


# UNGU TUKUMEMU



The New Testament in the Imbo Ungu Language of Papua New  
Guinea

**UNGU TUKUMEMU  
The New Testament in the Imbo Ungu Language of Papua New  
Guinea  
Nupela Testamen long tokples Imbo Ungu long Niugini**

copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

8e236e4f-bf7f-5fe1-a0ea-4f115d5cbf7e

## Contents

FRT . . . . .	1
Matyu . . . . .	2
Mak . . . . .	58
Luk . . . . .	91
Jon . . . . .	148
Aposel . . . . .	188
Rom . . . . .	240
1 Korin . . . . .	267
2 Korin . . . . .	290
Galesia . . . . .	308
Efesus . . . . .	317
Filipai . . . . .	326
Kolosi . . . . .	332
1 Tesalonaika . . . . .	338
2 Tesalonaika . . . . .	343
1 Timoti . . . . .	346
2 Timoti . . . . .	355
Taitus . . . . .	361
Filemon . . . . .	365
Hibru . . . . .	367
Jems . . . . .	387
1 Pita . . . . .	394
2 Pita . . . . .	402
1 Jon . . . . .	407
2 Jon . . . . .	413
3 Jon . . . . .	414
Jut . . . . .	415
Nimbe Para Tilimu . . . . .	418
Read the New Testament . .	444

**Gotenni Lino Kinye Opa  
Peamili Nimu  
UNGU TUKUMEMU**

**The New Testament in the  
Imbo Ungu Language of  
Papua New Guinea**

**Nupela Testamen long  
tokples Imbo Ungu long  
Niugini**

*Gotenni Lino Kinye Opa Peamili Nimu  
Ungu Tuknemu*

The New Testament in the Imbo Ungu  
language of Papua New Guinea  
[imo]

Translation by Wycliffe Bible Translators

© 1997, Bible League International

Print publication, 1997 by Bible League  
International

Web version  
2014, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>  
[www.ScriptureEarth.org](http://www.ScriptureEarth.org)

This translation is made available to you  
under the terms of the Creative Commons  
license (Attribution-Noncommercial-No  
Derivative Works).

<http://creativecommons.org/licenses/by-nc-nd/3.0>

**Your are free to share** – to copy, dis-  
tribute and transmit the text under the  
following conditions:

- **Attribution.** You must attribute the  
work to *Wycliffe Bible Translators* (but  
not in any way that suggests that they  
endorse you or your use of the work).
- **Noncommercial.** You may not use this  
work for commercial purposes.
- **No Derivative Works.** You may not alter,  
transform, or build upon this work.
- **In addition,** you have permission to  
port the text to different file formats, as  
long as you don't change any of the text  
or punctuation of the Bible.

**Notice** – For any reuse or distribution, you  
must make clear to others the license terms  
of this work.

**Tok Orait**

Dispela Buk Baibel i kam wantaim tok orait  
na lo bilong Creative Commons Attribution-  
Noncommercial-No Derivative Works li-  
cense. Em i tok olsem **yu ken givim kopi  
long narepela manmeri**. Yu ken wokim  
kopi na givim long husat i laikim. Tasol,  
yu mas tok klia dispela samting i kam long  
<http://tokplesbaibel.org>. Yu no ken kisim  
mani na salim dispela. **Yu mas givim nat-  
ing**. Na tu, **yu no ken senism Tok**.

Ol piksa i kam wantim ol Baibel na narapela  
buk i stap long dispela sait i gat tok orait  
long usim wantaim dispela samting tasol.  
Sapos yu laik narapela tok orait, yu mas  
askim husat i papa bilong copyright long  
dispela ol piksa.

Sapos yu laik strem samting i no orait  
long dispela tok orait, strem tok, salim Buk  
Baibel, o tainim Tok bilong God long nupela  
tok ples, **yu ken askim mipela**.

Olgeta tok orait na lo long tok ples English  
i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim  
mipela**.

**I TUKUNDOL TEMOMANGA  
IMBIMA**

Imbima:[tab]Gomo

## Gotenga Ungu Tukumemu Matyu Matyuni Ungu Torumumunga Ungu Pulu Mare

Matyu yuni i ungu tukumemu topa panjirumu. Yunge imbi te Levi. Yu oi Rom gavman kou takis lili iyemu molopili, Jisasini yu lombili owi nimuna Matyuni Jisasinga kitipi kanoli iye molorumu. Goteni Israel imbomando eno nokopa kondombalo iye te lipo mundumbo oi nimbe panjipe kanopa ltimu iye Kraist akumu Jisas ningolio Israel imbomani Jisas ipuki tingeindo i ungu nimbe panjirumu. Akumunga, profetemani oi ningi panjiringi ungu awinima Jisas ara tirimu nimbelie topa panjirumu. Jisasini ungu mane tirimu ungu awili mare i tepa: Sapta 5-7 pali, Sapta 10 pali, Sapta 13 pali, Sapta 18 pali, Sapta 24-25 pali.

I ungu kambu torono wali, nu Jisas Kraistini nokopa kondopili ipuki tirino mele Goteni tepa enge tipelie olando pupili nipili.

### *Jisas maina orumu ungu*

<sup>1</sup> Jisas Kraist Devitinga lapuna wendo orumu. Devit yu Abrahamenga lapuna wendo orumu. Jisas Kraistingu kolepale-manga imbima i tepa:

<sup>2</sup> Abrahameni Aisak merimu; Aisakeni Jekop merimu; Jekoponi Juda kinye yunge angenupilima merimu;

<sup>3</sup> Judani Peres kinye Sera kinye merimu, aku iye talonga anumu Temar; Peresini Hesron merimu; Hesrononi Ram merimu;

<sup>4</sup> Ramoni Aminadap merimu; Ami-nadapeni Nason merimu, Nasononi Salmon merimu,

<sup>5</sup> Salmononi Boas merimu, Boas yunge anumu Rahap; Boasini Obet merimu, Obet yunge anumu Rut; Obeteni Jesi merimu;

<sup>6</sup> Jesini iye nomi king Devit merimu. Devitini Solomon merimu. Solomononga anumu oi Urianga ambomu molorumu.

<sup>7</sup> Solomononi Rehoboam merimu; Rehoboamoni Abiya merimu; Abiyani Asa merimu;

<sup>8</sup> Asani Jehosafat merimu; Jehosafateni Jorim merimu; Jorimoni Usia merimu;

<sup>9</sup> Usiani Jotam merimu; Jotamoni Ahas merimu; Ahasini Hesekia merimu;

<sup>10</sup> Hesekiani Manase merimu Manaseni Emon merimu. Emononi Josaia merimu;

<sup>11</sup> Josaiani Jekonia kinye yunge angenupilima merimu. Jekonia kinye angenupili kinye molangei opa pule imbomani Israel imboma kinye ongo opa tekolio Israel imbo awini ka tiko Babilon kombundo meko puringi.

<sup>12</sup> Ka tiko meko puringi wali pele Jekonian Sealtiel merimu; Sealtieleni Serubabel merimu;

<sup>13</sup> Serubabeleni Apium merimu; Apium Eliakim merimu; Eliakimuni Asor merimu;

<sup>14</sup> Asorenii Sadok merimu; Sadokeni Akim merimu; Akimuni Eliut merimu;

<sup>15</sup> Eliutini Elieser merimu; Elieserani Matan merimu; Mataneni Jekop merimu;

<sup>16</sup> Jekoponi Josep merimu. Josep Maria omunu. Joseponi Maria oi naa lipili Maria yu bakulu olona mondopa molorumu. Pele ambo iye talo moloringili kinye Mariani Jisas merimu. Goteni eno nokopa kondombalo iye nomi te lipo mundumbo oi nimbe kanopa ltimu iyemu Jisas aku iyemu omnia molorumu. Aku tepa yunge imbi te Kraist ningi.

<sup>17</sup> Abrahameni yandoko yandoko meliko ongo King Devit meringi aku anda kolepale 14 moloringi. Devitini pulu polopale yandoko yandoko meliko ongo Israel imboma opa pule imbomani ka tiko Babilondo meko puringi aku anda kolepale 14 moloringi. Babilon ka tiko meko puringi wali yandoko yandoko meliko ongo iye nomi Kraist merimu aku anda kolepale 14 moloringi.

### *Mariani Jisas Kraist merimu*

<sup>18</sup> Jisas Kraist, yu meringi temanemu i tepa: Yunge anumu Marianga pulu lerimu imbomani Maria Joseponi lipili ningi kanoko ltenderingi nalo oi Josep peya tendekuna naa peangili Mini Kake Telimuni Maria yunge olona bakulu mondondoromu. Maria bakulu olo mongo torumuna kanoringi.

<sup>19</sup> Aku wali yunge alanggu iye Josep yu iye tumbi nilimu molorumu kala Maria bakulu meremo ningi ungu pilipelite Maria mai naa kolopili nimbe imbo awini molangei yu temo mele nimbo para naa tipo yu yunu molombalo kinye kiyengo nimbo we kamukumu puwi nimbo konopu lerimu.

<sup>20</sup> Josep aku tepa konopu lipe mundupe molopili Awilimunga ensel teni Josep uru kumbu tipelie nimbei, ‘Josep, iye nomi king Devitini kalopa ltimu iyemu, Mini Kake Telimuni Maria ulu te terimu kala yu bakulu olona mondoromo kani yu linindo pipili naa kolko liwi.

<sup>21</sup> Yu ungulu kanopa limbelo. Aku unggulumuni yunge imboma enonga konopuna ulu pulu keri teremelema pepili molkolio mindili nonge nimbe eno lipe tapondopa, mindili nongei aulkena wendo lipe, yu kinye peya molko kondonge aulkena lipe mondombalo kani yu imbi tiko Jisas niwu," nimu.

<sup>22</sup> Aku tepa wendo orumu ulumanga pali koro oi Gotenga nimbe munduli unguma imboma nimbe para tirimu iye profet teni ulu mare pele wendo ombalo oi nimu mele muli torumu. Akumu i tepa:

<sup>23</sup> Pileio. Ambo wenepo te iyemu kinye kopu naa telimuni bakulu olona mondopalie ungulu te membalo. Yunge imbi leko Emanuel ningi, (*Ais 7:14*)

nimu. I imbimunga ungu pulumu Gote lino kinye moromo.

<sup>24</sup> Josep uru pepa makilipelie Awilimunga enselemani nimu mele pilipe lipelie ambomo Itimu.

<sup>25</sup> Nalo yu bakulumu oi naa mepili tendekuna naa peambilu nimu. Pele Mariani ungulu te merimu kinye Josep yuni yunge imbi tipelie Jisas nimu.

## 2

<sup>1</sup> Herot kombu Judia distrik imbomanga iye nomi king molorumu wali Betlehem nimbe kombu taun te lerimu akuna Mariani Jisas merimu. Aku walimanga ena oromondo kombu kandiyema lipe manjili peli iye mare moloringima kombu awili Jerusalem ongolio waliko pilko ningei,

<sup>2</sup> "Juda imbomanga iye nomi king molombalo ungulu meringimu tena moromoya? Lino ena oromondo kombuna molopolio iye te iye nomi king molombalo meringimu lipe ondoli kombukandiye te pulu polopa wendo ombo angilimona kanopolio, yu kapi nimbo imbi lipo ola mundumilindo oromolo," ningi.

<sup>3</sup> Iye nomi king Herot i ungumu pilipelie iye te yu kolo wangopa king molombalo lepamo nimbe pilipelie yu mini lterimu. Jerusalem imboma pali konopu awini leringi.

<sup>4</sup> Kano wali yuni Juda imbomanga Gote popo tondoringi iye awilima pali kinye Gotenga ungu manemanga puluma pilko mane tiringi iyema wayendo tukundo waio nimbelie eno walipe pilipelie nimbei, "Goteni eno nokopa kondombalo iye te lipo mundumbo nimbe kanopa Itimu iye nomi Kraist te kombuna mengeya?" nimu.

<sup>5</sup> Enoni yundo ningei, "Kombu Judia tukundo Betlehem taunona yu menge. Gotenga nimbe munduli ungu nili iye profet teni pele aku tepa wendo ombalomundo

oi nimbe buk torumu akuna moromo kanomu. Yuni nimbei,

<sup>6</sup> Betlehem, kombu Juda ltemo kombu te, yu kombu Juda tukundo kombu awilimanga yu kombu mainye te molo. Yunge tukundo iye nomi awili te wendo ombalo, akumuni nanga Israel imbomanga sipsip tapu iyemu molopa eno nokombalo, (*Mai 5:2*) nimu kanomu," ningi.

<sup>7</sup> Kano wali imbo lupema naa kanoko naa pilko molangei Heroten'i lipe manjili peli iyema waio nimbe kombu kandiyemu pulu polopa wendo ombo angilerimu walimu walipe pilerimu wali, yundo ningi tiringi kinye

<sup>8</sup> pilipelie enondo nimbei, "Eno Betlehem pungo ungulamu wamongo koro paio! Kanoko ltendekolio yando ongo na ningi tieio. Nani kape yu ombo kapi nimbo imbi lipo ola mundumbo," nimu.

<sup>9</sup> Kingimuni aku tepa nimu ungu pilkolio eno kelko pungo kano purungi. Kano kinye ena oromondo kombuna molkolio kombukandiye kanoringimu eno puringina kumbe lepa pumbei pumbelie ungulamu molorumu ulke tulepena pumbe ola angilerimu.

<sup>10</sup> Enoni kombukandiyemu kanokolio paa tono koloringi.

<sup>11</sup> Ulkena tukundo pungolio ungulamu kinye anumu Maria kinye moloringili pungo kanoko ltenderingi. Kanokolio ungulamu kumbekerena komongo toko pondoko mai kanokolio yu kapi ningi imbi liko ola munduringi. Mundukolio eno wale penga meko oringima apiko mele pengama wendo liko yu tiringi. Kou gol kinye, paura karomele kinye mune toli paura te kinye, kopongo wel mune toli te kinye, aku melema yu tiringi.

<sup>12</sup> Kano kinye Goteni eno uru kumbu tipelie enondo nimbei, eno Herot oromondo naa paio, molo nimu kinye pilkolio eno aulke tengen lupe ongolio ulkendo purungi.

*Josep kinye ungulu anungolo kinye Isip kombuna purungi*

<sup>13</sup> Kano kinye lipe manjili peli iyema kelko purungi wali Awilimunga ensel teni Josep uru kumbu tipelie nimbei, "Iye nomi king Heroten'i yunge ami iyemando ungulamu koroko toko kondopao nimbei temeo kani nu ola molkolio ungulamu anungolo liko meko kombu Isipindo kowa pungo molopao. Altopo nani yando waio nimbo wali wangei," nimu.

<sup>14</sup> Aku nimu ungu pilipelie Josep makilipelie ipu leli anungolo talo lipe mepa Isipindo purumu.

<sup>15</sup> Herot kolombalo kinye kelepo ulkendo pumolo ningi oi Isip anjo moloringi. Aku ulu teringimu Gotenga nimbe munduli ungu altopa tembaloma imboma nimbe tirimi iye profet teni ulu te pele wendo omba oi nimu mele muli torumu. Akumu i tepe: Goteni nimbei, Nanga ungulumundo kombu Isip tiye kolko wendo owi niu, (Hos 11:1)

nimu.

*King Heroteni unguluma toko kondangei nimbe iyema lipe mundurumu*

<sup>16</sup> Kano wali anumu lapa talo Jisas peya Isip pungo molangei, lipe manjili peli iyemani Herot yu kili tiringi Herot yuni pilipelie mumindili paa awili tepa kolorumu. Mumindili kolopalie ami iye maredo nimbei, "Bettlehem taun kinye Betlehem nondopa itemo kombuma kinye kanomanga pungo poinye talo omba puli unguluma kinye poinye talo naa pora nili unguluma kinye koroko toko kondopao!" nimu. Kombukandiye kanoko lipe manjili peli iyemani kombukandiyemu pulu polopa wendo omba angilerimu walimu yundo ningi tiringi mele pilipelie poinye aku tepe peli unguluma topa kondombaindo nimu.

<sup>17</sup> Aku tepe terimumunga koro oi Gotenga iye profet Jeremaiani ulu te pele wendo ombalo nimbe nimu mele wendo orumu.

<sup>18</sup> Yuni nimbei,  
Eno kombu Rama tuku ungu te pileringi, kola tiringi pilko, imbo koromele kinye kola teremele mele kola aku teko teringina pileringi. Ambo Reseleni yunge bakulumanga kola terimu. Yu konopu u nipili ningolio tiringi nalo yunge bakuluma naa moloringina yu kondo kolopa kau molorumu, (Jer 31:15) nimbe Jeremaiani oi aku nimu.

*Josep kinye ungulu anungolo kinye Israel yando orangi*

<sup>19</sup> Altopa Herot kolorumu kinye Awilimunga ensel teni Josep Isip molopili uru kumbu tipelie nimbei,

<sup>20</sup> "Ungulumu tongei tengen imboma koloringi kani ola molko anumu malo talo liko meko kombu Israelendo kelko puwi," nimu.

<sup>21</sup> Aku ungu pilipelie yu ola molopa anumu malo talo lipo mepa Israelendo prumu.

<sup>22</sup> Nalo Arkelaus yunge lapa Herot kolo wangopa iye nomi kingimu molopa kombu Judia distrik nokorumu pilipelie Josep yu kanona altopa pumbeindo pipili kolorumu. Kano wali Goteni uru kumbu tipelie yundo lepi lepi torumu kinye yu kelepa kombu Galili distrik pumbe,

<sup>23</sup> akuna lerimu Nasaret taunona pumbe molorumu kala Gotenga nimbe munduli ungu imboma ningi tiringi profet iyemani Jisas kinye ulu te altopa wendo ombalo oi ningi mele paa wendo orumu. Enoni ningei,

Imbomani Yu Nasaret taun iye te ningi, ningi.

### 3

*Jon imbo no ltindilmuni ungu nimbe tirimu*

<sup>1</sup> Jisas Nasaret taunona we molopili Imbo No Ltindili Jon omba kombu Judia distrik tukundo imbo naa peli kombuna ungu nimbe tipelie nimbei,

<sup>2</sup> "Gote iye nomi kingimu molombalo waimu nondopa wendo ombai teremo kani enonga ulu pulu keri tiringi konopuna peremoma tiye kolko konopu topele taio," nimu.

<sup>3</sup> Kano iyemu oi naa molopili paa koro oi Gotenga profet iye Aisaiani ungu te nimbe tipe bukuna torumu. Kano ungumu i tepe, Imbo naa peli kombuna imbo tengen kerena ungu te nimbei, "Awilimu ombalo aulkemu teko wamoko tendaio. Yu ombalo aulke keloma teko tumbi tieio," nimo. (Ais 40:11)

Aisaiani Jononi paa altopa temballo mele oiaku tepe nimbe panjipe buk torumu.

<sup>4</sup> Jon yu kongi kamelenga indini teli wale te pakopa, kongi kao kangimuni teli kako te topalie, kuli komboro kinye pilimo mulu kinye aku langi talo kau nomba molorumu.

<sup>5</sup> Kano kinye kombu awili Jerusalem imboma kinye Jerusalem lerimu kombu Judia distrik pali imboma kinye kombu Jordan pali imboma kinye Jon molorumuna purungi.

<sup>6</sup> No Jordan tukundo pungolio enoni ulu pulu keri tiringima ningi para tiringi kinye yuni eno no ltindirimu.

<sup>7</sup> Yuni Juda imbomanga iye awili Farisima kinye Sadyusima kinye awini no lingendo orangi ulu kanopalie, eno iri topalie nimbei, "Kolo topa imboma tepa kenjili waimbemunga waloma, Gote mumindili kolombalo walimunga narini eno kowa paio nimu kinye eno Goteni naa tepa kenjipili ningi no liemili ningi oromeleya?

<sup>8</sup> Eno tumbi tiko molko, ulu pengama kau teko molonge kinye eno ulu pulu keri teringima paimbo tiye kolko konopu topele tonge mele mona lembalo.

<sup>9</sup> Lino anda kolepa Abrahameni kalopa Itiuma moromolomunga imbo pengama moromolo ningi aku konopu naa leaio.

Nani eno nimbo tiro, Goteni i kou mongomando Abrahameni kalopa ltimu imboma apuwe leangei nilkanje kou mongoma Abrahameni kalopa ltimu imboma molemala i nio.

<sup>10</sup> Unjo peke tombai loimu Goteni oi unjo puluna loi nokopa moromo. Unjo mongo topa tukume naa pembalo unjoma yuni peke topalie tipena kalombalo.

<sup>11</sup> Nani ulu pulu kerima tiye kolko konopu topele toromele imboma paimbo imbo nomuni no ltindiro. Nalo eno imbo no ltindiro mele na akilio lepa ombalo iyemuni Gotenga Mini Kake Telimuni kinye tipemuni kinye eno no mele ltindimbelaone linge. I na akilio lepa ombalo iyemu yunge engemu paa olandopa, nanga engemu paa mandopa. Na yu kinye manda molo. Imbo awilimanga kongono keri teli kendemande imbomani paimbo enonga awilimanga kongono keri tendengeindo kimbo tu wendo ltindirimele nalo na akilio lepa ombalo iyemunga kimbo tu wendo lindimbo kano kongonomu paa olandopa mele nani tendembo manda naa telka.

<sup>12</sup> Yuni yunge rais wit moke teli pokomu ambolopalie yunge rais wit mongo kinye rais wit kangi kinye moke tembaido moromo. Yunge rais wit moke teli polomu tepe wamopa tembaido rais wit pali wendo liembo nimbe moke tepalie mongoma lipe rais wit noirimo mingina lepili nimbe noiimbeindo mingi topa, pele kangima lipe makutopa tipena polo tepe tipeni nomba pepa kau purumona kalombalo,” nimu.

#### *Jononi Jisas no ltindirimu*

<sup>13</sup> Jononi imboma no ltindipe molopili Jisas kombu Galili distrik tiye kolopalie, Jononi yu no lindipili nimbe Jon no Jordan molorumuna yu purumu.

<sup>14</sup> Orumu kinye Jononi nimbei, “Aku paa molo. Nani nu no ambe tepo lindembo ningoy ninoya? Nuni na no lindilinanje penga,” nimu.

<sup>15</sup> Nalo Jisasini topondopa nimbei, “Molo. Goteni nimo uluma pali ara tiembili kani nio mele tewi,” nimu. Kano wali Jononi manda nimbe yu no ltindirimu.

<sup>16</sup> Jisas no lipe pora tipelie no kelona ola orumu. Wendo ombai orumu wali mulumu kengea lepa anjo yando purumu, Gotenga Minimu, kera imili mele, mainye ombo Jisas molorumuna pumbe kangina ola molorumuna kanorumu.

<sup>17</sup> Kano kinye muluna ola ungu te wendo ombalie, “I nanga konopu mondoro Ungulamu. Yu kinye konopu noiro,” nimu.

#### **4**

*Sataneni Jisas yunge ungu tengen tirimunjebelie manda manjipe kanorumu*

<sup>1</sup> Jisas no ltimu kinye Gotenga Mini Kake Telimu yu kinye ombo molopalie nimumuni, Minimu yuni kuromanga nomi Sataneni yu manda manjipe kanopili nimbe Jisas imbo naa peli kombuna meli purumu.

<sup>2</sup> Akuna Jisas tangoli wali 40 kinye ipu leli wali 40 peya langi naa noli we molopa perimu kinye yu engele kolorumu.

<sup>3</sup> Aku wali manda manjipe kanoli Satyan ombalie yundo nimbei, “Paimbo nu Gotenga Malo lemo i kouma bret kaloli apuwe lepili niwi,” nimu.

<sup>4</sup> Nalo yuni topondopa nimbei “Gotenga bukumuni nimbei, Langimani kau imboma koinjo mololi ulu pulumu naa tirimo. Goteni ungu nimoma pali pilko liko teko molonge kinye koinjo mololi ulu pulumu linge, (Lo 8:3) nimbe moromo,” nimu.

<sup>5</sup> Kano wali Sataneni Jisas lipe kombu awili Jerusalem, akumundo kombu awili kake teli nilimu, akuna mepa pumbe Gote popo toko kaloringi ulke tempelena mepa, paa ola tulepena pumbe anjipelie,

<sup>6</sup> yundo nimbei, “Paimbo nu Gotenga Malo lemo nu lipe tapondombalo kani po ningoy mainye puwi! Gotenga bukumuni nimbei, Goteni yunge enselemani nu ongo nokangei nimbelo. Enoni nu kou teni kape naa topili ningoy na kangulko liko enonga ki polona liko meko punge, (Sng 9:11-12)

nimbe moromo kanomu. Aku tepe nimu ungu pilkolio aku teko tewi,” nimu.

<sup>7</sup> Jisasini yundo nimbei, “Gotenga imbormando ungu te peya nimbe moromola. Akumu i tepe, Gote enonga Awilimuni tembo nimo mele paimbo nimonje molo kolo toromonje kanamili ningoy enoni yu manda manjiko naa teangei, (Lo 6:16)

nimbe moromo,” nimu.

<sup>8</sup> Altopa Sataneni yu lipe mulu kembo te paa olandopa polarumuna ola mepa pumbe anjipelie, yu mai kombuma pali kinye kombumanga mele pengama peya lipe ondopalie

<sup>9</sup> yundo nimbei, “Nu nanga kumbekerena komongo toko pondoko mainye molko na popo toko nanga imbi liko ola mundunio lemo i nu kanokono mai kombuna Itemo melema pali nu timbo,” nimu.

<sup>10</sup> Kano kinye Jisasini yundo nimbei, “Satan, nu wendo pa! Gotenga bukumuni nimbei,

Gote enonga Awilimuni kau kapi ningoy imbi liko ola munduko, yunge kongonomu kau tendeko molangei, (Lo 6:13)

nimbe moromo" nimu.

<sup>11</sup> Kano wali Satan Jisas tiye kolopa yu purumu. Purumu kinye mulu kombuna enselema ongo Jisas taporingi.

*Jisasini Galili kombuna yunge kongonomu pulu polorumu*

<sup>12</sup> Kano kinye Imbo No Ltindili Jon katiko ka ulkena panjiringi ungu pilipelie Jisas kelepa kombu Galili distrikindo yando ombo

<sup>13</sup> Nasaret taunona ombalie, pele aku taunomu tiye kolopa Kaperneam taun, nomu Galili kulendo lerimu, akuna pumbe kinye i kombumu nanga molombo kamukumu kombumu lepili nimbe akuna molorumu. Kaperneam iye Sebulun kinye Naptali taloni kalko ltingili imboma oi moloringi kombuna lerimu.

<sup>14</sup> Kaperneam taunona pumbe molorumungu koro oi Gotenga profet iye Aisaiani ulu te pele wendo ombalo oi nimu mele kamukumu wendo orumu. Aisaiani nimbei,

<sup>15</sup> Sebulunoni kalopa ltimu imboma peremele kombumu kinye, Naptalini kalopa ltimu imboma peremele kombumu kinye, nomu kutana purumo aulkemu aku no Jordan kulendo lemo kombumu kinye, kombu Galili wikondo imbo lupe awini moromele kombumu kinye,aku kombumanga moromele imboma paa tumbulu tolina moromele.

<sup>16</sup> Kano imbo paa tumbulu tolina moromelema pa enge nili paa awili tepe teli te kanoringi. Kololi ulu pulumu aku topa tumbulu tondoromo kombuna peremele imbomanga kombuna pa tenderemo, (*Ais 9:1-2*) nimu.

*Jisasini iye kite alako torumuna yu lombileringi*

<sup>17</sup> Kaperneam ombo molorumu walimunga Jisasini imboma pulu polopa unguma nimbe tipelie nimbei, "Gote iye nomi kingimu molopa nokombalo waimu nondopa wendo ombai teremo kani Gote yuni nokombalo imbomanga talapena tukundo molamili ningi ulu pulu keru teremelema tiye kolko konopu topele taio," nimu.

<sup>18</sup> Jisas Nomu Galili kulendona andopalie angenungolo talo kanorumu. Aku talo Saimon kinye angenu Andru talo. Oma lili wale mune te nomuna toko munduko moloringilina kanorumu. Pele Saimononga imbi te Pita ningi. Oma ltingili akumu elonga kou kongono teringili.

<sup>19</sup> Aku ulu teko moloringili ulu kanopalie nimbei, "Na lombili wangili. Oma lingilindo oma lili wale mune te liko nona

mainye mundurumbele kinye omama walena ombo peremo mele, akilio nanga kongonomu tengilindo nanga ungumu pilko ningi tilko andongele kinye imboma nanga talapena tukundo ongo molangei nimbo elo na lombili walio nio," nimu.

<sup>20</sup> Aku nimu ungu pilkololio tamburumbu elonga oma lili wale munema tiye kolkolio Jisas lombili puringili.

<sup>21</sup> Kano wali yu alaye kolte welto pumbelie angenungolo talo lupe kanorumu. Aku talo Sebedi malo Jems kinye Jems angenu Jon talo. Lapa Sebedi kinye enonga nona andoli sipina tukundo oma lili wale munema toko tambulko moloringina kanopalie elo alako topalie, na lombili walio nimu.

<sup>22</sup> Aku nimu ungu pilkololio elonga lapa Sebedi kinye nona andoli sipimu kinye tamburumbu tiye kolkolio Jisas yu lombili puringili.

*Jisasini ungu nimbe tipe imbo awini tega koinjo ltimu*

<sup>23</sup> Kano kinye Jisas kombu Galili distrik tukundo kombumanga pali andopa, imboma maku toko Gotenga ungumu pileringi ulkemanga imboma ungu mane tipe, Gote nondopa iye nomi kingimu molopa nokombalo mele ungu nimbe tipe, imbo kuro lupe lupe torumuma kinye kangina ulu awini terimuma kinye tega koinjo ltimu.

<sup>24</sup> Yu terimu mele temanemu kombu Siria provins kombumanga pali anjo anjo purumuna pilkollio enonga imbo kuro lupe lupe torumu imboma kinye, mindili lupe lupe nongo moloringi imboma kinye, imbomanga konopuna kuro molko amboloringi imboma kinye, topa mundupe pungu pungu tipe kuro torumu imboma kinye, kimbo ki kulorumu imboma kinye, yu molorumuna meko oringi wali yuni eno tega koinjo ltimu.

<sup>25</sup> Imbo paa awini yu lombili puringi. Kombu Galili distrikimboma kinye, Kombu Awili Dekapolis ningi kombu imboma kinye, kombu Judia distrik lerimu kombu awili Jerusalem imboma kinye, kombu Judia tukundo lerimu we kombumanga moloringi imboma kinye, no Jordan nekondo kombumanga imboma kinye, paa awini yu lombili puringi.

## 5

*Jisasini mulu kembona molopalie imboma mane tipe nimu*

<sup>1</sup> Jisasini imbo awini maku toko yu lombili puringima kanopalie mulu kembona ola pumbe molorumu kinye yu lombili andolima yu molorumuna oringi.

<sup>2</sup> Kano kinye yuni eno ungu mane tipelie nimbei,

<sup>3</sup> "Goteni lino imbo keloma tapopili konopu ltemele imboma, Gote enonga iye nomi kingimu molopa eno nokoromomungu eno malo.

<sup>4</sup> Imbo kola teko konopu keri pepili moromele imboma, Goteni eno konopu penga pepa toimbo topili nimbelomunga eno malo.

<sup>5</sup> Taka liko moromele imboma, mai kombuna pali Goteni eno timbelona lingemunga eno malo.

<sup>6</sup> Goteni teaio nimo ulu tumbi nilima teneindo engele mele kolko no wali mele kolko moromele imboma, eno Goteni manda tendembalomunga eno malo.

<sup>7</sup> Imbo lupema kondo koromele imboma, Goteni eno kondo kolombalomunga eno malo.

<sup>8</sup> Konopu kake tepili moromele imboma, Gote kanongemunga eno malo.

<sup>9</sup> Opa pulema konopu tendekuna pupili molangei nimele imboma, Goteni eno nanga bakuluma nimbelomunga eno malo.

<sup>10</sup> Goteni teaio nimo ulu tumbi nilima teko moromelemunga imbo lupemani eno mindili tirimele imboma, Gote enonga iye nomi kingimu molombalomunga eno malo.

<sup>11</sup> Na ipuki tirimele imboma, eno nanga imboma moromelemunga we imbomaní eno ungu taka tondoko mindili tiko, ungu keri lupe lupema enonga umbulkondo kolo toko nindinge wali, eno malo.

<sup>12</sup> Imbomani eno aku teko ulu teremelemunga eno mulu kombuna punge wali, kanona Goteni ki wamopa eno mele kipunge mele timbelo kani konopu paa awili teko tiko konopu penga pepili molaio. Imbomani kinye eno mindili tirimele mele aku teko eno naa molangei koro oi Gotenga nimbe munduli ungu nili iye profetema we imbomani eno kape mindili tiringi," nimu.

*Eno api kinye pa kinye aku teko mele moromele nimu*

<sup>13</sup> "Eno mai kombuna imbomanga api kutu mele moromele. Akumu mele penga nalo yu tingo naa tembalu kinye yu kelepa tingo tepili nimbo ulu te manda temoloya? Yu kongono tembalu enge te altopa naa pembalomunga we toko ltemolo wali imbomani andokolio kimboni kambulunge.

<sup>14</sup> Eno mai kombuna imbomanga pa tendelima moromele. Kombu awili kembona ola lembalomu manda lopeke naa tembalu.

<sup>15</sup> Imbomani tipe lam kandokolio mingina tuku naa panjirimele. Melema kanangei, ulke tukundo pa tepili ningi polo tengen ola noirimele.

<sup>16</sup> Aku tepa mele linoni ulu pengama teremolo ulumuni i mai kombuna pa mele tenderemonia imbomani kanokolio linonga

mulu kombuna moromo Lapa kapi nengei ningo ulu pengama teaio," nimu.

*Jisasini Gotenga ungu manemundo nimu*

<sup>17</sup> "Nani Gotenga ungu manema Mosesini bukuna torumu unguma kinye Gotenga profet iyemani bukuna toringi unguma kinye mainye pupili nimbe oromo konopu naa leao! Nani kano unguma kamukumu mainye pupili nimbo naa oro. Aku ungumanga ungu pulu peremoma kamukumu wendo opili nimbo oro.

<sup>18</sup> Nani enondo paimbo nio. Mulu mai talo oi pora naa nipili Gotenga ungu manemanga ungu kelo kolte kape paa we mainye naa pumbelo. Ungu manemanga pali ungu awili kelomanga pali kongonoma waye wendo ombalo.

<sup>19</sup> Akumunga, imbo teni kano ungu manemanga ungu mane kelo te kape topa tangondopa, imbo lupema mane tipelie toko tangondangei nimbelo imbonu Gote iye nomi king molopa nokoromo kombuna yunge imbi paa mainye molombalo. Nalo imbo teni kano ungu manema pilipe lipe tene tipe molopa, imbo lupema mane timbelo imbonu Gote iye nomi king molopa nokoromo kombuna yunge imbi paa olandopa molombalo.

<sup>20</sup> Nani eno nimbo tiro. Farisima kinye Gotenga ungu manemanga puluma pilko mane tirimele iyema kinye enoni ulu tumbi nilima teremele ulumanga olandopa eno we imbomaní naa tene lemo, Gote iye nomi king molopa imbo nokoromo talapena tukundo eno paa naa pungo molonge," nimu.

*Jisasini ungu nimbe amenge teli ungumu nimu*

<sup>21</sup> "Koro oi Mosesini anda kolepalemando ungu mane te tirimumu eno pimele. Kano ungu manemu i tega, Eno imbona toko naa kondangei. Imbo topa kondombalo imbonu, kot pimele imbomani yu kot tendangei, (Kis 20:13)

nimu kanomu.

<sup>22</sup> Nalo kinye nani eno kano ungu manemanga ungu pulumu i nimbo timboi tero. Imbo teni yunge angenu kinye mumindili kolombalo imbonu kotena meko pungo kot tendenge. Imbo teni yunge angenundo nu kamakoya nimbelo imbonu kot awilina meko pungo kot tendenge. Imbo teni imbo tendo nu paa loi lelimu nimbelo imbonu tipe kombuna pumbelo.

<sup>23</sup> Aku ulu tene imbona mongo lingi kani nuni Goteni na kanopa penga pilipili ningi yunge melema tipena kaloli alta polona Gote popo toko kalko tinindo meko ongolio nu anganani nu kinye we mu-mindili te kolombalo pilkolio,

<sup>24</sup> nu Gote kalko tini melema Gote popo toko kaloli alta polona we lepili noikolio kelko anjo pungo angenando tendekuna molambili ninga amenge tekolio, kelko ongo nu Gote kaloni melema ongo yu kalko tieni.

<sup>25</sup> Nu kot tendembai tembalu imbonu kopu tepo molambili ulu te teambo ningolio welela tewi. Aku naa tenio lemo nu kot tendembalo imbonuni nunge kot pileli iyemu molombalona mepa pumbe timbelo. Pele kot pileli iyemuni nu ka ulke nokoli iyemu lipe timbelo, yuni nu ka ulkena panjimbelo.

<sup>26</sup> Nani nundo paimbo nimbo tiromu, nu ka ulkena wendo oni wali pundu tokolio kau wendo onio," nimu.

*Jisasini imboma wapu ulu keri nale naa taio nimu*

<sup>27</sup> "Oi Mosesini ungu mane te tirimumu eno pimele. Kano ungu manemu i tepe, Ambo iye pulima iye lupema kinye wapu ulu kerinale naa teko, iye ambo lilla ambo lupema kinye wapu langi naa nangei, (Kis 20:14)

nimu.

<sup>28</sup> Nalo kinye nani eno kano ungu manemunga ungu pulumu i nimboi tiro. Iye teni ambo te kanopalie yu peya kopu tepo pelembalanje penga konopu lemo lemo akumu konopu tukundo, ambomu kinye kamukumu wapu langi noromo.

<sup>29</sup> Nunge mongo imbondomuni melte kanokolio konopuna liemboa ninga pilko ulu pulu keri te tenio lemo aku mongomu akuko lteani. Nunge mongo angilepili nu tipe kombuna liko mundunge kinye manda naa tembalu kani kangimunga melte wendo liko ltekolio molko kondonio kinye manda.

<sup>30</sup> Nunge ki imbondomuni ulu pulu keri te tenio lemo aku kimu karu leko lteani. Nunge ki angilipili nu tipe kombuna liko mundunge kinye manda naa tembalu kani kangimunga melte wendo liko ltekolio molko kondonio kinye penga," nimu.

*Jisasini amboma makoroko wendo mundunge ulumando nimu*

<sup>31</sup> "Oi Mosesini ungu mane te tipelie nimbei, Iye teni yunge ambomundo kamukumu pupili nimbe makorombaindo ambomu kamukumu puwi nimbe pipia te topa ambomu tipelie yundo kamukumu puwi nimbe aku tepili, (Lo 24:1)

nimu.

<sup>32</sup> Nalo nani kinye eno nimboi tero. Iye puli ambo te iye te kinye wapu langi naa nopili topa yunge iyemuni yu makoropa kamukumu puwi nimo lemo aku ambomu altopa iye pumbelo wali, wapu ulu langi

noli ambomu molopili nimbe aku teremo ulumunga iyemu, yu pulu. Puwi nimbe makororomo ambomu pele iye teni yu limo kinye aku iyemu kape wapu ulu kerinale teremo," nimu.

*Jisasini we mi naa lewi nimu*

<sup>33</sup> "Koro oi Mosesini anda kolepalemando ungu mane te peya tirimumu eno pimele. Kano ungu manemu i tepe,

Paa tembo ningi, ningi panjiko mi lenge ungumu toko naa tangondangei. Awilimundo paa tembo ningi, ningi panjiko mi lenge mele paa aku teko teangei, (WKP 19:12; Nam 30:2)

nimu kanomu.

<sup>34</sup> Nalo kinye nani eno nimboi tero. Paimbo nimbo ningi pilengi ningi mele awili tenga imbi leko paa mi naa leangei. Mulu kombumu kape imbi leko mi naa leangei. Aku kombumu Gote molopa melema nokoromo kombumu kani aku ulu naa teangei.

<sup>35</sup> Mai kombumu kape imbi leko mi naa leangeila. Akumu Gote yunge kimbo mundurumo polomu. Jerusalem kape imbi naa leangei. Akumu iye nomi king paa awilimunga kombu awilimbu.

<sup>36</sup> Enonga pinyewe kape imbi leko mi naa leangei. Akumu pinyendi te kake tepili molo kilu lepili ningi ulu te manda naa tenio kani pinyewemu imbi leko mi naa leao.

<sup>37</sup> Ulu te paimbo tenio lemo tumbi tiko tembo niwi. Naa tenio lemo naa tembo niwi. Ulu kerimanga pali ulu pulumu peremo kuromuni amboromo imbomani kau ungu tule teko niliko pungo mi ltemele," nimu.

*Jisasini ulu kerima pundu naa taio nimu*

<sup>38</sup> "Oi Mosesini ungu mane te tirimumu eno pimele. Kano ungu manemu i tepe:

Imbo teni imbo tenga mongomu topa akumbelo kinye yunge mongomu toko akundeio. Imbo teni imbo tenga ungu topa langombalo kinye yunge ungu toko langondaio (Kis 21:24)

nimu.

<sup>39</sup> Nalo kinye nani eno i nimboi tero. Eno tepa kenjimbelo imbonu anjo ulure naa teko, we tepa kenjipili nengei. Imbo teni nunge kumbekere ekondonga larauwe tombalo kinye topele toko tekondonga kape larauwe tombai temo lemo topili tiye kolowi.

<sup>40</sup> Imbo teni nunge wale pakolimu liembo nimbe kot tendembai tembalu imbonu nunge wale tule pengamu kape peya we lipili niwi.

<sup>41</sup> Iye teni nu ambolopalie nuni na liko tapondoko mako tenga nanga melema mendani pambili nimbelo wali nuni anjiko mako tenga we tapoko mendewi.

<sup>42</sup> Melte tiwi nimbe konge tembalo imbormu konge tembalo melemu tiwi. Mele te pundi anjiko tiwi nimbelo imbomu molo naa niwi," nimu.

*Jisasini enonga opa pulema konopu mondangei nimu*

<sup>43</sup> "Oi Mosesini ungu mane te tirimumu eno pimele. Kano ungu manemu i tepa, Opa kalale iyemu konopu mondoko, opa pulemu kinye konopu keri leao, (WKP 19:18)

nimu kanomu.

<sup>44</sup> Nalo kinye nani eno i tepo nimbo tiro. Enoni enonga opa pulema kape konopu mondoko, eno teko kenjirimene imboma Goteni tepa kondopili ning Gote kinye enonga konge tendao.

<sup>45</sup> Enonga Lapa mulu kombuna moromomunga bakulumu molamili ning aku teko teangei. Yuni imbo keri pengama moromele naa topili nimo. Ulu tumbi nilima teremele imboma kape ulu tumbi nilima naa teremele imboma kape enonga waye lo opili nimo.

<sup>46</sup> Eno konopu mondoromele imboma kau konopu mondoromele kinye Goteni kanopa penga pilimbelya? Rom gavman kou takisi limele imbo kerima kape aku ulu teremele kala.

<sup>47</sup> Enoni enonga pulu ltemo imbomando kau molko kondao nimele kinye we imbomani teremele mele mainyendopa, enoni teremele mele olandopaya? Tawendo imbomani kape aku ulu teremele.

<sup>48</sup> Akumunga enonga Lapa mulu kombuna moromo iye paa tumbi nilimu moromo mele eno teko imbo tumbi nilima molaio," nimu.

## 6

*Jisasini imbo molo ltemoma tapangei nimu*

<sup>1</sup> Jisasini ungu mare nimbe molopalie ungu mare peya nimbei, "Imbomani lino imbo paa pengama. Uluma paa tepo kondoromolo ning kanangei ning imboma kanoko molangei enonga ulu pengama paa naa teao. Aku teko tengen lemo imbomani eno kapi ning. Kano kapi ninge unguma enonga ulu tengemanga pundi tolimu lingemunga enonga mulu kombuna moromo Lapamuni eno mele te naa timbelo.

<sup>2</sup> Enonga mulu kombuna moromo Lapamuni eno teko tengen lemo imboma melema naa timbelo kani enoni imbo koropa nolima kondo kolko lipo tapondamili ning kou mone te tingei wali temolo mele imbomani kanangei ning, ru ning eno teko mele te naa tieio. Topele mapele toli iyemani na imbomani kapi nengei ning imboma

maku toko Gotenga ungumu pileli ulke-manga kinye aulkemanga kinye we imbo awinimani mongoni kanangei ning imbo koropa nolima taporomele. Aku iyemani teremele mele enoni eno ulu naa teao. Nani eno paimbo nio. Aku teremelemunga eno imbomani kapi nimele unguma enonga ulu tengemanga pundi tolimu oi limele.

<sup>3</sup> Nalo enoni imbo koropa nolimu te taponge wali imbo kini tembalo ulu koya kini naa kanopili.

<sup>4</sup> Aku tekolio kondo kololi ulu tengemu lopeke tepe lepili. Ulu lopeke tepama karomo Lanieni eno pundi tombalo.

*Jisasini i teko Gote kinye konge teao nimu*

<sup>5</sup> Eno Gote kinye ungu ningeindo topele mapele toli iyemani Gote kinye ungu ning teremele mele eno ulu naa teao. Kano topele mapele toli iyemani na iye paa pengamu moro mele imbo awinimani mongoni kanoko na kapi nengei ning imbo maku toko Gotenga ungu pileli ulke-manga kinye aulkemanga kinye ulu pundi tolimu kinye ungu nimele. Nani enondo paa paimbo nimbo tiro. Aku ulu teremelemunga enonga mele pundi tolimu oi limele.

<sup>6</sup> Nalo eno Gote kinye ungu ningeindo enonga kiripina tukundo pungo nambu tikolio kano lopeke telo kombuna enonga mulu kombuna moromo Lapa naa karomele iyemu kinye ungu neio. Aku tengen kinye enonga mulu kombuna moromo Lapa lopeke teko teremele uluma karomomuni eno pundi tombalo.

<sup>7</sup> Na Gote kinye ungu nembo ningolio Israel talapemunga tawendo moromele imbomani enonga kuroma molo gote kolo tolimu kinye ungu ningeindo we ungu awini nimele mele eno teko naa teao. Aku imbomani na ungu awini nimbo kinye pilimbelyo ning eno teko nimele.

<sup>8</sup> Enonga mulu kombuna moromo Lapamu eno konge naa teangei eno molo ltemo melema yuni eno pilipe karomo kani eno imbomani teremele ulu naa teao.

<sup>9</sup> Eno Gote kinye ungu ningeindo i teko nengei,  
Mulu Kombu Ara Gote,  
imboma nunge imbi wengenderimu nengei.

<sup>10</sup> Mulu kombu nokorono mele mai kombu eno teko nokowi.

Mulu kombu ungu tengen peremo, mai kombu eno teko tengen pepili.

<sup>11</sup> Kinye lino kere tiko molowi.

<sup>12</sup> Imbomani lino teko kenjinge uluma tiye kolomolo mele,

Linonga ulu kerima liko ltendewi.

<sup>13</sup> Lino manda manjili uluma ombalo wali

tiye naa kolowi.

Iye kerimunga kina wendo liwi.

Nu linonga iye nomi penga pa telina morono.

Molorunu mele molko kau puruno.

I paa.

ningo aku teko Gote kinye nengei.

<sup>14</sup> Pileio. Imbomani eno teko kenjinge uluma enoni tiye kolonge lemo enonga mulu kombuna moromo Lapamuni enonga ulu pulu kerima mainye pupili nimbe tiye kolombalo.

<sup>15</sup> Nalo imbomani eno teko kenjinge uluma tiye naa kolonge lemo enonga mulu kombuna moromo Lapamuni enonga ulu pulu kerima tiye naa kolombalo," nimu.

#### *Jisasinilangiwalitemitoliusungumunimu*

<sup>16</sup> "Eno langi naa nongo mi toko we molonge ulu pulumu tengendeido topele mapele toli iyemani na nanu nimbo molambo nimele mele aku teko naa neio. Kano iyemani na langi naa nombindo mi topo moro mele imbomani kanangei ningi eno kumbekere teko enonga kumbekerema keri panjiko moromele. Nani eno paimbo nio. Kano iyemani aku teremelemunga imbomani eno kapi nimele unguma enonga teremele ulumunga pundu tolimu oi ltimele.

<sup>17-18</sup> Nalo eno langi naa nongo mi toko we molongeindo we imbomani na aku tepo tero ulu naa kanangei, Arani kau kanopili ningi we imbomani kanangei uluma naa teao. Aku tengenye enonga mulu kombuna moromo Lapa lopeke teko teremele uluma karomomuni eno mele te timbelo," nimu.

#### *Meleako memo noirimelena akuna konopu mondoromele*

<sup>19</sup> "Ya mai kombuna mele noirimelena urelo tepe molo lkurinia melemani ongo teko kenjiko, wapu lili iyema ongo melema wapu limele kani ya maina kamako molopo mele kamukumuma lipo noiemili ungu naa neio.

<sup>20</sup> Aku ulu naa tekolio mulu kombuna melema urelo naa tepe molo lkurinia melteni ombo tepe naa kenjipe, wapu lili iyema ongo wapu naa limele kani eno mulu kombuna pepungemunga mele kamukumuma altopo limoloma oi lepili nimele.

<sup>21</sup> Enonga noirimelena melema Itemo kombu akuna eno konopuna pilko konopu mondoko moromele kani mulu kombuna kau melema lepili ningi molaio," nimu.

#### *Mongomuni konopundo pa tenderemo*

<sup>22</sup> "Nunge mongomu nunge kangimunga tipe lam mele Itemo. Aku kani nunge

mongo penga angilimo lemo nu kangi pali pa tepili morono.

<sup>23</sup> Nalo nunge mongomu keri lembalo kinye nunge kangi pali tumbulu topili andonio. Aku wali nunge kangina pa teli pembalolu kolo wangopa tumbulu tombalo kinye akumu nu paa kamukumu tumbulu tombalo," nimu.

#### *Iye tendekumunga kongono tendani kau nimu*

<sup>24</sup> Imbo teni iye awili talonga kongono lipe popo tipe manda naa tendembalo. Iye awili te konopu keri panjipe, te konopu mondombalo. Molo aku naa temo lemo iye awili tengenye ungu nimbeloma paa konopu tipe pilipe lipe kongono nimbeloma enge nimbe tendepa, te konopu keri panjipe yunge ungu nimbeloma tui timbelo. Aku teko Imbomani Gotenga kongonomu kinye Kou Monemunga kongonomu kinye liko popo tiko manda naa tendenge.

#### *Imai kombu molko andonge ulumanga konopu awini naa leao*

<sup>25</sup> Akumunga nani eno tengenye mele nimbo tiembo. Kangindo molopo kondamili ningi konopu awini liko naa mundeo. Langi nongemunga kape no nongemunga kape wale pakoli pakongemunga kape akumanga konopu awini liko munduko naa molangei. Paimbo kere noromele nalo koinjo mololi ulumuaku ulumu olando Itemo. Wale pakolina konopu tirimele nalo kangimu yu kiyendomu.

<sup>26</sup> Kerama kanaio. Langi te panjikolio nowi Itemo wali liko meko ulkendo pungo noiko naa noromele nalo eno imbomanga mulu kombuna moromo Lapamuni kerama langi tirimo. Kerama maindo eno olando, konopuaku teko naa ltemeleya?

<sup>27</sup> Enonga imbo teni konopu awini lipe mundurumomuni oi naa kolopili yunge koinjo mololi ulumundo wai te winjipe limbelyoya? Manda naa limbelo.

<sup>28</sup> Eno pakonge melemanga konopu awini ambe telka liko mundurumeleya? Kondipe tindima maina oromo mele eno naa karomeleya? Kondipe tindimani kongono mindili nongo naa teko, wale pakoli te teko wamoko naa teremele

<sup>29</sup> nalo kondipe tindima moromele mele olando, iye nomi king Solomon wale pakoli pakopa au nimu mele mainyendo.

<sup>30</sup> Era timborimboma otilikondo poroko tipena karomelema Goteniaku tepe tindi toromomuni penga teremo Itemo eno Goteni lino manda nokbalonje ningi alaye kau ipuki tirimele imboma pakonge melemanga yuni manda lipe naa tapondombaloya? Eno paa lipe tapondombalo.

<sup>31</sup> Akumunga, esi, langi te tena lipo nomolonje, molo no tena kolopo nomolonje, molo wale pakoli tena lipo pakomolonje konopu awini leko naa molaio.

<sup>32</sup> Gotenga imboma naa molko tawendo moromele imbomani aku konopu ltemele nalo enonga mulu kombuna moromo Lamamuni eno yunge imbomanga mele molo ltemo kanopa moromo.

<sup>33</sup> Eno langi nongemanga kinye wale pakoli pakongemanga kinye konopu naa liko munduko, Gote iye nomi king molopa eno nokoromo uluma kinye yu kanopa kake teremo karomo ulu tumbi nilima kinye kumbe tundu mongo lipo mundemili konopu leko teaio. Aku tengen kinye yuni we melema kape eno timbelo.

<sup>34</sup> Yuni aku tembalo kani otli ambe tembonje ningi kinye konopu awini liko naa mundengei. Otili wendo ombalo ulumangaaku wali konopu liko manjing. Wali tendekumumunga umbuni wendo oromoma neya aku wali kau pembalo.

## 7

### *Enoni imbomare kanoko moke naa teaio nimu*

<sup>1-2</sup> Jisasini ungu mare nimbe molopalie ungu mare peya nimbei, "Enoni imboma teremele uluma moke tengen kinye enoni teremele mele aku tepe Goteni eno moke tembalo. Imbomani teremele ulu enoni kanoko moke tekolio teko kenjirimele. Teremele mele Goteni kanopa keri pilipili ningi mele Goteni aku tepe eno kinye moke tembalo. Aku tembalo kani Goteni lino ulu teremoloma naa moke tepili ningi enoni imboma teremele uluma naa kanoko moke teaio.

<sup>3</sup> Nuni angenanga mongona nurupili te itemona kanorono nalo nunge mongona unjo kolombera te itemomu naa kanorono akumu ambe telka terenoya?

<sup>4</sup> Nunge mongona unjo kolombera itemomu naa kanokolio angenando ango, nunge mongona nurupili te itemomu wendo lindemboi ambe telka ninoya?

<sup>5</sup> Nu topele mapele toli imbomu, nuni nunge mongona itemo unjo kolombera awilimu oi wendo likolio altoko kanoko kondoko angenanga mongona itemo nurupilimiu manda wendo lindinio.

<sup>6</sup> Gotenga nimile melema likolio owa naa tieio. Aku ulu tengen lemo tikiri pe eno nombalo. Enonga kulumbu pengama kongima angimelena toko naa mundeio. Aku ulu tengen lemo kimboni kambulko takele makale tendenge.

*Gotenga mele pengama konge tengen imboma timbelo*

<sup>7</sup> Lapa, mulu kombuna moromo iyemu melema konge teko tiwi nengei. Aku tengen kinye melema paimbo timbelona linge. Lapa moromona melema korangei. Aku tengen kinye melema paimbo kanoko linge. Ulke kerepuluna angilko nambu gaungau tingi wali nambu tombalo.

<sup>8</sup> Aku ambe telka konge tengen melema paimbo timbelona linge. Koronge melema paimbo kanoko linge. Nambu gaungau tingi kinye paimbo Goteni nambu tondombo.

<sup>9</sup> Enonga iye te yunge malo ombalie Ara, bret kaloli te nambo tiwi nimbelo kinye yunge lapani yu kou mongo te timbeloya?

<sup>10</sup> Molo ungulumuni Ara, oma te nambo tiwi nimbelo kinye yunge lapani waimbe te timbeloya?

<sup>11</sup> Eno konopu keri pepili moromele imbomani aku teko enonga bakuluma mele pengama tirimele lemo enonga Lapa mulu kombuna moromomuni melema tiwi ningi konge tengen imboma mele pengama paa olandopa timbelo.

<sup>12</sup> Akumunga, imbomani nu kinye teangei konopu lteno mele nuni imboma kinye aku ulu tewi. Aku ambe telka, aku ulumu Mosesini Gotenga ungu mane tirimu bukuna torumumanga pulumu kinye, Gotenga profet iyemani bukuna toringi ungumanga pulumu.

### *Eno kerepulu kelona tukundo pungei*

<sup>13</sup> Eno pape kerepulu kelomunga paa pangei. Kombu kerina purumo kerepulu paa awilimu, akuna purumo aulkemu paa palaku lepa unana itemona imbo awinini we we purumele.

<sup>14</sup> Nalo waliwalima koinjo molopa kondopa kau puli kombuna itemo kerepulumu paa kelo, yunge aulkemu paa tengenpeya teli kelomu itemo kala imboma akuna pungeindo mindili nongolio imbo koltalo kau aku aulkemu kanokolio purumele.

### *Kolo toli profet iyema ongei kani lino kane kane molamili*

<sup>15</sup> Kolo toko Gotenga ungu nimbe munduli te naa ningi tingi profet iyema ongei kani kanoko kondoko molaio. Kangindo kongi sipsip none teremele nalo konopundo melte topo namili ningi owa takera mele ongo moromele.

<sup>16</sup> Aku tepe amo namili ningolio wali takeme manda londoko nolemalaya? Molo me te namili ningi maliembi te manda akuko nolemalaya? Paa molo. Amo te lupe, takeme te lupe, me te lupe, maliembi te lupe ningi karomele. Kano kolo toli imboma ongo ulu tengema kanokolio, eno paimbo kolo tolima ningi kanonge.

<sup>17</sup> Aku tepa kau unjo pengamuni mongo pengamu toromo. Unjo kerimuni mongo kerimu toromo.

<sup>18</sup> Unjo pengamuni mongo keri te manda naa tombalo. Unjo kerimuni mongo penga te manda naa tombalo.

<sup>19</sup> Unjo mongo pengama naa tombalo unjoma pali peke tokolio tipena karomele.

<sup>20</sup> Akumunga ulu tengema kanokolio kolo toli profetema ningko kanoko imbi tinge.

<sup>21</sup> Imbomani nando Awilimu, Awilimu nimele imboma pali Goteni nokoromo mulu kombuna tuku naa punge ningko pileio. Ara mulu kombuna moromomunga unguma tengen tinge imboma kau akuna punge.

<sup>22</sup> Imboma moke tembalo wai kanomu wendo ombalo kinye imbo awinini nando ningei, ‘Awilimu, nani nunje imbi lepo nunje unguma nimbo tiru kanomu. Nunje imbi lepo imbomanga konopuna kuro moloringima ongo wendo pame niu kanomu. Nunje imbi lepo ulu enge nili awini teru kanomu,’ ninge.

<sup>23</sup> Nalo aku teko ninge wali nani enondo nimbo para timboi, ‘Na enonga imbima paa naa pilipo eno kanopo imbi naa tiro. Eno Gotenga ungumu naa pilko liko teringi kani nanga kumbekerena naa ongo anjo paio,’ nimbo.

#### *Ulke talo takoromele imbo talo*

<sup>24</sup> Akumunga, i nanga unguma pilko liko tengen imboma eno iye te moromo mele nembo. Iye lipe manjili perimu iye te yuni yunge ulkemu enge nimbe angilepili nimbe kou awilima pololina ola takorumu.

<sup>25</sup> Walite lo ombo poporome topa no topalie ulkemu paa topa tambaluwe timbei terimu nalo ulke timumu akupe naa mepa naa tekiripe enge nimbe kouma pololina we angilerimu.

<sup>26</sup> I nanga unguma pilko liko naa tengen imboma eno iye te moromo mele nembo. Keke lepo toli iye teni yunge ulkemu ukiana ola takorumu.

<sup>27</sup> Walite lo ombo no topa poporome enge nimbe topalie ulke kanomu lipe tambaluwe tipe paa tekiripe lterimu,’ nimu.

<sup>28</sup> Jisasini aku unguma nimbe pora tirimu kinye yuni mane tirimu pilko moloringi imbomani yuni ungu mane tirimu mele pilkollo mini lterengi.

<sup>29</sup> Gotenga ungu manemanga puluma pilko eno mane tiringi iyemani we mane tiringi mele Jisasini aku tepa mane naa tirimu. Nalo imbi lerimu iyemani pipili naa kolko enge ningko mane tiringi mele aku tepa mane tirimuna pilkolio eno mini lterengi.

## 8

### *Jisasini kuro kendi noli iyemu tepa koinjo ltamu*

<sup>1</sup> Jisas mai kembona mainyendo ombai orumu wali imbo awini yu lombili oringi.

<sup>2</sup> Aku wali iye te kuro kendi nomba perimumu Jisas orumuna omba yunge kumbekerena komongo topa pondopalie yundo nimbei, ‘Awilimu, nunje konopumuni na koinjo pambo konopu lienio lemo nuni na manda teko koinjo munduwu,’ nimu kinye.

<sup>3</sup> Jisasini iyemu ki ola noipelie yundo nimbei, ‘Nu koinjo pani konopu lteo kani koinjo puwi,’ nimu kinye tamburumbu iyemu koinjo purumu.

<sup>4</sup> Aku terimu wali Jisasini kano iyemundo nimbei, ‘Nuri ya ulu teromu imbo tendo kape paa naa niwi. Tumbi tiko pungo Gote popo tondoli iyemu nunje kangimu liko ondoko, na altopo kangi penga liepili molto kani ningko Mosesini tewi nimbe panjirimu mele pilko liko tenindo Gote popo toko kalko tiwi nimu meleme liko Gote popo tondoli iyemundo kalondowi ningko yu tiwi. Pele imbomani nu kanokolio yu paimbo kangi penga liepili moromo ningko pilengei kani nio mele i teli oi tepuwi,’ nimu.

### *Jisasini ami iye nokoli tega kongono kendemande iyemu tepa koinjo ltamu*

<sup>5</sup> Jisas Kaperneam taunona tukundo purumu wali Rom imbomanga ami iye 100 nokorumu iye te yu orumuna omba yundo konge tepalike nimbei,

<sup>6</sup> ‘Awilimu, nanga kendemande iyemu kimbo ki kolopa pora tipe mindili nomba perepa ulkena liepili oro,’ nimu.

<sup>7</sup> Jisasini yundo ‘Ombo tepo koinjo limbo,’ nimu.

<sup>8-9</sup> Aku nimu ungu pilipelie ami iye 100 nokorumu iyemuni yundo topondopa nimbei, ‘Awilimu, na iye kerimu mele moro, nu nanga ulkena onio kinye manda naa tembaloo. Na kape iye teni nokoromo, yunge ungumu pilipo lipo tero. Nani kape ami iye mare nokoro. Kano iyemanga tendo puwi nio wali yu purumo. Molo tendo owi nio wali yu oromo. Molo nanga kongono tendeli kendemande imbo tendo i teko tewi nio wali yu aku tepa teremo. Aku tepala, nuni ungumuni kau ninio wali nanga kendemande iyemu koinjo pumbelo,’ nimu.

<sup>10</sup> Jisasini yu nimu ungu pilipelie mini lepalie lombili oringi imbomando nimbei, ‘Nani eno paimbo nio. Israel imbomanga talapena tawendo mololi iyemuni na ungumuni kau manda tembo nimbe ipuki tirimo mele Israel imbomanga pali tukundo imbo tendekureni kape aku teko ningko pimele mele naa karo.

<sup>11</sup> Nani enondo paimbo nimbo tiromu, Ena oromondo kombumanga kinye ena

pepurumondo kombumanga kinye imbo awini wendo ongo Gote iye nomi kingimu molopa nokoromo mulu kombuna tukundo Abraham kinye Aisak kinye Jekop kinye peya ongo langi nongo molonge.

<sup>12</sup> Nalo Goteni yunge imboma nimbe kanopa Itimu Israel imboma yu nokopa moromo kombuna pungo molemala imboma yuni topa makoropa tumbulu tolina mundumbelo. Kanona paa mindili nongoilio kola teko perek molonge,” nimu.

<sup>13</sup> Aku ungu nimbeline yuni ami iye 100 nokorumu iyemundo nimbei, “Nani nunge manda tendembo ningi ipuki tinio mele tendembo kani puwi,” nimu. Kano kinye yuni aku tepa nimu enamunga kendemande iyemu yu kuro toromomu pora nimbe koinjo pumbe molorumu.

*Jisasini Pitanga Bamu ambomu tepa koinjo ltimu*

<sup>14</sup> Jisas Pitanga ulkena tukundo pumbeline wali, Pitanga bamu ambomu kuro topa kangi tipe topa ainyembo lerimu ulu kanopalie,

<sup>15</sup> yunge kimu ambolorumu kinye kangi tipe toromu ulumu pora nimu kinye ambomu makilipe wendo ombalie Jisas langi tirimu.

*Jisas imbo awini tepa koinjo ltimu*

<sup>16</sup> Altopa kombu ipu lembai terimu wali konopuna kuro perimu imbo awini Jisas molorumuna meko oringi kinye yuni kuromando ongo wendo paio nimu kinye ongo wendo puringi. Kuro torumu imboma pali tepa koinjo ltimu.

<sup>17</sup> Aku tepa terimumu koro oi Gotenga iye profet Aisaiani ulu te pele wendo ombalo oi nimu mele wendo orumu. Aisaiani nimbei, Yuni kau lino kuro lupe lupe torumuma mepalie makoropa wendo mundurumu, *(Ais 53:4)* nimu.

*Imbomani na lombilingei mele Jisasini nimu*

<sup>18</sup> Walite Jisas nomu Galili kulendona molopili imbo awini liko maku toko yu liko makai tendeko angileringina kanopalie yu lombili andolimando nimbei, “Nomuna nekondo pamili waio,” nimu.

<sup>19</sup> Nalo oi naa pumbe we angilipili Gotenga ungu manemanga puluma pilipe mane tirimu iye te yu angilerimuna ombo yundo nimbei, “Ungu Mane Tilimu, nu punio kombumanga waye lombili ombo,” nimu.

<sup>20</sup> Aku nimu kinye Jisasini yundo nimbei, “Piliwi! Owa takerama maina kowa itemona peremele. Kerama enonga manga

takoromeleanga peremele. Nalo Iyemunga Malo peremo kombu te naa itemo,” nimu.

<sup>21</sup> Kano kinye yu lombili andorumu iye teni yundo nimbei, “Awilimu, nu kamukumu lombili wamboi nalo oi pumbo nanga lapamu kinye peya molambo. Pele yu kolombalo kinye ono tepolio nu lombili ombo,” nimu.

<sup>22</sup> Nalo Jisasini yundo nimbei, “Nanga ungumu naa pilko imbo kololi none telimborani enongan imbo kolongema ono teangei. Nalo nu na lombili owi,” nimu.

*Jisasini poporome awilimu nimbe kenderimu*

<sup>23</sup> Aku tepa nimbeline nomu Galili nekondo pumbeindo nona andoli sip tenga tukundo purumu wali yu lombili andolima yu lombili tukundo puringi.

<sup>24</sup> Kano wali nomuna pungei puringi kinye poporome awili te nomuna torumu. Aku terimuma nomumua apipe topa ola ombalie sipimu lipe aku tombai terimu nalo Jisas we uru pepa molorumu.

<sup>25</sup> Kano kinye enoni yu uru perimuma pungo toko makinjikolio ningei, “Awilimu, lino liko tapowi. Lino no wangoromolo,” ningi.

<sup>26</sup> Yu makilipelie enondo nimbei, “Goteni lino nokombalo ningi konopu enge nili naa peremo iyema, eno ambe telka mini literemeleya?” nimu. Aku tepa nimbeline ola angilipe poporamem kinye nomumua kinye iri torumu. Kano wali poporome naa topa nomumua lope naa teli we lerimu.

<sup>27</sup> Yuni terimu ulu kanokolio iyemani mini ltekolio ningei, “Apal! I iye ambele telinje? Poporamem kape nomumuni kape yunge ungumu pilko ltimbele,” ningi.

*Jisasini kuro wangoli iye talo tepa koinjo ltimu*

<sup>28</sup> Kano kinye yu lombili andolima kinye peya nomu nekondo pumbe kombu Gadara puringi kinye kano kombu Gadara iye talo, konopuna kuro wangopa molorumu iye talo, imbo ono kombuna wendo ongo yu molorumuna oringili. Elo paa enge ningi imboma tongili teringilina we imboma elo peringili kombuna eloni eno tonguele ningi aka aulkena ongo naa puringi.

<sup>29</sup> Jisas kanokolio enge ningi waliko pilkolio ningili, “Gotenga Malo, lino kinye ulu ambelemu teni oronoya? Lino mongo lipe timbelo walimu oi wendo naa opili nuni i teli oi lino mindili liko tini ina oronoya?” ningili.

<sup>30</sup> Akuna anjipe kombu tengi imbo kongi awini imu nongo moloringina kanokolio

<sup>31</sup> kuromani Jisas konge tekolio ningei, “Lino toko makoroko munduniope ne

kongimanga konopuna molo pamili niwi," ningi wali

<sup>32</sup> yuni enondo nimbei, "Manda, akuna pangei," nimu. Kano kinye kuroma kano iye talonga konopuna wendo ongolio kongi akuna moloringimanga konopuna pungo moloringi kinye kano kongima pali keke lepo toko lkiko pungo takelana puke toko mainye pungo nomuna tuku pungo no wango koloringi.

<sup>33</sup> Ulu akuma wendo orumuna kanokolio kongi tapu teko moloringi iyema kowa pungolio, taunona pungo akuna moloringi imboma enonga kongima terimu ulu kape kuroma konopuna moloringi iye talo terimu uluma kinye temane toko ningo tiringi.

<sup>34</sup> Ningi ungu pilkolio taunona moloringi imboma pali Jisas molorumuna ongo kanokolio yu konge tekolio ningei, "Linonga kombuna naa mololi, kelko puwi," ningi.

## 9

*Imbo kimbo ki kololi te Jisasini tepa koinjo ltimu*

<sup>1</sup> Aku wali Jisas altopa nona andoli sip tenga tukundo pumbelie, nomu Galili yakondo ombo yunge kombu taunona wendo orumu.

<sup>2</sup> Yu ombo molorumuna iye marenimimbo ki kolopa pora tirimu iye te taropela teko meko oringi. Enoni Jisasini i yemanda tepe koinjo limbelo ipuki tikolio yu meko oringi ulu Jisasini kanopa pilipelie kimbo ki kolopa pora tili iyemundo nimbei, "Nanga ungulumu, nunge konopu ame topili. Nunge konopuna ulu pulu keri terinuperemoma mainye pupili, tiye kolto," nimu.

<sup>3</sup> Aku nimu ungu pilkolio Gotenga ungu manemanga puluma pilko mane tiringi iye marenimengano konopuna pilkolio, ulu paa keri teremo. Da iyemuni Gote none tepe ungu nimo ningo pileringi.

<sup>4</sup> Eno konopu leringi mele Jisasini lipe manjipelie nimbei, "Eno ambe telka konopu leko kenjirimeleya?"

<sup>5</sup> Te ulumu unana lembaloya? Nunge ulu kerima tiye kolto nimbo ungumu unana lembalonje molo ola angilko puwi nimbo ungu unana lembaloya?

<sup>6</sup> Nalo na Iyemunga Malo enge pere-momuni ya mai kombuna imbomanga ulu pulu kerima mainye pupili, tiye kolto manda nimbo ningo pilengei nimbo i tepo nio," nimu. Aku nimbeline kimbo ki kolopa pora tili iyemundo nimbei, "Nu ola angilko nunge kunumu likono meko ulkendo puwi," nimu.

<sup>7</sup> Aku tepe nimu kinye iyemu ola angilipe ulkendo purumu.

<sup>8</sup> Imbo awini akuna maku toko moloringimani yu aku terimu ulu kanoko mini ltekolio, maina imboma ulu enge nili aku mele teangei engemu tirimu Gotenga imbi liko ola munduko kapi ningi.

*Jisasini Matyu kanopa ltimu*

<sup>9</sup> Aku wali Jisas pumbe pumbelie, kou takisi lipe molorumu iye te, yunge imbi Matyu, kanopalie yundo "Na kinye peya pambili lombili owi," nimu. Kano kinye Matyu yu ola angilipe yu lombilipe purumu.

<sup>10</sup> Altopa Jisas Matyunga ulkena langi nomba molorumu kinye kou takisi lili iyema kinye. Juda iye awilimani ulu pulu kerima teli iye ningi wema kinye awini ongo Jisas kinye yu lombili andoli iyema kinye eno peya mainye molko langi noringi.

<sup>11</sup> Eno aku teko tendekuna langi nongo moloringi wali Farisi iyemani kanokolio yu lombili andolimando waliko pilkolio ningindo, "Enonga ungu mane tili iyemu kou takisi lili iyema kinye ulu pulu kerima teli iye wema kinye eno kinye yu ambe temona langi peya popo tiko noromeleya?" ningi.

<sup>12</sup> Aku teko ningi ungu pilipelie Jisasini enondo nimbei, "Kuro naa toromo imboma dokta moromona naa purumele. Kuro toromo imboma kau dokta moromona purumele kano."

<sup>13</sup> Aku tepe mele nani imbo tumbi nilima na molombona wangei nimboindo mai kombuna naa oru. Ulu pulu keri teli imboma na molombona wangei nimboi oro. Ulu pulu keri teli imboma lipo tapondomboindo oru kani eno pungo Gotenga bukuna moromo ungu tengapulumu pungo pilipeio. Goteni nimbeindo, Na melema popo toko kalko tiengei nimbo pilipo naa moro. Eno imbo lupema konopu mondoko kondo kolangei nimbo pilipo kau moro, (*Hos 6:6*) nimu kanomu," nimbe Jisasini nimu.

*Langi mi toli ulumundo Jisasini nimu*

<sup>14</sup> Altopa Imbo No Ltindili Jon lombili andoringi iyema Jisas molorumuna ongolio yundo waliko pilkolio ningei, "Lino kinye Farisi iyema kinye lino waliwalima wali tinge langi naa namili nimolo nalo nu lombili andolima aku teko naa teremele akumu ambe temona walite langi naa namili nimeleya?" ningi.

<sup>15</sup> Aku teko ningi ungu pilipelie Jisasini topondopa enondo ungu manda lepa yu kinye ulu te wendo ombalo mele nimbeline nimbei, "Ambo limbei iye te yunge pulu ltemo iyema kinye moromo wali eno tono kolkolio kola tepo langi naa namili manda ningey?" Manda naa ninge. Altopa kau, ambo limbei iyemu eno molongena ongo ambolko

liko meko wendo punge kinye kano walimanga paimbo konopu keri panjiko langi naa nongei mi tonge.

<sup>16</sup> Wale pakoli oimu te tungu nimo kinye linoni wale pakoli paa koinjo tengen te kopipo lipo, tungu nimomunga naa topo tambulurumolo kanomu. Imbo teni aku tepa topa tambulkanje kano wale pakolimu nona panjilkia kinye wale pakoli koinjo kopilimu kelo lepa li nimbeline wale pakoli oimu kelepa kamukumu awili tepe tungu nilka.

<sup>17</sup> Kongi meme kangimuni teli mingi oi tengen no wain koinjo naa koromolo. Imbo teni mingi oi tengen no wain koinjo te kolkanje kano no wainimbu mingina tukundo pepalie pele palaku leka kinye kano mingi oimu naa akopa tungu nilka. Kano kinye nomu kape mingimu kape kamukumu keri leka. Akumunga no wain koinjo kongi meme kangimuni teli mingi koinjona kau koromolo. Altopa nomu palaku itemo kinye kangimuni teli mingi koinjomu anjo yando pumbe tungu naa nimomunga nomu kinye mingi koinjomu peya manda itemo,” nimu.

*Jisasini ambo talo tepe koinjo ltimu*

<sup>18</sup> Jisasini Jononga lombili andoli iye-mando ungu nimbe molopili Juda imboma maku toko Gotenga ungumu pileringi ulke te nokorumu iye te Jisas molorumuna ombo yunge kumbekerena komongo topa pondopa yundo nimbei, “Nanga bakulumu kinye i teli kau nomi ka akupe limo. Nalo nu ongo ki ola noinio kinye koinjo pumbelo,” nimu.

<sup>19</sup> Aku nimu kinye Jisas ola angilipe yu lombili purumu. Jisas lombili andolima peya purungi kala.

<sup>20-21</sup> Kano kinye ambo te yunge pena ulke perimu walima pora naa nimu akuna molorumu. Yu pena ulke kau pepili poinye ki yupoko ombo purumu. Aku ambomuni Jisasinga wale pakolimu kau ambolondu lemo na koinjo pumbo konopu lepalie Jisas purumu kinye umbulkondo ombo, yunge wale pakolimunga pundumu ambolorumu.

<sup>22</sup> Ambolorumu kinye Jisas topele topa yu kanopalie nimbei, “Balomu nu konopu wango nipili molowi. Nu manda tepe koinjo limbelo konopu lenio kano ulumuni nu koinjo puruno,” nimu. Nimu kano wali kau ambomu koinjo pumbelie we molorumu.

<sup>23</sup> Kano kinye Jisas Juda imboma maku toko Gotenga ungumu pileringi ulkemu nokoli iyemunga ulkena tukundo ombalie imbo awini molko kondo kolko, kolape mingi langoko, kola awili teko, teko moloringi ulu kanopalie yuni nimbei,

<sup>24</sup> “Eno wendo paio! Balomu oi naa kolomo. We uru kau peremo,” nimu.

Aku tepe nimu kinye balo kanomu paimbo kolopa pora tirimu ulu liko manjikolio yu owe tenderingi.

<sup>25</sup> Kano kinye imbo maku toko moloringima kiri tipe makoropa pena pena tepalie balo onomu lerimu kiripina pumbe yunge kimu ambolorumu wali balomu makilipe ola molorumu.

<sup>26</sup> Iulu enge nili terimumunga temanemu kano kombumunga tukundo lerimu kombumanga pali anjo anjo purumu pileringi.

*Jisas mongo keri leli iye talo kinye ungu naa nili iye te kinye tepe koinjo ltimu*

<sup>27</sup> Jisas kano kombumu tiye kolopa pumbe purumu wali mongo keri leli iye talo yu lombili ongo konge tekolio ningili, “Iye nomi king Devitinga kolepa iyemu, nu iltoo kondo kolowi,” ningi wali awini nilko oringili.

<sup>28</sup> Yu ulke tengen tukundo purumu kinye mongo keri leli iye talo yu molorumuna lombili oringili kinye yuni elo walipe pilipelite nimbei, “Elo na konge terembele mele manda tembaloo konopu itembelene molyoya?” nimu kinye eloni ningili, “Awilimu, manda tenio konopu itembolo,” ningili.

<sup>29</sup> Kano kinye yuni elonga mongo talonga ambolopalie nimbei, “Nani manda tembaloo konopu itembele mele aku tepe wendo opili,” nimu

<sup>30</sup> kinye elonga mongo talo penga lerimu, melema altoko kanoringili. Jisasini elo enge nimbe mane tipelie nimbei, “Eloni i ulu wendo oromomu imbo tendo kape paa naa pilengei, naa ningi tielio!” nimu.

<sup>31</sup> Nalo elo penando pungo Jisasini tembele mele aku kombumunga tukundo lerimu kombumanga pali temane toko tilko andoringili.

<sup>32</sup> Kano iye talo Jisas tiye kolko pungili puringili kinye iye te konopuna kuro wangopa molorumumunga ungu te naa nimu iye te Jisas molorumuna meko oringili.

<sup>33</sup> Jisasini iyemunga konopuna wangopa molorumu kuro kanomu topa makororumu kinye ungu naa nimu iye kanomuni ungu nimu kala imbo maku toko moloringimani kanokolio konopu awini liko mundukolio ningei, “Oi Israel kombuna tukundo i tepe ulu te wendo naa orumu kanomu,” ningi.

<sup>34</sup> Nalo Farisi iyemani ningei, “Kuronanga nomimuni yu lipe tapondoromona yuni kuroma topa makoromo,” ningi.

*Jisasini imbo waye kondo kolopa molorumu*

<sup>35</sup> Jisas kombu awilimanga kinye, kombu kelomanga kinye pelipe andopalie nimumuni, Juda imboma maku toko Gotenga ungumu pileringi ulkemanga pumbe ungu

mane tipe; Gote iye nomi king molopa imboma nokoromo ungu pulumunga ungu tukumema nimbe tipe kuro lupe lupema torumu imboma tepa koinjo ltimu.

<sup>36</sup> Imbo paa awini yu molorumuna ongo liko maku toko moloringima kanopalie eno imbo konopu naa pepili andoko, kangima enge naa perimu kala eno enongano manda liko naa tapoko molkolio eno kongi sipsipma enonga tapu iye te naa molorumumunga we moloringi mele eno aku teko moloringina kanopalie eno paa kondokolourumu.

<sup>37</sup> Kano kinye yu lombili andolimando nimbei, "Langi awini poinyena nowi ltemo nalo liko nombeya tengen kongono iye awini molo.

<sup>38</sup> Akumunga Langi Pulu Iyemu konge tekolio yuni langi nowi lelima lingei kongono tengen imbo yunge poinyena lipe mundupili neio," nimu.

## 10

*Jisasini yu lombili andoli iye 12 imbi topa ltimu*

<sup>1</sup> Jisasini yu lombili andoli iye 12 waio alako topalie enoni imbomanga konopuna kuro wangopa moromoma ongo wendo paio ningi toko makorongei engemu tipelie, imbo kuro tolima kinye imbo kuroni ka anjilima kinye koinjo pangei ningei engemu tirimu.

<sup>2</sup> Yuni nanga kongonomu tendepaio nimbe lipe mundurumu iye 12 akumanga imbi i tepsa: Oi Saimon, yunge imbi te Pita ningi, yu kame yunge angenu Andru kame, Sebedinga malo Jems kame Jems yunge angenu Jon kame,

<sup>3</sup> Filip kame Bartolomyu kame, Tomas kame kou takisi ltimu iye Matyu kame, Alifusinga malo Jems kame, Tadius kame,

<sup>4</sup> Lino Juda imboma linongan gavman molamili ningi talape iye Saimon kame altoipa Jisas lipe opa pulemanga kindo tirimu iye Judas Iskariot kame, akuma.

<sup>5</sup> Jisasini aku iye 12 lipe mundupielie mane tipe nimbei, "Imbo lupema moromelena naa paio. Samaria imbomanga taun tengen naa paio.

<sup>6</sup> Israel imboma kau enonga kongi sipsip pena loi leko peremele mele aku teko moromele imboma moromelena kau paio.

<sup>7</sup> Eno moromelena pungolio, enondo Gote iye nomi king molopa imboma nokombalo waimu nondopa wendo ombai teremo nilko paio.

<sup>8</sup> Kuro tombalo imboma teko koinjo liko, kolko linge imboma makinjiko koinjo mondoko, kuro kendi nombalo imboma imbo kangi anglepili ningi, kuro konopuna wangopa molopili molonge

imboma konopuna naa molangei, ongo wendo paio ningi teliko paio. I kongonomu tengemunga engemu lingindo kou teni molo melteni topo toko naa tirimele kani anjo imbo yu kape teko liko tapondokolio ningemuni, kou te liemili ningi naa teao. We teao.

<sup>9</sup> Pungeindo kou gol mare molo kou silva mare molo kou kapa mare kakona panjiko meko naa paio.

<sup>10</sup> Meli wale kape wale pakoli talo kape kimbo laku kape tu ambolongemu kape naa meko, we pangei. Enoni imbomanga tapoli kongono tenderemele imbo yu we imbo mani langi tinge.

<sup>11</sup> Altropa kombu awili tenga molo kombu kelo tenga tuku pungolio, imbo yu waliko pilkolio ningi, iye nari penga toya tolimu moromomuni linondo peya molamili waio nimbelyoa nenge. Aku wali te ningi tinge kinye pilko yu kanoko Itendekolio aku iye-munga ulkena pungo yu kinye kau peko molkolio altoipa aku kombumu tiye kolko paio. Ulke pinepine naa andoko, ulke tendekurenga kau langi nongo peao.

<sup>12</sup> Kombu tenga pungo iye penga te liko ondonge kinye kanoko Itendeko yunge ulkena tukundo pungolio, ulke pulu imbonando Goteni eno nokopa kondopili molaio neio.

<sup>13</sup> Kano kinye kano imbomani peya peamili tukundo waio ningi lemo, enonga ungu penga ningi kanomu kano imbo yu kinye pepili. Nalo kano imbomani konopu penga naa panjiko, peya peamili waio naa ningi lemo ungu penga oi tukundo pungolio ningi kanomu eno kinye naa pepili ningi, kelko meko eno tiye kolko yando waio.

<sup>14</sup> Imbo teni enondo peya peamili waio ungu naa ningi enoni ungu ningema pilko naa linge lemo aku ulkemu molo aku taunona imbo kerima tiye kolko pungeindo aku kombuna imbo yu kamukumu molko kenjingei Goteni eno lipe naa tapondombalo mele pilengei ningi enonga kimbona kano kombumanga kungupo angilimbelomu kulu toko paio.

<sup>15</sup> Nani eno paimbo nimbo tiro. Kot walimu wendo ombalo kinye kombu awili Sodom kinye Gomora talo elonga imboma oi ulu pulu keri awini teringi nalo elonga kot kelo mele pembalo. Nalo i imbo enondo tukundo waio ungu naa ningi enonga ungu pilko naa linge imbo yu kot walimu wendo ombalo kinye enonga kot awilimu pembalo.

*Umbuni lupe lupema wendo ombalo*

<sup>16</sup> Eno lipe munduro iyema eno sipsip melema, imbo owa takera awili kerimani sipsip topa noromo mele imbo yu moromelena eno lipe munduro. Nanga ungumu

andoko ningotinge kinyepilkokeripilkolio imbonani enomindili liko tinge. Imboma owa takera meleaku tekomoromele kani waimbemu lipe manjilimu paa peremonauluma tembaindo wamba lipe manjipe teremo mele eno aku tekomolko, kera imili moromo mele molangei. Aku keramuni melema mindili tipe tepakenjimbelo ulupulu te naaperemo.

<sup>17</sup> Imboma wamongo kanaio. Enoni na lombili andoli imboma mindili nongo, kolangei ningon, eno mare liko ambolkolio kaunsilimanga makumanga meko pungokot tendeko, eno mare Juda imboma makutoko Gotenga ungumu pimele ulkemanga likomeko pungokoipeni tinge.

<sup>18</sup> Eno nanga imboma molongemunga eno mare kati imbo lupemanga gavman iye awilima kinyeyenome kingima kinyemolongena kot tendengeinde meko punge. Aku ulutengenekani eno kanoko kondokomolaio. Nalo kot tendenge kinyekotena angilkolio enoni nanga ungumu pilengeiningo eno ningotinge.

<sup>19</sup> Nalo eno kati kot tendenge kinyekotena ambele ungure nimolonje, lino ungu te walikopilinge kinye ambele ungure topondopo nimolonje ningomininaa lteao. Neyaaku wali Goteni nengei ungnimbe timbelo.

<sup>20</sup> Eno ungu ningema enongano pilkolio naaninge. Enonga mulukombuna moromo Lapanga Mini Kake Telimuni eno i tekoungeenimbeitope timbelo.

<sup>21</sup> Aku walimanga angenuni yunge angenu nanga imbo molombalomunga kolopili tokokondangeinimbeitope timbelo. Lapani yunge bakulumakaakulatembalo. Bakulumankape enonga anupili lapalikinyemumindili kolkokotenameko pungotoko kondangeinigela.

<sup>22</sup> Nanga imboma molongemunga imbonani pali eno kinyekonopukeripanjingne, nalo na tiyenaakolokowalimapora naanipili enge ningomolongeimboma Gotenilipe tapondopamindilinongekombunanaapungo peyamolopokondopokau pamili nimbolo.

<sup>23</sup> Kombutenga imbomanienomindili nangei ningotekokenjingekinyekombutenga kowa paio. Nani enondo paimbo nio. Eno kombu Israel tukundokombumangapali andokonanga kongonomutekorporaa tindengei iyemunga Malo ombalo.

<sup>24</sup> Mane tiliyete lombilipungo unguma pimele imboma enonga manetilimainyendopa, enolandopamanda naaninge. Kendemande imboteniyunge nokoli iyemainyendopa, yolandopamanda naanimbolo.

<sup>25</sup> Lombilipumbungungapimoimbomukinyeyungeungumanane tirimo iyemukinye

tendekutepamorombe akumu manda. Kendemande imbonukinyeyunge nokoli iyemukinyetendekutepamorombe akumu mandala. Ulke puluyemunga ungu naapimele imbonayukinyemumindili kolko iri tongeindo kuromanga nomi Satanenga imbi manda leko yu Belsebulningotirimele. Alttopukinyeyunge ulkenaperemele imbonando pali imbi paa kerti tinge.

#### *Imbomanigote kau pipili kolangei*

<sup>26</sup> Nanga opa pulemani na tekokenjirimele mele eno na lombili andoli iyemapaimbo tekokenjingelakumunga enokano imboma pipili naakolaio. Tekopange tenderemele ulumanga tendekure kape naapange tendenge, uluma pali monalembalo. Lopeke teremo ulumangatendekure kape altoptalopeke naatembalo.

<sup>27</sup> Nani enondo tumbulutolina nio unguma tangolina neio. Unguoletokoningeenonganokomunipilingeunguma ulketulepena imuna ola anglikowinjikoningotieio.

<sup>28</sup> Kangimukau tokokondokolio minimu manda tokonaakondongeimbomapipili naakolaio. Gote kau pipili kolaio. Yuni kangimukinyeminimu kinyeyeyatalotipe kombunamanda topakondombalo kani yu kau pipili kolaio.

<sup>29</sup> Kera kaltindipele paa kelomumoromo, tarepotokolingeindo kera talopeyatoxytenimelekau purumo. Nalo tekolopawemainye naapurumo. Kano kerama na lombili andoli imboma mulukombunamoromo Lapamuninokoromo.

<sup>30</sup> Eno na lombili andolima, enongapinyendimateketenimbeitope wayekambutoromo.

<sup>31</sup> Kera kaltindipeleyukou paa koltalomele purumo. Nalo Goteni enokanopaliawali enoimbomapaalandopaa. Akumungapipili naakolaio.

#### *Lino Jisasinga imboma nimbo para tiemilipipili naakolamili*

<sup>32</sup> Imboteniyemungakumbekerenaola angilipona Jisasinga imbonumoronomibelo kinyenani Ara mulukombunamoromungakumbekerenaola angilipokuimbonumangainbomunimbo.

<sup>33</sup> Nalo imboma kumbekerena Jisas yunariya, Yu naakarokutepanimbolo imbonayunani Ara mulukombunamoromungakumbekerenyu nanga imbonumoloinbomoyu naakaroonimbo.

#### *Imbomanigotayaa paa konopumondongei*

<sup>34</sup> Yamainaimboma opa naatekotendekunakoputekomolangeinimbooru

konopu naa leaio. Eno imboma taka liko molko kopu teko molangei nimboindo naa oru. Na oromupe opa teli bainet mepo oromunga na ipuki naa tirimelema kinye opa makinjingue.

<sup>35-36</sup> Iye teni yunge lapa kinye opa tembalo. Lemenu teni yunge anumu kinye opa tembalo. Malo tenga omenuru yunge bamu kinye opa tembalo. Ulke tendekuna peremele imboma opa pule molonge. (*Mai 7:6*)

Na orumungaaku ulu tengue.

<sup>37</sup> Imbo teni na olandopa konopu naa mondopa, yunge lapa molo anumu olандопа konopu mondombalo imbonmu nanga imbonmu manda naa molombalo. Imbo teni na olandopa konopu naa mondopa, yunge malo molo lemenu olandopa konopu mondombalo imbonmu nanga imbonmu manda naa molombalo.

<sup>38</sup> Imbo teni yu lombili pambo nimbelie imboma unjo polopeyana angilko mindili nongo koromele mele yuni unjo polopeyena mele gomo lembaingo na yu lombili pumboindo mindili nondu lemo manda; kolondu lemo paala naa nimo lemo nanga imbonmu manda naa molombalo.

<sup>39</sup> Imbo te ya mai kombuna na molopo kondopo, nondopo naa kolambo nimbe pimo imbonmu kolopalie kombu kerina mindili nomba molopa kau pumbelo. Nalo imbo te na lombili andopa nanga kongonomu tendembaindo ya maina mindili nombo molombo kinye manda, kolombo kinye manda nimbelo imbonmu koinjo molopa kondopa kau pumbelo.

*Imbo teni Kraistinga imboma tapomo  
lemo Goteni yu mele penga timbelo*

<sup>40</sup> Eno kombu tenga punge kinye imbo teni peya molamili waio nimbe lipe tapondoromo imbonmu na peya aku tepe lipe tapondoromo. Na peya molamibili owi nimo imbonumi na mai kombuna puwi nimbe lipe mundurumu iyemu peya molambili owi nimola.

<sup>41</sup> Imbo teni Gotenga nimbe munduli ungu nili profet imbo te oromo kinye yu Gotenga profet imbo te kani nimbe pilipelie peya molambili owi nimbe lipe taporomo imbonmu Goteni yunge profet imbonmu mele timbelo mele aku lipe taporomo imbonmu kape tendeku tipe timbelo. Imbo teni Gotenga ungu pilinge lipe konopu tumbi nipi moromo imbo te oromo kinye yu Gotenga ungu pilinge lipe konopu tumbi nipi moromo imbo te kani nimbe pilipelie peya molambili owi nimbe lipe taporomo imbonmu Goteni aku imbo tumbi nilimu mele timbelo mele yu lipe taporomo imbonmu kape tendeku tipela timbelo.

<sup>42</sup> Imbo teni eno nanga lombili andoli imbo imbi naa mololi imbo te kanopa yu nanga lombili andoli imbo te kani nimbe kanopalie yu lipe tapopa we no kape kolopa timo lemo aku imbonmu Goteni paimbo mele timbelou limbelo akumu nani eno paimbo nimbo tiro," nimu.

## 11

*Jon Imbo No Ltindilini yu lombili  
andoringi iyema Jisas molorumuna lipe  
mundurumu*

<sup>1</sup> Jisasini yu lombili andoli iye 12 yunge kongono tendengei mele mane tipe pora tipelie, yu kano kombumu tiye kolopa Galili kombuna taunomanga andopa mane tipe Gotenga ungu mu imbonmu nimbe tirimu.

<sup>2</sup> Goteni o kanopa ltimu iye nomi Kraistini ulu enge nilima terimumungu Jon ka ulkena pepa pilipelie, Jisasindo i teko i teko waliko piltindeio nimbe yu lombili andoli iye mare Jisas molorumuna lipe mundurumu.

<sup>3</sup> Kano iyema Jisas molorumuna ongo yu waliko pilkolio ningei, "Goteni lino nokopa kondombalo iyere lipo mundumbo nimbe, nimbe panjirimu iyemu ombalo nimbo nokopo moromolo kanomu nunje molo te lupe ombalona nokopo molamiliya?" ningi.

<sup>4</sup> Jisasini enondo topondopa nimbei, "Enoni ya kandomele mele kape piltimene mele kape pungo Jon ningo tipeio.

<sup>5</sup> Mongo keri leli imbonmu mongoni kanoko, kimbo keri leli imbonmu aulke andoko, kuro kendi nolima imbo kangilipe, komu tili imbonmu ungu pilko, kololi imbonmu makilko, koropa noli imbonmu ungu tukumemu nimbo tirona pimele. Aku teko Jon ningo tieio.

<sup>6</sup> Na kanoko ipuki tikolio, altoko konopu talo naa panjiko molonge imbonmu eno malo," nimu.

<sup>7</sup> Nimu ungu pilkolio pungei puringi kinye Jisasini kelepa imbo awini maku toko moloringimando Jonondo nimbei, "Kombu ku lelina Jon imbo no ltindipe molorumu kinye eno kano kombu ku lelina ambele ulu kanongei puringiya? Kambe mele poporomeni lope lape tendepa molorumu te kanongei puringiya?

<sup>8</sup> Molo. Waliwali karomele mele kanongei naa puringi lemo ulu ambelemele kanongeindo puringiya? Iye te wale pakoli paa pengama pakopa molorumuna kanongei puringiya? Akumu molo. Imbo wale pakoli paa pengama pakoromelema iye nomi kingimanga ulkena kau momomele.

<sup>9</sup> Aku telu te kanongei naa puringi lemo Gotenga nimbe munduli ungu nimo iye profet kanongei puringiya? Akumu paimbo

nalo nani enondo nimbo timboi, Jon yu paimbo Gotenga iye profet te nalo Gotenga profet iyemanga pali yu kiyendomu.

<sup>10</sup> Yuni Goteni oi lipo mundumbo nimu iyemunga aulkemu tepa wamopa temo. Aku iyemundo Gotenga bukuna tukundo moromo ungu te i tepa,

Goteni yunge Malondo nimbei, 'Piliwi. Nanga ungu te nindimbelo iyemu nani nu punio aulkena yu kumbe lepo lipo munduro. Yuni nunge aulkemu akirindimbelo,' nimu, (*Mal 3:1*)

kano ungumu bukuna moromo.

<sup>11</sup> Nani eno paimbo nio. Oi maina moloringi imbomanga te Imbo No Ltindili Jon kinye, manda molo. Jon olandopa. Nalo Gote iye nomi king molopa nokoromo imbomanga te paa imbi naa mololi imbomu olandopa; Jon yu mandopa.

<sup>12-13</sup> Jon oi maina naa omiba molopili ungu manema peremo buk Mosesini torumuma kinye, Gotenga nimbe munduli ungumu profet imbomani ningi tiko bukuna toringi bukuma kinye, aku bukumani Gotenga unguma ningi tiko, Jon kinye Goteni eno nokombalo iye nomi te lipo mundumbo nimbe panjirimu iyemu kinye ongele mele unguma ningi. Nalo Jon orumu kinye yandopa Gote iye nomi king molopa imboma nokoromo ulumu paa enge nimbe wendo omiba yunge opa pulema topa mainye mundurumola. Iye enge nilimaniaku ulumu ambolongeindo enge ningokaraye teko lingei teremele.

<sup>14</sup> Ungu te nimboi teromu pilimolo konopu linge lemo pileio! Gotenga bukuna Gotenga profet Elaija ombalo nimu iyemuaku Jonondo nimu.

<sup>15</sup> Inio mele komu angilimbelo imbomani paa wamongo pileio!" nimu.

<sup>16</sup> "I waina moromele imboma ambele melte eno manda lepo nimbonje? Eno moromele mele i tepo nimbo tiembo. Eno imboma makutoremele kombuna bakulumakindipo nongo moromele mele. Kano baku-lumanga marenin e anjo moromele bakulu marendo waliko pilkolio ningi,

<sup>17</sup> 'Kunana nimolo kinye eno peya kunnana nemili naa ningi molo ningi. Altopokola temolo kinye eno peya kola teamili ungu naa ningi,' nimele.

<sup>18</sup> Jon ombalie gai kinye no wain kinyenaa nomba molorumu kinye kanoko keri pilkolio ningi, 'Yunge konopuna kuro te moromo,' ningi.

<sup>19</sup> Altopa Iyemunga Malo omiba gai kinyeno wain kinye norumu wali kanoko keri pilkolio ningi, 'Kanaio! Yu gai awini nomba keri pilipe, no wain awini nomba keke lepo topa teremo iyemu. Yu kou takisi lili iyema kinye, ulu pulu keri teremele

imbo wema kinye yu kinye pulu lepili peya kopu tepo molamili nimbe teremo,' nimele. Nalo lipe manjili ulu pulumu Gote kinye peremoni yuni teremo ulu kanokolio paimbo teremo ninge," nimu.

### *Imbo konopu topele naa tolima umbuni menge nimu*

<sup>20</sup> Aku tepa nimbeline Jisas kombu oi andopa ulu enge nili awini terimu kombumanga moloringi imboma yuni terimu ulu kanokolio enonga ulu pulu kerima kanoko keri pilko tiye kolko konopu topele naa toringi ulu kanopalie yuni eno iri topalie nimbei,

<sup>21</sup> "Kombu Korasin kinye Betsaida taun talonga moromele imboma mindili nongo paa molko kenjing! Kano kombu talonga tukundo ulu enge nili awini teru nalo akuna moromele imboma konopu topele naa toromele. Kombu awili Tair kinye Saidon talonga tukundo ulu enge nili te naa teru nalo kano kombu talonga tukundo nani ulu enge nili aku tepo telkana kanolemalanje kano kombu talonga imboman eno ulu pulu keri teremelemaoi tiye kolko, umbulu tiko, konopu topele tolemala. Konopu aku teko lelemalanje enonga ulu keri teremelema tiye kolongei wali pakoli kerima pakoko tipe kekuna molko kondolekala.

<sup>22</sup> Akumunga nani enondo i tepo nimbo tiro. Pele kot walimu wendo ombalo kinye kano kombu Tair kinye Saidon talonga imboma ulu pulu keri teremelelunga enonga kot kelo pembalo. Nalo eno kombu Korasin kinye Betsaida talonga imboma nani ulu enge nilima teru kinyekanokolio konopu topele naa toringimunga kot walimu wendo ombalo kinye enonga kot awilimupembalo.

<sup>23</sup> Kaperneam taun imboma enoni mulukombuna pumbo molamili konopu itemeleya? Aku manda molo. Enoni nanga unguma waliwalima pimele nalo konopu topele naa toromelelunga eno kombu kerina pungo molonge. Enonga kombuna tukundo ulu enge nili awini teru nalo eno konopu topele naa toringi. Kombu awili Sodom tukundo ulu enge nili te naa teru nalo kano kombuna tukundo nani ulu enge niliaku tepo telkana kanolemalanje imboma konopu topele tolemala. Aku ulu telemalanje kombumu we leka.

<sup>24</sup> Akumunga nani eno Kaperneam imbomando i tepo nimbo tiro. Kot walimu wendo ombalo kinye kombu Sodom imboma oi ulu pulu keri awini paimbo terengi nalo enonga kot kelo mele pembalo. Nalo eno nani ulu enge nili teruma kanokolio

konopu topele naa toringi imboma, kot walimu wendo ombalo kinye enonga kot awili pembalo," nimu.

### *Eno na kinye ongolio mulu lieio*

<sup>25</sup> Aku walimanga Jisasini nimbei, "Ara, Mulu Mai talo Nokoko Morono Iye Nomi, imbo eno none teko enonga lipe manjili peremo ningo eno enongano ungumanga puluma pali pilipo kondoromolo ningi pimele imboma eno nani kinye tero ulumanga puluma Ara nuni aku imboma naa pilengei ningo pange tenderinu. Nalo imbo bakulu pame mele molko nani nio unguma komu tendeko moromele imboma kau nani tero ulumanga pulumu pilengei ningi moro tondorono akumunga nani nu kinye paa tereno nio.

<sup>26</sup> Paimbo Ara, aku ulu tembo konopu lteno mele terinu," nimu.

<sup>27</sup> Gotendo aku tepa nimbelie kelepa imbo moloringimando nimbeindo, "Melema pali Arani na tirimu. Imbo teni Malo paimbo moromo mele pilipe kanopa imbi tirimo imbo te molo. Arani kau na kanopa imbi tirimo. Imbo teni Ara paimbo moromo mele pilipe kanopa imbi tirimo imbo te molo. Maloni kau kanopa imbi tirimo. Maloni Lapa lipo ondambo konopu ltemo imboma kau enoni Lapa kanoko imbi tingue.

<sup>28</sup> Eno kongono mindili nongo teremele imboma kinye, konopuna umbuni teremo imboma kinye, na morona waio. Onge wali nani konopu u nipili koro molaio nimbo.

<sup>29</sup> Nando, nunge kongono tereno mele peya ambolambili, nu nanga ungu mane tilimu molani, nunge ungu ninioma pilipo lipo molambo ningi teao. Na taku lipo molopolio kiyendo limbo konopu naa lteo akumunga nanga unguma pilko liko kongono popo tipo teamibili ninge wali enonga konopumu u nimbelo.

<sup>30</sup> Kongono popo tipo tembolo wali kongonomu u nimbelo. Nani eno meaio nimbo tiromu eno umbuni naa tembalo," nimu.

## 12

*Jisasini koro mololi Sabat waimunga kongono mi toromele ungu nimu*

<sup>1</sup> Walite, Juda imbomanga koro moloringi wali Sabat tengu, Jisas kinye yu lombili andolima kinye wit poinyemanga onto purungi kinye yu lombili andoli iyema engele kolkolio wit mongo mare inie toko noringi.

<sup>2</sup> Aku teringi ulu kanokolio Farisi iyemani Jisas yundo ningi, "Kanowil! Koro moromolo wali sabatemunga kongono naa teangei nimbe peremo ungu manemu nu lombili andoli iyemani manemu topa tangondokolio aku ulu teremele," ningi.

<sup>3</sup> Jisasini topondopa nimbei, "Eno Gotenga bukuna tukundo anda kolepa iye nomi king Devitini terimu mele nimbe moromo temanemu kanokolio temanemunga pulumu naa pimeleya? Devit kinye yu peya puringi iyema kinye eno engele kolkolio,

<sup>4</sup> Devit Gote molorumu sel ulkena tukundo pumbe, Gotenga kumbe kerena lerimu plawa kalolima lipe nomba, yu peya puringi iyema tirimu noringi kanomu. Kano plawa kalolimando Goteni ungu mane te tipelie nimbei, 'We imbomania paa naa nangei! Gote popo tondoli iyema kau nangei,'aku tepa mele nimu kano ungu manemu topa tangondoromu kanomu.

<sup>5</sup> Ungu mane te peremola. Gote popo tondoli iyemani koro mololi wali Sabatemanga Gotenga ulkena kongono teremele kinye sabat walimanga ungu manemu toko tangondoromele nalo aku kongono teremelemunga mongo naa pembalo nimbe moromo akumu naa pimeleya?

<sup>6</sup> Nani enondo i tepo nimbo tiro. Mele koinjo te kinye peremo akumu Gote popo toko karomele ulke tempelemunga olan-dopamu.

<sup>7</sup> Goteni nimu ungu te yunge bukuna moromo mele i tepe,  
Enoni imboma kondo kolko taponge wali kanopo penga pio. Na popo toko kongima kaltomele akumu ulure molo. *(Hos 6:6)*

akumunga ungu pulumu eno Farisi iyemani pilimalanje i ulu teko naa kenjirimele iyema teko kenjirimele naa nilimala.

<sup>8</sup> Iyemunga Maloni Sabat walima nokromo iyemu moromona Sabat wali teremele mele manda nimbelo," nimu.

*Koro mololi Sabat waina Jisasini ki keri leli iyemu tepe koinjo ltimu*

<sup>9</sup> Kano kinye Jisas aku kombumu tiye kolopa pumbe Juda imboma maku toko Gotenga ungumu pileringi ulke tengu pruru.

<sup>10</sup> Kano ulkena iye te molorumu, yunge ki ekondomu kamukumu kolopa kukurumu. Kano kinye akuna moloringi iye marenii Jisasini tepa kenjimbelo kinye kot tendamili ningi yu waliko pilkolio ningi, "Koro moromolo wali Sabat kinye imbo kuro toromoma tepe koinjo limolo kinye mandanje moyoya?" ningi.

<sup>11</sup> Jisasini iyemando topondopa nimbei, "Sabat wali kinye iye tengu kongi sipsip te muru tomo lemo sipsip ari teremo iyemuni kundupe ola lipe mepa naa ombaloya?

<sup>12</sup> Aku lemo sipsip paa mandopa, imboma paa olandopa, akumunga Sabat wali kinye ulu pengama manda naa temoloya?" nimu.

<sup>13</sup> Aku tepa nimbeline ki kolopa kukurumu iyemundo nimbei, "Nunge kimu tinio tiwi," nimu wali iyemuni yunge kimu tinio tirimu wali yunge ki ekondo penga lerimu mele ki keri lerimumu kelepa penga lerimu.

<sup>14</sup> Nalo Jisasini aku terimu ulu kanokolio Farisi iyemani pena pungo maku toko Yu ambe topo topo kondamiliya ningi ungu panjiringi.

*Jisas Gotenga kongono iye tukumemu*

<sup>15</sup> Farisi iyemani yu tongei teringi ungu pilipelie Jisas aku kombumu tiye kolopa purumu. Kano kinye imbo awini Jisas purumu mele yu lombili puringi wali yuni imbo kuro torumuma pali tepe koinjo lipelie

<sup>16</sup> nimbei, "Na i iyemu ningi i ulu enge nilima tero mele enoni imbo lupe marendo naa ningi tieio!" nimu.

<sup>17</sup> Aku tepe wendo orumumunga koro oi Gotenga iye profet Aisaiani ulu te pele wendo ombalo oi nimu mele kamukumu wendo orumu. Aisaiani nimbei,

<sup>18</sup> I iyemu nanga kongonomu tendepili iye kanopa ltiumu. Nani i iyemu konopu mondopo, yu konopu noiro iyemu. Nanga Mini Kake Telimu yunge konopuna panjindimbo. Yuni mai kombuna imboma pali nani eno tumbi tipo nokombo mele nimbe timbelo.

<sup>19</sup> Imbomani yu iri tonge kinye yuni topondopa ungu te naa nimbe, ungu te enge nimbe naa nimbelo. Imboma andoko moromele aulkena ungu enge nimbe naa nimbelo.

<sup>20</sup> Kambe enge naa nimo te elke naa topa, tipe lam wamba tipe naa noromo kinye kamukumu topa naa kumundumbelo. Gotenga ulu toyia tolima kombu pange tendepili nimbe kongono telipe kau purumo.

<sup>21</sup> Imbo manga pupuma yunge imbi pilkolio ipuki tiko tapopili ningi nokoko molonge, (Ais 42:1-4)

nimu ungu akumu wendo orumu.

*Farisi Imbomani Jisasini Belsebul kinye kongono teremo ningi*

<sup>22</sup> Kano kinye iye te yunge konopuna kuro te molorumuna mongo keri lepa melema naa kanopa ungu naa nimu iye te Jisas molorumuna meko oringi kinye Jisasini iyemu tepe koinjo ltumu kinye kano iyemu ungu nimbe melema kanorumu.

<sup>23</sup> Aku terimu ulu kanokolio imbomani pali mini tekolio ningei, "I iyemu iye nomi king Devitinga malo, lino nokopo moromolo kano iyemunje?" ningi.

<sup>24</sup> Nalo aku ningi ungumu pilkolio Farisi iyemani ningei, "Molo. Kuromanga nomi Belsebul kau iye Jisasinga konopuna

molopalie yu enge tirimona yuni kuroma topa makororomo," ningi.

<sup>25</sup> Enoni aku teko konopuna pileringi mele Jisasini pilipelie nimbei, "Imbo talape te konopu tendekuna naa pupili molko tuku tingina owe panjiko eno enongano opa teko lupe lupe moromele kinye kano talapemu pora nimo. Molo kombu tengi imboma molo ulke tendekuna peremele imboma konopu tendekuna pupili naa molko eno enongano opa teremele kinye kano imbo talapemu tungu tiko yu mele mele moromele. Pora nilka.

<sup>26</sup> Aku tepala, Sataneni yunge kuro te makorolkanje aku telkamunga yunge talapemu kinye opa mele telka. Altapa yunge talapemu ambe tepe manda molemalaya? Pora nilka.

<sup>27</sup> Ungu te pilengi! Nani Belsebulinga engemuni kuroma makororo lemo enonga iyemani naringa engemuni kuroma makorromeleya? Akumunga enonga iye kuroma makorromele iyemani Goteni lino enge tirimona linoni kuroma makororomolo ningi pimelena enoni nando i nimele unguma kano iyemani pilko moke tekolio eno kolo toromele ninge.

<sup>28</sup> Nalo paimbo Gotenga Mini Kake Telimuni na enge tirimona nani kuroma makorondu lemo Gote iye nomi kingimu molopa imboma nokombalo waimu eno moromelena oi wendo omo," nimu.

<sup>29</sup> "Ungu te peya i tepe: Iye enge nili teni yunge ulkemu nokopa kondolka kinye iye teni we manda tukundo ombo melema wapu lipe meli pulkaya? Akumu manda molo. Oi wapu noli iyemuni iye enge nilimunga kimbo kima ka topa noipelie yunge ulkena manda ombo melema wapu lika.

<sup>30</sup> Na naa lipe tapondoromo imbomuni na kinye opa pule toromo. Imbo teni na lipe tapondopa kongi sipsipima tukundo naa ltumu imbomuni kongi sipsipima topa makoropa mundurumo.

<sup>31</sup> Aku teko ningi moromelemunga nani enondo i tepe nio. Imbo teni ulu pulu kerima tepe, ungu taka tondopa nimbe kenjirimo uluma Goteni manda mainye pupili nimbe tiye kolombalo. Nalo imbo teni Gotenga Mini Kake Telimu nimbe kenjipe ungu taka tondombalo uluma Goteni mainaye naa pupili nimbe tiye naa kolombalo.

<sup>32</sup> Iyemunga Malo ungu taka tondopa ungu nimbe kenjirimo imbomu aku tepe ulu keri teremoma Goteni mainye pupili nimbe tiye kolombalo. Nalo Mini Kake Telimuni ulu te teremo kinye imbo teni ungu taka tondopa, opa tepe tipe yuni naa teremo, kuromanga nomi Sataneni yu lipe tapondoromona aku teremo nimo imbomu aku tepe ulu keri teremomu kinye kape mulu mai pora nimbelo wali kinye

cape mainye naa pupili nimbe paa tiye naa kolombalo.

*Unjo kerimuni mongo kerimu toromo*

<sup>33</sup> Unjo penga te kanokolio mongo pengama tombalo nomolo ningkaromele. Unjo keri te kanokolio mongo kerima tombalo manda naa nomolo ningkaromele. Unjo te mongo toromo kinye kanokolio i unjomu penga, i unjomu keri ningko moke teko karomele.

<sup>34</sup> Eno Farisi iyema, kolo topa imboma tepe kenjili waimbemunga waloma. Imbo te yunge konopuna peremo unguma kau kerena nimbe tirimo akumunga eno iye keri moromelemani ambe teko ungu pengama manda ningeya?

<sup>35</sup> Aku tepe mele, imbo penga teni yunge konopuna ulu penga peremoma teremo, nalo imbo keri teni yunge konopuna ulu keri peremoma teremo.

<sup>36-37</sup> Akumunga nani enondo i ungu nimbo tiro. Goteni imboma kot tendembalo walimunga enonganu ungu nimelema moke tepe pilipelite nu imbo toya tolimu, nu imbo kerimu nimbelo akumunga imbomani maina we ungu nimelema pali kape moke tepe pilipelite ambe telka aku ungu niniya, ningko para tiwi nimbelo,” nimu.

*Ulu wengendeli te tewi ningko iye marenijasas waliko pileringi*

<sup>38</sup> Kano kinye Farisi iye mare kinye Gotenga ungu manemanga puluma pilko mane tiringi iye mare kinye enoni Jisasindo ningei, “Ungu Mane Tilimu, nu paimbo Goteni kongono tendani nimbe maina lipe mundurumunje lino kanamili ningko Goteni kau manda ulu enge nili teremo mele te tewi,” ningi.

<sup>39</sup> Jisasini topondopa nimbei, “Kinye maina moromele imbo kerima kau molko eno ambo wapera toli mele moromele. Eno teko kenjiko Gote liko tui tirimele imbomani Goteni kau ulu enge nilima manda teremo mele kanamili tewi ningko na konge teremele. Nalo Goteni na lipe mundurumuna ombo molto. Yu kinye tapu topo kongono terembolo mele lipe ondombalo ulu enge nili te wendo naa ombalo. Gotenga profet iye Jona kinye wendo orumu ulu akumuni kau lipe ondombalona kanonge.

<sup>40</sup> Oma awili teni Jona lipe pengo mundurumu kinye yu omamunga olona ipu leli tangoli wali yupoko molopa perimu kinye omamuni yu nomu kulendona muku topa wendo mundurumu kinye yu altopta we molorumu mele Iyemunga Malo ono teko panjingi kinye aku tepe ipu leli tangoli wali yupoko maina tukundo pepalie makilipe koinjo molombalo.

<sup>41</sup> Oi kombu awili Ninive imboma paa molko kenjiringi nalo Gotenga profet Jonani pilipe Ninive imboma pumbe nimbe tirimu kinye pilkolio teko kenjiringi mele kanoko keri pilko konopu topele toko molko kondoringi. Aku teringimunga kinye moromele imbomani Jonanga olandopa iye te ya moromo iyemunga ungumu liko tui naa pimelemunga kot walimu altopta wendo ombalo kinye Ninive imbomani kotena angilko, kinye moromele imbomando teko kenjiringi, mindili nongei kinye paa ninge nimu.

<sup>42</sup> Oi lino Israel imbomanga iye nomi king Solomon yu iye paa enge nili te molopa, yu ungu lupe lupema lipe manjindilimu pepili molorumu mele kombu Sipa nokorumu ambo nomi kwinimu pilipelite, Solomononi ungu pengama kau nimu mele pilimbeindo yu kombu tulena molopalie Solomon molorumuna wali awini aulkena pelipe orumu. Aku tepe terimumunga, iye nomi Solomononga olandopa ya moromo iyemuni nimo ungumu, kinye maina moromele imbomani naa pilko, liko tui tirimelemunga kot walimu wendo ombalo kinye kombu Sipa ambo nomi kwinimuni nimbei, ‘Nani Solomononi ungu penga nimu mele pilimboindo aulke tulena oru nalo Solomononga olandopa molorumu iyemuni nimu ungumu eno naa pilko, liko tui tiringi imboma aku teringimunga eno paimbo mindili nongei,’ nimbelo,” nimu.

*Keri kuro oi molorumuna altopta tukundo ombalo*

<sup>43</sup> “Kuro te iye tengi konopuna wendo ombalie, no naa mololi kombumanga pumbe manda koro molombalo kombu te kororomo. Te naa kanopa ltendepalie

<sup>44</sup> yuni nimbei, ‘Na oi molopolio wendo ondu ulkena kelepo pambo,’ nimbe yu ombo yu oi molopa purumu ulkemu karomo kinye ulke pureme mepa tepe penga tepe we lepa imbo te naa moromo kinye kanopalie,

<sup>45</sup> yu kelepa anjo pumbelie kuro enge nili paa olandopa kite yupoko pakera lipe mepa ombo eno peya kano ulkena tukundo pungo moromele. Kano kinye kano iyemu oi molopa kenjirimo nalo pele paa kamukumu olandopa molopa kenjirimo. Aku tepe mele, kinye ya teko kenjiko moromele imboma pele kamukumu molko kenjinge,” nimu.

*Jisasini i nanga ango kame nimbeline nimu*

<sup>46</sup> Jisas imbo maku toko moloringima ungu mane tipe molopili yunge anumu kinye angenupili kinye yu kinye ungu ningeindo ongo pena angileringi.

<sup>47</sup> Imbo teni yundo nimbei, "Aminye kinye angenali kinye eno nu kinye ungu ningei penana ongo angimele," nimu.

<sup>48</sup> Jisasini yundo topondopa ungu iko topalie nimbei, "Nanga ama nariya? Nanga ango kame naimeleya?" nimbelie,

<sup>49</sup> yu lombili andoli imboma ki tundu topalie nimbei, "I imboma nanga anumu kinye nanga ango kame moromele."

<sup>50</sup> Nanga Ara, mulu kombuna moromomuni teangei nimo mele pilko liko teremele imboma nanga anumu kinye nanga angenupili kinye nanga kemulupili kinye moromelemunga aku tepo nio," nimu.

## 13

*Jisasini ungu kongolino lipelie imbo teni wit mongo poityena tanda tirimu nimu*

<sup>1</sup> Imbo maku toko moloringimando aku tepea nimbe pora tipelie, Jisas ulkena molopa pena pumbe nomu kulendo pumbe molorumu.

<sup>2</sup> Imbo paa awini yu molorumuna ongo maku toko moloringimunga nona andoli sip te nona ola lerimumunga tuku pumbe molorumu, imboma nomu kulendona angleringi.

<sup>3</sup> Yuniaku imbomando ungu awini nimbe timbeindo ungu kongolino lipe kau nimu. Te i tepea nimbei, "Pileio! Iye teni wit mongo yunge poityena andopa tanda tirimu.

<sup>4</sup> Tanda tilipe andoramu kinye mongo mare aulkena mainye purumu, kanoma keramani ongo tiltiko liko norangi.

<sup>5</sup> Mongo mare kou perimuna mainye pumbelie mai koltalo lerimunga pumbelie nondopa muli topa wendo orumu.

<sup>6</sup> Nalo pulkono naa mundurumuna ena terimu wali kanoma kapu lepa kolorumu.

<sup>7</sup> Mongo mare lokoloko teli ka molorumuna mainye purumu. Ka lokoloko tellimani wendo ombo witima topa nomba aka torumu.

<sup>8</sup> Langi mongo mare mai pengana mainye purumuma wendo ombo mongo pengama torumu. Mare mongo 100, mare 60, mare 30 torumu," nimu.

<sup>9</sup> Aku nimbelie, "Imbo komu angilimbelenmani i ungumu pileio," nimu.

*Jisas ambele konopu lepalie unguma kongolino lipe kau nimu*

<sup>10</sup> Jisas lombili andolima yu molorumuna ongolio yundo ningei, "Nu imbomando unguma ningi tini wali ambe telka ungu kongolino kau ltinoya?" ningi.

<sup>11</sup> Yuni enondo topondopa nimbei, "Gote iye nomi kingimu molopa imboma kinye melema kinye nokoromomunga ulu pulu yu yunu pilerimu kano ulu puluma, kinye eno na lombili oromele imboma pilengei

nimbelie eno nimbe tirimo. Nalo we imboma nimbe naa tirimo.

<sup>12</sup> Gotenga ungumu pilko kondoromele imboma paa olandopa nimbe timbelona pilinge. Pilko paa kondonge. Nalo pilko naa kondoromele imboma eno alaye kolte pimele ungumu kape wendo limbelo.

<sup>13</sup> Eno mongoni kanokolio nalo kanoko imbi naa tirimele. Komuni pilkolio nalo naa liko manjirimele,

akumunga nani we imboma enondo unguma nimbo tiembo nimbolio ungu kongolinoma kau ltio.

<sup>14</sup> Aku ulu teko moromelemunga koro oi Gotenga profet iye Aisaiani aku teko tengenoi nimu mele wendo oromo. Aisaiani nimbei,

Enoni waliwalima komuni pilinge nalo konopu paa naa liko manjing; mongoni kanonge nalo melte paimbo kanoko imbi naa tiengen.

<sup>15</sup> I imbonanga konopuma paa pipi tirimo; ungu pilingeindo komu naa tendeko moromele. Eno mongo kumbuli moromele. Aku ulu teko moromelemunga naa kanoko naa pilko moromele.

Aku ulumaaku teko naa telemalanje enoni enonga mongoni kanoko uluma imbitiko komuni pilko konopuma pilkolio konopu topele tolemala, kano kinyenani eno koinjo pangei nilka, nimbe Goteni nimu. (Ais 6:9-10)

Aisaianiaku tepea nimu mele, kinye we imboma teko moromele.

<sup>16</sup> Nalo na lombili andolima enoni mongoni paa paimbo kanoko komuni paa paimbo pilko moromelemunga eno malo.

<sup>17</sup> Nani enondo i ungu paa paimbo nimbo tiro. Oi moloringi imboma, Gotenga nimbe munduli ungu ningi profet iyema kinye, Gotenga unguma pilko liko tumbitiko moloringi imboma kinye, kano imbo awini kinye eno mongoni kanoko moromele melema kinye uluma kinye kanongeindo kanamilia ningi moloringi nalo naa kanoringi. Eno kinye komunipilkomo moromele unguma pilingeindo pilemilia ningi moloringi nalo naa pileringi akumunga nani eno kinye paimbo kanoko paimbo pimelemunga eno malo nio.

*Wit mongomunga kongolino ltimu ungu pulumu*

<sup>18</sup> Kinye, imbo teni wit mongo tanda tirimu ungu kongolinomunga pulumu nembo pileio.

<sup>19</sup> Mongo mare tanda tirimu aulkena mainye purumu kanomanga ungu pulumu i tepea: Imbo teni Gote iye nomi kingimu molopa imboma nokoromomunga ungumu pilpelie naa pimo wali ulu kerimanga pali ulu pulumu peremo kuromuni ombo

mongo tanda tili konopuna pumbei pere-moma walitikale toropa wendo ltimo.

<sup>20</sup> Mongo mare tanda tirimu kou per-imuna mainye purumuma imbo mare i teko moromele. Imbo marení ungumu pilko-lio walitikale tumbi tiko konopu tiko pilko ltimele.

<sup>21</sup> Nalo eno pulkono naa mundukolio ungumu alaye kolte kau pilko moromele. Pele eno konopuna umbuni teremo kinye molo eno Gotenga ungumu pilko liko moromele mele imbo lupemani kanoko keri pilkolio ungu taka tondoko teko kenjiko mindili tirimele kinye enonga pilko ipuki tirimele unguma tiye koromele.

<sup>22</sup> Mongo mare tanda tirimu lokoloko teli unjo ka molorumuna mainye puru-muma imbo mare kape aku teko moromele. Enoni ungumu pimele kinye konopuna um-buni teremo umbunima kinye, mele awini noikolio aku melemani lino lipe taporomo ningo pilko moro mele uluma kinye, kano teli ulu mare wendo ombo ungu kanomu topa noromo kinye ungumuni ulure naa tepa langi mongo naa toromo.

<sup>23</sup> Imbo mare tanda tirimu mai pengana mainye purumuma imbo mare aku teko moromele. Enoni ungumu pilkolio ungu pulum pilko kondoromele. Pele eno langi mongo toromele. Kano imbo marenega langi mongo 100 topa, imbo marenega 60 topa, marenaga 30 topa, aku tepa toromo," nimu.

#### *Era kerima poinyena wendo orumu nimbe kongolino lipe nimu*

<sup>24</sup> Jisasini ungu kongolino te lipe imboma nimbe tipelie nimbei, "Gote iye nomi kingimu molopa imboma nokoromo akumu i tepa mele. Iye teni yunge poinyena wit mongoma pumbe tanda tirimu.

<sup>25</sup> Nalo imboma uru peringi kinye yunge opa pule iye te ombo wit none teli era kerimanga mongoma wit poinyena tanda tipelie purumu.

<sup>26</sup> Kano kinye mongo pengama wendo ombo wit mongo torumu wali era kerima popo tiko molorumuna kanoringi.

<sup>27</sup> Kano kinye poinye pulu iyemunga kon-gono tendeli iyema ongo yundo ningei, 'Awilimu, nunge poinyena langi mongo pengama tanda naa tirinuya? Ambe telka era kerima kinye wendo oromoya?" ningi.

<sup>28</sup> Yuni enondo nimbeindo, 'Tena. Opa pule iye teni aku era mongoma ombo tanda tirimu lepamo,' nimu. Kongono tendeli iye-mani ningei, 'Era peya wakamaka wendo orombele kani pumbo era kerima akupo lipo maku tamili konopu Itenoya?' ningi.

<sup>29</sup> Nalo yuni nimbei, 'Molo. Era tengen wali wit peya pulu akungenje.'

<sup>30</sup> Altopa wit kamukumu lipo maku tomilindo oi peya ongo molangili. Pele

wit kamukumu limolo walimu wendo ombalo wali nani wit karu leko lindinge imbomando nimboi, "Oi era kerima kalangei liko piye teko maku toko noikolio, altoko wit inie toko nanga wit noiro ulkena maku toko noindeio," nimbo,' nimu," nimbe Jisas nimu.

#### *Mastet mongo paa kelomunga manda lepalie nimu*

<sup>31</sup> Ungu te manda lepalie nimbei, "Gote iye nomi kingimu molopa imboma nokoromo akumu i tepa mele. Iye teni unjo mastet mongo te lipe

<sup>32</sup> yunge poinyena tanda tipe mundurumu. Mastet mongo akumu langi imbomanga pali yu paa kelomu nalo wendo ombo awili ltemo kinye poinyena moromo melemanga pali yu paa awilimu. Kamukumu awili lepa unjo mele angimo kinye kerama ongo unjo komanga manga takoromele," nimu.

#### *Yisimunga manda lepa nimu*

<sup>33</sup> Ungu te manda lepalie nimbei, "Gote iye nomi kingimu molopa imboma nokoromo akumu i tepa mele. Ambo teni yu langi plawa akopili nimbe isi walo kolte plawa awininga mundupe topele torumu kinye plawa pali akorumu," nimu.

#### *Jisasini ungu manda lelima kau nimu*

<sup>34</sup> Kano unguma pali Jisasini imbomando nimbe yu ungu manda lepa kau nimu. We ungu te enondo tumbi tipe naa nimbe ungu manda lepa kau nimu.

<sup>35</sup> Aku tepa terimumunga koro oi Gotenga ungu nimbe mundulima imboma nimbe tirimu iye profet teni oi i tepa nimbei, Nani i ungu nimboindo ungu manda lepo kau nimbo. Goteni oi mulu mai talo terimu wai kape ombo yandopa yandopa kape kinye kape mona naa ningi lopeke tepe perimu unguma nimboindo ungu manda lepo kau nimbo,

(Sng 78:2)  
nimu. Jisasini terimu ulumu aku ungumu ara tirimu.

#### *Era kerimunga ungu manda lepa nimu-munga ungu pulumu*

<sup>36</sup> Jisasini ungu manda leli akuma nimbe pora tipelie, yu maku toko moloringi imboma tiye kolopaulkendo purumu wali yu ki tipi kanoli iyemani yu molorumuna ongolio ningei, "Poinyena era keri orumu ungu manda lelimunga ungu pulumu linondo ningo para tiwi," ningi.

<sup>37</sup> Yuni topondopa nimbei, "Langi mongo pengama tanda tirimu iyemu aku Iyemu-na Malo.

<sup>38</sup> Poinyemu mai kombu pali. Langi mongo pengama imbo Gote nanga iye nomi kingimu molopili nimelemunga enonga

konopumanga Goteni tapu tepa molopa nokoromo imboma. Era keri akuma ulu kerimanga pali ulu pulumu peremo kuromunga imboma.

<sup>39</sup> Era keri mongo tanda tirimu opa pule akumu kuromanga nomi Satan. Wit tukundo liko maku tonge wali akumu mai kombu pora nimbelo walimu. Wit mongoma tukundo linge imboma mulu kombuna enselema.

<sup>40</sup> Erama liko maku tokolio tipena karomele mele mai kombu pora nimbelo walimunga aku tepa.

<sup>41</sup> Iyemunga Maloni yunge enselema lipe mundumbelo wali, enoni imbo Gotenga unguma naa pilko, teko kenjiko moromele imboma pali kinye, ulu pulu keri teremele imboma pali kinye, Goteni tapu tepa molopa nokoromo imboma molongena wendo liko maku tokolio,

<sup>42</sup> tipe awili nomba peremo kombuna tukundo toko mundunge, kanona imboma kola teko paa mindili nongo perekolo molonge.

<sup>43</sup> Kano walimanga imbo tumbi nilima enonga Lapa iye nomi kingimu molopa nokoromo kombuna ena pa teremo mele enoaku teko pa tepili molonge. Imbo komu angimomani i ungumu pileio," nimu.

*Kou ket maina lopeke tepa peremo mundo kongolino lipe nimu*

<sup>44</sup> Jisasini aku nimbeline nimbei, "Gote iye nomi kingimu molopa imboma nokoromo akumu i tepa mele: Kou mone mare ket tengu tuku panjikolio poinye tengu oi muru liko lowai teringi we perimu. Iye teni walite kanopa ltendepalie kelepa aku torumu. Aku topalie konopu tipe pumbe yunge melema pali lipe maket tepa kou yando lipelie aku poinyemu pumbe yando ltimu," nimu.

*Kulumbu kou paa olandopa puli te yolo lilimu manda lepa nimu*

<sup>45</sup> "Gote iye nomi kingimu molopa imboma nokoromo akumu i tepa: Kou bisnis teli iye teni kulumbu paa pengama kororumu.

<sup>46</sup> Kano kinye kulumbu kou paa awili puli te kanopalie, yu pumbe yunge melema pali yolo lipe kou yando lipelie kano kulumbu pengamu topo topa yando ltimu," nimu.

*Oma munemunga manda lepa ungu nimu*

<sup>47</sup> "Gote iye nomi kingimu molopa imboma nokoromo akumu i tepa mele: Oma mune te nomuna toko munduringi kanomuni oma lupe lupema ltimu.

<sup>48</sup> Oma munemu paa peko lerimu kinye kunduko liko nomu kulendona noikolio, mainye molko moke tekolio pengama liko

wali basket pokorenga munduringi nalo kerima toko lteringi.

<sup>49</sup> Mai kombumu pora nimbelo walimunga aku tepala. Mulu kombuna enselema ongolio, imbo teko kenjiko molongema wendo liko imbo tumbi tiko molko kondongema molangei ningi aku teko moke tekolio

<sup>50</sup> imbo teko kenjiko molongema liko tipe awili we nomba kau peremo kombuna toko tuku mundunge, kanona kola teko paa mindili nongo perekolo molonge," nimu.

<sup>51</sup> Ungu kongolino lipe nimbe pora tipelie Jisasini ki tipi kanoli iyema walipe pilipelie nimbe, "Aku unguma pali ungu puluma eno piltimoleya?" nimu. Enoni yundo ningei "Piltimolo," ningi.

<sup>52</sup> Yuni enondo nimbei, "Aku lemo Gotenga ungu manemanga puluma pilko mane tirimele iyemani Gote iye nomi kingimu molopa imboma nokoromomungu unguma mane tirimolo kinye pilko liko moromele kano iyema eno i tepa: Ulke pulu iye teni yunge mele penga awini noirimomanga mele koinjoma kinye mele oima kinye peya wendo lipe mepa oromo," nimu.

*Nasaret imbomani Jisas umbulu tiringi*

<sup>53</sup> Jisasini aku ungu kongolino nimbe pora tipelie kano kombumu tiye kolopa yu purumu.

<sup>54</sup> Tiye kolopa pumbelie yunge ulke kombu Nasaret ombalie Juda imboma maku toko Gotenga ungumu pileringi ulkena tuku pumbe imboma mane tirimu kinye pilkolio eno mini ltekolio ningi, "I iyemu yunge lipe manjilimu kinye yunge ulu enge nili teremomanga engemu kinye yu tena ltimuya?

<sup>55</sup> Yu ulkema takorumu iyemunga malo, Maria yunge anumu. Jems kame, Josep kame, Saimon kame, Judas kame, yunge angenupili moromele.

<sup>56</sup> Yunge kemulupili lino kinye peya momromo. Aku lemo yunge lipe manjilimu kinye yunge ulu enge nili teremomanga enge nilimu kinye yu tena ltimuya?" ningi.

<sup>57</sup> Aku teko unguma ningi yu ungu nimbe uluma tepa molorumu mele kanoko keri pilko yu umbulu tiringi. Yu umbulu tiringi ulu kanopalie Jisasini enondo nimbei, "Gotenga iye profet tengu imbi mololi akumu kombumanga pali imbomani pali pilkolio yunge unguma pilko ltimele.

Nalo yunge ulke kombuna yu kinye peya kopu teko moromele imboma kau yuni nimo ungummu pilkolio yu linonga we iyere, yu imbi mololi iye te molo ningi yu nimo unguma naa pilko, liko tui tirimele," nimu.

<sup>58</sup> Kano kinye yu ungu nimbe uluma tepa yu yunu molorumu mele ipuki naa tiringi

wali yu kano kombuna ulu enge nili awini naa terimu.

## 14

*Jon Imbo No Ltindili toko kondoringi*

<sup>1</sup> Kano walimanga kombu Galili distrik nokorumu iye nomi king Heroteni Jisasini terimu mele temane toringi pilipelie

<sup>2</sup> yu kinye tapu toko molko yu liko taporingi tapu iyemando nimbei, "I uluma teremo iyemu Imbo No Ltindili Jon lepamo! Yu kolopalie makilipe wendo omomunga ulu enge nilima teremo engemu yu kinye peremo," nimu.

<sup>3-4</sup> King Heroteni aku tepa nimu ungu-munga pulumu i tepa: Oi walite Heroteni yunge angenu Filiponga ambo omenu Herodias mangopa Itimu. No Ltindili Jononi Herotaku tepa terimu ulu kanopalie yundo waliwalima nimbei, "Nuni Gotenga ungu mane te toko tangondoko angenanga ambomu mangoko Itimu. Akumu teko kenjirinu," nimu kinye Heroteni yu lipe ka tipe ka ulkena panjirimu.

<sup>5</sup> Ka ulkena panjipelie yu topo kondambo konopu lerimu nalo we imbomanji Jon yu Gotenga iye profet te moromo ningokanoringimunga yu pipili kolopalie Jon topa naa kondorumu.

<sup>6</sup> Altopa walite king Herot meringi walimu wendo orumu kinye Herodias lemenu ulkena tukundo omba, iyema maku toko kanoko molangei yu danis terimu. Heroteni ambo wenepomu aku terimu ulu kanopa paa penga pilipelie

<sup>7</sup> yundo nimbei, "Nando tiwi ninio melemu paa timbo," nimbe, nimbe panjipe Gotenga imbi lepa mi lerimu.

<sup>8</sup> Yuni aku tepa nimuna anumuni pilipelie lemenu ungu te nimbe tirimu kinye pilipelie ambo wenepomu Herotendo nimbei, "Imbo No Ltindili Jononga pimingimu plet tengen noiko na tiwi," nimu.

<sup>9-10</sup> Yuni aku tepa mele konge terimuna pilipelie Herot konopu umbuni terimu nalo yuni paa timbo nimbe, nimbe panjipe Gotenga imbi lepa mi lerimu mele kape, yu konopu alowa tendembalo kinye yu kinye peya langi nongo moloringi iyema yu kanoko keri pilinge mele kape,aku ulu talo pilipelie, ka ulkena nokoringi iyemando ungu te nimbe mundupelie Imbo No Ltindili Jononga nomimu toko pule toko pimingimu meko waio nimu.

<sup>11</sup> Aku nimu ungu pilkolio Jon toko kondoko, yunge pimingimu pelete tengen noiko, meko ongo ambo wenepomu tiringi kinye yuni lipe anumu molorumuna mepa pumbe tirimu.

<sup>12</sup> Aku ulu teringimu pilkolio Jon lombili andoringi iyema ongo yunge onomu liko

meko pungo ono tekolio Jisas molorumuna pungo temane toko tiringi.

*Jisasini iye 5,000 langi tirimu*

<sup>13</sup> Iye nomi king Heroteni Imbo No Ltindili Jon topa kondorumu ungumu pilipelie, Jisas yu molorumu kombumu tiye kolopa tengen nanu molambo nimbe nona andoli sip tengen tukundo pumbe nomu Galili nekondo pumbe imbo naa peli kombu tengen kiyengo nimbe pumbe purumu. Nalo imbo awini Yu aku terimumu pilkolio enonga kombuma tiye kolko kimbo kongono teko nomu kulendona makai tendeko pungo yu purumuna akilio leko lombili puringu.

<sup>14</sup> Jisas no kulendona ombalie imbo paa awini akuna maku toko moloringina kanopalie eno kondo kolopa enonga kuro torumu imbo meko oringima tepa koinjo Itimu.

<sup>15</sup> Altopa ipupene ena pepumbei terimu kinye Yu lombili andolima yu molorumuna ongo yundo ningei, "I kombuna imbo te naa peremo. Ena nendo pepurumo kani ya maku toko moromele imboma pungo kombu marenge langi topo toko lipengei niwi," ningi.

<sup>16</sup> Nalo yuni yu lombili andolimando topondopa nimbei, "Ambe temona imbo akuma we pangei nembo ningok nimeleya? Enoni enonganji imboma langi mare liko tieio," nimu.

<sup>17</sup> Enoni yundo ningei, "Ya langi awini molo. Bret kaloli kelo kite pakera kinye oma kaloli talo kinye aku pokon kau itemo," ningi.

<sup>18</sup> Yuni akuma na morona yando meko waio nimu.

<sup>19</sup> Kano kinye imbomando erana mainye molaio nimbelie yuni kano bret kaloli kite pakera kinye oma talo kinye lipelie muluna olando tipe kanopa Gote kinye paa tereno nimbe bret kalolima ambolopa pike lepa oma kinye lombili andolima moke tepe tipelie imboma moke teko tieio nimuna moke teko tiringi.

<sup>20</sup> Eno pali kano langima norangi kinye olo terimu. Pele lombili andolimani langi arikili lerimuma liko maku toko wale basket ki yupoko lakileringi.

<sup>21</sup> Langi norangi iyema 5,000 mele. Ambo bakulu mare peya langi norangi akuma kambu naa toringi.

*Jisas no mongoluna ola andorumu*

<sup>22</sup> Imboma langi tirimu norangi wali jisasini yu ki tipi kanoli iyemando tumbi tipe nimbei, "Maku toko moromele imboma nani pangei nembo. Eno nona andoli sipina ola pungo no nekondo kumbe leko paio," nimu.

<sup>23</sup> Imbomando paio nimbelie yu yunu Gote kinye ungu nimbeindo mai kembona

ola purumu. Kano kinye ena pepumbe kombu kala torumu kinye akuna yunu molorumu.

<sup>24</sup> Sipimu no nekondo pumbeindo nomu awi tuku tingina kokele pumbei purumu wali sip kumbendo mendo tipe poporomeni topa, nomu torumula kinye nomu ola pumbe mainye omiba terimu, sipimu topa ola munde mainye munde terimu.

<sup>25</sup> Kano kinye ipu leli kombu muni naa lepili yu lombili andolima sipina ola molko puringina Jisas nona ola kimbo kambulupe tepa sipina ombai orumu.

<sup>26</sup> Enoni yu nona ola kimbo kambulupe orumu ulu kanokolio, pipili awili teko kolkolio "Kuro te oromoa!" ningi mini lteringi kinye

<sup>27</sup> Jisasini tamburumbu enondo nimbei, "Eno konopu toimbo topili molaio. Na kau oro. Pipili naa kolaio," nimu.

<sup>28</sup> Yuni aku nimu ungu pileringi kinye Pitani topondopa nimbei, "Awilimu, akumu paimbo nu kau onio lemo nu oronona na nona ola angilipo wambo niwi," nimu.

<sup>29</sup> Yuni owi nimu kinye Pita sipina wendo pumbe nona mainye pumbelie nona ola kimbo kambulupe Jisas molorumuna pumbelie purumu.

<sup>30</sup> Nalo poporome enge nili torumu kinye kanopalie pipili kolopa yu no wangombai tepalie, "Awilimu, na ki ambolko liwi!" nimbe alako torumu.

<sup>31</sup> Kano kinye Jisasini ki tinio tipe ambolopaa Pita kundupe ola lipelie yundo nimbei, "Nu alaye kolo kau ipuki tirino iyemu ambe temona konopu talo ltenoya?" nimu.

<sup>32</sup> Sipina tuku puringili kinye poporome topa kelerimu.

<sup>33</sup> Aku terimu ulu kanokolio sipina tuku moloringi iyemani Jisasinga imbi liko ola mundunduko kapi ningi "Nu paimbo Gotenga Malo lepamo," ningi.

*Jisasini Genesaret kombuna imbo kuro toli awinima tepa koinjo ltimu*

<sup>34</sup> Kano wali Jisas kinye Yu lombili andolima kinye nomu Galili nekondo pungolio nomu kulendona kombu Genesaret lerimuna wendo oringi.

<sup>35</sup> Kano kombuna sipina mainye oringi kinye akuna moloringi iyemani Jisas kanoko imbi tikolio akundo lerimu kombumanga moloringi imboma pali ningi munduringi kinye imbomani kuro torumu imboma pali yu omiba molorumuna meko ongolio,

<sup>36</sup> nunge wale pakoli pundumu kau ambolangei niwi ningi konge teringi. Kano kinye kuro torumu imbomani yunge wale pakolimu amboloringi imboma waye koinjo puringi.

## 15

*Gotenga ungu manemuni anda kolepalenga uluma pange tenderimu*

<sup>1</sup> Kano kinye Farisi iye mare kinye, Gotenga ungu manemanga puluma pilko mane tiringi iye mare kinye eno Jerusalem tiye kolko Jisas molorumuna ongo yu waliko pilkolio ningei,

<sup>2</sup> "Linonga anda kolepalemani teao ningi ungu manemu nu lombili andolimani ambe telka toko tangondoromeleya? Anda kolepalemani teao ningi mele wambo pilipolio linoni kima kulumie toromolo mele enonga kima aku teko kulumie naa toko langi we noromele," ningi.

<sup>3</sup> Jisasini topondopa nimbei, "Enoni kape enonga anda kolepalemani teao ningi mele kau pilko liko teneindo Gotenga ungu manema ambe telka toko tangondoromeleya?

<sup>4</sup> Akumunga Goteni nimbei, Aminyeli lanielinga unguma pilko liko tene tiko teao, nimbe

Imbo teni yunge anumundo molo lapando ungu te nimbe kenjipe iri tomo lemo kano imbonu toko kondangei, (*Kis 15:4; Lo 5:16*)

nimu kanomu.

<sup>5</sup> Nalo eno iyemani ningei, imbo teni yunge anumu lapa talondo nimbei nani elo mele mare lipo tapopo tilkama oi Gote timbo nimbo panjindu kanomunga elo manda naa lipo tapopo timbo nimbelie

<sup>6</sup> aku tepe nimbelomunga yunge lapa imbi lipo ola mundumbelo ungu te naa pembalo nimele. Aku teko nimele ungumuni anda kolepalemani mane tiringi unguma olandopa ningi Goteni nimu ungumu ulure molo mainye pupili nimele.

<sup>7</sup> Eno ungu manema pilko mane tirimele iyema kinye Farisi iyema kinye eno topele mapele toli iyema moromele! Gotenga profet iye Aisaiani enondo nimu mele i tepa paimbo nimu.

<sup>8</sup> Goteni nimbei,

Kano imbona enonga keremani na kapi ningi Iye Awili olandopamu, nu lipo awili tirimolo ningi na imbi liko ola mundurumele nalo enonga konopuma tule tepa ltemo. Na naa tirimele.

<sup>9</sup> Enoni nanga imbi lipo ola mundemili ningi na we popo toko kapi nimele. Maina imbomani mane tirimele unguma kau mane tikolio i ungu manema Goteni teao nimo ungu manema ningi pilko liko teremele, akumunga na popo tonge kinye popo we toromele, nimu, (*Ais 29:13*) nimbe nimu.

*Jisasini imboma tepe kaloro mundurumo ulu akuma nimu*

<sup>10</sup> Aku tepe nimbeline Jisasini maku toko moloringi imbomando na morona waio nimbeline enondo nimbei, "Nani aku niomunga ungu te nimboi tero ungumu komu tendeko ungumunga pulumu pilko kondaio.

<sup>11</sup> Imbomanga kangina tawendo lepalie kerena pumbe olona tuku purumo melteni Gote manda popo tonge aulkemu pipi timbei kalaro te manda naa mondoromo. Imbomanga konopuna tukundo pepalie wendo oromo ulumani kau imboma tepe kalaro mondoromo," nimu.

<sup>12</sup> Aku nimu ungu pilkolio, yu lombili andolima yu molorumuna ongolio ningei "Nu aku teko nino ungu pilkolio Farisi iyemani paa pilko keri pilinge mele nu piltinoya?" ningi.

<sup>13</sup> Nalo Jisasini topondopa ungu manda lepa Farisima moloringi mele nimbeline nimbei, "Nanga mulu kombuna moromo Arani poinyena langi imbo naa panjirimuma pali pulu akumbelo.

<sup>14</sup> I iyemani nimele mele konopu kimbo tiko naa pilko molangei. Eno mongo keri lelimani mongo keri lelima aulke liko ondoromele iyema moromele. Mongo keri leli iye teni mongo keri leli iye te aulke te lipe ondopa ki ambolopa mepa pumbelo wali elo waye kombuna topa mainye mundumbelo," nimu.

<sup>15</sup> Kalaro moromomunga ungu manda lelimu aku tepe nimu kinye pilipelie Pitani yundo nimbei, "Aku ungu manda leko niniomunga pulumu ambe tepaya? Ningo para twi," nimu kinye

<sup>16</sup> Jisasini enondo nimbeindo, "Kinye kape eno naa piltimeleya?

<sup>17</sup> Imbo tenga kangina tawendo lepalie kerena purumo melte olona tuku pumbe tawendo ombo le muruna kamukumu purumo mele naa liko manjirimeleya?

<sup>18-19</sup> Kerena tukundo purumo melemani ulure naa teremo. Ulu kerima oi konopu liko manjikolio pele kamukumu wendo oromomunga konopuna pepalie kerena wendo oromo kano melemani kau Gote popo tombalo aulkemu pipi timbei kalaro mondoromo. Kano melema i tepe: Konopuna ulu kerima pimele, imboma toko kondoromele, ambo iye pulima molo iye ambo lilima imbo lupema kinye ulu kerinale teremele, wapu ulu kerinali lupe lupema andoko teremele, wapu noromene, kolo toko imboma kot tenderemele, imboma pipili kolko molko kenjingei ningi ungu umbulkondo nindirimele, ulu pulu akuma pilko teremele.

<sup>20</sup> Aku teremele ulu akumani imboma Gotenga kumbekerena tepe kalaro mondoromo. Nalo ki oi naa kulumie toko langi we tumbi tiko noromele ulu pulumuni imbo tengen konopuna tuku kalaro naa mondoromo," nimu.

*Kenan ambomuni Jisas ipuki tirimu*

<sup>21</sup> Kano kinye Jisas kombu Genesaret tiye kolopa Juda imboma moloringi kombu Galili distrik tawendo kombu awili Tair kinye Saidon talo lerimu kombuna tukundo purumu.

<sup>22</sup> Akuna purumu kinye kombu Kenan ambo te molorumu. Yu wendo ombo alako topalie nimbei, "Awilimu, Iye Nomi King Devitini Kalopa Ltimu Iyemu, nanga balamu kuro te konopuna tukundo molopa yu enge nimo kani nuni na kondo kolowi!" nimu.

<sup>23</sup> Nalo Jisasini yundo ungu te topondopa naa nimu. Kano wali yu lombili andolimani ongo yundo ningei, "Ambomuni nu konge nilipe nilipe lino lombili kapu toromona lino tiye teremo kani anjo pupili niwi," ningi.

<sup>24</sup> Ambomu yu ambo lupe, Juda ambo te molo nimbe kanopalie Jisasini yundo nimbeindo, "Goteni na Israel imbo talapemunga kongi sissip beambo ningi moromele imboma moromelena kau lipe mundurumu. Imbo talape lupema moromelena lipe naa mundurumu," nimu.

<sup>25</sup> Aku tepe nimu ungu pilipelie ambomu ombo yunge kumbekerena komongo topa pondopa mai kanopalie nimbei, "Awilimuya, na liko tapowi," nimu.

<sup>26</sup> Aku tepe nimu kinye Jisasini topondopa ungu manda lepa nimbei, "Bakulumanga langima lipo owama timolo kinye manda naa tembalo," nimu.

<sup>27</sup> Ambomuni nimbei, "Awilimuya, paimbo nino nalo owamani kape enonga pulu imbomanga langi pundu polona mainye purumoma liko noromele," nimu.

<sup>28</sup> Kano kinye Jisasini yundo nimbei, "Ambomu, nu enge ningi ipuki tirino akumunga kinye konge tereno mele aku tepe wendo opili," nimu. Aku tepe nimu waimungaaku wali ambomunga lemenu koinjo pumbe molorumu.

*Jisasini kuro torumu imbo awini tepe koinjo ltimu*

<sup>29</sup> Aku wali Jisas kano kombumu tiye kolopa nomu Galili kulendo aulke te lerimu ombo pumbe mai kembo tengen ola pumbe molorumu.

<sup>30</sup> Kano wali yu molorumuna imbo paa awini oringi. Kimbo keri lerimuna aulke wamongo naa andoringi imboma kinye, mongo keri lerimu imboma kinye, kimbo kikeray maraye terimu imboma kinye, ungu

manda naa ningi imboma kinye, aku tepa kuro lupe lupe torumu imbo awini meko ongo yu molorumuna nondoko noiringi kinye yuni akuma tepa koinjo ltimu.

<sup>31</sup> Ungu naa ningi imboma ungu ningi. Kimbo ki karaye maraye terimu imbomanga kimbo kima kelepa toyatormu. Kimbo keri lerimu aukle wamongo naa andoringi imboma manda andoringi. Mongo keri lerimu imboma mongoni melema kanoringi. Aku tepa ulu enge nilima wendo orumuna kanokolio we makutoko moloringi imbomania paa konopu awini liko munduko, Gote eno Israel imboma nokorumu popotoringi Gote kapi ningi imbi liko ola munduringi.

#### *Jisasini imbo 4,000 langi tirimu*

<sup>32</sup> Aku wali Jisasini yu lombili andolimando na morona waio nimbeline enondo nimbei, "I imbo maku toko moromelema na kondo teremo. Wali yupoko na kinye molonge, kinye gai nongei te naalitemo. Eno langi naa nongowepunge kinye aulkenna kimbo ki tambaramba tepsa, topa ne munde ya munde tembalo kani eno engele tepsa pepili ulkendo pangei naa nimbo," nimu.

<sup>33</sup> Aku nimu ungu pilkolio yu lombili andolimani ningi, "Paimbo nino nalo i imbo naa peli kombuna moromodo. I imbo paa awini manda nonge mele bret kaloli tenalembalona lipotimoloya?" nimu.

<sup>34</sup> Jisasini enondo "Bret kaloli ambe teko noirimelyea?" nimbe waltindirimu wali enoni "Bret kaloli kite yupoko pakera kinye oma koltalo kinye noirimolo," ningi.

<sup>35</sup> Kano wali yuni maku toko moloringi imbomando mainye molaio nimbeline,

<sup>36</sup> bret kaloli kite yupoko pakera kinye omama kinye lipe Gote kinye paa tereno nimbe, langi akuma pike lepa yu lombili andolima tirimu kinye enoni imboma moke teko tiringi.

<sup>37</sup> Imboma pali nongo olo terimu. Pele langi nurupulu lierimuna lombili andolimani liko wale basketemanga lakilerengi. Wale awili kite yupoko pakera peko lerimu.

<sup>38</sup> Iye 4,000 aku langima noringi. Ambo bakuluma kinye peya langi noringima kambu naa toringi.

<sup>39</sup> Kano kinye Jisasini maku toko moloringi imbomando ulkendo paio nimbeline, nona andoli sip tenga tuku pumbé, nomuna nekondo kombu Magadan purumu.

## 16

### *Jisasindo ulu enge nilima tewi ningi*

<sup>1</sup> Kombu Magadan purumu wali Jisas molorumuna Farisi iyema kinye Sadyusi

iyema kinye eno ongo, yuni ambe tembalonje, kanamili ningi yu manda manjiko kongektekolio ningi, "Ungu Mane Tilimu, nu paimbo Goteni kongono tendani nimbe ya maina lipe mundurumunje kanamili ningi mulu kombuna moromo Goteni kau manda ulu enge nili teremo mele te tewi," ningi.

<sup>2</sup> Jisasini topondopa nimbei, "Ipupene ena pepumbeindo mulumu kondoromo wali kanokolio wali pengamu wendo ombalo nimele.

<sup>3</sup> Ipu leli oi kombu tangombaindo kombu kupe topa mulumu tumbulu toromo kinye kanokolio lo ombalo konopu itemele kanomu. Mulumu kanokolio kombumi i tepsa i tepsa tembalo ningi karomele nalo i walimanga uluma wendo oromoma kanokolio ulumanga pulumu manda naa pimele.

<sup>4</sup> Kinye maina moromele imboma imbo kerima kau moromele. Eno teko kenjiko Gote liko tui tirimele kano imbomania Goteni kau ulu enge nilima manda teremo mele kanamili tewi ningi na konge teremele. Nalo Goteni na lipe mundurumuna yaombo molto. Yu kinye tapu topo kongonoterembolo mele lipe ondombai ulu enge nili te wendo naa ombalo. Gotenga profet iye Jonani terimu ulumuni kau lipe ondoromo mele manda kanonge. Te lipe wendo naa ombalo," nimbeline eno tiye kolopa purumu.

### *Yis manda lepa Farisima kinye Sadyusima kinye akumanga Jisasini nindirimu*

<sup>5</sup> Eno nomu Galili nekondo pungeindo Jisas lombili andoli iyema bret kaloli komutindiko naa meko purungi.

<sup>6</sup> Kano kinye Jisasini enondo lepilepi topa ungu iko topalie nimbei, "Paa wamongo kanaio! Farisi iyema kinye Sadyusi iyema kinye enoni plawa akopili isi noirimelyea kane kane molaio!" nimu.

<sup>7</sup> Aku tepa nimu ungu pilkolio yu lombili andoli iyemani enonganano nendo yando ningolio ningi, "Lino bret kaloli nomili mare naa lipo mepo omolomungaaku tepanimonje," ningi.

<sup>8</sup> Aku teko ningi ungu pilipelie Jisasini enondo nimbei, "Eno nani manda lipe tapombalo ningi walo kolte kau ipuki tirimele iyema, bret kaloli naa memolo ningi ambe telka nimeleya?

<sup>9</sup> Kinye kape eno naa pilko kondoromeleya? Bret kaloli kite pakera iye 5,000 moke teko tiringi mele komu tindirimeleya? Nongo pora tiringi kinye langi pundu lierimuna liko wali basket awini toko peko tiringi mele komu tindiko naa liko manjirimeleya?

<sup>10</sup> Molo bret kaloli kite yupoko pakera moke teko iye 4,000 tiringi mele naa pilko, nongo pora tiringi kinye wale basket awili mare langi nurupulu lerimuma lakilko peko tiringi mele naa pilko moromeleya?

<sup>11</sup> Yuni paimbo plawa kalolimundo naa nimo ningi ambe temona naa pilenguya? Farisi iyema kinye Sadyusi iyema kinye plawa akopili mele isi noirimelemu wamongo kanangei nindu nio," nimu.

<sup>12</sup> Yuni aku nimu ungu pilkolio enoni plawa kalongeindo isi mundurumele akumundo naa nimo, Farisi iyema kinye Sadyusi iyema kinye enoni ungu mane tiringi ungumando nimo ningi pileringi.

*Pitani Jisas yu Kraist moromo nimbe para tirimu*

<sup>13</sup> Jisas kombu awili Sisaria Filipai lerimu kombuna pumbelie, yu lombili andolimando walipe pilipelie nimbei, "Iyemenga Malondo imbonani Yu imbi leko nari nimeleya?" nimu.

<sup>14</sup> Enoni yundo ningei, "Mareni nu imbo no ltindili Jon kolorumu, kinye kelepa makilipe ola moromo ningi pilko, mareni nu Goteni oi koinjo molopili olando ltimu iye Elaija kelepa omiba moromo ningi pilko, mareni nu Jeremaia molo Gotenga iye profet oi kolorumu kinye makilipe ola moromo te lupe nimele," ningi.

<sup>15</sup> Aku teko ningi ungu pilipelie Jisasini enondo nimbei, "We imbonani aku teko nimele nalo enoni na nari nimeleya?" nimu.

<sup>16</sup> Saimon Pitani topondopa nimbei, "Nu Koinjo Molopa Kau Puli Gotenga Malo, Goteni lino nokopa kondombalo iye te lipo mundumbo oi nimbe kanopa ltimu iye nomi Kraist," nimu.

<sup>17</sup> Yuni aku nimu ungu pilipelie Jisasini yundo nimbei, "Jonanga malo Saimon, nu malo. I ninomu maina imbo teni nu naa nimbe timo. Ara mulu kombuna moromomuni nimbe timo.

<sup>18</sup> Unku te peya nundo nio. Nunge imbi Pita, kano imbibunga ungu pulumu kou kanomu. Kano koumunga ola nanga imbo talapemu lipo maku topo mondomblo. Aku wali kololi ulu pulumunga enge nilimuni i nanga talapemu topa mainye manda naa mundumbelo, molo.

<sup>19</sup> Gote iye nomi king molopa imboma nokombalo ulke kimu nu timbo. Aku wali nuni maina mele tendo molo nini meleme mulu kombuna tukundo moromo Goteni molo nimbelo. Nu maina mele tendo manda nini meleme mulu kombuna tukundo moromo Goteni manda nimbelo," nimu.

<sup>20</sup> Kano kinye yu lombili andolimani Jisasindo Goteni eno nokopa kondombalo

iyere lipo mundumbo oi nimbe kanopa ltimu iye nomi Kraist nu ongo morono ningi kano ungumundo yuni enondo enge nimbe nimbei, "Enoni anjo imbo tendekurendo kape na kano iyemu moro mele i teli oi paa naa ningi tieio!" nimu.

*Jisasini yu kolopolio altopo makilimbo nimu*

<sup>21</sup> Kano kinye Jisas yu lombili andolimani yundo Goteni lino nokopa kondombalo iye te lipo mundumbo oi nimbe kanopa ltimu iye nomi Kraist nu ningi, ningi para tiringi kinye pilipelie yuni yu kinye wendo ombalo mele pulu polopa eno tumbi tipe nimbe tipelie nimbei, "Na mindili awini nomboindo kombu awili Jerusalem paa pumbo nimbo pilipo moro. Juda imboma nokoromele tapu iyema kinye, Gote popo ton-doli iye awilima kinye, Gotenga ungu manemanga puluma pilko mane tirimele iyema kinye, enoni na paa toko mindili kondonge. Na toko kondonge kolombo kinye, wali talo omnia pumbelo kinye yupoko tipemunga Goteni nando makilko koinjo molowi nimbelo," nimu.

<sup>22</sup> Aku nimu ungu pilipelie Pitani yu wendo lipe aulke kulendo mepa pumbelio yu pulu polopa iri topale nimbei, "Awilimu, aku teko paa naa niwi! Nu nino mele aku tepa paa wendo naa ombalomu," nimu.

<sup>23</sup> Nalo Jisasini topele topa Pitando nimbei, "Satan, nu anjo pa! Goteni nando tewi nimu kongono temboi teromu pipi tini tereno kani nu anjo pa! Nu Goteni konopu iteme mele naa lteno. Imbonani konopu itemele mele kau lteno," nimu.

<sup>24</sup> Kano kinye Jisasini yu lombili andolimando nimbei, "Imbo teni yu lombili pambu nimbelie yuni yunge konopumuni pimo mele manga topo mainye mundemblo nimbe imboma unjo polopeyana angilko mindili nongo koromele mele yuni unjo polopeya mele gomo lembaindo Jisas lombili pumboindo mindili nondu lemo manda; kolondu lemo manda nimbelie na lombili opili.

<sup>25</sup> Imbo teni yunge maina molopa naa kololi ulu pulumu ambolopa tembalo kinye yu kolopalie paa molopa kenjipe kau pumbelo. Nalo imbo teni na konopu mondopalie nanga kongonomu tendamboi nimbe tembalo kinye yu kolopalie yu koinjo molopa kondopa kau puli ulu pulumu paimbo kanopa limbelo.

<sup>26</sup> Akumu ambe temona nioya? Imbo teni maina melema pali yu yunu lipe noipelie yu mini pali kombu kerina pumbe mindili nomba molopa kenjilkanje kano melemani kano imbonu ambe tepa lipe tapolkaya? Lipe naa tapolka. Molo imbo teni na mini pali koinjo molopo kondopo

kau pambo nimbeline yu ambele melteni mini pali koinjo molopa kondopa kau puli ulu pulumu topo topa likaya? Melteni manda topo topa naa limbelo.

<sup>27</sup> Iyemunga Malo altopa Lapanga enge pa telimu kinye yunge mulu kombuna enselema kinye peya ombalo. Ombalie yuni lino ya maina imboma yu mele mele teremele ulumanga lino yu mele mele pundu tomboimunga nani aku tepo nio.

<sup>28</sup> Nani enondo paimbo i nimbo tiro. Eno iye angiltiemele manga mare oi naa kolangei Iyemunga Malo iye nomi kingimu om̄ba molopa imboma pali nokombai ombalona kanonge,” nimu.

## 17

### *Jisasining kangimu te lupe wendo orumu*

<sup>1</sup> Jisasini yu lombili andolimando aku tepe nimbe tirimu kinye pele wali kite talo pakera om̄ba purumu kinye Pita kame Jems kame Jems angenu Jon kame eno lipe meli pumbe mulu paa olandopa polarumu tengə ola purumu. Lino linongan kau molamili nimbe eno akuna lipe mepa purumu.

<sup>2</sup> Akuna puringi kinye eno kanoko molangei yunge kangimu alowa tepe, yunge kumbekeremu ena enge nili topa imbomanga mongo yumi yami teremo mele pa awili tepe, yu pakorumu wale pakolima pa teremo mele aku tepe kake terimu.

<sup>3</sup> Yuaku tepe molopili, Juda imbomanga koro oi moloringili iye awili Moses kinye Elaija talo ongo Jisas kinye ungu ningō mona waye angileringilina kanoringi.

<sup>4</sup> Kano kinye Pitani Jisasindo nimbei, “Awilimu, lino ya moltomolo penga lepmamo. Nuni ee ninio lemo, ulke takai yupoko takondombo. Te nunge, te Mosesinga, te Elaijanga takondombo,” nimu.

<sup>5</sup> Yuniaku tepe nimbe molopili kupe kake pa teli te om̄ba enoaku torumu kinye kupa tuku ungu te wendo ombalie nimbei, “I iyemu nanga konopu mondoro Malomu. Yu kinye konopu noiro. Yuni ungu nimbeloma pilko lieio,” nimu.

<sup>6</sup> Akutepe nimu ungu pilkolio yu lombili andoli iye yupoko paa mini ltekolio maina mainye molko tamalu peringi.

<sup>7</sup> Eno tamalu peringina Jisas om̄ba eno ambolopalie nimbei, “Mini naa lteko ola angleio,” nimu.

<sup>8</sup> Altopa olando tiko kanoringi kinye Jisas yunu angilerimuna kanoringi.

<sup>9</sup> Mulu polarumumunga mainye ongei oringi kinye Jisasini eno mane tipelie nimbei, “Enoni kinye kanonge mele i teli oi imbo tendekure kape ningō naa tieio. Altopa, Iyemunga Malo kolopalie makilipe

koinjo molombalo kinye temanemu tokonjo tieio. Oi molo!” nimu.

<sup>10</sup> Aku tepe nimu ungu pilkolio yu lombili andolimani yu paimbo molorumu mele ningō kanokolio yundo waliko pilkolio ningei, “Goteni lino nokopa kondombalipe mundumbo nimbe kanopa ltimu iye nomi Kraist nu lemo Gotenga ungu manemanga puluma pilko mane tirimele iyemani Elaija kelepa kumbe lepa ombalo, iye nomi Kraist pele akilio lepa ombalo nimele mele ambe telka nimeleya?” ningi.

<sup>11</sup> Jisasini topondopa nimbei, “Elaija kelepa kumbe lepa ombalie melema pali tumbi tipe tembaloo nimele ungu kanomu paimbo nimele.

<sup>12</sup> Nalo akumunga ungu te peya nimbo tiro. Pileio. Elaija oi orumu. Yu orumu kinye kano iyemani yu kanoko imbi naa tiko yu we iyere konopu lekolio yu kinye temolo ningō pileringi uluma pali teringi. Aku teko mele Iyemunga Malo mindili liko tingela,” nimu.

<sup>13</sup> Aku tepe nimu kinye pilkolio lombili andolimani Imbo No Ltindili Jonondo nimo ningō pileringi.

### *Keri kuro wangoli ungulu te Jisasini tepe koinjo ltimu*

<sup>14</sup> Jisas kinye yu lombili andoli iye yupoko kinye eno muluna mainye ongolio imboma maku tokonjoringina oringi kinye iye te Jisas orumuna om̄ba komongo topa pondopoda

<sup>15</sup> Konge tepalie nimbei, “Awilimu, nanga ungulamu kondo kolowi. Yu topa mondopa keke lepo kuro toromona mindili awili tepe noromo. Waliwali yu tipena pumbe nomanga purumo.

<sup>16</sup> Nu lombili andoli iyema molongena ungulamu mepo ondu kinye enoni yu manda teko koinjo naa lingi,” nimu.

<sup>17</sup> Aku tepe nimu ungu pilipelie Jisasini imboma iri topalie nimbei, “Kinye moromele imboma eno Goteni uluma paimbo manda tembaloo ningō ipuki naa tirimele. Eno konopu tui tili imboma, na eno wali ambe tepe mane tipo ulu mare lipo ondombo kinye wamongo pilingeia? Na eno kinye tiye teremo,” nimbeline “Na morona ungulamu meko waio,” nimu.

<sup>18</sup> Meko oringi kinye Jisasini kano kuromu iri torumu wali yu ungulumunga konopuna om̄ba wendo purumu. Kano ena tendekumunga ungulamu manda molorumu.

<sup>19</sup> Aku terimu ulu kanokolio Jisas lombili andoli iyema Jisas yunu molorumuna ongo waliko pilkolio ningei, “Kuro akumu linoni ambe telka manda naa makoromoloya?” ningi kinye

**18**

*Gotenga molopa kau purumo kumbuna nari imbi awili limbelo*

<sup>1</sup> Aku walimunga Jisas lombili andolimani yu molorumuna ongo yu waliko pilkolio ningei, "Gote iye nomi kingimu molopa nokoromo imbomanga nari paa olandopa moromoya?" ningi.

<sup>2</sup> Enoni waliko pileringi mele Jisasini pilipelie yu bakulu kelo te na morona owi nimbe eno moloringina mondopalie

<sup>3</sup> enondo nimbei, "Nani eno i tepo paimbo nimbo tiro. Eno konopu topele toko bakulu keloma mele naa molonge lemo Gote iye nomi kingimu molopa imboma nokoromo kombuna tuku paa manda naa punge.

<sup>4</sup> Akumunga imbo teni na we imbonu molambo, nanga imbi te oladopa naa molopili nimbe i bakulu kelomu mele moromo imbonu yu Gote iye nomi kingimu molopa nokoromo kombuna imbo imbi paa mololimu moromo.

<sup>5</sup> Imbo teni nanga imbi lepa i bakulumu mele lipe tapombalo kinye kano imbonuni aku ulu tembalomunga na lipe tapombalo," nimu

*Ulu kerimani Gotenga ipuki tirimolomu teta kenjirimo*

<sup>6</sup> "Nalo imbo teni i bakulu kelomu mele na ipuki tirimo bakulu kelo te ulu kerima tepili nimbe toperope timbelomunga kano bakulu kelomu ipuki tirimo ulumu tiye kolopa na umbulu timo lemo bakulu kelomu oi toperope naa tipili kou paa awili te moko toko nomina lendeko yu kamukumu kolo pupili ningi pera tiko nomuna paa mainye mundulimalanje aku penga.

<sup>7</sup> Na ipuki tirimele imboma kelko umbulu tiko tiye kolonge uluma ya maina itemomunga ya i mai kombumu paa embambo nimbelo. Paimbo aku tepa uluma wendo ombalo nalo imbo teni nanga imbo te toperope timbelomunga kano imbonu na umbulu tipe anjo pumo lemo kano toperope timbelo imbonu mindili nomba paa molopala kenjimbelo.

<sup>8</sup> Nunge ki te molo kimbo te ulu pulu keri te temo lemoaku kimu molo kimbomu kara leko ltewi. Nu koinjo mololiko kau punio kombuna ki te molo kimbo te naa angilepili punio wali aku penga. Nunge kimbo ki pali we angilipili tipe naa kumbulape nomba, pepa kau pumbelo kombuna liko toko mundunge wali aku keri.

<sup>9</sup> Molo nunge mongo te melte kanokolio liemboa konopu leko ulu pulu keri te tenio lemoaku mongomu akuko ltewi. Nu koinjo mololiko kau punio kombuna mongo te naa angilepili punio kinyeaku penga. Mongo

<sup>20</sup> Jisasini topondopa nimbei, "Goteni paimbo lino lipe tapombalo ningi enge ningi naa pimelemunga ulu enge nili i telima manda naa teremele. Nani eno paimbo nimbo tiromu, unjo tengi mongo akumu mele paa kelo nalo kano mongomu maina mundurumele kinye unjo akopa awili lepa angilimo mele, aku tepa enoni Goteni linonga unguma pilimbelo, lino lipe tapombalo ningi walo kolte kau pilkolio mulumundo anjo pungo ne kombuna polowi ninge kinye paimbo aku tepa pumbre polombokalo. Teamili ninge ulumanga ulu manda naa tengi ulu te naa pembalo.

<sup>21</sup> Gote konge teko langi mi tokonaa nongolio kuro i telima imbomanga konopumanga manda makoronge. Ulu enge nili i telima we manda naa tengi," nimu.

*Wali talo tepe Jisasini yu kolopa makilimbo nimu*

<sup>22</sup> Pele walite, kombu Galili distrik pungo moloringi kinye Jisasini yu lombili andolimando nimbei, "Iyemunga Malo ka tikolio yu tonge iyema anjo tinge kinye

<sup>23</sup> enoni yu toko kondonge. Kolopalie, wali yupoko tipemunga Goteni yundo makilko koinjo molowi nimbelo," nimu. Aku tepa nimu ungu pilkolio enonga konopu paa kondo koloringi.

*Jisasini Tempel nokoringi iyema kou takisi tirimu*

<sup>24</sup> Altopa Jisas kinye yu lombili andolima kinye Kaperneam taunona oringi wali Gote popo toringi ulke tempelemunga kou takisi ltingi iyema ongo Pita waltindikolio ningei, "Nunge ungu mane tili iyemuni ulke tempelemunga kou takisi tirimo konopu ltemolomu, paimboya?" ningi wali

<sup>25</sup> Pitani "Tirimo," nimu.

Kano kinye Pita ulkena tukundo pumbelle ungu te nimbei terimu wali Jisasini yu oi walipe pilipelie nimbei, "Saimon, nu ambele konopu ltenoya? Iye nomi kingimani kou takisi lupe lupema lingeindo naimele tieio nimelenje? Enonga imboma kou takisi tieio nimelenje molo Imbo lupema tieio nimeleya?" nimu.

<sup>26</sup> Pitani topondopa nimbei, "Imbo lupemando takisi tieio nimele," nimu. Pilipelie Jisasini yundo nimbei, "Aku lemo kingimunga imbomani takisi naa tienge.

<sup>27</sup> Nalo takisi naa timbolo kinye ulke tempel takisi limele iyemani ilto iyepu tendenje kani nomuna pungo ukumundupuwi. Uku mundukolio kiyendo linio omamunga keremu anga tondonio kinye kou te pembalo, aku koumu likolio meko pungo iltonga peya popo tiko takisi tiwi," nimu.

talo we angilepili nu tipe kombuna liko tuku mundunge kinye aku keri.

<sup>10</sup> I bakulu keloma mele imbomanga te kanoko keri kanoko yu imbo kerimu ninga paa naa neio. Enonga nokoromele mulu kombuna enselema waliwalima Ara mulu kombuna moromona peya moromele kani aku ulu naa teao.

<sup>11</sup> Iyemunga Maloni imbo aulke loi leko molko kenjirimele imboma koropo lipo tapamboi nimbe orumu,” nimu.

*Ungu kongolino lipe kongi sipsip maa toromona purumu Jisasini nimu*

<sup>12</sup> “Eno ambele konopu ltemeleya? Iye teni kongi sipsip 100 ari telka kinye, te maa toromona pulka, yuni sipsip 99 wema mai kembona molangei nimbe tiye kolopa pumbe, tendeku maa toromo sipsipimu kanopa limbei koroliko pulkaya?

<sup>13</sup> Nani i ungu enondo paimbo nimbo tiro. We sipsip 99 maa naa toromoma konopu mondolka nalo sipsip tendekumu kanopa lipelie paa tono kolopa konopu mondolka.

<sup>14</sup> Aku tepa enonga Lapa mulu kombuna moromomuni i bakulu keloma mele moromele imboma beambo naa nengei konopu ltemo,” nimu.

*Imbo angena te ulu keri terimumu teko wamongei nimu*

<sup>15</sup> “Na lombili andolimanga angenu teni nu tepa kenjimo lemo nu pungo tepa kenjimbelo imbonu peya elongalo molkolio kano ulu pulu kerimu yuni nu kinye tembalu ulumu ninga tiwi. Nuni ninio ungumu tepa kenjimbelo angenani pilimo lemo angena kinye elo altoko popo tiko molongeli.

<sup>16</sup> Nalo nuni ninio ungumu yu tui timo lemo pele nuni i ungumu pora nipili kani tembo mele imbo mare kanoko molangei altopo nemboi ningolio, kanonge imbo talo molo yupoko liko angena molombalona meko ongo,aku imboma kanoko molangei angenando tendekuna molambili ninga altoko niwi. Kano kinye nuni tenio kinye angenani tembalu mele kano imbomani kanokolio imbo lupemando manda temane toko tingue.

<sup>17</sup> Kano kinye yuni enonga ungumu kape tui timo lemo Kraistainga imbo talapemundo pungo ninga tiwi. Pele Kraistainga imbo talapemu kape angenani naa pilipe kamukumu tui timo lemo yu linonga angenu molo, yu tawendo molko konopu alowa naa teli imboma mele moromo lepamo imbi tieio.

<sup>18</sup> Nani enondo i ungu muli muli nimbo tiro. Ya maina enoni uluma kinye imboma kinye molo ninge wali Goteni mulu kombuna tukundo molo nimbelo, enoni

maina manda ningema Goteni mulu kombuna tukundo manda nimbelo.

<sup>19</sup> Akumunga nani enondo ungu te peya nimbo tiro. Enonga imbo taloni ya maina i tepo konge teambili ninga panjingele lemo eloni konge tengene mele mulu kombuna moromo Arani elonga nimbe aku tepa tendembalo.

<sup>20</sup> Imbo koltalo, talo molo yupoko, na enonga Awilimu imbi leko waliko pilko, peya kopu tepo moromolo konopu leko maku toko moromelemanga na eno kinye moromolona konge tengene mele Ara yuni aku ulu enonga tendembalo,” nimu.

*Kongono iyemuni yunge kongono tendeku iyemu yu kinye pundu anjirimu naa tiye kolorumu nimbe Jisasini manda lepa nimu*

<sup>21</sup> Jisasini imbo teko kenjirimelemanu ungu mane aku tepa tirimu kinye yu molorumuna Pita nondopa ombalieu yu walipe pilipelie nimbei, “Awilimu, nanga angenu teni na wali ambe tepe tepe kenjimbelo kinye nani we tiye kolomboya? Wali ki te yupoko pakera yuni tembalu mele tiye kolopo we molopolio ki talo tipemunga pundu topili nimbo kinye mandaya?” nimu.

<sup>22</sup> Jisasini topondopa nimbei, “Nani wali ki te yupoko pakera kau yuni nu tepe kenjimbelo kinye yuni tembaloma tiye kolko altoko pilko naa molowi ungu naa nio. Wali 70 X 7 yuni nu tepe kenjimbelo walima pali tiye kolko yu tepili ninga we molowi nio.”

<sup>23</sup> Akumunga Gote iye nomi kingimu molopa imboma nokoromo akumu i tepe mele: Walite iye nomi king teni yunge kongono nokondoringi kendemandema kinye pundu angilerimuna kinye tepe wamopolio pundu tangei nembo nimu.

<sup>24</sup> Aku tepa nimu kinye kingimuni kou 10,000,000 kina mele oi pundu angilerimu iye te kumbe leko yu molorumuna meko oringi.

<sup>25</sup> Nalo yu manda aku kou pundumu tombalo aulke te paa naa lerimuna kingimuni yunge kongono imbonarendo nimbei, “Manda, i iyemu kinye yunge ambo bakuluma kinye yunge melema pali kinye maket teko kou mone likolio koumu ongo pundu tondangei,” nimu.

<sup>26</sup> Aku nimu ungu pilipelie kendemandemu iye nomimunga kumbekerena komongo topa pondopa tamalu pepa konge tepalie nimbei, “Nuni na kondo kolko we nokoko molowi. Nunge pundu waye tombo,” nimu.

<sup>27</sup> Manda naa tombalo konopu lepalie iye nomimuni yunge kendemandemu paa kondo kolopa yu kendemandemu kinye

\* **18:22:** 70 X 7 = 490 nalo Jisasini aku tepa naa nimu. Imbonani lino teko kenjirimele uluma kambu naa tamili nimu.

pundu angilerimuma waye yu tepili, altoko pundu naa tani, nimbe kamukumu tiye kolopa iyemu ka naa tipe we puwi nimu.

<sup>28</sup> Nalo ka naa toli kendemande kanomu yu pena pumbe kendemande te yunge kou 100 kina mele tirimumu kanopalie, yu pumbe yunge nomina ambolopa elkele akupelie nanga kou tiru kanomu pundu towi nimu.

<sup>29</sup> Aku terimu kinye yuni tombai terimu iyemu yunge kumbekerena komongo topa pondopa tamalu pepa konge tepalie nimbei, "Nuni na kondo kolko we nokoko molowi. Nani nunge pundu pali tombo," nimu.

<sup>30</sup> Nalo kendemande lumeni molo, paa i teli pundu tani nimbelie nu ka ulkena pekolio pundu toko pora tiko wendo wani nimbe yu ka tipe ka ulkena panjirimu.

<sup>31</sup> Yuni aku ulu terimuna kendemande wemani kanokolio eno konopu keri panjiko pungo enonga iye nomimundo kendemande iye talo teringilina kanoringi ulumu pungo ningi tiringi.

<sup>32</sup> Kano kinye iye nomimuniaku ningi ungu pilipelie kendemande yunge pundu naa toko we puwi nimu kendemande kanomu welea owi nimbelie yundo nimbei, "Kendemande kerimu, nuni na enge ningi konge teniona nu na kinye pundu paa awili tepa angilerimumu yu tepili, naa towi nimbolio we tiye kolondu kanomu.

<sup>33</sup> Altopo nani nu we kondo kolondu mele nuniaku teko nunge kongono tendeku iyemu ambe telka kondo naa kolonioya?" nimu.

<sup>34</sup> Iye nomimuni yu mumindili kolopalie yu mindili nopili nimbe ka ulke nokoringi iyema yu lipetirimu. Kingimuni nimbei, "Nu mindili nongolio pundu tani. Oi pundu pali toko pora tikolio pele kau wendo wani. Oi molo," nimu.

<sup>35</sup> Aku tepe mele enoni angenali kinye ulu keri tendilima tiye naa kolonge lemo mulu kombuna moromo Lapani eno kinye aku ulu kala tembalo," nimu.

## 19

*Jisasini iyemani ambo liko lteli ulu mundo nimbe tirimu*

<sup>1</sup> Jisasiniaku tepe unguma nimbe poratipelie, kombu Galili distrik tiye kolopa kombu Judia distrik pumbe no Jordan lem-bulape nekondo purumu.

<sup>2</sup> Kano kinye imbo awini yu lombili oringi wali yuni kuro torumu imboma tepe koinjolitimu.

<sup>3</sup> Farisi iye mare yu molorumuna ongo yu ambele ungumu nimbelonje, nimbe ken-jimbelonje manda manjipo pilemlili ningi yu waliko pilkolio ningi, "Iye teni yu yunu

pilipelie yunge ambomu kamukumu topa makorombalo wali manda tembalo moloaku tembalo kinye ungu mane te topa tangondombaloya?" ningi.

<sup>4</sup> Yuni topondopa nimbei, "Goteni nimu ungu yunge bukuna moromo mele kanoko oi kambu naa tongeya? Oi pulu polopa, Goteni melema tepalie, yuni imbo tembaindo iyemu kinye ambomu kinye tepalie

<sup>5</sup> nimbei,  
Aku tepe tendumunga iye teni ambo te lipelie yunge anumu lapa talo tiye kolopa yunge ambomu kinye elongalo tendekuna kopu teko kangi tendekumu mele molko konopu tendekuna pupili molongele, (Stt 1:27)

nimu ungumu naa pilenguya?

<sup>6</sup> Goteniaku tepe nimu kala iye te ambo te limo kinye kangi tendekumu mele morombele elo altoko talo mele naa morombele, elo imbo tendekumu mele morombele. Imbo tendekumu morombele kani Goteni ambo iye talo tendekumu molangili nimomunga eno imbo teni ambo iye talo lupe lupe teangili ungu naa neio," nimu.

<sup>7</sup> Aku tepe nimu kinye enoni ningi, "Aku lemo Mosesini ungu mane te tirimumu ambe telka tirimuya? Mosesini nimbei, iye teni yunge ambomundo kamukumu pupili nimbe makorombaindo aku tepe pipia te topa ambomu tipelie manda tiye kolopili, (Stt 2:24)

nimu kanomu," ningi.

<sup>8</sup> Jisasini nimbei, "Mosesini paimbo aku tepe nimu nalo eno kalambo naa ningi Goteni ambo iye talo popo tiko molongele mele ungu mane tirimumu liko tui tiko naa pileringi akumunga yuniaku teangei nimu. Nalo oi pulu polopa, Goteni melema kokele tepe wamoromu wali, ungu mane aku tepe te naa perimu kani

<sup>9</sup> nani eno i tepe nimbo tiro. Iye teni yunge oi lismo ambomu iye te kinye wapulu kerinale naa tepili kamukumu topa makoropalie kelepa ambo te limo lemo aku iyemu yuni wapulu kerinale teremo," nimu.

<sup>10</sup> Yuniaku nimu ungu pilkolio yu lombili andoli iyemani yundo ningeindo, "Iye teni ambo limo kinye nuni nino meleaku teko molongele ulumu peremo lemo iye te ambo naa likanje paa," ningi.

<sup>11</sup> Nalo Jisasini topondopa nimbei, "I ungu mane tiromu imbomanipali manda naa pilko linge. Goteni kanopa lipengema timbelo imbo akuma kau manda teng."

<sup>12</sup> Iye mare anupilini meremele kinye amboma kinye tendekuna kopu teko peko ambiye angimbele enge te naa peremo. Iye marenipambiye amboma kinye tendekuna naa

peangei ningi iye marenaga laka ltimele. Mareni enongan iye nomi king Gotenga iyema molopo yunge kongonoma kau tendamili ningi eno enongan mi leko ambo naa ltmele. I ungumu imbo pilko linge imbomani pilengei!" nimu.

*Jisasini bakuluma yu moromona wangei nimu*

<sup>13</sup> Kano kinye imbomani enonga bakuluma Jisas yunge ki ola noipe Gote kinye enonga konge tendepili ningi yu molorumuna meko oringi. Nalo yu lombili andolimani iri toko imbomando naa meko waio ngingi.

<sup>14</sup> Molo ngingi ulu kanopalie Jisasini nimbei, "Gote iye nomi kingimu molopa nokoromo imbo talape akumu i bakuluma mele moromele kani enoni i bakuluma na monra wangei pipi tiko molo naa neio," nimu.

<sup>15</sup> Aku tepea nimbeline yuni bakuluma kondo kolopa yunge kimuni eno te te nimbe ola noipelie altopa aku kombu tiye kolopa purumu.

*Melema awini noirimu kelo iye teni Jisas kinye ungu nimbei orumu*

<sup>16</sup> Walite iye te Jisas molorumuna ombo yundo walipe pilipelie nimbei, "Ungu Mane Tilimu, na ambe tepolio ulu pengamu tembo wali koinjo molopa kondopa kau puli ulu pulumu limbo konopu lenio lemo Gotenga ungu mane Mosesini yando nimbe tirimuma lombilko teko molowi," nimu.

<sup>17</sup> Jisasini yundo nimbei, "Nuni na ambe telka ulu pengamundo waliko piltinoya? Imbo tendekumu kau penga moromo. Nuni koinjo molopo kondopo kau puli ulu pulumu limbo konopu lenio lemo Gotenga ungu mane Mosesini yando nimbe tirimuma lombilko teko molowi," nimu.

<sup>18</sup> Iyemuni walipe pilipelie nimbei, "Te ungu manemando ninoya?" nimbe waltindirimu kinye Jisasini topondopa nimbei, "Imbo toko naa kondangei nimbe, ambo iye pulima molo iye ambo lilima imbo lupema kinye wapu ulu kerinale naa teangei nimbe, melema wapu naa liengei nimbe, imbomare kolo toko kot naa tendangei nimbe,

<sup>19</sup> aminyeli lanieri kinye teko kondoko ungu ninge mele pilko liko teko molangei nimbe, eno te te ningoni enongan konopu mondoko kondo kolko nokoromele meleaku tekola imboma konopu mondoko nokoko molangei nimbe, ungu mane akuma tirimu," nimu.

<sup>20</sup> Aku nimu ungu pilipelie kano kelo iyemuni nimbei, "Na aku ungu manema pali pilipo lipo tepo moro. Nalo ambele ulure molo itemomu teamboya?" nimbe waltindirimu.

<sup>21</sup> Jisasini yundo topondopa nimbei, "Na kamukumu iye tumbi nilimu molambo konopu lenio lemo nu pungo nunge

mele noirinoma pali yolo liko kou mone lipungolio, kou mone linioma imbo koropa nolima moke teko tikolio na lombili owi. Maina melema aku tenio wali mulu kombuna nunge mele pengama lembalo," nimu.

<sup>22</sup> Kano kelo iyemu mele paa awini noirimungu Jisasini yundo aku nimu ungu pilipelie yu konopu umbuni terimuna anjo purumu.

<sup>23</sup> Aku terimu ulu kanopalie Jisasini yu lombili andolimando nimbei, "Gote iye nomi king molopa imboma nokoromo kombuna tuku pungeindo imbo kamakoma kongono paa mindili nongolio tuku punge."

<sup>24</sup> Enondo altopo nimboi, kongi kamel kongi paa awili te nalo walipe kale aulkena pumbeindo mindili kelo nomba pumbelo. Nalo imbo kamakoma Gote iye nomi king molopa imboma nokoromo kombuna tuku pungeindo mindili paa awili nongo punge," nimu.

<sup>25</sup> Aku tepea nimu ungu pilkolio yu lombili andolima paa mini lteko makikollio nendo yando ungu ningolio ningei, "Aku lemo, nari molopo kondomolo kombuna pumbeloya? Te molonje," ngingi.

<sup>26</sup> Jisasini eno neme neme nimbe kanopalie nimbei, "Paimbo, imboma enongan manda molo nalo Goteni manda tendembalo. Gote yuni uluma pali manda teremo," nimu.

<sup>27</sup> Yuni aku nimu ungu pilipelie Pitani yundo nimbei, "Apa, lino kinye ambele ulure wendo ombaloya? Lino linonga melema pali tiye kolopo nu lombili oromolo kani ambele melema limoloya?" nimu.

<sup>28</sup> Jisasini nimbei, "Nani enondo i ungu paimbo nimbo tiro. Akilio Goteni melema pali koinjo pupili nimbelo kinye iyemunga Malo au nimbe kondopalie yunge iye nomi king polona molopa imboma nokombalo kinye, eno na lombili andoromele iyema peya iye nomi king polo 12 akuna molkolio, Israel imbo manga pupu 12 nokonge.

<sup>29</sup> Na konopu mondoko nanga kongono tendengeindo enonga ulkema, angenupili, kemulupili, anupili, lapali, bakuluma, poinyema akuma tiye koloringi imboma pali, aku tepea mele paa olandopa 100 likolio, koinjo molko kondoko kau puli ulu pulumu linge.

<sup>30</sup> Nalo kinye kiyendo moromele imbo-manga awini pele akilio peyalime molonge. Kinye peyalime moromele imboma akilio imbo kiyendoma molonge," nimbe Jisasini nimu.

## 20

*Jisasini wain poinyena kongono teremele iyema manda lepa ungu nimu*

<sup>1</sup>Jisasini yu lombili andolimando ungu te peya nimbei, "Aku nio ungu munga ungu te nembo, Goteni iye nomi kingimu molopa imboma nokromo akumu i tepa mele: Walite poinye pulu iye teni kongono tendeli iye mare yunge wain poinyena kongono tendangei nimbe paa ipu leli oi iyema pumbe lipurumu.

<sup>2</sup>Kongono teangei nimbe ltimu iyemando nimbei, 'Kinye tengen walimunga eno kou mone 5 kina 5 kina nimbo mele timbo,' nimu wali enoni manda ningi kinye yuni eno yunge wain poinyena kongono teangei paio nimbe eno lipe mundurumu.

<sup>3</sup>Altopa, ipu leli oi 9 klok mele terimu kinye, yu kelepa imboma maku toringi kombuna pumbe iye mare akuna we angleringina kanopalie

<sup>4</sup>enondo nimbei, 'Eno kape nanga wain poinyena kongono tendangei paio. Altopa nani enonga kongono tengen mele timbo,' nimu kinye eno purungi.

<sup>5</sup>Altopa awi tangoli lerimu kinye kape, ipupene 3 klok kinye kape, kelepa aku tepa pumbe iye mare kanopa lipe mundurmula.

<sup>6</sup>Ipupene 5 klok mele terimu kinye altopa pumbe iye mare we angleringina kanopalie enondo nimbei, 'Wali imunga pali kongono naa teko ya ina ambe temona we angimeleya?' nimu.

<sup>7</sup>Enoni yundo ningei, 'Iye teni lino kongonona naa limona we angimolo,' ningi. Yuni enondo nimbei, 'Eno kape nanga wain poinyena kongono tendepao,' nimu.

<sup>8</sup>Ena pora nimu kinye wain poinye pulu iyemuni yunge kongono nokoli iyemundo nimbei, 'Kongono teremele iyema tukundo waio ningi eno kongono tengemunga melema tinindo paa akilio leko onge iyema kumbe leko mele tilko pungolio kumbe leko onge iyema paa akilio leko melema tiwi,' nimu.

<sup>9</sup>Aku tepa nimu kinye ipupene 5 klok terimu kinye, 'Kongono tendangei,' nimbe ltimu iyema kumbe leko ongo 5 kina 5 kina nimbe tirimuna ltingi.

<sup>10</sup>Akilio ongo kongono tenderingi iyema kouaku teko ltingi ulu kanokolio kumbe leko ongo kongono tenderingi iyema ongolio lino kou olandopa mele limolo konopu leringi nalo eno 5 kina 5 kina nimbe tirimuna ltingila.

<sup>11</sup>Likolio enoni poinye pulu iyemundo iri tokolio ningei,

<sup>12</sup>'Akilio leko onge iyema ena mongo tendekumu kou kongono tengen. Lino ipu leli oi ombo kongono awili tepo temolo. Ena awili tomomuni lino paa nomo kanomu, nalo eno kinye lino kinye kou tendeku ulu teko tirinomu, manda naa teremo,' ningi.

<sup>13</sup>Aku teko ningi wali yuni kongono iye tendo topondopa nimbel, 'Angenu, nani nu tepe naa kenjiro. Aku 5 kina timbo nindu kinye manda ninio kanomu.

<sup>14</sup>Kou tiromu liko meli puwi. Nanga konopuna kau pilipolio akilio lepa omo iyemu nu tiro mele yu aku tepo tindu.

<sup>15</sup>Nanga koumanga konopuna pilipolio manda naa temboya? Molo akilio onge iyema kou awili tepo tindumunga nu konopu keri panjirinoya?' nimu," nimbe Jisasini nimu.

<sup>16</sup>Ungu manda lelimu nimbe pora tipelie aku ungu munga pulumu nimbei, "Aku tepala, akilio lenge imboma kumbe leko molonge, kumbe leko molonge imboma akilio leko molonge," nimu.

*Wali yupoko tepa Jisasini nimbei yu kolopolio makilimbo nimu*

<sup>17</sup>Kano kinye Jisas kombu awili Jerusalem pumbe pumbelie wali yu lombili andoli iye 12 na kinye eno kinye linongan molamili nimbe eno lipe mepa pumbelie nimbei,

<sup>18</sup>"Pileio, Lino Jerusalem pumili purumolo. Akuna pumolo kinye Iyemunga Malo tangen ningi Gote popo tondoli iye awilima kinye, Gotenga ungu manemanga puluma pilko mane tirimele iyema kinye, akumanga kindo tinge wali, enoni yu kot tendeku Yu kolopili tangen ningolio

<sup>19</sup>Juda iye naa moromelemando liko tinge. Aku wali kano iyemani yu ungu taka tondoko, ka pulteni toko, yu kolopili ningi unjo polopeyana uku toko panjing. Kolopalie, wali yupoko tipemunga Goteni yundo makilko koinjo molowi nimbelo," nimu.

*Imbo teni iye awili molombo konopu itemo lemo oi kiyendo yu imbo kelomu molopili*

<sup>20</sup>Kano kinye Sebedi malo Jems kinye Jon talonga anumu Jisas molorumuna ombo komongo topa pondopa yundo nu ulu te teani nimbo konge temboi oro nimu kinye

<sup>21</sup>yuni yundo nimbei, "Ambele ulure nani tendambo ningi ninoya?" nimu. Ambomuni nimbei, "Nu iye nomi kingimu molonio kinye i nanga ungulu talo elo nu kinye peya iye nomima molamili ningi elonga te nunge ki imbondon mondoko te nunge ki koyando mondani nimbo nio," nimu.

<sup>22</sup>Jisasini enondo nimbei, "Konge teremele mele eno pilko naa kondoromele. Na no mingina no nondopo nomboimulo manda nongeleaya?" nimu kinye eloni "Manda nombolo," ningili.

<sup>23</sup>Yuni elondo nimbei, "Na no mingina no nombomu altoko elo paimbo nongele nalo nani elo nanga ki imbondon kinye ki

koyando ongo molangili nimbomu nanga ulu te molo. Arani yunu akuna molongele talo oi kanopa ltimu," nimu.

<sup>24</sup> Angenungolo Jems kinye Jon taloni Jisas konge teringili ungu pilkolio lombili andoli iye 10 akumani elo kinye konopu keri panjiko mumindili koloringi.

<sup>25</sup> Aku wali Jisasini eno waio nimbeline, enondo nimbei, "Lino Juda imbomanga tawendo moromele imbo talapemanga iye nomima enonga imboma enge ningokoko kongono enge nilima waliwalima tirimele. Iye imbi ola moromo iyema enonga imboma mindili nangei ningokokoromele. Aku teko teremele mele enoni pimele.

<sup>26</sup> Nalo we imbomanga iye nomimani enonga imboma enge ningokoko nkokoromele mele na lombili andoli iyema eno enonganaku teko nendo yando naa teao. Enonga iye te na imbi olandopa molopili, na iye awilimu molambo nimbelo iyemu enonga kongono tendeli iyemu molopili.

<sup>27</sup> Na enonga iye nomimu molopo eno nokambo nimbelo iyemu enonga kongono kendemande tendeli iyemu molopili.

<sup>28</sup> Aku tepala, Iyemunga Malo kape imbomanga iye awilimu molopo eno nokambo, enoni nanga kongono tendeli kendemande imboma molangei nimbena orumu. Imbomanga kongono tendeli kendemande iyemu molopo eno lipo tapopo, ulu pulu keriman eno ka tipe nokoromo mele naa tepili manda molangei kani na imbo awininga nimbo pundutondopo nanga kangimu tipo, enonga kolo wangopo kolombo nimbe orumu," nimu.

### *Mongo keri leli iye talo Jisasini tepe koinjo ltimu*

<sup>29</sup> Jisas kinye yu lombili andolima kinye eno kombu awili Jeriko tiye kolko pungei purungi kinye we imbo awini yu lombili purungi.

<sup>30</sup> Kano kinye mongo keri lerimu iye talo aulke kulendona molko Jisas omba purumu ungu pilkolio yundo enge ningokoko pilko ningili, "Awilimu, iye nomi king Devitini kalopa ltimu iyemu, ilto kondo kolowi," ningili.

<sup>31</sup> Imbomani elo iri toko ungu naa nili taka liko molalio ningi. Nalo eloni paa enge ningokoko alako toko waliko pilkolio ningili, "Awilimu, Devitini kalopa ltimu iyemu, ilto kondo kolowi," ningili.

<sup>32</sup> Jisas we angilipelie elo walio nimbelie elondo nimbei, "Nani elo ambe teambo konopu ltembeleya?" nimu kinye

<sup>33</sup> mongo keri lerimu iye taloni ningili, "Awilimu, iltonga mongo talo altopa imbo mongo angilepili niwi konopu ltembolo," ningili.

<sup>34</sup> Kano kinye Jisasini elo kondo kolopa mongona ambolorumu kinye elo walikale mongoma penga lerimu, melema kanokolio, Jisas lombili purungi.

## 21

### *Jisasini Jerusalem Kombundo king mele tukundo purumu*

<sup>1</sup> Jisas kinye yu lombili andolima kinye eno kombu awili Jerusalem nondoko ongo, mai kembo te Mai Kembo Unjo Oliv Poinye nili akuna ltemo kombu kelo Betfage oringi. Kano kinye Jisasini yu lombili andoli iye talo lipe mundupelie,

<sup>2</sup> elondo nimbei, "Neya kombu kelo kandomolona pungolio kongi donki te kareko panjingemu kinye yunge walomapeya angimbelenakanokolio kano talo pungo poiko yando meko wangili palio.

<sup>3</sup> Poingili teko molongele kinye imbo teni elondo ungu te nimo lemo eloni i tekoningili 'Awilimu yu donkimuni mepili nimona ombo ltimbolo,' nelio. Aku teko ningele kinye yuni toyatopama, meko palio nimbelo," nimu.

<sup>4</sup> Aku tepa wendo orumumunga koro oi Gotenga profet iye teni ulu te altopa wendo ombalo oi nimu mele kamukumu wendo orumu. Akumu i tepa,

<sup>5</sup> Enoni kombu awili Saion imbomando i tekone, 'Kanaio! Eno moromelena enonga iye nomi kingimu oromo. Yu iye imbi naa mololi iyemu mele taka lipe moromomukongidonki umbuluna ola molopalie oromo. Kongi donki tengawalomunga umbuluna ola molopalie oromo,' ningotieio. (Sek:9:9)

nimu kanomu. Aku nimu mele Jisas terimu.

<sup>6</sup> Kano kinye lombili andoli talo pungo Jisasini tepalio nimu ulu tepuringili.

<sup>7</sup> Eloni kongi donkimu kinye yunge walomapeya meko ongolio, enoni enonga ola wale pakolima kulko donki talonga umbuluna ola pauwe toringi kinye Jisas kanonan ola molorumu.

<sup>8</sup> Imbo maku toringimanga awinini enonga wale pakoli olama kulko yu ombalo aulkena pauwe toliko pungo, marenitaku gomo langoko liko yu ombalo aulkena pauwe toliko purungi.

<sup>9</sup> Kumbe leko purungi imbomani kape akilko purungi imbomani kape ru niliko pungolio ningei,

Iye Nomi King Devitini Kalopa Ltimu Iyemu imbi ola molopili nemili.

Goteni lipe mundurumuna yunge kononomu tendembai

oromo iyemu molopa kondopili.

Mulu kombuna ola yu imbi ola molopili, nilko purungi.

<sup>10</sup> Jisas Jerusalem tuku purumu kinye kano kombu awilimunga tukundo moloringi imboma pali konopu awini liko mundukolio iye tekaimuya ningi.

<sup>11</sup> Maku toko moloringi imbomanि ningei, "Gotenga nimbe munduli ungu nili profet iye Jisas, i kombu Galili distrik Nasaret taun oromo iyemu," ningi.

*Gotenga ulke tempelena bisnis kongono teringi iyema Jisasini makoropa wendo murumuru*

<sup>12</sup> Jisas Jerusalem tuku pumbelie Gote popo toko kaloringi ulke tempel papena tuku pumbe kanopalie akuna melema maket teko moloringi imboma kinye, melema topo toko liko moloringi imboma kinye akuma kanopalie eno pali topa makoropa, kou mone lupe lupema alowa teko anjo tiringi imbomanga poloma kinye, kera imili maket teringi imbomanga mainye moloringi poloma kinye, topele topa, topa bulubalu tipelie,

<sup>13</sup> enondo nimbei, "Gotenga bukuna ungu te i tepa nimo,

Imbomanि nanga ulkemundo Gote kinye ungu nimbo konge nimolo ulkemu, (*Ais 56:7; Jer 7:11*)

ninge kanomu. Ungu aku tepa moromo nalo enoni i ulkemu wapu noromele imboma lopeke teko moromele ulkemu ningolio aku ulu teremele," nimu.

<sup>14</sup> Kano kinye Jisas ulke tempelena molopili imbo mongo keri lepa, kimbo ki keri lerimu imbo awini yu molorumuna oringi kinye yuni eno tepa koinjo Itimu.

<sup>15</sup> Nalo yuni we imbo teni manda naa telka ulu enge nili pengama terimu mele kinye, ulke tempelena bakulumani enge ningru ru ningolio, "Iye Nomi King Devitini Kalopa Ltamu Iyemu imbi ola molopili nemili," ningi mele kinye, kano ulu talo wendo orumu mele kanokolio Gote popo tondoringi iye awilima kinye Gotenga ungu manemanga puluma pilko mane tiringi iyema kinye enoni konopu keri panjikolio

<sup>16</sup> Jisas waltindikolio ningei, "Andi bakulmani ungu nimele mele nu naa piltinoya?" ningi.

Nalo Jisasini enondo nimbei, "Pilti. Andi bakulumani teremele mele ungu te bukuna moromo mele eno naa karomeleya? Kanomu i tepa moromo:

Bakulu keloma kinye bakulu pamema kinye Gote yu paa kapi ningei, (*Sng 8:2*)

aku ungumuk bukuna moromo mele eno naa karomeleya?" nimu.

<sup>17</sup> Aku tepa nimbeline yu kano iyema tiye kolopa kombu awili Jerusalem tawendo pumbe kombu kelo Betani pumbe akuna perimu.

*Jisasini unjo fik kapu lepili nimbelie aku tepa nimu ulu wendo orumu*

<sup>18</sup> Ipu leli oi Jerusalem nondopa lerimu kombu Betani tiye kolopa Jisas kelepa kombu awili Jerusalem pumbei purumu wali yu engele terimu.

<sup>19</sup> Kano wali yu orumu aulke kulendona unjo fik te angilerimuna kanopalie nondopa pumbe kanorumu kinye unjo mongo te topa naa perimu, gomo kau terimu. Gomo kau terimuna kanopalie "Nu altoko mongo te naa tani," nimu kinye unjo fik kanomu walitikale monda nomba kolopa kapu lerimu.

<sup>20</sup> Aku ulumu wendo orumuna kanokolio yu lombili andolimani paa mini ltekolio ningei, "I unjo fikimu ambe tepalie walitikale kolomoya?" ningi.

<sup>21</sup> Jisasini topondopa nimbei, "Nani enondo i ungu paimbo nimbo tiro. Eno konopu talo tepa naa pepili Goteni nanga ungumu paimbo pilimbolomunga nimbo mele paimbo wendo ombalo ningi enge ningi ipuki tiengei lemo nani i unjo fikimu tendu mele manda tengen. Unjoma kau molola. Ne mai kembomundo konoko nomu kutana tukundo puwi ninge kinye pumbelola.

<sup>22</sup> Lino Goteni paimbo lipe tapombalumunga teamili nimolo mele paimbo manda aku tepo temolo molo nimolo kinye paimbo aku tepa wendo ombalo ningi ipuki tikolio Gote kinye ungu ningi konge tengen mele pali Goteni paimbo tendembalomunga kano uluma paimbo wendo ombalo," nimu.

*Nu i ulumu tewi nimbe narini enge tiri-moya waliko pileringi*

<sup>23</sup> Kano kinye Jisas kamukumu Jerusalem ombo ulke tempel kerepuluna ombo, imboma ungu mane tipe molorumu kinye iye mare, Gote popo tondoringi iye awilima kinye, Juda imbomanga tapu iyema kinye ongo yu waliko pilkolio ningei, "Nu imbi ambelemu likolio i kongonomu teronoya? Narini i kongonomu tepuwi nimbe nu engemu tipe lipe mundurumuya?" ningi.

<sup>24</sup> Jisasini enondo topondopa nimbei, "Nani eno ungu te walipo pilemboi tero. Aku ungumu pundu tonge lemo na i kongonomu teambo nimbe enge tirimumunga pulumu eno nimbo timbo.

<sup>25</sup> Oi Imbo No Ltindili Jon ombo imboma no ltindirimu kinye, yu mulu kombuna moromo iyemunga kongonomu tendembaindo imboma no ltindirimu molo ya maina imbomanga kongonomu tendembaindo imboma no ltindirimuya? Narini tewi nimuna terimuya? Ningi tieo," nimu. Yuni aku tepa walipe pileringi ungu pilkolio enoni enonganio ningei, "Yuni

walipe piltimo mele linoni topondopo, Jon yu mulu kombuna moromo iyemunga kongoно tendembaindo imboma no ltinderimu nimolo lemo yuni linondo nimbei, 'Aku lemo eno Jononi nimu ungumu ambe temona i ungumu paimbo ninga naa pilko ltingiya?' nimbelo.

<sup>26</sup> Molo linoni nimili, 'Yu maina imbonanga kongoно tendembaindo imboma no ltinderimu' nimolo lemo we imbomani lino tongenje nimbo pipili koltomolo. We imbomani imbo no ltindili Jon yu paimbo Gotenga profet iye te molorumu ninga pimele kani lino ambe temolonge?' ningi.

<sup>27</sup> Enonganaku tekono nendo yando ningolio, Jisasindo topondoko ningi, "Lino naa lipo manjirimolo," ningi. Aku tekono ningi ungu pilipelie Jisasini enondo nimbei, "Manda. Nani eno walipo pilto ungumunga ungu te topondoko naa nimelemunga enoni na waliko piltieme ungumunga ungu te topondopo nando i kongonomu te puwi nimbe na lipo mundupe enge tirumu iyemunga imbibmu eno naa nimbo timbola," nimu.

#### *Iyetenga ungulu talomundo ungu kongolino lipo Jisasini nimu*

<sup>28</sup> Nilipe pumbelie nimbei, "Eno ambele konopu ltemeleya? Iye te yunge ungulu talo moloringili. Yu pumbe ungulu komomundo nimbei, 'Ungulumu, kinye nu wain poinyena pungo kongono te puwi,' nimu.

<sup>29</sup> Yuni topondopa lapando molo, na naa pumbo nimu, nalo altopa yu konopu te lepale purumu.

<sup>30</sup> Lapa pumbe komomundo nimu mele aku teta akiliomundo nimu wali yuni topondopa tepumbo nimu, nalo naa purumu.

<sup>31</sup> Kano ungulu talonga narini lapanga ungumu pilipe lipo terimuya?" nimu. Enoni topondoko komomuni ningi. Jisasini enondo nimbei, "Nani eno paimbo nio. Eno Juda imbomanga iye awilima Gote iye nomi kingimu molopa nokoromo talapena tukundo kumbe leko naa punge. Kou takisi lili iyema kinye apureli toli amboma kinye kano imboma, kumbe leko punge.

<sup>32</sup> Aku ambe telka Imbo No Ltindili Jon omba eno tumbi tiko molonge aulkemu lipo ondoramu kinye enoni yu nimumu kolo toromo konopu leko yunge ungumu pilko naa ltingi nalo kou takisi lili iyema kinye apureli toli amboma kinye yuni nimu ungumu paimbo ninga ipuki tiringi. Nalo kano ambo iye kerimani aku teringi kinye kape kanokolio konopu topele topo yuni paimbo nimo nimbo enge nimbo pilemili naa ningi," nimu.

*Iye kerimani wain poinye nokoringi nimbe Jisasini ungu manda lerimu*

<sup>33</sup> Aku tepe nimbeline Jisasini kano iye awilimando altopa nimbei, "Ungu kongolino lipo te nembo pileio. Mai pulu iye teni wain poinye tepalie pape terimu. Poinyena tukundo muru akupe wain no ingi tepe mondombaindo tepe wamopa tepalie, altopa poinye nokonge ulke takai te polo kulupe ola takorumu. Iye mare kanopa lipelie enondo nimbei, 'Nanga poinyemu tapu tendeko unjo mongoma inie toko nokondaio. Altoko wain mongo nowi lembalo kinye unjo mongoma moke tepo, kongoно tendenge mele mare eno liengei mare na liembo,' nimbe kano poinyemu eno tipelie yu kombu paa tulerenga pumbe molorumu.

<sup>34</sup> Kano wali altopa wain mongo nowi lembai terimu kinye poinye pulu iyemuni yunge kendemande iye mare nanga wain mongo mare tiengi pungo liko mendeko wangei paio nimbe poinye nokoringi iyema moloringina lipo mundurumu.

<sup>35</sup> Nalo kendemande iyema oringi wali poinye nokoli iyemani eno ambolko likolio te koipeni toko, te toko kondoko, te kouni toringi.

<sup>36</sup> Altopa poinye pulu iyemuni kendemande iye mare awini mele lipo nanga wain mongo ltindipeo nimbe lipo mundurumu, oi kendemande iye pokore mele lipo mundurumu. Nalo poinye nokoli iyemani oi pulu polko oringi kendemande iyema kinye teringi kano ulu altoko kendemande oringi iyema akula teringi.

<sup>37</sup> Kano kinye poinye pulu iye yuni konopu lipo manjipelie nanga ungulumu pilipi kolko yunge unguma pilko liko, yu wain mongoma tinge konopu lepalie yunge malomu lipo mundurumu.

<sup>38</sup> Nalo poinye nokoli iyemani poinye pulu iyemunga malo ombai orumu ulu kanokolio enoni enonganu ningi, 'Andi oromo iyemu altopa lapanga melema limbelo iyemu. Yu topo kondopo i poinyemu lino kamukumu liemili,' ningolio

<sup>39</sup> enoni yu ambolko liko poinyena meko wendo pungolio yu toko kondoringi," nimbe Jisasini nimu.

<sup>40</sup> Jisasini ungu kongolino akumu nimbe pora timbeindo kano Juda imbomanga iye awilimando walipe pilipelie nimbei, "Poinye nokoli iyemani aku ulu teringimunga poinye pulu iyemu ombalie kano poinye nokoli iyema kinye yuni ambele ulure tembaloo konopu ltemeleya?" nimu.

<sup>41</sup> Enoni yundo topondoko ningi, "Yuni kano iye kerima kamukumu molko kenjengei nimbe tepe kenjipelie poinye nokonge iye lupe mare lipo wain mongo nowi lembalo kinye wain mongoma moke

teko, mare poinye pulu iye tinge iyema poinyemu timbelo," ningi.

<sup>42</sup> Jisasini enondo nimbei, "Gotenga bukuna tukundo moromo ungu te kanoko naa pimeleya? Aku ungumu i tepa mele, Ulke takoringi iyemani kanoko keri kanoko toko lteringi kou kanomu kinye kelepa ulke timu mele ulke enge tindili kou awili pengamu. Awilimunu aku ulumu terimu linoni kanopo paa penga karomolo, (Sng 118:22,23)

nimbe moromo kanomu.

<sup>43</sup> Aku tepa nimumunga nani eno Gotenga Juda imboma nimbo tiro. Gote enonga iye nomi king molopa eno nokromo mele tiye kolopalie, imbo talape lupe teni yunge ungumu pilko liko teko molongema lipe nokombalo.

<sup>44</sup> Kou nindu kanomunga ola imbo te ai topalie ombele elke tombalo. Nalo imbo te molombalona ola koumu omba topalie kano imbonu topa naalemu nondombalo," nimu.

<sup>45</sup> Kano kinye Gote popo tondoringi iye awilima kinye Farisi iyema kinye Jisasini ungu kongolino ltimuma pilkolio enoni tongei teko moloringi mele yuni nimu ungu pilkolio enondo manda lepa nimu ningi liko manjiringi.

<sup>46</sup> Yu ka tingei teringi nalo imbomani yu Gotenga profet iye te konopu leringimunga imboma pipili kolkolio yu neya wali ambolko liko ka naa tiringi.

## 22

*Ambo lipelie langi kalorumu ulumundo kongolino lipelie Jisasini nimbe tirimu*

<sup>1</sup> Jisasini altopa ungu mare Juda iye awilimando nimbeindo ungu kongolino lipelie nimbei,

<sup>2</sup> "Gote iye nomi kingimu molopa imboma nokromo akumu i tepa mele: Iye nomi king teni yunge malo ambo limbelo-munga langi awini kalombai terimu.

<sup>3</sup> Oi iye ambo limbelo langi peya namili tukundo wangei nimu imboma yunge kendemandendo 'Kinye langi namili waio nipeio,' nimbe eno lipe mundurumu, nalo pungo aku teko ningi waliaku imboma naa omolo ningi.

<sup>4</sup> Altopa kendemande mare lupe lipe mundupelie nimbei, 'Langi peya namili wangei nindu imbomando pungo ningei, "Langi tepa amenge tepa pora timo. Yunge kongi kao peleama kinye kongi kao walo wami telima kinye tomo. Langi pali tepa amenge tepa noirimo kani iye ambo limbelo-munga langi peya namili waio," nipeio,' nimu.

<sup>5</sup> Nalo pungo ningi ungu naa pilko tiye kolko, te yunge poinyena pumbe, te yunge bisnisina pumbe,

<sup>6</sup> maren i kingimunga kendemandema ambolko liko teko kenjikolio toko kondoringi.

<sup>7</sup> Aku teringimunga kingimu mumindili kolopalie yunge ami iyemando nimbei, 'Eno moromelena pungo toko kondoko enonga kombumu tipe mundupeio,' nimbe eno lipe mundurumu kinye pungolio, nimu ulu teringi.

<sup>8</sup> Kano kinye kingimuni yunge kendemande marendo nimbeindo, 'Iye ambo limbelomunga langi noirimolo nalo peya namili wangei nindu imboma manda naa onge kani

<sup>9</sup> eno pungolio aulke lupe lupe itemanga pali pungo imbo kanongema iye ambo limbelomunga langi peya namili waio nipeio,' nimu.

<sup>10</sup> Pilkolio kano kendemandema aulke-manga pali pungo imbo kanoringima pali liko maku toringi. Imbo pengama kinye imbo kerima kinye peya liko maku toringi. Kano kinye iye ambo limbelomunga ulkena imboma paa ongo tenegepeya tendeko moloringi.

<sup>11</sup> Imbo maku toko moromelema kanamboi nimbe kingimuni eno moloringina om-balie, imboma iye ambo limbelo makuna ongemunga wale pakoli pakoromelema iye te wale pakoli aku tepa naa pakopa molorumuna kanopalie

<sup>12</sup> yundo nimbei, 'Iyemu ambe telka nu ambo ltimele wali, au ningi oromele mele tukundo naa onioya?' nimu kinye kano iyemuni ungure naa nimu.

<sup>13</sup> Kano wali kingimuni langi nokoringi kendemandendo nimbei, 'I iyemu kimbo kima ka tokolio kombu tumbulu toromona toko pena mundieol!' nimu. Akuna imboma paa mindili nongolio kola teko perekoi molonge," nimbe nimu.

<sup>14</sup> Aku tepa nimbeline Jisasini ungu ikomunga pulumu para tipe nimbei, "Paimbo Goteni imbo awinindo waio nimo nalo imbo koltalo kau kanopa lipe tukundo wangei nimo," nimu.

*Israel imbomani Sisarando kou takisi tangenje moloya waliko pileringi*

<sup>15</sup> Jisasini aku tepa nimu ungu pilkolio Farisi iyema tawendo pungo eno enonganliko maku tokolio ningei, "Jisasini ungu te nimbe alowa tendepili nimbo ambe teamiliya?" ningolio,

<sup>16</sup> eno lombili andolima kinye iye nomi king Herotenga talape iye mare kinye liko Jisas molorumuna liko munduringi. Eno pungolio Jisasindo ningei, "Ungu Mane Tilimu, nuni ungu paimboma kau ningi,

Goteni teaio nimo uluma toy a toko mane tiko, nu imbo tendekurenga kape konopu kimbo naa tiko, imboma pipili naa kolko enondo pali ungu tendeku tiko kau ningotirino konopu ltemolo.

<sup>17</sup> Aku teko ningotirino moronomunga nu ambele konopu ltenoya? Linoni Rom Gavman Iye Paa Awili Kiyendomu Sisar nilimu kou takisi tamilinje moloya?" ningi.

<sup>18</sup> Nalo Jisasini yu kinye konopu keri panjiko yu teko kenjingei teringi ulu lipe manjipelie enondo nimbei, "Eno kolo toko topele mapele toli iyema, nani nimbe kenjipili ningotirino ambe temona manda manjikoko toko waliko piltiemeleya?

<sup>19</sup> Takisi toromele kou mongo te na liko ondaio," nimu. Enoni yu molorumuna te liko meko oringi.

<sup>20</sup> Kano kinye Jisasini enondo nimbei, "I kouna naringa kumbekeremu kinye imbumu moromoaya?" nimu.

<sup>21</sup> Enoni yundo ningei, "Rom Gavman Iye Paa Awili Kiyendo Sisaramunga kumbekeremu kinye imbumu moromo," ningi.

Aku wali yuni enondo nimbei, "Kou monemu Sisaramunga kani Sisaramunga melema Sisaramu yunge tiko, Gotenga melema Gote yunge tieo," nimu.

<sup>22</sup> Yuni aku tepa paa tumbi tipe nimu ungu pilkolio mini lteko yu tiye kolko enopuringi.

*Sadyusi iyemani kolko makilinge ulumundo Jisas waliko pileringi*

<sup>23</sup> Kano iyema Jisas kinye kou takisi toli unggumi ningotirino pora tiringi wali Sadyusi iye mare Jisas molorumuna oringi. Sadyusi iyema eno Goteni altopa koromele imboma topa naa makinjimbelo, makilko ola naa molonge ningotirino pilko moloringi talapemu. Aku Sadyusi iyema ongo Jisas waliko pilkolio ningei,

<sup>24</sup> "Ungu Mane Tilimu, Gotenga ungu manema lino tirimu iye Mosesini ungu mane tipelie nimbei, Ambo limbelo iye te bakulu naa mepalie kolombalo kinye kano iyemu yunge angenu molombalumuni yunge ambo waimu lipe angenu lipe tapopa bakulu mendepili, nimu aku tepa bokuna moromo kanomu.

<sup>25</sup> Aku ungu manemanga ulu te linonga iye mare kinye wendo orumu mele nu walipo pilemili. Angenupili kite yupoko pakera moloringi. Komomu ambo lipelie kolorumu. Bakulu te naa molopili kolorumu kala yunge umbulkondo angenumuni yunge angenu kolorumumunga bakulu mendambo nimbe ambo waimu kelepa ltimu.

<sup>26</sup> Nalo bakulu te naa mendepalie yu we kolorumula. Yunge umbulkondomuni kano ambomu ltimula nalo yu kape we

kolorumula. Aku teliko pungolio iye kite yupoko pakera pali bakulu te kape naa mekolio kolko pora tiringi kinye akiliomu we kolorumula.

<sup>27</sup> Altopa ambomu yu kape kolorumula.

<sup>28</sup> Akumunga, koromele imboma altoko makilko ola molonge kinye kano ambomu iye kite yupoko pakera wayeni ltingi aku ambomu yu iye paa naringa omenu molombaloya?" ningi.

<sup>29</sup> Jisasini enondo topondopa nimbei, "Eno Gotenga bukuna ungu moromoma kinye, Gote kinye enge peremo mele kinye, naa pilko loi ltemelelunga imboma altoko tengemundo nimele mele naa pilko likolio kolo toromele.

<sup>30</sup> Makilko koinjo molonge imbomanga iyema ambo naa liko, amboma iye naa pungo,aku paa naa tengen. Mulu kombuna moromele enselema moromele mele aku teko molonge nio.

<sup>31-32</sup> Nalo eno Sadyusimani koromele imboma makilko ola naa molonge konopu ltemelelunga ungu te Goteni enondo nimumu enoni naa kanoko pimeleya? Yuni nimbei,

Na Abraham kinye Aisak kinye Jekop kinye enonga Gote moro, (Kis 3:6) nimu. Enonga Gote moloru naa nimu. Gote yu kololi imbomanga Gote, molo. Yu koinjo mololi imbomanga Gote," nimu.

<sup>33</sup> Yuni aku tepa nimu ungu imbo makuto moloringimani pilkolio yunge ungu mane tirimu unguma pilko mini lteringi.

#### *Gotenga ungu mane kiyendomu*

<sup>34</sup> Nalo Jisasini aku ungu nimumuni Sadyusi iyemanga unggumi pipi tindirimu, eno ungu te naa perimuna Farisi iyemani pilkolio eno liko maku toko Jisas molorumuna oringi.

<sup>35</sup> Oringi wali enonga iye te, yu Gotenga ungu manemanga puluma pilipe kondoramu iyemuni yuni nimbe kenjimbelonje manda manjipo pilemboi nimbe Jisasindo walipe pilipelie nimbei,

<sup>36</sup> "Ungu Mane Tilimu, Goteni ungu mane tirimu peremomanga te ungu manemu yu olandopaya?" nimu.

<sup>37</sup> Jisasini yundo nimbei, "Ungu mane olandopamu i tepe, Enoni enonga konopuma kinye, enonga minima kinye, enonga lipe manjilima kinye, akumani Awili mu enonga Gote kau enge ningotirino konopu mondaio, (Lo 6:5) aku tepe peremo.

<sup>38</sup> Aku ungu manemu yu paa enge nili kiyendomu.

<sup>39</sup> Talo tipe ungu manemu tendeku tipe mele. Akumu i tepe:

Eno te te ningoni enongano konopu mondoko kondo kolko nokoromele mele aku tekola imboma kondo kolko konopu mondoko nokoko molaio, (WKP 19:18)

nimbe peremo.

<sup>40</sup> Gotenga ungu mane Mosesini tirimuma pali kinye, Gotenga nimbe munduli ungu nili profet iyemani bukuna toringi unguma pali kinye, kano ungmanga pulumu aku ungu mane talo kau," nimu.

*Kraist yu naringa malo nimbe Jisasini imboma walipe pilerimu*

<sup>41</sup> Aku wali Parisi iyema aku teko we maku toko molangei Jisasini enondo i tepa walipe pilipelie nimbei,

<sup>42</sup> "Goteni eno nokopa kondombalo iye te lipo mundumbo oi nimbe kanopa ltimu iye nomi Kraistindo enoni ambele konopu ltemeleya? Yu nari? Yu narini kalopa limbelo konopu ltemeleya?" nimu kinye enoni ningei, "Iye nomi Kraist yu iye nomi king Devitini kalopa limbelo iye te," ningi.

<sup>43</sup> Yuni eno walipe pilipelie nimbei, "Aku lemo Gotenga Mini Kake Telimu Devitinga konopuna molopalie ungu te nimu kinye Devitini pilipelie iye nomi Kraistindo Awilimu nimu akumu ambe temona nimu konopu ltemeleya? Devit yuni iye Kraist molombalo mele i tepa nimu,

<sup>44</sup> Awili Goteni nanga Awilimundo nimbei, 'Nunge opa pulema nuni nokani nimbo, altopa eno topo mainye mundumbu kani i teli oi nu na kinye peya kopu tepe iye nomi talo molopo melema nokambil nanga imbo kindo ongo molani,' nimu, (Sng 110:1)

nimbe Devitini nimu kanomu.

<sup>45</sup> Devitini iye nomi Kraist yundo nu nanga Awilimu nimu lemo yu altopa ambe tepe Devitini kalopa limbelo iye te kau molombaloya?" nimu.

<sup>46</sup> Jisasini aka tepa walipe pilerimu ungu pilkolio iye akuna moloringimanga teni ungu te kape topondoko manda naa ningi. Neya aku wali pulu polko yu ungu te waliko pilingei pipili kolko naa waliko pileringi.

## 23

*Farisi iyema kinye Mosesinga mane ungu pilko ungu imbo tondoringi iyema kinye ulu pulu kerima teringina Jisasini nimu*

<sup>1</sup> Kano wali Jisasini imbo maku toringima kinye, yunge lombili andoli iyema kinye, ungu nimbe tipelie nimbei,

<sup>2</sup> "Gotenga ungu manemanga puluma pilko mane tirimele iyema kinye Farisi iyema kinye enoni Mosesini ungu manemanga puluma mane tirimu mele aku teko mane tirimele.

<sup>3</sup> Akumunga kano iyemani eno mane tirimelema pali wamongo teko pilko teangei, nalo aku iyemani mane tirimele mele enongano lombilknaa teremelelunga enoni ulu teremelema manda leko naa teao.

<sup>4</sup> Imbo teni umbuni teli mele te mepili nimbe ola lipo pendekona menderemo mele aku teko kano iyemani imbomando ungu mane tiko i teko teaio, i teko teaio ningi umbuni tirimele nalo alaye kolte kape tapopo meamili naa nimele.

<sup>5</sup> Imbomani lino kanokolio molko kondoromele Itemo ningi kanangei ningi uluma teremele. Gotenga ungu manema moromo pipia te kulupi toko mai mongona molo kina ka tongeindo imboma paa kanangei ningi kulupi paa awilimu toromele. Enonga wale pakolimanga ka kopo toko mondongeindo ka tule penga mare awini kopo toko mondoromele.

<sup>6</sup> Imbomani langi nongo imbomando namili waio nimele kinye kano iyema ongolio iye awilimanga polo kiyendo lino molamili ningi konopu tiko moromele. Imboma maku toko Gotenga ungumu pimele ulkena tukundo pungolio mainye molongeindo iye awilima moromele polo penga akuna molamili ningi konopu tiko pola akuna pungo moromele.

<sup>7</sup> Imboma maku toko moromele kombuna andongeindo pende pende teko we imbomani lino kanoko kapi nengei ningi pilkolio konopu tiko pilko andoko moromele. Imbomani enondo Ungu Imbo iye nimele kinye paa konopu tirimele.

<sup>8</sup> Kano iyemani aka teremele nalo enonga nokoli iye awili tendekumu kau moromo, eno pali angenupili moromele kani imbomani eno linonga Ungu Imbo Iyema naa nengei.

<sup>9</sup> Enonga Lapa tendekumu kau mulu kombuna moromo, akumunga maina imbo tend Ara naa neio.

<sup>10</sup> Goteni eno nokopa kondombalo iye te lipo mundumbo oi nimbe kanopa ltimu iye nomi Kraist kau enonga nokoli iye awilimu moromo kani imbomani enondo lino nokromo iyemu ningi iye awilimu naa nengei.

<sup>11-12</sup> Imbo teni yunge imbimu yunu lipo ola mundumbelo kinye Goteni yunge imbimu topa mainye mundumbelo; imbo teni yunge imbimu yunu topa mainye mundumbelo kinye Goteni yunge imbimu lipo ola mundumbelo kani enonga iye te eno nokombalo iye awili te molombai temo lemo enonga kongono kendemande iyemu molopili," nimu.

*Jisas Gotenga mane ungu pileli iyema kinye Farisi iyema kinye ulu keri teringima nimbe para tirimu*

<sup>13</sup> Yu lombili andolimando ungu nimbe pora tipelie Jisasini Juda imboranga iye awili moloringimando nimbei, "Eno Gotenga ungu manemanga puluma pilko mane tirimele iyema kinye, Farisi iyema kinye, eno mindili nongo paa molko kenjing! Eno topele mapele toli iyema! Enoni ambo waima ningi bembu tiko enonga ulkema wapu liko, imboma kanangei ningi Gote iye unguma tule teko we ningi angimele, akumunga kot walimu wendo ombalo wali puluma eno kinye pembalo.

<sup>14</sup> Eno ungu manemanga puluma pilko mane tirimele iyema kinye Farisi iyema kinye eno mindili nongo paa molko kenjing! Eno topele mapele toli iyema! Enoni ambo waima ningi bembu tiko enonga ulkema wapu liko, imboma kanangei ningi Gote iye unguma tule teko we ningi angimele, akumunga kot walimu wendo ombalo wali puluma eno kinye pembalo.

<sup>15</sup> Eno ungu manemanga puluma pilko mane tirimele iyema kinye Farisi iyema kinye eno mindili nongo paa molko kenjing! Eno topele mapele toli iyema! Imbo tendekure kau konopu topele topa lino lombili andombalo kinye paa, ningi mai kombumanga kimbo kongono teko kombu tulemanga pungo, nomu kuta sipimanga andoromele nalo altopa imbo te paimbo enoni nimele unguma pilipe lipe konopu topele topa lombili andoromo wali kano imborou teka kenjirimo mele paa olandopa, enoni teko kenjirimele mele mandopa, akumunga yu tipe kombuna paa pumbelo aulkemu akirindirimele.

<sup>16</sup> Eno mongo keri lelimani imboma aulkemu lipo ondamili nimele iyema eno mindili nongo paa molko kenjing! Enoni imboma mane tikolio ningi, 'Imbo teni mi lepalie ulke tempeleku imbi lepa paa tembo nimbelie pele tembo nimbe panjimbelo mele naa tembalo wali ulure molo. Nalo imbo teni mi lepalie ulke tempelena kou golomu imbi lepa paimbo tembo nimbelie pele tembo nimbe panjimbelo mele naa tembalo kinye manda naa tembalo. Yu paimbo kamukumu tepili,' nimele.

<sup>17</sup> Eno aroma toko mongo keri leli iyema! Mele ambele meleme lu olandopaya? Kou gol akumu mele olandopamu molo Gotenga ulke tempelena kou gol maku topa Gotenga nimbe kake tenderemo tempeleku olandopaya?

<sup>18</sup> Enoni ungu te peya imboma mane tikolio ningi, 'Imbo teni mi lepalie Gote popo toko melema karomele alta polomu imbi lepa paimbo tembo nimbelie altopa tembo nimbe panjimbelo mele naa tembalo kinye ulure molo. Nalo imbo teni mi

lepalie aku alta polona ola melte tingemu imbi lepa paimbo tembo nimbelie altopa tembo nimbe panjimbelo mele naa tembalo kinye manda naa tembalo. Yu paimbo kamukumu tepili,' nimele.

<sup>19</sup> Eno mongo keri leli iyema! Mele ambele meleme lu olandopaya? Alta polona ola Gote popo toko kalondangei ningi tirimele meleme lu olandopamu molo aku polona kano melema ola noiko Gotenga ningi tirimelema nimbe kake tenderemo alta polomu olandopaya?

<sup>20</sup> Akumunga, imbo teni mi lepalie Gote popo toko melema karomele alta polomu imbi lembalo wali alta polomu kinye polona ola lembalo melema waye imbi lepa mi lembalo.

<sup>21</sup> Aku tepala imbo teni mi lepalie ulke tempeleku imbi lembalo wali ulke tempeleku kinye akuna tukundo moromo Gote kinye imbi lepa mi lembalo.

<sup>22</sup> Imbo teni mi lepalie mulu kombumu imbi lembalo kinye Gote iye nomi kingimu molopa kombu nokombaindo moromo polomu kape aku polona ola moromo Gote kape imbi lepa mi lembalo.

<sup>23</sup> Eno ungu manemanga puluma pilko mane tirimele iyema kinye, Farisi iyema kinye, eno mindili nongo paa molko kenjing! Eno paimbo unguma nimolo ningi kolo toko topele mapele toli iyema! Langi kalongeindo tingo tepili ningi enonga poinyena mele kelo lupe lupe oromomanga inie toko langina mundurumele akumanga ungu mane te peremomu pilko 10 10 ningi noirimelamga te te Gotenga ningi yu tirimele. Aku ulu teremele nalo ungu mane enge nili olandopa mare tiye kolko naa pilko teremele. Imboma moke teko imbo awilima liko tapondoko imbo kerima teko kenjiko naa teko, imboma naa moke teko pali kondo kolko, Gote ipuki tiko temolo nimele mele tumbi tiko teko molko, aku ulu teangei nimbe peremo ungu manemando nio. Unku mane wema pilko teremele tiye naa kolko mare naa teremele nio akumaga pali teangei.

<sup>24</sup> Eno mongo keri lelimani imboma aulkemu lipo ondamili nimele iyema, eno ungu mane wema enge ningi pilko teko, ungu mane enge nilima naa pilko teremele aku teremele mele ungu manda lepo i teko nembo. Langi nongeindo mele kelo lopale molo lomoi langina peremo kanokolio naa namili ningi wendo liko lteremele, nalo kongi kamele te langina peremo kinye naa kanoko we liko nongo pengo mundurumele.

<sup>25</sup> Eno ungu manemanga puluma pilko mane tirimele iyema kinye Farisi iyema kinye, eno mindili nongo paa molko kenjing! Eno topele mapele toli iyema! Plet

kapomanga tawendo kulumie toko kondoromele nalo akumanga tukundo kalaro moromo aku mele enonga tukundo enoni enge ning wapu liko, eno kau kele toko konopu kimbo tiko limele uluma peremo.

<sup>26</sup> Eno mongo keri leli Farisi iyema! Plet kapomanga tukundo kulumie tonge kinye tawendo kape kake tembalo.

<sup>27</sup> Eno ungu manemanga puluma pilko mane tirimele iyema kinye Farisi iyema kinye, eno mindili nongo paa molko kenjing! Eno topele mapele toli iyema! Imbo ono kombumu kanoko penga kanangei ning pena kake telimu wape tenderemele mele eno aku tepa mele moromele. Imbo ono kombuma paimbo tawendo penga itemona karomele nalo tukundo imbo kololimanga ombelema kinye mele puruli nurupilima kinye peko lepa peremo.

<sup>28</sup> Enoaku teko mele moromele. Imbo mani enonga kangindo kanokolio eno iye tumbi nilima konopu itemele nalo enonga konopuna tukundo kolo toli uluma kinye ulu pulu kerima kinye kau tenegepeya tepa peremo.

<sup>29</sup> Eno ungu manemanga puluma pilko mane tirimele iyema kinye Farisi iyema kinye eno mindili nongo paa molko kenjing! Eno topele mapele toli iyema! Gotenga profet iyema koromele kinye enonga ono kombuma teko kondoko, tumbi nili imbomanga ono kombuma au tirimele.

<sup>30</sup> Aku tekolio enoni ningei, 'Lino linonga anda kolepalema kinye molemalanje enoni Goteni profet iyema toko kondoringi kinye linonga anda kolepale naa lipo tapondopo profet iyema naa tolemala,' nimele.

<sup>31</sup> Aku teko nimelelunga kano iyema toko kondoringi imbomani kalko ltingi iyema lino moromolo ning enonganliko ondoromele.

<sup>32</sup> Aku lemo manda, enonga anda kolepalemani pulu polko teko kenjiringi mele enoni kamukumu teaoi.

<sup>33</sup> Imbo toko kondoli waimbema! Eno kolo topa imboma tepa kenjili waimbemunga waloma! Goteni enondo teko kenjiringimunga tipe kombuna paio nimbelo kinye eno manda kowa pungeya?

<sup>34</sup> Akumunga nani Gotenga profet iyema kinye, lipe manjili pembalo iyema kinye, mane tingi iyema kinye, eno moromelena lipo munduro. Aku iyemanga mare toko kondoko, mare kolangei ning unjo polopeyana uku toko panjiko, mare eno maku toko Gotenga ungumu pileli ulke-manga meko pungo ka mapuni toko, kombumanga tamili ning kika tilko lombili punge.

<sup>35</sup> Aku tengemunga oi pulu polko yan-doko yandoko kape imbo tumbi nilima toko kondoringimunga ulu umbunima eno

Juda imbomanga iye awilima kinye pembalo. Gotenga bukuna oi pulu polko tumbi nili iye Abel kinye, yandopa moloringi imbo tumbi nilima kinye, yandopa Gotenga bukumu pora nimo akuna Berekia malo Sekaraia kinye toko kondoringi akumanga pali pulumu eno kinye pembalo. Sekaraia akumu Gotenga ulke kiripi lerimu ulke kinye Gote popo toko melema kaloringi alta polomu kinye aku tuku tingina toringi kanomu.

<sup>36</sup> Nani paimbo enondo i tepo nio. Oi teko kenjiringi ulumanga pali umbunima eno kinye moltomele imboma kinye pembalo," nimu.

#### *Jisasini Jerusalem lipe manjipelie kondo kolorumu*

<sup>37</sup> Aku tepa nimbeline Jisasini Jerusalem moloringi imboma yu kondo kolopalie akumundo ungu te nimbeline nimbei, "Oe Jerusalem imboma, Jerusalem imboma, Gotenga profet iyema toko kondoko, yuni imboma liko tapondangei nimbe eno moloringina lipe mundurumu iyema kouni toko kondoko teremele imboma, kera gula anumuni yunge waloma lipe yunge kongona maindo lopeke tepa nokoromo mele nani wali awini enoaku tepo nokomboi teru nalo enongan molo nimele.

<sup>38</sup> Akumunga pileio. Enonga kombumu, kinye beambo nimbe ku lembalo.

<sup>39</sup> Akumunga nani eno ungu te peya nimbo tiro, Eno Jerusalem imboma, enoni nando Goteni lipe mundurumuna oromo iyemu imbi ola molopa, molopa kondopili ning walimunga na altoko kanonge. Oi molo," nimu.

## 24

#### *Jisasini peyalime waimu i tepe wendo ombalo nimbe tirimo*

<sup>1</sup> Kano kinye Jisas Gote popo toko kaloringi ulke tempelena tawendo pumbe aulkena pumbe purumu kinye yu lombili andolima ongo ulke tempelelunga ulke lupe lupe paa penga angileringima yu kanowi ningliko ondordingi.

<sup>2</sup> Aku ulu teringi kinye yuni enondo nimbei, "I ulke tempel penga angimona kandomele melema pali i ungu paimbo nimbo tiro. Altopa walite opa pulemani kou te tengola lepili ungu naa ningei kouma toko mainye mundunge," nimu.

#### *Jisasini umbuni awini wendo ombalo nimu*

<sup>3</sup> Kano kinye yu mai kembo Unjo Oliv Poinyena ola pumbe molorumuna we imboma naa molangei yunge kitipi kanoli iyema ongo enongan molkolio yundo wa-liko pilkolio ningei, "Tewali nuni nino ulu

wendo ombaloya? Altoko nu nondoko oni tenio walimu kinye mai pora nimbelo walimu kape wendo ombaindo oi ambele ulure tembalu kinye lino kanopolio kinye ombai teremo nimbo pilimoloya? Ningo tiwi," ningko waltindiringi.

<sup>4</sup> Yuni enondo nimbei, "Aku uluma wendo ombalomunga ungu mare imbonmani eno kolo toko tinge kani kanoko kondoko molaio.

<sup>5</sup> Iye awini ongo na moro mele yu mele mele kolo toko ningei, 'Goteni eno nokopa kondombalo iye te lipo mundumbo oi nimbe kanopa ltumu iye nomi Kraist akumu eno,' ningolio aku teko kolo toko tinge kani kanoko kondoko molaio. Imbo awinini aku iyemanga unguma pilko liko paimbo nimele ninge.

<sup>6</sup> Kombu marenge opa awili teko tengen mele pilko, otli akinjo opa awili i tepa i tepa wendo ombalo ningwe ninge kinye pilkolio mini naa lteao. Opa tengema kinye aku uluma Goteni oi wendo opili, alayé pele mele ya mai kombumu pora nimbelo nimbe, nimbe panjirimunguaku uluma paimbo wendo ombalo nalo aku wali peyalime waimu oi wendo naa oli.

<sup>7</sup> Mulu mai pora nimbelo walimu oi wendo naa opili iye pupu awili te kinye iye pupu awili te kinye opa teko, iye nomi king marenge imboma kinye marenge imboma kinye opa tengen. Ya mai kombu tengenenga ombe, mai parambala tepa, aku ulu tembalu.

<sup>8</sup> Ambo teni bakulu kokele kanopa limbeindo oi umbulu meni topa mindili noromo mele, mulu mai pora nimbelo walimu kokele wendo ombaindo umbuni lupe lupe aku tepama oi wendo ombalo.

<sup>9</sup> Kano uluma wendo ombalo walimanga nanga kitipi kanoli imboma mindili nongo, kolangei ningeno mare kot teko ka tinge. Nanga imboma molko nanga unguma andoko ningottingemunga kombumanga pali imbomani eno kinye mumindili kolko konopu keri panjinge.

<sup>10</sup> Kano umbunima wendo ombalo walimanga na ipuki tinge imbo awini ipuki tinge mele tiye kolko enongano nendo yando konopu keri panjiko, Kraistinga imboma moromelemunga mindili nangei ningoenonga opa pulemanga kindo liko tinge.

<sup>11</sup> Kano walimanga Gotenga ungu naa pilko we kolo toko yando ningottinge imbo awini wendo ongela. Aku tengen kinye we imbo awinini paimbo nimele ningoenonga unguma pilko linge.

<sup>12</sup> Ulu paa keri awini olandopa olandopa wendo ombalo kinye nendo yando konopu mondonge mele kinye, na konopu mon-

donge mele kinye nanga imbo awinimaniaku uluma tiye kolonge.

<sup>13</sup> Nalo nanga ungumu tiye naa kolko mulu mai pora naa nipili enge ningomolonge imboma Goteni lipe tapondopa mindili nonge kombuna naa pungo peyamolopo kondopo kau pamili nimbelo.

<sup>14</sup> Goteni iye nomi kingimu molopa imboma nokoromomunga ungu tukumemuimboma pali pilengi ningokombumanga pali andoko ningottinge kinye altopa mulu mai pora nimbelo walimu kamukumu wendo ombalo," nimu.

*Jisasini mele paa keri te wendo ombalo nimu*

<sup>15</sup> (Na i bukumu toro iyemuni eno bukaromele imbomando ungu te nembo, Jisasini nimu ungumu inie anjikondo moromo akumu eno imbi karomele imbomani ungu pulumu paa pilko kondangei nimbo nio.) Jisasini nimbei, "Gotenga nimbe munduli ungu nili profet iye Denieleni bukuna imbi topa nimbe tirimu mele,

Imbo tepa pipili kondoli mele paa kerimu ulke tempelena tuku Gotenga ulke kiripi kake telina angilimbelomunga kombu akumu paa kalaro molombalo,

(Dan 9:27, 11:31, 12:1)

nimbe peremo. Aku melemu akuna wendo ombe angilimbelona kanokolio

<sup>16</sup> umbuni awilima wendo ombai teremo ningopilkokombu Judia provins molonge imboma enonga kombuma tiye kolko mai kembolebalomanga kowa pungei.

<sup>17</sup> Imbo te ulke tulepena ola molopili aku tepa wendo ombalo kinyekanopalie kowa pumbeindo mainye ombe melema lipo mepo pambonimbe ulkena tukundo naa pupili.

<sup>18</sup> Imbo te poinyena molopalie kowa pambonimbe kelepa ulkendo pumbe yunge ali wale tulemu naa lipili. Toya toko kowa kau pangie.

<sup>19</sup> Aku tepa wendo ombalo walimunga ambo bakulu keri teko molongema kinye, ambo bakulu ame tiko molongema kinye, eno manda lkiko kowa naa pungemunga eno kinye paa umbuni wendo ombalomunga eno kondo teremo.

<sup>20</sup> Gote kinyekonge tekolio, ali teremo olimanga kinyekoro molopo manda naa andomolo wali Sabatemanga kinye manda kowa naa pumolo kaniaku walimangaaku umbunima wendo naa opili neio.

<sup>21</sup> Aku walimanga umbuni paa awilima wendo ombalo. Oi mulu mai talo pulopolopa terimu wali kape, yandopa kape umbuniaku tepe te wendo naa orumu. Altopakapeaku tepe umbuni awilima naa wendo ombalo.

22 Aku umbunima wendo ombalo wali Goteni nondopa pora nipili nimbe oi naa nimbe panjilkanje imboma pali kolemala. Nalo Goteni nanga imboma molangei nimbe kanopa ltimu imboma pali naa kolangei nimbe umbuni wali akuma nondopa pora nipili nimbe, nimbe panjirimu.

23 Aku umbunima ombo pembalo walimanga imbo mareni ningei, 'Kanaio! Goteni lino nokopa kondombalo iye te lipo mundumbo oi nimbe kanopa ltimu iye nomi Kraist i ombo moromo,' ninge molo 'Neyana ombo moromo,' ninge kinye enonga unguma naa pilko, paimbo nimele ninga naa pilengel!

24 Iye mare ongo kolo tokolio ningei, 'Goteni kanopa ltimu iye nomi Kraist lino,' ninge, molo kolo tokolio 'Gotenga nimbe munduli ungu nimilindo ombo nimbo tirimolo,' ninge. Imboma pali, Goteni nanga imboma molangei nimbe kanopa ltimu imboma kape lipo loi tipo, nimolo mele paimbo ninga enge ninga pilengel ninga Goteni kau ulu enge nili manda teremoma mele manda leko ulu paa enge nili awini tenge. Nalo Gotenga imbo tukumema aku teko kondi tonge wali enonga unguma naa pilko, liko tui tinge.

25 Akilio ulu akuma wendo ombalo mele eno oi pilengel nimbo i nimbo tiro.

26-27 Muluna kariapa teremo wali ena mundi oromondo kape ena pepurumondo kape kariapa teremo walitikale karomele, aku tepa Iyemunga Malo altopa mainye ombalo wali kombumanga pali imbomani yu walitikale kanonge aku mele kani pileio. Aku walimunga akilio imbo teni nimbei, 'Iye nomi Kraist neya imbo naa peli kombu ku lelina moromo,' nimbelo kinye kanamili ninga akuna naa paio. Molo i ulkemunga kiripina moromo ninge lemo enoni ipuki naa tieio!

28 Mele kololi te lemo kombuna kera krumuluma ongo maku toromele kanomu."

### *I uluma kamukumu wendo ombalo wali, Gotenga malo altopa ombalo*

29 "Aku walimangaaku mindili nonge nio uluma wendo ombalo kinye altopa tumbi tipe ulu lupe lupe mare wendo ombalo. Akuma i tepa:

Kombu tangombaindo ena pa teremo mele naa tepa, tumbulu topa, oli ipu leli pa teremo mele naa tepa, kombu kandiyema muluna mainye ombo, muluna angimo mele enge nilima lope lape tepa anjo yando pumbe,aku tepa ulu lupe lupema wendo ombalo.

(Ais 13:10)

30 Aku uluma wendo ombalo wali Iyemunga Malo kamukumu ombai tembalo mele lipe ondombalo melte muluna angilimbelo kinye kanokolio kombumanga pali imbonani paa kola awili teko tenge. Altoko kanoko molangei Iyemunga Malo enge peremo kinye, pa awili tepa teli au nimomu kinye kupena molopa kamukumu mainye ombalo kinye imbomani kanonge.

31 Kano kinye biukel teni ungu paa enge nili tembalo. Aku wali Iyemunga Maloni yunge enselema lipe mundumbelo kinye ena oromondo ena pepurumondo wiyando mereyando muluna maindo mai kombumanga pali pungo Goteni nanga imboma molangei nimbe oi kanopa ltimu imboma tukundo tukundo linge."

### *Unjo fik teremo ulumu liko manjingei nimu*

32 "Unjo fikimuni teremo aku tepa ungu iko te peremo kani pilkolio ungu pulumu pileio. Unjo fik mu teremo wali kanokolio ena tembalo waimu wendo ombai teremo lepamo ninga pimele.

33 Aku tepala, i ulu wendo ombalo nioma paimbo wendo ombalo kinye kanokolio Yu paimbo nondopa ombai teremo ninga Yu kerepuluna ombo angimo ninga pilengel.

34 Nani enondo i ungu paimbo nimbo tiro. Kinye moromele imboma oi naa kolangei i wendo ombalo nio uluma pali wendo ombalo.

35 Mulu mai talo pora nimbelo nalo nanga ungu nioma paa pora naa nimbelo," nimu.

### *Imbo teniaku uluma ombalo waimu naa lige manjirimo*

36 "Iyemunga Malo paimbo ombalo nalo yu ombalo walimu imboreni naa lipe manjirimo. Ipu leli ombalonje, tangoli ombalonje naa lipo manjirimolo. Mulu kombuna enselema kape naa liko manjirimele. Gotenga Malo kape naa lipe manjirimo. Ara yunu kauaku waimu lipe manjipe moromo.

37 Oi iye Noa molopili imbomani terengi mele Iyemunga Malo ombai tembalo kinye imbomaniaku ulu kala tenge.

38 Mai kombumanga pali no oi naa topili imboma langi nongo, iyema ambo liko, amboma iye pungo,aku uluma kau teko mololiko puringi. Noa nona andoli sip ulkebunga tukundo purumu wali kape enoaku uluma kau we teko moloringi.

39 Eno Noanga ungumu naa pilko aku teko uluma kau teko molangei no topa kombuma pali noni aka topa imboma pali topa kondorumu. Aku ulu terengi mele teliko pungo molangei Iyemunga Malo ombalo.

40 Yu ombalo walimunga iye talo pojnye teko molongele wali Gotenga ensel teni ombo iye te we molopili te lipe mepa pumbelo.

<sup>41</sup> Ambo talo langi kalko molongele wali ensel ombalie ambo te we molopili te lipe mepa pumbelo.

<sup>42</sup> Akumunga enonga Awilimu ombalo walimu paa naa liko manjirimele kani Yu ombalo ningko kanoko molaio.

<sup>43</sup> Eno i ungumu konopu liko munduko pileio. Ulke pulu iyemuni ipu leli wapu noli iye te yunge ulkemu omaba alumbiye tepa melema wapu limbelo mele pilkanje wapu noli iyemu ombalo nimbe nokopa molka kinye wapu noli iyemu yu manda tuku naa olka.

<sup>44</sup> Aku teko eno nokoko molaio. Iyemunga Malo ombalo waimu naa liko manjirimele kani yu paimbo ombalo ningko aku teko nokoko molaio," nimu.

*Kongono iye pengamu kinye kongono iye kerimanga ungu manda lepa nimu*

<sup>45</sup> "Akumunga ungu te nemboi, kongono tendeli kendemande iye narini kongono tepa kondoromo kinye kanopalie yunge iye awilimuni yuni kongono tiroma tumbi tipe teremomunga yu kongono timbo kinye tepa kondombalomunga na altopo konopu kimbo tipo naa molombo nimoya? Kemande iye te aku tepa mele tepa kondopa moromomu kanopalie yunge iye awilimuni yu kanopa lipelie yundo nimbei, 'Kongono tendeli kendemandemba pali nokondoko enonga langi nongema ena waina mako tolimunga eno nangei moke teko tieni, nokondoko molowi,' nimbe yu tenga purumo.

<sup>46</sup> Altopa iye awilimuni kongono timomu kano kongono tendeli kendemandemuni wamba tendepa molopili awilimu kelepa omo lemo kendemandemba yu konopu timbelo.

<sup>47</sup> Nani enondo i ungu paimbo nimbo tiro. Iye awilimuni kano kendemandemundo nimbei, 'Nanga mele noiroma pali nuni nokondowi,' nimbelo.

<sup>48-49</sup> Nalo iye awilimuni kano kendemande iyemundo nimbei, 'Nanga kendemande imboma pali nokondowi,' nimbe tenga purumo wali kano kendemande iyemuni tepa kenjipe nanga awilimu welea naa ombalo konopu lepalie yuni nokondoromo kendemande imboma koipeni topa, no nongo keke lepo toli iyema kinye langi nomba no enge nilima nombalie, aku tepa tepa kenjipe molomo lemo

<sup>50</sup> walite kano kendemande iyemuni yunge iye awilimuni ombalo nimbe naa pilipe kongono tirimu mele naa tepa we tepa kenjipe molombalo wali ombalo.

<sup>51</sup> Ombalo kano iyemuni tepa molombalo ulu kanopalie yu paa koipeni pupu topalie, kolo toromele imbo topele mapele toli

imboma kombu keri moromelena pupili nimbe lipe mundumbelo. Kano kombuna imboma paa mindili nongo kola teko perekonolonge," nimu.

## 25

*Ambo wenepo ki talonga talo pakeranga kongolino lipe nimu ungu*

<sup>1</sup> Aku tepa nimbelie nimumuni, Jisasini yu kelepa ombalo mele ungu mare peya nimbelie nimbei, "Iyemunga Malo kelepa wali talo tipe maina mainye ombalo kinye Gote iye nomi kingimu molopa imboma nokoromo akumu i tepa mele lembalo: Ambo limbei iyemu ombai terimu kinye pilkolio ipu leli ombalo ningko ambo wenepo 10 enonga tipe lamema liko yu aulkena limolo ningko purungi.

<sup>2</sup> Aku ambo wenepomanga kite pakera konopu naa pepili tune tane ningko moloringi; kite pakera lipe manjili pepili moloringi.

<sup>3</sup> Konopu naa pepili tune tane ningko moloringi ambo wenepomani enonga tipe lamema meko purungi nalo lam kerasin peya naa meko purungi.

<sup>4</sup> Nalo lipe manjili pepili moloringimani kerasin kinye enonga tipe lamema kinye meko purungi.

<sup>5</sup> Ambo limbelo iyemu welea naa orumuna ambo wenepoma pali uru orumuna uru peringi.

<sup>6</sup> Kano kinye amburume tuku iye te alako topa nimbei, 'Ambo limbelo iyemu oromo kani! Aulkena liengei waio!' nimu.

<sup>7</sup> Ambo wenepo kanoma ola angilko tipe lam tipe nopili ningko teko wamoringi.

<sup>8</sup> Konopu naa pepili moloringimani lipe manjili pepili moloringimando ningei, 'Linonga tipe lamema kumbultumo kani enonga kerasin mare lino liko munduko tieio,' ningi wali

<sup>9</sup> lipe manjili pepili moloringimani topondondo ningei, 'Kerasin eno kinye lino kinye manda naa tembalo kani eno stuana pungo enonga pame teko lipeio,' ningi.

<sup>10</sup> Pame teko lingindo purungi wali ambo limbelo iyemu orumu. Kano kinye iye ambo limbelomunga langi akuna nongeindo maku toringi imboma, lipe manjili pepili moloringi ambo wenepoma peya ulkena tuku purungi. Kano kinye ulke nambu tiko ingi tiko langi nongo moloringi.

<sup>11</sup> Altoko langi nongo molangei ambo wenepo stuana puringima ongolio ningei, 'Awilimu, Awilimu, lino nambu toko liwi,' ningi.

<sup>12</sup> Nalo yuni enondo topondopa nimbei, 'Nani enondo i ungu paimbo nimbo tiro. Na enonga imbima naa pilto. Tawendo

moromelema manda tukundo naa onge,' nimu," nimbe Jisasini nimu.

<sup>13</sup> Aku tepa nimbeline yuni altopa nimbei, "Aku ulu tembalu kani Iyemunga Malo kelepa ombalo walimu kape eno naa pilko, ipu leli oi ombalonje tangoli ombalonje ipu leli ombalonje aku naa liko manjirimele kani Yu ombalo nokoko kondoko molaio," nimu.

*Kongono iyema kou mone ltingi ungu kongolino lipe nimu*

<sup>14</sup> Nimbeline Jisasini ungu kongolino lipelie nimbei, "Goteni iye nomi kingimu molopa imboma nokromo akumu i tepe mele: Iye te kombu tenga pumbe molombaindo yunge kendemande iyema waio nimbe yunge melema nokondaio nimbeline,

<sup>15</sup> enoni kongono teremele mele lipe manjipelie moke tepe yunge melema eno moke tepalie iye te kou 5,000 kina mele tipe, te kou 2,000 kina mele tipe, te 1,000 kina mele tirimu. Aku tepalie yu purumu.

<sup>16</sup> Iye 5,000 kina ltimumu tumbi tipe pumbe kano koumuni bisnis tepalie, kou 5,000 kina olandopa pumbe ltimu.

<sup>17</sup> Aku tepala iye 2,000 kina ltimumu olan-dopa 2,000 kina pumbe ltimu.

<sup>18</sup> Nalo 1,000 kina ltimumu pumbe lopeke teambo nimbe yuni maina muru akupe yunge nokoli iyemunga koumu lowai terminu.

<sup>19</sup> Wali awini ombo purumu kinye aku kendemandemanga nokoli iyemu ombo enondo nimbei, 'Kouma eno teringi ulu kanambo liko ondaio,' nimu.

<sup>20</sup> Kano kinye 5,000 kina ltimu iyemuni 5,000 kina ola panjipe ltimumu mepa ombalie nimbei, 'Awilimu, nuni na 5,000 kina tirinu. Nani 5,000 kina ola panjipo ltimu i ambolto kanowi,' nimu.

<sup>21</sup> Nokoli iyemuni yundo nimbei, 'Kendemande iye pengamu, ulu paa penga terinu. Kongono walo kolte mele tirumu nuni teko kondorunumunga nuni nanga mele awini nokondowi nimbo kani nu ongo na peya tapu topo tono kolopo molambili owi,' nimu.

<sup>22</sup> Iye 2,000 kina ltimu iyemu yu kape ombalie nimbei, 'Awilimu, nuni na 2,000 kina tirinu kanomu. Nani 2,000 kina ola panjipo ltimu i ambolto kanowi,' nimu.

<sup>23</sup> Yunge nokolimuni yundo nimbei, 'Kendemande iye pengamu, ulu paa penga terinu. Kongono walo kolte mele tirumu nuni teko kondorunumunga nanga mele awini nokondowi nimbo kani nu ongo na peya tapu topo tono kolopo molambili owi,' nimu.

<sup>24</sup> Kano kinye 1,000 kina ltimu iyemu kape ombalie nimbei, 'Awilimu, nu bisnis

enge ningoteko kou mone lipo noimbo-munga imboma mindili nonge lemo mandala ningoteko kendemande imboma kongono mindili nongo teangei ningotiko, eno mele koltalo tiko melema pali nunu kau linio iyemu, poineyimbomanipanjindirimel kinye nu nunu langi melema we akuko liko rais witimunga kilulu toromele kinye mongo talo imbo wemanikilulu toko tiltirimel kinye nu nunu rais wit mongo we linio meleaku ulu lipo manjiru.

<sup>25</sup> Aku teko terenomunga nani nu pipili kolopolio na pumbo nunge kou na tirinumu maina lowai tenderu. Kano koumu i ampolto kanowi. I nunge koumu nu tiro liwi,' nimu.

<sup>26</sup> Aku nimu ungu pilipelie nokoli iyemuni yundo topondopa nimbei, 'Teko kenjili kendemande iye kerimu, poineyimbomanipanjindirimel akuna na nanu langi melema we akupo lipo; rais witimunga kilulu toromele kinye mongo talo imbo lupemani tiltirimel kinye na nanu rais wit nowi itemoma we ltio ningoteko manjirinu itemo.

<sup>27</sup> Aku teko pilkolio nanga kou monemu kou beng ulkena noilinanje paa. Aku tele-nanje na ombo nanga koumu wendo lipolio kou walo kolte ola panjiko tilimala lika,' nimu.

<sup>28</sup> Kano kendemande iyemundo aku tepa nimbe pora tipelie yuni we kendemande iyemando nimbei, 'Iyemu tepa kenjirimu kani yunge koumu wendo likolio 10,000 kina ambolto iyemu tieio,' nimu.

<sup>29</sup> 'Melema noirimo imbomu nani mare peya timbo, yu paa awini noimbelo. Nalo melema naa noirimo imbomu yu noirimoma kape wendo limbo.

<sup>30</sup> Kinye kendemande iye kerimu tumbulu tolina liko pera tiko pena mundeo. Akuna imboma paa mindili nongolio kola teko perekolonge,' nimu," nimbe Jisasini nimu.

*Iyemunga Malo imboma pali moke tem-balo*

<sup>31</sup> Aku tepa nimbeline yu altopa ombalito mele nimbeline nimbei, 'Iyemunga Malo yunge enge pa telimu kinye ombalie, yunge mulu kombuna enselema kinye pali onge kinye enge pa telina tuku iye nomi king polomu lembalona yu molombalo.

<sup>32</sup> Yunge kumbekerena mai kombuna imboma pali liko makutondonge. Kano kinye kongisipsipateli iye teniyunge ari tirimoma moke tepaliekongisipsipima lupe lipe mundu, kongimememalupe lipe mundurumo meleaku tepa Iye Nomi Kingimuni imbo makutoko molongema moke tepalie,

<sup>33</sup> imbo kongi sipsip mele molongema yunge imbo kindo lipe mundupe, kongi memema mele molongema yunge koya kindo lipe mundumbelo.

<sup>34-36</sup> Aku tepalie, yuni yunge imbo kindo molonge imbonando nimbei, 'Na engeleena koloru kinye enoni na langi tiringi. Na no wali koloru wali enoni no kolko tiringi. Na aulke ponenge oru wali enoni na peya molamili owi ningi. Na pulu waimbele naa panjipo we andoru kinye wale pakoli te tiringi. Na kuro torumu wali nokoringi. Na ka ulkena peru wali ongo kanoringi. Arani eno molko kondangei nimuna konopu penga pepili moromele imboma, enoni ulu akuma na kinye teringi kani, ya ongo, oi mulu mai talo naa lepili Arani'yu nokombalo kombuna eno peya tapu topo molomolo nimbe, nimbe panjir imu kombuna tukundo waio,' nimbelo.

<sup>37</sup> Aku tepa nimbelo kinye pilkolio tumbi nili imbomanli topondoko yundo ningei, 'Awilimu, tewali nu engele kolorunu kinye kanopolio naa langi tirimulya? Tewali nu no wali kolorunu kinye kanopolio naa kolopo tirimulya?

<sup>38</sup> Nu iye ponengemu tena molorunu kinye kanopolio ulke tukundo molamili owi nimulya? Wale pakoli naa pakoko we andorunu kinye kape naa tena kanopolio wale pakoli tirimulya?

<sup>39</sup> Nu kuro torumu wali kape, ka ulkena perinu wali kape, tewali ombo kanorumulyua?' ninge.

<sup>40</sup> Aku teko ninge kinye Iye Nomi Kingimuni enondo topondopa nimbei, 'Nani enondo i ungumu paimbo nimbo tiro. I nanga angenupili imbi naa mololi te kape liko taporingi akumu na liko taporingi,' nimbelo.

<sup>41-43</sup> Aku tepa nimbeline yunge koya kindo molonge imbonando nimbei, 'Goteni eno molko kenjingei nimo imboma, na engeleena koloru wali enoni na langi te naa tiringi. Na no wali koloru wali enoni na no nambo ningi kolko naa tiringi. Na iye ponengemu oru wali na peya molamili owi naa ningi. Na wale pakoli te naa pakopo we andoru kinye na wale pakoli te naa tiringi. Na kuro torumu wali na naa nokoringi. Na ka ulkena Peru wali na naa ongo kanoringi. Enoni na aku teko naa liko taporingi kani eno nanga kumbekerena naa ongo andi pungo, Satan kinye yunge enselema kinye enonga tipe we nomba pepa kau purumo kombu akuna paio,' nimbelo.

<sup>44</sup> Aku tepa nimbelo ungu pilkolio kano imbomanli kape topondoko ningei, 'Awilimu, nu engele kolorunu wali kape, no wali kolorunu wali kape, nu ponenge leko orunu wali kape, we andorunu wali kape, kuro torumu wali kape, ka ulkena perinu

wali kape, linoni nu aku teko molorunu wali, tewali kanopolio nu naa lipo taporumulya?' ninge.

<sup>45</sup> Aku teko ninge wali yuni enondo topondopa nimbei, 'Nani eno paimbo nio. Enoni i nanga angenupili imbonanga imbi naa mololi te naa liko taporingi akupe na naa liko taporingi,' nimbelo.

<sup>46</sup> Kano kinye aku teko kenjirimele imboma pungo kamukumu molko kenjiko kau puli kombuna punge, nalo tumbi nili imboma pungo kamukumu molko kondoko kau puli kombuna punge," nimbe Jisasini nimu.

## 26

*Juda imbomanga iye awilimani Jisas topo kondamili ningi wai toringi*

<sup>1</sup> Jisasini yu altopa yando ombalo mele ungu akuma nimbe pora tipelie yunge kitipi kanolimando nimbei,

<sup>2</sup> "Eno i ungu piltimeli, wali talo we ombo pumbelo kinye oi Goteni Israel imboma naa topa we ombo purumu waimu liko manjiko plawa yis naa munduli we kalko noromele Pasova wai awilima wendo ombalo. Aku waimu wendo ombalo kinye Iyemunga Malo kolopili ningi unjo polopeyana ola uku tangei ningi liko wendo tinge," nimu.

<sup>3</sup> Jisasini aku tepa nimu walimunga Gote popo tondoringi iye awilima kinye, Juda imboma nokoringi tapu iyema kinye, eno Gote popo tondoringi iye awili olandopa Kaiafas nili iye akumunga ulkena pungo liko makutokolio,

<sup>4</sup> Jisas kiyengo ningi ambolko liko tongeindo langi ningi moloringi.

<sup>5</sup> Ningi molkolio ningei, "Nondopo tamili, nalo Pasova waimunga langi kalopo uluma tepo molamili ningi imbo awini ya Jerusalem ongo maku toko molongemunga yu i teli oi tomolo kinye enoni lino kinye mumindili kolko opa tengen kani i teli oi naa topo, keleamili," ningi.

*Ambo teni wel pengamu lipelie Jisasina pinyewena ondopa kandorumu*

<sup>6</sup> Kombu kelo Betani iye te oi kuro kendi nombalie kelerimu iye te, imbi leko Iye Kuro Kendi Noli Saimon ningi kanomunga ulkena Jisas molopili

<sup>7</sup> ambo te wel mai mingi paa penga te yu molorumuna mepa orumu. Kano wel paa mune tolimunga kou mone paa awili tepe purumu. Akumu mepa ombalie Jisas langi noli polo molorumuna mepa ombo Yu tepo kondambo nimbe pinyewena ondonorumu.

<sup>8</sup> Yuni aku terimu ulu kanokolio Jisas lombili andolima konopu keri panjikolio ningei, "Aku welemu ambe telka we tepe kenjirimuya?"

<sup>9</sup> Aku welemu kou mone limalanje kou awini lipolio imbo koropama moke tepo tilimala,” ningi.

<sup>10</sup> Enoni ambomundo aku teko ningi ungu pilipelie Jisasini enondo nimbei, “I ambomu kinye ambe telka ungu awini nimeleya? Yuni na kinye ulu penga te temo.

<sup>11</sup> Imbo koropama eno kinye waliwalima molonge nalo na eno kinye waliwalima naa molombo.

<sup>12</sup> Na ono tengemunga i ambomuni i wel mune tolimu nanga kangina ondondomo.

<sup>13</sup> Nani enondo i ungu paimbo nimbo tiro, Mai kombumanga pali i nanga ungu tukumemu andoko ningi tinge kinye i ambomuni kinye temo temanemu kape imbonani pilkolio yuni tepa kondorumu ningi pilengei ningolio aku ungumu ningi tinge,” nimu.

*Judasini Jisas Juda imbomanga tapu iyemanga kindo timbo nimu*

<sup>14</sup> Kano walimunga Jisasiningi kitipi kanoli iye 12 akumanga iye te, yunge imbiwu Judas Iskariot, Gote popo tondoringi iye awilima moloringina pumbe,

<sup>15</sup> eno walipe pilipelie nimbei, “Nani eno Jisas ambolko ka tinge aulke te lipo ondondu lemo enoni na kou ambe teko tingeya?” nimu. Aku nimu ungu pilkolio enoni kou silva mongo 30 kambu toko yu tiringi.

<sup>16</sup> Kano kinye yu kelepa yando ombalie Jisas lipe eno timbelo aulke te koropa molorumu.

*Jisas yunge ki kitipi kanoli iyema kinye langi nomba teangei unguma nimbe tirimu*

<sup>17</sup> Plawa Akoli Mele Yis Naa Munduko Plawa We Kalko Noringi Koromunga pulu polko walimu wendo orumu kinye Juda imbomani Pasova waimu liko manjingeindo kongi sipsip walo te toko nonge mele pilkolio, Jisas kitipi kanoli iyema yu molorumuna ongo waliko pilkolio ningei, “Goteni linonga anda kolepalema Naa Topa We Ombo Purumu waimu lipo manjilimilindo kongi sipsip walo te, kinye noniomu kombu tena pumbo melema tumbi tipo amenge tepe tepamili konopu ltenoya?” ningi.

<sup>18</sup> Aku teko ningi waltindiringi kinye Jisasini iye te molombalo mele eno lipo ondopalie nimbei, “Neya kombu awili Jerusalem tuku pungolio, neya iye akumu molombalona pungo yundo i teko ningei, ‘Ungu Mane Tilimuni i tepa nimu, na kinye ulu te wendo ombalo walimu nondopa wendo ombai teremo. Nunge ulkena tukundo na kinye na kitipi kanolima kinye lino Pasova waimu lipo manjimolo kongi sipsip walomu nomolo nimu,’ neio,” nimu.

<sup>19</sup> Kano kinye kitipi kanolima pungo Jisasini nimu ulte te pungolio, oi Goteni Israel

imboma naa topa we ombo purumu aku Pasova waimu liko manjinge kongi sipsip walo nongemu teko amenge teko noiringi.

<sup>20</sup> Kano kinye, ipupene ena pepumbe kala torumu kinye Jisas kinye kitipi kanoli iye 12 kinye ongo langi noli polona moloringi.

<sup>21</sup> Langi nongo moloringi kinye Jisasini nimbei, “Nani enondo i ungu paimbo nimbo tiro. Enonga iye teni na kinye opa pule toromele iyemanga kindo lipe timbelo,” nimu.

<sup>22</sup> Aku tepa nimu ungu pilkolio enonga konopuna umbuni awili tepa terimu pilkolio te te ningoni waltindikolio ningeindo, “Awilimu, nando ninoya?” nimu.

<sup>23</sup> Jisasini topondopa nimbei, “Eno nanga iye 12 enonga iye te na kinye langima polona ola ltemo te waye lipo nombolo iyemuni na lipe, opa pulemanga kindo timbelo.

<sup>24</sup> Kinye Iyemunga Malo kinye tengen mele koro oi ningi panjiringi temanemu Gotenga bukuna moromo mele paimbo opa pulemani tengen, nalo yu lipe opa pulema timbelo iyemu mindili nomba paa molopa kenjimbelo. Yu mindili enge nili nombalomunga iye akumu anumuni naa melkanje paa,” nimu.

<sup>25</sup> Jisasini aku tepa nimu ungu pilipelie Judas, yu lipe opa pulemanga kindo timbeli terimu iyemu, yuni nimbei, “Rabai, nino iyemu naya?” nimbe waltindirimu kinye Jisasini yundo “Nuni nino mele ltemo,” nimu.

*Jisasini yunge kitipi kanoli iyema bret wain talo tirimu*

<sup>26</sup> Eno langi nongo moloringi kinye Jisasini bret te lipe Gote kinye paa tereno nimbe ambolopa pike lepa yu kitipi kanolima moke tepa tipelie nimbei, “Imu nanga kangimu eno liko naio,” nimu.

<sup>27</sup> Altopa no wain kap te lipelie Gote kinye paa tereno nimbe eno tipelie nimbei, “I no wainimu eno pali liko naio.

<sup>28</sup> I no wain tiromu nanga mememu. Goteni eno yunge imboma kinye opa peamili nimbe mi lerimu kano ungumu kamukumu wendo ombo tepe enge timboi nanga mememu ondombo. Imbo awininga ulu pulu kerima kamukumu mainye pupili Goteni altopa naa kanopa tiye kolopili nimbo aku mememu imu.

<sup>29</sup> Nani enondo i tepe nimbo tiro, i teli oi na no wain altopo paa naa nombo. Akilio kau, Nanga Ara Gote iye nomi kingimu molopa nokoromo kombuna eno kinye no wain koinjomu popo tipo nomolo,” nimu.

<sup>30</sup> Langi nongo pora tikolio eno Gotenga kunana te ningolio, pena pungo mai kembo Unjo Oliv Poinyena ola puringi.

*Jisasini nimbei Pitani yu naa karo nimbelo nimu*

<sup>31</sup> Kano kinye Jisasini yu kitipi kanolimando nimbei, "Paa kinye ipu leli opa pulemani na kinye tengen ulumu kanokolio enoni pali na tiye kolonge. Aku teko tengen mele Goteni oi nimu yunge bukuna momomo kanomu. Goteni ungu iko te topalie nimbei,

Kongi sipsip tapu iyemu tangei nimbo, yu tonge kinye sipsipima lupe lupe punge, (Sek 13:7)

nimu, aku mele kinye wendo ombalo.

<sup>32</sup> Nalo na toko kondonge kinye na makilipo koinjo molopolio, na kumbe lepo kombu Galilindo pumbo," nimu.

<sup>33</sup> Jisasini aku tepa nimu kinye pilipelie Pitani nimbei, "Nu kinye ulu te wendo ombalumunga kanokolio enoni pali nu ipuki tirimele mele mainye pumbelo kinye nu aku tepa tiye kolonge lemo nani nu paa tiye naa kolombo, paa molo," nimu.

<sup>34</sup> Jisasini topondopa nimbei, "Nani nu i ungu paimbo nimbo tiro, kinye ipu leli, kera gula oi ko naa topili nuni pipili kolokolio wali yupoko nando kolo toko yu nariya na naa karo ninio," nimu.

<sup>35</sup> Nalo Pitani yundo nimbei, "Na nu kinye tapu torombolomunga ilto peya to-molo ninge lemo kape nu naa karo paa naa nimbo," nimu. We kitipi kanoli iyemani pali nu naa karomolo paa naa nimolo ningi kala.

*Getsemani poinyena Jisasini Gote kinye ungu nimbe konge nimu*

<sup>36</sup> Kano wali Jisas kinye yunge kitipi kanoli iyema kinye kombu Getsemani nilina purungi. Akuna pungolio yuni enondo nimbei, "Na andi pumbo Gote kinye ungu nipuro kani eno ina molaio," nimu.

<sup>37</sup> Aku tepa nimbelie Pita kinye Sebedi malo Jems kinye Jon talo peya lipe mepa pumbelie na teko kenjinge ulumu paa nondopa wendo ombai teremo nimbe pilipelie yu yunu kondo kolopa konopu keri panjipe konopuna mindili tepili molorumu.

<sup>38</sup> Yuni enondo nimbei, "Nanga konopuna umbuni paa awili te tepamo kani na kolto none teremo. Eno uru naa peko na kinye peya kopu tepo nokopo kondopo momamili, eno kane kane molaio," nimu.

<sup>39</sup> Aku tepa nimbelie yu alaye kolte anjipe pumbe komongo topa pondopa tamalu pepalie Gote kinye ungu nimbe konge tepalie nimbei, "Nanga Ara, na nondopo mindili noli no mingina no nombomu naa nambo ninio aulke te lemo lemo paa penga nalo nani tepolio nanu konopu lteo ulu naa teambo. Nuni kanoko penga pilino ulu tewi," nimu.

<sup>40</sup> Aku tepa nimbelie altopta yunge kitipi kanoli iye yupoko moloringina yando ombo eno uru peringi ulu kanopalie Pitando nimbei, "Eno uru naa peko na kinye wai alaye kolte manda we kanoko kondoko naa mlongeya?

<sup>41</sup> Kuromanga nomi Sataneni lino kondi tombalo kinye tepo kenjimolo kani ningolio uru naa peko Gote kinye ungu ningi kanoko kondoko molaio. Paimbo tepo kondamili nimbo konopuman pimolo nalo temilind kangimu tiye tepa enge naa peremo," nimu.

<sup>42</sup> Aku tepa nimbelie yu altopta anjipe pumbe oi Gote kinye ungu nimbe konge terimu mele altopala nimbei, "Nanga Ara, na mindili noli no mingina nomu nani ninu nomu wendo naa likolio na nomboi ninio lemo nunge konopu lteno ulumu wendo opili," nimu.

<sup>43</sup> Altopta yando orumu wali eno uru orumu altoko uru peringina kanopalie

<sup>44</sup> yu altopta wali yupoko tipe anjipe pumbe Gote kinye ungu oi nimbe konge terimu mele altopala nimu.

<sup>45</sup> Altopta yando ombalie kitipi kanolimando nimbei, "Ambe telka we uru peko mulu pilko moromeleya? Kanaio! Iyemunga Malo tangei ulu pulu keri teremele iyema lipe timbelo waimu wendo ombai teremo.

<sup>46</sup> Ola angilko pamili waio! Na lipe ondopa opa pule iyemanga kindo timbelo iyema oromona kanaio!" nimu.

*Judasini Jisas opa pule iyemanga kindo tirimu*

<sup>47</sup> Jisasini kombu Getsemani yu kitipi kanolimando aku tepa nimbe molopili Judas yu kitipi kanoli iye 12 akumanga iye te orumu. Gote popo tondoringi iye awilima kinye, Juda imbomanga tapu iyema kinye,aku iyemani liko munduringi iye awini, imbo toli loi geleama kinye koipema kinye meko, Judas kinye oringi.

<sup>48</sup> Oi Jisas molorumuna naa wangei Jisas Juda iye awilima lipe timbei nimbe panjirrimu iye Judasini eno Jisas yu ipu leli manda kanangei nimbe tipelie nimbei, "Nani iye te kanopolio kangulupo nunu nimbo akumu Jisas. Yu ambolko ka tieio," nimu.

<sup>49</sup> Aku iyema oringi kinye Judas yu Jisas molorumuna tumbi tipe ombalie "Imbo mane tili, molko kondowi," nimbe ombo yu kangulupe nunu nimu.

<sup>50</sup> Aku terimu kinye Jisasini yundo nimbei, "Ango, nuni teni orono ulu tumbi tiko tewi," nimu. Judasini Jisas kinye terimu ulu kanokolio oringi iyemani yu liko ka tiringi.

<sup>51</sup> Aku ulu teringi kinye kanopalie Jisas peya tapu toko angileringi iye teni yunge loi gelea te kulu topa wendo lipe Gote

popo tondoringi iye awili olandopamunga kendemande iye te topa yunge komu te topa laka ltenderimu,aku komumu wendo omba mainye purumu.

<sup>52</sup> Aku ulu terimuna kanopalie Jisasini yundo nimbei, "Nunge loi gelea te altoko lakona panjiwi! Loi gelea te liko imbo tonge imboma loi geleani toko kondonge.

<sup>53</sup> Nani nanga Ara waltindipolio liko tapondowi nilkanje yuni ensel ami talape 12 molo olandopa, tamburumbu na liko tapondangei paio nimbe lipe mundulka akumu nu naa liko manjirinoya?

<sup>54</sup> Nalo enselemani onto opa pulemani na naa tangei ningi liko tapondolemalanje Gotenga bukuna na kinye wendo ombalo nimbe moromo mele ambe tepea wendo olkaya?" nimu.

<sup>55</sup> Aku tepea nimbeline Jisasini yu ka tingei oringi iye awini onto angileringimando nimbei, "Na imbo topa wapu noli iyere moromo konopu lekolio na ka tingeinge imbo toli loi geleama kinye koipema kinye meko oromeleya? Ulke tempel kerepuluna we imboma maku toko moromele kombuna walwalima eno peya moromolo kinye ungu mane tipo moro wali na ambolko liko ka naa tirimele kanomu.

<sup>56</sup> Nalo i tepea wendo oromo ulumanga pali Gotenga profet iye mareni ulu mare na kinye altopa wendo ombalo mele oi ningi bukuna toringi moromo mele kamukumu wendo oromo," nimu. Kano kinye yu lombili andolima pali lino peya ka tingenje ningi pilkolio yu munduko kolko eno kowa purungi.

### *Jisas kot tenderingi*

<sup>57</sup> Kano kinye Jisas ambolko liko ka tikolio Gote popo tondoringi iye awili olandopa Kaias molorumuna meko purungi. Gotenga ungu manemanga puluma pilko mane tiringi iyema kinye, Juda imbomanga tapu iyema kinye, enoni Jisas kot tendepo pilemili ningi akuna oi onto maku toko moloringina meko purungi.

<sup>58</sup> Nalo Jisas meko purungi kinye Pita lombili akilio lepa taka lipe pumbe, Gote popo tondoringi iye awili olandopamunga ulkena, ulke angilipe pape tepea makai terimu, imunana imbo maku toringi kombu we lerimuna paa tukundo pumbe, Jisas ambele ulu tengenje pilemboi nimbe Jisas nokoko moloringi ele iyema kinye molorumua.

<sup>59</sup> Gote popo tondoringi iye awilima kinye, Juda imbomanga kaunsil iyema pali kinye, akuman Jisas yu toko kondongeindo ulu tepea kenjirimu te imbo teni yu i tepea tepea kenjirimu nimbe kolo topa nipi ningi imboma onto nengei ningi ungu pilko moloringi kinye

<sup>60</sup> imbo awini onto ungu mare kolo toko ngingi nalo enoni yu manda toko kondonge ungu te naa ningi.

Altoko imbo talo onto

<sup>61</sup> kolo toko ningili, "Iyemu i tepea nimuna pilerimbulu, i Gote popo toko kaloli ulke tempelemu nani tekiripolio, wali yupoko ombo pupili ulke tempel koinjo te manda altopto takombo nimu," ningili.

<sup>62</sup> Aku teko ningili ungu pilipelie Gote popo tondoringi iye awili olandopamu ola angilipe Jisas waltindipolie nimbei, "Ungu te topondoko naa ninoya? Nuni ningo kenjirinu mele nimbelemu ambele ungumu ningi kenjirinumundo nimbeleya?" nimu.

<sup>63</sup> Nalo Jisas ungu te topondopa naa nimbe we angilerimu. Gote popo tondoringi iye awili olandopamuni yundo altopa nimbei, "Nu morono mele paa ningo tieni. Koinjo Molopa Kau Puli Gote pilipe molopili paimbo nio ningo mi lekolio, Gote yunge Malo, yuni lino nokopa kondombalo iye te lipo mundumbo nimbe kanopa ltimu iye nomi Kraist paimbo nunje moloya? Lino paa ningo tiwil" nimu.

<sup>64</sup> Jisasini nimbei, "Nino mele litemo," nimu. "Ungu te peya enondo pali nio. Altopa walite Iyemunga Malo, Iye Enge nili Olandopa Pulim u melema nokombaindo yunge imbo kindo molopa, kupe-manga ola molopa mainye ombalona eno kanonge," nimu.

<sup>65</sup> Aku tepea nimumunga, yu Gote moro nimbe nimo ungu pilipelie Gote popo tondoringi iye awili olandopamuni paa pilipe keri pilipe yunge wale pakolimu yunu ambolopa pure lipelie nimbei, "Kinye yuni paimbo Gote ungu taka tondoromo ungu pilipolio nimbe kenjirimu mele nimbe timbelo imbo te peya ambe telka koromoloya? Yu Paimbo Gote none teremo nimona piltimolo.

<sup>66</sup> Ambele konopu ltemeleya? Yu kinye ambe teamiliya?" nimu kinye enoni ningei, "Yu Gote ungu taka tondomomunga topo kondamili," ningi.

<sup>67</sup> Aku teko ningolio enoni yunge kumbekerena olkambe toko kandoko, ki lumoni toringi. Maren yu larauwe tokolio ningi,

<sup>68</sup> "Nu Gotenga iye nomi Kraist moro nino kani profet kongono tekolio narini nu toromonje ningi tiwi," ningi.

### *Pitani nimbe Jisas naa karo nimu*

<sup>69</sup> Aku wali Pita yu papena tukundo, imboma liko maku toringi ulke kerepuluna molorumu kinye kongono tendeli kendemande ambo te Pita molorumuna ombalie yundo nimbei, "Nu kape Galili distrik iye. Jisas kinye peya tapu toko moloringi kanomanga iye te lepamo," nimu.

<sup>70</sup> Nalo akuna moloringi imboma pali kanoko molangei Pitani kolo topalie molo nimbe, "Nuni nino ungu na naa lipo manjiro," nimu.

<sup>71</sup> Aku tepa nimbeline Pita yu ulke kerek-puluna pumbe molopili kongono tendeli kendemande ambo teni yu kanopalie akuna moloringi imbomando nimbei, "I iyemu Yu Nasaret iye Jisas kinye peya tapu topa molomo iyemu," nimu.

<sup>72</sup> Pitani altopa "Molo. Nuni nino iyemu na naa karo," nimbeline Gotenga imbi lepa mi lerimu.

<sup>73</sup> Alaye kolte pele mele, Pita angilerimuna nondoko angileringi iyemani yu ungu alaye lupe mele nimuna pilkolio yu angilerimuna ongolio yundo ningei, "Kombu Galili distrik imbomani ungu nimele mele nu aku teko ungu nino piltimolo. Jisas kinye yu lombili andoli iyema kinye kombu Galili distrik iyerna, nu kaape Galili iye te, pilipolio nu paimbo yu lombili andoli iye te itemo konopu itemolo," ningi.

<sup>74</sup> Aku teko ningi kinye Pitani Gotenga imbi lepa enge nimbe mi lepalie nimbei, "Paimbo nio. Eno nimele iyemu paa naa karo. Kolo tondu lemo Goteni na topa kondopili," nimu.

Aku tepa nimu wali tamburumbu kera gula ko torumu.

<sup>75</sup> Aku terimu kinye pilipelie Jisasini yundo "Kera gula oi ko naa topili nuni wali yupoko tiko kolo tokolio, na naa karo ninio," nimu ungu kanomu Pita kelepa pilerimu. Lipe manjipelite ama, paa tepo kenjindu lepamo, paa naa tembo konopu lendu mele paimbo tendu nimbe pilipelie pena pumbe kola paa awili tepa terimu.

## 27

### *Jisas Pailat molorumuna meko puringi*

<sup>1</sup> Ipu leli oi kombu kokele tangorumu kinye Gote popo tondoringi iye awilima kinye, Juda imbomanga tapu iyema kinye enoni pali Jisasina kotemu pilko pora tikolio yu topo kondamili ningi, ningi panjiringi.

<sup>2</sup> Aku teko ningi panjikolio yu liko, ka toko, meko pungo, Rom gavman iye nomi Pailat molorumuna meko pungo kot tenderingi.

### *Judas yunu topa kondorumu*

<sup>3</sup> Judas, yu Jisas lipa yunge opa pulema tirimu iye kanomu, Jisasina kotemu pilkollo kolopili, toko kondangei ningi ungu pilipelie yuni Jisas eno lipa tirimu ulu pilipe keri pilipelie enonga kou silva 30 oi yu tiringima kelepa mepa pumbe Gote popo tondoringi iye awilima kinye Juda imbomanga tapu iyema kinye tipelie nimbei,

<sup>4</sup> "Nani iye eno lipo tindu kano iyemu, yu ulu te tepa naa kenjili iyemu, toko kondangei nimbo lipo tindumu paa ulu pulu keri te tendu," nimu. Nalo enoni topontoko ningei, "Akumu linonga ungu te molo. Nu nunu kau lino liko tinio. Akumu nunge ulumu," ningi.

<sup>5</sup> Kano kinye Judas yuni kou silva kanoma meli pumbe Gote popo toringi ulke tempel papena topa anjikondo mundupelie yu eno tiye kolopa anjo purumu. Anjo pumbelie ka nomba kolorumu.

<sup>6</sup> Gote popo tondoringi iye awiliman kou kanoma mainye polona lerimu kanoko likolio ningei, "I kouma imbo topo kondomilindo timoloma kani ulke tempel kouma kinye popo tipo naa noiemili. Akumunga ungu mane te peremo kani," ningolio

<sup>7</sup> ungu te ningi panjikolio ningei, "I kou monemani mingi sospen maini tepe wamoromo iyemunga maimu pame tepe liemili. Imbo mai te naa lepa enonga kombu tuluna imbo ya ongo moromelemanga imbo kolongema akuna ono teangei," ningolio aku teko pame teko ltingi.

<sup>8</sup> Kano kou monemani iye te toko kondonge aulkemu akirirenderingi koumani aku teringimunga kano maimu imbi leko Imbo Toko Meme Ondoringi Maimu ningi mele, kinye kaape aku tepe nimolo.

<sup>9-10</sup> Juda iye awiliman aku ulu teringimunga Gotenga profet iye Jeremai-ani ulu te altopa wendo ombalo oi nimu mele ara tirimu. Yuni nimbei,

Awilimuni nando tewi nimu mele eno aku teko tengende Israel imbomani iye akumu kou silva 30 pame teko liengei ningi kouma likolio, kano koumani mingi sospen maini tepe wamoromo iyemunga maimu pame teko ltingi, (Sek 11:12-13; Jer 32:6-9)

nimu.

### *Pailateni nimbei, "Nu Juda imbomanga King moronoya?" nimu*

<sup>11</sup> Judas aku ulu tepa molopili Jisas Rom gavmanemanga Judia kombu nokondopili iye nomi Pailat molorumumunga kumbekerena angilerimu kinye kano iye nomimuni yunge kotemu pilipelie yu walipe pilipelie nimbei, "Nu Juda imbomanga iye nomi kingimuya?" nimu. Jisasini topontoko nimbei, "Nuni aku teko nino," nimu.

<sup>12</sup> Gote popo tondoringi iye awilima kinye, Juda imbomanga tapu iyema kinye, enoni Jisas kot tendeko Pailatendo kolo toko ungu awini ningolio ningei, Jisas yu tepa kenjirimo ningi yu kot tenderingi kinye Jisas yu ungu te naa nimu.

<sup>13</sup> Jisasini ungu te naa nimu ulu kanopalie Pailateni yundo nimbei, "Nu ulu keri awini terinu nimele ungu nu naa piltinoya?" nimu kinye

<sup>14</sup> Jisas Yu tepa kenjirimu ningi mele pundu topa ungu tendekure kape naa nimbe we angilerimu kinye kanopalie Rom gavman iye nomi kanomuni paa mini ltepa konopu awini lipe mundurumu.

*Pailateni nimbei, "Jisas unjo polopeyana toko kondaio," nimu*

<sup>15-16</sup> Jisas kot tendeko molangei, iye te, yunge imbi Barabas, yu mongo ltimu mele imboma pali pilko moloringi kano iyemu yu ka ulkena perimu. Poinye tengatenga, Juda imbomanji kombu awili Jerusalem ongo akuna tuku oi Goteni Israel imboma naa topa we ombo purumu Pasova liko manjingiendo langi noringi waima wendo orumu kinye enoni ka ulkena perimu iye te imbi leko wendo liko munduwiningo konge teringi kinye Rom gavman iye nomimuni kano iyemu wendo lipe imboma tirimu.

<sup>17</sup> Aku teko tepula teringi walima kamukumu wendo ombo pepili Jisas kot tenderingi pilipelie, Juda imboma liko maku toko moloringi kinye Pailateni eno waltindipelie nimbei, "Iye nari ka ulkena wendo lipo eno tiembo konopu ltemeleya? Iye Barabas wendo lipo tiembo, molo enoni Goteni eno nokopa kondombalo iye te lipo mundumbo nimbe oi kanopa ltimu iye nomi Kraist nimele iye Jisas wendo lipo tiemboya?" nimu.

<sup>18</sup> We imboma Juda imbomanga iye awilima tiye kolko enonga unguma liko tui tiko Jisasinga ungumu pilko yu lombili andoringimunga Juda imbomanga iye awilimani Jisas kinye konopu keri panjikolio kot tenderingina pilipelie Pailateni aku tepe nimu.

<sup>19</sup> Pailat kot pileli polona molopa Juda iye awilimani topondoko ungu te ningenge nimbe nokopa molorumu kinye yunge omenungi ungu te yu molorumuna nimbe mundupelie nimbei, "Nuni andi iye tumbi nilimu ulu te naa tewi. Kinye yu kumbu tepo kanondumunga nanga konopuna umbuni awini wendo omo kani yu ulu te paa naa tewi," nimu.

<sup>20</sup> Pailateni ka iye nari wendo lipo tiemboya nimu ungu pilkolio Gote popo tondoringi iye awilima kinye, Juda imbomanga tapu iyema kinye, enoni we imboma kondi toko ungu imbo tondokolio "Jisas topa kondopili Barabas wendo lipe tipili neio," ningi.

<sup>21</sup> Aku teko ningi kinye pilipelie Rom gavman iye nomimuni enondo iye talonga nari wendo lipo tiembo konopu ltemeleya nimbe waltindirimu wali enoni topondoko

ningei, "Iye Barabas wendo liko lino tiwi," ningi.

<sup>22</sup> Aku ningi ungu pilipelie Pailateni enondo nimbei, "Aku lemo, enoni Goteni eno nokopa kondombalo iye te lipo mundumbo oi nimbe kanopa ltimu iye nomi Kraist nimele iye Jisas, ambe teamboya?" nimbe waltindirimu kinye enoni pali "Yu unjo polopeyana kolopili uku toko panjiwi!" ningi.

<sup>23</sup> Aku teko ningi ungu pilipelie yuni enondo nimbei, "Aku ambe telkaya? Yu ambele mongore limoya?" nimu. Nalo enoni altoko paa enge ningi ningi, "Molo! Yu kolopili, unjo polopeyana uku toko panjiwi!" ningi.

<sup>24</sup> Yunge ungumu naa pilko, opa tengai teringi ulu kanopalie Pailateni no mare kolopa lipe, imbo liko maku toko angilereringima kanoko molangei ki kulumie topalie nimbei, "I iyemu toko kondonge kolombalo kinye pulumu eno kinye pembalo; na olie naa polombo," nimu.

<sup>25</sup> Aku tepe nimu kinye pilkolio imbomanji topondoko ningi, "Yu tonge kolombalomunga pulumu lino kinye linonga bakuluma kinye pepili," ningi.

<sup>26</sup> Kano kinye iye Barabas ka ulkena wendo lipe eno tirimu. Aku tepalie Jisas lipe yunge ami iyema tipelie nimbei, "Yu ka mapuni tokolio unjo polopeyana kolopili ningi meko pungo unjo polopeyana uku toko panjipeio," nimu.

<sup>27</sup> Kano wali Rom gavman iye nomimunga ami iyemani Jisas liko kano iye nomimuni perimu ulke awili akuna tuku imboma liko maku toko moloringi kombuna pungolio, enonga ami talape iyema pali Jisas ya moromona tukundo tukundo waio ningi.

<sup>28</sup> Kano kinye yunge wale pakolima kulko wendo lindiko, yu iye nomi king te none tepili ningi wale pakoli kondoli penga te pakondoko,

<sup>29</sup> unjo ka lokoloko te liko munguluwe teko iye nomi kingimunga wainyemu ningi pinyewena mere munduko, kingimani unjo koipe te we amboromele mele kolo te liko yunge ki imbondio amondokolio, yu angilerimunga komongo toko pondoko ungu taka tondoko imbi we kolo toko liko ola mundungei "Juda imbomanga nu iye nomi kingim," ningi

<sup>30</sup> yunge kumbekerena olkambe toko kandoko, kolo koipe ambolorumumu liko yunge pinyewena koipe topula teringi.

<sup>31</sup> Yu aku teko ungu taka tondoko pora tikolio wale pakoli kondolimu kulko wendo ltindikolio altoko, yunge oi pakorumu wale pakolima pakondokolio yu unjo

polopeyana kolopili, uku topo panjipemili ningyo yu liko meli puringi.

*Jisas unjo polopeyana toko uku toringi*

<sup>32</sup> Rom ami iyemani Jisas Jerusalem papena tawendo meko pungei pungolio, kombu Sairini iye te, yunge imbi Saimon, ambolko liko Jisas kolombalo unjo polopeyamu kolo wangoko mendewi tope tiringi.

<sup>33</sup> Pungolio kombu Golgota pungo akuna moloringi. Golgota imbi pulumu Kaungala leli kombumu.

<sup>34</sup> Jisas akuna meko pungolio, imboma mindili naa nangei ningyo no wainina tuku marasin kombili teli te munduko noiringi aku no wainimu yu nopili ningyo, tiringi nalo aku no wainimu nomba pilipelie molo nimbe naa norumu.

<sup>35</sup> Kano kinye ami iyemani yu unjo polopeyana toko panjikolio unjomu liko ola anjiringi. Aku tekolio, oi unjona ola uku toko naa panjikolio yunge wale pakoli kulko noiringima moke teamili ningyo narini imu limbelo ningyo liko manjingiendo kat mele teko altoko wale pakolima te te ningyo ltingi.

<sup>36</sup> Altoko yu unjo polopeyana uku topa pepili tapu teko kanoko moloringi.

<sup>37</sup> Yu toringi ungumu imboma kanangei ningyo I IYE JISAS JUDA IMBOMANGA IYE NOMI KINGIMU ningyo imbi toko yunge pinyewena olando unjona mondoringi.

<sup>38</sup> Opa teko, melema wapu ltingili iye talo peya unjo polopeya talonga uku toko panjiringi. Te Jisas yunge imbo kindo uku toko, te koya kindo uku toko panjiringi.

<sup>39</sup> Akuna ongo puringi imbomani Jisas yu ungu taka tondoko kondowa ltindikolio

<sup>40</sup> ningei, "Aa! Ulke tempelemu tekiripolio altope wali yupoko ombo pupili takopo limbo ninu iyemu, naa kolambo ningyo nu nunu liko tapowi. Nu paimbo Gotenga Malo lemo unjo polopeya tiye kolko mainye owi," ningi.

<sup>41</sup> Aku tekola Gote popo tondoringi iye awilima kinye, Gotenga ungu manemanga puluma pilko mane tiringi iyema kinye, Juda imbomanga tapu iyema kinye, enoni kape yu ungu taka tondokolio ningei,

<sup>42</sup> "Yu imbo wema naa kolangei nimbe lipe tapondorumu nalo yu yunu naa kolambo nimbe manda naa lipe taporomo. Yu Israel imbomanga iye nomi kingimu moro nimo mele paimbo aku tepa moromo lemo yu yunu unjo polopeyana mainye opili. Yu yunu unjo polopeyana mainye ombalo kinye kanopolio yu paimbo linongga iye nomi kingimu nimbo ipuki timolo.

<sup>43</sup> Yuni Goteni na lipe tapombalo nimbe ipuki tipe moromo kanomu. Yu Gotenga Malo moro nimo kani Goteni yu kanopa

penga pilipe, da iyemu mainye we olkanje paa konopu ltemo lemo manda, Goteni ombo yu lipe tapondopa unjo polopeyana wendo lipili. Aku tepa temo lemo yu paimbo Gotenga Malo nimbo ipuki timolo," ningi.

<sup>44</sup> Wapu noli iye talo yu kinye unjo polopeya talonga uku toko panjiringi iye taloni yu aku teko ungu taka tondoringilila.

*Jisas kolorumu*

<sup>45</sup> Jisas unjo polopeyana we uku topa pepili awi tangoli ena 12 klok terimu kinye kombu pali tumbulu topalie, altopa ipu-pene ena 3 klok terimu kinye kelerimu.

<sup>46</sup> Ipupene ena 3 klok terimu kinye Jisas ini alako topalie nimbei, "Eloi, Eloi, lama sabaktani," nimu. Akumu Juda imbomanga ungu te, akumunga pulumu i tepe, "Nanga Gote, nanga Gote, na ambe temona tiye kolonioya?" nimu.

<sup>47</sup> Akuna nondoko angileringimanga imbo maren i yuni aku tepa nimu kinye pilko tundukolio ningei, "Pileio. Yu Elaija waltindirimu," ningi.

<sup>48</sup> Aku tepa nimu kinye pileringimanga iye te tamburumbu lkipe pumbe ulu koma mele te lipe no wain kombili teli mare akuna panjipelie, Jisas no wain kombili teli komana peremomu nopili nimbe mepa ombo unjo pepena tengen ka topa olando tirimu.

<sup>49</sup> Nalo yu no wainimu tirimu ulu kanokolio we imbomani ningei, "Molo, kinye unjo polopeyana we pepili. Elaijani paimbo yu naa kolopili nimbe lipe tapondopa mainye limbeindo oromonje, kanopo kanamili," ningi.

<sup>50</sup> Jisasini ungu te enge nimbe are nimbelie, altopa yunge minimundo puwi nimbe yu kolopa itimu.

<sup>51</sup> Yu aku tepa kolorumu kinye ulu awili mare walitikale wendo orumu. Gote popo toko kaloringi ulke tempel Jerusalem tuku angilerimu akuna tukundo Gote molorumu kiripi paa kake telimunga kerepuluna imboma tukundo naa pangei ningyo oi wali-walima maminye awili teni pipi tiko panjiringina angilerimu. Jisas kolopa pora tirimu kinye kano maminye olana pure lipe undukana mainye orumu. Aku tepa, mai parambala tepe, kou awilima ungu mangutopa,

<sup>52</sup> imbo oi ono teringi kombuma alumbiye tepe, Gotenga imbo kake teli oi koloringi awinima Goteni topa makinjirimu.

<sup>53</sup> Makilko ola molko ono kombu peringina wendo ongolio, Jisas altopa makilipe koinjo molorumu kinye Gotenga kombu awili kake teli Jerusalem tuku pungolio imbo awini kanangei puringi.

<sup>54</sup> Rom ami iye 100 nokorumu iyemu kinye, yu peya Jisas terimu mele tapu teko kanoko moloringi ami iyema kinye, enoni mai parambala tepe ulu lupe lupema wendo orumu kinye kanokolio eno paa mini ltekolio ningei, "I iyemu yu paimbo Gotenga Malo lepamo," ningi.

<sup>55</sup> Ambo awini, Jisas unjo polopeyana kolorumu akuna tule teko kanoko angleringi. Oi kano amboma enonga pulu kombu Galili distrik tiye kolko Jisas lombili andoko liko tapondoko nokoko Jerusalem peya oringi amboma.

<sup>56</sup> Enonga ambo te Makdala taun ambo Maria, te Jems kinye Josep kinye elonga anumu Maria, te iye Sebedinga malo talonga anumu.

### *Jisasinga onomu kou angana ono teringi*

<sup>57</sup> Ipupene, kombu kala tombai terimu kinye Arimatea taun iye kamako te, yunge imbi Josep, yu kape Jisas lombili andorumu iye te omba

<sup>58</sup> Rom gavman iye nomi Pailat molorumuna pumbe, Jisasinga onomu na tiwi nimbe konge terimu kinye Pailateni yu onomu lipili nimbe ami iyemando nimbe mundurumuna liko tiringi.

<sup>59</sup> Pailateni manda nimu kinye Josep pumbe onomu lipe, maminye koinjo kake teni lipe kulupi torumu. Kulupi topalie

<sup>60</sup> kou anga koinjo te, Josep yu kolombo kinye akuna na ono teangei nimbe kou anga te wamopa noierimu kou angamunga tuku mepa pumbe noierimu. Noipelie kou anga kerepuluna kou awili te perelemarele omba pipi tipelie yu kelepa purumu.

<sup>61</sup> Makdala taun ambo Maria kinye Maria te kinye elo kou angamu lerimu kerepuluna nondonko yu onomu kou angana noirimu ulu kanoko moloringili.

### *Ami iyemani ono kombuna nokoko angleringi*

<sup>62</sup> Aku wali, otli koro molomolo wali Sabatemu ningi pilkolio kinye mele melema tumbirumbi tiringi kano walimu pora nimu kinye otilikondo Gote popo tondoringi iye awilima kinye, Parisi iyema kinye, eno Rom gavman iye nomi Pailat molorumuna pungo liko maku toko angilkollo

<sup>63</sup> ningei, "Iye Awilimu, iye kanomu oi naa kolopa we molopalie imbomani paimbo ningi pilinge unguma kolo topa nimu kano iyemu Yu kolopolio wali yupoko ombo pumbelo kinye makilipo koinjo molombo nimuna lino pilerimulu kani

<sup>64</sup> nuni ami iyemando kano iyemu olianga ono tengen kou angamu wali yupoko paa wamongo teko nokaio niwi. Naa nokonge wali yunge lombili andoli iyemani onomu ongo wapu liko meko pungolio

yu makilipe koinjo molopa ombo pumo ninge. Aku teko kolo toko ninge kinye yu oi paimbo nimo nengei nimbe kolo torumu ungumu mainyendopa, enoni imbomani yuni paimbo aku tepe temo nengei ningi kolo tonge ungumu paa andopanda pembalo," ningi.

<sup>65</sup> Pailateni Juda iye awilimando topondopa nimbei, "Aku lemo, ami iye mare liko meko pungo, iyemu ono tengen kombumu nokoko kondangei ningi mondoko, imbonani ono kombumu ulu te naa teangei ningi aulkemu enge nimbo pipi tiemili koponu lenge mele teao," nimu.

<sup>66</sup> Aku tepe nimu ungu pilkolio ami iye mare liko meli pungo, imbo ono teringi kou angamu pipi tiringi koumu pape teko bele leko enonga imbibim akuna toko mondokolio, ami iyema akuna nokoko molangei ningi mondokolio eno puringi.

## 28

### *Jisas makilipe koinjo molorumu*

<sup>1</sup> Juda imbonanga koro moloringi wali Sabatemu pora nimbe, enonga pulu polopa kongono waimu wendo ombaindo kombu tangombai muni lerimu kinye Makdala taun ambo Maria kinye, Maria te kinye, pungo Jisasinga onomu noiringi kou angana onomu kanongili puringili.

<sup>2</sup> Awilimunga mulu kombuna ensel te mainye orumu kinye mai parambala paa enge nili tepe terimu. Enselemani omba kou angana pumbe kou anga kerepulumu pipi tiringi koumu wendo lipe perelemarele mepa pumbe noipe akuna ola molorumu.

<sup>3</sup> Kano enselelunga kumbekeremu kariapa tepe pa teremo mele pa tepe, wale pali pakorumuna kalopera topa paa kake teremo mele kake terimu.

<sup>4</sup> Jisas ono kombu nokoringi ami iyema enselemani kanoko paa mini ltekoi pungo bungu ningi topa mundurumuna eno aku teko ulure naa teko we moloringi.

<sup>5</sup> Enselemani ambo talondo nimbei, "Pipili naa kololio. Jisas kolopili ningi kamukumu unjo polopeyana uku toko panjiringi kano iyemu kanongili orombelena lipo manjiro.

<sup>6</sup> Yu ina naa itemo. Kolopolio, wali yupoko tipemunga makilipo koinjo molombo oi nimu aku mele temo. Onomu oi lemo kombumu ongo kanalio," nimu.

<sup>7</sup> Kanokolio popenge teko pungo yunge lombili andolima i teko ningi tiengili Jisas ono kombuna lepalie makilipe koinjo molopa kombu Galili distrikindo kumbe lepa purumo kani eno akuna yu kanonge,' ningi tiengili. Ungu nimbo tindimboindo ondu kano ungumu nimbo pora tiro," nimu.

<sup>8</sup> Enselemu aku tepa omba mona molopalie nimu ulu kanoko pilkolio ambo talo pipili kolko kamele paa akoko, aku tepa konopu talo pepili lkiko pungo yunge lombili andolima ningi tingili puringili.

<sup>9</sup> Lkiko pungili puringili kinye Jisas elo aulkena kanopa lipelie "Orombeleya?" nimu. Kano kinye eloni yunge kimbondo pungo kangulko yu kapi ningi imbi liko ola munduringili.

<sup>10</sup> Kano kinye Jisasini elondo nimbei, "Pipili naa kolkolio, elo pungo nanga angenupilindo ningili, 'Kombu Galilindo paio. Yu akuna kanonge,' nipelio," nimu.

*Ami iyemani temane toko tiringi ungumi*

<sup>11</sup> Ambo talo kelko yando ongili oringili wali Jisasina ono kou angamu nokoringi ami iye mare kombu awili Jerusalem tuku pungo Gote popo tondoringi iye awilimando uluma wendo orumuma pali ningi tipuringi.

<sup>12</sup> Pilerungi kinye popo tondoringi iye awilima, Juda imbomanga iye awilima kinye peya maku tokolio eno kinye ungu ningolio ningei, "We imboma i uluma wendo omo mele pilkolio Jisas makilipe koinjo moromonje ninge kani naa pilengei nimbo ambe temolonje?" ningi nendo yando ningolio tengi ulu ningi panjikolio, ami iyema kou mone awini tikolio

<sup>13</sup> enondo ningei, "Imbomanji Jisas ambe temoya ningi waltindinge kinye enoni i teko nengei, 'Ipu leli uru pemolo kinye yunge lombili andolimani kiyengo ningi ongo yu liko meli punge,' neio.

<sup>14</sup> Lino Juda imboma nokoromo Rom gavman iye nomimuniaku tengi mele ungu te pilimo lemo eno mongo naa liengei nimbo linoni enonga lipo tapondopo yu kinye ungu nimolo. Kano kinye enoni ono kombumu wamongo teko naa nokoko we uru penge konopu lembalomunga mongo naa lingi," ningi.

<sup>15</sup> Aku teko ningi ungu pilkolio ami iyemani kou mone liko enoni neio ningi mele imbomando ningi. Akumunga yandopa kinye, i buk toro walimu kape Juda imbomanga kombumanga pali i ungumu anjo anjo purumo pilkolio imbo awinini kano temanemu toromele.

*Jisasini yunge kitipi kanoli iyemando i teko teao nimbe kongono tirimu*

<sup>16</sup> Amboma pungolio kanoko pileringili ulu temane toko tiringili kinye pilkolio Jisasina kitipi kanoli iye 11 kombu Galili distrik pungo, Jisasini mai kembo te imbi lepa oi akuna wangei nimuna puringi.

<sup>17</sup> Akuna pungo Jisas kanokolio, yu kapi ningi yunge imbi liko ola munduringi nalo

mareni Jisas kolorumu, imu Jisas molo narinde ningi konopu talo teko leringi.

<sup>18</sup> Kano kinye Jisas yu nondopa omba enondo nimbei, "Arani nando nu mulu kombuna melema kinye imboma kinye, mai kombuna melema kinye imboma kinye nokani nimbe engema pali na tirimu, na kinye peremo.

<sup>19</sup> Aku tepa na enge tirimumu eno timbo eno kinye pembalo kani eno mai kombumanga pali pungo imboma pali nanga ungumu pilko liko, nanga kitipi kanolima molangei ningi, pungo ningi tipungolio, pilko liko molonge imboma no ltindingeindo Lapa Malo talo kinye Mini Kake Telimu kinye enonga imbi leko eno no ltindiko,

<sup>20</sup> enondo na kitipi kanolimani teangei hindu mele pali aku uluma teangei ningi eno mane tieio. Aku teko nilko andoko molonge kinye na eno kinye waliwalima paimbo molamboi mulu mai talo pora nimbelo," nimu. Aku peya.

## Gotenga Ungu Tukumemu Mak I Ungu Torumumunga Ungu Pulu Mare

Imbo awinini Mak i ungu tukumemu topa panjirimu nimele. Mak yuni Pita kinye molopalie Pitani ungu nimbe tirimu wali pilipelie aku ungu topa panjirimu nimele. Imbomani Jisas Gotenga malo maina mainye omiba iye apuwe lerimu konopu lekolio Jisas ipuki tiengenimbe Makoni Jisasini imboma tepa koinjo lipelie ulu wengendelima terimu mele topa panjirimu.

Goteni nu yunge malo Jisas enge peliyemu kanoko imbi tieni nipili.

*Jon imbo no ltindili iyemu wendo orumu*  
<sup>1</sup> I ungumu lemo, Gotenga malo Jisas Kraistainga ungu tukumemu pulu polorumu mele.

<sup>2</sup> Aisaia aku iyemu Gotenga ungu nimbe munduli iye te oi molorumu. Aku molorumu wali yuni ungu te topa panjirimu. Aku topa panjirimu ungumu i tepe, Goteni nimbei, "Nani nanga ungu nimbe munduli iye te unnge kumbe lepo tipo mundumbo aku iyemu yuni nu oniomunga uluma tumbi tipe noindimbelo."

<sup>3</sup> Kombu kapu imbo naa peli wena iye teni alako topa angilipelie nimbei, "Iye awilimu ombalominga uluma tumbi tiko noindeio. Yu opili ulu tumbi nilima teko amenge teko noindeio," nimu. (*Mal 3:1; Ais 40:3*)

<sup>4</sup> Imunga Jon nimbe iye te imbo naa peli kombu kapu wena Gotenga ungu nimbe tilipe imbo no ltindilipe wendo orumu. Aku ombalieg wali, enonga ulu pulu kerimanga konopu topele tokolio kinye no lieio nimbelie aku tengen wali, Goteni enonga ulu pulu kerima kulu topa ltendembalo nimu.

<sup>5</sup> Aku wali, imbo pulumu wendo pungo enonga ulu kerima ning para tiringi kinye Jononi imbo akuma Jordan nona no ltindirimu. Neyaaku imboma Judia nimbe kombu tengen tukundo kinye Jerusalem nimbe kombu taun awili tengen moloringi imboma wendo pungo aku ulu teringi.

<sup>6</sup> Jon nimbe aku iyemu kongi kamel indini teli wale pakolimu pakorumuaku ulumu oi Gotenga ungu nimbe mundurumuna ning para tiringi iye profetemani pakoringi mele pakorumu. Aku tepalie, wale pakolimu ola pange tendepa kako let te poromongona torumu. Yunge kere norumumu lemo komboro kinye pilimo mulu talo kau nomba perimu.

<sup>7</sup> Aku tepalie yuni ungu pulipomu imbo bali pilengei nimbe mona ltendepa nimbei, "Iye te nanga umbulkondo ombalo. Aku iyemu lemo iye paa awilimu. Na yunge kumbekerena iye koropa noli meleme.

<sup>8</sup> Paimbo, nani eno imbo noni no Itindiro, naloaku iyemu yuni lemo enonga nindipe Gotenga Mini Kake Telimu ltindipe mundumbelo," nimu.

### *Jisas no ltimu*

<sup>9</sup> Neyaaku waimunga walite Jisas kano Galili kombu awilite lerimumunga tukundo Nasaret nimbe kombu kelo tengen molopalie wendo orumu kinye Jononi yu kano Jordan nona no ltindirimu.

<sup>10</sup> Jisas kano nona angilipe wendo omaba nekondo angilerimu kinye mulumu kengea lepa anjo yando purumuna ulu yuni kano rumu. Aku terimu wali Gotenga Mini Kake Telimu kera imili mele mangopa mainye omabalie yunge kangina molorumu.

<sup>11</sup> Kano terimu wali ungu te muluna mainye ombalie nimbei, "Nu nanga malo. Nani nu konopu mondoro. Nu kinye konopu noiro," nimu.

### *Sataneni Jisas manda manjipe kano rumu*

<sup>12</sup> Aku wali, walitikale kau Gotenga Mini Kake Telimuni Jisas kano imbo naa peli kombu kapu tengen pupili nimu.

<sup>13</sup> Akuna Jisas molopili, wali 40 omiba ipo lepa kombu tangorumu. Aku wali Sataneni ombalieg Jisas manda manjipe kanorumu. Aku terimu kombuna mele takerama kape moloringi kala, kano wali Gotenga muluna enselemani ongolio Jisas taporingi.

### *Jisasini Galili kombuna kongono pulu polorumu*

<sup>14</sup> Jon kano ka ulke oi liko panjing, pele Jisas kano Galili kombu pumbe Gotenga ungu tukumemu nimbe para tirimu.

<sup>15</sup> Aku nimbe para tipelie nimbei, "Gotenga imbo tepe ltimo waimu wendo omo. Goteni imboma nokoromo uluma wendo ombai teremo. Akumunga eno lemo enonga ulu pulu kerimanga konopu topele toko Gotenga ungu tukumemu pilkolio ipuki tieio," nimu.

<sup>16</sup> Jisas kano Galili no mongolu kulendona pumbe molopa iye angenungolo talo waye oma mune meko angileringilina kanorumu. Aku iye talonga imbi Saimon kinye Andru talo. Aku iye talonga kongonomu oma tokou kou ltingili.

<sup>17</sup> Jisasini kano iye talondo nimbei, "Elo na ongo lombieilio. Kinye oma ltingili mele nani elo nanga imboma tukundo ltindengili ungu imbo tondombo," nimu.

<sup>18</sup> Pilkolio, walitikale kau iye kano talo elonga oma munema lepili ningi tiye kolkolo Jisas yu ongo lombileringili.

<sup>19</sup> Jisas kano alaye kolte anjipe pumbelie wali, Sebedi nimbe iye tengah malo talo elonga no sipina oma munema tumbirumbi tiko amenge teko moloringili. Aku iye angengnolo talonga imbi Jems kinye Jon talo.

<sup>20</sup> Jisasini aku iye talo kanopa nendo lepalie wali, elo walio nimu. Pilkolio, elonga lapa Sebedi kano no sipina tuku kongono iyema kinye molopili tiye kolkolo elo ongo Jisas lombileringili.

*Jisasini kuro keri te makoropa lterimu*

<sup>21</sup> Jisas kinye yunge kitipi kanoli iye kanoma Kaperneam ningi kombu tengah wendo oringi. Israel imbomanga koro awili wendo orumu wali Jisas yu kano imboma nombeaya teko moloringi ulkena tuku pumbelie pulu mondopa imboma ungu imbo tondombai lipe anjirimu.

<sup>22</sup> Aku wali yuni ungu nimumu Mosesinga mane ungumunga ungu imbo iyemani nimele mele kape naa nimu nalo yuni nimu ungum iye awili enge peli teni nili none terimu. Imunga yunge ungu imbo tondorumuna pileringi imbo akumani yunge ungumu penga lepa nimbe kondorumu kinye pilkolio mini lteko ereye nimgi.

<sup>23</sup> Amaya, walitikale kau iye loi leli te enonga nombeaya teko moloringiulkenna tuku molorumumu kano iyemu kuro kerimuni lipe loi tirimu wali are nimbelie nimbei,

<sup>24</sup> "Jisas nu Nasaret kombu iyemu, nu lino kuro kerima kinye ambe teni onioya? Nu lino kuro kerima teko toni ongo angino. Nani nu lipo manjipo kanopo imbi tiro. Nu Gotenga iye wengendelimu ltemo," nimu.

<sup>25</sup> Kano tepa nimu wali Jisasini enge nimbe paa nimbe lipelie nimbei, "Ya! Nu ungu te naa niwi! Kiyengo ningi wendo owi," nimu.

<sup>26</sup> Kano wali kuro keri kanomuni iye kanomu lakopa mikiripe mundupelie are kerire nimbelie iyemunga ombo wendo purumu.

<sup>27</sup> Imbomani aku terimu ulumu kanokolio enonga nendo yando ningi, "Yuni kuro kerima ongo wendo paio nimo kinye yunge nimu ungumu tengah piltimeli imunga iulu koinjo enge peli mare ltemo," ningolio imbo pali eno mini lteringi.

<sup>28</sup> Aku wali, Jisasina i terimu ulumunga temanemu Galili kombu tukundo walitikale andopa anjo yando palaku lerimu.

*Jisasini Saimononga bamu ambomu tepe koinjo ltimu*

<sup>29</sup> Kano wali Jisas kinye yunge kitipi kanoli iye kano pokon waye nombeaya teko

moloringi ulkemu tiye kolko Saimon kinye Andru talonga ulke pilipili puringi.

<sup>30</sup> Aku wendo pungo ulke moloringi wali, Saimononga bamu ambomu kangina tipe torumu kinye polona ainyembo lepa lerimu unggumu Jisasindo ningi tiringi.

<sup>31</sup> Aku ningi tiringi ungumunga Jisasini aku ambomu ainyembo lepa lerimu pumbelie kinye ambo kanomo ki ambolopa tapopa ola ltimu. Kano terimu wali ambomu yunge kangina tipe torumu kano ulumu kelerimu wali ambomu kuro koinjo pumbe Jisas kinye yunge kitipi kanoli iye-manga kere nangei tumbi tindirimu.

*Jisasini imbo pulumu tepe koinjo ltimu*

<sup>32-33</sup> Aku waimunga ena oi pepumbe ipo kala torumu wali aku kombu taunona tukundo moloringi imbo pa pulumu ongo ulke kere puluna nombeaya teringi. Aku imbomani enonga imbo kuro torumuma kinye kuro keri wangopa terimuma pali Jisasini tepe koinjo ltindipili ningi meko ongo noiko moloringi.

<sup>34</sup> Kano wali, Jisasini kuro i kano kano toli imbo pulumu tepe koinjo lipe kuro keri awini makoropa lterimu. Aku kuro kerimani Jisas yu Gotenga malo ningi liko manjiringi akumunga yuni kuro kerimando ungu te naa ngeji nimu.

*Jisas Galili kombu tukundo kongono andopa terimu*

<sup>35</sup> Otilikondo ipu leli oi kombu oi naa tangoli we tumbulu topa pepili Jisas makilipe perimu ulkemu tiye kolopa we kombu ku tenu purumu. Akuna konge nimbe molorumu.

<sup>36</sup> Nalo Saimon kinye yunge lombili andoli iyema makilko wendo pungo yu kororungi.

<sup>37</sup> Kelko Jisas kanoko ltendekolio wali ningi, "Imbo palini nu kororomele," ningi.

<sup>38</sup> Nalo aku teko ningi wali Jisasini ungu pundu topa nimbei, "I kombu kulekule anjipe yandopa ltemo kombu malio pamili. Aku malio kape na Gotenga ungu tukumemu nindimboi oru kala," nimu.

<sup>39</sup> Imunga Jisas enonga nombeaya teringi ulkemanga tuku pumbe Gotenga ungu tukumemu nindilipe kuro kerima makoropa ltelipe Galili kombu tukundo andorumu.

*Jisasini kuro kendi noli iye te tepe koinjo ltimu*

<sup>40</sup> Aku telipe andorumu wali kuro kendi noli iye teni Jisas yunge kimbo puluna ombo komongo topa pondopalie wali yu tapopili nimbe konge nimbei, "Nuni na manda tepo koinjo limbo konopu lenio lemo na teko koinjo liwi," nimu.

<sup>41</sup> Kano tepa nimu wali Jisasini iye kanomu kondo lakopa kolopalie yunge kimu tinio mundupe iye kanomu lope tendepalie nimbei, “Oe, nani aku konopu lteomunga nu koinjo puwi,” nimu.

<sup>42</sup> Walitikale kau kendi norumu ulumu pora nimu. Kano iyemu yu neya koinjo purumu.

<sup>43</sup> Jisasini iye kanomundo welea pupili nimbelie wali ungu enge nili te tipelie nimbei,

<sup>44</sup> “Nu piliwi. Imbo tendo i temo ulumu anjo naa ningi tiwi. Nalo nu lemo Gote popo tondolimu molombalona pilipili pungolio wali na koinjo pundu ningi yundo liko ondowi. Aku tekolio Mosesini kuro koinjo pungolio wali paa tereno ningi melte toko kalko tendelimu Gotendo tieo nimu kano ulumu pungo tewi. Aku tenio wali imbo peyani nu kuro koinjo punio ltemo ningi kanoko imbi tiengei,” nimu.

<sup>45</sup> Nalo aku ulu teli mele iye kanomu anjo pumbelia wali terimu ungu temane kanomu kombu palinga nimbe andopa tirimu. Pilerangi imbomani Jisasi kanamili ningi akumunga Jisas kombu taunorenga mona wendo naa purumu. Aku tepa puli mele imbo naa peli kombu ku malio wendo angilerimu. Nalo aku tepili kape imbo indo yandoma yu molorumuna kau oringi.

## 2

*Jisasini iye kimbo ki kololi te tepe koinjo ltimu*

<sup>1</sup> Wali pokore omba purumu kinye Jisas kano Kaperneam kombu altopa yando orumu. Aku yando omba ulke kombu moromo ningi ungumu neyaaku kombu tukundo imbomani pilerangi.

<sup>2</sup> Aku ungu pilkolio wali, imbo pulumu Jisas yu molorumu ulkena ongo nombeya teringi. Aku wali, imbo pulumu ulke tukundo tenegepeya derere nimu kinye ulke kere puluna fawendo kape imbo tendekure molowi kombu te we naa lerimu. Akuna Jisasini Gotenga ungumu imboma nimbe tirimu.

<sup>3</sup> Aku nimbe angilerimu wali imbomare oringi. Aku oringi imbomanga iye kiteni kimbo ki kololi iye te tili teko meli Jisas molorumuna ongei oringi.

<sup>4</sup> Nalo imbo pulumu tenegepeya terimuni Jisas yu angilerimuna iye kanomu meko puwi aulke naa lerimu. Aku wali iye kanomani ulke tulepena ongo pala pungolio Jisas yu angilerimuna maindo tiko ulke tulepemu toko alumbiye teringi. Aku ulu tekolio tiriyyena maindo tiko iye kimbo ki kololi kanomu yunge tilina lepili ka anjiko mainye munduringi.

<sup>5</sup> Kano teringi wali Jisasini iyemanga ipukimu kanopalie wali iye kimbo ki kololi kanomundo nimbei, “Nanga malo, nani nunge ulu pulu kerima kinye i tiye kolto,” nimu.

<sup>6</sup> I tepe nimu wali, Mosesinga mane ungumunga ungu imbo iyemare akuna moloringimani konopu liko manjikolio,

<sup>7</sup> “Goteni kau imboma kondo kolopa enonga ulu pulu kerima tiye kondopa komu tindirimo. Imunga aku tepe ungumu imbo i tepamuni manda naa nilkamunga imbo imu yu Gote none tepe ungu taka tondoromo,” ningi.

<sup>8</sup> Kano wali, walitikale kau Jisasini ungu imbo iyemanga leringi konopumu yunge konopumuni nimbe tirimuna lipe manjirimu. Aku tepalie yuni aku iyemando nimbei, “Eno ambe telka da konopu kerimu itemeleya?

<sup>9</sup> Kinye nani iye kimbo ki kololimunga ulu i talo manda tendembo. Iye imundo nunge ulu kerima lipo ltendero nimbo aku wali ulu akumu pa wendo ombalo nalo aku ulumu eno manda naa kanonge. Nalo kinye iyemundo nimboi nu ola angilkunununge kunu lembilimu likono nu puwi nimbo kinye aku ulumu eno manda kanonge.

<sup>10</sup> Imunga kinye enoni na Iyemunda Malo mainayne imbomanga ulu pulukerima manda lipo ltendembo ltemo ningi kanoko imbi tengemunga nani I ulumu teamboi,” nimu. Aku nimbelie wali Jisas yuni kimbo ki kololi kano iyemundo nimbei,

<sup>11</sup> “Nani nundo nio, nu ola angilkuno nunge kunu lembilimu liko ulkendo puwi,” nimu.

<sup>12</sup> Nimu wali, imbo pali kanoko molangei iye kimbo ki kololi kanomu ola angilipe yunge kunu lembilimu lipe ambolopa imbomanga kumbekere polo palana yu purumu. I terimu ulumu kanokolio wali imbo kanomani mini ltekolio ereye ningi Gotenga imbi kape ningolio ningei, “Lino i tepe ulte oi naa karomolo,” ningi.

*Jisasini Livai nimbe iye te owi nimu*

<sup>13</sup> Jisas kano Galili no mongolu kulendona altopala walite purumu. Aku wali imbo pulumu yu molorumuna oringiaku kinyeyuni imbo kanoma ungu imbo tondopa lipe anjirimu.

<sup>14</sup> Aku ungu imbo tondolipe pumbe molopa, takis lili iye te yunge takis ltimu kongono ulkena molorumuna kanorumu. Aku iyemunga imbi Livai yunge lapa Alfius. Aku iyemundo Jisasini nimbei, “Nu kamukumu ongo nanga kitipi kanoli iyemu molowi,” nimu. Pilipelie Livai ola angilipe Jisas lombilerimu.

<sup>15</sup> Aku wali iye imbi keri mololi iye awinimani Jisas yu lombilko waye andoringi.

Walite Jisas kano yunge kitipi kanoli iyema kinye Liavainga ulke kere nongo moloringi wali, takis lili iye awini kinye we iye imbi keri mololi mare kape eno moloringi mele kopu teko ongo molko kere waye noringi.

<sup>16</sup> Aku wali, Farisi ningi manga pupu tengen Mosesinga mane ungu pimele ungu imbo iyemare moloringi. Aku ungu imbo iyemani molko kanoringi wali Jisas kano takis liko imbi keri mololi iyema kinye tendeku tipe molopa kere norumu. Aku terimu ulumu ungu imbo iye kanomana Jisas yunge kitipi kanoli iyemando ungu nendeleme ningi ningei, "Ambe telka Jisas yu imbo keri i tepama kinye kere noromoya?" ningi.

<sup>17</sup> Ningi ungu pilipelie Jisas yuni aku iyemando nimbei, "Imbo kuro naa peremoma aku doktamau moromona naa purumele nalo imbo kuro peremoma aku doktamuni kanopili ningi yu moromona purumele. Eno imbo tumbi nili ningema limboi naa oru nalo ulu pulu keri teremele imbomani konopu topele tangei nimbo tepo limboi oru," nimu.

*Kere langi mi leli ungumunga Jisas wa-like pileringi*

<sup>18</sup> Walite Jon Imbo No Ltindilinga lombili andoli iyema kinye Farisi ningi manga pupu akumunga lombili andoli iye akumani ulu pulu kerima tiye kolamili ningi konopu keri leko wali kere naa namili ningi mi leko we peringi. Aku teringi ulumu kanokolio wali imbo marenai Jisas yu molorumuna ongolio kinye waliko pillkolio ningei, "Jon Imbo No Ltindilinga lombili andoli iyema kinye Farisi ningi manga pupu akumunga lombili andoli iye akumani ulu pulu kerima tiye kolamili ningi konopu keri leko kere naa namili ningi mi leko we peringi nalo nunge kitipi kanoli iyemani ambe telka aku ulu naa teremeleya?" ningi.

<sup>19</sup> Kano teko ningi wali Jisasini yu yunu manda lepa ungu iko topalie nimbei, "Ambo limbei iyemu yu molka wali yunge waye andoli imbomani umbuni meko konopu keri lekolio kere naa namili ningi mi leli aku ulumu naa telimala. Aku iyemu molka waimunga kere popo tiko nongo tono kolko koniye tendeku tiko lemalia.

<sup>20</sup> Nalo, wai te wendo ombalo aku wali iye kerimani yu kinye waye molonge iyemanga imunana yu kano tapu toko wendo linge kinye aku waimunga yunge waye molonge iye kanoma umbuni meko konopu keri leko kere naa namili ningi mi manda lenge," nimu.

<sup>21</sup> I ungumu nimbelie nimbei, "Imbo teni maminye enge nili karu leli koinjomuni wale pakoli lumbiye tamba nilite topa naa tandoromo. Nalo aku ulu temo lemo, maminye enge nilimuni wale pakoli

tamba nili lumbiye kanomu anjo yando lipe kundupe ora tondombalo. Aku tembalu wali wale pakoli tamba nili lumbiye kanomu oi ora toromo kanomunga altopa paa ora topa awili ltemo.

<sup>22</sup> Imunga aku tepa mele kala, imbo teni no wain koinjomu kongi kangimu mingu tiliona ondopa naa mundurumo. Aku ulu temo lemo, no wain koinjomuni kongi kangi mingu oi tiliomu nomba anjo yando mundupe pakalu tembo nimbe tembalu kinye kongi kangi mingu tiliomu tuku nimbelo. Aku tembalu wali wain koinjomu kinye kongi kangi mingu tiliomu talo peya bemblo ningele. Aku teremo ulumunga ningolio kinye no wain koinjomu kongi kangi mingu koinjona kau ondoko mondoromele kinye aku ulu te naa teremo," nimu.

*Linonga koro awilina kongono naa teao ningi*

<sup>23</sup> Walite Juda imbomanga koro awili kinye Jisas kano yunge kitipi kanoli iye kanoma kinye wit poiney tengen anjikondo puringi. Kano kinye yunge kitipi kanoli iyema engele kolkolio wit mongomare inie toko noliko puringi.

<sup>24</sup> Aku wali i teringi ulu Farisi ningi iye marenai kanokolio Jisasindo ningei, "Nunge kitipi kanoli iyemani linonga koro awili kinye molo nili ulumu ambe telka teremeleya?" ningi.

<sup>25</sup> Jisasini ungu pundu topa nimbei, "Oi linonga kolepa Devit kinye yunge waye andoringi iyema engele kolko nowi mele maa torumu kinye kelko ambe teringi karolo ungu temanemu eno naa kambu toko pimeleya?

<sup>26</sup> Aku teringi ulumu i tepe, Devit yuni Gotenga ulkena tuku pumbelie kinye Go-tendo paa tereno ningo bret tiringi akuma Gote popo tondoli iye teni lipe tirimuna norumu. Aku teli bretema linonga mane ungumuni nimbei Gote popo tondoli iyemani kau nangei nimo kano eno liko manjirimele. Nalo Devit yuni yunge waye andoringi iyema mare nangei tipe yu nombai terimu. Aku teringi ulumu koro oi Apiata nimbe Gote popo tondoli iye awili te molorumu. Nalo, nuni i ulu kerimu tereno ungu naa ningi," nimu.

<sup>27</sup> Aku tepa nimbelie Jisasini ungu nimbei ulu lepa nimbei, "Enoni koro awili waimu teko kenjirimele. Enoni mane ungu wamoko panjirimelemani imboma teko bemblo tiko umbuni liko tirimele. Nalo Goteni koro awilumu lemo imboma mulu liko koro molangei nimbe tenderimu.

<sup>28</sup> Imunga na Iyemunga Malo linonga koro awilimunga pulu. Nani imbomando teao nimbo ulumu manda tengen," nimu.

**3**

*Jisasini iye ki kololi te tepa koinjo ltimu*

<sup>1</sup> Altopa walite Jisas kano nombeya ulke tengatuku purumu. Kano kinye iye ki kololi te aku ulkena tuku molorumu.

<sup>2</sup> Aku wali Farisi ningi iyemare akuna tuku molkolio Jisas yu kot tendengei ungu pulu te kororingi. I ungu pulumunga Juda imbomanga koro awili kinye Jisas yuni iye ki kololi kanomu tepa koinjo ltimonje ningi nondoko pungo kane kane molorungi.

<sup>3</sup> Kano teringi wali Jisasini iye ki kololimundo nimbei, "Nu imbomanga palinga kumbekerena ola angiliwi," nimu.

<sup>4</sup> Kano tepa nimbelie wali Jisasini imbomando i tepa walipe pilerimu, "Koro awili wali linonga mane ungu munani ambe teao nimoya? Ulu pulu pengama teko imbo te teko koinjo lieio nimonje molo ulu pulu kerima teko imbo te toko kondaio nimoya?" nimu. Nalo i tepa nimu wali imbo teni alaye lope teko ungu te naa ningi.

<sup>5</sup> Kano wali Jisasini imbo akuma te te nimbe taki lepa turu tondopalie mumindili kolorumu nalo tendeku wali imbo akuma kondo kape kolorumu. Ambe telka imbo akuma paa ulu a lowamu teko enonga oloma kou mele polorumu kinye alaye lope ponde naa teko molkonka molko koi tiringi. Aku tiringi wali Jisasini iye kanomundo nimbei, "Nunge kimu tinio munduwi," nimu.

Kano tepa nimu kinye, iye kanomuni yunge kimu tinio mundurumu. Kano kinye yunge kimu penga lepa engema kolona ombo molorumu.

<sup>6</sup> I terimu ulumu Farisi ningi manga pupu kanomuni kanokolio wali nombeya ulkemu tiye kolko King Herotenga talapemu walitikale pungo kanoko liko nombeya teko molkolio kinye Jisas ambe teko toko kondongei ungumu wai toringi.

*Imbo pulumuni Jisas lombilko pungo Galili no mongolumu kulendona nombeya teringi*

<sup>7</sup> Neya aku Farisi iyema purungi wali Jisas yunge kitipi kanoli iyema kinye Galili no mongolumu purungi. Aku wali Galili kombu moloringi imbo pulumuni Jisas lombileringi.

<sup>8</sup> Kano kinye kombu lupe lupe imbo pulumuni Jisas yunge oi terimu ungu temanemu pilkolio kinye ikondo yakondo lerimu kombumanga imbo pulumu Jisas yu molorumuna neya aku wali ongo nombeya teringi. Aku ikondo yakondo oringi kombumanga imbima i tepa Judia, Jerusalem, Idumea, kinye Jordan no nekondo lerimu kombumanga imboma kinye Tair Saidon nimbe kombu lerimu talonga kule kule peringi

imboma pali kimbo tiko ongo nombeya teringi.

<sup>9-10</sup> Aku wali Jisas yuni imbo pulumu tepa koinjo ltimu. Imunga imbo kuro perimumani Jisas yu lope tendengei eke lepa meliko ongei oringi. Aku teliko oringi ulumuni imbo paa pulumu lerimu wali Jisas yu liko okowi none terimu kinye yunge kitipi kanoli iyemando nimbei yunge no sip te tumbi tiko noindeio nimu.

<sup>11</sup> Aku wali kuro keri wangoli imbomani ongolio wali Jisas kanokolio yunge kumbekerena komongo toko ongo pondopula tekolio Jisas yu ningi ame tondongei are ningolio ningei, "Nu kau nu Gotenga malo," ningi.

<sup>12</sup> Nalo Jisasini kuro keri wangoli imbomando enge nimbe iri topalie yu iye pupu imu ningi imbomani pilengeti imbi naa leao nimu.

*Jisasini yunge kitipi kanoli iyema kongono tipe munduli iye 12 imbi topalie kongono tirimu*

<sup>13</sup> Altopa walite Jisas kano mulu kembo tengatapa pumbelie kinye yunge kitipi kanoli iyemanga imunana yunge limbo konopu lerimu iyemare waio nimu kinye aku iyema yu molorumuna oringi.

<sup>14</sup> Kano wali iye 12 waye imbi topa ltimu. Aku tepalies imbi tipe aku iyema kongono tipe munduli iyema nimu. Aku imbi topa kanopu lipelie wali nimbei, "Nani eno kanopo ltiomu lemo eno na kinye molamili nimbo tero. Imunga eno Gotenga ungu tukume nindengei kape wendo tipo mundumbo.

<sup>15</sup> Aku tembo kinye enoni kuro kerima makoroko Itewinga kape eno nanga enge ambolonge," nimu.

<sup>16</sup> Aku iye 12 imbi topa ltimumanga impima i tepa, Saimon nimbe iye te Jisasini imbi koinjo te tirimu. Aku tirimu imbimu Pita.

<sup>17</sup> Akuna Jems nimbe iye te kinye yunge angenu Jon nimbe iye te, aku iye talo Sebedi nimbe iye tenga malo talo. Da iye talo Jisasini Boanerges nimbe imbi koinjo te tirimu. Aku tirimu imbimunga ungu pulumu i tepa, elo iye kalambo naa nili talo nimbelie nimu.

<sup>18</sup> Aku we iyemanga imbi Andru, filip, Bartolomyu, Matyu, Tomas, Alfius nimbe iye tenga malo Jems, Tadius kinye kelepa yunge maimunga nimbe oi opa pule torumu iye te imbi Saimon kinye

<sup>19</sup> peyalimekondo lipe pipi tipe Iskariot kombu iye te ltimu. Aku iyemunga imbi Judas yuni Jisas opa pule iyemanga kindo tirimu.

*Mane ungu imbo iye mareni Jisas yunge tukundo kuro kerima nokoli kuro awili te molopalie yu lipe loi tirimo ningi*

<sup>20</sup> Altopa Jisas ulke tengah tuku purumu. Aku wali kano tepala imbo pulumu ongo nombeaya teringi. Aku teringi wali Jisas yu kinye yunge kitipi kanoli iyema kere nowi wai te naa lerimu.

<sup>21</sup> Aku walipe yu kere naa norumu ungu pilkolio wali Jisas yunge anumu kinye angenupili kemulupilini ningei "Yu loi ltemo," ningi yu lingei purungi.

<sup>22</sup> Aku wali Juda imbomanga mane ungumunga ungu imbo iyemare Jerusalem kombu tiye kolko maindo ongolio ningi, "Jisas yu kuro kerireni lipe loi tipe enge tirimo. Aku kuromu lemo kuro kerimanga nokolimi. Imunga Jisas yuni aku engemu ambolopalie kuro kerima makoropa mundurumo," ningi.

<sup>23</sup> Aku teko ningi ungumunga Jisasini kano iyema waio nimbeline ungu kongolino lipelie eno nimbei, "Satan yuni yunge kuro kerima manda naa makoropa mundumbelo.

<sup>24</sup> Iye awili teni yunge nokoromo kombumunga tukundo molonge imbomani yunge nimbelo ungumu naa pilkolio enongan nendo yando mokemake lekolio opa tengem lemo aku kombumu bembu nimbelo.

<sup>25</sup> Lapa ulke tukundo molonge imbomani lapanga nimo ungumu naa pilkolio mokemake lekolio opa tengem lemo aku iye pupu imbumu bembu nimbelo.

<sup>26</sup> Aku tepa mele kala Sataneni yunge kuro kerima kinye mokemake lepalie tukundo opa makinjimo lemo aku Satan yu bembu nimbe yunge imbumu naa molombalo.

<sup>27</sup> Paimbo, imbo teni iye keri enge nilimunga ulke alumbiye tepa tuku pumbe yunge noirimmo walkumo melema wapu oi naa limbelo. Aku molo. Nalo iye keri enge nilimu ka topa oi noipelie wali pele manda yunge ulkena tuku lembalo walkumo melema manda wapu limbelo itemo.

<sup>28</sup> Imunga nani eno ungu tukumemu nimbo tiro. Imbo imbomanga ulu pulu kalaro tengema kinye ungu keri ningema Goteni manda kulu topa ltendembalo.

<sup>29</sup> Nalo imbo narireni Gotenga Mini Kake Telimunga ungu keri nindimo lemo aku imbumu yuni ulu pulu kalaro lepa pulum tempalo. Imunga imbo akumu yunge ulu pulu kalaro tembalomunga Goteni pundi topa mindili lipe tipe paa naa tiye kondombalo," nimu.

<sup>30</sup> Jisas yuni i nimu ungumu ambe telka Mosesinga mane ungu pimele ungu imbo iye mareni ningi kuro kerireni yu lipe loi tirimo ningi.

*Jisas yunge anumu kinye angenupili kemulupilili oringi*

<sup>31</sup> Aku wali Jisas yunge anumu kinye yunge angenupili oringi. Penana ongo angilkolio wali Jisas yu tawendo owi ningi imbo tendo ningi tukundo munduringi.

<sup>32</sup> Neya aku walimunga imbo pulumu Jisas yu liko makai tendeko moloringi aku imbomani Jisas yundo ningi, "Nunge aminye kinye nunge unga angenali keminyeli penando ongo angilkolio nu kanamili nimele," ningi.

<sup>33</sup> Aku teko ningi wali Jisas yuni imbo akuma ungu imbo tondopa nimbei, "Nanga ama kinye nanga ango kame naimeleya?" nimu.

<sup>34</sup> I tepe nimbeline wali yu makai tendeko moloringi kano imboma kanopalie nimbei, "Pileio! Enope nanga ama kame nanga ango kame moromele.

<sup>35</sup> Imunga imbo narireni Gotenga konopumu lombilimo lemo da imbumu nanga ango, nanga aya, nanga ama," nimu.

## 4

*Iye teni kere imbo panjirimu ungu kongolinomu*

<sup>1</sup> Altopala walite Jisas kano Galili no mongolumu kulendona ungu imbo tondorumu. Aku wali imbo paa pulumuni yu makai tendeko ongo nombeaya teringi kinye aku ulu kanopalie wali Jisas yu kano no sipe tengemungupe pala pumbeline imbomani yunge ungu manda pilinge mele akuna molorumu. Aku terimu wali imboma nomu kulendona moloringi.

<sup>2</sup> Aku wali Jisas yuni ungu kongolino lipelie imboma ungu awini nimbe tipelie nimbei,

<sup>3</sup> "Eno pileio! Walite iye te yunge poinyena kere imbo panjimbei purumu.

<sup>4</sup> Poinyena pumbeline wali kere imbo kano tanda tirimu. Kano kinye mare aulke pulena mainye purungi. Aku wali kerama ongolio kinye tiltiko eno noringi.

<sup>5</sup> Mare mai alaye lepa kou mainye pololimanga pala purungi. Aku wali mai alayemu olala lerimu kinye kere imbo kanoma waliitikale muli tuku ningi ipopa teko akoringi.

<sup>6</sup> Nalo mai alaye ola lepalie kou mainye polorumumuni kere imboma pulukono mandoko naa munduringimuni kelepa ena ola angilerimu kinye kere imbo kanoma kui ningi koloringi.

<sup>7</sup> Kere imbo mare kano tiri pakale mele ka koko mololi malio mainye purungi. Aku wali, ka koko mololi kanoma akoko winjikolio kinye kere imbo kanoma tokonoringi. Aku teringi wali kere imbo kanoma akoko tumbi ningi alaye kere mongo te naa toringi.

<sup>8</sup> Aku tepili kape mare mai puruli pengana mainye purungi. Aku kere imbo

kanoma muli tuku ningko akoko awili lekolio kinye mongo toko kere meringi. Mareni langi mongo tendekumunga mongo 30 mongo toko tukume peringi. Mareni 60 mongo toko tukume peringi. Aku wali mareni kere imbo panjirimu mele ongondoko 100 mongo toko tukume peringi," nimu.

<sup>9</sup> Kano tepa nimbeline wali Jisasini nimbei, "Komu angilimbelo imbonuni lemo i ungumu wamongo piliwi," nimu.

*Jisasini ungu kongolino ltimu ungu pulumu*

<sup>10</sup> Altopa Jisas kano yunu molorumu wali yunge kongono tipe munduli iye 12 kano poko kinye yunge kitipi kanoli iye mare yu lombili andoringima peya ongoing nombeaya tekoi mokolio ungu kongolino kanomunga pulumu pilemili ningko para tiwi ningi.

<sup>11</sup> Jisasini nimbei, "Oi imbonani Gotenga imbo nokoromo ulu lopeke tepa itemoma naa liko manjiringi. Kinye Goteni yunge ulu aku lopeke tepa lerimura enondo lipo ondomo. Nalo we angimele imbona ungu kongolino kau lipolio nimbo tiro.

<sup>12</sup> Imunga,

Imbo akumani kanonge nalo mele te naa kanoko imbi naa tingi. Komu lenge komu lenge nalo ungu te naa pilko lingi.

Imbo akuma kanoko pilko konopu topele tolimalanje Goteni enonga ulu kalaroma kulu topa ltendelka," nimu.

(Ais 6:9,10)

*Kere imbo panjirimu ungu kongolino-munga pulumu*

<sup>13</sup> Jisasini i ungumu nimbeline wali yunge ki tipi kanoli iyemando nimbei, "Eno i ungu kongolinomu paa naa pilko ltimeleya? Aku tengi lemo, enoni we ungu kongolinoma ambe tekolio pilko lingey?

<sup>14</sup> Pileio! Kere imbo panjirimu iyemuni Gotenga ungumu imbo panjirimu.

<sup>15</sup> Kere imbo mare aulke pulena mainye puringiaku mele imbo marenega konopuna Gotenga ungumu imbo panjirimu. Aku imbonani Gotenga ungumu pilko nendo leringi wali Sataneni ombalio kinye Gotenga ungu penga kanomu imbonanga wendo lipo ltenderimu.

<sup>16-17</sup> Kere imbonare mai alaye kolo ola lepalie kou mainye pololimanga pala puringi. Aku puringina pulkono mandoko naa munduringi. Aku mele imbo mare Gotenga ungumu pilkolio kinye walitikale tono ningko Itigi nalo molko tule naa puringi. Imbo akumanga kangindo Gotenga ungumunga ningko pondokolio imbonareni mongo liko tiko mindili noli uluma liko tiringi kinye Gotenga ungumu walitikale tiye koloringi.

<sup>18</sup> Kere imbo mare tiri mele ka koko mololimanga mainye puringiaku mele imbonare Gotenga ungumu pileringi.

<sup>19</sup> Nalo enonga mololi ulu pulundo ambe tepo molopo pemolonje konopu leringi, kongi tumili kou mone mele mare awini noiemolo konopu leringi,aku wali we kape konopu i kano kanoma tukundo ombalio Gotenga ungumu pange tendepa topa norumuna tumbi ningko kere naa meringi.

<sup>20</sup> Nalo kere imbonare mai puruli pengana mainye puringi. Aku puringi mani kere mongo toko tukume peringi. Mareni 30, mareni 60, mareni kere imbo panjirimuru ongondoko 100 ningko mongo peringi. Aku mele imbonareni ungu tukumemu pilko liko meringi," nimu.

*Tipe lamemunga ungu kongolinomu*

<sup>21</sup> I ungumu nimbe pora tipelie wali Jisasini altopala imbonando ungu kongolino lipelie nimbei, "Imbo teni tipe lamemu kandopalie mingina tuku mondombalonje molo polona maindo mondombaloya? Aku molo. Aku ulu teli mele lamemu kandopalie yunge moromo kombuna mondombalo.

<sup>22</sup> Aku mele kinye ungu kongolinomanga palinga puluma lopeke tepa itemo nalo altoko ungu pulumu pilko likolio wali ningo mona ltendenge. I tepa mele ulu lopeke telima pali kinye aku topa itemo nalo altoko kanoko imbi tikolio wali ningo mona ltendenge.

<sup>23</sup> Imunga komu angilimbelo imbonani lemo i ungumu wamongo pileio!" nimu.

<sup>24</sup> Jisasini nilipe pumbeline nimbei, "Eno nanga nio unguma wamongo pilko meao! Eno unguma pilko moke tengi tepe mele Goteni enonga lipo manjili uluma moke tendepa pakalu tindimbelo.

<sup>25</sup> Imbo te ungu pilipe lipo membalo aku imbonu Goteni yunge lipo manjili mu balaku tindimbelo. Nalo imbo teni yunge ungumu pilipe naa memo lemo, aku lipo manjili kelo ambolombalomu kape peyo naa lembalo," nimu.

*Kere imbo akoromomunga ungu kongolinomu*

<sup>26</sup> Aku ungu nimbeline wali i ungumu kape nimbei, "Goteni imbo nokoromo ulumunga palaku itemo mele i tepe. Iye teni poinyena kere imbo tanda tirimu.

<sup>27</sup> Aku tepalie wali, ipu leli uru perimula otili oi makilerimula, da wali kere imbo kanomu yunu muli tuku nimbe akorumu. Kere imbo tanda tirimu iyemuni kere imbonu ambe tepa akoromonje nimbe topele topa naa kandorumu.

<sup>28</sup> Aku wali, kere imbo kanomu maimuni kau tepe akondopa kere mongo topili nimu. Kere imbo kanomu kiyendo gomo anjirimu. Altopa gomo kope tipe mongo

torumu. Peyalimekondo kere mongo kanomu tukume pepa kekere nimu.

<sup>29</sup> Langi imbo kanomu nowi lepa nendo lerimu kinye panjirimu iye kanomu langi lipemboi nimbe yunge mapu loimu kinye orumu," nimu.

*Mastet ningko kere imbo paa kelo koltenga ungu kongolinomu*

<sup>30</sup> Altopala nimbei, "Goteni imboma nokromo ulumunga palaku ltemo ungumu i nimboi tero.

<sup>31</sup> Iye teni mastet nimbe kere imbo te ltimu. Aku kere imbomu i mai kombuna mainye ltemo kere imboma ongondopalie yu paa kelomu, kano kere imbomu maina mainye panjirimu.

<sup>32</sup> Altopala alaye koltenga kere imbo kanomu akorumu wali poinyena we kere imbo i kano kanoma ongondopa yu paa awili kango akorumu. Aku kere imbomu akopalie kou awili kangoma anjo yando mundurumu. Aku wali unjo kou amo torumumanga maindo keramani ongolio manga takoko mulu walo teringi," nimu.

*Jisasini imboma ungu kongolino kau lepa nimbe tirimu*

<sup>33</sup> Jisasini i tepa mele ungu kongolino awini lipelie imboma manda pilko lengei mele Gotengu ungu tukumemu nimbe tirimu.

<sup>34</sup> Yunge nimu ungumu kongolino lipelie kau nimbe, ungu we te naa nimu nalo kelepa yunge kitipi kanoli iyema kinye enongan moloringi wali aku ungu kongolino ltimumanga puluma pali tilke topa tirimu.

*Jisasini poporome awili te nimbe kenderimu*

<sup>35</sup> Neya aku tendeku walimunga ipo lembari teli, Jisasini yunge kitipi kanoli iyemando nimbei, "Lino Galili no mongolumu topo pule topo nekondo kulendo pamili," nimu.

<sup>36</sup> Pilkolio, Jisas no sipina we molopili kitipi kanoli iye kanomani tuku pungo, imbo kanoma tiye kolko eno purringi. Aku wali we no sipima kape akuna purringi kala.

<sup>37</sup> Kano pungo molangei kau, walitikale poporome awili kangore ombalie nimumuni no apipe sipina tuku mundurumu. Aku terimu wali no sipina tukundo no molopa peko lembai andi andi terimu.

<sup>38</sup> Aku wali Jisas no sipimunga umbulkondo yunge pinyewemu kandarenga noipelie uru pepa molorumu. Kano wali yunge kitipi kanoli iyemani yu toko makinkjoklio ningei, "Ungu imbo iyemu, lino no wangomili teremolo ulumu kanokolio terenoya?" ningi.

<sup>39</sup> Pilipelie Jisas ola angilipe poporome iri topa nomundo nimbei, "Ya! Nu kelew!"

nimu. Kano tepe nimu kinye poporome kelepa nomu oi molorumu mele molorumu.

<sup>40</sup> Kano ungu nimbelie wali Jisasini yunge kitipi kanoli iyemando nimbei, "Eno ambe telka pipili koltomeleya? Na alaye ipuki kape naa tirimeleya?" nimu.

<sup>41</sup> Nalo kitipi kanoli iyemani paa mini ltekolio enonga nendo yando ningei, "Poporamemuni kape nomuni kape yunge nimo ungumu pilko lombiltimbele kani i iye ambe teltenje?" ningi.

## 5

*Jisasini kuro keri wangoli iye te tepa koinjo ltimu*

<sup>1</sup> Jisas kinye yunge kitipi kanoli iye kanoma Galili nomu toko pule toko Garasa nimbe kombu te lerimu akundo kulendo wendo oringi.

<sup>2</sup> Jisas no sipina wendo ombo nendo lerimu wali iye te imbo ono kombuna angilipe ombalie yu kinye kane kane tombai wendo orumu. Neya aku iyemu kuro keri wangoli iye.

<sup>3</sup> Yu imbo ono teringi kou angamanga pelipe andorumu. Aku iyemu yu imbo teni ka toko noinge mele kape manda molo, ka senema kape manda naa terimu.

<sup>4</sup> Waliwalima yunge kimbo kima seneni ka toringi nalo otli ipupene ka senema tungu tipe kimbona ka toringi ainima elke-malle tondorumu. Yu paa enge lakopa nimumuni imbo teni ambolko panjingue mele kape molo lerimu.

<sup>5</sup> Ipu leli tangoli imbo ono teringi kou anga malio kinye mai kembo malio wali-walima are nilipe kouni yunge kangina yunu turupe kopilipe andorumu.

<sup>6</sup> Aku iyemu yu tule tepe angilipe Jisas kanopalie wali, mu nimbe ombalie Jisas yunge kumbekerena komongo topa ombo pondorumu.

<sup>7-8</sup> Aku wali, Jisasini iyemunga tukundo kuro keri molorumumundo nimbei, "Kuro kerimu, nu iyemu tiye kolko wendo ongo puwi," nimu. I tepe nimu wali kuro kerimuni are lakopa nimbelie nimbei, "Jisas nu Gote Ola Iyemunga malo, na kinye ambe tenioya? Gotengu imbina mi leko na mindili naa liko tiwi," nimu.

<sup>9</sup> Nalo Jisasini kuro keri kanomundo nimbei, "Nunge imbi nariya," nimu. Kuro keri kanomuni ungu pundu topa nimbei, "Nanga imbimu Pulumu, ambe telka lino kuro keri awinima wangopo moromolo," nimu.

<sup>10</sup> Aku tepe nimbelie wali altopala altopala Jisas yu walipe pilipelie nimbei, "Lino kuro kerima i kombuna wendo liko naa munduwi," nimu.

<sup>11</sup> Aku wali mulu kumbo kulerenga kongi pulumu imu nongo angileringi.

<sup>12</sup> Kano wali kuro kerimani Jisas yu wali kolo pilkolio ningei, "Lino kongima angimela liko munduwu. Lino kongimanga tuku pamili niwi," ningi konge teko ningi.

<sup>13</sup> Ee nimu wali kuro keri kanoma iyemunga wendo ongo pungo kongimanga tuku purungi. Kano kinye kongi paa pulumu angileringi, lipe popo tipe 2,000 mele waye, kanopana tondolo waru no kekona maindo lkikolio kinye no mongolu te molorumuna poningo tuku pungo no wangoringi.

<sup>14</sup> Kongi nokoko angileringi iyema kowa eno pungo aku terimu ulumu neya aku kombu taunomanga kinye kombu kulemanga anjo anjo andoko ningi. Aku teko ningi wali, terimu ulumu kanongeim bomba wendo purungi.

<sup>15</sup> Pungo Jisas molorumuna wendo ongo kanoringi wali oi kuro keri awini wangopa perimu kano iyemu kelepa wale pakoli pakopa yunge konopumu kolona lepili molorumu. Aku ulu kanokolio kinye mini lakoko lteringi.

<sup>16</sup> Neya aku terimu ulu kanoringi im bomani imbo oringimando kongima kinye kuro keri wangorumu iyemu wendo orumu uluma temane toko tiringi.

<sup>17</sup> Pilko kanokolio wali imbomani Jisas yu konge tekolio enonga kombumu tiye kolko nu puwi, ningi.

<sup>18</sup> Kano teko ningi wali, Jisas kano pumbei no sipina tuku purumu kinye, oi kuro keri wangorumu kano iyemuni Jisasindo konge tepele waye pambili nimu.

<sup>19</sup> Nalo Jisasini opili ungu naa nimbelie kano iyemundo nimbei, "Iye Awilimuni nu tepa kondoromo mele kinye nu kondo koltomo mele kape ulke kombundo pungo nunge imboma ningi tipuwi," nimu.

<sup>20</sup> Pilipelie iye kanomu anjo pumbe Jisasini yu paa tepa kondoromo uluma pali kombu awili Dekapolis ningina nilipe andorum. Aku tepa nimu ungu pileringi imbomani ereye ningi nongo purungi.

*Balo kololimu kinye ambo kuro pelimu talo Jisasini tepa koinjo ltimu*

<sup>21</sup> Jisas kano altopala Galili no mengoluma topa pule topa nekondo kulendo purumula. Aku no kulendona imbo pulumu Jisas yu angilerimuna ongo liko okoringi.

<sup>22</sup> Aku wali Juda imbomanga nombeya ulke tengatapu iye te orumu, aku iyemunga imbi Jairus. Kano iyemuni Jisas kanopalia wali yunge kimbo puluna komongo topa pondopalie

<sup>23</sup> enge nimbe walipe pilipelie nimbei, "Nanga lemenu balomu koltomo, imunga nuni paa ongo nunge ki pala noindiwi. Aku

tenio wali, balomunga kuromu pora nimbe yu koinjo pupili," nimu.

<sup>24</sup> Aku tepa nimu kinye Jisas kano aku iyemu kinye pumbei purumu. Aku wali imbo pulumuni yu purumu mele lombilko yu liko okoko peya purungi.

<sup>25</sup> Aku waye purungi imbomanga imu nana ambo te yokoli mepa mindili nomba molopili poinyi 12 pena perimu.

<sup>26</sup> Da ambomu yu dokta pulumunga kina maindo molopa mindili awilimu norumu. Aku tepalie kuro koinjo puro kiyekiye nimbe yunge kou merimuma akuna pora tirimu nalo koinjo naa puli kuro topa olandopa kau purumu.

<sup>27-28</sup> Aku ambomuni Jisasinga teremo ningi uluma pilipelie wali yunu konopuna tukundo nimbei, "Jisas yunge wali pakolimu lope tendendu lemo, aku na koinjo pumbo lepamo," nimu.

Aku konopu panjipelie wali imboma oringi mele Jisasinga umbulkondo akilio akilio orumu. Aku konopu leliple ombalie kinye Jisasinga wale pakolimu lope tenderimu.

<sup>29</sup> Kano ulu tepa nendo lerimu kinye walitikale yokoli merimu kano ulu pulumu akuna pora nimu. Aku kinye ambomu yunu tukundo lipe manjirimu wali yunge umbuni merimu kano ulumu pora nimu.

<sup>30</sup> Kano terimu wali Jisasini imboma koinjo lipili enge mare wendo purumu ulu tumbi tipe lipe manjipelie imbo oringimando kumbekere ondopalie nimbei, "Narini nanga wale pakolimu lope tendemoya?" nimu.

<sup>31</sup> Aku tepa nimu wali yunge kitipi kanoli iyemani ungu pundu toko ningei, "Imbo pulumuni nu liko okoromele ulu kandono wali na imbo narini lope tendemo ninoya?" ningi.

<sup>32</sup> Nalo imbo paa narini yu lope tendonje nimbe kanombai kau kanorum.

<sup>33</sup> Aku terimu wali ambomuni yunge terimu ulumu lipe manjipelie kinye pungu pungu nilipe pipili kololipe ombalie wali Jisas yunge kimbo puluna komongo topa ombo pondopalie wali yu kinye terimu ulumu pali nimbe para tirimu.

<sup>34</sup> Kano tepa nimu wali, Jisasini ambo kanomundo nimbei, "Nanga lemenu, nunge ipukimuni nu tepa koinjo mundumo. Imunga nunge umbuni meniomu paa pora nipili, nunge konopumu kolona lepili ulkendo puwi," nimu.

<sup>35</sup> Jisas kano i ungumu nimbe angilipili iyemare Jairusinga ulke tiye kolko ongolio kinye Jairus yundo ningei, "Nunge lemenu kano nomi ka akumo. Ungu imbo iyemu umbuni tiko ambe telka we meko oronoya?" ningi.

<sup>36</sup> Nalo Jisasini aku teko ningi ungumu komu naa tipelie ulke nokoli iye kanomundo nimbei, "Mini naa ltekolio, na ipuki tiwi," nimu.

<sup>37</sup> Kano terpi nimbeline wali yu lombilko imbo te wangei ungu naa nimu. Nalo Pita kinye we angenungolo Jems Jon talo waye i pokon kau wangei nimu.

<sup>38</sup> Jairusinga ulke wendo oringi wali Jisasini imbo kapu andi malio lila ningi pekolio kinye kola tome toko angileringina kanorumu.

<sup>39</sup> Jisasini kola teko moloringina tuku pumbelie nimbei, "Eno ambe telka ungu panjiko kola teko moromeleya? Balomu kolopa naa kolomo. We uru pepa kau moromo," nimu.

<sup>40</sup> Yunge nimu ungu pilkolio owe tenderingi.

Aku terpingi kinye Jisas yuni imbo kanoma pali makoropa tawendo mundupelie wali balomunga anumu lapa talo kinye yunge kitipi kanoli iye yupoko waye lipe meli onomu lerimu kiripina tuku purungi.

<sup>41</sup> Akuna pungolio wali Jisas yuni balo kanomunga kimu lipelie kinye balomundo nimbei, "Talita kumi," nimu. Aku nimu ungumunga pulumu i tepa mele, "Balo kelomu, nani nundo nio, nu makiliwi," nimu.

<sup>42</sup> Walitikale kau balo kanomu para lepa makilipe angilipe andorumu. Aku balomu poiney 12 pelimunga i ulumu wendo orumu. Aku wali i terimu ulumu kanokolio imbo waye moloringi kanoman mini lteko ereye ningi.

<sup>43</sup> Nalo Jisasini aku imbomando enge nimbe nimbei, "I temo ulumu anjo imbo tendo naa ningi tieio," nimu. Aku tepa nimbeline kinye anumu lapa talondo nimbei, "Balomu langi mare noplili liko tielio," nimu.

## 6

### *Ulke kombu Nasaret imbomani Jisas umbulu tiringi*

<sup>1</sup> Jisas aku kombumu tiye kolopa yunge ulke kombundo yando orumu wali yunge kitipi kanoli iyema yu kinye waye oringi.

<sup>2</sup> Kelepa Juda imbomanga koro awili Sabat wendo orumu wali, Jisas aku nombeya ulkena ungu mane tirimu. Aku ungu nimbe tirimuna imbo pulumu molko yunge nimu unguma pilko mini ltekolio ningei, "I uluma tena limoya? Imbo narini i mane unguma yu timoya? Ambe tepalie yuni ulu wengendelima teremoya?

<sup>3</sup> Yu ambo Marianga malo. Yu iye kamda kanomu. Yunge angenupili, Jems Josep Judas kinye Saimon pokon kanomu. Yunge kemulupili lino kinye waye moromelena karomolo," ningi. Aku teko ningolio Jisas

umbulu tiko, yunge nimu unguma ipuki naa tiringi.

<sup>4</sup> Kano terpingi wali, Jisasini kano imbomando nimbei, "Kombu palinga Gotenga nimbe munduli ungu nimu iye profet te imbi moromo nalo, yunge ulke kombuna kinye yunge kolepale bamunupili kinye yunge lapuna tuku manjipe, aku Gotenga iye profet imbi naa mololimu," nimu.

<sup>5</sup> Ipuki naa tiringi kombuna ulu wengendeli mare naa terimu. Nalo yuni kuro imbo pokoraye pokorenga kau ki pala noindipe aka pokon koinjo ltimu.

<sup>6</sup> Aku imbomani yu ipuki naa tiringi ulu lipe manjipelite konopu awini lipe mundurumu. Kelepa Jisas kano yunge ulke kombu tiye kolopa we kombu kulekule lerimumanga imboma ungu mane tilipe purumu.

*Jisasini yunge kitipi kanoli iye 12 kongotepangei nimbe tipe mundurumu*

<sup>7</sup> Jisas yuni iye 12 kano pokon alako topa lipe nombeya tepalie wali talo talo nimbe lupe lupe kongono tepangei nimbe wendo tipe mundurumu. Aku tepalie yuni kuro kerima makoroko mundengei engema eno tirimu.

<sup>8</sup> Iye akumando i ulu teaio nimbeline nimbei, "Enonga pungei aulke malio melte meko naa paio, nalo tumu kau aulke pangei kani liko ambolao. Nalo gai kape, wale kape, molo kou mongo tendekure kape kakona pepili naa meko we paio.

<sup>9</sup> Kimbo tuma mondonge nalo wale pakoli te arikili naa meaio.

<sup>10</sup> Kombu tengah pungolio wali eno panjiko lingi ulke akuna kau molko pekolio anjo yando kongono teaio. Kelko aku kombumu tiye kolko pungei waliaku penge ulkemu kape tiye kolko paio.

<sup>11</sup> Eno kombu tengah onge wali, akuna molonge imbomani eno naa panjiko liko, enonga ninge unguma naa pilinge lemo, aku kombumu tiye kolko ongei wali enonga kimbona kungupomu ga tiko aku kombuna mainyene munduko paio. Aku imbomani eno teko kenjirimele ulu Goteni kanopili ningi aka ulu teaio," nimu.

<sup>12</sup> Kano tepa nimu ungumu pilkolio, iye 12 kano wendo pungo imboma enonga ulu pulu kerimanga konopu topele taio ningi, ungu tukume ningi tilko purungi.

<sup>13</sup> Kano iyemani kuro keri awini makoroko munduko, imbo kuro torumu awini wel kandoko teko koinjo ltingi.

*Jon Imbo No Ltindili oi toko kondoringi*

<sup>14</sup> Imbo awinini Jisasinga imbimu pilko temane toringimunga King Heroteni Jisas kinye yunge kitipi kanoli iyemani teliko purungi uluma pilierimu. Da wali imbo marenii ningi, "Jon Imbo No Ltindili kano

kelepa makilimomunga yu aku engema amboopalie ulu wengendelima teremo," nylko andoringi.

<sup>15</sup> Nalo aku ungu niliko andoringi wali pileringi imbomareni ningei, "Yu Elaija," ningi. Nalo mareni ningei, "Ama tenaya, oi Gotenga nimbe munduli ungu ningi iyema moloringi aku mele yu aku tepa Gotenga ungu nimbe munduli iyemuni andopa teremo," ningi.

<sup>16</sup> Nalo Heroteni aku ungu pilipelite kinye nimbei, "Jon imbo no ltindili, nani yunge pinyewemu topo pule toru, nalo karolo iyemu kelepa Goteni topa makinjimo lepamo," nimu.

<sup>17</sup> Heroteni aku nimu ungumunga temanemu i tepe. Oi walite Heroteni Jon pungo ambolko liko ka ulke panjeio nimu. Aku ambe telka, yunge angenu Filip nimbe iye tenga omenu Herodias nimbe mangopa ltimu.

<sup>18</sup> Aku terimu wali, Jon imbo no ltindilini Herotendo nimbei, "Angenanga omenu mangoko ltitu wali Gotenga ungu mane toko tangondorunu," nimu.

<sup>19-20</sup> Aku tepe nimu kinye, ambo Herodiasini Jon kinye mumindili kolopalie Jon topa kondombai terimu, nalo Heroteni Jon iye paa tumbi nilimu konopu lepa pipili kolopa yu nokopa kondurumu wali ambonuni ulu te manda naa terimu. Paimbo, Heroteni Jononga nimu unguma pilipelite wali yu konopu awini lipe mundurumu nalo aku ungumu paa pilembo konopu lermu.

<sup>21</sup> Tomboi nimbe nokopa molopalie ambo Herodiasini Jon manda topa kondombalo wali wendo orumu. King Herot yu meringi waimu wendo orumu wali Herot yuni yunge gavmanemunga iye nokoli awilima kinye, Galili kombu tukundo iye mololima kinye ele iyemanga nokoli iye awilima lipe nombeya tepe kere awilite kandorumu.

<sup>22</sup> Aku terimu wali, ambo Herodiasinga lemenu kere kalko nongo moloringina tuku ombalie kinye karendamela mele terimu. Aku terimu ulumuni Herot kinye yunge waye moloringi iye kanoma tepe olo penga timru.

Aku terimu wali, King Heroteni ambo weneponundo nimbei, "Nu mele ambelelu limbo konopu ltenoya? Ambele mele te tiwi ninio aku melelu timbo," nimu.

<sup>23</sup> Aku tepe nimbeline kinye, ambo weneponundo ungu pulumu mi lepa tipelite nimbei, "Nani mi lepo nundo nio, ambele mele te waliko pilimio aku melelu timbo. Paimbo nanga kombu nokoramanga ekondo owe toko tiwi ninio lemo kape timbo kau," nimu.

<sup>24</sup> Pilipelite, ambo wenepo kanomu anumu angilerimuna tawendo pumbelie kinye anumundo ambele melelu nemboya nimbe walipe pilerimu. Aku wali, anumuni lemenu balomundo ungu pundu topa nimbei, "Jon Imbo No Ltindilinga pi mingimu limbo ningo pungo nipiwi," nimu.

<sup>25</sup> Ambo wenepo kanomu walitikale kingimu molorumuna ombalie kinye nimbei, "Kinye welea i teli kau Jon Imbo No Ltindilinga pi mingimu okolarengga noikolio tiwi," nimu.

<sup>26</sup> I tepe nimu kano ungumuni kingimu yu tepe olo keri ltenderimu, nalo yunge waye moloringi iye kanomanga kumbekerenia mi lerimu. Kano ungumuni ambo weneponunga nimu ungumuni pilipe tupe naa torumu.

<sup>27</sup> Imunga Herot yuni ka iyema nokoli iye tendo Jon imbo no ltindilinga pi mingimu toko pule toko leko mendeko owi nimbe walitikale lipe mundurumu. Kano tepe nimbe lipe mundurumu kinye ka iyema nokoli kano iyemuni ka ulkena tuku pumbe Jon Imbo No Ltindilinga nomimu topa pule topalie pimingimu okolarengga noipe mepa orumu.

<sup>28</sup> Mepa ombalie ambo wenepo kanomu tirimu. Aku wali ambo weneponumi meli anjipe pumbbe anumunga kindo tirimu.

<sup>29</sup> I teringi ulumu, Jon yunge kitipi kanoli iyemani pilkolio wali, yunge kangi panamu ongo liko ono tepuringi.

*Jisasini imbo paa pulumu kere langi tirimu*

<sup>30</sup> Oi kongono tipe mundurumu iyema Jisas molorumuna yando ongolio eno ungu mane tikolio ulu teringima pali temane toko ningo tiringi.

<sup>31</sup> Aku wali imbo pulumu owi puwi teringimuni, yunge kitipi kanoli iyema kere nowi wali te naa lerimu. Imunga Jisasini yunge kitipi kanoli iyemando nimbei, "Eno alaye kolte mulu liko teangei. Linonganu molamili kombu ku marenga pamolo," nimu.

<sup>32</sup> Aku wali enonganu no siperenga no lembulko imbo naa peli kombu ku tengu pungei purungi.

<sup>33</sup> Nalo i teringi ulu imbo pulumuni kanokolio kinye manga pupu imu purneple lepamo ningo walitikale liko manjiringi. Kano imbonani kombu taun lerimumanga pali anjikondo kimbo kongono teko mu ningo Jisas kinye yunge kitipi kanoli iyema pungei purungi kombuna eno kumbe leko pungo moloringi.

<sup>34</sup> No sipinga wendo omiba imbo pulumu moloringina kanopalie wali, Jisasini imbo akuma tapu iye naa mololi kongi sipsip

mele ku peko moloringi kanopa kondo lakopa kolorumu. Imunga Jisas yuni imbo akuma ungu awinima imbo tondombai lipe anjirimu.

<sup>35</sup> Kano tepa angilipili kombu kano ipupene lerimu. Kano wali yunge kitipi kanoli iyemani Jisas yu molorumuna ongolio ningei, "I kombu kuna imboma naa peremele. Ipo lembai oi temo kani,

<sup>36</sup> kere panjirimele kombu malio kinye we ulke kombu nondopa ltemo malio enongan pungolio kere koroko pame teko nangeindo imboma paio niwi," ningi.

<sup>37</sup> Jisasini ungu pundu topa nimbei, "Eno langi mare nangei tieio," nimu.

Kano tepa nimu wali, yunge kitipi kanoli iyemani ningei, "Iye teni oli ki talonga tukundo kongono tepalie kou ltimo aku tepa koumu bretena kau topo mundupolio imbo ima lipo langi teamili ningi ninoya?" ningi.

<sup>38</sup> Jisasini eno walipe pilipelie nimbei, "Enoni bret ambe teko meremelenje pungo kanaio," nimu.

Pungo kanoko ltendekolio wali ningei, "Bret kite pakera kinye oma talo ltemo," ningi.

<sup>39</sup> Aku wali, Jisasini yunge kitipi kanoli iyemando nimbei, "Erana mainye imboma pupu lupe lupe wamoko maku toko mondaio," nimu.

<sup>40</sup> Kano ulumu teringi wali, imbo kanoma 100 ningi 50 ningi pupu wamoko maku toko moloringi.

<sup>41</sup> Kano wali, Jisasini bret kite pakera kinye oma talo lipelie, muluna olando tipe kanopalie Gotendo paa tereno nimbelie, bret pike lepa yunge kitipi kanoli iyemando tipelie imboma moke teko tieio, nimu. Oma kano talo kano tepa pike lepalie imbo pali tipe aru tirimu.

<sup>42</sup> Imbo palini noringi kinye manda terimu.

<sup>43</sup> Kano teringi wali, Jisas yunge kitipi kanoli iyemani bretenga kape omanga kape nongolio punduko neripi noiringima tiltiko liko wale basket 12 waye peko teringi.

<sup>44</sup> Imbo kere noringima kambu tiltikolio iye kau 5,000 waye kere noringi.

### *Jisas Galili no mongoluna angilipe orumu*

<sup>45</sup> Pele Jisasini yunge kitipi kanoli iyerna, no sip tenga tumbi tiko lipe mundupelie kinye Betsaida nimbe kombu te no nekondo kulendo lerimuna kumbe leko oi pangei nimu. Aku tepalie, yu imbo maku toringima pangei nimbe yando we angilerimu.

<sup>46</sup> Paio nimbe opele nimbelie wali, Jisasini Gote kinye ungu nimbe konge nimbeindo mulu kembo tengah pala purumu.

<sup>47</sup> Ipo kala torumu wali, sipimu no imu nana lerimu. Aku wali, Jisas yunge yunu mulu kembona molorumu.

<sup>48</sup> Jisas molopa kanorumu wali, poporome orumundo nendo tiko no lembu luringimunga yunge kitipi kanoli iyemani kelepa paloli none telimani no tuku tiko no sipimu kundungei mongonane awilite noliko puringi. Kano teliko puringi wali, Jisas kombu mune lepa kombu ambolopa tungu tirimo wali, nona angilipe yunge kitipi kanoli iyema pungo moloringina ombai orumu. Ombalile kinye, yunge kitipi kanoli iyema topa akilio tipe omba pumbei purumu,

<sup>49-50</sup> nalo yunge kitipi kanoli iyemani Jisas yu nona angilipe omba purumuna kanokolio wali, kurore oromo konopu lekolio mini ltekolio araya ningi. Kano teringi wali, Jisasini walitikale iye kanomando nimbei, "Konopu toimbo topili molaio. Ya na oro. Pipili naa kolao," nimu.

<sup>51</sup> Kano tepa nimbeline wali, Jisas no sipina pala pumbe molorumu kinye waye puringi. Kano wali poporome kanomu kelerimu. Aku ulu kanokolio yunge kitipi kanoli iye kanoma mini lteringi.

<sup>52</sup> Jisasini imbo 5,000 bret kite pakera kinye oma talo moke tepa tirimu ulumu kanokolio nalo yu naa liko manjiringi akumunga mini lteringi.

### *Genesaret kombuna Jisasini imbo pulumu tepe koinjo ltimu*

<sup>53</sup> Kelko no mongolu kanomu toko pule toko, Genesaret nimbe kombu tengah wendo puringi. Aku kombuna sipimu kareko noiringi.

<sup>54</sup> Aku sipimu noikolio wendo pungo nendo leringi wali imbomani Jisas kanoko imbi tiringi.

<sup>55</sup> Aku tekolio lkiko anjo yando pungolio tenarenga Jisas andopa moromo ningi ungu pilkolio, aku imbo kuro tolima enonga tili malio leangei Jisas yu molorumuna taropela teko meko oringi.

<sup>56</sup> Kano kinye kombu taun malio kape, ulke kombu malio kape, we mai poinye liko kere imbo panjiko kongi ari teko moloringi kombu aku malio, Jisas tengah purumu wali, imbo kuro torumuma imbo angenupilini aku maket kombuna meko ongo noikolio kuro torumu imbomani yunge wale pakoli pundumu kau alaye lope tendangei niwi, ningi Jisas konge tekolio ningi. Aku wali, imbo pali lope tenderingima koinjo puringi.

## 7

### *Imbo pilelimani Gotenga ungumu kawa tondoringi*

<sup>1</sup> Mane ungu pimele ungu imbo iyemare kinye Farisi ningi manga pupumare

Jerusalem kombu tiye kolko oringi. Aku manga pupumuni Jisas liko makai tendeko moloringi.

<sup>2</sup> Aku molkolio wali kano iyemani Jisas-  
inga kitipi kanoli iyemareni Farisi iyemani  
nimene mele aku teko enonga kima kulumie  
naa toli kere we noringina kanoringi.

<sup>3</sup> (Alowa naa tenderingi nalo Farisi ning  
manga pupu akuma kinye we Juda imboma  
kafe enonga lapali kolepalenga yandoko  
ltingi mane ungumu lombilko kere nongei  
wali we naa nongo enonga kima oi lapali  
kolepalenga mane ungumuni nimu mele  
kulumie tokolio kere noringi.

<sup>4</sup> Maket kombuna pungo langi likolio  
ulkendo ongo we naa nongo kulumie  
oi tokolio kere langi noringi. We mane  
ungu i kano kano mare awini ltingima  
pilkolombilerengi. Aku tekolio okolo,  
kap, mingi, sospenema kinye enonga uru  
peringi poloma kape kulumie tonge wali  
enonga lapali kolepalenga mane ungumuni  
nimu mele aku teko kau lombilko kulumie  
torungi.)

<sup>5</sup> Teringi ulu kanokolio Farisi iyema kinye  
mane ungumunga ungu imbo iyema kinye  
enoni Jisas yu kinye ungu karaye tekoli  
ningi, "Nunge kitipi kanoli iyemani  
linonga ara kae kamenga mane ungumuni  
naa liko amboltomele nalo linonga nimolo  
mele ki kalaro ki kulumie naa toli kere  
we noromele, aku ambe telka teremeleya,"  
ningi.

<sup>6</sup> Jisasini eno topondopa nimbei, "Eno iye  
penga mare none teremele. Oi Gotenga  
kere ltimu iye Aisaiani eno manda lepa  
nimu ungumu paa nimu. Oi topa panjirimu  
ungumu Goteni i tepa nimbei,  
Enonga keremuni na kapi ningomondoko  
pimele nalo enonga konopumu na  
kinye tule tepa itemo.

<sup>7</sup> Na kapi ningonanga imbi ola  
mundurumele wali we teremele.  
Ulu tukume naa tekolio nalo imbo iye-  
manga mane ungumu ningopilkolio  
wali ningi, 'I Gotenga ungu paim-  
bomu,' nimeli, (Ais  
29:13)

nimu.

<sup>8</sup> I paimbo nio. Enoni Gotenga mane  
ungumu kulendo noikolio imbo iyemanga  
mane ungumu aku ungu tukumere none  
tendeko lombiltomele," nimu.

<sup>9</sup> Nilipe pumbelie nimbei, "Enoni enonga  
mane ungumu ambolongeindo Gotenga  
mane ungumu tiye kolko umbulu tirimele  
aku paa teremeleya?"

<sup>10</sup> Pileio! Mosesini imbomando nimbei,  
Aminye lanienga nimbelo ungumu teng  
tiwi,  
nimbelie

Imbo teni anumu lapanga imbi nimbe  
keri ltendembalo aku imbonu yu-  
toko kondangei, (Kis 20:12,  
21:17)

nimu kano.

<sup>11</sup> Nalo, enoni mane tikolio ningeimbo-  
boreni anumu lapa tapombai mele te am-  
bolopolale elondo nimbei, 'Tapolka nalo oi  
aku meleme Gotenga mendepolomu nimbo  
panjiru,' nimuna

<sup>12</sup> yu anumu lapa tapombai teremo ulumu  
naa tepili nimene.

<sup>13</sup> Aku tekolio enoni lanieli kolenalenga  
ungu manemu ambolongeilekolio nalo  
Gotenga ungu tukumemu ulure molo ning  
teko mainye mundurumele. We ulu awin-  
ima kape aku teko teremele," nimu.

*Imbo te tepe kalaro mondoromo  
ungumu*

<sup>14</sup> Kano tepe nimbeline wali, Jisasini imbo  
pulumu yu angilerimuna altopala waio  
nimbelie imbomando nimbei, "Eno imbo  
pali nanga nimboi tero ungumu pilko liko  
manjeo.

<sup>15</sup> Melte tawendo lepalie imbo  
tukundo pumbelie akumuni imbonu tepe  
kalaro naa mondoromo, nalo imbomunga  
tukundo lepalie wendo oromo, aku mele-  
muni imbonu yu tepe kalaro mondoromo.

<sup>16</sup> Imbo komu angilimbelo imbomuni i  
ungumu wamongo piliwi," nimu.

<sup>17</sup> Altopa imbo kanoma tiye kolopalie  
kinye, yu kano ulke tengatuku purumu.  
Aku wali, yunge kitipi kanoli iyemani  
oi nimu kano ungumunga pulumu eno  
pilemili ningi para tiwi ningi.

<sup>18</sup> Jisasini ungu pundu topa nimbei,  
"Enonga lipe manjilimu we imbomanga  
kinye tendeku teremo itemo. Eno paa naa  
liko manjirimeleya. Tawendo lepalie imbo  
tukundo purumo mele akumuni imbonu  
tepe kalaro naa mondoromo.

<sup>19</sup> Pileio! Kere langima yunge konopu-  
na tuku naa purumo, nalo olona pum-  
belie wendo ombo purumo," nimu. I  
ungumu nimbeline wali Jisasini imbona  
kere langima pali manda nongei nimu.

<sup>20</sup> Aku ungu nilipe pumbelie nimbei,  
"Imbo tengatkonopuna tukundo lepalie  
wendoroomo akumani yu tepe kalaro  
mondoromo.

<sup>21</sup> Pileio! Konopuna tukundo konopu ker-  
imu wendo ombalie kinye imbonu toper-  
ope tipe ulu pulu kerimanga teremo. Wapu  
ulu keri niale lupe lupema andoko teremele.  
Wapu noromele. Imbo toko kondoromele.

<sup>22</sup> Ambiye wapu ltimele. Imbonanga  
noirimele melema liemilia ningonkonopu  
itemele. Imbona kinye konopu keri  
panjirimele. Kolo toko konditoromele.  
Waimbele gele melema ponjiko teko

panjiko walo kelkele toko imbo tenga kumbekerena pende teremele. Wailke toko yama panjirimele. Umbulkondo ungu nindirimele. Enongan kelkele toromele. Loi leko mongo kondoromele.

<sup>23</sup> Aku mele ulu pulu kerima pali, imbomanga konopuna tuku lepalie wendo oromani imboma tepa kalaro mondoromo," nimu.

*Israel kombu tawendo ambo teni Jisas ipuki tirimu*

<sup>24</sup> Jisas aku kombumu tiye kolopa, Tair nimbe kombu taun tengah nondopa purumu. Aku kombuna ulke tengah tuku pumbelie imbo teni yu kanoko naa ltendangei nimbe konopu lerimu, nalo imbomareni yu kanoko imbi tiringi.

<sup>25</sup> Ambo te Jisas ombera moromo ningi ungu pilipelie wali, yunge lemenu balomu kuro keri wangorumuna Jisasini tepe koinjo lipili nimbe walitikale ombera Jisas yunge kimbo puluna komongo topa pondorumu.

<sup>26</sup> Aku ambomu yu Juda imbomanga tukundo ambore molo. Yu ambo pupu Grikimu. Yu meko Siria Fonisia nimbe kombu tengah tukundo meringi. Aku ambomu yuni Jisasindo konge tepalie nimbei, "Nu paa ongo, nanga balomunga kuro kerimui makoroko munduwu," nimu.

<sup>27</sup> Nalo, Jisasini Juda imboma bakulu melema nimbeline ambomunga ungu pundu topa nimbei, "Linoni bakuluma kere oi tiemili. Bakulumanga kere langima owama oi naa lipo tiemili, aku manda naa tembaloo," nimu.

<sup>28</sup> Ambomuni pundu topa nimbei, "Aku pa nino, Iye Awilimu. Nalo bakuluman kere langi nongolio nurupili polona mainye mundurumelema aku owamani kape polona maindo molkolio liko noromele," nimu.

<sup>29</sup> Kano wali, Jisasini ambo kanomundo nimbei, "Ungu pundu toko ningo kondoromunga konopu wango nipili puwi. Kuro kerimuni lemena kano tiye kolopa ombera wendo pumo," nimu.

<sup>30</sup> Nimu kano mele ambo kanomu ulke pumbelie kanorumu wali, kuro keri wangopa naa pepili yunge lemenu polona uru pepa molorumu.

*Jisasini iye komu tipe ungu tumbi tiko naa nilite tepa koinjo ltimu*

<sup>31</sup> Jisas Tair kombu tiye kolopa Saidon nimbe kombu tengah anjikondo pumbelie kombu awili ki talonga talo pakera ningi ombera andopalie Galili no mongolu kulendona wendo purumu.

<sup>32</sup> Aku wali imbomareni iye komu tipe ungu tumbi tiko naa nili iye te Jisas molorumuna meko ongolio iyemunga ki pala noindiwi ningi konge terengi.

<sup>33</sup> Kano teko ningi wali, Jisasini imbo pulumu angileringi kanoma tiye kolopa iye kanomu yunu lipe meli wendo pumbelie iyemunga komu aulke talonga ki mundurumu. Aku tepalie Jisasini yunge kina olkambe topa noipelie, iyemunga alimbilina lope tenderimu.

<sup>34</sup> Kano tepalie wali, Jisasini muluna olando tipe kanopalie kondo lakopa kolopa mulu umbuni teli te ltimu. Aku tepalie nimbei, "Epata" nimu. Aku ungu pulumu peyo lepili nimu.

<sup>35</sup> Kano tepe nimu kinye, iye kanomunga komundo peyo lerimu kinye ungu waliitikale pilipe ltimu. Kelepa kerendo pipi tirimu, kano ulumu kelerimu kinye kano iyemuni ungu kawemawe topa ungu tumbi tipe nimu.

<sup>36</sup> Kano wali, Jisasini imbomando enge nimbe nimbei, "I tero ulumu imbo tendo anjo naa neio. Paa molo," nimu. Nalo, imbomani kano terimu ungumu anjo ningei kau ningi.

<sup>37</sup> Aku wali, yandoko ningina pileringi imbomani temowa ningi ereye ningolio ningei, "Yuni ulu palima tepe kondoromo. Tepa koinjo ltimona komu tili imbomani ungu pimele, ungu naa nilima ungu nimele," ningi.

## 8

*Jisasini imbo 4,000 kere langi tirimu*

<sup>1</sup> Neyaaku tepe wali tengah altope imbo paa pulumu Jisas yu molorumuna ongo nombeya terengi. Kano imboma kere nowi melte naa lerimu. Aku wali Jisasini yunge kitipi kanoli iyema waio nimbeline nimbei,

<sup>2</sup> "Imbo ima wali yupokonga na kinye waye molomolo. Enonga kere mengema oi nongo pora tinge kani nongei melte naa itemo kondo teremo.

<sup>3</sup> Imbo ima kere naa tipolio enonga ulkendowepangei nindulemo, imbomare paa kombu tulendo ongemunga aulke pulepule pungo molangei mongo mepa andopa topa mundumbelo," nimu.

<sup>4</sup> Aku tepe nimu wali, yunge kitipi kanoli iyemani Jisas walikoi pilkolio ningei, "Imbo naa peli kombuna molopolio eno kere manda nangei mele linoni tena limoloya?" ningi.

<sup>5</sup> Kano wali, Jisasini yunge kitipi kanoli iyemando walipe pilipelie nimbei, "Enoni bret ambe teko meremeleya," nimu.

Yunge kitipi kanoli iyemani ningei, "Aya! Bret kite yupoko pakera meremolo," ningi.

<sup>6</sup> Kano teko ningi ungu pilipelie wali, Jisasini imbo oringima mainye molaio nimbelie bret kite yupoko pakera kano pokolipelie, Gotendo paa tereno nimbe bret pike lepalie imboma moke teko tiengi nimbe, yunge kitipi kanoli iyemando tirimu. Aku wali, yunge kitipi kanoli iyemani imbo kanoma moke teko tiringi.

<sup>7</sup> Oma kape kelo pokore meringima, Jisasini lipe Gotendo paa tereno nimbelie, yunge kitipi kanoli iyemando imboma moke teko tieiola nimu.

<sup>8-9</sup> Imbo palini norangi wali manda terimu. Aku teko nongolio, punduku neripi tiye koloringima, yunge kitipi kanoli iyemani basket kite yupoko pakeranga tiltiko peko tiringi. Imbo norangi mele liko popo tiko 4,000 wayeni norangi. Jisasini imbo kanoma pangei opele nimbeline nendo lepale kinye,

<sup>10</sup> *yu* kano yunge kitipi kanoli iyema kinye, no sip tenga ongo tuku pungo, no Galili nekondo Dalmanuta nimbe kombuna purungi.

*Farisi iyemani Jisas Yu manda manjiko kanoringi*

<sup>11</sup> Aku wali Farisi ningi manga pupu mare Jisas *yu* molorumuna ongolio *yu* manda manjiko kanongei ungu mare waliko pilkolio ningi, "Muluna moromo Goteni nu lipe mundurumunje ulu wen-gendeli te kanamili tewi," ningi.

<sup>12</sup> Nalo Jisasini mulu umbuni teli te lipelie nimbei, "Ambe telka eno imbo pupu akumanu ulu wengendeli te kanongei waliko piltimeleya? Paa molo, nani enondo nio, alaye ulte kape Goteni naa lipe ondopili," nimu.

<sup>13</sup> Kano tepa nimbeline kinye Jisasini kano imboma tiye kolopa, no sip kanona kelepa tuku pumbe, no nekondo pumbei purumu.

*Farisi iyemanga mane kerimu bretena tukundo yis mele palaku ltemo ungu kongolonomu*

<sup>14</sup> Pungei purungi wali, Jisasinga kitipi kanoli iyemani bret mare naa meko orangi. Tendekumu kau sipina tukundo lerimu.

<sup>15</sup> Kano wali, Jisasini yunge kitipi kanoli iyemando enge nimbei nimbei, "Farisi ningi manga pupumunga kinye Herotenga plawa akoli yisimu ulu te naa tembaloningo eno kane kane molaio," nimu.

<sup>16</sup> Kano tepa nimu kinye, kitipi kanoli iyemani enongano nendo yando toropo toko ningi, "Ama! Lino bret naa memolona, i ungumu nimbemonje," ningi.

<sup>17</sup> Nalo, Jisasini enonga ningi ungumu lipe manjipelie nimbei, "Ambe telka eno bret te naa memolo ningo toropo toromeleya? Kinye kape, eno paa naa kanoko

naa pimeleya? Enonga konopumu tumbulu topa we peremoya?

<sup>18</sup> Enonga mongo komuma angimo nalo eno paa naa kanoko naa pimeleya? Eno oi tero kano uluma kape paa naa liko manjirimeleya?

<sup>19</sup> Nani imbo 5,000 bret kite pakera pike lepo tiru wali, enoni basket ambe tepanga punduku neripi nongolio tiye koloringima tiltiko liko peko tiringiya?" nimu.

Aku wali, ungu pundu toko ningi, "Ki yupokonga peko tirimulu," ningi.

<sup>20</sup> Jisasini nimbei, "Aku paa nimelemunga, kelepo nani bret kite yupoko pakera imbo 4,000 pike ltenderu wali, aku enoni basket ambe tepanga waye kere nongolio punduku neripi tiye koloringima tiltiko liko peko tiringiya?" nimbe Jisasini aku tepe walipe pilerimu.

Enoni topondoko ningi, "Kite yupoko pakeranga tiltiko peko tirimulu," ningi.

<sup>21</sup> Jisasini eno walipe pilipelie nimbei, "Kinye kape wamongo naa liko manjirimeleya?" nimu.

*Jisasini mongo akuli iye te tepa koinjolitmu*

<sup>22</sup> Jisas kinye yunge kitipi kanoli iye kanoma Betsaida nimbe kombu tengawendo orangi wali, imbomareni Jisas *yu* molorumuna iye mongo akuli te meko orangi. Aku wali Jisas yundo ki pala noindini ningo konge teringi.

<sup>23</sup> Kano teko ningi wali, Jisasini iye mongo akuli kanomu ulke kombu akuna ki ambolopa meli tawendo purumu. Iye kanomunga mongona olkambe topa kandopalie, iyemunga ki pala noipelie kinye iyemu walipe pilipelie nimbei, "Kinye melte kanoko imbi tirinoya?" nimu.

<sup>24</sup> Iye kanomuni nendo tipe kanopalie nimbei, "Paa nino, na imboma andoko purumelena kando nalo, aku imboma unjo mele moromele," nimu.

<sup>25</sup> Kano tepa nimu kinye, Jisasini altopala iyemunga mongona ki pala noindirimu. Kano wali, mongo makilipe oi kanorumumele iye kanomuni melema pali kanopa imbi tirimu.

<sup>26</sup> Aku terimu kinye, Jisasini iye kanomundo nimbei, "Nu ulkendo puwi. Nalo mepo wendo ondu kano kombuna molonge imbomando nu kinye temo ulumu oi ningo naa tiwi," nimu.

*Pitani Jisas *yu* Goteni imboma nokopa kondombalo nimbe lipe mundurumu iyemu nimbeline nimu*

<sup>27</sup> Altoko Jisas kinye yunge kitipi kanoli iyema Sisaria Filipai nimbe kombu te lerimumunga kulekule ulke kombu lerimunga pungei purungi. Aku pungo molko aulkena Jisasini yunge kitipi kanoli iyema

walipe pilipelie nimbei, "Imbomani na nari nimeleya?" nimu.

<sup>28</sup> Enoni topondoko ningei, "Mareninu Jon Imbo No Ltindili makilinio nimele. Mareninu Elaija yando orunu nimele. Mareninu Gotenga ungu nimbe mundulimu oi ningotiringi profet iye te kelko makilko wendo orunu nimele," ningi.

<sup>29</sup> Pilipelie Jisasini eno walipe pilipelie nimbei, "Kinyenonina nari konopulitemeleya?" nimu.

Pitani nimbei, "Nu Mesaia, nu Goteni imboma nokopa kondombalo iye te lipu mundumbo nimbe kanopa ltimu iye Kraist," nimu.

<sup>30</sup> Kano tepa nimu wali, Jisasini yunge kitipi kanoli iyemando enge nimbe nimbei, "Da ungumu imbo tendo anjo naa ningotieio," nimu.

### *Jisas Yu kolopolio makilimbo nimu*

<sup>31</sup> Aku tepa nimbeline wali, Jisasini yunge kitipi kanoli iye kanoma pulu polopa ungu mane tipelie nimbei, "Iyemunga Malo, na mindili awilimu nombo. Tapu iyema kinye, Gote popo tondoli iye nokolina kinye, mane ungu pimele ungu imbo iyemani peya na umbulu tingi. Na toko kondonge, nalo wali yupoko ombo pumbelo wali na makilipo koinjo molombo," nimu.

<sup>32</sup> I yunge tendenje ulumu pilinge mele yunge kitipi kanoli iyema mona nimbe tirimu. Aku wali, Pitani Jisas yu meli aulke kulendo pumbeline iri tombai lipe anjirimu.

<sup>33</sup> Nalo Jisasini yunge kitipi kanoli iyema topele topa kanopalie kinye, Pita kano iri topa nimbei, "Nu Satan, nanga umbulkondo ongo puwi. Nunge liko manjiko nino ungumu Gotenga ungre molo, nalo mai kombu iyemanga ungumu nino," nimu.

<sup>34</sup> Kano tepa nimbeline wali, Jisasini yunge kitipi kanoli iyema kinye we imbo kanoma yu angilerimuna waio nimbeline nimbei, "Imbo te na kinye onio lemo, aku yunge konopu mandopa ltemo uluma umbulu tipelie unjo polopeyan kolombonje lepamo nimbe yunge unjo polopeyamu mepa na omiba lombilimbelo.

<sup>35</sup> Imbo teni yunge mai kombuna mololi ulumu yando limbei temo lemo, aku yunge mulu kombuna molopa kondoli ulumu tepa ltembalo, nalo imbo teni na kinye nanga ungu tukumemu nimbe tilipe andopalie kolomo lemo, aku yunge mulu kombuna molopa kondoli ulumu kanopa limbelo.

<sup>36-37</sup> Pileio! Imbo teni mele paa awini noipe kamako lembalo nalo kolopalie wali Goteni yu tipe kombuna pupili nimo lemo, kelepa ambe teli kongi tumilimuni yunge molopa kondoli ulu pulumu polo tepa yando limbeloya? Aku tepa melemani

pali kape manda yando polo tepa naa limbelo.

<sup>38</sup> Akumunga kinye imbo keri pulure moromele. Imbo teni imbomanga kumbekerena angilipelie imbo kerima pipili kolopalie Jisas nanga iye awili molo nimbe nanga ungu tukumemu umbulu timbelo lemo, na Iyemunga Malo nanga Ara Gotenga engema ambolopolio mulu kombuna kongono iye kake teli enselema kinye yando ombo waliaku tepe nimbelo iyemundo nani naa nangaiyere molo nimbo," nimu.

## 9

<sup>1</sup> Aku ungu nilipe pumbeline wali, yunge kitipi kanoli iyemando nimbei, "Nani enondo paimbo nio. Eno i angimele imbomanga mare oi naa kololi we molkolio Gotenga imboma nokoromo ulumunga enge awilimu wendo ombalona kanonge," nimu.

### *Jisasinga kangi au nimu*

<sup>2</sup> Altopa wali kite talo pakera ombo pupili, Jisasini Pita, Jems kinye Jon poko lipe waye mulu kembo awili tengatela meli pala purumu. Enongan molko kanoringi wali, Jisasinga kangina ulu te lupe terimu.

<sup>3</sup> Yunge wale pakoli pakorumu kanoma mini mana tepe kake tepe wendo orumu. Aku kake terimumu, ya mai kombuna mainye imbo teni kulumie toko kake tendenje mele kape molo.

<sup>4</sup> Kano wali, kitipi kanoli iye kano pokoni kanoringi wali, Elaija kinye Moses talo Jisas kinye ungu ningotieio angileringili.

<sup>5-6</sup> Kano teringi ulu kanokolio wali, Pita yu kinye yunge waye moloringi iye talo eno mini lteringi kinye niwi unggumu maa torumu wali, Pitani Jisasindonimbei, "Nanga Iye Awili, lino ina molomolo aku penga. Linoni ulke takai yupoko takamili, te nunge, te Mosesinga, te Elaijanga," nimu.

<sup>7</sup> Kano wali orumuna maa torumuna piru nimbe kupe te wendo ombalie, iye kano pokoni lipe akutormu wali ungu te kupena wendo ombo nimbei, "Imu lemo Nanga malo. Nani yu konopu mondoro. Yunge nimbelo ungumu pileio," nimu.

<sup>8</sup> Kano wali kupemu purumuna maa torumu kinye kitipi kanoli iye kano pokoni kulekule kanoringi wali imbo te lupe naa kanoringi. Nalo Jisas kau eno kinye angilerimuna kanoringi.

<sup>9</sup> Kelko mulu kembo kanona mainye ongei oringi wali Jisasini yunge kitipi kanoli iye pokondo enge nimbe nimbei, "Eno kanonge ulumu, imbo tendo anjo naa ningotieio. Nalo altopo na Iyemunga Malo kolopolio makilimbo, aku wali pele ningotieio," nimu.

<sup>10</sup> Aku wali iye kano poko yunge nimu ungumu ee ningi pilko lombileringi. Nalo enonga nendo yando ungu walipe pilei tengai toropo tongei liko anjikolio ningei, "Kolopo makilimbo nimo ungumu ambele ulumundo nimonje," ningi.

<sup>11</sup> Aku teko ningolio kinye, Jisas waliko pilkolio ningei, "Ambe telka mane ungu pimele ungu imbo iyemani Elaija kumbe lepa ombalo, Gotenga malo akilio lepa ombalo ningiya?" ningi.

<sup>12</sup> Jisasini topondopa nimbei, "Paimbo, Elaija kumbe lepa omba nanga uluma pali tumbi tipe noimbeindo ombalo nimele. Nalo liko manjeio! Na Iyemunga Malo mindili pulumu nombo kinye Israel imbonmani na umbulu tinge unguma ambe telka oi toko panjiringiya?

<sup>13</sup> Nani enondo paimbo nio, iyemuni Gotenga nimbe munduli ungu nimu iye Elaija none tepe oi orumu. Oi bukuna toko panjiringi mele, imbomani yu mindili liko tiko temolo konopu leringi uluma teringi," nimu.

*Jisasini kuro keri wangoli ungulumu tepe koinjo ltimu*

<sup>14</sup> Jisas kinye yunge kitipi kanoli iye kano poko mulu kembona mainye ongo kanorangi wali imbo pulumuni Jisas yunge yando mondopa purumu kitipi kanoli iye kanoma liko makai tendeko angileringi. Mane ungu pimele ungu imbo iyemareni yunge kitipi kanoli iyema kinye ungu mele-nale teko angileringina kanoringi.

<sup>15</sup> Aku imbomani Jisas kanokolio wali mini itekolio mu ningi Jisas yu angilerimuna ongo yu panjiko Ittingi.

<sup>16</sup> Kano wali Jisas yunge kitipi kanoli iyemando nimbei, "Eno ambe telka mane ungu pimele ungu imbo iyema kinye ungu mele-nale teremeleya," nimu.

<sup>17</sup> Imbo pulumu angileringimanga iye te angilipelie Jisasindo nimbei, "Ungu imbo iyemuya, nani nanga malo ungulumu kuro keri wangorumu wali ungulumu ungu naa nimo akumu nuni teko koinjo ltindeni nimbo mepo oro.

<sup>18</sup> Wali mare, kuro kerimuni ungulumu ambolopa lipe yu maina mainye mikiripe mundurumo. Aku teremo kinye ungulumu apupu talo topa lipe ai polopa ungu nengerepu ltimu. Aku teremo wali, ungulumu yunge kangimu undukana tondolo lipe, lipe enge tirimo. Nunge kitipi kanoli iyema walipo pilipolio kuro kerimun makoroko mundeio nindu, nalo aku iyemani manda naa tendenge," nimu.

<sup>19</sup> Kano tepe nimu wali, Jisasini imbo-mando iri topa nimbei, "Eno imbo ipuki alaye naa pelima, ambe tepe walinga na

eno kinye molopo eno enge tiemboi ningi teremeleyal Ungulumu meko waio," nimu.

<sup>20</sup> Ungulumu Jisas molorumuna meko oringi. Kuro kerimuni Jisas yu kanopa nendo lepalie wali, ungulu kanomu topa konopu naa ltenderimu. Aku kinye maina mainye pindu nimbeline nimumuni kerena apupu topa pewe torumu.

<sup>21</sup> Jisasini aku ulu kanopalie wali, ungulumunga lapando walipe pilipelie nimbei, "Tewali i ulumu pulu polorumuya?" nimu.

Lapani ungu pundu topa nimbei, "Aya! Oi bakulu kelo wali pulu polopa terimu.

<sup>22</sup> Wali awini ungulumu topa tipena tuku kalopa nomanga topa tuku mundupelie topa kondombai teremo. Nalo, nuni ulte manda tenio lemo, lino kondo kolko tapowi," nimu.

<sup>23</sup> Jisasini lapando nimbei, "Manda tembonje ninoya? Imbo ipuki timbelomuni ulu palima manda tempalo," nimu.

<sup>24</sup> Aku ungumu nimbe nendo lerimu wali, lapani enge nimbeline nimbei, "Na ipuki tiembo! Ipuki tiro ulumu teko enge tindidi," nimu.

<sup>25</sup> Imbo pulumu eke lepa meliko nondoko nondoko oringina kanopalie wali Jisasini kuro kerimun iri topa nimbei, "Nu komu tili ungu naa nili kuromu, nani nundo nio, ungulumunga wendo ongo pa. Altoko yu wangoko naa molowi," nimu.

<sup>26</sup> Pilipelie kuro kerimuni are kerire nimbeline ungulumu keri tepe topalie wendo orumu. Kano terimu wali ungulumu maina mainye imbo ono melemeu lerimuna kanokolio imbo palini ningi, "Yu kolomo," ningi.

<sup>27</sup> Nalo Jisasini yunge ki ambolopalie ungulumu tapopa ola ltimu wali ungulu kanomu ola angilerimu.

<sup>28</sup> Altopa Jisas ulkendo purumu wali yunge kitipi kanoli iyemani Jisas kinye enongano molko waliko pilkolio ningei, "Ambe telka linoni kuro kerimun makoropo naa mundurumoloya?" ningi.

<sup>29</sup> Jisasini topondopa nimbei, "Aku melemeu Gote kinye konge tengemuni kau makoroko mundunge," nimu.

*Jisasini Yu kolopolio makilimbo nimu ungumu altopala nimu*

<sup>30</sup> Jisas kinye yunge kitipi kanoli iye kanomaaku kombumu tiye kolko Galili nimbe kombu tengai tuku puringi. Imbo teni yu molombai purumu kombumu naa kanongeji konopu lepa pumbelie wali

<sup>31</sup> Jisasini yunge kitipi kanoli iyema kau ungu mane tipelie nimbei, "Na Iyemanga Malo opa pule iyemanga kindo tinge. Aku wali, aku iyemani na tongena kolopolio nalo wali yupoko tipemunga makilipo koinjo molombo," nimu.

<sup>32</sup> Nalo yunge nimu ungu pilko tundukolio naa liko manjiringi. Aku tekolio, yu altoko nendo waliko piliwinga, eno pipili koloringi.

*Nari paa iye kamako molombaloya ningi*

<sup>33</sup> Jisas kinye yunge kitipi kanoli iye kanoma Kaperneam kombu wendo oringi. Akuna yunge ulke tuku pungo molkolio Jisasini yunge kitipi kanoli iyema walipe pilipelite nimbei, "Eno aulke pulena ungu ambelemunga ungu melenale teliko ongeya?" nimu.

<sup>34</sup> Nalo enoni nari kamako molombaloya ningi ungu mele nale teliko ongolio Jisasina walipe pilerimu ungumu pilkolio ungu naa ningi.

<sup>35</sup> Kano wali, Jisas mainye molopalie yunge kitipi kanoli iye 12 kano pokondo waio nimbelie nimbei, "Imbo narireni yu kiyendo molamboi konopu lembalo, aku imbonu lemo yu peyalime molopalie imbo palinga kongono imbonu molopili," nimu.

<sup>36</sup> Kanongei nimbe Jisas yuni bakulu kelo te lipelie eno angileringina angilipili nimu. Aku bakulumu kangulupe lipelie yunge kitipi kanoli iyemando nimbei,

<sup>37</sup> "Imbo narireni nanga imbina bakulu kelo i teli te panjipe limo lemo,aku na panjipe ltimo. Imbo narireni na panjipe limo lemo,aku na kau panjipe naa ltimo nalo na lipe mundurumu iye awilimu kape ilto waye panjipe ltimo," nimu.

*Jisasini imbo teni lino kinye opa pule naa tomo lemo da imbonu linonga nimu*

<sup>38</sup> Aku tepa nimu wali, Jononi Jisasindo nimbei, "Ungu imbo iyemuya, linoni iye teni Jisas nunge imbina kuro kerima makoropa mundurumuna kanomolo. Aku wali, aku iyemu lino kinye tapu topa naa andorumu akumunga linoni aku tereno ulumu kelewi nimbo, molo nimolo," nimu.

<sup>39</sup> Aku tepa nimu wali, Jisasini nimbei, "Enoni aku iyemundo molo ningko kelewi ungu naa neio. Imbo teni nanga imbina ulu wengendeli te tepalie, altopa nanga ungu kerima naa nindimbelo.

<sup>40</sup> Pileio! Imbo te lino kinye opa pule naa tombalomu lemo,aku linonga imbonu.

<sup>41</sup> Nani enondo ungu kamukumu nio. Imbo teni eno nanga imbona molonge ulu kanopalie wali nanga imbina no kolopa timo lemo paimbo aku imbonunga tembalu ulumu pundi topa Goteni mele tipe kalolimu awilimu timbelona limbelo," nimu.

*Jisasini imbo teni yunge imboma teko mainye naa mundeio nimu*

<sup>42</sup> "Imbo teni na ipuki tirimo bakulu kelo teni ulu kerima tepili nimbe toperope timo lemo aku ulu oi naa teli yunge nomina

kou muluwele kangore moko tokolio nomu kutana toko mainye mundunge,aku paa penga.

<sup>43</sup> Nunge kimuni ulu pulu keri te tenio lemo aku tembalu kimu karu leko ltewi. Ki kalalendomu angili nu koinjo mololi ulumu linio lemo aku penga. Nalo ki peya talo angili tipe kombuna punio lemo,aku paa keri lepamo.

<sup>44</sup> Neya aku tipe kombuna tuku korowa imbo noromelema naa koromele. Aku tipe imbo noromomou kape walite naa kumburumo.

<sup>45</sup> Nunge kimbomuni ulu pulu keri te tenio lemo,aku tembalo kimbomu karu leko ltewi. Nu kimbo ekondo kalalendo angili koinjo mololi ulumu linio lemo,aku penga lepamo. Nalo kimbo peya talo angili nu tipe kombuna toko mundunge lemo,aku paa keri lepamo.

<sup>46</sup> Neya aku tipe kombuna tuku korowa imbo noromelema naa koromele. Aku tipe imbo noromomou kape walite naa kumburumo.

<sup>47</sup> Nunge mongomuni ulu pulu keri te tenio lemo,aku tembalo mongomu akuko ltewi. Gotenga molopa kondoli kombu mongo tendekumu kau angilipili tuku punio lemo,aku penga lepamo. Nalo mongo peya talo angili tipe kombuna toko mundunge lemo,aku paa keri.

<sup>48</sup> Neya aku tipe kombuna tuku korowa imbo noromelema naa koromele. Aku tipe imbo noromomou kape walite naa kumburumo.

<sup>49</sup> Imbonani Gote popo toko kaltomele melema tingeindo Goteni langi kake telima kanopili ningi api kuta mundukolio tirimele. Api kuta mele tipeni imbo pali molongena wendo ombalo.

<sup>50</sup> Kutamu penga, nalo yu tingo naa temo lemo tingo tepili ningko ulu te manda teremeleya? Eno api kuta mele tingo tepili molkolio enonga imunana konopu tendekuna pupili taka liko molaio," nimu.

## 10

*Iyemuni ambo lipe lteli ungumu*

<sup>1</sup> Jisas aku kombumu tiye kolopa Judia kombu pumbelie Jordan no lembulupe purumu. Aku wali, imbo pulumu kano tekola Jisas yu molorumuna oringi. Aku oringi kinye Jisas yunge oi teli ulumu lepalie, kano tepala imbona ungu mane tirimu.

<sup>2</sup> Kano tepa molorumu kinye Farisi ningi manga pupu te yu molorumuna ongolio yu manda manjiko pilingei ungu te waliko pilkolio ningei, "Linonga mane ungumuni iye teni yunge ambomu makoropili nimbe aku ulumu ee nimonje molo manda naa tembaloya?" ningi.

<sup>3</sup> Jisasini ungu pundu topalie nimbei, "Aku tepa ulumunga, Mosesini eno oi mane ungu ambelelu tirimuya?" nimu.

<sup>4</sup> Enoni ningei, "Iye te yunge ambo tiye kolomboi konopu lembalo akumuni lemo ambo tiye koltu nimbe pipia te topalie kinye yunge ambomu wendo manda makoropa mundupili nimbe, Mosesini ee nimu," ningi.

<sup>5</sup> Jisasini topondopa nimbei, "Eno ungu tukumemu naa pilko lombileringi kinye eno ungu imbo tondombai perepa kelepalie Mosesini aku mane ungu enonga nindipe tondorumumu.

<sup>6</sup> Nalo oi kiyendo pulu polopa melema tepea wamoramuaku waina kinye Gotenga ungumuni nimbei,

Ambo iye talo tepea wamoramu, (Stt 1:27) nimbe

<sup>7</sup> kelepala Gotenga ungumuni nimbei,

I ungu pulumunga iyemuni yunge lapa anumu talo tiye kolopalie omenu ambomu kinye tenge timbelo.

<sup>8</sup> Aku tengale ulumuni imbo talo kangi tendekumu mele apuwe lengale, (Stt 2:24)

nimo. Imunga imbo talo ningoloko naa pungele nalo imbo tendekumu none tekoloko moloko pungele.

<sup>9</sup> Akumunga Goteni lipe popo tirimo ulumu imbo teni lupe lupe pupili naa neio," nimu.

<sup>10</sup> Altoko ulkendo pungolio wali, Jisasini yunge kitipi kanoli iyemani i nimu kano ungumuni ambe tepeaya ningoloko Jisas yundo waliko pileringi.

<sup>11</sup> Aku wali, Jisasini topondopa nimbei, "Iye teni yunge ambomu makoropa mundupelie, kelepa ambo te lupe limo lemo, aku tembalo ulumuni yunge oi ambomu molopili altopa yuni lupe ambo wapu langi noli ulumu tembalo.

<sup>12</sup> Aku tepea mele kala, ambo teni yunge omenu iyemu tiye kolopalie kelepa iye te lupe pumo lemo, aku tembalo ulumuni yunge oi iyemu molopili yu iye wapu langi noli ulumu tembalo," nimu.

*Jisasini bakulu keloma mane ungu tirimu*

<sup>13</sup> Altopa walite imbomareni enonga bakuluma Jisasini ki pala noindipe mane ungu tipili ningoloko Jisas yu molorumuna meko ongei oringi, nalo yunge kitipi kanoli iyemani imbo kanoma iri toringi.

<sup>14</sup> Aku teringi ulumu Jisasini kanopalie wali konopu naa mondorumu. Aku tepalie yunge kitipi kanoli iyemando nimbei, "Bakulu keloma anjo pipi naa tieio. Goteni imboma nokoromo ulumu da tepea bakulumanga litempo akumunga na morona wangei neio.

<sup>15</sup> Nani enondo ungu paimbo nio. Imbo narireni Goteni imbo nokoromo ulumu bakulu mele naa limo lemo, aku imbonmu yu Gotenga nokopa moromo kombuna manda naa pumbelo," nimu.

<sup>16</sup> Aku tepea nimbeline wali, Jisas yuni bakulu kanoma kangulupe lipelie ki pala noindipelie bakulu kanoma mane ungu tirimu.

*Jisas purumu wali kelo iye kamakore orumu*

<sup>17</sup> Jisas pumbei purumu wali, iye te mu nimbe ombalile yunge kumbekerena komongo topa pondorumu. Aku tepalie, Jisasindo walipe pilipelie nimbei, "Ungu imbo iye pengamu, ulu pulu paa ambelelu nani tepolio wali, koinjo molopa kau puli ulumu limboya?" nimu.

<sup>18</sup> Jisasini ungu pundu topa nimbei, "Ambe telka nuni na iye pengamu ninoya? Imbo te paa penga molo, nalo Gote tendekumu yu kau pengamu.

<sup>19</sup> Nu Gotenga mane unguma pino kano, akuma i tepea: Nu imbo te toko naa kondowi. Nu ambo iye kinye wapu langi naa nowi. Nu wapu naa nowi. Nuni imbo te kot kolo tondoko naa tendewi. Nu imbo te kolo toko tiko yunge noimbelo melema wapu naa liwi. Nunge aminye lanie talonga imbi ningoloko munduko ningele ungumuni tenge pilili," nimu.

<sup>20</sup> Pilipelie, iye kanomuni nimbei, "Ungu imbo iyemu, na oi bakulu kelo wali, aku mane unguma pali lombilipo oru," nimu.

<sup>21</sup> Kano tepea nimu wali, Jisasini iye kanomu kanopa konopu mondopalie nimbei, "Nu i ulu tendekumu kau oi naa teli. Nu pungolio kinye nunge noirino melema pali yolo liwi. Aku yolo likolio kou linioma imbo koropa nolima tiwi. Aku tenio ulumuni nu mulu kombuna mele makakoma litempo palima lieni. Da ulu tekolio, na ongo lombiliwi," nimu.

<sup>22</sup> I nimu ungumuni kano iyemuni pilipelie wali, yu tapa lepa mai kanorumu. Aku tepalie konopu keri lepa ulkendo yu purumu. Ambe telka, yu mele paa awini noipe kamakomo lerimu.

<sup>23</sup> Aku terimu wali, Jisasini yunge kitipi kanoli iyemana kanopalie nimbei, "Gote iye nomi kingimu molopaga nokoromo kombuna tukundo pungeindo imbo kamakoma pungeindo paa perenge!" nimu.

<sup>24</sup> I nimu ungu pilkolio yunge kitipi kanoli iyemana mini wale lteringi. Nalo Jisasini altopala nimbei, "Gote iye nomi kingimu molopaga nokoromo kombuna tukundo pungeindo imbo kamakoma pungeindo paa perenge.

<sup>25</sup> Kongi kamelelu paa awili walipe kale aulkenna anjikondo manda naa purumo.

Aku tepa mele imbo kamakomu Goteni imbo nokoromo kombuna pungeindo paa perenge,” nimu.

<sup>26</sup> Aku nimu ungumu pilkolio yunge kitipi kanoli iyema mini ltekolio araya ningi. Aku tekolio enongan nendo yando ningei, “Aku lemope, Goteni nari paa tepa limbelonje?” ningi.

<sup>27</sup> Aku wali, Jisasini iye kanoma kanopalie nimbei, “Imbo imbomani i ulumu manda naa tengenalo Gote kinye aku tepa molo. Goteni ulu palima manda teremo,” nimu.

<sup>28</sup> Kano tepa nimu wali Pitani Jisasindo nimbei, “Nu piliwi, lino nu lombilimili nimbulio melema pali tiye kolorumulu,” nimu.

<sup>29</sup> Jisasini topondopa nimbei, “Nani nundo paimbo nio. Imbo teni na konopu mondopa nanga kongono tendembai yunge ulke, molo angenupili kemulupili, molo lapali anupili, molo yunge bakuluma, molo poiney mai melema mola mola lepili ombalo imbomu lemo,

<sup>30</sup> kinye i wai ltemomunga mele paa pulumu limbelo. Aku imbomu yu lemo, ulke kape, angenupili kemulupili anupili kape, ambo kango bakulu kinye poiney mai kape, mele paa pulumu ola mandopa limbelo. Aku tepalie, i walimunga umbuni meko mindili noli uluma kape limbelo. Altopa wai yando ombalomunga imbo akumu yu koinjo molopa kau puli ulumu limbelo.

<sup>31</sup> Nalo imbo awini kinye kumbe ltemelema akilio lenge. Kinye akilio ltemelema kumbe lenge.”

#### *Jisas yu kolombo nimbe altopala nimu*

<sup>32</sup> Jerusalem kombu olando pungei pungei wali, yunge kitipi kanoli iyema Jisas yunge umbulu umbulu akilio leko ongolio wali eno mini lteringi. Kano wali, we imbo akilio akilio lombileringi imbomani pipili kolkolio oringi. Aku wali, Jisasini yunge kitipi kanoli iyema aulke kulendo meli pumbelie yu kinye wendo ombalo unguma altopala nimbetipeli

<sup>33</sup> nimbei, “Eno pileio. Kinye lino Jerusalem kombu pumili purumolo, akuna lemo Iyemunga Malo Gote popo tondoli iye awilima kinye mane ungu imbo iyemanga kindo tinge. Aku wali, aku iyemana yu kot tendekolio kinye kolopili ninge aku tekolio imbo tawendomanga kindo tinge.

<sup>34</sup> Aku imbomani yu ungu taka tondoko, olkambe toko kandoko mapu tokolio toko kondonge nalo wali yupoko tipemunga yu makilipelie koinjo molombalo,” nimu.

#### *Jems kinye Jon taloni Jisasindo elonga ulu te tendewi ningili*

<sup>35</sup> Kano wali, Sebedinga malo Jems kinye Jon talo Jisas yu molorumuna ongolio kumbe lepo molambili konopu lepolio

Jisasindo ningilindo, “Ungu imbo iyemu, iltonga ulu te walipo pilimbolo tendani konopu lepolio orombolo,” ningili.

<sup>36</sup> Jisasini walipe pilipelie nimbei, “Nani elonga ulu ambelemu tendamboi ningolio nimbeleya?” nimu.

<sup>37</sup> Eloni topondoko ningili, “Nu paa au ningo kondoko polo wengendelina nunge engemani kombu nokoko molonio wali, ilte nunge imbo kindo mondoko te nunge koya kindo mondani,” ningili.

<sup>38</sup> I teko ningili wali, Jisasini iye kano talondo nimbei, “Elonga walikor piltimbele ungumu elo naa liko manjikolio nimbele. Na no mingi kombili telimu paa nomboi teromu, elo manda nongeleya? Imbomani na umbuni liko tingemu manda membo nalo elo aku ulu tengenalo wali paa manda mengeleya?” nimu.

<sup>39</sup> Aku tepa nimu wali, kano iye taloni ungu pundu i teko toringili, “Aku nino uluma manda tembolo,” ningili.

Aku wali, Jisasini iye kano talondo nimbei, “Paa nimbele! Na no mingi kombili telmu nomboi teromu eloni paa nongeleya. Imbomani na umbuni liko tingemu manda membo akumu elo kape umbuni aku teko liko tingemu manda mengeleya.

<sup>40</sup> Nalo nani nanga imbo kindo kape koya kindo kape molangili manda naa nio. Aku kombu talo Goteni yunge tumbi tipe noindrimo imbomanga timbelo,” nimu.

<sup>41</sup> Aku ningili ungumu Jisas yunge we kitipi kanoli iye 10 kano pokoni pilkolio wali, Jems Jon talo kinye mumindili koloringi.

<sup>42</sup> Aku wali, Jisasini yu molorumuna waio nimbelie nimbei, “Imbo tawendomanga kombu meli iye awilimani enonga olo kele tokolio we imbo keri pengama kambulko embambo tiko eno windina pala moromele. Aku iyemanga maindo iye pinyewe moromelemani kape enonga olo kele tokolio imbo keri pengama liko maindo mundukolio eno winjiko moromele. Aku teremele uluma enoni liko manjirimele.

<sup>43</sup> Aku ulu paa manda naa teaio. Nalo imbo narire enonga imunana yu awili molambo konopu lembalo, da imbomu yu enonga kongono kendemande iyemu molopili.

<sup>44</sup> Aku mele enonga imunana imbo te kiyendo molombo konopu lembalolu lemo, yu enonga palinga kongono kendemande iyemu molopili.

<sup>45</sup> Liko manjeo! Paimbo, Iyemunga Malo maina mainye ombalie wali imbo manjeo, yu enonga palinga kongono tendangei nimbe naa orumu nalo imboma tapopa kongono tendepe imbo awini tukundo limbei kolo wan-gopo kolombo nimbe orumu,” nimu.

*Jisasini Bartimeus nimbe mongo lili iye  
tenga mongo makintirimu*

<sup>46</sup> Jisas kinye yunge kitipi kanoli iyema Jeriko ningko kombu tenga wendo oringi. Altoko Jisas kinye yunge kitipi kanoli iyema kinye we imbo pulumu peyaaku kombumuti tie kolko anjikundo pungei purungi wali, melema tieio nimbe ki olo lepa teremo iye mongo lili te awili aulke kulendona molorumu. Aku iyemunga imbi Bartimeus, yu Timeus nimbe iye tenga malo.

<sup>47</sup> Jisas Nasaret kombu iyemu omaba pumbe nimuna pilerimu. Aku wali, iye kanomuni pulu mondopa alako topa nimbei, "Jisas nu Devitinga kolepa, na kondo kolowi," nimu.

<sup>48</sup> Aku tepa nimu wali, imbo pulumuni yu pai ningko likolio, yu taka liko molowi ningi. Nalo aku teko ngingi kape alako paa lakopa topalie nimbei, "Nu Devitinga kolepa, na kondo kolowi," nimu.

<sup>49</sup> Pilipelie Jisas angilipe nimbei, "Andi mongo lili iyemu opili neio!" nimu.

Aku wali, iye mongo lili kanomuni alako tokolio ningei, "Nu konopu toimbo topili kani, nu tono kolko makilkono owi nimu kani ongo puwil" ningi.

<sup>50</sup> Iye mongo lili kanomuni yunge komoku palu mele maminye pakorumumu darenga kulendo kulupe anjo mundupe yu kano walitikale puke topa ola angilipe Jisas yu angilerimuna orumu.

<sup>51</sup> Kano wali, Jisasini yu walipe pilipelie nimbei, "Nani nunge paa ambele ulumu tendamboi ningko ninoya?" nimu.

Iye mongo lili kanomuni nimbei, "Ungu imbo iyemu, na mongomuni melema kanopo imbi tiemboi konopu lteo," nimu.

<sup>52</sup> Jisasini nimbei, "Puwi. Nunge ipukimuni nu tepe koijno ltimo," nimu. Walitikale kau iye kanomuni melema kanopa imbi tirimu. Aku tepalie, Jisas purumu aulkena lombili akilio lerimu.

## 11

*Jisas king mele Jerusalem kombu tuku  
purumu*

<sup>1</sup> Jisas kinye yunge kitipi kanoli iyema Jerusalem kombu nondoko onge wali Oliv nimbe mulu kembo nondopa ltemo Betfage kinye Betani kombu talonga wendo oringi. Akuna Jisasini yunge kitipi kanoli iye talo yunge kumbe lepa palio nimbeline tipe mundupelie

<sup>2</sup> nimbei, "Neya ulke kombu kandombelena pungo nendo lekolio kongi donki kokele imboni kape oi naa molopa andoli te ka teli pembalona kanongele. Aku kongimu ka poikoliope na angio ina altoko yando meko walio.

<sup>3</sup> Nalo imbo teni elo da ulu ambe telka teremebeleya nimo lemo, aku imbo-mundo ningili 'Iltonga Iye Awilimuni yu donkimuni mepili nimbe altopa walitikale da tipe yando mundumbelo,'nelio," nimu.

<sup>4</sup> Nimu kano mele kitipi kanoli iye kano taloni pungolo kongi donki kokele te aulkelkulendo ulke kerepurengka ka tepe perimuna kanoringili. Kano iye taloni kongi donki kanomu ka poiko angileringili kinye

<sup>5</sup> imbo mare akuna angileringimani wali-liko pilkolio ningei, "Andi kongimu ka poirimbele, aku ambe telka teremebeleya?" ningi.

<sup>6</sup> Kano teko ngingi wali iye kano taloni Jisasini nimu kano mele aku teko ungu pundi toringili. Aku wali iye kanomani iye talo pangili tie koloringi.

<sup>7</sup> Iye kano taloni kongi donkimu Jisas angilerimuna meko ongolio elonga ola wale pakolima kongi donkimunga umbuluna kulko pala noindiringili. Aku wali Jisas ola pumbe molorumu.

<sup>8</sup> Neya aku wali, Jisas yu kongi donkinia molopa opili ningolio imbo pulumuni enonga ola wale pakolima aulkena mainye kumbe leko pawembo toliko purungi. Nalo aku wali, mareni kulekule poinye lerimanga unjo koma langoko likolio gomo pukuko aulkena kumbe leko pawembo toliko purungi.

<sup>9</sup> Aku teringi wali imbo kumbe leko pururingima kinye imbo akilio leko lombileringimani tono kolko alako toko ningei, "Gotenga imbi kapi neio!

Goteni iye awilimunga imbina oromo iyemu  
nokopa kondopili!

<sup>10</sup> Linonga kae Devitinga kalopa ltimu iye nomi king  
kombu nokombalo iyemu, Goteni yu nokopa kondopili!  
Linoni Gote kapi nemili," ningi.

<sup>11</sup> Jisas kano Jerusalem kombu tuku pumbelie Gotenga Ulke Tempelena purumu. Akuna tuku pumbelie tuku lerimu melema pali tiyomaye lipe kanorumu. Nalo kombu ipo lembai terimu wali yunge kitipi kanoli iye 12 kano poko kinye Betani kombundo altoko purungi.

*Jisasini unjo mongo naa torumumu  
kolopili nimu*

<sup>12</sup> Otilikondo Betani kombu tiye kolko purungi wali Jisas engele kolorumu.

<sup>13</sup> Aku wali, tule tepe weltenga fik nimbe unjo te mongo topalie gomo meremo mele akun tepe gomo mepa angilerimuna kanorumu. Jisas kano unjo mongo te peremonje nimbe lipe nombai purumu. Nalo unjo puluna omaba kanorumu wali, unjomu yu gomo kau mepa angilerimuna lemo. Ambe

telka unjo mongo toromo waimu neya aku wali molo.

<sup>14</sup> Kano wali Jisasini unjomundo nimbei, "Nunge mongo toniomu imbo teni altoko paa naa nopili," nimu. Aku tepea nimu ungumunga yunge kitipi kanoli iyemani pileringi.

*Jisasini Gotenga ulke tempelena melema tarepo torangi imboma makoropa tawendo mundurumu*

<sup>15</sup> Jisas kinye yunge kitipi kanoli iye kanoma Jerusalem kombu wendo oringi wali Jisasini Gotenga tempel ulke papena tuku pumbelie kinye melema tarepo toko topo toko moloringi imboma pali topa makoropa pena pena mundurumu. Aku tepalie yuni kou alowamalowa teringi imbomanga poloma kinye kera imili maket teringi poloma lipe topele tondorumu.

<sup>16</sup> Aku tepalie imbo tukundo tawendo teringimani Gotenga ulke tempelena melte meko welkondo yalkondo teangei ungu naa nimu.

<sup>17</sup> Aku wali yuni imbomando mane tipelie nimbei, "Gotenga oi ungumunga i tepea nimbe peremo. Goteni nimbei,

Nangaulkemu imbi tikolio lemo kombu palinga imbomanga konge teremele ulkemu ningi, *(Ais 56:7)*

nimo nalo enoni wapu iyemanga kou anga mele apupe tirimele," nimu.

<sup>18</sup> Aku tepea nimu ungumu Gote popo tondoli iye awilima kinye mane pimele ungu imbo iyemani pilkolio Jisas yu toko kondongei aulke mare kororingi. Nalo imbo pali nombeya teko angilerimani yunge mane tirimu ungumu pilkolio ereye ningo tono koloringina kanokolio yu pipili koloringi.

<sup>19</sup> Altropa ipo lerimu wali Jisas kinye yunge kitipi kanoli iye kanoma Jerusalem kombu tiye kolko eno wendo purungi.

*Unjo te pulu pulkonomanga peya kolopa ltimu lemo*

<sup>20</sup> Otilikondo aulkena pungo molko kanoringi kinye fik nimbe kano unjomu mundo maindo maindo kololipe pumo.

<sup>21</sup> Kano wali Pitani aku terimu ulumu lipe manjipelie Jisasindo nimbei, "Ungu imbo iyemu, kanow! Nuni monda nopili ninio kano unjomu gomo oo lepa kolomo ltemo," nimu.

<sup>22</sup> Jisasini topondopa nimbei, "Eno Gote ipuki tieio.

<sup>23</sup> Nani enondo ungu tukumemu nio. Imbo narireni i mulumundo nimbei, nu makilko la tikolio nunu nomu kutana toko tuku munduwu nimbeline kinye yu konopu talo naa lembalo nalo yunge nimbelo ungumunga ipuki kau timo lemo,aku Goteni yunge nimbelo ulumu paa tendembalo.

<sup>24</sup> Akumunga nani enondo nio, mele ambele te konge ningi waliko pilingei wali, ipuki tikolio melemu oi lindu konopu leao,aku tengen lemo, ambele mele te waliko pilinge aku melemu Goteni timbelo.

<sup>25</sup> Akumunga eno konge ningi ola angilingei wali, imbo te kinye konopu te ambolongei lemo,aku ulumu tiye kondao. Aku tengen wali enonga muluna moromo Lanieni enonga ulu alowa tengema tiye kondombalo.

<sup>26</sup> Nalo enoni imbo wemanga ulu allowama tiye naa kondonge lemo,aku enonga muluna moromo Lanieni enonga tengen ulu allowama kape tiye naa kondombalo," nimu.

*Jisas nu narini enge damu tirimuna terenoya ningi*

<sup>27</sup> Jisas kinye yunge kitipi kanoli kano iyema Jerusalem kombu altokola yando oringi. Aku wali Jisasini Gotenga Tempel ulke papena tuku pumbe andorumu wali Gote popo tondoli iye awilima kinye, mane ungu pimele ungu imbo iyema kinye, we tapu iyemani Jisas angilerimuna oringi.

<sup>28</sup> Jisas waliko pilkolio ningi, "Nu enge temu ambolko da uluma terenoya? Nu imbo narini da uluma teami nimbe imbi mu tirimuya?" ningi.

<sup>29</sup> Jisasini topondopa nimbei, "Nani eno ungu tendekure kau walipo pilemboi. Aku ungumu pundu tonge lemo aku nani i ulu teromanga engemu tena ltionje aku enondo nimbo timbo.

<sup>30</sup> Jononi imbo no Ltindirimu ulumu Goteni tewi nimuna terimunje molo imbo iyemani tewi ningi ulumu terimuya? Aku ungumu na kondo ningo ningo tieo," nimu.

<sup>31</sup> Iye kanoma enonga nendo yando toropo toko ningi, "Goteni tewi nimuna terimu nimolo lemo,aku yuni eno ambe telka Jon ipuki naa tiringiya nimbelo.

<sup>32</sup> Nalo linoni imbo iyemani tewi ningina terimu nimolo lemo aku lino umbuni limolo lepamo," ningi. Ambe telka imbo palini Jon Imbo No Ltindili yu paimbo Gotenga nimbe mundulu ungu nili iyemu ningo liko manjirimele.

<sup>33</sup> Konopu talo lekolio wali Jisasindo ningi, "Lino naa lipo manjirimolo," ningi.

Aku teko ningi wali Jisasini ne kano iyemando nimbei, "Aku lemo nani kape na enge temu ambolopolio i uluma tero aku ungumu eno naa nimbo timbo," nimu.

## 12

*Juda iye pinyewe kanoma pilenge nimbe wain poinye ungu kongolino lipe ungu nimu*

<sup>1</sup> Aku ungu nimbeline wali Jisasini ungu kongolino te lipelie nimbei, "Iye teni wain poinye te panjirimu. Aku tepalie poinyemu

undukana pape tepe okorumu. Poinyena tuku wain nowi lembalo wali kambulko ingiriko wain nomu wendo liko wain teangei nimbe muru te akupe noirimu. Da tepalie wali wapu iyemani wain mongo ongo wapu inie tonge nimbeline poinye tapu ulke te takorumu. Kano uluma tepe pora tipe noipelie wali, wain poinye kanomu yu kinye moke liko peya tuku moloringi kano iyemanga kindo tipe nokoko molangei nimbe yu kombu ponenge purumu.

<sup>2</sup> Altopa wain nowi lepa inie toromele waimu wendo orumu wali, poinye pulu iyemuni yunge poinyemu tapu teko nokaio nimu iyema moloringina yunge moke limbelo mele wain mongo mare inya toko tiengei nimbe yunge kongono iye te lipe mundurumu.

<sup>3</sup> Nalo lipe mundurumu iyemu orumu wali poinye tapu teko nokoringi iyemani yu ambolko likolio koipeni pupu toko ulkendo we pupili ningi.

<sup>4</sup> Kano teringi wali poinye pulu iyemuni yunge kongono iye te lupe altopala aku iyema moloringina lipe mundurumu. Nalo kano iyemani kongono iye lipe mundurumu kanomu ambolko liko pinyewe imu tuku tiko paa keri teko toringi.

<sup>5</sup> Aku teringi kape poinye pulu iye kanomuni yunge kongono iye te lupe altopala lipe mundurumu, nalo kano iyemu ambolko liko toko kondoringi. Kelepa yunge kongono iye pulumuaku tepala lipe mundurumu. Aku terimu wali, kano iyemani lipe mundurumu iyemanga mare koipeni paa kenjiko toringi, wema toko kondoringi.

<sup>6</sup> Peyalimekondo iye tendekumu kau lipe mundumbelo mele molorumu. Aku iyemu lemo yunge marenu tendekumu. Yuni konopu paa lakopa mondorumu. Marenu peyalimekondo lipe mundupelie nimbei, 'Nanga malo oromo ningolio yunge nimbelo ungumu pilko tengen tiko marenu ulte naa tengen,' nimu.

<sup>7</sup> Nalo yu kinye moke liko poinye nokoko moloringi iyemani yunge marenu orumuna kanokolio wali enonganano nendo yando ningi, 'I poinye pulu iyemunga malo akilio poinye maima limbelo iyemu oromo kani yu topo kondamili waio. Aku tepolio yunge poinye maimu pali lino liemili,' ningi.

<sup>8</sup> Aku teko langi ningolio, poinye pulu iyemunga marenu ambolko liko toko kondokolio wain poinyena toko wendo munduringi.

<sup>9</sup> Aku ulu teringimunga poinye pulu iyemuni ambe tembaloya? Ombo poinye tapu teko moromele iyema pali topa kondopalie poinyemu iye we marenga kindo timbelo.

<sup>10</sup> Akumunga Gotenga oi topa panjirimu ungu karolomu eno kambu toko naa pimeleya? Aku ungumu i tepe, Ulke takoringi iyemani kanoko keri pilko toko lteringi kou akumu kelepa ulke timu mele ulke enge tindili kou awili pengamu itemo,

<sup>11</sup> Awilimuniaku ulumu terimu linoni kanopo paa penga karomolo," (Sng 118:22,23)

nimu.

<sup>12</sup> Jisasini iye pinyewema kongolino lipelie nimu ungu liko manjikolio wali enoni yu ambolko liko kot tendengei aulkere kororingi. Nalo imbo pulumu angileringina kanokolio pipili kolkolio Jisas yu tiye kolko eno purungi.

*Jisas manda manjingei ungu te waltindiringi*

<sup>13</sup> Altopa walite Farisi ningi manga pupumunga kinye King Herotenga talapena iyemareni Jisas yuni ungu alowa tepe nimbolomanga yu ambolko liengei ningolio Juda imbomanga iye pinyewemani Jisas molorumuna liko munduringi.

<sup>14</sup> Kano iyema Jisas angilerimuna ongolio ningi, "Ungu imbo iyemu, linoni lipo manjirimolo, nu iye tumbi nilimu. Nuni imbomanga i teko tewi nimele unguma ipuki tiko naa tono kondokolio Gotenga ungu paimboma kau nino. Walite kolo naa torono. Aku tekolio nuni imbo koropa noli kamakoma ningi kambu naa torono. Nalo nuni Gotenga ungu paimbomu imbo iyema kinye pimo mele tumbi tiko ningotirino. Imunga linonga mane ungumuni Rom kombu nokoli iyemunga kou takis toko tieio nimone naa nimoya? Molo linoni aku gavmanemunga kou takis tamilinje naa tamiliya? Aku ungumu lino tumbi tiko ningotiri," ningi.

<sup>15</sup> Nalo Jisasini yu kili tiringi ungumu lipe manjipelie iye kanomando ungu te nimbei, "Enoni na ambe telka melu leko poingei teremeleya? Na kanamboi kani kou mongo te meko waio," nimu.

<sup>16</sup> Yu molorumuna kou mongo te meko oringi. Kano kou mongomu lipe kanopalie kinye iye kanomando walipe pilipelie nimbei, "I kou mongomunga tuku imbi naringamu kinye kumbekere naringamu moromoya?" nimu.

Enoni topondoko ningi, "Aku Sisaranga itemo," ningi.

<sup>17</sup> Aku teko ningi wali Jisasini nimbei, "Aku lemope, Rom kombu nokoli iyemunga melemele lemo aku yunge tieio. Gotenga melemele lemo Gote yunge tieio," nimu.

Yunge nimu ungu pilkolio wali iye kanoma mini lteringi.

*Imbo kololima makilinge wali ambo iye ningi naa liko manjingi*

<sup>18</sup> Kano wali imbo kololima altoko naa makilinge nimele Sadyusi ningomanga pupu imbo mareni Jisas angilerimuna ongo ungu walipe pileli temeko ongolio Jisasindo ningei,

<sup>19</sup> "Ungu imbo iyemu, Mosesini mane ungu te linonga i tepa tondorumu. Iye te kolombalo wali yunge omenu ambomu we molombalo nalo ambomu wangono pemo lemo, aku iye kolombalomunga angenumuni ambo waimu yu lipili nimu. Aku tepalie oi iye kololimunga bakulumu mendepili.

<sup>20</sup> Piliwi. Walite iye angenupili kite yupoko pakera moloringi. Iye komomu ambo lipelie bakulu naa meli yu kolorumu.

<sup>21</sup> Kano terimu wali angenu iye tukunamuni ambo wai kanomu yu ltimu. Nalo kano iyemuni kape bakulu te naa meli yu kolorumu. Aku wali kano tendeku ulumu angenu iye yupoko tipemuniaku terimu nalo kano tekobakulu te naa meli yu kolorumu.

<sup>22</sup> Aku kinye we kano angenupili mendepa mendepa kanomanipwaye aku teringi. Akumunga iye angenupili kite yupoko pakera ambo tendekumu liko oringi. Aku tekolio, peyamanibakulu naa meli eno koloringi. Peyalimekondo ambomu yu kape kolorumula.

<sup>23</sup> Akumunga, kinye iye angenupili kite yupoko pakera peyani ambo tendekumu liko oringi. Nalo altoko imbo kololima makilinge wai akumunga ne aku ambomu iye temunga paa omenu molombaloya?" ningi.

<sup>24</sup> Aku tekoni wali, Jisasini ungu pundu topalie nimbei, "Eno Gotenga ungumunga kinye yuni imbo kololima alto pa makinjimbelo engemu talo naa liko manjirimelemunga paa alowa awilimu teremele!

<sup>25</sup> Imbo kololima makilinge akitwali iye pungo ambo liko akitulu naa tengenalo muluna ensel melema molko punge.

<sup>26</sup> Imbo kololima makilinge ulumundo ungu te nemboi. Mosesini torumu bukuna Gote yutipenamolopalie Moses yu alako torumu temane karolomu eno kambutoko naa pimeleya? Goteni Mosesindo nimbei, Na lemo Abraham, Aisak, Jekop pokonokopo moro Gote, *(Kis 3:6)* nimu.

<sup>27</sup> Akumunga Gote yulemo imbo kolkolio makilingemanga nokoli Gote, nalo kolko pora tilimanga gotere, molo. Akumunga enoni paa alowa awilimu teremele!" nimu.

*Jisasini ulu mulimuli kiyendo teaio nimu*

<sup>28</sup> I teko toropo toko ningi ungumunga Mosesini torumu mane ungumunga ungu

imbo iye te akuna molopa pilerimu. Jisasini ne kano Sadyusi nimbe manga pupumunga ungu waliko pileringimu pundu topa kondorumuna pilipelie aku iyemuni Jisasindo ungu te walipe pilipelie nimbei, "Goteni teaio nimbe mane ungu tirimu ungumanga ambolopa mandopa ungu temu paa kiyendo mulimuli angimoya?" nimu.

<sup>29</sup> Jisasini topondopa nimbei, "Mosesini teaio nimbe torumu ungumanga palinga lipe ongondopa ungu kiyendo mulimuli angimomu i tepa itemo,

Israel imboma pileio. Linonga iye awili Gote yu kau iye awili akyu yu teneckumu kau moromo.

<sup>30</sup> Nunge konopumuni kinye minimuni kinye kangimunga enge peremomuni kinye kanomani pali enonga Awili Gote kau enge ningi konopu mondowi!

<sup>31</sup> Unugu talo tipemu i tepa, Nunge nunu konopu mondorono mele imbo wema akyu teko konopu mondowi. *(Lo 6:4-5; WKP 19:18)* Imunga we Goteni teaio nimu ungumunga i ungu talonga maindo oromo," nimu.

<sup>32</sup> Aku tepa nimu wali, iye kanomuni nimbei, "Ungu imbo iye, paa ningi kondoromo. Iye awilimu yu kau Gote, we gote te naa moromo nalo yu kau Gote tendeku moromo nino akyu paa nino.

<sup>33</sup> Konopumuni kinye minimuni kinye kangimunga enge peremomuni kinye lipe manjilimu kinye kanomani pali enonga Awili Gote kau enge ningi konopu mondowi ungu ningolio talo tipemu ninindo nunuge nunu konopu mondorono mele imbo wema akyu teko konopu mondowi ungu nino akyu ulu talo lemo paa mulimuli. Kongima kinye melema popotopokalopa Gotendo tiro nimolo ulu akuma mandopa," nimu.

<sup>34</sup> Iyemuni lipe manjipelie nimbe kondoromu nimbe konopu lepalie Jisasini nimbei, "Goteni nu nokopili ungu nini tekolio yunge iyemu molambo konopu lteno lepamo," nimu.

Jisasini ungumunga pali nimbe kondoromunga imbo teni pipili kolko ungu te walipo pilemili konopu naa leringi.

*Gotenga imboma tepa lipili nimbe tipe mundurumu iyemu naringa maloya ningi*

<sup>35</sup> Jisas Gotenga tempel ulkena imboma ungu imbo tondopa angilipelie wali walipe pilipelie nimbei, "Mosesini torumu mane ungumunga ungu imbo iyemani Kraist nimbe akyu iyemu Devitinga lapuna wendo ombalo ningi, nalo ambe tepalie akyu ulumu wendo ombaloya?

## 13

*Jisasini Gotenga ulke tempelemu talaye  
tinge nimu*

<sup>1</sup> Jisas Gotenga ulke tempelemu tiye kolopa purumu wali yunge kitipi kanoli iye teni yundo nimbei, "Ungu imbo iyemu, kou pengama kinye tempel ulke awi kangomu kandonoya?" nimu.

<sup>2</sup> Jisasini topondopa nimbei, "Nuni ulke tempel awili i kangomu kandonoya? I kandono koumanga tendekure alaye neya tepe apu topa naa lembalo. Palima talaye tiko mainye mundunge," nimu.

*Jisasini eno wamongo mongo lepili kane  
kane angileio nimu*

<sup>3</sup> Jisas kano Gotenga ulke tempelemunga nekondo Oliv nimbe mulu kembo tenga pumbe molorumu wali Pita, Jems, Jon, Andru poko Jisas yu molorumuna enongano pungo molkolio ungu te mainye munduko waliko pilkolio ningei,

<sup>4</sup> "Neya aku nino uluma te wali wendo ombaloya? Te ulumanai aku waimu kinye nondopa wendo oromo nimbe lino kuliene lipe ondombaloya?" ningi.

<sup>5</sup> Aku teko ningi wali, Jisasini iye kano pokondo nimbei, "Eno imbo teni kolo topa timbelo kani mongo lepili wamongo kane kane angileio.

<sup>6</sup> Imbo pulumuni nanga imbi liko anekale teko ongolio ningei, 'na Kraist oro', ningolio kinye imbo pulumu kolo toko tinge.

<sup>7</sup> Imunga eno molonge malio nondoko opa tengena loi le unguma pilinge. Kelko kombu anjikondo marenga opa teremele ningi ungu temanema tonge aku unguma pilkolio pipili naa kolaio. Paimbo, aku tepe uluma paa wendo ombalo, nalo peyalime waimu welea wendo naa ombalo.

<sup>8</sup> Kombu awinini nendo yando angilklo alowa teko opa tengen. Kombu marenega parambala tepe engele awini lembalo, nalo aku uluma lemo wai kerimu kokele ombaimunga oi kumbe lepa mindili noli ulumu pulu mondombalo.

<sup>9</sup> Eno lemo paa wamongo kane kane angileio. Imbomanai eno ambolko liko kotena meko punge. Aku tekolio eno nombeyai ulke malio meli tuku pungolio koipeni pupu tonge. Aku wali imbomanai nanga imbimunga kau nindikolio eno kombu nokoromele iyemanga kinye king iye awilimanga kumbekerena kot pilengei ningi meli pungo anjinga kinye enoni nanga ungu tukumemu imboma ningi tingi.

<sup>10</sup> Pileio! Oi Gotenga ungu tukumemu kombu palinga ambolko mandoko paa ningi tiengen. Aku tengen wali, pele peyalime waimu wendo ombalo.

<sup>36</sup> Oi Gotenga Mini Kake Telimuni Devitinga konopundo molopalie tope tirimu wali, Devit yuni nimbei, Iye kamakomuni nanga Iye Awilimundo nimbei, nu nanga imbo kindo ongo molowi, aku tenio wali nunge opa pule iyema nunge kimbo puluna maindo mondombo, (Sng 110:1)

nimu.

<sup>37</sup> Devit yuni Kraist imbi tipe yu iye awili nimu akumunga altopa ambe tepalie Kraist Devitinga lapuna wendo ombaloya?" nimu.

Aku tepe nimu ungumu imbo paa pulumuni pilko tono koloringi.

*Jisasini mane ungumunga ungu imbo iyemani teringi uluma kanopalie naa lombieo nimu*

<sup>38</sup> Aku ungu mane tipelie wali, Jisasini imbonamdo nimbei, "Mane ungumunga ungu imbo iyema kinye kane kane molao. Aku iyema enonga wale pakoli tule pengama pakoko mere mundukolio kinye maket kombu malio imbomanai eno panjiko lengenai aku tepe andamili konopu ltemele.

<sup>39</sup> Nombeya teko ulkena pungo eno polo kiyendo pengamanga molamili konopu ltemele. Langi awili kalaromele wali lino imbi mololi kumbena molamili konopu ltemele.

<sup>40</sup> Aku iyemani ambo waima taporomolo ningolio kolo toko tiko enonga pojnye ulke melema eno wapu noromele. Aku tekolio, ekondo kulendo eno iye penga mare none teko konge tule teko ningi purumele. Nalo aku teremele ulumanga mindili paa awilimunonge," nimu.

*Ambo waimuni Gotendo paa tereno  
nimbe kou mundurumu*

<sup>41</sup> Jisasini Gotenga tempel ulkena imbonmani paa tereno kou tiko ongo mundupula teringi ulu kanopa, yu kou ketemu lerimu kulendona molorumu. Aku wali, imbo kamako awinini kou pulumu ongo mundupula teringi.

<sup>42</sup> Nalo aku teringi wali, ambo wai koropa noli teni ombalie kou walo kololi talo koltalo waye ombo mundurumu.

<sup>43</sup> Jisasini i terimu ulu kanopalie wali yunge kitipi kanoli iyemando waio nimbe lie nimbei, "Nani enondo paimbo nio. I ambo wai koropa nolimuni we imbomanga kou ongo mundurumelema pali lipe ongondopa yuni paa olandopa ketena ombo mundurumo.

<sup>44</sup> We imbo palimani enonga noikolio melemanga arikilima ongo tirimele, nalo i ambo paa koropa pupilimuni altopa molopa pembalo ulumunga noimo koumu pali ombo timo," nimu.

<sup>11</sup> Eno ambolko liko kotena meko punge wali, eno ambele ungu nimolonje ningokonopu umbuni naa leao. Aku wali eno ungu ninge waimu wendo ombalo wali enonga ungu mare naa ninge, nalo Mini Kake Telimu kinye lepalie wendo ombalomuni ungu aku da konopuna neio nimbelo ungu mare neio.

<sup>12</sup> Aku waimunga iyemani enonga angenupili yokoli tendekuma opa pule iye-manga kindo tiko toko kondangei ninge. Aku kinye lapalini enonga bakuluma aku ulu tengen. Bakulumania enonga anupili lapali kinye opa pule tonge. Aku tekolio wali, enonga anupili lapali toko kondangei ninge iye marengia kindo tinge.

<sup>13</sup> Eno nanga imboma molongemunga imbo palini eno tamili konopu leko mu-mindili kolonge. Nalo imbo narireni enge nimbe angilipe peyalime waimunga wendo pumbelo, da imbonu Goteni tukundo lipe teba limbelo."

#### *Wai paa kerimu wendo ombalo*

<sup>14</sup> "Imboma teba tombai mele paa pipili teli keri kangore ombalomu Gotenga ulke tempelena tuku naa angilipili konopu lengen kanona omaba angilimbelo kinye enoni kanonge. Aku tembalu wali nanga imbo mare Judia kombu tuku molonge akuma lemo kowa lkiko lama mulu kembomanga pala pangei. (I ungumunga pulumu, nu kambu toko pilko imboreni wamongo liko manjiwi.)

<sup>15</sup> Aku wali, ulke tulepene ola angilimbelo imbonu kelepa ulke tukundo pumbe walkumo naa mepili.

<sup>16</sup> Kelepa imbo te poinyena angilimbeleni altopa anjo pumbe yunge wale pakolimu naa lipili.

<sup>17</sup> Apa! Ambo bakulu keri teko molongemina kinye bakulu ame tiko molonge ambomanga neya aku wai paa kerimu wendo ombalowa!

<sup>18</sup> Aku tembalomunga Gotendo kongeingolio neya aku waimu lemo lo kombu kinye naa wendo opili neiowa!

<sup>19</sup> Paimbo aku teba ulumu oi Goteni mulu mai talo pulu polopa terimu aku waina winjo aku teba ulte kape naa wendo orumu. Kinye kape aku teba ulumu naa wendo oromo. Altopa kape aku teba ulumu wendo naa ombalo nalo neya aku waina wendo ombalo ulumu paa kerimuwa!

<sup>20</sup> Nalo Gote Iye Awilimuni aku waimu teba ponjimbelo. Yuniaku ulu naa telkanje, aku imbo te naa molko pali beambo nilimala. Nalo kelepa yuni yunge imbi topo ltiu imboma nimbelie kinye aku waimu teba ponjindimbelo.

<sup>21</sup> Neya aku wali imbo teni enondo nimbei, 'Kanaio! I Kraist oromo molo neya

Kraist,' nimo lemo, aku nimbelo ungumu ipuki naa tieio.

<sup>22</sup> Pileio! Kolo toko Gotenga imbo nokopa kondorumu iye Kraist lipe mundurumu iyema kinye kolo toko Gotenga ungu nimbe munduli nili iyema wendo ongolio Gotenga imbi topa lili imboma kolo toko tiko be-mbo tingei ulu wengendeli mare awini tengen. Aku uluma tekolio Gotenga imbi toli imboma konopu teko bembo tingei nalo manda naa tengen.

<sup>23</sup> Imunga aku waimu wendo ombalo uluma nani eno unguma pali oi nimbo tindu kano, akumunga eno lemo wamongo kane kane angileio."

#### *Iyemunga malo yando ombalo*

<sup>24</sup> "Nalo neya aku wai kerina, aku mindili nonge nio uluma wendo ombalo kinye pele, Enamu tumbulu tombalo kinye olimu pa naa tembalu.

<sup>25</sup> Muluna kombu kandiyema oo leko mainye onge. Muluna pala litemo melemanga engemu Goteni am-bolopa parambala tendembalo. (*Ais 13:10, 34:4*)

<sup>26</sup> Neya aku wali, Iyemunga Malo ku-pena enge paa awilimu kinye au tiperipere nimbo molopolie yando ombo.

<sup>27</sup> Aku wali, yunge enselema mai kombuna mainye ambolopa mandopa Gotenga imbi toli imbo molongema lipo nombeya teangei lipe mundumbelo. Aku liko nombeya tengen imbo korongeimu lemo mai pundi ekondo koroliko pungo mai pundi ekondo ulu lengen."

#### *Jisasini peyalime waimu wendo ombalo mele manda lepa fik nimbe unjo te ko ltimu*

<sup>28</sup> "Imunga unjo fikimuni tembalu ulumu kanoko moke ltendeko mane lieio. Unjo fikimu mu teba gomo anjimbelo kinye, kinye pane yalie tembalu waimu nondopa lepamo ningo liko manjirimene.

<sup>29</sup> Aku teba mele kala, enoni ulumu wendo ombalona kanokolio wali, aku enoni kinye waimu wendo ombai nondoromo kimbo puluna mainye omaba litemo lepamo ningo konopu lengen.

<sup>30</sup> Nani enondo ungu paimbomu nio. Neya aku uluma wendo ombalona kanonge imbo mare oi naa kolangei kau i uluma pali wendo ombalo.

<sup>31</sup> Akumunga mulu mai talo kape beambo ninge naa nanga ungumu lemo beambo naa nimbe enge nimbe lepa kau pumbelo."

#### *Jisasinyando ombalo waimu imbo teni naa lipe manjirimo*

<sup>32</sup> "Na yando ombo waimu lemo, muluna olando enselemani kape na Gotenga malo kape paa naa lipo manjirimolo. Nalo Gote Ara yunu kau aku waimu lipe manjirimono.

<sup>33</sup> Na altopo yando ombo wai akumu eno naa liko manjirimele. Akumunga eno lemo wamongo konopu toimbo topili enge ningko angilko kane molaio.

<sup>34</sup> Aku wai wendo ombalomu lemo i tepe mele: iye te yunge ulke kombu tiye kolopa kombu ponenge purumu. Aku wali yunge kongono iyema yu mele mele kongono moke tepa tipelie yunge ulkemu nokoko tapu tendaio nimu. Pumbei terimu wali, ulke kerepuluna angilerimu iyemundo nimbei, ‘Ulke kerepuluna lemo wamongo nokoko tapu tewi,’ nimu.

<sup>35</sup> Ulke pulu iyemu altopa ulkendo yando ombalomu aku ipo kala toli ombalonje molo amburume tuku ombalonje, molo kombu tangombai telimuni kinye ombalonje molo ipo leli oi ena mundi kinye ombalonje akumu eno naa liko manjirimele akumunga eno kape paa wamongo kane kane molaio.

<sup>36</sup> Nalo yu kiyengo nimbe walitikale wendo omo lemoaku yuni eno paa uru peko molangei omba naa kanopa ltendepili.

<sup>37</sup> Akumunga nani enondo i nio ungumu lemo,aku imbo palindo nio. Eno lemo paa wamongo kane kane molaio,” nimu.

## 14

*Juda Iye Awiliman Jisas ambolko liko tongei wai momo toringi*

<sup>1</sup> Goteni Israel imboma oi Isip kombu wendo lipe enonga unggulu komoma tepe ltimuaku waimu wendo oromo wali liko manjingi langi awili talo karomele. Aku talo te imbi tiko, Pasova langi ningko, te Bret Yis Naa Munduli langimu nimbe. Aku talo oi wendo naa oli wali talo welepiliaku wali Gote popo tondoli iye awilima kinye mane ungu pimeleungu imbo iyemani Jisas lopeke teko ambolko liko toko kondongei wai panjemili ningolio ningei,

<sup>2</sup> “Tamil nalo imbonani kanonge lemo opa makininge kani langi kalomolo wali i nimulo ulumu naa teamili,” ningi.

*Amboreni kangi wel mune toli te Jisas inga pinyewena ondondoruru*

<sup>3</sup> Jisas Betani nimbe kombu tengatukundo Saimon nimbe iye tenga ulkena kere nomba molorumu. Saimon yu oi kuro kendi norumu, nalo kelepa Jisasini yu tepe koinjo ltimu. Aku ulkena molorumu wali ambo teni tumili kiye noromo mele aku tepe numunamu nili mingirenga wel kou olandopa puli mingina meli orumu. Aku mingimu kawee topalie wel mune toli kano Jisasinga pinyewena ondondoruru.

<sup>4</sup> Aku terimu ulu kanoko moloringi imbo marenimumindili kolkolio enonga nendo yando ningei, “Ambe telka i ambomuni wel mune tolimu tepa kenjirimoya?

<sup>5</sup> Neya tepe welemu yolo limalanje, poiney tengatukundo iye tengakongono tepe kou ltimu mele limala. Aku tepolio koumu lipo imbo koropa nolima tilimala,” ningolio ambo kanomu wayeni irini opopo toringi.

<sup>6</sup> Nalo aku teko ningi ungumu Jisasini pilipelite nimbei, “Ambe telka ambomu yu konopu umbuni liko tirimeleya? Aku teremele ulumu keleao! Ambomu yuni na kinye temo ulumu,aku ulu paa pengatumbi nilimu temo.

<sup>7</sup> Imunga imbo koropa nolima eno kinyewaliwalima molonge. Te walimanga tapomolo konopu lenge wali manda taponge. Nalo waliwalima enoni na kinye naa molonge.

<sup>8</sup> Ambomu yuni na altoko ono tengemunga oi tumbi tindipe nanga kangina wel ondondomo. I temo ulumu lemo ambomuni altoppa tembai ulumu oi temo.

<sup>9</sup> Nani enondo paimbo nio. Terenga tukundo ya i mai kombuna ambolko mandoko Gotenga ungu tukumemu ningotinge waliaku ya i ambomuni teremo ulumu kape ningotinge. Aku tengenye imbonani terimu lepamo ningo ambomu yu liko manjinge,” nimu.

*Judasini Jisas opa pule iyemanga kindo timbei nimu*

<sup>10</sup> Kano tepe nimu wali, kitipi kanoli iye 12 moloringi kanomanga iye te Gote popo tondoli iye awilima moloringina Jisasaku iyemanga kindo timboi nimbe purumu. Aku iyemunga imbi Judas yu Iskariot nimbe kombu iyemu.

<sup>11</sup> Pumbelie ungu nimbe tirimuna pilkoliowali, Gote popo tondoli iye awilimanitono lakoko kolkolio, Judas yu kou timoloning mi leringi. Aku teko ningi wali, Judas kano Jisas tewaliaku iyemanga kindo timbonje nimbe lape lepa lipe kondopalie molorumu.

*Goteni oi Juda imboma Isip kombu wendo lipe enonga unggulu komoma tepe ltimu waimu kanoko liko Jisasini yunge kitipi kanoli iyema kinye Pasova langimu kalopa norumu*

<sup>12</sup> Goteni eno Isip kombu wendo ltimuwaimu manda leko Bret Yis Naa Munduli langi karomeleaku waimu kiyendo ondopa angilerimu. Aku wali enonga oi teremele ulumu lepalie wali kiyendo akuna Pasovlangikalongei kongisipsip angilinomunga yokolimu ulke pulupena kandamili ningotoromele. Aku wali kitipi kanoli iyemani Jisas walikopilkolio ningei, “Linoni tenapumbo Pasova langimu nunge tumbi tindemili konopu ltenoya?” ningi.

<sup>13</sup> Jisasini iye talo palio nimbe lipe mundupelite i ulu tealio nimbei, “Eloaku

kombu sitina pungo iye te mingina no kolopa meli ombalie elo kinye kane kane tombalo. Aku iyemu lombili palio.

<sup>14</sup> Yu tuku pumbelo ulkena peya pungolio, ulke pulu iyemundo ningilindo, ‘Ungu imbo iyemuni nimbei, nanga kitipi kanoli iyema kinye Pasova langimu nombo molomolo kiripumu tenaya, nimo,’ nelio.

<sup>15</sup> Aku wali, ulkemunga olana kiripi awilite kulumie toko melema tumbi tiko oi noilimu elo lipe ondombalo. Akuna lemo eloni linonga Pasova langima tumbi tiko noielio,” nimu.

<sup>16</sup> Jisas kano angilipili tiye kolkolo kitipi kanoli iye talon kumbu sitina pungolio ulu palima Jisasini elondo nimu kano mele wendo orumuna kanoringili. Kelko nimu kano mele Pasova langi akuna tumbi tiringili.

<sup>17</sup> Altapa ipo kala torumu kinye, Jisasini yunge kitipi kanoli 12 kinye oringi.

<sup>18</sup> Kelko ulke tuku polona langi nongo molkolio wali Jisasini yunge kitipi kanoli iyemando nimbei, “Nani enondo paimbo nio. Eno i moromolomanga iye teni na opa pule iyemanga kindo timbelo. Aku tembalu iyemu na kinye kere langi waye nomba moltomo,” nimu.

<sup>19</sup> Nimu ungu pilkolio yunge kitipi kanoli iyemani kondol kolko enonga konopundo wango naa nipili Jisas molorumuna te te ningi pungolio waliko pilkolio ningei, “Nando ninonje,” ningi.

<sup>20</sup> Kano teko pungo nipula teringi wali, Jisasini topondopa nimbei, “Eno iye 12 teni aku ulu tembalu. Aku imbonu na kinye waye okolona tuku bret panjipo norombolo.

<sup>21</sup> Paimbo Iyemunga Malo Gotenga ungu-muni nimo mele aku tepo kolombo nalo opa pule iyemanga kindo timbelo aku iyemu mindili nomba paa molopa kenjimbewa! Aku iyemu paa mindili nombalomunga anumunu yu naa melkanje aku penga!” nimu.

*Pasova langimunga kongi sipsip toromele mele Jisasini yunge mindi meme tala moke tepea tirimu*

<sup>22</sup> Langi kano nongo moloringi wali, Jisasini bretemu lipelie Gotendo paa tereno nimbelie kinye, bret kanomu pike lepa yunge kitipi kanoli iyema tipelie nimbei, “Imu nanga kangimu eno liko naio,” nimu.

<sup>23</sup> Aku tepalie wain kapomu lipe Gotendo paa tereno nimbelie yunge kitipi kanoli iyemando tirimu kinye eno palini no wain norangi.

<sup>24</sup> Nongo moloringi wali Jisasini nimbei, “Imu lemo nanga mememu. Goteni yunge imboma kinye opa peamili nimbe mi lerimu kano ungu nanga mememuni enge

timbeindo imbo awininga nimbo ondon-doro.

<sup>25</sup> Akumunga nani enondo paimbo nio. No wainimu altopo paa naa nombo nalo pele Gote iye nomi king molopa nokoromo kombuna wain koinjomu nombo,” nimu.

<sup>26</sup> Altoko kere nongo pora tiko kunana te ningilio kinye Oliv nimbe mulu kembo tengga punge wendo purungi.

*Pitani Jisas naa karo nimbelo ungumu Jisasini oi nimbe tirimu*

<sup>27</sup> Aku wali Jisasini yunge kitipi kanoli iyemando nimbei, “Gotenga oi toko panjiringi ungumuni i tepe nimbe peremo, Goteni kongi sipsip tapu iyemu topa kombokalo, aku wali kongima lupe lupe talopamalopa lenge akumunga eno palini na tiye kolko kowa punge.

(Sek 13:7)

<sup>28</sup> Nalo altopo kolopolio makilimbo wali enonga kumbe lepo Galili kumbu oi pumbu,” nimu.

<sup>29</sup> Aku tepe nimu wali, Pitani topondopa nimbei, “Imbo palini aku tengen lemo kape nani nu paa manda tiye naa kolombo,” nimu.

<sup>30</sup> Kano tepe nimu wali, Jisasini Pitando nimbei, “Nani nundo paimbo nio. Ipu leli kera gula ko talo tipe oi naa toli wali, nuni naa lipo manjiro ningi wali yupoko tendenio,” nimu.

<sup>31</sup> Nalo aku tepe nimu kinye Pitani ungu paa enge nimbe topondopa nimbei, “Imbomanu na nu kinye peya toko kondonge lemo kape nani nundo aku tepo ungu naa nimbu,” nimu.

Aku wali, we kitipi kanoli iye palini kape tendeku ungu kau ningi.

*Jisasini Oliv nimbe mulu kembo wendo ombalie Getsemani poinyena konge nimu*

<sup>32</sup> Jisas kinye yunge kitipi kanoli iye kanoma Getsemani ningi poinye tenga wendo oringi. Aku wali Jisasini enondo nimbei, “Na pumbo konge nipembo kani eno ina molaio,” nimu.

<sup>33</sup> Aku tepe nimbelie Pita kinye Jems Jon poko yu kinye waye lipe meli purumu. Aku wali yu kinye ulte wendo ombalolu konopu umbuni lepalie konopuna mindili tepili molorumu.

<sup>34</sup> Kano terimu wali Jisasini yunge kitipi kanoli iye pokondo nimbei, “Nanga konopu umbuni paa awili te tepamo kani na kolto none teremo. Eno uru naa peko na kinye peya kopu tepo nokopo kondopo molamili, eno kane kane molaio,” nimu.

<sup>35</sup> Kano tepe nimbelie kinye Jisas kano alaye kolte anjipe pumbelie yuyunu maina topa mundupelie wali yu kinye wai keri akumu naa opili nimbelie konge nimbei,

<sup>36</sup> "Araya! Nanga araya! Ulu palima nuni manda tereno. Imunga i kombili teli no mingimu na kinye wendo liwi, nalo nani konopu lteo mele naa tewi. Nunge konopu lteo mele kau tewi," nimu.

<sup>37</sup> Aku tepa nimbeline yando ombo kanorumu kinye yunge kitipi kanoli iye kano poko uru peko moloringi. Kano wali Jisasini Pitando nimbei, "Saimon nu uru peko kau moronoya? Nu alaye kolte ena mongo tendekumunga kape kane kane molonio mele moyola?

<sup>38</sup> Manda manjili ulumuni eno tepa mainye naa mundupili ningko kane kane molkolio konge neio. Enonga konopumunepe aku ulu tumbi nili teambo konopu ltemo nalo enonga kangima tamba nimo," nimu.

<sup>39</sup> Aku tepa nimbeline kinye Jisas kano al-topala anjo pumbe kano tendeku ungumu nimbeline konge nimula.

<sup>40</sup> Kano konge nimbe molopalie yando ombo kanorumu kinye, yunge kitipi kanoli iyema uruni enonga mongoma mepa andorumu kinye uru peko moloringi lemo. Jisas orumu wali makilko molkolio eno niwi ungumu maa torumu.

<sup>41</sup> Jisas konge nipumbelie wali yupoko tepe yando ombalie kinye iye kano pokondo nimbei, "Eno mulu liko uru peko molongei kau moromeleya? Aku manda, kinye waimu oi wendo oromona kanaio. Kinye Iyemunga Malo imbo ulu pulu keri telimanga kindo tingei teremele

<sup>42</sup> kani lino pamili, ola angileio. Kanaio. Na opa pule iyemanga kindo timbei iyemu oromo," nimu.

### *Jisas ambolko ltingi*

<sup>43</sup> Jisas kano i ungu nimbe nendo lerimu wali kitipi kanoli iye 12 akumanga iye Judas orumu. Imbo pulumu yu akilio leko loi koipe meko oringi. Gote popo tondoli iye awilima kinye Mosesini torumu mane ungumunga ungu imbo iyema kinye tapu iyema kinye iye akumani aku imbo pulumu liko munduringi lemo.

<sup>44</sup> Aku wali, Jisas opa pule iyemanga kindo timbei iyemuni imbo pulumu yu kinye waye oringima Jisas manda kanangei nimbei, "Nani pumbo kangulupo nunu nimbo iyemu yu ambolko liko tapu teko meko paio," nimu.

<sup>45</sup> Kano tepa nimbeline Judasini Jisas angilerimuna toyapota pumbelie nimbei, "Nanga ungu imbo iyemu!" nimbeline kangulupo nunu nimu.

<sup>46</sup> Kano ulu terimu wali Jisas ambolko likolio ingi ningko amboloringi.

<sup>47</sup> Akuna angileringi iyemanga teni yunge loi gelea kakona panjirimumu wendo kulu topa lipelie Gote popo tondoli

iye awilimunga kongono kendemande iye tengah komumu topa laka ltendepa mainye mundurumu.

<sup>48</sup> Kano terimu kinye Jisasini yu ambolko ltingi kano iyemando nimbei, "Eno na lingei loi koipe melema meko ongepe, na wapu iyemu ningolio tengeya?

<sup>49</sup> Nape takiraki walimanga eno kinye Gotenga ulke tempelena ungu imbo tondopa moro kanomu. Aku wali eno na ambolko naa ltimele kanomu. Nalo Gotenga oi nimbe peremo ungumu paa ara nipili," nimu.

<sup>50</sup> Kano tepa nimu kinye, yunge kitipi kanoli iyema pali yu angilipili tiye kolko eno kowa talopamalopa leringi.

### *Iye kelo iye te kowa talopa lerimu*

<sup>51</sup> Aku wali kelo iye te maminye kake unana leli te kau pakopalie Jisas meli purungi mele akilio akilio lombili purumu. Kano wali aku imbomani yu ambolko lingei terengi,

<sup>52</sup> nalo wale pakoli kanomu taka topa amondopa kangimu mona mondoli yu kowa talopa lerimu.

### *Juda iye awilimani Jisas kote tenderingi*

<sup>53</sup> Kano wali Gote popo tondoli paa iye awili nokolimunga ulkena Jisas tapu toko meli tuku purungi. Aku wali we Gote popo tondoli iye awilima kinye mane ungumunga ungu imbo iyema kinye tapu iyema kape pali ulke akuna tuku ongo nombeya terengi.

<sup>54</sup> Jisas meko purungi wali Pitani tule tepe angilipe Jisas kano meli purungi mele akilio akilio lombilipe Gote popo tondoli iye paa awilimunga ulke papena tuku purumu. Akuna ele iye ulke tapu teko nokoko moloringima kinye mainye molopha tipe pilipe molorumu.

<sup>55</sup> Aku wali Gote popo tondoli iye awilima kinye Juda imbomanga kaunsil iye mulimulima pali tukundo nombeya teko molkolio Jisas toko kondongei ningi ungumanga pilko moke terengi nalo ungu pulu te naa perimu.

<sup>56</sup> Aku wali ulke tukundo iye awilimani Jisas kote tenderingi. Aku terengi wali, imbo tapondoli pulumuni ti tendeku ungu kolo awini Jisasinga tondoringi, nalo enonga ningi unguma tendeku naa terimu.

<sup>57</sup> Kano teko ningi wali iye mareni ola angilkolio Jisas ti tendeku ungu kolo te ningei,

<sup>58</sup> "Da iyemuni nimbei, 'Nani Gotenga ulke tempel imboni takoli imu talaye tipolio altopata wali yupoko ombo pumbelo wali imbomani naa takoli ulke tempel koinjo te takombo,' nimo ungu akumu linoni pilimolo," ningi.

<sup>59</sup> Nalo aku iyemani enonga ningi unguma kape paa tendeku naa terimu.

<sup>60</sup> Aku teko ningi wali Gote popo tondoli iye paa awilimu imbo palinga kumbekerenaola angilipelie Jisasindo walipe pilipelie nimbei, "Ungu te topondonoko naa ninoya? Nu teko kenjirino nimele ungumu ambele ulumundo nimeleya?" nimu.

<sup>61</sup> Nalo Jisas kano ungu naa nili takalipe angilerimu. Aku terimu kinye Gote popo tondoli iye paa awilimuni Jisas altopala walipe pilipelie nimbei, "Aku lemope nu Mesaia, linoni kapi nimolo Gotenga maloya?" nimu.

<sup>62</sup> Kano tepe nimu kinye Jisasini ungu pundutopa nimbei, "Aku paa nino. Walite eno palini na iyemunga malo Gote iye enge pelimunga imbo kindo muluna olando kupena molopo yando ombona kanonge," nimu.

<sup>63-64</sup> Kano tepe nimu ungumunga mu mindili kolopalie Gote popo tondoli iye awilimuni yunge wale pakoli tule pakorumu ambolopa ora topalie nimbei, "Ya iyemuni Gotenga imbi nimbe keri ltenderemo ungumu enoni i piltiemele. Kinye linoni ungu lipe tapondoli imbo te altopa naa limolo. Ambele konopu litemeleya?" nimu. Pilkolio imbo palini ningei, "Yuni ulu allowamu temomungayu kolopili," ningi.

<sup>65</sup> Aku teko ningi wali iye mareni Jisas yu olkambe tondoringi. Mareni yunge mongo talo ka toko pipi tindikolio wali ki kumo tukundo tukundo tekolio ningei, "Nu iye narini ki kumo toromonje aku imbonu Goteni nundo paa nimbe tirimo kani lino ningo tiwi!" ningi. Aku teringi wali ele iye opa tapu iyemani Jisas yu likolio kinyelaraauwe toringi.

*Pitani kolo topa Jisas yu na naa karo iyemu nimu*

<sup>66</sup> Pita kano Gote popo tondoli iye awilimunga pape tukundo penana molorumu. Aku wali Gote popo tondoli iye awilimunga kongono ambo wenepo te orumu.

<sup>67</sup> Kano ambomu ombalalie kanorumu kinye Pita tipe pilipe molorumu. Aku wali ambo kanomuni Pita wamba kanopalie nimbei, "Nu kapeaku Jisas Nasaret kombiyemu kinye molorunu lepamo," nimu.

<sup>68</sup> Nalo Pitani ungu akupelie nimbei, "Na naa lipo manjiro kani nu ungu ambelemu ninoya?" nimu. Aku tepe nimbelie wendo pumbe ulke kere pape ombona angilerimu. Aku pumbe nendo lerimu kinye kera gula te ko torumu.

<sup>69</sup> Kano wali tendeku kongono ambonuni omnia Pita kanopalie akuna angileringu imbonando altopala nimbei, "Wiya aku iyemu peya konye leko andoringi iyemu," nimu.

<sup>70</sup> Nalo Pitani altopala ungu akupe topalie aku yure molo nimu. Aku wali alaye koltenga pele akuna angileringu imbonani Pitando altokola ningei, "Nu paa Galili kombu iyere none tereno kani nu paimbo aku iyemunga lombili andoli iye te ltemo," ningi.

<sup>71</sup> Aku teko ningi wali Pitani nimbei, "Nani mi lepolio ungu paimbomu nio! Nani kolo tondu lemo aku Goteni na mindili lipe tipili. Enonga nimele aku iyemu na naa karo," nimu.

<sup>72</sup> Kano tepe nimbe nendo lerimu kinye kera gula ko topa wali talo tenderimu. Aku terimu kinye Jisasini Pita yundo kera gula ko wali talo tipemu oi naa toli wali, numi na naa lipo manjiro ningo wali yupoko tendenio nimu kano ungumu Pitani lipe manjirimu kinye konopu kikime kolamu we yunu ololo nimu.

## 15

### *Pontius Pailateni Jisas kote pilerimu*

<sup>1</sup> Otilikondo ipu leli oi Gote popo tondoli iye awilima kinye mane ungumunga ungu imbo iyema kinye tapu iyema kinye we iye mulimulimani nombeya teko moloringi kanona Jisasini kot pilko pora tikolio ungu ningo kamukumu panjiringi. Aku tekolio Jisas kano ka tokolio meko pungo Pontius Pailatenga kindo tiringi.

<sup>2</sup> Aku teringi wali Pontius Pailateni Jisasindo walipe pilipelie nimbei, "Nu Juda imbonanga kingimuya?" nimu.

Aku wali Jisasini topondopa nimbei, "Nuni nino mele aku tepo moro," nimu.

<sup>3</sup> Kano wali Gote popo tondoli iye awilimani Jisas yundo ulu awini tepe a lowa temo ningo ningi.

<sup>4</sup> Aku teko ningi wali, Pontius Pailateni Jisas kano altopala i tepe walipe pilerimu, "Nu ungure molo konopu lekolio terenoya? Nundo i nimele unguma te alaye pundu tonio mele kape paa moloaya?" nimu.

<sup>5</sup> Nalo Jisasini ungu te anjo naa nili yu angilerimu. Kanopalie wali Pailateni mini itepa konopu awini mundurumu.

### *Imbo pulumuni Jisas kolopili ningi*

<sup>6</sup> Goteni Juda imboma oi Isip kombu wendo lipe enonga ungulu komoma tepe ltimu waimu wendo oromo aku waimu kanoko liko langi te karomele. Aku wali enonga oi teli ulu lepalie ka iye te imbi tokolio Pontius Pailatendo wendo liko mundunduwa nimele wali aku ulu tenderremo.

<sup>7</sup> Neya aku wali oi Juda iye mareni Rom imboma makoroko mundungei opa tekolio imbonare toko kondokolio kinye eno ka ulke peringi. Akuna peringi iyemanga Barabas nimbe iye te kape waye ka ulke peringi.

<sup>8</sup> Aku wali Juda imbo pulumuni Pontius Pailatendo enonga oi tendereno kano ulumu tendewi ningyo yu waliko pileringi.

<sup>9-10</sup> Gote popo tondoli iye awilimani Jisas kinye yokoli kolkolio Jisas nanga kindo ongo tingemu lepamo ningyo lipe manjipelie Pailateni imbo tepa olala i walipe pilipelie nimbei, "Eno Juda imbomanga kingimu moki lepo mundundemboi ningyo nimeleya?" nimu.

<sup>11</sup> Nalo Gote popo tondoli iye awilimani imbo pulumu nombeaya teringi kanoma ungu ningyo amondoko kondi tokolio ningei, "Jisas molo. Barabas linonga moki leko mundunduwi neio," ningi.

<sup>12</sup> Kano wali altopala Pontius Pailateni imbo kanomando nimbei, "Ipe kinye Juda imbomanga king nimele aku iyemu kinye nani ambe teambo konopu lekolio nimeleya?" nimu.

<sup>13</sup> Aku tepa nimu wali imbo kanomani yando nakai leko ningei, "Yu toko uku tangai niwi," ningi.

<sup>14</sup> Aku teko ningi wali Pontius Pailateni imbomando nendo walipe pilipelie nimbei, "Aku ambe telkaya? Yuni ulu pulu ambelemu tepa alowa tendemoya?" nimu.

Aku tepa nimu wali imbo palini paa lakoko nakai lekolio ningei, "Yu toko uku tangai niwi" ningi.

<sup>15</sup> Aku teko ningi wali Pontius Pailateni imbo nombeaya teko angileringima tepa olo penga timbeimunga Barabas nimbe iyemu imbomanga moki lepa wendo mundundurumu. Aku tepalie Jisas mapu tangai nimbeline pele yu toko uku topangei ele iyemanga kindo tirimu.

*Ele iyemani Jisas kondowa ltindiringi*

<sup>16</sup> Aku tirimu wali ele iyemani Jisas kano gavman nokoli iye awili Pontius Pailatenga ulke awilina tukundo kiripi tengah meko tuku pungolio kinye we ele iye kanoma waio ningyo liko tendekuna nombeaya teringi.

<sup>17</sup> Aku wali Jisas wale pakoli kungu kandoli kangi kilu angili paa pengare panjindiringi. Aku tepa wale pakolimu iye kingimani kau pakoromele. Aku wali ka koko mololi munguluwe te pinyewena panjindikolio Jisas kondowa likolio

<sup>18</sup> yunge imbi ningyo pala munduko ningei, "Nu Juda imbomanga king iye awilim," ningi.

<sup>19</sup> Aku teko ningolio wali Jisas yu kano kelowa pulte teni altokola altokola teni teni pinyewena pakamaka panjiringi. Aku tekolio yu olkambe tondoko komongo toko pondokolio wali yunge imbi kapi ningyo pinyewe toko munduringi.

<sup>20</sup> Aku ungu kondowa ltindikolo owe tendeko uluma teko pora tikolio wali ne

kano kungu kandoli wale pakoli kilu penga kanomu kulko likolio kinye Jisas yunge wale pakoli kanoma kelko pakondoringi. Aku uluma teko pora tikolio kinye yu toko uku tongei meli wendo puringi.

*Jisas unjo polopeyana toko uku toko panjiringi*

<sup>21</sup> Jerusalem kombu tiye kolko Jisas meli wendo pungo aulke pulena iye te kane kane toringi. Aku iyemunga imbi Simon, yu Sairini nimbe kombu iyemu. Yu Aleksander kinye Rufus talonga lapa. Yu Jerusalem kombu ombai orumu nalo ele iyemani yu ambolko liko Jisasinga unjo polopeyamu mendewi ningi.

<sup>22</sup> Kano wali Jisas Golgota nimbe kombu tengah meli puringi. Kombu Golgota aku imbibunga ungu pulumu Imbo Kaungala Kombumu.

<sup>23</sup> Akuna mir nimbe konga te Jisas yu mindili naa lipe manjipili ningyo no wain kinye teko bembu tikolio Jisas yu nopili ningyo tingei teringi nalo molo nimbelie naa norumu.

<sup>24</sup> Aku tekolio wali Jisas unjo polopeyana toko panjiringi. Aku toko panjikolio wali ele iyemani yunge wale pakoli oi kulko Itingima noikolio kinye narini paa limbeloya kanamili ningolio kat mele tekolio wale pakolima yu mele mele moke teringi.

<sup>25</sup> Jisas yu toko panjiringi waimu aku otili oi ena ombo enge nili kano wali toringi.

<sup>26</sup> Yu toko panjiringi ungu pulumu imbomani kanange ningolio unjo tengah toko panjikolio ningei, IYE IMU JUDA IMBO-MANGA IYE NOMI KINGIMU ningyo toringi.

<sup>27</sup> Jisas toko panjiringi aku tendeku wali wapu iye talo kape aku kombuna toko panjiringi kala. Te yunge imbo kindo toko uku toko, te yunge koya kindo toko uku toko panjiringi.

<sup>28</sup> Aku teringi ulumuni oi Gotenga ungu toko panjiringimua neya aku wali ara tirimu. Aku ungumu i tepe:

Yu wapu iyemu none tendeko imbi tiringi,  
(Ais 53:12)

nimo.

<sup>29</sup> Aku wali imbo ongo pungoliomani Jisas yu ungu taka tondoko ongo nipula tekolio ningei, "Ya, nuni Gotenga ulke tempelemu talaye tipolio kelepa wali yupoko ombo pumbelo wali altopo takombo ninu kano iyemuya?

<sup>30</sup> Kinye nu unjo polopeyana mainye ongo nunu teko liwi!" ningi.

<sup>31</sup> Aku wali imbomani neya teko ningi mele aku tekola Gote popo tondoli iye awilima kinye mane ungumunga ungu imbo iyemani enonga nendo yando Jisasinga kondowa ltindikolio ningei, "Yuni imbo

wema tepa koinjo ltimu nalo yu yunu manda naa tepa ltimu.

<sup>32</sup> Da iye Kraist nimbe yu Israel imbomanga king nimo iye imu, kinye yu unjo polopeyana mainye ombalo ulu kanopolio wali yu ipuki tiemili," ningi. Aku wali wapu iye talo Jisas yu kinye waye toko panjiringi kano iye taloni kape Jisas yundo ungu taka tondoko ningili kala.

### *Jisas kolopa ltimu*

<sup>33</sup> Aku wali awi tangoli imbo dindo nimo kano wali kombu pali tumbulu topalie ena mongo yupoko ombo purumu.

<sup>34</sup> Aku wali Jisas are nimbeline nimbei, "Eli, Eli, lama sabaktani," nimu. Aku ungmungu pulumu i tepa, "Nanga Gote, na ambe telka tiye koltonoya?" nimu.

<sup>35</sup> Akuna nondoko angileringi imbomareni aku nimu ungmungu pilkolio wali ningei, "Pileio, yu Elaija nimele kano iyemu alako toromo," ningi.

<sup>36</sup> Kano teko ningi wali iye teni lkipa pumbelie koma mele no panjiko ltimele aku tepe melteni no wain kou mandopa puli kombili teli tengi nomu panjipe lipelie kinye luwe punduna uku topalie la tipe lipe Jisasinga kere punduna undu tindipe anjipelie nimbei, "Elaijani yu unjo polopeyana mainye ombo ltimonje, oi nokopo kanamili," nimu.

<sup>37</sup> Kano wali Jisas are awilite nimbeline kolopa ltimu.

<sup>38</sup> Aku tendeku ena mongona Gotenga ulke tempelemunga tukundo kiripi wen-gendelimu pipi tiko maminye waltiko uku toringimu mundo ora topa pulundo wendo pumbe ekondo ekondo terimu.

<sup>39</sup> Kano wali ele iyema nokoli iye te Jisas toko panjiringi unjo polopeya puluna angilerimu akumuni Jisas kolorumu mele kanopalie nimbei, "Araya! I kano iyemu paa Gotenga Malo ltemol!" nimu.

<sup>40</sup> Ambomare tule teko kanoko angileringi. Aku ambomanga imunana Maria Makdala kombu ambomu kinye ungulu Jems kinye Josep talonga anumu Maria kinye ambo Salome waye angileringi.

<sup>41</sup> Aku ambomanji Jisas yu Galili kombu molorumu wali yu lombilko taporingi. Nalo we ambomare awini Jisas yu kinye waye Jerusalem kombu oringima kape akuna angileringi kala.

### *Jisas liko ono teringi*

<sup>42-43</sup> Otilikondo Juda imbomanga koro awili waimu wendo ombalomunga koro awili waimu kanoko lingei kere langi melema tumbirumbi tirimele wai akumu oi wendo naa oli,aku ipo lembai teli Arimatea kombu iye Joseponi pipili naa kololi Pontius Pailatenga kumbekerena pumbelie Jisasinga onomu mainye liemboya nimbe walipe pilerimu. Aku iyemu yu Juda

imbomanga iye mulimulimu molopa Goteni Juda imboma ombo tepe lipe nokombalo waimu wendo opili nimbe nokopa molorumu.

<sup>44</sup> Kano wali Pailateni Jisas oi kolomo nimu ungu pilipelie konopu awini mundupelie ami iye 100 nokoli iyemu owi nimbelie Jisas oi paa kolopa limonje nimbe walipe pilerimu.

<sup>45</sup> Kano ami iyemanga nokoli iyemuni Jisas kolorumu mele nimu ungmungu pilipelie wali Pailateni Joseponto Jisasinga onomu pungo lipuwi nimu.

<sup>46</sup> Kano wali Joseponi wale pakoli kake pengare pame tepe meli pumbelie kinye Jisasinga onomu unjo polopeyana mainye lipe kumo topalie kou anga lumburuko noiringirenga tuku pumbe noipe ono terimu. Aku ono tepalie kou anga kere pulumunga kou muluwele awili kangore pera tipe mundupelie pipi tirimu.

<sup>47</sup> Aku terimu ulu Maria Makdala kombu ambomu kinye ungulu Joseponga anumu imbi no pi ambo Maria waye Jisasinga onomu noirimu kombumu kanoringili.

## 16

### *Jisas ono kombuna makilerimu*

<sup>1</sup> Altopa koro awili Sabat waimu ombo purumu wali pele ipo lembai teli Maria Makdala kombu ambomu kinye ungulu Jems singa anumu imbi no pi ambo Maria kinye Salome nimbe ambo te waye Jisasinga onomu welea naa purupili ningi wel mune tolimate pungo kandongei pame teringi.

<sup>2</sup> Otilikondo paa ipu leli oi ena mundi kinye ambo kano pokon Jisas ono teringi kombuna eno pungei purungi.

<sup>3-4</sup> Kano pungo molko aulkena enonga nendo yando ningei, "Imbo narini kou muluwele kango ono kombu kerekuluna linonga pera tipe mundundumbeloya?" ningi.

Nalo aku teko niliko pungolio winjo tiko kanoringi kinye imbo-rene angilipe kou muluwele kango pera tipe oi mundurumu lemo.

<sup>5</sup> Kano kinye nangape topa lerimu kou angana tuku pungo iye wenepo te wale pakoli kake paa penga te pakopa mere mundupelie enonga imbo kindo molorumuna kanokolio ambo kano pokon eno mini lteringi.

<sup>6</sup> Iye kanomuni enondo nimbei, "Mininaa Iteao. Jisas Nasaret kombu iye toko panjinge kano iyemu koroliko oromele, nalo iyemu yu ina naa ltemo. Oi makilipe koinjo molopa purno. Kanaio! Yu noinge kombumu i we ltemo.

<sup>7</sup> Nalo eno pungolio Pita kinye Jisas yunge kitipi kanoli iyemando pungo i ungmungu

ningei, 'Jisas yu enonga kumbe lepa Galili kombu oi pumo. Oi nimu kano mele akuna pungo yu kanonge,' ningi tipeio," nimu.

<sup>8</sup> Aku nimu ungu pilkolio wali ambo kano pokolungu pungo ningi konopu awini mundukolio imbo ono kombumunga tiye kolko anjo kowa lkiringi. Eno mini ltekopungolio imbo te kinye ungu te naa ningi.

*Maria Makdala kombu ambomuni Jisas kanorumu*

<sup>9</sup> Juda imbomanga pulu polko kongo walimu ipu leli oi makilipe koinjo molopalie nimumuni Maria Makdala kombu ambo molorumuna purumu wali ambomuni yu kanorumu. Oi ambo akumunga Jisasini kuro keri kite yupoko pakera tuku wangoko moloringina makoropa wendo mundurumu.

<sup>10</sup> Aku ambomuni Jisas koinjo purumu ulu kanopalie yunge kitipi kanoli iyema kola aulke moloringina pumbe nimbe tirimua.

<sup>11</sup> Yunge kitipi kanoli iyemani Jisas kano koinjo molomo nimbe ambomu yuni yu kanandu nimu ungumu pilkolio wali ipuki naa tiringi.

*Kitipi kanoli iye talo moloringilina Jisas yu wendo orumu*

<sup>12</sup> Altoko i unguma pilko moloringi wali pele iye talo kombu werenga pungili pungo moloringili kinye elonga imunana Jisas kano iye lupere none tepa orumu.

<sup>13</sup> Aku wali kano iye talo ulkendo yando ongolio we ki tipi kanoli iyemando Jisasini i ulure temo ningi ningili nalo aku iyemani elonga ningili ungumu ipuki naa tiringi.

*Jisas kano yunge kitipi kanoli iye 11 moloringina wendo orumu*

<sup>14</sup> Altopa walite, Jisas yunge kitipi kanoli iye 11 kere nongo moloringina wendo orumu. Yunge kitipi kanoli iyemani we imbomani Jisas kanokolio ongo ningi unguma ipuki naa tiko aku ungumu naa pilemili ningimunga Jisas yuni eno iri torumu.

<sup>15</sup> Enondo nimbei, "Eno mai kombu undukana lepa purumomunga pali anjo yando pungolio Gotenga ungu tukumemu imboma pali ningi tipeio.

<sup>16</sup> Imbo narire ipuki tipelie no limbelo imbomu Goteni tepea limbelo nalo imbo narire ipuki naa timo lemo da imbomu Goteni tepea tombalo.

<sup>17</sup> Imbo ipuki tingema kinye Gote waye kongono tepalie ulumare liko ondangei nimbelo. Aku uluma i tepea: Nanga imbina kuro kerima makoroko mundunge. Imbo ungu lupe lupe oi naa pilelimare ningi.

<sup>18</sup> Imbo akumani imbo topa kondoli waimbe keri mare ambolko linge nalo

naa kolonge. Tomo peremo no te naa liko manjiko pilinge wali ulure paa naa tembaloo. Imbo kuro tombalomunga ki pala noindinge kinye aku imboma koinjo punge," nimu.

*Jisas Goteni Yu moromo kombuna olando Itimu*

<sup>19</sup> Altopa Iye Awili Jisas yunge kitipi kanoli iyemani kombu palinga wendo pungo Gotenga ungu tukumemu ningi andoko tiringi. Aku wali Iye Awili Jisasini kitipi kanoli iyema enge tipe kongono tapu terimuna imbomani yunge ungu tukumemu paimbo itemo ningi kanangei nimbe yunge imbomani ungu tukumemu andoko ningi tiringi wali ulu enge nilima terimu.

<sup>20</sup> Jisas olando purumu wali, yunge kitipi kanoli iyemani kombu palinga wendo pungo Gotenga ungu tukumemu ningi andoko tiringi. Aku wali Iye Awili Jisasini kitipi kanoli iyema enge tipe kongono tapu terimuna imbomani yunge ungu tukumemu paimbo itemo ningi kanangei nimbe yunge imbomani ungu tukumemu andoko ningi tiringi wali ulu enge nilima terimu.

**Lukuni Ungu Tukumemu  
Topa Panjirimumu  
Luk  
Lukuni Ungu  
Torumumunga Ungu Pulu  
Mare**

Luk yu iye doktamuni Pol kinye andopa molorumu. Israel imbo naa mololimani yunge ungumua wamongo pilengei nimbelie Israel imbomanga ulu puluma moro tondopa nimbe topa panjirimu. Imbo kora-ropa nolima tapopa umbuni meremele imboma tepa enge tipe Jisasini imboma pali kondo kolopa konopu mondorumu ulumu imbomani liko manjengei nimbe Lukuni i ungu tukumemu topa panjirimu. I torumu ungu tukumena Jisas ungu manda lepa nimbe ungu konolino lipelie nimu ungu awini peremo. Jisas orumumunga Goteni imboma mindili nolemala aulkena wendo ltimo ningi Gote kinye molopo kondamili lepamo ningi nokoko molkolio paa tono kolko molangei nimbelie ungu topa panjirimu.

I ungu kambu torono wali Jisasini nu tepa lipe tukundo lipelie nu paa konopu mondromo liko manjiko tono kolani nimbe Goteni nu tepa kondopili.

*Lukuni i pipiamu toru mele i tepa peremo nimu*

<sup>1-2</sup> Iye Awili Tiopilus, lino moromolo kombuna Goteni oi nimu ungumua altopa Jisas kinye wendo orumu uluma pulu polorumu wali kanokolio, Gotenga kongono teremele imbomani yunge ungu wendo orumumu linondo temane toko tiringi. Imbo awinini aku temanemu bukuna kamukumu molopili tamili ningi buk toringi.

<sup>3-4</sup> Altopo nani temanemunga pulumu paa pilipo kondambo nimbo oi pulu polopa wendo orumu mele kape altopa wendo orumu mele kape akuma pali koropo pilipo kanoru. Akumunga imbo mareni Tiopilus nundo i teko wendo orumu temane toko ungu mane tirimelema paa paimbo konopu leani nani i ungumua bukuna tepo wamopolio topo tiro.

*Mulu kombuna ensel teni Jon Imbo No Ltindili mengele nimbe tirimu ungumu*

<sup>5</sup> Iye Nomi King Herot kombu Juda nokopa molorumu wali Gote popo tondorumu iye te molorumu, yunge imbi Sekaraia. Gote popo tondoringi imbomanga talape tengah imbi Abiya, Sekaraia yuaku talapemunga iye te. Yunge ambo Ilisabet Gote popo tondoringi imbomanga

talape tengah lupe ambo te. Elonga wayenga kolepa Aron.

<sup>6</sup> Aku ambo iye talo moloringili mele Goteni kanopa penga pilerimu. Eloni yunge ungu manema kinye Imboma teaio nimu ungumua pali pilko liko teko kondoringili.

<sup>7</sup> Nalo Ilisabet wangono perimu, bakute naa meringili. Elo amboi anda leko moloringili.

<sup>8-9</sup> Walite Sekaraia talapemuni Juda Imbomanga ningi Gote popo toko kaloringi kongono tenderingi wali yu kape peya Gotenga kumbe kerena aku kongonomu tenderimu. Aku tendeko molkolio ningimuni, Gote popo tondoringi iyemani teringi mele nari pumbe mune toli paura kekumu imbomanga nimbe kalondombalonje kanamili ningi kat mele teringi. Aku tekolio Sekaraia yu kano kongonomu tendembalo ningi kanoringi. Yu ulike tempel kiripina tuku pumbe mune toli paura kekumu kalopurumu.

<sup>10</sup> Aku tepa angilerimu wali imbo awini maku toko Gote konge teko tawendo angileringu.

<sup>11</sup> Sekaraia mune toli paura kekumu kalopa angilerimu wali kano paura kekumu kaloringi alta polomunga imbo kindo Awilimunga ensel te ombo mona angilerimuna kanorumu.

<sup>12</sup> Akumu kanopalie paa mini lterimu.

<sup>13</sup> Aku wali enselemuni nimbei, "Sekaraia, mini naa ltewi. Nu Gotendo konge tereno kanomu Gote yuni pilerimu. Nunge ambomu ungulu te kanopa limbelo. Yunge imbi Jon ningi tiwi!"

<sup>14-15</sup> Yu molombalomunga nu kamele akoko pende tenio. Yunge imbimu Awilimukinye molombalo akumunga yu mengele wali imbo awini tono kolonge. No wain kinye we no enge nili kape paa naa nopili! Anumunga olona we tukundo molopili wali Gotenga Mini Kake Telimu yunge konopuna ombo molopila manda tembaloo.

<sup>16</sup> Israel Imbomani Awilimukinye oi tiye koloringi Jononi tembaloo ulumuni altoko Israel imbo awini konopu topele toko enonga Gote Awilimukinye tengeninge.

<sup>17</sup> Oi Gotenga profet iye Elaija enge perimu mele yuaku tepa molombalo. Akumunga yunge tembaloo ulumuni lapalini konopu topele toko, bakuluma konopu mondonge. Gotenga ungu manema liko tui tirimele imbomani konopu topele toko, imbo toya tolimanli liko manjiko teremele uluma tengen. Jon yuni tembalomunga Awilimukinye ombalo ningi imboma tumbi tiko molonge," nimbe enselemuni Sekaraia nomu.

<sup>18</sup> Aku wali Sekaraiai enselemundo waltindipelie nimbei, "Na anda lepo nanga ambomu amboi lepa pora tirimbulu.

Nunge nino ungumupe nani paimbo nino nimbo ambe tepo lipo manjimboya?" nimu.

<sup>19</sup> Enselemuni topondopa nimbei, "Nanga imbi Gebriel. Na Gotenga kumbekerenia angio. I kinye nundo nio mele Goteni aku teko nipiwi nimbe mundumona nundo ombo i ungu pengamu nimbo tiro.

<sup>20</sup> Nalo nani ungulu mengele nimo kolo toromonje ningo piltino kani i ulumu oi wendo naa opili nu ungu naa nili molonio. Pele wendo ombalo nio mele amboma bakulu keri teko molkolio meremelemanga walima ombo purumo mele aku tepa walimu ombo pumbelo wali paa paimbo wendo ombalo ltemo," nimu.

<sup>21</sup> Aku teko ungu ningo angilengili imbo tawendo angileringimani Sekaraia ulke tempelemunga kiripina tukundo oi pumo kano, welea wendo naa orumu ningo konopu awini liko munduringi.

<sup>22</sup> Sekaraia wendo ombalie wali ungu naa nimbe kini kau ungu manda lerimu. Aku terimu ulu kanokolio Goteni ulke tempel kiripina ulte lipe ondomona kanomo konopu leringi.

<sup>23</sup> Altopa yunge ulke tempelena kongono waimu pora nimu waliulkendo purumu.

<sup>24</sup> Altopa ambo Ilisabet kano bakulu molorumu ulu lipe manjipelie oli kite pakera yu Imbomani naa kanangei nimbe lopeke tepa molorumu.

<sup>25</sup> Yuni nimbei, "Awilimuni na kanopa kondo kolopalie i ulumu temo lepamo. Imboma na kanoko keri pileringi kinye mai koloru ulu akumu Awilimu yuni lipe ltendemo," nimu.

*Mulu kombuna ensel teni Mariani Jisas membalo nimbe tirimu*

<sup>26</sup> Ilisabet yu keri tepa molopili bakulu olona mondopili oli kite pakera ombo pupili talo pakera tipemu ondopa angilerimu wali Goteni mulu kombuna ensel Gebriel kombu Galili tukundo ulke kombu Nasaret nilina lipe mundurumu.

<sup>27</sup> Akuna lopa kumbu oi naa tepa kanoli ambo wenepo te molorumuna lipe mundurumu. Kano ambo wenepomu yunge pulu lerimu imbomani yu iye te pupili ningo ungu tiringi, iyemunga imbi Josep. Kano iyemu yunge oi kaue te Iye Nomi King Devit. Ambo wenepomunga imbi Maria.

<sup>28</sup> Maria molorumuna Ensel Gebriel ombarie yundo nimbei, "Ambomu, nu moronona kanomboi oro. Gote Ola Iye nu kinye konopu noipelie, nu kinye molopili," nimbelie nimu.

<sup>29</sup> Nalo kano ungumu pilipelie yu konopu pulumu lipe mundupelie i ungu nimomu ambele ungu rendo nimonje konopu lerimu.

<sup>30</sup> Enselemuni yundo nimbei, "Maria, Goteni nu kanopa penga pimo kani pipili naa kolowi!

<sup>31</sup> Piliwi, nu keri teko molkolio ungulu te menio. Ungulumunga imbi Jisas ningtiwi!

<sup>32</sup> Yu iye nomi molombalo. Yu imbi tiko Paa Olandopa Moromo Gotenga Malo ninge. Yu Awili Goteni Yunge anda kolepa Devit Israel imbomanga iye nomi king enge nilimu molorumu mele aku tepa molopili.

<sup>33</sup> Jekoponi kalopa Itimu Israel imboma yuni nokoromo ulumu lepa kau pumbelo. Yu iye nomi king awilimu molopila kau pumbelo," nimu.

<sup>34</sup> Mariani enselemundo nimbei, "I nino ulumu ambe tepa wendo ombalona niwaya? Na iye te oia naa puli," nimu.

<sup>35</sup> Enselemuni yundo nimbei, "Nu moloniana Paa Olandopa Moromo Gotenga Mini Kake Telimu ombo yunge engemuni nunge olona ungulu te mondombalo. Akumunga ungulu kake teli meniomundo Gotenga Malo ningi imbi tinge.

<sup>36-37</sup> Goteni manda naa tembaloo ulu te naa peremo ungumu liko manjeni i nimbo timboi. Piliwi. Goteni nu tembo nimo mele paimbo tembaloo. Ulu enge nili te lupe tembo nimbelie terimu mele nembo nunge pulu lemo ambo Ilisabetendo ambo wangano peremo nimele nalo kinye yu amboi wali bakulu keri tepa molopili oli kite talo pakera peremo," nimu.

<sup>38</sup> Mariani nimbei, "Na Awilimunga kendemande ambomu moro. Nuni nino mele aku tepa Gote yuni na kinye tepili," nimu. Aku wali enselemuni Maria tiye kolopa yu purumu.

*Maria yunge pulu lerimu ambo Ilisabet pumbe kanopurumu*

<sup>39</sup> Aku wali Maria tumbi tipe kombu Judia distrik pumbe ulke kombu te mai pangitenga ola lerimuna purumu.

<sup>40</sup> Pumbe akuna iye Sekaraianga ulkena tuku pumbelie ambo Ilisabet kanopa na oro nimbe kanguliringili.

<sup>41</sup> Ilisabeteni Marianga ungu pileringi wali yunge olona molorumu bakulu puke topa ola pumbe mainye ombo terimu ulumu lipe manjirimu. Kano wali Gotenga Mini Kake Telimu Ilisabet yunge konopuna pumbe molopila tope tirimu kinye

<sup>42</sup> Ilisabet yuni ungu ola enge nimbe nimbei, "Ambo moromelemanga pali liko ongondoko, nu malo. Nunge olona moromo bakulu meniomu Goteni mane ungu tipili.

<sup>43</sup> Na ambo pengare moro konopu naa lendu nalo nu nanga awilimunga anumuni na kanoni onio. Aku terenomunga na kinye teko penga tirino.

<sup>44</sup> Na oro ninio ungu pilindu wali nanga olona moromo bakulumu tono kolopa puke topa ola mainye temo.

<sup>45</sup> Awilimuni nundo nimu ungumu pilkolio Yuni paa nimo mele tembalu ningi ipuki tirinu kani Goteni nu mane ungu tipili," nimu.

*Mariani tono kolopa kunana nimumu*  
<sup>46-49</sup> Ilisabeteni nimbe pora tirimu wali Mariani nimbe,

"Gote yuni na yunge ambo kendemande mainye mololimu komu naa tindirrimo

akumunga nanga Tepa Lilimunga na tono kolopo Awilimun kapi nimbo imbi nimbo ola munduro!"

Gote Enge Nilimuni na kinye ulu awili tendemomunga kinye moromelema kape altoko kalko liko molongeman kape nando Yu malo ninge.

Yu iye paa kake telimu.

<sup>50</sup> Yu pipili kolko moromele imboma yu kondo kolopa tapombai moromo.

Aku imbomanga anjiko anjiko kalko linge imboma kondo kolopa

<sup>51</sup> yunge kimuni ulu enge nilima terimu.

Imbo eno none teko enonga konopuna enono kapi ningi moromele imboma yuni makoropa enonga konopuma bili bala tirimu.

<sup>52</sup> Imbo nomi molko kombuma nokoko moromelema yuni topa mainye mundupe, we imbo imbi naa moromoma lipe ola mundurumo.

<sup>53</sup> Engelena koromele imboma yuni olo tepili nimbe langi pengama tipe, imbo kamakoma mele tendekure kape naa tipe we pangei nimbe makororomo.

<sup>54-55</sup> Yuni linonga pulu polopa oi ara kaue kame tembo nimbe mi lerimumu komu naa tindipe lipe manjipe molopalie,

oi kaue Abraham kinye yunge yandopa yandopa kalopa ltimu imboma kinye enondu tembo nimbe mi lerimu mele tembaindo

lino Gote yunge kendemande Israel imbo moromolo akuma yuni kondo kolopa lipe tapondombai tepa moromo," nimu.

<sup>56</sup> Maria Ilisabet kinye molopili oli yupoko ombo purumu mele aku wali altopa Maria yunge kombundo purumu.

#### *Ilisabet ungulu Jon merimu*

<sup>57</sup> Ilisabet bakulu membalo walimu wendo orumu kinye yuni ungulu te kanopa ltimu.

<sup>58</sup> Yunge kombu tendeku imboma kinye yunge pulu lerimu imboma kinye Awilimuni yu kondo paa pulumu kolorumu

mele pilkolio yu konopu tiko eno waye tono koloringi.

<sup>59</sup> Wali ki talo tipe perimumunga imboma tukundo tukundo ongo maku tokolio ungulumunga kangi pundi te kopiko ltendeko molkolio ningimuni, yu lapanga imbi manda leko Sekaraia tiemili ningi.

<sup>60</sup> Nalo ungulumunga anumuni molo nimbelie yunge imbi Jon nemili nimu.

<sup>61</sup> Enoni yundo ningei, "Elonga pulu ltemo imbo tengah imbi aku tepe naa moromo kanomu," ningi.

<sup>62</sup> Kano wali enoni Lapani ambele konopu ltemonje, ambele imbi timbelonje, walipo pilemili ningi lapando kini ungu manda leringi wali

<sup>63</sup> yuni topondopa kini ungu manda lepalie pipia tieio nimbelie, yuni pipiana topalie nimbei, "Yunge imbi Jon," nimbe torumu. Aku ulu kanokolio imbomani paa konopu awini leringi.

<sup>64</sup> Aku wali tumbi tipe yuni kerena altopa ungu nimbelie Gote kapi nimu.

<sup>65</sup> Kano wali yunge kombu tendekuna moromele imbomani mini leringi. Kombu Judia mulu kemboma polorumu kombumanga pali aku temanemu kau toliko purungi.

<sup>66</sup> I ulumu pileringi wali imbomani pali konopu liko mundukolio ningei, "Ulu aku tepe mele we naa teremo. Awilimuni i ungulumu kinye molopa enge tirimo lepamo," ningi pilkolio "I ungulumu akilio iye ambe teli te molombalonje?" ningi.

*Mini Kake Telimuni Sekaraia tope tirimuna Sekaraiani imboma ungu nimbe tirimu*

<sup>67</sup> Mini Kake Telimu Jononga lapa Sekaraianga konopuna ombo molopa manda terimu wali Sekaraia yuni Gotenga nimbe munduli ungu pilipe, altopa wendo ombalo mele imboma ungu nimbe tipelie nimbei,

<sup>68</sup> "Awilimu, Israel imbomanga Gote, yu kapi nimbo yunge imbi ambolopa ola mundemili!

Yu ombo yunge imboma tepa limo i pilipolio aku teamili!

<sup>69</sup> Gote yuni yunge kendemande linonga Iye Nomi King Devitini kalopa ltimu imbomanga iye enge peli te lino tepa lipili nimbe timo.

<sup>70</sup> Aku ulu wendo ombalomundo yunge iye profet akumani koro oi ningi panjiringi.

<sup>71</sup> Yuni lino tepo liembo nimbe linonga opa pulu iyema topa mundupe,

lino kanoko keri pimele imbomanga kindo wendo limbelo ningi mele, kinye aku tembai teremo.

<sup>72-73</sup> Linonga ara kae kame kondolo kolopa, linonga kalopa ltimu ara kae Abraham kinye tembo nimbe mi lerimu ungumu komu naa tindipo, niu mele aku teambo nimbeline aku tepe teremo.

<sup>74-75</sup> Pipili naa kolko nanga kongonomu enge ninggo tendeko, konopu kake tepili nani kanopo penga pio uluma kau maina teko mololiko pangei nimbeline

lino linonga opa pulu iyemanga kindo wendo limbo nimbe mi panjirimu mele teambo nimbeline aku ulu teremo.

<sup>76</sup> Nanga ungulu Jon, nuni Awilimunga kumbe leko pungo yu ombalo aulkemu akirindiniona pilkolio, imbomani altoko nundo Olandopa Moromo Gotenga nimbe munduli ungu nili iye profetemu morono ninge.

<sup>77</sup> Awilimu yunge aulkemu akirindembo ningolio nuni yunge imbomando i teko ninggo tini:

Awilimu yuni enonga ulu pulu keri teremelema tiye kondopa eno tepe limbelo ninggo, aku ungumu enondo ninggo tinio.

<sup>78-79</sup> Goteni lino kondolo pulumu kolopalie lino tumbulu tolina molopo kololi aulkemu moromolona wendo ombo konopu wango nipili molopo konopu tendekuna pupili molomolomo aulkemu manda kanoko pangei nimbe pa tendepili nimbe lino moromolona pa tendelimu lipe mundurumo," nimbe Sekaraiani nimu.

<sup>80</sup> Ungulu Jon yu akopa awili lepa konopu enge nimbe molorumu. Yu oi imbo naa peli kombuna molopalie altopa pele Israel imbomanga kumbekerena wendo ombo kongo terimu.

## 2

### *Mariani Jisas merimu ungumu*

<sup>1</sup> Jon yu pamemu molorumu kano kinye Rom gavmanemuni nokorumu kombumanga pali Iye Nomi Awili Sisar Ogastasini ungu te nimbe panjipelite Rom gavmanemuni nokoromo kombumanga moromele imboma pali imbi lipo kambu tamili nimu.

<sup>2</sup> Kwirinius kombu Siria nokorumu iyemu molopili Rom gavmanemuni imbomanga imbia pulu polopa imbi lipe kambu torumu.

<sup>3</sup> Ungu akumu Ogastasini nimbe panjirimu wali imboma pali enonga lapali kolepaleni kalko ltingi kombumanga yu mele mele eno purungi.

<sup>4</sup> Iye Josep kombu Galili tukundo ulke kombu Nasaret molopa, aku ungu pilipelite wali, Nasaret tiye kolopa Kombu Judia pumbe yunge kolepa iye nomi king Devitini yu kalopa ltimu ulke kombu Betlehemendo purumu.

<sup>5</sup> Akuna iltonga imbi talo mondangei pambilin yunge nondopa limbei ambo Maria kinye elo akuna puringili. Maria bakulu keri tepe molopili waye puringili.

<sup>6-7</sup> Betlehem tuku pungolio, imbo ponenge ongo pepundala teringi ulkemu tenggepeya terimumanga elo kongi donki kinye kaoma peringi ulkena pungo peringili. Akuna peringili wali Maria bakulu kuro torumu. Pele ungulu te kanopu ltimu. Aku ungulumu komo merimu. Kanopa lipelite maminye mare lipe okopa, ari tirimelema langi noli okolo tenga tuku noirimu.

*Mulu kombu ensel te ombo kongi sipsip tapu iye mare iye Kraist merimu ungu nimbe tirimu ungu*

<sup>8</sup> Betlehem kombu tawendo tengi kongi sipsip tapu iye mare era poinyemanga ipu elenongga sipsipima tapu teko moloringi.

<sup>9</sup> Kano kinye eno moloringina Awilimunga ensel te ombo mona angilerimuna kanoko, Awilimunga pa enge nilimu omba eno moloringi kombu pa terimuna kanokolio, eno paa mini lteringi.

<sup>10</sup> Nalo enselemuni nimbei, "Nani eno temane penga te topo timboi oro kani mini naa lteao! I temanemu imboma pali tono kolonge temanemu!

<sup>11</sup> Kinye oi molorumu iye nomi king Devitinga ulke kombuna ambo teni ungu te memo. Aku ungulumuni imboma tepe limbelo. Yu Awilimu, Goteni imboma tepe lipili nimbe lipo mundumbo nimu Iye Kraist, akupe yu.

<sup>12</sup> Bakulu kiki te maminyena okoko, kongi kao langi noli okolo tengi noingenpa pungo kanoko ltendekolio nani paimbo nimo lepango ipuki tinge," nimu.

<sup>13</sup> Aku ungu nimu kinye walitikale mulu kombuna ensel paa pulumu oi orumu enselemu angiltimona ongo mona angilkolio, Gotenga imbi ambolko ola munduko yu kapi ningolio ningei,

<sup>14</sup> "Paa Olando Mulu Kombuna Ola Iyemunga imbi paa ola molopili! Maina imbo yuni kanopa penga pimo imboma, konopu ame topili molangei" ningi.

*Kongi sipsip tapu iyema pungolio Jisas meko nondoko moloringili kano purungi ungumu*

<sup>15</sup> Aku teko ningolio eno kongi sipsip tapu iyema tiye kolokolio mulu kombuna kelko olando purungi. Aku teko purungi wali sipsip tapu iyemani nendo yando ningei, "Lino

Betlehem pumbo Awilimuni wendo omo nimo ulumu kanopamili!" ningi.

<sup>16</sup> Aku ningolio walitikale pungolio, Maria Josep talo moloringilina kanoko, baku kikimu kongi kaomanga langi noli okolona tuku lerimuna kanoko ltenderingi.

<sup>17</sup> Yu mongoni kanokolio, oi enselemuni eno aku bakulumundo nimbe tirimu mele imbona ningi tiringi.

<sup>18</sup> Kano wali sipsip tapu iyema enoni ningi tiringi ungu pilkolio imbonani konopu awini liko munduringi.

<sup>19</sup> Nalo Maria i uluma pali konopuna pan-jipelie lipe manjipe molorumu.

<sup>20</sup> Sipsip tapu iyema kelko yando ongolio ningimuni, enselemuni nimbe tirimu mele paa aku teko pilko kanokoliomunga Gote kape nilko yunge imbi ambolko ola ltindi-liko yando oringi.

#### *Jisas imbi tiringi temanemu*

<sup>21</sup> Ungulumu kanopa ltimuna moloringili, wali kite yupoko pakera ombo purumu kano kinye, wali ki talo tipemunga yunge kangi pundu te kopikolio, anumuni yu olona naa mondopili enselemuni yunge imbi i teko tiwi nimu mele lipe manjirimuna yunge imbi Jisas ningi tiringi.

*Josep kinye Maria talo ungulu kiki  
Jisas meko Jerusalemundo pingo ulke  
tempelena tukundo puringili wali wendo  
orumu ungumu*

<sup>22-24</sup> Josep kinye Maria talo, elonga kamukumu kake tepili molongeles walimu wendo orumu kinye, Mosesini ungu mane tirimu te pilko liko tengilindo ulke kombu awili Jerusalem pungolio, kake tepili molongilindo kera mai lepo mele talo molo kera imili mele talo Gote popo toko kalangei nimbe ungu mane aku tepa nimbe perimu kanomu. Gote popo toko kalo pungili Awilimunga ungu mane nimbe peremo te lupe pilko liko tengilindo puringili. Aku ungu manemu i tepa:

Ungulu komomu kanoko lingema pali Awilimunga ningi yu tiengei, (Kis 13:2,12)

nimbe perimu kanomu. Aku ungu manemu pilkolio iltonga ungulu komomu Gote Awilimunga tiembili ningi Jerusalemendo pungili Jisas meko puringili.

<sup>25</sup> Iye anda te Jerusalem molopili elo puringili, yunge imbi Simeon. Yu ulu keri te naa peli iye pengamu. Yu Gotenga ungu pilipe Gote popo toli iyemu. Yu Israel imbona molko kondangei nimbelo iyemu kanombaindo nokopa molorumu. Mini Kake Telimu yunge konopuna tukundo molorumu.

<sup>26</sup> Mini Kake Telimuni yundo ungu te oi nimbeindo, nu oi we naa kolani, nu oi Awilimuni eno nokopa kondombalo iye te lipo

mundumbo nimbe kanopa ltimu iye Kraist nimomu kanokolio wali pele kolonio nimu.

<sup>27</sup> Mini Kake Telimuni Simeon yu lipe mundurumu kinye yu Gote popo toko kaloli ulke tempelemunga purumu. Kano kinye Jisas anumu lapa talo ungu manemuni ungulumando teao nimbe tirimu mele tengilindo ungu Jisas meko ulke tempelemunga tukundo puringili wali

<sup>28</sup> Simeononi ungulumu kangulupe lipe Gote kapi nimbeline nimbei,

<sup>29-30</sup> "Awilimu, imbona lipe tepa limbelo iye tirinomu,

kinye nanga mongoni kando wali, oi ninu mele wendo ombaindo kinye na nunge kongono iyemu konopu u nipili kolombo lepamo.

<sup>31</sup> Kano Tepa Lilimu kombumanga pali imbonani kanangei ningi tereno.

<sup>32</sup> Yu Israel Imbonanga tawendo moromele imbonanga pa tendembalo wali, enoni nu liko manjingine.

Nunge Israel Imbonanga pa tendelimu molombalo wali, aki imbonani imbi awili molopili," nimu.

<sup>33</sup> Anumu lapa talo Simeononi Jisasindo nimu mele pilkolio konopu awini liko munduringili.

<sup>34</sup> Simeononi Goteni eno nokopa kondopili nimbeline anumu Mariando nimbei, "Piliwi! Goteni yu lipe mundurumumunga, Israel imbo awini oi imbi molorumuma altoke mainye punge, awini oi imbi naa molorumuma altoke imbi molombalo. Aku Yu molombalo wali imbonani kanokolio yu umbulu tiko ungu taka tondonge.

<sup>35</sup> Aku wali, ambomu, nu kape ulu te wendo ombalo. Nunge kameleno mindili pulumu tembalu. Imbo pulumunga konopu lope teko lengema mona ltendembalo," nimu.

<sup>36</sup> Gotenga ungu nimbe munduli imbona nimbe tirimo ambo profet te, yunge imbi Ana. Yu Israel talape Asa iye Panuelenga lemenu. Yu paa amboi lerimu. Yunge omenu iyemu waye molangili poinye kite yupoko pakera ombo purumu wali kolorumu kinye yu ambo waimu molorumu.

<sup>37</sup> Yu maina molopili yunge poinye 84 perimu. Yu ulke tempelema tiye naa kolopalie, waliwali kanona kau molopa ipu leli tangoli kape Gotenga imbi ambolopa kapi nimbe, wali awinimanga langi naa nomba Gote konge tepa kau molorumu.

<sup>38</sup> Simeononi Jisasindo ungu nimbe molopili eno moloringina kano ambomu yu ombalai Gotendo paa tereno nimu. Kano kinye Jerusalem imbona tepa limbeindo ombalo iyemu ombalo ningi nokoko moloringi imbonando, Ana yuni ungu moromo mele ungu mare nimbe tirimu.

*Josep kelepa Nasaretendo purumu temanemu*

<sup>39</sup> Josep Maria talo eloni Awilimunga ungu mane nimbe perimu mele pali pilko liko tekolio ningilimuni, elo Jisas kinye kelko kombu Galili pungo elonga ulke kombu Nasaret yando oringili.

<sup>40</sup> Ungulumu akopa awili lepa enge nimbe yunge konopu kekere nimbe molorumu. Goteni yu molopa kondopili nimbe mane ungu tirimu.

*Ungulu Jisas Ulke Tempelena pumbe terimu mele ungumu*

<sup>41</sup> Jisas anumu lapa talo Israel imbo-manga koro moloringi wai te, Gote Omba Israel Imboma Naa Topa We Kanopa Omba Purumu Waimu ningi, akumundo Pasova Waimu nimele, kano koro mololi waimunga poinye yaka nimbe wendo orumu wali elo ulke kombu awili Jerusalem olando puringili.

<sup>42</sup> Ungulu Jisas molopili poinye ki yupoko omba purumu wali Pasova wai akumunga kano teko puringili mele anumu lapa talo kinye Jisas kinye waye olando puringili.

<sup>43</sup> Pasova waimu pali pora nimu wali anumu lapa talo ulkendo pungili puringili kinye ungu Jisas anjo molorumu ulu elo naa kanoringili.

<sup>44</sup> Waye purumolo, imboma kinye oromo konopu leko, wali tendekumunga we pungolio ningilimuni, pele ipupene kala torumu kinye pungo elonga pulu lerimu imboma kinye we imboma kinye waye pungo moloringimando waliko pilko andoko kororingili.

<sup>45</sup> Yu naa kanoko likolio kinye Jerusalem altoko pungo kororingili.

<sup>46</sup> Koroko korokolio, pele wali yupoko tipemunga Gote popo toko kaloli ulke tempelena pungo kanoringili kinye yu akuna tuku molorumuna kanoko ltenderingili. Yu ungu manema pilko ningi tili iyema kinye waye moloringi, yuni enonga ungu ningima pilipelite, nendo ungu waltindipe molorumu.

<sup>47</sup> Yu enoni ningima pilipe ltimu mele kape, topondopa nimbe kondorumu mele kape, imbo moloringimani pilkolio yunge lipe manjili paa pepamo ningi pilko konopu liko munduko mini lteringi.

<sup>48</sup> Yu kano ulkena tuku molorumu pungo kanoko mini lteringili anumuni yundo nimbei, "Ungulumu, ilto kinye peya pamili naa oli, ambe temona tenioya? Na andopo koropo koropo kelepolio lanie ilto mini Itembolo," nimu.

<sup>49</sup> Kano kinye yuni anumu lapa talondo nimbei, "Elo kombuma pali ambe telka na andoko korongeleya? Na ya Aranga ulkena moromu konopu naa lengeleya?" nimu.

<sup>50</sup> Nalo yuni nimu ungu pulumu eloni naa liko manjiringili.

<sup>51</sup> Yu elo kinye Nasaret manyendo pumbelie nimumuni, elonga unguma pilipe tengen tipe molorumu. Yunge anumuni kano uluma pali konopuna panjipe pilipe molorumu.

<sup>52</sup> Jisas yu akopa awili lerimu kinye yu lipe manjili kekere nilipe orumu. Yu Goteni kape imbomani kape kanoko paa penga pilko moloringi.

### 3

*Jon Imbo No Ltindilimu omba terimu ungumu*

<sup>1</sup> Iye Taiberius Sisar, Rom gavmanemuni nokorumu kombumanga pali, yu iye nomi awilimu molorumu. Yu kano kombumanga bali Rom iye nomi awilimu molopili poinye 14 ombo pumbe poinye 15 tipemu wendo orumu wali yuaku tepa we molorumu. Kano poinyemunga Rom Iye Pontius Pailat kombu Judia imbomanga iye nokoli molorumu. Herot kombu Galili imbomanga iye nomimiu molorumu. Herot angenu Filip kombu Ituria kinye Trakonitis talo imbomanga iye nomimiu molorumu. Lisanias kombu Apilini imbomanga iye nomimiu molorumu.

<sup>2</sup> Enoaku kombuma nokoko molangei Anas kinye Kaifas talo Juda Imbomanga ningi Gote popo tondoringi iye nomi awili talo molangili. Sekaraia malo Jon kombu imbo naa pelina molorumu kinye Goteni i unguma ni puwi nimu wali Jon nilipe wendo orumu.

<sup>3</sup> Aku wali Jon yu pumbe No Jordan nekondo yakondo andopa imboma ungu mane tipelie nimbei, "Ulu pulu keri teremele manga konopu topele toko no lieio! Aku tengen kinye Goteni enonga ulu pulu kerima tiye kondopa komu tindimbelo," nimu.

<sup>4</sup> Aku kongonomu Jononi terimu mele oi Gotenga profet iye Aisaiani nimbe torumu buk akuna moromo mele i tepe, Imbo teni kombu imbo naa peli alako topa nimbelie nimbei, Awilimu ombalo aulkemu teko amenge tendeko yu andombalo aulkema tumbi tindieio!

<sup>5</sup> Mai kemboma kinye mulu kemboma kinye akuko kalakulu tiko, kolo ltemomanga akuko pe tiko, aulke anekale manekale teremoma toko tumbi tiko, aulke ola mainye purumoma warake tonge.

<sup>6</sup> Aku tengen wali Goteni lino molko kondangei nimbe lino molomolona tepla limbelo iye te lipe mundumbelo, kano iyemu linonga nimbe tendembalo

mele imbomani pali kanonge, nimo,  
(Ais 40:3-5)

nimu.

<sup>7</sup> Imbo awini Jon molorumuna yuni lino no ltindipili ningi ongei oringina kanopalie, Jononi eno iri topalie nimbei, "Eno imbo teko kenjili waimbe waloma, Goteni eno tepa tombai teremomungaaku ulu naa tepili kani eno kowa pungokolo toko no we lipeio ungu nari nimona oromeleya?

<sup>8</sup> Konopu topele tonge lemo enonga tengelulumuna aku ulu lipo ondopili. Enoni lino Abrahamenga kalopa ltimu imboma momromolo ningi aku teko naa neio. Nani enondo i tepo nio. Goteni kou imani lipelie Abrahamenga kalopa ltimu imboma manda apuwe timbelo.

<sup>9</sup> Goteni unjomna peke tombaindo i teli oi loimu ola lipo tumbi tipe angimo. Unjo mongo topa tukume naa pembaloma peke topa tipena kalombalo," nimbe Jononi aku tepa nimu.

<sup>10</sup> Kano ungu pilkolio kinyewaltindiko ningi, "Kinye lino ambe teamiliya?" ningi.

<sup>11</sup> Yuni enondo topondopa nimbei, "Wale pakoli talo noirimele imboma enoni imbo wale pakoli te naa noingema moke teko tienge! Langi kape aku tekola teaio," nimu.

<sup>12</sup> Kou takisi lili iyema kape no liemili ningi oringi. Yuni ungu niimumu pilkolio yundo waliko pilkolio ningi, "Ungu Mane Tili Iyemu, lino ambe temolo kinye Gote yuni lino kanopa penga pilimbelya?" ningi.

<sup>13</sup> Yuni enondo nimbei, "Eno kou takisi likolio gavman yuni kou i teko lieio nimbe mako topa timbelo mele lieio! Enoni kolo toko mare ola panjiko ltimele mele altokana lieio," nimu.

<sup>14</sup> Kano kinye ami iye mare yu walikopilkolio, "Lino kape ambe teamiliya?" ningi. Yuni topondopa nimbei, "Enoni imbomanga kou mone wapu lingendo imbo te tepa kenjilimu ningi ungu kolo naa toko koipeni we naa taio! Gavmanemuni eno kou timbelo mele liko nongo, takalikomo laio," nimu.

<sup>15</sup> Jononi terimu ulu kanokolio imbomanyundo konopu awini liko munduko, Goteni linonga ara kaue kamendo eno nokopa kondombalo iye te lipo mundumbu nirmiyeye Kraist kanomu i iyemunje ningi pilkomoloringi.

<sup>16</sup> Ningi pileringi ungu pilipelie Jononi topondopa enondo nimbei, "Nani imboma no kau ltindiro. Nalo iye te ombalomuni imboma tilipte nani no ltindiro mele Mini Kake Telimuni, kinye tipemu talo ltindimbelo. Aku iyemu yunge engemu olandopa, nanga engemu mainyendopa. Yu iye paa

awilimu, na iye mandopamu. Morombolo mele nembo: Kendemande imbomani enonga awilimunga kimbo su ka pilke tondoromele mele yunge aku tepo nani manda naa pilke tondombo.

<sup>17</sup> Yu rais wit tiltili polona rais wit lemoma tiltipelie rais wit mongoma noiro ulkena tuku mongoma mepo pumbo noipo, ilkema kinye wit unjo nurupilima kinye lipo maku topo tipe naa kumbulupe nomba pepa kau purumona kalambo nimbe yunge rais wit tiltili fokomu lipo ambolopa moromo," nimu.

<sup>18</sup> Aku tepa mele ungu awinima nimbe Jononi imboma konopu topele tangei konopu makinjipe ungu tukumemu nimbeitirumu.

*Heroteni Jon Imbo No Ltindilimu ka tirimu ungumu*

<sup>19</sup> Walite, pele, kombu Galili imbomanga iye nomi king Herot angenu iyemunga omenu ambo Herodias yu mangopa lipo ulu pulu keri lupe awini terimuma kinye Jononi nimbe para tipe yu iri torumu.

<sup>20</sup> Aku ulu keri terimanga lipo popo tipe te i tepa: Jon lipo ka ulkena panjirimu.

*Jononi Jisas imbo no ltindirimu ungumu*

<sup>21</sup> Heroteni Jon oi ka naa tipili imbo awini Jon no ltindipe molorumuna ongo no ltingi wali Jisas kape ombo no ltimu kala. No lipelie Gote kinye konge tepa ungu nimbe angilipelie muluna olando tipe kanorumaku wali

<sup>22</sup> Gotenga Mini Kake Telimu kera imili mele mainye ombo yu molorumuna orumu. Muluna ungu te wendo ombalie nimbei, "Nu nanga konopu mondoro malo. Nu kinye nani konopu noiro," nimu.

*Jisasinga lapali kolepalenga imbima*

<sup>23</sup> Jisas yu maina molorumu poiney 30 mele ombo purumu kinye yunge kongono pulu polopa terimu. Imbomani Jisasindo Joseponga Malo konopu leringi. Josep yunge lapa Eli.

<sup>24</sup> Elinga lapa Matat. Matatenga lapa Livainga lapa Melkai. Melkainga lapa Janai. Janainga lapa Josep.

<sup>25</sup> Joseponga lapa Matatias. Matatiasinga lapa Amos. Amosinga lapa Nahum. Nahumonga lapa Esli. Eslinga lapa Nakai.

<sup>26</sup> Nakainga lapa Mat. Matenga lapa Matatias. Matatiasinga lapa Semen. Semenenga lapa Josek. Josekenga lapa Joda.

<sup>27</sup> Jodanga lapa Joanan. Joanananga lapa Resa. Resanga lapa Serubabel. Serubabelenga lapa Sealtiel. Sealtielenga lapa Neri.

- <sup>28</sup> Neringa lapa Melkai. Melkainga lapa Adi. Adinga lapa Kosam. Kosamenga lapa Elmadam. Elmadamenga lapa Er.
- <sup>29</sup> Erema lapa Josua. Josuanga lapa Elieser. Elieseranga lapa Jorimu. Jorimunga lapa Matat. Matatenga lapa Livai.
- <sup>30</sup> Livainga lapa Simeon. Simeononga lapa Juda. Judanga lapa Josep. Josep lapa Jonam. Jonamunga lapa Eliakim.
- <sup>31</sup> Eliakimunga lapa Melea. Meleanga lapa Mena. Menanga lapa Matata. Matatanga lapa Natan. Natanenga lapa Iye Nomi King Devit.
- <sup>32</sup> Devitinga lapa Jesi. Jesinga lapa Obet. Obetenga lapa Boas. Boasinga lapa Salmon. Salmonenga lapa Nason.
- <sup>33</sup> Nasononga lapa Aminadap. Am-inadapenga lapa Ram. Ramonga lapa Hesron. Hesroninga lapa Peres. Peresinga lapa Juda.
- <sup>34</sup> Judanga lapa Jekop. Jekoponga lapa Aisak. Aisakinga lapa Abraham. Abrahamenga lapa Tera. Teranga lapa Neio.
- <sup>35</sup> Neionga lapa Seruk. Serukenga lapa Reu. Reunga lapa Pelek. Pelekenga lapa Eber. Eberenga lapa Sela.
- <sup>36</sup> Selanga lapa Kenan. Kenanenga lapa Arpaksat. Arpaksatenga lapa Siem. Siemenga lapa Noa. Noanga lapa Lamek.
- <sup>37</sup> Lamekenga lapa Metusela. Metuse-langa lapa Enok. Enokonga lapa Jaret. Jaretenga lapa Mahalalel. Mahalale-lenga lapa Kenan.
- <sup>38</sup> Kenanenga lapa Enos. Enosinga lapa Set. Setenga lapa Adam. Adamenga lapa Gote.

## 4

*Kuro kerimanga nomi Sataneni Jisas keri ulu tepili nimbe tope tirimu temanemu*

<sup>1</sup> Jisas no Itimu wali Mini Kake Telimu yu kinye ombo molorumu kano kinye Mini Kake Telimu yunge konopuna paa molopa tenepeya tepili No Jordan tiye kolopalie, Mini Kake Telimuni yu kombu imbo naa pelina mepa purumu.

<sup>2</sup> Akuna Jisas kuro kerimanga nomi Satan ombo yu keri ulu tepili nimbe tope tipili wali 40 ombo purumu. Kano wal-imunga kere langi tendeku kape naa noli we molopalie, wali 40 ombo purumu kano kinye yu engelge kolopa molorumu.

<sup>3</sup> Kano kinye Satan yu molorumuna ombo yu topoperope tipelie nimbei, "Nu Gotenga Malo lemo i kouma bret apuwe lepili niwi," nimbu.

<sup>4</sup> Nalo yuni topondopa nimbei, "Gotenga Bukuna ungu nimbe peremo mele i tepa:

Imboma kere langi kau nongo molonge ulumuni eno manda tepa koinjo naa mondombalo, (Lo 8:3)

nimbe peremo kanomu," nimbu.

<sup>5</sup> Kano kinye Sataneni Jisas yu lipe mepa pumbe kombu paa ola tengen anjipelie, yu mai kombuma pali walitikale lipe on-dopalie,

<sup>6-7</sup> yundo nimbei, "I kombumanga pali engema kinye mele pengama kinye Goteni nando nokowi nimbe oi tirimu. Ima nani imbo te timbo hindu lemo manda timbo. Nu na popo toko nanga imbi ola ltindinio lemo i engemu kinye mele pengama kinye nu lieni timbo," nimbu.

<sup>8</sup> Kano kinye Jisasini yundo nimbei, "Gotenga Bukuna ungu nimbe peremo mele i tepa:

Gote enonga Awilimu kau popo toko imbi ola lindiko, yunge kongonomu kau teko molangei, (Lo 6:13) nimbe peremo kanomu," nimbu.

<sup>9</sup> Kano kinye Satan yuni yu lipe ulke kombu awili Jerusalem akuna mepa pumbe, Gote popo toko kaloli ulke tem-pelemunga mepa pumbe, akumunga paa ola tulepena mepa pumbe anjipelie, yundo nimbei, "Nu Gotenga Malo lemo Goteni nu lipe tapondombalo kani po ning mainye puwi!"

<sup>10</sup> Gotenga Bukuna ungu nimbe peremo mele i tepa:

Gote yunge mulu kombuna enselemani nu ongo nokangei nimo.

<sup>11</sup> Enoni nu kou teni naa topili ning nu enonga kimani oko polko lingi, (Sng 91:11-12)

nimbe peremo. Aku tepa nimu kani pilkolio aku teko tewi," nimbu.

<sup>12</sup> Jisasini yundo topondopalie nimbei, "Gotenga imbomando ungu te peya nimbe peremola. Akumu i tepa:

Gote enonga Awilimu enoni yu manda manjiko naa kanaio, (Lo 6:16) nimbe peremo kanomu," nimbu.

<sup>13</sup> Kuromanga nomimuni Jisas tope tipe pora tipelie, altopo yu manda tope timbo wali tengen ombo konopu lepa yu tiye kolopa purumu.

*Jisas kombu Galili Yunge kongono pulu mondopa terimu ungumu*

<sup>14</sup> Aku wali Mini Kake Telimunga enge ambolopalie Jisas kelepa kombu Galilindo yando orumu wali Kombu Galili akuna andopa terimu mele kombumanga pali yunge temanemu toko tilko andoringi.

<sup>15</sup> Yuni Juda Imboma nombeya teko Gotenga ungu pileringi ulkemanga pumbe imboma ungu mane tirimu kinye imbo-mani pali yu kapi ningi.

*Jisas Yunge kombu tendeku imbomaniyu umbulu tikolio tongei teringi ungumu*

<sup>16</sup> Jisas kombu Galili Imboma ungu mane tilipe andopalie, yu ulke kombu Nasaret oi molopa awi lerimuna kelepa orumu. Ombaliye Juda Imbomanga koro moloringi wali kinye kombumanga pali enonga maku toko Gotenga ungu pileringi ulkemanga waliwali purumu mele Nasaret imboma Gotenga ungu pileringi ulke akuna aku tepe purumu. Aku wali yuni na bukumu kanopo nemboi nimbe ola angilerimu.

<sup>17</sup> Gotenga ungu moromo bukuma nokoruru iyemuni Gotenga profet iye Aisaiani koro oi torumu bukumu lipe tirimu. Jisas yuni akumu lipe tukundo ungu molorumu te kanopalie nimbei,

<sup>18</sup> "Awilimunga Mini Kake Telimu na kinye moromomu yuni nando nimbei, Imbo koropama temane pengamu toko tikono, ka ulkena peremele imbomando wendo waio ningono, mongo keri leli imbomando imbo mongo angilipili kanaao ningono, mindili nongo moromele imboma mindili naa nongo, molko kondao ningono,

<sup>19</sup> Kinye i waina Awilimuni imboma kanopa kondo kolombalo waimu wendo oromo ningi tilko andowi nimbe Mini Kake Telimuni aku tepe iye te imbi topalie nimu." (Ais 61:1-2)

<sup>20</sup> Ungu akumu buk kanopa nimbe pora tipelie bukumu altopa panga tepe bukumu nokoruru iyemu tipe, ungu te nemboi nimbe Jisas yu mainye molorumu. Imboma pali yu kau neme neme ningi kanoko moloringi.

<sup>21</sup> Kano kinye yuni enondo nimbei, "Gotenga ungu buk kanopo nindu pilinge ungumunga Aisaiani wendo ombalo oi yundo mele, kinye wendo oromo," nimu.

<sup>22</sup> Moloringi imbomani yu iye pengamu, yu paa teremo ningi yu nimu mele pilkolio paa nimbe kondoromo ningolio konopu awini liko munduringi. Nalo mareni ningei, "Yu Josep malo kau, we iyere molo," ningi yu konopu talo teko leringi.

<sup>23</sup> Jisasini yu molopa nimu ungu pilkolio yuni kolo toromonje ningi pilko yundo konopu keri panjiringi ulu lipe manjipelite enondo nimbei, "Ungu iko toromelemanga te nando i teko ningei konopu lteo. Nu paimbo dokta morono lemo nu kuro tombalo walimu nunu teko koinjo liwi. Nando ningei, Nuni ulke kombu Kaperneam ulu enge nilima terinu pilerimulu mele ya nunge pulu kombu Nasaret akuna aku teko tewi ninge," nimu.

<sup>24</sup> Nilipe pumbelie nimbei, "Nani enondo paimbo i tepo nimbo tiro. Ulu pulu te teremele mele i tepe: Gotenga nimbe munduli ungu nili profet iye teni yunge

pulu kombumanga imbomando ungu nimbe tirimo kinye naa pilko liko liko tui tirimele.

<sup>25</sup> Nani enondo i tepo paimbo nimbo tiro. Elaija kinye Elisa taloni teringili mele nembo! Elaija oi Gotenga ungu nimbe mundulima imboma nimbe tipe molopili ulu te wendo orumumu nembo! Goteni lo naa opili nimu kinye poinye yupoko kelepa oli kite talo pakera lo naa ombo engele lerimu. Kano walimunga Israel kombuna tukundo ambo wai pulumu engele kolko moloringi.

<sup>26</sup> Aku wali Goteni aku ambo waima Elaijani tapopili nimbe naa lipe mundurumu. Nalo Israel tawendo lerimu kombu Saidon ulke kombu Sarefat ambo wai te tapopili nimbe akuna lipe mundurumu.

<sup>27</sup> Gotenga profet iye Elisa molorumu kinye Israel kombuna tukundo imbo awini kuro kendi norumu, nalo eno pali tendeku kape koinjo naa puringi, kuro kendi nomba we perimu. Kombu lupe Siria nili iye Naman kau kuro kendi norumu kinye Elisani yu tepe koinjo ltimu," nimu.

<sup>28</sup> Aku tepe nimu ungu pilkolio Gotenga ungu pileringi ulkena tukundo moloringi imboma pali paa mumindili koloringi.

<sup>29</sup> Mumindili kolkolio ola angilko yu ulke kombuna wendo toko kiri tiko munduko, enonga ulke kombu lerimu kembona meko pala pungolio waruna toko mainye mundungei teringi.

<sup>30</sup> Nalo yu eno maku toko angileringga takapunena eno tiye kolopa yu purumu.

*Iye te kuro keri te konopuna molorumu kano kuromu Jisasini topa makororumu*

<sup>31</sup> Aku wali Jisas yu kombu Galili ulke kombu te Kaperneam nili akuna mainyendo purumu. Akuna Juda Imbomanga koro mololi wali sabat ningi kano walimunga Jisas Juda Imboma maku toko Gotenga ungu pileringi ulke kanona tuku pumbe ungu mane tirimu.

<sup>32</sup> Yu imbi mololi iyemani pipili naa kolko ungu enge ningi nimele mele aku tepe nimbe ungu mane tirimumunga imbomani pilkolio konopu liko munduringi.

<sup>33</sup> Kano kinye enonga ungu pileringi ulkena iye kuro keri te yunge konopuna molorumumuni ungu niwi nimbe tope tirimuna are nimbeline nimbei,

<sup>34</sup> "Ulke kombu Nasaret Jisas, nu lino kinye ambele ulumu teni onioya? Nu lino toko kondoni onioya? Nani nu lipo manjiro. Nu Gotenga Iye Kake Telimu," nimu.

<sup>35</sup> Jisasini kano kuromu iri topalie yundo nimbei, "Nu ungu naa ningi ongo wendo pa," nimu kano wali kuro kerimuni kano iyemu topa mainye mundupelie wendo

omba purumu. Iyemu yu ulure naa terimu, we manda molorumu.

<sup>36</sup> Jisasini aku terimu ulu kanokolio imboma araya ningi, mini lteko, enonganano nendo yando ungu toropo tokolio ningei, "I ulu ambele te teremonje? Ulu koinjo te wendo oromo lepamo. Imbi molopa enge peli iyemuni teremo mele i iyemuni kuro-mando kape nimo wali kano kuroma yunge ungu pilko tengen tiko wendo oromele kani," ningi.

<sup>37</sup> Kano wali, Jisas molopa terimu uluma anjo anjo temane toliko andoringina kule kule lerimu kombumanga imboma pali pileringi.

#### *Jisasini Pitanga bamu ambomu tepa koinjo ltimu*

<sup>38</sup> Gotenga ungu pileringi ulke kanomu Jisas tiye kolopa pumbelie, Saimononga ulkena tuku purumu. Akuna Saimononga bamu ambomu kuro topalie kangi tipe topa lerimuna Jisasindo liko tapowi ningi wali pileringi.

<sup>39</sup> Aku wali yu lerimuna pumbe angilipelie kuro pora niwi nimu wali kangi tipe torumu ulumu pora nimu. Kano ambomuni tumbi tipe ola angilipie wendo ombalie, oringi iyema langi tipe nokopa molorumu.

#### *Jisasini imbo awini tepa koinjo ltimu*

<sup>40</sup> Aku walimunga ipupene, ena pepumbei purumu kinye, kuro lupe lupe torumu imboma Jisas molorumuna meko oringi kano wali aku imboma eno yu mele mele kini noindipelie eno pali tepa koinjo ltimu.

<sup>41</sup> Konopuna kuro keri wangorumu imboma waye oringi. Kano kuro kerimando ongo wendo paio nimu wali ongo wendo pungo ru ningolio ningi, "Nu Gotenga Malo morono lepamo," ningi. Kuroma enoni yuaku teko imbi lekolio yu Goteni Imboma nokopa kondombalo iye te mundumbelo nimu iye Kraist ningi like manjiringi kala yuni eno iri topa na moro mele imbomania naa pilengei nimbe enonga kerema pipi tirimu.

#### *Jisas Galili kombu ungu nimbe tilipe andorumu*

<sup>42</sup> Ipu leli oi Jisas ola angilipie penando pumbe kombu ku leli tengen purumu kano wali imbo pulumu yu koroko kanoko ltendekolio ningi, "Lino peya kamukumu molamili! Tenga naa puwi," ningi walikopileringi.

<sup>43</sup> Yuni enondo topondopa nimbei, "Waye naa molomolo. Ulke kombu lupema waye pumbo Gote omba iye nomi king molombalo ungu pengamu nimbo tilipo andombo. Akumunga na maindo lipe mundurumu," nimu.

<sup>44</sup> Aku tepa nimbeline yu Galili kombu ulke kombu lupe lupemanga pumbe Juda imboma liko maku toko Gotenga ungu pileringi ulkemanga pumbe kano ungu pengamu nimbe tilipe andorumu.

## 5

#### *Iye mare pulu polko Jisas lombili andoringi*

<sup>1</sup> Walite, Jisas nomu Genesaret, aku nomu kulendona angilipie imboma Gotenga ungumu nimbe tirimu kinye pilingeindo eno yu angilerimuna pungo maku toko nondoko nondoko pungo molko pileringi.

<sup>2</sup> Kano wali yuni nomuna andoli sip talo nomu kulendona lerimu kanopalie, oma lili iyema oi nomu kulendona wendo pungo enonga oma lili munema kulumie toko moloringina kanorumu.

<sup>3</sup> Sip te Saimon Pitanga, akuna tukundo pumbelie yuni yundo walipe pilipelie nimbei, "Sipimu alaye kolte pera tiko nomu tukundo munduwi," nimu. Mundurumu wali aku sipimunga tuku yu mainye molopalie, no kulendona maku toko moloringi imboma ungu mane tirimu.

<sup>4</sup> Aku ungu nimbe pora tipelie yuni Saimonondo nimbei, "Sipimu nomu imunana panjiko meko pungolio oma lingeingdo oma lili wale munema nona mainye munduwi," nimu.

<sup>5</sup> Saimononi topondopa nimbei, "Iye nomimu, tumbulu tendekumunga oma lili kongono enge nimbo tepo molopo kombu tangoromolo nalo oma te paa naa limolo. Nalo nuni aku teko ungu nino kani munemu nona mainye mundembo," nimu.

<sup>6</sup> Munema nona mainye munduringi kinye oma pulumu munemanga tukundo ongo peringi kinye munema kunduko sipina tukundo lingei teringi wali tungu nimbei terimu.

<sup>7</sup> Aku wali enoni enonga oma lili kongono peya teli iyema, sip tenga lupe moloringima ongo liko tapangei waio ningi. Oringi kinye sip talo peya peko tiringi umbuni tepea nona mainye pumbe terimu.

<sup>8</sup> Saimon Pitani aku ulumu kanopalie Jisasinga kumbekerena omba mainye tamalu pepalie nimbei, "Iye Awili, na ulu pulu keri teli iyemu. Nu na kinye kopu teko naa molko, puwi," nimu.

<sup>9</sup> Yu kinye yu peya moloringima kinye oma pulumu walitikale tangoli ltingi ulu kanokolio eno pungu pungu ningo mini lteringili Saimononiaku tepea nimu.

<sup>10</sup> Sebedinga malo Jems kinye Jon talo elo Saimon Pita kinye kongono tendekuna teringili iye talo, elo peya mini lteringili.

Kano kinye Saimononi nimu ungu pilipelie Jisasini yundo nimbei, "Nu pipili

naa kolowi! I teko oma ltino mele aku teko nanga imboma ltinden," nimu.

<sup>11</sup> Aku wali enonga sip talo nomu kulendona meko wendo ongolio, sip talo melema pali lepili tiye kolko Jisas yu lombili puringi.

*Jisasini kuro kendi norumu iye te tepa koinjo ltimu*

<sup>12</sup> Kombu Galili ulke kombumanga tenga Jisas molorumu kinye iye te kuro kendi awili tepa nomba perimumu ombo Jisas kanopalie kumbekerena komongo topa pondopa mainye molopa yu konge nimbe nimbei, "Awilimu, na Koinjo pamboi konopu lenio lemo nuni na manda teko koinjo lieni," nimu wali

<sup>13</sup> Jisasini kano iyemu kini ambolopalie yundo nimbei, "Nu koinjo pani konopu lteo kani koinjo puwi," nimu. Aku tepa nimu wali kuro kendimu walitikale nomba kelerimu.

<sup>14</sup> Jisas yuni kano iyemundo ungu enge nimbelie nimbei, "Nuni iulu teromu imbo tendo kape paa naa niwi! Tumbi tiko pungo Gote popo tondoli iyemu nunge kangimu liko ondowi. Na altope kake tepili molto kani, ning Mosesini torumu bukumunga tukundo Goteni tewi nimbe panjirimu moromo mele pilko liko teniondo Gote popo toko kalowi nimu meleme Gote popo tondoli iyemundo kalowi ningyo yu tieni! Pele imbomani nu kanokolio yu paimbo kake tepili moromo ltemo ningyo pilengei kani nio mele i teli oi tepuwi," nimu.

<sup>15</sup> Nalo yuni terimu mele anjo anjo imbo pulumuni pilkolio, yu molorumuna tukundo tukundo ongo yu ungu penga nimumu pilengei ongo, yuni eno tepa koinjo lipili ningyo oringi ulu kanopalie

<sup>16</sup> wali mare yu eno oringina tiye kolopa kombu imbo naa peli tengu pumbe Gote kinye ungu nimu.

*Jisasini kimbo ki kololi iyemu tepa koinjo ltimu*

<sup>17</sup> Walite Jisas yuni imboma ungu mane tipe molorumu. Awilimu imboma tepa koinjo lili engemu yu pepili molorumu. Farisi iyema kinye, Gotenga ungu mangan pulumu pilko mane tili iyema kinye, kano Juda Imbomanga iye nomima yu ungu mane tirimumu pilko moloringi. Kano iyema, kombu Galili ulke kombumanga moloringima kinye, kombu Juda ulke kombumanga moloringima kinye, ulke kombu awili Jerusalem moloringima kinye, Jisas molorumuna ongo maku toko yu ungu mane tirimumu pilko moloringi.

<sup>18-19</sup> Yu molorumuna iye kimbo ki kololi iye te taropelana ola lepili iye mareni meko ongei oringi. Imbo pulumu akuna tenegepeya teko angileringi ulkena tuku Jisas molorumuna nondoko meko ongei

pereko aulke te naa kanokolio, ulke tulepena pala pungo yu molorumuna turu toko ulkemu tekirikolio kimbo ki kololi iyemu taropela pali ka anjiko Jisas angilerimuna mainye munduringi.

<sup>20</sup> Enoni Jisas i iyemu manda tepa koinjo limbelo ningyo pilkolio yu meko oringi ulumu Jisas yuni kanopa pilipelie kano iyemundo nimbei, "Nanga iyemu, nuni ulu pulu keri terinu nunge konopuna perernoma lipo ltendero," nimu.

<sup>21</sup> Farisi iyema kinye, Gotenga ungu mangan pulumu pilko mane tili iyema kinye, Jisasini aku tepa nimu ungu pilkolio pilko keri pilko konopu kimbo tikolio, "I iye Gote ungu taka tondoromo iyemu nariya? Imbomani ulu pulu keri teremelema lipo ltendambo narini manda nimbelyoa? Goteni kau manda teremo," ningyo pilko konopu kimbo tiringi.

<sup>22</sup> Kano kinye Jisasini eno aku teko konopu kimbo tiringi mele lipe manjipelie "Enoni aku teko ambe temona konopu kimbo tirimeleya?

<sup>23</sup> Iiyemundo nunge ulu pulu kerima lipo ltendambo. nimbo kinye eno ulu te naa kanokolio we nimo konopu lengenje? Molo ola angilko kimbo kongono teko andowi nimbo kinye yu ola angilimbelona mona lembalo manda kanokolio aku tepa manda tembaloo konopu lengeya?

<sup>24</sup> Nalo Iyemunga Malo enge peremomuni ya mai kombuna imbomanga ulu pulu kerima lipe ltendembalo manda tembaloo ningyo kanoko imbi tiengei nimbo, ungu nimbomuni iyemu tepo koinjo liembói," nimu. Aku tepa nimbelyie kimbo ki kololi iyemundo nimbei, "Nu ola angilko nunge tilimu, liko meko ulkendo puwi," nimu.

<sup>25</sup> Kano kinye yu ola angilipe tamburumbu tilimu lipe mepalie, eno kanoko molangei ombo pena pumbelie Gote kapi nilipe ulkendo purumu.

<sup>26</sup> Yuaku terimu ulu kanokolio eno pungu pungu ningyo mini lteko Gotenga imbi ola ltindiko kapi ningolio, "Lino iulu wendo oromo kandomolomu ulu paa te lupe lepamo. Oi walite aku tepo ulu te naa karomolo," ningi.

*Jisasini iye Livai, Na lombili owi nimu*

<sup>27</sup> Aku wali Jisas pena pumbelie, iye te, yunge imbi Livai, kou takisi lipe molorumuna kanopalie yundo peya pambilis lombili owi nimu kano kinye

<sup>28</sup> Livai ola angilipe kou takisi melema we lepili tiye kolopa yu lombili purumu.

<sup>29</sup> Livaini yunge ulkena Jisasinga langi awili te kandorumu. Akuna kou takisi lili iye pulumu kinye, we imbo mare kinye,

Jisas Livai talo kinye kano langimu peya nongo moloringi.

<sup>30</sup> Aku teringina kanokolio Farisi iyema kinye, Gotenga ungumanga pulumu pilko mane tili iyema kinye, kano Juda Imbomanga iye nomimani Jisas yunge lombili andolimando ningei, "Eno kou takisi lilia kinye we ulu pulu keri telima kinye eno popo tiko molko ambe temona langi noromeleya?" ningi waltindiringi.

<sup>31</sup> Aku teko ningi ungu pilipelie Jisasini enondo nimbei, "Koinjo moltomolo konopu Itemele imboma dokta moromona naa purumele. Kuro toromo ningi pimele imboma kau dokta moromona purumele kanomu.

<sup>32</sup> Nani imbo toya tolima na molombona wangei nimboindo mai kombuna naa oru, molo. Nalo ulu pulu keri telimbaando eno ulu pulu keri teremele uluma tiye kolko umbulu tiko na molombona wangei nimboindo oru," nimu.

*Imbomani walite walite kere langi mi toko naa noromele ungumu*

<sup>33</sup> Imbo mare ongo Jisasindo ningei, "Jononga lombili andolima kinye Farisi iyema lombili andolima kinye takiraki langi mi toko naa nongolio Gote popo toromele kanomu. Nalo nunge lombili andolimani aku teko naa teremele, kere langi we noromele," ningi.

<sup>34</sup> Aku teko ningi ungu pilipelie Jisasini enondo ungu iko te topa nimbei, "Imboma iye teni ambo limbeimunga langi nonge kalombalumundo ongo maku toromele kinye ambo limbelo iyemu eno kinye moromo wali eno mi tokolio langi naa nomolo manda ningeya? Manda naa ninge.

<sup>35</sup> Altoko, ambo limbelo iyemu eno molongena ongo wendo linge kinye kano walmanga kau, konopu keri panjiko langi naa nongeindo mi tonge. Oi manda molo," nimu.

<sup>36</sup> Jisas yuni aku ungu nimbeline, ungu iko talo topalie nimbei, "Maminye oi te tungu nimo kinye linoni maminye koinjo kopili te lipo tungu nimomunga naa topo tamburumolo. Imbo teni aku tepa topa tambulkanje kano maminyemu nona panjingue kinye maminye koinjo kopilimbu kelo lepa li nimbeline maminye oimu kelepa ora tolka. Koinjomu kinye oimu talo popo tiko manda naa tambulunge.

<sup>37</sup> Linonga imbo teni kape kongi meme kangimuni teli mingi oi tengen no wain koinjo naa koromo. Imbo teni mingi oi tengen no wain koinjo kolkanje kano no wainimu mingina tukundo pepalie ekele tembalu kinye kano mingi oimu naa akopa tungu nilka. Kano kinye nomu kape mingimu kape kamukumu bembo nilka.

<sup>38</sup> Akumunga no wain koinjo kongi meme kangimuni teli mingi koinjona kau koromo.

<sup>39</sup> Iye teni no wain oi te nombalie kano wain oimu nomba penga pilipelie no wain koinjo waka naa kolombalo," nimu.

## 6

*Juda imbomanga koro mololi wali Sabat nimu ungumu*

<sup>1</sup> Walite, Juda imbomanga koro moloringi wali sabat nili tengen, Jisas kinye yu lombili andolima kinye rais wit poinyemanga ongo puringi. Ongo pungolio kano lombili andolimani rais wit mongo mare nongeindo inie toko kikulu торинги.

<sup>2</sup> Aku teringi ulu kanokolio Farisi iyemani Jisas yundo ningei, "Piliwi! Koro moromolo wali Sabatemunga kongono naa teangei nimbe peremo ungu manemu ambe telka nunge lombili andoli iyemani toko tangondokolio aku teko teremeleya?" ningi.

<sup>3</sup> Yuni enondo topondopa nimbei, "Eno Gotenga Bukuna tukundo anda kolepa iye Devitini terimu mele nimbe moromo temanemu kanokolio kano temanemunga pulumu naa pimeleya? Devit kinye yu peya buringimani engele kolkolio,

<sup>4</sup> yu Gotenga ulkena tukundo pumbe, Gotenga kumbekerena lerimu bret lipe nomba, yu kinye peya puringima tirimuna noringi. Kano bretemanga Goteni ungu mane tipelie nimbei, 'We imbomani paa naa nangei! Israel imbomanga ningi Gote popo tondoli iyema kau nangei,' nimbe peremo kanomu," nimu. Aku tepe nimbeline nimbei,

<sup>5</sup> "Iyemunga Maloni Sabat walimanga Awilumu moromo akumunga imboma teangei unguma manda nimbelo," nimu.

*Sabat wali tengen Jisasini iye ki kolopa taipo toli te tepe koinjo ltimu*

<sup>6</sup> Altopa walite, koro mololi wali Sabat tengen, Jisas omiba Juda imboma liko maku toko Gotenga ungu pileringi ulkena tuku pumbeline ungu mane tirimu. Akuna iye te molorumu, yunge imbo kindo kolopa taipo toli molorumu.

<sup>7</sup> Kano wali Farisi iyema kinye, Gotenga ungumanga pulumu pilko mane tili iyema kinye, kano Juda imbomanga iye nomima Jisasini Sabat walimunga imbo te tepe koinjo limbelonje naa limbelonje ningi yu liko kondoko moloringi. Koinjo limbelo kinye yu kot tendamili ningi eno aku teko konopu leringi.

<sup>8</sup> Eno konopu leringi mele lipe manjipelie Jisasini kano ki kolopa taipo toli iyemundo nimbei, "Nu ya imboma kanongeindo ongo ola angiliwi," nimu kinye iyemu yu akuna omiba ola angilerimu.

<sup>9</sup> Kano kinye Jisasini enondo nimbeindo, "Eno ungu te walipo pilembo! Koro mololi wali sabatemunga ambele ulu manda temoloya? Imboma tepo kondomolonje molo tepo kenjimoloya? Tepo koinjo limolonje molo topo kondomoloya? Ambele ulu manda temoloya?" nimu.

<sup>10</sup> Eno pali yuni neme neme nimbe kanopa aku tepa nimbeline ki taipo topa kololi iyemundo nimbei, "Ki tinio tiwi," nimu kinye yu ki tinio tirimu kano wali kimi walitikale penga lerimu.

<sup>11</sup> Aku terimu ulu kanokolio mumindili awili teko kolko enoni enono nendo yando ungu toropo toko ningei, "Tepa kenjirimumunga yu ambe teamiliya?" ningoo moloringi.

*Jisasini kongono lipe mundumbelo iyema kanopa ltimu*

<sup>12</sup> Walite ipu leli Jisas yu Gote kinye ungu nimbeindo mai kembo tengah ola pumbe Gote kinye ungu nimbe konge tepe molopili kombu tangorumu.

<sup>13</sup> Ipu leli oii yu lombili andolimando waio nimbeline enonga iye ki yupoko nanga kongonomo teangei lipo mundembu nimbeline aku iye pokolipe kanopa lipelie enondo nimbei, "Eno nanga lipo munduro aposelma molangei," nimu.

<sup>14</sup> Kano iye aposel ki yupokonga imbima i tepe: Saimon yunge imbi te Pita, yunge angenu Andru, Jems kinye angenu Jon talo, Filip, Bartolomyu,

<sup>15</sup> Matyu, Tomas, Alfiusinga malo Jems, lino Israel imboma linongan gavman molamili ningi talape iye Saimon,

<sup>16</sup> Jems malo Judas kinye, Jisas altopa lipe opa pule iyemanga kindo tirimu iye Judas Iskariot, aku iyema Jisas yunge aposelma.

*Jisasini imbo pulumu tepe koinjo ltimu*

<sup>17</sup> Kano wali yu kinye yunge aposel iyema kinye mai kembona mainye oringi wali yu lombili andorangi imbo awini kinye, kombu Judia moloringi imbo awini kinye, ulke kombu awili Jerusalem peringi imbo awini kinye, nomu kuta kulendo lerimu ulke kombu Tair kinye Saidon kano ulke kombu talonga peringi imbo awini kinye, yu molorumuna tukundo tukundo ongo liko makutoringi.

<sup>18</sup> Yu temane penga topa, ungu mane tirimuna pilingeindo ongo, yuni eno kuro torumuna tepe koinjo lipili ningi oringi. Enonga imbo mare konopuna kuro keri perimuma oringi kinye tepe koinjo ltimu.

<sup>19</sup> Imboma tepe koinjo lili engemu yu pepili molorumuna eno oringima pali yu ambolamili ningi yu molorumuna nondoko nondoko oringi. Aku wali ongo yu amboloringi kinye kano engemuni eno pali tepe koinjo ltimu.

*Lino tono kolopo molomolo ungu pulumu kinye molopo kenjimolo ungu pulumu kinye Jisasini yunge lombili andolimando nimbe tirimu*

<sup>20</sup> Kano kinye Jisas yu lombili andoringima kanopalie enondo nimbei, "Eno koropa purumuma Gote enonga iye nomi kingimu molopa eno nokromomunga eno malo.

<sup>21</sup> Eno kinye engele teremoma eno altoko walite olo tembalomunga eno malo. Eno kinye kola teremelema altoko walite owe tengemunga eno malo.

<sup>22</sup> Iyemunga Malo ipuki tiko moromelema, eno nanga imboma moromele-munga we imboman eno mumindili kolko yokeya tendeko enondo eno imbo keri ningi kenjiko, enonga imbima ningi keri ltendenge kinye eno malo.

<sup>23</sup> Aku ulu tengah wali Goteni linonga mele kande kande mulu kombuna noindirimona limolo konopu lekolio eno tono kolko pende pende teko kimbo mundeo. Ambe temona eno teko kenjirimele iyemanga lapalini aku teko oi Gotenga ungu nimbe mundurumu profet moloringimando aku ulu teringi. Eno iye profetema kinye tendeku tiko molonge.

<sup>24</sup> Nalo eno kamako ltemelema, kinye eno oi mele noirimelangka konopu tiko moromele, altoko aku teko naa molongemunga konopu keri panjiko molonge!

<sup>25</sup> Eno kinye olo teremoma altoko walite eno engele kolongemunga konopu keri panjiko molangei! Eno kinye owe teremelema altoko walite eno kola tengemunga konopu keri panjiko molonge!

<sup>26</sup> We imboman pali eno kapi ningi enondo imbo penga waliwali ningema eno konopu keri panjiko molangei! Kano imboman enondo ungu pengama ningi kapi ninge mele oi eno naa molangei koro oi Gotenga nimu ungu naa pilko we kolo toko imbo ningi tiringi imbo profetemando i imbomanga lapali kolepalemani aku teko ningila," nimu.

*Lino imboma konopu mondamili mele Jisasini mane tirimu*

<sup>27</sup> Kano kinye Jisasini nimbei, "Ungu te kape nembo pileio! Eno enonga opa pule kondo kolko, eno teko kenjirimele imboma teko kondoko teaio!

<sup>28</sup> Enondo Imbo keri ningi molko kenjengei nimele imbomando imbo penga ningi molko kondangei neio! Eno mindili tirimeli imboma Goteni lipe tapondopilili ningi konge tendao!

<sup>29</sup> Kumbekere ekondonga larauwe tombalo wali topele toko ekondo kape larauwe topili neio. Nunge ali wale limbelo

imbomu tukundo pakonio wale pakoli peya tiwi!

<sup>30</sup> Melema tiye ningi waliko pilinge imboma pali melema we tiwi nunge melema limbelo imbonundo altoko nanga yando tiwi ningi naa niwi!

<sup>31</sup> Nuni imbonani na i teko teangei konopu lteno mele, eno nendo aku teko tewi!

<sup>32</sup> Eno yando kondo kolonge imboma kau eno nendo aku tenge lemo ulu ambelemu teko kondongeya? Imbo ulu kerima teremelemani kape nendo yando aku ulu teremele kala.

<sup>33</sup> Enondo yando ulu wamba tenge imbonando kau nendo aku tenge lemo ulu ambelemu teko kondongeya? Ulu kerima teremele imbonani enonga koni imbonanga melema tiko yandoaku tepa tipili konopu leko melema tirimele kala.

<sup>34</sup> Nanga melemu altopa yando pundu topili konopu lekolio aku imbonando kau melema tingi lemo aku ulu ambelemu teko kondongeya? Ulu kerima teremele imbonani enonga koni imbonanga melema tiko yandoaku tepa tipili konopu leko melema tirimele kala.

<sup>35</sup> Aku teko molo. Nalo i ulu teaio. Enoni enonga opa pulema kape kondo kolko teko kondoko melema nendo yando pundu kalomo konopu naa leko aku ulu teaio. Aku teko tenge wali Gote Olandopamunga bakulumola molkolio, yuni eno mele awinima timbelona linge. Gote yuni maina imbona aku ulu tepa moromola. Yu teko kenjirimele imbona kinye, yundo paa tereno naa nimele imbona kinye kanoma tepa penga tirimo.

<sup>36</sup> Enonga Lapa Gote teko kenjirimele imbona kape yu aku tepa kondo kolopa we tepa penga tirimo mele eno teko kenjinge imbona aku teko kondo kolko teko pengatiego," nimu.

#### *Imbo te yu imbo kerimu ningi moke naa teaio*

<sup>37</sup> Jisasini nimbei, "Imbo tenga ulu tembaloma imbo teni naa apurupili! Imbonanga uluma naa apurunge lemo Goteni enonga uluma kape naa apurumbelola. Imbo lupemando i teko teko kenjiringi ningiaku teko naa neio! Aku teko naa ninge wali Gote yuni enondoaku tepa naa nimbelo. Enoni imbo lupemanga ulu kerima we tiye kondaio! Aku wali enonga ulu pulu kerima Goteni we tiye kondombalo kala.

<sup>38</sup> Enoni imbo lupema melema tieio! Aku wali Goteni eno tepa timbelo. Melema timbeindo koltalo naa timbelo, olandopa olandopa timbelo. Enoni anjo tingi ulu kanopalie eno yandoaku tepa timbelola," nimu.

<sup>39</sup> Jisasini enondo ungu iko te topa nimbei, "Mongo akuli iye teni mongo akuli iye te aulke manda lipe ondombaloya? Peya talo muru manda naa tolkaya?

<sup>40</sup> Ungu mane pilko mololi imboma enonga ungu mane tili iyemu liko naa ongondoromele. Oi ungu mane pilko pungo pora tikolio altoko enonga ungu mane tili iyemu manda leko moromele.

<sup>41</sup> Eno angenalinga mongona nurupili te itemona enoni karomele nalo enonga mongona enongano mele awili kango pipi tirimo naa karomele aku ulu ambe telka teremeleya?

<sup>42</sup> Enonga mongona mele awili teni pipi tirimomu enoni naa kanokolio angenalingo ango, nunge mongona nurupili te itemo wendo lindemboi ungu ambe telka nimeleya? Topele mapele imboma, enoni enonga mongona itemo mele awilimu oi wendo lieio! Altoko kanoko kondokolio angenalinga mongona itemo nurupilimu manda wendo ltindengei," nimu.

#### *Unjo mongo toromomanga ungu ikomu*

<sup>43</sup> Aku wali Jisasini ungu te kape nimbelie ungu iko pokore topalie nimbei, "Unjo penga te mongo keri manda naa tombalo. Unjo keri te mongo penga manda naa tombalo.

<sup>44</sup> Unjo mongo te kanokolio kano mongo torumu unjomu imbi manda tirimele. Amo nambo ningi, takeme manda londoko naa nolemala. Molo me te nambo ningi, maliembi manda meko naa nolemala. Amo lupela takeme lupela kanoko, me lupela maliembi lupela karomele kanomu.

<sup>45</sup> Aku tepala, ulu penga teremo imbo teni ungu penga yunge konopuna peremoma kau nimbelo. Nalo ulu pulu keri teremo imbo teni ungu keri yunge konopuna peremoma kau nimbelo. Konopuna pepa peko itemo unguma kau kerena nimbelo," nimu.

#### *Ulke takoromele mele ungu ikomu*

<sup>46</sup> Jisasini nimbei, "Nani nio unguma pilko liko naa tekolio enoni nando Awilimu we ambe telka nimeleya?" nimbelie pele yuni ungu iko te topa nimbei,

<sup>47</sup> "Imbo te na morona ongo i nanga unguma pilko liko tenge imbona momromele mele manda lepa nemboi.

<sup>48</sup> Iye te yunge ulkemu ingi nipili nimbe we mai kinye ukia kinye akupe tepalie, akuna mainye mai enge nilimunga ola kano ulkemu takorumu. Yunge ulkemuaku tepa takopa kondorimuna no topa kano ulkemu noni limbei lipelie wali manda naa terimu, we angilerimu.

<sup>49</sup> Nalo imbonani i nanga unguma pilko liko naa tenge imbona eno iye te mele nemboi. Iye te yunge ulke we mai tamba nilina ola we takorumu. Altopa no topa ulke

kanomu topalie paa topa kalakulu tirimu," nimu.

## 7

*Rom ami iye nomi te kombu Israel molorumumunga kendemandemu Jisasini tepa koinjo ltimu*

<sup>1</sup> Kano unguma imbomando pilengi nimbe pora tipelie Jisas ulke kombu Kaperneam tukundo purumu.

<sup>2</sup> Akuna Rom Imbomanga ami iye nomi tengi kendemande te yu paa konopu mendorumumu kuro awili tepa topalie yu kolombai tepa lerimu.

<sup>3</sup> Kano ami iyemuni Jisas orumu ulu pilipelie yuni Juda iye awili mare lipe Jisas molorumuna mundupelie nimbei, "Nanga kendemandemu kuro awili tepa tomo kani ongo yu teko koinjo liwi," nimu.

<sup>4-5</sup> Jisas molorumuna enoni aku teko pungo ningi wali ungu te peya ningei, "Yu Israel iye te molo, nalo lino Israel imboma konopu mondopa, lino maku topo Gotenga ungu pimolo ulkemu yuni takondorumu. I ulu aku tepa teremoma ami iyemu yu kanopo penga pimolo iyemu kani yunge kendemande koltomomu liko tapondowi," ningi.

<sup>6</sup> Aku ningi ungu pilipelie Jisas eno kinye kano iyemunga ulkena pumbei purumu.

Kano ulkemunga nondopa orumu kinye kano ami iye nomimunga kanopa lili imbo maren iyu orumuna ongolio ningei, "Ami iye nomimuni i tepa nimo. Awilimu, na iye kerimu morona nu nanga ulkena onio manda naa tembaloo.

<sup>7-8</sup> Nu moronona na iye kerimu manda naa ombola. Na iye teni kape nokopa momomo, yunge ungu pilipo lipo tero. Nani kape ami iye mare nokopo moro. Kano iyemanga tendo puwi nimbo nio kinye yu purumo. Molo owi nimbo nio kinye oromo. Molo nanga kongono iyemundo i teko tewi nio kinye yu aku tepa teremo. Aku tepala, nuni koinjo puwi ninio lemo nanga kendemandemu koinjo pumbelo kani nu aku teko niwi," nimo.

<sup>9</sup> Jisasini Rom ami iye nomimuni nimu mele pilipelie yu konopu awini lipe mundupelie topele topa yu lombili oringi imbomando nimbei, "Nani enondo i tepo paimbo nimbo tiro. I Israel imbomanga talapena wendo mololi iyemuni na ungu-muni kau manda tembaloo konopu itemo mele na kombuma pali, Israel kombuna tukundo, imbo tendekureni kape aku teko enge ningi ipuki tirimele mele paa naa karo," nimu.

<sup>10</sup> Aku nimu ungu pilkolio ami iye nomimuni Jisas molorumuna mundurumu iyema kano ami iyemunga ulkena yando

ongolio kano kendemandemu koinjo pumbi molorumuna kanoringi.

*Ulke kombu Nain iye te kolorumumu Jisasini topa maknjirimu*

<sup>11</sup> Jisas ulke kombu Nain nilina purumu, yu lombili andolima kinye imbo mare awini peya puringi.

<sup>12</sup> Yu ulke kombu pape kerepuluna nondopa purumu wali Nene iye te kolorumu ono tengi taropela teko meko wendo pungei oringi. Kano kolorumu iyemu yunge anumu lapa taloni yu lomamu meringili altopa lapa kolorumu. Altopa yunge anumu ambo waimu molopili ungulumu yu kolorumula. Ungulu kanomu ono tengende imbo awini anumu kinye kopu teko puringi.

<sup>13</sup> Awilimuni ambomu kanopalie paa kondo kolopa yundo "Kola naa tewi," nimu.

<sup>14</sup> Aku wali yu imbo taropelamunga nondopa ombo taropelamu ombo ambolopalie meringi iyema we meko angilengei yuni nimbei, "Iye wenepomu nu makiliwi!" nimu.

<sup>15</sup> Kano wali kolorumu iyemu ola molopa yu ungu nimu. Kano wali Jisasini iye kolorumumu lipelie iyemu yunge anumu tirimu.

<sup>16</sup> Jisasini aku ulu terimuna imbomani kanoko mini ltekolio ningei, "Apa! Gotenga profet iye awili te lino moromolona wendo omo lepamo," ningi Gote yunge imboma momromelena ombo lipe tapondomo," ningi.

<sup>17</sup> I Jisasini terimumunga temanemu kombu Judia pali kinye Judia wendo kombu lupe lupema pali kinye pileringi.

*Jon Imbo No Ltindilimuni Jisas narinje pilembo nimbe yu lombili andoli mare Jisas molorumuna lipe mundurumu*

<sup>18</sup> Jisasini terimu mele Jon yu lombili andoliman yundo ningi tiringi wali Jononi yu lombili andolimanga talo walio nimbelie nimbei,

<sup>19</sup> "Goteni lipo mundumbo ombalo nimbe panjirimu iyemu nu, molo te lupe ombalomunga nokopo molamiliya nimbe i teko pungo nindipelio," nimbe Jisas molorumuna elo lipe mundurumu.

<sup>20</sup> Kano iye taloni Jisas molorumuna ongo yundo ningili, "Jon Imbo No Ltindilimuni ilto lipe mundupelie nimbei, Goteni Enonga lipo mundumbona ombalo nimbe panjirimu iyemu nu molo te lupe ombalomunga nokopo molamiliya nimo," ningili.

<sup>21</sup> Aku teko waliko pilko kanoko angilengili wali Jisasini kuro torumu imboma kinye, konopuna kuro keri perimu imboma kinye, mongo akuli imbo awini kinye, tepa koinjo lipe molorumuna kanoringili.

<sup>22</sup> Altopa Jisasini elondo nimbei, "Elo Jon moromona nendo pungo elo kinye pilko kanongele mele yundo ningi tiengili! Mongo akuli imboma kelko kombu kanoko, kimbo keri leli imboma kelko ola angilko andoko, kuro kendi noli imboma kelko imbo kangi angilko, komu tili imboma kelko ungu pilko, imbo kololima kelko koinjo pungo molko, imbo koropama ungu tukumemu pilko moromele. Aku teko Jonondo ningi tielio!"

<sup>23</sup> Na paimbo kano iyema moro ningi ipuki tiko, konopu talo naa panjiko molonge imboma eno tono kolko molko kondonge," nimu.

<sup>24</sup> Jononi mundurumu iye talo nendo puringili wali Jisasini kelepa imbo awini maku toko moloringimando Jon molorumu mele nimbei, "Kombu imbo naa pelina Jon imbo no Ltindipe molorumu kinye eno kano kombu imbo naa pelimunga mele ambeleku kanongei puringiya? Imbo, kambe mele poporomeni mepa andopa molorumuna te kanongei puringiya? Jon yu aku tepa mele molo.

<sup>25</sup> Aku tepa mele kanongei naa puringi lemo ambele mele kanongei puringiya? Iye te maminye paa pengama pakopa molorumuna kanongei puringiya? Jon yu aku tepa naa moromola. Imbo kamako molko, mele awini noiko, maminye paa penga pakoromelema iye nomi kingimanga ulkena kau moromelena karomele kano.

<sup>26</sup> Aku tepa imbo te kanongei naa puringi lemo Gotenga profet iye te kanongei puringiya? Nani eno paimbo nio. Jon yu paimbo Gotenga profet iye te, nalo yu we profet te molo. Yunge kongono olandopamu.

<sup>27</sup> Yuni Goteni oi lipo mundumbo ombalo nimbe kanopa ltimu iyemunga aulkemu tepe wamorumu kanomu. Kano iyemu yundo Gotenga bukumunga tukundo nimbe peremo ungu te i tepe:

Goteni yunge Malondo nimbei, 'Pileio nanga ungu nindimbolomu nani nu punio aulkena yu kumbe lepo lipo munduro. Yuni nunge aulkemu tumbi tindimbelo,' nimu, (*Mal 3:1*) aka tepe mele bukuna nimbe peremo.

<sup>28</sup> Nani eno paimbo nio. Oi maina moloringi imboma Jon mele, te manda molo. Jon yu paa olandopa mele. Nalo kinye wai koinjo wendo oromo. I wai koinjomunga Goteni nokoromo imbomanga te paa imbi naa molombao imbomu olandopa mele, Jon yu mandopa mele," nimu.

<sup>29</sup> Jisasini aka tepe nimu ungu pilkolio we imboma kinye kou takisi lili iyema kinye Jisasini Jonondo nimu ungumu pilko penga pilko Gote kapi ningi. Kano imboni oi Jon Imbo No Ltindilimuni nimu

ungumu pilko penga pilkolio eno ulu pulu keri teringima umbulu tiko, konopu topele toko eno Jononi no ltindipili ningi no ltingi.

<sup>30</sup> Nalo Farisi iyema kinye, Gotenga ungumanga pulumu pilko ningi tili iyema kinye, kano Juda Imboma nokorungi iyema enoni Goteni Jon naa mundurumu ningi pilkolio, Goteni imbomanga lipo tapondopo tendembo nimu ungumu pilko keri pilko umbulu tikolio altoko Jononi eno no naa ltindipili ningi no naa ltingi.

<sup>31</sup> Aku wali Jisasini nimbei, "Kinye maina moromele imbomanga eno ambe tepe mele nimbo manda lepo nemboa.

<sup>32</sup> Eno imboma maku toko moromele kombuna bakuluma kindipo nongo moromele mele. Kano bakulu aku tepe mareni nendo yando ningei, 'Kunana nimolo nalo eno peya kunana nemili ungu naa ningi. Altopo kola temolo nalo eno peya kola teamili ungu naa ningi,' ningi nimele.

<sup>33</sup> Jon Imbo No Ltindilimu ombalie kere langi kinye no wain kinye naa nomba, molopa naa kondorumu, nalo eno yu kanoko keri pilkolio ningei, yunge konopuna kuro keri peremo ningi.

<sup>34</sup> Nalo Iyemunga Malo ombalie kere langi kinye no wain kinye norumu ulu kanoko keri pilkolio ningei, 'Yu kere langi awini nomba, no wain pulumu nomba, keke lepo topa teremo,' ningolio altoko ningei, 'Yu kou takisi lili iyema kinye, ulu pulu keri teremele imboma kinye yu peya tendekuna molamili nimbe teremo,' nimele.

<sup>35</sup> Nalo Gotenga ungu lipe manjili ulumu pimele bakulumani ulu tukume tekolio Gotenga lipe manjilimu paimbo ltemo liko ondoromele," nimu.

*Ambo keri teni Jisasinga kimbo talo kulumie tondorumu*

<sup>36</sup> Walite, Farisi iye te Saimon nilimuni Jisasindo langi peya nambili owi nimu wali yunge ulkena tuku pumbe akuna langi polona nondopa polo tengatenga mainye molorumu kano wali

<sup>37</sup> aku ulke kombuna molorumu ambo keri teni Jisas yu kano Farisi iyemunga ulkena tuku langi nomba molorumu pilipelie, yu kopongo wele paa penga te mingi pali lipe akuna mepa pumbelie,

<sup>38</sup> Jisas molorumuna umbulkondo kimbona nondopa kola tepe angilipelie, Jisas yunge kimbo talo kola mongona orumumani kulumie tondopa, ambo yunge pinyewe lapiemuni kano kimbo talo kulu tondopa, kimbo talo nunu nimbe, kopongo wel mepa orumu kanomuni kimbona ondopa kandorumu.

<sup>39</sup> Kano ulke pulu iye Farisi Saimon yuni ambomuni aka terimu ulu kanopalie yunu

konopu lipe manjipelie i iyemu paa paimbo Gotenga profet iye te molkanje i ambo yu amboltomomu moromo mele kinye ulu keri teremo mele kinye manda lipe manjipili na naa ambolko, ongo wendo pa nilka konopu lerimu.

<sup>40</sup> Jisasini Saimon konopuna lerimu mele lipe manjipelie yundo nimbei, "Saimon, nu ungu te nemboi," nimu wali Saimononi topondopa nimbei, "Ungu Mane Tilimu, manda, niwi!" nimu.

<sup>41</sup> Aku tepa nimu wali Jisasini yundo temane te topa nimbei, "Iye teni iye talo kou mone pundu anjipe tirimu. Te pundu awili 100 kina mele tipe, te 10 kina mele tirimu.

<sup>42</sup> Altoko elo peya pundu manda naa toringili kinye iye pundu anjirimu kano iyemuni kano pundu talo we tiye kolopa ulure molo, yu tepili nimu. Aku nimumunga iye talonga narini yu konopu olan-dopa mondorumu konopu ltenoya?" nimbe Jisasini Farisi iyemundo aku tepa nimbe waltindirimu.

<sup>43</sup> Kano Farisi iye Saimononi yundo topondopa nimbei, "Pundu awili anjirimu iyemu, konopu lteo," nimu wali Jisasini paa nino nimu.

<sup>44</sup> Kano kinye Jisasini topele topa kano ambomu angilerimuna kanopalie Saimonondo nimbei, "I ambomu kanowi. Na nunge ulkena tukundo ondu wali nuni kimbo kulumie towi ningi no naa tinio nalo i ambomuni nanga kimbo yunge kola mongoni kulumie tondopa, yunge pinyewa lapiemuni nanga kimbo kulu tondomo.

<sup>45</sup> Na ondu wali nuni na naa kangulunio nalo i ambomuni na morona ombalie wali temo mele nanga kimbo kangulupe moromo.

<sup>46</sup> Na ondu wali nuni nanga pinyewena kopongo wele liko wakulu naa kandonio nalo i ambomuni nanga kimbo talo kopongo wel penga teni wakulu kandon-doromo.

<sup>47</sup> Yuni ulu pulu keri awini terimuna omiba wendo pumomunga na konopu awili tepa mondopalie aku tepa temo. Nalo ulu pulu keri koltalo kau teremo imbomu yunge terimu mele omiba wendo pupili nimbo iyemu konopu alaye tepa mondombalo," nimu.

<sup>48</sup> Iye Saimonondo aku tepa nimbe pora tipelie, ambomundo nimbei, "Nu ulu pulu keri terinu nunge konopuna peremoma omiba wendo pupili! Tiye kolopo altopo naa lipo manjimbo," nimu.

<sup>49</sup> Aku nimu ungu pilkolio yu kinye langi nongo moloringi mareni yuni nimu mele pilko keri pilkolio enono nendo yando ungu i teko ningei, "I iye imbomani ulu pulu keri teremelema omiba wendo pupili nimo

iyemu yu nariya? Yu Gote konopu lepalie nimonde?" nimu.

<sup>50</sup> Kano wali, Jisasini ambomundo kamukumu nimbei, "Nani nu ulu pulu keri terinu mele omiba wendo pupili manda nimbo ningi ipuki tiko ninomunga na paimbo aku tepo manda lipo tapondoro kani nu konopu ame topili molko puwi," nimu.

## 8

### *Ambo mareni Jisas nokoringi*

<sup>1</sup> Aku wali pele Jisas pumbe, ulke kombu awilima kinye keloma kinye akumanga andopalie, Gote iye nomi king molopa im-boma nokombalo ungu tukumemu nimbe tilipe, imboma ungu mane tilipe andoramu. Yu lombili andoli iye 12 kinye

<sup>2</sup> ambo mare kinye yu peya andoringi. Aku ambomanga mare oi kuro topa, mare oi kuro keri enonga konopuna perimu wali Jisasini eno pali tepa koinjo ltimu. Te, ulke kombu Makdala ambo Maria, oi yunge konopuna kuro keri 7 moloringimando Jisasini ongo wendo paio nimu wali ongo wendo purungi.

<sup>3</sup> Te, ambo Joana, Kusa omenu. Kusa yu kombu Galili iye nomi King Herotenga ulke tapuiyemu. Te, ambo Susana. Eno kinye we ambo awini kinye Jisas nokoringi. Aku am-bomani enonga kou mone noiringima likolio Jisas kinye yu lombili andolima kinye enonga langi kinye melema pame teko liko nokoringi.

### *Iye teni rais wit mongoma tanda tirimu ungu ikomu*

<sup>4</sup> Walite Jisas molorumuna ulke kombu lupe lupe moloringi imboma tukundo tukundo ongo, maku toringi wali yuni enondo ungu iko te topalie nimbei,

<sup>5</sup> "Iye teni rais wit mongo poinyena andopa tanda tirimu. Tanda tilipe andoramu wali mongo mare poinye aulkena mainye purumu kanoma mare imbomani kimboni kambuluringi, mare keramani ongo liko noringila.

<sup>6</sup> Langi mongo mare kou perimuna mainye pumbelie akuna no naa molorumu kani muli topa walitikale kolorumu.

<sup>7</sup> Langi mongo mare tiri ka mele molorumuna mainye purumu. Tiri ka melemu wendo omiba wit waloma aku topa, topa norumuna omiba penga naa lerimu.

<sup>8</sup> Langi mongo mare mai pengana mainye purumuma wendo omiba mongo pengama topa, 100 mele torumu," nimu.

Kano ungu ikomu topa pora tipelie ungu te peya nimbei, "Komu angilimbelo imbo-mani i nio ungu wamongo pilieo," nimu.

*Ungu ikoma ambe telka toronoya ningi Jisasindo ningi waltindiringi*

<sup>9</sup> Jisasini aku tepa nimu kinye yu lombili andolimani yundo ningei, "Aku ungu iko munga pulumu ningi tiwi!" ningi. Aku wali yuni enondo nimbei,

<sup>10</sup> "Gote iye nomi king molopa imboma nokoromo kombumungu ulu puluma oi yunu pilerimu kano ulu puluma Kinye eno pilengei nimbelie eno ungu ikomanga puluma pilengei nimbe lipe ondoromo. Nalo We imbomani mongoni kanokolio nalo kanoko imbi naa tinge. Komuni pilkolio nalo pilko imbi naa tiengei, (Ais 6:9)

nimbolio aku tepo enondo ungu nimboindo ungu iko topo kau nio," nimu.

*Iye teni langi mongo tanda tirimu ungu ikomunga pulumu*

<sup>11</sup> Aku tepa nimbelie yuni nimbei, "Aku ungu ikomunga pulumu i tepa: Langi mongo tanda tirimumu Gotenga ungumu.

<sup>12</sup> Langi mongo mare poiney aulkena mainye purumu kanomanga ungu pulumu i tepa: Imbo mare Gotenga ungumu pimele wali kuromanga nomi Sataneni ombo nimbei, aku unggumu kamukumu naa pilko liengei! Gote kinye tendekuna naa molangei nimbe enonga konopuna peremo ungu kanomu wendo Itimo.

<sup>13</sup> Langi mongo mare kou perimuna mainye purumu kanomanga pulumu i tepa: Imbo mare Gotenga ungumu pilkolio walitikale konopu tiko kano ungguma ltimele. Nalo eno pulkono naa mundukolio wali kano unggumu alaye kolte kau pilko moromele. Altoko eno konopuna umbuni tembalu wali molo Sataneni ombo manda manjipe kanombalo wali, eno pimele unggumu tiye koromele.

<sup>14</sup> Langi mongo mare tiri ka mele molorumuna mainye purumu kanomanga pulumu i tepa: Imbo mare Gotenga ungumu pilkolio altoko pungo ya mai kombuna uluma konopu mondoko, konopuna umbuni teremo mele pilko, kamako itemele mele pilko tekolio, altoko Gotenga ungumu komu tindiko molko pimele unggumu teko tukume naa panjirimele.

<sup>15</sup> Langi mongo mare mai pengana mainye purumu kanomanga pulumu i tepa: Imbo mareni Gotenga ungumu pilkolio kano unggumu kamukumu liko ipuki tikolio enonga konopu penga pepili molko, konopu kake tepili molko, enge pepili moromele. Kano imbomani langi mongo 100 torumu mele, kano imbomani aku teko Gotenga ungu pilko tukume panjirimele," nimu.

*Tipe lamemunga ungu ikomu*

<sup>16</sup> Jisasini ungu iko te peya topa nimbei, "Imbomani tipe lam kandokolio mingina tuku naa panjiko polo maindo wele naa mondoromele, molo. Imbo ongema kombu

kanangei ulkena tuku pa tepili ningi polona ola noirimele.

<sup>17</sup> Aku tepa mele, kinye lopeke teremo melema pele walite mona lepa imboma kanonge. Kinye aku topa ltemo melema altopa walite pa tembalu kinye imbonani kano melema kanonge.

<sup>18</sup> Aku tembalu kani nani kinye nio ungumu pilko kondai! Pilko kondoromele imbonani olandopa pilinge, nalo pilko naa kondoromele imbonani ungu koltalo kau pimolo konopu itemelema kape wendo linge," nimu.

*Jisasinga anumu kinye angenupili kinye yu molorumuna oringi*

<sup>19</sup> Walite Jisas ulke tengah tuku molorumu wali yunge anumu kinye angenupili kinye yu kanongeindo oringi. Akuna imbo pulumu tenegepeya teko angileringi kinye yu molorumuna nondoko manda naa oringi wali

<sup>20</sup> imbo akuna angileringimani yundo ningeindo, "Aminye kinye angenali kameni nu kanongeindo ongo pena we nokoko moromele," ningi.

<sup>21</sup> Aku teko ningi wali Jisasini nimbei, "Gotenga ungumu pilko liko teremele imboma nanga ama kinye ango kame moromele," nimu.

*Poporome awili te torumu ungumu*

<sup>22</sup> Walite, Jisas kinye yu lombili andolima kinye nomuna andoli sipina tukundo puringi wali, yuni enondo nimbei, "Nomuna nekondo pamolo," nimu kano wali akuna pungei puringi.

<sup>23</sup> Sipina nekondo pungei puringi wali Jisas yu uru perimu. Yu uru pepili poporome awili te topa, no topa terimu wali sipina tukundo no pulumu orumu kinye eno no wangonge teringi.

<sup>24</sup> Kano wali yu uru perimuna ongo toko makinkikolio ningei, "Ungu Mane Tilimu, Ungu Mane Tilimu, lino no wangomili teremolu," ningi wali yu makilipelie poporomemu kinye no topa no apipe tirimu nomu talo iri torumu. Iri torumu wali poporomemu topa kelepa, nomu lope lape naa tepe we lerimu.

<sup>25</sup> Aku tepalie yuni yu lombili andolimando nimbei, "Nani eno manda lipo tapondombo ningi naa ipuki tingeya?" nimu.

Kano wali yuni ulu enge nili terimumu kanokolio kano iyemani pipili kolko pungu pungu ningolio enono ningei, "Poporome kinye nomu kinye yu ungu nimo mele pilko lombiltimbele lepamo. Apa! I iyemu ambele iyerenje?" ningi.

*Kuro keri awini iye tenga konopuna perimuna Jisasini makoropa wendo mundurumu*

<sup>26</sup> Aku wali yakondo Galili kombu molkolio tiye kolko Gerasa kombu nekondo sipina molko puringi.

<sup>27</sup> Jisas akuna omaba nona andoli sipina wendo omaba kulendona angilerimu wali Gerasa iye te akuna omaba angilerimu. Aku iyemunga konopuna kuro keri awini perimuna yu maminye tendeku kape naa panjipe, we andopa, ulke tengaa naa pepa, imbo ono kombumanga pelipe andopa molorumu.

<sup>28-29</sup> Aku kuro kerimuni kano iyemu walawali lipo loi tirimu wali imbomani ka seneni yu ka toko yu nokoko moloringi nalo kuro keri yunge enge tirimomuni ka sen tungu tirimu wali kano kuro kerimuni kombu imbo naa pelina yu mepa purumu. Kano kuro kerimundo Jisasini nimbei, "Ongo wendo pa!" nimu kano wali iyemuni Jisas kanopa alako topa nimbe yu angilerimuna mainye tamalu pepa ru nimbelie nimbei, "Jisas, Gote Paa Olandopa Awilimunga Malo, nu peya na tendekuna tapu topo naa molombolo. Nu na kinye ambele ulu teni onioya? Nuni na ulure naa tewi nimbo walipo pilto," nimu.

<sup>30</sup> Aku tepa nimu kano wali Jisasini iyemundo walipe pilipelie nimbei, "Nunge imbi nariya?" nimu kano wali iyemu yunge konopuna kuro keri awini peringimani tope tiringina nimbei, "Nanga imbi Awini," nimu.

<sup>31</sup> Kano kuro kerimani Jisasindo ningei, "Lino wendo ongo, Goteni kombu keri paa mere mainyenala linonga iye nomi Satan walite lipe mundumbelo kano kombumanga paio ungu naa niwi!" ningi kano wali yuni "Manda, akuna paio!" nimu.

<sup>32</sup> Akuna mai kembo tengaa kongi awini imu nongo angileringina kanokolio yundo altoko ningei, "Ne kongimanga konopuna tuku pungo pepamili niwi," ningi kano wali yuni "Manda, akuna paio!" nimu.

<sup>33</sup> Aku tepa nimu kano wali kano kuro kerima kano iyena wendo ongolio kongimanga konopuna pungo moloringi wali kano kongima lkiko no waruna maindo pungo no mongoluna no wangoringi.

<sup>34</sup> Kongi tapu iyemani terimu ulu kanokolio eno talopa leko pungolio, enoni kanoringi imbomando aku temanemu toko tilko puringi. Ulke kombu awilina moloringi imboma kinye ulke kombu kelomanga moloringi imboma kinye aku temanemu toko tilko puringi.

<sup>35</sup> Kano temanemu pileringi imboma terimu ulu kanamili ningi wendo pungo Jisas molorumuna ongolio oi kuro keri awini konopuna peko ongo wendo puringi iyemu

kanoko, yu Jisas kinye molopa, maminye topa, imbo konopu pepili molorumu ulu kanokolio eno pipili koloringi.

<sup>36</sup> Jisasini terimu ulu kanoringi imbonami altoko oringiimboma ningi tiringi.

<sup>37</sup> Aku teko ningi ungu pilkolio, kombu Gerasa imboma pali pipili awili tekokollio Jisasindo puwi ningi kano wali yu pumbeindo nona andoli sipina tuku purumu.

<sup>38</sup> Yu pumbe terimuna kanopalie kuro kerima oi konopuna peko wendo oringi iyemuni yundo nimbei, "Na peya pambili!" nimbe walipe pileringi. Nalo Jisasini yundo topondopa nimbei, "Molo. Nu ulkendo anjo pungo Goteni nu kinye tepe kondomo mele nunge imboma ningi tipuwi" nimu.

<sup>39</sup> Kano wali yu anjo pumbe Jisasini nimu mele tembaido yu ulke kombu awilina tuku moloringi imboma pali Jisasini yu terimu ulu nimbe tirimu.

*Iye Jairus yunge lemene kolorumumu kinye kuro te topa naa kelerimu ambomu kinye Jisasini tepe koinjo ltimu*

<sup>40</sup> Kano wali Jisas yu nomuna yakondo orumu wali yu ombalo ningi maku toko nokoko moloringi imbomani nu paa orono ningi konopu tiringi.

<sup>41</sup> Juda imboma maku toko Gotenga ungu pileringi ulke nokorumu iye te, imbi Jairus, nomu kulendo akuna orumu. Omaba Jisas kanopalie Jisas yunge kimbona nondopa omaba komongo topo pondopa

<sup>42</sup> yundo walipe pilipelie nimbei, "Nanga balo kelomu kolombai teremo kani nanga ulkendo peya pambili owi!" nimu. Kano balomu yunge lemene tendekumu kau. Yu poiney 12 mele omaba purumu. Altopa Jisas kano ulkena pumbe purumu wali yu peya puringi imboma aulkena topo tili peremo.

<sup>43</sup> Kano imbo peya puringimanga ambo te yu pena perimu walima pora naa nimu. Yu walipali pena kau pepili poiney ki yupoko omaba purumu. Yu doktamanga pumbe yu kuro topo kelepli nimbe andopa, yu kou mone noirimuma pali eno tirimu nalo kuro kanomu pora naa nimu.

<sup>44</sup> Kano ambomu Jisas purumuna umbulkondo omaba, yunge wale pakolimunga pundumu ambolorumu kinye kuro torumumu pora nimu.

<sup>45</sup> Jisas pumbe molopili ambomuni aku ulu terimu wali Jisasini angilipelie imbonando nimbei, "Nanga wale pakoli narini lope tendemoya?" nimu. Imbonani pali enore molo ningi, kano wali Pitani yundo nimbei, "Ungu Mane Tilimu, imbo pulumu nu peya ekele meko purumele kanomu," nimu.

<sup>46</sup> Nalo Jisasini altopa nimbei, "Na imbo lipo tapondoro enge te ombo wendo purumo ulu lipo manjipolio imbo te na lope tenderemo konupu lepolio nio," nimu.

<sup>47</sup> Aku tepa nimu ungu pilipelie ambo kanomu yu lopeke manda naa tepa, yu terimu ulu Jisas pilipe molorumu ulu kanopalie yu pungu pungu nimbelie Jisas molorumuna mainye molopa tamalu perimu. Imboma pilko angilengei yuni kuro toromumu kelepili nimbe ombo yu lope tenderimu wali walitikale koinjo purumu mele nimbe para tirimu.

<sup>48</sup> Jisasini yundo nimbei, "Ambomu, nani nu manda tepa koinjo limbelo konopu leniomuni nu koinjo punio kani konopu u nipili puwi," nimu.

<sup>49</sup> Jisas yu aku tepa nimbe angilerimu wali Juda imboma maku toko Gotenga ungu pileringi ulke nokorumu iye Jairusinga ulkena molorumu iye te ombo Jairusindo nimbei, "Nunge balomu paa kamukumu nomi ka akumu kani nu Ungu Mane Tili Jisas we meko naa wan!" nimu.

<sup>50</sup> Yuni nimu mele Jisasini pilipelie Jairusindo nimbei, "Minu naa ltewi nunge balomu nani manda lipo tapombo ningoe ningo kau ipuki tiko molonio wali yu koinjo pumbelo," nimu.

<sup>51-53</sup> Jisas Jairusinga ulkena ombalie ulkena tutkundo imbo awini kondokolokola teko moloringina kanopalie enondo nimbei, "I balomu kolopa naa kolomo, we uru kau peremo kani eno kola naa teaio!" nimu. Nalo yu paa paimbo kolorumu ulu kanokolio, yuniaku tepa nimu wali enoni yu ungu tako tondoko owe tenderingi. Eno tiye kolopa yuni balomunga kiripina pumbe purumu wali we imboma pali tutkundo peya naa pamili nimbe yu lombili andoli pokore, Pita kame, Jon kame, Jems kame, kano balomunga anumu lapa talo kinye, eno kau peya pamili nimu.

<sup>54</sup> Kano wali balomu lerimuna Jisas pumbe balomunga ki ambolopalia nimbei, "Balomu, makilko ola angiliwi!" nimu kano wali

<sup>55</sup> i kololi balomunga minimu altopa tutkundo orumu wali yu walitikale ola angilerimu. Jisasini enondo nimbei, "Yu langire nonopi tieio," nimu.

<sup>56</sup> Yuni terimu ulu kanokolio balomunga anumu lapa talo elo paa mini lteringili. Yuni elondo nimbei, "Nani kinye tero ulu imbo tendo ningo naa tielio!" nimu.

## 9

*Jisasini lipe mundurumu iye 12 Apostel nili akuma kongono tirimu*

<sup>1</sup> Walite Jisasini yu lombili andoli iye 12 akumando yando waio nimbelie,

enondo nimbei, "Eno kuro keri imbomanga konopuna mololima ongo wendo pangei ningoe teangei nimbo, imbo kuro tolima teko koinjo liengei nimbo, eno enge tiro," nimu.

<sup>2</sup> Aku tepalie enondo nimbei, "Eno pungo, Gote ombo iye nomi king molombalo ungu tukumemu imboma ningoe tilko andoko, kuro tolima teko koinjo liko paio!

<sup>3</sup> Punge wali eno mele te naa meko we paio! Tu kape, wale lepo kape, kere langi kape, kou mone kape, naa meko we paio! Wale pakoli tendeku kau pakoko pungo, te peya naa meko we paio!

<sup>4</sup> Ulke kombu tengatuku pungolio akuna molongeindulke tendekurenga tuku pungolio akuna kau peangei! Altoko kombu akumu tiye kolko tengalupe pungolio akula teao!

<sup>5</sup> Ulke kombu marenga tuku pungolio, kombu pulu imbomani paa teko onge, peya beamili waio ungu naa ningoe enonga ungu pilko naa lingelimo manda enoniaku kombuma tiye kolko wendo pungolio,aku imbomani eno liko tui tingemunga lino kinye naa molangei, kamukumu molko kenjengei ningoe,aku kombumanga kungupo enonga kimbona angilimbolamu ga tiko noikolio tengalupe paio!" nimu.

<sup>6</sup> Aku tepa nimu wali kano iyema pungo, ulke kombumanga andoko, Gotenga ungu tukumemu ningoe tiko, kuro tolima teko koinjo liko teliko andoringi.

### *Iye Nomi King Heroteni Jisas yu narinje nimbe pilerimu*

<sup>7-8</sup> Kombu Galili iye nomi King Heroteni Jisasini terimu mele pilipelie, i iyemu narinje konopu lepa pilipe tundurumu. Jisasini terimu ulumundo imbomareni i teko temane toko ningei, "Jon Imbo No Ltindilini kolopa makilipelie i ulu enge nilima teremo ningi. Mareni, Gotenga profet iye Elaija, yu altopa ombalo ningi kanomu, kinye ombo aku tepa terimu ningi. Mareni profet iye oi koloringi akumanga te makilipe ola molopalia ulu enge nilima terimu," ningoe imbomani teko ningoe moloringi. Aku ungu lupe lupe ningima pilipelie Heroteni yu paa pilipe tundupelie

<sup>9</sup> nimbei, "Jon Imbo No Ltindilimunga pinyewemu topo pule toruna yu kolorumu halo i ulu enge nili lupe lupe teremonapilto iyema yu narinje?" nimu. Aku tepa nimbelie i iye Jisas kanamboa nimbe molorumu.

### *Jisasini iye 5,000 langi tirimu*

<sup>10</sup> Jisasini nanga kongono tendepaio nimbe lipe mundurumu aposel iyema yu molorumuna yando ongolio enoni terengi mele yu ningoe tiringi. Kano aposel iyema lipe mepa pumbe linono tengalupe molamili nimbe eno ulke kombu Betsaida mepa purumu.

<sup>11</sup> Nalo we imbo pulumu eno akuna puringi mele pilkolio eno puringina lombili akilio leko puringi. Imboma oringina kanopalie Jisasini enondo paa onge nimbelie eno Gote ombo iye nomi king molombalo ungu tukumemu nimbe tipe enonga kuro tolima tepa koinjo ltimu.

<sup>12</sup> Altopa ipupene, yunge ki tipi kanoli iye 12 yu molorumuna ongo yundo ningei, "I kombuna imbo te naa peremo. Langi te manda naa liko nonge kani ya maku toko moromele imbomando nini, eno pungo ulke kombu marenga langi topo toko liko nongo peliko pangei niwi!" nimu.

<sup>13</sup> Aku teko ningi wali Jisasini lombili andolimando nimbei, "Enoni imboma kere langi liko tieio!" nimu kano wali enoni yundo ningei, "Ya langi awini molo. Bret kaloli kelo kite pakera kinye oma kaloli talo kinye aku langi koltalo kau ltemo. Molo nuni lino kombu tenga pungo i imbomanga langi pame toko lindipemili ningi ninoya?" nimu waliko pileringi.

<sup>14</sup> Akuna, iye 5,000 mele moloringi.

Aku teko ningi wali Jisasini enondo nimbei, "Imbo 50 ningi lapu wamoko mainye molangei neio!" nimu.

<sup>15</sup> Enoni aku teko imbomando ningi wali pilko liko aku teko mainye moloringi.

<sup>16</sup> Aku wali Jisas yuni kano bret kaloli pokokinye oma talo kinye lipelie mulu kombuna olando tipe kanopa, Lapa Gotendo paa tereno nimbe, ambolopa pike lepa, lombili andolima moke tepa tipelie anjo imboma tieio nimu. Likolio, enoni anjo mainye moloringi imboma moke teko tiringi.

<sup>17</sup> Eno nongo olo terimu wali lombili andolimani langi arikili lerimuma liko maku toko wale basket 12 toko peko tiringi.

#### *Pitani Jisasindo nu Kraist nimu*

<sup>18</sup> Walite, Jisas yunu Gote kinye konge tepa ungu nimbe molorumu wali yu lombili andoli iye peya moloringimando walipe pilipelie nimbei, "Imbomanu imbi leko na nari nimeleya?" nimu.

<sup>19</sup> Enoni yundo topondoko ningei, "Mareni ningei nu Jon Imbo No Ltindilimu kolopalie makilipe ola moromomu ningi pilko, mareni ningei nu Gotenga profet iye Elaija yando ombo moromo ningi pilko, mareni ningei nu Gotenga iye profet te oi koloringimanga te makilipe ola moromo ningi pimele," ningi.

<sup>20</sup> Aku teko ningi wali yuni enondo walipe pilipelie nimbei, "We imbomanu aku teko

nimele nalo enoni na nari konopu ltemeleya?" nimbe waltindirimu. Pitani topodopa nimbei, "Nu Goteni lipo mundumbo nimbe kanopa ltimu iye Kraist," nimu.\*

#### *Jisasini na mindili nombo kolopolio makilipe koinjo molombo nimu*

<sup>21</sup> Pitani aku tepa nimu ungumu Jisasini pilipelie enondo enge nimbe nimbei, "Na moro mele Pitani i nimo ungumu enoni anjo imbo tendo kape oi paa naa ningi para tieio!" nimu.

<sup>22</sup> Kano wali Jisasini yu lombili andolimando nimbei, "Iyemunga Malo mindili pulumu nombalo. Juda iye awilima kinye, Juda Imbomanga nimbe Gote popo tondoli iye nomima kinye, Gotenga ungumanga pulumu pilko mane tili iyema kinye, aku Juda imbomanga iye nomimani yu umbulu tiko yu toko kondonge. Yu wali talo ono kombuna pepalie wali yupoko tipemunga makilipe koinjo molombalo," nimu.

<sup>23</sup> Aku tepa nimbelie Jisasini akuna maku toringi imboma palindo nimbei, "Imbo teni Na lombili andambo konopu lepalie wali, yunge mandopa ltemo konopuma topo mainye mundembu nimbe, na unjo polopeyana angilipo mindili nombo kolombo mele yuni aku tepa mele tembaindo i tepa nipili: Na yu lombili pumboindo mindili nondu lemo paa manda, kolondu lemo paa manda nimbelie na lombili opili!

<sup>24</sup> Imbo teni na naa kolopo, ya maina kamukumu koinjo molopo kau pambo nimbelo imbonu yu kolopalie kamukumu molopa kenjipe kau pumbelo. Nalo imbo teni na konopu mondopalie nanga kongono teambo nimbe tembaloo wali yu kolopalie yu molopa kondopo kau puli ulu pulumu kanopa limbelo.

<sup>25</sup> Imbo teni mai kombuna melema pali yuni yunu lipe noipe mai kombuma pali yu yunu nokopa molopalie altopa yu mini pali Gote naa molombalo kombuna pumbe mindili nomba molopa kenjilkanje akumu yuni penga telkaya? Aku molo.

<sup>26</sup> Imbo teni yu tonge konopu lepalie Jisas nanga Awilimu molo, na yunge ungumu naa pio nimo lemo Iyemunga Maloni yunge Lapanga melema pali nokoromo engemu ambolopa kinye yunu Iye Awili molopa au nimbe enge ambolopa pa enge nilina molopa Gotenga kongono iye kake teli enselema kinye ombalie wali imbo akumundo yunge imbole molo nimbelo.

<sup>27</sup> Nani enondo paimbo nimbo tiro. I angimelemanga mare oi naa kolkolio Gote

\* <sup>9:20:</sup> Kraist yu Grik ungu te, akumunga pulumu i tepe: Goteni eno nokopa kondombalo iye te lipo mundumbo nimbe kanopa ltimu iyemu.

iye nomi kingimu ombo molopa kombu nokombaindo ombalo ulu kanonge," nimu.

*Jisasina imbo kangimu te lupe apuwe lerimu*

<sup>28</sup> Jisasini aku tepa nimbeline altopa koro te ombo purumu wali yuni Pita kame, Jems kame, Jon kame, eno lipe meli Gote kinye ungu nembo nimbeline mulu kembona ola purumu.

<sup>29</sup> Yuni akuna Gote kinye ungu nimbe molopili yunge kumbekere alowa tepa yu panjirimumi maminyema ena mele pa tepa imbomanga mongo yumi yami teremo mele aku tepa paa kake tepili molorum.

<sup>30-31</sup> Kano wali koro oi moloringili iye awili, Moses kinye Elaija talo, elo mulu kombuna molokolio mainye ongo pa terimuna ongo angilkolio elo kinye Jisas kinye enoni Jisas yu ulke kombu awili Jerusalem akuna Goteni yundo tewi nimu mele tepa kolombo ungu ningo angileringi.

<sup>32</sup> Pita kinye, yu peya moloringi iye talo kinye, eno tiye tepa uru mele mele nimu nalo altoko eno makiklo imbo konopu pepili molokolio Jisas yunge kangi alowa tepa molopa, ena mele pa tepa, yu kinye iye talo peya angileringina kanoringi.

<sup>33</sup> Aku iye talo pungili puringili wali Pitani Jisasindo nimbei, "Ungu Mane Tilimu, lino ina moromolo penga lepamo. Linoni ulke takai yupoko takondamili! Te nunge, te Mosesinga, te Elaijanga takomolo!" nimu. Pita yuni niwi ungu maa toromona we orumu ungure nimu.

<sup>34</sup> Pitani aku tepa nimbe molopili kupe te wendo ombo eno aku torumu wali eno pipili koloringi.

<sup>35</sup> Kupe torumuna tukundo ungu te wendo ombalie nimbei, "I iyemu nanga malo. Nani enonga nimbo yu kanopo lipo munduru. Yuni ungu nimbeloma pilko lieio!" nimu.

<sup>36</sup> Aku unggumu nimbe kelerimu wali Jisas yunu kau we angileringuna kanoringi. Enoni aku teko kanoringi ulu anjo naa ningo para tiko, imbo tendo kape oi naa ningo tiringi.

*Jisasini kuro keri te makororomu*

<sup>37</sup> Ipu leli oi Jisas muluna mainye ombai orumu wali imbo awini yu lingei oringi.

<sup>38</sup> Oringimanga iye teni Jisasindo nimbei, "Ungu Mane Tilimu, nanga ungulu kelomu, yu nanga ungulu tendekumu kau, kondo kolko liko tapowi nimbo konge tero.

<sup>39</sup> Yunge konopuna kuro keri te peremomuni yu lipe mindili tipe toromo wali ungulumuni are nimbe, mainye pungu pungu topa litemo wali kerena apupu topa litemo. Yuaku tepa waliwali teremonia ungulumu tepa bemblo tirimo.

<sup>40</sup> Nunge lombili andolimando aku temanemu topo tipo enoni kano kuro kerimu makorangei nimbo konge tendu nalo eno manda naa tengen," nimu.

<sup>41</sup> Aku tepa nimu wali Jisasini eno iri topalie nimbei, "Kinye moromele imboma eno Goteni manda teremo mele enge ningi ipuki naa tirimele. Eno ungu naa pileli moromele imboma, na eno kinye wali ambe tepo molopo, eno umbuni teremo mele wali ambe tepo mendemboa," nimbeline, kano iyemundo nimbei, "Nunge ungulamu na morona meko owi!" nimu.

<sup>42</sup> Mepa ombai orumu wali kano kuro kerimuni ungulu kanomu topa lipe mainye mundupelie yu torumu kano wali Jisasini kuromu iri topalie wendo pupili nimbe ungulamu tepa koinjo lipelie, yu koinjo molorumu wali yunge lapa tirimu.

<sup>43</sup> Aku terimu ulu kanokolio imboma Gotenga engemu pilkolio mini lteringi.

*Na tongena kolopolio nalo makilipo koinjo molombo nimbe Jisasini wali talo tenderimu*

Yuni terimu mele eno pungu pungu ningo mini lteko molangei Jisasini yunge lombili andolimando nimbei.

<sup>44</sup> "I nio mele pilko kondao! Iyemunga Malo tongue iyemanga kindo liko tinge," nimu.

<sup>45</sup> Nalo yuni nimu ungu pulumu naa pilkolio enoni kano ungumunga pulumu yu waliko pilingeindo pipili koloringi. Goteni eno kano ungumunga pulumu i teli oi naa pilengei nimbe terimu.

*Kiyendo molombo konopu lenge lemo i ulumu teao*

<sup>46</sup> Kano wali Jisas lombili andolimani eno enongano nendo yando ungu mele nale tekolio ningei, "Linonga iye nari imbi ola moromoya?" ningi.

<sup>47</sup> Enoni aku konopu leringina lipe manjipelie, Jisas yu bakulu te lipe yu molorumuna nondopa mondopalie enondo nimbei,

<sup>48</sup> "I bakulumu kanaio! Imbo teni na Awilimu konopu mondoro kani i bakulu mele panjipo limbo nimbelo imbonuniaku ulu tembalomunga na kape panjipe limbelo. Naaku tepa panjipe limbelomunga kano imbonu yuni na lipe mundurumu Gote kape panjipe limbelo. Enonga iye teni na mainye molopo, na imbi te olandopa naa molopili! Iye te lupe imbi olandopa molopili nimo iyemu yu olandopa molombalo," nimu.

*Jisasini nimbei, "Lino kinye opa pule naa toromele imboma linonga opa kalalema," nimu*

<sup>49</sup> Jisas lombili andoli iye Jononi Jisasindo nimbei, "Ungu Mane Tilimu, iye teni nunge imbi lepa kuro keri imbomanga konopuna molongemando ongo wendo paio nimbe temona kanomolo. Aku tepa kanopolio yu lino peya tapu topo naa moromolo kani yundo nu aku teko naa tewi nimolo," nimu.

<sup>50</sup> Aku tepa nimu wali Jisasini yundo kano iyemuni terimu ulumundo nimbei, "Linondo opa pule naa tomo lemoaku imboma linonga opa kalalemu moromo kani enoni imboaku tembalomando molo naa neio," nimu.

*Jisas Jerusalem pambo nimbeline pumbei purumu wali Samaria kombu moloringi imbomani yu panjiko naa ltingi*

<sup>51</sup> Kano wali Jisas ulke kombu awili Jerusalem yu kolopalie mulu kombuna olando pumbelo walimu nondopa wendo orumu lipe manjipelie Jerusalemando pambo nimbeline purumu.

<sup>52</sup> Yu lombili andoli iye mare lipe mundupelie nimbei, "Kinye ipu leli kombu Samaria ulke kombu te nondopa lembalona peamili kani eno akuna pungo lino manda pemolo ulke te koroko lieio," nimu.

<sup>53</sup> Nalo kano Samaria imboma eno kinye Israel imboma kinye opa pule mokkolio yu Jerusalemendo pumbei purumu ulu kanokolio enoni ya manda naa penio, molo ningi.

<sup>54</sup> Aku teko ningi teringi ulu kanokolio yu lombili andoli iye Jems kinye Jon taloni yundo ningili, "Awilimu, iltoni mulu kombuna tipe wendo omba i Samaria Imboma nomba kondopili nemibili konopultenoya?" ningi waltindiringili.

<sup>55</sup> Nalo yu topele topa kanopalie, elo ningi kenjirimbele nimbe iri torumu.

<sup>56</sup> Yu kinye eno waye ulke kombu tengapungo pepuringi.

*Jisas lombili andoromolo mele ungumu*

<sup>57</sup> Eno aulkena pungei purungi wali iye te omba Jisasindo nimbei, "Nu punio kombumanga pali nu lombili ombo," nimu wali

<sup>58</sup> Jisasini yundo nimbei, "Piliwi! Owa takera kowana peremele kape, muluna mangoromele kerama manga takoko peremele nalo nanga moro kombu te naa temo kani!" nimu.

<sup>59</sup> Kano wali yuni iye te lupendo nimbei, "Na peya pambili lombili owi," nimu wali kano iyemuni topondopa nimbei, "Awilimu, oi pumbo nanga lapa peya molopolio pele yu kolombalo wali ono tepolio nu lombili ombo," nimu.

<sup>60</sup> Pilipelie Jisasini yundo nimbei, "Nanga ungumu naa pilko we koromele imboma enoni kolongema ono teangei nalo nu Gote

omba iye nomi king molopa imbo nokombalo ungu tukumemu imboma pilengei ningi tilko andowi!" nimu.

<sup>61</sup> Kano wali iye teni yundo nimbei, "Awilimu, nu lombili ombo nalo oi pumbo nanga imboma kondo kolopo molaio nimbolio altopo nu lombili ombo," nimu kano wali

<sup>62</sup> Jisasini yundo nimbei, "Na lombili ombo nimbe ombalie nondopa tiye kolombalo imbo te yu Gote iye nomi king molopa nokombalo kombumunga kongonomu manda naa tembalo," nimu.

## 10

*Jisasini iye 72 kongono teangei nimbe lipe mundurumu*

<sup>1</sup> Altopo Jisas ulke kombu awili Jerusalem mundo pumbei pumbelie, yu pumbei purumu ulke kombu marenga iye 72 akumanga talo talo nimbe kumbe lepa lupe lipe mundurumu.

<sup>2</sup> Eno lipe mundupelie ungu iko topa nimbei, "Poinyena langi pulumu nowi lepa peremo nalo kano langi pungo liko noinge imboma koltalo kani Poinye Pulu Iyemuni kano langimu liko noiko kongonomu pungo teangei imboma poinyena lipe mundupili ningi konge teao!

<sup>3</sup> Eno Gotenga kongonomu pungo tendeliko andonge wali we imbomani eno mindili liko tinge lipe manjipolio eno kano kongonomu tendepangei nimbo eno lipe munduro.

<sup>4</sup> Pungolio, wale lepo kape, kou mone kape, mele wale kape, kimbo su alowa teko mondongema kape naa meli we paio! Aulkena onge imboma kanokolio enondo ungu te naa ningi we paio!

<sup>5</sup> Ulke kombu tengatukundo pungolio akuna," neio!

<sup>6</sup> Aku teko ningi wali aku ulkena konopu penga pepili molambo nimbe imbo te molomo lemo yu konopu penga pepili molombalo. Molo aku teko ningi wali kano ulkena. konopu penga pepili molambo nimbe imbo te naa molomo lemo enonga ningi ungumu yu kinye naa pembalo.

<sup>7</sup> Punge ulkena paa peangei! Kongono teremo iyemu yu melema paa tirimele kani ulke pulu iyemuni langi timbeloma naio! Ulke pinepine naa andaio!

<sup>8</sup> Ulke kombu tengatukundo pungolio, kano ulke kombu pulu imbomani enondo, paa onge, lino peya molamili waio ningi lemo eno langi tingema nongo,

<sup>9</sup> akuna kuro tombalo imboma teko koinjo liko, enondo ningei, "Eno moromelenena Gote omba iye nomi king molopa lino nokombalo walimu nondopa omo," neio!

<sup>10</sup> Molo ulke kombu tengah tuku pungolio kano ulke kombu pulu imbomani enondo eno ambe telka ongeya, anjo pame ninge lemo eno pungo aulkena angilkolio enondo ningei,

<sup>11</sup> "Enonga kombumunga mai kungupo, linonga kimbona angiltimoma kulu topolio pamili! Aku tepo temolo wali aku imbomani i teko pilengei: Linondo peya molamili waio ungu naa ningi kani akumunga Goteni enondo mulu kombuna peya molamili waio ungu naa nimbelo. Akumu pilengei ningo aku teko ningolio ungu te peya enondo kamukumu ningei, 'Eno lepi lepi tamili pilengei! Eno moromelena Gote omba iye nomi king molopa imboma nokombalo ulumu nondopa omba ltemo,' neio!

<sup>12</sup> Nani enondo i tepo paimbo nimbo tiro, Gotenga kot waimu wendo ombalo wali ulke kombu Sodom imboma oi ulu pulu keri pulum teringi nalo enonga kot kelo mele pembalo. Nalo i imbo enondo peya molamili waio ungu naa ningi, enonga ungu pilko naa linge imboma, kot waimu wendo ombalo wali enonga kot awilimu pembalo," nimu.

*Jisasini ulke kombu marenga imboma molko kenjengei nimu*

<sup>13</sup> "Ulke kombu Korasin kinye Betsaida talo akuna moromele imboma molko kenjirimele! Aku ambe temona nio? Nembo! Kano ulke kombu talonga tukundo ulu enge nili pulumu teru nalo akuna moromele imboma konopu topele naa toromele. Ulke kombu Tair kinye Saidon talonga tukundo ulu enge nili te naa teru nalo kano kombu talonga tukundo nani ulu enge nili aku tepo telka kanolemalanje, kano ulke kombu talonga imbomani eno ulu pulu keri teremelema oi tiye kolko, konopu umbulu liko lino imbo kerima ningko keku tapuwé tiko molko, konopu topele tolemala.

<sup>14</sup> Kano ulke kombu talonga moloringi imbomani nani ulu enge nili teru mele naa kanoringi akumunga kot waimu wendo ombalo wali kano ulke kombu Tair kinye Saidon talonga imboma ulu pulu keri teringi nalo enonga kot kelo mele pembalo. Nalo eno ulke kombu Korasin kinye Betsaida talonga imboma na ulu enge nili teru mele kanokolio konopu topele naa toromele imboma, kot waimu wendo ombalo wali enonga kot awili pembalo.

<sup>15</sup> Ulke kombu Kaperneam imboma enoni mulu kombuna pumbo molamili konopu ltemeleya? Aku manda molo. Enoni nanga unguma waliwali pimele nalo konopu topele naa toromelena eno kombu kerina pungo molonge.

<sup>16</sup> Eno kinye kongono lipo munduro iye-mando ungu te peya nembo! Enoni ungu ningema pilipe limbelo imbomuni nani ungu nio ungumu pilipe limbelo. Enoni ungu ningema naa pilipe, lino peya molamili naa nimbe tembalo imbomuni na kinye peya naa molambili nimbelo. Nando peya naa molambili nimo imbomuni Gote, na lipe mundurumu iyemundo peya naa molambili nimbelo," nimu.

*Iye 72 Jisasini lipe mundurumuma kelko yando oringi*

<sup>17</sup> Walite Jisasini lipe mundurumu iye 72 yu molorumuna paa tono kolko yando ongolio enoni yundo ningei, "Awilimu, linoni nunge imbi ambolopo kuro kerima kape linoni ungu nimoloma pilko maindo moloringi," ningi.

<sup>18</sup> Jisasini enondo nimbei, "Kuro kerima nomi Satan kariapa mele tepe, topa mainye mundurumu nani kanoru.

<sup>19</sup> Pileiol Eno enge tiru. Eno waimbe keri molo lindi keri aku melema naa kanoko kambulunge wali aku melemani eno nanga imboma ulure naa tepili nimbo eno kano engemu tiru. Lino kinye opa pule iye Satan yu paimbo enge peremo nalo eno kano enge tirumunga yuni eno ulure manda naa tembalo.

<sup>20</sup> Nalo aku tepa niomunga tono naa kolko, kuro kerima enonga ungumu pilkollo maindo moromelelunga tono naa kolko; Goteni mulu kombuna molopa enonga imboma topa mondorummungu tono kolko molaio!" nimu.

*Jisasini Gote paa tereno nimbelie kapi nimu*

<sup>21</sup> Mini Kake Telimuni Jisas tepa paa tono tenderimu wali Jisasini Gotendo nimbei, "Ara, mulu mai talo nokoko morono iyemu, nu kapi nio. Imbo maren eno none tekolio i teko ningei, lino pilipo kondopo, kanopo kondoromolo ningko pimele. Aku teko ningko pimele imboma eno nani tero ulumanga pulumu naa pilengei ningko eno naa ningko tirinu kanomunga nu kapi nio. Imbo bakulu mele molko, nani nio unguma komu tendeko moromele imboma kau nani tero ulumanga pulumu pilengei ningko, eno ningko tirinu kanomunga nu kapi nio. Paimbo Ara, nuni i tereno mele oi aku teko pilko penga pilerinu," nimu.

<sup>22</sup> Gotendo aku tepa nimbelie imbo moloringimando nimbei, "Melema pali Arani na tirimu. Imbo teni Maloni paa paimbo kanopa imbi tirimo imbo te molo, Lapani kau kanopa imbi tirimo. Lapa kanopa imbi tirimo imbo te molo. Maloni kau yu kanopa imbi tirimo, Maloni Lapa lipo ondambo nimbelo imbo akumani Lapamu kanoko imbi tinge," nimu.

<sup>23</sup> Altopa yu lombili andoli iyema eno enonga moloringi wali enondo nimbei, "Eno mongoni karomele ulumanga eno tono kolko molaio!"

<sup>24</sup> Nani enondo i tepo paimbo nimbo tiro. Oi moloringima, Gotenga iye profetema kinye, iye nomi kingima kinye, enoni i kanoko moromele uluma kanongeindo kanamoloa ninga moloringi nalo naa kanoringi. Eno kinye pilko moromele unguma pilingeindo pilemboa ninga moloringi nalo naa pileringi," nimu.

*Juda imbomanga opa pule iye teni Juda iye te lipe taporumu*

<sup>25</sup> Gotenga ungumanga pulumu pilipe imboma mane tili iye teni yuni ambele ungu nimbelonje, nimbe kenjimbelonje pilembo nimbe Jisasindo walipe pilipelie nimbei, "Ungu Mane Tilimu, na ambe tepolio molopa kau puli ulu pulumu limboya?" nimu.

<sup>26</sup> Jisasini yundo nimbei, "Gotenga ungu manema Mosesini bukuna torumu bukuna kanokolio ambe tepa nimbe moromo, kanoronoya?" nimu.

<sup>27</sup> Yuni topondopa nimbei, "Gotenga ungu manemani nimbei, Enonga konopumuni kinye minimuni kinye kangimunga enge peremomuni kinye lipe manjilimu kinye kanomani pali enonga Awili Gote kau enge ninga konopu mondaio!"

Enoni enono yu mele mele konopu mondoko kondo kolko nokoromele mele aku tekola pulu lemo imboma konopu mondoko nokoko molaio, (*Lo 6:5; WKP 19:18*)

nimbe peremo," nimu.

<sup>28</sup> Jisasini yundo nimbei, "Nu paimbo nimu. Nu aku teko tenio lemo molopa kau puli aulkena punio," nimu.

<sup>29</sup> Nalo Gotenga ungumanga pulumu pilipe imboma mane tili iyemuni imbomanina paa pimo iyemu ninga pilengei nimbeline waltindipe nimbei, "Nanga pulu itemo imboma naimele ya?" nimu.

<sup>30</sup> Jisasini ungu te topondopa nimbei, "Jura iye te ulke kombu awili Jerusalem tiye kolopa ulke kombu Jeriko pumbesi purumu wali wapu noli iyemu ongo yunge mainyine toroko kulklo liko yu toko noiko eno puringi.

<sup>31</sup> Aku wali Juda imbomanga nimbe Gote popo tondorumu iye te kano aulkemunga mainyendo pumbesi pumbelie, iye aulkena lerimumu ombe kanopalie yu lerimuna tiye kolopa aulke kule ekondondo ombe purumu.

<sup>32</sup> Aku tepala altopa Gotenga kongono tendeli talape Livai nili iye te iyemu toko noiringina ombe kanopalie yu lepili kelepa aulke kule ekondondo ombe yu purumula.

<sup>33</sup> Nalo kombu Samaria iye te kano aulkena pumbesi ombalie iyemu lerimuna ombe kanopalie yu kondo kolopa,

<sup>34</sup> lerimuna nondopa pumbe kangina toringimanga kopongo kinye no wain kinye ondopa kandondopalie laku tendepa ka tondopalie, altopa yuni yu kangulupe ola lipe yunge kongi donki umbuluna ola noipe mepa pumbelie imbo ponenge pepundala teringi ulke tengah mepa pumbe noipe nokopa molorumu.

<sup>35</sup> Peringili wali ipu leli oi yu pumbesi tepalie, kou 5 kina mele wendo lipe ulke pulu iyemu tipelie nimbei, 'Yu nokoko kondaio! Pele i tiro koumou manda naa temo lemo nunge kou mare olandopa pumo lemo i aulke altopo yando ombolio nunge kou pundu tombo,' nimbe Samaria iyemuni nimu," nimbe Jisasini i tega nimu.

<sup>36</sup> Jisas yuni aku tega nimbeline nimbei, "I iye yupoko ongo puringimanga iye wapu nolimani toko noiringi iyemunga pulu lerimu iyemu nariya? Juda iye oi pulu polko ongo kanoko we ongo puringili iye talonga te molo yunge opa pule iye akilio lepa orumu iyemuya?" nimbe walipe pileringi.

<sup>37</sup> Gotenga ungumanga pulumu pilipe imboma mane tili iyemu yuni nimbei, "Iye-muni yu we kondo kolorumu iyemu lepamo," nimu.

Kano wali Jisasini yundo nimbei, "Nu aku teko pungo tepuwi!" nimu.

*Jisas kinye ambo Marta Maria talo peya molorangi*

<sup>38</sup> Kano wali Jisas kinye yu lombili andolima kinye eno ongo pungolio ulke kombu tengah pumbelie ambo Martani yunge ulkena peya molamili owi nimu wali yu akuna purumu.

<sup>39</sup> Marta yunge angenu Maria molopalie yu Jisasini ungu tukume nimomu pilembo nimbe Jisas molorumuna ombe nondopa mainyine molopalie, Jisas ungu nimbe molorumu mele yu pilipe molorumu.

<sup>40</sup> Nalo Marta yunu langi kalopa, kongono tepe molopalie yu kongono awini lerimu wali kano kongonomu kau konopu lepalie Jisas molorumuna pumbelie nimbei, "Awili mu, nanga angenu na lipe naa tapondoromona na nanu kau langi timboido kongono tepe molto kanokolio kondo naa teremoya? Yuni na ombe lipe tapopili niwi!" nimu kano wali

<sup>41</sup> Jisasini yundo topondopa nimbei, "Ambo Marta, ulu awinimanga nu konopu awini liko munduko konopu umbuni tepili morono

<sup>42</sup> nalo ulu tendeku kau nu naa pilko tereno. Ulu pengamupe Mariani teambo nimbeline nanga ungumu pilipe moromo. Akumunga molo naa nimbo," nimu.

## 11

*Gote kinye ungu ningko kongo tengemunga ungu pulumu jisasini Yu lombili andolimando ungu nimbe tirimu*

<sup>1</sup> Walite, kombu tenga, Jisas yu Gote kinye ungu nimbe molopali mele oi Jon Imbo No Ltindilimuni yu lombili andoringi iyema mane tirimu mele lino aku teko mane tiwi!" nimu.

<sup>2</sup> Aku tepa nimu wali Jisasini enondo nimbei, "Eno Gote kinye ungu nemili ningko i teko mele neio:

Mulu Kombu Ara Gote,  
Imboma nunge imbi wengenderimu  
nengei.

Mulu kombu nokorono mele  
mai kombu aku teko nokowi.

Mulu kombu ungu tente peremo  
mai kombu aku teko tente pepili.

<sup>3</sup> Kinye lino kere tiko molowi.

<sup>4</sup> Imbomani lino teko kenjinge uluma tiye  
kolomolo mele  
linonga ulu kerima liko ltendewi.  
Lino manda manjili uluma ombalo wali tiye  
naa kolowi.

Iye kerimunga kina wendo liwi,  
ningo aku teko neio!" nimu.

<sup>5</sup> Aku tepa nimbeline enondo ungu te peya  
nimbei, "Nu nunge pulu lemo imbo te paa  
ipu lehi amburume pembalona pungolio  
yundo nini, 'Ango, kere langi mare tiwi!

<sup>6</sup> Iye ponenge te kombu tenga pumbelindo  
nanga ulke pembai oromo nalo na gai te naa  
ltemo kani nuni na kere langi mare tiwi,  
nilina kinye

<sup>7</sup> yuni nundo nimbei, 'Nuni na umbuni  
te aku teko naa tiwi! Bakuluma kinye oi  
nambu tipo uru pemolo kani na makilipo  
wendo ombo, nu manda naa timbo, molo,'  
nilka.

<sup>8</sup> Nani enondo nimbo tiro: Yu angenu  
moromomunga makilipe gai naa tilka nalo  
nuni yu kimbo kai tiko konge terenomunga  
yu tiye kolopa wendo ombo gai nilina mele  
tilka nimbo tiro.

<sup>9</sup> Aku lemo, Gote konge ningko wali altoko  
konge ningko melema yuni eno timbelo kani  
yu konge neio! Melema korokolio altoko  
koronge melema kanoko lingko kani melema  
koraio nambu gaungau tingko wali Goteni  
enonga nambu tondombalo kani nambu  
gaungau tieio!

<sup>10</sup> Imbo te Gote walipe pilipelie yu  
melte limbelo. Imbo te melte korombalo  
wali altopa korombalo melema kanopa  
limbelo. Imbo te nambu gaungau timbelo  
wali Goteni yunge nambu tondombalo.  
Akumunga eno waliwali Gote konge teko,

melema koroko, nambu gaungau tiko  
molao!

<sup>11</sup> Enonga iye te yunge malo ombo ara,  
oma te nambo tiwi nilka wali yunge lapani  
waimbe keri te tilkaya? Aku naa tilka.

<sup>12</sup> Molo yuni ara, kera mulu te nambo tiwi  
nilka wali yunge lapani lindi molo makena  
te lipe tilkaya? Aku tepe manda naa tilka,  
molo.

<sup>13</sup> Eno konopu keri pepili moromele im-  
bomani enonga bakuluma mele penga aku  
teko manda tirimele. Altopa enonga Mulu  
Kombuna Moromo Lanieni mele paa olan-  
dopa naa timbeloya? Olandopa timbelo.  
Imbomani yundo Mini Kake Telimu linonga  
konopuna ombo pepili tiwi ningko konge  
ninge imboma yuni eno paa timbelona  
linge," nimbe Jisasini nimu.

*Jisas Yu kuromanga nomi Belsebul ningko  
peya kongono tapu toko terembele ningi  
ungumu*

<sup>14</sup> Jisasini ungu naa nili kuro keri te iye  
tenga konopuna molorumumu makorom-  
bai makororumu. Kuro kerimu wendo  
omba purumu wali ungu naa nili iyemuni  
ungu nimu. Imbomaniaku ulumu kanoko-  
lio konopuna awini leringi.

<sup>15</sup> Nalo imbo mare Jisasindo konopu  
keri panjiringi kanomani nengei, "Kuro  
kerimanga nomi Belsebulini yu lipe tapon-  
doromona yuni kuroma makororomo,"  
ningi.

<sup>16</sup> Imbo mareni Jisas manda manjiko  
kanongei nengei, "Nu paimbo Goteni lipe  
mundurumu lemo mulu kombuna ulu enge  
nili te kanamili tewi," ningi.

<sup>17</sup> Nalo enoni yu Goteni lipe mundurumu  
iye te molo, yu we iyere konopu leringi  
konopu lipe manjipelie yuni enondo  
nimbei, "Kombu tendekuna iye taloni na  
i kombumunga undukana na kau iye nomi  
molomboi ningolio imboma mokemake  
leko opa tengelo lemo aku kombumu  
bembo timbelo. Ulke tendekuna peremele  
imbomanga imbo taloni nani kau i ulkemu  
undukana nokombo ningolio moke make  
teko opa tengelo lemo aku ulke lapumu pora  
nimbelo.

<sup>18</sup> Aku tepala, kuro kerimanga nomi Sa-  
taneni nokromo talapemu tungu tikolio  
opa telemalanje yu nokromo talapemu  
ambe teko manda molemalanje? Manda  
naa molemala. Enoni nando Belsebulini  
yu lipe tapondoromona yuni kuro kerima  
makororomo nimele. Aku telkanje Belsebul  
yunge talapemu pora nilka.

<sup>19</sup> Molo paimbo Belsebulini na lipe  
tapondomo lemo enonga imbomani kuro  
kerima makororomele wali narini eno  
lipe tapondoromona makororomeleya?  
Enonga iye kuro kerima makororomele

imbomani nando nimele unguma aku imbomani pilko apurukolio kolo toromele lepamo ninge.

<sup>20</sup> Nalo Goteni na lipe tapondoromona nani kuroma manda makorondu lemo Gote eno nokopa iye nomi kingimu molombalo waimu eno moromelena wendo oromo.

<sup>21</sup> Iye keri teni enge nimbe opa melema ambolopa mune mondopaya yunge ulke awili nokopa kondoromo wali yunge ulkena tuku ltemo melema imbo te omba manda wapu naa ltimo.

<sup>22</sup> Kano opa melema ulke awili nokoromo pulu iyemuni akumani nani nanga melema manda nokopo kondombo nimbe pilipe ambolopa moromo, nalo yunge opa pule iye te enge olandopa peli ombalie yu tombai tepalie yuni ulke awili nokoromo iyemu topa mundupe yu amboromo opa melema kinye yunge ulkena noirimo melema kinye opa pulemuni wendo lipe pumbe yunge pulu lemo imboma moke tepa tirimo.

<sup>23</sup> Na naa tapondoromo iyemuni na tombai teremo. Na kinye kongi sipsipima tapu topa tukundo naa ltimo imbomuni kongi sipsipima tepa talopa tirimo,” nimu.

#### *Kuro kerimu kelepa oromo*

<sup>24</sup> Jisasini ungu te peya nimbei, “Kuro keri te iye tengen konopuna wendo ombalie, no naa mololi kombumanga yu pumbe manda koro molombalo tengen kororomo. Te naa kanopa Itendepalie yuni nimbei, ‘Na oi molopolio wendo oru ulkemunga kelepo pumbo kanopamboi,’ nimo.

<sup>25</sup> Yu omba yu oi molorumu ulkena kanoromo kinye, ulke pureme mepa tepa penga tepa we lepa imbo te naa moromo ulu kanopalie,

<sup>26</sup> yu wendo pumbelie, kuro keri paa olandopa enge nili 7 lipe mepa omba eno peya kano ulkena tukundo pungo moromele. Paimbo kano iyemu oi molopa kenjirimo nalo altopa paa olandopa molopa kenjirimo,” nimu.

#### *Imboma penga teko molonge ulumu Jisasini nimbe tirimu*

<sup>27</sup> Jisasiniaku tepa nimbe molopili maku toko moloringina ambo teni ungu enge nimbe nimbei, “Nu paa teko kondoronomunga ambo nu mepa ame tirimumu yu malo,” nimu.

<sup>28</sup> Jisasini nimbei, “Yuaku tepa moromo nalo imbo Gotenga ungumu pilko liko teko moromele imboma eno paa olandopa malo,” nimu.

#### *Imbomani Jisasini ulu enge nili te tepili kanamili ningi*

<sup>29</sup> Jisasini molorumuna imbo pulumu tukundo tukundo ongo liko maku toringi wali yuni enondo nimbei, “Kinye maina

moromele imboma imbo kerima kau moromele. Eno teko kenjiko Gote liko naa ipuki tirimele kano imbomani Goteni kau ulu enge nilima manda teremo mele kanamili tewi ninge na konge teremele. Nalo te naa kanonge. Goteni yunge oi molorumu profet iye Jona kinye ulu enge nili terimu mele akumundo kau kanoko pilinge.

<sup>30</sup> Profet iye Jona oi tepa molorumuna kanokolio Ninive imbomani Goteni ulu te terimuna kanoko imbi tiringiaku tepa mele Iyemunga Malo tepa molombalona eno i waina moromele imbomani kanonge.

<sup>31-32</sup> Oi ulke kombu Ninive imboma paimbo ulu pulu kerima teko moloringi nalo Jonani Gotenga nimbe munduli ungu nimbe tirimu wali enoni teko kenjirringi ulu keri pilkolio konopu topele toko molko kondorringi. Aku ulu teringimunga kinye moromele imbomani na Jonanga olandopa moro iyemunga ungumu liko tui tirimele-munga kot walimu wendo ombalo wali Ninive imbomani ningei, ‘Lino Jonanga ungumu pilipo ltimalu nalo eno Jonanga olandopa molorumu iyemunga ungumu liko tui tiringi imboma aku teringimunga mindili nangei,’ ninge. Oi lino Israel imbomanga iye nomi King Solomon yu iye paa enge peli molopa, yu iye lipe manjili molorumu. Kombu Sipa ambo nomi Kwin pilipelie, Solomon yunge konopu paa penga lipe manjipelie ungu pengama kau nimu mele pilimbeindo yu kombu tulena molopalie, wali awini aulkena pelipe orumu. Aku tepa terimumunga, kinye maina moromele imbomani na iye nomi Solomononga olandopa moro iyemuni nio ungumu naa pilko, liko tui tirimele-munga kot walimu wendo ombalo wali kombu Sipa ambo nomi Kwinini nimbei, ‘Nani Solomononi ungu penga nimu mele pilimboindo aulke tule oru nalo Solomononga olandopa molorumu iyemuni nimu ungumu eno naa pilko, we konopu leringi imboma aku teringimunga mindili nangei,’ nimbelo,” Jisasini nimu.

#### *Enonga konopuna pa tepili ungu nimu*

<sup>33</sup> Jisasiniaku tepa nimbe pora tipelie ungu te peya nimbei, “Imbomani tipe lam kandokolio polona maindo naa mondoko, mingina tuku naa mondoko tekolio, ulkena tuku pa tepili, imbo ongema kombu kanangei ningi ltemo polona ola noirimele.

<sup>34</sup> Nunje mongo nunje kangimunga lam mele moromo. Nunje mongo penga tepa angimo wali nu kangi pali pa tepili molko nu andoko kondorono. Nalo nunje mongo kerilembalo wali nunje kangi pali tumbulu topili andonio.

<sup>35</sup> Akumunga nunge konopuna tukundo tumbulu naa topili ningon konopuna tukundo pa kau tepili ningon tiri tewi nio.

<sup>36</sup> Nunge konopuna tukundo pa tepe tenggepeya tepili molko tumbulu tendeku kape naa topili molonio wali nunge kangi konopuna pali pa tepili molonio. Lamemu pa teremona karomolo mele nunge konopuna pa tepili molonio,” nimu.

*Farisi iyema kinye, Gotenga ungumanga pulumu pilko ningon tili iyemando, Jisasini iri torumu*

<sup>37</sup> Jisasini ungumu nimbe pora tirimu wali Farisi iyemanga teni Jisasindo nimbei, “Kere langi peya nambili owi,” nimuna yu kinye pumbe langi nombaindo mainye molorumu.

<sup>38</sup> Nalo yu oi ki kulumie naa topalie langi we norumu ulu kanopalie kano Farisi iyemuni konopu awini lipe mundurumu.

<sup>39</sup> Jisasini yu konopu lipe mundurumu mele lipe manjipelle ungu iko topalie yundo nimbei, “Eno Farisi iyema plet kinye kap kinye tawendo kulumie toromele nalo akumunga tukundo kalaro pulumu moromo. Ulu pulu kerima kinye, melema wapu ltimele ulu pulumu kinye akuna peremo.

<sup>40</sup> Eno paa keke lepo toromele. Kangi terimu iyemuni konopumu peya naa terimuya? Peya talo terimu kani eno kangi no leko kake tepili moromele mele aku teko enonga konopu kake tepili molonge lemo manda.

<sup>41</sup> Enon konopu topele tokolio imbo koropama kondo kolko enonga noirimel melema tingi wali enonga konopu kalaro moromomu kolo wangopa kake tepili,” nimu.

<sup>42</sup> Jisasini Farisi iyema iri topalie nimbei, “Eno Farisi iyema mindili nonge. Enoni poinyena oromo mele keloma lkepa moi kemu aku tepa melema meko kambu toko 10 10 ningon liko noikolio te te ningon wendo liko Gotenga kongono tendeli iyema tiemili ningon tirimile. Goteni aku teko Teao nimo mele enoni teremele nalo aku ulu olandopama naa teremele. Ulu tumbi nilima naa teko, we imboma kondo naa kolko, Goteni imboma konopu mondoromo mele eno anjiko imboma konopu naa mondoromele. Aku teko ulu olandopa mele telemelanje penga. Kinye ulu mainyendopama teremele mele munduko naa kelkilio aku uluma kinye ulu olandopama kinye waye talo telemelanje paa penga. Nalo aku teko naa teremelemunga eno mindili nonge.

<sup>43</sup> Eno Farisi iyema, Juda Imboma maku toko Gotenga ungu pileli ulkena pungo mainye molongeindo eno polo wambana

lino kau molamili ningon akuna konopu tiko moromele. Eno Farisi iyema maket kombuna iye nomi kelkele toko andonge wali we imbomani lino kapi nengei konopu itemele. Aku teremelemunga eno mindili nonge.

<sup>44</sup> Eno Farisi iyema imbo ono kombu tenga imbo ina ono teremele ningon naa pilko wakulu tiko kimbo kamburumele mele eno moromele kani eno mindili nonge,” nimu.

<sup>45</sup> Jisasini aku tepa nimu ungu pilipielie Gotenga ungumanga pulumu pilipe nimbe mane tili iye teni yundo nimbei, “Ungu Mane Tilimu, nuni Farisi iyema aku teko iri toronomunga lino kape iri torono konopu itemolo,” nimu kano wali

<sup>46</sup> Jisasini eno kinye iri topalie nimbei, “Paimbo nino. Eno Gotenga ungumanga pulumu pilko mane tili iyema mindili nonge. Enoni ungu mane tiko teao nimele mele we imboma eno pilkolio tengendo umbuni koromele. Mindili teko umbuni awini menge mele meangei ningon tikolio enoni enongan lipo tapondopo meamili paa naa ningon we kanoko moromelemunga eno mindili nonge.

<sup>47</sup> Eno Gotenga ungumanga pulumu pilko mane tili iyema, enonga anda kolepalemani Gotenga iye profetema toko kondoringi. Yandopa, kinye, enoni kano profet iyema ono teringi kombuma au tirimile.

<sup>48</sup> Anda kolepalema enoni kano profet iyema toko kondoringi ulu penga pilkolio, kinye eno kano profet iyema paimbo toringi. ningon enoni ono teringi kombuma au tirimilemunga eno mindili nonge.

<sup>49</sup> Aku teko teremelemunga, Gote yunu ungu pali lipe manjili iyemuni oi nimbei, ‘Nani nanga profet iye marendo enoni imboma ungu ningon tieio nimbo lipo mundupo, iye mare nanga kongono tendepaio nimbo lipo mundumbo wali imbomani mundumbo iyemanga mare mindili tiko, mare toko kondonge,’ nimbe Goteni nimu.

<sup>50-51</sup> Koro oi Goteni mai pulu polopa tepe wamoromu wali enoni profet iyema toko, pele yandopa yandopa profet iyema pali toko kondoringi. Koro oi Adam malo Abel toko kondoko, pele yandopa yandopa iye profet lupe lupema toliko pungo, pele kamukumu profet iye Sekaraia Gote popo toko kaloli ulke tempelena tukundo toko kondoringi. Kanona tukundo kiripina kake telimu anjikondo lepa, Gote kaloli alta polomu yakondo lerimu, kano tuku tingina yu toko kondoringi. Oi moloringi imbomani kano profet iyema toko kondoringimunga Goteni eno paimbo mindili tirimu nalo kinye moromele imbomani ulu

keri olandopa peya tengei teremele, akumanga peya Goteni eno kot pilipelie mindili timbelo.

<sup>52</sup> Eno Gotenga ungumanga pulumu pilko mane tili iyema ungu manemanga pulumu pilko kondoromele nalo we imbomani naa pilengei ningi eno pilinge aulkemu pipi tirimele. Eno Gotenga bukuna moromo ungumua waliwali karomele nalo Goteni iye te eno lipe tapopili nimbo lipo mundumbo nimu iyemundo nimbe bukuna peremo unguma kanokolio pilko maa tondoromele. Bukuna kano iyemundo nimo unguma pilemili ningi moromele imboma enoni pilinge aulkemu pipi tirimele. Aku teremelemunga eno mindili nonge," nimu.

<sup>53-54</sup> Jisasini aku ungumu nimbe pora tipelie aku ulkemu tiye kolopa pumbei purumu wali yuni iri torumu iye Farisima kinye Gotenga ungumanga pulumu pilko mane tilima kinye enoni yu ungu ambelema, nimbe kenjimbelo wali yu kot tendemolo ningolio enoni ungu lupe lupe awini nendo tiko waliko pilkolio topondonko niwi ningi enge ningi ningi.

## 12

*Farisi iyema topele mapele toromele mele manda leko naa teao Jisasini nimu*

<sup>1</sup> Kano wali Jisas molorumuna imbo pulumu liko maku toko angileringina imbo tengereyani dimbu nimu wali yu lombili andoringimando oi kumbe lepa nimbei, "Farisi iyemanga topele mapele toromele ulumu yis mele lopeke tepa Itemo. Imbo akumanu tengi uluma enoni aku teko manda leko naa teao nimbo lepi lepi toro.

<sup>2</sup> Ulu aku topa pelima altopa tendeku kape aku naa topa pali mona lepa, lopeke teremele uluma altopa tendeku kape lopeke naa tembaloo. Kanoma pali imbomani pali mona lembalona kanonge.

<sup>3</sup> Tumbulu tolina ungu ningima pali pa telina pilinge. Ulke kiripimanga ungu olo toko niangi unguma ulke tulupena angilko ru ninge," nimu.

*Gote kau pipili kolangei ungumu*

<sup>4</sup> Nilipe pumbelie nimbei, "Nanga imboma, enondo ungu te nimbo tiemboi. Eno toko kondokolio nalo altoko ulu te manda naa tenge imboma pipili naa kolaio!"

<sup>5</sup> Nalo eno paa pipili kolonge iyemu nimbo tiembo. Kangimu topa kondopalie altopa mini pali tipe kombuna manda topa mundumbelo Gote yu pipili kolaio! Paimbo nimbo tiro. Yu pipili kolaio!

<sup>6</sup> Kera kaltindipele yu paa walo kolo moromo, topo toko lingende kera kite te pakera kou kololi talo kau purumo. Nalo Goteni kano kerama nokombaindo komu naa tindirimo.

<sup>7</sup> Pileio! Enonga pinyendi kape Goteni eno yu mele mele indi te te nimbe oi kambu torumu. Kera kaltindipele yu kou paa koltalo mele purumo nalo kano keramu Goteni kanopa moromo. Eno imboma paa olandopa awilima Gote yuni eno paa nokopa kondopa molombalo kani pipili naa kolaio!" nimu.

*Imbomani na Jisasinga imbonu moro ningo, ningi mona ltendengei ungumu*

<sup>8</sup> Ungu tela nimbei, "Enondo ungu te nimbo tiemboi. Imbomanga kumbekerena imbomani na Jisasinga imbonu moro ninge wali altopa Gotenga ensele manga kumbekerena Iyemunga Maloni aku imboma, nanga imboma, nimbelola.

<sup>9</sup> Nalo imbomanga kumbekerena nando Jisas yu nariya, yu naa karo ninge imboma altopa na Iyemunga Malo yu Gotenga ensele manga kumbekerena, aku imboma eno naimeleya, eno na naa karo nimbola nimu.

<sup>10</sup> Iyemunga Malondo ungu taka tondoko ungu ningi kenjirimele imboma eno aku teko tekkenjirimele uluma Goteni manda tiye kondombalo. Nalo imboma Gotenga Mini Kake Telimundo ungu taka tondoko, ungu ningi kenjiko, marake teremele imboma eno aku teko tekkenjirimele uluma Goteni manda mundupe naa tiye kondombo.

<sup>11-12</sup> Kano wali altoko eno nanga imboma molengena kanokolio eno ongo ka tiko, eno maku toko Gotenga ungu pileli ulkemanga iye awilima kinye, iye nomina kinye, gavman iye awilima kinye eno molengena eno meko pungo kot tendenje wali akuna Gotenga Mini Kake Telimuni nengei mele nimbe timbelo kani mini naa lteao! Enoni ungu ningi mele kinye, kot tendenje wali ungu topondonko ningema kinye, yuni ungu imbo tondombaloma pilko ninge kani mini naa lteao," nimu.

*Iye kamako teni konopu keke lepo lerimungu ungu ikomu Jisasini nimu*

<sup>13</sup> Jisas molorumuna liko maku torungi imbomanga teni yundo nimbei, "Ungu Mane Tilim, nanga angenumu kinye iltonga lapani tirimu melema yuni na mare moke tepe tipili niwi," nimu.

<sup>14</sup> Nalo Jisasini yundo topondono nimbei, "Iyemu, Nani enonga kot piltindiko enonga melema moke tendewi nimbe narini na mako torumuya?" nimu.

<sup>15</sup> Akumunga yuni enondo altopa nimbei, "Mele awini lipu noipo kamako molamboi ungu naa ningi, melema lipu noiembo kau konopu leli ulu pulumu yu ulu pulu kerimu kani aku naa teambo konopu leko molaio! Imbo teni mele awini lipe noirimomunga

altopa koinjo molopa kondombalo aulkemu naa ltemo," nimu.

<sup>16</sup> Kano wali Jisasini ungu iko te topalie nimbei, "Walite iye kamako te molorumu kinye yunge poinyena langi paa pulumu orumu.

<sup>17</sup> Akumunga yuni konopu kimbo tipe molopalie nimbei, 'Langi noiro ulkema pali tengapeya tepa, we ongoli pulumu ltemo kani na ambe teamboya?' nimu.

<sup>18</sup> Altopa yuni yunu nimbei, 'Kinye pilto. Na i tepo teamboi. Na langi noiro ulkema alumbiye temo tekiripolio langi noimbo ulke paa awilima altopo takopolio akumanga nanga melema kinye poinyena oromo langima pali noiembo!

<sup>19</sup> Akuna noipolio na nanu lipo manjipolio nimbei, "Na malo. Na langi pulumu, poinye awini omba pumbelo wali nombo molombo mele ltemo kani koro molopo, kongi nombo, no wain nombo, tono kolopo molambo!" nimu.

<sup>20</sup> Nalo Goteniaku iyemundo nimbei, 'Iye konopu keke lepo tolimu, kinye ipu leli nani nunge minimu ombo limbo wali nunge noirino melema narini limbelyoa?' nimu," nimbe Jisasini nimu.

<sup>21</sup> Jisasini aku ungu ikomu topa pora tipelie altopa nimbei, "Mele awinima noiro nimele imboma Goteni eno kanopalie eno imbo koropa pulima karomo. Gote kanopa penga karomo ulu puluma naa teko moromele imboma enonga minima koropa pupili mele moromele. Kano imboma eno aku ungu iko toro iyemu mele moromele," nimu.

#### *Goteni nokombalo kani konopuna umbuni naa kolao*

<sup>22</sup> Kano wali Jisasini yu lombili andolimando nimbei, "Mele awinima noingeindo kau pilko moromele imbomani ulu tukume naa teremele nio akumunga enondo ungu te nimbo tiemboi. Eno molonge mele konopu awini liko naa mundukolio lino langi te tena lipo nomolonje ungu naa neio! Enonga kangimunga konopu awini liko naa mundukolio lino maminye te tena lipo pakomolonje ungu naa neio!

<sup>23</sup> Eno molonge mele olandopa, langi nonge mele mandopa; enonga kangi yu olandopa mele maminye pakonge mandopa mele kani langi nonge mele kinye maminye pakonge mele kinye konopu awini liko naa mundeio!

<sup>24</sup> Keramani teremele mele nembo! Poinye naa teko, gai naa akuko langi noirimele ulkema naa takoko teremele nalo Goteni eno langi tirimo. Kera mandopa nalo Goteni eno nokoromo. Eno imboma olandopamunga eno yuni paa nokombalo.

<sup>25</sup> Enonga imbo teni konopu awini lembalomuni kolombalo waimu manda winjipe mundumbeloya? Manda naa tembalo lepamo.

<sup>26</sup> Enoni ulu walo kolte aku teko manda naa teremelelu olandopama eno ambe telka konopu awini liko munduko moromeleya?

<sup>27</sup> Kondipe tindima maina oromo mele liko manjengei. Kongono naa teko, maminye naa toromele nalo kondipe tindi akuma Goteni au tipe kondoromo. Iye Nomi King Solomon wale paa pengama pakopa au nimu mele mainyendopa. Goteni plawa tindima au tirimo mele olandopa.

<sup>28</sup> Era, kinye moromo, otili poroko tipena kalonge nalo Goteni era akumu nokopa kondoromo. Yuniaku teremona eno Goteni lino manda nokombalonje ningalayekolo kau ipuki tirimele imboma pakonge melemanga yuni manda lipe naa tapondombaloya? Eno lipe tapondombalo lepamo.

<sup>29</sup> Enoni konopu awini lekolio asi, langi te tena lipo nomolonje, no tena kolopo nomolonje ningalikopu naa molangei!

<sup>30</sup> Mai kombumanga pali molko, Gote naa pimele imbomaniaku teko teremele nalo nanga imbomanga mulu kombuna moromo Lapamu eno molo lembalo melema kanopa moromo kani eno nongo pakonge melemanga kinye konopu naa liko mundeio!

<sup>31</sup> Gote enonga iye nomi king molopili ningalikopu naa molao! Aku tenge wali yuni we melema kape eno timbelo," nimu.

#### *Mele kande kandema mulu kombuna noirimolomunga ungu ikomu*

<sup>32</sup> Kano wali Jisasini yu lombili andolimando kelepa nimbei, "Nanga kongi sipsip koltalo, Lanieni mulu kombuna molopa walite iye nomi king molopaiimboma nokombalo wali mele penga itemoma eno timbelo. Yuaku teko tembaindo konopu tipe moromomunga pipili kolko naa molao!

<sup>33</sup> Akumunga eno noirimele melema koumone likoaku koumone lingema imbo koropanolia moke teko tieio! Aku ulu teko lio altoko kou kamukumu pora naa nimbelokoumu liko noiko, mele makumamakumaliko altoko mulu kombuna pungena noiko uluma teaio! Akuna wapu lili iyema ongo wapu naa liko, kokani luriniani we melemani ongo teko kenjiko naa tenge. Eno akuna noinge melema manda lembalo.

<sup>34</sup> Eno mele kande kandema noirimele ltemo kombu akuna enoni konopu mon-

doko moromele kani mulu kombuna kau melema noiemili konopu leao!" nimu.

*Kendemandemani enonga nokolimu yando ombalo ningolio nokoko moromele ungu ikomu Jisasiniyu lombili andolimando nimu*

<sup>35</sup>"Enoni Awilimu kinye ombalonje ningo maminye pakoko, kako toko, kiye kandoko molange!

<sup>36</sup>Iye awili te tengen pumbe ambo limbei alapu teremele imboma kinye anjo alapu kere nomba molopalie altopa ulkendo yando ombalo wali yunge kendemandemani yu ombalo ningo ulke nambu tongeindo nokoko moromele mele, enoaku tekomo!

<sup>37</sup>Kano kendemandemanga nokolimu omaba yunge kendemandema kanopalie, uru naa peko molongena kanombalo wali aku kendemandema tono kolko molonge. Nani eno paimbo nio. Awilimu yuni au nimbe maminye kulu topa noipelie kongono maminye pakopa enondo langi noli polona molaio nimbe langi nangei nimbe enonga kongono tendepa eno nokombalo.

<sup>38</sup>Awi amburume tuku ombalo, molo kombu muni kinye ombalo, eno uru naa peko nokoko molongena kanomo lemo eno tono kolko molonge.

<sup>39</sup>I ungumu pileio! Ulke pulu iyereni wapu iyemu ombalo waimu pilkanje yuni yu omaba nanga ulke nambu alumbiye tepa tuku naa opili nimbe yunge ulkemu tiye naa kolopa tengen lupe naa pumbe uru naa pepa nokopa molka.

<sup>40</sup>Iyemunga Malo altopa ombalo waimu eno naa liko manjirimele. Yu lipe manjipe ombalo kani eno yu ombalo kinye tumbi tiko nokoko molaio," nimu.

*Jisasini kongono teko kondoli imboma kinye kongono teko kenjili imboma kinye eno kinye wendo ombalo ulumu nimbe para tirimu*

<sup>41</sup>Jisasini Iyemunga Malo altopa wali talo tepa mainye ombalo mele ungu iko akumu topa pora tirimu wali Pitani yundo nimbei, "Awilimu, aku ungu iko toko ningo tirinomu linondo kau ningo tirino molo imbo lupemando peya ningo tirinoya?" nimu.

<sup>42</sup>Awilimuni topondopa nimbei, "Aku iyemu yu kongono tepa kondopa konopu penga pepili molorumumu yunge iye awilimuni yunge kongono iyema kongono langi nonge waima tembalu kinye moke tepa timbeindo yuni eno nokopa molopili nimu kano kongono tepa kondoromo iyemu yu nariya?

<sup>43</sup>Iye te yunge iye awilimu ulkendo ombalie yuni i teko i teko, teko molowi nimu uluma tembalona kanopalie wali

kongono tendembalo iyemunga awilimuniaku iyemu konopu mondombalo.

<sup>44</sup>Nani eno paimbo nio. Awilimuni kano iyemundo nanga noiro melema pali nuni nokoko molowi nimbelo.

<sup>45</sup>Nalo kano kongono nokoli iyemuni nanga iye awilimu welea naa oromo konopu lepalie kongono teli ambo iyema mapuni topa molopa, langi pulumu nomba no enge nilima nomba keke lepo topa molombalo wali

<sup>46</sup>kano kongono teli iyemunga awilimuwalite yu naa lipe manjimbelo wairengayando ombalo. Tukundo ombalie kano iyemu tepa kenjimbelenunga yu koipenitopa paa mindili tipelie, yunge ungu naa pilko kongono teko kenjili iyema molonigena yu lipe mundumbelo.

<sup>47</sup>Kongono teli imbo te yunge awilimuni i teko i teko tewi nimbelo ungumu pilipelieaku tepa pilipe lipe naa tembalu imbomu yunge awilimuni altopa yu mindili paa awili timbelo.

<sup>48</sup>Nalo tewi nimbelo ungu naa pilipeliewekau tepa kenjimbelo imbomu yunge awilimuni mindili alaye kolte mele timbelo. Imbo mele awini tiringi lipe noirimu imbomupundu toko mele awini tiwi ninge. Imbo mele awini nokoko molowi ningi imbomukelko mele awini tiwi ninge," nimu.

*Jisasinga ungumu imboma pilkolio bulu ninge mele ungumu*

<sup>49</sup>Kano wali Jisasini yu lombili andolimando nimbei, "Na mai kombu tipe mundumboi oru. Aku tipemu i teli oi weleanolkanje penga konopu leka.

<sup>50</sup>Ulu te na kinye kamukumu tukundo molambo no ltio mele wendo ombai oromo. Kinye i teli oi wendo naa oromomunga na konopu umbuni tepili moro.

<sup>51</sup>Ya maina imboma tendekuna popo tiko molangei nimbo oru konopu ltemeleya? Aku molo. Imboma opa pule mele molangei nimbo oru.

<sup>52</sup>Kinye kape altopa kape ulke tengaperemele imbomanga mareninanga ungumu naa pilko molko mareninanga ungumu pilko molkolio, eno enono moke leko opa pule toko imbo kite pakera ulketendekuna peko, yupoko tengen pungomolko, talo tengen pungo molko lupe lupe molonge.

<sup>53</sup>Lapa yunu tengen molopa, yunge malotenga molopa, opa pule tonguele. Anumu yunu tengen molopa, yunge lemenu tengenolopa, opa pule tonguele. Bamu yunu tengen molopa yunge malonga omenu tengenolopa, opa pule tonguele," nimu.

*Kinye wendo oromo ulumanga ulu pulumu ambe telka naa pimeleya nimbe Jisasini imboma waltindirimu*

<sup>54</sup> Kano wali Jisasini liko maku toringimando nimbei, "Enoni kombu kolopalie kupe toromu wali kanokolio lo ombalo nimele wali lo oromo.

<sup>55</sup> Altopa poporome topa, ipu leli kombu kandiye angimo wali kanokolio pane tembalo konopu ltemele wali pane teremo.

<sup>56</sup> Eno topele mapele imboma. Eno ya kombu teremo ulu kanokolio wai wendo ombalolu liko manjirimele nalo kinye na maina oru wali wendo oromo uluma kanoko molkolio kano ulumanga ulu pulumu naa pimele. Aku ambe telka naa liko manjirimeleya?" nimu.

*Kot tendembai tendembalo imbomu kinye ninggo amenge teko molongele unguru Jisasini nimbe tirimu*

<sup>57</sup> Jisasini aku ungu nimbeline nimbei, "Enoni ulu pulu penga tengema ambe telka naa pilko apuruko teremeleya?

<sup>58</sup> Nu kot tendembai tembalo imbomu tendeku tipo molambili ulu mare teambo ninggo welea tewi! Aku ulu naa tenio lemo nu kot tendembalo imbomu nu kot pilipe moke tepe iye molombalona mepa pumbe timbelo. Aku iyemuni nu ka ulke nokoromo iyemu timbelo, yuni nu ka ulkena lipe mundumbelo.

<sup>59</sup> Nani nundo paimbo i tepo nimbo tiro. We manda wendo naa onio. Nu ka ulkena wendo onio pundu pali tokolio kau wendo onio; oi molo," nimu.

## 13

*Ulu pulu keri teremelema imboma naa kolomolo ninggo umbulu tiko konopu topele taio nimbe Jisasini nimu*

<sup>1</sup> Kano kinye Jisasini ungu mane tirimuna moloringi imbo mareni yundo temane toko tikolio ningei, "Kombu Galili imbo mareni Gote popo toko kalko molangei Rom gavman iye awili Pailateni eno topa kondorumi," ninggo temane toringi.

<sup>2</sup> Jisasini aku temanemu pilipelie enondo nimbei, "Kombu Galili imboma aku teko mindili noringi ulu pilkolio Galili imbo moloringi lupe wemanu ulu pulu keri teringi mele mandopa, kano mindili noringi imboma ulu pulu keri teringi mele paa olandopa konopu ltemeleya?

<sup>3</sup> Paimbo nani enondo aku tepe molo nio. I moltomele imboma, eno ulu pulu keri teremelema umbulu tiko munduko kelko konopu topele toko naa tengen lemo eno aku teko toko kondongela," nimu.

<sup>4</sup> Altopa Jisasini temane te topalie nimbei, "Ulke kombu awili Jerusalem tukundo kombu kelo Siloam kouni takoli ulke awili olana te topa kalalu tepe topa mainye mundupelie imbo 18 topa kondorumuna koloringi. Kano imboma ulke kombu

Jerusalem imbo lupe moloringimani pali ulu pulu keri teringi mele mandopa, koloringi imbomani ulu pulu keri teringi mele paa olandopa konopu ltemele ya?

<sup>5</sup> Paimbo nani enondo aku tepe molo nio. I moltomele imboma, eno ulu pulu keri teremelema umbulu tiko munduko kelko konopu topele toko naa tengen lemo eno aku teko kolongela," nimu.

*Unjo mongo naa torumumunga ungu ikomu*

<sup>6</sup> Jisasini aku ungu nimbeline ungu iko te topalie enondo nimbei, "Iye teni unjo fik te yunge unjo wain poinyena imbo panjirimu. Altopa fik mongo tombalo nimbe omba kanorumu kinye te naa torumu.

<sup>7</sup> Fik mongo te naa torumu kano wali yunge unjo wain poinye tapu iyemundo nimbei, 'Piliwi! Poinye yupoko peya i unjo fik angimomunga ombo kanoru nalo fik mongo tendeku kape naa torumu kani yu mai kopongo we noromo kani peke toko Itewi,' nimu.

<sup>8</sup> Poinye pulu iyemu aku tepe nimu kano kinye poinye tapu iyemuni yundo topondopa nimbei, 'Awilimu, i poinye tendekumu kau aku unjomu we angilipili! Unjomu akopa mongo topili nimbo unjo puluna era tepe mai mundupo kongi le lipo mundupu tembo.

<sup>9</sup> Pele nekondo poinyemunga mongo tomo lemo paa penga. Naa tomo lemo kamukumu peke tani,' nimu," nimbe Jisasini nimu.

*Koro mololi wale Sabat tenga Jisasini ambo te tepe koinjo ltimu*

<sup>10</sup> Walite, Juda Imbomanga koro mololi wale Sabat tenga Juda imboma maku toko Gotenga ungu pileringi ulke tengen tuku Jisas pumbeline imboma ungu mane tipe molorumu.

<sup>11</sup> Akuna ambo te molorumu, yu kuro topa umbulu langorumuna ola angilipe tinio timbeindo perepa molorumu. Yuaku tepe molopili poinye 18 ombo purumu.

<sup>12</sup> Jisasini kano ambomu kanopalie yundo owi nimbeline nimbei, "Ambomu, nu kuro torumumu topa kelepili!" nimbeline

<sup>13</sup> ambomu kini ambolorumu kano wali yu tamburumbu tumbi tipe ola angilipelie Gote kapi nimu.

<sup>14</sup> Nalo kano ulkemu nokorumu iyemu yuni Jisas koro mololi wali Sabatemunga imbo tepe koinjo ltimuna kanopa keri pilipelie akuna maku toringi imbomando nimbei, "Kongono wali ki te talo pakera Itemomanga teko koinjo lengei onge manda. Nalo koro mololi Sabat waimunga manda naa tengen, molo," nimu.

<sup>15</sup> Yuni aku tepa nimu kano kinye Jisasini nimbei, "Eno topele mapele iyema. Walilamu koro mololi wali Sabat wendo oromo kinye eno pali yu mele mele enonga kongi kao molo kongi donki langi nomba molorumuna moki leko no oromo kombu tenga no noplili ningi meko purumele kanomu.

<sup>16</sup> Eno enonga kongima Sabat walimunga paa moki leko nokoromele kano, i ambomu Sabat walimunga paa lipo tapon-doro. Kongimu mandopa mele, ambomu olandopa mele kanomu. Akumunga i ambomu, yu Abrahameni kalopa ltimu ambo-te, kuromanga nomi Sataneni yu poinye 18 mindili tirimu ambomu Sabat walimunga moki lepo nokoro mele tepo kenjiro konopu itemeleya?" nimbe waltindirimu.

<sup>17</sup> Yu aku tepa nimu kinye yu terimu mele kanoko keri pileringima mai koloringi. We imbomani yu ulu enge nili terimuma kanokolio tono koloringi.

*Goteni iye nomi kingimu molopa im-boma nokombalo molonge mele ungu iko-talo*

<sup>18</sup> Kano kinye Jisasini imbomando kelepa nimbei, "Gote iye nomi kingimu molopa yunge imboma nokombalo molonge mele ambe tepe mele manda lepo nembonje.

<sup>19</sup> Yu i tepe: Iye teni yu unjo mongo paa kelo te, yunge poinyena mundurumu kano kinye kano unjo mongomu muli topa akopa unjo awili te angilerimu kano kinye aku unjo komanga kera manga takoko peringi," nimu.

<sup>20</sup> "Gote iye nomi kingimu molopa yunge imboma nokombalo molonge mele ambe tepe mele manda lepo nembonje?

<sup>21</sup> Ambo teni yu langi plawa akoli mele isi nili walo kolte lipelie plawa awininga tukundo panjirimu kano kinye plawa pali akorumu aku tepa melela," nimu.

*Gote molombalo kombuna tukundo pumolo mele Jisasini nimu*

<sup>22</sup> Jisas ulke kombu awili Jerusalem purumo aulkrena pumbei pumbelie ulke kombu awilima kinye keloma kinye pumbe, akumanga moloringi imboma ungu mane tilipe purumu.

<sup>23</sup> Kano imbomanga teni yu walipe pilipelie nimbei, "Awilimu, Gote molombalo kombuna tukundo pungo kamukumu molko kondoko punge imboma koltalo kauya?" nimbe waltindirimu kano kinye yuni enondo nimbei,

<sup>24</sup> "Gote iye nomi kingimu molombalo ulkemunga kerepulu paa kelona imbo awini kanona tuku pungeindo perenge. Akumanga kano ulkena tukundo pungo molongeindo eno enge ningi paio nimbo nio.

<sup>25</sup> Kano ulke Goteni ola angilipe nambu timbelo kinye eno pena molkolio, kune

gaungau tikolio waliko pilkolio ningei, 'Awilimu, lino nu kinye peya molamili wamili kani linonga ulke nambu tondowi,' ninge kinye yuni enondo nimbei, 'Tena molkolio oromeleya? Eno imbo tekai marenje naa lipo manjiro,' nimbelo.

<sup>26</sup> Yuni aku tepa nimbelo kinye enoni yundo ningei, 'Nu peya kere norumulu. Linonga ulke kombumanga ongolio lino ungu mane tirinu kano,' ninge.

<sup>27</sup> Nalo yuni enondo nimbei, 'Eno nemboi pileio! Eno imbo tekaima na naa lipo manjiro. Eno ulu pulu keri teko moromele im-boma pali na morona anjo paio,' nimbelo.

<sup>28</sup> Akuna tawendo molkolio eno anda kolepale Abraham, Aisak, Jekop poko kinye Gotenga iye profetema pali kinye, eno Gote iye nomi kingimu molopa nokombalo kombuna tukundo molongena kanokolio eno enono akuna tawendo molkolio eio ningi kola teko molonge.

<sup>29</sup> Israel imboma eno kau Gote iye nomi kingimu molopa nokombalo kombuna tukundo naa punge. Mai kombuna pali imbo mare Gote iye nomi kingimu molopa nokombalo kombuna tukundo pungo Gote kinye peya langi nongo molonge.

<sup>30</sup> Pileio! Mandoko moromele imbo mare Gote iye nomi kingimu molopa nokombalo kombuna tukundo kiyendo molonge. Kiyendo moromele imbo mare mandoko molonge," nimu.

*Jerusalem imboma toko kalonge konopu lipe manjipelie Jisasini eno kondo kolorumu*

<sup>31</sup> Aku tepa mane tilipe purumu kinye Farisi iye maren iongo Jisasindo ningei, "Iye Nomi King Heroteni nu topo kondambo nimbe moromo kani nu ina naa molkolio tenga kowa puwi!" ningi.

<sup>32</sup> Jisasini enondo nimbei, "Na tombai teremo iyemu, yu kolo topa konopu keri peli owa takera mele akumu moromona i unggumu pungo ningi tipeiol!" nimbelie nimbei, "Kinye otli talo kuro kerima imbomanga konopuna peremoma makoropo, kuro toli imboma tepo koinjo lipo tepo molopolio akinjo wali yupoko tipena naa kongono tepo moromu tepo pora timbo.

<sup>33</sup> Nalo Jerusalem pumboindo kinye kape otli akinjo kape na we kongono telipo pumbo. Gotenga iye profet te ulke kombu awili Jerusalem tawendo manda naa kolombalo. Akumunga Jerusalem kombuna kolombo," nimu.

<sup>34</sup> Jisas yuni Jerusalem ugu teaku tepa nimbelie Jerusalem moloringi imboma yu kondo kolopalie enondo nimbei, "O Jerusalem imboma, Goteni eno moloringina yunge kongono tendeli iye profet mundurumu iyema toko kondoko, Goteni eno Liko tapondangei nimbe

mundurumu iyema kouni toko teremele imboma, kera gula amboi yunge waloma lipe yunge kongona lopeke teremo mele nani wali awini eno aku tepo nokolkka nalo eno molo ningi.

<sup>35</sup> Akumunga pileio! Opa pule ongo eno tonge kinye Goteni altopa eno naa nokopa naa lipe tapondombalo kani eno kinye enonga kombumu kinye enonga ulke tempelemu kinye ongo kamukumu toko bembotinge. Enondo ungu te peya nimbo tiemboi! Eno Jerusalem imboma, enoni nando Awilimuni lipe mundurumu oromo iyemu imbi ola molopa, molopa kondopili ninge walimunga na altoko kanonge. Oi molo,” nimu.

## 14

*Iye te kangi akorumumu Jisasini tepe koinjo ltimu*

<sup>1</sup> Juda imbomanga koro mololi wale sabat tengah Farisi iye awili tengah ulkena Jisas kere langi peya nongeindo purumu. Ombo molorumu kinye peya langi nongo moloringi iyemani yu wamongo kanoko moloringi.

<sup>2</sup> Yunge kumbekerena iye kangi akorumu te ombo molorumu.

<sup>3</sup> Gotenga ungumanga pulumu pilko mane tili iyema kinye, Farisi iyema kinye, kano Juda imbomanga iye nomima peya moloringi Jisas yuni enondo nimbei, “Koro mololi wali kinye kuro toli imbo te topo koinjo lilimalanje mandaya? Gotenga ungu manemanga tukundo ambe tepea nimbe moromoya?” nimu.

<sup>4</sup> Nalo yundo ungu te topodoko naa ningo we moloringi. Kano kinye yuni kano iyemu lipe tepea koinjo lipelie yundo puwi nimu.

<sup>5</sup> Jisas yuni peya moloringi imbomando nimbei, “Eno moltomele iye tengah ungulu te molo kongi kao te Sabat wali tengah no muru tengah mainye tomo lemo kano iyemuni kano ungulumu molo kongi kaomu walitikale pumbo wendo naa kundupe limbeloya?” nimu.

<sup>6</sup> Aku tepea nimu ungu pilkolio ungu te naa ningi.

### *Eno maluwele naa taio*

<sup>7</sup> Farisi iye awilimunga ulkena langi nongeindo oringi imboma iye awilima molangei nimbe lipe noirimu polomanga ongo moloringina kanopalie Jisasini eno ungu mane tipelie nimbei,

<sup>8-9</sup> “Iye teni nu kinye imbo mare kinye langi peya namili waio nimbelo wali kano iyemuni iye awilima molangei nimbe lipe noimbelo polomanga tengah nu pungo naa molani. Nu kano polomanga tengah molonio kinye altopa iye awili te yu imbi olandopa

molombalo iye te yu kape langi peya namili owi nimbelo iye te ombalo kano kinye ulke pulu iyemuni nundo nimbei, ‘I iye awilimu nu morono polo akuna molopili polomo tiwi,’ nimbelo wali nu mai kolkolio polo te lupe, imbi naa mololi imboma molangei nimbe noimbelo polo tengah pungo molonio.

<sup>10</sup> Akumunga iye teni nundo langi peya namili owi nimbelo kinye yunge ulkena pungo imbi naa mololi imboma molangei nimbe noimbelo polo tengah pungo moloni! Akuna moloniong kinye ulke pulu iyemuni nu moloniona ombalio nundo nimbei, ‘Ango, i polona naa molko iye awilima molangei nimbo noiro polona ongo molowi,’ nimbelo kinye langi peya nongo molonge imbomani nu kinye tembalo ulu kanokolio nu iye awilimuni lepamo ningi liko manjiko kanonge.

<sup>11</sup> Imbo enono imbi ola liko mundurumele imboma Goteni topa mainye mundumbelo, nafo enonga imbi mandoromele imboma yuni enonga imbima lipe ola mundumbelo,” nimu.

*Langi peya namili waio nimolo ungumu*

<sup>12</sup> Kano kinye Jisasini ulke pulu iyemundo nimbei, “Nu imbomanga kere langi kalondokolio nunge pulu lemoma kinye, nunge angenali kinye, iye kamakoma kinye enondo langi peya namili waio ungu naa nen! Aku imboma waio ninio lemo, aku imbomani walite altoko pundu toko, nundo langi peya namili owi ningi.

<sup>13</sup> Nu imbomanga kere langi kalondokolio koropa nolima kinye, kangi keri lelima kinye, kimbo keri lelima kinye, mongo akulima kinye akumando langi peya namili waio niwi!

<sup>14</sup> Enoni kano langima pundu paa manda naa tongemunga Goteni nu nokopa kondopili ningi. Walite konopu tumbi nimbe pepili moromele imboma kolko makilko koinjo molonge aku walimunga Goteni nu aku teko teniomunga mele pundu tombalona linio,” nimu.

*Langi awini maku toko noringimunga ungu ikomu*

<sup>15</sup> Farisi iyemunga ulkena Jisas peya langi nongo moloringi iye teni Jisasindo nimbei, “Gote iye nomi kingimu molopa nokombalo kombuna langi nonge eno malo,” nimu.

<sup>16</sup> Aku tepea nimu ungumu pilipelie Jisasini ungu te topondopa ungu iko te topalie nimbei, “Iye teni imbo awini peya langi namili kalambo konopu lepalie langi kalopalie imbo awinimando waio nimu.

<sup>17</sup> Langi nonge waimu wendo orumu kinye yunge kendemandemundo nimbe mundupelie nimbei, ‘Oi peya namili waio nimu imbomando kinye i waimunga langi koipo panjiro kani namili wangei pungo nipiwi’ nimu.

<sup>18</sup> Nalo eno pali naa ongeindo yu mele mele ulu mare poltomomunga naa omolo ningi. Teni nimbei, 'Na mai koinjo te topo lindumu kanopumboindo na naa ombo nindiwil!' nimu.

<sup>19</sup> Teni nimbei, 'Nani kongono teli kongi kao 10 pame tenduma pumbo kanopumboindo manda naa ombo nindiwil!' nimu.

<sup>20</sup> Teni nimbei, 'Na ambomu i teli kau lindumunga manda naa ombo,' nimu.

<sup>21</sup> Kendemandemu kelepa yando ombalie ningi mele yunge iye awilimu nimbe tirimu. Kano kinye ulke pulu iyemuni mumindili kolopalie kendemandemundo nimbei, 'Nu welea welea lkiko pungo, i ulke kombu awilimunga aulke baret awilimanga kinye aulke kelomanga kinye pungo, imbo koropa nolima kinye kimbo ki kangi keri lelima kinye mongo akulima kinye aulke naa andoko kimbo tambilulima kinye liko meko owi!' nimu.

<sup>22</sup> Kendemandemuni aku ulu tepalie omba nimbei, 'Awilimu, ninio mele tendu nalo langi noli polona kombu mare we itemola,' nimu.

<sup>23</sup> Kano kinye Awilimuni yunge kendemandemundo nimbei, 'Aku teremo kani nu altoko pungo, ulke kombu awilina tawendo pungo aulke baret awilimanga kinye aulke pakamakamanga kinye pungo, imbo kanoko ltendenioma pali meko owi! Pungolio wali, molo ninge imboma kape tai ningi meko owi nanga ulkemu ti nipili kani imbo pulumu wangei!

<sup>24</sup> Na eno i tepo paimbo nimbo tiro. Nani kiyendo peya namili waio nimbo, ungu nimbo munduru imbomanga tendekure kape paa naa ongo langi nonge itemo. Walite kape paa molo,' nimu," nimbe Jisasini aku tepa ungu iko te torumu.

#### *Lino Jisas lombili andomolo mele ungumu*

<sup>25</sup> Jisas aulkena omba purumuna imbo pulumu liko maku toko yu lombili andoringi kano kinye yu we angilipe topele topa kanopalie enondo nimbei,

<sup>26</sup> "Imbo teni na lombili ombaindo yunge lapa kinye, anumu kinye, omenu kinye, bakuluma kinye, angenupili kinye, kemulupili kinye, yu yunu kape, eno peya olandopa konopu mondopalie, na konopu paa olandopa naa mondomo lemo na lombili manda naa ombalo.

<sup>27</sup> Na Gotenga kongono tendero akumunga kolomboi aulkena puro. Aku tepa mele imbo teni na lombili ombaindo kolombo nimbe yunge unjo polopeya meli na lombili naa omo lemo yu nanga lombili andoli iyere naa molombalo.

<sup>28</sup> Enonga iye teni ulke awili te takombaindo oi kiyendo aku ulkemunga konopu

lige mundupelie yunu nimbei, 'Ulke takopo pora timbomunga kou mone manda noironje molo manda naa tembalonje?' nimbe pilipelie kou moke tepe karomo.

<sup>29</sup> Yu aku tepa oi naa telkanje altopa yu kano ulkemu takombaindo unjo ponga kau pame tepe lige polopalie altopa kou mone molo lembalo kinye kamukumu manda naa takopa pelka. Akumunga imbomani yu ungu taka tondoko owe tendelemala.

<sup>30</sup> Akumani owe tendeko ungu taka tondoko ningei, 'I iyemu ulke awili te takombai takorumu nalo yunge kou mone molo lerimuna yu manda naa takopa pora tirimu,' ningi owe tendelemala.

<sup>31</sup> Aku tepala, iye nomi tengu talapemu kinye iye nomi tengu lupe talapemu kinye opa tengili wali teni yunge kombuna we molombalo, teni yu tombai ombalo. Ombo tombalo iye nomimyu opa teli iye 20,000 mepa ombalo. Nalo we molombalo iye nomimyu yunge opa teli iye 10,000 kau molonge. Kokele aulkena ongo angilengei kinye we molombalo iye nomimyu yunge iyema walipe pilipelie nimbei, 'Lino opa teli iye 10,000 kau molopolio lino ongo tongei imboma manda nendo enge nimbo angilipo tamolonje?' nimbe opa mo wamopa moke tepe karomo.

<sup>32</sup> Kano kinye, kano iye nomimyu yuni linoni eno nendo manda naa tamolo nimbe lipo manjimo lemo yunge iye mare lipelie, iye 20,000 mepa ombalo iye nomimyu aulke tulena omba molopili paio nimbe lige mundupelie nimbei, 'Opa naa tepo we ame topo molamili kani nani ambele ulu te nundo teamboya?' ningi walikoo pilipeio nimbelo," nimbe Jisasini nimu.

<sup>33</sup> Jisasini aku ungu iko talo topalie ungu nimbe ulu lepalie nimbei, "Aku tepla enonga imbo te yuni na lombili wambo nimbelie yunge melema pali kinye, yunge imboma kinye, yunge kou mone kinye, yunge kangi kinye, aku melema kau konopu mondopalie, na olandopa konopu naa mondombalo imbomu na lombili manda naa ombalo," nimu.

#### *Api kutamunga ungu ikomu*

<sup>34</sup> "Api kuta yu mele penga nalo yu tingo naa tembaloo kinye yu kelepa tingo tepili ulu te manda naa temolo.

<sup>35</sup> Kano api kuta tingo naa telimu ambele ulu temoloya? Poinyena lipo mundumolo kinye langi manda naa ombalo. Yu mai kopongo te molo nimbo kanopolio we topo iteremolo.

Komu angilimbelo imbomani i ungumu pileio," nimu.

## 15

*Kongi sipsip te maa torumumunga ungu ikomu*

<sup>1</sup> Kou takisi lili iyema kinye Gotenga ungu pilko naa lili imbo lupema kinye eno pali Jisasinga ungu pilingeindo yu molorumuna nondoko oringi.

<sup>2</sup> Farisi iyema kinye Gotenga ungumanga pulumu pilko ungu mane tili iye akumaniaku ulu kanokolio enomi konokono ningonegi, "I iyemu ulu pulu kerima ambololi imboma peya molamili waio nimbelie, kere langi eno peya nongo moromele ulumu tepea kenjirimo," ningi.

<sup>3</sup> Jisasini eno aku tekono ningi ungu pilipelie i ungu ikomu topalie nimbei,

<sup>4</sup> "Enonga iye teni kongi sipsip 100 ari telka kinye te maa tolkanje yuni sipsip 99 wema era nongo angilengei nimbe pumbe, maa toromomu kanopa limbei korolipe pulka.

<sup>5</sup> Altopa kanopa lipelie yuni konopu tipe apu topa ulkendo mepa pulka.

<sup>6</sup> Kano wali ulkendo ombalie aku iyemuni yunge pulu itemo imboldando kinyeyunge ulke kere pongolo imboldando kinyewalipe pilipelie nimbei, 'Nanga kongi sipsip maa tomomu kanopo lindumunga tono teremo kani peya tono kolopo molamili waio,' nilka.

<sup>7</sup> Aku tepala, nani eno ungu te i tepo nimbo tiro. Imbo ulu pulu keri naa tekokonopu tumbi nimbe pepili molonge imbo 99 waye aku tekono molongena eno ulu pulu kerima munduko kelko konopu topele tonge ulumu eno kinye naa pembalo, kano imboma mulu kombuna enselemani tono koromele. Nalo sipsip tapu iyemuni yunge sipsip maa tolimu kanopa lipelie wali paa tono kolka mele aku mele ulu pulu keri ambololi imbo te yunge ulu pulu keri teremoma pilipe keri pilipe mundupe kelepa konopu topele tombalo mulu kombuna enselemani tono awili tiko kolonge," nimu.

*Kou mone te mainye purumumunga ungu ikomu*

<sup>8</sup> "Aku tepala ambo te kou mongo 10 noipelie te mainye pulkanje yu tipe lam kandopa ulke pureme mepa kanopa limbeindo wamba koropa kondolka.

<sup>9</sup> Kano wali, aku koumu kanopa lipelie yunge pulu itemo imboldando kinye yunge ulke kere pongolo imboldando kinyewalipe pilipelie nimbei, 'Nanga kou mongo mainye pumomu kanopo lindu kani peya konopu tipo molamili waio,' nilka.

<sup>10</sup> Nani eno i tepo nimbo tiro. Aku tepamele ulu pulu keri ambololi imbo te yunge ulu pulu keri teremoma pilipe keri pilipe

mundupe kelepa konopu topele tombalomunga Gotenga enselemani tono kolonge," nimu.

*Ungulu te tepa kenjirimunu lapani yu we konopu mondorumu ungu ikomu*

<sup>11</sup> Jisasini ungu iko te peya topalie nimbei, 'Iye te, yunge ungulu talo moloringili.

<sup>12</sup> Walite akiliomuni lapando nimbei, 'Ara, nu koloniomunga monge melema i teli oi moke teko na tinio mele tiwi!' nimu kano wali kano iyemuni yunge noirimu melema moke tepalie yunge ungulu talo tirimuna ltingili.

<sup>13</sup> Kano melema elo tirimu kano wali akiliomu wali pokore kau molopalie, altopa mele tirimuna pali lipe mepa aulke tule tenga purumu. Kombu tulena pumbe molopalie yu pumbe takera kalorumu. Aku telipe purumu kano wali yunge kou mone melema pali pora nimu.

<sup>14</sup> Yunge melema kinye kou mone kinye pora nimu wali yu paa koropa purumu. Kano wali yu molorumu kombuna engele awili tepa lerimu wali yunge melema pali pora nimuna yu paa engele kolorumu.

<sup>15</sup> Yu engele terimuna yu kano kombupulu iye te molorumuna pumbe kou kongono te teambo tiwi nimbe konge terimu kano wali yuni nimbei, 'Manda, nanga kongi tapu tendewi,' nimu.

<sup>16</sup> Gai punduku kongi tirimuna nambo nimbe pilipe molorumu nalo yu te naa tiringi.

<sup>17</sup> Kano wali, altopa yu konopu kuli lipe mundupe pilipelie yu yunu nimbei, Aranga kongono tenderemele imboma kere pulumu nongo olo tepili moromele nalo na ya ina engele kolopolio kamukumu kolomboitero.

<sup>18</sup> Akumunga na pumbo Ara moromona pumbolio yundo nimboi, 'Ara, nu kinye Mulu Kombuna Moromo Gote kinye nani tepo kenjiru.'

<sup>19</sup> Na ungulu kerimu kani nunge marena molombo manda naa tembaloo kani nunge kongono iye te molambo," nimbo,' nimbe pilerimu.

<sup>20</sup> Kano wali, yu molorumu kombuna mundupe kelepa, lapa molorumuna pumbe purumu. Yu ulkendo pumbe purumu kano wali yunge lapani yu tule tepa orumuna kanopalie yu kondo kolopa lkipe pumbe yu kangulape ltimu.

<sup>21</sup> Kano wali ungulumuni lapando nimbei, 'Ara, nu kinye Mulu Kombuna Moromo Gote kinye nani tepo kenjiru. Na ungulu kerimu kani nunge marena molombo manda naa tembaloo!' nimu.

<sup>22</sup> Aku tepa nimbe molopili lapani yunge kongono tenderengi iyemando nimbei, 'Welea pungo nanga wale pakoli pengamu

pungo liko meko ongo yunge pakondoko, ki ring te liko yunge kina mondondoko, kimbo su liko yunge kimbona mondondaio!

<sup>23-24</sup> Aku tekolio kongi kao walo awilimu toko kalondoko molombolona meko waio! Nanga ungulumu yu koro oi purumu yu kolorumunje konopu lero nalo kinye yu koinjo molopa kelepa oromo. Yu oi pumbe maa torumu nalo kinye altopa oromo kanopo ltimbolo kani tono kolopo kongi kao nombo molamili,' nimu kano wali eno aku teko tono kolko kongi nongo moloringi.

<sup>25</sup> Nalo yunge ungulu komo poinyena kongono tepe molopalie ipupene ulkendo ombai orumu wali eno tono kolko kunana ningi moloringi ungumu pilipelie

<sup>26</sup> yuni kongono tendeli iye tendo ungu te nemboi owi nimbelie, yundo waltindipelie nimbei, 'Tukundo ambele ulu teremeleya?' nimu.

<sup>27</sup> Kano kongono tendeli iyemuni yundo topondopa nimbei, 'Angena kano manda molopa omona lanieni kanopa tono kolopalie kongi kao walo awilimu namili nimbe topa koimo,' nimu.

<sup>28</sup> Aku tepe nimu ungu pilipelie komomu yu mumindili kolopalie na ulkena tuku paa naa pumbo nimu. Aku nimu ungu pilipelie lapani wendo ombo yundo nimbei, 'Lino peya tono kolopo molamili owi,' nimbe konge terimu kano wali

<sup>29</sup> lapando topondopa nimbei, 'Piliwi. Na waliwalima, poinye awini nunge kongono tendepo molopolio nu nino unguma pilipe lipo tengi tipo, walite kape nunge ungu te pilipo tupe naa toro kano nalo nuni nando walite kape kongi meme walo te nanga kanopo ltio unguluma kinye peya tono kolko nongo molangei ningi naa tirino.

<sup>30</sup> Nalo kinye nunge marena ombo, yuni apureli ambomando kou mone pora tirimu, kano marena omo wali nu tono kolko kongi kao walo awilimu namili ningi toko koinio lepamo,' nimu.

<sup>31</sup> Lapani yundo topondopa nimbei, 'Nanga ungulumu, nu kinye na peya morombolo wali nanga melema pali nunge kindo itemo, iltonga.

<sup>32</sup> Nalo kinye angena kolorumu kanomu altopa omo. Yu oi pumbe maa torumu, kinye kelepa omona kanopo ltimolo kani lino tono kolopo kunana nimbo langi nombo moltomolo,' nimu," nimbe Jisasini nimu.

## 16

*Ya maina noirimolo melemando Jisasini ungu te nimu*

<sup>1</sup>Jisasini yu lombili andolimando ungu te peya nimbelie temane te topalie nimbei, "Walite iye kamako te molorumu wali

yunge mele noirimumanga nokoli iye te molorumula. Walite imbo maren i kamakomu molorumuna ongo, yunge melema nokoli iyemuni terimu mele ongolio yundo ningeindo, 'Nunge mele noirimomanga nokoli iyemuni nu tepe kenjipe, nunge melema we mainye pupili nimbe yu akuma nokopa naa kondoromo,' ningi.

<sup>2</sup> Aku teko ningi ungu pilipelie kamakomu kano iyemundo owi nimbelie yundo iri topa nimbei, 'Nundo i ungu ambeleme nimeleya? Nuni nanga melema teko kenjindirino ningi ungu pilipolio nuni nanga melema nokondoromo mele bukuna toko, yando tikolio altoko puwi. Nu nanga melema altoko manda naa nokowi, nu makorombo,' nimu.

<sup>3</sup> Kano melema nokoli iyemu anjo pumbelie yunu nimbei, 'Apa! Kinye ambe teambonje? Nanga awilimuni nanga kongono teromu wendo lipo na makorombai teremo kani na ambe teambonje? Na mai akumboindo enge naa peremo na aku kongonomu manda naa tembo. Imboma langi tieio nimbo konge tembo ulumu mai tememo.

<sup>4</sup> Akumunga na tembo mele kinye lipo manjiro. Nanga awilimuni pundu anjirimu imboma lipo tapondopolio enondo pundu ekondo kau taio, ekondo mainye pupili nimbo wali altopa na makorombalo wali kano imbomani na konopu tiko liko tapon-dokolo nando peya peamili owi ninge,' nimbelie,

<sup>5</sup> yunge awilimuni pundu anjirimu imboma yu mele mele wangei nimbe kumbe lepa orumu iyemundo nimbei 'Nanga awilimuni nu kinye ambe tepe mele pundu anjirimuya?' nimbe waltindirimu wali

<sup>6</sup> yuni topondopa nimbei, 'Wel mingi 100 pundu anjirimu,' nimu. Aku wali kamakomunga melema nokoli iyemuni yundo altopa nimbei, 'Pundu anjili bukumu i tiro. Ya mainye molko, 100 toko mondiringi gomomu ora toko kolo wangoko gomo koinjona wele mingi 50 kau toko mondowi,' nimu.

<sup>7</sup> Yunge umbulkondo orumu talo tepe iyemundo nimbei, 'Nanga awilimuni nu kinye ambe tepe mele pundu anjirimuya?' nimbe waltindirimu wali yuni topondopa nimbei, 'Rais wit wale 1,000 pundu anjirimu,' nimu. Aku wali melema nokoli iyemuni yundo altopa nimbei, 'Pundu anjili bukumu i tiro. Ya mainye molko, rais wit wale 1,000 toko mondiringi gomomu ora toko kolo wangoko gomo koinjona rais wit wale 800 welea toko mondowi,' nimu.

<sup>8</sup> Yu aku tepe terimu ulu pilipelie iye kamako awilimuni kano tepe kenjili iyemu yu kapi nimu. Yunge melema paimbo wapu

mele lipe te pa kenjirimu nalo yunge lipe manjilimu paa olandopa perimu pilipelie yu kapi nimu. Ya maina molko, Gote konopu naa mendoromele imboma mai kombuna ltemo uluma eno paa liko manjirimile. Nalo pa telina molko Gote konopu mendoromele imbomaaku uluma naa liko manjirimile,” nimu.

<sup>9</sup> Kano wali Jisasini aku temanemu topa pora tipelie enondo nimbei, “Nani enondo nimbo tiemboi. Kinye ya maina molkolio maina melema liko imboma nunge angenali mele molangei ningonunge mele noirinoma eno liko tapondani! Altoko melema pora nimbelo wali nu kombu pengana kamukumu punio wali akuna mlongemani nundo ya kamukumu peya molamili ninge,” nimu.

<sup>10</sup> Aku tepa nimbeline nimbei, “Imbo teni imbo tenga mele koltalo nokopa kondondoromo ulu kanopalie mele awini timbo kinye nokopa kondondombalo ltemo nimo. Imbo teni imbo tenga mele koltalo naa nokopa kondondoromo ulu kanopalie mele awini timbo wali nokopa naa kondondombalo ltemo konopu ltemo.

<sup>11</sup> Nuni ya maina noirimele melema nokoko naa kondonio lemo Goteni timbelo mele tukumema, nokondani ungu manda naa nimbelo.

<sup>12</sup> Nuni ya maina noirino melema nunge molo, kano melema Gotenga. Akumunga nuni yunge melema nokoko naa kondonio lemo altopa yuni nunge noieni nimbe timbei tepa moromo melema manda timbelonje?

<sup>13</sup> Kendemande teni iye awili talonga kongo talo lipe popo tipe manda naa tendembalo. Altopa awili te yu konopu mondopa te konopu naa mondombalo. Molo aku tepa naa temo lemo awili teni ungu nimbelo pilipe naa lipelie teni ungu nimbelomu pilipe limbelo. Enoni Gotenga kongo kinye maina noirimele melemanga kongono kinye liko popo tiko manda naa tengen,” Jisasini nimu.

<sup>14</sup> Jisasini aku tepa nimu ungu pilkollo Farisi iyema eno kou mone kape melema kape konopu paa pulumu mendoringimunga yu ungu nimumu liko tui tiko owe teringi wali

<sup>15</sup> Jisasini enondo nimbei, “Enoni i tekoneimele. We imbomani lino Farisi iyema konopu tumbi tipe pepa, pengama moromolo kanoko nindengei konopu ltemele nalo enonga konopuna paimbo peremo mele Goteni kanopa moromo. Maina imbonani kanokolio mele paa tukume, mele paa olandopamu nimelemando Goteni konopu naa mendoromo,” nimu.

*Ungu manemanga kinye, ungu tukumemunga kinye, Jisasini ungu te nimu*

<sup>16</sup> Kano wali Jisasini ungu te altopa nimbei, “Jon Imbo No Ltindilimu oi maina naa omba molopili Goteni lino teaio nimu mele iye Mosesini pilipelie yando mane tirimu ungu manema kinye, Gotenga profet iye mani imboma mane tiringi unguma perimu. Nalo kinye, Goteni omba iye nomi kingimu molopila imboma nokopa kondombalo ungu tukumemu nimbo tilipo andromolo. Gote kingimu molombalo kombuna tuku pungeindo imboma enge ningomindili nongo teliko purumele.

<sup>17</sup> Mulu mai talo walite pora nimbelo nalo Goteni ungu nimu unguma oi mane tiko buk toringi bukuna moromo kano ungu manemanga alaye ungu mongo te kape mainye manda naa pumbelo. Gotenga ungu manema pali lepa kau pumbelo,” nimu.

*Iye te ambore wapu ltimomunga Jisasini ungu te nimu*

<sup>18</sup> Kano wali Jisasini ungu te altopa nimbei, “Iye teni yunge oi ltimu ambomu topa makoropa mundupelie altopa ambo te lupe limo lemoaku iyemuni oi ltimu ambomu tepa kenjipe pele koinjo limbelo ambomu wapu mele limbelo. Ambo yunge oi purumu iyemuni topa makoropa mundurumo ambo akumu altopa iye lupe teni yu limo lemo yuni kano ambomu wapu mele limbelo,” nimu.

*Iye kamakomu kinye iye koropa noli Lasarus talonga temanemu*

<sup>19</sup> Jisasini temane te topalie nimbei, “Iye kamako te molorumu. Yunge wale pakoli paa penga kou paa olandopa pulima pakopa, yunge ulkena langi pengama kau nomba perimu.

<sup>20</sup> Iye koropa noli te molorumula, kanomunga imbi Lasarus. Yu waliwali kamakomuni yu kondo kolopa kou mone te molo langi te timbelonje ningonunge ulke kerepuluna molopili ningomeko ongo mendoringi. Yunge kangi pali lupe molorumu.

<sup>21</sup> Kano lupema owamani ongo penemanle leringi. Yu kamakomunga langi nurupili mainye pumbeloma lipo nombo nimbe molorumu.

<sup>22</sup> Koropa noli iyemu kolorumu, kano kinye mulu kombuna enselemani yunge minimu liko, Juda Imbomanga pulu polko anda kolepa Abraham molorumuna meko puringi, Gotenga mulu kombu pengana peya moloringili. Kamakomu kolorumula, kano wali imbomani yu ono teringi.

<sup>23</sup> Kano wali yu tipe kombuna mindili nomba molopalie, yuni mongoni olando

tipe kanopa wirenga Abraham Lasarus talo peya moloringilina kanorumu.

<sup>24</sup> Kanopalie alako topa nimbei, ‘Ara Abraham, na kondo kolkolio Lasarusini imbo nona ki tundu mainye mundupelie nanga alimbili koma topili nimbe tendepili ningyu liko maindo munduwu. Na i tipemunga paa mindili awili nombo moro,’ nimu.

<sup>25</sup> Nalo Abrahameni yundo nimbei, ‘Nanga malo iye, oi moloringili kano mele konopu liko manjiwi! Elo maina moloringili wali nu mele pengama noiko manda molorunu nalo Lasarus yunge mele te naa noipe molopa kenjirimu kanomu. Kinye yu konopu penga pepili moromo nalo nu mindili nongo morono.

<sup>26</sup> Nani ee nilkanje yu maindo manda naa olka. Lino moromolo eno moromele awi tuku tingina Goteni kombu awilimu ltimu peremo kanomu. Kinye ya ina moromolo imboma eno moromelena maindo pamili ningwe wali manda naa onge; enonga imboma olando wamili ningwe wali yakondo manda naa onge,’ nimu.

<sup>27</sup> Kano wali kamakomuni nimbei, ‘Aku lemope Araya, yu nanga ulke kombuna pupili liko munduni nimbo konge tero.

<sup>28</sup> Nanga angenupili ki te pakera moromele kani. Ikombu mindili noli kombuna eno kape naa wangei, yuni enondo ungu nimbe tepe amenge tepili,’ nimu.

<sup>29</sup> Nalo Abrahameni yundo nimbei, ‘Enonga oi iye nomi Mosesini buk torumu bukuma kinye Gotenga ungu nimbe mundulima imboma ningwe tili iye profetemani buk торинги bukuma kinye noirimele kanomu. Enoni kano bukuma kanoko pilengi,’ nimu.

<sup>30</sup> Kano wali kamakomuni nimbei, ‘Ara Abraham, aku manda molo. Kolorumu imbo te makilipe koinjo molopa eno moromelena pumbe nimbe timo lemo ulu pulu keri teremelema pilko keri pilkolio kelko konopu topele tonge,’ nimu.

<sup>31</sup> Abrahameni yundo nimbe, ‘Mosesinga unguma kinye Gotenga iye profetemanga unguma kinye kambu toko naa pilinge lemo kolorumu imbo te makilipe koinjo molopa pumbe nimo lemo yunge ungumu naa pilinge kala,’ nimu,’ nimbe Jisasini temane te aku tepe torumu.

## 17

*Imbo te ulu kerima tepili ningwe toperope naa tieio nimbe Jisasini nimu*

<sup>1</sup> Jisasini yu lombili andolimando nimbei, ‘We imboman i nanga imbomarendo Ulu kerima teangei ningwe toperope tirimele nalo aku teko toperope tinge imboma paa mindili nonge.

<sup>2</sup> Nanga imboma ulu kerima tepili toperope timbei tembalu wali oi naa teli yu kou muluwele awili te nomina moko tokolio pera tiko nomuna mainye mundunge lemo paimbo yu mindili nomba kolombalo nalo yu imbo te toperope oi naa tili Goteni yu aku ulu keri teremelelunga pundi keri tambo nimbe mindili lipe timbelo mele yu kinye naa pembalo.

<sup>3</sup> Nanga imboma, enonga teremele ulu wamongo liko manjeio! Angena teni nu kinye ulu te tepe kenjimbelo wali yu molombalona pungo nini, ‘Ango, ulu keri teniomu, ambe temona tenioya?’ niwi! Aku teko ninio wali yu pilipelie nimbei, ‘Ango, paimbo tepo kenjindu kani kondo kolto’ nimbelo kano wali nu kinye kano ulu keri tembalomu tiye kolko altoko naa liko manjiwi.

<sup>4</sup> Wali tendekumunga yu wali ki te yupoko pakera aku tepe nu kinye tepe kenjipe, altopa wali ki te yupoko pakera konopu topele topa nundo ango, kondo teremo nimbelo wali manda, nu wali ki te yupoko kano ulu keri tembaloma tiye kolowi,’ nimu.

*Linoni Jisasinga ungumu ipuki tipo amboromo ungumu*

<sup>5</sup> Kano wali Jisas lombili andolimani yundo ningei, ‘Awilimu, nu ungu nino mele lino paimbo ungumu nimbo alaye tepe kau ipuki tipo amboromo kani nuni awili teko ipuki enge ningwe tiko ambolangei ningwe like tapondowi,’ ningwe konge terengi kano wali

<sup>6</sup> Awilimuni eno topondopa nimbei, ‘Unjo tengen mongo yu paa kelo nalo kano mongo maina mundurumolo wali unjo akopa awili lepa angimo kanomu. Aku tepe mele, eno nani ungu nio mele ipuki alaye kolo kau tilimalanje, enoni Goteni nanga ungumu manda pilimbelo ningwe neya angiltimo unjo akumundo pulkono pali nunu pulu akuko, nomu kutana tuku pungo angiliwi nilimala wali kano unjomu enonga ungumu pilipe lipelie aku tepe ulu awili manda telka,’ nimu.

*Gotenga kongono kendemande tengen mele Jisasini ungu nimu*

<sup>7</sup> Aku tepe nimbeline nimbei, ‘Enonga iye te yunge kendemande iye teni poiney tendepa molo kongi sipsip tapu tendepalie altopa ipupene ulkendo ombalo wali yunge awilimuni yundo ya ongo mainye molko kere welea nowi nimbelyo? Aku tepe manda naa nimbelo.

<sup>8</sup> Kano kongono tendeli iyemu yu kongono tepe pora tipe ulkendo ombalo wali yunge awilimuni yundo i tepe nimbei, ‘Nanga kere kalondoko ambolko tikolio altoko na kere nombo pora timbo wali nu pungo nunge kere kalko nani,’ nimbelo.

<sup>9</sup> Iye awilimuni tewi nimbelo mele yunge kendemande iyemuni pilipe lipa tembalomungu, ‘Ango, paa tenio,’ nimbeloya? Aku tepe naa nimbelo.

<sup>10</sup> Aku tepala, enoni Goteni enondo kongo tendaio nimo mele pali teko likolio eno enono ningei, yuni lino teaio nimo mele kau tepo, kongono olandopa te naa tepolio lino kendemande kerima moromolo nengei,” nimu.

*Jisasini kuro kendi noli iye 10 tepe koinjo ltimu*

<sup>11</sup> Jisas ulke kombu awili Jerusalem pumbelie, Galili kombu Samaria kombu owena kule kulena tuku tingina pumbelie,

<sup>12</sup> ulke kombu kelo tengen tukundo purumu. Tukundo purumu kano wali kuro kendi noli iye 10 yu aulke omaba purumuna ongo tule teko angilko

<sup>13</sup> enoni ru ningolio ningei, “Jisas, Nokoli Iyemu, lino kondo kolowi,” ningi.

<sup>14</sup> Yuni eno kanopalie nimbei, “Manda, kinye eno koinjo purumele kani eno Juda Imbomanga ningi Gote popo tondoli iye moromelena pungo, enonga kangi liko ondopaoi,” nimu. Kano wali eno pungei purungi wali eno kuro pora nimbe imbo kangi angilerimu.

<sup>15</sup> Enoni koinjo pungolio kanoringi wali iye akumanga teni yando omaba ungu enge nimbe Gotenga imbi ola ltindipe omaba

<sup>16</sup> Jisas angilerimuna mainye pumbe tamalu pepa yundo paa tereno nimu. Kano iyemu yu Samaria iyemu.

<sup>17</sup> Kano wali Jisasini nimbei, “Nani iye 10 kulumie naa tondonduya? Kinye iye 9 tena pungeya?

<sup>18</sup> Te kape yando ongo, Gotenga imbi ola naa ltindingeya? I iye lupemu kau oromo kani Israel iye kuro kendi nomo tepo koinjo linduma tena moromeleya?” nimu.

<sup>19</sup> Kano wali yuni Samaria iyemundo nimbei, “Ola angilko puwi. Nani manda tembo ningi ipuki tirinomuni nu koinjo puruno,” nimu.

*Gote kamukumu Iye Nomi King Awilimuna omaba molombalomunga ungumu*

<sup>20</sup> Walite Farisi iyemani Jisas waliko pilkolio ningei, “Te wali Gote iye nomi kingimu molopa imboma kinye melema pali kinye yu yunu nokombalo walimu wendo ombaloya?” ningi. Jisasini topondopa nimbei, “Gote iye nomi kingimu molopa imboma kinye melema pali yu yunu nokombalo walimu wendo ombalo mele imbomani mongoni kanangei mele naa wendo ombalo.

<sup>21</sup> Eno kinye ya moromelena Gote oi iye nomi kingimu molopa imbo mare nokromona yu iye nomi kingimu molopa imbona kinye melema pali nokombalo ulumundo imbo teni kanaio, i wendo oromo ningi, andi wendo oromo ningi, aku mele manda naa ninge. Kano walimu oi wendo omo ltemo,” nimu.

<sup>22</sup> Aku tepe nimbeline Jisasini yunge lombili andolimando nimbei, “Enoni Iyemunga Malo alaye kolte kanamili ninge walima wendo opili konupu lenge nalo naa kanonge.

<sup>23</sup> Imbomani wina moromo, ya ina moromo ninge. Nalo kolo tonge kani eno lombili naa paio!

<sup>24</sup> Kariapa teremo wali kombuma pali pa teremona imbonani pali karomele. Iyemunga Malo aku tepe mele altopa ombalo.

<sup>25</sup> Nalo oi yu mindili pulumu nombalo, kinye moromele imbonani yu liko tui tiko umbulu tinge.

<sup>26</sup> Oi iye Noa molopili imbonani teringi mele Iyemunga Malo ombai tembalo wali imbonani aku teko tene.

<sup>27</sup> Noa nona andoli sip ulkemu takopa imbona ulu wendo ombalo mele nimbe tepe mololipole purumu wali eno naa kanoko naa pileringi. Enonga we kongono teko enonga we uluma teringi mele langi nongo ambo liko teko aku uluma teko mololiko pungolio, Noa nona andoli sip ulkemunga tuku purumu wali kape eno aku uluma we teko moloringi. Kano wali sipina tukundo naa moloringi imbona pali noni topa kondorumi.

<sup>28</sup> Lot kinye waye moloringi imbonaniaku teko teringila. Eno langi nongo bisnis teko poiney teko ulke takoko, we ulu akuma teko moloringi.

<sup>29</sup> Nalo Lot ulke kombu Sodom tiye kolopa kowa purumu kano walimunga tipe kinyekou tipe nomba angilima muluna mainye lo mele omaba Sodom moloringi imbona pali topa kondorumi.

<sup>30</sup> Iyemunga Malo altopa ombalo walimunga oi teringi nio mele altoko aku ulu teko molonge.

<sup>31</sup> Yu ombalo walimu wendo ombalo wali enonga ulke kerepulmanga molonge imbona altoko ulkendo tukundo pungo enonga ulke tukundo noinge melema pungo naa lipunge! Aku tepala poineyena molonge imbona enonga noinge melema altoko ulkendo pungo naa lipunge!

<sup>32</sup> Lot omenu terimu mele liko manjeio!

<sup>33</sup> Iye teni molopa kondombalo melema ambili nonde nimo lemo aku iyemu paa kolombalo nalo aku melema mundupe tiye kolombalo iyemu yu koinjo molombalo.

<sup>34</sup> Nani eno paimbo nio. Iyemunga Malo altopa ombalo kano walimunga ipu leli iye

talo polo tendekuna pengele wali Gotenga ensel teni ombo iye te we pepili mundupe kelepa te lipe mepa pumbelo.

<sup>35</sup> Ambo talo langi kalko molongeles wali ensel teni ombo ambo te we molopili mundupe kelepa te lipe mepa pumbelo.

<sup>36</sup> Iye talo poinyena angilingeles wali ensel teni ombo iye te we angilipili te lipe mepa pumbelo," nimu.

<sup>37</sup> Yuni nimu ungu pilkolio enoni ningei, "Awilimu, aku ulumu tena tembaloya?" ningi.

Jisasini topondopa ungu iko te topalie nimbei, "Melema kolopa ltemo kombumanga mele kololima noromele kera iliaka mele kolopa ltemoma kanokolio nongeindo mainye ongo liko maku toromelena mona karomele," nimu.

## 18

### Gote Kot pilimbelomunga ungu ikomu

<sup>1</sup> Walite, Jisasini Eno Gote kinye ungu ningi tiye naa kolangei nimbe yu lombili andolimando ungu iko te topalie nimbei,

<sup>2</sup> "Walite, kombu tengah kot pileli iye te molorumu. Kano kot pileli iyemuni yu Gote kape maina imboma kape pipili naa kolorumu.

<sup>3</sup> Kano kombuna ambo wai te molorumu. Aku ambomu yuni kot pileli iyemuni molorumuna waliwali ombalie yundo nimbei, 'Na tepe kenjirimu iyemuni kot tendembo. Nuni na liko tapondoko kot piliwi,' nimbe konge tepundala terimu.

<sup>4</sup> Ambomu oi kokele orumu wali kot pileli iyemuni yundo molo, nunge kot naa piltindimbo nimu nalo, ambomu yu waliwali opundala terimumungu kot pileli iyemuni yu yunu nimbei, 'Na Gote pipili naa kolopo, imboma kondo naa kolopo moro

<sup>5</sup> nalo i ambo waimu waliwali ombo waltindirimomunga altopa ombo konge tembalo wali na kamukumu tiye teremo kani yunge kot piltindemboi,' nimu," nimbe Jisasini nimu.

<sup>6</sup> Awilimuniaku ungu ikomu topa pora tipelie ungu te peya nimbei, "Kot pileli iye kerimuni ambo waimundo terimu mele pileio!

<sup>7</sup> Aku tepe mele Goteni yunge imboma umbuni tirimele imbomaaku teremelelenga kot pileli iyemuni molopalie kot naa tendembaloya? Yunge imbomani waliwali tangoli kape ipo leli kape linonga kot piliwi ningi konge teremele kinye yuni enonga kot naa pilimbeloya?

<sup>8</sup> Yu tembalo mele nimbo tiemboi. Gote yu welea ombo yunge imboma lipe tapombaindo, eno umbuni tirimele imboma kot

tendepalie umbuni timbelo. Nalo Iyemunga Malo altopa wali talo tepe mainye ombo wali imbo maren yuni eno lipe tapondombalo ningi yu konge teko ipuki tiko molongena ombo kanombalonje," nimu.

*We imboma peya tendekuna naa molamili nimu iye Farisi te kinye kou takis lili iye te kinye elonga ungu ikomu*

<sup>9</sup> Imbo mare eno enono pilkolio na penga, na konopuna kake tepili molopo, na tumbi tipo moro, imbo lupema molko kenjirimile, eno imbo kerima, eno kinye tapu topo naa molambo ningi pilko andoko moloringi imborando Jisasini i ungu ikomu topalie nimbei,

<sup>10</sup> "Iye talo yu mele mele Gote kinye ungu nemibili ningi Gote popo toko kaloringi ulke tempelemunga puringili. Te Farisi iye te, te kou takis lili iye te.

<sup>11</sup> Farisi iyemu yu pepenare none tepeola angilipeli yu yunu konopuna pilerimu unguma nimbei, 'Gote, imbo lupe moromele mele na aku tepe naa moromunga nundo paa tereno nio. Eno wapu nongo, ulu pulu kerima teko, ambo iye wapu langi nongo teremele. I kou takis lili iyemu tepe moromo mele kape naaaku tepe molo.

<sup>12</sup> Nunge ungu manema pilipo lipo temboindo na koro tengah wali talo langi mi topo naa nombo, kou mone kinye melema kinye mele 10 10 nimbo ltiomanga te nunge nimbo aku tepe moke tepe nu tiro kano,' nimu.

<sup>13</sup> Nalo kou takis lili iyemu nondopa naa ombo anjo tengah lupe mai kanopa angilipe, na iye paa keri te nimbe pilipelie mai kolopa kimuni yunge luwina topa angilipelie nimbei, 'Gote, na konopuna ulu pulu keri peli iyemu kondo kolowi,' nimu," nimbe Jisasini nimu.

<sup>14</sup> I ungu ikomuaku tepe topa poratipelie Jisas yuni nimbei, "Nani eno paimbo nimbo tiro. I iye talondo Goteni kou takis lili iyemunga ulu pulu keri terimuma mundupe kelepa altopa naa pimona,aku iyemukonopu kake tepiliulkendo purumu, nalo Farisi iyemu ulu pulu keri terimumakonopuna we pepiliulkendo purumu. Imbo enono imbi ola ltimelema Goteni topa mainye mundumbelo, nalo imbo enonomandoromelema yuni enongaimbima ola lindimbelo," nimu.

*Jisasini bakuluma molko kondangei nipi ningo meko oringi temanemu*

<sup>15</sup> Imbomani enonga bakuluma keloma Jisas ki noindipili ningi yu molorumuna meko oringi. Nalo yu lombili andolimani iri tokonaa meko waio ningi.

<sup>16</sup> Nalo Jisasini bakulumando waio nimbelie yu lombili andolimando nimbei, "Gote

iye nomi kingimu molopa nokoromo kombumu imbo i bakulu mele moromelemanga kani eno i bakuluma na morona wangei pipi tiko molo ungu naa neio.

<sup>17</sup> Nani eno paimbo nimbo tiro. Bakuluman Gote linonga iye nomi kingimu molopo lino nokopili ningoromemele mele aku teko naa nimele imboma yunge kombuna tuku paa naa punge, molo," nimu.

### *Iye kamako tenga temanemu*

<sup>18</sup> Walite Juda imbomanga iye nomi te Jisas molorumuna omaba yundo walipe pilipelie nimbei, "Ungu Mane Tili Pengamu, na ambe tepo kamukumu molopa kondopa kau puli ulu pulumu limboya?" nimu.

<sup>19</sup> Jisasini yundo nimbei, "Nuni ambe telka na iye pengamu ninoya? Imbo penga te molo. Gote kau pengamu.

<sup>20</sup> Nu Gotenga ungu manema Mosesini yando tirimuna pino kano. Moses yuni nimbei, 'Ambo iye pulima molo iye ambo lilimani imbo lupema kinye wapu langi naa nangei nimbe, imbo toko naa kondangei nimbe, melema wapu naa liengei nimbe, imbo lupemando kolo toko kot naa tendangei nimbe, eno amiryeli lanielinga ungu tenge tiko molangei,' nimbe aku ungu mane tirimuma peremo kanomu," nimu.

<sup>21</sup> Iye nomimuni nimbei, "Na ungulu wali aku ungu manema pali pilipo lipo tepo moloru mele kinye we tepo moro," nimu.

<sup>22</sup> Yuaku tepo nimu ungu pilipelie Jisasini yundo nimbei, "Paa tereno nalo ulu tendeku kau naa tereno. Nu pungo nunge mele noirinoma pali kou mone lipungolio, kou mone linioma imbo koropa nolima moke teko tikolio na lombili owi. Nunge melema aku tenio wali mulu kombuna nunge mele kande kandema lembalo," nimu.

<sup>23</sup> Kano iye nomimuni mele paa kande kandema noirimumunga Jisasini aku tepa nimu ungu pilipelie yu kumbekere tepa konopu umbuni tepili anjo purumu.

<sup>24</sup> Yu purumu ulu kanopalie Jisasini yu lombili andolimando nimbei, "Gote iye nomi kingimu molopa nokoromo kombuna tukundo pungeindo imbo kamakoma pungei paa perenge.

<sup>25</sup> Kongi kamel walipe kale aulkena omaba tuku pumbeindo mindili awili tepa nomba pumbe perembalo. Nalo yu alaye mandopa mele. Imbo kamakoma Gote iye nomi king molopa nokoromo kombuna pungeindo mindili paa awili teko nongolio punge," nimu.

<sup>26</sup> Yuniaku tepa nimu ungu pileringi imbomani ningei, "Gotenga kombuna pumilindo aku teko tenge mele paimbo nimo lemo altoko nari manda akuna pumbe molopa kondopa kau pumbeloya?" ningi.

<sup>27</sup> Yuni enondo nimbei, "Imbomani paa manda naa teremele ulu Goteni manda tembalo," nimu.

<sup>28</sup> Kano wali Pitani nimbei, "Lino linonga melema pali mundupo kelepo nu lombili oromolo kanomu," nimu.

<sup>29</sup> Kano wali Jisasini nimbei, "Nani eno paimbo nio. Gote omaba iye nomi kingimu molopa lino nokombalo walimu wendo opili ningoromemele imboma enonga ulkema kinye, omenupili kinye, angenupili kinye, anupili lapali kinye, bakuluma kinye, akuma munduko kelenge imboma pali

<sup>30</sup> kinye ya maina moromele wali mele paa olandopa awini liko molkolio altoko punge kombuna molko kondoko kau pungeela," nimu.

### *Kolopolio, wali yupoko tipemunga makilipo koinjo molombo nimbe Jisasini altopa wali yupoko tipe nimbe tirimu*

<sup>31</sup> Jisasini yu lombili andoli iye 12 enondo nimbe terimu mele we imboma naa pilengei nimbe eno mepa anjo pumbelie, enondo nimbei, "Pileio! Lino ulke kombu awili Jerusalem purumolo. Pumbo molomolo wali oi Gotenga nimbe munduli ungu nili iye profetemani Iyemunga Malo wendo ombalo mele ningi uluma pali kamukumu wendo ombalo.

<sup>32</sup> Jerusalem iyemani Iyemunga Malo liko Israel imbo naa mololi imbo lupema tinge. Enoni yu ungu taka tondoko owe tendekoyu teko kenjiko yu olkambe toko kandoko, yu ka pulenti tokolio, kamukumu yu toko kondonge.

<sup>33</sup> Kolopalie altopa wali yupoko tipemunga makilipe koinjo molombalo," nimu.

<sup>34</sup> Nalo Jisasini nimu ungu pulumu naa pilkolio ungu nimumu pilko tunduringi.

### *Jisasini mongo keri leli iye te tepa koinjo ltimu*

<sup>35</sup> Jisas ulke kombu Jeriko nondopa wendo orumu wali mongo keri leli iye te aulke kulendona mainye molopa imbo ongo puringimando kou mone te tieio nimbe konge tepa molorumu.

<sup>36</sup> Kano iyemuni imbo awini ongo pungei puringi ulu pilipelie yuni ambe teremeleya nimbe waltindirimu.

<sup>37</sup> Enoni yundo ningei, "Ulke kombu Nasaret iye Jisas omaba purumo," ningotiringi.

<sup>38</sup> Pilipelie, yuni enge nimbe nimbei, "Jisas, Devitini kalopa ltimu iyemu, na kondo kolowi," nimu.

<sup>39</sup> Kumbe leko puringi imbomani yu iri toko ungu naa niwi ningi. Nalo yuni altopa paa enge nimbe nimbei, "Devitini kalopa ltimu iyemu, na kondo kolowi," nimu.

<sup>40</sup> Jisas we angilipelie yu yando meko waio nimu. Jisas angilerimuna yu nondopa orumu wali Jisasini yundo walipe pilipelie nimbei,

<sup>41</sup> "Nani nu ambele ulure tendamboi konopu ltenoya?" nimu.

Yuni topondopa nimbei, "Awilimu, na altopo nanga imbo mongo angilipili kanambo tendewi," nimu.

<sup>42</sup> Jisasini yundo nimbei, "Kinye mongo makikko kanowi. Nani manda nu imbo mongo angilipili tendembalo ningi ipuki tirinomunga nu koinjo puruno," nimu.

<sup>43</sup> Kano wali tamburumbu yu imbo mongo angilerimuna kanorumu. Kanopalie Gote kapi nimbe yunge imbi ola ltindilipe Jisas purumu aulkena lombili purumu. Imbomani pali kano ulu enge nili wendo orumumu kanokolio enoni kape Gote kapi ningi kala.

## 19

*Jisas kinye iye Sakius kinye teringili temanemu*

<sup>1</sup> Jisas yu ulke kombu Jeriko ombo pumbesi purumu.

<sup>2</sup> Jeriko akuna kou takis lipe takis ltingi iyema nokorumu iye te, yunge imbi Sakius, molorumu. Yu mele awini noipe yu kamako molorumu.

<sup>3</sup> Kano iyemuni Jisas orumuna kanombai terimu. Jisas orumuna imbo awini liko maku toringi wali Sakius iye ponjili moloru mlepalie Jisas manda naa kanorumu.

<sup>4</sup> Akumunga Jisas orumuna yu lkipe kumbe lepa pumbelie unjo sikamo fikte Jisas ombai orumu aulkena nondopa angilerimu akuna ombo ola purumu.

<sup>5</sup> Jisas akuna ombalwe we angilipe olando tipe kanopalie yundo nimbei, "Sakius, nunge ulkena kinye peya molambili pambili welea mainye owi," nimu wali

<sup>6</sup> "yu walitikale mainye ombo yundo "manda, pambili," nimbe tono kolorumu.

<sup>7</sup> Jisas Sakiusinga ulkena peya puringili kanokolio oi akuna liko maku toringi imborani ningei, "Yu ulu pulu keri teli iye te kinye molambili nimbe purumu," ningolio kanoko keri pileringi.

<sup>8</sup> Kano wali, Jisas kinye Sakius kinye elo ulkena tuku molkolio Sakius ola angilipe Awilimundo nimbei, "Awilimu, nanga mele noiroma ekondo lipo imbo koropama tipolio, pele kou te molo mele kolo topo wapu ltiuma altopo wapu ltiu mele pundu topo yupoko ola panjipo anjo timbo," nimu.

<sup>9</sup> Yuni aku tepa nimu wali Jisasini yundo nimbei, "I ulke pulu iyemu yu kape anda kolepa Abrahameni kalopa ltimu iye te kanomu, akumunga i ulke pulu imboma Goteni lipe tapondoli ulu pulumu ltimele.

<sup>10</sup> Iyemunga Maloni molko kenjirimile imboma koropo lipo tapondambo nimbe orumu," nimu.

*Iye nomi teni yunge kendemandema kou mare tipelie purumu ungu ikomu*

<sup>11</sup> Aku tepa nimu ungu pilkolio Jisas yu ulke kombu awili Jerusalem nondopa ombai terimu ulu kanokolio we imboma enoni Gote ombo iye nomi kingimu molombalo waimu paa nondopa ombalo konopu leko moloringi. Enoni aku teko pilko moloringi lipe manjipelie Jisas yuni enondo ungu iko te topalie nimbei,

<sup>12</sup> "Iye nomi tengi malo kombu ponenge pumbe yu king molombalo imbi awili te, lipumbolio altopo yando ombo nimbeline yu purumu.

<sup>13</sup> Oi naa puli yunge kendemande 10 waio nimbeline kou 10 paono eno yu mele mele paono te te nimbe tipelie enondo nimbei, 'Na pumbo anjo molambo i kou mone tiro ltitemelunga kou te ola panjipo ltindemili ningi konopu enge ningi teko molaio! Altopo ombo,' nimbe yu purumu.

<sup>14</sup> Kano iyemu purumu wali yunge talapena imboma yu kinye konopu keri lekolio enonga iye te yu akilio lepa pupili ningi liko mundukolio ningei, 'I iye nomimulinonga iye nomi king naa molopili nimbo moromolo nindiwi,' ningi yu liko munduringi.

<sup>15</sup> Pele kano iyemu king imbimu paimbo lipe meli yando orumu wali oi kou mone tirimu kendemande waoi nimbeline, 'Eno kou mone tirumunga ola panjiko kou ambe teko ltingiya?' nimbe waltindirumu.

<sup>16</sup> Oi kumbe lepa tirimu iyemuni ombo yundo nimbei, 'Awilimu, nunge kou wan paono tirinu kanomunga ola panjipo 10 ltiu,' nimu kano wali

<sup>17</sup> iye nomi kingimuni yundo nimbei, 'Kendemande pengamu, paa teko kondorono. Mele kelo tirumunga nu teko kondorunu kani nu ulke kombu 10 nokani,' nimu.

<sup>18</sup> Iye talo tipemuni ombo yundo nimbei, 'Awilimu, nunge kou wan paono tirinu kanomunga ola panjipo 5 paono ltiu,' nimu kano wali

<sup>19</sup> iye nomi kingimuni yundo nimbei, 'Aku teko terinumunga nu ulke kombu kite pakera nokani,' nimu.

<sup>20-21</sup> Altopa kendemande te ombo yundo nimbei, 'Awilimu, na pilipolio nu iye mindili teli molko, nu mele naa noirinoma we liko, nu poiney naa tereno poinyena langi liko noiko, nu aku teko tekopilipolio pipili kolopo nuni na tirinu kou kulupi topo noindirumu i tiro,' nimu.

<sup>22</sup> Yunge iye nomimuni iri topalie yundo nimbei, 'Nu kendemande kerimu. Nu nino

ungumuni nu kot tendembalo. Nuni pilkolio na iye mindili teli molopo, na mele naa noiroma we lipo, na poinyenla langi lipo noipo tero iyemu moro ningo liko manjinio itemo.

<sup>23</sup> Aku konopu lekolio kou mone tirumu kou beng ulkena ambe telka naa noirinuya? Noilinanje na ombo nanga koumu wendo lipolio kou walo kolte ola panjiko tilimalana lika,’ nimu.

<sup>24</sup> Kano wali iye nomimuni nondoko angleringi imbomando nimbei, ‘Yu tepa kenjirimu kani yu kou wan paono amboltomomu wendo liko kou 10 paono amboltomo iyemu tieo,’ nimu.

<sup>25</sup> Enoni yundo ningei, ‘Awilimu, yu kou 10 paono tiniona oi amboromo,’ ningi.

<sup>26</sup> Enoni aku teko ningi wali iye nomi kingimuni nimbei, ‘Enondo nimbo tiemboi. Melema lipe noirimo iyemu yu mele olandopa timbona limbelo. Nalo melema lipe naa noirimo iyemu yu walo kolte noirimoma kape wendo limbo,’ nimu.

<sup>27</sup> Aku tepa nimbeline kano iye nomi kingimu yuni ungu te peya nimbei, ‘Kinye na kinye opa pule toringi imbona meko waio! Enoni nando ningeindo, i iyemu linonga iye nomi kingimu naa molopili ningi kano imbona meko ongo na kanopo molambo eno toko kondao’ nimu,’ nimbe Jisasini aku tepa kano ungu ikomu topa pora tirumu.

*Jisasini iye nomi king mele Jerusalem kombu tukundo purumu*

<sup>28</sup> Aku tepu nimbe pora tipelie Ulke Kombu Awili Jerusalemando kumbe lepa pumbrei purumu.

<sup>29</sup> Kano wali Jisas kinye yu lombili andolima kinye ulke kombu awili Jerusalem nondoko ongo Unjo Oliv Angili Mai Kembona, ulke kombu kelo Betfage kinye Betani talo lerimu kombu akuna nondoko oringi wali Jisasini yu lombili andoli talo kumbe lepa lipe mundupelie, nimbeindo,

<sup>30</sup> ‘Ne ulke kombu kelona pungolio akuna kongi donki kokele te, umbuluna oi imbo te naa mololi kokele te, kareko panjingemu kanoko ka poiko yando meko wangili palio!

<sup>31</sup> Elondo imbo teni elo i donkimu ambe telka ka poirimbeleya nimbe waltindimo lemo eloni topodoko ningili, Awilimu yu i donkimu kongono tembalona ombo ltimbolo nelio,’ nimu.

<sup>32</sup> Kano lipe mundurumu iye talo pungo yuni nimu mele kanoko ltendekolio

<sup>33</sup> kano kongi donki kokeleme poiko moloringili wali donki pulu iyemani elondo ningei, ‘Linonga donkimu ambe telka ka poirimbeleya?’ ningi waltindiringi.

<sup>34</sup> Kano wali eloni enondo ningili, ‘Awilimu yu i donkimu kongono tembalomunga ombo ltimbolo,’ ningili.

<sup>35</sup> Kano wali donki kanomu liko Jisas molorumuna meko yando oringili. Altoko enoni enonga ola wale pakolima kulklo, donki umbuluna ola toko munduko pauwe tondoko Jisas kanona ola mondoringi.

<sup>36</sup> Maren enonga wale pakolima kulklo yu ombalo aulkena lembulko puringi.

<sup>37</sup> Kano wali yu ulke kombu awili Jerusalem paa nondopa ombo Unjo Oliv Angili Mai Kembona mainye ombai orumu wali yu lombili puringi imbo awini paa tono awili tiko kolko Jisasini ulu enge nili terimuna kanoringi mele Gote ru ningi paa tereno ningo kapi ningei,

<sup>38</sup> ‘I oromo iye nomi kingimu, Goteni ya maina mundurumu iyemu, yu imbi ola molopa, molopa kondopili! Mulu kombuna moromo Goteni lino kinye konopu ame topili!

Pa telina moromo Gote kapi nemili,’ nilko puringi.

<sup>39</sup> Aku teko ningi ungu pilkolio peya oringi Farisi iye mareni ningi mele pilko keri pilkolio yundo ningei, ‘Ungu Mane Tilim, nu lombili andolimanu nimele mele. Naa nengei ningi eno iri towi,’ ningi wali

<sup>40</sup> Jisasini enondo nimbei, ‘Ungumupe i nio. Imbo imani i teko naa ningi we molonge lemo i kou mongo itemomani enonganano na kapi ningi ru ningi,’ nimu.

*Jisas ulke kombu awili Jerusalem kanopalie kondo kolopa kola terimu temanemu*

<sup>41</sup> Ulke kombu awili Jerusalem paa nondopa ombo kanopalie, Jisasini kola tepalie

<sup>42</sup> nimbei, ‘Jerusalem imbona, kinye eno kape mindili naa nongo ame toko molonge aulkemu liko manjilimalanje manda molemala. Nalo kinye naa liko manjirimeli.

<sup>43</sup> Eno molongena wai kerire wendo ombalo. Aku walimanga enonga opa pulema ongo enonga ulke kombumunga aulke naa lepili ningi mai akuko liko makuto, pape mele teko opa pule eno angliko makai tendifeo eno tukundo molangei ningiaku ulu tengen.

<sup>44</sup> Aku tekolio, altoko Jerusalem ulkema pali toko tekiriko bulubalu tikolio tuku molonge imbona toko kondonge. Aku tengen walima wendo ombalo lepamo. Goteni eno lipe tapondombaindo oromo walimu enoni naa liko manjirimemelelunga aku uluma wendo ombalo lepamo,’ nimu.

*Gote popo toko kaloringi ulke tempelena tuku Jisasini ulu kerima teringi imbona topa makororumu temanemu*

<sup>45</sup> Jisas Jerusalem tukundo pumbelie, ulke tempelena tuku pumbelie imbo

akuna bisnis teko moloringi imboma pulu mondopa makorombai angilipelie,

<sup>46</sup> enondo nimbei, "Gotenga Bukuna ungu te moromo mele i tepe:

Imbomani nanga ulkemundo Gote kinye ungu nimbo konge nimolo ulkemu ninge. (Ais 56:7; Jer 7:11)

Ungu aku tepe moromo nalo enoni i ulkemu wapu noromele imboma lopeke teremele ulke none tenderemele," nimbu.

<sup>47</sup> Yuni walimanga takiraki ulke tempele tuku ungu mane tirimu. Juda imbomanga ningo Gote popo tondoringi iye awilima kinye, Gotenga ungumanga pulumu pilko mane tili iyema kinye, imboma nokoli iye awilima kinye, kano Juda iye nomima enoni yu toko kondongeindo aulke te kororingi

<sup>48</sup> nalo we imbomani yunge ungu komu tendeko pilko moloringi wali enoni yu toko kondongeindo aulke te naa kanoko ltingi.

## 20

*Jisas kongono terimu engemu narini tirimuya ningi ungumu*

<sup>1</sup> Walite Gote popo toko kaloli ulke tempelena Jisas molopalie akuna maku toringi imboma ungu mane tipe, ungu pengamu nimbe tirimu wali Juda imbomanga Gote popo tondoringi iye awili mare kinye, Gotenga ungumanga pulumu pilko mane tili iye mare kinye, Juda imbomanga tapu iye mare kinye, kano iye nomima eno yu molorumuna ongo

<sup>2</sup> Yu waltindikolio ningei, "Nu ambele imbimu likolio nu i kongonomu terenoya? Narini i kongonomu tepuwi nimbe nu lipe mundurumuya?" ningi waltindiringi.

<sup>3</sup> Yuni enondo nimbei, "Nani enondo ungu te walipo pilemboi! Eno waltindimbo wali enoni topondonko nenge!

<sup>4</sup> Oi Jon No Ltindilimu omiba imboma no ltindirimu wali yu mulu kombuna moromo iyemunga kongono tendembaindo imboma no ltindirimuya? Molo ya maina imbomanga kongono tendembaindo imboma no ltindirimuya?" nimbe waltindirimu.

<sup>5</sup> Yu aku tepe nimu kano wali enoni enongan ungu nendo yando ningolio ningei, "Yuni waltindirimu mele linoni topondonpolio, Yu mulu kombuna moromo iyemunga kongono tendembaindo imboma no ltindirimu nimolo lemo yuni linondo nimbei, akumunga eno yuni nimu ungumu ambe telka naa pilko liko teringiya nimbelo.

<sup>6</sup> Molo linoni nimilindo, yu maina imbomanga kongono tendembaindo imboma no ltindirimu nimolo lemo we imbomani lino kouni tongue. We imbomani Jon Imbo No Ltindilimu yu paimbo Gotenga iye profet

iye te molorumu konopu ltemele kani enoni lino kouni tongue," ningi.

<sup>7</sup> Eno enonganaku teko ningi wali Jisasindo topondonko ningei, "Jon Imbo No Ltindilimuni Gotenga kongono tendepalie imboma no ltindirimu, molo maina imbomanga kongono tendepalie yuni imboma no ltindirimunje lino naa lipo manjirimo," ningi.

<sup>8</sup> Ningi ungu pilipelie Jisasini nimbei, "Manda. Nanga ungumu topondonko naa nimelemunga nani enonga ungumu topondonpolio nando i kongonomu tepuwi nimbe mundurumu iyemunga imbimu enondo naa nimbo timbola," nimbu.

*Wain poinyemunga ungu ikomu*

<sup>9</sup> Kano wali makutoko moloringi imboldamo Jisasini ungu iko te topalie nimbei, "Kombu pulu iye te wain poinye tepalie nanga poinye teko nokondangei nimbe iye mare lipelie enondo nimbei, 'Poinye tendeku wain mongo inie toko nokaio! Wain mongo nowi lembalo wali mongoma moke tepo, mare eno kongono tendenge mele lenge, mare nanga limbo,' nimbe kano poinyemu eno tipelie yu kombu paa tulurenga pumbe akuna wali awini moloru.

<sup>10</sup> Aku wali altopa wain mongo nowi lerimu waimu wendo orumu wali poinye pulu iyemuni yunge kendemande iye tendo nimbeindo, 'Nanga wain mongoma tiengi ltindeni moke puwi,' nimbelie wain poinye tenderingi iyema moloringina lipe mundurumu nalo kano kendemandemu enoni koipeni toko, wain mongoma naa tiko, kelko we puwi ningi.

<sup>11</sup> Aku teko teringi wali poinye pulu iyemuni kendemande te poinyena altopa lipe mundurumu. Aku kendemandemu enoni koipeni toko, teko kenjiko, wain mongo naa tiko, kelko we puwi ningi kala.

<sup>12</sup> Kano wali kendemande te altopa lipe mundurumu wali yu kape tokolio poinyena wendo munduringi.

<sup>13</sup> Aku teko teringi wali kano poinye pulu iyemuni yunu nimbei, 'Kinye na ambe teambonje?' Nanga malo konopu mondoromu, eno yu pipili kolokolio wale pakoko yu wain mongo tingenne,' nimbe pilipelie yunge malomu poinyena lipe mundurumu.

<sup>14</sup> Nalo poinye nokoli iyemani poinye pulu iyemunga malo ombai orumuna kanokolio enoni enonganu ningei, 'Andi oromo iyemu lapanga nini melema limbele iyemu oromo. Yu topo kondopo, pele yunge lapa kolombalo wali i poinyemu lino liemili,' ningi panjikolio

<sup>15</sup> enoni yu ambolko liko poinyena tawendo mundukolio yu toko kondoringi.

Aku teko teringimunga poinye pulu iyemuni kano poinye nokoli iyemando ombe ambe tembalonje?

<sup>16</sup> Yu ombe kano poinye nokoli iyema topa kondopa kano no wain mongo poinyemu lipe nokangei imbo lupema timbelo lepamo," nimu.

Kano wali Jisas yuni aku nimu ungu pilkolio imbomani ningei, "Aku tepa wendo naa opili, paa molo," ningi.

<sup>17</sup> Aku teko ngingi ungu pilipelie Jisasini enondo nimbei, "Gotenga ungu te bukuna moromomunga ungu pulumu ambe tepanje konopu ltemeleya? Kano ungumu i tepa:

Ulke takoringi iyemani kanoko keri pilko toko lteringi kou akumu kelepa ulke timu mele ulke enge tindili kou awili pengamu ltemo, (Sng 118:22)

nimbe peremo kanomu.

<sup>18</sup> Aku koumunga ola imbo te ai tomo lemo ombele melema elke tombalo. Nalo imbo te molombalona ola aku koumu ombe yu topalie kano imbomu topa kai lepa namiamni nondombalo," nimu.

*Gavman kou takis tamilinje moyoya ningi Jisas waltindiringi temanemu*

<sup>19</sup> Gotenga ungumanga pulumu pilko mane tili iyema kinye, Juda imbomanga ningi Gote popo tondoringi iye awilima kinye, kano Juda Imbomanga iye nomima yuni aku ungu iko torumumu pilkolio enondo nimu ungu pilkolio yu ka tingei teringi nalo kano iye awilimani we imboma pilki kolkolio yu naa liko ka tiringi.

<sup>20</sup> Kano wali Juda imbomanga iye awilimani Jisas ka tiemili ningi molkolio yu kanoko moloringi. Iye mare, konopu tumbi nimbe pepili moromolo ningi kolo toringi iye mare, yu nimo mele pilengi ningi yu molorumuna kou wangoko liko munduringi. Jisasini ungu te nimbe kenjimbelone ningolio pilko moloringi. Ungu te nimbe kenjimo lemo yu ka tipo kot tendemilindo gavman iyemu molombalona mepo pumolo ningi yuni nimu mele pilko moloringi.

<sup>21</sup> Kano iyemani ongo yundo ningei, "Ungu Mane Tiliimu, lino pilipolio nu waliwali ungu penga kau ningi, ungu mane penga teko liko manjikolio, nu imbo tendekurenga konopu kimbo naa teko, imbo awilima kape kanoko pipili naa kolko, enondo pali ungu tendeku tiko mandakona ningi tirino. Goteni teao nimo uluma paimbo unguma mane tiko tereno nimbo pimolo.

<sup>22</sup> Aku tepo pilipolio nundo ungu te walipo pilipolio nemili! Linoni Rom Gavman Iye Paa Awili Sisaramu kou takis tomolo lemo mandanje? Goteni akumundo

ungu mane tirimumu ambe tepa nimbe peremoya? Ningi tiwi," ningi.

<sup>23</sup> Nalo Jisasini enoni yu ambolko lingeindo aku teko liko noikolio waltindiringi pilipelie enondo nimbei,

<sup>24</sup> "Kou mongo te liko ondaio," nimbelie enondo kelepa walipe pilipelie nimbei, "I kou mongomunga imbi kinye naringa kumbekere moromoya?" nimu.

<sup>25</sup> Enoni yundo ningei, "Rom Gavman Paa Awili Sisaramunga moromo," ningi.

Kano wali yuni enondo nimbei, "Kou monemu Sisaramunga kani Sisaramunga melema Sisaramu yundo tiko, Gotenga melema Gote yundo tieio," nimu.

<sup>26</sup> Imbo awini akuna moloringi kala Jisasini aku nimumunga yu ambolko liko ka tiko manda naa teringi. Yuni nimu mele pilkolio linonga ungumu paa topa nimbe kondoromo ningi pilko konopu awini liko mundukolio ungu te altoko naa ningi.

*Koromele imboma makilko koinjo molkolio kelko ambe tengenje ningi waltindiringi temanemu*

<sup>27</sup> Aku wali Juda imbomanga iye awili Sadyusi iye mare Jisas molorumuna oringi. Sadyusi iyema eno Goteni koromele imboma topa naa makinjimbelo, makilko koinjo naa molonge nalo kolkolio wali mini pali kamukumu kolongela ningi pilko mané tiko moloringi talapemu. Kano Sadyusi iyema ongo Jisasini ungu te nimbe kenjimbelone pilemili ningolio

<sup>28</sup> *yu waltindikolio ningi, "Ungu Mane Tiliimu, linonga anda kolepa Mosesini ungu mane tipelie bukuna torumu mele i tepe: Ambo limbelo iye te bakulu naa mepa kolombalo wali kano iyemu yunge angenu molombalomuni yunge ambo waimu lipe yuni angenunga lipe tapondopa bakulu mendepili nimu kanomu.*

<sup>29</sup> Aku ungu manemunga ulu te wendo orumu mele nu walipo pilemili! Iye kite yupoko pakara angenupili pokolokolio. Komo iyemuni ambo te lipelie bakulu te naa meli kolorumu.

<sup>30</sup> Altopa yunge umbulkondo angenu-muni yunge ambo waimu lipelie bakulu te naa meli kolorumula kano wali

<sup>31</sup> yunge umbulkondomuni kano ambomu lipelie we kolorumula. Aku teko teliko pungolio iye kite yupoko pakara pali kano ambomu liko bakulu naa meli kolko pora tiringi.

<sup>32</sup> Kano wali peyalimendo ambomu yu kolorumula.

<sup>33</sup> Akumunga, koromele imboma pele makilko koinjo molonge wali kano ambomu iye kite yupoko pakara pali ya maina ltingi ambomu yu iye paa naringa omenu molombaloya?" ningi.

<sup>34</sup> Jisasini enondo topondopa nimbei, "Ya maina moromele imbomanga iyema ambo liko, amboma iye pungo teremele

<sup>35</sup> nalo Goteni imbo kolkolio manda makilko koinjo molko mulu kombuna manda pungo molangei nimo imbomanga iye te ambo naa liko ambo te iye naa pungo tengé.

<sup>36</sup> Kano imboma makilko koinjo molonigena eno mulu kombuna moromele ensemble moromele mele molkolio, kelko kolko naa kolko Gotenga bakuluma molonge.

<sup>37</sup> Nalo anda kolepa Moses kape yuni kololi imboma makilko koinjo molonge. nimbe lino lipe ondorumu mele nemboi. Walite Moses yuni unjo kelo tega tipe nomba perimu tipemuni unjomu naa norrumu ulu kanopalie, akuna yuni Gote Yu Abraham kinye, Aisak kinye, Jekop kinye enonga Gote moromo nimu. Mosesini aku tepe nimu walimu Abraham kinye, Abraham yunge malo Aisak kinye, Aisak yunge malo Jekop kinye koro oi koloringi nalo enonga minima Gote peya koinjo moloringi pilipelie yuaku tepe nimu.

<sup>38</sup> Gote yu kololi imbomanga Gote molo. Yu imboma pali koinjo moromele kanopalie yu koinjo mololi imbomanga Gote," Jisasini nimu.

<sup>39-40</sup> Aku tepe nimu ungu pilkolio Gotenga ungumanga pulumu pilko mane tili iye mareni altoko yu ungu te wali kolo pilingeindo pipili kolkolio yundo ningeindo, "Ungu Mane Tilim, nuni paa ningo kondorono," ningi.

#### *Jisasini Kraist moromo mele ungu te nimu*

<sup>41</sup> Kano wali Juda Imbomanga iye awili mare moloringi wali Jisasini enondo ungu te nimbei, "Goteni maina lipo mundumbo nimbe kanopa Itimu iye Kraist yu anda kolepa Iye Nomi King Devitinga kalopa limbelo iye te kau molombalo ningo pimebelo yuaku tepe kau molo.

<sup>42</sup> Devit yuni iye Kraist molombalo mele kunana te konopu lipe manjipelie bukuna torumu mele i tepe:

Awili Goteni nanga Awilimundo nimbei, 'Nu ilto peya melema nokopo molambili nanga imbo kindo ongo molani!

<sup>43</sup> Peya nokopo molombolo wali nunge opa pulema topo mainye mundundumbo,' nimu. (Sng 110:1)

nimbe Devitini nimu.

<sup>44</sup> Devitini Kraistindo nanga Awilimundo nimu. Devitinga lapuna Kraist wendo ombalo nimele ungumu ambe teko liko manjikolio nimeleya," nimu.

*Gotenga ungumanga pulumu pilko mane tili iyemanga ulumando Jisasini nimu temanemu*

<sup>45</sup> Jisas molorumuna imbo awini liko maku toko moloringimani peya pilko molangei Jisasini yu lombili andolimando lepi lepi topalie nimbei,

<sup>46</sup> "Enoni Gotenga ungumanga pulumu pilko mane tili iyema kanoko kondokolio enoni teremele mele manda leko naa teangei! Kano iyemani imboma lino kanoko iye pengama nengei ningi wale pakoli paa tule pengama, iye nomima pakoromele mele pakoko, iye nomi kelkele toko andoromele. Maket kombumanga enoaku teko andokolio imbo akuna maku toromelemani lino kapi ningi wali konopu timolo ningi akumanga andoromele. Juda imboma Gotenga ungu pilingeindo maku toromele ulkena imboma maku toromele wali kano iyema iye awilima eno ungu ningi tili polona nondopa pungo kumbe leko moromele polomanga pungo moromele. We imboma pungo mendo tiko eno kanoko moromele wali kano iyema eno konopu tirimele. Iye teni enondo langi peya namili waio nimo wali eno langi noli polona kumbe leko iye awilima moromelemanga molongeindo konopu tirimele.

<sup>47</sup> Ambo waima ningi bemboko tiko ulkema linonga ningi eno itimele. We imbonani lino ulu pulu keri teremolo mele naa kanoko pilkolio, lino paa molko kondoromele iyema nengei ningi Gote kinye popo toko, we kolo toko ungu ningi tule purumele. Goteni we imboma ulu pulu keri teremelemunga eno paimbo mindili lipe timbelo nalo iye niomani akuluma teremelemunga Goteni aku iyema mindili awili tepe lipe timbelo lepamo," nimu.

## 21

#### *Ambo wai koropa teni ulke tempelena kou mone mundurumu temanemu*

<sup>1</sup> Jisas Gote popo toko kaloli ulke tempelena molopa tempel ulkena tukundo kongono tenegeindo kou mone munduringi unjo ketena nondopa molorumu. Akuna molopalie yu olando tipe kanopalie iye kamakomani kano ketena kou mone munduringina kanorumu.

<sup>2</sup> Kanopalie wali ambo wai paa koropa noli te ombo kou kololi talo akuna mundurumuna kanopalie

<sup>3</sup> nimbei, "Nani enondo paimbo nio. I ambo wai koropamu yuni kou mone mundurumomu paa olandopa mundurumo, we mundurumelema mainyendopa.

<sup>4</sup> Eno kou mone awini noirimele nalo koltalo kau ongo mundurumele. Nalo ambo waima kou mone te paa naa noirimo. Yunge koltalo noimo talo undukana mepa

omba timo. Langi nomba molopa pembalo mele te anjo naa noirimmo," nimu.

*Ulke tempelemu toko kalonge walimundo Jisasini ungu nimu temanemu*

<sup>5</sup> Kano wali eno ulke tempel kombu akuna molkolio tempel ulke takoringi kou paa penga kinye Gotendo paa tereno ningi mele penga tiringima akuna au tiringi ulu kanoko, ungu nendo yando ningi moloringi wali Jisasini enondo nimbei,

<sup>6</sup> "I ulke tempel penga angimona kandomele melemando ungu te nemboi. Walite i ulke kombu awili Jerusalem imboma umbuni linge walimunga i ulke tempelemu toko konoko bilibala tiko kou pali mainye toko talau tinge. Kou tendekure kape we naa lepili ningi ungu mangu toko bulu balu tinge," nimu.

*Umbuni awini wendo ombalomunga Jisasini nimu ungumu*

<sup>7</sup> Jisasini aku tepa nimu ungu pilkollo enoni yundo waliko pilkolio ningei, "Ungu Mane Tilimu, nuni nino mele te wali wendo ombaloya? Altapa aku ulu nondopa wendo ombai tembalo wali oi ambele ulure lipe ondopa wendo ombaloya?" ningi waltindiringi.

<sup>8</sup> Pilipelie yuni enondo nimbei, "Imbonani eno kolo toko tinge kani kanoko kondoko molangei! Iye awini nanga imbi leko ongo kolo toko ningei, 'Ombalo ningi nokoko moromele iyemu na,' ningolio, 'Maimu pora nimbelo nimu waimu wendo ombai teremo,' ninge. Eno aku teko ningena lombili naa paio!

<sup>9</sup> Altoko opa awili kombu marenga tengen ungu pilko, imbomani enonga iye nomima tonge ungu pilkolio mini naa lteao! Aku uluma Goteni oi kumbe lepa wendo opili nimu mele tembalo. Nalo peyalime waimu welea naa wendo ombalo," nimu.

<sup>10</sup> Kano wali Jisasini yu lombili andolimando kelepa nimbei, "Maimu pora nimbelo waimu oi wendo naa opili imbo talape awilima nendo yando opa teko, iye nomi king tenga talapemu kinye tenga talapemu kinye opa tengen.

<sup>11</sup> Ya maina kombu marenega mai parambalaa awili tepa, engele awili lepa, kuro awili topa tembalo. Imboma pipili awili tepa kuliene leli ulu enge nilima muluna wendo ombalona kanonge.

<sup>12</sup> Ulu aku tepama wendo ombalo nalo oi naa wendo oli eno nanga imboma ningi molongena eno liko ka tiko, teko kenjiko, Juda imboma Gotenga ungu pileli ulke-manga eno meko pungo akuna kot tendeko, ka ulkena meko pungo panjiko, iye nomi kingima kinye gavman iye awilima kinye molongena eno kot tendengeindo meko pungo tengen.

<sup>13</sup> Aku uluma wendo ombalo wali enoni kano ka tinge imboma ungu mane tinge. Eno nanga imboma molonge mele kinye, eno nani ungu mane tiru mele kinye, nani eno kinye ulu enge nili teru mele akuna eno pilengei ningi, imbo akuma ningi tinge.

<sup>14-15</sup> Enoni eno ka tiko kot tendenge wali, enonga kere kinye konopu kinye enge pepili nimbo wali enoni ninge unguma eno teko kenjingei tengen imbomani eno paimbo ungumu tukumemu ninge pilkolio, enoni ungu ninge mele ungu ningi pundu tongeindo perenge. Akumunga oi enoni eno ongo ka naa tiengen, 'Apa, eno ongo na ka tiko kot tendenge wali ambele ungure nimbonje?' ningi konopu awini liko munduko naa molaio!

<sup>16</sup> Enonga aminyeli lanieli kinye angenali kinye, pulu lepa imboma kinye, akumani kape eno nanga imboma liko ka tiko kot tendekolio eno mare toko kondonge.

<sup>17</sup> Eno nanga imboma molongena imboma pali eno kinye opa pule tongue.

<sup>18</sup> Nalo enonga pinyendi tendekumu kape Lapani komu naa tindimbelo.

<sup>19</sup> Eno enge ningi angilingemunga eno koinjo molopa kau puli ulumu linge," nimu.

*Jerusalem toko kalonge ungumu Jisasini nimu*

<sup>20</sup> Kano wali Jisasini yu lombili andolimando kelepa nimbei, "Walite, ami iyema i ulke kombu awili Jerusalem imboma tongeindo ongo liko makai tendeko angilingena kanokolio i kombu Jerusalem imboma toko mundunge walimu nondopa wendo ombalo liko manjingei.

<sup>21</sup> Eno kombu Judia kombumanga molongema mai kembo itemomanga kowa pungo, ya ulke kombuna tuku molongema wendo ongo kowa pungo, eno ulke kombuna wendo molongema tukundo naa pangei!

<sup>22</sup> Aku walimanga Jerusalem imbomani oi takiraki Gote teko kenjiringimunga yuni eno umbuni timbelo. Koro oi yuni walite aku ulu tembo nimbe panjirimu kano ungumu yunge iye mareni yunge bukuna toringi peremo kanomu, aku wali wendo ombalo.

<sup>23</sup> Goteni Jerusalem imboma mumindili kolopalie ami iyema mumindili kolko Jerusalem imboma ongo tangei nimbelo kano wali ulu umbuni awini eno molongena wendo ombalo. Aku tembalo wali ambo bakulu keri teko molongema kinye ambo bakulu ame tingema kinye eno manda welea kowa naa pungemunga eno kondo teremo.

<sup>24</sup> Jerusalem imboma tonge walimanga imbo toli loi geleamani imbo mare toko kondonge, mare ka tiko kombu tule lupe

lupemanga meko punge. Juda imbomanga talapena wendo mololi imboma ya Juda imbomanga ulke kombu awili Jerusalem tuku ongo toko munduko kombu liko kolo wangoko molonge. Aku wali akilio Goteni enonga walima pora nipli nimbelo wali Juda imboma Jerusalem kelko ongo molonge," nimu.

*Iyemunga Malo altopa yando wali talo tipe ombaindo ulu mare oi wendo ombalo mele Jisas nimbe tirimu*

<sup>25</sup> "Aku mindili nonge nio uluma wendo ombaindo ena kinye oli kinye kombukandiyema kinye pali ulumare tembalona imbomani kanonge. Mai kombuna nomu kutana ungu awili nimbe topa paa awili ola munde mainye munde telipe ombalona kanonge. Uluma aku tepe wendo ombalo wali maina imbo talapema mini ltenge.

<sup>26</sup> Muluna angimo mele enge itemoma lope lope tepe anjo yando pumbelo wali imboma pipili paa pulumu kolko mai kombuna ambele ulure wendo ombaindo tere-monje ningi pilko konopu paa awini liko mundunge.

<sup>27</sup> Aku uluma wendo ombalo wali Iyemunga Malo kupe tenga tuku molopa, enge awilimbu ambolopa paa awili tepe telimu au nimbe mainye ombalona kanonge.

<sup>28</sup> Aku uluma pulu mondopa tembalo wali Goteni eno kombu kerina wendo lipo kombu pengana tukundo limbelo walimu nondopa wendo ombalo kani aku uluma wendo ombalo wali eno konopu toimbo topili ola angilko olando tiko kanongei," nimu.

*Unjo fik teremo ulumu manda leko kanongei nimu*

<sup>29-30</sup> Jisasini aku nimbelie nimumuni, yu ombalo walimu pilengei nimbe ungu iko te topalie nimbei, "Iyemunga Malo altopa ombalomunga walimu liko manjingei mele nio. Unjo fik kinye we unjo mare karomele walimu tepe kuku toromelena kanokolio pane waimu nondopa lepamo ningi konopulitemele.

<sup>31</sup> Aku tepala i ulu wendo ombalo nioma wendo ombalo wali kanokolio, Gote iye nomi kingimu molombalo walimu nondopa wendo ombalo lepamo ningi liko manjinge.

<sup>32</sup> Nani enondo paimbo i tepe nimbo tiro. I moromele manga pupumu oi naa kolangei i wendo ombalo nio uluma pali wendo ombalo.

<sup>33</sup> Mulu mai talo pora nimbelo nalo nanga nio unguma pora naa nimbelo. Nani ungu nioma pali paimbo wendo ombalo," nimu.

*Jisasini Yu ombalo walimu imboma loi leko molonge nimu ungumu*

<sup>34</sup> Jisasini yu ombalo walimu pimolo mele ungu te peya nimbei, "Eno no enge nili nongo keke lepo toko we umbuni tepili molko konopu naa makilipili molonge lemo Iyemunga Malo yu ombalo kano walimuni eno meluna mele naa poipili kani kanoko kondoko liko manjiko molaio!

<sup>35</sup> Aku walimu mai kombuna pali imboma molongena wendo ombalo.

<sup>36</sup> Nalo enoni Gote kinye konge tekolio ningei, 'Na altopa Iyemunga Malonga kumbekerena pumbo ola angillembo kani na enge pepili, i ulu wendo ombalomani na topa mainye naa mundupili niwi,' ningi waliwali kane kane molaio," nimu.

<sup>37</sup> Walimanga takiraki Jisasini ulke tempelena imboma ungu mane tipelie, ipo leli takiraki Jerusalem tawendo pumbe Unjo Oliv Angili Mai Kembona ola pumbei opundala pupundala terimu.

<sup>38</sup> Imboma pali paa ipu leli oi yu ungu mane timbeloma pilemili ningi ulke tempelena ongo maku toko opundala pupundala teringi.

## 22

*Jisas lombili andoli iye Judas Iskariot yuni/Jisas yunge opa pulena lipo timbo nimbe ei nimu temanemu*

<sup>1</sup> Oi Goteni Israel imboma naa topa we ombo purumo waimu liko manjiko Bret Yis Naa Munduli we kalko noromele wai awili akumu nondopa wendo ombai orumu. Aku waimundo Pasova ningi imbi tiringi.

<sup>2</sup> Juda imbomanga ningi Gote popo tondoringi iye awilima kinye, Gotenga ungu manema pilko imboma mane tili iyema kinye, kano Juda imbomanga iye nomima Jisas toko kondonge aulke te koroko moloringi nalo enoni lino Jisas imbomani kanangei ka timolo wali imbomani lino mumindili kolko iri tonge ningi pipili kolko we moloringi.

<sup>3</sup> Aku wali Jisas lombili andoli iye 12 akumunga iye Judas Iskariot nili, kanomunga konopuna kuro keri nomi Satan ombo tuku purumu.

<sup>4</sup> Kano wali yu Gote popo tondoli iye awilima kinye ulke tempel nokoli ele iyemanga ele iye awilima kinye moloringina purumu. Jisas eno lipo timbelo mele eno kinye wai toringi.

<sup>5</sup> Eno kamele paa akokolio yu kou mone tinge mele ningi panjiringi.

<sup>6</sup> Yunii enonga unguma pilipelie, manda nimbe, imboma Jisas peya naa molonge wali yu eno lipo timbelo aulke te koropa molorumu.

*Jisas kinye yu lombili andolima kinye Pasova ningi kongi sipsip angilinomu nongeindo kombu kinye langi nongemakinye enonga iye talo pungo teko tumbi tiringili temanemu*

<sup>7</sup> Juda imbomani Pasova Waimu liko manjingeingido kongi sipsip angilino tokokalko plawa tepa awili tindili mele yis nili naa peli kalko peya talo nonge, kano waimu wendo orumu.

<sup>8</sup> Kano wali Jisasini Pita kinye Jon talo lipe mundupelie nimbei, "Elo pungo linonga Pasova Walimunga kongi sipsip angilino nomolomu teko amenge teko noipelio," nimu.

<sup>9</sup> Eloni waltindikolio ningili, "Tena tepo amenge tepo noipembili konopu leko ni-noya?" ningili.

<sup>10</sup> Yuni topondopa nimbei, "Pilelio! Elo ulke kombu awilina pungolio, iye te no mingi te mepa aulkena ombo pumbelona kanokolio, yu pumbelo mele lombili pungo ulke tukundo pumbelona peya pungolio

<sup>11</sup> kano ulke pulu iyemundo ningili, Ungu Mane Tilimuni waltindipelie nimbei, 'Yu kinye yu lombili andolima kinye Pasova kongi sipsip angilinomu nomolo ulke kirip-imu tena itemoya?' nimu nelio!

<sup>12</sup> Aku teko ningele wali yuni ulke olandomunga kiripi awili te langi noli polomu kinye langi noipe noli melema kinye akuna oi lemoma, lipe ondombalo. Akuna linonga Pasova Walimunga kongi sipsip angilinomu kinye plawa kinye teko arnenge teko noielio," nimu.

<sup>13</sup> Elo pungolio, Jisasini nimu kano mele kanokolio Pasova langi akuna teko amenge teko noiringili.

*Jisas kinye yunge aposelema kinye Pasova Walimunga kongi sipsip angilinomu norangi wali yunge talape imboma altoko kape langi nongo altoko liko manjinge mele lipe ondorumu temanemu*

<sup>14</sup> Juda Imbomani ipo lembai kombu kala torumu wali Pasova Walimunga kongi sipsip angilinomu norangi aku walimunga Jisas kinye yunge aposelema kinye langi noli polona Pasova Walimunga sipsip angilinomu kinye yis naa peli bret kaloli kinye ongo maku toko molko norangi.

<sup>15</sup> Langi nongo moloringi wali yuni enondo nimbei, "Na mindili oi naa nombolio i Pasova Walimunga langima eno kinye peya namili konopu lepo andopo moloru mele kinye paa noromolo.

<sup>16</sup> Nani enondo paimbo i tepo nimbo tiro. Akumu na i langimu i teli oi altopo naa nombo. Gote iye nomi kingimu kamukumu molombalo walimu wendo ombalie i Pasova langimanga paimbo ulu

pulumu wendo ombalo aku wali altopo nombo," nimu.

<sup>17</sup> Yuni no kap wain lipe ambolopalie Gotendo paa tereno nimbelie nimbei, "Imu kolko moke teko naio!"

<sup>18</sup> Nani enondo paimbo i tepo nimbo tiro. Gote iye nomi kingimu kamukumu molombalo walimu oi wendo naa oli i no wain paa naa nombo," nimu.

<sup>19</sup> Bret kaloli te lipe Gotendo paa tereno nimbelie ambolopa pike lepa eno tipelie nimbei, "Imu nanga kangimu. Nanga kangimu enonga nimbo kolo wangopo tipolio eno tepo limboimunga tangei timboi tero imu. I ulu altoko tengen wali na liko manjengei," nimu.

<sup>20</sup> Aku tepa mele Pasova langi nongo pora tiringi wali yuni no wain kap lipe ambolopalie nimbei, "Na eno tepo limbo nimbo na enonga nimbo kolondombo. I no wainimu ee nili ungu koinjomu nimbo panjipolio nanga mememuni tepa enge tipili eno ondopo tiro.

<sup>21</sup> Nalo na lipe nanga opa pulemanga kindo timbelo iyemu na kinye peya i langi noromolo polona moromo.

<sup>22</sup> Goteni Iyemunga Malondo nu tangei puwi nimu mele aku tepa paimbo wendo ombalo nalo Yu opa pule iyemanga kindo lipe timbelo iyemu yu Goteni paa tepa tombalo lepamo," nimu.

<sup>23</sup> Aku tepa nimu ungu pilkolio yu lombili andolimani nendo yando waltindikolio ningei, "Iye narini paa aku ulumu tembalonje?" ningi.

*Aposelema nendo yando ningolio nari imbi olando moromo ningi moloringi ungumu*

<sup>24</sup> Apostel iyemani enonganu nendo yando ningolio ningei, "Nari imbi ola moromo," ningi keru kuru liko moloringi.

<sup>25</sup> Jisasini enondo nimbei, "Imbo talape lupemanga iye nomimani enonga imboma enge ningi nokoko kongono awini mindili teko tirimele nalo kano iye nomimani nokoromele imbomani enonga imbi ola ltindiko, linonga nokoko kondoko liko tapondoli iyema nimele.

<sup>26</sup> Nalo na lombili andolima, iye nomi akumani teremele mele enoni aku teko naa teangei, molo! Enonga iye te imbi ola molombalo wali aku iyemu iye kropa mele molopili! Iye nomi molopa iye lupema nokombalo iyemu iye kendeman-dememu mele molopa iye lupemanga kongono tendepili!

<sup>27</sup> Iye nari paa iye nomimuya? Langi noromo iyemu iye nomimu molo langi peke topa kalopa plet kulumie topaaku kongonoma tenderemo iyemu iye nomimuya? Langi noromo iye akumu iye

nomimu ltemo. Aku tepa, nalo na aku tepa molo. Na paimbo enonga iye awilimu nalo enonga kendemande mele molopo eno lipo tapondoli iyemu moro.

<sup>28</sup> Na mindili nombo moro mele eno na kinye peya tapu topo mindili nombo moromolo kano.

<sup>29</sup> Nanga Lapa iye nomi kingimu omba molopa imboma nokombalo wali nando nokondowi nimu mele nani aku tepo enondo akuna imboma nokondangei nimbo nio.

<sup>30</sup> Akuna na iye nomi king molopo imboma nokombo wali eno na kinye peya langi polona nombo molomolo. Eno iye nomi kingimanga polomanga mainye molkolio, Israel imbo manga pupu 12 nokonge,” nimu.

*Jisasini Pitando Yu altopa umbulu timbelo mele oi nimbe para tirimu temanemu*

<sup>31</sup> Jisasini Pitando nimbei, “Saimon, piliwil! Kuro kerimanga nomi Sataneni Gotendo konge tepalie eno teko kenjingenje tope tipo manda manjipo kanambo nimu wali Geneti ee nimu.

<sup>32</sup> Nalo Saimon, nani Gote nunge konge tendepolio nimboi, Satan yuni nu aku tembalo wali Pita nuni na naa mundupe kelepa na ipuki tipe molopili nindu. Saimon, Satan alaye kolte pilko na munduko kelkolio, pele konopu topele tokو na kelko ipuki tiko molkolio, angenalima enge tiwi,” nimu.

<sup>33</sup> Nalo Pitani nimbei, “Awilimu, nani nu tiye kolopo kowa pumbo ningolio ninoya? Manda molo. Ilto peya ka tiemili ninge lemo paa. Molo ilto peya topo kondamili ninge lemo ulure molo. Peya kolambili,” nimu.

<sup>34</sup> Jisasini Pitando nimbei, “Pita, nani nundo paimbo i tempo nimbo tiro. Kinye kera gula oi ko naa tombalo wali nuni nando wali yupoko ninindo, ‘Na Jisas naa karo,’ ningi umbulu tinio,” nimu.

*Kou mone kinye, mele wale kinye, loi gelea kinye aku melemando Jisasini nimu ungumu*

<sup>35</sup> Jisasini yu kitipi kanoli iye 12 akumando kelepa nimbei, “Nani eno oi kongono lipo munduru wali kou naa meko, mele wale naa meko, kimbo su naa meko, we pangei nimbo munduru wali eno mele molo lerimuya?” nimbe walipe pilerimu wali, enoni “Mele tendekure kape molo naa lerimu,” ningi.

<sup>36</sup> Yuni enondo kelepa nimbei, “Nalo kinye na kinye ulure wendo ombalomunga, kou mone noirimoiyemu kano kou monemu lipe ambolopa, mele wale noirimoiyemu kano walemu lipe ambolopa, aku teko molangei! Opa teloi gelea naa noirimoiyemu yunge wale pakoli te yoko lipe loi gelea te pame tepili!

<sup>37</sup> Nani aku tepo ambe telka nio ungumu, nemboi! Oi imbomanu nando ningotenga bukuna toringi moromo mele kinye wendo ombai teremo mele i tepa: Yu kinye imbo mongo mongo kondoko ulu pulu keri teli imboma kinye liko tenu-deku tiko mako toringi, (Ais 53:12)

ningi bukuna moromo kanomu,” nimu.

<sup>38</sup> Yuni aku tepa nimu ungu pilko tundukolio enoni yundo ningei, “Awilimu, ya opa teloi gelea talo noirimolo kanowii,” ningi.

Kano wali yuni enondo nimbei, “Ungu manda nimbo, pamolo,” nimu.

*Unjo Oliv Angili Mai Kembona ola purungi wali aku lerimu kombu Getsemani nilina Jisas Gote kinye ungu nimbe konge terimu temanemu*

<sup>39</sup> Kano wali Jisas ulke mundupe kelepa ulke kombu awili Jerusalem tawendo pumbelie, yu takiraki Unjo Oliv Angili Mai Kembona ola pupundala terimu kano mele akuna purumu. Yunge ki tipi kanoli iyema yu lombili akilio leko waye purungi.

<sup>40</sup> Akuna pumbelie yuni yu lombili andolimando nimbei, “Kuro kerimanga nomi Satan lino topoperope tipe tepa maindo naa mundupili ningotenga konge teaio,” nimu.

<sup>41</sup> Aku tepa nimbeline yu alaye anjo pumbelie komongo topa pondopalie, Gote kinye ungu nimbeline nimbei,

<sup>42</sup> Ara, na mindili nombo kolomboi teromunga nuni molo, naa tepili konopu lenio lemoaku teko teami nalo nanga konopu lteo mele naa teamboi. Nunge konopu lteno mele paa teambo,” nimu.

<sup>43</sup> Aku tepa nimbeline kanopa molorumu wali, ensel teni mulu kombu tiye kolopa Jisas yu molorumuna ombo yu tepa enge tirimu.

<sup>44</sup> Kano wali, yu konopuna umbuni awili tepa, mindili nomba molopalie yu enge nimbeline Gotendo ungu nimbe konge tepalie yunge kangina kuru topa kano kurumu meme none tepa maina mainye purumu.

<sup>45</sup> Yu nimbeline kelepa ola angilipe yu lombili andoli iyema moloringina yando ombo eno yu kondo kolko konopu umbuni ltingimu eno tepa uru panjirimuna kanopalie

<sup>46</sup> enondo nimbei, “Kinye ambe telka uru peremeleya? Satan ombo eno ulu keri teangei nimbe tope timbei ombalo kani ola molko Gote konge teko molaio,” nimu.

*Jisas ka tiringi temanemu*

<sup>47</sup> Kano wali Jisasini aku nimbe molopili eno moloringina iye awini orangi. Orangi iyemanga kumbena molorumu iyemu yu iye Judas, ki tipi kanoli iye 12 akumanga te. Judas yu Jisas molorumuna nondopa ombo yu kangulurumu.

<sup>48</sup> Aku ulu terimu wali Jisasini yundo nimbei, "Judas, opa pule iyemani Iyemunga Malo kanoko imbi tiengei ningi nuni na ambe telka kangultunoya?" nimu.

<sup>49</sup> Kano wali akuna angileringi lombili andoli iyemani yu ulu tembai terimuna kanokolio enoni yundo ningei, "Awilimu, opa teli loi geleamani iyema tamiliya?" ningi kano wali

<sup>50</sup> enonga iye teni loi gelea lipe ambopalie Juda imbomanga ningi Gote popo tondoringimanga iye nomimunga kendemande iye tengi komumu imbondotopa laka ltenderimu.

<sup>51</sup> Aku terimu ulu kanopalie Jisasini yundo nimbei, "Aku ulu naa teao," nimbelie torumu iyemunga komumu lipe ambopalopatambu tindirimu.

<sup>52</sup> Juda imbomanga ningi Gote popo tondoringi iye awili mare kinye, Gote popo toko kaloringi ulke tempelemu nokoko moloringi ami iye nokoli iye mare kinye, Juda imbomanga tapu iye mare kinye, enoni Jisas ka tingi oringi. Kano wali Jisasini enoaku teko oringina kanopalie nimbei, "Na imbo topo wapu noli iyere naa moro kani loi geleama kinye koipema kinye ambe telka meko oromeleya?

<sup>53</sup> Oi takiraki ulke tempelena eno peya molomolo wali na ambolko liko ka naa tingi. Nalo kinye tumbulu tolina ongo tumbulu toli engemuni teremele," nimu.

#### *Pitani Jisas naa karo nimbe kolo topa nimu ungumu*

<sup>54</sup> Aku wali enoni Jisas ambolko liko meko pungolio Juda imbomanga ningi Gote popo tondoringimanga iye nomi awilimunga ulkena tukundo meko puringi. Yu lombili andoli iye Pita tule tepa eno umbulkondo akilio lepa purumu.

<sup>55</sup> Jisas meko oringi ulke kanomunga kerekuluna tipe kalko pilko moloringina Pita pumbe kopu tepa mainye molorumu.

<sup>56</sup> Yu akuna molopili kendemande ambo wenepo te omba tipe nomba pa terimuna Pita molorumuna yu neme neme nimbe kanopalie nimbei, "I iyemu Jisas kinye peya andoringilina kanoru iyemu," nimu.

<sup>57</sup> Pitani kolo topalie nimbei, "Ambomu, aku nino iyemu na naa karo," nimu.

<sup>58</sup> Alaye kolte mololiko puringi wali iye teni Pita kanopalie yundo nimbei, "Nu Jisas lombili andoli iye te lepamo," nimu kano wali Pitani nimbei, "Yane iyemu, na aku iyere molo," nimu.

<sup>59</sup> Pele ena mongo mele omba purumu wali imbo te Pita yu ungu nimu nomi ka pilipe imbi tipelie yuni enge nimbelie nimbei, "Paimbo, i iyemu Jisas peya moloringili. Elo peya kombu Galili iye talo kanomu," nimu.

<sup>60</sup> Aku tepe nimu wali Pitani nimbei, "Iyemu, nu nino mele na naa lipo manjiro," nimu. Aku tepe nimbe molopili kera gula ko torumu.

<sup>61-62</sup> Kano wali Jisasini topele topa Pita kanorumu. Aku wali Jisasini yundo oi nimbei, kera gula oi ko naa topili nuni wali yupoko nando kolo tokolio yu naa karo ninio. nimu kano ungumu Pitani lipe manjipelie tawendo pumbe kola enge nimbe terimu.

#### *Gote popo tondoringimanga iye nomi awilimunga ulkena Jisas teko kenjiringi ungumu*

<sup>63</sup> Aku wali Jisas akuna nokoko moloringi ele iyemani yu ungu taka tondoko kondowa tindiko yu larauwe toringi.

<sup>64</sup> Eno maminye te liko yuni eno naa kanopili ningi yunge kumbekere maminye ka tondoko pipi tindiko yu tokolio yundo ningei, "Nu Gotenga profet iyere morono nimele kani nu nari toromonje ningi tiwi," ningi.

<sup>65</sup> Enoni yuaku ungu taka tondoko ungu awiniaku teko ningi kala.

#### *Juda imbomanga kaunsil iyemani Jisas kot pilko yu kinye tengi mele ningi panjiringi temanemu*

<sup>66</sup> Kombu tangorumu wali Juda imbomanga ningi Gote popo tondoringi iye awili ma kinye, Gotenga ungumanga pulumu pilko mane tili iyema kinye, kano Juda imbomanga tapu iye kaunsilima pali Jisasinga kot pilemili ningi. Enonga ele iyemani yu eno liko maku toko moloringina meko purungi wali enoni yundo ningei,

<sup>67</sup> "Goteni lino nokopa kondombalo iye te lipo mundumbo nimbe kanopa ltimu iye, akumundo Kraist nimolo akumu nuya, ningi tiwi," ningi.

Nalo yuni enondo nimbei, "Na akumu moro nilkanje enoni naa pilko kolo torono nilimala.

<sup>68</sup> Nani enondo ungu te walipo pilkanje yando pundu naa telemala.

<sup>69</sup> Nalo Iyemunga Malo kinye pulu mondopa altopa kape enge pali peremo Gotenga ki imbondotopa mainye molopa yu peya melema nokombalo," nimu.

<sup>70</sup> Eno palini yundo ningei, "Nu Gotenga Malo moro ningi ninoya?" ningi.

Yuni nimbei, "Enoni naaku tepo moro nimele," nimu.

<sup>71</sup> "Linope, ungu te peya pilemili ambe telka nimoloya? Yuni yunu nimbe kenjirimo ungu piltimolo," ningi.

<sup>1</sup> Kano wali Juda imbomanga iye awilima pali eno ola angilko Jisas ambolko liko, kot tendengeindo Rom gavman iye nomi Pailat molorumuna meko puringi.

<sup>2</sup> Yu kot tendekolio Pailatendo ningei, "I iyemuni Rom gavmanemuni lino Juda imboma naa nokopili nimbe, Rom gavman iye paa awili Sisaramu kou takisi naa taio nimbe, yu yunu Goteni lino nokopa kondombalo iye te lipo mundumbo nimbe kanopa ltimu iye Kraist, yu iye nomi king te moro nimbe nimuna lino pilipo karomolo," ningi.

<sup>3</sup> Eno aku teko ningi ungu pilipelie Rom gavman iye nomi Pailateni Jisas yundo waltindipelie nimbei, "Nu Juda imbomanga iye nomi kingimuya?" nimu.

Jisasini topondopa nimbei, "Nuni nino mele na aku tepo moro," nimu.

<sup>4</sup> Yuni aku tepa nimu wali Pailateni Juda imbomanga ningi Gote popo tondoringi iye awilima kinye, we imboma akuna liko maku toringima kinye, enondo nimbei, "Iyemu ulu tepa kenjili te naa kando," nimu.

<sup>5</sup> Nalo Pailateni aku ungu nimumu konopu naa mondokolio enoni karaye teko enge ningi ningei, "Yuni we imboma ulu teko kenjiko, mongo liengei nimbeline toperope tirimu. Yuniaku ulumu oi pulu polopa kombu Galili tepe, pele yandopa Kombu Judia kombu pali tilipe andopalie, kinye kamukumu ya Ulke Kombu Awili Jerusalem omaba aku tepa moromo," ningi.

*Jisas iye nomi King Heroteni kot tenderimu temanemu*

<sup>6</sup> Galili kombu ningi ungu pilipelie Pailateni enondo waltindipelie nimbei, "Iyemu yu Galili kombu iyemuya?" nimu wali

<sup>7</sup> enoni ee ningina pilipelie yuni nimbei, "Iye Nomi King Herot, kombu Galili nokoli iyemu, Jisasininga kot yuni pilipili yu moromona kelko meko paio," nimu. Aku walimunga kano iye nomi king Herot yu Jerusalem omaba molorumu.

<sup>8</sup> Herot yu Jisasini ulu terimu mele ungu awini pilipelie, kano iyemu kanamboa nimbe molopa, yuni ulu enge nili te tepili kanamboa! konopu lepa molopalie yu orumu wali kanopa konopu tirimu.

<sup>9</sup> Akumunga Herot yu molorumuna Jisas meko oringi wali yu ungu awini walipe pilerimu nalo Jisasini ungu te topondopa naa nimbe we angilerimu.

<sup>10</sup> Juda imbomanga ningi Gote popo tondoringi iye awilima kinye, Gotenga ungu-manga pulumu pilko mane tili iyema kinye, akuna angilkolio enoni King Herotendo enge ningi ningi, Jisasini i tepe ungu nimbe kenjipe, i tepe ulu awini tepe kenjipe moromo ningi ningi.

<sup>11</sup> Kano wali iye nomi King Herot kinye yunge ami iyema kinye enoni Jisas yu iye nomi molo, yu we iyere ningi iye nomimani pakoromele wale pakoli wamba te liko pakondoko, yu ungu taka tondoko kondowa ltindiringi. Aku tekolio Pailat molorumuna Heroteni Jisas lipa yando mundurumu.

<sup>12</sup> Pailateni Herot molorumuna Jisas oiaa mundupili Pailat kinye Herot elo opa pule moloringili. Nalo Jisas aku ulu teringili walimunga pele elo popo tiko kanoko liko moloringili.

*Pailateni Jisas kot pilipelie kolopili tangei nimu temanemu*

<sup>13</sup> Jisas Pailat molorumuna yando meko oringi wali Pailat yuni Gote popo tondoringi iye awilima kinye, Juda Imbomanga tapu iyema kinye, we imboma kinye, enondo waio nimbeline nimbei,

<sup>14</sup> "Enoni i iyemuni imbomando Rom gavmanemu lino naa nokopili nimbe eno mongo liengei nimbe moromo ningi na morona meko onge. Kano wali eno kanoko molangei nani kot pilipolio enoni yu tepe kenjirimu nimele mele na ulu te naa kanopo ltendero.

<sup>15</sup> Kombu Galili iye nomi King Herot, yu kape i iyemu ulu te tepe kenjirimu te naa pilipelie yu altopa yando mundumo. Pil-timeleya? Yu ulu te tepe naa kenjimo. Yu we ambe telka topo kondomoloya?

<sup>16</sup> Ulu te tepe naa kenjimomunga nani yu we ka pulteni topolio kelko puwi nimbo," nimu.

<sup>17</sup> Poiney yaka nimbe Pasova wali wendo orumu wali Rom gavman iye awilimuni ka iye te ka ulkena wendo lipa mundupe we puwi nimu.

<sup>18</sup> Imbo paliri Pailat yuniaku tepe tembai terimu ulu liko manjikolio yundo ungu enge ningi ru ningi ningi, "Iye imu wendo pupili ungu naa niwi! Yu kolopili meko pungolio, pele kolo wangoko Barabas, ka ulkena peremo iyemu, wendo pupili niwi," ningi.

<sup>19</sup> Ulke kombu awili Jerusalem imboma oia walite Rom gavman iyema topo, linongano gavman molamili ningolio kano iye Barabas yu peya aku teko ningi tekolio, yuni iye te topa kondorumumunga yu ka ulkena perimu.

<sup>20</sup> Pailateni Jisas we pupili nimbeline enondo ungu te altopala nimu

<sup>21</sup> nalo enoni yundo ru ningolio ningi, "Da iyemu kolopili unjo polopeyana toko uku taio niwi," ningi.

<sup>22</sup> Aku teko ningi wali yuni enondo altopa wali yupoko tipe waltindipelie nimbei, "Yuni ulu keri ambelemu temona yu tamboya? Yu ulu te tepe naa kenjimo. Yu we

ambe telka topo kondomoloya? Naniyu mapu topolio kelko puwi nemboi," nimu.

<sup>23</sup> Nalo enoni ru ningungu enge ningolio ningei, "Da iyemu kolopili unjo polopeyana toko uku towi," ningi wali enoni enge ningi ungu Paillateni pilipelie

<sup>24</sup> kano ungu nimbe panjipe "Aku tepe wendo opili," nimu, kano wali

<sup>25</sup> iye Barabas, oi Juda imboma linonganogavman molamili nimbe iye te torumuna ka ulkena pepili panjiringi kano iye Barabas, wendo lipe we puwi nimbelie, pele enoni Jisas kolopili ningi ungu pilipelie yu toko kondangei nimbe ami iyema tirimu.

*Wapu iye talo kinye Jisas peya unjo polopeyana ola toko uku toringi temanemu*

<sup>26</sup> Jisas meko pungei pungolio, kombu Sairini iye Saimon, yu imbo kombu te mundupe kelepa ulke kombu awili Jerusalem pumbei orumu wali, ami iyemani yu ambolko likolio, Jisasinga unjo polopeyamu mendeko yu lombili puwi ningi liko pendekona ola gomo ltenderingi.

<sup>27</sup> Imbo awini yu lombili purungi. Ambo mare yu tongueimunga kola teliko purungi.

<sup>28</sup> Kano wali Jisasini topele topa aku ambomando nimbei, "Jerusalem amboma, eno na kolombomunga pilkolio kola naa teangei! Eno enono kinye enonga bakuluma kinye ulu altaupo wendo ombalomunga pilkolio kola teao!

<sup>29</sup> Aku tepo niomu, ambe telka nio? Nemboi. Walite eno Jerusalem imboma umbuni timbelo walimu wendo ombalo wali eno kinye enonga bakuluma kinye mindili nonge wali imbomani ningei, 'Ambo bakulu te naa meko, bakulu ame naa tiko, wangono moromele amboma eno malo,' ninge.

<sup>30</sup> Altoko

Imbomani kelko mulu awili poromomando mai ambu topa lino topili ningi, mai kembomando mai ambu topa lino aku topili ningi" (*Hos 10:8*)

nimu.

<sup>31</sup> Aku tepe nimbelie pele kamukumu ungu iko te topa enondo nimbei, "Unjo koinjo angimomu peke toromele. Pele unjo kololimu ambe tengaya?" nimu.

<sup>32</sup> Iye talo Jisas peya toko uku tongueindo meko purungi. Aku iye talo wapu noringili iye talo.

<sup>33</sup> Kombu Pinyewe Kaungala nilina oringi wali yu kinye wapu noli iye talo kinye unjo polopeya yupokonga ola toko uku toko mondoringi. Wapu noli iye talo te Jisas yunge imbo kindo uku toko, te Jisas yunge koya kindo uku toringi.

<sup>34</sup> Kano wali Jisasini nimbei, "Ara, nando i teremele imbomani naa liko manjikolio

teremele kani nuni teremelelunga umbuni naa tiko tiye kondowi," nimu. Ami iyemani yunge wale pakolima oi yu unjona toko uku naa tokolio kulkotingga moke teamili ningi eno te te ningi lingelimunga kat mele teko wale pakolima tingga.

<sup>35</sup> We imboma enoni yu teringi mele kanoko we angilerangi nalo enonga awilimanu yundo ungu taka tondoko ningei, "Yu imboma lipe tapondolimu kani kinye yu yunu lipe tapondopili! Yu Goteni lino nokopa kondombalo iye te mundumbo nimu iye Kraist molopha, Goteni Nanga kongono tendepili nimbe kanopa ltimu iyemu molomo lemo, kinye yu yunu lipe tapondopili," ningi.

<sup>36</sup> Ami iyema peya yu ungu kondowa Itindiko molkolio no wain kombili teli te nopili tiemili ningolio

<sup>37</sup> yundo ningei, "Nu Juda imbomanga iye nomi king molonio lemo nu nunu liko tapowii," ningi.

<sup>38</sup> Yu unjona toko uku toringi unjona ola ungu te toko mondiringimu i tepe: IYE IMU JUDA IMBOMANGA IYE NOMI KINGIMU.

<sup>39</sup> Wapu noli iye talo unjo polopeyana ola toko uku toko panjiringi iye talonga teni Jisasindo ungu taka tondopalie nimbei, "Goteni lino nokopa kondombalo iye te lipo mundumbo nimbe kanopa ltimu iyemu nu molo nariya? Lipo mundumbo nimu iye Kraist nu lemo, nu kinye ilto kinye lipo tapondambo ningi unjona mainye pamili niwi," nimu.

<sup>40</sup> Nalo wapu noli iye talonga teni pilipelie yu iri topalie nimbei, "Ilto umbuni tendedku tiko mele tingemunga Gote pipili naa koltonoya?

<sup>41</sup> Ilto tepo kenjirimumbulumunga mindili paa awili tinge. Nalo iye imupe yu ulu keri te naa terimu," nimu.

<sup>42</sup> Aku tepo nimbelie yuni Jisasindo nimbei, "Jisas, nu iye nomi kingimu ongo molkolio wali, na liko manjiwia," nimu.

<sup>43</sup> Jisasini topondopa yundo nimbei, "Nani nundo paimbo nio. Kinye nu na kinye waye imboma Molko Kondoromele Kombu Pengana pumbo molombolo," nimu.

#### *Jisas kolorumu*

<sup>44-45</sup> Jisas unjo polopeyana ola we pepili awi tangoli ena mongo 12 klok terimu wali ena topa kelepa kombu tumbulu topalie, altopa ipupene ena mongo 3 klok kombu kelepa tangorumu. Gote popo toko kaloli ulke tempel Jerusalem tuku angilerimu akuna tukundo Gote molorumu kiripi paa kake telimunga kerepuluna imboma tukundo naa pangei ningi oi waliwali maminye awili teni pipi tiko panjiringi. Akuna kano maminyemu imunana pure lipe aloawa terimu.

<sup>46</sup> Kano wali Jisasini are nimbeline nimbei, "Ara, nanga minimu nu moronona opili nimbo nu tiro," nimbeline yu nomi ka akupe ltimu.

<sup>47</sup> Jisas toringi ami iyemanga nokoli iyemuni Jisas ungu te nimbe kolorumu mele pilipe kanopalie yuni Gote kapi nimbeline nimbei, "Iiyemu yu paimbo ulu pulu keri te naa tepa, iye tumbi nili te lepamo," nimu.

<sup>48</sup> Kano wali yu unjo polopeyana toko uku tonge kanomolo ningi oi liko maku toringi imbona yu terimu ulu kanokolio lupe lupe pungu awini konopu liko munduko kondo kololiko ulkendo puringi.

<sup>49</sup> Yu oi lombili andoringi iyema kinye kombu Galili amboma yu peya andoringima kinye enoni tulu teko angilko yu toringi kolorumu ulu kanoko angileringi.

#### *Jisas onto teringi temanemu*

<sup>50-51</sup> Jisas kolorumu wali, iye te yunge imbi Josep, yu Juda Imbomanga kaunsil iye awili te, yu ulu pengama kau tepa iye toya toli te, yu kombu Judia ulke kombu Arimatea iyemu. Yu Goteni omba iye nomi kingimu molopa lino nokombalo walimu opili nimbe nokopa molorumu iye te. Yu Juda imbonanga kaunsil iye te paimbo molorumu nalo kano kaunsil iyemani Jisas kolopili ningi wali yuni ee naa nimbeline we molorumu.

<sup>52</sup> Aku iyemuni Rom gavman iye awili Pailat molorumuna pumbelie Jisasinga onomu liemboya nimbe konge terimu.

<sup>53</sup> Pailateni manda nimu wali Josep pumbe Jisasinga onomu unjona mainye lipe, maminye koinjo teni lipe onomu kulupi topalie, ono kombuna kou anga tengenepa pumbe tuku noirimu. Aku kou angana imbo te oi ono naa telina, yu pumbe ono terimu.

<sup>54</sup> Jisas ono terimu walimu, Juda imbonani Otili Koro Mololi Sabat waimu ombalo ningi melema tumbi tiko noirimele walimu.

<sup>55</sup> Oi Jisas kinye kombu Galili munduko kelko Jerusalem oringi amboma ulke kombu Arimatea iye Josep Jisasinga onomu mepa purumu wali yuni Jisas ono terimu kou angamu kanoko akuna tuku onomu noirimu mele neme neme ningi kanoringi.

<sup>56</sup> Kanoko pora tikolio yando ongo enonga ulkendo pungolio, yunge onona kopongo welema kinye mele lupe mune tolima kinye kandandamili ningi tumbi tiko noirangi. Nalo aku teko pora tikolio sabat walimu wendo orumuna Gotenga ungu manemuni Sabat wali kinye koro molangei nimu mele pilko likolio mele tumbirumbi tiko noirangi melema ono kombuna naa meko pungolio we noiko koro moloringi.

## 24

*Amboma Jisasinga onto kombuna pungolio pilko kanoringi mele lombili andolima ningi tiringi temanemu*

<sup>1</sup> Sabat wali pora nimu kinye Juda Imbomanga kongono wali kiyendo kinye, paa kombu muni kinye oi amboma kopongo mune toli oi tumbi tiko noiringima liko Jisas ono teringi kombuna meli puringi.

<sup>2</sup> Ono kombu kou anga kerepulu pipi tiringi koumu perele marele pumbe welekondo lerimuna kanokolio,

<sup>3</sup> tuku puringi nalo akuna Iye Awili Jisasinga onomu oi lerimuna naa kanoringi.

<sup>4</sup> Kano wali onomu ambe temonje ningi konopu liko munduko moloringi wali iye talo kariapa tepalie pa tepa wendo oromo kano mele teli wale pakoli pakoringili iye talo eno moloringina angileringili.

<sup>5</sup> Kanokolio amboma pungu pungu ningi tamalu peringi nalo iye taloni enondo ningili, "Koinjo moromo iyemu ya onto kombuna ambe telka kororomeleya?

<sup>6</sup> Yu ya naa itemo. Makilipe koinjo molopa wendo pumo. Yu oi eno kinye Kombu Galili molopa nimu kano mele liko manjeio! Yuni nimbei,

<sup>7</sup> Juda Imbonanga iye awilimanu Iyemunga Malo liko talape lupe imbo ulu pulu keri telima tinge, enoni yu unjo polopeyana kolopili toku uku tongena kolopalie, wali yupoko tipemunga makilipe koinjo molombalo nimu kanomu," ningili.

<sup>8</sup> Kano wali Jisasini oi aku nimu mele ambomanu altoko konopu liko manjiringi.

<sup>9</sup> Ono kombu kou angamu munduko kelko yando ongolio, ki tipi kanoli 11 kinye Jisas lombili andoli peya moloringima waye enondo kanoko pileringi uluma temane toko tiringi.

<sup>10</sup> Ulke kombu Makdala ambo Maria, ambo Joana, Jems anumu Maria, eno peya puringi amboma, kano ambomanu aku temanemu Jisasini oi nanga kongono tepaio nimbe lipe mundurumu iye aposel nilimando toko tiringi.

<sup>11</sup> Nalo ambomanu ningi ungumu we ungu mare nimele konopu lekolio kolo toromele konopu leringi.

<sup>12</sup> Aku konopu leringi nalo Pita ola angilipe ono kombu kou angana lkipe pumbelie, tapa lepa kanopa Jisas onomu kulupi toringi maminyema kau lerimu ulu kanopalie konopu awini lipe mundupe i ambe tepa ulure temonje konopu lepalie yando orumu.

*Ulke kombu Emeus aulkena ulu te wendo orumu temanemu*

<sup>13</sup> Jisas makilipe koinjo molorumu aku walimunga yu lombili andoringimanga imbo talo ulke kombu Emeus pungili

puringili. Aku ulke kombumu kinye ulke kombu awili Jerusalem kinye aulkemu alaye tule tepa mele, 11 kilomita mele.

<sup>14</sup> Eloni Jisas kolorumumundo nendo yando ungu nilko puringili.

<sup>15</sup> Aulkena aku ulumando ungu nilko pungo moloringili wali Jisas yunu elo puringilina ombo elo kinye kopu tepa purumu,

<sup>16</sup> nalo Jisas yu we iye lupere oromo konopu leangili nimbeline terimu eloni yu naa kanoko imbi tiringili.

<sup>17</sup> Yuni elondo waltindipelie nimbei, "Elo ulu ambelemundo ungu nilko purumbeleya?" nimbu.

Elo Jisas toringi kolorumumunga konopu topili we angileringili.

<sup>18</sup> Tenga imbi Kliopas, akumuni yundo waltindipelie nimbei, "Jerusalem tukundo bolkena ulu wendo orumuma nu naa kanorunuya? Imbo awini akuna ongo makutokolio kanoringi nalo nu peya naa molko kanoringi. Tenga lupe molkolio ponenge orono lepamo," nimbu.

<sup>19</sup> Orumu iyemuni, "Ambele ulumaya?" nimbu.

Eloni ningili, "Ulke kombu Nasaret iye Jisasina ulu kanoma. Jisas yu Gotenga iye profet te molopalie Gote kinye lino maina imboma kinye kanopo molamili ungu enge nilima nimbe ulu enge nilima terimu.

<sup>20</sup> Kano wali linonga ningi Gote popo tondoli iye awilima kinye lino nokoromele iye awilima kinye Yu kot pilko kolopili ningi tangeiningo Rom gavmaniyema anjo tiringi wali enoni yu kolopili ningi unjo polopeyana toko uku toringi.

<sup>21</sup> Yu Goteni lipe mundurumu, yuni Israel imboma tepa limbelo nimbo pilipo konopu tipo molorumulu nalo yu toringi. Bolkena tonge kinye, wali yupoko tipe kinye ombo purumona yu ono kombuna we Itemo.

<sup>22-23</sup> Kinye ulu te lupe wendo omo. Yu lombili andorumulumanga ambo pokorenii kinye ongo ninge ungu pilipolio mini ltemolo. Kinye paa ipu leli oi aku amboma yu ono teringi kou angana pungo kanonge nalo yu ono kombuna naa lemo. Eno ongo linondo ningi, "Mulu kombuna ensel talo kanomolo, eloni Yu koinjo moromo, ningele ningi.

<sup>24</sup> Kano wali lino peya molomolo iye marenii kou angana pungolio ambomani ningi mele kanonge, nalo yu naa kanonge," ningili.

<sup>25</sup> Aku teko ningili wali elo lombili akilio lepa orumu iyemuni elondo nimbei, "Elo keke lepo torombele. Oi Gotenga iye profetemani yundo ningi bukumunga moromo mele mongoni kanoko komuni pilkolio konopuna panjiko andolembalanje Jisas

kinye bolkena teringi mele kinye yuni teremo mele kinye paa lepamo ningi ipuki tilimbala.

<sup>26</sup> Iye profetemani Goteni eno nokopa kondombalo iye te mundumbo nimu iye Kraist mainye ombalie, aku nimbele iyemu bolkena mindili norumu mele mindili nomba mulu kombuna iye nomi awili pumbe molombalo mele oi ningi naa tiringiya? Kinye oi ningi tiringi mele yu aku temo," nimbu.

<sup>27</sup> Aku tepa nimbeline Mosesini Jisas yu yunu tembalo mele oi nimu mele pulu mondopa nimbe tipe yandopa yandopa iye profetemani yu tembalo mele oi ningi Gotenga ungu bukumuni nimo mele nimbe tilipe iye talo kinye aulkena purumu.

<sup>28</sup> Iye talo puringili ulke kombumu nondoko wendo oringi wali Jisas we tumbi tipe tengi lupe pumbelei terimu.

<sup>29</sup> Nalo eloni ningili, "Molo, ena pepumbe ipu nondopa lembai teremo kani yando peamili owi," ningili wali yu elo kinye pumbe molorumu.

<sup>30</sup> Elo peya kere nongo moloringi wali yuni bret kaloli te lipe Gote paa tereno nimbe, ambolopa pike lepa elo tirimu.

<sup>31</sup> Aku ulu terimu wali elo yu kanoko imbi tiringili kano wali tepa nema ltimuna altko naa kanoringili.

<sup>32</sup> Kano wali elo nendo yando ningili, "Aulkena ilto kinye ombo ungu nimbe Gotenga ungu bukumuni nimo mele ungu pulumu nimbe tilipe omo wali ilto konopu makilipe tonore temona ombolo kanomu," ningili.

<sup>33</sup> Kano wali elo ola angilko kelko tumbi tiko Jerusalem yando ongo, lombili andoli iye 11 kinye eno peya makutokolio moloringi imbo lupema kinye moloringina puringili.

<sup>34</sup> Tuku puringili wali enoni elondo ningi, "Awilimu paimbo makilipe koinjo moromu itemo. Yu yunu Saimon moromona pumbe lipe ondomo," ningili.

<sup>35</sup> Kano wali iye taloni aulkena puringili kinye iye te ombo nimu mele kape kano iyemuni bret kaloli te ambolopa pike lepa terimu wali kanoko yu Jisas ningi kanoringili mele kape enondo temane toko tiringili.

*Jisas makilipe koinjo molopalie lombili andolima moloringina orumu temanemu*

<sup>36</sup> Jisas lombili andoli imbonani Jisas yu makilipe koinjo molorumu kanoringimundo ungu ningi molangei Jisas yu ombo eno moloringina angilipelie "Konopu ame topili molaio," nimbu.

<sup>37</sup> Eno imbo kololi tengi minimu kandomolo konopu lekolio mini lteringi.

<sup>38</sup> Yuni enondo nimbei, "Mini lteko konopu talo panjiko ambe telka moromeleya?

<sup>39</sup> Nanga ki talo kinye kimboma kanoko na iombo angio kani kanaao! Ambolko pileio. Minimupe, kangi kape ombele kape naa angimona naa ambolko pilino," nimu.

<sup>40</sup> Aku tepa nimbeline yunge kimbo ki pirimu toringima eno lipe ondorumu.

<sup>41</sup> Kano wali eno yu kanokolio nondoko tono kolko paa konopu liko munduringi nalo paimbonje molo mele ambele te kandomolonje ningi konopu talo panjiko we moloringi wali yuni eno waltindipelie nimbei, "Langi te itemoya? Namboi tieo," nimu.

<sup>42</sup> Enoni yu oma kaloli te liko tiringi,

<sup>43</sup> akumu lipe eno kanoko molangei norumu.

<sup>44</sup> Yuni enondo nimbei, "Na oi naa koloru wali eno kinye molopolio eno ulu wendo ombalo mele nimbo tiru kano ulumu i wendo oromo. Mosesini kinye Gotenga profet iyemani kinye enoni nando ningi buk toringi uluma kinye, Gotenga kunana ningi bukura moromo kunanama akuma palini nando nimo uluma kinye, kano uluma paimbo wendo omba langi mongo mepili niu kanomu," nimu.

<sup>45-46</sup> Aku tepa nimbeline Gotenga ungu bukuna nimo mele pilko kondangei nimbe yuni ungu pulumu eno nimbe tipelie nimbei, "Bukuna toringi moromo mele i tepe: Goteni eno nokopa kondombalo iye te lipu mundumbo nimbe kanopa ltimu iye Kraist nili kano iyemu mindili nomba kolopalie wali yupoko tipemunga ono kombuna makilipe koinjo molombalo.

<sup>47</sup> Aku ulu tembalo wali kano iye Kraist yunge talape imbomani yunge engemuni imboma ulu pulu keri tengema pilko keri pilko konopu topele tonge mele kinye, ulu pulu keri tengema Goteni tiye kolopa altopa naa pilipe umbuni naa timbelo mele kinye, ningi tingeindo Israel imbomanga ulke kombu awili Jerusalem pulu mondoko kombumanga pali pungolio ningi tilko andonge.

<sup>48</sup> Na kinye wendo orumu ulu kandomelema pali imbomando anjo ningi tipeio.

<sup>49</sup> Goteni timbo nimbe mi lerimu Mini Kake Telimu nani olando pumbolio lipu mundumbo kani aku Mini Kake Teli enge nilimu yu mulu kombuna mainye omba eno enge tipe molombalo kani oi tengu lupe naa pungo, Jerusalem tuku we nokoko molaio," nimu.

*Jisas mulu kombuna olando purumu ungumi*

<sup>50</sup> Jisas yu lombili andoringi imboma ulke kombu Betani lerimuna nondopa mepa pumbelie, ki talo ola mundupe eno mane

ungu panjembo nimbe Goteni eno nokopa kondopili nimu.

<sup>51</sup> Aku tepa molopili eno mundupe kelepa mulu kombuna ola purumu.

<sup>52</sup> Kano wali eno yu kapi ningi imbi ola ltindikolio tono kololiko kelko Jerusale-mando yando oringi.

<sup>53</sup> Akuna pungolio Gote popo toko kaloli ulke tempelena takiraki molko, Goteni terimumunga paa tereno ningi yu kapi ningi yunge imbi ola ltindiringi.

## Ungu Tukumemu Jononi Torumu Jon Jononi Ungu Torumumunga Ungu Pulu Mare

Kitipi kanoli Jon, yu Jisasini paa konopu mendorumu. Jononi imboma Jisas Gotenga malo ningi ipuki tiengei nimbelie i ungu tukumemu topa panjirimu. Ungu enge nili mare Sapta 13-17 akuna peremo.

Goteni nu i ungu tukumemu pilko kondoko Jisas olandopa ipuki tiwi nipili.

*Jisas Kraist, Gotenga Ungumu, maina iye apuwe lerimu*

<sup>1</sup> Paa koro oi mulu mai talo kape melema oi naa leli, Gotenga Ungumu molorumu. Aku Ungumu Gote kinye moloringili. Aku Ungumu yu Gote.

<sup>2</sup> Paa koro oi, melema maina oi naa leli, yu Gote kinye moloringili.

<sup>3</sup> Ungumu yuni yunu melema pali terimu. Melte we pora naa purumu. Mele wendo orumuma pali yuni terimuna wendo orumu.

<sup>4</sup> Koinjo mololi ulu pulumu yu kinye kau perimu. Kano koinjo mololi ulu pulumu imboma tepe pa tenderemo.

<sup>5</sup> Aku pa teremomuni kombu tumbulu toromomu pa tenderemo. Tumbulu toromomuni walite pa telimu manda pipi tipe tumbulu altopa naa toromo.

<sup>6</sup> Iye te Goteni lipe mundurumuna orumu, yunge imbi Jon.

<sup>7</sup> Jon yuni pa tendelimunga pulumu nimbe timbei orumu. Imbomanipali yunge ungumu pa tendeli akumu ipuki tiengei ombo nimbe tirimu.

<sup>8</sup> Jon yu aku pa tendelimu molo. Aku pa tendelimu ombalo ungumu nimbe timbei orumu.

<sup>9</sup> Paimbo pa tendelimuni imboma pali pa tenderemo kanomu maina ombai orumu.

<sup>10</sup> Yu mai kombuna ombo molorumu. Yuni yunu mai kombumu terimu nalo mai kombuna imbomanipal yu kanoko imbi naa tirungi.

<sup>11</sup> Yu yunge kombuna ombo molorumu nalo yunge imbomanipal yu tukundo naa ltingi.

<sup>12</sup> Nalo imbomanipal yu kanoko imbi tiko tukundo ltingimando yuni Gotenga bakulumapuwe leko molangei nimbe imbi tirimo.

<sup>13</sup> Nalo kano imboma Gotenga bakulumapuwe lteringi,aku ulumu kangimunga kongonomu molo, anupili lapalini Gotenga

bakulumamemili ungu naa ningila. Goteni yunu kau enondo Nanga bakulumamimbe aku ulu terimu.

<sup>14</sup> Gotenga Ungu mainye ombo maina iye apuwe lepa lino kinye peya molorumu. Lapani tipe mundurumuna orumu malo tenekeu imbi awili moromo iye kanopo pileringi. Yu kondo kololi ulu pulumu kinye paimbo nili ulu pulumu kinye yunge konopuna pepa tenegepeya terimu iyemu.

<sup>15</sup> Jononi yu kanopa imbi tipelie wali ruminimbelie nimbei, "Altopa ombalo iyemu nanga kiyendomu, aku ambe telka yu koro oi molorumu. Aku ungu oi niu kano aku iyemundo nio," nimu. Imbomando aku tepe ungu nimbe tirimu.

<sup>16</sup> Goteni yu kinye konopu noirimulu pulumu yu kinye pulu peremomunga lino tipe titirimo. Ulu pengama pali yu kinye pulu peremo akumunga lino nokopa kondorumuna Itimolo.

<sup>17</sup> Mosesini lino Gotenga ungu mane tirimu. Nalo Goteni lino we kondo kololi ulu bulumu kinye paimbo ulu tukumemu kinye aku uluma Jisas Kraist yu kinye kau pepili orumu nimu.

<sup>18</sup> Maina imbo teni oi kape, kinye kape Gote naa karomele. Gotenga Malo teneckumu kau moromo, akumu Lapa kinye peya kopu teko morombele, akumuni kau Gote moromo mele kanangei nimbe yuni yu moro tondoromo.

### *No Ltindili Jononga ungumu*

<sup>19</sup> Juda imbomanga iye awili kaunsil ulke kombu awili Jerusalem moloringiaku iye mani Gote popo tondoli iye pokore kinye Livainga talape iye pokore kinye Jon imbo no ltindipe molorumuna liko mundukolio, Jonondo nu nariya ningi waliko pilengei paio ningi.

<sup>20</sup> Aku iye pokongo yu waliko pileringi wali yuni kolo naa topa tumbi tipe nimbelie nimbei, "Goteni lino nokombalo iye te lipomundumbo nimbe panjirimu iye Kraist na molo," nimu.

<sup>21</sup> Aku iye pokoningo, "Nu aku iyemu molo lemo, nu nariya? Nu Gotenga profet iye Elaija Goteni oi olando Itimu akumu nu kelko onioya?" ningi waliko pileringi. Yuni "Na aku iyere molo," nimu. Ungutopendoko ningi, "Aku lemo profet iye te pele ombalo oi ningi iyemu nuya?" ningi. Yuni "Molo!" nimu.

<sup>22</sup> Kano kinye yundo ningi, "Nu nariya? Lino paio ningi tope tinge iyema ongo ningi tinge ningi nokoko moromele kani nunge imbi leko tiwi! Nu pa nariya?" ningi.

<sup>23</sup> Jononi nimbei, "Gotenga profet iye Aisaiani koro oi nimbei,

Imbo naa peli kombuna iye teni Aw-ilimunga ombalo aulkemu tumbi tindiwi nimu, (Ais 40:3) nimu. Aisaiani oi pilerimu ungumu nani kinye nio," nimbe Jononi nimu.

<sup>24</sup> Ongo moloringi iyemanga Farisi iye mare moloringi.

<sup>25</sup> Aku Farisi iyemani yundo waliko pilkolio ningeindo, "Nu iye Kraist molo, Elaija molo, ombalo ningi profetemu molola. Ambe temona imboma no ltindinoya?" ningi.

<sup>26</sup> Jononi aku iyemanga ungu topondopa nimbei, "Na paimbo imbo no ltindiro nalo nanga kongonomu mainye. Iye te linonga kombuna tukundo moromo akumu eno kanokolio we iyere konopu leko, kanoko imbi naa tirimele.

<sup>27</sup> Nalo yu iye paa kiyendomu. Na yunge kimbo su ka pilke topo kimbo su wendo ltindilimu lemo na iye penga. Naloaku kongonomu na kame i tepa iyemuni manda naa tembo," nimu.

<sup>28</sup> I ulu wendo orumuma ulke kombu Betani, no Jordan nekondo ltemo kombuna, wendo orumu. Jononi akuna imbo no ltindirimu.

*Jononi Jisasindo, Gotenga Kongi Sipsip Walomu nimu*

<sup>29</sup> Otilikondo Jon molorumuna Jisas om-bai orumu ulu kanopalie nimumuni, im-bomando nimbei, "Kanaio! Gotenga Kongi sipsip Walomu oromo. Yu imbomanga pali ulu pulu keri teremelema kulu tondombalo iyemu oromo," nimu.

<sup>30</sup> "Oi nani iye te niu kanomu andi oromo iye akumundo niu. Nani oi nimboi, iye na lombili ombalo iye te naaa molambo yu koro oi molorumu kala yu olandopa na mainyendopa niu kanomu i iyemu.

<sup>31</sup> Na kape yu naa kanoru nalo Israel imboma yu kanoko imbi tiengei lipo ondambo nimbo na ombo imboma no ltindiro," nimu.

<sup>32</sup> Jisas kinye wendo orumu ulumu kanopalie Jononi nimbei, "Yu no ltindipo molopo kanopolio wali Mini Kake Telimu kera imili mele mulu kombuna mainyendo ombo yu moromona ombo moromo ulu kando.

<sup>33</sup> Nani yu kanopo imbi naa tipo yu we iyere konopu leka nalo nando imboma no ltindipuwi nimbe lipe mundurumu iye-muni na nimbe tipelie nimbei, 'Mini Kake Telimu mainye ombo iye tengaa kangina ombo ola molombalo kanonio lemo aku iye-muni Mini Kake Telimu lipe imboma tim-belo iyemu,' nimu ungu pilipolio yu kanopo imbi tipolio

<sup>34</sup> enondo Yu Gotenga Malo, nio," nimu.

*I ungumu torumu iye Jon kinye Andru kinye Pita kinye Jisas lombili puringi ungumu*

<sup>35</sup> Otilikondo Imbo No Ltindili Jon angilipelie nimumuni kinye, yu lombili andolimanga iye talo kinye No Jordan kulendo akuna peya angilerengi.

<sup>36</sup> Aku wali Jisas ombo purumu ulu kanopalie nimbei, "Kanaio! Gotenga Kongi Sipsip Walomu ombo purumu," nimu.

<sup>37</sup> Yu lombili andoli iye talo yuni nimu ungu pilkolio Jisas lombili puringili.

<sup>38</sup> Jisas topele topa yu lombili puringili ulu kanopalie nimbei, "Elo ambele mele kororombeleya?" nimu. Eloni yundo "Rabai, nu tena perenoya?" ningili. (Rabainga ungu pulumu 'Ungu mane Tilimu').

<sup>39</sup> Yuni kano iye talondo "Ongo kanalio!" nimu. Elo yu perimuma pungo kanokolio ipupene 4 klok terimu mele kano wali yu peya puringi.

<sup>40</sup> Jononi nimumu pilkolio Jisas lombili puringili iye talonga te Andru, Saimon Pitanga angenu.

<sup>41</sup> Andru pumbelie kumbe lepa angenu Saimon koropa kanopa ltendepalie nimbei, "Lino Iye Mesaia kanopo ltendemolo," nimu. (Mesaia akumu Juda imbomanga ungu te, akumunga ungu pulumu Goteni imboma nokopa kondombalo iye te lipo mundumbo oi nimbe panjirimu iyemu. Mesiando Grik unguna Kraist nimele.)

<sup>42</sup> Aku nimbeline Andruni angenu Saimon Jisas molorumuna meli purumu. Jisasini Saimon kanopalie nimbei, "Nu Saimon, Jononga nili iye tengaa malo. Nunge imbi te Sifas ningolenge," nimu. (Juda imbomanga unguna Sifas ningol, Grik unguna Pita nimele, aku ungu talonga pulumu kou mulu.)

*Jisasini Filip kinye Nataniel kinye Yu lombili walio nimu*

<sup>43</sup> Otilikondo Jisas Kombu Galili distrik pambo konopu lepa pumbei purumu. Pumbelie Filip aulkena angilerimuna kanopalie, "Na lombili owi," nimu.

<sup>44</sup> Filip kape ulke kombu Betsaida iyemu, Andru kinye Pita talonga kombumu.

<sup>45</sup> Filiponi Nataniel kanopa ltendepalie yundo nimbei, "Iye te, oi Gotenga ungu manema moromo bukuna Mosesini iye te ombalo nimbe temane torumu kanomu kinye, Gotenga nimbe munduli ungu nili profet iyemani enonga bukumanga iye te ombalo ningol panjirangi kanomu kape, kinye lino kanopo ltendemolo. Yu ulke kombu Nasaret iye Jisas, Joseponga malo," nimu.

<sup>46</sup> Nalo Natanieleni Filipondo nimbei, "Nasaret kombu taun aku tepana ulu penga te manda wendo ombaloya?" nimu. Filiponi Natanielendo nimbei, "Ongo kanowil!" nimu.

<sup>47</sup> Aku wali Nataniel ombai orumu Jisasini kanopalie, yundo nimbei, "I iye oromomu paimbo Israel iyemu, ungu kolo toliyu kinye naa peremo," nimu.

<sup>48</sup> Nataniele ni Jisasindo nimbei, "Nuni na ambe teko kanoko imbi tikolio ninoya?" nimu. Jisasini topodopalie nimbei, "Molo. Filiponi nu oi naa waltipili nu unjo fik puluna molonio wali nu kanopo imbi tindu," nimu.

<sup>49</sup> Aku tepa nimu wali Nataniele ni topodopa nimbei, "Ungu Mane Tilimu, nu Gotenga Malo, lino Israel imbomanga iye nomi kingimu lepamo," nimu.

<sup>50</sup> Jisasini nimbei, "Nani nu unjo fik puluna molonio wali kanondu nio kanomunga nuni na Gotenga Malo moromo konopu Itenoya? Kinye nani nundo nio mele manyendopa pele ulu tondolo paa olandopama wendo ombalona kanonio," nimu.

<sup>51</sup> Aku ungu nilipe pumbelie Jisasini nimbei, "Nani enondo paimbo nimbo tiro. Pele mulu kombuna anjo yando pumbe, Gotenga ensel iyemani Iyemunga Malo molombalona olando pungo manyendo ongo tengena kanonge," nimu.

## 2

*Jisasini ulu enge nilima pulu polopa tembaindo imbo nomu no wain apuwe ltenderimu ungumu*

<sup>1</sup> Wali yupoko tipemunga ulke kombu Kana kombu Galili distrik tukundo lerimu, akuna iye te ambo limbeindo langi koipa imboma timbei terimu, akuna Jisasina anumu waye moloringi.

<sup>2</sup> Jisas kinye yunge lombili andoli iyema kinye kano ambo limbei iyemuni eno kape langi peya namili waio nimu kala eno ongo langi waye noringi.

<sup>3</sup> Langi nongo molangei no wain pora nimu wali Jisasina anumuni Jisas yundo nimbei, "No wain kano pora nimo," nimu.

<sup>4</sup> Jisasini anumundo nimbei, "Ambomu, nani ulu temboma nunge kongono te molo. Nani ulu tembo waimu oi wendo naa oli," nimu.

<sup>5</sup> Yunge anumuni ulke pulu iyemunga kendemande imbonando nimbei, "Yuni enondo teaio nimbelo mele aku teko teaio!" nimu.

<sup>6</sup> Juda imbomani no lengendo mai mingi awili kite talo pakera akuna no kolko mondoringi. Mingimanga te te nimbe no 100 lita mele manda molorumu.

<sup>7</sup> Jisasini ulke pulu iyemunga kendemande imbonando nimbei, "Mingi kelo marenga no mare pungo kolkolio, andi mingi awili lemomanga munduko peko

tieio," nimu. Kano wali eno no mare kolko paa peko tiringi.

<sup>8</sup> Yuni enondo kelepa nimbeindo, "Olama liko mundukolio andi langi nokoli iyemu meko pungo tieio," nimu. Kano wali meko pungo yu tiringi.

<sup>9</sup> Kano langi nokoli iyemuni no wainimu nomba pilerimu nalo imbo nomu no wain ambe tepa apuwe lerimu ulu naa lipe manjirimu. Nalo kendemande no koloringimani nomu kanoko imbi tiringi. Langi nokoli iyemuni nomba pilipelie ambo limbei iyemundo owi nimbeline

<sup>10</sup> yundo nimbei, "Iyemani pali waliwaima no wain pengamu oi pulu polko tikolio, altoko imbomani no awini nongo pora tiko tinga naa pimele kano wali no keri mele lelima tirimele. Nalo nuni no wain pengamu anjo noikolio altoko tirino, paa manda tirinoya," nimu.

<sup>11</sup> I Jisasini kombu Galili tukundo lerimu ulke kombu Kana terimu ulumupe ulu enge nilima tembaindo imu pulu polopa terimu. Aku tepalie, yu Gotenga enge peli iyemu imbonando lipe ondorumu. Aku wali yunge lombili andolimani Yu paimbo Goteni lipe mundurumu iyemu ltemo ningyo yu ipuki tiringi.

<sup>12</sup> Iye ambo limbeimunga langi nongo pora tikolio Jisas kinye anumu kinye angenupili kape lombili andolima kinye ulke kombu Kapernaeam pungolio, akuna wali pokore moloringi.

*Gote popo toko kaloli ulke tempelena bisnis teko moloringi iyema Jisasini topa makororumu*

<sup>13</sup> Juda imbomanga Pasova ningyo wai awili akumu nondopa ombai orumu wali Jisas Jerusalem kombundo olando purumu.

<sup>14</sup> Gote popo toko melema kaloringi ulke tempel akuna tukundo pumbe kanorumu wali kongi pirimu kao koinjoma kinye kongi sipsip koinjoma kinye kera imili koinjoma kinye kou mone liko bisnis teringi imboma kape, kou mone alowa teringi imboma kape akuna tukundo aku teringi uluma kanopalie,

<sup>15</sup> ka mare lipe lakopalie kano ka pultemuni kongima pali ulke tempelena topa makoropa pena pena tepe, kou alowa teringi imbomanga kou mone walena perimuma lipe ondopa enonga kou noiringi poloma lipe topa bililala tipelie,

<sup>16</sup> kera mondoko tarepo teringi imbonando nimbei "I Aranga ulkena tarepo naa toko i melema wendo uwa ningyo, meko baio! I Aranga ulkena tarepo toko kombu naa wamaio," nimu.

<sup>17</sup> Yuni aku terimu ulu kanokolio yunge lombili andoli iyemani Gotenga

Bukumunga tukundo peremo ungu te konopuna pileringi. Aku i tepa,  
Nunge ulkemu penga tepa angilipili nimbo-  
lio mindili noro, (Sng  
69:9)

nimbe peremo.

<sup>18</sup> Aku terimu wali Juda iye awilimani yundo ningei, "Nu imbi ambelemu likolio aku ulu terenoya? Goteni tewi nimu lemo Goteni teremo mele ulu enge nili te lino kanamili tewi!" ningi.

<sup>19</sup> Jisasini topondopa nimbei, "Enoni i ulke tempelemu tekiringe wali nani wali talo wali takopolio yupoko tipemunga pora timbo," nimu.

<sup>20</sup> Pilkolio Juda iye awilimani ningeindo, "I ulke tempelemu poinye 40 ombo pumbe kelepa poinye kite talo pakera ombo purumu wali takoko ltingi kanomu. Altoko nuni wali talo wali takopolio yupoko tipemunga pora timbo ninoya?" ningi.

<sup>21</sup> Nalo yuni ulke tempelemu nimu akumu yunge kangimundo nimu.

<sup>22</sup> Altoko Jisas kolopa wali talo ono kombuna pepa yupoko tipemunga makilipe koinjo molorumu wali yunge lombili andolimani yuni oi ulke tempelemundo nimu ungumu liko manjiringi. Pilkolio Gotenga Bukumunga moromo ungumu kinye Jisasini nimu ungu talo paimbo ungumu lepamo ningo pileringi.

*Jisasini imboma pali teko moloringi ulu lipe manjirimu ungumu*

<sup>23</sup> Pasova Langi Noringi Walimanga Jisas Jerusalem molopalie imbomani yuni ulu enge nili terimuma kanokolio Yu paimbo Gotenga Malo lepamo ningo yu ipuki tiringi.

<sup>24-25</sup> Nalo Jisasini imboma pali teko moloringi ulu lipe manjipelie imbomanga konopu mandopa ltemele imbo teni yu lipe ondopili ungu naa nili yu yunu akuma pali pilipe molorumu. Enoni ningo pileringi mele yuni konopuna pilipelie, eno kinye we wakulu tipo molambo ungu naa nimu.

### 3

*Jisas kinye Nikodemus talo ningili ungumu*

<sup>1</sup> Juda imbomanga iye mare Farisima ningo moloringi. Aku iye Farisimanga iye te, imbi Nikodemus, yu Juda imboma nokorumu kaunsil iye te,

<sup>2</sup> yu Jisas molorumuna ipu leli ombalie nimumuni, yundo nimbeindo, "Ungu Mane Tilimu, nu Gote peya molkolio ungu mane tinindo orunu nimbo pimolo. Iye te Gote kinye naa molkanje Goteni ulu enge nili teremo mele nuni terenoaku tepa yuni manda naa telka nimbo pimolo," nimu.

<sup>3</sup> Jisasini topondopa yundo nimbeindo, "Nani nundo paimbo nimbo tiro. Imbore kelko naa menge lemo kano imbomuni Goteni iye nomi kingimu molopa kombu nokoromo kombumu manda naa kanopa yunge imbo manda naa molombalo," nimu.

<sup>4</sup> Nikodemusini yundo nimbeindo, "Imbo te anda lepa moromo kinye yu ambe teko mengeya? Yu anumunga olona altopa manda tuku pumbelo, anumuni yu kelepa manda membaloya?" nimu.

<sup>5</sup> Jisasini topondopa nimbeindo, "Nani nu paimbo nimbo tiro. Imbore nomuni kape Minimuni kape naa mengili lemo aku imboni Gotenga bakulu naa molopa Gote iye nomi King molopa nokoromo kombuna tuku manda naa pumbelo, molo.

<sup>6</sup> Mele kangimuni merimu mele, akumu kangimu yu maina molombalo meleme kau. Mele Gotenga Minimuni merimu mele akumu minimu aku meleme kau Gote moromona manda pumbe molombalo.

<sup>7</sup> Akumunga nani nundo nimboindo, Gote iye nomi kingimu molopa nokoromo kombuna pamili ninge imboma pali oi altoko meangei niomundo konopu awini naa lewi!

<sup>8</sup> Poporomemu yunu pilipe kombu lupe lupemanga toromo kinye enoni yunge ungumu pilko, melema lopelape teremo karomele, nalo yu naa kanoko yu wendo oromona kape purumona kape naa karomele. Gotenga Minimu aku tepala. Mini Kake Telimuni meremo imboma mini koinjo pupili eno paa imbo lupe mele moromele imbomani karomele, nalo Gotenga Minimuni kano imboma mini koinjoma tirimo kano Minimu naa karomele," nimu.

<sup>9</sup> Nikodemusini yundo nimbeindo, "I uluma ambe tepa wendo oromoya?" nimu.

<sup>10</sup> Jisasini yundo nimbeindo, "Nu Israel imbomanga ungu mane tili iye te nalo i nio mele naa piltino lepamo.

<sup>11</sup> Nani nundo i tepo paimbo nimbo tiro, Lino pimolomando nimolo, karomolomando nimbo tirimolo. Nalo i ungu nimolo unguma enoni pali pilko limele imbo te molo.

<sup>12</sup> Ya mai kombuna uluma eno nimbo tiro kinye enoni kolo toromonje ningo pimelemunga pele kinye mulu kombuna uluma nimbo tindu lemo paimbo nimu ningo ambe teko manda pilingeya? Manda naa pilinge lemo.

<sup>13</sup> Imbo tendekure kape olando tiko mulu kombuna tuku naa puringi. Iye tendekumu kau, mulu kombuna mainyendo tipe orumu iyemu kau oi mulu kombuna molorumu. Yu Iyemunga Malo.

<sup>14</sup> Oi Mosesini imbo naa peli kombu kuna kongki ka waimbe kapani telimu lipe ola uku

topa panjirimu aku teko mele imbomani Iyemunga Malo liko ola uku toko panjinge.

<sup>15</sup> Aku wali, oi imbo waimbemani nongo kondoringi kolongei teringi imbomani Mosesini lipe ola uku topa panjirimu waimbe kapani telimu kanokolio koinjo purungiaku mele kinye aku teko imbomani yumele mele na ulu pulu kerikerina konopuna peremomanga kombu kerina pumbo molopo naa kenjembo, Yuni na lipe tapondombalo ningopilkolio Iyemunga Malo liko ola uku toko panjingena kanonge wali, aku imboma pali molko kondoko kau pangei nimbe Goteni Malo unjo polopeyana ola uku toko panjengei nimu.

<sup>16</sup> Goteni maina imboma konopu paa pulumondopalie imboma kombu kerina naa pungo, waliwalima molko kondoko kau pangei nimbe yunge malo tendekumu kau molorumu nalo akumu maina imboma tirimu. Imboreni Yu ipuki timo lemo kombukerina naa pumbewaliwalima molopa kondopa kau pumbelo.

<sup>17</sup> Goteni Malondo nuni maina imboma kot pilko eno ka ulkena liko mundeni puwi ungu naa nimu. Nalo Maloni teremo ulumuni mai kombu imboma kombu kerina naa pangei nimbe tepalipili nimbe Goteni yukanopu lipe mundurumu.

<sup>18</sup> Malo ipuki tirimo imbomu yunge kot naa pembalo, molo. Nalo ipuki naa tili imbomu, yunge kotemu oi wendo orumu. Kano imbomuni Gotenga Malo tendekumu kau moromo akumundo Gotenga Malo naa nimu. Ne kano imbomu kot pimo iyemuni lipe kot tendepa yu kolopili nimbe koro oikot pilipe pora tirimu.

<sup>19</sup> Kotemunga ungu pulumu i tepa: Pa telimu maina wendo orumu nalo maina imbomani ulu pulu kerima kau tekolio pa telimu konopu naa mondoko tumbulu tolimu kau konopu mendoromele.

<sup>20</sup> Imbo ulu pulu kerima teremelemani pa telimu kanoko keri pilkolio, pa telimuni nanga uluma mona ltendembalo ningopatelimunga wendo naa oromele.

<sup>21</sup> Nalo imbo ulu paimboma teremo imbomuni Goteni na lipe taporomona i ulu pulu paimboma tero kani tero uluma imbomani kanangei nimbe pana wendo oromo,” nimu.

*Imbo No Ltindili Jononi Jisas molorumu  
mele nimbe tirimu*

<sup>22</sup> Altopa Jisas kinyeyunge lombili andoli iyema kinye Judia distrik kombu tengapungolio ningimuni, akuna wali mare yueno kinye molkolio, yuni imboma no ltindirimu.

<sup>23</sup> Jon yu imboma no ltindipe molorumula. Ulke kombu Salim nondopa kombu Ainano awini omaba purumu kala Jon yuni

akuna imboma no ltindirimu. Imbo awini yu molorumuna no lingei oringi.

<sup>24</sup>(Jon yu iye nomi king Herotenika oinaa tipiliaku tepea molorumu.)

<sup>25</sup> Walite Jononga lombili andoli iyema kinye Juda iye te kinye nendo yando karayeteko ningolio, “Lino no ambe tepolemolo kinye Goteni lino kake tembalo kanombaloya?” ningonigi.

<sup>26</sup> Altopa Jononga lombili andolima Jon yu molorumuna ongolio ningeindo, “Ungu Mane Tilimu, iye te no Jordan nekondo nupeya moloringili kinyenunyu moromo mele ningotirimu kano iyemuni imbo no ltindipe moromona imbo awini purumele,” ningi.

<sup>27</sup> Aku ningi ungu pilipelie Jononi topodopa nimbeindo, “Mulu kombuna Goteni iye te ulu te tepili ungu naa nilkanje akuyemuni manda naa telka.

<sup>28</sup> Nani eno oi nimbo tiru pileringimele i tepa: Nani nimboindo, na iye Kraist molo, Goteni na oikumbe lepa lipe mundurumu niu pileringikanomu.

<sup>29</sup>Iye ambo limbeimunga ambomu yunge kau. Iye ambo limbei iyemunga pulu lembariyemuni ambo limbei iyemuni ungu nimblele mele pilimbeindo komutendepabolombalo. Yunge ungumupilipelie paa tonokolombalo. Akumunga iyemu kinyepulu lembalo iyemu konoputimbelo mele naaku tepokamukumu tonokolto. Ambo limbei iyemu olandopa, yunge pulu litemoyemuyu kinyewe taputopamoromo, akuyemua manyendopa.

<sup>30</sup>Aku tepe mele neya no ltindipe moromo iyemu yunge imbimupaimbopaa olandopapumbelo. Nanga imbimupaa manyepumbelo.

<sup>31</sup>Iye wi ola molopalie manyendo orumu iyemu imbomanga pali yu olandopamu. Lino maina imbo moromoloma mainamelemanga kau molopo mainamelemanga kau imbima nimbo tipotemanetoromolo. Lino manyendopa, mulukombuna molopalie manye orumu iyemu yuimbomanga pali olandopa.

<sup>32</sup>Yuni mulukombuna kanopapilerimu mele nimbetirimo nalo imbomani koltotoromo ningolikotui tiko naa pimele.

<sup>33</sup>Imbo teniyungeungumupilipe lipe paimbonimuninimbeimbomuniaku tepe Gotenipaimbonimoni nimbelola.

<sup>34</sup>I Goteni lipe mundurumu iyemu Gote yunge Minimu paa awili tepe tirimokonopuna pepama teremo kani yuni Gotenga ungumutumbitipe nimo.

<sup>35</sup>Lapani Malo konopu mondopalie melema pali Malonokopilinimbeitrimu.

<sup>36</sup>Imbo te Yu paimbonimu Yu paimbogotenga Malolitemoningeimbomawaliwalima koinjomolko kau punge. Nalo imbo

te Malo umbulu tiko yunge ungumu liko tui tiko naa pilinge imboma koinjo mololi ulu pulumu naa linge. Aku imboma kinye kape, pele kamukumu kape Goteni mindili lipe timbelo ulu pulumu eno kinye peremo," nimu.

## 4

*Jisas Samaria ambo te kinye ungu ningili*

<sup>1</sup> Juda imbonanga iye nomi Farisimani ungu te pileringi mele i tepa, Jisas moromona imbo awini no ltindipili ningi purumele, Jon moromona imbo koltalo mele no ltindipili ningi purumele ningi ungumu pileringi.

<sup>2</sup> (Nalo Jisas yu lombili puringi imboma yuni no naa ltindirimu. Yunge lombili andoli iyemani imboma no ltindiringi.)

<sup>3</sup> Aku wali, Farisi iyemani temane akumu pileringi mele pilipelie Awilimuni kombu Judia distrik tiye kolopa kombu Galili distrikindo altopa pumbei purumu.

<sup>4</sup> Yu Galili pumbei aulke akumu kombu Samaria imunana lerimu.

<sup>5</sup> Aulkemu aku tepa lerimuna yu Samaria ulke kombu tengah orumu, aku taunomunga imbumu Sikar. Aku kombumu lino Juda imbonanga ara kaue Jekoponi yunge malo Josep tirimu maimungu nondopa lerimu.

<sup>6</sup> Jekoponi no molopili nimbe muru akurumu aku no mongolumu kano kombu Sikar lerimu. Jisas aulke tuluena orumumunga tiye terimuna aku no kulendona omaba mainye molopa mulu pilerimu. Kombu awi tangoli mele akuna omaba molorumu.

<sup>7-8</sup> Jisas yu lombili andoli iye waye oringima yu mulu pilipe molopili eno langi topo toko lingindo Sikar taunona puringi. Pele yu mulu pilipe molorumu wali Samaria ambo te no kolombaindo orumu kinye Jisasini yundo nimbei "No te namboi tiwi!" nimu.

<sup>9</sup> Samaria ambomuni yundo nimbei, "Nu Juda iyemu. Na Samaria ambomu. Ambe temona nando no tiwi ninoya?" nimu. (Aku nimumunga ungu pulumu i tepa: Juda imbonani Samaria imboma kanoko keri pilko langi tendekumu moke teko naa nongo, eno kinye tendekuna kopu teko naa andoringi aku ungundo nimu.)

<sup>10</sup> Jisasini topondopalie ambomundo nimbei, "Goteni meleme we tirimo mele liko manjiko, i iye no tiwi nimu iyemu kanoko imbi tilinanje yundo no tiwi nilino kinye yuni koinjo molopa kau puli nomu nu tilka," nimu.

<sup>11</sup> Ambomuni topondopa nimbei, "Awilimu, nu no koloni mungi te naa menio. No muruna paa mainye moromo. I no koinjo molopa kau puli nino nomu nuni tena kolkolio tinioya?

<sup>12</sup> Linonga kaue i no mongolu tirimu iye Jekop, yu kinye yunge bakuluma kinye yunge ari tirimelema kinye i nomu noringi, kano iyemu mainyendopa nu olandopa ningi ninoya?" nimu.

<sup>13</sup> Jisasini topondopa nimbei, "I no mongoluna no nongei imboma altopa no wali kolonge,

<sup>14</sup> nalo nani no timbo nonge imboma altoko eno no wali naa kolonge. Paimbo nio, nani no timbona nonge imbomanga konopuna no akupe pikopiko nimbe kau molopa, koinjo molko kau punge ulu pulumu timbelo," nimu.

<sup>15</sup> Jisasini ungu iko torumu mele naa pilipelie nimumuni, ambomuni yundo nimbei, "Awilimu, na altopa no wali naa tepili, ya altopo takiraki'ombo no naa kolambo kani nuni no ninomu nambo twi!" nimu.

<sup>16</sup> Jisasini yundo nimbei, "Nunge iyemu waye wangili, pungo lipuwil!" nimu.

<sup>17</sup> Ambomuni topondopa nimbei, "Nanga iye te naa moromo," nimu. Jisasini nimbei, "Nunge iye te naa moromo ninomu paimbo nino.

<sup>18</sup> Oi nu iye kite pakera purunu. Kinye nu iye te peya perembelemu nunge omena molo. Nuni kinye ungu ninomu paimbo nino," nimu.

<sup>19</sup> Ambomuni yundo nimbei, "Awilimu, na lipo manjiro, nu Gotenga iye profet te lepamo.

<sup>20</sup> Linonga ara kaueni i mulu kembona Gote popo toko kapi ningi nalo eno Juda imbonani ningei, Gote popo toko kapi ninge kombumu paa Jerusalem kau, nimele," nimu.

<sup>21</sup> Jisasini enge nimbe nimbei, "Ambomu, nani nio ungumu pilko lieni! Wai te wendo ombalo aku walimunga i mai pangina kape Jerusalem kape imbomani Lapa popo toko kapi naa ninge. Eno Samaria imbomani popo toko kapi nimele iyemu pilko tunduko we nimele.

<sup>22</sup> Nalo Goteni imbonanga kolopa tukundo limbei iyemu Juda imbonanga talape wendo ombalo nimumuni lino Juda imbonani Gote paa lipo manjipolio popo topo kapi nimolo.

<sup>23</sup> Nalo wai te wendo ombai pereremo kinye wendo oromo. Gote tumbi tiko popo toromele imbomani ulu tukume toya toko Mini Kake Teli enge tirimomuni Ara kapi ningi popo toromele. Imbo aku tepama Arani konopu mondoromo.

<sup>24</sup> Gote yu minimu, akumunga yu popo toko kapi ninge imbomani yunge Minimuni enge tirimomunga ulu tengena tukume pembalo," nimu.

<sup>25</sup> Ambomuni nimbei, "Iye nomi Mesaia ombalo. Yu ombalie ungumunga puluma

pali lino wamba nimbe timbelo," nimu. (Hibru unguna Mesaia ningi akumu, Grik unguna Kraist ningi aku ungu talonga pulumu tendekumu. Ungu talonga pulumu i tepe, Goteni lino maina imboma nokopili iye lipo mundumbo nimbe panjirimu.)

<sup>26</sup> Aku wali Jisasini enge nimbe nimbei, "Akumupe na. Ombalo ningi iyemu kinye nu kinye i ungu nimbolo," nimu.

<sup>27</sup> Yu aku nimbe molopili yunge lombili andoli iyema kelko yando ongolio ningimuni, yu ambo te kinye ungu ningi moloringilina kanokolio konopu awini liko munduringi. Nalo iye teni 'Nu ambele mele lini terenoya?' molo 'Ambomu kinye ambe temona ungu ningi morombeleya?' ningi teni kape naa waliko pileringi.

<sup>28</sup> Aku wali ambo kanomu yunge no mingimu tiye kolopa yu altopa kombu taunona nendo pumbelie imbomando nimbei,

<sup>29</sup> "Na ulu teruma pali iye teni na nimbe timo iyemu eno ongo kanaio! Goteni lino nokombalo iye te lipo mundumbo nimu iye Kraist akumu yunje?" nimu.

<sup>30</sup> Aku nimu ungumu pilkolio imboma taun tiye kolko Jisas molorumuna ongei oringi.

<sup>31</sup> Aku teko molangei yunge lombili andolimani yu topope tikolio ningi, "Ungu Mane Tilimu, langi te nowi," ningi.

<sup>32</sup> Nalo yuni enondo nimbei, "Na langi nombolu ltemo, nalo akumu eno naa pilko naa karomele," nimu.

<sup>33</sup> Aku nimu ungu pilkolio yunge lombili andolimani nendo yando ningolio ningi, "Imbo teni langi oi mepa omba timonje?" ningi.

<sup>34</sup> Jisasini nimbei, "Nanga langi i tepe, Na kongono tepuwi nimbe lipe mundurumu iyemuni konopu mendoromo uluma tepe, yunge kongonomu tepo pora timbo. Akumu nanga langimu.

<sup>35</sup> Enoni oli kite omba pumbelo wali rais wit nowi lembalo, inie topo lipo noimolo nimele kanomu. Nalo nani enondo poinyema kanaio nio! Poinyena langi pali koro nowi ltemo.

<sup>36</sup> Langima lepa kau pupili nimbe inie tondopa noirimo iyemu yunge kongonomunga mele pundu toko tiringima limbelo. Aku tenderemomunga poinye tepa langi panjirimu iyemu kinye langi inie tondoromo iyemu kinye waye talo tono kolongele.

<sup>37</sup> Akumunga iye teni langi imbo panjirimo, teni langi inie toromo nimele ungumu paimbo.

<sup>38</sup> Langi enoni imbo naa panjiringima nani eno inie topaio nimbo lipo munduru. Imbo lupemani poinye mindili nongo

teringi, nalo imbo lupemani teringi langima eno inie toromele," nimu.

<sup>39</sup> Ambomuni na ulu teruma pali yuni nimbe tirimo nimu ungu pilkolio taunona moloringi Samaria imbo awini Jisas paimbo iye Kraist ningi ipuki tiringi.

<sup>40</sup> Akumunga Samaria imboma Jisas molorumuna ongolio, nu lino kinye kolte molamili ningi. Aku ungu pilipelie kano imboma kinye wali talo molorumu.

<sup>41</sup> Moloringi wali imbo awini yuni nimu unguma pilkolio yu paimbo iye Kraist ningi pileringila.

<sup>42</sup> Enoni ambomundo ningi, "Nuni oi ungu niniomu pilipo yu paimbo iye Kraist nimbo pilimolo nalo kinye lino linonganu yunge ungumu pilipolio paimbo, Gote mai kombu imboma tukundo lipe tepe koinjo mundurumo iyemu ltemo nimbo pimolo," ningi.

*Jisas Kombu Galili distrik kelepa pumbelite, iye nomi kingimunga kongono tendeli iye awili tengateng malo tepe koinjo ltimu ungumu*

<sup>43</sup> Samaria imboma kinye wali talo molopalie Jisas eno tiye kolopa kombu Galili distrik pumbrei purumu.

<sup>44</sup> Galili Jisas yunge pulu kombumu. Oi walite Jisas yuni nimbei, "Gotenga iye profet moromomunga kombu puluna moromele imbomani yu wale naa pakoromele," nimu.

<sup>45</sup> Oi Juda imboma Pasova Pileringi Waimu wendo orumu wali Galili imboma Jerusalem pungo molangei yuni akuna ulu enge nili mare terimuna kanoringimunga enoni yu Galili kombu tukundo orumu kanokolio wali paa orono ningi tono kolko panjiko ltingi.

<sup>46</sup> Jisas Galili distrik pumbelie altopa ulke kombu Kana tukundo orumu. Kano ulke kombumunga oi yuni imbo no koloringima no wain apuwe ltenderimu. Ulke kombu Kaperneam iye nomi kingimunga kongono tendeli iye awili te molorumu,aku iyemunga malo kuro awili te torumu.

<sup>47</sup> Jisas Judia kombu tiye kolopa Galili kombu tukundo orumu ungumu pilipelie aku iyemuni, Jisas molorumuna pumbelie nimumuni, yundo konge tepalie nimbei, "Nanga ungulumu winjo lie mendo lie teremo kani mainyendo ongo yu teko koinjo liwi," nimu.

<sup>48</sup> Aku nimu ungu pilipelie Jisasini yundo nimbei, "Ulu enge nili te naa kanokoliope na ipuki naa tinge ltemo," nimu.

<sup>49</sup> Kingimunga kongono tendeli iye awili muni yundo nimbei, "Awilimu, nanga ungulumu nomi ka akumbei teremo kani nu welea maindo owl!" nimu.

<sup>50</sup> Jisasini yundo nimbei, "Marena koinjo pumbelo kani puwi!" nimu. Iyemuni Jisasini nimu ungu pilipelie paimbo nimo nimbe ipuki tipe yu purumu.

<sup>51</sup> Mainyendo pumbei purumu wali yunge kendemandema aulkena ongo yu mainyendo orumu kanoko likolio enoni yundo ningei, "Marena koinjo pumo," ningi.

<sup>52</sup> Aku wali yuni enondo nimbei, "Ena wai ambelemunga kuro pora nimoya?" nimbe walipe pilerimu. Enoni yundo ningei, "Olianga awi tangoli 1 klok mele kangina tipe tomomu pora nimo," ningi.

<sup>53</sup> Lapani pilipelie Jisasini marena koinjo pumbelo nimu kano enamunga kuro pora nimo lepamo nimbe pilipelie, yu kinye yunge ulke peringi imboma kinye akumanji Jisas ipuki tirringi.

<sup>54</sup> Judia distrik tiye kolopa Galili distrik ombo molopalie Jisasini ungulumu tepa koinjo ltimu ulumu aku kombuna ulu enge nili talo tipe terimu. Te oi walite aku kombuna imbo no koloringima no wain apuve ltenderimu kanomu.

## 5

*Jisasini iye te nomu Betesda tepa koinjo ltimu wali Juda iye awilimani Yu konopu keri panjiringi*

<sup>1</sup> Altopa walite, Juda imbomani poinymanga yaka ningko langi noromele wai awili te wendo orumu wali Jisas Jerusalem olando purumu.

<sup>2</sup> Jerusalem tukundo kongi sipsipimanga pape kere puluna nondopa, no mongolu te molorumu aku no mongolumundo Hibrunguna Betesda ningi, akuna ulke takai kite pakera angilipe makai terimu.

<sup>3</sup> Akuna kuro torumu imbo awini ainyembo leringi. Mongo keri lerimuma kape, kimbo keri lerimuma kape imbo poro topa kape ainyembo leringi. Nomu lope tembalu ningko nokoko moloringi.

<sup>4</sup> Walite walite nimbe Awilimunga ensel te mainye ombo nomu beumbue tirimu wali kuro ambele toli imbo te kumbe lepa nona tuku purumu imbomu koinjo purumu.

<sup>5</sup> Kuro torumu iye te akuna molopili poinye 38 ainyembo lerimu.

<sup>6</sup> Jisasini iyemu kelolina ainyembo lerimu ulumu ombo kanopalie, nimbei, "Nu kuro pora nipili konopu ltenoya?" nimu.

<sup>7</sup> Ainyembo lerimu iyemuni topondopa nimbei, "Awilimbu, no lope teremo wali imbo te na lipe tapondopa nona meli pumbelo te naa moromo. Na nanu pumboi tero wali imbo mare oi tultuku toko eno nona purumele," nimu.

<sup>8</sup> Aku tepe nimu wali Jisasini yundo nimbei, "Nu ola angilko nunge uru pereno kunumu liko meko puwi," nimu.

<sup>9</sup> Aku ungu nimu wali, walitikale iyemunga kuromu pora nimu kinye yu ola angilipe yunge kunumu lipe meli purumu. Iulu wendo orumu wali akumu Juda imbomanga koro moloringi wali sabat te,

<sup>10</sup> akumunga Juda iye awili marenikuro pora nimu iyemundo ningei, "Kinye Sabat walimunga ambe temona nunge kunumu meli andoronoya? Sabat wali melema naa meli andaio nimbe ungu mane te peremo kanomu," ningi.

<sup>11</sup> Nalo iyemuni topondopa nimbei, "Na tepe koinjo limo iyemuni nimbei, nunge kunumu liko ambili puwi, nimo," nimu.

<sup>12</sup> Aku nimumunga enoni yu altoko wali liko pilkolio ningei, "Iyepe narini aku ulu tewi nimoya?" ningi.

<sup>13</sup> Nalo kuro pora nimu iyemu oi ainyembo lerimu kombuna imbo awini moloringi akuna Jisas kiyengo nimbe purumomunga yuni kano iye narinje nimbe naa lipe manjirimu.

<sup>14</sup> Pele Jisasaku iyemu Gote popo toko melema kaloringi ulke tempelena kanopalie yundo nimbei, "Piliwi! Kinye nunge kuro pora nimo nu altoko koinjo morono kani nu ulu pulu kerima altoko naa tewi! Altoko tenio lemo nu ulu umbuni awili te wendo ombalo," nimu.

<sup>15</sup> Iye akumuni anjo pumbe Juda iye awilimando nimbei, "Na tepe koinjo limo kano iyemupe Jisas," nimu.

<sup>16</sup> Jisasini koro moloringi wai Sabatemungaaku tepe uluma terimuna Juda iye awilimani Jisas yu pulu polko tepo bumbo tiri-molo konopu lerangi.

<sup>17</sup> Jisasini enondo nimbei, "Arani imboma wali lipe taporomo mele kinye kapeaku tepe moromo. Nani kapeaku ulu tero," nimu.

<sup>18</sup> Yuniaku nimu ungu pilko Juda iye awilimani Jisas yu paa kamukumu topo kondamili konopu lerangi. Oi Sabat waimunga ungu manemu topa tangondorumumunga yu mumindili kolko molangei wali altopa Gote yunge Lapa nimumunga yu Gote none tenderemo nimbe nimumunga yu kamukumu mumindili kolko yu tongeiterangi.

*Goten Yunge Malo kongonoma manda tepeti nimbe imbi tirimu ungu*

<sup>19</sup> Jisasini enondo topondopa nimbei, "Nani eno i tepo paimbo nimbo tiro. Maloni yunu ulu te manda naa teremo. Yunge Lapani teremo mele kanopalie yuni kapeaku ulu teremo. Lapanga Malo lepalie Lapani teremo ulu teremo,aku tepalie

<sup>20</sup> Lapani Malo konopu mondopalie yuni teremo mele pali Malo lipe ondorumu. Iye tepe koinjo Itimo akumu mainyendopa. Paimbo altopa eno paa kanoko konopu awini liko mundunge ulu enge nili olan-dopama Lapani Malo lipe ondombalo.

<sup>21</sup> Akumu ambe tepe wendo ombaloya? Lapani imbo kololima topa makinjipelie koinjo molangei nimo mele aku tepe Maloni imbo kololima koinjo pangei konopu ltemo imboma tepe koinjo limbelo.

<sup>22-23</sup> I ulumunga liko manjengei: Imbomani Lapanga imbiwu ambolko ola mundurumele mele Malonga imbimu aku teko ambolko ola mundengei nimbe Lapani kot pilipe imboma naa apurupe kot pileli kongono akumu Malo tirimu. Akumunga imbomani Malonga imbimu ambolko ola naa mundurumele imbomani aku teko Malo yando lipe mundurumu Lapanga imbiwu kape ambolko ola naa mundurumele.

*Gotenga Maloni koinjo molopa kau puli ulu pulumu tirimo ungumu*

<sup>24</sup> Nani enondo i tepo paimbo nimbo tiro. Imbo nanga ungumu pilko, na lipe mundurumuna oru iyemu ipuki tirimele imboma koinjo molopa kau puli ulu pulumu eno kinye peremo. Altopa kot waimu wendo ombalo kinye eno kotena naa angilinge. Aku imboma kololi ulu pulumu tiye kolko koinjo molopa kau puli ulu pulumu eno kinye peremo.

<sup>25</sup> Nani enondo i tepo paimbo nimbo tiro. Wai wendo ombalomu, kinye oi wendo omo. Wai akumunga Gotenga Malo ungu nimoma kololi imboma pilinge. Yunge ungumu paimbo ningi pilko liko molonge imboma koinjo moloko kau punge.

<sup>26</sup> Koinjo mololi ulu pulumu Lapa kinye peremo meleaku tepe Lapani koinjo mololi ulu pulumu Malo kinye pepili nimu.

<sup>27</sup> Malo yu Iyemunga Malo moromomunga Lapani Malo imbomanga kot pilipili nimbe engemu tirimu.

<sup>28</sup> Nalo akumunga kau eno konopu awini kimbo tiko naa tiengei! Ambe telka, wali te wendo ombalo,aku walimunga imbo ono kombuna pereemelemani Malonga ungumu pilkolio ningemuni,

<sup>29</sup> ono kombumu tiye kolko wendo onge. Aku wali makilko koinjo molonge imbomanga oi maina koinjo molkolio teko kondoko moloringi imboma koinjo molonge, oi maina teko kenjiko moloringi imboma kotena angilkolio altoko mindili nonge.

<sup>30</sup> Na nanu ulu te manda naa tembo. Arani nimo mele pilipolio imbomanga kotema apurupo pio. Na nanu konopu tiembo nimbo uluma naa tepe, na lipe mundurumu iyemu konopu tipili nimbo

ulumula teromunga kot pilipo apurupo kondoro.

*Jisas molopa terimu kanoringi mele imbo mareniningo tiringi ungumu*

<sup>31</sup> Paimbo na molopo tero mele na nanu nimbo tindu lemo imbomani aku nio ungumu ipuki naa tinge.

<sup>32</sup> Iye teni kape na molopo tero mele nimbe tirimo, akumu nando paimbo nimo lipo manjiro.

<sup>33</sup> Enoni iye mare Jon molorumuna paio ningo liko munduringi wali yuni na molopo tero mele paimbo nimbe tirimu.

<sup>34</sup> Maina imbo teni na molopo tero mele imboma nimbe tipe paimbo nimu, paimbo aku tepe moromo nimo lemo na konopu awini lipo naa mundupu, ulure molo konopu lteo, nalo Goteni eno tepe lipili nimbo Jononi nando nimu mele eno nimbo tiro.

<sup>35</sup> Jononi kongono terimumu kiye mele nomba imboma pa tenderimu. Aku wali alaye kolo eno kano pa tenderimuna konopu tiko moloringi.

<sup>36</sup> Nalo Jononi na lipe tapondopa na molopo tero mele eno nimbe tirimu mele mainyendopa. Ulu te na molopo tero mele lipe tapondopa lipe ondoromo mele olan-dopa. Aku i tepe: Arani ulu enge nili teko pora tieni nimbe na tirimu ulu enge nili tero akumani na lipe tapondopa, Arani na puwi nimbe lipe mundurumu mele eno lipe ondoromo.

<sup>37</sup> Na puwi nimbe lipe mundurumuna oru kinye na molopo tero mele Arani kape nimbe tirimu. Enoni yunge ungu nimuma walite kape komomuni naa pilko, yunge kumbekeremu mongoni naa kanoringi.

<sup>38</sup> Arani lipe mundurumu iyemunga ungumu ipuki naa tirimelemunga lapanga ungumu enonga konopumanga naa peremo.

<sup>39</sup> Gotenga Bukuna ungu moromomani lino waliwalima koinjo molopo kau pumolo ulu pulumu timbelo ningi ainye meko karomele. Aku ainye meko karomele Buku-muni nanga nimbe para tindipe na moro mele nimbe tirimo,

<sup>40</sup> nalo koinjo molopo kau pumolo ulu pulumu liemili naa ningi, na morona naa omolo ningi ainye naa meremele.

<sup>41</sup> Imbomani na kapi ningi nanga imbi ambolko ola mundunge nimbolio aku ulu naa tero.

<sup>42</sup> Nalo enoaku teko naa moromele. Nani eno lipo manjipolio, enoni Gote konopu mondoli ulumu eno kinye naa peremo.

<sup>43</sup> Nanga Arani na imbi tipe yunge kongonomu tendepuwi nimbe na lipe mundurumuna oru nalo nanga ungumu eno naa pilko ltimele. Nalo imbo teni

yunu imbi lipe ombo kongono telkanje aku imbomunga ungumu pilko lilimala.

<sup>44</sup> Eno enongan nendo yando imbi molopili ningi, Gote tendeku kau momomo akumuni enonga imbi lipe ola mundundupili naa nimele, aku lemo na molopo tero mele nimbo tiro ungumu paimbo nimu ningi ambe teko pilingeya?

<sup>45</sup> Nalo Gotenga kot waimu wendo ombalo wali Arani kot pilipe molopili nani kau kot tendembalo konopu naa leao! Mosesini eno lipe tapondombalo konopu ltemele iyemuni enonga kot tendembalo.

<sup>46</sup> Mosesini na ombo molombo mele buk torumuna enoni Mosesini nimu unguma paimbo nimu ningi pilimalanje nanga ungumu kape paimbo nimu ningi pilimala.

<sup>47</sup> Nalo yuni nanga temane bukuna torumumu paimbo nimu ningi naa pimelemunga nanga ungu niomu paimbo nimu ningi ambe teko pilingeya?" nimbe Jisasini nimu.

## 6

*Langi naa lerimu kombuna Jisasini ambo bakuluma kinye iye 5,000 kinye langi tirimu ungumu*

<sup>1</sup> Altopa walite Jisas Nomu Galili nona andoli sipina molopa nekondo purumu. Aku nomunga imbi te Nomu Taiberias ningi.

<sup>2</sup> Aku nomuna nekondo purumu wali kuro torumu imboma tepa koinjo ltimu ulumu kanokolio Goteni kau ulu enge nilima teremo mele yuni aku tepa teremo konopu lekolio imbo paa pulumu yu lombili puringi.

<sup>3</sup> Jisas kombu pangti te lerimuna ola pumbe lombili andolima peya pungo mainye moloringi.

<sup>4</sup> Israel imbomanga Pasova Wai Awili ningi poinyemanga yaka ningi orumumuaku waimu nondopa wendo ombai terimu.

<sup>5</sup> Jisas aku pangina ola molopa mainyendo tipe kanopalie imbo paa pulumu yu orumu aulkena lombili oringina kanorumu. Kanopalie yuni yu lombili andoli iye Filipondo nimbei, "I oromele imbomanga nongei langima tena topo topo ltindemili konopu ltenoya?" nimu.

<sup>6</sup> Jisas yuni tembai ulumu yuni pilipe molorumu nalo Filip yuni ambele ungu nimbelonje, nani ulu enge nili te tepolio manda langi timbo konopu lembalo molo we mini ltembalonje pilembo nimbele yuniaku tepa Filipondo walipe pilerimu.

<sup>7</sup> Filiponi yundo nimbei, "Imbore 200 kina melemunga langi topo topo limalanje imbo mare kau alaye kolte liko nolemala. Mare molo leka naa nolemala," nimo.

<sup>8</sup> Lombili andoli te Saimon Pitanga angenu Andru, yuni nimbei,

<sup>9</sup> "Ya ungulu te bali bret kaloli kelo kite pakera kinye oma kelo kaloli talo kinye noipe moromo. Nalo akumu koltalo, imbo paa awini. Manda naa tembalo lepamo," nimo.

<sup>10</sup> Jisasini imboma mainye molangei neio nimu. Aku kombuna era pulumu orumuna mainye moloringi. Iye 5,000 mele akuna mainye moloringi.

<sup>11</sup> Aku wali Jisasini bali plawa kalolima lipe ambolopalie Gotendo paa tereno nimbe imbo moloringima moke tepe eno manda nangei mele tirimu. Oma talo kau aku tepe moke terimu. Nongo olo tenderingi.

<sup>12</sup> Nongolio olo terimu wali yuni yu lombili andolimando nimbei, "Langi pundu lemoma we mainye pumbe lembalo manda naa tembalo kani liko maku taio!" nimu.

<sup>13</sup> Aku wali nongo pora tiringi kinye pundu lerimuma lombili andolimani liko maku toko wale basket 12 lakliko peko tiringi.

<sup>14</sup> Jisasini ulu enge nili akumu terimuna kanokolio imbomani pulu polko ningei, "Gotenga nimbe munduli ungu nili iye profet te mai kombuna ombo lino nokombalo ningi panjiringimu paimbo i iyemu yu lepamo," ningi.

<sup>15</sup> Eno ningi pilkolio yu enge ningi ambolko liko enonga kingimu molopili ningei tiringi. Aku tengenai tiringi ulu minyeko lipelie yuni molombaindo pangti kanona altopa olando pumbe molorumu.

*Jisas nomuna ola kimbo kambulupe andorum ungumu*

<sup>16</sup> Ena pe pumbe ipo kala torumu wali yu lombili andolima pangina mainyendo pungo nomu kulendona pungolio ningimuni,

<sup>17</sup> akuna nomuna andoli sip tenga tuku pungo nomunga yakondo ulke kombu Kaperneam ongo pungei puringi. Aku wali tumbulu torumu nalo Jisas naa orumu wali lombili andolima enongan puringi.

<sup>18</sup> Nomuna pungei puringi wali poporome enge nili torumu kinye no paa beumbeu keri lepa telipe orumu.

<sup>19</sup> Kelepa paloli none telimaninotukutiko kundungei sipimu nomu awi tukutingina purumu wali Jisas nomuna ola kimbo kongono tepe sipimu purumuna orumu. Yu orumu wali iyema kanokolio kuro te oromo konopu lekolio paa mini titingi.

<sup>20</sup> Nalo yuni enondo nimbei, "Na kau oro. Mini naa lteao!" nimu.

<sup>21</sup> Aku nimu ungu pilkolio "Awilimoruomo lepamo sipina peya molamili!" ningi enoni konopu tiko yu sipimunga tukundo ltingi. Tukundo orumu wali eno

pungei puringi nomu kulendona sipimu walitikale purumu.

*Imbomani Jisas andoko kororingi ungumu*

<sup>22</sup> Ipu leli oi imboma nomu kulendona nekondo ipu leli moloringima konopu kimbo tikolio ningimuni "Olianga ipu leli nomuna andoli sip tendeku kau ya lemo, Jisas akuna tuku naa pumo. Yunge ki tipi kanoli iyema enonganu akuna tuku pungo nomu kulendona nekondo punge," ningó pileringi.

<sup>23</sup> Aku wali olianga Awilimuni langi walo kolte lipe ambolopa Gotendo paa tereno nimbe imboma tirimu noringi kombuna nondopa ulke kombu Taiberias imbomanga sip mare nomu kulendona oringi.

*Jisasini ungu iko topa na mulu kombuna gaimu moro nimu ungumu*

<sup>24</sup> Jisasini langi tirimuna noringi kombuna imbomani Jisas yu korokolio ningimuni, yu kinye yu lombili andolima kinye akuna naa moloringi kanokolio sip eno moloringina nomu kulendona nondoko ongo leringimanga tuku pungo ulke kombu Kaperneam Jisas korongei purungi.

<sup>25</sup> Nomu nekondo ongo Jisas kanoko lendekekolio enoni yu waliko pilkolio ningei, "Ungu Mane Tilimu, nu te wali yando onioya?" ningi.

<sup>26</sup> Nalo yu orumu mele nimbe para naa tipelie topondopa enondo nimbei, "Nani enondo paimbo i tepo nimbo tiro. Na Gotenga ulu enge nilima teromunga enoni na naa kororomele. Nani eno langi tindu nongo olo tendenje kanomunga kau na kororomele lepamo.

<sup>27</sup> Eno langi nondopa pururumoma lipo nomolo ningó kongono naa teao! Nalo Iyemunga Maloni langi naa puruli lepa kau pupili timbeloma lipo namili ningó kau kongono teao. Aku langi nongollio koinjo molko kau punge. Iye akumuni paimbo kano langimu imboma timbelo ningó pilengei nimbe Goteni ulu enge nilima teremo mele aku iyemuni ulu enge nilimaaku tepe tepili nimbe Gote yuni Malo tirimu," nimu.

<sup>28</sup> Nimu ungu pilkolio i teko ningei, "Lino ambele ulumu tepolio Gotenga kongono nino akumu tendemoloya?" ningó waliko pileringi.

<sup>29</sup> Yuni topondopa nimbei, "Gotenga kongonomu i tepe: Goteni mai kombuna lipe mundurumu iyemu yu Gotenga malo, yu lino molopo kondopo kau pumolo ulu pulumu timbelo iyemu ningó ipuki tiko mo-lao!" nimu.

<sup>30</sup> Aku nimo ungu pilkolio enoni yundo waltindikolio ningei, "Nuni na paimbo Goteni lipe mundurumu ningono Goteni ulu enge nili teremo mele nuni aku teko ambele ulu te liko ondonioya! Ambele ulu teniona kanopolio nuni paimbo nino nimbo pilomonje?

<sup>31</sup> Linonga ara kae kame oi moloringima imbo naa peli kombuna langi mana norangi. Langi mana orumu mele Gotenga bukuna temanemu moromo,  
Yuni eno mulu kombuna yando langi nangei, (*Kis 16:4; Neh 9:15; Sng 78:24-25*)

nimbeline tirimu ungu akumu moromo. Nuni linonga aku teko tendani molo ambe tenioya?" ningi.

<sup>32</sup> Jisasini enondo nimbei, "Nani enondo i tepo paimbo nimbo tiro. Oi moloringi imboma mulu kombuna maindo langi tirimu iyemu Mosesire molo. Arani tirimu. Molko kondoko kau puli ulu pulu peremo langi nio kano paimbo langimu mulu kombuna yando tirimo iyemu Ara kau.

<sup>33</sup> Mulu kombuna mainye omba maina imboma koinjo molko kondoko kau punge langi tirimomu Goteni tirimo," nimu.

<sup>34</sup> Jisasini nimu ungu pilko tundukolio, "Awilimu, aku langimu lino waliwali tiwi!" ningi.

<sup>35</sup> Aku wali Jisasini enondo enge nimbe nimbei, "Molko kondoko kau punge langimu na. Na molombona onge imboma enge naa kolonge. Na ipuki tinge imboma altoko walite no wali naa kolonge.

<sup>36</sup> Aku tengi imboma aku teko molonge nalo enoni na Gotenga ulu enge nilima teremo, yu Goteni naa lipe mundurumu ningó na ipuki naa tirimele oinimbo tiru aku mele kinye kape aku teko we teremele.

<sup>37</sup> Arani Nanga imboma molangei nimbe kanopa ltimo imboma pali na molombona ongo na ipuki tinge. Aku wali na lombili andongeindo na molombona onge imboma tendekurendo kape lombili naa ongo anju puwi paa naa nimbo.

<sup>38</sup> Na nanu konopuna pilo mele teambo nimbo na mulu kombuna tiye kolopo maina mainyendo naa oru, molo. Na lipe mundurumumuni konopuna pimo mele tewi nimo ulu temboi oru.

<sup>39</sup> Na lipe mundurumu iyemuni konopu itemo mele i tepe: Na timbelo imboma pali nokopo kondopo, tendekure kape paa naa tiye kolopo, mai kombu pora nimbelo walimunga eno pali topa makinjipo olando limbo!

<sup>40</sup> Arani konopu itemo mele i tepe Malo kanoko imbi tinge imboma pali koinjo molko kau punge. Aku tengi imboma mai

kombu pora nimbelo walimunga nani topo makinjipo olando limbo," nimu.

<sup>41</sup> Jisasini na mulu kombuna mainyendo oru langimu nimu ungu pilkolio wali Juda iye awilimani yu mumindili kolko enongan kono kono ningolio

<sup>42</sup> ningei, "Aku ungu nimo iyemu Joseponga malo Jisas kau. Yunge anumu lapa talo karomolo kanomu. Altapa yu mulu kombuna molopo maina mainyendo oru nimoru ambe telka nimoya?" ningi.

<sup>43</sup> Jisasini nimbei, "Eno nendo yando kono kono naa neio!"

<sup>44</sup> Imbo tendekure kape na we manda naa lombili onge. Na lipe mundurumu Arani konopundo tope tirimo imboma kau na lombili oromele. Na morona ongo ipuki tirimele imboma kombu pora nimbelo walimunga nani topo makinjipo olando limbo.

<sup>45</sup> Gotenga nimbe munduli ungu nili profet iyemanga bukuna moromo ungu te i tepa,  
Goteni imboma pali ungu mane timbelo,

(Ais 54:13)

ningo toringi bukuna aku tepa moromo. Arani nimo mele pilkolio aku ungumunga puluma pilko ltmele imboma pali na morona oromele.

<sup>46</sup> Mai kombuna imbooreni kape Ara naa kanoringi, naa karomele. Imbo tendekumuni kau yu kanorumu. Lapa kinye molopalie mainye orumu iyemuni kau yu kanorumu.

<sup>47</sup> Nani enondo i tepo paimbo nimbo tiro. Na ipuki tirimele imboma koinjo molko kondoko kau punge ulu pulumu eno kinye peremo.

<sup>48</sup> Koinjo molko kondoko kau punge langimu, na.

<sup>49</sup> Enonga lanieli kolenalenimbo naa peli kombuna langi mana norangi nalo alto koloringi.

<sup>50</sup> Nalo mulu kombu tiye kolopa mainyendo omo langi ltemo akumu nongei imboma te naa kolonge.

<sup>51</sup> Langimundo i nio. Pora naa nimbe we lepa kau puli langimu, akuna tuku molko kondoko kau puli ulu pulumu peremo langimu, akumu mulu kombuna mainyendo orumu langimu, na. Imbo teni langi akumu nomo lemo, yu koinjo molopa kau pumbelo. Aku langimu, nanga kangimu. Mai kombuna imboma pali molko kondoko kau pangei nimbo nani nanga kangimu enonga langi timbo," nimu.

<sup>52</sup> Jisasiniaku nimu ungu pilko tunduko imbonani ungu mele nale tekolio ningei, "I iyemuni lino yu naio nimo kani yuni lino ambe tepa timbei nimoya?" ningi.

<sup>53</sup> Jisasini enondo nimbei, "Nani enondo ungu paimbo i tepo nimbo tiro. Enoni Iyemunga Malonga kangimu naa nongo yunge

mememu naa nongei lemo molko kondoko kau puli ulu pulumu eno kinye manda naa pembalo.

<sup>54-55</sup> Nanga kangimu paimbo langimu, nanga mememu paimbo nomu akumunga nanga kangimu kinye mememu talo nongei imboma waliwalima molko kondoko kau punge ulu pulumu eno kinye peremo. Kano imboma mai kombu pora nimbelo walimunga nani topo makinjipo olando limbo.

<sup>56</sup> Nanga kangimu kinye mememu talo noromele imboma eno na kinye kopu teko moromele, na eno kinye kopu tepo moro.

<sup>57</sup> Molopa kau purumo Arani na lipe mundurumu, yuni na molko kau pani nimuna molopo kau puro, aku tero mele na nongei imboma molko kau pangei nimbo, aku wali eno pali molko kau punge.

<sup>58</sup> Aku langimu mulu kombuna mainyendo orumu langimu. Linonga oi anda kolepale moloringimani langi mana nongolio kolonge waima wendo orumu wali koloringi, nalo kinye orumu langimu nongei imboma waliwalima koinjo molko kondoko kau punge," nimu.

<sup>59</sup> Juda imboma makutoko Gotenga ungu pileringi ulke te, ulke kombu Kaperneam angilerimu, akuna tuku Jisasini imboma ungu mane tipe aku unguma nimu.

#### *Imboma koinjo molko kondongemunga puluma Jisasini nimu ungumu*

<sup>60</sup> Jisasini yu nongei nimu ungumu pilkolio Jisas lombili andoringi imbo awini ningei, "Imbomu keke lepo topa kolomo. Narini yunge ungu manda pilipe limbeloya? Lino naa piltimolo," ningi.

<sup>61</sup> Yu lombili andoringi imboma yu nimu ungu keri konopu lekolio nendo yando kono kono ningo tomboloringina Jisasini pilipelie nimumuni yuni nimbei, "I ungumunga eno konopu keri itemeleya?

<sup>62</sup> Walite Iyemunga Malo oi molorumuna altopa olando pumbelo kanonge lemo konopu ambelemu lengeya? Kamukumu mudindili kolongenje?

<sup>63</sup> Mini Kake Telimuni koinjo molko kau puli ulu pulumu tirimo; kangimuni koinjo molko punge ulure naa tirimo. Nanga nio ungumu Mini Kake Teli tirimo kani aku ungumuni eno koinjo molko kau puli ulu pulumu tirimo.

<sup>64</sup> Nalo eno moromele imbo mareninani kolo toromo konopu itemele," nimu. Imbo mareniyu ipuki naa tirimelema oi lipe manjirimu. Jisas yu yunge opa pulema lipe timbelo iyemu oi kape lipe manjirimu. Akumunga eno mareninakolotorokonopu itemele nimu.

<sup>65</sup> Aku nilipe pumbelienimbei, "Eno mareninakolotorokonopu itemele nimu.

Arani na morona paio ungu naa nimo imboma na morona manda naa ongo, na ipuki manda naa tiko andonge oi nimbo tindu kanomu," nimu.

<sup>66</sup> Aku ungu nimu waliyu lombili andoringi imbo awini yuni nimu mele pilko konopu keri lekolio yu tiye kolko umbulu tiko altoko yu lombili naa puringi.

<sup>67</sup> Yu tiye koloringi wali yunge ki tipi kanoli 12, iye akumando yuni walipe pilipelie nimbei, "Eno kape na tiye kolopo anjo pamili konopu ltemeleya?" nimu.

<sup>68</sup> Saimon Pitani topondopa nimbei, "Awilimu nari moromona pumoloya? Koinjo molopo kondopo kau pumolo unguma nu kinye peremo.

<sup>69</sup> Lino lipo manjipo nu Gotenga Kake Teli Iye mendepolomu nimbo ipuki tirimolo," nimu.

<sup>70</sup> Jisasini topondopa nimbei, "Nani nanu eno iye 12 akumando pali na lombili waio niu nalo enonga iye te kuromanga nomi Satanenga kuro te mele moromo," nimu.

<sup>71</sup> Aku nimumu Saimon Iskariot malo Judasini tembalo ulu lipe manjipelie nimu. Judas Iskariot yu eno iye 12 akumanga iye te nalo yuni altopa Jisas lipe yunge opa pulemanga kindo tirimuna toringi.

## 7

*Jisasinga angenupili yu ipuki naa tiringi ungumu*

<sup>1</sup> Altopa walite Jisas kombu Galili distrik andopa molorumu. Juda iye awili kombu Judia distrik moloringimani yu tongei nokoko moloringimunga pilipelie yu kelepa Judia naa pumbo nimbe anjo molorumu.

<sup>2</sup> Nalo Juda imbomani oi imbo naa peli kombuna sel ulke takoko peringi walimu liko manjiringi wai awilima nondopa wendo ombai terimu wali

<sup>3</sup> Jisas yunge angenupilini ningei, "Nuni ulu enge nilima tereno mele nu lombili andormele imboma kanangei ningi nu ya i kombu tiye kolko Judiando pani konopu itemolo.

<sup>4</sup> Imbo teni yu kongono tepa moromo mele pilko yu kanoko imbi tiengei nimbe uluma lopeke tepa naa teremo. Akumunga nuaku uluma paimbo tereno lemo imbonani pali kanangei pungo tepuwil!" ningi.

<sup>5</sup> Jisas yunge angenupilini kape Jisas yu Goteni lipe mundurumuna orumu iyemu ningi naa liko manjikolio aku teko ningi.

<sup>6</sup> Aku ningimunga Jisasini nimbei, "Nanga waimu oi wendo naa oli. Nalo enonga waimu we itemo.

<sup>7</sup> Mai kombu imbomani eno kinye konopu keri naa panjirimele nalo nani

imbomando ulu teremelema tekokjerimele niomunga na kinye konopu keri panjirimele.

<sup>8</sup> Eno Wai Awilimu wendo ombalo kombuna punge lemo paio! Nalo nanga waimu oi naa wendo oromona na i teli oi naa pumbo," nimu.

<sup>9</sup> Aku tepa nimbeline yu Galili we molorumu.

*Oi sel ulkemanga peringi mele pileringi Wai Awilimu wendo orumu wali peya pilingeindo Jisas Jerusalem purumu ungumu*

<sup>10</sup> Nalo Jisas yunge angenupili Wai Awilimu waye kanamili ningi oi puringi wali Jisas kape purumu. Nalo Jisas yu naa kanoko imbi tiengei nimbe kiyengo nimbe kombu Judia distrik pumbe ulke kombu awili Jerusalem purumu.

<sup>11</sup> Akuna Juda imbomanga wai kake telima pileringi Juda iye awilimanu Jisas omonje ningi koroko molkolio enonganano ningi, "Kano iyemu tena moromonje?" ningi.

<sup>12</sup> We imbomanga awini yundo olo toko ningi andoko moloringi. Mareni ningi, "Yu yandopa imboma kolo topa tirimo," ningi. Mareni ningi, "Yu iye pengamu," ningi.

<sup>13</sup> Nalo eno Juda iye awilima pipili kolko lino nimolo mele eno pilinge wali mongo limulo ningi ungu mona naa ningi.

<sup>14</sup> Wai Awilima oi wendo orumu tuku tingina Jisas Gote popo toringi ulke tempelemu okoko pape teringina tukundo pumbe imboma mane tirimu.

<sup>15</sup> Juda iye awilimanu konopu awini liko mundukolio ningi, "Iyemu ambe tepa lipe manjili peremoya? Yu skul awili tengena naa purumu," ningi.

<sup>16</sup> Jisasini topondopa nimbei, "I ungu nimbo tirumu nanga ungu te molo. Na lipe mundurumuna oru iyemunga ungumu.

<sup>17</sup> Goteni teaio nimo uluma pilipo lipo teambo konopu lepa moromo imbomuni i nio ungumunga pulumu pilipelie, nani Gotenga ungumu nimo lemo molo yuni yunu konopuna pilipe nimo lemo konopu lembalo.

<sup>18</sup> Imbo teni yunu konopuna pilipelie ungu nimbe tirimomuni nanga imbi ola molopili nimbe teremo, nalo imbo teni lipe mundurumuna iyemunga imbi mu lipo ola mundembo nimbe kongono teremo imbomu yu tumbi nili imbo te molopa, tepa kenjipe kolo toli imbo te naa moromo.

<sup>19</sup> Oi Mosesini eno Gotenga ungu manema naa tindirimuya? Tirimu nalo eno moromelemanga teni kape kano ungu manema pilko naa tengi tirimele. Aku lemo na kano ungu manema topa tangondoromo

ingo ambe temona na toko kondongei teremeleya?" nimu.

<sup>20</sup> Yuni aku tepa nimu ungu pilkolio imbolani topondoko ningei, "Narini nu topa kondombai teremoya? Nunge konopuna kuro keri te moromomunga pilkolio aku teko nino lepamo," ningi.

<sup>21</sup> Jisasini enondo topondopa nimbei, "Nani ulu enge nili te teru wali eno konopu awini liko munduringi.

<sup>22</sup> Mosesini ungulumanga kangi pundu te kopingei nimbe ungu mane tipe panjirimungu enoni koro awili Sabat walimu kinye ungulumanga kangi pundu te kopirimele. Paimbo Mosesini oi pulu polopa aku ulumu teamili ungu naa nimu. Oi enonga lanieli kolenaeniaku ulumu teringi, nalo altopa Mosesini aku ungu manemu topa panjirimungu pilkolio teremele.

<sup>23</sup> Enoni Mosesini ungu mane tirimumu pilko likolio ungulu tengakangi pundu tekopinge walimu koro awili wendo oromo wali paa kopirimele konopu itemele. Aku-munga nani koro awili wali iye te undukana tepo koinjo ltiumunga naa kinye ambe telka unjo kande meko noirimeleya?

<sup>24</sup> Enoni mongoni karomele uluma kanokolio tumbi tiko imu paimbo, imu kolo lepamo ningo naa pilengel! Uluma wamongo kanoko konopu liko manjikolio apuruko kondao!" nimu.

#### *Jisas Yu paimbo Goteni lipo mundumbo nimu iye Kraist moromonje ningi ungumu*

<sup>25</sup> Yuaku tepa nimbe molopili Jerusalem moloringi imbo marenieno enonganowalli pilkolio ningei, "Iye i kanomutokokondongei teremeleya?

<sup>26</sup> Nalo kanaoi! Imbo awini moromena yu mona ombarangilipe ungu mane tirimo nalo iye awilimani yu kinye ulute naa teremele. Enonyu paimbo Goteni lino nokombalo iye te lipo mundumbo nimu iye Kraist liko manjirimelenje?

<sup>27</sup> Nalo linoni i iyemunga pulukombumu karomolo. Goteni lipo mundumbelo iye Kraist ombalo wali imbo teni yu molopakombu kumbumaa kanopapimbeli timbelo," ningi.

<sup>28</sup> Aku wali Jisas, oiu luke tempelenaugu mane tipe molorumu mele we tepa molopalie, ru nimbeliernimbei, "Paimbo enoni na kanoko imbi tiko, na molopo onduskombumu karomeleya? Na nanu konopuna pilipolio naa oru. Na lipo mundurumuna oru iyemu paimbo ulupulamu yu kinye peremo iyemu. Aku iyemu enaapimele

<sup>29</sup> nalo na yu peya molopolio, yuni na lipo mundurumuna oru akumunga nani yukanopapimbeli tiro," nimu.

<sup>30</sup> Aku tepa nimu ungu pilkolio yu ambolliko ka tingeteringinalo yutongewaimuo wendo naa olina imbo teni yu naambili ambili teringi.

<sup>31</sup> Aku tengeteringinalo imbo awini yu paimbo kano iyemu ningo ipuki tikolio ningei, "Goteni lipo mundumbo nimbe panjirimuiye Kraist ombalainimbemuni,i iyemuni ulu enge nilima teremo mele kano iyemuni ulu enge nili olandopama manda tembaloya? Kraistini tembalonimbo pimolouluma i iyemuni teremo," ningi.

*Juda iye awilimani ele iye mare Jisas pungoka tipeio ningo liko munduringi ungumu*

<sup>32</sup> Imbolaniaku tepa Jisas molorumu meleaku teko nendo yando olotoko ningi mele Juda iye awili Farisimani pilkoliongimuni, eno kinye Gote popo tondoringi iye awilima kinye enoni ulke tempel ele iye mare Jisas pungoka tipeio ningo liko munduringi.

<sup>33</sup> Aku wali Jisasini nimbei, "Alaye kolo kau eno kinye molopolio, altopa na lipemundurumu iyemu moromona pumbo.

<sup>34</sup> Aku wali enoni na andoko korongenalo naa kanoko, molombona manda naa onge," nimu.

<sup>35</sup> Juda iye awilimani enonganonendo yando ningolio ningei, "Yu tena pumbelonalinoni yu manda naa pumbo kanomoloya? AkulemoninogaJuda imbo mare oikombulupemanga puringimoromele kombumanga pumbe imbotalape lupema ungu mane tipe molombalonaa kanomolonje?

<sup>36</sup> Yuni oinimbei, na andoko korongenalo enoni naa kanonge, na molombona eno manda naa onge nimo kanomu ambeleungumundo nimonje?" ningi.

*Koinjomalopapululu pulumu peremonomungauungumu*

<sup>37</sup> Imboma Jerusalem ongo maku tokowai Awilimanga uluma teringi walimapora nimbeindo wali awilimuwendo orumu kinye Jisasola angilipelie enge nimbeliernimbei, "Imbo te no waka kolomolemo na morona ombaronopili!

<sup>38</sup> Na ipuki tirimele imbomangakonopuna imbo koinjomalopakau pululu pulumutirimonu pikopiko nimbeaku molombalo. Gotenga bukunau gungutepa nimbe peremo," nimu.

<sup>39</sup> Yuni ungu nimumungapulumu i tepa: Yu ipuki tinge imboma walite Gotenga Mini Kake Telimu enonga konopumangaa ombamolombalo lingueiungundo nimu. Jisas oikolopamakilipe koinjomalopamulukombuna olando naa purumumunga Mini Kake Telimu oinaaoli.

*Imbomani Jisasindo konopu talo lekolio mokemake leringi ungumu*

<sup>40</sup> Imbomani Jisasini ungu nimuma pilkolio mareni ningei, "I iyemu Mosesini Gotenga profet iye te ombalo nimu kanomu, i iyemu lepamo," ningi.

<sup>41-42</sup> Mareni ningei, "Yu Goteni lino nokopili lipo mundumbu nimbe panjirimu iye Kraist lepamo," ningi. Nalo mareni ningei, "Iye Nomi Kraist kombu Galili molopalie ombaloya? Yu Galili naa menge. Gotenga Bukumuni nimbei, Iye Nomi Kraist iye nomi king Devitini kalopa limbelo. Devit yu meringi ulke kombu Betlehem akuna Iye Nomi Kraist menge nimo kanomunga yu Galili manda naa menge lepamo," ningi.

<sup>43</sup> Aku teko imbomani Jisasindo konopu talo lekolio mokemake leringi.

<sup>44</sup> Imbo mareni Jisas ka tiemili konopu leko moloringi nalo teni yu pumbe ambo pola naa ltimu.

*Juda iye awilimani Jisas we iyere konopu leringi ungumu*

<sup>45</sup> Ulke tempel ele iyema Jisas kinye imboma kinye ningi moloringi mele pilko molkolio, kelko we yando ongo Gote popo tondoringi iye awilima kinye Farisi iyema kinye moloringina puringi. Jisas ka tiko naa meko oringi ulu kanokolio enoni ele iyemando ningei, "Ambe telka iyemu naa meko ongeya?" ningi.

<sup>46</sup> Ele iyemani ningei, "Iye teni oi ungu mane tirimele mele yuniaku tepa naa timo. Yuni ungu mane paa olandopa timo," ningi.

<sup>47</sup> Farisimani ningi kano ungumu pilkolio ningei, "Yuni kolo topa ungu nimoma paimbo nimo konopu leko eno altoko we yando ongeya?

<sup>48</sup> Linonga iye awilima kinye Farisi iyema kinye linonga iye teni paimbo nimu nimbe konopu ltemoya? Paa molo.

<sup>49</sup> Nalo we imbo makukoto molongema Mosesini ungu mane tirimu peremoma paa naa pimele. Goteni enonga kotemu oi pilipe, kolonge wali mindili nangei nimbe panjirimu," ningi.

<sup>50</sup> Nikodemus yu oi walite Jisas molorumuna purumu iye kanomu, Farisi iye akumanga te yu, yuni eno waltindipelie nimbei,

<sup>51</sup> "Linonga ungu manemani imbo te kot naa pilkolio we umbuni liko tiwi nimoya? Yu oi kotena ombalie nimo ungu pilipolio altopa nimo ungumanga puluma apurupo pimolo," nimu.

<sup>52</sup> Farisi iyemani yundo topondoko ningei, "Aku nu kape kombu Galili iyere lepamo? Gotenga bukuna tukundo wamongo kanan! Wamongo kanokolio

Gotenga iye profet te Galili wendo ombalo nimbe peremo kanonioya?" ningi.

<sup>53</sup> Imboma pali ulkendo bulu balu ningi puringi.

*Ambo iye puli te kinye iye te kinye wapu ulu kerinale teringili wali fisasini ulu te terimu ungumu*

## 8

<sup>1</sup> Nalo Jisas Unjo Oliv Angileringi Mulu Kembona olando purumu.

<sup>2</sup> Otilikondo kombu tangombai muni kinye yu altopa Gote popo toringi ulke tempelemu okoko pape teringina tukundo purumu. Aku terimu wali imboma yu molorumuna ongo makukoto moloringi kinye eno ungu mane timbeindo yu mainye molorumu.

<sup>3</sup> Kano kinye Gotenga ungu manema pilko imboma mane tiringi iyema kinye Farisi iyema kinye enoni ambo iye puli te iye te kinye wapu ulu kerinale teringilimu liko meko ongo imboma moloringi kumbekerena liko ola anjikolio,

<sup>4</sup> Jisasingo ningei, "Ungu Mane Tilimu, i ambo iye pulimu iye te kinye wapu ulu keri nale teko molongele imbomani kanoko ltendengena mepo oromolo.

<sup>5</sup> Mosesini ungu mane te nimbe panjirimumu i tepe. Ambo aku tembalomu kouni tokon kondaio nimu kani nuni ambele niyaya?" ningi.

<sup>6</sup> Nalo enoni paimbo pilingeindo naa ningi. Yuni ungu ambelemu nimbelonu, nimbe kenjimbelo kinye kot tendemolo konopu lekolio aku teko waliko pileringi.

Nalo Jisas mai kanopa kimuni maina we imbi topa molorumu.

<sup>7</sup> Kano wali yu altokola altokola waliko pileringi. Naa pileli kelkele topa mai kanopa altopa para lepa kanopalie nimbei, "Enonga iye te ulu pulu keri te naa peremo iye teni i ambomu kiyendo ki winjipe kouni topili!" nimu.

<sup>8</sup> Aku tepa nimbelie yu altopala mai kanopa maina we imbi topa molorumu.

<sup>9</sup> Aku nimu ungu pilkolio iye awilima eno te talo ningi kunduko lteko pena pena pungo Jisas tiye kolko eno puringi. Iye awilimanga iye nomima oi kumbe leko puringi. We iye awilima akilkopuringi. Wayema eno puringi wali, ambomu kinye Jisas kinye elongalo moloringili.

<sup>10</sup> Kano wali Jisas para lepa kanopalie ambomu walipe pilipelie nimbei, "Ambomu, iyema tena pungeya? Kano iyema teni kape nuni teko kenjiniomunga kot tendambo ungu naa ningeya?" nimu.

<sup>11</sup> Ambomuni nimbei, "Awilimu, teni na kot naa tendembai teremo," nimu. Jisasini nimbei, "Nani kape nuni teko kenjiniomunga mindili nani ungu naa nio kani nu pungolio imuni undupe kanopili kani altoko i ulumu naa tewi!" nimu.

*Jisas yuni mai kombumu pa tenderimu nalo imbomani Yu ipuki naa tiringi*

<sup>12</sup> Imbo moloringimando Jisasini kelepa nimbei, "Na mai kombu imbomanga pa tendiflimu. Na andopo molombona lombili andoko molonge imboma tumbulu tolina naa andoko molonge. Koinjo mololi ulu pulumu tirimo pa telina molonge."

<sup>13</sup> Aku tepa nimu ungu pilkolio iye awili Farisimani yu nendeleme ningolio ningei, "Nu morono mele nunu ningi tirino kani nuni ungu ninoma pilipolio paimbo nimu nimbo pilimalanje manda naa telka," ningi.

<sup>14</sup> Jisasini topondopa nimbei, "Na oi molopo oru kombumu kinye kelepo pumboi tero kombumu kinye lipo manjipo moromunga na molopo tero mele paimbo nio. Nalo na molopo oru kombumu kape altopo pumboi tero kombumu kape eno naa liko manjirimele."

<sup>15</sup> Maina imbomani pilko apuruko teremele mele eno Farisi iyemani aku teko pilkolio apururumele, nalo nani imbo te naa apururo.

<sup>16</sup> Nalo nani paimbo pilipo apurulkanje na nanu kau naa apurulkamunga tumbi tipo apurulka. Na lipe mundurumu iye Ara kinye peya kopu tepo morombolomunga tumbi tipo pilipo apururo.

<sup>17</sup> Enonga ungu mane te bukuna moromo kanomu i tepa: Imbo taloni ningele ungumu tendekuna ombla pumo lemo paimbo ltemo ningi pimele.

<sup>18</sup> Akumunga na molopo tero mele nanu nimbo tiro kape; na lipe mundurumu iye Arani kape na molopo tero mele nimbe tirimo," nimu.

<sup>19</sup> Aku wali enoni waltindikolio ningei, "Lanie tena moromoya?" ningi.

Jisasini topondopa nimbei, "Enoni na kape nanga Ara kape naa kanoko imbi tirimele. Na kanoko imbi tilimalanje Ara kape kanoko imbi tilimala," nimu.

<sup>20</sup> Jisas ulke tempelana tukundo, Gotenga ningo imbomani kou mone tiringi unjo ketemu lerimu kiripina molopa imboma ungu mane tipe molopalie i unguma nimu. Nalo yunge waimu oif wendo naa oli imbo teni yu ambili ambili teko ka naa tiringi.

*Jisasini iye awilimando Na pumbo kombuna eno manda naa punge nimu ungumu*

<sup>21</sup> Jisasini altopa Juda iye awilimando nimbei, "Na kinye pumboi tero, aku wali enoni na koroko kelkolio enonga ulu pulu

kerima konopuna pepili kolonge. Na pumboi tero kombuna eno kame manda naa punge,"

<sup>22</sup> Aku nimu ungu pilkolio Juda iye awilimani enonganano nendo yando ningi waliko pilkolio ningei, "Ambe temona 'Na pumbo kombuna eno manda naa punge' nimoya? Aku lemo yu yunu topa kondombalonje?" ningi.

<sup>23</sup> Jisasini kelepa nimbei, "Eno mainye imboma, na ola iyemu. Eno mai kombu imboma na mai kombu iye te molo.

<sup>24</sup> Nani enondo oi nimboindo, ulu pulu kerima konopuna we pepili kolonge nindu kanomu. Akumu kinye moro oi moloru altopo molopo kau pumbo iyemu nimbo tiro mele enoni ipuki naa tienge lemo pele eno kolonge wali paimbo enonga ulu pulu kerima konopuna peli kolonge," nimu.

<sup>25</sup> Farisi iyemani yu waltindikolio ningei, "Nu nariya?" ningi.

Jisasini topondopa nimbei, "Na molopo tero mele eno waliwalima nimbo tiro kanomu.

<sup>26</sup> Nani eno molko ulu teremele mele pilipo apurupolio enoni teko kenjirimelle mele ungu awini nimbo para timbo nalo nanu konopuna pilipolio unguma naa nimbo. Na lipe mundurumu iyemu, yu ulu paimboma kau tepa ungu paimboma kau nimo iye, kanomuni nimo mele kau pilipolio maina imboma nimbo tiro," nimu.

<sup>27</sup> Yuni Lapando nimu nalo yuni nimu mele pulumu naa pileringi kala.

<sup>28</sup> Jisasini enondo nimbei, "Pele enoni Iyemunga Malo pala toko panjinge wali enoni kanoko pilkolio Nape aku iye moro nimbo tiro mele enoni paimbo moromo liko manjikolio kape, na nanu konopuna pilipolio ulu te naa tero. Arani na mane tirimo mele kau pilipolio nio waliwalima nimbo tiro akumu paimbo lepamo liko manjinge.

<sup>29</sup> Na lipe mundurumuna oru iyemu na kinye peya kopu tepo morombolo. Waliwalima yuni konopu mondopili uluma kau teromunga walite kape na tiye naa kromo," nimu.

<sup>30</sup> Yuniaku tepa nimbe molopili kape imbo awini Jisas yu Goteni paimbo lipe mundurumu ningi yu ipuki tiringi.

*Ungu paimbomuni lino ka tirimo melema wendo ltindipe we molko kondange nimu ungumu*

<sup>31</sup> Jisasini yu ipuki tirimele Juda imbomando nimbei, "Nani ungu mane tiroma paimbo pilko liko tengi tiko molonge lemo eno paimbo nanga lombili andolima molonge.

<sup>32</sup> Aku tekolio enoni paimbo ungumu pilinge wali eno ka tirimo melema paimbo

ungumuni wendo ltindipe eno we molko kondangei nimbelo," nimu.

<sup>33</sup> Enoni topondoko yundo ningei, "Lino Abrahameni kalopa ltimu imboma molopo imbo tengka kongono te naa tendepo molorumulu. Aku terimulu kani nuni ka tirimo melema wendo pumbelo lino molko kondonge ninio kanomu ambe tekoliko manjikolio ninoya?" ningi.

<sup>34</sup> Jisasini topondopalie nimbei, "Nani eno ungu paimbo i tepo nimbo tiro. Imbo ulu pulu keri teremelema ulu pulu keri-mani ka tirimo kani aku ulu pulu keri-manga ka kongono tenderemele.

<sup>35</sup> Ka kongono teremo imbonu ulke pulu imboma kinye waye kamukumu naa moromo, nalo bakulumu yunge ulke pulu imboma kinye waliwalima tendekuna kopu tepe moromo.

<sup>36</sup> Akumunga Ulke Pulu Iyemunga Maloni eno ka tirimo melema wendo lipo eno we molko kondangei nimo lemo melteni ka naa timbelo we paa molko kondonge.

<sup>37</sup> Eno Abrahameni kalopa ltimu imboma moromelena pilipo moro nalo enonga konopuna nanga ungumu naa peremomunga na toko kondangei teremele.

<sup>38</sup> Nape Ara kinye molopolio kanoru mele eno nimbo tiro. Enoni enonga lanieni nimo mele pilkolio teremele," nimu.

*Jisasini enonga lanie Satan nimu ungumu*

<sup>39</sup> Jisasini imbomando, eno lanienga ungumu pilkolio teremele nimu ungu pilkolio Juda imbomani topondoko ningei, "Lino kalopa ltimumu Abraham," ningi. Jisasini nimbei, "Molo. Eno paimbo Abrahameni kalopa ltimu imboma molemalanje Abrahameni terimu mele eno aku tekotemalae.

<sup>40</sup> Nalo aku ulu naa teremele. Goteni na nimbe tirimu unguma na pileru ungu paimboma eno nimbo tiro iyemu toko kondonge teremele. Abrahameniaku ulure naa terimu.

<sup>41</sup> Eno enonga lanieni teremo mele manda manjiko teremele," nimu. Enoni enge ningi karaye tekolio ningei, "Linonga ama kameni iye lupema kinye wapera tokolio lino naa meringi. Linonga lapa kanomu Pulu Iye tendekumu kau," ningi.

<sup>42</sup> Jisasini enondo nimbei, "Na Gote kinye molopolio oru ya moromunga Gote yu paimbo enonga Lapa lekanje enoni na konopu mondolemala. Na nanu konopuna pilipolio naa oru. Yuni na lipo mundurumuna oru.

<sup>43</sup> Nani ungu niomanga pulumu ambe temona tumbi tiko naa pimeleya? Unku pulumu naa pimolo ningi liko tui tirimele akumunga nanga ungumu eno naa pimele.

<sup>44</sup> Eno kuromanga nomi Satanenga bakulumu, Satan yu enonga lanie. Lanieni konopu tirimo uluma teamili ningolio teremele. Oi pulu polopa mulu mai talo kokele wendo orumu wali yu imbo topa kondoli iyemu molorumu mele kinye kapeaku tepe we moromo. Yu paimbo ungu pulu te naa perimuna paimbu ungu te walite kape paa naa nimo. Yu kolo toromo iyemu; yu paimbo kolomunga gote moromomunga oi yu kolo torumu mele kano kere we ltemo.

<sup>45</sup> Nalo nani ungu paimboma nimbo tironmunga eno naa pilko kolo toromo nimele.

<sup>46</sup> Narini nanga ulu pulu keri te kanopalie manda nimbe para timbeloya? Te naa peremo nalo nani ungu paimbo nindu lemo paimbo nimo lepamo ningolio eno ambe temona naa pimeleya?

<sup>47</sup> Gotenga bakulumani Goteni nimo ungumu pilko ltimele. Eno Gotenga bakulumu naa molkolio yunge ungumu nani nimbo tiroma naa pimolo ningi naa pilko ltimele," nimu.

*Jisasini Abraham oi naa molopili Na moloru nimi ungumu*

<sup>48</sup> Juda iye awilimani yundo topondoko ningei, "Nu Samaria iye te morono, nunge konopuna kuro keri te moromo nimolo kanomu paimbo nimolo ltemo," ningi.

<sup>49</sup> Ningi mele pilipelite Jisasini topondopa enondo nimbei, "Nanga konopuna kuro keri te naa moromo. Nani Aranga imbi lipo ola munduro nalo enoni nanga imbi tekokendirimele.

<sup>50</sup> Nanu imbi ola molopili naa nio, nalo iye te moromo akumuni na imbi ola molopili nimbe nanga imbi lipo ola mundundurumo. Kano iyemuni nani nio mele kape enoni nimele mele kape wamba pilipe apuru paimbo nimu nimbe lipo manjirimo.

<sup>51</sup> Nani enondo ungu paimbo i tepo nimbo tiro. Imbo te nanga ungu pilipe lipo tengetipe molombalo imbonu paa kamukumu naa kolopa molopa kau pumbelo," nimu.

<sup>52</sup> Juda iye awilimani yundo ningei, "Kinye lino piltimolo. Kuro keri te paimbo nunge konopuna moromo lemo. Linonga ara kaue Abraham kolorumu. Gotenga iye profetema kape koloringi. Nalo nuni ninindo, 'Nanga ungumu pilipe lipo molombalo imbonu kamukumu naa kolombalo,' nino.

<sup>53</sup> Abrahamenga imbi mainye mele molopa nunge imbi ola moromoya? Yunge imbi paa ola, nalo yu kape kolorumu. Profet imbona kape imbi ola molorumu nalo koloringila. Nunge imbimu ola enonga imbima mainyeya? Paa molo. Iye nomi kelkele toronoya," ningi.

<sup>54</sup> Jisasini topondopa nimbei, "Nani na awili kelkele tolkanje aku na imbire naa

molka. Nalo akumu molo. Arape, enoni linonga Gote nimele aku iyemuni nanga imbi ambolopaola mundundurumo.

<sup>55</sup> Enoni yu naa kanoko naa liko manjirimele nalo nani yu kanopo lipo manjiro. Nani yu naa kanopo naa lipo manjiro nilkanje eno mele na kape iye kolo tol molka. Nalo nani yu paimbo kanopo pilipo, yunge ungumu pilipo lipo tengen tipo moro.

<sup>56</sup> Enonga kolena Abrahameni na maina mainye ombo walimu kanomboya nimbe tono kolopa molorumu. Kano waimu kamukumu kanopalie wali paa tono kolorumu," nimu.

<sup>57</sup> Aku tepa nimu wali Juda iye awilimani yundo ningei, "Nunge poinye 50 aku tepa oi ombo naa puli. Nu kelo iyemu kau. Pele nu Abraham kanoru ninoya? Nuni yu manda naa kanorunu. Kolo torono," ningi.

<sup>58</sup> Jisasini enondo nimbei, "Nani enondo ungu paimbo i tepo nimbo tiro. Abraham paa koro oi molopka kolorumu nalo yu oinaa molopili na moloru," nimu.

<sup>59</sup> Aku nimu ungu pilkolio enoni yu topo kondamili ningko kou liko yu tongei teringi. Nalo Jisas lopeke tepalie, ulke tempel pape tawendo yu kundupe lerimu.

## 9

*Jisasini iye mongo keri lerimu te tepa koinjo ltimu wali tomboloringi ungumu*

<sup>1</sup> Jisas aulkena pumbei purumu wali iye mongo keri leli te molorumuna kanorumu. Anumuni merimu wali mongo keri lerimu.

<sup>2</sup> Yu lombili andoli iyemani yu waliko pilkolio ningei, "Ungu Mane Tilimu, narrini ulu pulu keri terimumunga i iyemunga anumuni yu merimu wali mongo keri lerimu? Iyemu yunu terimu molo anumu lapa taloni teringiliya?" ningi.

<sup>3</sup> Jisasini nimbei, "Iyemu yuni kape anumu lapa taloni kape ulu pulu keri te teringina yunge mongo keri naa lerimu. Gotenga ulu enge nili te i iyemu kinye mona wendo opili imboma pali kanangei nimbe i iyemu mongo keri lerimu.

<sup>4</sup> Kombu we tangopa ltemo wali na lipe mundurumu iyemunga kongono paa teamili lemo. Tumbulu toromo wali imbo teni manda kongono naa temballo.

<sup>5</sup> Na i mai kombuna molopolio, na mai kombuna imbomanga pa tendelimu moro," nimu.

<sup>6</sup> Aku tepa nimbelie yu maina olkambe topalie maimu kinye ambolopa topele mapele topalie iyemunga mongona kandopalie nimbei,

<sup>7</sup> "Nu no mongolu Siloam pungo kumbekerena no lepuwi," nimu. Siloamunga ungu pulumu Lipe Munduli. Yu akuna pumbe kumbekerena no lerimu wali mongomu

penga lerimu. Melema kanolipe ulkendo orumu.

<sup>8</sup> Aku wali yunge kombu imboma kinye yu kou mone tieio nimbe oi aulkena konge tepe molorumu kanoringi imboma kinye yu aku tepe orumu ulu kanokolio enoni enongano nendo yando ungu ningko waliko pilkolio ningei, "Iyemu oi kou mone tieio nimbe konge tepe molorumu kano iyemu-nje?" ningi.

<sup>9</sup> Mareninigei, "Paimbo yu aku iyemu kau," ningi. Mareninigei, "Molo. Elo kumbekere tendeku tepe nalo i iyemu lupe," ningi. Nalo iyemu yunu enge nimbeline nimbei, "Iye kanomu na kau," nimu.

<sup>10</sup> Enoni topondokolio ningei, "Ambe temona nunge mongomu kinye penga ltemoya?"

<sup>11</sup> Ningi wali yuni topondopa nimbei, "Iye te Jisas nimele kanomuni maimu olkambe topa le oli ltendepa mongona kandopalie nimbei, no mongolu Siloam pungo kumbekerena no lepuwi nimu wali pumbo kumbekerena no lepundi kinye nanga mongomu makilimona kombu kando," nimu.

<sup>12</sup> "Aku iyemu tena moromoya?" ningi wali "Na naa kanondu," nimu.

<sup>13</sup> Iye oi mongo keri lerimunu imbomani Farisi iyema moloringina meko purungi.

<sup>14</sup> Jisasini le oli lipe iyemunga mongona kandopalie iyemunga mongomu altopa penga lepili nimu kano walimu Juda imboma koro moloringi wali Sabat kinye terimu.

<sup>15</sup> Akumunga Farisi iyemani kape yu waliko pilkolio ningei, "Ambe temona nunge mongomu penga ltemoya?" ningi. Iyemuni topondopa nimbei, "Nanga mongona le oli apike kandomo wali na kumbekerena no lepolio wali mongoni kinye melema kando," nimu.

<sup>16</sup> Farisi iye mareninigei, "Iyemu Sabat walimu naa pilipe we andoromo, aku tepe ulu pulu keri teremomunga Goteni yu naa lipe mundurumu lepamo," ningi. Nalo mareninigei, "Ango kame, ulu keri te teli iyemuni i tepe ulu manda tembaloya?" ningi. Akumunga eno mokemake leringi.

<sup>17</sup> Akumunga mongo oi keri lerimu iyemu altoko kanoko waliko pilkolio ningei, "Kano iyemuni nunge mongomu tepe penga ltemo akumunga nuni yu ambele iyemu konopu ltenoya?" ningi. Iyemuni topondopalie nimbei, "Yu Gotenga iye profet te," nimu.

<sup>18</sup> Nalo Juda iye awilimani i iyemu oi yunge mongomu paa paimbo keri lerimu nalo kinye penga ltemo nimbo paimbo ltemo we naa nimolo. Yu lino kanopo imbi naa tirimolo kani anumu lapa talo walipo pilemili walio ningi.

<sup>19</sup> Anumu lapa talo oringili wali, waliko pilkolio ningei, "I iyemu elonga marenaya? Meringili wali mongomu keri lerimu nimbele kano iyemupe imuya? Aku lemo, kinye mongoni ambe tepalie karomoya?" ningi.

<sup>20</sup> Anumu lapa taloni topondoko ningilindo, "Yu paimbo iltonga malo, merimbulu wali mongo keri lelimu merimbulu lipo manjirimbole.

<sup>21</sup> Nalo kinye yunge mongomu penga ltemomu ambe tepa temonje ilto naa lipo manjirimbole. Yu narini mongomu tepa makinjimonje akumu kape ilto naa lipo manjirimbole. Yu iyemu moromo kani yu temo mele yunu nimbe tipili yu waliko pileio," ningili.

<sup>22</sup> Anumu lapa talo Juda iye awilima pipili kolkolio aku teko ningili. Ambe telka, Juda iye awilimani oi ningo panjikolio ningei, "Imbo teni Jisas yu paimbo Goteni lipa mundurumu iye nomi Kraist nimo lemoaku imbonu ulke makuto Gotenga ungu plipio yu kapi nimolo ulkemanga naa opili kamukumu makoromolo," ningi.

<sup>23</sup> Oi iye awilimani aku teko ningo panjiringimunga anumu lapa talo pilkolio yu iyemu kani yunu nipili waliko pileio ningili.

<sup>24</sup> Juda iye awilimani altoko talo tiko oi mongo keri lerimu iyemu owi ningolio yundo ningei, "Nuni Gote pilipe moromo ningo kolo naa toko, nu temo mele tumbi tiko lino pilemili ningo tiwi! Lino Gotenga ungu wamongo pimolo iyemani pilipo, nunge mongo tepa makinjimo nino iyemu yu ulu pulu keri teli iyemu nimbo piltimolo," ningi.

<sup>25</sup> Yuni enondo topondopa nimbei, "Nanga mongo talo tepa makinjimo iyemu ulu pulu keri teli iyemunje, na naa lipo manjiro. Nalo na kumbe tundu mongo lipo manjiro ulu imu, oi na mongo taloni melema naa kanoru nalo kinye kanopo imbi tiro," nimu.

<sup>26</sup> Altoko enoni yu waliko pilkolio ningei, "Yuni nu ambe temoya? Ulu ambelemu temo wali nunge mongomu makinjimoya?" ningi.

<sup>27</sup> Yuni topondopa nimbei, "Nani eno oi nimbo tindu nalo naa pilingeindo ungu nindumu liko tui tinge kanomu. Ambele ungu nemboi ningolio nando niwi kau nimeleya? Eno kape yu lombili pungeindo waltindirimeleya?" nimu.

<sup>28</sup> Aku wali enoni yu kinye mumindili kolko iri tokolio ningei, "Nu aku iye kerimunga lombili andolimu nalo lino Mosesinga lombili andolima.

<sup>29</sup> Goteni paimbo Moses kinye ungu nimbu pilipolio Moses Gotenga iye awilimou konopu lepo moromolo nalo i iye kerimu yu terenga molopa orumunje lino naa lipo manjirimolo," ningi.

<sup>30</sup> Iyemuni topondopa nimbei, "I iyemuni nanga mongomu tepa makinjimo nalo yu tena molopa orumunje eno Gotenga ungu wamongo pimele iyemani naa liko manjirimbole akumu paa ulu te lupe.

<sup>31</sup> Lino i tepo pimolo. Ulu pulu keri teremele imboma Goteni konge teko liko tapowi nimele unguma naa pimo. Imbo te Gotenga imbibu olalandopa molopili nimbe uluma tengen tipe molopa, yuni tewi nimo mele pilipe teremo imbonu Goteni konge tepa liko tapowi nimo unguma pimo akumu lino pimolo.

<sup>32</sup> Oi Goteni mulu mai talo terimu wali kape yandopa kape imbo te anumuni merimu wali mongo keri lerimu imbonunga mongomu imbo teni tepa makinjirumu ningi temane kolte kape oi teni naa toringi, oia naa pilerimulu.

<sup>33</sup> Goteni i iyemu lipe naa mundulkanje yuniaku tepa ulu enge nili te manda naa telka," nimu.

<sup>34</sup> Aku nimu ungu pilkolio enomi topodoko ningei, "Nu aminyeni merimu wali ulu pulu keri awini pepili merimu. Kinye nuni lino mane timbo konopu lekolio ninoya?" ningi. Aku ningolio yu Gotenga ungu pileringi ulkena kamukumu makororingi.

*Ipuki naa tirimele imboma mongo keri leli mele moromele nimu ungu*

<sup>35</sup> Jisasini mongo makinjirumu iyemu Juda iye awilimani Gotenga ungu pileringi ulkena kamukumu makororingi Jisas yu pilipelie nimumuni, yu pumbe kanopalie nimbei, "Nu Iyemunga Malo Yu paimbo Goteni lipa mundurumu ningo ipuki tirinoya?" nimu.

<sup>36</sup> Aku iyemuni Jisas walipe pilipelie nimbei, "Iye Awilim, iye nino akumupe nariya? Nani yu ipuki timbo kani ningo tiwi!" nimu.

<sup>37</sup> Jisasini nimbei, "I ungu nimbele nu kandono iye imu," nimu.

<sup>38</sup> Aku wali iyemuni nimbei, "Awilim, kinye nu aku iyemu paimbo lepamo nimbo pilto," nimbelie Jisasina imbi lipe ola mundupe yu kapi nimu.

<sup>39</sup> Jisasini nimbei, "Na imboma ulu pulu keri teko moromele mele mona lepili pilengei nimbo mai kombuna oru. Imbo mongo keri lemoma mongoni melema kanoko, mongo penga lemoma mongoni melema naa kanangei nimbo mai kombuna oru," nimu

<sup>40</sup> Farisi iye yu kinye waye moloringi maren yuniaku nimu ungu pilkolio yu waliko pilkolio ningei, "Lino kape mongo keri leli iyema konopu lekolio ninoya?" ningi.

<sup>41</sup> Jisasini nimbei, "Enonga mongoma keri lekanje enonga ulu pulu keri teremelema

naa kanoko naa liko manjilimala. Nalo mongoni melema karomolo nimelemunga enonga ulu pulu kerima konopuna we pepili moromele," nimu.

## 10

*Jisas kongi sipsipimanga tapu iyemu moromo ungumu*

<sup>1</sup> Walite Jisasini imbo moloringimando nimbei, "Nani enondo ungu paimbo i tepo nimbo tiro. Iye te kongi sipsip pape ombona tuku naa pumbé, we tenga alumbiye tepe purumo iyemu yu wapu iyemu.

<sup>2</sup> Nalo iye te pape ombona tuku purumo iyemu yu sipsip tapu iyemu.

<sup>3</sup> Pape ombona nokopa angimo iyemuni yunge pape akuromo. Sipsipimani tapu iyemunga unguma pimele. Yunge sipsipimanga imbima lepa ti nimbe pape ombona akupe mepa purumo.

<sup>4</sup> Yunge sipsipima wendo lipelie, yu kumbe lepa purumo wali yunge unguma pilkolio eno umbulu pala moromele.

<sup>5</sup> Iye lupe teni ombo ti nimo wali yu minyeko naa likolio umbulu pala naa molko talopa leko purumele," nimu.

<sup>6</sup> Jisasiniaku ungu ikomutopa tirimu nalo ungu pulumu i tepanimbemo ningolio naa liko manjiringi.

*Jisas Yu kongi sipsipimanga tapu iye pengamu moro nimu ungumu*

<sup>7</sup> Jisasini kongi sipsipimanga ungu ikomutopalie nimumuni, ungu pulumu naa pileringi wali kelepa ungu te nimbei, "Nani enondo ungu paimbo i tepo nimbo tiro. Na sipsipimanga pape ombomu.

<sup>8</sup> Na oi naa wamboi imbo kumbe leko oringima wapu iyema kau, nalo enonga unguma sipsipimani naa pileringi.

<sup>9</sup> Na pape ombomu. Imboma tukundo pamili ningolio na molombona ongema ulte manda naa wendo ombalo kani tukundo tawendo teko era nonge.

<sup>10</sup> Wapu iyemu sipsipima topa kondopa wapu nomba bumbo timbeindo kau oromo. Nalo nape eno koinjo molko paa molko kondangei nimbo oru.

<sup>11</sup> Na nanu kongi sipsip tapu tepo kondoro iyemu. Sipsip tapu tepea kondoli iyemuni yunge sipsipima mindili naa nongo, kolko naa kolangei nimbelie eno lipo tapon-dopa enonga nimbe kolo wangopa kolombai teremo.

<sup>12</sup> Iye te yu sipsip pulu iye molo, yu we kou kongono kau tepea sipsipima we nokondoromo. Kano we tapu tendeli iyemu owa takera te sipsip mare topa nombai oromo ulu kanopalie, yu sipsipima tiye kolopa talopa lepa purumo. Kano kinye owa taker-amuni sipsipima topa bulubalu tirimo.

<sup>13</sup> Iyemu yu kou kongono teli iyemu kau molopalie, sipsipima kondo naa kolopa yu kowa purumo.

<sup>14-15</sup> Na nanu sipsip pulu iyemu molopolio eno tapu tepo kondoro. Arani na kanopa lipe manjirimo nani yu kanopo lipo manjiryo. Aku teko melela nani nanga sipsipima kanopo lipo manjiryo enoni na kanoko liko manjirimele. Nani sipsipima eno naa kolangei nimbo enonga kolo wan-gopo kolombo.

<sup>16</sup> Nanga sipsip mare lupe moromele, i Juda kombu sipsip mare molo. Aku sipsipima kape meli ombo. Mepo ombo wali kanoma nanga unguma pilko lingéaku wali sipsipima pali talape tendekumu kau molonge. Sipsip pulu iye tendeku kau molopa eno tapu tepea kondombalo. Akumupe na.

<sup>17</sup> Enonga nimbe kolopolio makilimbo akumunga Arani na konopu mondonromo.

<sup>18</sup> Imbo teni na manda naa topa kondombalo. Nanga konopumuni kolamboi nindu lemo kolombo. Koinjo pamboi nindu lemoaku koinjo pumbo. Araniaku ulu tewi nimbe enge tirimumunga na kau ulu talo manda tembo," nimu.

<sup>19</sup> Jisasini nimu ungu pilkolio Juda imbonani mokemake leringi.

<sup>20</sup> Imbo awinini ningei, "Yunge konopuna kuro keri te moromomunga yu keke lepo topaaku tepea unguma nimbe kenjirimo. Ambe temona yunge unguma piltiemeleya?" ningi.

<sup>21</sup> Nalo mareninengei, "I ungu we manda naa nilka. Kuro kerireni imbo tengat mongo keri lelimu ambe tepea manda tepea makinkilkaya?" ningi.

*Juda iye awilimani Jisas Gotenga Malore molo ningi ungumu*

<sup>22</sup> Kano wali Juda imbomanga wai awili te wendo orumu. Koro oi imbo mareni Gote popo toko kaloringi Ulke Tempelena Teko Kake Tenderingi Waimu poiyemanga yaka yaka ningi liko manjingeindo Jerusalem maku toringiaku Waimu wendo orumu. Aku Waimu kombu ali terimu walimanga wendo orumu.

<sup>23</sup> Aku wali Jisas ulke tempel kerepuluna Solomononga takoko anjo Itingina andopa molorumu

<sup>24</sup> Aku wali yu molorumuna Juda iye awilima ongo maku toko angilkolio yundo ningei, "Lino konopu talo tepo naa lipo mundupoo molamili kani Goteni lino nokombalo iye te lipo mundumbo nimbe panjirimu iye nomi Kraist nu lemo, lino kondo ningi tiwi," ningi.

<sup>25</sup> Jisasini topondopa nimbei, "Nani oi nimbo tiru nalo ipuki naa tirimele. Nanga

Arani na enge tipe yunge kongonomu depuwi nimuna ulu enge nili teromani na molopo tero mele lipe ondoromo,

<sup>26</sup> nalo eno nanga kongi sipsipima naa moromelemunga molopo tero mele nio akumu kolo toromo ning pimele.

<sup>27</sup> Nanga sipsipima nanga unguma pimele. Nani eno kanopo imbi tiro, enoni na umbulu pala moromele.

<sup>28</sup> Nani eno koinjo molko kau pangei nio, eno kombu kerina naa pungo molko ken-jinge. Sipsipima nani nokopo molambona imbo teni manda wendo naa limbelo.

<sup>29</sup> Arani kano sipsipima nando tirimu iyemu, yu melemanga pali olandopamu. Yuni kanoma nokopa molopili, imbo teni manda wendo naa limbelo.

<sup>30</sup> Na kinye Ara kinye ilto tendekumu, nimu.

<sup>31</sup> Pilkolio wali Juda iye awilimani altoko kou liko Jisas tongei teringi,

<sup>32</sup> nalo yuni enondo nimbei, "Nani Aranga ulu enge nili awini pengama eno lipu ondopo teru, akumanga ulu temu tepe kenjiruna kanokolio na kouni tongei teremeleya?" nimu.

<sup>33</sup> Juda iye awilimani topondoko ningeindo, "Ulu enge nili terenomanga nu kouni tomili ulure naa teremolo. Nu we maina iyemuni Gote liko ungu taka tondoko nuni Na Gote nino, aku ungmundo nu kouni tomili teremolo," nimu.

<sup>34</sup> Jisasini topondopa nimbei, "Gotenga ungu manema moromo buk noirimelемunga Goteni ungu te nimbei,

Nani eno gotema niu kanomu, (Sng 82:6) nimbe Bukuna moromo.

<sup>35</sup> Gotenga bukuna ungu moromomani kolo naa toromo, ungu nimoma pepa kau purumo kanomu. Oi Goteni yunge ungu pileringi imbomando gotema nimu itemo.

<sup>36</sup> Arani kanopo lipe nanga iyemu molopili nimbe mai kombuna lipe mundurumuna orumu iyemupe yu Gotenga Malo manda naa nimbeloya? Nani na Gotenga Malo niomunga nando Gote liko ungu taka tondorono aku ungu ambe telka nomeleya?

<sup>37</sup> Arani uluma teremo mele nani aka tupo uluma naa tendu lemo na ipuki naa tieio! <sup>38</sup> Nalo Arani tewi nimo uluma tero. Nanga ungumu ipuki naa tingepi ulu enge nili teroma kanoko ipuki tinge. Aku tekolio Ara na kinye kopu tepa moromo, na kape yu kinye kopu tupo moro ningliko manjingue," nimu

<sup>39</sup> Yuni aka tepa nimu wali yu ambili ambili teko ka tingei teringi nalo yu purumu.

<sup>40</sup> Aku tepalie nimumuni, Jisas altopa no Jordan lebulupe nekondo pumbe, Jon oi imboma no ltindirimu kombuna pumbe molorumu.

<sup>41</sup> Aku wali imbo awini yu molorumuna oringi. Ongolio ningeindo, "Jononi ulu enge nili alaye tendekure kape naa terimu, nalo iyemuni altopa omba tembalu uluma Jononi oi nimu kano unguma paimbo nimu," nimu.

<sup>42</sup> Kano wali aku kombuna imbo awinini Jisas yu paimbo lepamo ningi ipuki tiringi.

## 11

*Lasarus kolorumu ono teringi wali Jisasini topa makinjirimu ungumu*

<sup>1</sup> Iye te kuro torumu, yunge imbi Lasarus. Yunge ulke kombu Betani, akuna yunge kemulu Maria kinye Marta talo peya moloringi.

<sup>2</sup> I ambo Mariani altopa walite Awilimunga kimbona kopongo wel ondopa kandopalie Maria yunge pinyendimuni Awilimu yunge kimbona kulu tondorumu. Ambo akumunga kemulu Lasarus kuro torumu.

<sup>3</sup> Yunge kemulu taloni Lasarus kuro torumu wali Jisas molorumuna ungu te ningi mundukolio ningilindo, "Awilimu, nu konopu mondonoro iyemu kuro tomo," ningi mundurungili.

<sup>4</sup> Jisasini aka ungumu pilipelie yu lombili andolimando nimbeindo, "Lasarus kuro toromomu manda naa kolombalo, molo. Yu kuro toromomunga Gotenga enge nilimu mona lepa yunge imbi ola molombalo. Yu kuro toromomunga Gotenga Malonga enge nilimu mona lepa imbi ola molombalola," nimu.

<sup>5</sup> Jisasini ambo Marta kinye angenu talo, elonga kemulu Lasarus kinye eno paa konopu mondonoru.

<sup>6</sup> Nalo Lasarus kuro torumu ungu pilipelie, wali talo yu anjo we molorumu.

<sup>7</sup> Wali talo molopalie pele yu lombili andoli iyemando nimbeindo, "Lino kombu Judia distrikindo kelepo yando pamili!" nimu.

<sup>8</sup> Nalo enoni ningeindo, "Ungu Mane Tilimu, Juda iye awilimani nu oi kouni tongei teringi kanomu. Kinye nu akuna kelko punido ninoya?" nimu.

<sup>9</sup> Jisasini topondopa ungu iko topalie nimbeindo, "Wali tenga ekondo kombu tumbulu topa ekondo tangopa naa teremoya? Kombu tangoromo wali imbo te mai kombuna pa teremona pumbelie aulke tumbi tipe kanopa pumbelie manda ai naa toromo.

<sup>10</sup> Nalo imbo te ipu leli purumomu pa telimu yu kinye naa peremomunga yu alamalu nilipe purumo," nimu.

<sup>11</sup> Aku ungu nimbelie yuni altopa enondo ungu te peya nimbeindo, "Linonga kanopa lili iye Lasarus uru peremo, nalo nani pumbo yu topo makinjimbo," nimu.

<sup>12</sup> Yunge lombili andolimani ningeindo, "Awilimu, yu uru pemo lemo kelepa koinjo pumbelo," ningi.

<sup>13</sup> Jisasini Lasarus kolorumumundo nimu nalo yunge lombili andolimani yu we uru peremo konopu leringi.

<sup>14</sup> Aku teko konopu leringi kolo Jisasini ungu ikomunga pulumu nimbe para tipelie nimbeindo, "Lasarus nomi ka akupe Itimu.

<sup>15</sup> Nalo na yu kinye naa molondumunga ulu enge nili wendo ombalo akumunga enoni na moro mele pilko kondongei nimbo yu kinye naa molondumu paa tendu. Onomu ltemona pamili!" nimu.

<sup>16</sup> Pumbe kolombalo konopu lepalie, Tomas, yunge imbi te Didimus, yuni ki tipi kanoli iye wemando nimbeindo, "Lino Jisas yu kinye peya kolamili pamolo!" nimu.

*Imbo kololima makilko ola moromelemunga pulumu kape imbo koinjo moromelemunga pulumu kape Jisas Yu aku pulumu moromo*

<sup>17</sup> Jisas ulke kombu Betani orumu wali, Lasarus ono teangei ono kombuna pepili wali kite ombo purumo ningina pilerimu.

<sup>18</sup> Ulke kombu kelo Betani kinye ulke kombu awili Jerusalem kinye paa nondopa mele lerimu, manda manjili kilomita yupoko mele. Nondopa lerimu kolo

<sup>19</sup> Juda imbo awini Lasarus kolorumu ungu pilkolio Marta Maria talo moloringilina eno kola aulke orangi.

<sup>20</sup> Martani Jisas orumu ungu pilipelie yuni aulkena kanopo limbo nimbe purumu, nalo Maria yu ulke tuku we molorumu.

<sup>21</sup> Martani Jisas kanopa lipelie yundo nimbeindo, "Awilimu, nu ya peya molemalanje nanga kemulu naa kolka."

<sup>22</sup> Nalo na i tepo lipo manjiro. Kinye kape nuni Gote kinye konge tenio wali nu konge tenio ungumu yuni pilipelie nu timbelo," nimu.

<sup>23</sup> Jisasini yundo nimbeindo, "Kemilie altopa makilipe koinjo molombalo," nimu.

<sup>24</sup> Martani nimbeindo, "Paimbo. Mulu mai pora nimbelo walimunga imboma makilko koinjo molonge ulu pulumu kinye koinjo mololi ulu pulumu kinye aku ulu talonga pulumu na. Moro mele paimbo nimbe na ipuki tirimo imbomu kolopalie koinjo molopa kau pumbelo."

<sup>25</sup> Jisasini yundo nimbeindo, "Imbo makilko koinjo molonge ulu pulumu kinye koinjo mololi ulu pulumu kinye aku ulu talonga pulumu na. Moro mele paimbo nimbe na ipuki tirimo imbomu kolopalie koinjo molopa kau pumbelo.

<sup>26</sup> Imbo koinjo molopalie na paimbo Goteni lipe mundurumu iyemu nimbe ipuki timo imbomu paimbo kamukumu naa kolopa waliwalima koinjo molopa kau pumbelo. I nio ungumu, paa nio ningi ipuki tirinoya?" nimu.

<sup>27</sup> Martani Jisasindo nimbeindo, "Paa lepamo, Awilimu. Goteni lino nokopa kondombalo iye te lipo mundumbo nimu iye nomi Kraist, yu Gotenga Malo, aku maina ombalo iyemuya nu lepamo ipuki tiro," nimu.

### *Jisas kola terimu ungumu*

<sup>28</sup> Martani aku tepa nimbelie yu anjo pumbelie angenu Maria kiyengo nimbe nimbeindo, "Ungu Mane Tilimu ombo molopalie, Yu morona owi nimo," nimu kani

<sup>29</sup> Maria pilipelie yu tamburumbu ola angilipe Jisas molorumuna purumu.

<sup>30</sup> Kola ulke moloringina Jisas oi naa ombo, Martani yu aulkena angilipili pumbe kanopa orumu akuna yu we molorumu.

<sup>31</sup> Aku wali Juda imbo kola ulke peya moloringimani Maria tamburumbu ola angilipe ombo pena purumu ulu kanokolio ningimuni, "Yunge kemulu ono tengai kombuna kola tembai pumonje," ningo lombili purungi.

<sup>32</sup> Maria Jisas angilerimuna ombo Jisas kanopalie yunge kumbekerena ombo tamalu pepali nimbeindo, "Awilimu, nu ya peya molemalanje nanga kemulu naa kolka," nimu.

<sup>33</sup> Maria kinye Juda imbo yu kinye peya oringga kinye kola terigi ulu kanopalie Jisas eno paa kondo kolopa konopu umbuni awili tepea kolorumu.

<sup>34</sup> Yuni waltindipelie nimbeindo, "Ono tenu tengaya?" nimu.

Enoni topondono ningeindo, "Awilimu, nu ongo kanowi," ningi.

<sup>35</sup> Jisas kola terimu.

<sup>36</sup> Aku terimu ulu kanokolio Juda imboni ningeindo, "Kaname! Kolomo kano iyemu paa konopu mondoromo ltemo," ningi.

<sup>37</sup> Nalo mareni ningeindo, "Imbo mongo keri leli imbomando melema kanangei nimu iyemu yuni wi kolomo iyemundo naa kolopili manda naa nilkaya?" ningi.

### *Jisasini Lasarus ono kombuna topa makinjirumu ungumu*

<sup>38</sup> Jisas yu altopa eio konopu lepalie ono kombuna orumu. Yu ono terigi wali kou angana noiko aku kou anga kerepuluna kou awili te pipi tiko noieringi lerimu.

<sup>39</sup> Jisasini nimbeindo, "Koumu wendo lieio," nimu.

Nalo kolorumu iyemunga kemulu Martani nimbeindo, "Awilimu, yu ono kombuna pepili wali kite ombo pumo lkupindi paa tombalo," nimu.

<sup>40</sup> Jisasini yundo nimbeindo, "Nani nundo na ningo ipuki tinio lemo nuni Gotenga engemu kanonio nindu kanomuaku naa piltinoya?" nimu,

<sup>41</sup> Aku tepa nimu wali enoni kou akumu wendo ltingi. Aku wali Jisasini olando tipe kanopalie nimbeindo, "Ara, nuni na pilin-iomunga nani nu paa tereno nio.

<sup>42</sup> Nuni nanga ungumu waliwalima pino, nuni pino mele pio nalo imbo ya i angiltiemelemani na nuni mundurunu iyemu ningi pilengei nimbo nani nundo nio unguma piliniomunga paa tereno nio," nimu.

<sup>43</sup> Aku ungu nimbelie nimumuni, ru nimbelie nimbeindo, "Lasarus, nu makilko wendo wa!" nimu.

<sup>44</sup> Kano wali iye kolorumu kanomu makilipe wendo orumu. Yu wendo orumu wali yunge kimbo kima banisini ka toko yunge kumbekeremu kape maminyeni okoko yu onto teringima wendo naa lipe we omba angilerimuna kanopalie Jisasini angileri imbomando nimbeindo, "Yu okonge akuma wendo lieio! Yu omba pupili!" nimu.

*Jisas tongueindo langi ningi ungumu*

<sup>45</sup> Lasarus kolorumu wali Jisasini yu topa makinjirimu ulu kanokolio Juda imbo kola ulke oringimanga awinini ipuki tiringi.

<sup>46</sup> Nalo maren i Farisi iyema Jerusalem moloringina pungo Jisasini terimu mele temane toko tiringi.

47 Aku ungumu pilkolio Farisima kinye Gote popo tondoringi iye awilima kinye enoni lino Judamanga kaunsilima pali maku tamili waio ningolio ningeindo, "Linoni i iyemu ambe temoloya? I iyemuni ulu engo nili awini teremo," ningi.

48 "Linoni yu aku tepa uluma tepa molopili tiye kolomolo lemo imbomani pali yu Goteni lipo mundumbo nimbe panjirimu iye Kraist ningi ipuki tikolio yu lombili andonge wali Rom gavmanemu lino kinye opa temolo konopu lekolio ningemuni, ongo linonga Gote popo topo melema karomolo ulke tempelemu toko tekiriko linonga im-boma toko bulubalu tiko mundunge," ningi.

49 Kano wali enonga iye Kaifas nili iye te,  
yu aku poinyemunga Gote popo tondoringi  
iyemanga iye nomi awilimu molorumu,  
yuni nimbeindo, "Eno keke lepo toko, i ulu  
wendo oromumonga pulumu naa pimele.

"... Linonga imboma pali kolonge molo imbo te imbomanga pali kolo wangopa kolombalo manda tembaloo konopu ltemeleya? Teni aku tepa kolombalo, manda," nimu.

<sup>51</sup> Aku nimu ungumu yunu pilipe naa nimu. Yu aku poinyemunga Gote popo tondoringi iyemanga iye nomi awilimu molorumumunga Goteni yunge konopuna tukundo i tepa nipili nimbe tope tirimuna aku tepa nimu. Jisas Juda imbomanga pali nimbe kolo wangopa kolombalo ulumundo Kaiafas nimu.

<sup>52</sup> Nalo Juda imbomanga kau molo. Gotenga bakulu kombumanga pali momomele akuma peya tendekuna lipe mepa omba nombeya tembalomunga yu enonga peya nimbe kolombalomundo Kaifas yuni nimu.

<sup>53</sup> Kaifasini kerena nimu ungu pilkolio kaunsilima enoni Jisas tongeindo aku wali pulu polko langi ningi.

<sup>54</sup> Juda iye awilimani yu tongeindo langi ngingi ungu pilipelie Jisas eno moloringina kanangel naa andorumu. Yu eno tiye kolopa imbo naa peli kombuna nondopa lerimu ulke kombu Ipereme pumbe, akuna yunge lombili andolima peya moloringi.

<sup>55</sup> Juda imbomanga Pasova Wai Awilimus nondopa wendo ombai terimu kinye Juda imbo awini enonga pulu kombuma tiye kolko pungo, Goteni eno kake tepili molonge kanombalo uluma tingeindo Jerusalem olando puringi.

<sup>56</sup> Akuna pungolio Jisas korokolio, Gote popo toko kaloringi ulke tempelena makutoko angilkolio nendo yando ungu ningolio ningeindo, "Eno ambele konopul temeleya? Pasova uluma peya kanamili nimbe naa ombaloya?" ningi.

<sup>57</sup> Nalo Gote popo tondoringi iyemanga iye awilima kinye Farisi iyema kinye kano Juda iye awilimani oi ningō panyikolio ningeido, "Imbo teni Jisas tengā molomona kanomo lemo, ka tiemili linondo nimbe tipili!" ningi.

12

*Lasarus singa kemulu Mariani Jisasinga  
kimbona kopongo wel kandorumu ungumu*

<sup>1</sup> Pasova Wai Awilimu, wendo ombaingo wali kite talo pakera we pepili Jisas Lasarus molorumu ulke kombu Betani purumu. Kano iyemu yu oi kolorumu ono teringi kinye pele Jisasin wendo wa nimu wali yu makilipe wendo orumu.

<sup>2</sup> Betani kanona ulke tengah imboma langi Jisas peya nongeindo langi awili kaloringi. Lasarus kemulu Martani langima moke temimu. Jisas peya langi nongo moloringi imbomanga te Lasarus yu.

<sup>3</sup> Aku wali Lasarus kemulu Mariani mune toli wel nat ningi mingi te lipe Jisas molorumuna mepa orumu. Aku nat yunge mingi tengi skel wan lita mele, akumu kou mone paa pulumu purumu. Lipe mepa om-balie nimumuni, Jisas singa kimbo talonga kandopalie Maria yunge pinyendimu lipe kimbo talo kulu tondorumu. Ulkena tuku mune paa pengare torumu.

<sup>4</sup> Nalo Jisas yunge lombili andoli te, Judas Iskariot, yuni pele Jisas lipe Jisas yunge opa pule imboma tirimu iye kanomu, yuni nimbeindo.

<sup>5</sup> "Yuni ambe temona i wele mune paa toli mingi pali we naa timoya? Tilkanje akumunga iye teni poinye tendekumunga kongono tepa kou limo mele pali lipolio imbo koropama moke tepo tilimala," nimu.

<sup>6</sup> Nalo yuni koropama kondololapie aku tepa naa nimu. Yu wapu limbeindo nimu. Yu Jisas lombili andoli iyemanga kou walemu nokopa mendepa, enonga kou mone lakileringima waliwalima yu wapu itimu.

<sup>7</sup> Judas Iskariot yuni aku tepa nimu wali Jisasini topondopalie nimbeindo, "Ambo-muni temomunga ungure naa niwi! Na ono tenegeimunga kandombaindo paa noirimu.

<sup>8</sup> Imbo koropama eno kinye peya waliwalima molonge nalo na peya waliwalima naa molomolo," nimu.

*Gote popo tondoringi iye awilimani Lasarus kape tamili ningi langi ningi ungumu*

<sup>9</sup> Jisas ulke kombu Betani ulke tengamolorumu Juda imbo awini pilkolio yu molorumuna oringi. Jisas kau kanongeindo naa oringi. Lasarus oi kolorumu Jisasini topa makinjirimu kano iyemu koinjo molorumu mele kanongei oringila.

<sup>10</sup> Aku teringina Gote popo tondoringi iyemanga iye awilimani pilkolio Lasarus kape tongeindo langi ningi.

<sup>11</sup> Lasarus kinye ulu enge nili te wendo orumumunga Juda imbo awini enonga Juda iye awilima tiye kolko Jisas lombili andoringimunga Lasarus yu kape tamili ningi langi ningi.

*Jisas Jerusalem tukundo pumbeipurumu wali iye nomi king te ulke kombu tengatukundo purumo wali teremele ulu teringi ungumu*

<sup>12</sup> Imboma Pasova Langi nomolo ningi ulke kombu awili Jerusalem tukundo tukundo ongo maku toko moloringi. Jisas oliangakondo ulke kombu Betani Lasarusinga ulkena molorumu. Pele otilikondo yu Jerusalem ombai orumu wali kano imbo maku toko moloringimani pilkolio ningimuni,

<sup>13</sup> enoni yawaye gomo mele mare langoko meko pungo, aulkena Jisas lingei pungolio enge ningi ningeindo, "Gote kapi neio! Awilimunga imbina kongono tembai oromo iyemu Goteni nokopa kondopili! Israel imbomanga iye nomi King nokopa kondopili!" nilko purungi.

<sup>14</sup> Jisas kongi donki te koropa kanopa lipe, ola pumbe molopa orumu. Aku terimu wali Gotenga ungu pele wendo ombalo toko panjiringimu wendo orumu. Aku ungumu i tepa,

<sup>15</sup> Jerusalem imboma, pipili naa kolai! Iye nomi kingimu kongi donki angilimbelo tengenya umbuluna molopa oromo kanaia!

(Sek 9:9)

nimbe moromo.

<sup>16</sup> Oi Jisas naa toli eno kinye molorumu wali yu lombili andolimani kano ulumanga pulumu naa pilko ltingi, pele kau liko manjiringi. Jisas yu imbomani torangi Goteni yu kelepa mulu kombuna olando lipe yu tepa kondorumu wali eno kano uluma, oi yu mulu kombuna naa pupili wendo orumu, kelko pilkolio, Jisas maina mainye naa opili yundo pele wendo ombalo mele oi bukuna toko panjiringi mele pele imbomani yu kinye teringi mele kape yuni terimu mele kape liko manjiringi.

<sup>17</sup> Imbomani Jisas aulkena we naa lipuringi. Oi ulke kombu Betani Lasarus kolopa ono kombuna perimu kinye Jisasini yu topa makinjirimu imbo maku toko moloringi mareni kanoringi. Aku imbomani kano ulu enge nilimu Jisasini terimuna kanoringi temanemu andoko torangi.

<sup>18</sup> Aku wali imbomani yu kano ulu enge nili terimumu pilkolio yu aulkena lingei purungi.

<sup>19</sup> Aku teringi ulu kanokolio Farisi iyemani enonga awilimando ningeindo, "Kanaio! Enoni yu toko mainye mundungei teremele mele manda naa teremo. We imboma pali pungo yu lombili purumele," ningi.

*Grik imbo mareni lino Jisas kanamili ningi ungumu*

<sup>20</sup> Pasova Wai Awilimu pilinge uluma tengenya walimu wendo ombai terimu wali imboma Gote popo tondopo yunge imbilipo ola mundemili ningi Jerusalem purungi kano imbomanga Grik imbo mare eno waye purungi.

<sup>21</sup> Aku imboma kombu Galili ulke kombu Betsaida iye Filip molorumuna ongo yu waltindiko ningeindo, "Awilimuya, lino Jisas kanamili!" ningi.

<sup>22</sup> Ningi ungu Filiponi pilipelie anjo pumbe Andru nimbe tirimu. Aku wali Jisas lombili andoli iye Filip Andru talo elo pungo Jisas ningi tiringili.

<sup>23</sup> Jisasini topondopa yu nondopa tembalo mele nimbe tipelie nimbeindo, "Iyemunga Malo altopa pumbe yunge kombu pengana molopa kondombalo waimbu wendo oromona imbi awili limbelo.

<sup>24</sup> Nani enondo ungu paimbo i tepo nimbo tiro. Langi mongo maina mainye pumbe naa pemo lemo yunge yunu kau we lembalo. Nalo yu muli tombaindo maina mainye pumbe pemo lemo muli topa wendo omba mongo awini tombalo. Aku

tepala na naa kolondu lemo nanga imbo awini naa molonge, nanu kau molombo.

<sup>25</sup> Imbo teni maina uluma konopu mondomo lemo yu kolopalie kombu kerina mindili nomba molopa kau pumbelo. Nalo imbo te na lombili andopa nanga kongono tendembaindo yu maina mindili nombu molombo mandala, kolombo mandala konopu lemo imbo te yu pele kamukumu molopa kondopa kau pumbelo.

<sup>26</sup> Imbo nanga kongono tenderemo imbo te yu na lombili andopa na tero mele tepili! Na imboma lipo tapondopo, Gotenga ungumua enondo nimbo timboindo mindili nombo moro mele kano imbomuni aku tepa nanga kongono tepili! Aku wali na molombo kombuna nanga kendemande kape peya kopu tepo molombolo. Imbo te nanga kongono tepa molomo lemo pele Arani aku imbomunga imbi lipe ola mundumbelo," nimu.

#### *Jisas kolombaindo ungu te nimu*

<sup>27</sup> Jisasini ungu te peya nimbeindo, "Imbomani na tongeimunga kinye na mini purumo. Ambele ungu nimbonje? Arando Ara, kinye na ulu pulu wendo ombai oromomu naa wendo opili niwi nembonje? Aku molo. Na i ulu pulumu wendo opili nimbo oru.

<sup>28</sup> Ara, nunge imbi ola pupili niwi," nimu.

Aku wali ungu te mulu kombuna wendo omabalie nimbeindo, "Nanga imbimu oi ola purumu. Pele kinye kamukumu ola pumbelo," nimu.

<sup>29</sup> Maku toko moloringi imbomani aku ungumu pilkolio ningimuni, "Mulu topamo," nimu. Mareni ningeindo, "Mulu kombuna ensel teni yundo ungu te nimo," nimu.

<sup>30</sup> Jisasini nimbeindo, "I ungu wendo omomu na lipo tapambo nimbe i ungumu naa nimo. Eno konopu enge nipili molangei nimbe i ungumu nimo.

<sup>31</sup> Kinye Goteni mai kombuna imboma moke tembal walimu nondopa wendo ombai teremo. Na kolombo wali Goteni mai kombumunga iye nomi Satan tepa mainye mundumbelo.

<sup>32</sup> Nalo na liko ola mondonge wali na molombona imboma pali waio nimbo," nimu.

<sup>33</sup> Yu kolopili ningi unjona pirimu toko uku tonge yunge lombili andolima pilengei nimbe aku tepa nimu.

<sup>34</sup> Aku tepa nimumunga imbo maku toringimani ningeindo, "Gotenga Ungu Manema Moromo Bukuna Goteni lipo mundumbo nimbe panjirimu iye nomi Kraist omabalie naa kolopa, waliwalima molopa kau pumbelo nimbe moromo kanomu pilipo moromolo. Akumunga nuni

Iyemunga Malo liko ola mondonge nino akumu ambe telka ninoya? Iyemunga Malo ninomu nariya?" nimu.

<sup>35</sup> Kano wali Jisasini enondo nimbeindo, "Wali alaye kolo pa telimu eno kinye molombalo. Akumunga pa tendelimu eno kinye moromo wali eno pangei! Pele eno tumbulumbuni pipi naa tipili! Imbo tumbulu tolina purumo imbmamu purumo aulkemu kanopa imbi naa tirimo.

<sup>36</sup> Kinye pa telimu eno kinye moromo kani lino pa telimanga imboma molamili ningi pa telimu paimbo ningi ipuki tiengei!" nimu. Unguma nimbe pora tipelie nimumuni, Jisas imboma tiye kolopa tenga pumbe lopeke tepurumu.

#### *Juda imbomani Jisas ipuki naa tiringi*

<sup>37</sup> Jisasini ulu enge nili awini terimuna imbomani kanoringi nalo yu Goteni lipe mundurumu iyemu ningi ipuki naa tiringi.

<sup>38</sup> Gotenga profet iye Aisaiani oi nimu mele kamukumu wendo orumumunga enoniaku teko ningi naa pileringi. Aisaiani nimbeindo, "Awilimu, linoni nimbo tirimulu unguma narini paimbo nimele nimbe pilimoya? Awilimuni yunge enge nari lipe ondorumuya?" (*Ais 53:1*)

nimu.

<sup>39</sup> Aisaiani ungu te kape nimbeline aku imbomani ipuki naa tinge ungumungu pulumu mona lepili i tepe nimbe para tirimu:

<sup>40</sup> Goteni enonga mongoma pipi tindipe, enonga konopuma pipila tindirimuna eno mongoni naa kanoko, konopuna melte naa pilko, konopu topele toko na morona naa wangei!

Olemalanje tepe koinjo leka nimbeline enonga mongo konopu talo aku ulu terimu,

<sup>41</sup> Aisaiani Jisasinga engemu kanopalie aku tepa nindirimu.

<sup>42</sup> Aku ungu peremo nalo Juda iye muli muli awinini Jisas paimbo Goteni lipe mundurumu ningi ipuki tiringi. Nalo eno Farisi iyema pipili kolkolio, yu paimbo nimbo para timolo wali Farisi iyemani Gotenga ungu maku topo pimolo ulkemanga naa waio ningi kamukumu makoronge ningi pilkolio, ningi para naa tiringi.

<sup>43</sup> Eno Goteni kapi nimbeline kinye penga ningi naa pilko, imbomani lino kapi ninge kinye penga ningi aku teko we molko, Jisas paimbo ningi ipuki tiringi mele ningi para naa tiringi.

#### *Jisasini nimu ungumuni altopa imbomanga ulu teremelema apurumbelo*

<sup>44</sup> Kano kinye Jisasini ru nimbeline nimbeindo, "Imboma na paimbo ningi ipuki

tirimele imboma na kau paimbo ningi ipuki naa tirimele. Na lipe mundurumu iyemu paimbo ningi yu kape ipuki tirimele.

<sup>45</sup> Aku imbomani na kanokolio wali na lipe mundurumu iyemu kape karomele.

<sup>46</sup> Imbo teni na paimbo lepamo nimbe ipuki timbelo imbonu, yu tumbulu tolina naa molopili nimbo na mai kombumanga pali pa tendelimu mai kombuna oru.

<sup>47</sup> Nalo imbo te nanga unguma pilipelie nalo naa tengi timo lemo nani yu kot naa tendembo, aku ambe telka, nani mainaimbomanga kot pilipo mindili nongo molangei nimbo naa oru. Mindili naa nongo, molko kenjingei aulkena tiye kolko wendo ongo Gote kinye molangei nimbolio oru.

<sup>48</sup> Imbo te na umbulu tipe nanga unguma paimbo nimbe naa pilipe limbelo imbonu kot tendepa apurumbelo melemu peremo. Mulu mai pora nimbelo wali kinye ungu nimbo tiro ungumani yu kot tendembalo.

<sup>49</sup> Aku ambe telka, Arani na lipe mundupelie niwi nimo ungu pilipolio nio. Na nanu konopuni pilipolio i unguma naa nio.

<sup>50</sup> Arani niwi nimona nio ungumuni imboma waliwalima koinjo molko kondoko kau punge ulu pulumu tirimo nimbo piomunga yuni aku teko ningi tiwi nimo ungu nimbo tiro," nimu.

## 13

*Jisasini yu lombili andoli iyemanga kimboma kulumie tondoramu temanemu*

<sup>1</sup> Israel imbomani Goteni oi Pasova walimu kinye terimu mele liko manjingeindo kongi sipsip nongei walimu otilikondo ombai terimu. Jisas yu nondopa mai kombu tiye kolopa Lapa moromondo pumbelomunga lipe manjirimu. Yuni yunge maina moloringi imboma kinye andopa konopu mondopalie kolombai terimu wali eno paa lakopa konopu mondopalie yu pumbe kolorumu.

<sup>2</sup> Jisas yunge opa pule iyema Saimon Iskariot malo Judasini lipe timbelo ungumu kuromanga iye nomi awili Sataneni Judas yunge konopuna oi topopero tipili, Jisas kinye yu lombili andolima kinye ipupene langi nongo moloringi.

<sup>3</sup> Jisas, Lapani melema pali yu nokowi nimu pilipelie, yu Gote tiye kolopa mainye orumu altopa Gote moromona olando pumbesi terimu, pilipe molorumu.

<sup>4</sup> Aku ulu pilipelie, yu langi nongo moloringi polomu tiye kolopa ola angilipelie yunge ola wale pakoli pakorumumu kulupe wendo lipe noipe, ulke pulu imbomanga kimbo kulumie tondongeindo kendemande imbomani teringi mele yuni

kangi kulu toli maminye te lipe panjipelie nimumuni,

<sup>5</sup> plet tenga no ondopa mundupe yu lombili andolimanga kimboma pulu polopa kulumie tondopa kulu toli maminye porona panjirimumuni kulu tondorumi.

<sup>6</sup> Kulumie topalie kulu tondolipe ombalie Saimon Pita molorumuna orumu wali Pitani yundo nimbeindo, "Awilimu, nuni nanga kimbomu kulumie tondoni terenoya? Aku manda molo," nimu.

<sup>7</sup> Jisasini topondopa yundo nimbeindo, "I tero mele nu kinye naa liko manjirino nalo akilio liko manjinio," nimu.

<sup>8</sup> Pitani yundo nimbeindo, "Nu nanga iye Awilimu kani kinye kape altoko kape nuni nanga kimbo talo kulumie paa naa tondonio, molo," nimu. Jisasini nimbeindo, "Kulumie naa tondondu lemo na nu kinye peya kopu tepo naa molombolo," nimu.

<sup>9</sup> Pitaniaku nimu ungu pilipelie nimbeindo, "Awilimu, aku ulu tembalu kani kimbomu kau molo! Kimbo ki kape kangima pali kulumie tondowu!" nimu.

<sup>10</sup> Jisasini nimbeindo, "Imbo te yunge kangima pali kulumie topalie pele yu kombu tenga purumo wali yunge kimboma mai angimo kelepa kulumie toromo wali yu kangima pali altopa kake teremo. Kinye eno kake tepili moromele, nalo eno palire molo," nimu.

<sup>11</sup> Waye moloringimanga iye teni na lipe nanga opa pulema langi nimbelie lipe timbei teremo lemo lipe manjipelie kano iyemu konopu kalaro molopili moromo nimbeindo ungu iko topa eno palire kake tepili naa moromele nimu.

<sup>12</sup> Kano wali yuni enonga kimboma kulumie topa pora tindipe, yunge kulupe noirimu kano wale pakoli lipe pakopa mainye molopalie nimumuni, eno waltindipelie nimbeindo, "Nani, kinye enonga tendendumga ulu pulumu enoni liko manjirimelya?

<sup>13</sup> Enoni na Ungu Mane Tilimu ningi, Awilimu ningi imbi tirimele. Aku imbi talo paimbo tirimele, na aku tepo moro.

<sup>14</sup> Na enonga Awilimu molopo enonga Ungu Mane Tilimu moro nalo kinye enonga kimboma kulumie tondondu kani eno kape nendo yando enonganano kimbo kulumie tondangeila nio.

<sup>15</sup> I ulu pulumu nani eno teangei nimbo lipo ondoro kani enoni aku teko akilio kape teao! Kimbomundo kau naa nio. Eno imbo pengama molopolio lupema lipo naa tapondomolo naa ningi, kendemande mele molamili ningi molangei nimbo i ulumu tero.

<sup>16</sup> Nani enondo ungu paimbo i tepo nimbo tiro. Kongono tendeli imbo teni yunge nokoli iyemu maindo yu iye nomi kelkele

naa topili. Imbo kongono pumbe tenderemo imbo teni yu kongono pumbe tendepili nimbe mundurumo imbomu akumu maindo na paa olando aku tepa manda naa nimbelo kani na enonga Awilimu molopolio enonga kongono keri te tendero aku mele eno imbo lupemangaaku teko kongan tendao!

<sup>17</sup> Enoni i unguma pilko kondokolio nio ulu tengen lemo Goteni eno tepa tono kondonbalomunga paa tono kolonge.

<sup>18</sup> Nani enondo nio akumu eno palindo naa nio. Nanga iyema nimbo oi kanopo ltiu, nalo Gotenga Bukuna ungu te moromo mele aku tepa wendo opili nimbo enonga imunana iye te kanopo ltiu. Aku ungumu moromo mele i tepa:

Na kinye peya langi nombo moromolo iye te nanga opa pule iyemu moromo. (Sng 41:9)

<sup>19</sup> Aku ulumu wendo ombalo kinye na paimbo oi molorumu, kinye molopa kau purumo iyemu lepamo ningopilengenimbo akumulmu oi wendo naa opili nani nangumueno nimbo tiro.

<sup>20</sup> Enondo ungu paimbo i tepe nimbo tiro. Imbo te nanga kongono tendepuwi nimbo lipo munduro imbomu kombu tengapumbe imbo te moromona purumo kinyepaa orono, peya molambili owi nimo imbonuni na kape peya molambili owi nimola. Nando peya molambili owi nimo imbo akumuni na lipe mundurumu iye Ara kape peya molambili owi nimola," nimu.

*Judasini opa pulema wai topa panjipelie Jisas lipe timbeli purumu temanemu*

<sup>21</sup> Jisasini aku tepa nimbelie nimumuni, yunge konopu paa umbuni terimu kolo yu lombili andoli iyemando nimbe tipelienimbeindo, "Nani eno ungu paimbo i tepe nimbo tiro. Eno moltomele iyemanga teni na lipe opa pulemanga kindo timbelo," nimu.

<sup>22</sup> Yuni aku nimu ungu pilkolio lombili andolima enonganoneno yando kumbekerenane kana ya kana tekolio i ulumu narini tembalonje konopu leringi.

<sup>23</sup> Enonga iye te, Jisasini paa konopu mondorumuaku iyemu Jisas kinyekopu tepa molorumu.

<sup>24</sup> Akumunga Saimon Pitaniaku iyemundo mai kuye lepalie nimbeindo, "Inarindo nimonje? Waliko piliwi!" nimu.

<sup>25</sup> Kano wali lombili andoli kanomu Jisas kopu tepa molopalie yundo komuna olotopalienimbeindo, "Awilimu, narindo ninoaya?" nimu.

<sup>26</sup> Jisasini topondopanimbeindo, "Nani langi te lipo timbo iye akumundo nio," nimu. Aku tepa nimbelie langi te lipe Saimon Iskariot malo Judas tirimu.

<sup>27</sup> Jisasini langi tirimumu Judas ltimuwali yunge konopuna kuromanga nomi Satan tukundo purumu kinye Jisasini yundo nimbeindo, "Tembo konopu lteno ulumu welea pungo tepuwi!" nimu,

<sup>28</sup> nalo langi peya nongo moloringiyema Jisasini Judasindo ungu nimumunga pulumu naa liko manjirangi.

<sup>29</sup> Judasini enonga kou walemu nokondoromomunga marenipilkolio Wai Kake Telimanga langi nomolo mare pumbe topo topa lipupili nimbe nimunje molo imbo kropama lipe tapondopakou mare pumbe tipupili nimbe nimunje konopu leringi.

<sup>30</sup> Judas langi tirimumulipeliewalitikale ombara pena purumu wali kombutumbulutopapepilipurumu.

*Jisasini Pitando Yu altopatiye kolopaubulutimbelomeleinbe para tirimu temanemu*

<sup>31</sup> Judas Iskariot pena purumu kinye Jisasini we lombili andoli ulkenapeya moloringimando nimbeindo, "Kinyenayemunga Malo imbimu paa olandopamolombai teremo. Kano kinyenangimbi paa olandopamolombalomunga Gotenga imbimu kape paa olandopamolombalo.

<sup>32</sup> Aku wali na Iyemunga Malo imbi paa olandopamolombalomunga Gotenga imbimu paa olandopamolomo lemo Goteni kano iyemunga imbimu kinyewaye tala paa olandopamolopili nimbelo. Aku nimbelomu paa nendo mundupe nimbelo.

<sup>33</sup> Nanga bakuluma, na eno kinye alayekolo molto. Altoko enoni na koroko kelenge. Juda iye awilima oiaku tepe nindumele kinye enondoaku tepe nimbo tiro. Na pumbói terokombuakuna eno manda naa onge.

<sup>34</sup> Eno teangei nimbo ungu mane koinjongamu eno nimbo tiro. Eno nendo yando konopu mondangei! Nani eno konopu mondondumele eno nendo yandoaku teko konopu mondangeila!

<sup>35</sup> Eno nendo yando konopu mondonge lemoaku teko tengewali weimbomanikanokolio eno nanga kitipi kanoliimbomaitemingo kanonge," nimu.

<sup>36</sup> Saimon Pitaniyu waltindipelie nimbeindo, "Awilimu, nu tenapuniya?" nimu.

<sup>37</sup> Jisasini topondopanimbeindo, "Na pumbona nui teli oimanda naa onio. Nalo akilio nupaimbolombili onio," nimu.

<sup>38</sup> Pitani waltindipelie nimbeindo, "Awilimu, nu puniaulkena na i teli oiambe temona manda lombili naa omboya? Nunge opatondopolionakolondulemo manda," nimu.

<sup>39</sup> Aku nimu ungu pilipelie Jisasini topondopanimbeindo, "Nuni paimbo nangaton-dokokolonioya? Nani nundo ungu paimbotepo nimbo tiro. Kera gula oiko naatopili

Jisas naa karo ningi wali yupoko tendenio," nimu.

## 14

*Jisasini Lapa moromona imboma punge aulkemu Na kau nimu ungumu*

<sup>1</sup> Jisasini yunge lombili andolimando kelepa nimbeindo, "Eno konopuna umbuni tepili mini iteko naa molaio! Gote ipuki tirimele. Na kape ipuki tieio.

<sup>2</sup> Aranga ulkena kiripi pulumu itemo. Naa lekanje nani enondo naa itemo nilka. Nalo paimbo itemomunga nani enonga molongei kombumu pumbo tepo amenge tendepuro.

<sup>3</sup> We naa tendembo. Enonga molongei kombumu pumbo tepo amenge tendepolio nimbomuni, na molombona eno peya molamili nimbo eno ombo limbo.

<sup>4</sup> Kombu pumbomunga aulkemu eno karomele," nimu.

<sup>5</sup> Lombili andoli iye Tomasini yundo nimbeindo, "Awilimu, nu kombu puniomu lino naa karomolo. Aku tepolio lino aku kombumunga aulkemu ambe tepo kanomoloya?" nimu.

<sup>6</sup> Jisasini yundo nimbeindo "Na aulkemu, na paimbo ungumu, na koinjo molko kau puli pulumu. Imbo te Ara moromona pumbaindo na molombona kau manda ombalo. We aulke te molo.

<sup>7</sup> Enoni na paa liko manjilimalanje Ara liko manjilimala. I nimbo tiro wali Ara pulu polko kanoko imbi tirimele," nimu.

<sup>8</sup> Yu lombili andoli iye Filiponi yundo nimbeindo, "Awilimu, Lanie liko ondowi! Kanopolio lino molopo kondomolo," nimu.

<sup>9</sup> Jisasini yundo nimbeindo, "Pilip, na eno kinye koro mololipo omolo kano nalo na Ara mele moro alaye naa liko manjirimeleya. Na karomelemani Ara karomele. Kinye Ara liko ondowi nino akumu ambe telka ninoya?

<sup>10</sup> Na Aranga konopuna tukundo molopo yu kinye kopu tepo moro, yu nanga konopuna tukundo molopa na kinye kopu tepa moromo. Aku ulu ipuki naa tirimeleya? Ungu enondo nioma nanga konopuna pilipolio naa nio. Ara nanga konopuna tukundo molopalie na ulu teroma yuni yunge kau teremo.

<sup>11</sup> Na Ara kinye konopuna tukundo moro, yu na kinye konopuna tukundo moromo nio akumu paimbo nio ipuki tieio! Molo ungumu kau pilkolio paimbo nimo ningi we naa ipuki tienge lemo nani ulu enge nili teroma kanokolio Arani manda teremo ulu enge nilima mele kau nani paimbo aka tepa teremo ningi kanokolio Ara na kinye tendeku tipo morombolo nio paimbo nimo lepamo ningi pileio nimu.

<sup>12</sup> Nani enondo ungu paimbo i tepo nimbo tiro. Na ipuki tinge imboma nani ulu enge nilima tero mele aka imbonani aka teko tengela. Nalo Ara moromona pumbomunga enoni ulu enge nili ongondoko tengen.

<sup>13</sup> Na Maloni Ara imbi kapi nengei nimbolio nanga imbina konge tengen lemu pali tembo.

<sup>14</sup> Nando ulu te molo mele te nanga imbina konge tengen lemo akumu tembo," nimu.

*Jisasini Gotenga Mini Kake Telimu ombalo nimu ungu*

<sup>15</sup> Jisasini ungu te peya nimbeindo, "Enoni na konopu mondonge lemo nanga ungu mane tiroma pilko tengen tinge.

<sup>16-17</sup> Aku tengen wali nani Arando enonga konge tendembo kani yuni Lipe Tapondoli te lupe eno kinye kamukumu molopili nimbe akumu eno timbelo. Aku Lipe Tapondolimu, Paimbo Unguma Lipe On-doromo Mini Kake Telimu. Imbo wemani yu naa kanoko naa liko manjirimelemunga Mini Kake Telimu manda naa linga. Nalo na lombili andolina, Mini Kake Telimu eno kinye moromo, akilio enonga konopuna tukundo molombalo akumunga enoni yu liko manjirimele.

<sup>18</sup> Pumbolio nimbomuni, nani eno enongan bakulu kolu muluma mele molangei nimbo naa timbo, molo. Kelepo eno molongena ombo.

<sup>19</sup> We imbonani na naa kanonge waimu nondopa wendo oromo. Nalo enoni na kanonge. Na koinjo molopo kau purona eno kape koinjo molko kau punge.

<sup>20</sup> Aku walimunga enoni pilkolio, na Aranga konopuna tukundo moro mele kape, eno nanga konopuna tukundo moromele mele kape, na enonga konopuna tukundo moro mele kape liko manjinge.

<sup>21</sup> Imbo te yu nani tewi nio ungu manema pilipe moromo imbonu yuni na paa konopu mondoromo. Na konopu mondoromo imbonu Arani kape aka imbonu konopu mondopolio na pilipo moro mele pilipili nimbo yu molombalona ombo tendekuna kopu tepo molopolio moro mele lipo ondombo," nimu.

<sup>22</sup> Jisasini aka tepa nimu wali yu lombili andoli iye Judas nili te, Judas Iskariot molo, Judas te lupe, yuni Jisas yundo nimbeindo, "Awilimu, nuni lino kau lipo ondombo ningi, ambe temona we imbona naa lipo ondombo ninoya?" nimu.

<sup>23</sup> Kano wali Jisasini topondopa yu lombili andolimando nimbeindo, "Imbo teni na konopu mondomo lemo yuni nanga ungu manema pilipe lipe tembalo. Aku tembalo

imbomu nanga Arani konopu mondopalie Ara kinye ilto yu peya tendekuna molamili nimbo yu molombalona ombolo.

<sup>24</sup>Na konopu naa mondoromo imbomuni nanga ungu manema pilipe lipe naa teremo. Ungu niona piltimeli ungumu nangare molo. Arani na lipe mundurumu iye-munga ungumu kau.

*Jisasini eno konopu toimbo topili molangei nimu ungumu*

<sup>25</sup>Na eno kinye molopolio i unguma pali nio.

<sup>26</sup>Nalo na kolo wangopa Arani Mini Kake Telimu eno tapopili nimbe timbelo. Mini Kake Telimu yuni eno unguma pali mane tipe nimbe, nani enondo nio unguma pali te komu tindinge wali aku ungumu altopa nimbe timbelo.

<sup>27</sup>Na konopu toimbo topili moro mele eno konopu toimbo topili molangei nio. Nanga ungumu naa pimele imboma konopu toimbo topili moromele kano tepamundo naa niola. Na konopu toimbo topili moro mele ulu teni eno tepa pipili naa mondopalie eno tepa konopu umbuni naa tipili tepo toimbo tondoro.

<sup>28</sup>Nani oi nindumu eno pilinge. Na eno tiye kolopo pumbo, altopo eno molongena yando ombo nindu ungumunga konopu keri naa panjinge. Ara yu olandopa na mainyendopa. Enoni na konopu mondole-malanje na Ara mulu kombu moromona pumbomungaaku paa tono kolemala.

<sup>29</sup>Pumboi wali nani enondo nindu unguma paimbo nimo ningoo ipuki tiengei nimbolio oi naa pumbolio tembo mele enondo nimbo tiro.

<sup>30</sup>Mai kombumu nokoromo iye nomimu oromona nani eno kinye ungu nilipo naa puro. Na maina molombo walimu pora nimo. Mai kombumunga iye nomi oromomu yu kuromanga iye nomi Satan kanomu. Akumuni na tangei nimbe oromo nalo yuni na naa nokoromona ulure we manda naa tepamo. Nani yuni na ulure tepli nindu lemo na manda tembalo. We manda naa tembalo.

<sup>31</sup>Nalo maina imbonani pali na Ara konopu mondoro ningoo pilengei nimbo Arani nando tewi nimu ungu manema pali pilipo lipo tembo," nimu.

Aku tepa nimbelie, "Manda nio kani kinye pamili waio," nimu.

## 15

*Jisasini Na unjo wainimu, eno unjo wain kouma nimu*

<sup>1</sup>Jisasini yu lombili andolimando nimbeindo, "Na unjo wain paimbomu. Ara yu unjo wain poinye nokoromu iyemu.

<sup>2</sup>Na Unjomu. Nanga koumani mongo naa toromoma pali Arani langopa wendo Iteremo. Kou mongo toromoma pali penga tepa angilipe kamukumu mongo pulumu topili nimbe yuni akumanga unjo kola keri Itemoma langopa wendo lipe tepa amenge teremo.

<sup>3</sup>Lombili andolima, eno nimbo tiro ungu-muni enonga konopu keri oi wendo lipo konopu tepo amenge tendu, eno konopu kake tepili moromele.

<sup>4</sup>Unjo kouma paka tepa wendo oromu-muni manda mongo toromo,aku teko eno na kinye molko, na eno kinye molombo wali eno manda molko ulu pulu pengama tengen. Kou te kerepa mainye oomba Itemoma al-topa mongo naa toromo. Kou unjona ola paka tepa angimomu yu mongo toromo. Aku teko eno na peya kopu tepo molamili naa ninge lemo eno teao nio uluma manda naa teko nanga kongono manda naa tendenge.

<sup>5</sup>Na unjomu, eno kouma. Kou paka tepalie unjona angilipe mongo toromo mele eno na kinye kopu teko molko na eno kinye kopu tepo molopoaku temolo lemo nani teao nio mele eno manda teko nanga kongo-nama manda tendenge. Eno na tiye kolko eno na kinye kopu teko naa molonge lemo nanga uluma eno manda naa tengen.

<sup>6</sup>Unjo kou langoko wendo liko ltekolio, koromo wali aku kouma liko tipena tuku-ruku teremele. Aku tepala, imbo te na kinye naa tengen tipe molopalie ulu pengama naa temo lemo unjo kou kololima teremele mele yu aku ulu tengen.

<sup>7</sup>Eno na kinye kapu teko molko nanga unguma enonga konopumanga pepili pilko liko molonge lemo ulu te teamboa ningoo, ungu te pilemboa konopu leko, melte molo lembalomu liemboa ningoo, Ara konge tengen mele yuni ee nimbef tendembalo.

<sup>8</sup>Eno nani teao nio uluma paa ainye meko tengen wali eno tengen mele imbonani kanokolio eno paimbo Jisasina lombili andolima Itemo konopu lenge. Eno ulu tengen-muni Ara imbi molombalo."

*Eno enonganano nendo yando konopu mondaio nimu ungumu*

<sup>9</sup>"Arani na konopu mondoromo mele nani eno konopu mondoro. Eno nanga konopu mondoli imbona molko paio!

<sup>10</sup>Arani nando tewi nimo ungu manema lombilipo teromunga yunge konopu mondoli iyemu molopo puro mele enoniaku teko nani teao nio ungu manema pilko liko tengen lemo aku ulu tengemunga nanga konopu mondoli imbona molko punge.

<sup>11</sup>Na tonore tepli moro mele eno akiteko tono kolko molangei nimbo i unguma nimbo tiro.

<sup>12</sup> Teangei nimbo mane tiro ungu nimo i tepe: Nani eno konopu mondoro mele enoni enongano nendo yando aku teko konopu mondaio.

<sup>13</sup> Imbo teni yunge kanopa lili imboma konopu mondopalie eno kolo nimbeline kolomo lemo yuni konopu mondoromo mele olandopa, we imbomani konopu mondoromele mele mainyendopa.

<sup>14</sup> Nani enondo teaio nio ungu manema tenge lemo eno nanga kanopa lili imboma molonge.

<sup>15</sup> Kinye nani enondo altopo nanga kendemandema naa nimbo, nanga kanopa lilita nio. Ambe temona, kendemandema enonga nokoli iyemuni uluma tepa konopu lepa andopa moromo mele eno naa nimbe tirimo naa kanoko naa pimelemunga kinye enondo aku tepo nanga kendemandema ungu naa nio. Iye tenga kanopa lilita kau iyemu yu andopa moromo mele nimbe tirimona pimele. Aku tepa pilipolio nani enondo nanga kendemandema ungu naa nio. Arani nando nimbe tirimuna pioma pali eno nimbo tiro kala nani eno nanga kanopa lili imboma nio.

<sup>16</sup> Enoni na linonga Awilimu ningko kanoko naa ltingi, molo. Enope nanga iyema molangei nimbo nani kanopo ltiu. Eno pungo, teaio nimbo mele aku teko nanga kongono tendangei! Aku ulu penga tengema tukume pepili nimbo nani enondo nangama nimbo eno kanopo lipo na lombili waio niu. Akumunga Ara lino Awili Jisasinga imboma moromolo ningko mele te konge tenge wali yuni pilipolie konge tenge meleme eno tipe enonga tendembalo.

<sup>17</sup> Nani eno ungu mane tipolio nanga imboma enongano nendo yando paa konopu mondaio nio."

*Imbomani Jisasinga lombili andolima kinye opa pule tonge ungu nimo*

<sup>18</sup> "We maina imbomani eno kinye opa pule tonge wali aku teko oi na kinye opa pule torangi melela. Opa pule tonge karolo ulumu teremele konopu leao.

<sup>19</sup> Eno we imboma kinye konopu tendekuna pupili molemalanje we imbomani eno linonga imboma ningko konopu mondoemala. Nalo eno we imboma kinye eno manga pupu tendekumu molo. Eno mai kombuna uluma tiye kolko nanga imboma molangei nimbo kanopo ltiungu we imbomani eno kinye opa pule toromele.

<sup>20</sup> Nani eno nimbo tindu unguma konopuna pilko molangei! Nani oi enondo nimboindo, kongono tendeli imbo teni yunge nokoli iyemu mainyendo, yu iye nomi kelkele naa toromo nindu kanomu. Aku teko na mindili liko tirimele mele eno kape

aku tekopu mindili liko tinga. Nanga ungu nimo pilko liko tenge tirimele imbomani enonga ungu nimo pilko liko tenge tingela.

<sup>21</sup> We imbomani Na Lipe Mundurumu iyemu liko naa manjikolio, eno nanga imbi leko kongono tendenge wali eno mindili liko tinga.

<sup>22</sup> Na imboma moromelena ombo ungu te naa nilkanje enoni Goteni lipo mundumbo nimbe panjirimu iyemu liko tui tiko, aku teko ulu pulu keri naa telemala. Nalo kinye na paimbo Goteni lipo mundurumuna ondu iyemu liko tui tirimelemunga ulu pulu keri paimbo naa teremolo manda naa ninge.

<sup>23</sup> Imbo te na kinye opa pule tomo lemo eno imbomani Ara kinye kape opa pule toromele.

<sup>24</sup> Kongono lupe lupema, oi imbo teni ulu enge nilima naa terimu mele nani enonga tuku tingina ombo naa telkanje enoni na liko umbulu tiko ulu pulu keri teremelo mele naa telemala. Nalo ulu enge nili teruma kanokolio kape Ara ilto kinye opa pule toromele.

<sup>25</sup> Nalo enonga ungu mane te Gotenga Bokuna moromo mele ara tirimelemunga eno ulu teremele. Bokuna ungu te moromo mele i tepe,  
Eno na kinye we opa pule toromele. (Sng 35:19, 69:4)

<sup>26</sup> Ara kinye Lipe Tapondolimu kinye morombelena pumbolio enonga tapopilimtu tipo mundumbo akumu ombalie nimbeleni, nanga ulu tero mele eno nimbe timbelo. Eno Lipe Tapondolimu yu Paimbo Ugu Nimo Mini Kake Telimu, yu Ara kinye molopalie oromo Minimu.

<sup>27</sup> Nalo Minimu yuni kau nanga ungu nimo naa nimbe timbelo. Eno na kinye oi pulu polopo molorumulu mele kinye yandopa moromolomunga eno kape nanga ungu tapoko nindili iyema moromelela."

## 16

<sup>1</sup> "Enoni na tiye kolko loi naa leangei nimbo i unguma nio.

<sup>2</sup> Imboma makutoko Gotenga ungu pimele ulkena iyemani eno tukundo naa wangei ningko makoronge. Imbomani Gotenga kongono tenderemolo ningko eno nanga lombili andolima tokon kondonge waimu paimbo wendo ombalola.

<sup>3</sup> Ara kinye ilto naa liko manjikoliomunga imbomani eno kinye eno tekoteko kenjinge.

<sup>4</sup> Nalo eno uluma tenge waimu wendo ombalo wali imbomani lino i tekoteko tenge waimu Jisasini akilio wendo ombalo nimbe lepi lepi torumu walimu ya i wendo oromo lepamo ningko pilko molangei nimbolio altopa ombalo eno mindili nonge mele, kinye

oi lepi lepi topo nio. Oi eno kinye molopolio i unguma naa nimbo tiru."

*Jisasini Gotenga Minimuni kongono tembale mele nimbe tirimu ungumu*

<sup>5</sup> "Nani kinye pumboi tero nio nalo aku niomunga enonga iye teni nu tena purunoya ninga naa waliko piltieme.

<sup>6</sup> Na pumboi tero niomunga eno mini pupili moromele.

<sup>7</sup> Nalo mini naa lteao! Paimbo enondo nimbo tiro. Eno tapomboimunga pumbo. Na naa pundu lemo eno Mini Kake Telimu eno toimbo tondombai naa ombalo. Pundu lemo eno molongena yu lipo mundumbu.

<sup>8</sup> Yu yando ombalie nimbelomuni, ulu pulu kerimanga peremomunga pulumu kinye konopuna ulu pulu keri te naa pepa konopu tumbi nilimunga pulumu kinye kotemunga pulumu kinye nimbe tumbi tipe, imbomani kanomanga puluma ninga pilko tunduromelema yuni nimbe moro tondombalo.

<sup>9</sup> Imbomani na ipuki naa tirimele ulu kanomu ulu pulu kerimanga pali pulumu peremomu Mini Kake Telimuni nimbe moro tondopa,

<sup>10</sup> na Ara moromona pumbo altoko naa kanongemunga na iye toya toli moro akumuga na ulu toya tolimumga pulumu moro tondopa,

<sup>11</sup> kotemunga pulumu nimbo moro tondamboi nimbe ya mai kombumunga iye nomi awili Satan mongo ltimumunga Goteni Satan yunge kot oi pilerimu wali kinye nondopa yu mainye pupili nimbe panjirrimu mele lipe moro tondombalo.

<sup>12</sup> Ungu awini enondo nimboi tero, nalo eno manda naa pilko linge.

<sup>13</sup> Nalo Mini Kake Telimu, yu paimbo ungumanga pulumu, yu ombalie nimbelomuni, yuni ungu paimboma pali pilko kondangei nimbe akuma eno nimbe timbelo. Yuni yunu konopuna pilimbelo mele naa nimbe timbelo. Ungu imbo tondoromuma komuni pilipelie nimbe timbelo. Ulu altopa wendo ombalo ulumanga oi nimbe timbelola.

<sup>14</sup> Na tero mele kape moro mele kape nio mele kapeaku melemanga yuni pilipelie yando eno nimbe timbelo wali eno tepa nanga imbimu ambolopa ola mundumbelo.

<sup>15</sup> Aranga ltemo melema pali nanga. Aku-munga Minimuni nanga ungu ambolopalie pilipe eno nimbe timbelo nio," nimu.

*Jisasini kinye mini pupili moltomele nalo akilio paa tono kolonge nimu ungumu*

<sup>16</sup> Aku ungu nimbelie Jisasini yu lombili andolimando ungu te nimbeindo, "Enoni na wali alaye kolo kau naa kanonge. Nalo altoko na nondoko kanonge," nimu.

<sup>17</sup> Yu lombili andoli mare eno enongano nendo yando ningiendo, "Linondo nimomu ambele ungure nimbei nimonje? Na wali alaye kolo kau naa kanonge, nalo altoko na kanonge nimbe, na Ara moromona pumboimungaaku tembalo nimu, ambele ungure nimbeindo nimonje?

<sup>18</sup> Yu wali alaye kolo kau nimomu nimbei nimonje? Lino naa piltimolo," ningomoloringi.

<sup>19</sup> Enoni yundo walipo pilemili kani, ningokonopu leringi wali Jisas yuni lipe manjipelie nimumuni, yuni enondo nimbeindo, "Enope nendo yando ambele ungu kolo mare ningomoromeleya? Nani wali alaye kolo kau enoni na naa kanonge, altoko nondoko na kanonge nio kano ungundo nimeleya?

<sup>20</sup> Nani eno ungu paimbo i tepo nimbo tiro. Na tembomunga eno kola teko kondo kolonge. Nalo we imboma tono kolonge. Na lombili andolima eno oi kamelenamindili tembalo nalo kelko na kanokolio tono kolonge.

<sup>21</sup> Ambomuni yu bakulu membai wali bakulu kuro toromona mindili nomba pereremo. Nalo bakulumu kanopa lipelie yu oi umbuni mepa moromo mele komu tindipe bakulu te yunge lapuna mepalie yu tono kolopamoromo.

<sup>22</sup> Enoaku tepala. Eno tiye kolopo pumbo nio wali akumunga eno kinyekamelena mindili tepili moromele. Nalo eno altopo kanombo wali eno tono kolongela. Eno tono kolko molonge ulumu imbo teni makola pipi naa timbelo.

<sup>23</sup> Na altoko kanonge wali enoni na ungure altoko naa waltindinge. Enondo ungu paimbo i tepo nimbo tiro. Arando melte molo ungu te molo ulu te konge teamili ningolio ningemuni, nanga imboma moromolo ninga konge tengenge wali Arani konge teko waliko pilingemelema eno timbelo.

<sup>24</sup> Oienoni nanga imbina melte konge naa terengi. Konge teko likolio wali eno paa tono kolonge."

*Jisas Yu Gote kinye molopalie omo ltemo ningoliko manjiringi*

<sup>25</sup> "Na lombili andolima, nani eno unguma nimbo timboindo takiraki ungu iko kau toro. Nalo altopo enondo aku tepo naa nimbo. Arani ulu teremoma tumbi tiponimbo timbo.

<sup>26</sup> Aku walimunga nanga imbina konge tengen. Nani kau enonga nimbo Arando konge tendembo unguaku tepo naa nio. Aku molo.

<sup>27</sup> Enoni na konopu mondoko, na Gote kinye molopolio ya maina ondu enoni paimboaku terimu ltemo ningogipuki

tirimele akumunga Arani eno konopu mondonromo.

<sup>28</sup> Oi Ara molorumuna molopo maina mainye oru. Kinye maimu tiye kolopo Ara moromona pumbo," nimu.

<sup>29</sup> Yu lombili andolimani ningeindo, "A, kinye ungu iko naa toko tumbi tiko kau nino ungumu lino piltimolo.

<sup>30</sup> Imbo teni nu ningo tumbi tingei mele molo. Nu uluma pali liko manjirino. Lino aku tepo pilipolio nu Gote peya molkolio maina orunu nimbo ipuki tirimolo," ningi.

<sup>31</sup> Aku teko ningi wali Jisasini enondo nimbeindo, "Na Gote peya molopolio maina mainye oru, akumu kinye ipuki tirimeleya.

<sup>32</sup> Pileio! Wali te wendo ombalo, molo, kano walimu oi wendo omo lemo, kano walimunga imbo lupemani eno toko bili bala tingi. Aku wali na nanu molambo ningo na tiye kolko eno yu mele mele kunduko ltenga. Nalo na nanu naa moro, Ara kinye kupo teko morombolo.

<sup>33</sup> I ungu nimbo tipolio eno na kinye konopu tendekuna pupili molamili. I mai kombuna umbuni awini wendo oromele nalo konopure naa leangei. Aku ambe telka, nani i mai kombumunga uluma pali topa maindo munduru," nimu.

## 17

*Jisasini Yunge lombili andolimanga Gote kinye konge nimbe ungu nimu*

<sup>1-2</sup> Jisasini yu lombili andolimando aku unguma nimbe pora tipelie nimumumi, mulu kombuna olando tipe kanopalie nimbeindo, "Ara, nani teambo ningo panjirinu walimu wendo oromo. Nuni imbo tirinu imboma enondo pali nani koinjo molko kau pangei nipili ningolio, nani maina imboma pali nokopili ningolio, nunge Marenaga imbi tirinu kani nunge imbi ola molopili ningo nunge Marenanga imbi liko ola munduwi!

<sup>3</sup> Koinjo molko kau punge ulumu i tepe: Nu tendekumu kau paimbo Gote morono ningo pilko, na nuni imboma nokopa kondombalo iye te lipu mundumbo ningo panjikolio na liko mundurunu iye nomi Kraist ningo pilko, ilto peya kopu teko moromele imboma koinjo molko kau punge ltemo.

<sup>4</sup> Nuni kongono na tirinu kanomu tepo pora tindumuni nu tepe imbi mondondu.

<sup>5</sup> Ara, mai kombumu wendo naa opili na nu kinye oi molorumbulu na imbi ola molopa enge pepili moloru kano mele kinye na nu kinye aku tepo molambili niwi.

<sup>6</sup> Mai kombu moromele imbo mare nanga imboma molangei ningo imbi tirinumando nu enge peremo mele kinye paa olandopa morono mele kinye nimbo para tindu. Oi nunge imbo moloringima, nuni na tirinu.

Aku imbomani nunge ungumu pilko tengi tiko moloringi mele moromele.

<sup>7-8</sup> Nuni nando ninu unguma nani enondo nimbo tindu wali, enoni kano unguma pilko likolio nu molorununa wendo oru pilko kondokolio Nuni na paimbo mundurunu lepamo ningo ipuki tikolio aku teko moloringina kinye melema nuni na tirinu melema pali nu moronona wendo oromo ulu enoni pimele.

<sup>9</sup> Enonga konge tendero. We maina imbomanga nimbo konge naa tendero, aku molo. Nunge imbo moromele nando tirinuma aku iyemanga kau konge tendero.

<sup>10</sup> Nanga imboma pali nungemu, nunge imboma pali nangamu. Nuni tirinu iyema eno molko kondoromelemuni na imbi ola moromo.

<sup>11</sup> Kinye na nu moronona oromunga na maina imboma kinye naa moromolo. Nalo ya iyema eno mai kombuna enonga we moromele. Ara Kake Telimu, na nu moloniona ombo wali ilto imbo tendekumu mele molopo konopu tendekuna pupili morombolo kano mele na tirinu lombili andolima eno aku teko manga tendekumu molko konopu tendekuna pupili molangei ningo nunge engemu na tirinu akumuni eno nokowio!

<sup>12</sup> Na eno kinye molorumulu wali nunge enge na tirinu akumuni nani eno ulu te naa tepili nimbo nokopo molondu. Eno tapu tendu wali te molopa naa kenjirimu. Iye tendekumu kau, nunge bukuna ningo panjirini ungumu ara tipelie tepe kenjipelie kolombai akumuni kau molopa kenjimo.

<sup>13</sup> Nu moronona kinye oromunga na tono kolopo kamele akopo moro aku mele eno aku teko konopu penga panjiko molangei nimbo oi na olando naa ombolio ya mai kombuna molopo i unguma nio.

<sup>14</sup> Nunge ungumu eno tipo pora tindu. Na ya mai kombumunga iye te molo, aku teko eno mai kombumunga iyema molola. Iltonga iyema molko iltonga ungu manema pilko liko teremelena maina uluma kau pilko teremele imbomani eno konopu keri panjiko eno kinye opa pule toromele.

<sup>15</sup> Eno mai kombuna wendo liwi nimbo konge naa tendero. Nalo ya maina iltonga kongono tendeko molonge wali iye keri Sataneni eno kondi topa tepe naa kenjipili ningo nokowi nimbo enonga nimbo konge tendero.

<sup>16</sup> Na mai kombuna iyere naa moro aku tepe mele eno mai kombuna iyemare naa moromele.

<sup>17</sup> Nunge ungumu ungu paimbomu. Kano ungumuni enonga konopu tepe kake tepili ningo nunge imboma molangei niwi.

<sup>18</sup> Nuni na mai kombu imbomanga imuana liko mundurunu mele nani eno aku

imbomanga imunana lipo mundundu.

<sup>19</sup> Enu nunge ungu paimbomuni konopu kake tepili molko nunge imboma kau molangei nimbo na nunge nimbo kau molombo.

<sup>20</sup> Nani nanga lombili andolimanga kau konge naa tendero. Altoko enoni ungu ningtingema na paimbo ningi ipuki tinge imbomanga kape konge tendero.

<sup>21</sup> Ara, nu nanga konopuna morono, na nunge konopuna moro mele aku teko kano imboma pali konopu tendekuna pupili molangei nimbo aku tepo enonga konge tendero. Mai kombuna imbomani pali nuni na liko mundurununa orumu ningi ipuki tiengei nimbo kano imboma ilto kinye konopu tendekuna pupili molamili nimbo aku tepo konge tendero.

<sup>22</sup> Nuni na imbi ola molopili ningi tirinu ulumu nani eno tipolio ilto konopu tendekuna pupili morombolo mele eno aku teko konopu tendekuna pupili molangei nimbolio tiro.

<sup>23</sup> Nu nanga konopuna morono mele na enonga konopumanga moro aku ulumuni eno paa kamukumu konopu tendekuna pupili molangei. Aku teko molonge wali, na konopu mondorono mele nanga ungum paimbo ningi ipuki tirimele imboma aku teko konopu mondorono mele kape nuni na liko mundurunu mele kape, mai kombumanga pali imbomani pilengei nimbo eno paa kamukumu konopu tendekuna pupili molangei nio.

<sup>24</sup> Ara, nuni na imbo tirinuma na molomba waye molopo, mulu mai talo oi naa telu na konopu mondokolio nanga imbi ola molopili pamu kinye au nio mele pepili ningi aku ulu tirinuna kanangei konopu lteo.

<sup>25</sup> Ara Tumbi Nilimu, paimbo we maina imbomani nu naa liko manjirimele nalo nani nu kanopo lipo manjiro. Imbo nanga ungum pilko ltimelemani nuni na tiko mundurununa orumu ningi liko manjirimene.

<sup>26</sup> Nani nu morono mele eno nimbo tira. Altopo nimbo tilipo pumbolio nuni na konopu mondorono mele eno enonganu aku teko nendo yando konopu mondangei nimbolio na enonga konopuna molombo," nimu.

## 18

<sup>1</sup> Jisasaku tepe Gote kinye ungu nimbe konge tepe pora tipelie nimumuni, ipu leli yu kinye yu lombili andolima kinye aku kombumu tiye kolko No Kidron nekondo Unjo Oliv Poinye lerimuna tuku puringi.

*Jisas ka tiringi temanemu*

<sup>2</sup> Ipu leli no Kidron nekondo unjo Oliv poinye lerimuna tuku puringi aku mele Jisas yu

lombili andolima waye takiraki pupundala teringi lepalie Judas Iskarioteni karolo teko ongo purumele konopu lerimu. Judasini Jisas yunge opa pule iyemanga kindo lipe timbei terimu.

<sup>3</sup> Kano wali Judasini Jisas akuna waye takiraki pumbo moromolo karolona moromele nimbelie, ami iye talape te kinye Juda imbomanga Gote popo tondoli iye awilima kinye Farisi iyema kinye enonga ele iye mare kinye kano poinyena mepa orumu. Ongolio wali kiye kinye lamema kandoko meko opa teringi melema meko orangi.

<sup>4-5</sup> Judasini iye opa lipe mepa orumu ulu kanopalie kinye yu tongei oromele konopu lepalie oringindo pumbelie Jisasini nimbeindo, "Iye nari kororomeleya?" nimu. Enoni topondonko yundo ningeindo, "Jisas Nasaret kombu kano iye kororomo," ningi. Jisasini "Akupe na," nimu.

<sup>6</sup> Jisasini akupe na nimu wali eno umbulu meni meni anjo pungo ai toringi.

<sup>7</sup> Yuni altopa eno walipe pilipelie nimbeindo, "Iye nari kororomeleya?" nimu. Yundo ninge, "Nasaret iye Jisas kororomo," ningi.

<sup>8</sup> Jisasini nimbeindo, "Akumu na, nio kanomu. Enoni na koronge lemo ya peya moromolo iyema ka naa tiko, yando pangei neio!" nimu.

<sup>9</sup> Yuni oi Gotendo nimbeindo, 'Nuni na tirinu iyemanga te molopa naa kenjimo, eno pali nokopo kondoru,' nimu. Jisas altopa tembalo oi nimu ungu akumu ara timbeimunga ulu akumu wendo orumu.

<sup>10</sup> Kano wali Saimon Pitani loi gelea lakuna kulu topa wendo lipe Gote popo tondoli iye awili nomimunga kendemandemu topa komurmu laka lerimu. Aku iyemunga imbi Malkus.

<sup>11</sup> Jisasini Pitando nimbeindo, "Loi gelea lakuna panjiwi! Arani mindili namboi nimu mele naa nomboya?" nimu.

<sup>12</sup> Kano wali amima kinye amima nokoli iyemu kinye Juda imbomanga ele iyema kinye enoni Jisas ambolko liko ka tiko meko puringi.

*Anas molorumuna Jisas meko puringi*

<sup>13</sup> Jisas ka tokolio oi kumbe leko Anas molorumuna meko puringi. Anasinga lemenu Kaiafasini ltimu. Aku yunge kolepa. Kaiafas yu kano poinyemunga Gote popo tondoli iyemanga iye nomi Awilimu molorumu.

<sup>14</sup> Kaiafasini Juda iye awilimando oi nimbeindo, "Iye te imbomanga pali kolo wanggopa kolombalo wali penga," nimu.

*Pitani oi kiyendo wali Jisas naa karo nimu temanemu*

<sup>15</sup> Saimon Pita kinye Jisas lombili andoli iye te kinye Jisas lombili pungili puringili. Aku lombili andolimu Gote popo tondoli iyemanga iye nomi awilimuni kanopa imbi tirimuna, kano iye nomi awilimunga ulkena imbo maku toringi kombuna tukundo Jisas meko puringina yu purumu

<sup>16</sup> nalo imbo maku toringi ulke kere puluna Pita tawendo we nokopa angilerimu. Jisas lombili andoli iye te tukundo molorumumu yando ombo kendemande ambo ulke kere pulu nokorumumundo Pita tukundo opili nimbe walipe pilipelie Pita lipe meli tukundo purumu.

<sup>17</sup> Kere pulu nokoru ambo kanomuni Pitando nimbeindo, "Nu da iyemunga lombili andoli iye te karolomu Itemo," nimu. Pitani "Molo!" nimu.

<sup>18</sup> Ipu leli ali terimu wali kongono kendemande teli imboma kinye ele iyema kinye tipe pilko moloringi. Pita kape eno kinye tipe pilipe angilerimu.

*Anasini Jisas waltindirimu mele ungumu*

<sup>19</sup> Pita kinye imboma kinye aku tekongo molangei Gote popo tondoli iyemanga iye nomi awilimuni Jisas lombili andolima kinye yuni imboma ungu mane tirimu mele kape Jisas walipe pilerimu.

<sup>20</sup> Jisasini topondopa nimbeindo, "Na penana angilipo imboma ungu mane tiro. Gote popo toko kaloli ulke tempelemu kinye imboma maku toko Gotenga ungu pileli ulkema kinye aku ulke Juda imboma pali maku toromele ulkemanga ungu mane tilipo oromunga ungu mare mainye mainye naa andopo nindu.

<sup>21</sup> Unku niomu neya aku kani, na ambe telka waltindirinoya? Nanga ungu pimele imbomando waliko pileio! Nio mele aku imbona pilko moromele," nimu.

<sup>22</sup> Jisasini aku tepa nimu wali ele iye te yu kinye nondopa angilerimumuni yu kumbekerena larauwe topalie nimbeindo, "Nu Gote popo tondoli iyemanga iye nomi awilimundi topondoko aku ungu ambe telka ninoya?" nimu.

<sup>23</sup> Jisasini topondopa nimbeindo, "Ungu nindumunga te nimbo kenjindu lemo ungu keri nindu akumu ningi para tiwi! Molo paimbo ungure nindu lemo nuni na ambe telka toronoya?" nimu.

<sup>24</sup> Kano wali yu ka toringi akumu we pepili Anasini Kaifas moromona meko paio nimbe lipe mundurumu.

*Pitani altopa wali talo tipe Jisas naa karo nimu ungumu*

<sup>25</sup> Saimon Pita tipe pilipe angilerimu wali enoni yundo ningeindo, "Nu da iyemunga lombili andoli iye teya?" ningi. Yuni topondopa nimbeindo, "Na aku iyere molo," nimu.

<sup>26</sup> Gote popo tondoli iyemanga iye nomi awilimunga kendemande iye te, kano iyemu kinye Pitani komu lakalerimu iyemu kinye pulu lerimu kanomuni Pitando nimbeindo, "Nu da iyemu kinye unjo Oliv poiney Itemo kombuna peya kanondu kanomu," nimu.

<sup>27</sup> Pitani kelepa wali yupoko tipe na tenaya nimbe molo nimbe nendo lerimu wali kera gula ko torumu.

*Rom Gavman iye awili teni Jisas kot pilipili ningo Pailat molorumuna meko pungo kot tenderingi ungumu*

<sup>28</sup> Gote popo tondoli iyemanga iye nomi awili Kaifas kinye Juda imbomanga kaunsil iyema pali kinye enoni Kaifasinga ulkena Jisas kot tendeko pora tikolio, Judamanga iye awilima Kaifas tiye kolko eno nokorunu Rom gavman iyemunga ulkena Jisas meko puringi. Kombu tangombai mune lerimu wali akuna meko puringi. Meko pungolio eno Juda imbomanga ungu mane te perimumu pilkolio lino Rom imbo tenga ulkena pumolo wali kalaro mele molombalo, kano kinye Pasova Walimu pimolo walimunga kongi sipsip walo manda naa nomolo ningi pilkolio eno ulkena tukundo naa puringi.

<sup>29</sup> Eno ulke kerepuluna angileringu kanopalie eno angileringga pumbe Rom gavman iye nomi Pailat pena ombo enondo waltindipelie nimbeindo, "Eno ya iyemu ambele ulumunga kot tenderemeleya?" nimu.

<sup>30</sup> Enoni topondoko ningeindo, "Yu mongo naa likanu molomionna naa mepo ombo tilimala," ningi.

<sup>31</sup> Pailateni nimbeindo, "Yu enonga meko pungolio enongan enonga ungu mane peremomani nimo mele pilkolio yu kot tendepao!" nimu. Juda imbomanga awilimani ningeindo, "Rom gavmanemuni lino ungu mane tipelie nimbeindo, eno we imbomani imbo toko naa kondaio nimo kanomu," ningi.

<sup>32</sup> Aku ungu ningimunga Jisasini yu kolombalo mele oi nimbe tirimu ungumu ara tirimu.

<sup>33</sup> Juda iye awilimani ningi ungu pilipelie, Pailat altopa ulke awilimunga tuku pumbe Jisasindo owi nimbelie yundo waltindipelie nimbeindo, "Nu Juda imbomanga iye nomi kingimu moronya?" nimu.

<sup>34</sup> Jisasini topondopa nimbeindo, "Imbo lupemani ningi tinge ungundo ninonje nuni ninoya?" nimu.

<sup>35</sup> Pailateni topondopa nimbeindo, "Na Juda iyere konopu lekolio ninoya? Nunge imboma kinye nunge Gote popo tondoli iye awilima kinye akumani nu na morona

meko onge. Ulu ambele teniona nu liko meko ongeya?" nimu.

<sup>36</sup> Jisasini nimbeindo, "Na ya maina iye nomi kingimu molopo maina imboma nokombo mele molo. Paimbo maina iye nomi kingimu molkanje nanga imbo talapemani na Juda imbomani ka naa tiengei ning opa telemala. Nalo na maina iye nomi kingimu, molo," nimu.

<sup>37</sup> Pailateni nimbeindo, "Aku lemope nu paimbo iye nomi king te lepamo," nimu. Jisasini topondopa nimbeindo, "Paimbo. Goteni na kingimu molopili meao nimuna meringila. Imboma ungu tukumemu pilengei nimbo maina mainye oru. Unku tukumemu pilemola nimele imbomani nanga ungu pimele," nimu.

<sup>38</sup> Pailateni ungu taka tondopalie nimbeindo, "Ungu paimbo te peremonje naa peremoya?" nimu. Aku tepa nimbelie yu altopa Juda iyema angileringina penando pumbelie nimbeindo, "Yu kotena ambolomo ungure naa peremo," nimu.

*Rom gavman iye Pailateni Jisasinga kot kamukumu pilipelie kolopili nimu ungumu*

<sup>39</sup> Pailateni Jisas ulure naa tepa kenjirimu konopu lepalie naa kolopili nimbe pilipelie Juda imbomando nimbeindo, "Pasova na kinye teremolo ulu pulu peremomu pilipolio teambo! Poinye yaka nimbe enonga Pasova Waimu wendo oromo wali ka imbo te enoni wendo opili nimele imbomu nani wendo pupili nio. Kinye Pasova Wali te wendo oromungu Judamanga iye nomi kingimu wendo pupili konopu ltemeleya!" nimu.

<sup>40</sup> Nalo enoni ru ningolio ningeindo, "Andi iyemu pepili kani Barabas wendo liko munduwil!" ningi. Barabas yu Rom gavman kinye opa terimuna ka tiringi iyemu.

## 19

<sup>1</sup> Aku teko ningi ungu pilipelie Pailateni Jisas lipe Rom ami iyemando ka pulteni taio nimu.

<sup>2</sup> Aku tekolio enoni yu ungu taka tondoko yu iye nomi kingimu moro nimumunga yu king mele au tiemili ningolio, kingimanga wainye none teli te tingeindo ka koko mololi te liko munguluwe teko pinyewena pakondoko, kingimani wale pakoli kondoli pakoringi mele wale kondoli te liko pakondokolio

<sup>3</sup> yu angilerimuna pungo Judamanga kingimu, nu akuna angilinioya nipula teko, yu pungo kumbekerena larauwe toringi.

<sup>4</sup> Pailat altopa penando ombalie Judamando nimbeindo, "Kanaio! Yu mongo te limomunga pilipolio yu manda tombo mele molo ningo pilengei nimbo eno moromelena yu mepo oro," nimu.

<sup>5</sup> Kano wali Jisas ka koko mololini telo kingimunga wainye none telimu kinye wale pakoli kondolimu pakopa wendo orumu wali Pailateni enondo nimbeindo, "Iyemu oromona kanaio!" nimu.

<sup>6</sup> Gote popo tondoli iye awilima kinye enonga kendemande ele iyema kinye enoni Jisas penando kokele orumu kanokolio nendo tiko ningeindo, "Kolopili! Unjona ola uku toko panjeio! Kolopili! Unjona ola uku toko panjeio!" ningi. Nalo Pailateni nimbeindo, "Na molo. Yu tombomunga pulure naa peremo kani enonga meko bungo unjona ola uku taio!" nimu.

<sup>7</sup> Judamanga awilimanu ningeindo, "Linonga ungu mane te peremomuni nimbeindo, imbo teni Gotenga imbi lepa ungu taka tondombalo wali, aku imboru kolopili tangei nimo, aku ungu manemu pilipolio yuni Gotenga Malo moro nimumunga pilipolio kolopili nimbo piltimolo," ningi.

<sup>8</sup> Enoni yu Gotenga malo moro nimu ningi ungu Pailateni pilipelie yu paa mini itepalie,

<sup>9</sup> kelepa ulke awilina tukundo pumbe Jisasindo waltindipelie nimbeindo, "Nu tena molko orunuya?" nimu, nalo Jisasini yundo topondopa ungu te naa nimu.

<sup>10</sup> Unku te naa nimu wali Pailateni yundo nimbeindo, "Nando ungu te naa nimbo konopu ltenoya? Nanga enge peremomuni nu we pani manda nimbola, nu kolani unjona ola uku tangei manda nimbola. Aku nio ungumu naa piltinoya?" nimu.

<sup>11</sup> Jisasini topondopa nimbeindo, "Nunge enge peremomuni na ulu te manda naa telena. Olandopa Moromo Iyemuni yuni nando teani konopu lembalo ulu kau nuni tenio. Akumunga na kinye tenio mele ulu pulu keri kelo mele tenio. Iye na kolopili ningi meko ongo nu tingei iyemanga ulu pulu keri akumu awilimu," nimu.

<sup>12</sup> Jisasiniaku tepa nimu ungu Pailateni pilipelie Jisas yu we pupili nimbelo aulke te kororumu, nalo Judamani enge ningi nipula tekolio ningeindo, "Na king te moro nimo iye te Rom kombuma pali nokoromo iye nomi king awili Sisar kinye opa pule toromo. Da yuni king te moro nimo iyemu we pupili nino lemo aku teko teniomunga nu Rom gavman iye nomi awili Sisaramunga opa pule te taponiomunga nu kinye Sisar kinye pulu naa ltemo," ningi.

<sup>13</sup> Aku ningi ungu pilipelie Pailateni Jisas mepa penando ombo, kombu te akumundo Kou Polomu ningina pumbe kot pilimbei moromo polona pumbe mainye molorumu. Kou polomundo Juda imbomanga unguna Gabata ningi.

<sup>14</sup> Aku kot tenderingi walimu Pasova Walimanga wali te, otili Pasova walima pora

nimbelo walimu wendo ombalo. Aku koro molonge walimu wendo ombaindo, kinye mele Juda imbomani langi nongeima liko norambo teringi walimu kano walimunga awi tangoli mele, Pailat kinye kot tenderingi. Pailat kot pilimbei moromo polona omba mainye molopale nimumuni, Juda imbomando nimbeindo, "Enonga iye nomi kingimu kanaiol!" nimu.

<sup>15</sup> Nalo enoni ru ningolio ningeindo, "Towia! Towia! Unjona ola toko uku toko panjiwi!" ningi. Pailateni waltindipelie nimbeindo, "Enonga iye nomi kingimu kolopili nimbo unjona ola uku topo panjemblo konopu lekolio nimeleya?" nimu. Popo tondoli iye awilimani topondonko ningeindo, "Linonga iye nomi king te lupe naa moromo. Rom gavman iye nomi awili Sisar kau," ningi.

<sup>16</sup> Kano wali Pailateni kamukumu nimbeindo, "Manda, yu topo kondamili. Unjona ola uku toko panjengei!" nimu. Pailateni Jisas kolopili unjona ola uku toko panjenge nimu wali Rom ami iyemani yu ambolko liko meko pungolio

<sup>17</sup> yu unjo polopeya te tiringi, akumu yu yunu gomo lepa meli Jerusalem wendo purumu.

*Jisas unjona toko ola uku toko panjiringi ungumi*

Jisas unjo polopeya tiringimu mepa pupili eno Jerusalem tiye kolko Kombu Kaungala nilina meko purungi. Kombu Kaungala kanomundo Juda imbomanga unguna Golgota ningi.

<sup>18</sup> Aku kombuna Jisas unjona ola noiko kimbo kima pirimu tokolio iye talo wekondo yakondo toko peya unjo talonga uku toko panjikolio, Jisas imunana liko ola anjiringi.

<sup>19</sup> Pailateni Jisasinga unjona ola imbi toko mondaio nimu mele toko mondoringila. Akumu i tepa: ULKE KOMBU NASARET IYE JISAS, JUDAMANGA IYE NOMI KING ningi toko mondoringi.

<sup>20</sup> Jisas unjona ola toko uku toko panjiringi kombumu Jerusalem nondopa lepa, imbi unjona ola toringga Juda imbomanga ungu kinye Rom imbomanga Latin ungu kinye Grik ungu kinye, ungu lupe yupoko akumanga ningi toko mondoringi molorumu wali aku imbima Juda imbo awinini kanoringi.

<sup>21</sup> Juda imbomanga Gote popo tondoli iye awilimani kano imbima kanoko keri pilkollo Pailatendo pungolio ningeindo, "Nuni Judamanga iye nomi kingimu ningi akumu imbi taio ninio kanomu manda naa teremo. Yu linonga kingimu molo. Aku iyemuni na Judamanga kingimu moro yu yunu nimu. Akumu imbi taio niwi!" ningi.

<sup>22</sup> Pailateni topondopa nimbeindo, "Nani imbi toko mondaio nindu aku ungumu paimbo tonge. Altopo ungu te naa nimbo. Oi tonge aku ungumu molopili!" nimu.

<sup>23</sup> Ami iye kiteni Jisas unjona toko uku toko pora tikolio, yunge pakorumu mele kulklo noiringima liko, eno iye kite lingei mele moke teko liko maku toringi. Aku tekolio wale tendeku kau, tukundo pakorumumu, penga lerimu. Akumu tuku tingina tengen tekko naa tandoko we tulemu teringi kanokolio

<sup>24</sup> ami iyemani ningeindo, "Imu ora naa tamili kani iye tendekuren'i kau lipili kani oi kat mele teamili!" ningi. Aku teringi ulu Gotenga Bukuna ungu te moromomuni altoko aku teko tengen te naa nimu mele wendo orumu. Kano ungu bukuna moromomuni nimbeindo,

Nanga wale pakolima moke teko liko, nanga mainye pakoro walemu iye tendeku kau lipili ningi kat mele tengen, *(Sng 22:18)*

nimu aku mele teringi.

<sup>25</sup> Jisas unjo polopeyana ola perimu akuna nondopa yunge anumu kinye, anumu papamu kinye, Klopas omenu Maria kinye, Makdala kombu Maria kinye, aka ambo kite angileringu.

<sup>26</sup> Anumu kinye Jisas konopu mondorumu nondopa angilerimu iye kinye kanopalie Jisasini anumundo "Andi angimo iyemu marena mele molopili!" nimbe,

<sup>27</sup> kano lombili andoli iyemundo "Andi ambomu aminye mele molopili!" nimu. Aku nimu ungu pilipelie lombili andolimuni Jisas anumu lipe yunge ulkendo mepa pumbe nokoma molorumu.

*Jisas nomi ka akurumu*

<sup>28</sup> Jisasini yunge kongonoma pali kinye pora nimo lipe manjipelie "Na no waleni kolto," nimu. Aku ungu nimumu ungu te Gotenga Bukuna oi ningi panjiringi ungumu ara tirimu.

<sup>29</sup> No wain kombili teli mingi te akuna lerimu kanokolio koma melte liko nona tuku mundukolio, koma none teli melte no pepili unjo isop kola teni unjo toko olando tiko Jisasinga kerena kopondoringi.

<sup>30</sup> Yuni nomu nombalie "Nanga kongonomu pora nimo," nimu. Aku tepa nimbeline kinye kolambo nimbe yunge minimu puwi nimu wali nomi loki lerimu.

<sup>31</sup> Yu kolorumu aku walimu Juda imbomanga koro molonge walimunga langi liko norambo teringi walimu. Otili enonga koro mololi wali Sabat olandopa te wendo ombai terimu. Otili Sabat wali iyema unjona ola we penge manda naa tembalu ningolio enoni Pailatendo pungo konge tekolio ningeindo, "Ono pok'o, kinye mainye liemili

kani eno mindili awili nongolio kinye kau walitikale kolangei ningon kimboma toko elke tondaio niwi!" ningi.

<sup>32</sup> Kano wali ami iyema ongolio kumbe leko Jisas kinye wikondonga perimu iye-munga kimbo talo toko elke tondoko, pele merekondonga pungo toko elke tondoringi.

<sup>33</sup> Nalo Jisas perimuna ongo yu kanoringi wali yu oi kolopa ltimuna kanokolio tiye koloringi. Yunge kimbo talo elke naa tondoringi

<sup>34</sup> nalo ami iye teni Jisasinga lambona toloni torumu, akuna meme kinye no kinye kala kala nimbe orumu.

<sup>35</sup> Aku ulu terimuna kanorumu iyemuni teringi mele temanemu topa tirimu. Aku iyemunga ungumu paimbo. Yu paimbo nio nimbe pilipelie eno i temanemu pilinge imbomani pilkolio Jisas yu paimbo Gotenga Malo, Yu paimbo Goteni lino tepa lipili nimbe lipe mundurumu iye Kraist ningon Jisas yu ipuki tiengei nimbe temanemu topa tirimu.

<sup>36</sup> Ulu pele wendo ombalo Gotenga Buku-muni oi nimu ulu pokore paimbo wendo ombaindo aku imbomani aku teko Jisas kinye teringi. Gotenga Bukumunga moromo ungu te i tepa,

Yunge ombelemanga tendeku kape elke naa tondonge, (*Kis 12:46; Nam 9:12; Sng 34:20*)

nimbe moromo.

<sup>37</sup> Gotenga Bokuna moromo ungu te peya i tepa,

Toloni tonge iyemu neme neme ningon kanonge, (*Sek 12:10*)

nimbe moromo.

#### *Jisas ono teringi ungumu*

<sup>38</sup> Jisas kolopa pora tirimu wali pele kombu Arimatea iye Josep pumbe Pailatendo Jisasinga onomu tiwi nimu. Josep yu Jisasinga ungumu pilipe lipe molorumu iye te, nalo Juda iye awili lupema pipili kolopalie mona lombili naa andopa kiyengo nimbe Jisasinga unguma pilipe molorumu. Onomu tiwi nimu wali Pailateni manda, liwi nimbeline ee nimu. Josep yu ombo onomu mainye ltimu.

<sup>39</sup> Iye te, oi walite ipu lelikondo Jisas molorumuna purumu peya ungu ningon moloringili iye te, yunge imbi Nikodemus, kano iyemu yu Josep kinye waye oringili. Yu unjo talonga unjo to liko akumuni kongo mune toli te teremele akumu awini, yunge umbuni 30 kilo mele, mepa orumu.

<sup>40</sup> Eloni Jisasinga onomu likolio ningilimuni, Juda imbomani imbo ono tenege teremele mele tengilindo maminye mainye te liko olamala toko, unjo to taloni teringi kopongomu onomunga kandokolio onomu kulupi toringili.

<sup>41</sup> Jisas unjona ola toringi kombuna unjo poinye te lepa, akuna imbo ono kou anga te lerimu. Akuna imbo te oi naa ono teringi.

<sup>42</sup> Judamanga koro mololi wali Sabat nondopa wendo ombai terimu liko manjikolio aku imbo ono kou angamu nondopa lerimuna Jisas ono teringili.

## 20

#### *Jisas makilipe koinjo molorumu kanoringi ungumu*

<sup>1</sup> Judamanga koro moloringi wali Sabat pora nimbe, kongono wali tendekumu wendo orumu wali kombu tumbulu topa pepili kombu muni kinye oi ulke kombu Makdala ambo Mariani Jisas ono teringi kou angana omiba kanorumu. Jisas ono tekolio kere pulu pipi tiringi koumu perelemarele pumbe ekondonga lepa kere bulumu we lerimuna kanorumu.

<sup>2</sup> Kanopalie yu lkipe pumbe Jisas yu lombili andoringina konopu mondorumu kano iyemu kinye Saimon Pita moloringilina pumbelie nimbeindo, "Imbomani onomu ono kombuna wendo linge. Terenga pun-genje naa lipo manjirimolo," nimu.

<sup>3</sup> Aku nimu ungu pilkolio Pita kinye Jisas lombili andoli iye kano talo ono kombuna pungili puringili.

<sup>4</sup> Lkiko pungolio, lombili andoli iye te akumuni Pita topa akilio tipe yu kumbe lepa ono teringi kou angana purumu.

<sup>5</sup> Pumbe kou angana waka tepa kanopalie Jisas kumo toko ono teringi maminyema we lerimuna kanorumu, nalo yu tukundo naa purumu.

<sup>6</sup> Kano wali Saimon Pita akilio akilio omiba kou angana tukundo pumbe kanopalie, yu kumo toko ono teringi maminyema ono teringi kombuna we lepa,

<sup>7</sup> yunge pinyewena ka toringi maminyemu yunge pinyewe tiringido ka toringi mele we lerimuna kanorumu.

<sup>8</sup> Kano kinye lombili andoli kumbe lepa orumumu yu kape tukundo pumbe kanopalie, yu paimbo makilipe wendo pumbe lepamo nimbe ipuki tirimu.

<sup>9</sup> Gotenga Ungu Moromo Bukumuni Jisas makilipe koinjo molombalo oi nimbe tirimu nalo Jisas paimbo makilipe koinjo molorumu oi naa kanokolio yu lombili andolimani kano ungumu naa pilko kondoringi.

<sup>10</sup> Kanoko pora tikolio yu lombili andoli talo kelko ulkendo puringili.

*Ulke kombu Makdala ambo Mariani Jisas makilipe koinjo molorumu kanorumu ungumu*

<sup>11</sup> Ulke kombu Makdala ambo Maria Jisas lombili andoli iye talo kumbe leko puringili wali akilio lepa ombalie Jisas ono teringi

kou anga kere puluna kola tepa angilerimu. Kola tepa angilipelie kou angana tukundo waka tepa kanorumu wali

<sup>12</sup> mulu kombuna ensel talo wale pakoli kake telu talo pakoko Jisas ono oi lerimuna moloringilina kanorumu. Te yunge pinyewe tiringindo molopa, te yunge kimbo tiringindo moloringili.

<sup>13</sup> Elioni yundo waltindikolio, "Amboru, ambe telka kola terenoya?" ningili. Jisas makilipe koinjo molorumu mele naa lipe manjipelie yuni nimbeindo, "Nanga Awilimu yu liko meko pungo noienge kombumu na naa lipo manjiro," nimu.

<sup>14</sup> Aku tepa nimbelie yu topele topa kanorumu wali yunge umbulkondo Jisas anglerimuna kanorumu. Nalo akumu Jisas nimbe kanopa imbi naa tirimu.

<sup>15</sup> Yuni nimbeindo, "Amboru, nu nari korokolio kola terenoya?" nimu. Jisas yu poiney nokopa angilerimu iyemu konopu lepalie Makdala ambo Maria yuni nimbeindo, "Iyemu, nuni Jisas meko punio lemo noinio kombumu na ningo tiwi! Yu lipo meli pambo!" nimu.

<sup>16</sup> Jisasini yundo nimbeindo, "Mariaya," nimu. Ambomuni topele topa yu kanopalie Juda imbomanga Hibru ungu nimbelie 'Rabonai,' nimu. Akumunga pulumu Unru Mane Tilimu.

<sup>17</sup> Jisasini nimbeindo, "Na Ara moromona kelepo olando oi naa puli kani na naa kanguwi! Nanga angenupilima moromelena pungo enondo ningo tikolio ninindo, Na kinye eno kinye linonga Lapa Gote moromona kelepo olando puro nimo niwi!" nimu.

<sup>18</sup> Kano wali Maria yu Jisas lombili andolima moloringina pumbe yu Awilimu kanorumu ulumu kinye Awilimu yuni nimu unguma kinye pumbe temane topa tirimu.

*Jisas makilipe koinjo molorumu Tomas peya naa molangei lombili andolimani kanoringi ungumu*

<sup>19</sup> Jisas makilipe koinjo molorumu kano walimu Juda imbomanga kongono wali kiyendo lerimu kanomunga ipo kala torumu wali lombili andolimani Juda imboma pipili kolokolio eno ulke tuku molkolio ulke nangape tiko ingi tiko lok toko moloringi. Kano wali Jisas ombo enonga imunana angilipe enondo nimbeindo, "Goteni nokopili eno konopu u pilipo molaio!" nimu.

<sup>20</sup> Aku tepa nimbelie, yunge ki talo kinye lambona kinye toringima lipe ondorumu. Awilimu kanokolio enoni paa tono koloringi.

<sup>21</sup> Jisasini enondo altopa nimbeindo, "Eno mini naa lteko konopu ame topili molko

kandaio! Arani na lipe mundurumu mele eno nani lipo mundurola," nimu.

<sup>22</sup> Aku tepa nimbelie yuni eno moloringina kere mulumu popo topa mundupelie nimbeindo, "Mini Kake Telimu enonga konopuna molopili lieio!

<sup>23</sup> Enoni imbo te ulu pulu keri tembaloma tiye kolonge lemo kano ulu pulu keri tembaloma pora nimo. Molo imbo tenga ulu pulu kerima we pepili ninge lemo kano imbonunga ulu pulu kerima we pembalo," nimu.

*Jisas lombili andolima Tomas peya molkolio, Jisas Yu altopa yando orumu kanoringi ungumu*

<sup>24</sup> Jisas lombili andolima moloringina Jisas makilipe koinjo molopalie oi orumu wali enonga iye te naa molorumu. Aku iyemu Tomas. Yunge imbi te Didimus ningila. Yu Jisasinga ki tipi kanoli iye 12 akumanga tela.

<sup>25</sup> Lombili andoli iye Jisas kanoringimani Awilimu ya omona kanomolo ningi wali yuni nimbeindo, "Nani mongoni yunge kina pirimuni toringimu naa kanopo akuna nanga ki tundumu tuku naa mundupo, toloni lambona toringina nanga kimu tuku naa mundunu lemo yu paa makilipe omo konopu naa lembo, paa molo," nimu.

<sup>26</sup> Wali kite yupoko pakera omba purumu wali Jisas yunge lombili andolima altoko Tomas kinye waye ulkena tuku moloringi. Eno ulke moloringimu nangapema pali ingi tiko lok toringi nalo Jisas enonga imunana ombo angilipelie, "Goteni nokopili eno konopu u pilipo molaio!" nimu.

<sup>27</sup> Nimbelie yuni Tomasindo nimbeindo, "Nunge ki tundumuni nanga kimu lope tendekolio kanowi! Nanga lambona nunge kimu lope tendekolio kanowi! Kanokolio na makilipe koinjo manda naa molombalo ningo naa pilko, paimbo makilipe koinjo moromo ningo ipuki tiwi!" nimu.

<sup>28</sup> Tomasini yundo nimbeindo, "Nanga Awilimu, nanga Gote," nimu.

<sup>29</sup> Kano wali Jisasini yundo nimbe tipelie nimbeindo, "Na kanokolio paimbo makilipe koinjo moromo lepamo ningo ipuki tirino. Na naa kanokolio yu paimbo makilipe koinjo molorumu kinye we moromo ningo ipuki tingi imboma eno malo," nimu.

*Jononi i buk torumumunga pulumu nimbe tirimu ungumu*

<sup>30</sup> Jisas lombili andolima kanoko molangei Jisas yuni ulu enge nili awini terimu, kano uluma pali i bukuna naa tondu, pokore kau tondu.

<sup>31</sup> Nalo Goteni eno nokopa kondombalo iye te mundumbo nimbe panjirimu iye Kraist akumu Jisas orumu ningi pilko, yu Gotenga malo ningi ipuki tingi nimbo

i bukumu tondu. Aku teko ipuki tikolio Jisasini enonga nimbe tenderimumunga eno waliwalima molko kondoko kau pangei nimbo i buk tondu.

## 21

*Yu lombili andoli kiteyupoko pakerando, oma munena oma awini omba tuku pupili liengei nimu wali likolio, yu Jisas ningokanoko imbi tiringi ungumu*

<sup>1</sup> Altopa walite Jisas Nomu Taiberias aka nomumunga imbi te Galili kanomu aka nomu kulendona eno yu altoko kanangei nimbe lombili andolima moloringina orumu. Orumuna kanoringi temanemu i tepe,

<sup>2</sup> Saimon Pita kinye, Tomas yunge imbi te Didimus yu kinye, kombu Galili distrik Kana taun iye Nataniel kinye, Sebedi malo talo kinye, lombili andoli iye talo kinye, eno tendekuna maku toko moloringi.

<sup>3</sup> Saimon Pitani Jisas lombili andoli marendo nimbeindo, "Na oma koropo tomboi puro," nimu wali pilkolio lino waye pamolo ningolio, nona andoli sipina ola pungo, nomuna pungo oma munema ipu leli nona mundulikou andoko kombu tangondokolio nalo oma te naa toringi.

<sup>4</sup> Ena mundi wendo ombai terimu wali Jisas no kulendona angilerimu nalo lombili andolimani yu Jisas, ningokanoko imbi naa tiringi.

<sup>5</sup> Jisasini eno waltindipelie nimbeindo, "Nanga imboma, oma mare tongeya?" nimu. "Mare naa tomolo," ningi.

<sup>6</sup> Yuni nimbeindo, "Oma munemu imbo kindo tipe nona mainye mundeio! Mare lingi," nimu. Yuni nimu ulu teringi wali oma paa awini munena tenegepeya terimu kolo sipina winjiko ola lingei pereringi.

<sup>7</sup> Aku terimu ulu kanopalie Jisas yunge konopu mondorunu lombili andoli iyemuni Pitando nimbeindo, "Neya iye linonga Awilimu lepamo," nimu. Aku nimu ungu pilipelie Saimon Pita yunge wale pakoli ola pakorumumu kongono tembaindo kulupe noirimumu kelepa lipe pakopa puke topa nona mainye pumbe no lepa kulendona wendo purumu.

<sup>8</sup> Eno no kulendona nondoko pungeimunga 100 mita mele lerimuna we lombili andolima sipina oma tenegepeya tepe perimu mune kunduko meli Pita lombili akilklo puringi.

<sup>9</sup> No kulendona wendo pungolio kanoringi wali tipe te nomba perimuna oma mare kalopa panjirimuna kanoko, bret kaloli mare noirimuna kanoringi.

<sup>10</sup> Jisasini enondo nimbeindo, "Andi oma liko meko oromelemanga mare meko waio!" nimu.

<sup>11</sup> Kano wali Saimon Pita sipina ola pumbe oma perimu munemu kundupe meli no kulendona wendo orumu. Oma mune tenegepeya terimu. Oma munena tukundo 153 oma paa awilima perimu nalo mune tungu naa nimu.

<sup>12</sup> Jisasini enondo nimbeindo, "Langi ongo naiol!" nimu. Lombili andolimani i iyemu yu paimbo linonga Awilimu lepamo ningokanoko imbi tiringi ungumu

<sup>13</sup> Jisasini plawa kalolima lipe omama ombo lipe eno moke tepe tirimu.

<sup>14</sup> Jisas kolopalie makilipe koinjo molopalie i tepe molorumu, oi wali talo yu makilipo ola we moro mele kanangei nimbe lipe ondorumu mele imu wali yupoko tipe terimu.

*Jisasini Pitando nimbeindo, "Nanga sipipiwa langi tindiwi," nimu ungumu*

<sup>15</sup> Langi nongo pora tiringi wali Jisasini Saimon Pitando nimbeindo, "Jon malo Saimon, i iyemani na konopu mondoromele mele mainyendopa, nuni na konopu mondorono mele paa olandopaya?" nimu. Pitani topodopa nimbeindo, "Awilimu, paimbo nani nu konopu mondoro kanorono," nimu. Jisasini nimbeindo, "Aku lemo, nanga kongi sipsip waloma langi tindiwi!" nimu.

<sup>16</sup> Jisasini altopa wali talo tipe nimbeindo, "Jon malo Saimon, paimbo nuni na konopu mondorononje moloaya?" nimu. Pitani topodopo nimbeindo, "Awilimu, paimbo nani nu konopu mondoro kanorono," nimu. Jisasini nimbeindo, "Aku lemo, nuna nanga kongi sipsipima tapu tendewi!" nimu.

<sup>17</sup> Wali yupoko tipe Jisasini Pitando nimbeindo, "Jon malo Saimon, na konopu mondoronya?" nimu. Jisasini wali yupoko tipe na konopu mondoronya nimbe waltindirimu ungu pilipelie Pitani nando ambe telka wali yupoko tipe i ungu nimonje konopu lepalie nimbeindo, "Awilimu, nu uluma pali kanorono. Nani paimbo nu konopu mondoro nu kanorono," nimu. Jisasini yundo nimbeindo, "Aku lemo, nuni nanga kongi sipsipima langi tindiwi!"

<sup>18</sup> Nani nundo ungu paimbo i tepe nimbo tiro. Oi nu kelo iye molkolio wali nu nunu waimbele panjiko, nu nunu tengi puni konopu lekolio purunu, nalo nu anda lekolio nunge ki talo tinio tinio wali iye teni lupe nunge waimbele panjindipe, nu naa puni tenio kombuna mepa pumbelo," nimu.

<sup>19</sup> Jisasini i ungu iko torumu Pita tonge kolombalo wali Gotenga imbi lipe ola mundumbelo ulumundo nimu. Aku tepe nimbelie yuni Pitando "Na lombili owi!" nimu.

*Jisasini konopu mondorumu lombili andolimundo nimu ungumu*

<sup>20</sup> Pitani topele topa Jisasini konopu mondorumu lombili andolimu kanorumu wali akilio akilio elo lombili orumu. Pitani kanorumu iyemu yu oi Jisas peya langi nongo moloringi wali yu Jisas molorumuna nondopa molopalie nimbeindo, Awilimu, linonga iye narini nu opa pulema lipe timbeloya nimu kano iyemu.

<sup>21</sup> Pitani kano iyemu kanopalie Jisas waltindipelie nimbeindo, "Awilimu, iye damu ambe tembaloya?" nimu.

<sup>22</sup> Jisasini topondopa nimbeindo, "Na kelepo yando omboindo yu oi koinjo molopili nindu lemo nunge kongonomuya? Nu na lombili owi!" nimu.

<sup>23</sup> Jisasini aku tepa nimu ungu pilkollo ungu te anjo anjo angenupilima ningotiringi mele i tepa, "I lombili andolimu naa kolombalo," ningi. Nalo Jisasini yu naa kolombalo ungu naa nimu. Aku molo. Na kelepo yando omboi wali yu oi we koinjo molopili nindu lemo nunge kongonomuya nimu.

<sup>24</sup> Kano lombili andolimu yuni aku ulu wendo orumuma pali kanorumu mele nimbe tipe bukuna torumu. Kano iyemu lino pimolo yuni kanorumu mele nimbe tirimomu paimbo nimo nimbo pimolo.

<sup>25</sup> Jisasini ulu awini terimu. Terimu uluma pali bukuna tolemalanje i mai kombunga tenegepeya telka buk akuma manda naa noilimala.

**Jisasini Nanga Kongonomu  
Tendepao Nimbe Lipe  
Mundurumu Iyemanga  
Ungumu  
Aposel  
I Ungu Torumumunga  
Ungu Pulu Mare**

Jisas kolopa makilerimu wali yandoko yandoko Jisas ipuki tiringi imbomani teringi ulu akuma Lukuni topa panjirimu.

Lukuni torumu ungu mare i tepa: Pita kinye Pol taloni ungu mane tiko kongono teringili. Mini Kake Teli ombo terimu uluma. Jisas ipuki tiringimani andoko Jerusalem tiye kolko ungu tukume nilko pungolio Rom kombu wendo oringi wali imbo awini konopu topele toko Jisas ipuki tiringi. Tapu iyemani Israel imboma kinye enonga wendo imboma kinye lupe lupe naa pungo konopu tendekuna pupili molangei ningi amenge teringi. Jisas ipuki tiringi imbomani molko kondoringi nalo imbo maren eno liko mindili tiringi. Ungu mare i tepa peremo.

Mini Kake Telimuni nu tope tipili nu kape imbomando ungu tukume andoko ningi tiwi nimbe Goteni nu tepa enge tipili.

*Pulu polopa torumu ungumu*

<sup>1</sup> Iye awili Tiopilas, Jisasini pulu polopa uluma tepa imboma ungu mane tipe aku uluma terimu mele oi buk tengen toru kanomu.

<sup>2</sup> Oi uluma pulu polopa telipe pumbelie altopa andopa kelepa mulu kombuna altopa nondopo olando pumbo lepamo nimbe lipe manjipelie nimumuni yunge kongono tendepangei nimbe kongono tipe mundurumu iye apostelema oi aku teko teangei nimbe kanopa ltimu iyema Gotenga Mini Kake telimuni Jisas yunge konopundo ombo molopa lipe taporumu kinye Jisas yuni kanopa ltimu iyema i teko i teko teao nimbe ungu mane tirimu.

<sup>3</sup> Jisas yu kano ono kombuna makilipe ola molopalie nimumuni yunge kitipi kanoli iyemando na paimbo makilipo ola molondu mele kanoko imbi tiengei nimbe eno moloringina yu pumbe eno kanoko molangei ulu mare terimu. Yu walite walite nimbe eno moloringina ombo mona molopa Gote iye awili kamako kingimu molopa kombu nokoromo mele nokombalo unguma eno nimbe tirimu. Aku ulu tepa molopili wali 40 ombo purumu.

*Jisasini Mini Kake Telimu ombalo enoni  
linge nimbelie mulu kombuna olando pu-  
rumu*

<sup>4</sup> Kelko yunge kitipi kanoli iyema ongo nombeya teringi wali Jisas yuni i ulu teaio nimu. “Eno lemo Jerusalem kombu tiye oi naa kolaio, nalo nanga Arani tipe kaloli te timbolo nimbo niu kanomu Arani paa timbo nimbe mi lerimu kani akumu nokoko molaio.

<sup>5</sup> Arani timbelomundo nani oi i tepo niu. Jononi eno imbo noni no ltindirimu, nalo wali pokore ombo pumbelo kinye Goteni yunge Mini Kake Telimuni eno liengei tipe mundumbelo,” nimu.

<sup>6</sup> Altoko walite, kongono tipe munduli kano iyema Jisas kinye popo tiko nombeya tekolio wali, Jisas yundo waliko pilkolio ningei, “Awilimu kinye walimunga nuni Israel imboma oi moloringi mele altoko enongano molangei Rom gavman mainye pupili Israel imbomani enongano Gavman altoko lengei ningolio nu linonga king iye kamako manda molonioya?” ningi.

<sup>7</sup> Kano teko ningi wali Jisasini ungu pundu topa nimbei, “Waimu Arani yunge wai lipe panjirimo. Imunga aku uluma te wali wendo ombalo aku ungu eno manda naa pilinge.

<sup>8</sup> Nalo Gotenga Mini Kake Telimu enonga konopundo ombalo aku wali eno enge tipelite eno nanga ungu nimbe mendepa andoli iyema molonge. Aku ungu ningi tilko andongemu lemo Jerusalem kombu awilimu kinye Judia kinye Samaria mai kombu palinga tukundo kinye we mai kombu undukana palinga ningi andoko tingi,” nimu.

<sup>9</sup> I kano ungu nimbe pora tirimu kinye kanoko angilengei Goteni yu muluna olando ltimu. We kanoko angilengei kau kupe kake teni ombo lipe lopeke terimu.

<sup>10</sup> Kano purumu mele muluna olando tiko kanoko angileringi. Kano wali moloringilina maa torumuna maminye kake teli pakoringili iye talo wendo ongolo eno angileringi kongondona angileringili.

<sup>11</sup> Aku oringili iye talonga teni nimbei, “Eno Galili iyema eno ambe telka muluna olando tiko kanoko dana angimileya? I Jisas enonga imunana Goteni muluna olando limo kano iyemu kelepa eno limbei muluna yando ombalo wali kape enoni kanonge kano tepala muluna yando ombalo,”aku tepa nimbelie, nimu wali puringili.

<sup>12</sup> Kano wali kongono tipe munduli iye kanoma unjo oliv pangil kanomu munduko tiye kolko Jerusalem kombundo yando oringi. Aku mai kembomu kinye Jerusalem kinye paa nondopa mele lerimu aulke ponjilimu.

*Judas Iskariotenga iye te kolo wangopa molopili ningokanoko ltingi*

<sup>13</sup> Jisas mulu kombuna olando purumu kinye yunge kongono tipe munduli iye kanoma Jerusalemendo yando ongo tuku pungolio ningimuni enonga ulke oi peringi kano ulkemunga kiripi olana pungo moloringi. Aku ulkena peringi iyemanga imbi i tepa Pita, Jon, Jems kinye Andru pok, Filip kinye Tomas talo, Batolomyu kinye Matyu talo, Alfius malo Jems. Lino Israel imboma linongan gavman molamili ningo Rom gavman kinye opa tiringi manga pupu te imbi Selot aku talapemunga iye te imbi Saimon kinye Jemsinga malo Judas. Iye 11 aku pokulo ulkena peringi.

<sup>14</sup> Aku kanona eno pali liko nombeya teko konopu tendekuna pupili Gotendo konge teko moloringi. Aku moloringina ambo mare kinye Jisasinga anumu Maria kinye yunge angenupili akuma peya molko Gote konge teringi.

<sup>15</sup> Wali pokore ombo purumu kinye pele Jisasinga ungumu pilko lombileringi imbo 120 nombeya teko moloringi kinye Pitani ola angilipelite aku imbomando i tepa nimu:

<sup>16</sup> "Nanga imbo ango kame, Mini Kake Telimu King Devitinga konopundo ombo molopalie tope tirimi kinye Devitini altopa wendo ombalo ulumu nimbe topa bukuna panjirimu ungumu aku paimbo kere memo. Aku ulumu paa wendo omo. Aku ulumupe Judasini Jisas yu opa pule iyema lipa timbelo ungumundo Devitini oi nimu kano ungumunga pulumu oi wendo omo.

<sup>17</sup> Judas yu lino kinye peya molopo kongono peya tepo molorumulu kanomu. Nalo kinye iye te yunge kongono kolo wangopili," nimu.

<sup>18</sup> (Aku iye Judas yuni tepa kenjirimungu yu kou tiringi kanomuni mai te pame tepa ltimu kinye yunu unjona uku torumu kinye yu maina mainye topa mundupe yunge olo panamu tuku nimbe pali lumbira topa mundupe ombo wendo purumu.

<sup>19</sup> Jerusalem moloringi imboma palini Judas aku terimu ungu temanemu pilko kanoko tekolio enonga imbo unguna kano kombumu imbi tiko Akeldama ningi. Aku ungumunga pulumu i tepa: Yokoli Ondoli Maimu.)

<sup>20</sup> Pitani ungu kanomu nilipe pumbelie nimbei, "I wendo ombalo ulumu oi Devitini kunana bukuna i tepa nimbe topa panjirimu:

Yunge ulkemu ku lepa we angilipili. Akuna imbo te naa peyang! nimbe moromo kanomu. Kunana te kape i tepa kala:

Imbo te yunge kongono kolo wangopa tepili! (Sng 69:25, 109:8)  
nimbe moromo kanomu.

<sup>21-22</sup> Imunga kinye i ungu talonga te oi kere memo, akumunga te kape kamukumu kere mepa wendo opili teamili! Oi lino iye 12 molorumulu. Nalo i nio iye pokonga te mainye purumu. Akumunga yunge kombu kolo wangopa molopili iye te imbi topo kanopo liemili! Aku iye kanopo limolomu i tepa molorumu mele kombu lipa moloripili: Oi Jononi pulu polopa imboma no ltindirimu mele kape, altopa yandopa yandopa Iye Awili Jisasin uluma tepa unguma nimbe molopalie kelepa lino mundupe tiye kolopa mulu kombuna olando purumu mele kape, aku uluma pali wendo orumu mele kanopa limo kinye waye tapu topo andorumulu aku iyemanga te imbi topo kanopo liemili! Aku kanopo limolo iyemu yuni Jisas onto kombunga makilipe wendo orumu mele kape kanopa telu iyemu. Aku ambe telka lino waye koniye lepo andopo imboma temane topo nimbo timolo mele," nimu.

<sup>23</sup> Pitani aku tepa nimu kinye waye moloringi imbo kanomani iye talo kanoko ltingi. Iye tengah imbi Josep, aku iyemu yunge imbi talo leringila, te Barsabas, te Justus ningi. Iye te kanoko ltingimu aku iyemunga imbi Matias.

<sup>24-25</sup> Aku iye talo kanoko liko mondokolio Gotendo konge i teko teringi: "Awilimu, nuni imbo palinga konopuma kanoko imbi tirino kanomu. Kinye Jisasini aposel kongono tipe mundulimu Judasini tepili nimbe tirimi nalo yuni aku kongonomu mundupe tiye kolopa yunge ulu kalaro terimumunga yu yunu kolorumu. Imunga kano kongonomu kolo wangopa tepili iye te nuni kinye iye i talonga imunana imbi toniomu lino liko ondowi," ningokonge teringi.

<sup>26</sup> Kano wali iye talonga imbi talo manda leko pipia gomo talonga tokolio kinye mingina tuku munduringi. Kelko mingimu ambolko lopelape tenderingi wali Matiasinga imbimu kiyendo wendo orumu. Kano kinye oi Jisasini lipa mundurumu iye 11 moloringi kanoma kinye peya molopa kongono tapu topa tepili ningi. Aku teringimunga kelepa lipa popo tipe kongono iye tipe munduli aposel 12 oi moloringi kano mele altoko aku teko moloringi.

## 2

*Gotenga Mini Kake Telimu mainye orumu*

<sup>1</sup> Jisas kolopa makilipe muluna olando purumu waimunga yando ningolio kinye wali ki talo talo pakera ombo purumu

kinye Pentikos waimu wendo orumu. Aku waimunga Jisas ipuki tiringi imboma pali kombu tendekuna liko nombeya teko moloringi.

<sup>2</sup> Kano wali walitikale kau muluna ola poporome mele ungu te ombalile ungu nimo kano mele nilipe mainye orumu. Aku wali ulkena nombeya teko moloringi imbo kanomani palini neya aku nimu ungumu pileringi.

<sup>3</sup> Kano kinye ne ungumu alumelu tipe alimbili melema elkemalke topa wendo orumuna kanoringi. Aku tipe alimbilima ongo imbo te te ningi moloringi.

<sup>4</sup> Kano kinye Jisas ipuki tiringi kano imbo-manga konopundo Gotenga Mini Kake Tellimu tukundo omaba molopa manda tenderimu. Kano kinye Gotenga Minimuni imbo-manga konopundo yu mele mele molopalie tope tirimu kinye imbo ungu lupe lupe awi teli oi naa pilko naa nilima neya aku wali pulu polko ningei liko anjiringi.

<sup>5</sup> Juda imboma, mare oi ongo ulke kombu awili Jerusalem nombeya teko moloringi kinye aku ulumu wendo orumu. Aku imboma eno Gote wale pakoromele imboma. Enonga moloringi kombu malio imbo lupe lupema peya pali molkolio aku imboma munduko tiye kolko Jerusalem tukundo oringi.

<sup>6</sup> Kano poporome awili mele ungumu pilkolio kano imboma makutokolio enonga imbo ungu lupe lupema Jisas lombili andoli iyemani ningina pilkolio eno konopu awi teli liko munduringi.

<sup>7</sup> Aku imbomani ereye ningi konopu awi teli lekolio ningei, "Aa, i ungu lupe lupe nimele imbomape eno Galili imbomanje? Nalo Galili imbomani ungu tendekumu nimele kanomu.

<sup>8</sup> Imunga lino piltimolo, kinye lino te te nimbo imbo ungu lupe lupe nimoloma ambe teko pilkolio nimelenje.

<sup>9-11</sup> Lino kombu Partia kinye Mindiya kinye Elam kinye Mesopotemia kinye Judia kinye Kapadosia kinye Pontus kinye Esia kinye Frigia kinye Pamfilia kinye Isip kinye Libia tukundo Sairini kombu nondopa litemo kombuma kinye Rom kombu kinye Krit kombu kinye Arebia kombu kinye aku kombu lupe lupemanga molopo omolo imboma moromolo. Lino Rom kombu tiye kolopa oromuluma Judia imboma kape imbo lupemani molopolio Judia imbomangga ulu puluma mane lipo tere-molo imboma. Lino yu mele mele linongan imbo ungumani Goteni ulu enge nili tere-momando nimelena piltimolo," ningi.

<sup>12</sup> Eno kano araya ningi pilko tundukolio enonga nendo yando ningei, "I ulu pulu ambele tenje," ningi.

<sup>13</sup> Nalo imbo mareni Jisasinga ungumu pilko lombileringi imboma ungu kondowa Itindikolio ningei, "Imbo ima no enge nili nongolio loi leko keke lepo toromele," ningi.

### *Pitani imboma ungu nimbe tirimu*

<sup>14</sup> Kano wali Pita kinye kongono tipe munduli iye aposel 11 kinye peya ola angleringi kinye Pitani imbomando kere anga topa ungu ola nimbeline nimbei, "Linonga Judia imboma kinye eno Jerusalem moromele imboma kinye i wendo oromona teremolo ulumunga pulumu eno nimbo temboi wamongo komu tendeko pileio nimu.

<sup>15</sup> Eno imbomani lino lowi lepo keke lepo toromolo konopu ltemele nalo aku molo. Kinye otili oi naain klok kau, imunga ena wai akuna imboma no naa noromele kanomu.

<sup>16</sup> Kinye wendo oromo ulumunga i tepa ombalo mele oi Gotenga profet iye Joeleni i tepa nimbe topa panjirimu:

### <sup>17</sup> Goteni nimbeindo:

Peyalime waimu wendo ombalo kinye nani nanga Minimu imboma pali no mele ondopo timbo.

Aku walimunga enonga lemenali marenali nanga ungu nimbo munduromu pilkolio yandoko imboma ningi tingi.

Enonga iye wenepomani mongo indi kumbu tengenje.

Aku wali enonga iye pulumani kape uru kumbu tengenje.

<sup>18</sup> Imunga neya aku walimanga nanga kongono kendemande imbo mainye mololima kape peya nanga minimu ondopo timbo. Aku kinye nanga nimbo munduro ungu yandoko ningi tingi.

<sup>19-20</sup> Awilimunga pa awili teremo wai awilimbuoi wendo naa opili kau nani muluna ola kinye maina mainye ulu enge nilima eno kanangei nimbo lipo ondopo tembo.

Aku ulumanga maina mainye yokoli kinye tipe kinye ilio awili kinye ulu enge nili akuma wendo opili nimbo. Kelepo muluna pala enamu tumbulu topa olimu yokoli tepili nimblola.

<sup>21</sup> Aku wali Iye Awilimunga imbi leko konge tengenje imboma nani tepo lipo tukundo limbo, (*Jol 2:28-32*) nimbe Goteni nimu nimbe Gotenga nimbe munduli ungu nimu iye profet Joeleni ake tepa nimu.

<sup>22</sup> Imunga eno Israel imboma i ungumu eno nimbo timboi tero kani wamongo pileio! Nasaret iye Jisas yu paimbo Goteni kanopa lipe imbi topalile lipe mundurumu iyemu ningi kanoko imbi tengenji nimbe Goteni yu lipe tapondorumu kinye enonga

mongo pala ulu enge nilima terimu. Aku uluma eno kanoko pileringi kanomu.

<sup>23</sup> Akumunga enoni aku iyemu kinye pele tengen uluma Goteni oi lipe manjirimu. Goteni i tepa wendo opili nimbe lipe manjipielie iye imu eno Israel imboma tirimu kinye teko kenjiringi imbonani enonga liko tapondoko yu tangei ningon enonga kindo tiringi. Aku kinye enoni yu unjo polopeyana pirimuni toko uku toko kamukumu toko kondoringi kinye yu kolourumu.

<sup>24</sup> Aku toringi nalo Goteni kamukumu maina naa pepili nimbe topa makinjirimu. Kololi ulu pulumuni yu lipe ka tepa kamukumu manda naa ambolorumu. Gote yuni tepa lipe wendo ltimu.

<sup>25</sup> Oi molorumu iye kamako King Devitini kape iye imuni altopa tembalo mele oi ungu te nimbe panjirimu mele i tepa, Iye Awilimunangaliwali nanga kumbekerena moromona kando. Yuni na lipe tapondombaindo nanga ki imbondonumba moromomunga melteni na manda umbuni naa timbelo.

<sup>26-27</sup> Akumunga na kaimbo kondopo moro. Imunga na konopu tipo molopo nanga kerena unguma nio. Gote nuni nanga minimu imbona kolko purumele kombuna munduko tiye naa kolkono, nunge kake tel iye onomu we puru pupili ungu naa nino.

Akumunga lipo manjipolio nanga kangimu kinye minimu kinye peya na mele pengamu limbo nimbo nokopo moro. <sup>28</sup> Gote nuni na koinjo molopo kau pumbo aulkemu liko ondorunu. Nu na kinye tendeku tiko moloniomunga na konopu awili timbo, (*Sng 16:8-11*) nimbe Devitini aku tepa nimu.

<sup>29</sup> Akumunga, imbo angko kame i ungumu paimbo nio. Linonga ara kae Devit oi kolourumu ono teringi. Yunge ono kombumu linonga kombuna lerimu lemo. Aku lemope yuni nunge kake tel iye onomu purupupili ungu naa ninu ungu naa nimu. Akumungaaku nimu ungumu yu yunundo naa nimu itemo.

<sup>30</sup> Nalo yu Gotenga nimbe munduli ungu pilipe yando nimbe tili iye profet moloramunu kinye Goteni Devit yundo nimbei nuni maina imbo te nu kolo wangopa iye kamako kingimu molombalo nimbelie paa paimbo aku tembo nimbe enge nimbe nimu mele pilerimu.

<sup>31</sup> Devit yu Gotenga iye profet molopalie altopa wendo ombalo mele oi lipe manjipielie i tepa nimu, Goteni yunge minimu imbo kolko purumele kombuna mundupe tiye naa kolopa yunge onomu purupupili ungu naa nimbelo. Aku nimu ungumu

Goteni kanopa lipe imbi topa mundurumu iye Kraistindo yu kelepa kolopalie makilipe ola molombalo ungundo nimu.

<sup>32</sup> Imunga paimbo Goteni iye Jisas ono kombuna topa makinjirimu, aku ulumu lino kanorumulu mele nimolu.

<sup>33</sup> Aku ono kombuna topa makinjipelie Gote yunge imbo kindo lipe mondororu. Akuna molopalie Lapani Mini Kake Telimu oi timbo nimumu yu tirimu. Kelepa yuni lipelie kinye yando tirimo. Kinye i oromo mele kanoko imbi tiko piltiemele.

<sup>34-35</sup> Devit mulu kombuna olando naa pruru nalo yuni nimbeindo, Awilimuni nanga awilimundo nimbei, 'Nunge opa pule imbonani nunge ungu tengen pilko molangei nimbo topo mainye mundumboindo i teli oi nu nanga kombu pengando ongo molani,' nimu, (*Sng 11:0:1*) nimbe Devitini aku tepa nimu.

<sup>36</sup> Akumunga kinye eno Israel imbo pali i teko liko manjeio: I iye Jisas enoni unjo polopeyana toko uku toringi. Aku iyemu Goteni yu iye awili molopili nimbe, yu imbona nokopa kondopili nimbe kanopa lipelie iye Kraist molopili nimu iyemu momomo," nimbe Pita aku tepa nimu.

#### *Imbo paa awini konopu topele toko no ltingi*

<sup>37</sup> Aku teko teringi mele Pitani aku tepa nimu ungumu pilkolio imbona eno mini ltekolio enoni Pita yu kinye Jisasini kongono lipe mundurumu iye aposel we angileringu kanoma enondo ningei, "Ango kame, kinye lino ambe teamiliya?" ningi.

<sup>38</sup> Pitani kano imbona enondo nimbei, "Eno Goteni enonga ulu pulu kerima kanopa kulu tondopili ningon enonga teko kenjirimele ulumanga konopu liko munduko konopu topele tokolio na Jisas Kraistinga imbonu molambo ningon no lieio. Aku tengen wali Goteni Mini Kake Telimu eno we timbelona liengei kala.

<sup>39</sup> Oi Goteni Mini Kake Teli timbo nimumunga akumu eno kinye enoni kalko linge imbona kinye imbo kombu tulemanga moromele imbona kinye eno palindo nimu. Awilimunang Gote yuni nimbei nanga imbona molangei waio nimbo imbona pali Mini Kake Telimu timbo nimu nimbe Pitani aku tepa nimu.

<sup>40</sup> Ungu lupe lupe awi tel iye enoni pilengei nimbe lepi lepi topalie nimbei, "Ya maina imbo moloko kenjirimele manga Goteni eno umbuni timbei teremo kani yuni lino umbuni naa tipili ningon konopu topele toko molaio," nimu.

<sup>41</sup> Kano kinye Pitani nimu ungumu pilko ltingi imbona no ltingi. Neya aku walimunga Jisasinga ungumu paimbo ningo

pileringi imbo talapemunga tukundo imbo 3,000 mele olandopa purumu.

<sup>42</sup> Kano kinye ungumu pilko liko no ltingi imboma iye kongono tipe munduli iye aposelemani ungu mane tiringima pilko imbo angenupili kinye tendekuna manda molko, peya tapu toko langi mongo nongo, Gote imbi kapi ningi konge teko mororingi.

*Kraustinga imboma konopu tendeku tiko mororingi*

<sup>43</sup> Jisasini yunge kongono tendepaio nimbe kongono iye lipe mundurumu iye aposelema Goteni lipe tapondorumu kinye ulu enge nilima teringimunga imboma pali pipili kolko mini lteringi.

<sup>44</sup> Jisas Kraist yu paimbo ningi liko manjiringi imboma pali tendekuna molko enonga melema enono yu mele mele noiemili ungu naa ningi linonga popo tipo noiemili ningi tendeku tiko mororingi.

<sup>45</sup> Enonga mai kinye mele noiringima yolo liko kou liko mele molo lerimu imboma kou moke teko tiringi.

<sup>46</sup> Waliwali Gotenga ulke tempelena pungo maku toko enonga ulke malio pali peya andoko langi peya namili ningi konopu penga pepili konopu tiko langi nongo

<sup>47</sup> Gote kapi ningi imbi ambolko ola liko mororingi. Aku wali imbo wemani eno pali kanoko penga pileringi. Ulu pulu kerimanga konopu liko munduko konopu topele toko Jisasindo lino liko tapowi ningi imboma Awilimuni yunge imboma molangei nimbe waliwali tukundo tukundo ltimu.

### 3

*Kimbo keri lerimu iye te Pitani tepa koinjo ltimu*

<sup>1</sup> Imboma Gotenga ulke tempelena ena 3 klok pungo Gote konge nipula teringi mele walite Pita kinye Jon talo kano ena mongomunga Gote konge tengilindo puringili.

<sup>2</sup> Kano kinye iye kimbo keri leli te akuna molorumu. Anumuni olo tuku kimbo keri lelimu merimu. Aku iyemu yu imbo ongo Gotenga ulke awili tempelena tukundo pungeema konge tepa kou tieio nipili ningi waliwali meko ongo Gotenga ulke awili tempel kere pulu te imbi tiko Paa Penga ningi kanona mondopula teringi.

<sup>3</sup> Kano iyemu akuna molopili Pita kinye Jon talo ongo Gotenga ulke tempelena pungili puringili. Kano kinye yuni elo konge tepa kou mare mengele tielio nimu.

<sup>4</sup> I tepa nimu wali Pita kinye Jon taloni yu wamongo neme neme ningi kanokolio Pitani i tepa nimu, "Nuni ilto kanowi," nimu.

<sup>5</sup> Kano wali yuni kou tingilindo nimbele konopu lepalie elo kanorumu.

<sup>6</sup> Kano terimu kinye Pitani nimbei, "Na kou kape tendekure paa naa mendu nalo mele te meromu nu timboi tero. Akumu lemo Nasaret Iye Jisas Kraistinga imbina nu ola angilkono andowi nio," nimu.

<sup>7</sup> Aku ungu nimbelie yunge imbo kimu ambolopa lipe ola anjirimu kinye walitikale yunge kimbo talo enge nimu.

<sup>8</sup> Yu po nimbe ola pumbe ola angilipe pulu polopa andopa molorumu. Aku tepalie iye talo kinye peya tapu toko Gotenga ulke tempelena tukundo puringi. Yu kimbo kambulupe puke tolipe Gote kapi nilipe tukundo purumu.

<sup>9</sup> Yu kimbo kambulupe Gote kapi nilipe orumu ulu imbo palini kanoringi.

<sup>10</sup> Aku ulu kanokolio, yu waliwali Gotenga ulke tempel kere pulu Paa Penga nilina mainye molopaka kou konge teremo iye kanomu oromo ltemo ningi liko manjiko pungu ningi mini lteringi.

*Pitani ulke tempelena ungu mane tirimu*

<sup>11</sup> Kimbo keri lerimu iyemu ola angilipe Pita Jon talo ambolorumu kinye kanokolio imbo palini mini lteko lkiko ongo Gotenga ulke tempelena Solomononga ningi ulke kere pulu takoko yandoko ltingina Pita Jon talo kinye iye kimbo keri lerimumu kinye mororingina eno ongo maku toringi.

<sup>12</sup> Aku ulu teringi kinye Pitani kanopalie imbo akumando nimbei, "Eno Israel imboma, ambe temona i wendo oromo ulumu kanokolio konopu awini liko mundurumeleya? Ambe temona enoni ilto taki leko kandomeleya? Iltoni iltonga enge teni iye imu ola angilipe pupili ningele konopu itemeleya? Aku paa molo. Molo iltoni Goteni kanopa penga pimo ulu pulu te tembolona iye imu teko koinjo lingele konopu itemeleya? Aku paa molo kala."

<sup>13</sup> Nalo Abraham, Aisak, Jekop pokonkye linonga we ara kaue kame akumani linonga Gote ningi popo toringi kano Gote yuni yunge kongono iye Jisasina imbimu ambolopa lipe ola mundurumu. Aku iyemu eno Israel imbomanu yu tangei ningi yu Rom Davman iyemando liko tiringi. Aku teringi kinye Rom iye awili Pontius Pilateni nimbei, Yuni ulu te temo nimbo naa kandomunga yu pupili nimu nalo enoni yu tangei ningi liko umbulu tiringi.

<sup>14</sup> Iye kake teli tumbi nilimu yu umbulu tiko, kelko aku iyemunga kolo wangopa imbo topa kondoli iye te ka ulke wendo ombo pupili niwi ningi kanomu.

<sup>15</sup> Koinjo mololi ulumunga pulu iyemu toko kondorigni nalo Goteni imbo ono kombuna topa makinjirimu. Imungaaku terimu mele iltoni kanorumulu.

<sup>16</sup> Jisasini manda tepa koinjo limbelo nimbo ipuki enge nimbo timbolomunga iye

eno kanoko imbi tirimele imu koinjo pumo. Jisas kinye enge peremo nimbo yu ipuki tipolo yunge imbi lipo anjipo konge tembolo. Aku tepolio yuni iye imu manda tepe koinjo limbelo nimbo ipuki timbolo-munga iye imu koinjo pumo mele enoni kandomele.

<sup>17</sup> Paimbo, imbo ango kame, eno kinye enonga iye nokolima kinye enoni naa liko manjikolio Jisas toko kondoringi.

<sup>18</sup> Nalo aku ulu tembalo mele oi Goteni wendo opili nimbe nimu mele paa wendo orumu. Aku ulu wendo ombalo mele Gote yuni yunge ungu nimbe mundulimu pilko yandoko ningi tiringi iye profetemando i tepe nimu: Nani imbi topo lipo mundumbo iyemu mindili paa nomba kolombalo.

Aku tepe nimu kano mele eno nanga ungumu piltiemelemani paa paimbo tiringi aka tepe wendo orumu.

<sup>19</sup> Akumunga kinye enonga teko kenjirimele ulumanga konopu liko munduko konopu topele taio. Aku tekolio Gote moromona waio. Aku tengen wali Goteni enonga ulu pulu kerima kamukumu mundupe tiye kondopili. Aku ulu tengen kinye iye Awilimuni eno tepe enge tipe koinjo molaio nimbe

<sup>20</sup> eno molongena yuni oi kanopa lipe eno lipe tapondopili nimu iye Kraist imu eno timbello. Aku timbello iyemunga imbi Jisas.

<sup>21</sup> Goteni melema pali koinjo pupili nimbelo walimu wendo ombalomunga kinye i teli oi aku Jisas yu mulu kombuna nokopa moromo. Unku kanomu oi Goteni nimbe panjirimu mele kelko yunge iye kake teli profetemani yando ningi tiringi.

<sup>22</sup> Aku ningi tiringi mele, oi Mosesini i tepe nimu,

Awilimun enonga Gote na yunge iye profet moro mele enonga angena te na kolo wangopa yu Gotenga profet iye molopili nimbe kanopa limbelo. Aku nimbe munduli ungu nili iye profetemani yuni nimbelo mele eno paa pilko lengei.

<sup>23</sup> Eno aku iye profetemunga ungu naa pilinge imboma

Gote yunge talapena naa molangei nimbe Gote eno topa kondombalo. (Lo 18:15,18-19)

<sup>24</sup> Kinye wendo oromo ulu akumu oi moloringi iye Gotenga iye profetemani pali ungu ningi tiringi mele kinye wendo oromo kani eno konopu topele taio. Gotenga ungu nimbe tirimuna kere ltimu iye profet Samuel kinye yandoko yandoko moloringi iye profetemani pali aku teko ningi.

<sup>25</sup> Imunga kinye oi Gotenga iye profet molkolomani Goteni mi lepa timbo nimu ulumu altopta wendo ombalo ningi

unguma, kinye wendo oromo akumu enonga nimbe wendo oromo. Oi enonga kolenale kinye Goteni nimbe panjirimu unguma kinye enonga nimbe wendo oromo. Goteni eno oi pulu mondopa kalopa ltimu iye Abrahamedo i tepe nimu,

Nuni menio iye teni tembalo ulumuni mainaimboma pali molko kondonge, (Stt 22:18, 26:4)

nimu.

<sup>26</sup> Goteni yunge kongono iyemu eno Israelimboma lipe tapondopili nimbe kumbe lepa tipe mundumbelo. Akumunga Eno Israel imboma enonga teko kenjirimele ulumanga konopu liko munduko konopu topele toko aku uluma tiye kolaio. Eno te te nimbe konopu topele tondopili nimbe eno molongena yunge kongono iyemu oi kumbe lepa lipe mundumo. Aku kano iyemuni eno molko kandangei nipili Goteni aka terimu," nimu.

## 4

*Juda imbomanga kaunsil iyemani Pita Jon talo kot tendeko ka tiringi*

<sup>1</sup> Pita kinye Jon talo imboma ungu ningi tilko angileringili Gote popo tondoli iye popo tondoli iyema kinye, Gotenga Ulke tempeleme ele iyemanga nokoli iyema kinye imbo kololima naa makilklo koinjo molonge ningi Sadyusi iyema kinye.

<sup>2</sup> Aku iye taloni Jisas ono kombuna makilipe ola molorumu ningi tikolu yuaku terimuna imboma pali makilklo ola molonge ningi tiringili ungu pilkolio eno mumindili koloringi.

<sup>3</sup> Kano iyemani Pita Jon talo ka tiko, ipo lerimu kinye otilikondo kot teamili ningi elo liko ka ulkena panjiringi.

<sup>4</sup> Nalo ungu ningi tiringilina pileringi imbomanga awini paimbo nimbele ningi ipuki tiringi. Kano kinye oi Gotenga ungumu ipuki tiko pileringi imboma kinye kelko pele Gotenga ungumu pilko ipuki tiringi imboma kinye lipe popo tipe 5,000 mele moloringi.

<sup>5</sup> Otilikondo iye awilima kinye tapu iyema kinye Mosesinga ungu manema pilko mane tili iyema kinye Jerusalem kombuna liko maku toringi.

<sup>6</sup> Akuna Gote popo tondoli iyemanga iye awili oi molorumu iye Anas kinye kelepa yunge kolo wangopaaku tepe molorumu iye imbi Kaiafas talo kinye Jon kinye Aleksander kinye we Anas yunge pulu lerimu iye mare kinye eno waye moloringi.

<sup>7</sup> Aku maku tokolio ningimuni Pita kinye Jon talo kot tendengeindo enonga kumbekerena liko ola anjikolio waltindikoo ningei, "Elo kinye enge ambeleme peremo, molo

naringa imbi lekolio eloni kano ulu tondolamu tengelyea?" ningi waltindiringi.

<sup>8</sup> Kano wali Pitanga konopundo Gotenga Mini Kake Telimu pumbe molopa manda tenderimu kinye Pitani kano iyemando nimbei, "Eno Israel iye awilima kinye tapu iyemando kinye

<sup>9</sup> enoni iltoo waltindirimelempue, iltoni iye kimbo keri leli imu kondo kolopo lipo tapondombolomunga waltindirimele konopu lteo. Imunga kinye iyemu ambe tepalie koinjo pumo konopu lekolio waltindirimeleya?

<sup>10</sup> Aku lemope eno kot piltimile Israel iyema kinye Israel imboma pali i ungumpileio! Ulke kombu Nasaret iye Jisas Kraist enoni unjo polopeyana toko kondoringi. Nalo Goteni kelepa topa maknjirimu. Kano iye Jisasinga engemuni yunge imbi lepo koinjo puwi nimbolo wali iye imu koinjo pumbe enonga kumbekerena angilitmona kandomele.

<sup>11</sup> Aku ungu pulumunga oi kunana te toko panjikolio ungu iko toko ningi mele i tepa, Ulke takoringi iyemani kanoko tiye kolko lteringi kou kanomu kanoko keri mondoringi nalo  
kinye kano koumu yu ulke timu mele ulke enge tindili kou pengamu ningi kano koumu yu. (Sng 118:22)

Aku koumu lteringi iyema aku eno Israel iyema.

<sup>12</sup> Imunga imbo lupe teni lino manda naa lipo tapondombalo. Mai kombumanga pali imbo lupe teni lino lipo tapondopili nimbo imbi lepo waltindimolo imbo te molo, nalo Goteni Jisas yu kanopa lipelie yuni kau imboma tepa lipili nimu," Pita i tepa nimu.

<sup>13</sup> Pita kinye Jon talo pipili naa kolkolio unguma tumbi tiko ningilina kanoko elo skul naa tekolio we imbo iye talo moloringili kanokolio eno konopu awi teli liko munduringi. Aku tekolio i teko liko manjiringi. Iye i talo oi Jisas kinye peya tapu toko andoringili iye talo lepamo ningi liko manjiringi.

<sup>14</sup> Nalo iye koinjo purumu kanomu elo kinye peya tapu toko angileringina kanokolio eno ungu te manda topondoko naa ningi.

<sup>15</sup> Imunga eno kaunsil ulkena penando paio ningi. Pena puringili wali enoni enono kere popo tikolio ningi,

<sup>16</sup> "Iye i talo linoni ambe teamiliya? Eloni ulu enge nili paa penga te tengelye. Jerusalem moromele imbomania pali i ulu pilko kanonge. Akumunga ulte naa tengelye ungumu manda naa nimol.

<sup>17</sup> Nalo i nimbele ungumu kombumanga pali niliko pungele kinye kelko pilinge wali manda naa tembaloo kani altoko Jisasinga imbimu leko kombumanga anjo anjo ungu

te naa nengili. Ningele lemo elo umbuni liengili nimolo nimbo, molo nemili," ningi.

<sup>18</sup> Aku teko ningi panjikolio kelko elo walio ningolio i teko ningi, paa ungu kelo te kape Jisasinga imbimu leko naa ningolo, imboma ungu mane naa tielio, molo ningi.

<sup>19</sup> Nalo Pita kinye Jon talo eloni kano iyemando ungu pundu toko ningili, "Goteni ilo tealio nimo mele mundupo tiye kolopo enoni tealio nimele mele tembolo lemo Goteni kanopa penga pilimbelonje akumu enoni liko manjeo.

<sup>20</sup> Nalo ilo ulu kanorumbulu mele kape pilerimbulu mele kape keremu manda pipi naa timbolo," ningili.

<sup>21-22</sup> Oi teko koinjo ltingili kano iyemu yu oi ainyembo lepili poine 40 omba purumuna imbomania pali kanokolio Gote kapi ningi imbi ambolko ola munduringina eno kanokolio elo umbuni tingei aulke te koroko keleringi. Aku tekolio elo enge ningi, ningi pipili kondokolio palio ningi.

#### *Kraistinga imboma Gote kinye ungu ningi*

<sup>23</sup> Kano iye taloni elonga imboma moloringina tumbi tiko pungolio Gote popo tondoli iyemanga awilima kinye Israel imbomanga tapu iyema kinye aku iyemani elondo ninge mele elonga Jisasinga ungumu pileli imboma temane toko tiringili.

<sup>24</sup> Aku teko ningi ungu pilkolio eno liko popo tiko molkolio Gote konge teko ningei, "Melemanga pali nokromo iye kamako awilimu, nuni mulumu kape maimu kape nomu kutamu kape we mele Itemoma pali terinu.

<sup>25</sup> Nuni ungu te ninindo nunge Minimuni linonga ara kaue nunge kongono iye Devit nimbe tirimu kinye yuni pilipe yando nimbe tirimu mele i tepa,

Israel imbo naa molko ungu lupe moromele imboma eno ambe temona mumindili koltomeleya?

Imbomania pali ulure manda naa tengelye ambe temona teamili ningi konopundo panjiringiya?

<sup>26</sup> Gote Awilimu kinye yuni yunge imboma lipo tapondopili nimbe kanopa lipo imbi torumu iye Kraist kinye kombumanga pali iye awili kingima elo kinye opa teamili ningi moromele.

Imbo nokoli iyemani elo topo mainye mundumolo ningi moromele.

Aku teko ulu manda naa tengelye, imunga ambe temona teamili ningi moromeleya? (Sng 2:1-2)

nimbe Devitini aku tepa ungu taka tondorumu.

<sup>27</sup> Aku nimu ungumu kinye kere meremo. Paimbo i ulke kombuna iye awili king Herot kinye Rom iye Pontius Pailat taloni kinye Israel imboma kinye Israel imbo naa molko imbo ungu lupe nilima kinye maku toko nunge kongono iye kake telimu oi kanoko liko imbi torunu iye Jisas tamili ningi wai toringi.

<sup>28</sup> Nalo aku teringi uluma oi nunge enge-muni nunge nunu konopuni liko manjiko i teko teangei ningi pilerinu mele aku teko lombilko toringi.

<sup>29</sup> Kanomunga Awilimu kinye lino kinye enoni temolo ningi pipili kondoromele mele nuni pilkolio nunge kongono iyema nunge ungumu ningeindo pipili naa kolko toyta toko nengei kani liko tapondowi.

<sup>30</sup> Nunge kongono iye kake telu Jisasinga imbi lepo yu waltindimolo kinye kuro tombalo imboma koinjo pangei ningi ulu enge nilima teko nunge kongono teremolo imboma paimbo akumu Gotenga kongonomu lepamo ningi kanangei ningi ulu enge nilima tewi," ningi.

<sup>31</sup> Aku teko Gote kinye ungu ningi pora tiringi wali ulke moloringimu parambala mele tepa Mini Kake Telimu enonga konopundo ombo molopa manda terimu kinye pipili naa kolko Gotenga ungumu enge ningi imboma ningi andoko tiringi.

*Kraistingu imboma ulu enge nilima teko konopu tendekuna pupili moloringi*

<sup>32</sup> Jisas yu paimbo iye Kraist ningi ipuki tiringi imboma penga teko molko eno konopu tendekuna pupili moloringi. Imbo te yunge mele noirimuma nanga manjipe naa nimbe linonga waye nimbe tendeku tiko noiringi.

<sup>33</sup> Jisasini kongono lipe mundurumu iye aposelemani Awili Jisas makilipe ola molorumuna kanoringi mele temane pengamu munduko tiye naa kolko enge ningi toko tilko andoringi kinye Goteni eno mane tirimu.

<sup>34</sup> Aku terimu wali eno moloringina imbo te langi kape melte molo leli imbo te naa molorumu. Walite walite ningi imbo te mai lepa ulke awi telu angilipe terimumani mai we lepa ulke angilipe terimuma kou mone liko meli ongo,

<sup>35</sup> iye aposelema moloringina ongo tiringi. Aku teringi kinye iye aposelemani imbo mele molo lerimuma moke teko tiringi.

<sup>36</sup> Aku teko teringi mele Josep nili iye teni aka tepa terimu. Aku iyemu aposelemani yunge imbi te Barnabas ningi. Barnabas imbirunga pulunu i tepa, imboma nimbe toimbo tondoli iyemu. Yu iye lapu aka Livai, yunge ulke kombu Saiprus.

<sup>37</sup> Aku iyemuni yunge mai te lerimu kanomu kou lipelie mepa ombo aposelema tirimu.

## 5

*Ananaias kinye omenu Safaira talo koloringili*

<sup>1</sup> Kraistingu imboma aku teko moloringi nalo ulu teringi mele tumbi tipe naa teli iye te molorumu, aku iyemu yunge imbi Ananaias. Yunge omenumunga imbi Safaira. Ananaiasini elonga mai te kou mone lipelie nimumuni,

<sup>2</sup> omenu kanopa molopili kou ltimu-manga pakiripe ekondo yunge noipe ekondo iye aposelema pumbe tipelie nimbei, "Nani mai te kou lipolio aku kouma mepo ombo i tiro," nimu.

<sup>3</sup> Kano tepa nimu kinye Pitani yundo nimbei, "Ananaias, ambe temona nunge konopuna kuromanga iye nomi Satan ombo molopili ningolio Mini Kake Telimu kolo toko tikono, maimunga kou linioma pakiriko mare anjo noikono mare meko ongolio lino kolo toko tirinoya?

<sup>4</sup> Oi kou naa lino kinye maimu nunge kanomu. Kou linioma nunu nokonio kanomu. Kelku maimu na kou liemboi nilinanje imbole ungure naa nilka. Maimu nungemu. Kou mone likolio ekondo nanu noipo ekondo imboma tiemboi nilinanje kape ungure molo kala. Imunga mele nungemu. Akumunga ambele konopu lekolio kou mone likolio ekondo kau ningi kolo toronoya? Nuni aka tenio ulumu iyema kau kolo toko naa tirino, molo. Nalo Gote kolo toko tirino," nimu.

<sup>5-6</sup> Pitani aka tepa nimu ungumu Ananaias pilipelie, yu kano kolorumu kinye yunge kangi panamu topa mainye mundurumu. Kano terimu kinye iye wenepoma ongolio yunge kangi panamu liko maminyeni kulupi toko meli pungo ono tepuringi. Aku tepa ulu terimu ungu temanemu imboma pilkolio paa mini lteringi.

<sup>7</sup> Kano kinye Ananaias omenu yu i ulu wendo orumumu naa pilipelie pini pini molorumu. Pele ena mongo yupoko ombo purumo kinye yu orumu.

<sup>8</sup> Kano wali Pitani yu waltindipelie nimbei, "I kou mone ombo timona amboltomu elo maimunga aka teko lingele meleya? Na pilemboi ningi tiwi," nimu. I tepa nimu wali ambomuni nimbei, "Paimbo aka tepo waye limbolo mele," nimu.

<sup>9</sup> Kano wali Pitani yundo nimbei, "Ambe temona Awilimunga Minimu kolo topo tiembili ningeleya? Nunge omenanga onomu meli pungo ono tepunge iyema ongo ulke kere puluna angimele kani akumani nunge kangi panamu liko meko pangei kala," nimu.

<sup>10</sup> Kano kinye ambomu Pitanga kumbekerenya kolorumu wali yunge kangi panamu topa mainye mundurumu. Kano kinye iye wenepoma ongolio yunge onomu kanoko likolio omenu ono teringina yu meko pungo kopu teko ono teringi.

<sup>11</sup> Kano wali Kraustinga talapena imboma kape we imboma kape i ulumu wendo orumuna pileringima palini eno pipili kolkolio mini lteringi.

*Aposelemani ulu enge nili awini andoko teringi*

<sup>12</sup> Imbo moloringimanga ulu enge nili lupe lupe awi teli iye aposlemani andoko teringi. Kraist paimbo moromo ningi imboma Gotenga ulke awili tempelena Solomononga ningi takoko yandoko ltingi ulke kere puluna ongo waliwali maku toringi.

<sup>13</sup> Imbo lupemani eno kanoko penga pileringi nalo pipili kolkolio Kraustinga imboma kinye maku tamili ningi naa oringi.

<sup>14</sup> Akumu paimbo nalo imbo awini Awilimu yu paimbo ningi ipuki tiko tukundo ongo yunge imboma moloringi.

<sup>15</sup> Aposelemani teringi mele kanokolio imbomani imbo kuro torumuma meko wendo ongo aulke kulendona kunu lembulkolio noiko moloringi. Pita yu ombo pumbelo wali yu lope naa tendemo lemo enana yunge minimu eno lengena ombalo aku tombalo kinye koinjo pungenje ningiaku teko noiko moloringi.

<sup>16</sup> Ulke kombu awili Jerusalem lerimumunga nondopa lerimu ulke kombumanga moloringi imbo awini kuro torumu imboma kinye kuro keri konopuna perimu imboma kinye meko oringi, kano kinye iye aposlemani eno pali teko koinjo ltingi.

*Aposel iyema ka ulkena wendo ltimu*

<sup>17</sup> Kano wali Gote popo tondoli iyemanga iye awilimu kinye, Sadyusi talapena tukundo yu peya tapu toko moloringi iyema kinye imboma eno munduko tiye kolko iye aposlemaaku teko lombili purungi mele kanokolio eno paa konopu keri panjiringi. Aposelemani teringi mele naa teaio ningolio

<sup>18</sup> eno ambolko liko we imboma panjiringi ka ulke awilina ka tiko tuku panjiringi.

<sup>19</sup> Nalo ipu leli Awilimunga mulu kombuna ensel te omba ka ulke nambu topa eno lipe mepa penana ombalie nimbeindo,

<sup>20</sup> "Eno Gotenga ulke awili tempelena pungo angliko imbomanga Gote kinye koinjo molomolo mele temane toko tieio," nimu.

<sup>21</sup> Iye aposlemani yuni nimu mele pilko likolio kombu muni kinye Gotenga ulke

tempelena pungo imboma ungu mane tiringi.

Kano wali Gote popo tondoli iyemanga iye nomimu kinye yu kinye peya tapu toko moloringi iyema ongo kaunsil kinye Israel imbomanga tapu iyema kinye maku tamili waio ningi. Ongo maku tokolio ungu te ningi mundukolio ka ulke peremelema meko waio ningi.

<sup>22</sup> Nalo enonga ele iyemani aposlema lingeindo ka ulkena puringi wali aposlema naa moloringina kanokolio eno kelko yango ongolio ningei,

<sup>23</sup> "Ka ulke nambuma pali nambu tili pemo nokoromele iyema kerepuluna nokoko angilengei kanomolo nalo lino aposlemanga peringi ka ulke kiripina nambu topo tuku pumbo kanomolo kinye iye tendekure kape paa naa molomo," ningi.

<sup>24</sup> Kano kinye Gotenga ulke tempelena nokoringi ele iyemanga iye awilimu kinye Gote popo tondoli iyemanga iye awilima kinye enoni ongo ningi mele pilkolio ningei, "I ulu wendo omomu ambele ulure wendo ombaindo teremonje," ningi eno pilko tunduringi.

<sup>25</sup> Kano wali iye te ombalie enondo nimbei, "Pileio, enoni ka tinge imbo kanoma Gotenga ulke tempelena imboma ungu mane tiko angimeli," nimu.

<sup>26</sup> Aku nimu ungu pilkolio Gotenga ulke tempel awili nokoringi ele iyema kinye akyema enonga iye awilimu kinye aposlema lingei puringi. Nalo imbomani eno kouni toko kondonge ningolio koipeni naa toko taka ningi liko meko oringi.

*Aposel iyemani Juda imbomanga iye awilimu pipili naa kolko ungu tukumemu tumbi tiko ningi*

<sup>27</sup> Kano kinye iye kaunsilima moloringina ele iyemani aposlema liko meko oringi kinye Gote popo tondoli iyemanga iye nomi awilimuni kano iyemando mumindili kolopa nimbei,

<sup>28</sup> "Enondo oi nimulu mele i tepa. Paa ungu kelo kolte kape naa ningi Jisasinga imbi leko imboma ungu temane toko naa neio nimulu kanomu. Nalo kinye enoni Jerusalem kombumanga pali ungu kanomu ningi andoko tiko naa kelenge. Imbomani lino Israel imbomanga tapu iyemani iye kanomu we pelkai liko toko kondoringi ningi pilengen ningi enoni i unguma mane tirimele kala," nimu.

<sup>29</sup> Pita kinye we aposel kanomani ungu pundu toko ningei, "Goteni teaio nimo mele kau pilipo lipo tengi tipo teamili. Enoni akyemo mele naa teaio nimele ungumu naa pimolo.

<sup>30</sup> Aku ambe temona, enoni unjo polopeyana toko kondoringi Iye Jisas yu kelepa linonga ara kae kamenga Goteni ono kombuna topa makinjirimu.

<sup>31</sup> Yuni lino Israel imboma konopu topele tondopa ulu kerima mundupe tiye kondondopili nimbe Goteni Jisas yu imboma lipe tapondopa yu iye nomi awili molopili nimbe yunge imbo kindo lipe mondurumu moromo.

<sup>32</sup> Mini Kake Telimu kinye linoni Jisas yu aku tepa terimu mele kanopo pilipolio nimbo andopo tirimolo. Mini Kake Teli nimolomu Gote yunge unguma pilko liko teremele imboma Mini Kake Telimu tirimo kanomundo nimolo,” ningi.

*Gamalieleni Jisasinga iyema kinye ulu te naa teao nimu*

<sup>33</sup> Ningi mele pilkolio mumindili paa awili kolko eno topo kondamili ningi.

<sup>34</sup> Nalo Farisi iye kaunsil te, yunge imbi Kameliele, imboma Mosesinga mane ungu nimbe tirimu. Imbomanu yu kapi ningi iye te. Yu kano kaunsilima maku toringga ola angilipelie ele iyemando iyema alaye kolte pena meko paio nimu.

<sup>35</sup> Kano wali meko pena puringi kinye yuni kaunsilimando nimbei, “Eno Israel iyema, kinye enoni iye ima tenge mele ulumu oi pilko kondaio.

<sup>36</sup> Oi walat iye Teudas yuni ombo, iye awili none terimu. Kano tepa nimu kinye iye 400 yu lombili puringi. Nalo gavmanenga kongono iyemani yu toko kondoko yu lombili puringi iyema toko bili bala tiringi. Teamili ningi kano ulumu mainye purumu.

<sup>37</sup> Aku tepa gavman kongono iyemani imbo kambu torangi walimanga kinye Galili kombu iye Judas kape linongan gavman molamili nimu kinye iye mare yu lombili puringi kinye gavmanemu kinye opa terengi nalo yu toko kondoko yu lombili puringi iyema toko bili bala tiringila.

<sup>38</sup> Oi aku terengi kani kinye iye ima kinye enoni tenge mele nemboi, iye ima kinye enoni ulte naa teko we pangei keleai. Kinye iye ima enono konopuni pilkollo teamolo ningi tenge lemo aku ulure naa tepa we pora nimbelo.

<sup>39</sup> Molo, teremele mele Goteni teao nimona tenge lemo aku eno kaunsilimanu akumu manda naa ningi kendenge. Molo paa molo ninge lemo aku eno Gote kinye opa mele tenge wali manda naa tembalu,” nimu.

*Mapu torangi wali, aposelemani pipili naa kolko tono kolko ungu tukumemu ningi tilko andoringi*

<sup>40</sup> Aku tepa nimu kinye eno pilkolio aku teamoli ningolio ele iyemando aposolema ulke tukundo meko ongolio mapuni

taio ningolio ningei, “Jisasinga temanemu altoko imboma ningi tilko naa andaio,” ningolio eno paio ningi.

<sup>41</sup> Kano wali aposolema kaunsilima munduko tiye kolko eno puringi. Goteni enondo eno Jisasinga iyema moromelemunga imbomanu eno teko pipili kondonge lemo, aku konopure naa leao, nimu pilkolio eno paa konopu tiringi.

<sup>42</sup> Walimanga pali ulke tempelena kape imbomanga ulkemanga pali pipili naa kolko andoko temane pengamu kinye koro oi Gote eno lipe tapondombalo iye te lipe mundumbo nimbe kanopa lipe imbi torumu iye Kraist Israel imbomanu opili ningi nokoko moloringi kano iye Kraist, Jisas yu kano iyemu ombo molopa eno lipe tapondorumu, kelepa lipe tapondombalo mele temane toko tiringi.

## 6

*Aposelemani tapu iye kite yupoko pakera kanoko ltingi*

<sup>1</sup> Aku walimanga Jisasinga ungumu pilko lombileli imbo paa pulumu tukundo oringi. Aku wali Grik ungu ningi Juda imboma ulu te kanoko keri pilkolio iri toko ningi, “Ambo waima waliwali kere langi moke teko tinggi wali Hibrus ungu nimele Israel imbomanga ambo waima kau tiko linonga ambo waima naa tirimele,” ningi.

<sup>2</sup> Imunga aposel iye 12 lombili andolima liko maku tokolio ningi, “Lino Gotenga ungu nimbo tirimolo kongonomu mundupu tiye kolopo langi kongono temolo kinye aku manda naa tembalu

<sup>3</sup> kani ango kame enonga iye kite yupoko pakera Mini Kake Telimu kinye lipe manjilim kinye pepa imbomanu kanoko penga pimele iyema kanoko imbi tangei. Langi kongono linoni teremolomu aku enoni tendangei nimbo tiye kolopo,

<sup>4</sup> lino waliwali Gote konge tepo imboma Gotenga ungumu pilengeti nimbo, nimbo timolo,” ningi.

<sup>5</sup> Aku ningi ungumu imboma palini pilko penga konopu lekolio Stiven imbi torangi. Yu Gote paimbo nimbe paa enge nimbe ipuki tirimu iyemu. Yunge konopundo Mini Kake Telimu ombo molopa manda terimu iyemu. Iye pokore imbi toringimanga imbi i tepa Filip, Prokorus, Nikanor, Timon, Parmenas kinye Nikolas poko. Nikolas yu Antioik kombu iyemu, yu Israel iyere molo. Yu iye lupemu molopalie oi Israel imbomanga ulu pulu terengi mele topele topa terimu iyemu.

<sup>6</sup> Aku iyema aposel iyemanga kumbekerenia liko ola anjiringi. Aku terengi kinye aposolemani Gotenga kongono tendangi ningi konge tekolio ki pala noiringi.

<sup>7</sup> Aku teringi kinye imbo moloringi kombumanga pali Gotenga unggum pumbemanda terimu. Aku wali Jerusalem imbo awi telini Jisas yu paimbo iye Kraist ningyu lombili pungo, Gote popo tondoli iye awini peya aposelemani ungu ningi mele paimbo ninge enge ningi pilko ltingi.

*Juda imbomani Stiven kot tenderingi*

<sup>8</sup> Stiven yu Goteni imboma we kondokololi ulu pulumu kinye Gotenga engemu kinye perimu kolo imbo moloringimanga andopa ulu enge nili awini terimu.

<sup>9</sup> Nalo iye mareni teko kenjirino ningokani aku teko naa tewi ningi Stiven kinye ungu awini ningi. Kano Juda iyema eno oi kongono kendemande imboma moloringinalo kelko kongono nokoli iyemani enowemolaio ningo wendo munduringi. Enoi kombu Sairini kinye Aleksandria Silisia kinye Esia kinye molkolio Jerusalem yandoongo linongan molamili ningi enonga nombeya ulke takoringi. Aku ulkemundo Israel imbomani Wendo Munduringi Imbomanga Nombea ulke ningi. Aku Juda iyemani Stiven kinye karaye nale teringi.

<sup>10</sup> Nalo Mini Kake Telimu Stiven lipe manjili tirimuna yuni nimu mele pilkolio imbteni panga naa akuko ungu te manda naanungi.

<sup>11</sup> Unga te ningeindo koroko kelkolienoni iye marendo kiyengo ningolo tokolio ningei, "Enoni Moses kinye Gotenga talongunguma Stivenenil ungu takatondomona pilimolo neio," ningi.

<sup>12</sup> Kano iyemaniaku teko ungu konditoringimunga imboma kinye Israel imbomanga tapu iyema kinye Gotenga ungu manema pilko imbo mane tiringiimboma kinye enoni mumindili kolko Stiven ambolko liko kaunsil iyema makutokomoloringina meko purungi.

<sup>13</sup> Aku iyemani iye mare ungu imbotondokolio ketona pungo Stiven terimu mele kolo toko i tepa i tepa temo neio ningi. Aku wali iye kanoma ketona pungolio ningei, "Iye imuni Gote popo topo melema kaloli Gotenga ulke tempelemu kinye Mosesinga ungu manema kinye waliwali ungu takatondoromo.

<sup>14</sup> Yuni nimona pilimolo mele i tepa, ikombu Nasaret iye Jisasini ulke tempelemu tekirimbelo nimbe oi Mosesini nimbe panjirimuna yandoko yandoko ningotiringinateremolo ulumape altoko naa teko akuma tiye kolko Jisasini teao nimo uluma teao nimo kala," ningi.

<sup>15</sup> Kaunsil makutokomoloringimanipali Stiven taki leko kanoringi kinyeyunge kumbekeremu mulu kombuna iyeensel tengakumbekere none terimuna kanoringi.

## 7

*StivenenikotenaJudaimbomangakaunsilyemangaungunimbeitirimu*

<sup>1</sup> Kano wali Gote popo toringi iyemangaiye nomi awilimuni kot tendepalies Stiven ungu waltindipe i tepa nimu, "Nundo i nimele unggumapaimboya?" nimu.

<sup>2</sup> Kano tepa nimu wali Stiven ungu pundutopati tepa nimu, "Ango ara kame nanga unggumpileio. Linonga oikalopa ltimuara kae Abraham i kombu oina ombarombu Haran oina pumbe yunge kombu Mesopotemia kombu oiwemolopili imbiolandopamoromo Gote yu molorumunaombalienimbei,

<sup>3</sup> Nunge mai kombumu kinyenunge pululitemo imboma kinyetiye kolko nani nu puwi nimbo lipo ondombokombuna puwi, (Stt 12:1)

nimu.

<sup>4</sup> Aku unggumupilipelie Abraham yunge Mesopotemia kombu imbiite Kaldia tiyekolopa Haran kombu pumbelie molorumu. Aku wali yunge lapa kolorumu kinye Goteni lino i moromolokombuna yando lipe mundurumu.

<sup>5</sup> I kombuna mai owe kolte kape Abraham yu kamukumu ambolopili nimbe naatirimu. Nalo Goteni yu kinyeyunge kalopa limbelo imboma kinye i kombumu lingenimu. Abraham yu bakulu te kape oinaa meli wali akutepa nimu.

<sup>6</sup> Goteni yundo nimumele i tepa,Nunge kalkolino imboma kombu tengalupe imbo ombarangili mele molonge. Akuna molonge imbomani enondo linonga kongono kendemande imboma ningolio teko bembotikoka kongonointe. Mindili nongoteko molonge poiney 400 ombarumbel.

<sup>7</sup> Aku kinye eno ka kongonointe imboma umbuni timbo kelko eno kano kombumu tiye kolko, yando ongo i kombuna na ongopo tinge. (Stt 15:13-14)

<sup>8</sup> Aku nimbelie Goteni tembo nimu unggumAbrahamenina kinyekamukumu pepilinipili nimbe yu kinyeyunge kalopa limbelounguluma kinyekangi te kopiko wendo liko lteangei nimu. Goteni akuteko teao nimumunga Abrahameniuungulu Aisak mepaliewali kelepa wali kitalo ombarupuru kinyeyunge kangi pundotekopipe wendo ltimu. Kano kinye Aisakeni Jekop mepaliekutoku terimu. Kelepa Jekoponi lino Israel imboromolomangakalkolito arakae iye 12 mepaliekutoku ulu kala terimu. Kinye akutolu yando yandoteremolo.

<sup>9</sup> Kano kinyelinonga arakae Jekoponimerimu iyemani enonga angenu Josep

kinye konopu keri panjikolio kombu Isip pungei puringi iye mare kinye yu kou mone ltingi. Jekop kolo toko kou mone likolio yu imbo tengah kongono kendemande iyemu molopili meko paio ningi. Nalo Goteni yu kinye molopalie,

<sup>10</sup> Yu lipe tapondopa umbuni wendo orumanga pali wendo ltimu. Yuni yunge lipe manjilimu tipe, Isip kombu iye kamako king awilimuni yu kanopa penga pilipili nimu wali Josep yu Isip kombu gavman iye nomi molopa yunge ulkemu kinye Isip kombumanga mele itemoma pali nokopili nimu.

<sup>11</sup> Aku wali kelepa Isip kombu kinye i momololo kombu Kenan kinye engele awili te orumu. Aku wali imboma umbuni perimu. Aku wali linonga ara kaue kame kere langi lingei aulke te naa lerimu.

<sup>12</sup> Kano wali Jekoponi Isip kombu kere langi nombeya teko noirimelé ningi ungu pilipelite yunge malopili linonga ara kaue kame pulu polko Isip kombu langi lipeio nimbe lipe mundurumu.

<sup>13</sup> Wali talo tiko Isip kombu puringi kinye Joseponi angenupilindo na Josep nimbe yunge imbi lepa tirimu, aku kinye kelepa kingimuni Josepongona imboma kanopa imbi tirimu.

<sup>14</sup> Aku wali Joseponi yunge lapa Jekop yunge imboma kinye yando wangei neio nimbe ne kano angenupilindo nimbe mundurumu. Jekop yunge imboma lipe popo tipe imbo 75 waye moloringi.

<sup>15</sup> Yando waio nimu kinye Jekop Isip kombu purumu. Aku kombuna yu kinye yunge malopili kinye peya anda leko koloringi.

<sup>16</sup> Enonga onoma kelko Kenan kombu meko yando ongo Sekem kombu meko ongo oi Abrahameni Sekem iye Hamoronga malopilinga mai te pame tepa lipe oi yunge ambomu ono terimu kanona meli pungo eno ono teringi.

<sup>17</sup> Goteni oi Abrahamendo nunge imboma kombu ponengena wendo limbo nimu kano walimu nondopa wendo ombai terimu kinye linonga imbo Isip kombu moloringi mele anjiko anjiko awi teli kalko liko moloringi.

<sup>18</sup> Aku wali Isip iye nomi king te kolo wanggopa molorumu kanomuni oi Josepongona temanemu wamba naa pilerimu.

<sup>19</sup> Aku iyemu yuni linonga oi ara kaue kamendo kolo topa tipe tepa kenjipe, ara kaue kame mindili lipe tipe enonga bakuluma peya naa molko ulke tawendo malio kolangeloi noiengei nimu.

<sup>20</sup> Aku ulu teko molangei Moses merimu. Yu kau we ungulu te naa merimu. Ungulu akumu Goteni kanopa penga pilerimu ungulumu merimu. Oli yupokonga tukundo

yunge lapanga ulkena tukundo lopeke teko noiko moloringi.

<sup>21</sup> Aku wali kelko penana noiringi kinye iye nomi kingimunga lemenuni kanopa lipelite nanga ungulumu nimbe yunge ulkena mepa pumbe nokorumu.

<sup>22</sup> Kano kinye Isip imbonanga lipe manjili perimu mele pali Moses mane tiringi. Kano kinye yu lipe manjili pepa unguma tumbi tipe nimbe uluma enge nimbe tepa molorumu.

<sup>23</sup> Mosesinga poinye 40 perimu kinye yunge Israel manga pupumu kano pambo konopu lerimu.

<sup>24</sup> Kano pumbe kanorumu kinye Isip iye teni Israel iye te tepa torumu. Kano ulu kanopalie yuni Israel iyemu tapondopa Isip iyemu topa kondorumu.

<sup>25</sup> Mosesini ya Goteni yunge imboma liko tapondani puwi nimo ningi liko manjengei kondopu lerimu nalo Israel imbomanli aku teko naa liko manjiringi.

<sup>26</sup> Otilikondo Israel iye talo opa teringili kinye Moses pumbe kanopalie yuni opa teringili iye talo ambolopa lipelite nimbei, 'Elo angenangolo talo ambe telka opa terembele ya? Angenangolo talo opa tengele manda naa tembaloo,' nimu.

<sup>27</sup> Kano kinye tepe kenjirimu kano iyemuni Moses pera tipe anjo mundupelie nimbei, 'Narinii lino nokani nimbe nu mako tomoya?

<sup>28</sup> Olianga nuni Isip iyemu toko kondonio mele kinye na topo kondambo ningoninoya?' nimu.

<sup>29</sup> Aku tepe nimu kinye Mosesini pilipelite Kingimuni yu tombalo nimbe kowa pumbelie Mitiene imbonanga kombuna pumbe ombo angili iyemu molorumu. Yu akuna molopalie ungulu talo merimu.

<sup>30</sup> Moses kano Mitiene imbonanga kombuna molopili poinye 40 ombo purumu. Kano kinye walite yu kombu ku lelina andopa Mulu Sainai polarumuna nondopa molorumu kinye mulu kombuna enselte ye molorumuna ombo unjo tengah tipe nomba perimuna ombo molorumu.

<sup>31</sup> Mosesini aku ulumu kanopalie konopu awini lipe mundurumu. Aku tepalies terimu ulumu kanombaindo nondopa purumu. Kano kinye Awilimunga ungu te unjona wendo orumu. Aku ungumu pilerimu mele i tepe,

<sup>32</sup> Na lemo nunge kolenaleni popo toringi Gote moro. Abraham kame Aisak kame Jekop kameni popo toringi Gote i moro, (Kis 3:6)

nimu. Kano tepe nimu kinye Moses kano pilipi kolopa pungu pungu nimbeline lipe wendo kanopa tipemu naa kanorumu.

<sup>33</sup> Kano wali Awilimuni nimbei,

Nu i mai anginomunga na ombo moro kani  
nunge kimbo sumu kulko wendo  
liwi.

<sup>34</sup> Nanga Isip moromele imboma mindili  
noromele mele kanopo pora tipo moro. Eno  
umbuni meko kola teremele mele pilipolio  
eno kinye lipo tapondombo nimbo mainye  
ondu kani nu Isip kombu kelko pani nimbo  
mundumboi tero, *(Kis 3:5,7-8,10)*  
nimu.

<sup>35</sup> Iye Moses yu oi Isip kombu moloru  
rumu kinye Israel imbomani i teko ningi  
kano, 'Narini lino nokani nimbe mako to  
moya?' ningi yunge ungu liko tu tiringi  
kano iye Moses Goteni yu yunu kanopa  
lipe nanga imboma nokoko, eno tapondoko  
mindili noromelema wendo lieni nimbe  
unjona tipe nomba perimumunga ensel  
tendo nunge kimuni Moses tapoko tipuwi  
nimu.

<sup>36</sup> Kano iye Mosesini imboma Isip kombu  
mepta wendo orumu. Eno Isip tukundo  
moloringi kinye kape nomu kondolina  
oringi kinye kape kombu ku lelina poiney  
40 andoko moloringi kinye kape yuni ulu  
enge nili awini mare terimu.

<sup>37</sup> I Mosesini kau Israel imbomando nim  
bei,  
Nani Goteni mane tipe nimbe munduli  
unguma pilipo enondo nimbo tiro iye  
profet moro mele  
aku tepa enonga iye te na mele iye  
profet molopili nimbe Goteni lipe  
mundumbelo, *(Lo 18:15)*  
nimu.

<sup>38</sup> Israel imboma kombu kuna moloringi  
kinye aku iye Moses peya moloringi. Yu  
linonga kolepalema kinye Mulu Sainai  
molopa ungu nimbe tirimu enselemu  
kinye peya moloringi. Goteni we pepa  
kau pumbelo naa pora nimbelo unguma  
lino nimbe timbeindo Moses ungu imbo  
tondorumu. Moses yuni aku kano unguma  
pilipelie lino yando nimbe tirimu.

<sup>39</sup> Aku tepa terimu nalo linonga ara  
kaue kameni Goteni yundo nokowi nimbe  
kanopa ltimu iye Mosesinga ungumu tengen  
tipo naa pilimolo ningi yu umbulu tiko eno  
Isip kombundo altopo pamolo ningi waka  
koloringi.

<sup>40</sup> Moses mulu Sainaina ola pumbe welea  
maindo naa orumu kinye Israel imbomani  
Aronondo ningei  
Lino meko pungo nokonge Gote popo to  
molo pokore nuni unjoni molo kouni  
teko wamondowi.

Lino Isip kombu yando lipe mepta orumu  
iye Moses welea naa oromo kani  
ambe temonje, *(Kis 32:1)*

nungi.

<sup>41</sup> Kano walimunga kao kailepo walo none  
tel i teko wamokolio ningei, Imu linonga

Gote ningi popo toko melema kalko, eno  
enonganeko wamoringi mele pilkolio  
konopu tiko kongi kaloringima kinye langi  
nongo tono kolko moloringi.

<sup>42</sup> Aku terimumunga Goteni eno umbulu  
tipe oli kinye ena kinye kombu kandiye  
kinye muluna angimoma enoni linonga  
pulu imboma ningi popo toko melema  
kalko teringi kinye kanopalie manda,  
enonga aku teko teangei nimbe tiye  
kolorumu. Aku teringi mele iye profet teni  
ungumu bukuna torumu mele paa teremo.  
Aku ungumu topa panjirimu mele i tepe,  
Goteni nimbeindo, 'Ya Israel imboma, oi  
poiney 40 imboma naa peli kombu  
ku lelina eno kongi pirimu kao kinye  
sipsip kinye meme kinye popo toko  
kaloringima aku popo toko kalko na  
tiringiya?

<sup>43</sup> Aku molo. Eno sel kunu ulke meko  
puringimu kolo gote Molekenga kuro  
ulkemu ningi meko pungo,  
Refan linonga gote te ningi yunge kombu  
kandiye none tel i teko anjiko, kano  
aku melema linonga pulu imboma  
ningi kapi ningi popo toringi.  
Aku teringimunga nani eno mindili lipe  
timboindo eno kombu tiruna naa  
molangei nimbo makoropo eno Bab  
ilon kombu nekondo kombu anjipe  
tenga lipe mundumbo,' nimu, *(Amo  
5:25-27)*

nimbe aku tepa kano profetemuni bukuna  
torumu. Aku tepa nimbe bukuna torumu  
mele eno paimbo aku teko tiringi.

<sup>44</sup> Kombu ku lelina linonga ara kaue  
kameni Gote eno kinye molorumu sel ulke  
kanomu kanoko Gote lino kinye moromo  
ningi enoni yu popo toko melema kaloringi  
sel ulkemu takoko anjiringi. Goteni  
Mosesindo i teko i teko takangei nimbe  
ulkemu angilimbelo mele lipe ondopa aku  
teko enoni takoko anjiringi.

<sup>45</sup> Kelepa yandopa Josuani linonga ara  
kaue kame nokorumu kinye eno kano sel  
ulkemu tekiriko, Goteni tirimu kombuna  
meko ongo anjiringi. Goteni kano kom  
buna imbo talape lupe peringima linonga  
ara kaue kame kolo wangoko molangei, aku  
maimau lengi kanona peremele imboma  
camukumu pangei nimu kinye kano kom  
buna oi peringi imbo talapema enoni toko  
munduko, sel ulkemu meko ongo kanona  
takoringi, yandopa iye nomi king Devit  
molorumu wali we angilerimu.

<sup>46</sup> Goteni konopu noirimu iye Devit yuni  
Gotendo waltindipelie nimbei, 'Na kalopa  
ltimu iye Jekop popo torumu Gote molom  
balo ulke te oi sel ulkemu angilerimu mele,  
manda manjipo takondamboiya?' nimu.

<sup>47</sup> Nalo Goteni molo nimu kinye Devitinga  
malo Solomon yu Devit kolo wangopa iye

nomi kingimu molopalie Gotenga ulke tempelemu takondorumu.

<sup>48</sup> Nalo imbi paa olandopa mololi Gote imbomani takoromele ulkemunga naa moromo. Aku mele, Gotenga profet iye teni i tepa nimu:

<sup>49-50</sup> Gote awilimuni nimbeindo, ‘Mulu kombumu nanga mainye molopo kombu nokoro polomu, mai kombumu nanga kimbo munduro kombomu.

Nanga kimuni melema pali tepo wamoru. Akumunga enoni nanga ulke ambe telimu takondongeiya?

Molo, na tena manda mulu lipo molombaya?’ nimu. *(Ais 66:1-2)*

<sup>51</sup> I teringimunga kinye nani enondo i tepo nio. Eno karaye teli imboma, enoni nando Gote teko kenjiko yu ungu taka tondokono, nimele nalo akumu molo. Eno imbo Gotenga ungu naa pileli imboma mele molko enonga komuma pipi tiko konopuma pipi tiko moromele. Eno enonga kolepaleni teringi mele teko, enoni Mini Kake Telimunga ungumu liko umbulu tiko naa pilimolo ningi mele eno aku teko mele nimele.

<sup>52</sup> Enonga lanieri kolenaleni mindili liko naa tili iye profet te naa molorumu kanomu. Iye profetemani Gotenga Iye Tumbi Nilimu ombalo mele ningo tiringima kape enonga lapali kolepalenani toko kondoringila. Kano kinye profetemani ombalo ningi iye kanomu kamukumu orumu kinye eno nanga ungumu pilko moromele imbomani yu toko kondoringi.

<sup>53</sup> Eno Israel imboma, eno mulu enselemani Gotenga ungu manema tiringi imboma, enoni Gotenga iye kake teli Jisas aku teko toko kondoringi,” nimbe Stiveneni aku tepa nimu.

#### *Stiven toko kondoringi*

<sup>54</sup> Yuni enondo aku tepa nimu ungu eno pilkolio yu kinye paa mumindili kolko enonga kerema kongilerengi.

<sup>55</sup> Nalo Mini Kake Telimu Stiven yunge konopuna ombo molopa manda tenderimu kinye yuni olando tipe kanopa mulu kombuna tukundo kanorumu kinye Gotenga pa enge nimbe telimu kinye yunge engemu kinye akuma kanopa, Jisas Gotenga imbo kindo ola angilerimu ulu kanorumu.

<sup>56</sup> Aku ulu kanopalie nimbei, “Araya, mulu kombumu nambu topa anjo yando purumona kanopolio mainye ombo maina iye apuwe lerimu iyemu Gotenga imbo kindo ola angiltimona kando,” nimu.

<sup>57</sup> Yuni aku tepa Gote kinye Jisas kinye moloringili mele nimu ungu pilkolio, Gote kinye ungu taka tondoromo lepamo ningyo yunge ungu nimumu naa pilemili ningyo

komu pipi tiko eno ungu lupe mare toko tondolo munduko niliko yu molorumuna liko ongo

<sup>58</sup> yu ambolko kunduko ulke kombu awilimunga wendo liko munduko yu kouni tonguei toringi. Oi kotena i tepa i tepa temo kanomolo ningi kondi toringi iyemani yu kouni tongueindo enonga ola pakoringi wale pakolina kulkolio iye wenepo te kanopa angilerimundo nokopili ningo noiringi. Aku iyemunga imbi Sol.

<sup>59</sup> Kano iyemani yu kouni toko kondongei toringi kinye Stiveneni konge tepalie nimbei, “Awili Jisas, nu moronona wamboi nanga minimu liwi,” nimu.

<sup>60</sup> Kano kinye yu kouni toko mainye munduringi kinye komongo topa pondopa ru nimbelie nimbei, “Awilimu i teko kenjirimele ulumu pundu naa toko tiye kolowi,” nimbelie yu kolorumu.

## 8

#### *Ipuki tiringi imbomanga umbuni meringi*

<sup>1</sup> Kano kinye Soloni Stiven toko kondoringi ulu kanopalie paa toko kondoromele nimbe yu konopu penga pileringi.

Stiven kouni toko kondoringi kano walimunga Kraistainga imbo Jerusalem moloringima mindili pulumu tiringi kinye eno pali bulu balu ningo pungo, mare Judia pungo, mare Samaria puringi. Jisasini nimbe imbi topa mundurumu iye aposelema kau Jerusalem we moloringi.

<sup>2</sup> Gotenga ungumu pilko moloringi iye marenri Stiven liko ono teko kola awili teringi,

<sup>3</sup> nalo Soloni Kraistainga ungu pileringima kamukumu mainye pangai nimbe pulu polopa imbomanga ulkemanga pumbe, imbo moloringima ki kundupe lipe meli pumbe ka tirimu.

#### *Filip Samaria kombu imboma ungu nimbe tirimu*

<sup>4</sup> Kraistainga imbo bulu balu ningo puringimani Jissasinga temanemu kombu lupe lupemanga pali toko tilko puringi.

<sup>5</sup> Kraistainga imboma lipe tapondopili iye Filip kanomu yu Samaria provins ulke kombu tengah maindo pumbelie nimumuni Goteni eno nokopa kondombalo iye te lipo mundumbo nimbe oi nimu maina mainye orumu iye Kraistainga temanemu topa tirimu.

<sup>6</sup> Filip yuni ungu nimu mele pilko ulu enge nilima terimuna kanokolio, imboma pali komu tendeko pilko moloringi.

<sup>7</sup> Imbo awini kuro kerimu konopuna molorumuma Filiponi ongo wendo paio nimu wali ru ningyo wendo ongo puringi.

Imbo kimbo keri lelima kinye imbo kimbo ki kolopa ltimuna aiyembo leringima kinye tepa koinjo ltimu.

<sup>8</sup> Filiponi aku tepa ulu enge nilima terimu koloaku kombu taunona moloringi imboma konopu pulumu tiringi.

<sup>9</sup> Samaria kombu taun kanona iye te molorumu. Iyemunga imbi Saimon. Keri kuromaniyu liko tapondoringimunga yuni na iye awilimi, na imbi moromo nimbe alatorumu. Samaria imbomanipali ulu terimumakanokolio konopu awini liko munduringi.

<sup>10</sup> Imbo Kamakoma kinye koropama kinyeyungeungumukomutendeko pilkollo ningeindo, "Iye imu gote enge peremo meleyuaku tepa enge peremo iyemu. Yu enge peremo gote moromo," ngingi.

<sup>11</sup> Saimononi waliwali alatorumukanokokonopuawinilekoloyungeungupilkylolumbili puringi.

<sup>12</sup> Nalo Filiponi Gote iye nomikingimu molopamelema nokoromo nokombalo mele temane pengamu topa tipe, Jisas yu imboma lipe tapondoromo iyemu molopayu Goteni lipomundumbo nimbe kanopu ltimu iye Kraist molorumu mele nimbeitrimukinye imbo awini Saimon tiye kolko Jisas ipuki tiko no ltingi.

<sup>13</sup> Kano kinye Saimon kape Jisas ipuki tipe no ltimu. Lipelie Filip molorumula lumbili pumbe Filiponi ulu enge nili awini terimu mele kanopaliekonopuawinilepemundurumu.

<sup>14</sup> Kano kinye Samaria imbomanigotenga unggumukonoputikopilkololtingimele Jisasini nangakongonotendepao nimble lipe mundurumu iye aposel Jerusalemmoloringiyemani pilkolio ningimuni, enonga iye Pita kinye Jon talondo Samaria imboma liko tapondangilipalio ningo elo liko munduringi.

<sup>15-16</sup> Akuna pungolio ningilimuni oi awili Jisasinaimbileko no kau ltingi. Samaria imboma moloringina Mini Kake Telimu oinna orumuna kano aposeliye taloni eno Mini Kake Telimu lengenigoliononga ningo Gote kongeteringili.

<sup>17</sup> Kano kinye kelepa Pita kinye Jon talonipungolioenongaki pala noiringili wali eno Mini Kake Telimu ltingi.

<sup>18</sup> Kano kinye eloni imbomanga kipalanoiringili kinye eno Mini Kake Telimu ltingimele Saimononikanopaliekulomepoombalieelondonimbei,

<sup>19</sup> "Nani imbo tengaki pala noimbo kinye Mini Kake Telimu lipili ningoliononi i terembeleengemu na tiengili nimbekoumone meporo," nimu.

<sup>20</sup> Nalo Pitani ungu topondopanimbei, "Nuni Goteni we tirimo meltekou monenimanda pame tekoltimelekonopulekomongunungekoumonemamelikombukerina pani.

<sup>21</sup> Goteni kanopapenga pimo mele nuaku tepa molo, akumungia kongonoterembolomungunungeki tetukunaaitemo.

<sup>22-23</sup> Nuni ilto tembolo melekanokokomutendemomunganumolko kenjikolu pulukerimaninukatirimokaniikonopu ltenomele Awilimunimundupe tiyekondomalalonjeningo, kinyekutekokenjirinolu pulumangakonopukeripilkonokonoputopelekotonokote Gote yu konge teani," nimu.

<sup>24</sup> Aku nimu ungu pilipelie Saimononingu pundi topa i tepanimu, "Na kinyewendoombalonimbeleulumu wendo naa opili kani eloni na likotapondoko Awilimukongetendalio," nimu.

<sup>25</sup> Pita kinye Jon taloni Jisas kinyemolokokanoringili mele ningo tikolo Awilimunga unggumuningo tilko, elo kelko Jerusalem puringili. Pungili pungolio Samaria kombu awilinalukundulerimukombumangangu tukumemutokotokotilko puringili.

*Filiponi Itiopia iyemu ungu nimbe tirimu*

<sup>26</sup> Gote Awilimungamulunensieleneti Filipondo nimbei, "Jerusalem mundukotiye kolkokombu Gasa pungeipurumeleaulkeakunamereyando kombu welelina pani puwi," nimu.

<sup>27</sup> Aku wali Filip kanoakuna purumu. Pumbe kanorumukinye Itiopia iye te aulkenaomba purumuna kanorumu. Aku iyemu yu Itiopia imbomangambonomikwin Kandasinkoumone nokondoromu iye awilimi. Filiponi yuaulkenaoi naakanopapilili yu Gote popotombaindo ojerusalem purumu.

<sup>28</sup> Kelepa ulkendopumbeindokongiosenikundurumelekaronola molopagotenga unggumupilipeyandonimbeitrimiye profet Aisaianitorumu bukumukanolipoleulkendopumbeipurumu.

<sup>29</sup> Kano wali Mini Kake Telimuni Filipondo nimbei, "Nu pungokongiosenikarokundupe meli ombaburumumulombili puwi," nimu.

<sup>30</sup> Kano kinye Filip kano kareomba purumunkipumbe pilerimukinyeiye karenamolorumukanomoyu profetiye Aisaianitorumbukumukanopanilipepurumungungupulumopiltintonjemoloya?" nimu.

<sup>31</sup> Iye kanomunutopondopanimbei, "Imbotenina nimbenaa timbelokinyenananu ambetepopilimboya?" nimu. Aku ungnimbeliefilipondo nimbei, "Nu

karona kopu tepo molambili owi," nimu. Aku tepa nimu wali, Filip pumbe kopu tepa molorumu.

<sup>32</sup> Gotenga ungumu iyemuni kanorumu mele i tepa,

Kongi sipsip waloma meko pungo toko kondoromele mele Yu aku teko meli pungo toringi. Aku kinye kongi sipsip indi porongeindo amboromele kinye ungu naa nimbe we tendepa ltemo mele Yu tongei teringi kinye aku tepa ungu naa nimbe molorumu.

<sup>33</sup> Yu ulu te tepa naa kenjirimu nalo imbonani Yu ningi mandoko kot we tendeko ka tikolio toko kondoringi. Yu bakulu te naa mepili Yu toringimunga yunge kalopa ltimu imbo te naa moromo, (Ais 53:7-8) nimbe bukuna aku tepa peremo ungu kanorumu.

<sup>34</sup> Itiopia iyemuni Filipondo waltindipelie nimbei, "Iye profetemuni narindo i ungumu nimuya? Yu yunundo nimu molo imbo tendo lupe nimuya?" nimbe waltindirimu.

<sup>35</sup> Kano kinye Filiponi kano iyemundo unguma nimbe iyemuni kanorumu ungmanga pulumu pulu polopa nimbe tipe Jisasinga temane pengamu topa tirimu.

<sup>36</sup> Aulkena pungili pungolio no kelo tengu puringili kinye Itiopia iyemuni Filipondo nimbei, "No i ombo purumomu kanowi. Melteni na pipi timbelo mele molo no manda limboya?" nimu.

<sup>37</sup> Kano tepa nimu kinye Filiponi ungu pundu topa nimbei, "Jisasinga ungu nimbo tiromu aku paimbo ltemo ningi enge ningi ipuki tawil lemo nu no manda linio," nimu. Kano wali Itiopia iyemuni ungu pundu topa nimbei, "Jisas Kraist yu paimbo Gotenga malo nimbo ipuki tiro," nimu.

<sup>38</sup> Kano kinye karo kanomu lepili nimbe Filip kinye elo nona mainye pungolio Filiponi tapu iye kanomu no ltindirimu.

<sup>39</sup> No kanomu tiye kolko wendo oringili kinye Awilimunga Mini Kake Telimumi Filip walitikale meli purumu kinye tepa nema ltimu kani tapu iyemuni yu altopa naa kanopalie na Jisasinga iye moro nimbe tono kololipe yunge ulkendo purumu.

<sup>40</sup> Minimuni Filip meli pumbe kombu Asdot mondonoru kinye yu akuna wendo pumbe kombumanga pali temane pengamu topa tilipe andopa Sisaria kombu taun wendo purumu.

## 9

*Jisasini Sol Yunge iyemu nimbe kanopa ltimu*

<sup>1</sup> Filiponi neya aku tepa terimu wali Sol oi pulu polopa Awilimunga imboma

mindili lipe tirimu mele tiye naa kolopa, eno kolangei nimbe eno mindili lipe tipe molorumu. Aku tepa molombaindo Gote popo tondoli iyemanga iye nomimu molorumuna pumbe

<sup>2</sup> waltindirimu kinye iye nomimuni pipia te topa tipelie nimbei, "I iye Sol, Damaskus kombu pumbe Juda imboma maku toko Gotenga ungumu pimele ulkemanga pumbe, Jisas ipuki tiko moromele imboma kanopa ka tipe Jerusalem yando mepa opili," nimu.

<sup>3</sup> Aku wali Sol yu Damaskus nondopa pumbe purumu kinye muluna pa enge nili te mainye omba yu molorumuna tondolo pa terimu.

<sup>4</sup> Yu mini lepalie ai topa mainye lepa pilerimu kinye ungu te yundo nimbei, "Sol, Sol nuni ambe temona na mindili liko tiri-noya?" nimu.

<sup>5</sup> Kano tepa nimu kinye Soloni nimbei, "Awilimu, nu nariya?" nimu.

Aku wali yuni ungu pundu topa nimbei, "Na Jisas, nuni mindili liko tirino iyemu.

<sup>6</sup> Kinye ola angilkono ne taun awilina tukundo pani. Akuna punio kinye nu tenio mele imboreni nimbe timbelo," nimu.

<sup>7</sup> Sol kinye peya puringi iyemani ungu pileringi nalo, imbo te naa kanokolio, eno ungu naa ningi we angileringi.

<sup>8</sup> Sol kano mongo makilipe ola molorumu nalo mongoni melte naa kanorumu. Akumunga yu peya puringi iyemani yu ki ambolko meli Damaskus kombu tukundo purungi.

<sup>9</sup> Wali yupoko yu mongoni melte naa kanopa langi kape no kape naa nomba we perimu.

<sup>10</sup> Damaskus tukundo Jisasinga ungu pileli iye te molorumu, aku iyemu yunge imbi Ananaias. Awilimuni yu molorumuna ombo mongo indi kumbu tipelie "Ananaias" nimbe waltindirimu.

Aku wali yuni ungu pundu topa nimbei, "Awilimu, na ya moro," nimu.

<sup>11</sup> Kano kinye Iye Awilimuni yundo nimbei, "Awili aulke te imbi leko Aulke Toya Tolimu nimele kanona nu pungolio nini Judasina ulkena tuku pungolio waltindikolio i teko niwi. Tarsus kombu iye Sol kanomboi ondu niwi. Kano Tarsus kombu iyemu yu akuna konge tepa moromo kani pungo kanowi!

<sup>12</sup> Sol yu mongo indi kumbu te tepa kanomo kinye aku kumbuna tukundo iye te yunge imbi Ananaias aku iyemu yu ombo yunge kimu mongona pala noimo kinye yunge mongomu penga lembalo," nimbe Awilimuni nimu.

<sup>13</sup> I tepa nimu wali Ananaias ungu topodopa nimbei, "Awilimu, iye akumuni nunge Jerusalem moloringi imboma tepa kenjipe

mindili lipe tirimu mele imbo awini temane toko nimelena pio.

<sup>14</sup> Gote popo tondoli iyemanga iye aw-ilimaniyu pipia toko tiringima lipe mepa ombalies nunge imbi leko eno tapopili ningokonge teremele imboma ka timbeindo purrumu," nimu.

<sup>15</sup> Nalo aku tepa nimu wali Awilimuni yundo nimbei, "Aku tepa molo. Iye nio akumu yu nanga kongono tendepili nimbo kanopo ltiu iyemu. Yuni nanga ungum Israel imbo naa mololi imbo tawendoma kinye enonga iye nomi kingima kinye molongemanga kape Israel imbo molongemanga kape yu pumbe nimbe timbelo kani nu paa nio mele pungo tepuwi.

<sup>16</sup> Yu nanga ungum nimbe andopa tipelie nanga ungumunga nimbe umbuni mepa mindili nombalo mele nani lipo ondombo," nimu.

<sup>17</sup> Kano kinye Ananaias pumbe ulke nimu kanona tukundo pumbe Sol ki pala noipelie ambolopalie nimbei, "Ango Sol, nu aulkena oni orunu kinye Awilimununii kanorunu. Imungaaku kano iye Jisasini nu mongo kelko makiklo kanoko Mini Kake Telimu nunge konopuna ombo molopa manda tepili nimbe na puwi nimona i oro," nimu.

<sup>18</sup> Kano tepa nimu kinye walitikale yunge mongona melte pipi tirimu kanomu ombo wendo purumu kinye yu kelepa mongoni melema manda kanopa imbi tipelie, yu ola angilipe Kraistinga iyemu kamukumu malumbo nimbe no Itimu.

<sup>19</sup> Aku tepalie yu langi pokore norumu kinye yu kelepa enge perimu.

#### *Soloni Damaskus kombu imboma ungu nimbe tirimu*

Sol yu kano Damaskus kombu Jisasinga ungum pilko lombileli imboma kinye wali pokore molorumu.

<sup>20</sup> Yu kano koinjo pumbelie Judia imbomangamakutokot Gotenga ungu pileringi ulkemanga tumbi tipe pumbe Jisas kongo andopa tepa molorumu mele nimbe tipelie nimbei, "Jisas yu kano Gotenga malo," nimu.

<sup>21</sup> Yuni ungu nimuna pileringi imbomanini mini ltekolio waliko pilko ningei, "Ne aku nimo iyemu Jisasinga imbibimuleko popo toringi imbo Jerusalem mororingima tepa kenjipe topa bulu balu tipe mundupe mumindili lipe tirimu kano iyemu moloya? Kinye kelepa ya ombo aku teko moromele imboma ka tipe Gote popo tondoli iyemanga iye awilima moromelena mepa pumbe terimu iyemu lepamo," ningi.

<sup>22</sup> Nalo Sol yunge engemu olandopa purrumu. Goteni eno lipe tapondombalo iye mundumbo nimbe kanopa ltamu iye Kraistaku Jisas yu kano iyemu molorumu mele

enge nimbe, nimbe tirimu kani Judia imbonani yundo ungu te topondoko manda naa ningi.

#### *Juda imboman Sol yu tongei teringina kowa purumu*

<sup>23</sup> Wali awi telo ombo purumu kinye Juda imboman Sol tongeindo wai toringi,

<sup>24</sup> nalo yu pilerimu. Yu tongeindo ipu leli tangoli kape kombu ulke pape kerepulmanga nokoringi.

<sup>25</sup> Nalo walite ipu leli yu lombili puringi imboman yu naa tangai ningi yu meko pungo kombu liko okoko kou pape teringina meko pala pungolio akuna makopana lakiklo ka moko tokolio ka anjiko mainye munduringi.

<sup>26</sup> Aku kombu tiye kolopa pumbe pumbelie Sol kano Jerusalem kombu ombalies, Jisasinga ungu pileli imboma kinye peya molombai terimu nalo enoni yu paa paimbo Jisasinga ungu pileli iye te molo ningi liko manjikolio yu pipili koloringi.

<sup>27</sup> Nalo Barnabasini yu lipe iye apostolema moloringina meli pumbelie aku iyemando nimbei, "Iye imu aulkena pumbe Awilimunii kanorumu. Aku wali Awilimuni yundo ungu te nimu kano kinye yu Damaskus kombu pumbe Jisasinga ungum pipili naa kolopa nimbe tirimu," nimbe aku tepa nimbe tirimu.

<sup>28</sup> Aku ungu nimumunga Sol yu eno kinye peya molopa, Jerusalem kombu we andopa molopa, Awilimunga ungum pipili naa kolopa andopa nimbe tirimu.

<sup>29</sup> Yu kinye Grik ungu ningi Juda imboma kinye ungu mele nale teringi nalo aku imboma enoni yu toko kondongei teringi.

<sup>30</sup> Aku tongei teringi mele Jisasinga ungum pileringi iye angenupilini pilkolio, yu Sisaria mainyendo meko pungolio Tarsus kombu puwi ningi munduringi.

<sup>31</sup> Kano kinye Soloni imboma tepa kenjirimulu ulumu tiye kolorumu kinye Judia kinye Galili kinye Samaria kinye kano kombumanga Jisasinga imboma umbuni te wendo naa orumu. Aku kinye imboma molko kondoringi. Awilimupipili kolko yunge ungum pilipo lipo teamili ningi moloringi. Kinye Mini Kake Telimuni eno tapondorumu wali yunge talapemu enge nimbe imbo awini yunge talapena tukundo tukundo puringi.

#### *Pitani Ainias nimbe iye te tepa koinjo ltamu temanemu*

<sup>32</sup> Pita kano kombumanga pali andopalie walite Lida nimbe kombu taun tenga Gotenga imbo mororingima pumbe kanorumu.

<sup>33</sup> Akuna iye te molorumumunga imbi Ainias, yu kimbo ki kololi iyemu yunge enge

te naa perimu. Poinye ki talonga tukundo ainyembo kau lerimu.

<sup>34</sup> Kano wali Pitani kano iyemundo nimbei, "Ainias, Jisas Kraistini nu koinjo pani nimo kani nu ola angilko nunge ainyembo lenio kunumu kimbwi," nimu. Aku tepa nimu kinye yu kano walitikale ola angilerimu.

<sup>35</sup> Lida kombu taun imboma kinye Saron kombu taun imboma kinye pali yu kanokolio konopu topele toko Awilimunga ungumu pilko moloringi.

*Pitani Tabita nimbe ambo te kolorumuna pumbe topa makinjirimu*

<sup>36</sup> Jopa nimbe kombu taun tenga tukundo Awilimunga ungu pileli ambo te molorumu. Aku ambomu yunge imbimu Tabita, tendeku imbumunga kelepa Grik unguna aku Dorkas ningi. Yu waliwali tiye naa kolopa, umbuni perimu imboma kondo kolopa imbo koropa nolima lipe tapopa terimu.

<sup>37</sup> Pita yu Lida taun molorumu kano walmangaaku ambomu kuro torumu kinye yu kolorumu. Kelko yunge onomu no ltendeko ulkemunga olana kiripi tenga noiringi.

<sup>38</sup> Jopa kinye Lida taun talo nondoko nendo yando leringili. Akumunga Awilimunga ungu pilko lombielel imbomani Pita Lida kombu molorumu ungu pilkolio enoni iye talo yu molorumuna liko munduringi. Aku kinye elo ongo yu paa konge tekolio ningili, "Nu peya pamili nimbo limbili ombolo," ningili.

<sup>39</sup> Pita kano aku iye talo kinye peya pumbe yu ulkena purumu kinye yu kano meko ulkemunga ola kiripina meko puringi. Ambo waima Pita angilerimura nondoko ongo makai tendeko ongo angilkoka tekolio Dorkas yuni koinjo molopalie enonga maminye tenderimuma ongo liko ondoringi.

<sup>40</sup> Kano kinye Pitani eno ulke kiripina wendo paio nimbe makoropa mundupelie komongo topa pondopa mainye molopa Gote konge terimu. Aku tepalie ambo onomu lerimuna topele topa kanopalie nimbei, "Tabita nu ola angiliwi," nimu. Kano tepa nimu kinye ambo kano mongo makilipelie Pita kanopa imbi tipelie ola molorumu.

<sup>41</sup> Pitani ambo kanomu yu ki ambolopa ola lipe anjipelie, Awilimunga imboma kinye ambo waima peya waltindipelie Dorkas kano koinjo pumo kani ongo lieio nimu.

<sup>42</sup> I ulu wendo orumumu Jopa taun imboma pali pilkolio, imbo awinini Jisas yu paimbo Kraist, yu linonga Iye Awili molopili ningi enge ningi ipuki tiringi.

<sup>43</sup> Pita kano, wali awini Jopa kombuna iye te kinye molorumu. Aku moloringili iyemunga imbi Saimon, yu kongi kao kangini mele mare tepe wamopa kou ltimu iyemu.

## 10

*Pitani Kornilius nimbe iye te ungu mane tirimu*

<sup>1</sup> Rom kombu iye te Sisaria taunona molorumungu imbimu Kornilius. Aku iyemuni Rom kombu ele iye ami 100 nokromo iyemu. Aku ami iyemanga talapemunga imbiimbu Itali kombu ami iye talapemu.

<sup>2</sup> Yu kinye yunge pulu lerimu imboma kinye eno Judia imboma molo. Eno imbo lupema molkolio Gote pipili kolko konopu tiko paimbo yunge ungumu pileringi imboma moloringi. Yuni mele molo lepa koro-ro noringi imboma lipe tapondopa kou mone tipe, waliwali Gote konge terimu iyemu.

<sup>3</sup> Walite ipupene ena 3 klok mele Kornilius yu Gote konge tepe molopalie mongo indi kumbu tepe ulu te i tepe kanorumu. Gotenga kongono iye ensel te yu molorumuna orumu ulu mona kanorumu. Aku orumu enselemuni nimbei, "Kornilius," nimu.

<sup>4</sup> Kano tepa nimu kinye Kornilius kano mini ltepa pembele nimbe taki lepalie waltindipe nimbei, "Awilimu, ambe temoya?" nimu.

Kano tepa nimu wali enselemuni ungu pundu topa nimbei, "Nuni konge teko imbo koropa nolima liko tapondoko terenomuni Goteni kanopa penga pimo.

<sup>5</sup> Kinye nuni iye mare Jopa pangei liko mundukolio akuna iye te moromomunga imbi Saimon yunge imbi te Pita aku iyemu yu opili nengei.

<sup>6</sup> Saimon Pita yu peremo ulke pulu iyemunga imbimu Saimonola nimele. Aku ulke pulu iyemu yu kongi kao kangini mele mare tepe wamopa kou ltimo iyemu. Yunge ulkemu nomu kuta kulendona angimo," nimu.

<sup>7</sup> Ensel kanomuni aku tepe nimbeline yu purumu. Kano kinye Korniliusini yunge kongono iye talo kinye yu lipe tapondoru mu ami ele iye te kinye eno waio nimu. Aku ami ele iyemu Gotenga ungu pileringi iyemula.

<sup>8</sup> Kornilius yu kinye wendo orumu uluma aku iyemando pali nimbe tipelie eno Pita liko meko wangei Jopa kombundo paio nimbe lipe mundurumu.

<sup>9</sup> Kano iyema pungo ulkena pekolio, otilikondo anjo pungo awi tangoli Jopa nondoko pungei puringi. Awi tangoli Pita kano Gote konge tembaindo ulkemunga kiripi olana purumu.

<sup>10</sup> Kano wali Pita kano engele kolopalie langi te nambowa konopu lerimu. Imboma langi kokele kaloringi kolo nokopa molopalie yu kano mongo indi kumbu tepa kanorumu kinye.

<sup>11</sup> muluna anjo yando pumbe, maminye paa awili tengah ekondo ekondo pundu kitenga ambopalalie taka lipe mainye mundurumu.

<sup>12</sup> Aku maminyena tuku kongi lopa kera waimbe melema pali moloringi.

<sup>13</sup> Kano kinye ungu te ombalie yundo nimbei, "Pita ola angilkono i mele moremeleanga te tokonow," nimu.

<sup>14</sup> Aku tepa nimu wali Pitani ungu pundu topa nimbei, "Awilimu, paa naa nombo. Nuni kanoko keri pino melema kinye kalaro moromo nino melema kinye lino Judia imbomando naa nangei ningono ungu mane tirino melema na naa noro naa nombo molo," nimu.

<sup>15</sup> Wali talo tipe kano ungumu altopa wendo ombo yundo nimbei, "Goteni kake teremo nimo melemando nuni kalaro moromo ungu naa niwi," nimu.

<sup>16</sup> Aku teko, wali yupoko teko ungu ningili kinye walitikale maminye kanomu kelepa muluna olando purumu.

<sup>17</sup> Pita kano konopu kimbo tipelie i mongo indi kumbu tepo kanoro ulumunga pulumu ambe tepanje nimbe pilipe moloromu kinye Korniliusini lipe mundurumu iye kanoma ongo imbo marendo Saimononga ulkemu temuya ningo waltindiliko ongolio yunge ulke kere puluna ongo angileringi.

<sup>18</sup> Akuna angilko waltindikolio "Saimon Pita andi moromoya?" ningi.

<sup>19</sup> Pita kano mongo indi kumbu teromunga pulumu ambe tepanje nimbe konopu kimbo tipe moloromu kinye yunge konopundo Mini Kake Telimuni nimbei, "Iye yupoku nu koroliko oromele."

<sup>20</sup> Akumunga nu ola angilko mainyendo pungo konopu awi teli liko naa mundukono aku iyema kinye pani puwi! Nani iye akuma lipo mundunduna oromele," nimu.

<sup>21</sup> Pita kano mainyendo pumbe iyemando nimbei, "Eno kororomele iyemu na. Eno ambe temona ongeya?" nimu.

<sup>22</sup> Aku tepa nimu wali iyemani ungu pundu tokoningei, "Rom ele iye ami 100 nokoromo iye Korniliusini lino lipe mundumona omolo. Kornilius yu Goteni kanopa penga pimo iyemu, yu Gote pipili koromo iyemu. Judia imbomani pali yu iye pengamu nimele. Gotenga ensel teni yundo nimbei, Saimon Pitani ungu te nu nimbe tipili pileni kani yu opili niwi nimu," ningi.

<sup>23</sup> Kano kinye Pitani nimbeindo, "Eno peya otile pamili kani kinye ipu leli i peamili kani ulke tukundo waio," nimu.

Neya wali pekolio ningimuni otile oi yu kano peya eno kinye purumu wali Kraist ipuki tiringi Jopa kombu moloringi iye mare Kraist ipuki tiko moloringima yu kinye peya tapu toko puringi.

<sup>24</sup> Eno pungo aulkena pekolio, otile oi Sisaria kombu tuku puringi. Korniliusini kinye onge nimbe yunge angenupili lapali kinye pulu lerimu imboma kinye tukundo tukundo waio nimbe eno liko maku toko nokoko moloringi.

<sup>25</sup> Pita kano ulkena tukundo pumbe pu rumu kinye Kornilius ombo yunge kimbo puluna tamalu pepa yunge imbi nimbe pala mundupe kapi nimu.

<sup>26</sup> Nalo Pitani yundo nimbei, "Na Gote molo, na imbo iyemu. Nu ola angiliwi," nimu.

<sup>27</sup> Unku nilkolo ulke tukundo puringili kinye imbo awi teli maku toko moloringina kanorumu.

<sup>28</sup> Pita yuni kano imbomando nimbei, "Judia imboma kinye imbo lupema kinye tendekuna naa molangei nimele ungu manemu eno pimele. Na Judia iyemu molopo i ungu manemu piomunga eno imbo lupe moromelena naa olka nalo Goteni na lipo ondomo mele i tepa, yuni nando nimbei, 'Imboma apuruko te keri, kalaro mololim ningo tendekuna naa molonio kinye manda naa tembalo,' nimu.

<sup>29</sup> Akumunga na owi ningi waltindinge kinye enonga ungumu lipo tui naa tipo ondu. Imunga ambe temona nando owi ningiya?" nimu.

<sup>30</sup> Kano tepa nimu kinye Kornilius ungu pundu topa nimbei, "Wali kite ombo purumu kinye ena 3 klok wali i nanga ulkena tuku na Gote konge tepo moloru kinye walitikale nanga kumbekerena imbo te wale pakoli paa tondolo pa telimu pakopa ombo angilipelie

<sup>31</sup> nimbeindo, 'Kornilius nu Gote konge tereno mele yuni pilipe lipe, imbo koropa nolima liko taporono mele kanopa penga pimo.

<sup>32</sup> Imunga kinye nuni iye mare Jopa pangei liko mundukolio, akuna iye te moromo, iyemunga imbi Saimon, yunge imbi te Pita. Yu opili nengei. Pita yu kongi kao kaluluni mele mare tepa wamopa kou mone ltimi iye Saimononga ulkena moromo, yunge ulkemu nomu kuta kulendona angimo,' nimu.

<sup>33</sup> Aku tepa nimu ungu pilipolio nani tumbi tipo nu moloniona iye maredo nu pungo lipeio nindumunga nu ongo lingi akumunga nu paa onio. Kinye lino Gote kinye peya ombo moromolo imboma Goteni nu ungu nimbe timoma lino ningi teni nimbo pilimilindo ombo moromolo," nimu.

*Pitanga ungu mane tirimuma*

<sup>34-35</sup> Korniliusini aku tepa nimu kinye Pitani pilipelie nimumuni, Korniliusinga ulkena moloringi imbomando pulu polopa nimbei, "Oi pilipolio Goteni Israel imboma kau manjipe konopu mondonromo konopu lero. Nalo kinye pilo, yuni imbo talape-manga pali te ne nimbe yu pipili kolko Gote yunge imbi kape ningi ulu pulu pengama teremele imboma kanopa penga pilipe aku imboma nanga kumbekerena manda ongo molangei nimo lepamo, aku ungumu kinye lipo mantiro.

<sup>36</sup> Goteni Israel imbomando ungu pengama nimbe mundurumumu eno pimele kano. Aku ungumupe paa pulumu i tepe, oi eno Gotenga opa pule imboma moloringi. Nalo kinye Jisasini terimu ulumuni opa topa kolopalie imbo lipa Gote kinye tendeku tipe mondonromo. Aku Jisas yu imbo palinga Iye Awili.

<sup>37</sup> Oi Judia kombumanga ulu wendo orumuma eno nanga ungu niomu piltiemele imbomani oi pilko pora tirimele. Oi Jononi imbomando konopu topele tokolio no liengei nimbe aku unguma nimbe tirimu. Kelepa Jisas Galili kombu yunge uluma pulu polopa terimu.

<sup>38</sup> Oi pulu polopa Goteni kanopa lipelie imboma nokopa kondombalo iye te lipo mundumbo iyemu yu Nasaret kombu Jisas nimu. Aku iyemu pumbe molopili nimbe, yuni Jisas Mini Kake Telimu tipe Jisas enge nipili nimbe engemu tirimu. Kano kinye Gote Jisas kinye molorumu kolo Jisas kombumanga andopa ulu pengama tepa, kuro kerimanga nokoli Sataneni ambolorumu imboma koinjo pangei nimu.

<sup>39</sup> Juda imbomanga kombuma pali kinye enonga taun awili Jerusalem kinye yuni ulu terimuma pali lino yunge lombili andorummumani mongoni kanopo molorumulu. Juda imbomani yu kolopili ningi yu unjo polopeyana toko uku toringina kolorumu.

<sup>40</sup> Nalo yu wali talonga ono kombuna perimu, kelepa wali yupoko tipemunga Goteni topa makinjipelite imbomani nu kanangei mona molowi, nimu.

<sup>41</sup> Imbomani yu makilipe ola molorumu ulumu palini naa kanoringi. Oi Goteni kanangei nimbe imbi torumu imbomani kau kanoringi. Jisas makilipe ola molorumu kinye yu peya langi nombo molorumulu imbomani kau yu kanorumulu.

<sup>42</sup> Yuni linondo nimbei, "Enoni imboma ungu tukumemu ningi tiko, Goteni imbo koinjo moromelema kinye kololima kinye enonga pali kot tendepa uluma moke tepa pilimbelo iyemu na molopili nimu, ningi imboma anjo ningi tieio," nimu.

<sup>43</sup> Gotenga iye profetemani pali oi yu mai kombuna oi naa opili yunge ungumu ningi

tikolio ningei, "Jisas yu paimbo Gotenga malo molopa paimbo yu maina mainye ombla imbomanga nimbe kolo wangopa kolondorumu aku ulumu enge ningi ipuki tinge imboma Goteni Jisas imbomanga nimbe tenderimumunga pilipelie kano imbomanga ulu pulu keri teringima altope topele topo naa kanombo nimbe tiye kolondombo nimu," ningi," nimbe Pitani aku tepa nimu.

*Imbo lupema Mini Kake Teli ltingi*

<sup>44</sup> Pitani aku tepa nimbe molopili Mini Kake Telimu ombla Pitani ungu nimbe tirimuna pilko moloringi imbomanga konopuna tukundo purumu.

<sup>45</sup> Goteni oi Judia imbo Jisas ipuki tiringima tirimu mele kelepa imbo talape lupe moloringima aku tepa tirimuna kanokolio Kraist ipuki tili Judia iye Pita peya tapu toko oringimani paa mini lteko araya ningi.

<sup>46</sup> Mini Kake Telimu kano imbo lupe ltingimani imbo ungu lupe lupema ningi Gote imbi kapi ningina pilkolio Juda iye kanomani Mini Kake Telimu ombla enonga konopumanga pumo lepamo ningi liko manjiringi. Kano ulu kanopa pilipelie Pitani nimbei,

<sup>47</sup> "Lino Kraist ipuki tili Judia imboma Mini Kake Telimu ltimulu mele kinye i imbo talape lupema kape Mini Kake Telimu ltimele kani narini eno no naa liengei nimbe manda mi tombaloya?" nimu.

<sup>48</sup> Aku ungu nimbelie yuni nimbei, "Eno Jisas Kraist yunge imbibunga no liengei," nimu. Imbo kanomani no liko pora tikolio Pitando ningei, "Nu i teli oi naa puwi. Wali pokore nu lino kinye peya molkolio altoko pani," ningina yu kano eno kinye wali pokore we molorumu.

**11***Pita kano Jerusalemendo kelepa yando orumu*

<sup>1</sup> Iye aposelema kinye Jisasinga Judia kombu pali moloringi imboma kinye eno Juda imbomanga imbo lupema Gotenga ungumu pilko ltingi mele pileringi.

<sup>2</sup> Akumunga Pita Jerusalem olando puru mu kinye ungulumanga kangi pundu te kopiko Iteringi ungu manemu paa teamili ningi Kraist ipuki tili imbomani Pita Rom iye Kornilius ulkena purumuna yu iri tokolio

<sup>3</sup> ningei, "Nu Judia iyemu molkono imbo kangi naa kopilimanga ulkena pungo,aku imboma kinye peya molko langi noringimuaku ulumu paa teko kenjirinu," ningi.

<sup>4</sup> Nalo Pitani ulu pali wendo orumuma eno temane topa tipelie nimbei,

<sup>5</sup> "Yane iyema, na Jopa taun moloru kinye na Gote konge tepo molopolio niumuni mongo indi kumbu tepo kanoru kinye muluna anjo yando pumbe maminye paa awili te ekondo ekondo pundu kitenga ambolopalie taka lipe maina mainye mundurumu. Aku kinye na moloruna omba lerimu.

<sup>6</sup> Akuna tukundo kanoru kinye kongilopa kera waimbe mele takerama kape mele ari telima kape pali akuna tuku moloringi.

<sup>7</sup> Kano kinye ungu te ombalai nimu ungu pileru. Aku ungumuni nando nimbei, 'Pita ola angilkono i melema te toko nowi,' nimu.

<sup>8</sup> Aku tepa nimu wali nani ungu pundu topo nimboi, 'Awilimu paa naa nombo. Nuni kanoko keri pino melema kinye kalaro moromo nino melema lino Judia imbomando naa nangei ninggo ungu mane tirinu melema oi walite kape, te paa naa noru,' niu.

<sup>9</sup> Wali talo tipe kano ungummu muluna wendo omba nando nimbei, 'Goteni kake tenderemo melemando nuni kalaro moromo ungu naa niwi,' nimu.

<sup>10</sup> Ilto aku tepo wali yupoko ungu alowa terimbulu kinye walitikale maminye kanamu kelepa muluna olando purumu.

<sup>11</sup> Muluna kelepa olando purumu kano wali Sisaria iye teni paio nimbe lipe mundurumu iye yupoko na moloru ulkena oringi.

<sup>12</sup> Aku wali Mini Kake Telimuni nando nimbei, 'Konopu awi teli liko naa mundukono iye ima kinye nu puwi,' nimu. I Kraistingu iye kite talo pakera eno na kinye peya tapu topo Sisaria iyemunga ulkena tukundo purumulu.

<sup>13</sup> Ulkena tukundo purumulu kinye kano iyemuni linondo nimbei, 'Mulu kombuna iye ensel te nanga ulkena ombalie nimbei, "Nuni iyemare Jopa pangei liko mundukolio akuna iye te moromo, iyemunga imbimbu Saimon, yunge imbi te Pita, aku iyemu yu opili," niwi.

<sup>14</sup> Nu kinye nunge ulkena peremele imboma kinye Goteni enonga teko kenjirimele uluma tiye kolopalie tepe limbelo kani yu kinye molko kondoko kau punge ulu pulumu manda linge mele nimbe timbelo,' nimbe enselemuni nando aku tepa nimu nimbe kano iyemuni aku tepa nimu.

<sup>15</sup> Aku tepa nimu kinye nani pulu polopo ungu nimboi niu wali oi lino molorumulu Mini Kake Telimu mainye orumu meleaku tepe ne kano imboma moloringina orumu.

<sup>16</sup> Aku terimu wali nani Awilimuni ungu te oi nimbelie nimbei, 'Jononi imbo no kau ltindirimu nalo Goteni aku mele eno Mini Kake Telimu lipe timbelo' nimu mele altopo lipo manjiru.

<sup>17</sup> Aku lemo Awili Jisas Kraist enge nimbo ipuki tirimulu kinye Goteni lino oi Mini Kake Telimu tirimu mele altopa aku tepe imbo lupema tirimu lemo na nari molopolio Gotendo molo nilkaya?" nimu.

<sup>18</sup> Pitani aku tepa nimu mele pilkolio enoni oi yundo ningi mele kamu kumu munduko tiye kolkolio, Gote kapi ningolio ningei, "Akumunga Goteni imbo lupema konopu topele toko manda molko kau pangei nimbe panjirimu lepamo," ningi.

#### *Imbo maren i Gotenga ungumu Antiok kombundo meko purungi*

<sup>19</sup> Oi Stiven toko kondokolio pele Kraistingu imboma mindili liko tiringi kinye eno bulu bala ninggo purungi. Aku wali mare kombu Fonisia pungo, mare kombu Saiprus pungo, mare Antiok kombu pungo pungolio Jisasinga temanemu Juda imbomando kau toko tilko andoringi.

<sup>20</sup> Nalo bulu bala ninggo purungi iye mare Saiprus kombu kinye Sairini mai pulu iyema moloringi. Antiok kombu wendo oringi wali Grik imboma kape Iye Awili Jisasinga ungu tukume ninggo tiringi kala.

<sup>21</sup> Iye Awilimuni yunge ungummu pilko lombileringi imboma lipe tapondorumu. Aku terimu kinye manga pupu paa awinimuni yunge ungummu pilko lombilko Awilim kinye konopu tiko konopu topele toringi.

<sup>22</sup> Aku Jerusalem moloringi imbomani aku wendo orumu ungu temanemu pali pilkolio wali Barnabas nimbe iye te Antiok nimbe kombundo tiko munduringi.

<sup>23-24</sup> Barnabas nimbe aku iyemu yu iye pengamu. Mini Kake Telimu kinye ipuki tili ulumu talu yu kinye pepa tengerepea terimu. Yu kano Antiok kombu pumbe wendo ombalie Goteni imboma mane ungu tirimu mele kanopalie yu kano tono kolorumu. Yuni Antiok kombu tukundo pumbe Jisasinga ungu pilko lombileringi imbo akuma pali nimbe enge tipe i tepe nimu, 'Enonga ipuki tili ulumu tiye naa kolaio. Waliwalima Awilim kinye konopu tiko yu kinye tengi tiko molaio,' nimu. Aku wali imbo pulumu lino Awilimunga imboma molamili ninggo tukundo tukundo ongo moloringi.

<sup>25</sup> Da wali Barnabas kano Sol korombai Tarsus nimbe kombu awili tengi purumu.

<sup>26</sup> Sol kano kanopa ltendepalie kinyeyu lipe meli Antiok kombu orumu. Kelko poinye tengi undukana elo aku kombuna Kraistingu imbo moloringima peya moloringili. Imbo awi teli akuna ungu mane tiringili. Antiok kombuna Jisasinga ungummu pilko lombileringi imbomando imbo wemani pulu polko Kristen imbi tiringi.

<sup>27</sup> Neya aku walimunga Gotenga profet iye mare Jerusalem kombu molkolio Antiok kombu maindo oringi.

<sup>28</sup> Aku iye oringimanga iye tengah imbi Agabus. Aku iyemu yuni ola angilipielie Mini Kake Telimuni lipe tapondorumu wali nimbei, "Umbuni awili te wendo ombalolu lemo Rom Gavmaneni nokoromo kombumanga palinga wendo ombalo. Aku walimunga lemo engele ombalo," nimu. (Klodius nimbe iye teni Rom gavman nokoromu wali i ulumu wendo orumu.)

<sup>29</sup> Jisasinga unggum pilko lombileringi imbomani enonga imbo angenupili Judia kombu molko peringima kou tipo tapamili konopu leringi. Imbo te te ningoni mele paa pulumu tipo mundumolo ningononopuna kili kili tendekonoiringi.

<sup>30</sup> Kou mone liko popo tikolio Barnabas kinye Sol talonga kindo tiringi. Aku teringi kinye Barnabas Sol taloni liko meko ongo Judia moloringi Kristen tapu imbona tiringi.

## 12

*King Herot Agripani Jisasinga ungu pilko lombilko moloringi imboma umbuni lipe tirimu*

<sup>1</sup> Neya aku walimunga King Heroteni Jisasinga ungu pilko lombilko moloringi imbo mare mindili lipo tipo topo kondombo nimbe ambolopa ltimu.

<sup>2</sup> Yuni Jononga angenu Jems loi geleani toko kondangei nimbe ee nimu.

<sup>3</sup> Juda imbomani neya aku terimu ulumu konopu tiringina kanopalie wali Heroteni Pita kape ambolopo liembo konopu lerimu. (I terimu ulumu aku Bret Yis Naa Munduko Noli wai awili aku wali terimu.)

<sup>4</sup> Altopa Heroteni Pita kano ambolopa lipielie ka ulkena panjirimu. Aku tepalie ele iye 16 kite ningo wai ambolko Pita yu tapu teangei nimu. Heroteni Pita kinye tembo nimbe konopuna kili kili ltenderimu ulumu i tepe, Pasova Wai akumu oi ombo pumbelo wali pele imbomanga kumbekerena wendo mepo ombo kot tendembo konopu lerimu.

<sup>5</sup> Aku konopu lerimumunga Pita kano ka ulkena we perimu. Nalo Jisasinga unggum pilko lombileringi imbomani Pita yu kolo ningo Gotendo konge enge ningo tendekonau moloringi.

*Enselemuni Pita ka ulkena wendo ltimu*

<sup>6</sup> Pita kano otilikondo Heroteni mepa wendo ombo kot tendembalo wali kinyemele ipu leli uru perimu. Yu ele iye talonga imunana ka sen taloni ka toko mondoringi. Aku wali ele iye wemani ka ulke kere pulumu nokoringi.

<sup>7</sup> Kano wali Pita perimu kanona Awilimunga ensel orumundo maa torumuna akuna ombo angilerimu. Ne kano kiripina tuku pa terimu. Aku kinye enselemuni Pita kano lambona topalie makinjipe ola mondorumu. Kano tepalie enselemuni nimbei, "Welea makilko ola angiliwi," nimu. I tepa nimu kinye Pitanga kina ka sen kanomu yunu moki lepa mainye purumu.

<sup>8</sup> Kano wali enselemuni nimbei, "Nu wale pakoli pakokono nunge kimbo su talo mondowi," nimu kano terimu. Kano terimu kinye enselemuni nimbei, "Nunge ali wale pakolimu pakokono na puro mele lombiliwi," nimu.

<sup>9</sup> Aku wali ensel kanomu tawendo purumu kinye Pita kano lombileringi. Enselemuni terimu ulumu Pitani ulu paimbore teremonje nimbe naa lipe manjirimu. Pita mongo indi kumbure tero kau konopu lerimu.

<sup>10</sup> Ele iye nokoko angileringina onto pungholio talo tiko we ele iye nokoko angileringina onto pungholio kombu sitina tuku purungi kano ain papena wendo oringili. Kano wali ain pape kere pulu kanomu yunu nangape torumu. Kano pape kere puluna wendo pungholio auklena purungi kinye ensel kanomuni yu tiye kolopa tepe nema ltimu.

<sup>11</sup> Kano wali Pitani paimbore terimu kano ulumu lipe manjirimu. I konopu lepalie nimbei, "Kinye na paa lipo mantiro. Iye Awilimuni yunge enselemu na molonduna paa lipe mundumo. Juda imbomanga na kinye wendo ombalo ningonliko manjiringi uluma kinye King Herotenga kindo na tepe koinjo wendo ltimo," nimu.

<sup>12</sup> I uluma lipe manjipelie kinye yu kano Marianga ulke purumu. Marianga malo Jon yunge imbi te kape Mak ningo tiringila. Imbo pulumu akuna konge teko moloringi.

<sup>13</sup> Pita kano pumbelie nangape tawendo gaungau tirimu. Kano wali kongono ambo te imbi Roda, aku ambomu nari oromonje nimbe kanombai purumu.

<sup>14</sup> Kano kinye ambo wenepo kanomuni Pitanga ungu pilipe imbi tipelie yu paa tono lakopa kolopalie nangape kano komutindipe naa toli lkipe tukundo pumbelie imbo nombeya teko moloringi kanomando nimbei, "Pita kano ombo ulke kere puluna tawendo angimo," nimu.

<sup>15</sup> Kano tepe nimu wali imbomani ningei, "Nu loi ltenoya?" ngingi. Nalo aku teko ngingi kape enge nimbe, nimbei kau nimu. Aku wali imbomani ningei, "Pitanga minimunjie," ngingi.

<sup>16</sup> Aku wali Pitani tawendo gaungau timbei kau tirimu. Kelko nangape kano tokolio yu kanokolio eno mini lteringi.

<sup>17</sup> Aku wali Pita yuni yunge ki ola mundupe ungu molo nimu wali imboma ungu naa ningi. Aku wali yuni Awilimuni yu ka ulkena mepa wendo orumu kano uluma temane topa tirimu. Aku tepa nimbeline nimbei, "Jems kinye we Jisasinga ungu pilko lombileli imbo akumando i nio unguma anjo ningo tieio," nimbeline yu kombu tenga lupe purumu.

<sup>18</sup> Otilikondo Pita kano ambe temonje ningi ele iyema eno mini lteko konopundo pilko tunduringi.

<sup>19</sup> King Herot kano kombu palinga Pita kororumu nalo tengen kanopa naa ltimu. Aku wali Pita tapu teko angilerlingi kano ele iyema ungu waltindirimu nalo enonga ningi unguma naa pilipe ltimu wali aku iyema toko kondangei, nimu.

### *King Herot kolorumu*

Altopa King Herot kano Judia kombu wendo pumbe Sisaria nimbe kombu siti tengen pumbeline, wali te akuna molorumu.

<sup>20</sup> Herot kano Tair kombu imboma kinye Saidon kombu imboma kinye mumindili lakopa kolorumu. Nalo aku kombu siti lerimumanga moloringi imbomanga unguma pilkolio imbo mulimuli mare awini maku toko Herot molorumuna oringi. Akumunga kumbe leko eno lipe tapondopa kingimu kinye ungu nindipili ningi iye te kanoringi. Aku iyemunga imbi Blastus, yu Herotenga tukundo ulumanga kongono iye mulimulimu. Imbo akumani yundo Herot ningi ame tondoko lino kinye ame topa linonga ungumu pilipili kani niwi ningi. Aku ambe telka eno kere langi ltingimu aku Herot yunge nokorumu kombumanga ltingi.

<sup>21</sup> Blastus kano pumbe nindirimu wali Herotenil pilimbo nimbeline wai panjirimu. Aku wendo orumu wali, Herot yu yunge wale pakoli kamakomu pakopa Pol enge nilina pala molopalie imboma ungu nimbe tirimu.

<sup>22</sup> Aku terimu wali imbomani ungu are ningi olandoko ningolio ningei, "I nimo ungumu gotere mele ungu nimo. Imbo iyerenga mele molo," ningi.

<sup>23</sup> Aku wali Herotenil Gote imbi awili naa trimuna Awilimunga ensel teni yu topa noirimu kani yu kano korowani norumu kinye kolorumu.

<sup>24</sup> Nalo Gotenga ungumu anjo yando palaku lepa imbo tukundo tukundo lipe anjo anjo pumbei kau purumu.

<sup>25</sup> Altoko Barnabas kinye Sol talo elo liko munduringina kou meko Jerusalem kombu tukundo ongo kongono kanomu pora tikolio wali altoko Antiok kombundo puringili. Aku pungili wali iye te imbi Jon yunge imbi

te Mak aku iyemu kape waye liko meko puringili.

## 13

*Barnabas kinye Sol talo kanoko likolio Gotenga kongonona wendo tiko munduringi*

<sup>1</sup> Antiok kombu tukundo Gotenga ungumu pilko ipuki tiko Lombilklo moloringi imbomanga imunana Gotenga ungumu imboma mane tiringi imbo mare kinye Gotenga profet imbo mare moloringimanga imbima i tepe: Barnabas, Saimon (yunge imbi te Kilo), Sairini siti kombu iye te yunge imbi Lusius, kelepa iye tengen imbi Manain (aku iyemu yu King Herot kinye molopa akorumu). Kelepa iye te Sol.

<sup>2</sup> Aku iyema eno Awilimunga imbi kapi ningi kere langi mi leko naa nongo we peringi. Aku wali Gotenga Mini Kake Temlimuni iye akumando nimbei, "Sol kinye Barnabas talo na tieio. Nanga kongono enge nili te tendangili. Aku kongonomunga nani kanopo lindu iye talo," nimu.

<sup>3</sup> Altoko kere mi leko naa nongo konge teringi kano uluma teko pora tikolio kinye Barnabas kinye Sol talo ki pala noikolio Gotenga kongonona wendo tiko munduringi.

*Barnabas kinye Sol talo Saiprus kombu pungo moloringili*

<sup>4</sup> Barnabas kinye Sol talo Mini Kake Temlimuni imbi topa wendo lipe mundurumu. Kano iye talo Selusia nimbe kombu siti tengen wendo puringili. Akuna molkolio kinye anjiko Saiprus nimbe kombu te nomu kuta imunana lerimu akuna no sip liko puringili.

<sup>5</sup> Iye kano talo Salamis ningi kompuna wendo ongolio kinye akuna Juda imbomanga nombeya ulkemalio Gotenga ungumu ningi tiringili. Jon Mak nimbe aku iyemu kape elo tapombai waye moloringi.

<sup>6</sup> Kombu no imunana lerimu kanomunga aku teko nilko anjikondo pungo welendo Pafos nimbe kombu tendo wendo oringili. Pafos kombu akuna Juda ala iye te kanoko Itenderingili. Aku iyemunga imbi Ba-Jisas. Yu kolo toli iye profetemu.

<sup>7</sup> Aku iyemu yu waliwali gavman nokorumu iye Sergius Paulus kinye nondopa molorumu. Sergius Paulus yu iye konopu peyo lelimu molorumu. Aku iyemu yuni Barnabas kinye Sol talo ungu nimbe mundupelie yu morona walio nimu. Aku ambe telka yu Gotenga ungu tukumemu pilimbei nimu.

<sup>8</sup> Nalo Elimas kano ala iyemuni kano iye talo kinye opa pule torumu. (Liko manjeio, Ba-Jisasinga imbi te Elimas. Yunge imbimunga ungu pulumu ala iyemu.) Aku

iyemu yuni gavman nokoli iyemu Jisasinga ungumu pilko lombileli ulu akumunga pipi timbei mongo kondoruru.

<sup>9</sup> Nalo Sol Mini Kake Telimu pepa tengewepeya tenderimu. Solonga imbi te Pol. Yuni Elimas enge nimbe kanopalie

<sup>10</sup> nimbei, "Nu Satanenga malo! Ulu toyatolimanga palinga nu opa pule iyemu. Nu kinye ulu keru imbo lope ltendeli uluma kinye ungu kolo toli uluma pepa tengewepeya teremo. Nu waliwali Awilimunga ungu paimbomu kelko liko topele toko kolo none tendeni kau tereno.

<sup>11</sup> Imunga kinye nu Awilimuni topili! Aku tembalu wali nunge mongo talo limbelo kani nu wali marenga melte manda naa kanonio. Enamunga pamu kape paa naa kanonio," nimu.

Kano kinye Elimasinga mongona melema pali tumbulu torumu. Kano kinye yu ki ambolko meko pangai nimbe imbo te korombai tune tane andopa makai tenderimu.

<sup>12</sup> Gavman nokoli iye kanomuni i kano ulu kanopalie kinye yunge konopundo pilipe tengi tipe Jisas ipuki tirimu. Aku tepalie Awilimunga ungu manemu pilipelie yunge konopundo mimi purumu.

*Pol kinye Barnabas talo Saiprus kombu tiye kolko wendo puringili*

<sup>13</sup> Pol kinye yunge waye moloringi imbo kanoma kinye Pafos kombu tiye kolko no sip liko nomu kuta wendo puringi. Aku tekolio Pamfilia nimbe kombu awili te lerimumunga tukundo Perga nimbe kombu tengi wendo oringi. Nalo aku wali Jon Mak yu kano waye andoringi iyema tiye kolopa Jerusalemendo yando orumu.

<sup>14</sup> Kelko Pereka kombu liko yando munduko pungo kau molko Pisitia nimbe kombu awili te lerimumunga tukundo Antiok nimbe kombu siti tengi wendo oringili. Antiok kombu tukundo Israel imbomani Gote popo toringi wali elo kano Israel imbomanga nombeya ulke tengi tuku pungo mainye moloringili.

<sup>15</sup> Kano kinye nombeya ulke nokoli iyemani Mosesinga mane ungumu kinye aku oi Gotenga nimbe munduli ungu nili iye profetemani toko panjiringi unguma kambu toringi. Aku tekolio Pol kinye Barnabas talo moloringilina ungu ningi mundukolio ningei, "Ango kame, eloni i imboma enge timbelo mele ungu mare noiko molongele lemo imbo ima pilengeningo tielio," ningi.

<sup>16</sup> Kano tekoi ningi wali Poloni ola angilipelite ki pala mundupelie nimbei, "Eno Israel imboma kinye we imbo Gotenga imbi ambolko ola ltmele imbo akuma eno paa wamongo pileio!"

<sup>17</sup> Israel imbomanga Goteni linonga ara kae kame kanopa ltimu. Imbo akuma Isip kombu moloringi aku wali Gote yuni imbo akuma enge panjindipe imbo kalko liko manga awilimu molangei nimu. Kelepa imbo akuma kombu akuna enge paa awili nimumunga Goteni mepa wendo orumu.

<sup>18</sup> Aku tepalie yuni imbo akuma poinye 40 tukundo kombu kapu wena kele topa nokorumu.

<sup>19</sup> Goteni aku wali Kenan kombu maina imbo manga pupu kite yupoko moloringima topa mundupelie enonga maina yunge imboma kamukumu tirimu.

<sup>20</sup> I uluma pali poinye 450 akuna tukundo wendo orumu.

Aku uluma oi tepalie altopa Goteni yunge imboma nokoko teko leangei nimbe iye enge nili mare tirimu. Aku tepe iyema tilipe ombalbe profet Samuel wendo orumu wali ulu kanomu kelerimu.

<sup>21</sup> Aku wali imbomani eno nokopili iye kingire kanoko liko tiwi ningi kongeteringi. Aku teko ningi wali Goteni Kis nimbe iye tengi malo Sol nimbe iye te kanopa lipe tirimu. Sol yu Benjamin ningi anda pupu peringi aku lapuna iyemu. Aku iyemu yu poinye 40 tukundo king kamako molorumu.

<sup>22</sup> Kelepa Goteni Sol umbulu tipelie kinye Devit enonga king molopili nimu. Goteni Devit yundo nindirimu ungumu i tepe, Nani Jesinga malo Devit kanopo lindu. Yu nanga iye paa moromo. Akumunga nani tepili konopu lembo uluma pali tembalu,

(1Sa 13:14)

nimu.

<sup>23</sup> Akumunga Goteni Devitinga anda pupu talapena Israel imboma tepe lipili nimbe iye te kanopa lipe mepa wendo orumu. Aku tepalie Goteni o'i aku tepe tembo nimbe mi lepa nimu mele terimu. Aku Devitinga manga pupuna kanopa ltimu iyemunga imbi Jisas.

<sup>24</sup> Jisas kongono pulu mondopa oi naa telii wali Jon Imbo No Ltindilini Israel imboma pali Gotenga ungumu nimbe tirimu. Yuni nimbei, 'Eno konopu topele tokolio no lieio,' nimbelie aku tepe nimbe tirimu.

<sup>25</sup> Aku tepalie yuni kongono tepe pora timbei wali i tepe nimu, 'Enoni na nari konopu ltmeleya? Na Gotenga kanopa lili iye Kraist molo. Aku iyemu yu akilio lepa ombalo. Aku iyemunga nani yunge kimbo su kamu manda pio tindimbo mele molo,' nimu.

<sup>26</sup> Ango kame, Abrahamenga lapuna malopili iyema kinye imbo lupe Gotenga imbi ambolko ola ltmelema eni i ungumu wa-mongo pileio! Goteni Jisasindo imboma teko lipuwi nimu ungumu linondo nimbe mundurumu.

<sup>27</sup> Nalo Jerusalem imboma kinye enonga kombu meli iyemani Jisas yu kanoko imbi naa tiringi. Oi Gotenga profet iyemani toko panjiringi unguma Israel imbomani Gote popo toromele wali kinye waliwalimanga kambu toko ningi tirimelema pimele nalo naa liko manjirimene. Nalo kelko Jisas yu toko kondoringi ulumuni kano unguma kere mepili ningi.

<sup>28</sup> Paimbo yu toko kondongei ungu pulu te naa kanoko ltenderingi nalo Pontius Pailateni yu we toko kondangei nindipili ningyo yundo konge teringi.

<sup>29</sup> Jisas yu kinye wendo ombalo ulu pali oi toko panjiringi aku uluma tekolio kinye yu unjo polopeyanma mainye likolio ono kombu kou angana pungo noiringi.

<sup>30</sup> Aku teringi nalo Goteni yu kololi ulu pulumunga topa makinjirimu.

<sup>31</sup> Aku terimu kinye wali pulumunga yu kinye waye koniye leko Galili pulu mondoko Jerusalem kombu tuku purungiaku imbomani kanoringi. Kinye kano imboni kanoringi mele linonga Israel imboma ningi tilko andoromele.

<sup>32</sup> Linoni eno i ungu tukume nimbo timolo. Linonga ara kaue kame kinye oi Goteni tembo nimbe mi lerimuaku uluma

<sup>33</sup> lino enonga kalko ltingi bakulumanga kere mepili nimu. Aku terimu ulumu Jisas topa makinjipeola mondorumulu umuniterimu. Aku terimu ungu tendekumula kunana bukumunga talo tipe ungumunga nimbei,

Nu nanga malo; kinye na nunge lanie moro,  
(Sng 2:7)

nimbe peremo.

<sup>34</sup> Paimbo Goteni yu naa purupili nimbe kololi ulumunga topa makinjirimu ulumundo kunana bukuna ungumu nimbei, Nani oi Devitindo timbo nimbu mi lero aku

mane ungu tukumema nu paimbo  
timbo, (Ais 55:3)

nimbe peremo.

<sup>35</sup> Aku tepa tendeku ungumunga kunana bukuna ungu te kape i tepa nimbe peremo: Nuni nunge Iye Kake Telimu purupili ungu naa ninio. (Sng 16:10)

<sup>36</sup> Aku nimu ungumu Devitindo naa nimu. Oi Devit molorumu wali Devitini Goteni tewi nimu kongonoma pali tepochalayu kolorumu. Aku wali yunge lapali kinye ono teringi kinye yunge kangimu pururumu.

<sup>37</sup> Nalo kololi ulumunga Goteni topa maknjirimuaku iyemu naa pururumu.

<sup>38</sup> Akumunga nanga ango kame, nani eno liko manjengei nimboi tero ungumu i tepa: Ulu pulu kalaroma tiye kondopakomutindili ulumuaku we aulke te molo nalo Jisas kinye kau ltemo ungumu eno nimbo tiro.

<sup>39</sup> Jisas terimu ulumuni kau imbo pali yu ipuki tingema Gote kinye tendeku tipe manda mondombalo. Nalo oi Mosesinga mane ungumuni imboma Gotenga imbo toyatolima manda naa mondombalo.

<sup>40</sup> Oi Gotenga profet iyemani ningi unguma eno kinye naa wendo opili kani enoni wamongo kele toko nokao.

<sup>41</sup> Aku ungumu i tepa,  
Eno umbulu takau ngul nindili imboma i ungumu wamongo pileio! Nani eno molko punge walimunga eno tepe mini ltendepili ulu te tembo. Eno ningi tingewali kape enoni akulumu ipuki naa tingewali. Akuunguma eno we andoko andokolio kinyekelko kolongenningi," (Hab 1:5) nimbe Poloni i tepa nimu.

<sup>42</sup> Pol kinye Barnabas talo Gotenga nombeya ulkemu tiye kolko wendo pungili purungili wali imbomani altopa nendepa koro awilimunga ungu kanomu eno altokoningo tielio ningi elo konge teringi.

<sup>43</sup> Nombeya kanomu pora nimu kinye pele imbo mare Pol kinye Barnabas talo elo lombili purungili. Aku Juda imboma kinyewe imbo lupemana konoputokele toko Juda imbomani popo toromele Gotenga imbi kapi ningiaku imboma kape peya purungili. Aku teringi wali Pol kinye Barnabas taloni imbo akumando Gote eno kanopa pengapilipili ningolio eno molko kondaio ningili.

<sup>44</sup> Kano kinye nendepa kano koro awili wendo orumu wali kombu siti akumunga imbo pali Awilimunga ungumu pilingeiongo nombeya teringi.

<sup>45</sup> Imbo pana ongo nombeya teringi ulukanokolio kinye Juda imbomani konoputkeri panjiko Poloni ungu nimuma ungtaka tondoko nimbe kenjirimo ningokaraye teringi.

<sup>46</sup> Naloaku wali Pol kinye Barnabastaloniu ungu enge ningi ningili, "Jisasini yunge ungumu enondo kumbe lepo paa nimbo tiembili nimbe tirimu. Nalo enu ungu naa pilimolo ningi enonganmolopapuli ulumu eno manda naa limolo ningi momromekanilinkombalupeimboma kinye ungu kanomu mepo pumolo.

<sup>47</sup> Awilimuni linondo teao nimu ungumu nimbei, Nani eno kombu lupe imbomangapamu apuwe tiru.

Enoni mai kombumunga palinga imboma koinjo pangeiaulkemu liko ondonge, (Ais 49:6)

nimu. Akumunga iltoniaku ulu terembolo," ningili.

<sup>48</sup> Aku ungumu pilkolio imbo lupemantono kolkolio Awilimunga ungumu wale pakoringi. Goteni waliwali koinjomolko kau pungei nimbe kanopatitmu imbo

palini Yunge ungu paimbomu ningi Jisas ipuki tiringi.

<sup>49</sup> Aku kinye Awilimunga ungu tukume kanomu kombumunga anjo yando pumbe palaku lerimu.

<sup>50</sup> Nalo Juda imbo kanomani Gote popo toromele ambo awili mare kinye kombu sitimunga iye awilima kinye ungu kondi toko olona mondondokolio Pol kinye Barnabas talo mindili liko tiengei ningi. Kano wali imbo awilimani Pol kinye Barnabas talo opa makinjikolio enonga kombuna makoroko wendo munduringi.

<sup>51</sup> Aku teringi wali Pol kinye Barnabas taloni elonga kimbona kungupomu ga tiko mainye mundukolio elonga pulure molo ningolio aku teringili. Aku tekolio Aikoniam nimbe kombu tengah elo puringili.

<sup>52</sup> Nalo Gotenga ungumu pilko lombilerengi imbo kanoma paa tono kolko Mini Kake Telimu eno kinye molopa manda tepili moloringi.

## 14

*Pol kinye Barnabas talo Aikoniam kombuna Awilimunga ungu ningi tiringili pungo moloringili*

<sup>1</sup> Aikoniam kombu pungolio Pol kinye Barnabas talo akuna molkolio wali elonga oi terembele kano mele Juda imbomanga nombeya ulkena tuku puringili. Ungu ningi paa kondoko munduringili kinye Juda imboma kinye Grik imboma kinye aku paa pulumu ongondoko olandoko ungu tukumemu pilko lombilerengi.

<sup>2</sup> Nalo kolo torombele ningi Juda imbo mare elonga ungumu naa pileringi akumanzi imbo lupe kanoma teko mumindili kondoko ungu kondi toringi kinye imbo lupemani Pol kinye Barnabas talo konopu kerai panjiringi.

<sup>3</sup> Aku teringi wali Pol kinye Barnabas talo wai tulemunga Aikoniam kombu molkolio Awilimunga ungumu enge ningi ningi tiringili. Awilimuni imbomani yunge ungu tukumemu paimbo nengei nimbelie Pol kinye Barnabas talonga kindo ulu wengendelima kinye ulu tukume konopu leangei uluma teangili nimbe engemu tirimu.

<sup>4</sup> Nalo kombu sitimunga tukundo imbo marenzi Juda imboma kinye kopu tekolio molo ningi ungu naa pileringi. Aku wali imbo wemanzi Jisasinga kongono tipe munduli iyemanga ungumu pilko lombilerengi. Akumunga kombu sitina moloringi imbona talo teko mokemake leringi.

<sup>5</sup> Aku wali imbo mare Judama, mare imbo lupema, akuma kinye enonga kombu meli imboma kinye molkolio ningimuni Pol kinye Barnabas talo mindili liko tiko kouni toko kondongeun gungu wai toringi.

<sup>6</sup> Nalo aku tengai ningi ungu pilkolio Likonia nimbe kombu awili pungolio Listra kinye Derbe kombu siti talo akumunga tukundo lerimuna puringili. Aku kombu siti talonga nondopa lerimu kombumanga kape waye puringili.

<sup>7</sup> Eloni ungu tukumemu akuna kape ningi para tiringili kala.

*Pol kinye Barnabas taloni kano Listra kinye Derbe nimbe kombu siti talonga ulu wengendeli teringilina wendo orumu temanemu*

<sup>8</sup> Listra kombu akuna iye te kimbo kololimu molorumu. Oi anumuni merimu wali aku iyemu kimbo kololimu merimu. Aku iyemu yu walite kape aulke paa naa andorumu.

<sup>9</sup> Aku iyemuni Pol nimu ungu pilipe molopalie Goteni yu tepa koinjo limbelo nimbe konopundo ipuki tirimu. Poloni iye akumu mongoni wamba kanopalie iyemu ipuki tirimu lepamo nimbe lipe manjirimu.

<sup>10</sup> Imunga Pol yuni ungu enge nimbe ola nimbelie nimbei, “Ola angiliwi!” nimu. Iye kanomu puke topa ola angilipelie pulu mondopa aulke andorumu.

<sup>11</sup> Imbo maku toko angilerengi kanomani Poloni neya aku terimu ulu kanokolio enonga Listra imbo unguna are ningi ningei, “Gotema imbo iye apuwe lenge. Akuma lino moromolona mainye onge,” ningi.

<sup>12</sup> Aku kinye imbomani pulu mondoko Barnabas kano gote Sus ningi imbi tiringi. Pol gote Hermes ningi imbi tiringi, ambe telka ungu pulu nimbe yuni nimu.

<sup>13</sup> Sus ningi aku kolo gotemunga kuro ala ulkemu kombu sitina nondopa angilerimu. Aku kuro ala ulkemunga iye kuro popo tondoli teni kongi kao pelea mare kondipe tindima wili topa nomina ltendepa au tipe kombu siti kere puluna mepa orumu. Ne kano kuro popo tondoli iyemu kinye imboma kinye akumani Pol Barnabas talondo kuro koiko langima kalko tendelemumu tingi teringi.

<sup>14</sup> Nalo iye aposel talo, elo Barnabas kinye Pol taloni aku tengai teringi ulumu liko manjiringiliku aku Gotenga imbi mu teko kenjindingei teremele konopu lekolio elonga wale pakolima ora tokolio kinye imbomanga imunana lkiko pungolio ninglimuni ru ningi ningili,

<sup>15</sup> “Imboma, i uluma ambe telka teremeleya? Itlo iye talo kau, eno mele imbo talo. Iltoni enonga ungu tukumemu mendepo ombluo nimbili, enonga ulu pulu timborimbo imanga umbulu tikolio paimbo koinjo mololi Gote kinye konopu topele taio. Aku Gote yuni mulu mai talo tepa, nomu kutamu terimu. Nona tukundo ltemo

melema kinye mai kinye mulu talonga temo melema pali terimu, yu pulu.

<sup>16</sup> Oi Goteni kombu palinga imbomani enonga temolo konopu leringi uluma teangei nimu.

<sup>17</sup> Aku teangei nalo yu paimbo moromo ningko liko manjengei nimbe uluma terimu kala. Yuni imboma Nani eno kondo kondoro mele kanangei nimbe eno muluna maindo lo tipelite kere imbo langi inie toko nangei waima tirimu. Eno kere penga awini tipelite eno tepe tono kondoromo aku Goteni teremo,” ningili.

<sup>18</sup> I unguma ningili nalo nombeya teko angileringi imbomani enonga melema kalko tendelemumu elo tingei kau teringi. Nalo ningko ningolio ningili wali imbomani aku ulu tiye koloringi.

<sup>19</sup> Altoko Juda imbo mare Antiock kinye Aikoniam kombu talonga molkolio oringi. Aku imbomani ne kano moloringi imbonanga konopundo ungu toko mondondokolio Pol toko kondaio ningi. Aku teringi kinye imbomani Pol kano kouni tokolio kunduko meko kombu tawendona wendo puringi. Pol yu kano topo kondomolo konopu leringi.

<sup>20</sup> Nalo Jisasinga lombili andoli imboma Pol yu lerimuna liko okoringi. Aku wali Pol yu kano makilipe ola angilipelite Listra taun tukundo purumu. Otilikondo iye kano taloaku kombu tiye kolokolo Derbe nimbe kombu siti tenga puringili.

*Pol kinye Barnabas talo Siria kombu tukundo anjikondo yando oringili*

<sup>21</sup> Pol kinye Barnabas taloni Jisasinga ungu tukumemu Derbe nimbe kombuna ningko tiringili kinye imbo pulumu ungu pilko tengi tiko lombili andoli imboma moloringi. Pol kinye Barnabas taloni oi oringili kano kombumanga altoko yando oringili. Aku kombuma oringili mele i tepe: Listra ongolo Aikoniam ongolio Antiock wendo oringili.

<sup>22</sup> Neyaaku kombu siti tukundo Jisasinga lombili andoli imbo moloringima ningko enge tiringili. Imbo akuma Gotenga ungumu tengi tiko Jisasinga ulu paimbomu kau teao ningko tiringili. Aku tekolio wali ningili, “Lino Gote molopa kau puli kombuna tukundo pumili ulu umbuni pulumu paa memolo,” ningili.

<sup>23</sup> Pol kinye Barnabas taloni kere naa nongo mi leko konge tekolio Jisas ipuki tiko nombeya teringi imbonanga te te ningko tapu iyema kanoko imbi toko ltingili. Aku tekolio Gotenga ungumu pilko moloringi imbo palima Awilimuni nokopili ningolo yunge kindo noindiringili.

<sup>24</sup> Kelko kano iye talo Pisidia kombu anjikondo pungolo aku tekolio Pamfilia kombu wendo puringili.

<sup>25</sup> Aku kombuna tukundo Perga nimbe kombu siti tenga ungu tukumemu ningko tikolio Atalia kombu maindo puringili.

<sup>26</sup> Aku kombuna molkolio anjiko nosip liko Antiock kombu puringili. Aku kombuna tukundo Gotenga ungumu pilko lombileringi imbomani elo Gotenga kindo noindikolio neyaaku teliko andoringili kongonomu teangili ningi kano. Neyaaku kongonomu teko pora tikolio yando oringili.

<sup>27</sup> Antiock kombu wendo ongolio wali Kristen imbo moloringima liko nombeya teringili. Aku tekolio Goteni elo kinye terimu uluma pali ningko tiringili. Kelepa Goteni imbo lupemani yunge ungumu pilko lombilkolio tukundo wangai nimbelie ulu enge nili terimuaku unguma ningko tiringili.

<sup>28</sup> Aku teko ningolio neyaaku Antiock kombuna Jisasinga lombili andolima kinye wali awini moloringili.

## 15

*Kristen imbo awilima Jerusalem kombu nombeya teringi*

<sup>1</sup> Kano wali Juda iye mare Judia kombu molkolio Antiock kombu maindo oringi. Aku Juda iyemani Jisas ipuki tiko moloringi imbo pupu lupemando ungu mane tiko ungu liko anjiko ningei, “Eno Mosesinga mane ungumuni nimo mele kangipundu kopiko lieio. Aku ulu naa tengi lemo eno Goteni tepe koinjo naa limbelo,” ningi.

<sup>2</sup> Aku ungumunga Pol kinye Barnabas taloni iye oringima kinye ungu nendo yando ningili. Neyaaku ungumunga Antiock kombuna Jisasinga ungumu ipuki tiko moloringi kano imbomani Pol kinye Barnabas talo kinye we imbo mare peya kopu teko liko Jerusalem mundungei kanoko ltingi. Jerusalem kombu pungolio wali tapu iyema kinyekongonotipe munduli iyema kinye neyaaku ungumunga wamongo toropo toko nengei ningolio liko mundungei konopu leringi.

<sup>3</sup> Gotenga imbo moloringi kanomani ne kano iyema aulke pangeimunga liko tapoko munduringi. Kano iyema Fonia kinye Samariaaku kombumanga anjikondo pungo imbo pupu lupemani konopu topele toko Gotenga ungumu pilko ltingimele ningko tilko puringi. I ungu ningko tilko puringiman imbo Jisasinga ungumu pilko lombilklio moloringima tepe tono awili kango kondorumu.

<sup>4</sup> Imbo kanoma Jerusalem kombu wendo oringi kinye akuna kongonotipe munduli iye moloringi kinye tapu iye moloringi

kinye we Gotenga imbo moloringi akumani nombeya teko eno kano panjiko ltingi. Kano wali Pol kinye Barnabas taloni elo kinye Goteni terimu ulu kanoma pali ningotiringili.

<sup>5</sup> Ningili aku wali Farisi ningotiringili talape akumunga tukundo imbo mare Jisasinga ungumu pilko lombileringi aku imbomaniaola angilipelite ningei, "Imbo lupemando ungu pilko lombileli akuma kangi pundi paa kopiko liengei nimbo oi Mosesinga mane ungu topa panjirimu aku ungumolumbilengei paa nimbo tiemili," ningi.

<sup>6</sup> Kano kinye kongono tipe munduli iyema kinye tapu iyemani neya aku ulu unbunimunga konopu tendekuna noiko aku ulumu moke teko kanongei likonombeya teringi.

<sup>7</sup> Aku wali ungu nendo yando paa tule kango ningotiringili. Kano wali Pitani ola angilipelite imbo kanomando nimbei, "Imbo ango kame, oi Goteni terimu kano uluma eno liko manjirimele. Imbo lupemani Gote yunge ungumu pilko lombilengenimbeliemunga enonga imunana Goteni na kanopa lipelite imbo lupemando ungu tukumemu nimbo temboi nimu.

<sup>8</sup> Imunga Gote yu imbo palinga konopu karomo iyemuni imbo akuma kinye ulu tendekumu tepa tukundo ltamu. Aku terimu ulumu lino lipe ondorumu ulumu i tepa: Yuni lino Mini Kake Telimu tirimu kano mele imbo lupemana tepa Mini Kake Telimu tirimu.

<sup>9</sup> Gotenga kumbekerena imbo lupe akuma imbo lupemare molo. Imbo akumani yunge ungumu pilko lombileringina yuni enonga konopuma tepa kake tenderimu.

<sup>10</sup> Imunga kinye ambe telka enoni Gote manda manjirimeleya? Kinye enoni imbo ipuki tendeku tiringi lupemanga umbuni awili lomo ltenderemele. Aku umbunimulemope linoni kape molo oi linonga arakae kameni manda naa meringi kano telimu.

<sup>11</sup> Awili Jisas imboma nimbe kondormunga kau Goteni lino kondo kolorumumuni lino kape imbo lupemana kape lino pali tepa koinjo ltimumu, i konopu lepolio aku kangi pundi kopili ulumu teao ungumu paa naa nemili," nimu.

<sup>12</sup> Aku wali imbo pali kano takalikomolko Pol kinyetalinga ningili ungu pilko moloringi. Pol kinye Barnabas taloni imbo lupemanga imunana ulu wengendelima kinye ulu tukume ltemo nilima Goteni elonga kindo tipe ningili unguma paimbo ltemo lipe ondombai terimu aku uluma pali temane toko ningotiringili.

<sup>13</sup> Kano ungu ningotiringili kinye Jemsini ungu nimbei, "Imbo ango kame, na nio ungu pileio.

<sup>14</sup> Goteni imbo lupemana konopu lipe manjipelite imbo akuma kumbe lepa tupa tukundo lipe yunge imboma molangei nimo mele aku ungumua Saimononi lino nimbe timona pilimolo.

<sup>15</sup> Oi Gotenga nimbe munduli ungu niliyeprofetemani toko panjiringi ungumuniaku ulu ima enge tirimo. Aku i tupa,

<sup>16</sup> Aku uluma omaba pumbelo wali altopo ombo.

Devitinga king moromo ulke awilimutekiripe ltemo.

Nalo nani aku ulke kolo wangopo takopo enge tipo anjimbo.

<sup>17</sup> Aku tepolio imbo lupemana nanga nimba alako tombomu kinyenanga Israel imbo pokore we molongemakinye

na koroliko morona wayema wangeinimbolio tembo, nimbe Awilimuniaku tupa nimu.

<sup>18</sup> Yuni aku unguma paa koro oi pilengeinimbe wendo mundupelite

aku nimu mele tembalo. (Amo 9:11-12)

<sup>19</sup> Imunga nani i konopu lteo. Jisas ipuki tiringi imbo lupemana konopu topele toko Gote kinye tukundo ongo molongemakonopu umbuni lipo naa tiemili.

<sup>20</sup> Nalo imbo lupe akuma lino kinye tendekutikopengatoko molangeinimbolio linoni imbo akuma moromelendo pipia te topo mundupolio linoni i unguma nimbo tiemili: Kolo toko imbo kini wamoli gote-manga kere koiko tingema naa naio. Aku teko koinge kere langima Goteni kalaromololi nimo. Ulu i kano kano ambiye wapu langi noli ulu kalaroma naa teaio. Ari mele yokoli pelima naa nongo yokoli we naa naio.

<sup>21</sup> Paa koro oi wai tulemunga winjo Juda imbomania Mosesinga unguma meko kombu siti palinga imbo lupemana ningotiringi. Juda imboma Gote popo toromele wali nombeya ulkena ungu kanomu yaka ningokambutoko ningopimele kano. Imbo lupemana i pilko moromele liko manjirimele. Akumunga eno kinye Juda imboma kinye nendo yando konopu keri naa panjengei nimbolio i ulu pokokau naa teangei nemili," nimu.

*Tapu iyemani Jisas ipuki tiringi imbo lupemana pipia toko tiringi temanemu*

<sup>22</sup> Kano wali Jerusalem moloringi kongonotipe munduli iyemani kinyetapingu iyemani kinye Gotenga imbo moloringi kanomopalini enonga iye marendo Pol kinye Barnabas talo koputeko paio ningolio Antioakkombundo liko mundungeiteringi. Aku

tekolio iye talo kanoko ltingi. Iye tenga imbi Judas Barsabas. Tenga imbi Sailas. Iye aku talo Gotenga ungu pilko lombilko moloringi imbomani wale pakoringi iye talo.

<sup>23</sup> Aposelemani aku iyemando meko paio ningo pipia imu toko tiringi. Aku pipiana ungu ningo munduringi mele i tepa,

"Lino kongono tipe munduli iyema kinye tapu iyema linoni pipia imu eno imbo pupu lupemando topo tirimolo.

Eno kinye lino kinye Jisas ipuki tipolio Gotenga imboma moromolo.

Eno Antiok moromele imbo lupema kape Siria moromele imbo lupema kape Silisia moromele imbo lupema kape, eno molko kondaio.

<sup>24</sup> Imbo mare lino tiye kolkolio eno moromelena ongolio eno konopu teko bembu tiko umbuni teli ungu mare ningi temanemu pilerimulu. Nalo linoni pungo teao nimulu ulure ongo naa tiringi. Aku molo.

<sup>25</sup> Imunga linoni ya iye talo eno moromelena kanopo lipo tipo mundemili nimbo palini ee nimolo. Aku iye talo linonga konopu mondoli imbo angko Pol kinye Barnabas talo kinye ongele.

<sup>26</sup> Pol Barnabas kano iye taloni Jisasinga kongono terembolo wali kolombolo ungure molo ningo Awili Jisas Kraistinga kongono meko andoko kau teko, wali mare pondéanga koloringili.

<sup>27</sup> Imunga linoniaku iye talo kinye koputendepo iye talo waye tipo mundurumolo. Iye aku talonga imbi Judas kinye Sailas talo. Aku iye taloni lemope enondo i ungu tedenkumula ningo tingele.

<sup>28</sup> Mini Kake Telimuni lino tapondorumu wali eno kinye umbuni teli mane ungu awini naa panjemili konopu lerimulu. Imunga enoni ulu ima kau teao nimolo.

<sup>29</sup> Kolo toko imbo kini wamoli gotemanga kuro koiko tingema naa naio. Yokoli tepa angili ari melema kinye yokoli we naa naio. Eno ambiye wapu langi noliaku uluma naa teao. I uluma naa tengemolemoaku penga. Enge ningo molaio," ningolio pipiamu tiko munduringi.

<sup>30</sup> Aku pipia toko tikolio munduringi kinye iye kanoma Jerusalem kombu tiye kolko Anjikondo maindo puringi. Akuna Gotenga imbo moloringi kanoma liko nombeya tekolio pipia kanomu tiringi.

<sup>31</sup> Pipia kanomu kambu toko kanokolio wali i unggumu lino enge tirimo lepamo ningo eno tono paa enge ningo koloringi.

<sup>32</sup> Judas kinye Sailas talo Goteni teremo uluma imboma ningo tiringili iye profet talo. Aku iye taloni Goteni imboma tapopa enge timbelo ningo yunge imboma ningo molaio ningo ungu awini ningili.

<sup>33</sup> Wali mare ombo purumu kinye altopa Jisasinga imbo akuna moloringi kanomani Judas kinye Sailas talo konopu ame topa lepili ningi elonga oi molkolio oringili kano kombu Jerusalem palio ningo liko mundungei teringi. Aku teringi kinye iye taloni linonga tapu iyema kinye iye aposelemani kinye kanopambili ningili

<sup>34</sup> nalo altopa Sailas ya i kombuna molambo konopu lerimu.

<sup>35</sup> Pol kinye Barnabas talo Antiok kombu moloringili. Elo kinye we imbo awini kinye Gotenga ungu tukumemu ningo tikolo Awilimuni eno teao nimu mele imboma mane tiringili.

### *Pol kinye Barnabas talo karaye teko lupe lupe puringili*

<sup>36</sup> Wali mare ombo purumu kinye altopa Poloni Barnabasindo nimbei, "Kombu taun pulumunga tukundo Awilimunga ungu tukumemu nimbo tirimbulu kano. Kinye altopala aku kombu taunomanga iltonga ungu pilko ltingi imbo kanoma manda moromelenje kanolipo pambilili," nimu.

<sup>37</sup> Aku wali Barnabasini Jon Mak elo kinye waye lipe membai terimu kala.

<sup>38</sup> Nalo Jon Makoni elo Pamfilia kombu akuna oi mundupe tiye kolorumu. Elo kinye kongonomunga tepa pora naa tirimu. Imunga Poloni yu liko meko puwinga ulu yure konopu naa lerimu.

<sup>39</sup> Aku ulumunga Pol kinye Barnabas taloni ungu mele nale enge nili te tekolio lupe lupe puringili. Barnabas kano Jon Mak lipe meli no sip liko Saiprus kombundo puringili.

<sup>40</sup> Nalo Poloni Sailas kanopa lipelie pambilili nimu. Aku wali Antiok kombu moloringi Gotenga imbomani Goteni elo nokopa kondopili ningi wali elo puringili.

<sup>41</sup> Aku kinye Pol kano Siria kinye Silisia kombu talonga anjikondo pumbe Jisasinga imbo moloringima tepa enge tilipe purumu.

## 16

### *Timoti kano Pol kinye Sailas talo kinye waye purumu*

<sup>1</sup> Pol kano Derbe kombu taun lipe yakondo mundupe Listra kombu taun wendo orumu. Aku wali lombili andoli iye te imbi Timoti, aku iyemu akuna molorumu. Timotinga anumu Juda ambomu. Yu Gotenga ungu pilipe lombilipe molorumu ambomu. Lapa Grik kombu iyemu.

<sup>2</sup> Gotenga ungu pilko Listra kinye Aikoniam kombu taun moloringi imbonmani Timoti wale pakoko ungu pengama nindiringi.

<sup>3</sup> Poloni Timoti yu kinye waye opili konopu lerimu. Nalo Juda imbo pali aku kombuna moloringimani Timotinga lapa iye Grikimu ningko liko manjiringi. I ungu pulumunga Poloni Juda imboma tepa olo penga timbei, Timotinga kangi pundi kopipe ltenderimu.

<sup>4</sup> Pol kinye waye andoringili kano iye pokokinye kombu taunomanga tengatenga ningko oi wele Jerusalem kombukongono tipe munduli iyema kinyetapu iyemani imbomani lombilengei pipiatoringi kano unguma ningko tilko andoringi.

<sup>5</sup> Aku ungu pilkolio Gotenga imbomani konopu talo naa leli Jisas ipuki paa tiringi. Aku teko enge ningko moloringi walimanga imbo koinjoma waliwali tukundo oringi.

*Goteni mongo indi kumbuna Pol Esia kombu pupili nimbe lipe mundurumu*

<sup>6</sup> Aku wali Mini Kake Telimuni ungu tukumemu Esia kombu awilina tukundonaa ningko tengeni nimumunga Pol kinyewaye andoringili kano iyema Frigia kinye Galesia kombu awilimanga anjikondopuringi.

<sup>7</sup> Iye kanoma Misia kombu awili owena nondoko ongolio kinye Bitinia kombu awili tukundo pungei teringi. Nalo Jisasinga Mini Kake Telimuni kombuna tukundo naapangei ungu kau nimu.

<sup>8</sup> Imunga Misia kombu anjikondopungo Troas kombu taunona puringi.

<sup>9</sup> Troas moloringi wali ipu leli Pol kano mongo indi kumbu te terimu. Aku mongo indi kumbuna tukundo Masedonia kombu awili iye te yu molorumuna orumu. Iyemani angilipelie yundo konge tepa i tepanimu, "Nu Masedonia kombu ongolio lino tapowi," nimu.

<sup>10</sup> Altopa Pol kano mongo indi kumbutepa pora tipe makilipelie lino kanorumumele nimbe tirimu. Nimu ungumu pilipolio linoni Goteni lino alako topalie imbo akumando temane pengamu ningko tipengetimulonipo manjirimulu. Lino kano Masedonia kombu pumilindo ipopa tepo ulumaumbi tirimulu.

*Lidia nimbe ambo te konopu topele torumu*

<sup>11</sup> Lino kano Troas kombu taun tiyekolopo no sip lipolio toya topa mai kopunge Samotres purumulu. Otilikondo kano Neapolis nimbe kombu taun tengateno sippurumulu.

<sup>12</sup> Aku kombuna sip kano tiye kolopolio kimbo kongono tepo Filipai kombu purumulu. Aku kombumu Masedonia kombutukundo kombu siti kiyendomu. Kombu akumu Rom imbomani eno liko moloringi. Aku kombuna lino wali mare molorumulu.

<sup>13</sup> Juda imbomani Gote popo toringi Sabat wendo orumu wali kombu siti pape kere puluna tawendo pumbolio no ombarupuli kulendona wendo purumulu. Akuna lino kombu imbomani Gote konge teremele kombu penga te kanopo ltendemolo konopu lerimulu. Aku wali ambo mare akuna oi nombeaya teko moloringi lemo. Aku wali lino kano ambo akuma kinye Jisasinga ungu nimbo timili mainye molorumulu.

<sup>14</sup> Aku wali neya akuna Taiataira nimbe kombu siti tenga Lidia nimbe ambo lupe te molorumulu. Aku ambomu yunge kou kongonomo lemo wale pakoli kungukami topakandolima maket terimu. Aku ambomu yuni Gote popo torumu. Awilimuni ambo akumu Poloni nimu unguma pilipili nimu.

<sup>15</sup> Kano wali yu kinye yunge ulkenamoloringi imboma pali no ltingi. Kano kinye ambo Lidia yunge ulkena lino waionimbile i tepanimu, "Enoni na paimbo Awilimunga ungu pilipe lombileliimborekonopu lenge lemo nanga ulkena ongo molaio," nimu. Aku tepalie lino yu kinyemolamili kau nimu kani lino ee nimulu.

*Pol kinye Sailas talo Filipai kombutaunona ambolko liko ka ulke panjiringi*

<sup>16</sup> Walite lino kano Gote konge temili kombundo purumulu kinyekongonokendemande ambo wenepo teni lino kane kane torumu. Aku balomu keri kuro tukumolorumuna terimu. Akumuni tope tirimu wali yuni ulu altopa tembaloma kanopanimbile yu nokoringi imbomanga kou pulumu ltindirimu.

<sup>17</sup> Aku balomu yuni Pol kinyelino lombilipelie ungu ola are lakopa nimbelienimbe, "Iye ima lemo Gote paa olandopa iyemunga kongono iyema! Aku iyemani eno Goteni imboma tepa koinjolimbelo meleunguma ningko tirimele," nimu.

<sup>18</sup> Waliwalimaakuungumukau nimu. Aku nimu ungumuni Pol tepe konopu umbuni tirimu. Imunga topele topakanopaliekiri kuromundo nimbe, "Jisas Kraistinguengemunga nani nu balomunga wendoongo puwi nio," nimu. Kano tepe nimuwali, walitikalekerikurokanomunibalo tiyekolopawendoomba purumu.

<sup>19</sup> Balomupulu ningikanoimbomani neyaulukanokolio i teko liko manjiringi: Kinyelino yuni oi temokano ulu naatembalomunga lino kou manda naalimolelepamo ningolio Pol kinye Sailas talo ambolko likokundukomelikombusiti nokoli iyema kotpilokoloringipenana wendopuringi.

<sup>20</sup> Kano tekolio Pol kinye Sailas talo Rom gavman nokoli iyema moloringinameko ongolio ningei, "Iye italoakuJuda iye taloninlongakombusitinaopa makinjirimbele.

<sup>21</sup> Iye i taloni lino kinye manda naa telu ungu mare mane tirimbele. Lino Rom imboma nalo elonga lapali kolepalenga uluma paa teangei nimbele. Lino aku teko tele-malanje Rom gavman lino kot tendelka,” ningi.

<sup>22</sup> Kano kinye imbo penana we angleringi kanoma ongo liko popo tipungolio Pol Sailas talo tonguei ungu ningi. Kano kinye Rom gavman kot pimelemani Pol kinye Sailas talonga wale pakolima ora toko ltendekolio ka mapuni altokola altokola mapu tangei ningi.

<sup>23</sup> Aku ulu tekolio Pol kinye Sailas talo ele iyemani ka ulkena toko tuku munduringi. Ka ulke nokorumu iyemundo wamongo nokondoko tapu tewi ningi.

<sup>24</sup> Kano iyemuni aku ungu pilipelie paa ka ulke kiripi tukundona pumbe panjirimu. Elonga kimbo talo unjo kolomongo tiriye-manga tuku mundengili nimbelie lok topa ingi tirimu.

<sup>25</sup> Aku wali ipu leli amburume tuku Pol kinye Sailas talo Gotendo konge tekolo kunana ningi moloringili. Kano ningili unguma we kano ka imboma pilko moloringi.

<sup>26</sup> Kano kinye mini ltendepa parambala awili kangore terimu. Parambala kanomu paa enge lakopa nimu ulumuni ka ulke ambolorumu ponga kinye timuma lokelake terimu. Kano wali ka ulke kiripi nangape kanoma pali lokelake teko nangape toko leko purungi. Aku wali ka ulkena tuku moloringi imbomanga ka sen moko toringi kanoma yunu ombo wendo wendo purumu kinye imboma mini lteko we molo-liko purungi.

<sup>27</sup> Kano kinye ka imboma nokorumu kano iyemu makilipelie ka ulke kiripi nangape kanoma nambu topa lelipa purumuna kanopalie yuni ka imbo kanoma oi kowa punge lepamo konopu lerimu. Aku wali yuni yunge loi geleamu lipelie yu yunu topa kondombai terimu.

<sup>28</sup> Nalo aku ulu tembai terimu kinye Poloni ru nimbelie nimbei, “Lino pali we moromolo kani nu nunu toko naa kondowi,” nimu.

<sup>29</sup> Kano kinye ka ulke nokorumu iyemuni imbo tendo tipe mendeko owi nimu. Aku lipelie tukundo lkipe pumbelie pipili kolopa pungu pungu nilipe Pol kinye Sailas talonga kumbekerena yu topa mundurumu.

<sup>30</sup> Kano tepalie Pol kinye Sailas talo tukundo kiripimunga mepa tawendo ombalie nimbei, “Iye talo, na ulu ambelemu tembo wali Goteni na tepa koinjo limbe-loya?” nimu.

<sup>31</sup> Aku iye taloni ningili, “Nu iye awili Jisasinga temanemu paimbo ltemo ninio lemo Goteni nu tepa koinjo limbelo. Nu

kinye nunge ulkena moromele imboma aku ulu teaio,” ningili.

<sup>32</sup> Aku teko ningolio Pol kinye Sailas taloni Awili Jisasinga temane pengamu ka ulke nokoli iyemu kinye yunge ulkena moloringi imboma palindo ningi tiringili.

<sup>33</sup> Paimbo amburume tuku moloringi nalo ka ulke nokorumu iyemuni Pol kinye Sailas talo mepa pumbe elo ka mapu toringi kolo urumanga kulumie tondorumu. Kano wali yu kinye yunge imboma waye no ltingi.

<sup>34</sup> Aku wali pele ka ulke nokorumu kano iyemuni Pol kinye Sailas talo yunge ulke mepa pumbe kere langi nangili tirimu. Jisasinga ungumu pilko likolio ka ulke nokorumu iyemu kinye yunge lapumu kinye tono lakoko koloringi.

<sup>35</sup> Otilikondo otili oi Rom gavman kot pimelemani enonga ele iye marendo kano iye talo we wendo pangili liko munduwi ningi ungu ningi munduko ka ulke nokoru-mu iyemundo aku teko ningi.

<sup>36</sup> Kano wali ka ulke nokorumu iyemuni Polondo nimbei, “Kot pimelemani elo we liko munduwi ningi ungu te aku teko ningi mundunge kani elo konopu ame topa lepili palio,” nimu.

<sup>37</sup> Nalo Poloni ele iyemando nimbei, “Ilto Rom kombu mai pulu iye talomu imbo-manga kumbekerena ka mapu toko ka ulke panjingie kanomu eno alowa teringi. Kinye kelko ilto kano lopeke tepo pambilii ningolio ningeyea? Enoni ulu keri paimbo ten-gelenje ningi oi kot kape naa tendenge kanomu. Ilto aku tepo naa pumbolo. Aku iyema enonganongolio ilto liko wendo mundueio,” nimu.

<sup>38</sup> Ele iye kanoma pungolio Rom gav-man kot pimele kanomando Poloni nimu ungu pungo ningi tiringi. Kano kinye iye kanomani Pol kinye Sailas talo Rom kombu mai pulu iye talo ka mapu toringi lemo pilkolio wali eno pipili koloringi.

<sup>39</sup> Imunga kano iyema ongolio Pol Sailas talondo teringi ulumando ongo kondo kolkolio Pol Sailas talo ka ulkena wendo likolio meli pungo kombu sitimu tiye kolko wendo palio ningi waltindiringi.

<sup>40</sup> Kano kinye ka ulkena wendo ongo-lio Lidia nimbe kano ambomunga ulkena altoko purungi. Akuna Jisasinga ungu pilko lombilkio moloringi imbo mare kinye nombeya tekolio imbo akuma ningi enge tiringili. Aku tekolio elo kano Filipai kombu tiye koloringili.

## 17

*Pol kinye Sailas talo Tesalonaika kombu taun pungo moloringili*

<sup>1</sup> Pol kinye Sailas talo Amfipolis kombu taun kinye Apolonia kombu taun anjikondo

pungolio Tesalonaika kombu taun wendo puringili. Aku kombu sitina Juda imbonanga nombeya ulke te angilerimu.

<sup>2</sup> Pol kano yunge oi teremo mele nombeya ulke kanona tuku purumu. Aku wali Juda imbonani Gote popo toromele wali yupoko akuna Poloni Gotenga oi toringi bukuna peremo ungumu wendo lipa anjipe

<sup>3</sup> Kraist aku iyemu Goteni paimbo umbuni mepa kamukumu kolopalie kelepa koinjo pumbe makilipe molopili nimu ungu pulumu paa wamongo pilko ee nengei nimbe tipelie mane tirimu. Yuni nimbei, "I Jisas eno nimbo tiro aku iyemu lemo, yu Gotenga kanopa ltimu iye Kraist," nimu.

<sup>4</sup> Aku tepa nimu wali Juda imbo marenai Polonga nimu ungumu pilkolio ongo Pol kinye Sailas talo kopu teringi. Grik imbo awini paimbo Gotenga popo tondoko teringi aku imboma kinye enonga ambo awili muli muli awini elo kinye ongo kopu teringi.

<sup>5</sup> Nalo Juda imbonareni Pol kinye konopu keri leringi. Aku tekolio penana we angileringu iye keri mare likolio manga pupu te wamokolio opa makinjiringi. Aku ulu teliko Pol Sailas talo koroliko Jeson nimbe iye tenga ulte lkiko puringi. Aku Juda iyemani Pol kinye Sailas talo imboma anglerindo meko wendo ongei teringi.

<sup>6</sup> Nalo iye talo naa kanoko ltenderingi. Imunga Jeson kinye Jisasinga ungumu pilko lombileringi imbo mare kunduko meli kombu siti nokorangi iyema moloringina meko puringi. Aku ulu teringi imbonani ru ningolio ningei, "Kombu palinga tukundo ulu mongo mongo kondoliko andokolio iye talo ya i kombuna kape oringili.

<sup>7</sup> Jesoni aku iye talo yunge ulkena noipe peremo. Imbo akumani palini linonga iye kamako Sisarani teaio nimu unguma naa tekolio, Jisas ningko king iye te lupe moromo nimele," ningi.

<sup>8</sup> Imbo angileringima kinye kombu siti nokorangi iyemani aku ningi unguma pilkolio eno paa mini lteringi.

<sup>9</sup> Kano wali Jeson kinye iye liko meko oringima kinye iye kanoma kot pame teko eno paio ningi.

#### *Pol kinye Sailas talo Beria nimbe kombu siti tenga puringi*

<sup>10</sup> Ipu lerimu wali Kraistingu imbonani Pol kinye Sailas talo liko Beria kombu lopeke teko munduringi. Akuna wendo ongolio Pol kinye Sailas talo Juda imbonanga nombeya ulkena tuku puringili.

<sup>11</sup> Beria imboma, eno Pol kinye Sailas taloni ningili unguma pilingi konopu mondoringi. Aku kombu moloringi Juda imbonani waliwalimanga aku ningili unguma paimbonje ningi kanoko

ltendengei Gotenga ungumu kambu tiltiko koroko kanoko mane liko, imbo pengama moloringi. Nalo Tesalonaika imbonani aku ulu naa teringi.

<sup>12</sup> Beria kombu moloringi Juda imbo awini Jisasinga ungumu pilko lombileringi. Grik imbo awini, ambo muli mulima kinye iyema kinye Jisasinga ungumu pilko lombileringi kala.

<sup>13</sup> Nalo Tesalonaika moloringi Juda imbo kanomani Pol kano Beria kombu Gotenga ungumu nimbe tirimo ningina pileringi wali eno kape akuna ongolio Beria kombu imbo we angileringu teko mumindili kondoko Pol kinye Sailas tonguei ningi opa pulu polko makinjingei teringi.

<sup>14</sup> Imunga Kraistingu imbonani Pol kano walitikale liko nomu kuta kulendo kombundo munduringi. Nalo Sailas kinye Timoti talo Beria kombu we moloringili.

<sup>15</sup> Pol ltingi kano iyema yu kinye waye Atens kombu siti puringi. Kelko aku iyemani Sailas kinye Timoti talo moloringilina ungu te Poloni nimbe mundurumuna meko yando oringi. Aku nimbe mundurumu ungumu i tepa, "Na morona welea walio," nimu.

#### *Poloni Atens kombu imboma ungu nimbe tirimu*

<sup>16</sup> Pol kano Atens kombu Sailas kinye Timoti talo orombelenje nimbe nokopa molorumu. Atens kombu sitina tukundo kolo toli gote mele imbo kini wamoli mele pulumu tengepeya terimuna kanopalie umbuni kolorumu.

<sup>17</sup> Aku wali nombeya ulkena yuni paimbo Gotenga popo tondoli Grik imboma kinye aku Juda imboma kinye ungu alowa tepa ungu nimu. Yuni waliwalima nombeya teli kombuna purumu wali, imbo ongo moloringima kinye ungu nendo yando ningila.

<sup>18</sup> Paimbo ulumu koroli manga pupu taloni Pol yu kinye ungu mele nale teringi. Aku manga pupu tengi imbi Epikurian. Manga pupu tengi imbi Stoik. Aku manga pupumungga iye mareni ningei, "Iye ungu lalo nili iyere ltemo. Yuni ambele ungumu nimbei nimonje," ningi. Nalo Poloni Jisas kolopalie makilerimu ungu temane pengamu nimbe tirimuna pilkolio iye mareni ningei, "Yuni gote lupe marenga ungu nindili nome teremo," ningi.

<sup>19</sup> Kano kinye Pol kano kaunsil mele manga pupu te nombeya teko moloringina meko puringi. Aku manga pupumungga imbi Areopagus. Aku manga pupumungga ningei, "Nunge mane ungu koinjomu imboma ningi tilko andorono mele aku ungumu pilemili wamongo ningi tiwi.

<sup>20</sup> Nuni koinjo unguma meko oniomu lino pilipo tundurumolo. Ya i ungu koinjomu lino paa pilemili niwi,” ningi.

<sup>21</sup> (Atens kombu mai pulu imboma kinye akuna moloringi imbo lupema palini ungu koinjo wendo oromoma pilemili ningi kau molkolio ungu kanoma nendo yando ningi. Aku ulumu paa konopu mondondingi.)

<sup>22</sup> Kano wali Pol kano Areopagus ningi kaunsil nombeya teko moloringi kano iye-manga kumbekerena ola angilipelie nimbei, “Eno Atens kombu imboma, nani eno kolo toli gote popo toromele ulu palimanga wale pakoko pipili koromelena kando.

<sup>23</sup> Na enonga kombu sitina anjikondo pumbolio enonga popo tondoromele melema kanopolio wali neya aku lipo manjindu. Aku andopolio wali nani alta polo te kape kanondu wali ungu ima toko mondondingi lemo ‘gotere lino naa lipo manjirimolo nalo yundo we popo tondoromolo’ ningi toko panjiringi. Nani niope aku Gotendo nio.

<sup>24</sup> Aku Gote yuni mai kombu undukana tepea, akuna tukundo ltemo melema kape pali tepea panjirimu. Yu mulu mai talonga lye Awilimu. Yu ulke tempel wengendeli imboni takoromelemanga naa moromo.

<sup>25</sup> Aku Gote, imboma koinjo mololiko kere popo toromelemanga mele lupe lupema palinga Gote yu kau. Yu melte naa ponjirimo, ambe temona imbomani yu tapangei nimele.

<sup>26</sup> Goteni kaue iye te kalopa lipili nimbelie imbo palima terimu. Aku tepalie imboma kombumanga pali molangei nimbelie, yu yunu imbomanga waima nimbe panjipe imbo talape lupe lupe molonge maima owe torumu.

<sup>27</sup> Goteni imbo palini yu koroko kanoko Itendangei nimbe aku ulu terimu. Nalo yu lino te te kinye tule tepea naa moromo.

<sup>28</sup> Lipe manjili iye te oi i tepea nimu: ‘Yu moromomunga lino aulke andopo koinjo moromolo. Yupe linonga Gote,’ nimu. Aku tepea enonga kunana nimele iye maren ioi i teko ningi, ‘Lino Gotenga bakuluma,’ ningi.

<sup>29</sup> Lino Gotenga bakuluma moromelena yu imbomani kini wamoli mele te aku konopu paa naa leao. Yu pe kou gol mele kape molo. Kou silva mele kape molo. Imbo kou wamoli mele kape paa molo.

<sup>30</sup> Paa koro oi imbomani Gote naa liko manjiringi. Paimbo Goteni eno teringi uluma kanorumu nalo ungure apipi naa nimu. Nalo kinye Goteni imbo palindo nimbei, eno konopu topele taio nimu.

<sup>31</sup> Aku ambe telka, Goteni imboma pali kot tendembai wai te panjirimu. Goteni aku ulu tembalu iyemu koro oi kanopa lipe kot toya toli tendepili nimu. Iye akumu ono kombuna topa makinjirimu aku ulumuni

imbo palindo neya aku ulumu Goteni iye kanomu kanopa ltimu paimbo nimbe lipe ondorumu,” nimu.

<sup>32</sup> Imbo kanomani Jisas ono kombuna topa makinjirimu nimu ungu pilkolio wali imbo maren iko toromo ningi ungu taka tondoringi. Aku teringi nalo maren iinge, “Lino nunge nino ungu wambo pilemili al-toko walite niwi,” ningi.

<sup>33</sup> Aku ningi kinye Pol kano imbo akuma tiye kolopa yu purumu.

<sup>34</sup> Nalo imbo maren iko yuni nimu ungumu pilkolio wali paimbo nimo ningi yu kinye kopu teringi. Unku pilko lombileringi imbomanga iye tengi imbi Dionisius, aku iyemu yu Areopagus kaunsilimu tukundo molorumu. Unku pilerimu ambo tengi imbi Damaris. We imbo mare kape Polonga ungu pilkolio yu kinye kopu teringi.

## 18

*Poloni Korin imboma ungu nimbe tirimu*

<sup>1</sup> I kano ulumu pora nimu wali pele Pol kano Atens kombu tiye kolopa Korin kombundo purumu.

<sup>2</sup> Aku kombuna Juda iye kanopa ltenderimu, aku iyemunga imbi Akwila. Yu Pontus kombu meringi. Yunge omenu Prisila. Oi Itali kombu molkolio, nalo Rom gavman nokorumu iye awili Klodiusini Rom kombu moloringi imbo Judama tiye kolko konoko paio nimuna elo konoko oringili. Pol kano aku imbo talo kanombai purumu.

<sup>3</sup> Pol kano imbo aku talo kinye molopalie wali eloni yunge oi mulu 3 ulke kunu wamopa terimu kongono tendekumu teringilina kanopalie imbo aku talo kinye kongono terimu.

<sup>4</sup> Juda imbomani Gote popo toromele walimanga yuni waliwali Juda imbomanga nombeya ulkena pumbe imboma kinye nendo yando ungu tomboloringi kau. Aku wali yuni Juda imboma kape Grik imboma kape wayema Jisas ipuki tiengei nimbe tepea konopu topele tondoro kiye terimu.

<sup>5</sup> Sailas kinye Timoti talo Masedonia kombu molko tiye kolkolio ongo Pol kinye kopu teko Korin kombu moloringi wali Poloni ki kongono kelepalie Juda imboma Jisas Goteni imbi topa kanopa ltimu iye Kraist moromo nimbe tirimu kau.

<sup>6</sup> Nalo Juda imbomani Pol yunge nimu ungu manemu pilko naa likolio ungu taka tondoringi. Aku teringimunga Poloni manda lepa yunge wale pakoli ambolopa tanda tanda tipelie wendo molangei nimbelie terimu. Aku tepalie yuni imbo kanomando nimbei, “Nani eno Gotenga ungu tukumemu nimbo tindu nalo eno naa pilimili nimele. Akumunga Goteni eno

altopa tomo lemo enonga tengen. Kinye nani imbo lupemando nimbo tipumboi," nimu.

<sup>7</sup> Pol kano nombeya ulkemu tiye kolopa Taitus Jastus nimbe iye tengen ulkena tuku purumu. Aku ulkemu nombeya ulkena nondopa angilerimu. Aku iyemuni paimbo Gotenga imbi ambolorumu.

<sup>8</sup> Nombeya ulke kanomunga nokorumu iye Krispus kinye yunge ulkena waye peringi imboma aku Iye Awili Jisas Gotenga kanopa lili iye Kraist moromo ning Polonga ungumu pilko lombileringi. Korin kombu moloringi imbo mare awini kape Polonga ungumu paimbo Itemo ning pilkolio ipuki tiko no ltingi.

<sup>9</sup> Ipu leli Pol kano mongo indi kumbu terimu. Aku mongo indi kumbuna Awilimuni yundo nimbei, "Nu pipili naa kolowi. Imboma kinye ungu we ningono, nanga ungumu ningti.

<sup>10</sup> Na nu kinye moromunga imbo teni nu manda naa tonge. I kombu molani aku ambe telka nani tepo limboi tero imbo awini kombu sitina moromele," nimu

<sup>11</sup> Poloni Gotenga ungumu imboma ungu mane tipe molopili poinye te kinye oli kite talo pakera ombo purumu.

*Pol kano Galionga kumbekerena meko pungo kot tenderingi nalo Gotenga nimu kano ungumu paimbo kere merimu*

<sup>12</sup> Grik nimbe kombu akumunga gavmenga Galio nimbe iye kiyendo molorumu wali Juda iyemani wai tokolio Pol kano ambolko liko kotena meko puringi.

<sup>13</sup> Aku tekolio ningei, "Iye imuni imboma lino Juda imbomanga Gote popo toromolo mele naa nimbe tili nalo yuni tetepa nimbe timo," ningi.

<sup>14</sup> Poloni ungu mare nimbei terimu nalo Galio yuni Juda imbomando ungu mare nimbei, "Enoni yu ulu keri mare terimu nilimalanje nani enonga nilimala ungumu manda pilka.

<sup>15</sup> Nalo enoni nimele aku ulumape ungu mongoma kinye imbo imbamanga ungu waltindirimele. Aku ungumu enonga ungu manemunga ungu mele naelemu meko oromele. Imunga aku ulu mongomu enono lapiko ningi amenge teao. Na iye kot pilipo iyemu naa molombo," nimu.

<sup>16</sup> Kano tepa nimbelie imbo kanoma kot kombumu Galioni makoropa wendo mundurumu.

<sup>17</sup> Kano terimu kinye we Grik angileringimani Juda nombeya ulkemu nokorumu iye nomi Sostenes nimbe Juda iye te ambolko ltingi. Aku kano iyemu Galionga kumbekere kot kombuna koipe toko mapu toringi. Nalo aku teringi ulumu Galioni enonga tengen konopu lerimu.

*Pol kano Antiok kombundo yando orumu*

<sup>18</sup> Pol kano Kraistinga Korin kombu moloringi imboma kinye wali awini molorumu. Kelepa Siria pumboi nimbe imbo kanoma tiye kolopalie Senkria taun nomu kulendona purumu. Akuna Pol kano yunge pinyendi pororumu. Aku terimu ulumuni Gote kinye enge nimbe mi lerimu ulumu imboma lipe ondorumu. Kano pora tirimu wali Prisila kinye Akwila talo yu kinye waye pungo no sip liko Siria nimbe kombu pungei puringi.

<sup>19-21</sup> Aku teko pungolio Efesus taun wendo puringi. Pol yu kano akuna molopalie wali Juda imbomanga nombeya ulkemunga tuku pumbelie Juda imboma kinye Kraistinga ungumu nimu. Imbo akumani yu eno kinye ina molamili ningi nalo Poloni molo nimu. Pol kano aku imboma tiye kolopa pumbei wali nimbei, "Goteni puwi konopu lemo lemo aku eno moromelena altope ombo," nimu. I tepe nimbelie kinye yu kano Prisila kinye Akwila talo Efesus molangili tiye kolopa no sip lipe yu purumu.

<sup>22</sup> Pol kano Sisaria kombu wendo pumbelie Kraistinga imbo Jerusalem moloringima kano pumbe ponenge ltendeli unguma nimu. Aku unguma nimbelie altopa Pol kano Antiok kombu purumu.

<sup>23</sup> Aku kombuna Jisasinga imboma kinye wali awini molopalie kelepa kano kombu tiye kolopa Galesia kinye Frigia nimbe kombu awili talonga anjikondo purumu. Yuni anjikondo purumu kombu aku talonga tuku lerimu kombu taunomanga ipuki tiko moloringi imboma kanopumboi nimbe enge tilipe purumu.

*Apolos nimbe iye te Efesus kinye Korin kombu talonga ungu nimbe tirimu*

<sup>24</sup> Pol aku tepa andorumu kinye Juda iye te imbi Apolos, yu Efesus kombu orumu. Yu kombu siti awili Aleksandria akuna meringi. Yu skul tepa Gotenga oi bukuna toko panjiringi ungumanga iye turu tolimu.

<sup>25</sup> Yu Awilimunga ungu temanemu ningi tiko mane tiringina pilerimu iyemu. Yu Jisasinga temane pilerimu mele imbomando paa nimbo timboi konopu tondolomu lepalie nimu. Nalo kokele pilipelite yu imbo no ltindili Jononi no ltindirimu mele kau no ltimu.

<sup>26</sup> Apolos nimbe yu iyemuni Juda imbomanga nombeya ulkena yu pipili naa kolopa ungu enge nimbe pulu polopa nimu unguma Akwila Prisila taloni pileringili. Aku wali yu liko meko elonga ulkendo pungolio Gotenga uluma yu wamba pilipili ningi tapoko imbo tondoringili.

<sup>27</sup> Aku wali Apolos kano Grik kombu pumbesi terimu kinye Jisasinga lombili andoli imbomani yu taporingi. Pumbesi terimu kombu akuna Jisas ipuki tiko moloringimando pipia toko tikolio ningei, "Iye imu panjiko lieio," ningi. Aku imboma Jisasinga unguma pilko lombilklo ipuki tiringi. Aku teringi ulumu Gotenga imbo we kondo kololi ulumuni kau teringi. Apolos yuni aku kombu wendo pumbelie wali Goteni kondo kolopa taporumuna Jisas ipuki tiringi imbo akuma paa lakopa taporumu.

<sup>28</sup> Imbo palinga kumbekerena Juda imbomanga ungumu nimbe maindo mundurumu. Oi toko panjiringi bukuna Gotenga ungumu wendo lipelie yuni Jisas Gotenga imbi topa kanopa ltamu iyemu moromo nimbe moro tondorumu.

## 19

*Pol Efesus kombu ungu nimbe tirimu*

<sup>1</sup> Apolos kano Korin kombu molorumu kinye Pol kano lama aulkena pumbesi Efesus kombu wendo orumu. Aku kombuna Gotenga ungu pilkolio kokele tukundo oringi imbo mare kanopa ltenderimu.

<sup>2</sup> Aku imbomando ungu waltindipe i tepa nimu, "Eno Gotenga ungumu oi pilko likolio wali Yunge Mini Kake Telimu lttingiya," nimu.

Aku wali imbo akumani ungu pundu toko ningei, "Eno paimbo Gotenga Mini Kake Teli nimbe ungure kape walite naa pimolo," nimu.

<sup>3</sup> Aku teko ningi wali Poloni ungu waltindipelie nimbei, "Eno no ambele pupumunga lttingiya?" nimu.

"Aya, Jononi imbo no ltindirimu mele aku tepo lino no ltimalu," ningi.

<sup>4</sup> Kano wali Poloni nimbei, "Jononi imbo no ltindirimumuni imboma konopu topele tokolio no liengei nimu. Nanga umbulkondo orumu iye konopu mondoko ipuki tieio nimu. Aku iyemu yu Jisas," Pol aku tepa nimu.

<sup>5</sup> I kano ungu pilkolio wali imbo kanoma Iye Awili Jisasinga imbina no lttingi.

<sup>6</sup> Poloni yunge ki kano imbomangga pala noiirimu kinye Gotenga Mini Kake Telimu kano imbomanga konopundo orumu. Kano terimu kinye imbo kanomani Gotenga nimbe munduli ungu para tiko imbo ungu lupe lupe oi naa pilelima pulu mondoko ningi.

<sup>7</sup> Iye ki yupoko mele akuna Mini Kake Teli likolio moloringi.

<sup>8</sup> Pol kano Juda imbomanga nombeya ulkena tuku pumbelie Gote iye kamako king molopa imboma pali nokopa tepa limbelo mele ungumu pipili naa kolopa enge nimbe, nimbe tirimu. Juda imboma paa

pilko paimbo nengei nimbe oli yupokonga tukundo aku tepa nimu.

<sup>9-10</sup> Nalo Juda imbo mare enonga oloma kou mele polopa nimu unguma pilko ipuki naa tiringi. Aku Juda imbomani Jisasinga imbomani Gote popo toromele ulu pulumanga ungu keri mare nindiringi. Imunga Pol kano imbo akuma tiye kolopa lombili andoli imboma lipe mepa Tiranusinga ungu ninggo skul teringi ulkena purumu. Akuna Pol kano poinye talonga tukundo imboma waliwalimanga ungu nimbe tirimu. Aku tepalie, yunge kongono terimumungu langi mongo merimumuaku Esia kombu tukundo moloringi Juda imbo kape Grik imbo kape palimani Awili Jisasinga termanemu pileringi.

*Skeva nimbe iye popo tondolirenga malopili keri kuro wangoli iyereni torumu*

<sup>11</sup> Goteni Pol lipe tapondoru mu kinye Gotenga enge ambolopalie Poloni ulu wen-gendel paa tiperipe mare terimu.

<sup>12</sup> Mare i tepa terimu. Pol kongono tembaido maminye panjirimuma imboma tirimu kinye liko meli pungo kuro torumu imboma lope tenderingi kinye enonga kuro torumuma pora nimbe enonga konopuna kuro keri moloringima ongo wendo purungi.

<sup>13-14</sup> Nalo Juda imbo maren i kape imbomanga keri kuroma manda makoroko ltenderemolo ningi andoringi. Skeva nimbe iye tengga malopili iye kite yupoko bakera aku ulu teliko andoringi. (Skeva nimbe aku iyemu yu Juda imbomanga iye popo tondoli kiyendomu molorumu.) Iye Awili Jisasinga imbina keri kuroma makoroko ltengeli manda manjiringi. Aku ulu tengeli teringi wali kuro kerimando ningi, "Poloni nimo aku tendeku Jisasinga imbina nani nundo nio, kuro keri nu wendo ongo pa!" ningi.

<sup>15</sup> Aku teko ningi wali kuro kerireni Juda iye akumando nimbei, "Na Jisas kinye Pol talo imbi pio nalo enope naimeleya?" nimu.

<sup>16</sup> Kano kinye keri kuro wangorumu kano iyemuni ne kano Juda imboma angileringina po nimbe nendo lepa iye kanopoko tombai terimu. Ne kano iyema lipe ongondopa yu paa enge lakopa nimu. Yuni iye kanopoko topa pu tondopa enonga wale pakolima ora tondopa ltenderimu. Aku terimu kinye ulkemunga wendo kowa lkiko yokoli pakoko eno purungi.

<sup>17</sup> Kano wali Efesus moromele Juda kape Grik kape aku imbomani i terimu ungumu palini pilkolio pipili koloringi. Aku tekolio iye Awili Jisas imbomani yu wale pakoko yunge imbimu ambolko olando mundunduringi.

<sup>18</sup> Jisasinga ungumu pilkolio ipuki tiringi imbo mare awini enonga ulu pulu keri teringima penana mona ningi para tiringi.

<sup>19</sup> Enonga imunana imbo mareni tomo ambolko ala toringi. Imbo akumani enonga ulu keri tiringi buk akuma meko ongo nombeya tekolio imbo palinga kumbekerena kaloringi. Aku tipena kaloringi buku-manga kou mone 50,000 mele puli bukuma kaloringi.

<sup>20</sup> Efesus kombu tukundo ulu wendo orumuma temane toko kombu malio andoringi kinye imbo awinimani pilkolio Jisas ipuki tiringi.

*Pol aulke ponenge te pumbei wai lipe panjirimu*

<sup>21</sup> Kano uluma pali oi tiringi kinye pele Pol kano Masedonia winjo pumbolio Akaia kombu mendo omiba altopa Jerusalem kombu yando pumbo konopu lerimu. Yuni nimbei, "Jerusalem kombu pumbolio altopo Rom kombu kape paa pumbo," nimu.

<sup>22</sup> Poloni yunge iye lipe tapondoli talo oi kumbe lepa Masedonia kombundo tipe mundurumu. Iye aku talonga imbi Timoti kinye Erastus talo. Yu yunu Esia kombu akuna tukundo wali pokore molorumu.

*Efesus kombuna mongo perimu*

<sup>23</sup> Nalo neya aku Efesus kombuna tukundo imbo awinini Jisas ipuki tiringina iye teni konopu keri panjipe opa maknjirimu.

<sup>24</sup> Aku bisnis iyemumunga imbimu Demitrius. Aku iyemu yu kou silvani Grik gote ambo Artemisinga popo tondoli ulkemu manda lepa kelo koloma wamoramu. Yunge iye mare kou silvani kongono teko wamoromelemando kongono pulumu tirimu kinye enoni kou pulumu ltingi.

<sup>25</sup> Akumunga Demitriusini iye akuma lipe nombeya tepe we kongono tendeku tiko tiringi iye mare lipe nombeya tepalie i tepe nimu, "Yane iyema lino kou pulumu ltimolo aulke akumu ne imu liko manjirimele.

<sup>26</sup> Nalo kinye Pol iye imuni teremo ulumu kanaio. Yuni imbo pulumu nimbe konopu ltendepa kundupe tukundo ltimo aku ulumu enoni kanoko pilko pora tirimele. Yuni aki ulumu Efesus kombu taunona kau tukundo naa teremo nalo Esia kombumunga pali tukundo ambolopa mandopa mele teremo. Aku iyemu yuni nimbei, Linoni kini wamopolio teremolo gote akuma gote tukume mare molo nimo.

<sup>27</sup> Polonga ungu akumuni lino kou mone kongono aulke akumu manda nimbe kenjindimbei oromo. Kelepa ulu te kape tembai oromo ulumu i tepe. Yunge ungumuni kau linonga awili ambo gote Artemisinga popo toromele ulkemu imbomanga konopuna mele yure none naa tendangei nimbei

oromo. Oipe Esia kombu imboni kape we mai kombuna moromele imbo palini ambo gote Artemis akumu popo toromele kano. Nalo Polonga ungumuni neya aku ambo Hibru imbimu tepe kenjindimbei wendo oromo," nimu.

<sup>28</sup> Iye kanomani aku ungumu pilkolio mu-mindili lakoko koloringi. Aku tekolio eno ru ningi ningi, "Lino Efesus imbomanga ambo gote Artemis yu paa awilimu momomo," ningi.

<sup>29</sup> Akumunga ru awilimu neya taunona wendo orumu. Aku wali imbomanga konopumu kolona naa lerimu. Imbo kanomani Gaius kinye Aristarkas talo ambolko liko kunduko meli imbo pali enonga nombeya teremele kombuna lkiko puringi. Iye aku kunduko meko puringiaku talo elo Masedonia kombu iye talo. Elo Pol kinye waye andoringili iye talo.

<sup>30</sup> Poloni imbomanga imunana ungu nimboi nimbe pumbei terimu nalo Kraistinga imbomani molo ningi.

<sup>31</sup> Aku wali Esia kombu tukundo gavman iye mare Pol yunge kanopa ltendeli iyema. Aku iyemani ungu ningi mundukolio ningi, "Nu nombeya kombu akuna paa tukundo naa puwi," ningi.

<sup>32</sup> Aku wali imbo mareni ru ningi ungu te ningi. Mareni aku tekola ungu te ningi. Aku kinye nombeya tiringi ulumu bilibala ningi. Imbo mare awinini eno nombeya kombuna ungu pulu ambelemuya oromolone konopu leringi.

<sup>33</sup> Kano wali Juda imbomani Aleksander nimbe iye te imbomanga kumbekerena liko ola anjiringi. Imbo mareni yu nipili ungu naa ningi tiringi. Aku Aleksanderen iunyu te nemboi nimbe ki ola mundupe ungu nimbei terimu.

<sup>34</sup> Nalo imbomani Aleksander Juda iyemu angilerimuna kanokolio imbo palini ungu tendekumula ru kimbo tiko ningi, "Efesus kombu, ambo gote Artemis yu awili," ningi angilengei ena mongo talo omiba purumu.

<sup>35</sup> Kano kinye kombu taunona tukundo ungu ningi panjiko teringima topa panjipe terimu iye kuskus kanomuni imbo kanoma takalik molaio nimbelie nimbei, "Efesus iyema, lino i kombunape awili ambo gote Artemisinga pinyewe ulkemu kape yu manda lepa kou mongo wengedeli muluna mainye orumumu kape nokoromolomu mai kombu imbo palini pilko liko manjirimele.

<sup>36</sup> Imbo teni aki teremolo ulumu kolo toromolo ungu manda naa ningi. Akumunga eno ungu naa ningi takalik molaio. Eno konopu liko mundukolio takalik molaio.

<sup>37</sup> Kinye enoni iye ima ina meko onge nalo aki iyemani ungu keri te linonga ambo

gotemu kinye opa pule toko naa ninge. Yunge pinyewe ulkena mele te kape wapu naa linge.

<sup>38</sup> Demitrius kinye yunge kongono iyemani iye tendo ungu te ningei lemo, manda kot tendenge. Kot ungu pilko moke teremele iyema moromele. Aku iyemani manda ungumu pilko ninge amenge tendenge. Ungu akuna manda angliko iye kanoma alowa teringi litemo ninge.

<sup>39</sup> Nalo enoni ungu mare lupe ninge lemope aku unguma imbo nombeya tekowai panjirimelle wali tengatenga meko wangeli kinye imbo kanomani aku ulu ninge amenge tengen.

<sup>40</sup> I ru ninge bili bala ninge opa mak-injinjei ulumu tekowai kenjirimele. Eno liko manjeio. Lino opa mak-injirimolomunga pulure molo litemo. Akumunga lino ambe telka tengaya ninge waltindinge lemope ungure manda naa nimolo. Rom gavman imbomanil pilkolio lino tongei konopu lteo, nimu.

<sup>41</sup> Kano tepa nimbeline imbomando enonga ulkendo lupe lupe paio nimu.

## 20

### *Masedonia kinye Grik kombu talonga Pol purumu*

<sup>1</sup> Ungu panjiringi kano ulumu pora nimu kinye Poloni Kristen imbo kanoma yu molorumuna waio nimu. Enonga konopuma tepa enge tipe ungu mare nimbe tirimu. Kelepa imbo kanoma molaio nimbeline yu Masedonia kombu awilina purumu.

<sup>2</sup> Aku kombu malio kimbo kongono tepa pumbelie Kristen imboma tepa enge timbei ungu pulumumare nimbe tirimu. Aku tepa pumbelie Grik kombu wendo purumu.

<sup>3</sup> Grik kombu awili akuna oli yupoko molorumu. Altopa no sip lipe Siria kombu pumbelie terimu wali Juda imbomanil yu toko kondongei lekolio wai toringi. Aku tengatenga unggumu pilipelie Pol yu Masedonia kombundo altopo anjo pambo konopu lerimu.

<sup>4</sup> Aku wali Pol yu kinye iye mare waye purungi. Aku iyemanga imbi i tepa: Beria kombu taunona iye Sopater, yunge lapa Pirus. Tesalonaika kombu taunona iye talo kape waye, elonga imbi Aristarkas kinye Sekundus talo. Derbe kombu taunona iye Gaius kinye Timoti talo, Tikikus kinye Trofimus talo, aku Esia kombu awili iye talo.

<sup>5</sup> Aku iyemana oi kumbe leko pungolio lino Troas kombu taunona akuna nokoko moloringi.

<sup>6</sup> Aku wali Juda imbomanga bret yis naa munduko we noromele wai awili akumu oi omiba purumu kinye pele lino kano no

sipina tuku pumbo Filipai kombu tiye kolorumulu. Kelepa kongono kite pakera tipe kinye iye kanoma moloringi kombu Troas wendo orumulu. Aku kombuna koro te molorumulu.

*Troas kombu akuna Yutikus nimbe iye wenepo te kolorumu kinye Poloni topa mak-injirimu*

<sup>7</sup> Koromunga kiyendo wali Kristen imboma kinye langi mongo nomili ombo nombeya terimulu. Kano wali Poloni imboma ungu nimbe tipe otilikondo yu bumbeimunga ungu tukume nemboi nimbe ipu leli amburume tuku purumu.

<sup>8</sup> Lino olando kiripina nombeya tepo molorumulu kinye akuna tipe lam pulumu nomba perimu.

<sup>9</sup> Aku wali iye wenepo tengatenga imbi Yutikus, yu windo kongondona molorumu. Pol ungu nimbe pumbe kau purumu kinye Yutikus yunge mongomu mepa andorumu. Paa uru perimu kinye wi kano pala ulke yupoko tiko kimbo tiko liko takoringi kanona molopalie topa anjikondo mundurumu. Imbo kanoma mainye pungo ltingi nalo yu oi kolopa ltimu lemo.

<sup>10</sup> Pol kano mainye pumbelie ungu lumunga pala pumbe tamalu pepalie yunge kimuni ungulumu ambolopalie imbomando nimbei, "Eno mini naa lteao. Ungulumu koinjo we moromo," nimu.

<sup>11</sup> Pol kano ola ulke kiripimunga ola pumbelie bret kano pike lepa norumu. Altopa Pol kano imboma kinye ungu nilipe pumbe molopili kau kombu tangorumu. Kombu tangorumu kinye Pol kano yu purumu.

<sup>12</sup> Jye wenepo kanomu koinjo molorumu kinye yu ulke meko purungi. Aku kinye enonga konopu penga lerimu.

*Pol kano Troas kombu taun tiye kolopa Miletus kombu purumu*

<sup>13</sup> Pol yuni ungu imu nimu, yu kimbo kongo te Asos kombundo ombo nimu. Aku tepa nimbeline yu oi purumu. Lino kano no sip lipolio Asos kombu wendo purumulu. Pol Asos kombu akuna kanopo lipo no sipina mepo pumili nokopo molorumulu.

<sup>14</sup> Aku wali Pol kano yuni lino kanopa itim kinye yu kano no sipina lipo meli Mitilin kombu wendo purumulu.

<sup>15</sup> Lino kano otilikondo no sipina pumbo Mitilin kombu tiye kolopolio pumbo pumbolio Kios kombu nondopo wendo orumulu. Aku tepo pumbo sipina molopolio otilikondo Efesus naa pumbolio no topo pule topo Samos kombu wendo orumulu. Kelepa aku walimunga otilikondo Miletus kombu wendo purumulu.

<sup>16</sup> Pol yu Efesus kombu tiye kolombo anjikondo pumbo nimbe konopuna kiliki oi ltenderimu. Aku ambe telka yu

Esia kombuna tuku wai pulumu topa naa kalopa welea pumbe yu Jerusalem kombu pentikos nimele nombeya tengena manda pumbonje nimbelie pumbei terimu.

*Poloni Efesus kombu Kristen tapu iye-mando opele nimu*

<sup>17</sup> Miletus kombu ombalie wali Efesus kombu Kraistingu imbo moloringimando tapu iyemando yu ongo kanaio nimbe ungu nimbe mundurumu.

<sup>18</sup> Yu molorumuna oringi wali yuni iye akumando nimbei, "Na oi kiyendo Esia kombu ombolio wali winjo ombo eno kinye waliwali molopo pepolio teru kano uluma enoni liko manjirimele.

<sup>19</sup> Aku wali pulumunga Juda imbomani na mindili liko tingei wai toko teringi akumunga na umbuni awini mepolio nalo Jisasini tirimu kongonomu we tepo angilipo imboma kondo kolopo kuru kandiki tepo kongono teru kano.

<sup>20</sup> Eno pipili kolopo ungu te lopeke tepo ambolopo naa nimboi aku tepo walite naa niu. Nalo eno Gote liko manjingei taporomo unguma pali penana kinye enonga ulke malionaaku ungu manemu tiru kau. Akumu eno liko manjirimele.

<sup>21</sup> Nani waliwali Juda kinye Grik imboldando ungu enge nimbo nimborio nimboi, eno Gote kinye konopu topele tokolio linonga Iye Awili Jisas ipuki tieio nio kano.

<sup>22</sup> Nalo kinye na Gotenga Mini Kake Telimuni nando nu pani nimbe meremonia ku ungu pilipo tengen type Jerusalem kombundo puro. Jerusalem kombu akuna na kinye ulu ambelemu wendo ombalonje aku na naa lipo mantiro.

<sup>23</sup> Kombu palimanga puro wali Mini Kake Telimuni nimbei, nu ka ulke peko ulu umbuni awini menio nimo. Aku enge nimbe nimo ungumu kau lipo mantiro.

<sup>24</sup> Nalo na molopo kondomboi mindili naa nombo, na naa kolombo nimbo kele topo ulu te manda naa tero. Iye Awili Jisasini nando yunge kolopa makilerimumungu Goteni imboma tepa limbelo unguma imboldando nipiwi nimbelie kongono tirimumupa a paora timboi. Aku konopumupe paa mandopo panjiro.

<sup>25</sup> Kinye eno pileio. Oi nani enonga imunana Goteni Jisas imbi topa king iye kamako molopa nimbe imboma nokopili nimu ungumu waye nimborio mane tipo andoru kano. Nalo kinye eno palini nanga kumbekeremu altoko naa kanonge aku lipo mantiro.

<sup>26</sup> Akumunga ungu te nemboi, Eno te altoko kolko kape tipe kombu punge lemope naa pulu naa panjinge.

<sup>27</sup> Nani i ungumu niomu ambe telka, Goteni eno pilengei konopu lerimu unguma enondo waye nimbo tiru kano.

<sup>28</sup> Goteni eno tirimu imboma kinye eno enonganowamongo kane kane molaio. Imbo akuma nokondangei nimbelie Mini Kake Telimuni eno kongono akumu tirimu. Gotenga moromele imbo akumanga eno paa kongi sip sip tapu iye mele molaio. Imbo akuma Awilimunu yunge mememuni polo tepta ltimu imbomanga.

<sup>29</sup> Nani eno tiye kolopo na pumbo wali iye mare owa takera melema enonga kongi sip sip kanoma toko bemboto tingei ongemunga lipo mantiro.

<sup>30</sup> Tendeku tipe mele iye mare enonga imunana wendo ongolio ungu paimbomu ungu kolo tukuruku panjiko ning andoko kenjing. Aku tekolio enonga umbulkondo lombili andoli imbo ongema ungu kolomu lombilengei ning meko wendo punge.

<sup>31</sup> Aku tengen kani eno i ungumu wamongo liko manjeio. Poinye yupokonga tukundo ipu leli tangoli takiraki walimanga tukundo eno kola yokoli telimu tepo ltepundela tepo wamongo kane kane molaio niu kano. Aku mele kinye kape wamongo kane kane molaio.

<sup>32</sup> Kinye Goteni eno nokopa kondopili. Yunge ungumuni Gote eno kinye kandiki teremo nimbe aku ungu tukumemu eno enge manda tirimu. Aku tepalie Goteni yunge imbo kake telimanga nindipe noindrimoma eno manda timbolo.

<sup>33</sup> Na eno kinye moloru kano wali imbo tenta kou kape wale pakoli pengare kape konopu naa mondoru kano.

<sup>34</sup> Na kinye na peya tapu topo andoromulu imboma kinye, lino mele molo lermuma nanga kitalon enge nimbo kongono tepo melema lipolio lipo tapondoru kano.

<sup>35</sup> Nani eno ulu palimanga teangei mele lipo ondoru kano. Nani kongono teru mele enoni aku teko tekolio imbo tambaringga tapangei nimborio teru kano. Jisasini oi nimu ungumu eno liko manjengei nimborio nani enondo niu kano. Aku ungumu yuni nimbei, 'Nuni melema nunge linio lemo aku Goteni nu taporomo nalo nunge melema imbo koropa nolima tinio lemo aku nu Goteni olandopa tapombalo,' nimumunga imboma tapamili nio," nimbelie nimu.

<sup>36</sup> Poloni i kano unguma nimbe pora tirimu kinye tapu iye kanoma yu kinye waye komongo toko pondoko tapa lekolio konge teringi.

<sup>37</sup> Pol yu ki likolio kangulko angilko kola enge ning teringi.

<sup>38</sup> Polonga nimu ungu kanoma pilkolio kondo koloringi. Poloni nimbei yu altoko kumbekere naa kanonge nimumunga tapu

iyemani paa kondo kolkolio kola teringi. Kano teko pora tikolio no sipina pupili ningko meko pungo tiye koloringi.

## 21

### *Pol Jerusalem kombu purumu*

<sup>1</sup> Lino palini imbo kanomando kondo kolopolio molaio nimbo opele nimbolio lino purumulu. Nomu kutana pumbolio toyu topo pumbo Kos nimbe nomu kutana tuku mai pundu kelo te lerimuna wendo purumulu. Kelepo otilikondo no sipina pumbo Kos tiye kolopolio Rodes nimbe kombu tengu wendo purumulu. Aku kombu tiye kolopolio anjikondo pumbo Patara kombu wendo purumulu.

<sup>2</sup> Aku kombuna wendo pumbolio Fonia kombu awili pumbei no sip te akuna lerimunu kanopo ltenderimulu. Lino kano akuna tuku pumbolio nomu kutana pumbo pumbolio purumulu.

<sup>3</sup> Lino kano Saiprus nimbe mai pundu te nomu kutana tuku lerimu aku kombumunga nondopo mele pumbolio anjikondo purumulu. Linoni kombu akumu pundu wendo orumuna kanorumulu nalo lino Siria kombundo no sipina purumulu. Linonga andorumulu sip kanomu mele kako mare Tair kombu akuna mainye Itembaimunga akuna wendo purumulu.

<sup>4</sup> Lino kano Tair kombu akuna Kristen imbo mare kanopo ltendepolio, wali kite yupoko pakeria imbo akuma kinye akuna molorumulu. Gotenga Mini Kake Telimu imbo akumanga konopundo molopalie tope tirimu wali imbo akumani Polondo enge ningko ninggi, "Nu Jerusalem kombundo naa puwi," ningi.

<sup>5</sup> Kombu akuna molomolo konopu lerimulu waimu pora nimu kinye kombu Tair tiye kolopolio no sip kano lerimuna kimbo kongono tepo purumulu. Aku wali Kraist lombili andoli iye pali kape enonga ambo bakulu kape peya kombu sitimunga meko wendo puringi. No kule ukia penana wendo pumbolio wali komongo topo pondopolio lino waye Gotendo konge terimulu.

<sup>6</sup> Aku ulu tepolio molaio nimbo opele nimbolio lino kano no sipina tuku purumulu. Kristen imbo kanoma kelko enonga ulkendo puringi.

<sup>7</sup> Nomu kutana pumbo pumbolio Tolemes kombu wendo orumulu. Aku kombuna Jisas ipuki tiko moloringi imboma panjipo lipo imbo akuma kinye wali tendekumu molorumulu.

<sup>8</sup> Tolemes kombu otilikondo tiye kolopolio Sisaria kombu sitina wendo purumulu. Akuna Filip nimbe iye tenga ulkena tuku pumbolio yu kinye molorumulu. Filip yu Gotenga ungu tukume imboma nimbe

tili kongonomu terimu. Oi Kristen imbonani Jerusalem kombu pulu polkolio wali iye kite yupoko pakeramani iye aposelema tapondangei ningko kanoko ltingi kano iyemanga te yu.

<sup>9</sup> Yunge lemenupili ambo wenepo iye naa puli kitema moloringi. Aku pokoni Gotenga nimbe munduli ungu pilkolio imbona ungu kanoma ningko para tiringi.

<sup>10</sup> Wali mare omba purumu kinye Gotenga iye profet yu Judia kombu tiye kolopa lino molorumuluna Sisaria kombundo orumu. Aku iyemunga imbi Agabus.

<sup>11</sup> Yu lino molorumuluna ombalie Ponganaka letamu ltimu. Aku kano kakomu lipelie yunge kimbo kima ka torumu. Aku ulu tepalie yuni i tepa nimu, Gotenga Mini Kake Telimuni nimbei, "I kako pulu iyemu Jerusalem kombu Juda imbo moromelemani yu liko ka tonge mele. Aku tekolio yu manga pupu lupemanga kindo tinge," nimu.

<sup>12</sup> Lino palini aku unguma pilerimulu. Aku pilipoliomunga lino waye andorummula kinye imbo akuna moloringima beyani Pol Jerusalem kombundo naa puwi nimbo enge nimbo walipo pilerimulu.

<sup>13</sup> Nalo aku tepo nimulu wali yuni linondo nimbei, "Enoni na ambe telka na teko kamele pungu pungu tikolio kola teremleya? Na Jerusalem kombuna aku teko ka tiengei nimbo tumbi tipo moro. Akumu kau molo. Nalo na Iye Awili Jisasinga imbi ambolopolio yunge temane tondopo nimbo tiromunga imbomania na toko kondongeipe na tumbi tipo moro," nimu.

<sup>14</sup> Linoni yu Jerusalem kombu pumbei terimu ulumu manda naa nimbo kenderimulu. Imunga yundo naa puwi nimulu ungu kelepolio nimili, "Awilimuni nu kinye wendo opili konopu lembalo ulumu aku wendo opili," nimulu.

<sup>15</sup> Wali pokore molopolio lino kano melema tumbi tipolio Jerusalem kombu pumili purumulu.

<sup>16</sup> Sisaria Kristen imbo mare lino kinye waye purumulu. Jerusalem kombu wendo purumulu wali aku imbomania lino kano Nason nimbe Saiprus iye tenga ulkena meko tuku puringi. Nason nimbe aku iyemu yu kiyendo Kristen imbo molorumu iyemu. Lino aku iyemu yu kinye molamili ningko yunge ulkena meko puringi.

### *Pol kano Jerusalem kombu molorumu*

<sup>17</sup> Akuna molopolio Jisas ipuki tiko moloringi imbomania lino kanoko tono kolko panjiko ltingi.

<sup>18</sup> Otilikondo Pol kano Jems kanobaimunga lino kinye waye purumulu. Aku

wali tapu iyema kape, pali akuna moloringi lemo.

<sup>19</sup> Aku imbo kanoma panjipe lipelie Goteni Pol yu kinye molopalie Juda imbomanga manga pupu lupemanga imunana terimu uluma pali Poloni nimbe tirimu.

<sup>20</sup> Irimu kano ungu pilkolio Gotenga imbi kapi ningi. Aku tekolio Polondo ningei, "Angoya, Juda imbo paa awinini Jisasinga temanemu pilko ipuki tiringi ltemoma nu liko manjirino. Nalo imbo akuman Mosesinga mane ungumu pilipo lombilimalanje aku paa penga konopu ltemele.

<sup>21</sup> I Juda imbomani ningi ungu mane tirinumunga ungu temanemu pileringi. Nuni nini lekolio Juda imboma manga pupu lupe imbomanga imunana molongeman oi Mosesinga mane ungumu tiye kolaio ning enonga bakuluma kangi pundi kopiko naa ltendeko Juda imbomanga ulu puluma naa lombileio ningi ninu ungu pilko keri konopu leringi.

<sup>22</sup> Akumunga lino ambe temoloya? Juda imbo kanomani nu ongo morono ungu pilinge kani

<sup>23</sup> nu teani ulu nimbo tiemili. Linonga iye kitema Gote kinye mi leringi.

<sup>24</sup> Iye aku pokolikmeko pungolio Gotenga ungumuni kulumie taio nimo mele eno waye pungo kulumie taio. Aku tekolio iye aku pokolikmeko pungolio Gotendo paa tereno ningolangikalongeima mele tingema nuni pame tendani kani iye kite kanomanga pinyendi porangei. Aku teko liko ondonio ulumu imbo pali kanongemani nunge temane pileringim ugu kolore konopu leangei. Nu Mosesinga mane ungumu pilko lombino ltemo konopu lenge.

<sup>25</sup> Lino Juda imboma aku tepo teremolo nalo manga pupu lupe imbomando linoni eno i tendekulu teaio naa nimbolio pipia te o topotirimulu. Aku pipiana i tepo nimbo topo tirimulu: Kolo gote imbo kini wamolimanga kuro koinge langima enoni naa naio. Eno yokoli angili ari melema naa naio. Eno nomi ambolko pupu tokolio toko kondonge ari melema naa naio. Ambiye wapu langi noli aku ulumanga eno tengatuku naa peaio," nimbe Jems i tepa nimu.

<sup>26</sup> Otilikondo Pol kinye kano iye pokolikmeko kulumie taio ningi kano uluma pulu mondoko teringi. Poloni aklulu tepalies pele Gotenga tempel ulkena tukundo pumbelie Gotenga popo tondoli iyemando enoni kulumie teko pora tingewalimu wai timbei nimbe purumu. Iye kano pokoni te te ningotendeko melema toko kalamili ningemunga popo tondoli iyemani melema tumbi tiko noindeio ungumu nimbei terimu.

*Pol kano Gotenga tempel ulkena ambolko ltingi*

<sup>27</sup> Koro te kano nondopa pora nimbei terimu kinye Esia kombu moloringi Juda imbomareni Pol kano Gotenga tempel ulkena kanoringi. Aku imbomani we kano Juda imboma pali teko mumindili kondongei Pol kano ambolko ltingi.

<sup>28</sup> Kano tekolio ru ningi ningei, "Iye imuni kombu palinga andopalie Mosesinga mane ungumu kinye linonga imbomanga kinye ya i Gotenga tempel ulkemunga kinye opa pule topalie yuni imboma ungu mare lupe mane tipe nimbe tilipe andoromo. Kinye kape yuni iyepu kondoli temo. Yuni i kombu kake telimu tepa kalaro mondonromo. Grik kombu iye mare Gotenga tempel ulkena mepa tuku ombalie olandopa tepa kenjirimo. Imunga Israel imboma, yu ambolopo ingi tiemili kani tapao," ningi.

<sup>29</sup> Juda imbomareni Trofimus kinye Pol talo Jerusalem kombu andoringilina kanoringimungaaku teko ningi. Trofimus yu Grik iye pupumu Efesus kombu molorumu iyemu. Akumunga Juda imbomareni liko manjiringi wali Poloni neyaaku iyemu mepa Gotenga tempel ulkena mepa tuku pumbetea kenjingo konopu leringi.

<sup>30</sup> Jerusalem kombu moloringi imboma eno paa mumindili lakoko koloringi. Eno lkiko pungolio Pol kano Gotenga tempel ulkena kunduko meko wendo oringi. Aku teringi wali ulke nokoringi iye mareni Gotenga tempel ulke nangapema neya wali nendo munduko nangape tiringi.

<sup>31</sup> Pol kano imbomani tonge teringi. Nalo aklulu Rom kombu ele iye Jerusalem kombu moloringimanga nokoli iye awilimuni kombu sitimunga undukana opa makinjiko mongo peremo ningina pilerimu.

<sup>32</sup> Kano tepalies walitikale yunge maindo ele iye nokoli mare kinye ele iyemare kinye lipe mepa pumbelie lkipe pumbene kano imbo pana nombeya teko angileringina wendo purumu. Imbomani aklulu kanokolio Pol kano toko perarama tiringi ulumu keleringi.

<sup>33</sup> Ele iyema nokoli iye awili kanomuni Pol kano pumbemambolopa ltimu. Aku tepalies yunge ele iyemando nimbei, "Pol ka sen taloni ka taio," nimu. Aku tepalies imboma walipe pilipe nimbei, "I iyemu nariya? Yuni ulu alowa ambelemu temoya?" nimu.

<sup>34</sup> Kano tepa nimu wali nombeya teko angileringi kano imbo pana kango mareni ru ningi ungu te ningi. Aku wali mareni ungu tela ru ningi ningi. I ru ningi ungu panjiringi ungumanga ele iyema nokoli iye awili kiyendomuni ulu mongo perimumu

kanopa imbi naa tirimu. Imunga ele iyema nokoli kano iyemuni Pol kano ele iyemando liko meko enonga ulkena paio nimu.

<sup>35-36</sup> Nimu kano ulu teringi wali imbo kano pana ele iyema puringi mele lombileringi. Imbo akumani ru ningo ningei, "Yu tokon kondaio," ningi. Imbomani Pol tamili ningo tongei teringimunga ele iyemani enonga ulke wendo ongolio wali Pol yu kano ki polo pala, teni teni ola taropela teko meringi.

<sup>37</sup> Ele iye kanomani Pol yu kano meko enonga ulkena tuku pungei teringi. Nalo Pol yuni ele iyema nokoli iye awilimundo i tepe nimu, "Nundo ungu te nemboya?" nimbe waltindirumu.

Kano tepe nimu wali ele iyema nokoli kano iyemuni nimbei, "Nu Grik ungu pilko ninoya?

<sup>38</sup> Isip kombu iye teni gavmanemu kinye ulu mongo mare lipa opa pule alaye kolte oi mele tomo. Aku tepale yuni iye 4,000 loi imbo topa kondolima kombu ku imbo naa peli wena mepa purumumu karolo iyemu nunje konopu lteo," nimu.

<sup>39</sup> Kano tepe nimu kinye Poloni ungu pundu topa nimbei, "Na Silisia kombu awili akuna tukundo Tarsus kombu akuna mololi iye Judamu. Aku kombu siti muli mulimunga na kombu pulu iyemu. Imunga na aku iyere molo kani paa yane iye, ya imbomando ungu nimbo tiemboi kani aulke liko tiwi," nimu.

<sup>40</sup> Kano tepe nimu kinye ele iyema nokoli iye kanomuni Pol kano ungu nipli aulke lipa tirimu. Kano wali Pol kano ulke polona ola angilipelie imbo kano pana tako liko angileio nimbelie yunge ki ola mundupelie ki talo lope lape tenderimu. Aku terimu wali imbo kanoma ungu oo torumu kinye Pol Juda ungu lepa imboma ungu nimbe tirimu.

## 22

### *Polyu yunu tepe enge tirimu*

<sup>1</sup> Aku tepalie Poloni nimbei, "Ango kame ara kame, nanga nimboi tero ungumu pileio. Enonga kumbekerena enge nimbo angilimboi tero ungumu nimboi," nimu.

<sup>2</sup> Juda imbo kanomani yu Juda ungu lepa ungu nimu kinye eno paa tako liko angileringi.

Kano wali Poloni nimbei,

<sup>3</sup> "Na Juda iye pupumu. Na meko Silisia kombu tukundo Tarsus kombu akuna meringi. Na molopoaku kombuna akoru. Na ungu imbo iye Gamalieleni skul tenderimu. Yuni na linonga ara kaue kamenga mane ungu ulu pulumanga palinga wamba molowi mele ungu imbo tondopa kondon Dorumu. Eno da Juda angiltimelemani enge

ningo Gotenga ungumu pilko lombiltiemele mele oi na kape aku teru.

<sup>4</sup> Nani Jisas lombileringi imboma mindili lipo tipolio mare paa topo kape kondorula. Nani ambo iyema lipolio ka ulke panjiru.

<sup>5</sup> Aku teru ulu puluma popo tondoli iye awilimu kinye Juda imbomanga kaunsil iye tapu iye yuman i kape aku ungumu paimbo ningo eno manda ningo tinge. Aku iye nokolimani enonga Damaskus kombu moloringi imbo angenupilindo pipiama tokolio na Jisasinga imbo akuna moloringima pumbe lipupili ningi kinye na imbo akuma ambolopo lipolio mindili lipo tipo Jerusalem kombundo mepo yando omboi akuna pumboi puru.

### *Polonyu konopu topele torumu ungumu nimbe tirimu*

<sup>6</sup> Awitangoli ena dindo nimo kano kinye Damaskus kombu nondopo oru. Kano wali mini ltendepa muluna maindo kariapa mele pa enge nilte ombalie na puruna topa kau molorumu.

<sup>7</sup> Na kano maina mainye topa mundurumu kinye na topa dindeme tenderimu mainye leru. Aku wali muluna maindo ungureni i tepe nimu, 'Soloya! Soloya, ambe telka na mindili liko tirinoya?' nimu.

<sup>8</sup> Kano tepe nimu kinye nani waltindiponimboi, 'Awilimu nu nariya?' niu.

Ungu oromo kanomuni ungu pundu topa nimbei, 'Na Nasaret kombu Jisas. Nunipe na mindili liko tiko teko toni tereno,' nimu.

<sup>9</sup> Na kinye angileringi iyemani nimu ungumu pilko imbi naa tiringi nalo pamu aku kanoringi.

<sup>10</sup> Aku tepe nimu wali nani nimboi, 'Awilimu, kinye ambe teamboya?' niu. Aku wali Awilimuni ungu pundu topa nimbei, 'Nu makilko Damaskus kombundo puwi. Akunape nuni teani nimbo oi nimbo panjindu ungumu iyereni nimbe timbolo,' nimu.

<sup>11</sup> Pa enge nilimuni nanga mongomu tepe pimbinye ulu tondorumu. Aku wali na waye andoringi iyemani na kano ki ambolko meko Damaskus kombu tuku puringi.

<sup>12</sup> Akuna Ananaias nimbe iye te na moloruna orumu. Yu Mosesinga mane ungumu pilipe lombili iyemu. Akuna molko peringi Juda imbo palini yu wale pakoringi iyemu.

<sup>13</sup> Ananaias kano na moloruna ombalie nimbei, 'Ango Sol, nu melema altoko kanoko imbi teni,' nimu. Kano tepe nimbe nendo lerimu kinye walitikale mongo makilipo yu kanopo imbi tiru.

<sup>14</sup> Kano wali Ananaiasini nando nimbei, 'Linonga ara kaue kamenga Goteni yunge wai lipe noirimmo ulumu nu liko manjeni

nimbe yunge Malo Iye Toya Tolimu kanoko yunge unguma pileni nimbe nu oi kanopa ltimu.

<sup>15</sup> Nu lemo imbo palindo yunge ungu nindili iyemu molonio. Nuni pilko kanonio ulu akumanga ungumu imbomando ningoten.

<sup>16</sup> Imunga kinye nu ambe telka nokoko molonioya? Makilklo Jisasi nu tapopili ningi no liwi. Aku tenio wali Goteni nunge ulu kalaroma kulumie topa ltendepili,' nimu.

*Iye pupu lupema ungu nimbe tipili Jisasin Pol alako topa kanopa ltimu mele*

<sup>17</sup> Altopo pele na kano Jerusalem kombundo yando ombolio Gotenga tempel ulkena konge teru. Aku tepolio wali mongo indi kumbu te teru.

<sup>18</sup> Nani kanoru wali Awilimuni nando nimbei, Jerusalem kombu kinye welea tiye kolowi. I kombuna moromele imbomania nanga ungu paimbomu pilko naa linge,' nimu.

<sup>19</sup> Nalo aku wali nani i tepo niu, 'Awilimun nombeya ulke palimanga moloringi Kristen imbo ipuki tilima nani koipe topo ka tiru ulu palini i kano moromelemani liko manjirimele.

<sup>20</sup> Kelko nunge ungu nindirimu iye Stiven toko kondoringi wali kape na akuna tangai mele kanopo angileru ulu kanoringila. Nani akuna angilipolio yu toko kondangei ulumunga ee niu. Yu kou kalolini toringi iyemanga ola wale pakolima kulko tiringima nani amondoru,' niu.

<sup>21</sup> Nalo Awilimuni nando nimbei, 'Kinye nu Jerusalem kombu tiye kolowi. Nu lemo iye pupu lupe moromele imbomanga kombu paa tulerenja tipo mundumbo', nimu," nimbeline Poloniaku tepa nimu.

*Poloni ele iyemando yu Rom kombu iyemu nimu*

<sup>22</sup> Juda imbo nombeya teko angileringimani Poloni nimu ungu pilko angilkolio peyalime nimu ungumunga ru ningi ningei, "Iye imu toko kondaio. Iye pupu i tepamu mai kombuna naa molopili. Yu koinjo kape paa naa molopili," ningi.

<sup>23</sup> Aku teko ru ningi opa kanokolio wali enonga ola wale pakoli kangoma kulko lteko mai kungupo liko toko ola munduringi.

<sup>24</sup> Kano kinye ele iyema nokoli iye awilimuni imbomaniaku teko ru ningi toringi ulumu ambe telka teringinje Polaku ungumu nipili nimbeline yunge ele iyemando nimbei, "Pol liko meli ele iyemanga ulkena tuku pungolio ka maputao," nimu.

<sup>25</sup> Imunga ele iyemani yu ka tokolio koipe tongei teringi wali ele iyema nokoli iye mandopa te akuna angilerimumundo Poloni nimbei, "Na Rom kombu mai pulu iye kot oi naa tendeli enoni koipe oi tonge manda itemoya?" nimu.

<sup>26</sup> Ele iyema nokoli mandopa iye kanomuni i ungu pilipielie wele kano ele iyema nokoli iye olandopa awili kanomundo pumbe nimbei, "Nuni tereno ulumu liko manjirinoya? Iye imupe yu Rom kombu pulu iyemu," nimu.

<sup>27</sup> Kano tepea nimu wali ele iyema nokoli iye awili olandopa kanomu ombalie Polondo i tepea nimbe waltindirimu, "Nando toya toko niwi. Nu paimbo Rom kombu mai pulu iyemuya?" nimu.

Aku wali Poloni ungu pundu topa ee nimu.

<sup>28</sup> Kano wali ele iye awili kanomuni nimbei, "Na Rom kombu mai pulu iye molomboi wali kou pulumu tiru," nimu.

Nalo Poloni nimbei, "Na amani Rom kombu mai pulu iye merimu," nimu.

<sup>29</sup> Pol yu ungu waliko pilingei ungu tumbirumbi tiringi kano iyema walitikale yu munduko yokeya tendeko wendo purungi. Kano kinye ele iyema nokoli iye awilimuni, 'Nani Rom iye te ka sen toko panjiko ka pulteni taio nindumunga na mongo pembalonje nimbo pipili kolto,' konopu lerimu.

*Poloni Juda iye nokolimando ungu nimbe tirimu*

<sup>30</sup> Otilikondo ele iyema nokoli iye awili kanomuni Pol ulu ambelemu tepea alowa temona Juda imbomani ningeinje konopu lepa pilimboi konopu lerimu. Imunga yuni popo tondoli iye kiyendoma kinye Juda imbomanga kaunsilima nombeya teangei nimu. Ele iyema nokoli iye awili kanomuni Pol ka toringi kano ka senemu wendo lipe ltendepalies Pol kano enonga nombeya toringi kumbekerena mepa wendo ombaranjirimu.

## 23

<sup>1</sup> Pol kano Juda imbomanga kaunsil nombeya teko moloringi akuma pipili naa kololi enge nimbe taki lepa kanopalies nimbei, "Nanga Israel imbo ango kame, Goteni imbomando tewi nimo ulumaaku penga tepo telipo ombo kinye i walimunga wendo oro. Nani ulu te tepo kenjindukonopu naa lteo," nimu.

<sup>2</sup> Aku wali popo tondoli iye awili Ananaias akuna molorumu. Poloni nimu kano ungu yuni pilipielie wali iye kopu teko angileringimando da iye kere tuku tieio nimu.

<sup>3</sup> Aku wali Poloni Ananaiasindo i tepe nimbei, "Nu kape Goteni tombalo. Nunge

tukundo kalaro moromo nalo kangindo olando penga teko mololi none tereno. Nu Mosesinga mane ungumu ambolko dana molkolio na kanoko moke tereno. Nalo imbomani na tangei ninomu aku Mosesinga mane unguna aku naa teaio nimbe peremo kanomu,” nimu.

<sup>4</sup> Pol yu kinye kopu teko angileringi kano iyemani yundo i teko ningi, “Nuni Gotenga popo tondoli iye awilimundo aku teko manda naa nino. Ambe telka ninoya? Yunge imbimu ningi keri ltendereno,” ningi.

<sup>5</sup> Kano teko ningi wali Poloni nimbei, “Imbo ango kame, nani iye imu Gotenga popo tondoli iye awili te nimbo naa lipo manjindu. Gotenga bukuna i tepa nimbe peremo,

Enonga imbomanga iye nomimundo ungu kerima naa nindeio, (Kis 22:28) nimbe peremo kanomu,” nimu.

<sup>6</sup> Akuna moloringi iye mare Sadyusima, mare Farisima moloringi. Aku teko moloringimunga Pol yuni konopu te lipa manjipelie iye kanomando ungu ola enge nimbe nimbei, “Imbo ango kame, na iye Farisi. Nanga ara kape iye Farisi molorum. Imbo kololima altoko makilinge nimbo ipuki tiromunga kinye kotena i ombo angilto,” nimu.

<sup>7</sup> Aku tepa nimu wali, ne kano Farisima kinye Sadyusima kinye ungu melenale enge nili terengi. Aku tekolio nombeya teko moloringi kano imboma imunana nendo yando mokemake leringi.

<sup>8</sup> Aku mokemake leko ungu melenale terengi ungu pulumu i tepa, Sadyusi manga pupu akumuni ningei, “Imboma kolkolio wali altoko makilko koinjo naa molonge. Enselema kape kuroma kape minima kape naa moromele,” ningi. Nalo Farisi manga pupu akumuni i uluma pali ipuki tirungi.

<sup>9</sup> Nombeyana moloringi Juda imbomani ungu panjiringi ungumu omba olando olando purumu. Farisi manga pupu akumunga mane ungumunga ungu imbo iye mare ola angilkolio ungu toko akuko ningei, “Linoni iye imunga ulu alowa te naa kanopo ltenderemolo. Yu paimbo enselereni kape molo kuro minireni kape ungu nimbe timonje,” ningi.

<sup>10</sup> Unku toko akuringi kano ulumuni opa makinjiringi. Ele iyema nokoli iye awili kanomuni Pol kano Juda imbomani yu melema ambolko ongoko kimbo ki lupe lupe tendenge konopu lepa yu pipili kolorumu. Aku konopu lepalie wali ele iyemando nimbei, “Mainyendo pungo Pol Juda imbomanga imunana enge ningi wendo likolio meli pungo enonga ulkena tuku mondaio,” nimu.

<sup>11</sup> Kano wali ipu leli Awili Jisas kano Pol perimu kumbekerena omba angilipelie nimbei, “Nu pipili naa kolkono konopu enge nipili molowi. Nuni Jerusalem kombu imbomando nanga ungu nindirino. Aku mele nu paa Rom kombu kape pungolio aku imbomando nanga ungumu ningi tindiwila,” nimu.

*Juda imbomareni Pol topo kondamili ningi wai toringi*

<sup>12</sup> Otilikondo otile oi Juda iyemareni ulu te wai toko noiringi. Aku wai toringi ulumu Pol topo kondamili ningi. Juda iye akumanenongan mi enge ningi lekolio ningei, “Eno i teli oi langi nombo no naa nomolo. Pol paa topo kondopolio wali kau aku kere langima nomolo,” ningi.

<sup>13</sup> Aku ungumu wai toringimu iye 40 akumanga mare winjiko molkolio ungu ningi panjiringi.

<sup>14</sup> Aku Juda iyemani popo tondoli iye kumbe leko moloringimando kinye Juda iye mololimando kape i ungumu pungo ningi tikolio ningei, “Lino mi paa enge nilte lemolo. Lino i teli oi langi nombo no naa nomolo. Nalo Pol paa topo kondopolio wali kau langi nomolo nimolo.

<sup>15</sup> Akumunga kinye enoni tendangei konopu itemolo ulumu i tepa: Eno kinye Juda iye mololima palini ele iyema nokoli iye awilimu moromona pungo ungumu waltindiko i teko kolo toko neio, lino moromolondo Pol meko wendo owi. Aku wali linoni yundo ungu mare wambo walipo pilimolo neio. Aku teko ninge wali eno molongeindo ele iyemani Pol meko aulkena ongo molonge kinye akuna linoni yu topo kondomili nokopo angilimolo,” ningi.

<sup>16</sup> Nalo Polonga kepa iye wenepo teni aku tengenai wai toringi ungumu pilerimu. Ele iyemanga ulke kanona tuku pumbelie Polondo kano wai toringi ungumu nimbe tirimu.

<sup>17</sup> Kano wali Poloni ele iyema nokoli iye mandopa tendo owi nimbelie nimbei, “Kelo iye imu ele iyema nokoli iye awilimu moromona meko puwi. Yuni ungu te pilipili nimbei nimbe mepa omo,” nimu.

<sup>18</sup> Ele iyema nokoli iye awilimu molorumuna iye mandopa kanomuni Polonga kepa iye kanomu mepa purumu.

Kano ele iyemuni ele iyema nokoli iye awili kanomundi i tepa nimbei, “Ka iye Poloni nu moronondo iye imuni nu pilino ungu mare nimbei omo kani meko puwi nimona mepo oro,” nimu.

<sup>19</sup> Kano kinye ele iyema nokoli iye awili kanomuni Polonga kepa iye kanomu ki ambolopa meli kulendo pumbelie elongalo

kau molkolio nimbei, "Ungu ambeleme nando ningi tini meko onioya?" nimu.

<sup>20</sup> Aku kinye kelo iyemuni ungu pundu topa nimbei, "Juda iyemani otli enonga nombeaya tengena Pol nuni mendeko owi nemili ningi wai tonge. Polondo ungu mare awini waltindimolo konopu nuni leani ningi.

<sup>21</sup> Nalo aku teko ninge ungumu nuni ipuki naa tiwi. Aku kolo tonge. Juda iye 40 akumanga winjipe mare Pol toko kondongei lopeke teko nokoko angilinge. Aku iyema palini mi enge ningi lekolio ningei, eno i teli oi langi nombo no naa nomolo. Nalo Pol topo kondopolio wali kau no nombo langi nomolo ningi. Topo kondamili ningolio, kinye nuni ee nenii ungumu pilingei nokoromele," nimu.

<sup>22</sup> Ele iyema nokoli iye awili kanomuni Polonga kepa kelo iye kanomu pupili nimu. Aku pupili nimbeline mainye nimbei, "Enonga wai tonge i ungumu imbo tendo anjo nando nimbo tindu ungu naa niwi," nimu.

*Ele iye awilimuni Pol gavman kiyendo  
iye Feliks molorumuna meko paio nimu*

<sup>23</sup> Kano kinye ele iyema nokoli iye awili kanomuni yunge maindo ele iyema nokoli iye mandopa talondo walio nimu. Aku tepalie nimbei, "Sisaria kombu pangei kani ele iye 200 pungo tumbi tipelio. Aku iyema kinye popo tiko pangei aku kongi os umbuluna molko opa toli iye 70 tumbi tiko toloni opa toko ambelea nili iye 200 liko tumbi tielio. Aku tekolio ipu leli ena mongo 9 klok pangei tumbi tielio.

<sup>24</sup> Pol kape molopha pupili kongi os mare liko tumbi tindelio. Kombu gavman nokoli iye Feliks molombalona meko pungili kewale molombalo kani nokoko kondoko Pol meko anjikondo palio," nimu.

<sup>25</sup> Aku tepa nimbeline kinye ele iyema nokoli iye awili kanomu yuni pipia te torumumu i tepa nimbe perimu;

<sup>26</sup> "Na Klodius Lisiiasini i pipiamu gavman nokoli paa iye muli muli Feliksindo topo tiro. Molko kondowi, nio.

<sup>27</sup> Judia iyemareni iye imu ambolko liko toko kondongei tengen. Nalo yu Rom kombu mai pulu iye nimuna pilipolio nanga ele iyema kinye pumbolio yu nani koinjo lindu.

<sup>28</sup> Iye imundo Judia imbomani ungu mune tengen ungu pulumu pilimboindo enonga kaunsil nombeya tengena mepo maindo pundu.

<sup>29</sup> Aku pumbolio kanopo ltendendu uluma i tepa: Judia imbomani ningi Poloni ulu mare tepa alowa temo ningi. Nalo aku ningi unguma enonga Judia imbomanga mane unguma kau ungu mare ningi. Aku teko ninge unguma pilindu nalo lino Rom

iyemanga mane ungumuni yu ka ulke pepili kape yu topo kondamili nimbe aku tepe ungu te naa ltemo.

<sup>30</sup> Nando ningi Judia imbomani Pol toko kondongei lopeke teko wai tonge ningi. Aku wali walitikale nani nu moronondo Pol tipo munduro. Aku Judia imbomando kape nani nimboi, enoni kape Polondo ungu mare ambolonge lemo aku unguma nundo ongo ningi tieio nindu," pipiamu i tepe torumu.

<sup>31</sup> Ele iye kanomani enonga ele iye nokoli kiyendo kanomuni nimu kano uluma paa teringili. Neya aku wali ipu leli Pol kano Antipasi siti kombu meko purungi.

<sup>32</sup> Otilikondo kongi os umbuluna mololi ele iyemani Pol kano meko mondoli Sisaria kombu purungi. Nalo we ele iye kanoma kinye toloni opa teli ele iye kanoma peya Jerusalem kombundo yando enonga ulke anglerimundo oringi.

<sup>33</sup> Sisaria kombu wendo purungi wali, akuna gavman nokoli iye kanomunga kindo pipia kanomu tiko, Pol yu kape aku iyemu yunge kindo tiringi kala.

<sup>34</sup> Gavman nokoli iye kanomuni pipia kanomu kambu topa kanopalie wali Pol nu tekai iyemuya nimbe waltindirumu. Pol kano Silisia kombu iyemu ltemo nimbe kanopa imbi tipelie,

<sup>35</sup> nimbei, "Na Silisia kombu imbomanga kot pio. Akumunga nu kot tenderemele imboma onge wali aku nunge unguma pilimbo," nimu. Aku tepa nimbeline Pol kano king Herotenga ulke enge nili awilina wa-mongo ka tiko tapu teko nokaio nimu.

## 24

*Juda iye maren i kotena ongolio Feliks Pol  
alowa terimu ungumu ningi tiringi*

<sup>1</sup> Altopa wali kite pakera omba purumu wali popo tondoli iye awili Ananaias kinye tapu iye mare kinye Rom imbomanga kot pimele uluma lipe manjili iye te yunge imbi Tertulus kinye peya Sisaria kombu purungi. Gavman nokoli iye awili Feliks yunge kumbekerena Pol kot tendengei ningi unguma ningi tiringi.

<sup>2</sup> Kano wali Feliksini Pol kano tukundo meko waio nimu. Orumu wali Tertulus Pol kot tendembai lipe manjirimu unguma pulu mondopa nimbei, "Iye awili Feliks, linonga imboma nuni nokoko kondorona lino molopo kondopo tono lakopo koromolo. Linonga kombuna ulu alowa awini wendo oromo nalo nuni liko manjiko tapoko teko amenge teko kondorono.

<sup>3</sup> Nuni aku uluma teronomunga linoni nundo paa tereno nimolo. Linoni kombu

palinga i uluma paa tereno kau konopu itemolo.

<sup>4</sup> Nalo ungu awini nimbolio nu konopu umbuni naa timboi. Akumunga kinye ungu mongo alaye pokore nemboi kani nu takliko konopu penga pilko molko pilawi.

<sup>5</sup> I iye Pol, yu mongo lili iyemu. Yuni Juda imboma moromele kombu malio palinga mongo lipe tirimo. Yu Nasaret iye Jisasina manga pupu keri akumunga iye paa timumu.

<sup>6</sup> Gotenga ulke tempeleku kape tepe kalaro mondonbai temona linoni yu ambolopo lipolio yu molo nimulu. Aku tepolio linonga mi unguna yu kot tendamili nimulu.

<sup>7</sup> Nalo ele iyema nokoli iye awili Lisiasini ombalie linonga imunana yu enge nimbe lipe mepa wendo purumu.

<sup>8</sup> Aku tepalie nimbei, Pol kot tendengeti enonga ambolonge unguna meko pungo nu morona neio nimu. Imunga kinye nu moronona omolo. Kani i nio unguna paimbonje andi iyemu nunu ungu mare walikopiliwi," nimbe Tertulus i tepe nimu.

<sup>9</sup> We kano Juda iye pungo moloringi kanomania kape i nimo unguna paimboningo ee ningi.

<sup>10</sup> Kano teko ningi ungu pilipelie wali Pol ungu niwi nimbe ki tundu torumu. Aku wali Poloni ungu pundi topa nimbei, "Gavman nokoli iye Feliks, nani nu Israel imbomanga kot pilko unguna moke tendekorokoro molorunu kanomu lipo mantiro. Akumunga kinye nunge kumbekerena na nanu enge nimbo angilipo ungu nimboitono kolto.

<sup>11</sup> Na Jerusalem kombu pumbo Gote popo torumunga winjo nilipo ombolio aku wali 12 kau oi ombo pumo akumu nu kape manda kanoko pilko liko manjenio. Akumunga i nimboi tero ungumu mona itemomungu na pilko naa tundunio.

<sup>12</sup> I Juda iye nando ulu alowa tendu nimele aku iyemani na Gotenga ulke tempelena imbo te kinye ungu akupo angileru wali na ambolko naa ltingi. Na imboma kinye mongo naa ltiu. Nani imbo nombeya teko mololi ulke malio kape kombu sitina tukundo kombu marenge kape mongo lipo, ungu topo akupo aku ulu naa teru.

<sup>13</sup> I kot tenderemele iyemani na ulu temu nimele iye te ombo i uluma paa paimbo temo, na mongoni kanandu nipili ningte te paa manda naa liko meko ongela.

<sup>14</sup> Nalo nani i ungumu paimbo nimbo para timbo. Na Jisasini terimu mele tepolio linonga ara kaue kamenga Gote aku tepo popo toro. Aku teromundo Juda imbomani ningei Jisasini terimu aku ulumupe tumbi naa tipelie imboma mokemake ltenderimu nimele. Nalo Mosesinga mane unguna

nimo unguma aku na palima ipuki tiro. Iye profetemanga bukuna toko panjiringi unguna kape palima ipuki tiro.

<sup>15</sup> Juda imbomani aku imbo keri pengama pali ono kombuna Goteni topa makinjimbelo ningi nokoko moromele aku ulumu nani kape tembalu lepamo nimbo nokopo moro.

<sup>16</sup> Imunga Gotenga kumbekerena kinye imbo imbomanga kumbekerena ulu toya tolima enge nimbo teamboi kau konopu iteo.

<sup>17</sup> Poinye pulumunga na Israel kombu wendo angileru. Altopo Israel kombu tukundo nanga Kristen imbo koropa nolimanga kou mendepo tipe kaloli mare timboi oru.

<sup>18</sup> Aku ulumu teru wali Juda iye marenina Gotenga ulke tempelena tukundo kanoko ltenderingi. Aku wali na lino Juda imbomanga kulumie toli ulumu tepo pora tipolio angileru. Nani ulu mongo te naa ltiu. Imbomani kape naa liko makai naa tenderingi.

<sup>19</sup> Nalo Esia kombu mololi Juda iye mare akuna angilkolio na ambolko ltingi. Nani paimbo ulu alowa te tendu lemo aku Esia kombu Juda iyemani nando i uluma terinu ningi nunge kumbekerena angilko kot tendangei.

<sup>20</sup> Manda naa onge lemo, na Jerusalem Kombu Juda iye kaunsilimanga nombeya teringina angileru wali ulu alowa te teruna konoringinje i Juda iye ongema walikopiliwi.

<sup>21</sup> Nalo aku imbomanga kumbekerena ola angileru wali ungu tendekure kau niu. Aku niu ungumupe, Goteni imbo kololima topa makinjimbelo nimbo ipuki tiromunga enoni na kot pilko moke teko kandomele niu. Kinye aku tepo niiumunga nani ulu alowa te teru konopu itemelenje," nimu.

<sup>22</sup> Feliks yu Jisasina lombili andoli imbomani ipuki tirimele mele oi pilipe lipe manjirimu. Aku tepalie kot pora tipelie nimbei, "Jerusalem ele iyema nokoli Lisias ombalo wali enondo ungu i tepo nimbo panjimbo," nimu.

<sup>23</sup> Feliksini ele iyema nokoli iyemundo nimbei, "Pol wamongo tapu teko nokao. Nalo Pol yu aie konopu lembalo melema yunge imbo kanolimani ongo tiko teangei kani wali marenga tukundo yu we molopili ningi imbo akumando molo naa niwi," nimu.

<sup>24</sup> Altopa wali pokore ombo purumu kinye Feliks pumbelie kano yunge ambomu Drusila lipe mepa Sisaria yando orumu. Ambomu yu Juda ambomu. Feliksini yu morondo Pol kano meko waio nimu. Jisas Kraist ipuki tirimele aku unguna Poloni nimuna Feliks pilerimu.

25 Poloni imboma toyota tokomolanguei unguma nimbe, enono nokoko kondangei unguma nimbe, altopa Goteni imbo moke tembalo unguma nimbu kinye Feliks yu pilipe pipili kolorumu. Kano tepalie Polondo nimbei, "Kinye welea puwi. Nu manda nino kani altopa manda konopu lembo wali aku nu owi nimbo," nimu.

26 Nalo Poloni yu kot tembalomunga kou wangopili konopu lepalie Feliksini Pol walwalima owi nimbu ungu ningili.

27 Nalo altopa poinye talo omba purumu kinye Porsius Festus Feliksinga kombu lipe yu gavman nokoli iye awili molorumu. Nalo Feliksini Juda imboma tepa konopu penga timbeimunga Pol kano ka ulke we pepili nimbu yu purumu.

## 25

### *Festusini Polonga kot pilerimu*

<sup>1</sup> Festus kano gavman iye awili kombu lipe Judia tukundo orumu. Wali yupoko omba purumu wali altopa yu kano Sisaria kombu tiye kolopa Jerusalem kombu purumu.

<sup>2</sup> Aku molorumu wali Festusinga kumbekerena popo tondoli iye kiyendoma kinye Juda iye nomi muli muliman Polondo ulu ima tepa alowa terimu ningi.

<sup>3</sup> Festusini enonga ulu te tendepili ningi enge ningi waltindiringi. Enonga konopuna tutkundo panjiringi ulumu i tepa, Festusini Pol Jerusalem kombundo yando tipe mundupili. Aku tembalo wali aulkene lopeke tepo nokopo molopolio Pol topo kondomolo konopu leringi.

<sup>4</sup> Nalo Festusini ungu pundu topa nimbei, "Aku molo, Pol Sisaria kombu ka ulke we pepili. Na Sisaria kombu nondopo pumboi tero.

<sup>5</sup> Eno iye nomi mare na kinye waye pamili. Poloni ulu te paa tepa kenjirimu lemo aku enoni yu Sisaria kombu kot tendeko ungu akuma nengei," nimu.

<sup>6</sup> Festus kano Jerusalem kombu wali kitalo molo kitalo talo pakera aku tepare molorumu. Aku tepalie altopa Sisaria kombu yando orumu. Otilikondo Festusini ele iyemando Pol kot pilimbo kani yu morondo meko waio nimu. Festus kano kot pilko moke teremele polona molorumu.

<sup>7</sup> Pol kano kiripina tuku orumu. Juda imbo Jerusalem kombu molko oringi kanomani Pol yu liko makai tendeko angileringi. Juda iye kanomani ningi Poloni ulu alowa awini tepa alowa tenderimu ningi. Nalo yu ulu te terimumu naa ambolkolio we ningi.

<sup>8</sup> Poloni yu yunu enge nimbu angilipe nimbei, "Nani ulu te Juda imbomanga mane

unguma kape Gotenga ulke tempelemundo kape Sisarando kape tepo naa kenjiru," nimu.

<sup>9</sup> Nalo Festusini Juda iyema tepa konopu penga timbeimunga Polondo nimbei, "Nu Jerusalem kombu pani. Nundo i ungu nimelemanga akuna kot pilipo nunge ungu moke tendembo," nimu.

<sup>10</sup> Kano wali Poloni ungu pundu topa nimbei, "Kinye nu Sisaranga imbina kot pilko moke tereno iyemunga kumbekerena angilto. Ina lemo nanga unguma pilko moke tendeko kot tendani. Nani Juda imboma kinye ulu alowa te naa teru. I nio ungu paimbo ltemo akumu nuni kape liko manjirino.

<sup>11</sup> Nani ulu alowa te telka wali mi ungu-muni na kolani nilkanje aku ee nimbu na paa kolka. Nalo nando i ungu kepu toko kot tenderemele unguma paimbore molo lemo aku i Juda imbomangga kindo na imbo teni manda naa timbelo. Iye awili Sisarani nanga ungu muotena paa pilipili," nimu.

<sup>12</sup> Aku tepa nimbu ungu muotena Festusini yunge gavman lipe manjili iyema kinye toropo toringi. Kano tepalie nimbei, "Nu Sisar moromona pungo kot pilipili ningi kanomboi niniona nu Sisar moromona pani," nimu.

<sup>13</sup> Wali pokore omba purumu wali altopa King Agripa kinye kemulu ambo Bernaisi taloni Festus yu kombu lipe gavman iye nokoli molorumu ulu kanongili Sisaria kombu oringili.

<sup>14</sup> Elo akuna wali awini moloringili. Aku wali Festusini Polonga ungu muotena Kingimundo nimbu tirimu. Festusini nimbei, "Feliksini iye te ka ulkena we pepili purumumu moromo.

<sup>15</sup> Na Jerusalem kombu puru wali, popo tondoli iye kiyendoma kinye Juda iye nomimani yundo ulu ima temo ningi ungu kepu toringi. Juda iye akumani neya aku iyemu toko kondopangei nembo konopu leringi.

<sup>16</sup> Nalo nani ungu pundu i tepo toru. Imbo te ulu alowa teremo kinye lino Rom imbomani imbo aku teremomu toko kondangei nimbu imbo wemanga kindo oi naa tirimolo. Kiyendo ulumu lemo yu yundo ungu kepu tonge imbomani yu kiyendo kot tendenge. Aku wali paa yundo ungu kepu toko ningi ungu mangan yunu nimbu omba wendo pumbei enge nimbu nendo tipe angilipe kot tembalo, nimbu yu teponiu.

<sup>17</sup> Akumunga i Juda imboma Sisaria kombu waye orumulu. Aku kinye nani wai te naa topo kalaru. Otilikondo na kano kot pilko moke teremele polona pumbo molopolio Pol meko tukundo waio niu.

<sup>18</sup> Juda kanoma ola angilkolio yuni ulu ima tepa alowa temo ningi ungu kepu

toringi. Nani Pol ulu paa keri terimu konopu lero nalo Judamani ulu kerire temona kanomolo ningolio naa nili we ungu kepu toringi.

<sup>19</sup> Ningi ungumapeku enonga Gote popo toringi ulumu kinye Jisas nimbe aku iye-mundo winjo winjo ningi. Jisas oi kolorumulo nalo Poloni nimbei, we koinjo momromo nimu.

<sup>20</sup> Aku teko ningi unguma na wambo naa lipo manjiru. Akumunga nani ungu te wambo walipo naa pileru. Nalo nani Polondo nimboi, nu Jerusalem pani akuna kot pilipo moke tendembo niu.

<sup>21</sup> Nalo Pol yu iye awili Sisarani nimbe wendo mundumbelo ungu pilimboindo Sisaria kombu we ka ulke peambo niwi nimu. Aku wali nani Pol yu Sisar kanopili nimbo lipo mundumboi teru. Ele iyemando altopa pupili kani kinye oi ka ulkena we pepili nokaoi niu," nimu.

<sup>22</sup> Agripa Festusindo nimbei, "Nani iye akumunga ungu pilemboi," nimu.

Kano wali Festusini nimbei, "Unguma otili nimbelo kani pileni," nimu.

### *King Agripani kot pilerimu*

<sup>23</sup> Otlikondo Polonga ungu pilingili Agripa kinye ambo Bernaisi talo au ningo oringili kinye ele iye nokolima kinye Sisaria kombu iye muli mulima peya kot pilko moke teremele kiripina uluma teko tuku purungi. Festusini ele iyemando Pol liko meko tukundo waio nimuna meko oringi.

<sup>24</sup> Kano wali Festusini nimbei, "King Agripa, kinye eno iye i moromolomani i iye Pol kanaio. Juda imbo i moromelema kape Jerusalem kombu moromelema palini iye imu kotena ungu nindirimele. Yundo konopu naa mondoko unguma ningolio are ningi yu toko kondangei nimele.

<sup>25</sup> Nani yunge kot pilipo moke tendendu nalo aku ulu alowa te naa kanopo ltenderu. Yu toko kondangei nimbomungaaku ungu pulu te naa kanopo ltenderu. Nalo yu Iye awili Sisarini yunge kotemu pilipe moke tepili nimu. Akumunga nani yu Rom kombu pupili lipo mundumbo konopu lero.

<sup>26</sup> Nalo Sisarando iye imuni ulu imu tepe alowa temo nimbo nimbo ungumuna na pilipo tunduro. Akumunga nani eno palinga kumbekerena mepo ondu. King Agripa, nuni paa kananani nimbo mepo ondu. Nuni ungu mare waliko pilkolio nimbelo ungu mare pilkolio ungu mare yando ningi tiwi. Na kape pilimbo. Pulumu wendo lipolio nani pipia topo Sisarando timbo.

<sup>27</sup> Ka iyemundo ungure naa nili Sisar momondo we tipo mundundu lemo manda naa tembalo kani i ulumu teamili konopu lteo," nimbe Festusini aku tepa nimu.

## 26

<sup>1</sup> Kano wali Agripa Polondo nimbei, "Kinye nunge terinu unguma ningi tiwi," nimu.

Kano kinye Poloni yunge kimu ola mundupelie yu ungu pulu polopa nimbei,

<sup>2</sup> "King Agripa, kinye Juda imbomaninando tekalo awala terinu ningi ungumanga moke ltendepo nimboimunga nunge kumberekerena angilipolio, na tono kolto.

<sup>3</sup> Nuni Juda imbomanga ungu mele nale tekoh, ulu pulu teremele palima liko manjiko kondoronomunga nani tono kolopolionu takalikomo molko nanga unguma pileni nimbo walipo pilto.

<sup>4</sup> Na oi bakulu moloru wali nanga ulke kombu molopolio mele, kelepo akopo awi lepolio Jerusalem kombu ombo moloru akuluma Juda imboma palini liko manjirimele.

<sup>5</sup> Lino Juda imbomanga Gote i tepo kau popo tamili ningi moromele manga pupute Farisi, aku manga pupumunga na oitukumoloru. Juda imbomanikau ulumu liko manjirimeleungapange naatendemolokonopu lenge lemo akumando ninge.

<sup>6</sup> Oi Goteni linonga arakau kamendo ulubenga tembo nimbe mi lerimuaku ulumatembalo lepamo nimbo lipo mantiro akumunga na kinye Juda imbomanikot tenderemele.

<sup>7</sup> Nalo aku tendekukonopumunga linonga Juda imbo lapu 12 akumani Gotenitembonimulutembalo lepamo ningonokokowaliwalipuleli tangoli ningi Gote popotopolio yunge teao nimu ungumateremele. Yane kingimuya liko manjiwi. GotenitembaloulumunokopomoromungaJudaimbomanikontenderemele.

<sup>8</sup> Imbomaya, Gotenitembo kololima manda naatopamakinjirimikonopumambetemonitaitemeleya?

<sup>9</sup> Oi nani kape Jisas ipuki tiringi imboma opa pule tamboi kau konopu lero.

<sup>10</sup> Aku tepolio Jerusalem kombu i tepoteru. Farisi iye awilimaninando i uluma pungotepuwiningo enge tiringinanani Jisasiningimbo pulumu ka ulke lipo panjiru. Kelkoakuimbo kot tendekotokokondangeinungi kinyenani kapeaku ulupaa teangeinimbo ee niu.

<sup>11</sup> Waliwalima nani Juda imbomangynombeylekaulke mangatukupumbolio Jisasiningimbo pulumindili lipo tipo akuimbomando Jisasiningimbi ningokerimondondangeinii. Aku ulumupaa teambo kaukonopu lepolio imbulupemangakombusitiawili malio pumbolio akuna Jisas ipukitikomoloringiimbomaumbunilipo tiru.

<sup>12</sup> Waliteaku tepolo Farisi iye awilimaninando engetikokongonolikomunduring-

ina temboindo Damaskus kombundo pumbói puru.

<sup>13</sup> Yane kingimuya piliwi. Awi tangoli aulkena ena mele pa enge nili te muluna mainye ombalie wali na kinye waye purumulu iyema pa tepa lipe okorumu.

<sup>14</sup> Kano wali lino palima topa dindeme tendepalie topa maina mainye mundurumu. Mainye lepolio pileru wali imboreni Hibru ungu lepalie nimbei, 'Sol, Sol na ambe telka umbuni liko tirinoya. Nuni na umbuni liko tili none tekolio andi nu nunu umbuni mereno. Na tambo konopu lteno nalo ulte manda naa tenio,' nimu.

<sup>15</sup> Kano tepo nimu wali nani walipo pilipolio, 'Iye Awili nu imbi nariya?' niu.

Aku wali Awilimuni ungu pundu topa nimbei, 'Nuni umbuni liko tirinoya iyemu na Jisas, i ungu niu.

<sup>16</sup> Kinye nupe para leko makiliwi. Nu nanga kongono iyemu molani kanopo ltiumunga i wendo ombo angilipolio nio. Kinye na kandono ulumu imbo wemando anjo ningi tiwi. Altopo kape lipo ondombo uluma aku ulu tekola ningi tiwi.

<sup>17</sup> Nani imbo lupemani kape Israel imbomani kape nu umbuni liko tiko toko kondongei tengen wali nu aku imbomanga kindo wendo limbo.

<sup>18</sup> Aku tumbuluna moromele imboma Satanenga kindo wendo likolio Goteni eno nokopa kondopili ningi na imbi tiko kanangei pana mondani nimbo nani nu aku kongonomu teani nimbo lipo munduro. Aku tenio kinye kano imboma na ipuki tinge wali enonga ulu kerima Goteni tiye kondopalie, eno yunge imbo kake telima nimbe tepa tukundo limbelo,' nimbe Jisasini aku tepa niu.

<sup>19</sup> King Agripa, nani mongo indi kumbu mele muluna mainye oromona tepo kanoru wali niu ungu pilipo tupe naa toru.

<sup>20</sup> Nalo oi pulu polopo Damaskus kombu pumbo Gotenga ungumu nimbo tipolio nimboi, 'Eno oi teringi ulu kerima tiye kolko Gotenga ungumuni nimo mele aku ulu teao. Aku ulu tengen lemo Gote kinye angileringi imboma kinye eno paimbo Gotenga kanopa ltimu imboma moromele ningi kanoko imbi tinge,' niu. Aku tepa unguma Jerusalem kombu pumbo nimbo kelepo Judia komba palinga andopo nimbo imbo lupemanya kombu malio kape andopo niu kala.

<sup>21</sup> Aku terumunga Juda imbomani na Gotenga ulke tempelena ambolko liko na tuo kondongei teringi.

<sup>22</sup> Nalo Goteni oi taporumi mele, kinye kape teremomunga i ombo angilipolio Jisasinga ungumu imbo koropa nolima kinye kamako lelima kinye palindo nimbo

tiro. I nio ungumupe oi Mosesini kinye Gotenga nimbe munduli ungu nili iye profetemani oi ningi panjiringi mele aku tendeku ungumu kau niu.

<sup>23</sup> Aku ningina nio ungumu i tepe, Gotenga iye Kraist paa mindili nomba kolombalo. Aku kamukumu kolopalie, yu imbomanga kumbe lepa makilipe koinjo molombalo. Aku iyemuni yunge Israel imboma kinye lupe imboma kape wayendo enonga konopu pa mele tendepa Goteni imboma tepe limbelo ulu nimbe mona ltembembalo," nimu.

<sup>24</sup> Aku tepa nimbe molopili Festusini ungu topa karu lepa are nimbeline nimbei, "Pol, nunge ungu mane Itinumanu nu tepa pinyewe kikime bembo tirimo kinye nu lowi pulumu lteno," nimu.

<sup>25</sup> Poloni pundu topa nimbei, "Iye awili Festus, na lowi naa lteo. Nani ungu paimbo tumbi tipo niu.

<sup>26</sup> King Agripa i lopeke tepa naa ltemo uluma pali yu oi pimo konopu lteo. Oi pimomunga nani yundo manda nio.

<sup>27</sup> King Agripa, nuni Gotenga oi iye profetemanga ningi unguma ipuki tirinoya? Nu paa ipuki tirinoya konopu lteo," nimu.

<sup>28</sup> Kano tepa nimu kinye Agripa Polondo nimbei, "Nuni da teko nino ungumuni na walitikale Jisasinga iyemu molambo konopu lekolio ninoya?" nimu.

<sup>29</sup> Kano wali Poloni ungu pundu topa nimbei, "Kinye kape molo altoko kape akumu ungure molo. Nu kinye i nanga ungumu pilko moltomele imboma eno wayema na Gotenga iyemu moro mele molangei konopu lepolio Gotendo aku tepo konge nio. Nalo i ka senema enoni naa meangei konopu lteo," nimu.

<sup>30-31</sup> Kano wali King imu kinye yunge kemulu ambomu Bernaisi kinye waye moloringi imbo kanoma tiye kolko eno puringi. Aku pungolio enonga nendo yando ningei, "Iye imu yu ka ulke pewinga kape yu tuo kondonge kape ulu alowa te naa temo ltemo," ningi.

<sup>32</sup> King Agripa Festusindo nimbei, "Iye imu yu Rom kombu Sisar kanomboi pumbói naa nilkanje yu kinye ina manda ka ulkena wendo pupili nilimala," nimu.

## 27

*Pol sipina meko pungolio Rom kombu siti pungei puringi*

<sup>1</sup> Gavman iye awilimani Pol kinye lino yunge lombili andoli iyema waye Itali kombu pangei ningi. Kano wali Pol yu kinye we ka imbo mare peya iye awili Sisaranga ele iyema nokoli Julius nimbe iye tenga kindo tiringi.

<sup>2</sup> Lino kano Adramitium kombu no sip te Esia kombu pumbei tumbi tipe lerimuna ola pumbo molopo purumulu. Aku wali Masedonia iye te imbi Aristarkas Masedonia kombu maimunga tukundo Tesalonika nili kombu tengah yu lino kinye waye purumulu.

<sup>3</sup> Otilikondo lino kano Saidon kombu taun wendo orumulu. Akuna Julius nimbe ele iye kanomuni Pol kano kondo kolopalie yu mele pontirimoma yunge kanopa lili imbonani tiengen nimbe lipe wendo mundupe, pumbé kano pupili nimu.

<sup>4</sup> Pumbo yando ombolio kombu Saidon tipe kolopo no sipina purumulu. Kano kinye pumili terimulundo poporomemuni yando tipe torumu. Kelepo Saiprus kombu maimu makai tendepo anjikondo purumulu.

<sup>5</sup> Nomu kutana we pumbolio Silisia provins kinye Pamfilia provins talo lipo yakondo mundupo pumbo Lisia provins tukundo Maira kombu taun lerimuna wendo purumulu.

<sup>6</sup> Akuna oi kano sipimu tiye kolorumulu. Ele iye awilimuni Aleksandria sip te Itali provins pumbei lerimuna kanopalie sip akuna linondo pamili nimu. Öla waio nimbe lipe meli purumu.

<sup>7</sup> Wali awininga tukundo taka lipo pere-lipo pumbolio Nidus taun nondopo purumulu. Pumili terimulundo poporomemuni sipimu pera tipe yando mundurumuna perepolio Krit provins no imunana lerimuna makai tendepo pumbo akuna lerimu taun Salmone lipo yakondo mundupo purumulu.

<sup>8</sup> Nomu kulendona perelipo ombo pumbo No Sip Manda Lembalo ningi kombu tengah wendo purumulu. Aku kombumu Lasea kombu taun nondopa lerimu.

<sup>9</sup> Wali awini we ombo pumbe Juda im-bomanga Langi naa nongo mi toringi wai awilimuni kape ombo purumu kolo kano poinyena sipima andoromele walimu pora nimu. Ambe telka akuna winjo lo kombu tepa poporome topa wai kerimu. Imunga Poloni enge nimbe nimbei,

<sup>10</sup> "Iyema, kinye i teli pumolo lemo sipimu topa melema pali ondopa lino kape no wan-gopo kolomolonge konopu lteo," nimu.

<sup>11</sup> Nalo ele iye awilimuni Pol ungu ni-mumu pilipe lipe tu tipelie sip pulu iyemu kinye sip munguluwe ambolorumu iyemu kinye eloni ningili mele pilipelie akundo pamili nimu.

<sup>12</sup> I kombuna poporome tombalo wali no sipimu manda naa lembalo. Imunga imbo mare awini ningei, "I teli oi mepo Finiks kombu wendo pamili. Aku kombu manda wendo pumolo lemo akuna no sipimu ltemele kombuna leamili," ningi.

Finiks kombu akumu, poporomeni sip mepa wendo pumbelo ningi ongo lopeke teko lepula teringi kombumu. Aku kombu no imunana lerimu mai kombumu Krit kombu maina tukundo lerimu.

### *Poporome enge nilimu topa molopili*

<sup>13</sup> Poporome te torumu wali iye kanoma manda pamili ningolio no sipimu am-boromo mele umbuni teli nona mainye munduringi kanomu olando likolio Krit kombu kule kule nomu kutana puringi.

<sup>14</sup> Nalo kelkepo poporome enge nili te Krit kombuna yando tipe torumu.

<sup>15</sup> Poporome yando tipe topa enge nimu-muni pumili purumulu mele manda naa terimu. Kano wali lino we tengah mepa pupili nimbo sipina ola we molorumulu.

<sup>16</sup> Nomuna tukundo kombu kelo te ler-imumunga imbi Kauda. Aku kombu ku-lendo purumulu wali lino mawi tilipo purumulu. Aku wali sip kelo kundupe meri-mumu olando lipo ka topo panjemili pere-rumulu.

<sup>17</sup> Iyemani dingi kanomu kunduko ola liko sip awilina ka toko ingi tiko noiringi. Kamukumu ola liko noikolio sip awili purumulumu tuku nimbelonje ningi ka mareni sipimu makai tendeko ka toko ingi tiringi. Poporomemuni sipimu kombu Afrika kombundo mepa pumbelo kinye lino tombalonje ningi mulu selema ka kolambe tiko mainye liko noiko we pamili ningi.

<sup>18</sup> Poporomemuni sipimu paa pera tilipe kau purumuna otilikondo kamukumu keri lembalonje ningolio, tukundo mele wale meringima mare liko nona mainye mainye lteringi.

<sup>19</sup> Otilikondo sip kongono teringi melema sip pulu iyema enonganliko mainye mainye lteringi.

<sup>20</sup> Wali awini ena kape kombu kandiye kape melte naa kanopo, "Poporome kau paa awili tega torumu kinye, Imbo te ombo lino lipe naa tapondombalo. Lino paimbo kolomolo lepamo," nimbo ki konopu lepo mololoko purumulu.

<sup>21</sup> No sipina mololiko oringi walimunga iyema langi te naa nongo moloringi kinye eno moloringina Pol ola angilipelie nim-beindo, "Iyema, lino Krit anjo molamolo niu mele pilipo anjo we molemalanje, kinye mindili noromolo mele naa nombo melema naa topo ltelimala.

<sup>22</sup> Nalo kinye lino imbo te naa kolomolo kani konopu toimbo topili molaio. Sipimu kau keri lembalo.

<sup>23</sup> I nio ungumunga pulumu nemboi pileio. Na Gotenga kendemande iyemu molopo waliwalima yunge kongonomu

tendero. Kano Gotenga ensel te olianga ipu leli na molonduna ombo angilipelie

<sup>24</sup> nimbeindo, 'Pol, mini naa ltewi. Rom iye nomi kingimu nunge kotemu paimbo pilimbolomunga nu no naa wangonio. Nu kinye peya sipina purumele imboma kape Goteni nunge konge tenio ungu pilipelie kondol kolopa wayema koinjo molonge nimu,' nimbe enselemuni nimo.

<sup>25</sup> Ya ne iyema, Goteni mondopo pilipo nando nimo mele paa paimbo aku tepa tembaloo kani eno mini naa lteko konopu toimbo topili molaio.

<sup>26</sup> Nalo no imunana mai kembo tengah poporomemuni no sip meli pumbe polopili nimbelo," nimbe Poloni nimu.

*Sipimu pumbe nomu kulendona topa bulturumu*

<sup>27</sup> Lino sipina purumulu kinye poporome topa molopili koro talo ombo purumu. Kano walimanga pali poporomemuni kau lino topa meli purumu kinye sipimu iye teni kongono manda naa terimu. Nomu Kuta Adriatik ningina poporomemuni topa manjipe meli purumu. Aku tepo purumulu kinye walite ipu leli amburume tuku sipimu meko puringi iyemani pilko liko manjikolio, kinye nondopo kombu tengah pumili oromolo ningi.

<sup>28</sup> Aku teko ningimuni manda manjili kamu nona mainye munduko kanoringi wali maimu mainye lepili 36 mita no molorumuluna ola lino purumulu. Alaye kolte weltepo purumulu kinye altoko manda manjili kamu munduko kanoringi wali 27 mita mele maimu lepili lino ola purumulu.

<sup>29</sup> Akumu kanokolio, lino kou pololi tengah sipimuni mepa pumbelo kinye lino tombalonje ningi mini ltekolio sipimu we naa pupili ningi, mele umbuni teli kite kani moko toko sip umberkondo nona mainye mundukolio, ipu leli lino sipina naa topili kombu welea tangopili ningi.

<sup>30</sup> Sip kongono teli iyemani lino sipina naa topili, sipimu tiye kolopo pamili ningi dindi mepo purumulumu liko nomuna mainye munduringi. Enoni imbomando ningeindo Sipimu naa pumbe we lepili mele umbuni teli mare sipimunga kumbendo moko topo nona mainye mundemili," ningolio aku teringi. Nalo kolo toko eno enongan kiyengo ningi kowa pungeindo aku teringi.

<sup>31</sup> Kano teko ningi ungumu Poloni pilipelie ele iyema nokolimu kinye we ele iyemando nimbei, "Sip kongono teli iyema waye sipina we naa molomolo lemo eno pali kolonge," nimu.

<sup>32</sup> Aku nimu ungumu pilkolio ele iyemani dindi moko toko mainye munduringi

kanomu loini ka karu leko nona yunu pupili ningi.

<sup>33</sup> Kombu muni lembai terimu kinye Poloni kere mare nangei konopu lepalie nimbei, "Eno koro talonga tukundo mini kau lteko kere naa nongo we peliko oromele.

<sup>34</sup> Aku manda naa teremo kani akumunga nani enondo enge nimbo nio. Koinjo molangei, te naa kolonge kani kere mare naio," nimu.

<sup>35</sup> Aku ungu nimbeline kanoko molangei yu bret te lipe Gotendo paa tereno nimbeline pike lepa norumu.

<sup>36</sup> Aku terimu kinye imbomani kanokolio eno konopu toimbo tondorumu kinye eno kape kere mare liko noringi.

<sup>37</sup> Lino sipina iye 276 waye molorumulu.

<sup>38</sup> Eno kere nongo olo tendekolio rais wit wale we lerimuna sipimu umbuni naa tepili ningi nona toko lteringi.

<sup>39</sup> Ena enge nili wali no makonge te kanoringi. Aku no makongemunga kule kule ukia lerimu. Aku kinye ukiana no sipimu polobalonje nalo we manda manjipo pamili ningi.

<sup>40</sup> Aku ningimuni iye mareni sipimu naa pumbe we lepili ningi mele umbuni tellima moko toko nona mainye munduringi kano melema ka karu leko melema nona leangei tiye koloringi. Aku tekolio mareni sipimunga aulke lipe mundurumu meleme liko toko mondoko sipimu kongono tepo nomu kulendona meli pamili ningi. Iye mareni poporomemuni sipimu nomu kulendona mepa pupili ningi sip kumbena mulu sel te ola anjiringi. Kano kinye no kulendona pumili purumulu.

<sup>41</sup> Nalo pungei meko puringi wali mate nona ola orumuna sipimu pumbe polorumu. Sip kumbemu maina pumbe polopalie wendo pumbei pererimu wali nomu beumbeu tipelie no topa ombo sip umberkondolu topa alumbiye terimu.

<sup>42</sup> Sipimu oi bumbo naa nipili ele iyemani ningei, "Ka imboma no leko kowa punge kani topo kondamili," ningi.

<sup>43</sup> Nalo enonga iye awilimuni Pol naa tanguei konopu lepalie nimbeindo, "Molo, ka imboma naa taio. No leko kanoromele imbomani sipimu munduko tiye kolko no leko no kulendona kumbe leko paio.

<sup>44</sup> No leko naa karomele imboma unjo plang sipina tukuraka nilima liko ambolko no leko no kulendona paio," nimu. Aku tekolio imboma pali no kulendona wendo pungo te no naa wangoringi.

<sup>1</sup> No lepo no kulendona wendo pumbolio tena moltomolonje nimulu. Linonga ungu pilkolio kombu imbomani ningei, "I kombu kelo no imunana lerimu lemo kombumunga imbimu Malta," ningi.

<sup>2</sup> Aku kombu pulu imbomani lino paa kondol kolko liko taporingi. Lo ombo ali paa terimuna unjo tokliko tipe kalkolio tipe keku puluna nondoko meko pungo mondokolio peya molamili ningi.

<sup>3</sup> Poloni unjo kola mare lipe maku topalie meli ombo tipena kalorumu kinye waimbemera keri te tipe minyekilo pilipelite wendo ombo Polonga kina kongili lerimu.

<sup>4</sup> Kombu pulu imbomani waimbemu Polonga kimu norumuna kanokolio eno enonganano nendo yando ningei, "I iyemu imbo te topa kondorunu itemo. Yu no naa wangomo nalo Tumbi Tipe Teremo Goteni yu koinjo naa molopa, paimbo kolopili nimo itemo," ningi.

<sup>5</sup> Nalo Poloni waimbemu pupili nimbe kimu tanda tanda tipelite waimbemu tipena tuku mundurumu. Pol kano ulte naa topa we koinjo molorumu.

<sup>6</sup> Kombu pulu imbo kanomani waimbemuni Pol norumuna kanokolio i konopu leringi. Waimbemunga tomomu memena tukundo purumo kinye imbo kanomu kolombalo ningi liko manjiringi. Neya aku wali, Polonga kimu akombalanje molo yu topa mundupe kolombalanje ningi ena mongo awini ombo purumuna kanoko nokoko moloringi, nalo yu aku tepe ulu te naa tepe, we manda molorumuna kanokolio eno kelko konopu topele tokolio ningeindo, "I iyemu gotere lepamo," ningi.

<sup>7</sup> Aku Malta kombumu nokorumu iye nomimiu yunge ulke kombu nondopa lerimu. Iyemu yunge imbi Publius. Eno nanga ulkena molamili waio nimu kinye purumulu. Kanona, wali yupoko yuni lino langi tipe noipe pepa nokopa kondorumu.

<sup>8</sup> Yunge lapa kangi tipe topa le olo kuro torumu we ainyembo lerimu. Yu ainyembo lerimu kiripina Pol pumbemba Gote konge tepalie ki noipe tepe koinjo ltimu.

<sup>9</sup> Aku terimu kinye yu koinjo purumuna kanokolio aku kombuna kuro torumu imboma pali Pol molorumuna oringi. Yuni eno tepe koinjo ltimula.

<sup>10-11</sup> Poloni aku terimuna kanokolio lino nokoko kondorungi.

#### *Pol Rom kombuna wendo orumu*

Aku kombuna oli yupoko ombo purumu wali, lino sipina pumili terimulu kinye lino mele mare molo lerimuma enoni sipina meli pungo noindiringila. Kano sipimu poporome enge nili torumu wali yando we lerimu kano sipimu lipo Molta kombu tiye

kolopolio purumulu. Kano sipimu Aleksandria kombu taun sipimu. Aku sipimunga kumbena olo pakilieme gote talo ningi popo toringi gote talo none teli talo sip kumbena wamoko au tiko mondoringi.

<sup>12</sup> Pumbo pumbolio Sirakyus kombu taunona pumbolio akuna wali yupoko molorumulu.

<sup>13</sup> Kombu Sirakyus tiye kolopo pumbo Regium kombu taun purumulu. Otilikondo poporome penga te topalie sipimu pa topa melipe purumuna lino wali te we pumbo, wali talo tipemunga Puteoli kombu taun pumbo sipimu akuna kamukumu tiye kolorumulu.

<sup>14</sup> Aku taunona Kraistainga imbo mare moloringi kanopo ltimulu kinye enoni linondo ningeindo eno ya molamili ningi. Koro te eno kinye molopolio Rom taun kamukumu mainye aulke pumili purumulu.

<sup>15</sup> Kraistainga imbo Rom moloringima iyema oromele ningi pilkolio ningimuni eno Rom tiye kolko, mare Apius maket ningi kombuna ongo lino kanoko liko, mare Imbo Ongo Pewi Puwi Teringi Ulke Yupoko Angilerimu Kombumu ningi kombuna ongo lino kanoko ltingi. Poloni kano Kraistainga Rom imboma oringga kanopalap Gotendo paa tereno nimbe tono kolorumu.

<sup>16</sup> Lino Rom kombu taun tuku purumulu kinye Rom gavmanemuni Pol yunge ulke tengah pepili akuna ami ele iye teni nokopili nimu.

#### *Aku wali Poloni Rom kombuna Jisasinga ungu nimbe tirimu*

<sup>17</sup> Pol wali yupoko Rom molopalie Rom moloringi Juda iye awilima waio nimu. Ongo maku toringi kinye enondo nimbeindo, "Nanga ango kame, nani linonga Juda imboma kinye opa pule naa topo kape linonga ara kaue kamenga ungu manema tui tipo kape ulu te aku tepe naa teru nalo na Jerusalem moloru wali Juda imbomani na ka tiko Rom ele iyemanga kindo tiringi.

<sup>18</sup> Enoni nanga kot tenderingi mele Rom gavman iyemuni pilipelite yu toko kondange nimbo ungu te naa pilto, yu we pupili nimu.

<sup>19</sup> Juda iyemani molo ningi karaye teringi wali nani nimboindo manda, Rom gavmanemuni nokoromo kombumanga pali iye nomi Sisarani nanga kotemu pilipili, Rom pambo niu nalo nani nanga Juda imbomanga kot tendemboindo ungu te aku tepe naa niu.

<sup>20</sup> Na Rom yando ondumunga pulumu eno nimbo timboindo eno waio nindu. Lino Israel imboma Goteni iye te kanopo lipo eno tapopili nimbo lipo mundumbo nimu

ulumu tembalu nimbo nokopo moromolomungu ka seneni nanga kina ka toringimu kinye we ka angili moro," nimu.

<sup>21</sup> Rom moloringi Juda iye awilimani ungu topondoko Polondo ningeindo, "Juda moromele Juda iyemani nu terinu mele lino pilemili pipia te toko yando naa tiringi. Yando oringi iyemani nuni ulu te teko kenjirinu mele ungu te naa ningi tiringi.

<sup>22</sup> Nalo lino Juda imbomani ungu manema pilipo teremolo mele Juda imbo marenitiye kolko temane koinjomu pilkolio moromelemando akumu kombumanga pali imbo awini teko kenjirimele nimele kani nu konopu ltenomu lino pilemili ningi tiwi," ningi.

<sup>23</sup> Enoni aku teko ningolio Pol kinye wai liko panjiringi. Kano walimu wendo orumu kinye imbo paa awini Pol perimu ulkena tukundo tukundo ongo maku toringi. Aku wali yuni ipu leli o piulu polopa ungu nimbe molopili ipupene lerimu. Yuni Gote yu Iye Awili molopa imboma tepa lipe nokombalo mele nimbe tipe Moses kinye profetema kinye enoni buk toko iye te ombo tembalu mele ningi kanomu Juda imboma pilko wendo ombalo ningi nokoko moloringi mele moromele kano iyemu Jisasindo ningi nimbe enoni paimbo lepamo ningi pilengei nimbe enge tipe eno nimbe tirimu.

<sup>24</sup> Kano kinye maku toko moloringi imbo marenit Paimbo nimu ningi pileringi nalo marenit kolo toromo ningi pilko ipuki naa tiringi.

<sup>25-29</sup> Poloni eno ungu te paa pilengi nimbe enondo ungu te kamukumu nimbeindo, "Enonga lanieli kolenalemani pilengi nimbe Mini Kake Telimuni profet Aisaiando ungu imbo tondopa nimbe tirimu ungumu pilipe eno yando nimbe tirimumu paimbo nimu. Mini Kake Telimuni Aisaiando nimu mele i tepe, 'Nu i imbo moromelena pungo i teko nipiwi. Goteni nimbeindo, "Eno komu tendeko unguma pilinge nalo ungu pulumu naa pilinge; melte wamongo taki leko kandonge nalo melemu kanoko imbi naa tinge."

Aku ambe temona, enonga konopuma kaumukumu pipi tirimele, komuni ungu piliwinga eno ki pingue toromele.

Melte mongoni naa kanomolo ningi mongo kumburumele, aku naa telemalanje mongoni paimbo kanoko komuni paimbo pilko konopuni paimbo ungu pulumu pilkolio konopu topele toko na morona olemala.

Kano kinye nani eno tepo koinjo lika nimu niwi nimuna nio,' *(Ais 6:9-10)*

nimbe Aisaiani nimu. Mini Kake Telimuni Aisaianga kerena nimu mele eno Juda imbomanga lanieli kolenalemani oi aku teko

terengi mele, eno paimbo. Kinye aku teko teremelelunga eno i ungumu pilengi. Eno i ungumu naa pimelelunga Goteni lino imbo lupemando Jisasinga temanemu topao nimbe lipe mundurumu. Kano imbona pilkolio ungu paimbo ningi yunge imbo talape molonge," nimu. Poloni aku tepa nimu kinye Juda imbona enongano ungu nendo yando tombololikopu awini liko mundulikopu puringi.

<sup>30</sup> Pol poiney talonga pali Rom kombuna ulke tengah kou tipelie perimu. Imbona waliwalima yu molorumuna oringi kinye molamili waio nimu.

<sup>31</sup> Imbo teni Poloni ungu nimbelo aulkemu pipi naa tiringi. Yuni Gote melema pali nokopa iye nomi kiyendomu moromo molombalo mele kinye Awili Jisasinga temanemu kinye Jisas Goteni lipo mundumbo nimbe kanopa Itimu iye Kraist molorumu mele kinye imboma pipili naa kolopa enge nimbe temanemu nimbe tirimu. Aku peya.

## **Poloni Rom Imboma Pipia Topa Mundurumu Ungumu Rom I Ungu Torumumunga Ungu Pulu Mare**

Poloni i pipia torumu wali, mai kombumanga pali nokoringi imbo mulimulimani Rom taon akuna moloringi. Oi Rom naa puli, Korin kombuna molopalie i pipia topa panjirimumu konopu litemele. Goteni lino yunge imbo toya tolima molamili nimu nimbe, Mini Kake Telimuni lino tepa kulu tondombalo nimbe, lino ulu pulu kerima teremelema Goteni lino mindili nolemala aulkena wendo lipe yu kinye mondorumu nimbeline aku unguma i pipiana topa panjirimu. Imbomanga ulu pulu keri teremelema nimbe para tirimu. Goteni lino tiye naa kolopa lino paa konopu mendoromo nimbe lino konopu toimbo topili nimbe torumu. Ungu enge nili mare I tepa: Sapa 3 pali, Sapta 6 pali, Sapta 8 pali, Sapta 10 pali.

Goteni nu ulu pulu kerimanga yokeya tendeko nunge uluma unduko kanoko Jisas ipuki tiko Gotenga imbo toya tolimu molani nipi.

## **Gote Kinye Malo Talo Paimbo Nimbo Ipuki Tirimolo Aku Ulumuni Kau Goteni Lino Kanopa Imbo Toya Tolima Nimbe Karomo**

*Jisasini kongono tendepaio nimbe lipe mundurumumunga Poloniaku kongonomu terimu mele nimbe tirimu ungumu*

<sup>1</sup> Na Poloni i pipiamu eno Kraistingu imbo Rom kombu moromelema topo tiro, na Kraist Jisasinga kongono tendifi kendemande iye te, Goteni nanga kongonomu tendepuwi nimbe na lipe mundupe, Gotenga ungu tukumemu ningko tilko andowi nimbe na kanopa ltimu iyemu.

<sup>2</sup> Aku ungu tukumemu paa koro oi Goteni wendo ombalo nimbe, nimbe panjipe, yunge nimbe munduli ungu nili profet iyemani bukuna molopili tangei nimu wali yunge buk kake telimu toringi moromo ungu tukumemu.

<sup>3</sup> Aku ungu tukumemu Gote yunge Malondo nimo ungumu. Yu King Devitini kalopa ltimu imbomani meringi iyemu.

<sup>4</sup> Yu Gotenga iye kake telimu ningko kanangei nimbe Gote yunge engemuni yu imbo ono kombuna topa makinjirimuna makilipe koinjo molorumu aku engemuni yu Gotenga Malo moromo ningko kanangei

nimbe Goteni lipe ondorumu. Malo, yu linonga Iye Awili Jisas Kraist.

<sup>5</sup> Jisas Kraistini terimumunga Goteni Jisasinga imbi ola molopili nimbe konopumu lino kinye noiipelie lino yunge kongonomu tendepaio nimbe lipe mundurumu kongonomu temolo engemu tirimu. Aku kongonomu i tepa: Kombumanga pali imbomani Jisas paimbo Gotenga Malo, paimbo lino lipe tapombalo ningko ipuki tikolio yuni teaio nimo unguma pilko liko tenge kongonomu andopo teremolo.

<sup>6</sup> Kombumanga pali imboma nio akumu eno Rom imboma enondo kape nio. Eno peya Goteni kanopa lipe Jisas Kraistingu imboma molangei waio nimu imboma.

<sup>7</sup> Eno Rom imboma Goteni konopu mondopa, eno kanopa lipe Yunge imbo kake telima molangei waio nimu imboma nani i pipiamu eno topo tiro. Linonga Lapa Gote kinye Awili Jisas Kraist talonga elonga konopumu eno kinye noikolio molangili, elonga konopu ame toli ulumu eno kinye pepili molangei.

### *Poloni Rom imboma kanopamboa nimu ungumu*

<sup>8</sup> I ungumu kumbe lepo nimboi, eno Jisas Kraist paimbo ningko ipuki tirimele ulu mai kombu pali imbomani temane toko tirimelemunga nani Jisas Kraistingu imbi lepo nanga Gote kinye paa tereno nio.

<sup>9-10</sup> Nape, Jisasinga ungu tukumemu nimbo tilipo andopolio wali kongonomu kumbe tundu mongo lipo mundurona kanopalie Goteni nani yu kinye ungu nimborio enonga nimbo waliwalima konge terona lipe manjirimo. Na eno moromelena wamboi Goteni aulke te lipe tipili nimbo waliwalima enge nimbo yu konge tepe morola.

<sup>11</sup> Mini Kake Telimuni eno tepa enge tipili enge te timboi akumunga eno paa kanamboia konopu lteo.

<sup>12</sup> Na Jisas ipuki tiro aku ulumuni eno lipo tapamboi. Eno Jisas ipuki tirimelemuni na liko tapangei. Aku temolo wali na kape eno kape lino peya ipuki tirimolo mele paa enge pepili nimbo konopu lepolio na paa wamboa nimbo moro.

<sup>13</sup> Ango kame, nani wali awini eno moromelena kanamboi wamboi konopu lero nalo oi aulke te naa lepa ulu wendo orumumanu na pipi tirimu, aku konopu lepo moro mele kinye paa pilengei nimbo eno nimbo tiro. Na kombu lupemanga andopo imboma Gotenga bakuluma molangei nimbo lipo tapondoro mele aku tepe eno kape moromele mele enge nengei lipo tapambo nimbo paa wamboa nimbo moro.

<sup>14</sup> Aku kombu lupe lupe imbomanga mare Grik imbo pengama kinye mare we

imbo lupe kerima kape, lipe manjili peremo imboma kinye naa lipe manjili imboma kape, akumanga pali kongono tendeli kendemande iyemu Goteni molani nimona paa teambo.

<sup>15</sup> Akumunga eno Rom imboma kape ungu tukumemu nimbo tiembo nimbo konopu lteo.

*Ungu tukumemu Goteni imboma tukundo ltimo engemunga ungumu*

<sup>16</sup> Aku ungu tukumemunga Goteni imboma lipe tapopa mindili nonge aulkena wendo ltimo engemu peremomunga na ungu tukumemu nimbo timboindo pipili naa kolto. Jada imboma kumbe lepa, we imbo lupema kinye peya, akumanga imboma ungu tukumemu paimbo ningi ipuki tirimele imboma pali i ungu tukumemuni tukundo ltimo.

<sup>17</sup> Goteni imboma altoko yu kinye ongo kopu teko molonge ulumu aku ungu tukumemuni lipe ondoromo. Paimbo nimbo ipuki tirimolo ulumuni kau Goteni lino imbo toya tolima nimbe karomo. Goteni lino aku tepa nimbe kanombalo ulu te lupe molo. Gotenga Bukuna ungu te moromo akumuni aku tepa nimola. Akumu i tepa:

Imbo teni enge nimbe ipuki timbelomu Goteni imbo toya tolimu nimbe kanombalo, aku imbomu koinjo molopa kondopa kau pumbelo. (*Hab 2:4*)

*Imbomani pali Gote umbulu tiringimunga ungumu*

<sup>18-19</sup> Gote yu moromo mele yunu eno lipe ondoromona imbomani manda mona kanowinga nalo enonga ulu pulu kerimumi pipi tirimo akumunga yuni mulu kombuna kanopa molopalie yu umbulu tiko ulu pulu keri teremele imboma aku teremelemunga aku imboma kinye mumindili kolopa mindili nangei nimo. Mindili tirimo ulumu mona itemona karomolo.

<sup>20</sup> Eno lipe ondoromo mele i tepa, Imbo te Gote oi naa kanoli nalo pulu polopa mulu mai talo terimu wali akumunga yando yuni teremo melema kanokolio imbomani yu tepa moromo ulumu kinye yunge molopa kau puli engemu kinye liko manjirimele. Yuni terimu melemani lipe ondoromona karomele akumunga yuni eno mindili nongei nimbelo kinye enoni naa pilermulu ungu manda naa ninge.

<sup>21</sup> Gote paimbo moromo ningi nalo yu Gote ningi yunge imbi liko ola munduko kapi ningi yu kinye paa tereno naa ningi, eno konopu naa pepa keke lepo mele toko tumbulu tolina moloringi.

<sup>22</sup> Eno imboma paa lipe manjili kelkele toromele nalo eno konopu naa peli imboma molko,

<sup>23</sup> Gote waliwalima molopa kau purumo popo naa toko tiye kolko, kolo wangoko maina imboma kinye kera kinye waimbe kinye we mele takera melemania pali none telima wamoko au tiko anjiko lino nokoromele gotema ningi popo toko kapi ningi.

*Imbomani ulu pulu keri lupe lupe awini teringimunga ungumu*

<sup>24</sup> Aku teko Gote kinye teko kenjiringimunga yuni nimbeindo, manda, eno konopu kerimani kundupe meli purumu kinye ulu pulu keri awini teko wapu ulu kerinale tekolio wali enonga kangima enonganeko kenjiko, aku ulu eio konopu itemelema teangei nimbe tiye kolorumu.

<sup>25</sup> Gotenga ulu paimbonu tiye kolko kolo wangoko kolo toli ulumu konopu mondoko teamili ningi, Goteni terimu melemania wamoko au tiko mondokolio aku melemania lino nokoromele gotema kolo toko ningi popo toko kapi ningi. Nalo linoni melema pali terimu Gotenga imbi paa waliwalima ola kau molopili nimbo lipo ola mundemili. I paa.

<sup>26</sup> Aku ulu teringimunga Goteni eno ulu kerima konopu tiko teko molangei nimbe eno tiye kolorumu. Akumunga ambomania yema kinye telemala ulu naa teko ambomani amboma kinye enonganero teringi.

<sup>27</sup> Aku tepa mele iyemani kape amboma kinye konopu mondoko telemala ulu tiye kolko, iyema kinye enonganero konopu mondoko teringi. Iyemani iyema kinye pipili teli ulu kerima teringimunga enonga ulu teko kenjiringimanga pundi tolima lingi.

<sup>28</sup> Ulu teringimunga ungu te peremola, akumu nemboi. Gote paimbo moromo mele naa pilipo molomolo kinye ulure molo ningi akumunga Goteni ulu paa kerima konopuni pilinge konopuma kau pepili imbomani manda naa pilko telemala mele we teko molangei nimbe tiye kolorumu.

<sup>29</sup> Enonga konopuna ulu pulu keri lupe lupe awini perimumunga enoni ulu kerima teko, mele awini noirimoma kanoko konopu mondoko liemboa konopu leko, imbo mare kinye wapu ulu kerinale teko, aku uluma kau teko moromele. Imbo te mele awini noirimomu kanoko keri pilko, imboma toko kondoko, imboma kinye takalipu molamili naa ningi nendeleme ningi, kolo toli uluma teko, imboma kinye konopu keri panjiko teko kenjiko, aku uluma tengendo kau konopu kimbo tiko moromele. Enoni imbomanga ungu umbulkondo nindiko,

<sup>30</sup> imbo teni ungu te i tepa nimu ningko kolo toko, Gote kinye konopu keri panjiko, imbomando ungu keri awini ningko, mongo mongo kondoko enonga imbi liko ola munduko, kalambo naa ningko, ulu pulu keri mare pora tondongeindo konopuni pilko i tepo teamili ningko teko, anupili lapalini ungu nimelema naa pilko tui tiko,

<sup>31</sup> enonga konopu penga te naa pepili molko, ulu te aku tepo teamili ningko panjikolio naa teko, enonga pulu ltemo imboma konopu naa mondoko, we imboma kondo naa kolko teko kenjiko, aku teremele.

<sup>32</sup> Gotenga ungu mane tumbi nilimuni imbomani aku uluma teremelema paa kolonge nimbe moromo ungu manemu paimbo pimele nalo enoni tai ningko ulu pulu keri akuma we teko moromele. Akumu kau molo. Imbo aku ulu pulu kerima teko moromele imbomanga imbi liko ola munduko kapi nimelela.

## 2

### *Goteni kot toyap topa pimo ungumu*

<sup>1</sup> Goteni imbo ulu keri teremelema pundu tombalo akumunga nu ambe telka imbo tendo da iye keri ninoya? Nu kape ulu keri aku tepama terenomunga da iye keri moromo ningolio wali aku iyemu nu. Goteni nu tombai tembalo wali na iye kerire naa moro manda ninoya?

<sup>2</sup> Imbo marenin ne imbomani ulu keri teremele, eno molo nimele imboma Goteni tombai wali linoni yu ulu paimbomu tembalo konopu ltemolo.

<sup>3</sup> Akumunga enoni imbo lupema kanoko apurukolio mongo mongo kondoromele nimele nalo eno kape aku tekola mongo kondoromele akumu Goteni imboma apurupe mongo kondoringimunga mindili nangei nimbelo wali eno tiye kolopaaku tepa enonga uluma apurupe naa nimbelo konopu ltemeleya?

<sup>4</sup> Molo Goteni eno tepa kondoromo mele ulure molo ningko umbulu tiko moromeleya? Goteni eno kinye ulu awini tepa kondopa, eno kinye mumindili walitikale naa kolopa, enonga ulu kerimanga i teli oi pundu naa tambo nimbe moromo. Goteniaku tepa eno kinye tepa kondoromo ulumuni eno enonga ulu pulu kerima kanoko keri pilko konopu topele toko teangei nimo ulu naa liko manjirimeleya?

<sup>5</sup> Nalo eno tiko konopu topele naa toromelemunga Goteni mumindili kolopa kot tumbi tipe pilimbelo walimu mona lemabalona kanonge wali Goteni eno kinyemindili paa olandopa kolopalie mumindili wali akuna tanda lepa ltendembalo.

<sup>6</sup> Imbomanga enonga ulu teremelemanga Goteni eno yaka nimbe pundu tombalo.

<sup>7</sup> Imbo marenin Gote kinye yunge pa telina molopo kondopo, Goteni nu teko kondorunu nimbolumunga nanga imbi ola molopili molopo, waliwalima molopa kau pumbe pora naa nili ulu pulumu paa liemboa ningko mindili nongo ulu pengama teremele imboma Goteni waliwalima molopa kondopa kau puli ulu pulumu timbelo.

<sup>8</sup> Nalo imbo marenin imbo lupema ulure molo. Gote ulure molola ningko eno enongano pilko teko ungu tukumemu tiye kolko umbulu tiko, ulu kerima kau pilko teremele imboma Goteni eno paa mumindili kolopa pundu tambo nimbe mindili nongo molonge ulu pulumu timbelo.

<sup>9</sup> Mongo mongo kondoromele imboma pali ulu umbuni awilima kinye mindili noli awilima kinye eno kinye te te nimbe wendo ombalo. Juda imboma kinye kiyendo wendo ombalo, we imboma kinye kape wendo ombalola.

<sup>10</sup> Nalo imbo marenin molko kondoromele imbomando te te nimbe Goteni nimbeindo: Eno na kinye nanga pa telina peya kopu tepo molopo kondopo, teko kondoringi nimbe imbi ola molopa konopu u nipili molangei nimbelo. Juda imbomando kape kiyendo aku tepa nimbelo, we imbomando kape nimbela.

<sup>11</sup> Goteni imbo talapema lupe lupe naa apurupe, imboma pali tendeku tipe apurumbelo.

<sup>12</sup> We imbomani Gotenga ungu mane Mosesini nimbe tirimuma naa peremonaa naa pilkolio ulu pulu kerima teremele imboma paimbo Goteni enonga kot pilipe mindili nangei nimbelo nalo nanga ungu manema toko tangondoringi naa nimbelo. Juda imbomani Gotenga ungu manema eno kinye peremo akuma pilkolio, ulu pulu kerima teremelemunga Goteni enonga kot pilipelia eno nanga ungu manema toko tangondoringi nimbe eno mindili nangei nimbela.

<sup>13</sup> Imbomani ungu manema komuni kau pimelemunga Goteni kanopa imbo toyatolima nimbe naa karomo, molo. Unumanemani teao nimo mele pilko tengi tiko teremele imboma Goteni imbo toyatolima nimbo kanombo nimo akumunga Goteniaku tepa imboma pali apurupe mindili nangei nimbelo.

<sup>14</sup> Juda imboma ningko naa moromele imboma paimbo Gotenga Mosesini ungu mane nimbe tirimuma naa peremonaa naa pilko moromele nalo we konopuni pilkolio i tepo tembo kinye penga ningko liko manjikolio Gotenga ungu manemani teao nimo mele aku teko teremele. Paimbo Mosesinga ungu manema eno kinye naa

peremo nalo aku ulu teremele wali Gotenga ungu manema eno kinye peremo.

<sup>15</sup> Aku imbomani teremele ulumani Gotenga ungu manema enonga konopuna peremo ulumu lipe ondoromo. Enoni uluma teremele wali i ulumu teko kenjirimele, i ulumu teko kondoromele konopu mandoko ltemele aku tepa Gotenga ungu manema paimbo enonga konopuna peremo mele enonga konopumani lipe ondoromola.

<sup>16</sup> Akumunga Gotenga kot walimu wendo ombao wali Jisas Kraist kot pileli iyemu molopa imbomanga konopumanga lopeke tepe peremo uluma kape apurumbeindo imboma pali aku tepa kanopa kot pilimbelo. Ungu tukume nimbo tiromuni aku tepa nimbe tirimo.

*Juda imbomani ungu manema kambu topo nimolomuni Goteni eno tepa tukundo limbelo konopu leringi ungumi*

<sup>17</sup> Enope, eno Juda imboma moromolo nimele imboma, Gotenga ungu mane Mosesini nimbe tirimuma kambu topo nimbo manda moromolo ningi, lino Juda imboma kau Goteni kanopa lipe nanga imboma nimu imboma moromolo, eno we imbomanga Gote molo ningi kelkele toko enonga imbi liko ola munduko,

<sup>18</sup> Goteni eno teangei nimbe konopu mon doromo mele pilko, Gotenga ungu manema eno mane tiringi mele pilkolio ulu penga toya tolima apuruko pilko ima penga ningi,

<sup>19-20</sup> eno pilkolio Gotenga ungu manema paimbo lino kinye pepa ungu puluma kinye ungu paimboma kinye akuma pali aku ungu manema kinye paimbo peremo akumunga linoni mongo lili aulke naa karomele imboma paimbo lipo tapopo mepo andopo, tumbulu tolina moromele imbomanga lino paimbo pa tendelina molopo, imbo konopu naa peremoma kinye bakulu keloma kinye paimbo mane tirimolo nimele.

<sup>21</sup> Paimbo aku teko ningolio imbo lupema mane tirimele mele eno enongan ambe telka naa lombimeleya? Imboma mane tikolio wapu naa naio ningolio pele eno enongan ambe telka wapu noromeleya?

<sup>22</sup> Imbomando ambo iye pulima iye lupema kinye wapu ulu kerinale naa teko, iye ambo lilima ambo lupema kinye wapu ulu kerinale naa teaio ningolio eno aku ulu ambe telka teremeleya? Imbomanji we melema au tiko mondokolio linonga nokoromele gotema ningi popo toromele melema kanoko keri pilkolio pele Juda imbo naa molko we imbo moromelemani ulkema takoko akuna tukundo pungo aku melema au tiko mondokyo popo toromele

ulkemanga tuku pungo melema ambe telka kanoko penga pilko wapu ltmeleya?

<sup>23</sup> Gotenga ungu manema eno kinye kau peremo akumunga eno paa imbo nomima kelkele tokolio enonga imbi liko ola mundukolio ambe telka Gotenga ungu manema toko tangondoromelemani Gotenga imbi liko ola tondoromeleya?

<sup>24</sup> Aku ulu teremelemunga ungu te Gotenga Bukuna moromo wendo oromo, akumu i tepe,

Eno Juda mangamani teremele ulumunga Juda imboma ningi naa moromele imbomani Gote marake teko yunge imbiungu taka tondoromele. (*Ais 52:5*)

*Juda imbomani ungulumanga kangi pundu te kopiko wendo ltingimunga ungu pulum*

<sup>25</sup> Eno Juda imbomani ungu manema pilko tengi tiko tengi lemo ungulumanga kangi pundu te kopiko wendo ltmele ulumuni eno taporomo, nalo ungu manema naa lombilinge lemo ungulumanga kangi pundu te kopirimelemu ulu te naa teremo. Aku ulu teremelemunga imbo kangi pundu te naa kopili imboma mele moromele.

<sup>26</sup> We imbomani kangi pundu te naa kopikolio Gotenga ungu manemani teaio nimo mele pilko tengi lemo Goteni eno kanopa imbo kangi pundu te kopili Juda imboma mele moromele nimbe kanombalo.

<sup>27</sup> Kangi pundu te naa kopiko ungu manema tengi tiko teremele imbomani eno Juda imbo kangi pundu te kopiko eno kinye ungu mane peremoma naa lombimele imboma enondo ningeindo, Gotenga ungu manema naa lombimelemungaaku ulu teko kenjirimele kani eno paa mindili nangei ningi.

<sup>28</sup> Imbo te yunge kangi pundu kopirimo ulu kau kanopalie yu Juda imbomu nimbelomu yu paimbo Juda imbomu molo. Kangi pundu te kopiko wendo liko lteremele akumu kangindo kau ulure tepili ningolio teremele kinye ulure naa teremo.

<sup>29</sup> Imbo te konopuna tukundo ulu te teremo akumu kau Juda imbo tukumemu moromo. Kangi pundu te kopiko wendo ltmele akumunga pulumu konopuna tukundo Gotenga imbomu nimbe mako peremo. Kangi pundu te i teko kopiko wendo liengei nimu ungu manemuni yunu ulure naa teremo. Gotenga Minimuni konopuna tukundo teremo akumuni ulu tukumemu teremo. Aku tepe moromo imbomu, we imbomani kanoko penga pilko kapi ningi imbi liko ola naa mundurumele nalo Goteni imbo akumu kanopa penga

pilipe kapi nimbe yunge imbimu lipe ola mundurumo.

### 3

*Goteni tembo nimbe panjirimo ungumu paimbo temballo*

<sup>1</sup> Juda imbonani kangi te kopirimele aku ulu pulumuni naa tapomo lemo Juda imbona we imbo lupemanga ambe teko olandopa molongeya? Molo kangi pundi te kopirimele ulu pulumunga ambe telka ulu penga te wendo oromoya?

<sup>2</sup> Ama, Goteni Juda imbona olandopa taporomo. Goteni yunge unguma Juda imbonani nokangei nimbe tirimu. Aku ulu muli mulimu Juda imbonanga kindo tirimu.

<sup>3</sup> Paimbo, Juda imbo marenai aku unguma paimbo ningi ipuki naa tirimele nalo aku teko Gotenga unguma pilko naa ltimeleunga Goteni tembo nimbe panjirimu ungu naa tembaloya?

<sup>4</sup> Paa molo! Imbonani pali kolo toromele nalo Goteni kau waliwalima ungu paimbona kau nimo. Aku tepa mele yunge Bukuna ungu te nimo, akumu i tepa, Gote, nuni ungu te nino wali imbo teni kolo torono ungu paa manda naa nimbelo. Na kot tendenio wali, ungure akupo manda naa nimbo. Nani nu kot tendelkanje nimbo muli muli manda naa anjilka, (Sng 51:4) nimbe moromo.

<sup>5-6</sup> Manda, lino Juda imbonanga ulu keri teremolmani Gotenga ulu toya toli tere-moma tepa mona ltenderemo lemo linoni ungu ambelemu manda nimoloya? Goteni lino ulu pulu keri teremolomanga pundi topa mindili tirimo wali tepa kenjirimu nimoloya? Aku tepo paa manda naa nimolo! Goteni ulu toya tolima kau naa telkanje maina imbonanga ulu puluma ambe tepa tumbi tipe pilipe apurulkanje? Manda tumbi tipe naa pilipe apurulka. I nio akumu we imbo teni konopuni pilipe karaye tepa nilka mele nio.

<sup>7</sup> Nalo imbo teni konopuni pilipelite nimbeindo, nani kolo toro ulumani Gotenga imbi paa oladopa molombaindo yunge ungu paimbona tepa mona lendemo lemo yuni nando teko kenjirinomunga mindili nani ambe temona nimoya nilka.

<sup>8</sup> Imbo teniaku tepa nilkanje imbonareni manda naa nimele ungumu ningi ulu pengama wendo opili nimbo ulu kerima teamili nilimala. Ungu akumu imbo marenai kolo toko nando aku ungu andoko nino nimele. Aku teko nimelemunga Goteni paimbo mindili timbelona nonge.

*Ulu toya tolima teremo imbo te naa moromo ungumu*

<sup>9</sup> Aku lemo i ungumunga pulumu ambe tepa ltemoya? Goteni lino Juda imbona kanopa penga pilipe we imbona kanopa keri pimoya? Paa molo! Oi akumundo ungu te nindu kanomu. Linoni ulu pulu kerima teremolo nindu kano ungumuni lino Juda imbona kape we imbona kinye lino waye pange tenderemo.

<sup>10</sup> Gotenga Bukuna aku tepa ungu mare moromo. Akumuni nimbeindo, Imbo toya toli te naa moromo.

<sup>11</sup> Imbo teni Gote liko manjiko te naa mromele. Goteni kanopa penga pilipili uluma tembo nimbe imbo teni Gote kinye molomboi ungu naa nimo.

<sup>12</sup> Eno palimanu Gote umbulu tiko eno puringi. Eno waye loi leringi. Ulu kandiki teli naa teremo.

<sup>13</sup> Manga tipe kondoli karoloma, ungu kolo pepa wendo olima akumanu waimbemanga kerena tomo peremo mele enonga keremanga aku tepa imbona nendo mola yando mola teko aku ungu andoko nimele.

<sup>14</sup> Waliwalima imbona kinye mumindili kolko paa molko kenjengei nimele ungumuni imbona umbuni awini tirimele.

<sup>15</sup> Waliwalima imbona toko kondongeindo konopu tiko toko kondoko,

<sup>16</sup> imbona mindili nongo molangai ningi teko kenjiko umbuni tiko,

<sup>17</sup> imbona kinye konopu tendekuna pupili molonge ulumu kanoko imbi naa tirimele.

<sup>18</sup> Eno Gote iye paa Awilimu ningi yu kinye alaye kolte kape pipili naa koromele, (Sng 14:1-3, 53:1-3, 5:9, 140:3, 10:7, 36:1; Ais 59:7-8)

nimbe moromo mele aku teko moromele.

<sup>19</sup> Paimbo lino i tepo lipo manjirimolo. Imbo tendekurenai kape na molopo kondoro, na imbo toya tolimu naa nipili. Kombumanga pali moromele imbona Goteni kanopa uluma keri teremele nimbe kanopili nimbe Gotenga ungu manemani nimo akumu ungu manemani nokoromo Juda imbonando nimo. Akumunga Juda imbonani kape Goteni lino molko kondoromele nimbe karomo ningi manda naa ninge.

<sup>20</sup> Akumunga, imbo teni Goteni teaio nimbe oi ungu mane tirimuma paa pali manda naa lombilimo. Gotenga ungu mane tirimuma paa lombilto nimbelo imbo te Goteni nundo imbo toya tolimu naa nimbelo. Aku ungu manemani lino ulu pulu keri tepo moromoloma lipe ondoromo aku wali lino akuma pilipolio Goteni konopu naa mondoromo ulu puluma teremolo.

*Gote ipuki tirimolo akumunga Goteni lino imbo toya tolima nimbe kanombalo ungumu*

<sup>21</sup> Lino imbo toya tolima molomolo ulumu Goteni aku ulu mepa lino kanamili nimbelie moro tondoromo. Aku ulumu Mosesini oi mane tirimu ungumuni mepa wendo naa orumu nalo oi Gotenga profet iyemani aku ulumu i tepa wendo ombalo ningi bukuna toringi. Mosesini kape aku ulumu i tepa Itemo nimbe yunge ungu mane peremo bukuna torumu.

<sup>22</sup> Goteni imbo toya tolima nimbe karomo mele i tepa, Jisas Kraistini linonga nimbe tenderimu kano ulumu paimbo ningi ipuki tirimele imboma kau Goteni kanopa eno imbo toya tolima nimbe karomo. Juda imboma kinye, we imboma kape, imboma peya ulu tendekumu teangei nimu.

<sup>23</sup> Imbomani pali ulu pulu kerima teko Goteni konopu mondoromo uluma naa tekolio yu kinye pa telina naa moromele.

<sup>24</sup> Goteni eno manga lupe lupema pali we kondo kolopa linondo ulu keri teringimunga pundu naa tangei, imbo toya tolima molko, nanga kumbekerena ongo molangei nimu. Jisas Kraistini linonga nimbe kolo wangopa kolorumu ulumuni Gote lino peya konopu noipe altopo tendekuna molamili nimu.

<sup>25</sup> Enonga ulu pulu keri teremelemanga kolangei tambo naa nembo nimbe nanga ungelumu enonga nimbe kolo wangopa kolopili nimbe Goteni yu yando tirimu. Aku tepalie imbo te te ningi yu paimbo nanga nimbe kolo wangopa kolorumu. Yunge meme ondorumunni nanga ulu pulu keri teroma manda kulu tondombalo kani paimbo ombo kulu tondopili ningi imboma konopu kake tepili molonge Goteni kanombalo. Na toya topo molopo ulu pulu toya tolima kau konopu mondopo, ulu pulu kerima kanopo keri pio uluma pilengei nimbe Goteni Jisas Kraist yando tirimu. Yunoi omoloringi imboma we kondo kolopa enonga ulu pulu keri teringima kanopalie we tiye kolopa aku imboma umbuni naa tirimu.

<sup>26</sup> Nalo kinye moromele imbomani ulu pulu kerima we tiye naa kolopo ulu pulu toya tolima kau konopu mondoro ningi pilengei nimbe, Goteni Jisas linonga ulu pulu kerimanga kolo wangopa kolopili nimbe yando tirimu. Jisas paimbo linonga ulu pulu kerimanga kolo wangopa kolorumu ningi ipuki tirimele imbomando Goteni yunge imbo toya tolima nimo.

<sup>27</sup> Akumunga, kinye imbo teni yu iye toya toli moro nimbe yunge imbibmu lipe ola mundumbelomunga pulure naa Itemo. Imbo teni yunge engemuni ungu manema yuni yunu pilipe lipe teremo ulumuni yu

aye toya toli moro nimo ulumu tepa pora naa timbelo. Nalo Jisas ipuki tirimele aku ulumuni imboma eno none teremele ulumu tepa pora timbelo.

<sup>28</sup> Aku ambe telka, Jisas ipuki tirimele-muni kau Goteni imbomando yunge imbo toya tolima moromele ungumuni nimo nimolo. Mosesini tirimu mane ungu lom-bimelemunga aku tepa naa nimbelo.

<sup>29</sup> Gote we imbomanga Gote, molo Juda imbomanga kauya? Aku molo. Yu imbo-manga pali Gote.

<sup>30</sup> Gote tendekumu kau moromo, akumuni imbo kangti pundu te kopiko wendo limelemani iye nomi Kraist yu kau ipuki tirimelema kanopa imbo toya tolima nimbe, imbo kangti pundu te naa kopiko wendo limelemani iye nomi Kraist yu kau ipuki tirimelema kanopa imbo toya tolima nimbelola.

<sup>31</sup> Aku tepo nimbolio wali Kraist paimbo nimbo ipuki tirimolo ulumuni Moses tirimu ungu manema ulure molo nimoloya? Paa molo. Kraist paimbo nimbo ipuki tirimolo ulumuni ungu manema enge nipili nimolo.

## 4

*Goteni Abraham iye toya tolimu nimu ungumunda pulumu*

<sup>1</sup> Abraham lino kalopa Itimu iye kolepa, yu ambele ulumu terimumuna kanopalie Goteni yu iye toya tolimu nimu nimoloya?

<sup>2</sup> Abrahameni yu ulu terimumanga paimbo Goteni yu iye toya tolimu nimbe kanolkanje yu yunge imbi lipe ola mundulka. Nalo Gotenga kumbekerena angilipelie aku tepe naa nimu.

<sup>3</sup> Aku ungumundo Gotenga bukumuni ungu ambeleme nimoya? Akumuni nim-beindo,

Goteni Abraham kinye tembo nimbe pan-jirimu ungumundi Abrahameni paimbo nimo nimbe ipuki tirimumunga Goteni yu iye toya tolimu nimbe kanorumu, (Stt 15:6) nimbe peremo.

<sup>4</sup> Imbo teni imbo tengah kongonomu tenderemomunga mele te tirimomu mele kipungere ltio konopu naa lembalo. Yunge kongono tenderomunga tirimuna ltio konopu lembalo.

<sup>5</sup> Aku paimbo nalo imbo teni Goteni na imbo toya tolimu nimbe kanopili nimbe yunu ulure naa tepe aku ulu keri terimu imbo te Jisasini yunge nimbe tenderimunga Goteni yu imbo toya tolimu nimbeli ipuki tirimmo akumunga ipuki tirimmo ulumuni Goteni yu iye toya tolimu imbi timbelo.

<sup>6</sup> Devitini aku tepala nimu. Goteni imbo teni i tepo tendu kani nunge iye toya toli

moro ungu naa nimomu imbo toya tolimu nimbe karomo imbonu yu malo ningo pilengei nimbelie nimbeindo,

<sup>7</sup> Imbomanga ulu keri teremelema Goteni tiye kolopa,  
enonga ulu pulu kerima kamukumu kulu tondoromo imbona, eno malo.  
<sup>8</sup> Imbo tengu ulu pulu keri teremomanga Awilimuni altopa naa lipa manjipe konopuni tiye koromo imbonu, yu malo,  
(Sng 32:1-2)

nimu.

<sup>9</sup> I molko kondonge mele Devitini nimu ulumu imbo kangi te kopirimele imbo akumanga kauya? Molo kano ulu pulumu imbo kangi te naa kopirimele imbo akumanga peyaya? Abrahameni Goteni nimu mele paimbo nimbe ipuki tirimumunga Goteni yu iye toya tolimu nimbe kanorumu aku tepo nilipo oro.

<sup>10</sup> Abraham ambe tepa molorumu wali Goteni kanopalie iye toya tolimu nimbe kanorumuya? Yu kangi pundu te kopirimu wali Goteni iye toya tolimu nimu molo oi kangi pundu te naa kopili aku tepa nimuya? Oi naa kopili aku wali nimu.

<sup>11</sup> Yu oi kangi pundu te naa kopipelie Goteni nimu ungu paimbo nimbe ipuki tirimumunga Goteni yu iye toya tolimu nimu. Iiyemu Goteni iye toya tolimu nimbe karomo ningo kanangei nimbelie kangi pundu te i teko kopiwi nimbe mane tirimu akumu altopa mane tirimu. Akumunga imbo kangi pundu te naa kopiko Goteni nimo mele paimbo ningi ipuki tirimeleunga Goteniaku imbona imbo toya tolimu nimbe karomo imbomanga pali Abraham yuaku imbomanga anda kolepamu.

<sup>12</sup> Juda imbomani enonga kangi pundu te kopirimele aku ulu pulumunga kau yu enonga kolepa, molo. Nalo oi Abraham kangi pundu te naa kopipelie Goteni nimu mele paimbo nimbe ipuki tirimu ulu lombilko kangi pundu te kopiririmele imbo marenaiaku teko ipuki tirimeleunga Abraham yu enonga kolepa iyemula.

*Goteni eno kinye tembo nimbe panjirimu ungumu paimbo ningi ipuki tirimele imbando pali nimu*

<sup>13</sup> Goteni maina mele terimuma pali Abraham kinye yuni kalopa limbelo imbona kinye eno nanga maimu timbo nimbe panjirimu akumu Abrahameni ungu mane mare pilipe tengi tipe terimumunga naa nimu. Abrahameni Goteni nimu ungu paimbo nimbe ipuki tirimumunga Goteni Abraham yu iye toya tolimu nimbe kanopalie melema pali timbo nimbe, nimbe panjirimu.

<sup>14</sup> Nalo ungu manema pilko tengi tiko tengemunga Goteni melema timbo nimbe

panjilkanje yuni nimo ungu paimbo aku tepa tembalo ningo ipuki tili ulumuni ulure naa telka. Aku tepa lekanje Goteni melema timbo nimbe panjirimu ungumu akumu tukume naa pelka.

<sup>15</sup> Ungu manema peremo wali imbomani aku ulumu naa lombileli ulumuni Gote tepa mumindili kondoromo ulumu lipo manjiri-molo. Nalo Mosesinga ungu manemu naa pelkanje imbomando ambe telka naa lombiltimeleya ungu naa nilimala.

<sup>16</sup> Ungu manemanga pulumu aku tepa peremomunga Abrahamendo timbo nimbo, nimbo panjira ungu nimumu Goteni imbona kinye konopu noipe we kondo koromomunga kau wendo ombalo. Aku ungumu Abraham kinye yuni kalopa limbelo imbona kinye enonga pali ungumu pepili nimbelie Goteni tembo nimbe panjirimu ungu paimbo tembalo ningi ipuki tingemunga kau i ungumu itemo nimu. Imbonani ungu manema pilko tengi tiko teremele aku imbomando kau naa nimu. Abrahameni Goteni nimu mele paimbo nimo lepamo nimbe ipuki tirimu ulu aku teko ipuki tinge imbona enondo kape peya nimu. Abraham yu linonga pali anda kolepamu.

<sup>17</sup> Abraham lino Goteni nimo mele paimbo nimbo ipuki timolo imbomanga pali anda kolepamu akumunga ungu te Gotenga bukuna moromo. Akumu i tepe:

Goteni Abraham kinye nimbe panjipelie nimbeindo, "Nu manga pupu awininga anda kolepamu molani," nimu,

(Stt 17:5)

nimbe peremo. Akumundo Abrahameni paimbo nimbe ipuki tirimu Goteni Abraham yu linonga pali anda kolepamu moromo nimbe kanorumu. Goteni oi koloringi imbona altoko koinjo molonge ulu pulumu tipe, mele naa itemoma wendo opili nimo kinye paimbo aku tepa wendo oromoaku Gote Abrahameni paimbo nimo nimbe ipuki tirimu.

<sup>18</sup> Goteni anda kolepa Abrahamendo nu imbo talape awini kalko linio nimbe panjirimu ungumu Abraham yuni ipuki tipe litmu. Kano wali amboi anda lembolomunga ungu nimbe panjirimu ungumu we manda wendo naa ombalo nalo yuni kamukumu tembalo nimbe Abraham yu nokopa mologalie oi naa kanorumu nalo Goteni nimu mele yuni Goteni kolo naa toromona paimbo walite tembalo nimbe pilipe tiye naa kolopalie tembalo nimbe we nokopa molorumu. Gote yuni ungu nimbe panjirimu ungumu i tepe,

Yuni Abrahamendo nimbeindo, Nuni kalko linio imbona paa pulumu molonge,  
(Stt 15:5)

nimu. Aku tepa nimu wali Abrahameni pilipe paimbo tembalo nimbe ipuki tipelie nokopa molopalie altopa yu imbo talape awininga anda kolepamu molorumu.

<sup>19</sup> Yu molopili poinyema pali 100 mele omba purumu yu anda lepa pora tipelie ambomu kinye pepalai bakulu mewi engemu naa perimu. Yunge ambo Sara amboi lerimu, aku teko paimbo moloringili nalo yuni paa alaye kolte kape Gotenga nimu ungumu tiye naa kolorumu.

<sup>20-21</sup> Goteni nu ungu menio nimbe panjirimunu pilipe kau molopalie konopu talo naa lepa yunge engemuni manda tembalo nimbe ipuki tipelie nimumuni, Goteni ungu nimbe panjirimunu paa wendo ombalo nimbe pilipe molopalie yuni Gotenga imbi lipe ola mundupe kau molopalie yunge ipuki tirimu ulumu olando olando purumu.

<sup>22</sup> Yuaku tepa ipuki tipe molorumuna Goteni yu iye toya tolimu moromo nimbe kanorumi.

<sup>23</sup> Goteni yu iye toya tolimu nimbe kanorumiaku ungumu Abrahamenga kau ningo aku teko bukuna naa toringi.

<sup>24</sup> Lino yandopa yandopa pilemilia ningo aku ungumu bukuna tondoringi. Altopa lino kinye pilipoli Jisas linonga Awilimukolorumu wali Yu makilipo koinjo molopili nimbelie terimu Gote nimbo pilipo yu nimo mele kolo naa topa paimbo tembalo nimbo ipuki tipo molomolo imboma yuni Abraham kanorumu mele lino aku tepa imbo toya tolima nimbe karomola.

<sup>25</sup> Goteni Jisas linonga nimbe kolorumuna linoni ulu keri terimulumunga ungu te lino kinye naa peremo nimbelie Jisas makinjirimu. Aku tepalie lino imbo toya tolima nimu.

## **Lino Kraist Kinye Peya Kolopolio Yu Kinye Peya Makilipo Koinjo Moromolo Ungumu**

### 5

*Kraistini terimumuni lino kinye Gote kinye lipe tendeku tirimu*

<sup>1</sup> Aku tepa nimumunga, Goteni nimu ungu akumu paimbo nimbo ipuki tirimolumunga Goteni linonga ulu pulu kerima tiye kolopa pundu naa topa imbo toya tolima moromele nimbe karomo akumunga linonga Iye Awili Jisas Kraistini tenderimumuni lino Gote kinye opa pepo konopu tendekuna pupili moromolo.

<sup>2</sup> Lino paimbo nimbo ipuki tirimolo imboma, Goteni lino we kondo koromo ulu pulumunga tukundo molamili nimbelie aku Jisasini linonga nimbe tenderimu ulumuni lino tepa tukundo ltimu. Gote kinye peya

pumbo mulu kombuna tapu topo molomolo nimbo pilipolio lino pende pende tepo nokopo moromolola.

<sup>3</sup> Akumunga kau pende naa temolo. Lino kinye umbuni wendo oromomani lino ipuki tirimolo ulumu tepa enge tirimo nimbo pilipolio aku umbunima wendo oromo wali lino tono koltomolo.

<sup>4</sup> Lino ipuki tirimolo ulumu tepa enge tirimo ulumuni manda manjipe kanopolio uluma wendo oromo wali lino tepa mainye naa munduli Goteni lino yunge imbo enge nilima moromolo nimo. Manda manjipe kanopili ulumuni lino tepa mainye naa munduli Gotenga imbo enge nilima moromolo konopu lepolio yu kinye peya molamili waio nimo pilipolio yuni lino kamukumu tukundo limbelo nimbolio nokopo moromolo.

<sup>5</sup> Goteni Mini Kake Teli oi lino tirimu akumuni linonga konopuna Gote lino kinye we imboma kape konopu mondoromo ulu akumu tuku panjirimu akumunga Goteni lino tapombalo nimbolio we naa nokopo moromolo. Paimbo wendo ombalo nimbo konopu tipo nokopo moromolo ulumu ombalonje naa ombalonje nimbo konopu awini lipo naa mundurumolo. Paa wendo ombalo.

<sup>6</sup> Linonga ulu pulu keri teremoloma lino linonganatiye kolopo topo mainye mundumolo enge te naa perimu wali Goteni wai panjirimuna Kraistini lino Gote umbulu tipo tepo kenjili imboranga nimbe omnia kolorumu.

<sup>7</sup> Gotenga ungu manema pilipe lipe tepa kondoromo imbo toya toli te tongei tengewali imbo teni yu kondo kolopa molo nimbe, ne iyemu tongei kolona na kolamboi ungu naa nimbelo. Molo imboma kondo kolopa kandiki teremo imbo pengate tongei tengewali imbo teni yu kondo kolopa molo nimbe, ne iyemu tongei kolona kolamboi nimbelonje. Aku ulu manda naa telkanje.

<sup>8</sup> Akumu paimbo nalo Goteni lino konopu mondoro ulu imu eno kanangei nimbe lino ulu pulu keri tepi imboma kau molamili Goteni lino naa topili nimbe Gote yunge Malo Kraist linonga nimbe kolo wangopa kolorumuaku tepa Gote lino paa konopu mondoromo ulu Gote yuni lino lipe ondoruru.

<sup>9</sup> Kraist linonga nimbe kolombaindo yunge meme ondopa omiba wendo purumu akumuni Goteni linonga ulu pulu kerima tiye kolopa pundu tambo ungu naa nimbe lino imbo toya toli imboma nimbe karomo lemo akumunga olando tipe Kraist linonga nimbe tenderimu kanomuni Gote mumindili kolombalo waimu wendo

ombalo wali akuna lino kinye ulure naa pembalo.

<sup>10</sup> Lino yu kinye opa pule topo molorumulu wali yunge Malo linonga nimbe kolorumu aku ulumuni lino Gote kinye altoko konopu tendekuna pupili kopu teko molangei nimbe lino lipe Gote kinye lipe popo tirimu. Kinye yu kinye paa tendekuna moromolo lemo Kraist makilipe koinjo moromoaku ulumuni Goteni lino kololi aulkena wendo lipe tukundo limbelo.

<sup>11</sup> Aku ulumu kau molo. Ulu te peya i tepea: Linonga Awili Jisas Kraistini lino Gote kinye lino tepea ame tondorandumunga Gote kinye kopu tepe moromolona Kraistini aku terimu ulumuni, kinye lino Gote kinye paa tono kolopo moromolo.

*Iye Adameni terimu ulumuni kololi ulumu wendo orumu, kelepa Kraistini terimu ulumuni koinjo molko kau puli ulumu pilke topa noirimu*

<sup>12</sup> Lino Gote kinye opa pule topolio altopo yu kinye konopu tendekuna pupili moromolo nio akumunga ungu te pilengen nemboi. Oi iye Adameniulu pulu keri te terimu waliulu pulu kerimu kamukumu maina itemo. Yuni terimuakuulu pulu kerimukumu kololi ulumu wendo orumu. Akumunga kinyeyandopa yandopa lino imbomani pali ulu pulu kerima teremolona lino kinye pali kololi ulu pulumu wendo oromo.

<sup>13</sup> Goteni Mosesindo imboma i teko i teko teangei niwi nimbe ungu manema oi naa nimbe tipili mai kombuna ulu pulu kerima oi lerimu. Nalo Mosesini Gotenga ungu manema imboma oi naa nimbe tipili oi ulu pulu kerima teringi wali imbomani i ulu teremolomunga karomolo ungu pulumu naa liko manjiringi.

<sup>14</sup> Nalo kololi ulumu Adam molorumulu wali lerimu. Pele yandopa Moses molorumu wali we lerimula. Adameni Gotenga ungumu tengenaa tipelie kolorumu. Imbo mareni Adam terimu mele Gotenga nimungumu umbulu naa tiringi nalo we koloringi. Iye Adameni terimu ulumupe iye altopa ombalomunga ulumu manda lepa terimu.

<sup>15</sup> Nalo teringilimunga ulu pulu paa lupe lupe. Goteni lino we kondo kolopalie terimu ulu akumu paa lupela. Adameni terimu ulu pulu keriaku ulumu yu paa lupela. I ulu talo tendeku tipe molo, lupe lupe talo. Iye tendekumuni ulu pulu keri terimuaku ulumuni imbo pulumu koromele nalo Goteni lino imboma kinye konopu noipe we kondo kololi ulumuni mele paa pengamu we timbeindo Jisas Kraist we tirimu, aku iyemuni kau imboma we kondo kolopa imbo pulumu koinjo molko kondoko kau punge ulumu tirimu.

<sup>16</sup> Akumunga ungu te peremola. Goteni we tirimumu kinye, aku iye tendeku ulu pulu keri terimumunga wendo orumu ulumu kinye, lupe lupe. Iye tendekumuni ulu pulu keri terimu akumunga imboma pali Goteni kot tendepalie eno pali ulu keri teremelemunga mindili nongo molko kau pangei nimbelo nalo Goteni we tirimu ulu i tepea: Imbomani ulu pulu keri awini teringi wali Goteni mindili nangei nilka nalo we kondo kolopa imbomandoaku tepea naa nimbe ulu pulu kerima tiye kolopo lino imbo toya tolina molamili nimbelie yu kopu tepe molamili nimo.

<sup>17</sup> Iye tendekumuni Gotenga ungu tengenaa tirimu akumunga iye akumuni ulu pulu keri terimumunga kololi ulu pulumu iye nomi king mele moromo wali imboma pali maindo moloringi. Goteni imboma we kondo kololi ulumu kinyeyuni lino we tirimu ulumu talonga engemu paa olandopamu. Goteni imboma we kondo awili tepea kololi ulu pulumu kinye Goteni imbo toya tolina nimbelo ulu pulumu linge imboma eno iye tendeku Jisas Kraistini terimumunga iye nomi kingima molko melema nokoko koinjo molko kau punge.

<sup>18</sup> Aku lemo, iye tendekumuni ungumu tengenaa tirimumunga Goteni imboma pali kot tendepa mindili nangei nimbelo ulumu wendo orumu,aku tepala iye tendekumuni ulu toya tolina terimumunga Goteni linonga ulu pulu kerima tiye kolopa pundu naa topa imbo toya tolina moromele nimomunga imboma koinjo molko kau punge ulumu wendo orumu.

<sup>19</sup> Iye tendekumuni ungumu tengenaa tirimu akumunga imbo awinini ulu pulu keri teringi imboma moloringi. Aku tepala iye tendekumuni ungumu pilipe tengenipe terimumunga imbo awini imbo toya tolina molonge.

<sup>20</sup> Imbomani enonga ulu keri teremele paa liko manjingei nimbe Goteni Mosesindo ungu mane tipuwi nimu. Goteni ungu manema tirimu wali imbomani ulu pulu keri olando teringi. Nalo aku tendeku wali Goteni imboma we kondo kololi ulumu paa olandopa terimu.

<sup>21</sup> Ulu pulu keri teli ulumuni iye nomi king mele imboma nokopa molorumumuni imboma koloringi. Aku tepala Goteni imboma kinye konopu noipe we kondo kololi ulu pulumuni iye nomi king mele molopa lino nokopa linonga Iye Awili Jisas Kraistini tenderimumunga Goteni lino imbo toya tolina nimbe karomomunga waliwalima koinjo molopo kau purumolo.

*koinjo molopo, oi we konopu kerima kolopa pora tipili moromolo ungu*

<sup>1</sup> Oi imbomani ulu pulu keri awini teringi wali Goteni eno paa kondo kolorumumu kani, kinye kape kondo kolombalo kani nimolone? Kinye linoni kape ulu pulu kerima pimbingi ti tipo teamiliya? Aku ungu nemiliya?

<sup>2</sup> Aku paa molo. Kinye lino Kraistinga imbo moromoloma konopu keri akuman i lino oi ulu pulu kerima konopu mondopolio terimulu aku konopu keri perimuma kolopa pora tirimu. Aku konopuma kolorumumunga aku tepo ulu pulu kerima tiye kolorumulu kanomu. Kinye ambe tepo ulu pulu kerima tepo molomoloya?

<sup>3</sup> Lino no ltimulu kano ulumuni lino Kraist Jisas kinye imbo tendekumu mele molopolio peya kolorumulu. Imu naa liko manjirimeleya?

<sup>4</sup> No ltimulu wali Goteni lino imbo kololi mele lipe Kraist kolopa molorumuna lipe popo tipelie lino Kraist kinye ono terimu. Aku tepala yunge enge peremo ulumuni Kraist ono kombuna tepe makinkirimungu lino kololi ulu tiye kolopo koinjo molomolo.

<sup>5</sup> Kraist kolorumu wali, lino yu kinye peya kopu tepo kolorumulu lemo yu makilipe koinjo molorumu wali paimbo aku tepo lino yu kinye peya kopu tepo makilipo koinjo molopo yu moromo mele peya molomola.

<sup>6</sup> Lino i tepo pimolo. Kraist unjona ola uku toko panjiringi kolorumu wali Goteni linonga oi perimu konopu kerima Yu kinye waye unjona kolopili nimu. Ulu pulu keri teremolomanga ulu pulumuni enge naa pepili, lino topoperope tipe kendemande kongono naa tepili, altoko pilko naa teangei kani Kraist peya kolangili nimuna waye toko kondoringi nimbo pimolo.

<sup>7</sup> Ono kombuna peremo imbo kololi te, ulu keri te tembalu mele molo.

<sup>8</sup> Oi Kraist kinye peya kolorumulumunga yu kinye peya koinjo molomolo nimbo ipuki tirimolo.

<sup>9</sup> Lino i tepo pimolo. Kraist makilipe koinjo molorumu akumunga altopa naa kolombalo. Kololi ulu pulumuni altopa yu manda naa ambolombalo nimbo lipo manjirimolo.

<sup>10-11</sup> Ulu pulu kerimani yu kinye ulure altopa naa tepili Kraist wali tendeku wali kau kolorumu. Aku tepe mele lino Kraist kinye kolopolio wali ulu pulu kerima naa temolo ningo konopu lekolio molaio. Kinye yu koinjo molopalie Gotenga nimbe moromo. Aku tepe mele lino Kraist Jisas kinye kopu tepo molopolio Gotenga nimbo moromolo ningo konopu lekolio molaio.

<sup>12</sup> Akumunga enonga oi we konopuma kolopili imbo koinjo moromele kani kinye ulu pulu kerimani lino imboma naa nokopili, mai kombu imbomanga konopumuni lino ulu pulu kerima konopu tikolio teangei nimbe lino topoperope timbelo wali aku uluma naa temolo ningo enge ningo molaio.

<sup>13</sup> Linonga kangina angimo melema palini ulu pulu kerima teamili ungu naa nengei. Nalo Lino Kraist peya kolorumulu, kinye koinjo moromolo kani linonga nimbolio akuma kangina angimo melemani ulu toya tolima kau teamili Gote tiemili. Yuni lino nokopa kondopili ningo teao.

<sup>14</sup> Liko manjeio! Goteni oi Moses nimbe tirimu ungu manemani eno naa nokopa ltemo nalo Goteni eno kinye konopu noipe we kondo kolopalie eno nokopa moromo. Akumunga ulu pulu kerimuni eno naa nokombalo.

*Ulu pulu toya tolimunga kongono imboma moromolo*

<sup>15</sup> Kinye Gotenga ungu manemani lino naa nokoromomunga lino ambe temoloya? Kinye Gotenga we kondo kololimuni lino nokoromo akumunga ulu pulu kerima teamiliya? Paa molo!

<sup>16</sup> Imbo teni imbo tengen kongono kendemandemu molambo nimbeline yu paimbo aku imbomunga unguma kau pilipe lipe yunge kongonoma kau tepe mindili noromo akumu eno naa liko manjirimeleya? Aku tepe melela eno ulu pulu kerimunga kendemande kongono tendeko molonge lemo aku tengemunga kolonge. Molo Gotenga kendemande kongono tendeko yunge unguma pilko tengen tiko molonge lemo aku tengemunga Goteni eno imbo toya tolima nimbelo. Aku ulu naa liko manjirimeleya?

<sup>17</sup> Eno paimbo oi ulu pulu kerimunga kongono kendemande imboma moloringi nalo kinye Gotenga unguma pilko liengei ningo eno mane tiringi wali aku unguma paa enge ningo pilko ltingi, aku teko teringimunga kinye linonu Gote kinye Paa tereno nemili.

<sup>18</sup> Oi ulu pulu kerimuni eno enge nimbe ka topa yunge kongono kendemandema molangei nimu nalo altopa Goteni eno tapopa wendo ltimu wali eno ulu pulu toya tolimunga kongono kendemandema moromele.

<sup>19</sup> Ungu we nimbo timbo wali na pilko lingi nimbo i maina teremele ulumunga ungu te manda lepo nio. Oi ulu pulu kerima enonga kimbo ki kangimanga pali iye nomi mele molopili ningi wali enge nimbe nokorumu kinye kimbo ki kangimanga melemani ulu pulu penga te naa teko, ungu

manema tengenaa tiko kalaro moromo ulu pulu kerima kau olandopa olandopa ka kongono mele kau teko moloringi, aku tepe mele kinye alowa teko kimbo ki kangimanga pali ulu toya tolimanga kongono kendemande mele molamili ningot Gote kanopa penga pimo ulu pulu pengama kinye ulu pulu toya tolima kinye akuma kau teko molaio. Gotenga imbo kake telima molamili ningot aku ulu teangei.

<sup>20</sup> Ulu pulu kerimani eno topoperope tirimu wali yunge kongono kendemande teneringi. Aku wali ulu pulu toya tolumunga maindo naa moloringi.

<sup>21</sup> Oi teko moloringi uluma kinye liko manjikolio mai koromele aku ulumanga oi mele penga ambelema ltingiya? Mele pengare naa ltingi. Ulu pulu keri teringimanga eno kololi ulu pulumu kau liko tipe kombuna pungei purumele.

<sup>22</sup> Nalo ulu pulu kerimani eno oi ka topa noirimona moloringi wali Goteni eno moki lepa wendo ltimu. Kinye eno yunge kongono kendemande imboma moromele. Aku teko moromelemunga eno ulu penga ltimelemeleku mele kalombaindo eno konopu kake telima tirimona ltimelele. Kano kinye konopu kake teli peremo imbomando molko kondoko kau pangei nimbelo.

<sup>23</sup> Ulu pulu kerimuni yunge kongono teneremele imboma mele te tirimo. Akumu eno kolkolio tipe kombuna pangei ulumu tirimo. Nalo lino Kraist Jisas linonga Awilimum yu peya tendekuna kopu tepo moromolo wali Goteni lino mele te we tipe kalopa tirimo, akumu lino yu kinye molopo kondopo kau pumolo ulumu tirimo.

## 7

*Poloni ambiye talo morombele ulumunga ungu te manda lepa nimu*

<sup>1</sup> Ango kame, Gotenga ungu manema Mosesini oi nimbe tirimuma eno pimele imbomando nio. Imbo koinjo moromelema ungu manemani nokoromo nalo koromele wali naa nokoromo akumu eno pimele.

<sup>2</sup> Akumu i tepe mele: Ambo te iye purumomu yunge iyemu we koinjo moromo kinye ungu mane teni elo nokoromomunga ambomu wendo pumbelo aulkere naa itemo. Nalo yunge iyemu kolombalo wali aku ungu manemuni yu naa nokoromo.

<sup>3</sup> Akumunga yunge iyemu we koinjo molopili yu iye te kinye ulu kerinale temo lemo yu wapu ulu kerinale teli ambomu nimele. Nalo yunge iyemu kolombalo wali aku ungu manemuni yu naa nokoromomunga yu altopa iye pumo lemoaku manda. Aku temo lemo yu wapu ulu kerinale teli ambomu naa nimele.

<sup>4</sup> Nanga ango kame, eno aku ulu mele teringi. Kraist kolorumu wali eno peya tendekuna molko koloringimunga kinye Mosesini tirimu ungu manemani eno naa nokoromo, eno iye te lupenga ambomu mele moromele, aku iyemu imbo ono kombuna makilipe koinjo molorumu iye Kraist. Eno Goteni konopu mondoromo uluma teangei aku iyemunga imboma moromele.

<sup>5</sup> Liko manjeio. Linonga oi konopumani lino nokorumu wali ungu manemani teangei molo naa teangei nimu mele pilipo linonga kangimani pali ulu pulu kerima kau teamili konopu lepo terimulu. Aku ulu terimuluma kolomili ulumu kau terimulu.

<sup>6</sup> Nalo kinye lino Kraist peya kolorumulu akumuni lino oi ka topa noirimu ulumu mainye purumu. Kinye ungu manemani lino naa nokoromo. Akumunga ungu mane bukuna toringimanga kongono kendemande imboma naa moromolo. Mini Kake Telimuni teao nimo ulu koinjomanga kongono kendemandemda tenderemolo.

*Ulu pulu kerimuni lino tepe bembo tirimo ungu mu*

<sup>7</sup> Mosesinga ungu mane ambe tepe peremo nimoloya? Ungu manema ulu pulu kerimu nemiliya? Aku paa molo. Unku manemani na naa lipe ondolkanje ulu pulu kerima kanopo imbi naa tilka. Unku mane teni imbo tenga melema kanoko kumu naa mewi ungu naa nilkanje imbo tenga melema kumu meli ulu kerire nimbo naa lipo manjilla.

<sup>8</sup> Nalo ulu pulu kerimuni na mele lupe lupema kumu meambo nimbe ungu manemanga lape lepa lipe kondopalie wali naaku temo kumu mepo moloru ulu topoperope tirimu. Ulu pulu kerimuni ungu mane akuna lape naa lekanje engema naa pepa yu imbo kololi mele pelka.

<sup>9</sup> Na oi ungu manema naa pilipo walulu tipo moloru nalo altopa ungu manema na moloruna wendo orumu wali ulu pulu kerimu wendo omba tondolo ilte perimu, aku wali na Gotenga kumbekerena imbo kololi mele moloru.

<sup>10</sup> Aku wali Goteni ungu manema pilko tengenae wali koinjo molopa kau puli ulu pulumu lingelimebeli tirimu aku ungu manemani na kololi ulu pulumu tirimu itemo nimbo kanoru.

<sup>11</sup> Aku ambe tepe terimuya? Aku ulu pulu kerimuni ungu mane akuna lape lepa lipe kondopalie ungu manemana lipe na kili tipe kondi topalie topa kondorumu.

<sup>12</sup> Unku nilipo oro aku ungu mane peremomunga pulumu ambe tepe itemoya? Unku manema Gote yunu tirimomunga kake telimu. Unku manemanga tukundo

Goteni teao nimu ungu peremoma pali kake tepa, tumbi nili paa pengamu.

<sup>13</sup> Aku lemo aku ungu mane pengamuni na kololi ulu pulumu tirimuya? Aku paa molo! Ulu pulu kerimuni kololi ulu pulumu tirimu. Pele nani ulu pulu kerima terumunga kololi ulu pulumu na kinye ombo perimu. Ulu pulu kerimuni aku ungu mane pengamunga kololi ulu pulumu wendo opili nimu. Goteni ulu pulu kerimu mona lembalo wali imbomani akumu paimbo ulu pulu kerimu ningko kanangei nimbe tepili nimbe tiye kolorumu. Akumunga Goteni teangei nimbo ungu mane tirumani ulu pulu kerimu paa mele keri lkupindi tolimu imboma ningko kanangei nimbe tepa mona ltendepili nimu, akumunga ungu manemani aku ulu terimu.

*Ulu pulu kerimuni lino nokorumu ungu te*

<sup>14</sup> Lino i tepo pimolo: Unzu mane Gote yunu tirimu akuma ungu mane pengama nalo na mai kombuna moro iyemu ulu pulu kerimuni na ka topa noirimuna yunge kongono kendemande tendeli iyemu moro akumunga Goteni konopu mondoromo ulumu teamboi nimbo perero.

<sup>15</sup> Ulu teroma ambele pulurenga ulu akuma teronje, naa lipo manjiro. Na konopu mondopo teamboa konopu lteo mele naa tepo, naa teambo konopu lepo konopu naa mondoro uluma tero.

<sup>16</sup> Na konopu naa mondopo naa teambo nio uluma teromunga Gotenga ungu manema paa pengama nio.

<sup>17</sup> Akumungaaku ulu kerima na nanu teambo nimbo naa tero. Ulu pulu kerimu nanga konopuna peremomuni teremo.

<sup>18</sup> Paimbo na ulu pengama teamboa konopu lteo nalo manda naa tero. Akumunga, nanga konopuna tukundo ulu penga te tembo ulu pulumu naa peremo lipo manjiro. Aku ulu penga naa peremo konopumu nanga oi konopu perimumundo nio.

<sup>19</sup> Ulu penga teambo konopu lteo akuma naa tero. Ulu keri naa tembo konopu lteo akuma tepo kau moro.

<sup>20</sup> Ulu keri naa teambo konopu lteo aku ulu kerima tero akumu nanu teambo nimbo naa tero. Nanga konopuna tukundo ulu pulu keri peremomuni kau aku uluma teremo.

<sup>21</sup> Akumunga ungu mane teni na nokromo nimbo kanoro akumu i tepa: Ulu pengama teambo nio wali ulu kerimuni lape lepalie na ka topa noirimu.

<sup>22</sup> Paimbo nanga konopuna tukundo Gotenga ungu manema konopu tipo paa teamboa konopu lteo,

<sup>23</sup> nalo nando tewi nimo ungu mane te lupe nanga kangi angimomunga tukundo pali peremo nimbo karo. Akumuni Na ungu mane teambo konopuni nimbo pio aku ungu manemu kinye opa teremo. Aku ungu mane lupemu ulu pulu kerimu, akumuni nanga kangina tukundo pali pepalie ka tipe nokromo.

<sup>24-25</sup> Na tukundo opa teremo nilipo oro ulumunga tepo moro mele i tepa: Na nanu nanga konopumuni Gotenga ungu manemanga kongono tero nalo nanga oi konopu kerimuni nanga kangi angimoma tope tipelie ulu pulu kerimunga ka kongono tirimona tero. Aku ulumuni na ka tipe nokopalie topa kondombai teremona konopu keri panjipo narini na lipe tapom-balona kololi ulu pulumu peremo kangimu tiye kolomboya? Nanga Jisas Kraist linonga Awilimuni nanga nimbe tenderimumunga Goteni na lipe taporomo. Aku ulu teremona Gote yu kapi nimbo paa terenowa nio.

## 8

*Mini Kake Teli lino enge tirimomuni lino Gotenga bakuluma molopa ulu toyota tolima teremolo ungumu*

<sup>1-2</sup> Nalo Goteni lino taporumumunga lino Kraist Jisas kinye peya tapu topo moromolomunga koinjo mololi ulu pulumu peremo Mini Kake Telimuni lino nokopa, ulu pulu kerimu kinye kololi ulu pulumu kinye lino nokoringili talo lino naa nokongele, molko kondangei nimo akumunga Kraist Jisas kinye peya kopu tepo moromolo imboma ulu keri teremelemanga lino kot tendengena mindili nomolo ulu te naa peremo.

<sup>3</sup> Linonga oi konopumu enge naa perimumunga Mosesini Gotenga ungu mane tirimumanen ge naa nimbeline lino tapombai terimu ulumu manda naa terimu nalo Goteni manda terimu. Yunge Malo maina imbomanga ulu pulu kerimanga kolo wangopa kolopili nimbe maina lipe mundurumu, aki iyemu ombo lino maina imbo ulu pulu keri telo imboma mele apupe lierimu. Yu imbo kerimanga nimbe kolo wangopa kolorumu wali Goteni aki tepa Jisas yunge kangindo imbo kerimanga ulu keri enonga kangi akuna peremoma kot tendepalie aki engema topa maindo mundurumu.

<sup>4</sup> Lino ungu manemani i teko i teko tumbi tiko teangei nimo mele linoni aki tepo teamili nimbe Goteni aki ulu terimu. Lino kinye oi we konopu kerimuni teao nimo ulu naa pilipo tepo Mini Kake Telimuni teao nimo ulu pilipo teremolo imbomanga nimbe Goteni aki ulu terimu.

<sup>5</sup> Oi konopu kerimuni teaio nimo ulu pilko teko moromele imboma aku konopumuni konopu mondonromo ulu akumu kau temolo konopu leko moromele, nalo Mini Kake Telimuni teaio nimo ulu pilko teko moromele imbomani Mini Kake Telimuni konopu mondonromo ulu akumu kau konopu leko moromele.

<sup>6</sup> Oi konopu keri peremo uluma tembo konopu lepa moromo imbomu kolombalo, nalo imbo te Mini Kake Telimuni yunge konopumu nokoromona moromo imbomu koinjo molopa konopu u nipili molombalo.

<sup>7</sup> Imbo te oi we konopu keri ulumu tembo konopu lepa moromo imbomuni Gotenga ungu manemanga maindo naa molopa Gotenga ungumu tui tirimomunga yu Gote kinye opa pule toromo. Gotenga ungu manemanga maindo molambo konopu lekanje imbo aku tepamunga enge te naa pelka.

<sup>8</sup> Oi konopu kerimani amboromo imboma Goteni konopu mondonromo ulu tenukure kape naa teremele.

<sup>9</sup> Nalo Gotenga Mini Kake Telimu paimbo enonga konopuna molopalie yuni eno tope tirimona oi konopu kerimuni eno tope naa tirimo. Kraistingu Mini Kake Telimu konopuna naa moromo imbo akuma yunge imboma naa moromele.

<sup>10</sup> Nalo Kraist kinye kopu teko molonge lemo paimbo ulu keri teringimunga yu kinye imbo kololima moromele nalo yu kinye Gotenga imbo toyta tolima moromelemunga eno konopu koinjo pungolio koinjo moromele.

<sup>11</sup> Aku teko moromele kani Jisas kolorumu wali yu ono kombuna makinjirimu Mini Kake Telimu enonga konopuna molomo lemo Kraist Jisas makinjipe ola mondorumu Goteni enonga konopuna moromo Mini Kake Telimunga engemuni enonga kangima kololi ulu pulumu peremo kangima tepa koinjo limbelo.

<sup>12</sup> Aku tepa teremomunga, ango kame, lino tepo moromolo ulumu paa teamili. Oi konopu panjipo molorumulu kanomundo naa nio. Aku molo.

<sup>13</sup> Eno oi konopu keri peremomunga pilko teko molonge lemo Goteni eno kolangei nimo. Nalo Mini Kake Telimunga engemuni lino oi ulu keri teremelema topa kondopili ningko aku teko elkele akuko toko kondonge lemo eno koinjo molonge.

<sup>14</sup> Gotenga Minimuni tope tipe yunge nimo ungu tengen tiriemele imbo akuma Gotenga bakuluma moromele.

<sup>15</sup> Goteni eno Mini Kake Teli tirimumu, eno imbo kerima Gote pipili kolko tule teko angilengei Mini Kake Teli aku tepamu naa ltingi. Molo. Mini Kake Telimuni eno

Gotenga bakuluma mondonromo ltingi. Lino tope tirimona Gotendo Ara nimolo.

<sup>16</sup> Mini Kake Telimuni linonga konopundo eno Gotenga bakuluma moromele kani yundo ara neio nimo wali aku tepo nimolo.

<sup>17</sup> Lino yunge bakuluma molomolo lemo pele Lapani yunge imboma molko kondonge ulu timbeloma moke tepalie lino timbelola, Kraist kinye peya limolo. Nalo we naa timbelo. Lino pele Kraist kinye yunge kombu pengana kopu tepo molopo kondamili nimbolio Kraist mindili nomba umbun merimu mele lino aku tepo mindili nombo umbun memolo lemo Goteni Kraist molopa kondoromo ulumu tirimuna ltimu mele lino aku tepa timbelona limolola.

*Ulu pengama omba mona lembalo unggumu*

<sup>18</sup> Gotenga pa telimu kinye molopo kondomolo ulu pengama mona lembaloaku uluma paa olandopa lipo manjipolio i moltomolo walimanga lino Kraistingu imboma mindili nombo moromolo uluma paa mandopa konopu lteo.

<sup>19</sup> Goteni nanga bakuluma kangi penga angilepila ni kinye kamukumu kopu tepo molamili nimbelo ulumu kanamili ningokanongeindo Goteni terimu melema pali nokoko moromele.

<sup>20-21</sup> Paimbo, Goteni terimu melema pali molko kenjirimele, nalo melema enonganomolopo kenjimili ningolio molko naa kenjirimele, aku molo. Ulu penga pele wendo ombalo uluma kanangei nokoko molangei nimbeline Goteni yunu melema oi molko kenjengei nimu. Ulu kerimuni yunge imboma ka topa noirimona naa molko yu kinye molko kondonge mele, melema pali oi molko kenjengei nimu ungumunga maindo moromele melemaaku ulumunga wendo ongo yunge bakuluma koinjo molonge meleaku terimu melema pali kape koinjo pungei nimbeline oi molko kenjengei nimu.

<sup>22</sup> Lino i tepo pimolo: Amboma bakulu kanoko lingeindo mindili nongo pereremele mele Goteni terimu melema paliaku teko mele mindili noringima yandoko kape mindili nongo perekoo moromele.

<sup>23</sup> Mele akuma kau molola. Lino Goteni Minimuni oi kumbe lepa tipelie melema pali timbelo lipo noimolo imboma peya. I kangi tukundo mindili nombo perepo molopolio ulu pulu kerimanilino kundupeka mele tirimoaku kangimunga lino wendo lipe kangi te lupe, Kraistingu kangi mele tipe lino kamukumu yunge bakuluma omba limbelomunga konopu tipo nokopo moromolonombo pimolo.

<sup>24</sup> Paimbo kinye imbo kangina tukundo molopolio molopo kenjirimolo. Pele walite

kangi te lupe lipo Gotenga bakuluma kamukumu molamili konopu lengei nimbe Goteni lino lipe tapopa mindili nolemala aulkena wendo ltimu. Nalo i tepo kanomolo i tepo molomolo nimbo pimolo mele oi kanolemalanje molo oi limalanje, i tepo limolo molo i tepa wendo ombalo nimbo pilipo nokopo naa molemala. Imbo narini melte oi lipe noipelie limbo nimbe pilipe nokopa moromoya? Aku ulu naa teremolo

<sup>25</sup> nalo kinye aku tepo limolo, aku tepo molomolo nimbo pilipo aku walimu wendo ombalo nimbo taka lipo nokopo moromolo.

*Mini Kake Telimuni Gotendo linonga nimbe konge tenderemo ungumu*

<sup>26</sup> Ulu penga te wendo opili nimbo moromolo aku tepa mele, lino konopundo enge naa peremo wali Mini Kake Telimuni lino lipe taporomo. Lino Gote kinye ungu nimilindo konge temolo mele naa lipo manjirimolo. Yu kinye ambe tepo ungu nemolonje nimbo, pilipo tundurumolo. Lino aku tepo pilipo tundupo moromolo wali Mini Kake Telimuni pilipelie ungu nimilindo ambele ungu nemolonje nimbo pilipo tundurumolo unguma yuni kanopa imbi tipelie lino kele topalie Gote kinye linonga nimbe pumbe konge tepa nindirimo.

<sup>27</sup> Goteni yuni uluma wendo opili nimbe pimo mele Minimuni pilipelie lino lipe tapopa lino Gotenga imbomanga konge tenderemomunga Minimuni linonga konge tenderemo ungumanga pulumaaku imbo konopumanga tukundo karomo Gote yuni lipe manjirimmo ungumanga pulumu pimo.

*Yunge imbo molongema Goteni koro oi kanopa ltimu ungumu*

<sup>28</sup> Lino Gote konopu monodoromolo imboma yuni eno kinye konopu lteo uluma teambo nimbe kanopa lipe peya molamili waio nimbe tukundo ltimu imbomanga Goteni mai kombuna ltemo uluma palini lino tepe enge tipili nimbe nokoromo ulumu fino lipo manjirimolo.

<sup>29</sup> Paa koro oi Goteni Yunge imbo molongema kanopalie nanga Malo komo mele yu tendekumu yunu naa molopili, angenupili kinye peya molangei kani nanga imbo molonge nimbe kanopa ltimu imboma nanga malo iyemu mele molangei nimbe panjirimu.

<sup>30</sup> Aku wali yuni aku tepe nimbe panjipe kanopa ltimu imboma nanga imboma molangei waio nimu. Nanga imboma molangei waio nimu imboma eno ulu pulu keri teringima tiye kolopolio nanga imbo toya tolima moromele nimbo kanopolio nanga kumbekerena ongo molangei nimu. Na kinye molopa kondoli kombuna molamili waio nimu.

*Ulu teni Gote yunge imboma konopu monodoromo ulumu pipi naa timbelo*

<sup>31</sup> Akumunga Goteni lino kinye teremo ulumundo linoni ambele nemiliya? Gote aku tepe linonga opa kalale iye moromomunga narini lino kinye opa pule tombaloya? Te manda molo.

<sup>32</sup> Yuni yunge malo kape lino naa timbo ungu naa nimbe, linonga pali lipe tapopa kolo wangopa kolopili nimbe tirimu. Yunge malo tendekumu linonga nimbe tirimu lemo yunge we mele mendo mendoma ambe telka naa timbeloya? Paa timbelo.

<sup>33</sup> Goteni nanga imboma nimbe kanopa ltimu imboma narini kot tendembaloya? Goteni linondo enonga kot wendo ombalo ulu te naa peremo, eno imbo toya tolima moromele nimo.

<sup>34</sup> Lino kot tendepalie mindili nangei ungumu narini nimbeloya? Te molo. Kraist Jisasini linonga nimbe kolorumu. Akumu kau molo. Goteni yu topa makinjirimu iyemu, yu lino pinyewe koinjo ltimu iyemu, yuni Gotenga imbo kindo angilipe linonga ungu tapopa nimbe moromo.

<sup>35</sup> Kraistini lino konopu monodoromo ulumu narini manda tungu tipe yu mele mele tembaloya? Umbuni meremolomani manda tembaloya? Molo lino topa tundurumo ulumani manda tembaloya? Molo imbonani lino mindili tirimele ulu teni, molo engele oromo ulumuni, molo pulu waimbele melema molo lembalo akumuni, molo ulu teni lino topa kondombai tembaloyulu te wendo ombalomuni, molo opa te wendo ombalomuni, aku ulumanga pali teni tembaloya?

<sup>36-37</sup> Paa molo. Paimbo Gotenga Ungu Moromo Bukumuni umbuniaku te pama lino kinye wendo ombalo mele nimo. I tepa nimo,

Lino nunge imboma moromolona waliwali ima imbonani lino toko kondongei teremele.

Kongi tongei konopu tendekumu panjiko toromele mele lino aku teko tomolo konopu ltemele, (Sng 44:22)

aku tepe bukumuni paimbo nimo nalo Kraist yuni lino konopu monodoromona lino enge tirimoaku wali lino mindili tirimo ulu akuma linoni topo mainye mundurumolo. Yuni lino kinye moromomunga lino enge olandopa peli imboma moromolo.

<sup>38</sup> Na i tepo lipo manjiro. Kololi ulu pulumuni, molo mololi ulu pulumuni, molo Gotenga mulu kombuna enselemani, molo Satanenga kuromani, molo kinye peremo ulumani, molo altopta ombalo ulumani, molo mele enge nilimani,

<sup>39</sup> molo muluna paa ola melemani molo mainye ltemomani, molo mele lupelemani pali kape, Goteni lino konopu

mondoromo ulumu pipi tipe aku ulumanga pali teni Gote kinye lino tungu tipe yu mele mele naa tembalo, paa molo nimbo akumu na konopu tendekumu panjiro. Goteni lino konopu mondoromo ulumu Kraist Jisas kinye peremo.

## 9

### *Poloni Israel imboma paa kondo kolorumu ungumu*

<sup>1</sup> Na Kraistingu iyemu moro na ungu paimbomu nio. Kolo naa toro. Mini Kake Telimuni nanga konopuna paa nino nimona lipo manjiro.

<sup>2-3</sup> Nanga ango kame, anda kolepailemani na peya kalko Itingi Israel imbo akuma, enoni teremelemunga Goteni eno tepe kenjimbelo, kombu kerina molko kenjiko kau punge na lipo manjipolio niomuni, nanga konopuna paa kondo kolopo waliwalima kamele ambolopo mindili paa nombo moro akumu paa nio. Akumunga wendo liembo nimbo nani nanga Israel imboma lipo tapondambo nimbo Goteni eno molko kenjinge aulkena naa pangei nimbe na Pol Kraist kinye peya molombolo aulke purona naa pambo nimbe pipi tipe, enonga kolo wangopo molopo kenjimbo aulkena pambu, eno nanga kolo wangoko molko kondonge aulkena pangei nilka aulke te lekanje nani Gotendo aku teko niwi nilka.

<sup>4</sup> Oi Goteni Israel imboma kanopa lipe nanga bakuluma molangei nimbe tepe ltimu ulumu kinye Gotenga pa telimu kinye, ungu nendo yando nimbe panjipe mi lierimu unguma kinye, Mosesini ungu mane tirimu ungu manema kinye, Gote popo toko kapi ninge ulumu kinye, eno kinye i tepo i tepo tembo nimbe panjirumu unguma kinye, ima pali enonga.

<sup>5</sup> Pulu polko anda kolepa iye awilima Israel imboma enongala. Kraist maina iye molombaindo anda kolepailemani yandopa kalko Itingi imbo teni Kraist merimuna yu enonga talapena wendo orumula. Yu melema pali nokoromo Gote. Yu takiraki kapi nimbo tiye naa kolopo imbi lipo ola mundemili. I paa.

### *Goteni Israel imboma kinye terimu ulumu*

<sup>6</sup> Linonga kolepa Israeleni kalopa ltimu imbo nanga ango kame mare awini Gote umbulu tirimelemunga kondo teremo nalo eno teremelemunga tepo niomu Goteni Israel imboma kinye tembo nimbe panjirumu ungumu kamukumu mainye pumo nimbo naa nio. Linonga kolepa Israeleni kalopa ltimu imboma pali Israel lapu imbi akuna naa moromele.

<sup>7</sup> Abrahameni kalopa ltimu imboma pali yunge bakuluma moromele manda naala nimolo. Oi Goteni Abrahamendo aku tepe nimbelie nimbeindo,

Aisakeni kalopa limbelo imboma kau imbi leko Abrahameni kalopa ltimu imboma ninge, (Stt 21:12)

nimu.

<sup>8</sup> Aku ungumunga pulumu i tepe: Lino Abrahameni kalopa ltimumunga Gotenga bakuluma moromolo manda naa ninge. Goteni Abrahamendo imboma kinye tembo nimbe panjirumu ungumu paimbo ningi ipuki tirimele imboma kau Goteni Abrahamenga bakuluma nimbe karomo.

<sup>9</sup> Goteni tembo nimbe panjirumu ungumu i tepe.

Wai wendo ombalo niomu wendo ombalo wali kelepo yando ombo wali Sarani ungulu te membalo nimu. (Stt 18:10,14)

<sup>10</sup> Akumu kau molo. Rebekani merimu ungulu talonga lapa tendekumu kau, akumu linonga anda kolepa Aisak kanomu.

<sup>11-12</sup> Akumu paimbo nalo olo pakilieme ungulu talo oi naa meli wali, oi ulu keri pengama naa pilko teangili kape Goteni Rebekando nimbeindo, Komomuni akiliomunga kongono kendamande tendembalo, (Stt 25:23)

nimu. Goteni yunu waliwalima pilipe wendo opili nimbe kanopa ltimu mele lipo manjipelie aku ungu nimu. Ungulu taloni ulu teringili mele kanopa naa apurupe, yu yunge konopuna kau pilipe kanopa lipelie aku tepe nimu.

<sup>13</sup> Aku tepe mele Gotenga bukuna ungu te moromo, akumu i tepe:

Goteni nimbeindo, "Jekop konopu mondopo nanga iyemu molopili, nio nalo Iso konopu naa mondoro," nimu. (Mal 1:2-3)

<sup>14</sup> Goteniaku ulu terimumunga linoni ambele nimoloya? Goteniaku tepe terimu mele alowa tepe, tepe kenjirumu nimoloya? Akumu paa manda molo.

<sup>15</sup> Aku ulumunga Goteni Mosesindo nimbeindo,

Nani nanu imbo te tepe kenjimbelo wali kanopolio kondo kolopo mindili naa nopili nimbo konopu lembo imbomu kondo kolopo mindili naa nopili nimbo.

Nani nanu imbo te umbuni pembalo wali kanopolio kondo kolopo lipo tapondombo konopu lembo imbomu kondo kolopo lipo tapondombo, (Kis 33:19)

nimu.

<sup>16</sup> Akumunga imbo teni Goteni na yunge imbomu nimbe mako topili konopu Itemomunga Goteni yunge nimbe mako naa toromo. Molo imbo teni Na mako topili nimbelie mindili nomba ulu teremo akuma kanopa mako naala toromo. Goteni yunu, yunge kondo koromo akumuni kau aku ulu teremo.

<sup>17</sup> Aku ulumunga Goteni Mosesinga kerena Isip iye nomi kingimundo nimu ungumu Gote yunge Bukuna moromo akumu i tepa,

Nu kinye tembo mele imbomani kanoko nanga engemu kanangei. Na imbi molopili temanemu mai kombu-manga pali toko molangei nimbo nu Isip imbomanga iye nomi kingimu molani nindu, *(Kis 9:16)*

nimu.

<sup>18</sup> Akumunga, kinye lino i tepo pimolo. Goteni Imbo te kondo kolombo konopu lemo imbomu paimbo kondo koromo. Nanga ungumu naa pilipe tui tipili nimbo konopu lemo imbomu paimbo aku tepa moromo.

<sup>19</sup> Akumunga kinye eno imbomanga teni na walipe pilipelie nimbeindo, Goteni aku teremo lemo lino ulu kerima teremolo mele kanopalie lino ambe temona teko kenjirimele nimoya? Goteni konopuna pilipe tembo konopu lemo mele narini manda molo nimbeloya nilka.

<sup>20</sup> Aku nilkala nalo maina imbo narini Goteni ulu teremomanga teko kenjirino nimbe iri tombaloya? Imbo teni melte wamoromo wali aku melemuni imbomudo na ambe temona aku teko wamoronoya nimbeloya?

<sup>21</sup> Maini mingima wamoromo iye teni mingi talo wamopalie kamukumu noimbei mingi te wamopa, koieka noimbei mingi te wamopaaku tepe manda naa wamomaloya? Akumu yunge kongonomu.

<sup>22</sup> Aku lemo Goteni aku tepe manda naa tembaloya? Goteni Yunge mumindili koltu mele mona wendo opili, yunge engemu kanangei nimbe, mele tepo kenjimbo konopu lemo melema tepe kenjimbelo walimu wendo ombalo kinye tembalo waimu we liepili tiye koromo aku ulu teremonje?

<sup>23</sup> Yunge oi wamopa noindirimu mele pengama kondo kolopa yu kinye lepa kondopili nimbelie yunge pa telimu kinye engemu talo kanoko, yunge molopa kondoli ulumu mele pengamani kanangei nimbe oi mele kerima we liepili nimonje.

<sup>24</sup> Melema kondo kolombaindo tembalo melema nio akuma lino maina imbo Goteni kanopa Itimu imboma. Lino Juda imbomanga mare kau molo. We imbo mare kape waye.

<sup>25</sup> Akumundo Goteni oi nimu ungu Hoseani bukuna torumu moromo mele i tepa,

Nanga imbo naa moloringima eno nanga imboma nimbo. Imbo na konopu naa mondoruma nanga konopu mondoli imboma nimbo. *(Hos 2:23)*

<sup>26</sup> Kombu tengenango nanga imboma molo niu aku kombuna eno koinjo molopa kau puli ulu pulumu peremo Gotenga bakuluma nimbo, *(Hos 1:10)*

nimula.

<sup>27-28</sup> Aisaiani Israel imboma moloringi mele lipemani manjipelie nimbeindo, Israel imboma nomu kuta kulendona ukiye Itemo kano mele paa awini moromele nalo

Goteni maina imbomanga kot pilipelie enonga ulu teremelemanga tumbi tipe kamukumu pundu topa mindili timbelo akumunga eno imbo pokore tukundo limbelo, *(Ais 10:22-23)*

nimu.

<sup>29</sup> Imbo pokore kau molonge aku Aisaiani nimu mele akumu i tepa:

Gote paa engema pali peremo Awilimuni lino pali topa kondopa linonga imbo mare we koinjo molko yandopa imboma kalko liengei naa nilkanje ulke kombu Sodom kinye Gomora talonga imboma topa kalorumuna lino aku tepo te koinjo paa naa molemala. *(Ais 1:9)*

*Israel imbomani Goteni lino we lipetapombalo ningopipuki naa tiringimunga Goteni eno imbo toya tolima nimbe naa kanorumungu*

<sup>30</sup> Aku lemo kinye linoni ambele nimbeloya? I tepo nemili, Israel imboma ningopipuki naa moromele imbo lupemani imbo toya tolima molamili ningomindili nongo uluma naa teko moloringi aku imboma Goteni imbo toya tolima nimbe kanorumu. Gotenga ungumu paimbo ningopipuki tiringimunga Goteni eno imbo toya tolima nimbe kanorumu.

<sup>31</sup> Nalo Goteni yunge nimbe kanopa Itimu Israel imbomani eno Goteni imbo toya tolima nimbe kanombokalo ungu mane te lombiele ningopipuki molkolio te naa lierimuna koroko kelkolio Goteni eno imbo toya tolima naa nimuna naa Ittingi.

<sup>32</sup> Ambe telka imbo toya tolima naa moloringiya? Eno Gotenga unguma paimbo ningopipuki naa tiringimunga eno imbo toya tolima naa moloringi. Eno enongano mindili nombo ulu pengama temolo wali lino imbo toya tolima nimbe kanombokalo konopu leringimunga Goteni

eno imbo toya tolima nimbe naa kanorumu. Imbo kika tenderemo koumuni aku imboma kika tendepa tepa ai tondoromo.

<sup>33</sup> Aku koumundo Gotenga bukuna Aisaiani torumu ungu te moromo, akumu i tepa: Pileio! Imboma tepa kika tendepa imboma tepa ai tondoromo kou te,  
nani Mulu Saion ola liepili noindu. Kou akumu kimbo mundupe ipuki tirimo imbomu,  
aku koumuni yu tepa naa tombalo. Imboma manda tapombalo akumunga Yu ipuki tirimele imbomani mai naa koromele. (Ais 8:14, 28:16)

## 10

*Goteni ulu terimumanga pulumu Israel imbomani naa liko manjiringi ungumu*

<sup>1</sup> Ango kame, nanga pulu Itemo Israel imboma mindili nonge aulkena wendo ongo, yu kinye peya molko kondonge aulkena pangei konopulepo Gote waliwalima konge tepe moro.

<sup>2</sup> Enoni Goteni teaio nimo uluma enge nimbo teamili ningi teremele nalo Goteni konopu mondoromo uluma naa pilko kondoreme mele nani kanopo manda nimbo timbo.

<sup>3</sup> Goteni imbo toya toli imboma nimbe karomo mele naa pilko, eno enongan pilko i ulu temolo wali imbo toya tolima molo-molo ningi pilko teringi. Akumunga Goteni eno toya toli imboma nimbe karomo ulumu naa teringi.

<sup>4</sup> Jisas Kraist ipuki tirimele imboma pali Goteni imbo toya tolima nimbe kanopili nimbelie Kraistini Gotenga ungu manema Mosesini pilipe yando nimbe tirimu ungu manema omiba pora tirimu.

<sup>5</sup> Imbomani Goteni, eno imbo toya tolima kanopili ningi Mosesini tirimu ungu manema pilko teangei ulumu Mosesini pipia topalie nimbeindo,

Ungu manema pali pilko kondokolio tumbi tiko tengi imboma kauaku tengemunga molko kondoko kau punge, (WKP 18:5)

nimu.

<sup>6-7</sup> Nalo imbomani, Jisas Kraist nanga nimbe tenderimu ningi ipuki tirimelemunga Goteni imbo toya tolima nimbelo kano ulumunga ungu te i tepa moromo, Eno enongan konopuni pilkolio, nari mulu

kombuna ola pumbeloya ungu naa ningi nari imbo kololima purumele kombuna mainye pumbeloya ungu naa nengei. (Lo 30:13)

nimbe moromo. Aku teko ninge lemope eno Kraistini terimu ulu talo panga akuromele. <sup>8</sup> Bukuna peremo ungumuni eno panga ak- engei naa nimo. Nalo i tepa nimbei,

Ungumu eno kinye kopu tepa moromo.

Enonga kerena molopa, konopuna peremo, (Lo 30:14)

nimo. Ungu akumu Kraist ipuki tili ulumi Gotenga imbo toya tolima moromolo ungu andopo nimbo tirimolo. Akumu i tepa:

<sup>9</sup> Enoni Jisas yu nanga Awilimu lepamo ningi para tiko, enonga konopuna Yu kolorumu wali Goteni yu ono kombuna topa makinjirimu ningi ipuki tinge lemo Goteni eno tepa lipe tukundo limbelo.

<sup>10</sup> Liko manjeio. Eno konopuna Jisas ipuki tikolio Goteni eno yunge imbo toya tolima nimuna moromele. Eno keremu Jisas yu nanga Awilimu ningi para tikolio Goteni eno tepa lipe tukundo ltimona moromele.

<sup>11</sup> Akumu Gotenga Bukuna ungu te moromo mele i tepa,  
Yu kimbo mundupe ipuki tirimo imbomu,  
aku koumuni yu tepa naa tombalo, (Ais 28:16)

nimo.

<sup>12</sup> Bukuna ipuki tirimele imboma nimo akumu Juda imbomando kau naa nimo. Juda imboma naa moromele imbomando kape pali nimo. Iye awili tendekumu linonga palinga Iye Awilimu akumunga lino pali tendeku tipe nokromo. Na liko tapondowi ningi konge teremele imboma pali awili tepa, tepa kondoromo.

<sup>13</sup> Awilimu imbi leko liko tapowi ningi konge teremele imboma pali Yu paimbo lipe tapopa tukundo limbelo ungu nimbe peremo akumunga lino pali tendeku tipe nokromo.

<sup>14</sup> Aku lemo Yuni paimbo lipe tapombalo ningi ipuki naa tikolio liko tapowi ningi ambe teko yu konge ningey? Yuni enonga nimbe tenderimu, yu moromo mele ungumu naa pilkolio Yuni lipe tapombalo ningi ambe teko ipuki tingey? Imbo teni Jisas enonga nimbe tenderimu, yu moromo ungu nimbe naa timbelo wali eno ambe teko pilingey?

<sup>15</sup> Ungumu ningi tipeio nimbe lipe naa mundumbelo wali eno ambe teko ungumu pungo ningi tingey? Aku tepa Gotenga Bukuna ungu te moromo, akumu i tepa:

Imboma ungu tukumemu ningi tingeindo kimbo kongono teko oromelena kanokolio imbomani paa tono kolonge. (Ais 53:7)

*Israel imbomani Gotenga ungu tukumemu pilko naa ltingi ungumu*

<sup>16</sup> Nalo Israel imbo mare ungu tukumemu pilko naa ltingi. Akumunga Aisaiani nimbeindo,

Awilimu, nunge ungu andopo nimbo timolomu naimeleni paimbo ningi ipuki tiringiya? (Ais 53:1)

nimu.

<sup>17</sup> Akumunga Gotenga ungu ningi tirimele na pimele aku ulumuni imbomani Kraist paimbo nanga lipe tapondolimu ningi ipuki tirimele ulumu ltimele. Ungu ningi tirimele pimele akumu Kraistinga ungum.

<sup>18</sup> Nalo nani eno waltindipolio, Israel imboma i ungumu naa pileringiya nio. Paa pileringi. Akumu Gotenga Bukuna ungu te moromo,

Kerena ningi unguma imbo moloringi mai kombumanga pali wendo omba purumu.

Enonga unguma kombumanga pali pileringi, (Sng 19:4)

ungu te aku tepa moromo.

<sup>19</sup> Altopo ungu te waltindipolio, Israel imboma i ungumunga pulumu naa liko manjiringiya? Liko manjiko nalo ipuki naa tiringi. Mosesini oi Israel imbomando Gotenga ungu te nimumu nemboi. Goteni nimbeindo,

Na Goteni eno Israel imboma kau molko kandangei nemboi konopu ltemele mele pilipolio

enoni imbo manga pupu imbi naa mololima ningi karomele imboma tepo kondombo molko kondonge ulu kanokolio

eno Israel imbomaniaku imboma kinye yokolini kolko linoaku tepe tepe kondopili kani yunge ungumu pilipo yu umbulu naa tiemili nengei nimbo.

Nani eno Israel imboma lipo tapondambo nimbo moro mele enoni imbo manga pupu konopu naa peli molko kenjirimele imboma ningi karomele imboma lipo tapondombo wali

molko kondonge ulu kanonge wali nani eno Israel imbomani akuma kanoko mu-mindili kolko,

linoaku ulu tendepiliyu moromona pamili nengei nimbo, (Lo 32:21)

nimu.

<sup>20</sup> Paimbo Israel imbomani lino kau Gotenga imboma moromolo ningi pileringi nalo Aisaiani kapeaku tepe Israel imboma pipili naa kolopalie Gotenga ungu te Israel imbo pupu tawendo imbomando tumbi tipe nimbeindo,

Na koropo kanamili ungu naa ningi imbonani na kanoko ltenderingi.

Na ambe tepo moronje ungu te walikona naa pileringi imboma eno moloringina kanangei nimbolio ombo moloru, (Ais 65:1)

nimu.

<sup>21</sup> Nalo Israel imbomando Aisaiani Gotenga ungu te peya nimbeindo,

Nanga ungumu naa pilko liko tui tirimele imbomando nani waliwalima

wangei nimbo kangulupo limboi koro molopo angio, (Ais 65:2) nimu.

## 11

*Goteni Israel imbo koltalo we moloringima kondo kolorumu ungumu*

<sup>1</sup> Akumunga nani eno waltindiro: Goteni yunge Israel imboma umbulu tipe tiye kolorumuya? Paa molo! Na Pol Israel iye tela, Abrahameni kalopa ltimu iye te, na Benjamininga imbo talapemunga iye te. Na umbulu tipe tiye naa kolorumu kanomu.

<sup>2</sup> Goteni yunge imbo akilio molonge mele oi pilirimu kano imboma tiye naa kolorumu. Gotenga profet iye Elaijani terimu mele temane Gotenga Bukuna moromomu eno naa pimeleya? Elaijani Israel imbomani ulu keri teringima Gotendo enge nimbe, nimbe tipelie nimbeindo,

<sup>3</sup> Awilimu, nunge ungu ningi munduli pilko andoko ningi tirimele iyema toko kondoko, nu popo toko karomele alta poloma konoko bilibala tiringi. Kinye na tendekumu kau nunge iye moromu toko kondongei teremelela, (1Kin 19:10,14)

nimu kanomu.

<sup>4</sup> Nalo Goteni yundo topondopa ungu ambelemu nimuya? Yuni nimbeindo,

Imbo 7,000 moromele akuma nani nokoromunga enoni lino nokoromo gote ningi kolo toli Balanga kumbekerena tamalu peko popo naa toromele, (1Kin 19:18)

nimu.

<sup>5</sup> Aku tepala, kinye kape Goteni Israel imbo mare koltalo we kondo kolopa nanga imboma molangei nimbe kanopa ltimuna moromele.

<sup>6</sup> Yuni yunu eno we kondo kolopalie yunge imboma molangei nimo lemo enonga kongono telemalamunga ulure naa telka. Eno kongono tengemunga yuni kanopalie nanga imboma molangei nimo lemo yuni imboma we kondo kolopalie, nanga imboma molangei nimoaku we kondo kololi ulumu,aku tepe we kondo kololi ulumu paimbo naa ltemo.

<sup>7</sup> Aku lemo kinye linoni ambele nimoloya? Israel imbomani Gote kinyekoputeko molko yuni eno imbo toya tolima nimbe kanombalo ulumu paa liemiliya ningi kongono mindili nongo teringi nalo naa ltingi akumu Goteni yunu konopuni pilipe kanopa ltimu imboma ltingi. We Israel imboma konopu pipi tirimumunga Gotenga ungumu pilinge aulke te naa lierimu.

<sup>8</sup> Akumunga ungu te Bukuna toringi moromo, akumu i tepe,

Goteni konopu naa peli imboma mele molko, mongoni melema naa kanoko,

komuni unguma naa pilengei nimu akumu kinye kape yandopa yandopa aku teko mololiko purumele, (*Lo 29:4; Ais 29:10*)

nimbe moromo.

<sup>9</sup> Kano imboma Devitini yunge opa pulema molangei nimu mele molonge. Devitini yunge opa pulema molonge mele ungu te i tepa nimbeindo,

Enonga langi nongo molonge ulumuni eno meluna mele topa, imbo tepa ai tondoromo mele lepa,  
enoni teko kenjirimelemunga pundu topa umbuni timbelo mele te lepili.

<sup>10</sup> Enonga mongomani melema naa kanangei nimbe pipi tipe tumbulu topa, waliwalima eno umbuni awili mengemunga enonga umbuluma langopa olokondo tukundo opili molko kau pangei, (*Sng 69:22-23*)

nimu.

*Goteni manga pupu lupema nanga imboma molangei nimu ungumu*

<sup>11</sup> Akumunga na ungu te altopo walipo pilto: Israel imboma molko kenjiringi wali kamukumu molko kenjiringiya? Paa molo! Israel imboma Gote kinye teko kenjiko umbulu tiringimunga Goteni imbo lupemando nanga imboma molko kombu kerina naa pangei nimbe tukundo ltimu. Na imbo lupema tukundo limbo wali Israel imboma kanokolio aku imboma kinye yokolini kolko konopu keri panjiko lino yu kinye kopu tepo molamili nengei nimbe aku ulu terimu.

<sup>12</sup> Nalo Israel imbomani Gote kinye teko kenjiko umbulu tiringimunga Goteni mai kombuna pali imboma paa tepa kondoru. Israel imbomani Gotenga ulu pengama tiye koloringimunga imbo lupema kinye ulu pengama terimu. Aku lemo Israel imboma Gote moromona kelko ongo yunge talapena tukundo molonge wali imboma kinye pali ulu penga awini olandopa olandopa tembalo.

<sup>13-14</sup> Eno Israel imboma naa molko imbo lupema moromelema, nani kinye enondo nio. Na imbo lupemanga nimbe Kraistini lipe mundurumu iyemu moromunga imbo lupema ungu tukumemu nimbo tilipo andoro mele nanga Israel imbomani kanokolio eno malo lepamo ningyo yokolini kolkolio lino kape Jisasinga imboma molamili ningyo tukundo wangei nimbo Jisasini na imbo lupemanga nimbe lipe mundurumu iyemuni imboma pali nimbo tilipo andoro kongonomu konopu tiro.

<sup>15</sup> Goteni Israel imbomando naa ongo anjo paio nimu wali maina imboma pali yu

moromona tukundo pungo molko kondoko kau punge aulkemu wendo orumu. Aku tepa Israel imboma molko kondonge aulkemu mainye purumumunga imbo lupema molko kondonge aulkemu wendo orumu wali nanga Israel imboma eno Goteni altopa tukundo limo lemo kololi ulu pulumu mainye pumbelie molopa kau puli ulu pulumu paa kamukumu wendo ombalo.

<sup>16</sup> Bret kalongeindo plawa topele toromelemunga mare oi wendo liko Gote popo toko tirimele akumu Gotenga plawa mendepolo itemo lemo plawa we lemoma pali kape Gotenga plawa mendepolo itemola. Unjo tengateng pulkonomata Gotenga mendepoloma lemo unjomu pali Gotenga unjo mendepolo.

<sup>17-18</sup> Unjo oliv penga poinyena angilimungu kola mare Goteni langopa itepalie, eno imbo lupema lamana unjo oliv keri angilimomunga kolama mele moloringimunga kola mare langopa unjo oliv pengamunga lipe wakamaka tipe topa mondorumumunga enoni unjo pengamunga kola mainyendopa, lino olandopa moromolo ningyo liko naa manjengei! Kola pengama kinye unjo pengamunga langi norumu langima eno kinye peya noromelemunga enoni unjo pengamunga kola mainyendopa, lino olandopa moromolo ningyo liko naa manjengei! Aku teko konopu leringi lemo i teko liko manjengei: Eno unjo kolamani unjomunga pulkonomata langi naa tirimele. Unjomunga pulkonomani eno kolama langi tirimo konopu leao.

<sup>19</sup> Nalo kelko eno Israel imbo naa moromelemani ningeindo, Goteni lino kola kerima lipo unjo pengama panjembo nimbe unjo pengamunga kola mare langopa lterimu ninge.

<sup>20-21</sup> Aku paimbola. Nalo unjo pengamunga kola langopa lterimu akumani Goteni Eno nokopili nimbe lipe mundurumu iye nomi Kraist yu paimbo orumu ningyo ipuki naa tiringimunga Gote yuni eno langopa lterimu. Eno unjo kerimunga kolama enoni Yu paimbo orumu ningyo ipuki tirimelemungaaku teko angliko kondoromele. Aku paimbo nalo Goteni unjo pengamunga kolama kondo naa kolopa we angilengei tiye naa kolopa langopa lterimumunga eno kape aku tepa we angilengei tiye naa kolombalo kani lino penga ningyo enonga imbi liko ola naa munduko eno none teko naa molangei. Pipili kolko liko manjiko molaio.

<sup>22</sup> I konopu panjiko molaio: Goteni imboma kinye ulu pengama tepa mindili tirimo uluma peya talo teremo. Yu tiye koloringi imboma mindili tirimu, nalo

enoni yu kanopa penga pilipelie eno tepa kondombalo uluma teko molonge lemo yuni eno kinye ulu pengama terimu mele paimbo aku tepa tembalo. Aku ulu naa tengen lemo eno langopa ltembalola.

<sup>23</sup> Oi unjo kola langopa lterimuma konopu topele toko altoko iye nomi Kraist yu paimbo orumu ningi ipuki tinge lemo unjo langorumuna kelepa topa mondombalo. Goteni kano kolama aku tepa manda tembalo.

<sup>24</sup> Liko manjengei! Eno lamana unjo oliv kerimunga kolama Goteni langopa unjo oliv penga poinyena imbo topa nokorumu, kanomu enonga unjomu molo, akumunga eno panjirimu. Imbomani aku ulu naa teremele nalo yuni terimu. Aku ulu terimu wali manda orumu lemo unjo pengamu yunge kolama kelepa lipe topa mondombalo wali manda naa angilimbelyo? Molo, manda angilimbelo!

*Goteni Yunge kondo kololi ulu pulumu imboma pali kanangei nimbe terimu ungumu kinye Goteni Israel imboma pali mindili naa nangei nimbe lipe tukundo limbelo ungumu*

<sup>25</sup> Ango kame, enoni lino lipe manjili imboma molopo unguma pali pimolo ningi konopu naa leangei nimbo Gotenga ungu pulu lopeke tepa oi perimumu pilengi nimbo tiemboi. Akumu i tepa: Israel imbomani pali Gotenga ungumu Paimbo ningi pilko linge ulumu kamukumu pipi naa tirimo. Goteni imbo lupe kanopa ltimu imboma pali yunge talapena tukundo tukundo onge wali Israel imbomani i teli oi pilko tunduko moromele nimu.

<sup>26</sup> Imbo lupema Gotenga talapena tukundo ongo pora tinge wali Goteni yunge Israel imboma pali tukundo limbelo. Gotenga Bukuna ungu te aku tepa nimbe moromo, akumu Goteni i tepa nimbei, Israel imboma kamukumu molko naa ken-jingei nimbelie wendo lipe tukundo limbelo iyemu Jerusalem molopalie ombalo.

Aku iyemuni Jekoponi kalopa ltimu imbo talapemu Gotenga ungumu naa pilko umbulu tiko moromele mele tiye kolko konopu topele tangei nimbe wendo limbelo.

<sup>27</sup> Nani enonga ulu pulu kerima wendo lipo ltendembo nimbo walimungaaku tepoaku ungumu nimbo panjipo mi lembo, (Ais 59:20-21, 27:9; Jer 31:33-34)

nimbe moromo.

<sup>28-29</sup> Israel imbomani Jisasinga ungu tukumemu naa pilko liko umbulu tiringimunga Gote Israel imboma kinye opa pule moromele akumunga eno imbo

lupema tukundo lipe Gotenga imboma molangei nimu. Nalo Goteni imbo tendo Yu nanga imbomu molopili nimbe kanopa lipelie kelepa konopu topele naa toromo. Yu tepo kondombo nimbe panjirimo unguma konopu topele naa topa tiye naa koromo akumunga Goteni Israel imbomanga pulu polko anda kolepalama konopu mondopa enoni kalko linge imboma nanga imboma molangei nimbe nimbe kanopa ltimu mele pilipelie kinye kape Israel imboma konopu mondopa moromo.

<sup>30</sup> Eno imbo lupemani oi Goteni Teaio nimu ungu pilko liko naa teko tui tiringi nalo Israel imbomani Goteni Teaio nimu ungu tui tiringimunga Goteni eno imbo lupema we kondo koromo ulumu ltingi.

<sup>31</sup> Aku tepala, eno oi tui tiringi imbo lupema Goteni we kondo koromo mele aku tepa yuni Israel imboma kape we kondo kolombaindo Israel imboma eno yunge ungumu liko tui tirimele.

<sup>32</sup> Imboma pali oi yunge ungumu pilko naa liko tengen naa tirimele ulumuni eno ka topa noipili nimbe Goteni eno tiye kolorumu. Aku teko moromele wali kinye yuni imboma pali kondo kolopa moromo.

*Poloni Gote kapi nimbe imbi lipe ola mundurumu ungumu*

<sup>33</sup> Linonga Gote paa molopa kondoromo. Yu moromo mele linoni pilipo tundurumolo. Gote yunge ulu penga teremoma kinye yunge konopumu kinye yunge lipe manjilimu kinye paa olandopa peremo. Linoni kopunge kolo kau lipo manjirimolo. Yu aulke purumoma paa manda naa kanopo lenderemolo.

<sup>34</sup> Aku tepa mele Gotenga ungu moromo bukumuni ungu te i tepa nimo,

Narini Awilimunga konopu ltemoma pali lipe manjirimoya? Molo narini Awilimbu ulu tepilima mane tirimuya? (Ais 40:13)

<sup>35</sup> Molo narini Yuni na mele pundu topili kani nani yu kinye ele loi teambili nimbe yu melte langopa tirimuya? Imbo te molo nimo. (Jop 41:11)

<sup>36</sup> Yu melema pali terimu Gote; yu melema pali enge tipe nokopa moromo; melema pali yunge kau. Linoni wali walima Yu paa olandopa iyemu Yunge imbi melemanga pali paa olandopa moromo nimbo yu kapi nimbo imbi lipo ola mundulipo kau pamili. I paa.

**Kraist Paimbo Ningi Ipuki  
Tirimele Imbomani Ulu  
Teangei Mele Poloni Nimbe  
Tirimu Unguma**

## 12

*Poloni enoni enonga koinjo moromele  
kangi undukana Gotenga kau tiemili nengei  
nimu*

<sup>1</sup> Ango kame, oi nindu kano, nani enondo enge nimbo i tepo nio, Goteni lino kondo kolopa naa tambo nimo kani imbomani ari tirimele paa kake telima Gote kalko tiringi aku teko yuni tono kolopa ltimo mele enoni Gotendo tiemili ningon eno enongan koinjo moromele kangina angimo melema pali ulu pulu keri te naa pepa kake tepili yu tiengenimbo konge tero. Gote kapi nimbo yunge imbi lipo ola mundemili ningon aku ulu teangei.

<sup>2</sup> Aku tekolio enonga kangimani altoko we maina imbomanga konopu leko uluma teremele mele manda leko naa teao. Nalo Goteni eno konopu koinjo tirimo ulumuni eno amenge tepili ningon yunge ulu toyatolima teliko punge. Aku ulu tengen lemo enoni Goteni ulu teangei konopu lemo uluma manda pilinge. Aku tekolio ulu pengama kinye ulu yu kanopa konopu tirimoma kinye ulu toyatolima kinye manda liko manjinge.

*Goteni lino imbo te te nimbe enge moke  
tepa tirimomani yunge kongono teamili  
ungumu*

<sup>3</sup> Goteni na kinye konopu noipelie nando andoko imboma Yunge ungu ningo tiwi nimuna nani enondo nimboindo: Eno te te ningoni enonga konopuna iye nomi kelkele naa toko nalo eno litemo mele liko manjiko aku teko molao. Goteni eno kongono lupe lupemanga lipe manjili lupe lupe tirimu akumani konopu leko kondoko eno te te ningon teremele ulu apureio.

<sup>4</sup> Linonga kangina kimbo ki mele angimomani pali kongono lupe lupe teremele. Kini kongono lupe tepe, mongoni lupe tepe, komuni lupe tepe, kangimunga melemaniaku teko kongono lupe lupe teremele mele

<sup>5</sup> aku tepe lino imbo awini moromolo nalo lino Kraistainga imboma moromolomanga lino kangi tendekumu mele molopo kangi tendekumunga kimbo ki melema mele moromolo.

<sup>6</sup> Goteni yunu lino te te nimbo kongono lupe lupe teamili nimbe, lipe manjilima lupe lupe moke tepe tirimo aku kongonoma teamili. Gotenga nimbe munduli ungu pilipe imboma ungu nimbe tipili lipe manjilima imbo tendo timo lemo Gote ipuki tipi wamba lipe manjipe kondoromo mele nipili.

<sup>7</sup> Imbo lipe tapondoli lipe manjilima imbo tendo timo lemo imboma lipe tapondopili. Ungu mane tili lipe manjilima imbo tendo timo lemo aku imbomuni ungu mane tipili.

<sup>8</sup> Umbunimani imboma topa mainye naa mundupili. Konopu enge pepili molangei nimo lipe manjilima peremo imbonuniaku tepe nipili. Imbo lupema lipe tapombaindo kou mone tirimo imbonuni konoputalo tepe naa lepa toyatopakou mone tipili. Imbo lupemanga kongono nokoromo imbonuni nokopa kondopili. Imbo mindili noromelema kondo kolopa lipe taporomo imbonuni tono kolopa lipe tapopili.

*Imbo angenupilima konopu mondangei  
ungumu*

<sup>9</sup> Imbo lupema paa konopu mondoko kondaio. Ulu pulu kerima tiri teko tiye kolko, ulu pulu pengama kau konopu mondoko enge ningon teko molangei.

<sup>10</sup> Imbo angenupili konopu mondoromele mele Kraistainga imboma nendo yando konopu mondaio. Enonga imbo mare molko kondonge eno molko kenjingewali konopu awini naa leko konopu pengapepili imbo lupema kapi ningon molaio.

<sup>11</sup> Ulu pengama tengendo tiye naa kolko enge ningon teko, imbomani lino Gotenga Mini Kake Telimu peya moromolo kanangei ningon yuni topoperope tipili ningon molaio. Awilimunga kongono enge ningon tendaio.

<sup>12</sup> Akilio molopo kondomolo konopumapanjikolio tono kolaio. Umbuni tingewali mumindili naa kolko taka liko molaio. Walwalima Gote kinye ungu ningon konge teko molaio.

<sup>13</sup> Gotenga imbo mare mele molo lemabaloma liko tapoko mele mare tiengen. Imbo kombu tulena imbo mare ponenge leko onge wali liko tapoko noiko peao.

<sup>14</sup> Imbo marenieno teko kenjingema Goteniaku imboma tepea kondopa lipe tapondopili ningon yu konge teangei. Eno teko kenjinge ulumanga Gotenitepa kenjipili ningon konge naa teangei.

<sup>15</sup> Imbo tono kolongema kinye eno tonokolko molangei. Imbo kola tengema kinyekolko teko molangei.

<sup>16</sup> Imboma kinyekonopu tendekunapupili uluma tendeku tiko teko molangei. Eno kakera makera naa ningon imbo awilima moromolo, we imboma kinyehaa andopo molomolo ungu naa ningon, imbo imbi naa mololima kinyekonopu tiko tendekunataputoko molangei. Eno na imbi paa ola moromo, na paa lipe manjili peremo imbomu moro ungu naa neio.

<sup>17</sup> Imbo marenieno teko kenjingewali enoni pundu naa taio! Imbomani pali kanangei ulu wamba kandiki telima kau pilko teko molaio.

<sup>18</sup> Opa teko mumindili kololi ulu akumakonopu kimbo naa tieio. We imbomanga konopu lengema kinye enonga tenge. Nalo enoni walwalima imboma kinye pali tak

lipu molamili ningko konopu kimbo tiko pilko molangei.

<sup>19</sup> Nanga kanopa lili imboma, imbo marenipu eno teko kenjinge wali enoni pundu naa taio. Goteni aku imboma kinye mumindili kolombalo ulumu yunge tembalu ningko tiye kolangei. Aku tepa mele Gotenga Bukuna ungu te moromo, akumu i tepa.

Awilimuni nimbeindo, "Ulu teko kenjirimelemunga pundu toli kongonomu nanga kongonomu kau.

Teko kenjirimelemunga nani nanu pundu topo mindili timbo," nimo, (*Lo 32:35*) aku tepa moromo kani eno enongano ulu te naa teao.

<sup>20</sup> Nalo Gotenga Bukuna nimo mele teao. Akumuni nimbeindo,

Nunge opa pulemu engele kolombalo wali kere langi we ltindiwi. No wali kolto nimbelo wali no kolko tiwi. Aku ulu tenio wali nu kinye opa pule toromo ulu kanoma lipe manjipelie yu mai kolombalo. (*Snd 25:21-22*)

<sup>21</sup> Ulu pulu kerimani eno tepa maindo naa mundupili. Ulu pulu kerima topo mainye mundemili ningolio ulu pulu pengama teao.

## 13

### *Imboma gavmanemanga maindo molangei ungumu*

<sup>1</sup> Imboma pali gavmaneneni nimo unguma pilko liko molangei. Gavman we naa moromo. Goteni kombu nokopili nimbe kanopa Itimona moromomunga eno aku teko molangei. Kombumanga pali gavman moromelema Goteni kanopa lipe molangei nimona moromelemunga aku teko enoni nimele unguma pilko liko molangei.

<sup>2</sup> Akumunga, gavmanemunga ungu naa pimolo nimele imbomani aku teko Goteni aku ulu teangei nimbe mondoromo imbomanga unguma naa pimolo nimele. Aku teremelemunga enonga kotemu wendo ombalo.

<sup>3</sup> Molko kondoromele imboma gavman imbo nokolmani teko naa kenjirimele. Ulu teko kenjiko moromele imboma kau pipili kolangei. Gavmaneneniaku imboma kau tepa kenjimbelo. Gavman imboma linoni pipili naa kolamili. Enoni lino teko naa kenjingei ningolio ulu pengama teko molaio. Aku tenge wali gavmaneneni enoni teko moromele mele kanopa kapi nimbelo.

<sup>4</sup> Imboma molko kondangei nimbe Goteni Yunge kongono tendelimu molopili nimbe gavman lipe mondoromona gavmaneneniaku ulu tembalu. Nalo gavman we enge naa peremo. Imbo kerima mindili timbeindo engemu peremo kani enoni teko kenjinge lemo yu pipili kolaio. Teko

kenjinge imbomanga kot wendo ombalo wali nanga kot tendepili nimbe Goteni gavman mondoromo.

<sup>5</sup> Akumunga gavmaneneni lino tepa kenjimbelo kani nimbelo mele tepo molamili akumu kau ningko naa molangei. Lino konopu keri naa pepili, konopu wango nipili molamili ningko gavmaneneni nimbelo mele teko molangei.

<sup>6</sup> Enoni aku teko liko manjikolio gavman nokoli imbomani Gotenga kongono kau teko moromele kani kou takis tangei. Kombu nokoromele kongonomu aku enonga kongono kamukumu teliko punge.

<sup>7</sup> Gavmaneneni ungu mane tipelie mele tieio nimo melema tiengei. Kou takis ltimele imboma kou takis toko tiengei. Mele ltimelemanga kou takis purumo mele toko tiengeila. Eno nokoromele imboma kinye karaye naa teko ungu ningema taka liko pilko molangei. Imbo te imbi ola moromomunga imbi liko ola mundengeila.

### *Ungu manema pali pilipo lipo teamilindo imboma konopu mondamili ungumu*

<sup>8</sup> Eno nendo yando imboma kinye pundu anjikolio we pepa kau naa pumbe aku punduma welea pora nipili ningko nondoko pundu taio. Pundu mele tendekumu kau anjikolio tekolio pora naa nipili nengei. Akumu i tepa: Nendo yando imbo eno enongano kinye konopu mondoko kondo kolko mololiko pangei. Aku tenge imboma aku teko Gotenga ungu manema pali pungo ara tingi.

<sup>9</sup> Gotenga ungu mane Mosesini yando nimbe tirimu peremo ungu manema i tepa: Ambo iyema wapu ulu kerinale naa teao. Imboma toko naa kondaio Melema wapu naa lieio. Imbo lupemanga melema kanoko kumu naa meaio kanomu. Aku ungu manema kinye ungu mane lupema pali kinye lipo popo tipo nimiliindo,

Eno enongano te te ningko konopu mondoko kondo kolko nokoromele mele aku tekola imboma konopu mondoko nokoko molaio, (*Kis 20:13-15,17; Lo 5:17-19,21*)

aku ungu mane peremomu nimolo.

<sup>10</sup> Enoni konopu mondoromele imboma kondo koromele lepalie aku imboma manda naa teko embambo tinge. Akumunga imboma konopu mondoko kondo kolonge ulumuni ungu manema paa pali pilko liko tengi.

*Jisas Yunge imboma omba limbelo walimu wendo ombalomunga lino kinye molomolo mele ungumu*

<sup>11</sup> Wai te omiba peremomu liko manjikolio aku ulu teao nio. Aku waimu i tepa: Kraistini linonga nimbe tenderimumu oi paimbo nimbo ipuki tirimulu wali yuni yu

molombalona lino yu peya molamili nimbe kamukumu tukundo limbelo waimu nondopa naa ombai terimu, nalo aku waimu kinye nondopa wendo ombai teremo kani eno uru peremelema makilko molonge walimoi wendo omo.

<sup>12</sup> Ipo lepa we naa peremo. Kombu tangombai teremo kani tumbulu toromo wali teremele ulu puluma topo maindo mundupo tiye kolopo, Gote kinye kalale tipolio opa teamili ningopaa au ningo melema ka anjeio.

<sup>13</sup> Ulu kake telima kombu tangoromo wali imbona kanangei pipili naa tembalu uluma temilindo enge nimbo teamili. Nalo no enge nilima nomili nombeya tepo keke lepo naa tamili. Wapu ulu kerinale naa tepo,aku uluma temilindo konopu lipomundupo naa andamili. Ungu nendeleme naa nemili. Imbonarengamelema kolo yokoli naa kolamili.

<sup>14</sup> Nalo ami iyemani opa teli wali pakoli kapani telima pakoromele mele eno aku teko Awili Jisas Kraist lino lipe tapondopa lino enge nindipili, Yu konopu litemo meleaku tepo konopu leamili ningopaa tekomele Yu liko pakokolio, oii we konopumani ulu kerima liko manjiko eio konopu litemele uluma naa teao.

## 14

*Kraustinga imbonanga teremele uluma kanopo apurupo teko kenjirino ungu naa nemili*

<sup>1</sup> Imbo te Kraist yu paimbo nimbe ipuki tirimo nalo yu enge nimbe naa ipuki tirimo imbo akumundo peya molamili owi ningo, yuni lipe manjipelie ulu teremoma naa apurujo yu kinye winjo winjo ungu toko mondoko naa nengei.

<sup>2</sup> Kraustinga imbo te langima pali nombowali ulure naa tembalu nimbe pimo nalo Kraustinga imbo te konopu enge naa pepili molopalie ari melema peya pali mi lepa naa nomba, poinyena litemo langima kau noromo.

<sup>3</sup> Imbo te langima pali noromo imbonuni ari melema mi lepa naa noromo imbonayu keri, na penga konopu naa liepili. Imbo te ari melema mi lepa naa noromo imbonuni imbo langima pali noromo imbonukanopa apurupelie tepekenjirimo naa nipili. Imbo langima pali noromo aku imbonu Goteni tukundo lipe nanga imbonu moromo nimukaniaku ulu naa teangei.

<sup>4</sup> Nu nari konopu lekolio imbo tengakendemande imbonuni ulu tembaloma kanoko imu teko kondorono, imu teko kenjirino ningo apururunoya? Yunge nokoli iyemuni kau yunge kongonoteremoma kanopa imu teko kenjirino, imu teko kondorono nimbe apurumbelo.

Nalo Awilimuniaku kongono kendemande imbonu konopundo enge pepili molopili nimbe lipe tapombalomunga yu paimbo konopu enge pepili molombalo.

<sup>5</sup> Kraustinga imbo teni i we kongono walimu, i Gotenga wai kake telimu konopu litemo. Nalo Kraustinga imbo teni waimanaa apurupo walima pali tendekutirimo konopu litemo. Imbo te ne ningoni konopu litemele mele konopuni pilkolio naaku tepo konopu lteomua paa konopu lteo ningo ipuki tiengei!

<sup>6</sup> Imbo teni i waimu penga olandopa konopu litemo imbonuni Awilimuni kanopa penga pimo mele teambo nimbeaku tepe nimbe pimo. Imbo te langima naa apurupo wakulu tipe we noromo imbonu Awilimuni kanopa penga pimo mele teambo nimbeaku tepe Gotendo paa tereno nimbelie langima noromo. Imbo te langima mi lepa naa noromo imbonu Awilimuni kanopa penga pimo mele teambo nimbeaku tepe Gotendo paa tereno nimo.

<sup>7</sup> Lino Kraustinga imbonanga teni konopuni pilipe na nanu pilipolio i ulu tepo molambo manda lipe manjipe aku ungu naa nimbelo. Yunu pilipelie i tepo kolambo manda naa nimbelola.

<sup>8</sup> Lino koinjo molopolio Awilimuni kondenopu mondoromo uluma kau tepo molamili. Kolomolo lemo Awilimuni kolanimowalimuwendo oromo wali Gotenga imbo molopolio kolombo nemili. We koinjo molopolio wali kape kolomolo wali kape lino Awilimunga imbona moromolo.

<sup>9</sup> Aku ulumunga ulu pulumu i tepe: Yu imbo kololimanga kape koinjo mromelemanga kape Awilimuni molambo nimbe Kraist yu kolopalie makilipe koinjomolorumu.

<sup>10</sup> Akumunga nuni ambe telka nunge anganani ulu teremoma imu teko kenjirino, imu teko kondorono ningo apururunoya? Nunge angena ambe telka kanoko keri pilko yu imbo kerimu ninoya? Akilio lino pali Gotenga kotena angilimolo kani liko manjeio.

<sup>11</sup> Akumunga Gotenga bukuna ungu te moromo, akumu i tepe:

Awilimuni nimbeindo, "Na koinjo molopo kau puro akumunga mi lepo imbona pali ongo nanga kumbekerena komongo toko pondoko tamalu peko, Gote yu paimbo moromo ningo para tiengei nio," nimo. (Ais 45:23)

<sup>12</sup> Akumunga lino te te nimbo linonga ulu teremolomanga puluma pali Gotendo nimbo para timolo.

*Kraustinga imbonani imbo mare naateko kenjengei ungu*

<sup>13</sup> Akumunga linoni nendo yando imbonani ulu teremelema apurupo kanopo keri teremele nimolo uluma tiye kolamili. Nalo i ulu teamili, nunge angena mainye pumbelo molo ulu pulu kerima tembalo ulu te naa teambo ningol pilko molangei.

<sup>14</sup> Awili Jisasini mane tirimumunga na Pol, langimanga pali melte yunu Goteni molo nimbe mi naa toromo nimbe naa karomo nimbo ipuki tiro. Nalo imbo teni langi Goteni molo nimbe mi toromo konopu lemo lemo aku langimu yunge tiri tere-momu nimbo lipo manjiryo.

<sup>15</sup> Nuni langi te norono ulu angenani kanopalie yunge konopuna kelena kolomo lemo nuni yu konopu naa mondokolio aku ulu tereno. Yunge nimbe Kraist kolo wangopa kolorumu imbo teni nu langi norono ulu kanopalie Kraist tiye kolopa kamukumu tawendo pumbre molopa kenjimbelo lemo aku langimu naa nowi!

<sup>16</sup> Nuni ulu te paa tero konopu lekolio tenio ulumu imbomani kanokolio nunge umbulkondo ungu nindiko tepa kenjirimo ninge wali manda naa tembalo kani nu tenio uluma wamongo liko manjiko tewi.

<sup>17</sup> Gote iye nomi king molopa Kraistingu imboma nokopalie langi kinye no kinye noromele aku mele manga yu kanopalie ungu te naa nimo. Yu iye nomi king molopa nokopalie ulu toya tolima kinye, ame toli uluma kinye, tono kololi uluma kinye, Mini Kake Telimuni tirimo aku uluma kau tengen wali konopu mondombro nimbe pilipe momromo.

<sup>18</sup> Imbomani Kraistingu kongono tendengeindo aku uluma teremele imboma Goteni kanopa penga pimo, we imbomani kape kanoko teko kondoromele ningokaromele.

<sup>19</sup> Akumunga linoni imboma konopu tendekuna kau pupili molonge uluma kinye, linonga angenupilima Kraistingu unguma pilko liko teko molongeindo konopu olandopa enge pepili molonge uluma kinye, paa enge nimbo teamili.

<sup>20</sup> Langi te nonio wali Gotenga imbo te kamukumu teko maindo mundunio wali paa manda naa tembalo kani aku ulu paa naa tewi. Paimbo langima pali kalaro te naa molopa ulure naa teremo nalo langi te nonio wali imbo teni kanopalie yu konopu talo pembalomunga Kraistingu imbo molopa tembalo mele pilipe tundupe tepe kenjimbelo lemo aku tenio ulumu keri.

<sup>21</sup> Nani kongi te molo no te nombo molo ulu te lupe tendu lemo nanga imbo angenu tengen Kraist ipuki tirimo ulumu tepo mainye mundumbo konopu lenio lemope aku ulu naa tewi.

<sup>22</sup> Akumunga nunu aku melema kanoko liko manjinio mele akumu naa kinye Gote

kinye ulu elongamu. Imbo teni melte kanopa i meleme penga konopu lepalie yunge konopuni pilipe tepo kenjiro nimbe ungu te naa lipe manjimo lemo yu tono kolopili.

<sup>23</sup> Nalo imbo teni langi te kanopa i langimu Goteni molo nimbe mi toromonje. nombo wali manda naa tembalonje nimbe lipe manjipelie nomo lemo tepa kenjirimo. Goteni konopu mondonromo ulu te tero nimbe ipuki naa tirimomunga nomo lemo paa tepa kenjirimo. Linoni Goteni konopu mondonromo uluma teremolo nimbo ipuki naa tirimolo uluma teremolo wali aku tepo ulu pulu kerima teremolo.

## 15

*Kraistini pilipe teremo mele linoni aku  
tepo pilipo teamili nimu ungumu*

<sup>1</sup> Lino Jisas paimbo lipe tapondolimu nimbo enge nimbo ipuki tipo tiye naa koromo molo imbomani ipuki enge naa nili imboma Jisas ambolko kondangei nimbo enonga umbunima peya mendepo, lino linongan kele toromolo uluma kau naa teamili.

<sup>2</sup> Lino te te nimboni Kraistingu imboma Kraist yu paimbo ningol ipuki tirimele mele tiye naa kolko yu enge ningol ambolangei nimbo eno lipo tapondolimido enoni konopu tirimele uluma teamili.

<sup>3</sup> Lino i tepo lipo manjirimolo. Kraist kape yu yunu konopu tipo molombo uluma teambo naa nimu. Yuni pilipe terimu mele Gotenga bukuna moromo mele i tepa, Goteni maina puwi nimbe lipe mundumbelo iye Kraistini pele omaba tembalo mele Devitini oi pilipelie nimbeindo,

Imbomani nu ungu taka tondoko marake tengen akumu na peya tengela, (Sng 69:9)

nimu.

<sup>4</sup> Oi Gotenga bukuna ungu toko panjiringi aku ungumani pali lino mane timbeindo moromo. Linonga konopu enge pepili tiye naa kolopo Kraist ambolopolio Goteni lino lipe tapondombalo walimu paimbo ombalo ningol enge ningol ipuki tiko nokoko molangei nimbe Goteni aku unguma pilengei kani bukuna tangai nimuna toringi ungumu moromo.

<sup>5</sup> Konopu toimbo topili tiye naa kolko Kraist ambolangei nimo Goteni eno Kraist Jisas lombliko purumele imboma nendo yando konopu tendekuna pupili popo tiko molkolio,

<sup>6</sup> linonga Awili Jisas Kraistingu Lapa Gotenga imbi liko ola mundengei nimbe aku teko molangei nipili.

*Manga pupu lufe imboma kinye Juda imboma kinye Kraist enonga pali lufe taporomo ungumu*

<sup>7</sup> Konopu tendekuna pupili molangei nio akumunga, eno Kraista imboma moromele kani Gotenga imbi ola molopili ningo Kraistini enondo peya kopu tepo molamili waio nimu mele teko enoni enonga imboma nendo yando peya kopu tepo molamili waio neio.

<sup>8-9</sup> Nani eno Rom imbomando i tepo nimbo tiro. Kraistini Goteni paimbo nimo ningo pilengei nimbe, Goteni Israel imbomanga anda kolepalendo wendo ombalo mele nimbe panjirimu ungumu paimbo wendo oromo pilengei nimbe, Juda imbo naa moromele imbomani Gote kondo kolopa lufe tapondoromomunga Gote yunge imbi liko ola mundengei nimbe, Kraist Yu Juda imbomanga kongono kendemande iyemu omba molorumu. Juda imbo naa moromele imbomando ungu te aku tepe mele Gotenga bukuna toringi moromo, akumu i tepe,

Israel imbomanga talapena naa moromele imboma molongena ombo nani nu kapi nimbo, kunana nimbo nunge imbi lipo ola mundumbo, (Sng 18:49) nimbe moromo.

<sup>10</sup> Ungu te kape peremomu i tepe,

Israel imbomanga manga pupu naa moromele imboma, eno Gotenga Israel imboma kinye peya tono kolko molangei, (Lo 32:43)

nimbe moromo.

<sup>11</sup> Ungu te i tepala,

Israel imbo naa mololi imboma, Awilimu kapi neio. Imbomani pali yu kapi ningo kunana neio, (Sng 117:1)

nimbe moromo.

<sup>12</sup> Aisaiani ungu te nimbeindo,

Jesini kalopa limbelo iyemu ombalo. Yu omba Israel talapena naa moromele imbomanga iye nomi kingimu molopa eno nokombalo. Enoni Yu lino lufe tapondombalo ningo liko manjiko nokoko molonge,

(Ais 11:10) nimu.

<sup>13</sup> Mini Kake Telimunga engemuni eno Gote tembo nimbe panjirimu ungu aku ulu paimbo tembalu ningo enge ningo ipuki tirimele ulu altoko tiye naa kolko paimbu ningo enge ningo ipuki tiko mololiko kau pangei nimbe, eno ipuki tirimelemunga pulumu Gote yuni eno ipuki tirimele ulumuni eno tepe tono kondopa konopu ame topili molangei nipili.

*Poloni imbo lupema kinye kongono terumumunga ungumu*

<sup>14</sup> Nanga angko kame, eno paimbo ulu pengama kau waliwalima teko molko,

unguma pali paimbo pilko kondoko, nendo yando mane tingi engemu paimbo eno kinye peremo nimbo ipuki tiro.

<sup>15</sup> Ungu mare eno altoko pilengei nimbo na pipili naa kolopo enge nimbo pipia toro. Na kongono paa penga te timbo nimbe Goteni

<sup>16</sup> na kanopa lufe Kraist Jisasinga kongono tendambo ningo Juda imbo naa moromele imboma liko tapondani nimumunga aku ulu teru. Imbo lupema Gote popo toko kalko tirimele konopu mondonromo melema mele molko, Mini Kake Telimuni eno Gotenga imbo kake telima kau molangei nipili nimbe Goteni na imbomanga popo tondoli iyemu molko imboma ungu tukumemu ningo tilko andowi nimbe na kanopa ltimumunga aku tepo eno ungu mare enge nimbo, nimbo tipo pipia toro.

<sup>17</sup> Akumunga na Kraist Jisasinga kinye peya tapu topo kongono terembolomunga Gotenga kongonomu tenderomunga na paa tero nimbo pilipo tono kolto.

<sup>18</sup> Nani ungu te lupe paa naa nimbo timbo. Kraistini na lufe tapondoromona nani ungumu nimbo tipo ulu enge nili mare teromunga imbo lupema Gotenga unguma pilko liko teremele aulkemu akirinderu ulu akuma kau nimbo timbo.

<sup>19</sup> Mini Kake Telimuni na enge tirimumunga nani ulu enge nili mare teruna kanokolio imbo lupema aku teringi. Aku kongono temboindo Kraista ungu tukumemu pali ulke kombu awili Jerusalem pulu polopo nimbo tipolio kombumanga pali nimbo tilipo pumbo kombu Ilirkum provins nimbo tipo pora tiru.

<sup>20</sup> Oi kape kinye yandopa yandopa kape, Kraista imbimu naa pimele kombumanga yunge ungu tukumemu paa pilengei nimbo andopo nimbo tiemboi konopu lteo. Iye teni mai topa noilina ola ulke naa takambo konopu lteo.

<sup>21</sup> Nani teambo konopu lteo mele bukuna ungu te moromo, akumu i tepe, Imbo oi yunge temanemu naa toko tiringi imbomani yu kanonge. Ungumu naa pileringi imbomaniaku ungumunga ungu pulumu pilinge, (Ais 52:15) nimbe moromo. Aku tepe mele nani ungu oi naa pileringi imboma nimbo tiembo konopu panjiro.

*Poloni Rom imbomando ombo kanamboi nimu ungumu*

<sup>22</sup> Aku konopu panjiromunga eno Rom imboma ombo kanombo ulumu ya i kongonomuni na amboltomo.

<sup>23</sup> Nalo kinye i kombumanga na kongono tembo mare naa ltemo. Poinye awininga

eno ombo kanamboa konopu lepo moloru, akumunga

<sup>24</sup> na kombu Spen pumboindo oi eno ombo kanopolio pumbo konopu lteo. Eno kinye tono kolopo peya popo tipo molopolio altopto na liko tapoko kombu Spen mundupengei nimbolio aku tepo tembo konopu lepo moro.

<sup>25</sup> Nalo kinye Gotenga imbo Jerusalem moromelema oi lipo tapondopuro.

<sup>26</sup> Kraistingu imbo kombu provins Masedonia kinye Akaia talonga moloringi imbonani Gotenga imbo Jerusalem moloringimanga kangindo pakowi melema kinye kere langi nowi melema molo ltemo imboma liko tapongeindo kou mone toyota toko liko maku toringi kou monema timboi puro.

<sup>27</sup> Enonga konopuni pilkolio tiringi nalo pundu melela toringi. Imbomanga minima lipe taporomo melema oi Juda imboma kinye perimu. Aku mele tiringina ltingi imbo lupemani pundu mele toko kangindo tapopili melema Juda imboma tirimele.

<sup>28</sup> Akumunga na i kongonomu teppo rora timboindo oi Jerusalem pumbo kombu Akaia kinye Masedonia provins talo imbonani liko maku toko na tiringi kou monema imboma tipumbolio nimbomuni, altopto kombu Spen pumboindo oi kombu Rom ombo eno kanombo.

<sup>29</sup> Na i tepo lipo manjiro. Ombo wali Kraistini eno tepa kondombalo ulu paa awini mepo ombo.

<sup>30</sup> Ango kame, nani enondo enge nimbolio nimboindo, na lipo tapondamili ninga na kinye mindili nongo Gote nanga konge tendeko molangei nio. Awili Jisas Kraist ipuki tirimolomunga kape, Mini Kake Tellimuni lino nendo yando konopu mondormolo ulumu tirimomunga kape, aku ulu talonga konge tendangei nimbo nio.

<sup>31</sup> Gotendo nanga konge tendekolio, kombu Judia distrik Kraistingu ungumna naa pilko ltingi imbomania na teko kenjiko mindili naa tiengi. Nani Gotenga imbo Jerusalem moromelema lipo tapombo wali konopu mondangei neio.

<sup>32</sup> Na Goteni Manda, puwi nimo lemo na tono kololipo eno moromelena ombo eno kinye peya wali mare popo tipo molomolomunga altopta konopu enge nipili linonga konopu parela nipili kani ninga aku teko Gote kinye konge teaoi.

<sup>33</sup> Lino konopu ame topili nimo Gote eno kinye pali molopili. I paa.

## 16

*Poloni imbo lupe lupema molaio nimungumi*

<sup>1</sup> Linonga kemulu ambo Fibi, yu ulke kombu Senkria Kraistingu imbo talapemu

tapo ambo kongono te tenderemo ambomu, yu ombalo wali kanoko penga pilko

<sup>2</sup> yu Awilimunga ambomu kani ninga molamili owi nindengei. Eno Gotenga imboma molkolio aku ulu teko, yuni Gotenga imbo awini enge nimbe lipe tapondopa, na kape lipe tapondorumu kani yu umbuni mare memo lemo liko tapaio nio.

<sup>3</sup> Na kinye Kraist Jisasinga kongono teremolo ambo Prisila kinye omenu Akwila talondo molko kondaio nindeio.

<sup>4</sup> Imbomareni na toko kondongei teringi wali elo tongei lepamo ninga pipili naa kolko na liko taporingili. Na liko taporingilimunga nanu kau paa tereno naa nio; Juda imboma ninga naa molko kombu lupe lupe molko Kraistingu imbomani kape paa tereno nimelela.

<sup>5</sup> Kraistingu imbo mare elonga ulkena nombeya teremele imboma molko kondaio nindeio. Nanga paa konopu mondoro kanopa lili iye Epainetus, yu kombu Esia provins tukundo kombumanga pali kumbe lepa omba Kraistingu iyemu molorumu iyemu, yu molko kondowi nindeio.

<sup>6</sup> Enonga kongono enge nimbe tenderimu ambo Maria molko kondowi nindeio.

<sup>7</sup> Nanga Juda iye Andronikus kinye Juias talo, na kinye peya ka ulkena perimulu,aku iye talo molko kondalio nindeio. Jisasin nanga kongono tendepaio nimbe lipe mundurumu iyemani pali aku iye talo teko kondorombele iye penga talo nimele. Na Kraistingu iyemu oi naa molambo elo Kraistingu iye talo moloringili.

<sup>8</sup> Ampliatus yu Awilimunga iyemu moromomunga yu konopu mondoro iye molko kondowi nindeio.

<sup>9</sup> Lino Kraistingu kongono peya teremolo iye Urbanus kinye nanga kanopa lili konopu mondoro iye Stakis kinye molko kondalio nindeio.

<sup>10</sup> Apeles, Kraistingu iyemu molorumunga mindili norumu nalo Kraist tiye naa kolopa enge nimbe ambolorumumunga yu kanoko kapi nimele,aku iyemu molko kondowi nindeio. Aristobulusinga ulkena peremele imboma molko kondaio nindeio.

<sup>11</sup> Nanga Juda iye Herodion molko kondowi nindeio. Narsisusinga ulkena peremele imbomanga mare Awilimunga imbo moromelema molko kondaio nindeio.

<sup>12</sup> Awilimunga kongono enge ningotenderingili ambo Tiripina kinye Tiriposa talo molko kondalio nindeio. Nanga konopu mondoro kanopa lili ambo Persis, Awilimunga kongono enge nimbe tenderemo ambo tela, akumu molko kondowi nindeio.

<sup>13</sup> Awilimunga iye paa penga Rufus kinye yunge anumu kinye molko kondalio nindeio. Aku ambomuni nanga anumu mele molopha na nokoromola.

<sup>14</sup> Asinkritus, Flegon, Hermes, Patrobas, Hermas kame, enonga angenali eno kinye peya moromele iyema kinye eno molko kondaio nindieo.

<sup>15</sup> Filologus kame Julia kame Nereus kame yunge kemulu kame Olimpas kame Gotenga imbo eno kinye peya moromele imboma pali molko kondaio nindieo.

<sup>16</sup> Lino pali Kraistingu imboma ning nendo yando imboma kangulko molko kondaio neio. Kraistingu imbo talapemani pali eno molko kondaio ning mundurumele.

*Imbo marenii Kraistingu imbo talapemu tungu mengu tindiringimunga ungumu*

<sup>17</sup> Ungu te kamukumu nemboi. Ango kame, nani eno enge nimbolio nimboido, Imbo marenii Kraistingu imbo talapemu tungu mengu tiko, oi mane tiringi pilko ltingi unguma naa pilengei ningungulu lupe lupema ning tirimelemunga Kraistingu imboma pilkolio, Kraistingu ungumu oi pimele mele kelko pilko tunduko teko ken-jinge kani aku imboma kane kane molaio. Aku imboma kinye nondoko tendekuna popo tiko naa molangei.

<sup>18</sup> Aku imbomani linonga Awili Kraistingu kongonomu naa tenderemele kani eno kinye tendekuna naa molangei. Enonga kangindo uluma kau konopu mondoko teremele. Imbomani eno paimbo nimele ning pilengei ning kolo toko ungu penga mare nimolo ning kondi toromele aku unguma Kraistingu imbo marenii, paimbo ungu mare kau ningolio pilko moke naa teremele imboma ning embambo tirimele.

<sup>19</sup> Enoni Awili Kraistingu unguma teng tirimele ulumus imbomani pali pimelemunga na eno kinye tono awilimu kolopo moro, nalo eno ulu pengama paa pilko kondangei. Ulu kerima pali tiye kolko naa liko manjengei konopu lteo.

<sup>20</sup> Molko kondoko konopu ame topili molangei nimo Goteni nondopa kuro-manga nomi Satan kimboni kambulengei nimbelo. Goteni Awili Jisas kinye konopu noirimo ulumus eno kinye pepili.

*Imbo marenii Rom imbomando molko kondaio ningi unguma*

<sup>21</sup> Na kinye kongono tapu topo terembolo iye Timotini eno molko kondaio nimbe mundurumo. Nanga Juda iye Lusius kame Jeson kame Sosipater kame akumani kape eno molko kondaio ningungundurumelela.

<sup>22</sup> Na Tertius, Poloni nimo mele pilipo i pipiamu tondoro iyemuni Awilimunga iyemula molopolio eno molko kondaio nimbo munduro.

<sup>23</sup> Na Pol kinye Kraistingu imbo talape ya moromelema kinye yunge ulkena peya

peamili waio nimbe nokoromo iye Gaiusini eno molko kondaio nimbe mundurumo. Ya ulke kombu awili Korin kou mone kinye kombumunga kongonomu kinye nokoromo iye Erastus kinye linonga angenu Kwartus kinye eloni eno molko kondaio nimbele.

<sup>24</sup> Goteni Awili Jisas kinye konopu noirimo ulumus eno pali kinye pepili. I paa.

*Gotenga imbi lipe ola munduli ungumu*

<sup>25-27</sup> Kinye linoni Gotenga imbi waliwima lipo ola mundemili. Na ungu tukume nimbo tiro ulumuni tepe Jisas Kraistindo nimbo tirimolo ulumuni kape tepe Goteni eno konopu manda enge tindimbelo. I ungu tukumemu oi lopeke tepe perimu ungumu. Aku ungumu poiney paa awini Goteni oi nimbe para naa tirimu nalo kinye moro topa lino pilemili nimbelie nimbe para tirimo. Molopa Kau Puli Goteni mai kombuna imbo talapemani pali i ungumu yunge paimbo ungu tukumemu ning ipuki tiko kano ungumu pilko liko tenge tiko lombilengei nimbe yuni yunge profet iyemando moro topili ning para tieio nimu. Aku wali aku ungu ningotiringi iyemani imboma paa pilengei ning enonga bukumanga tukundo aku ungu tukumemu wendo ombalo mele ning tiko buk toringina peremo. Jisas Kraistindi linonga nimbe tenderimumunga Gote yu kau lipe manjili peremo iyemu, yunge imbi kamukumu ola molopa kau pupilli. I paa.

**Poloni Korin Imboma Oi  
Kumbe Lepa Pipia Topa  
Tirimu Ungumu  
1 Korin  
I UNGU TORUMUMUNGA  
Ungu Pulu Mare**

Korin kombuna imbomani melema topo toko yoko liko andoko molkolio wali ulu pulu kerima teliko teliko puringi. Kombu akuna imbomare bolkena mele Jisas ipuki tiringi akumando Poloni ungu mane tipe enonga teringi uluma nimbe amenge tepalie i ungumu topa panjirimu. Aku ulu tepalie wali Jisasinga kongono lipe mundurumu aposel iye tengah konopu peremo mele lipe ondorumu. Unga enge nili mare i tepa: Mini Kake Teli tirimu ulu mare (Sapta 12, 14 pali). Konopu mondoli ulu paibombu (Sapta 13 pali). Imboma kolkolio makilinge mele (Sapta 15 pali).

Goteni nu nimbe amenge teli unguma paa pileni nipili!

<sup>1</sup> Na Pol, Jisas Kraistingu kongonomu tendamboi konopu lepalie Goteni na kanopa lipelie tipe mundurumu. Na kinye linonga Kristen imbo angko Sostenes kinye molopolio nani i pipiamu topolio eno moromele lendo tipo munduro.

<sup>2</sup> Korin kombu awili akuna Gotenga ungumu pilko Jisas ipuki tiko nombeaya teko moromele imbo akuma Goteni yunge imbo kake telima molangei nimbe kanopa ltimumando i pipiamu tipo munduro. Eno mele moromele linonga Awili Jisas kapi ningi imbi leko kombu malio moromele imbo akuma kape Goteni kanopa ltimu. Awili Jisas yu imbo kanomanga kape linonga kape iye kamako moromo.

<sup>3</sup> Gote kinye linonga Iye Awili Jisas Kraist taloni kondo kolkolio eno teko ame tondangili taka ningi molangei nimblolio konge nio.

*Poloni Gotendo paa tereno nimo*

<sup>4</sup> Eno Jisas Kraistingu imboma moromele kani Goteni eno konopu mondopa mane ungu tirimuna nani Gotendo waliwalima paa tereno nio.

<sup>5-6</sup> Lino Jisas Kraistingu terimu temanemu nimbo tirimulu unguma paa ipuki tiko ingi ningi amboloringimunga Goteni mane ungu pali enondo tirimu. Kraistingu imboma moromelemunga eno Goteni tirimu mele ambolkolio uluma pali manda tinge. Gotenga ungumu ningolio wali ningi kondoromele kinye yunge unguma paa liko manjirimene.

<sup>7</sup> Aku teko molkolio eno Linonga Iye Awili Jisas Kraist altopa yando mona ombalo

waimu nokoko molkolio wali Mini Kake Telimunga tirimo uluma te eno kinye naa ponjirimo.

<sup>8</sup> Goteni eno tepa enge tipe mondombalona enoni enge ningi mololiko pungo eno kolongei wali kape yunge imboma molonge. Akumunga linonga Iye Awili Jisas Kraistini imboma moke tembai yando ombalo wai akuna eno imbo toya tolima molonge.

<sup>9</sup> Goteni eno yunge marenu Jisas Kraist yu linonga Iye Awili kinye kopu teko molangei nimbe kanopa wendo ltimu. Oi Nanga imboma nokopo kondomboi nimu ungumu ara tipelie eno nokopa kondombalo.

*Korin Kristen imboma lapu lupe lupe ningo moloringi*

<sup>10</sup> Nanga Kristen imbo angko kame, enoni lapu lupe kumbe teko enongano molamili ningei mele aku ulu paa naa teao nimblolio Awili Jisas Kraistingu imbina kimbo mundupolio niowa. Nalo konopu tendekuna pupili Jisas i tepo lombilemili ningi molaio.

<sup>11</sup> Ambo Kloenga ulkena molkolio oringi imbomareni nando ningi tiko ningei eno nanga Kristen imbo angko kame enonga nendo yando ungu mele nale teremele ningi ningimunga na i ungumu eno nimbo tiro.

<sup>12</sup> Eno ungu mele nale i teko teringi ningi. Imbo mareni lino Polonga imboma moromolo ningi. Mareni lino Apolosinga imboma moromolo ningi. Mareni lino Pitanga imboma moromolo ningi. Mareni lino Kraistingu imboma moromolo ningi. I ungumunga ningolio eno ungu mele nale teringi.

<sup>13</sup> Nalo Kraistini yunge imboma lupe lupe mokemake leko naa molaio nimo kani akupe ambele ulu mare teremeleya? Kraist yunge lapuna tukundo imboma da teko ungu mele nale naa teremele. Na Pol enonga nimbo unjo polopeyana kondoruna teremeleya? Molo nanga imbina eno no ltingiya?

<sup>14</sup> Aku molo. Nani iye talo kau no ltindiru. Krispus kinye Gaius talo akumu lipo manjiro. We imbo te molo. Eno imbo awini no naa ltindirumunga na Gotendo paa tereno nio.

<sup>15</sup> Aku niomu imbo mareni lino Polonga imbina no lipo nanga imboma moromolo ungumu paa naa ningi.

<sup>16</sup> A! Kinye altopo lipo manjiro karolo iye Stefanasinga lapumu no ltindiru. Imbo te lupe no ltindirunje aku maa toromo.

<sup>17</sup> Kraistini na imbo no ltindipuwi ungu naa nimu kani nani imbo awini no naa ltindiro. Nalo yunge ungu penga nimbe mundulimu pungo imbomando temane

toko tindipuwi nimu. Aku tepolio wali nani imbo imbomanga lipe manjilimu ambolopolio ungu nimbo naa tiro. Aku molo. Ne imbo liko manjilimanu nimele mele aku tepo nilkanje aku Kraist unjo polopeyana kolorumu ulumu darenga mainye pulka.

Kraist lipo manjipolio wali Gotenga engemu kinye yunge lipe manjilimu kanopo imbi tirimolo.

<sup>18</sup> Aku Kraist unjo polopeyana kolorumu ulumu pilkolio tipe kombuna pungei imboniaku ungu keke lepore ningokonopu ltemele. Nalo lino Goteni tepe wendo limbei imbomani i ungumot Gotenga enge nilimu teremo nimbo lipo manjirimolo.

<sup>19</sup> Nalo Goteni yunge bukuna ungu te nimbei.

Eno mongo angimo konopu ltemele aku imboma nani enonga konopuma manda tepe keka tindimbo. Paa liko manjirimele imbomanga lipe manjilimu tepe bembotimbo, (*Ais 29:14*)

nimu.

<sup>20</sup> Akumunga eno imbo lipo manjirimolo konopu ltemele imboma, kinye Gotenga terimu uluma eno te imbomani liko manjirimeleya? Mosesinga mane ungu bukuna peremo unguma lipo manjirimolo konopu ltemele imboma, kinye Kraist kolorumu ulumu eno te imbomani liko manjirimeleya? Eno ungu akuromele kano imboma, kinye Gotenga ungumeno te imbomani manda akungeya? Goteni mai kombu paa lakoko liko manjirimele imbo palinga lipe manjilimu topa maindo mundurumu.

<sup>21</sup> Kano imbomanga konopu ltemelema topa maindo mundupelie, Goteni mai kombu imbomani yu naa liko manjiringi ulu kanopalie linoni imboma Jisas ombar kolopa makilerumu nimbo tirimolo ungumundo imbomareni ungu keke lepore ningi kano ungumopilko ipuki tirimele imboma tepe koinjolimbo nimbe konopu lerimu.

<sup>22</sup> Aku ungu keke lepo nimele Juda imbomani lino ulu wengendeli te kanopolio imbo te ipuki timolo konopu ltemele. Aku tepe mele kala Grikimbomani iye lipe manjilimu kau ipuki timolo konopu ltemele.

<sup>23</sup> Nalo lino kongono lipe munduli iye aposelemani Jisas enonga nimbe ulu keriteremelemunga unjo polopeyana kondorumu ningokipuki teio nimolo. Aku ungu pilkolio Juda imbomareni ne ungu kolo mare lepamo ningokipuki naa tirimole. Aku tepe mele kala Juda imbomanga imbo lupemani ne ungumokeke lepo toli te ningolikomanjirimele.

<sup>24</sup> Nalo Goteni Jisas ipuki tieio nimbungumopilkolio Juda imboma kape Grikimboma kape Kraist ipuki tikolio

wali Gotenga engemu kinye yunge lipe manjilimu kanoko imbi tirimole.

<sup>25</sup> Mai kombu imbomani Gotenga ungu imu konopu keke lepomu nimele nalo konopu keke lepo nimele ungu akumuni Goteni imbo palinga lipe manjilimu pange tenderimu. Aku tendekungumundo mai kombu imbo mareni Gotenga ulu tamba nilimu nimele nalo tamba nili ulu akumuni Goteni mai kombu imbo palinga engema topa maindo mundurumu.

<sup>26</sup> I tendekungumundo ungu te nimboi. Goteni eno Kristen molangei nimbe kanopatitmu wali moloringi mele liko manjeio. Aku wali mai kombu imbomani i paa mongo angimo imbonu nimele ungumeno pokorendo kauaku teko ningi. Aku tepala imbo mulimuli pokorayepokore enge ningokombu meringima kautukundoorangi. Aku tepe eno lapu imbi mololimunga pokore kau tukundoorangi kanomu.

<sup>27</sup> Kano tepala Goteni imbo konopundo keke lepo toromo ningima Jisas ipuki tieio nimbe kanopatipelie imbo munikondoromele imboma akuterimu ulumuni tepe mai kondorumu. I mai kombuna mainye ltemo uluma tekolio imbo galapunena mololima Goteni Jisas ipuki tieionimbe kanopatitmu. Aku terimu ulumuni imbo kombu meko ungu ningotiringimatape mai kondorumu.

<sup>28</sup> Goteni imbo koropanolima kinye imbi naa mololima kinye imbo beambo nilima kinye Jisas ipuki tieio nimbe kanopatipelie tepe ltimu. Aku terimu ulumuni imbo mololima tepe mai kondorumu.

<sup>29</sup> I ulu terimupe yunge kumbekerena imbo te yu mulimuli kelkele naatopili nimbelie terimu.

<sup>30</sup> Goteni eno Jisas Kraist kinyememe tendekumele molangei nimu. Lino Gotenga uluma lipo manjirimolomape Goteni Jisas yu puliyemolopili nimu. Aku tepalies, Jisas terimu ulumuni Goteni lino yunge imbotoya tolima nimbe, lino tepe kake tendepa, lino kolopatukundoorangi.

<sup>31</sup> Akumunga, Gotenga bukuna ungu te peremo mele teao! Akuna i tepanimbe, Imbo te nunge tereno ulumu tonokoloni lemope Awilimuni nundo teremo ulu akumungatonokolowi, nimbe peremo.

(Jer 9:24)

## 2

*Mai kombu imbomanga lipe manjilimu tiye kolopalie Mini Kake Telimuni engetirimu mele Poloni Jisasina temane topa Gotenga ungumonimbe tirimu*

<sup>1</sup> Kristen imbo ango kame, nani eno ombo ungu niu wali mai kombu iye lipe manjilimu none naa tepo ungu mongo tiperipe enge nilimare tuku naa panjipo Gotenga ungumu nimbo tiru kano.

<sup>2</sup> Nalo Jisas Kraist moromo mele kinye unjo polopeyanu kolorumu mele kau konopu lepolio eno ungu nimbo tiru.

<sup>3</sup> Oi na ombo ungu nimbo tiru kano wali taka lipo kolo pipili kololipo pungu pungu nilipo oru.

<sup>4-5</sup> Kombu pulu imbomanga lipe manjilimu enoni pilko ipuki tingei ungu naa nimborio nani iye lipe manjilimu none tepo ungu mongo tiperipe mare nimborio imbomanga konopuma kundumbói nimbo nanga nio unguma kape nimboi tero uluma kape aku tepo naa niu. Nalo Gotenga ulu enge nili terimumu liko manjikolio eno Jisas paa ipuki tiengei nimborio Mini Kake Teli enge tirimumuni eno Gotenga unguma nimbo tiru.

*Mini Kake Telimuni Kristen imbomando liko manjengei nimbe enge tirimuna Gotenga unguma liko manjirimele*

<sup>6</sup> Nalo lino Gotenga kongono tendremolo imbomani Gotenga ungumu pilko Kristen imbo tukume moromelemando lipe manjili ungu enge nilima nimbo tirimolo. Aku nimbo tirimolo ungumu i mai kombu liko manjirimele mele, molo. Kano ungumu iye awili tipe kombuna pungeimani liko manjirimele mele kape, molo.

<sup>7</sup> Nalo lino Gotenga lipe manjili ungumu nimbo tirimolo. Aku ungu imbomani oi naa liko manjirimele nalo oi mulu mai talo naa teli wali Goteni imboma pilko ipuki tiko yu kinye mulu kombuna molangei nimbe ungu akumu konopu lipe manjipelie konopu lipe mundupe terimu.

<sup>8</sup> I kombu meremele iye awili teni i ungu naa lipe manjirimo. Liko manjili-malanje mulu kombumunga Iye Awilimu unjo polopeyanu toko naa kondolemala.

<sup>9</sup> Nalo ungu te peremo mele linoni i tepo lipo manjirimolo. Peremo ungumu i tepe, Goteni yu konopu mendoromele imbo-manga nimbe tumbi tipe noirimu mele, imbo teni naa kanopa naa pilipe yunge konopuna wendo naa orumu,

*(Ais 64:4)*

nimu.

<sup>10</sup> Nalo Mini Kake Telimu ulu teremomuni Goteni aku uluma linondo tepe mona Itenderimu. Aku ambe telka, Mini Kake Telimuni uluma pali kanopa imbi tirimo. Paimbo, Gotenga konopu tukundo mandopa Itemo uluma kape lipe manjirimo.

<sup>11</sup> I nio ungumunga ungu te manda lepo nimboi. Imbo tenga konopu Itemoma imbo teni manda naa lipe manjimbelo. Yu yunu

i konopu lteo nimbe lipe manjirimo. Aku mele Gotenga konopu Itemoma imbo teni manda naa lipe manjimbelo, nalo Gotenga konopu Itemoma Mini Kake Telimuni kau lipe manjirimo.

<sup>12</sup> I mai kombuna moromele kuro kerimanga konopu naa ltimulu. Aku molo. Goteni tipe kalopa tirimu ungu manema lipo manjemili nimborio Gotenga Mini Kake Telimu tukundo ltimulu.

<sup>13</sup> Goteni tipe kalopa tirimu ungu manemanga imbomando ungu nimbo tirimolo. Mai kombu imbomani ungu mane tirimele unguma lipolio aku tepo Gotenga ungumu mane naa tirimolo nalo Mini Kake Telimuni lino mane tirimo unguma lipo Gotenga Minimu liko manjirimele imbomando aku tepo ungu mane tirimolo.

<sup>14</sup> Aku unguma Mini Kake Telimu imboma liko manjengei nimbe taporomomu nalo imbo te Gotenga Mini Kake Telimu naa lipe manjirimo manda naa tapombalo. Aku naa taporamomunga imbo teni Mini Kake Telimuni tirimu ungu manemando i ungu keke lepo toli ungu mare naa pilimboi nimbeliemuni naa lipe manjirimo.

<sup>15</sup> Mini Kake Telimu moromo imbo teni unguma pali pilipe moke tepe kinye uluma pali kanopa imbi tipe kinye aku ulu talo manda teremo. Nalo mai kombu imboreni imbo akumuni teremo uluma kanopa imbi manda naa timbelo.

<sup>16</sup> Gotenga ungumu i tepe nimo,  
Imbo narini Awilimunga konopu Itemoma liko manjinio. Akumunga nu narini Awilimu mane tinio. *(Ais 40:13)*  
Nalo Kraista konopumu lino Kristen imboma kinye peremo.

### 3

*Gotenga kongono iye te imbi naa lieio. Imbo akuma kongono imboma kau moromele nalo Gote enonga Awili moromomunga wale pakaio*

<sup>1</sup> Nanga Kristen imbo ango kame, oi ungu mane tiru wali Gotenga Minimu tope tirimuna enge ningi moromelemando ungu nimbo tiro mele enondo aku tepo naa niu. Nalo mai kombu imboma none teko bakulu walo mele moromelemando ungu mane tiro mele enoni imbo kokele tukundo oli none teremelemando aku tepo ungu mane tiru.

<sup>2</sup> Aku wali nanga niu ungumupe bakulu ame tirimele mele unana lelimu niu kano. Eno langi enge nilimu nowi mele imbo yuma naa moloringi kanomunga imbo yumanlangi enge nilima noromele mele aku tepo ungumu naa niu kano. Paimbo, kinye kape eno kano teko moromele.

<sup>3</sup> Enoni mai kombu imbomanga teremele ulu puluma ambe telka oi tiye naa koloringiya? Imbo marennga melema kanokolio yokoli koromele. Imbo mare kinye, we ungu karaye teremele. Aku uluma teremelemuni eno mai kombu imbomangaltemu nimele.

<sup>4</sup> Imbo teni na Polonga imbomu moro nimo wali teni na Apolosinga imbomu moro nimola, akupe mai kombu imbomanga teangei uluma enoni teremele.

<sup>5</sup> Liko manjengei, Apolos yu iye imbi mololi te molo. Na Pol kape iye imbi mololi te molo. Iltope yu mele mele Jisasini tendalio nimu kongonomu tenderembolo. Oi aku kongono tenderimbulo wali enoni Gotenga unguma pilko Jisas ipuki tiringi kano.

<sup>6</sup> Nani kiyendo ungu mane tirumu, kere imbole mele panjiru wali enoni ipuki tiringi. Altopa Apolosini eno ungu nimbe tirumu aku ulumupe kere imboma akopili nimbe no mele tirumu. Nalo eno akoko awili leko Gotenga imboma moromelemunga pulu aku Gote yu.

<sup>7</sup> Akumunga iye kere imbo panjirimure kape, pulu iye molo. No tirimu iyere kape, pulu iye molo. Nalo Pulu Iyemu Gote yunu wendo opili nimumunga, yu pulu.

<sup>8</sup> Kongono iye langi imbo panjirimomu kinye kongono iye no tirimomu taloni konopu tendekuna pupili elo Goteni tirimu kongonomu wambo tepo kondambilu ningko konopu ltembele. Kongono pulu pololi iye tengah kongono teremomu kanopalie Goteni aku tepa pundi tombalo. No tirimumunga kape aku tepala pundi tombalo.

<sup>9</sup> Na kinye Apolos kinye ilto Gotenga kongono iye talo. Kongono tendeku iye talo tepo morombolo. Eno Gotenga poinye mele.

*Poloni Gotenga kongono iyemani anane leko kongono wamongo teko kondaio nimu*  
Eno Gotenga ulke takoromo melema.

<sup>10</sup> Goteni na konopu mondopa enge tipelie kongono tendepuwi nimumuni nani pulipo melema tumbirumbi tipo ulke timu lipo poloruaku tepa enondo oi kiyendo Jisasining temane topo tiru. Aku teru kinye iye teni altopa ulke takoromo. Kinye ulke takoromele imbomanigugu mane tirimelema anane leko kongono wamongo teko kondangei.

<sup>11</sup> Aku ambe telka, Goteni Jisas Kraist yunge ulkemunga timu molopili nimumunga imbo teni timu kanomu naa molopili nimbe koinjo te lupe manda naa kolo wangombalo.

<sup>12</sup> Gotenga timu poromo kinye imbo marennga ulke takoko kou goloni au tirimele. Marennga takoko kou silvani au tirimele.

Marennga akutekola kou mone olando puli kou tondolomani au tirimele. Nalo imbo marennga Gotenga timu poromona unjomani ulke takoromele. Marennga kambeni ulke takoromele. Aku tekola marennga erani takoromele.

<sup>13</sup> Peyalime waimu wendo ombalo wali Goteni yunge kongono imbomanigeringi mele apurumbelo. Peyalime waimu kombu mele tangombalo. Aku wali Gotenga kongono imboma terengi mele penana lembalo. Aku wendo ombalo mele i tepe, peyalime waina Goteni yunge imboma terengi kongono akuma tipeni nopili nimbeline, pele apurumbelo.

<sup>14</sup> Ulke te tipeni naa nomo lemo Goteni akulke takoromu imbomu ki wamombalo.

<sup>15</sup> Nalo ulke te tipeni nomo lemo akulke takoromu imbomunga kimu we topa kaloromu. Gotenga kongono imbole koinjo molopu pumbelo nalo yu imbo mongomu molombalo.

#### *Gotenga imboma kimbo opa tendembalo imbore Goteni bembo timbelo*

<sup>16</sup> Eno Gotenga ulke wengendelimu. Eno paa Gote yunge imboma mendepolo. Enonga konopundo tukundo Mini Kake Telimu omaba moromo. I kanomu naa liko manjirimeleya?

<sup>17</sup> Eno Gotenga ulke wengendelimu Goteni yunge mendepolo nimo. Akumunga imbo teni aku ulkemu tepe kimbo opa tendemo lemo akutembalo imbomu Goteni yu kape bembo timbelo.

#### *Poloni imbo te paa lipe manjirimo nimbolio* *aku imbomu wale naa pakamili nimu*

<sup>18</sup> Eno enonganokili tingei kani akulukeleia. Mai kombu imbomanigimo imbo pupu i tepe paa lipe manjirimo nimile akumunga eno imbo teni akutembalo te yu konopu lemo lemo oi mai kombu imbomanigimo keke lepo toli te konopu ltemelemanone tembalo. Aku mai kombu ulu pulumu tiye kolopalie imbomu yu Gotenga imbo lipe manjilimau apuwe lembalo.

<sup>19</sup> Ambe temona, mai kombuna moromele imbomanigimo i uluma paa lipo manjirimolo konopu ltemelelundo Goteni naa liko manjikolio konopu keke lepo tolima moromele nimo. Akumundo, Gotenga bukuna peremo ungumu i tepe, Imbo pupumuni imbole lope ltendero nimbe teremo nalo Goteni akutembalo pupumundo yuni ulte teli none tepalies po ka yunu lipe nomina merekondo mundurumo, (*Jop 5:13*)

nimo.

<sup>20</sup> Ungu te i tepe kala,  
Mai kombu lipe manjili imbomanigimo ulte temolo konopu ltemele ulumu

Goteni aku tepa ulumu lope naa tendembalo nimo. (Sng 94:11)

<sup>21</sup> Ungu i nio kani imbo te paa lipo manjiro nimo lemo wale naa pakaio. Aku ambe telka, Goteni melema pali eno tapopili nimbe tirimo.

<sup>22</sup> Eno tapangei nimbe Goteni eno Pol kinye Apolos kinye Pita kinye i mai kombuna ltemo melema kinye koinjo mololi ulumu kinye kololi ulumu kinye i wai ltemoma kinye altopa wendo ombalo melema kinye tirimo. Akuma pali enonga.

<sup>23</sup> Eno Kraistainga imboma mendepolo mōromele. Kraist yu Gotenga malo.

## 4

*Goteni yunu kau yunge kongono teremele imboma moke teremo*

<sup>1</sup> Lino Kraistainga kongono tendere-moloma kinye Gotenga oi penana naa nili unguma imbomando nimbo tipemili nimu tapu imbo moromoloma aku lino imbomanli liko manjikolio imbi tiengei.

<sup>2</sup> Kano tepa, kongono imbo teni kongono tirimu imbomunga unguma tengi tipe pilipelie kongono tepa kondopili.

<sup>3</sup> Enoni molo kot pimele imbomarenai na moke tengi lemoaku konopure naa lembo. Paimbo iulu keri ltemo, iulu penga ltemo nimbolio ungumuniaku tepa nanga tero uluma naa apururo.

<sup>4</sup> Ulu keri te naa tero konopu lteo naloaku konopu lteomunga na iye tumbi nilimu molo. Awilimuni kau nanga tero uluma pali kanopa imbi tipelie manda apurumbelo.

<sup>5</sup> Akumunga kot waimu oi naa oli kani Gotenga kongono iyema Awilimuni peyalime waina kot pilimbelo ningoi nokoko molaio. Aku wali teko alu toli uluma wendo lipe penana noimbelo. Imbomanga konopu leko pange tenderemelema kape mona lepili nimbe moro tondombalo. Aku wali Goteni imboma pali moke tepalieu yu mele mele nimbe enonga teringi ulumanga i penga ltemo, i keri ltemo nimbelie pundutombalo.

*Korin imbomanli iye apostolema iye kerima, eno paa konopu leringi*

<sup>6</sup> Nanga Kristen imbo angko kame, eno liko manjengei nimbolio Apolos ilto manda lepo nindu kanomu. Aku ungumu liko manjikolio wali, enoni Gotenga bukuna peremo ungu tengi tiko molaioaku nimolo ungumunga ungu pulu liko manjeio. Aku tekolio, imbo marenai na Polonga imbomu moro, na Apolosinga imbomu moro ungu kanomu naa ningolio imbo te wale naa pakangei.

<sup>7</sup> Nalo kinye eno imbo kamakomape none teremele. Ulu penga teremelema pali akupe eno Goteni enge tirimu. Nalo aku

tepa tirimumunga ambe temona enongano iye awili none teremeleya?

<sup>8</sup> Enoni Gotenga uluma pali lipo pora timolo konopu ltemele. Eno paa imbo kamakomare konopu ltemele. Apa! Lino iye apostolemani maindo moromolo nalo eno paa imbo kamako kingimare konopu ltemele. Eno paa aku teko molemalanje lino kape aka tepala eno kinye molemala.

<sup>9</sup> Nalo aku tepo naa moromolo. Opa pule imboma ambolko likolio toko kondongei ka moko tokolio meko ongo purumele wali peyalime ongo purumelemando imbomanli kanokolio ningoi neya poko peyalime klonge ltemo nimele. Lino kongono tipe munduli iye apostolema kano tepa mele konopu lteo. Imbo palima kinye enselemani ambele ulumu lino kinye wendo oromonje ningi kandomele.

<sup>10</sup> Kraistainga kongonomu tenderemolomungape imbomanli lino konopu keke lepo tolima nalo eno paa lipo manjirimolo konopu ltemele. Aku tepala lino enge naa peremo nalo eno paa enge peremo konopu ltemele. Eno imbomanli wale pakoromele nalo lino kinye ulu te teremele.

<sup>11</sup> Koro oi kongono pulu mondopo tepo mololipo orumulu mele ombo kinye lino waliwali koromolo engele we kolopo nomi kapu lepili andoromolo. Wale pakoli mele lumbyiemra pakopo andoromolo. Imbomanli lino larauwe toko nendo yando mundurumele. Linonga kamukumu ulke kombu te naa ltemo.

<sup>12</sup> Linonga ki taloni kongono tepolio kele toromolo. Imbo marenai lino ungu taka tondoromele nalo linonipe Goteni eno tapopili nimbo konge tenderemolo. Imbomanli lino mindili liko tirimele wali pundu naa topolio umbuni we meremolo.

<sup>13</sup> Imbomanli linonga ungu umbulkondo nindirimile nalo linoni imbo akumanga ungu pengama imbo wemando anjo nindirimolo. Mai kombu imbomanli lino karomele wali, gai ina aiku melema apuwe ltendeko toko lteamili ningi teremele. Oi kape kinye kape linoaku tepo moromolo.

*Korin imboma Pol yuni terimu uluma teangei konopu lerimu*

<sup>14</sup> Pipiana i topo tiro ungumape eno tepo mai kondomboi naa tero nalo eno nanga bakulu konopu mondoli mele ltemona i unguma mane liko pilengei nimbolio nio.

<sup>15</sup> Imbo 10,000aku imbo pulumuni eno Kraist kopu teko molangei ningi tapu telemalanje kape, enonga lapa iye tendekumu na kau moro. Oi Jisasinga temane topo tiru ungumu pilko ipuki tirangi wali nani eno Jisas Kraist kinye kopu teko molangei nimbo meru.

<sup>16</sup> Aku tepo lapa mele moromunga Kraist lombilimboi tero uluma kanokolio wamongo lombilko teko kondaio.

<sup>17</sup> Enoni aku ulu teangei nimbolio nani eno moromelendo Timoti tipo mundumboi tero. Eno nanga bakuluma moromele meleaku tepala yu nanga konopu mondoli unggulmu. Goteni kongono tewi nimo meleyu paa tengen tipe teremo. Ombalo wali, nani Kraist Jisas lombilipo tero uluma pali enondo altopala konopu makinjipe nimbe tili tili lembalo. Jisas ipuki tirimele imbo kombu malio moromelemando ungu mane tiro mele aku tepala nimbe timbelo.

<sup>18</sup> Eno imbo maren Pol nondopa naa ombalo konopu lekolio eno toko mongo ltimele.

<sup>19</sup> Nalo na Awilimuni puwi nimo lemoaku eno moromelendo paa walitikaleombo. Ombo wali imbo toko mongo ltimele akumani ungu nimele uluma naakanamboi nalo eno kinye Mini Kake Teli tirimo enge te peremonje manda manjipo kanomboindo ombo.

<sup>20</sup> Aku ambe telka, imbo awinini ungu nimele nalo Goteni imbo tenga iye nomiking molopa nokomo lemo yunge engemuaku imbonu kinye peremo.

<sup>21</sup> Eno imbo topa mongo lilima na ombo wali mapure langopo mepo wambo konopu ltemeleya? Molo eno kondo kolopolio takalipo wambo konopu ltemeleya? Aku ungumu welea kondo ningoneio.

## 5

*Ambiye wapu langi noli iye te makoroko wendo mondeio Poloni nimbe tirimu*

<sup>1</sup> Enonga imunana ulu paa keri wendo oromo ungumu pileru. Gotenga ungumu naa pilko wendo moromele imbomanikapeaku ulu naa teremele. Ulu kerimu iye teniyunge kandi lapanga omenu ambomumangopa ltimu.

<sup>2</sup> Eno paa moromolo nimele kano imboma kani kinye ambe telka i ulumu oiningo amenge naa tenguya? I teremele ulumunga alaye mai naa kololi. Aku uluteremo iyemu eno kinye kopu tepa naamolopili ningon makoroko wendo mondeio!

<sup>3</sup> Paimbo eno moromele kombuna naamoro nalo Mini Kake Telimuni nanga konopundo omba tope tirimu wali eno lipe pinjirimuna oru. Aku tepo molopolio wali eno kinye paa kopu tepo molopolio meleulu keri temo iyemu nanga konopumuni oi lipo manjipolio makoropo wendo mundemili nimbo moke tepo pora tindu.

<sup>4</sup> Iye Awili Jisasinga imbina nombeya tengen wali yunge engemu eno kinye pembaloi. Aku wali Mini Kake Telimuni nanga

konopundo omba tope tirimona eno kinyemoro konopu lteo.

<sup>5</sup> Aku wali linoni iye kanomunga kangi bembotipili nimbolio Satan iye kerimunga kindo tiemili. Lino aku ulu temolo kinye Goteni yunge minimu peyalime waimunga tepa wendo limbelo.

*Ulu keri teremele imboma kinye koniye naa leao*

<sup>6</sup> Enoni paa moromolo nimele ungumuaku keri nimele. I ungu te liko manjengei. Yis alaye koloni plawa undukanamu tepa akondoromo.

<sup>7</sup> Pasova bret yis naa mundurumele melemolamili ningoyis oiru pali wendo liko lteao. Linonga Pasova kongisipsip mele Kraist toko kondoringimu Gotendo paa tereno nimbolio tirimulumunga lino yis naa munduli Pasova bret koinjo mele paa moromolo.

<sup>8</sup> Akumunga mumindili kolopo imboma tepo kenjemili nimbolio ulu keri teremolo oi yis meleme wendo lipo lteamili. Aku tepolio ungu paimbomu nemili, uluma ltemo mele teamili nimbolio yis naa munduli bret koinjo mele molopolio Gotenga imboma moromolo nimbolio Pasova ltemo uluma teringi mele tonokolopo teamili.

<sup>9</sup> Nani enondo pipia te oi topo tipolio ambiye wapu langi noli ulu keri teli imboma kinyekoniye naa leao niu kano.

<sup>10</sup> Aku wali ambiye wapu langi noli ulukeri teko molko peremelema molo eno liemili ningoaie konopu ltemelesolo lekolio wapu ltemelesolo molo mele tendo i gote ningolio kuro popo toromele aku ulu teremele mai kombu imboma kinyekoniye naa leao unguaku tepo naa niu. Naloaku tepa rilkanje, eno i mai kombuna kolangei wendo pulimala.

<sup>11</sup> Nalo kinye imbomare kinyepaa konye naa leangei nimbo timboi. Imbomarenambiye wapu langi noli ulu kerimu teliko purumele kinyemarenimele liemili ningoaie konopu ltemelesolo kinyemarenimarenimbulataungu nindirimele kinyemareninenge nili nongo loi ltemelesolo kinyemarenimele wapu lingei lope ltenderemele. Naloaku manga pupumuni teni nimbei na Jisasinga imbomu moronimo lemo imbo akumu enonga imboriekonopu naa leao. Aku tembalo imbomukinyekere popo tiko naa naio.

<sup>12-13</sup> Jisas ipuki naa tirimele imboma Goteni apurumbelo. Akumunga nani imbo akuma apurumbo, molo. Nalo Bukuna peremo ungu te i tepe,  
Ulu pulu keri teli imbo te makoroko wendo mondeio. *(Lo 17:7)*

Akumunga Kristen imbomani teremele aku ulu kerima enoni manda apuruko wendo mundeio.

## 6

*Korin imbomani enongan kot teringi uluma Poloni nimbe amenge terimu*

<sup>1</sup> Eno kinye mongo te peremo. Kristen imboma kot naa pileli konopu lekolio Jisas ipuki tirimo imbo te kinye ungu te peremo kani kot tendamili ningi Gote ipuki naa tili imbomani kot pilengei nemili ningolio ambe telka aku ungu nimeleya?

<sup>2</sup> Eno Gotenga yunge mendepolo nimo imbomani peyalime waina mai kombu imbomani teremele uluma pali apurungei ungumu komu tindingeya? Aku ulu awili manda tengi lemo nalo aku ambe telka pipili kolokolio ungu i peremoma kot naa pileli ningeya?

<sup>3</sup> Lino Jisas ipuki tirimolo imbomani Gotenga kongono enselemani tenderingi uluma apurumolo ungumu kape komu tindingeya? Enselemani teringi uluma manda apurumolo lemo i mai kombuna teremele uluma paa manda imbi tipo nimbo amenge temolo lepamo.

<sup>4</sup> Akumunga ungu peremoma kot tendamili nilimalanje Kristen imbi mainye mololi teni kot pilipili ningi lilimala.

<sup>5</sup> I nio ungumupe eno mai naa koromeleya? Eno paa moromolo ningi none teremele nalo enonga imunana Kristen imbo talonga ungu peremoma manda pilimbei imbo lipe manjili tendekure kape momronje?

<sup>6</sup> Eno paa. Nalo Kristen imbo angenu kinye ungu te peremo kani kot tendamili nimele ulumu ambele konopu lekolio Gotenga ungu ipuki naa tirimele imbomani ketona kanoko molangei enoni pipili naa teremona teremeleya?

<sup>7</sup> Kristen imbo angenu te ulu alowa mare teremona kot tendamili nimele ulumuni eno paa maindo purungi. Nu imbo teni ulu kerire temomundo naa pundu tomba konopu lenio lemo Kraistingu itemo ulumu tereno. Imbo teni nunge melema wapu limbei kili timomundo naa pundu tomba konopu lenio lemope Kraistini nimo ulumu tereno.

<sup>8</sup> Nalo enoni Kraistini teaio nimo uluma naa teremele. Kristen imbo angenupilima kinye ulu keri mare kape teremele. Melema wapu lingemunga kape kili tirimelela.

<sup>9</sup> Ulu pulu keri teremele imbomani Gotenga mulu kombu naa punge kani liko manjeio. Eno enongan naa kili tieio. Ambiye wapu langi noromelema kape i Gote ningi mele te kuro popo toromelema kape omenupili umbulu tapu tekolio wapu

langi noromelema kape iye angenu kinye ambiye angili ulu teremelema kape

<sup>10</sup> wapu ltimele imboma kape liemili ningi eio konopu ltimele imboma kape no enge nili nongo loi leli imboma kape umbulkondo ungu nindirimele imboma kape kili tiko melema wapultimele imboma kape aku ulu teremele imboma Gotenga mulu kombu naa punge.

<sup>11</sup> Oipe eno imbomareni aku teko moloringi. Nalo Awili Jisas Kraist enonga nimbe kolorumumunga Mini Kake Teli teremomuni Goteni eno kulumie tondopa yunge imbo kake telima mendepolo nimbelie yunge imbo toya tolima imbi tirimo.

*Gotenga Mini Kake Telimupe linonga kangindo molopili nimbe tipe mundurumunga kangindo ulu toya tolima teamili*

<sup>12</sup> Imbomareni uluma pali manda temolo nimele. Teko manda tengi nalo ulu mareni eno naa tapombalo. Uluma pali manda tero nalo ulu teni na nokombalo mele manda molo.

<sup>13</sup> Imbomareni langi olomuni tirimolo wali olomuni ltimu nimele nalo kere langimu kinye olomu talo Goteni purupili nimbelomunga purungele. Goteni enonga kangini ambiye wapu langi nongo keri keri ulu akuma teangei nimbelie naa tenderimu. Kangi terimumu yunge mendepolo nimbe terimu. Yuni imbomanga kangima yunge nimbe tepe ltimu.

<sup>14</sup> Awili Jisas kolopa ono kombuna perimu nalo Gotenga engemuni topa makinjirimu. Lino kape aku tepala topa makinjimbelo.

<sup>15</sup> Enonga kangimu kinye Kraistingu kangimu talo Goteni lipe tendeku tirimu. Aku oi pileringi kano ungumape kinye naa liko manjirimeleya? Nalo tendeku tirimo kangi kanomu apureli ambomu moromona mepo pumboya? Aku manda molo!

<sup>16</sup> Gotenga bukuna peremo ungu te i tepa kani liko manjeio! Ambo iye talo kangi talonga tendeku tirimo nimbe peremo. Aku tepa, iye teni apureli ambomu mepa andomo lemo aku ambomu kinye kangi tendeku timbelo.

<sup>17</sup> Nalo imbo teni Gotenga imbonu molombo nimo wali Mini Kake Telimuni imbo akumu Kraist kinye tendeku tirimo.

<sup>18</sup> Ambiye wapu langi noli ulu teremelema paa keleame! Imbo teni we ulu keri teremoma aka yunge kangimunga tawendo itemo. Nalo ambiye wapu langi noromo imbo aka teremo ulumuni yunge kangimu tepe beambo tirimo.

<sup>19</sup> Goteni Mini Kake Teli tirimumuni enonga tukundo ombo moromo kani enonga kangi Gotenga ulke wengendelimu

kano ungumu oi pilkolio nalo kinye naa liko manjirimeleya? Eno enongano darenga we naa moromele.

<sup>20</sup> Yunge marenu Jisas enonga nindipe kolopili nimbelie tirimumuni Goteni eno yunge imbo mendepoloma molangei nimbe tepe ltimu. Akumunga kano ulu kerima tiye kolkolio kangimuni teremele ulumuni Goteni teao nimu ungu tengi tiko molko yunge imbi wale pakaio.

## 7

### *Ambo liko iye punge wali tembalu ungumu Poloni ungu mane tirimu*

<sup>1</sup> Oi pipia tokو tiko munduringina Kristen imbomani uluma ambe tepo temoloya ningo waliko pileringi. Aku ungumunga nimboi tero. Iye teni ambo naa limo lemoaku penga lembalo.

<sup>2</sup> Nalo andi kombu tukundo moromele imbomani eno andoko ambiye wapu langi noromelemunga aku ulu naa teangei kani ambo yu mele mele liko amboma iye yumele mele paio.

<sup>3</sup> Iyemunga kangimu ambomunga. Akumunga iyemuni kangimu lopeke naa tewi. Ambomunga kangimu iyemunga. Akumunga ambomuni kangi naa kanopili ungu naa niwi.

<sup>4</sup> Ambomuni yunge kangi yunu kau naa nokoromo. Iyemuni kape waye nokorombele. Aku tepala iyemunga kangimu yunu kau naa nokoromo. Ambomu kinye waye nokorombele.

<sup>5</sup> Eno ambo iye talo molongele lemo elonga kangi nendo yando mi naa talio. Nalo Gotendo enge nimbo konge nemibili ningolio kangi mi tambili ungumundo ee ningele lemoaku teko wali ponjilimunga kangi mi manda talio. Aku ulu pora tingele kinye Satan iye kerimuni elonga konopuna enge naa peremonam ambiye wapu langi nali nimbe kondi topili ungu naa nipiili ningolio eloni mi tongele ulumu akuna ongolio kelealio.

<sup>6</sup> I ungumu pe paa Gotenga mane ungure molo. Eno tapopilimunga tengi kape teangei nimbolio nio.

<sup>7</sup> Ambo naa lili iyemuaku tepo manda moro. Eno imbo paliniaku teko imboma molonge lemoaku penga nalo Goteni imbo yu mele mele enge lupe lupe tirimu. Mare ambo iye talo tendekuna manda molangili enge te tirimu. Aku tepala mare imbo tendekuna manda molopili enge te tirimu.

<sup>8</sup> Kinye wenepo mololima kinye ambo waima kinye aki imbomando ungu te nimboi tero. Na moro mele molongei lemoaku molko kondoromele.

<sup>9</sup> Nalo ambiye wapu langi naa namili ungu manda naa ninge lemo eno ambo liko

iye punge. Aku ambe telka, ulu keri wendo naa opili ningo molko kondoromele.

<sup>10</sup> Ambo iye ambiye ningo morombele talondo mane ungu te nimboi tero. Aku mane ungumu nanga mane ungure molo. Awilimunga mane ungumuni i tepe nimo ambomuni omena iyemu tiye naa kolowi.

<sup>11</sup> Tepa wendo pumo lemo omena iyemu tiye kolopa wendo pumbe molomo lemo ne kana ya kana naa tewi. Nunu manda naa molonio lemoaku omena kinye ningo amenge tekolio tukundo pungo molowi. Iyemuni kape yunge ambomu makoropa wendo naa mundupili.

<sup>12</sup> Ambiye talonga te Jisas ipuki tipelie molombalo nalo yunge omenu te Jisas ipuki naa timbeloaku teko moromele imbonando ungu te nimboi tero. I ungumu Awilimunga mane ungure molo. Jisas ipuki naa tili oi ltinu ambomuni nu kinye molomboi nimbe tai nimo lemo nu Kristen iye angenu teni ambo kanomu makoroko wendo naa munduwi.

<sup>13</sup> Aku tepala, Jisas ipuki naa tili iye oi purunu iyemuni nu kinye molomboi nimbe tai nimo lemo nu Kristen ambo angenu teni iye kanomu tiye naa kolowi.

<sup>14</sup> Aku ambe telka omena iyemu nu kinye moromomunga yu Goteni yunge imbonone tendepalie nokombalo. Aku tepala Kristen iyemunga omenu ambomu Jisas ipuki naa tirimomu Goteniaku ambomu yunge imbonone tendepalie nokombalo. Aku ulu Goteni naa telkanje elonga bakuluma wendo imbomarengabakuluma none telka. Nalo Goteni i teremo ulumuni elonga bakuluma yunge none tendembalo.

<sup>15</sup> Nalo ambiye talonga teni ipuki naa tirimomuni te tiye kolopa pumbei temo lemoaku imbonu yunge pupili kani tiye kolowi. Goteni lino Kristen imbomaaku tepe umbuni naa meko konopu ame topili molangei nimumunga ipuki naa tirimo imbonu yu pupili.

<sup>16</sup> Ipuki tili ambomu nu nunge iyemu kinye molonio ulumuni yu Gotenga ungumu pilimbelonjeaku ulumu nu naa liko manjirino. Aku tepala ipuki tili iyemu nu nunge ambomu kinye molonio ulumuni yu Gotenga ungumu pilimbelonjeaku ulumu nu naa liko manjirino.

### *Goteni eno kanopa ltimu wali moloringi kano mele molaio*

<sup>17</sup> Aku ungumu ltemo nalo Goteni enoaku teko molko peangei konopu lepa tirimu mele molaio. Goteni oi eno kanopa ltimu wali enonga teringi ulu kanoma teko kau molko peao. Aku ungu Jisas ipuki tiko moromele imbo palimando nio.

<sup>18</sup> Oi nu Juda imbo kangi pundu kopilimiu molani wali Goteni nu kanopa ltimu

lemo kangi pundu naa kopili imbo tawendore none naa tewi. Aku tepala nu kangi pundu naa kopili wendo imbomu molani wali Goteni nu kanopo ltimu lemo nunge kangi pundumu kopengei ningot Juda imbole none naa tewi.

<sup>19</sup> Kangi pundu kopili ulu akumu ulu nerungere. Kangi naa kopili ulu aku kape ulu nerungere. Nalo Goteni teaio nimo unguma tengen tiko tengen lemo aku ulu tukumemu.

<sup>20</sup> Aku tepe mele eno oi molko peringina Goteni kanopa ltimu kano teko molko peaiola.

<sup>21</sup> Eno kongono kendemande teremele imboma molangei wali Goteni eno kanopa ltimu lemo eno akumunga konopu umbuni naa lieio. Nalo eno kongono kendemandemunga molangei wendo pungei ulu te mandakona lemo lemo aku ulu manda teaio.

<sup>22</sup> Kongono kendemande teremele imboma kinye enonga kombu moromele imboma waye talo Gotenga imboma manda molonge mele i tepe, Kongono kendemande imbomu Goteni kanopa lipelie wali yunge imbomu nimbe konopu ltemo. Aku tepala imbo teni yunge kombuna we moromomu Goteni kanopa lipelie wali Kraistinga kongono tendembalo imbomu nimbe imbi tirimo.

<sup>23</sup> Goteni eno yunge marenu Jisasinga mememuni polo tepe lipelie eno yunge mendepolo. Aku ulu terimumunga eno imbo iyemuni kongono kendemande mele teko ulu kerima teaio nimele ungumu tengen naa tieio.

<sup>24</sup> Goteni eno taporomo wali oi eno molko peringina Goteni kanopa ltimu kano mele molko peao. Eno yu mele mele aku teko molangei Goteni tapombalo.

#### *Ambo iye ningot naa mololi imbomando Poloni ungu mane tirimo*

<sup>25</sup> Ambo iye ningot naa mololimando ungumu oi pipia toko tiringimunga nani i tepe nio. Goteni i ungumu nando ningot tiwi nimbe naa nimu nalo Goteni na paimbo toya topo molambo nimbe taporomo iyemuni i ungu mane tiromu pilengei.

<sup>26</sup> Kinye wai kerimu ltemo kani eno enonga moromele mele aku teko molongeaku penga lepamo.

<sup>27</sup> Nu ambo te oi ltimu lemo kelko aku ambomu tiye kolamboi konopu naa lewi. Nu ambo naa lili wangono angilino lemo altopto ambo liemboi konopu naa lewi.

<sup>28</sup> Nalo nu ambo te linio lemo aku ulu aloware molo. Aku tepala ambo wenepo te iye pumo lemoaku ulu aloware molo. Nalo i wai keri Itemomunga ambo iye mololimani enonga lapumu kele tongeimunga umbuni pulumu lingei konopu lteo.

<sup>29-31</sup> Mai kombu ulu Itemomaga pora nimbei teremo. Akumunga nanga Kristen imbo ango kameaku nio ungumunga pulumu i tepe. Kinye i wai ponjili moltonolona, eno ambo bakulu mololi iyemani ambo naa lili iye none teko Gotenga kongonomu enge ningot teaio. Umbuni meko kola teko moromele imbomaniaku uluma tiye kolko enge ningot molaio. Tono kolko pende pende ningot moromele imbomaniaku uluma kelkolio konopu toimbo topili ningot molaio. Melema polo teremele imbomaniaku melema lepa tule pumbelo konopu naa leao. I mai kombuna kou kongono teremele imbomani kou limolo konopu naa panjeio.

<sup>32</sup> I mai kombu umbuni Itemomanga enoni ambe temolowa konopu awini naa leangei nimbolio unguma nio. Oi ambo naa lili Kristen iyemuni Awilimuna konopu penga timbei Goteni tewi nimu uluma paa tembo konopu ltemo.

<sup>33</sup> Nalo ambo mololi iyemuni yunge ambo bakuluma kele toromo. Yunge omenuni konopu mondopili uluma andopa teremo.

<sup>34</sup> Aku iyemuni Gotenga kongono tembonje ambo bakuluma kele tombonje konopu talo Itemomuni yu topa tundurumona moromo. Aku uluma ambomani kape teremele. Iye naa mololi amboma kinye ambo wenepoma kape Awilimuna konopu penga tiemili konopu ltemele. Konopu kangi taloni enge ningot Awilimuni teaio nimu ungumu teamili ningot yunge imboma molamili konopu panjirimele. Nalo iye mololi ambomuni yunge bakulu lapali kele toromo. Aku tepalie yunge omenuni konopu mondopili uluma andopa teremo.

<sup>35</sup> Enambiente ningot naa molangei aku ungurendo naa nio. Nalo enoni konopu talo naa lekolio konopu tendekumu panjikolio Goteni teaio nimu uluma toya toko yunge imbo tukumema molangei nimbolio eno tapomboi konopu lepolio nio.

<sup>36</sup> Nalo iye teni ambo limo lemo ulu aloware naa teremo. Kristen imbo marenilara langi norangi nalo imbo talo ambo iye talo ungu oi naa ningi kinye ambo limbelo iyemuni oi naa lipolio ambomu oi molopili tepe kenjiro konopu lepalie, kinye limboi nimo lemoaku imbo talo ambo iye talo molongele.

<sup>37</sup> Nalo ulu teni tope naa tirimuna iye teni konopu toimbo topili yunu enge nimbe lipe manjipelie ambo naa limbo konopu panjimo lemo yu kape aloware naa teremo.

<sup>38</sup> I ulu talonga nimbolio lara langi norangi ambomu paa ltimu iyemuni ulu pengamu teremo nalo lara langi norangi ambomu naa ltimu iyemuniaku ulu paa pengamu teremo konopu lteo.

<sup>39</sup> Ambomu yunge omenu iyemu koinjo molombalo wali aku yu paa yunge iyemu kinye molopa peremo. Nalo yunge omenu kolomo lemo aku kau yu manda iye lupe pumbelo. Nalo iye pumo lemo yu Gotenga ungumu pilimbelo iyemu kau kanopa ltendepa pumbelo.

<sup>40</sup> Nalo ambomu yu altopa iye naa pumo lemo aku yu molopa kondombalo konopu lteo. I ungu nioma Gotenga Mini Kake Telimuni na tope tipelie ee nimo.

## 8

*Imbomani mele te gote ningko kuro ulkena ari mele koiringima manda nongenje Poloni ungu mane tirimu*

<sup>1</sup> I melemu gote ningko kuro ulkena ari mele koiringi langima manda namilinje waliko pileringi ungumundo kinye nimbo tero. Imbomareni lino Kristen imboma uluma pali lipo manjirimolo nimele ungu akumu paimbo. Nalo imbo teni lipe manjili imbo none teremo wali yu mongo kondoromo. Imbo teni imboma kondo kolopa konopu mondoromo wali Gotenga engemu yando ltimu.

<sup>2</sup> I ulumu paa lipo manjirio konopu lepalie aktu imbo teni Kristen imboma lipo manjirimolo mele oi pilipe aru naa tili.

<sup>3</sup> Nalo Gote konopu mondoromo imbomu Goteni aktu imbomundo yunge kanopa ltendeli imbomu imbi tipe lipe manjirimolo.

<sup>4</sup> Kano ungumu liko manjengei kani kuro koiko ari mele langima manda nomolonje ngingi ungumundo nimboi. Mele te i gote nimelemundo, damu enge naa peli, koinjo naa moromo nimolo. Gote tendekumu yu kau moromo.

<sup>5-6</sup> Paimbo, mai kombu imbomani mele-manga i linonga gotema ningko, ya i linonga awilima imbi tirimele. Muluna ola Itemoma kinye maina mainye Itemoma aktu melemando gote ningko nalo linoni Gote tendekumu kau moromo nimolo. Linonga Gote, melema palinga pulu iyemu yu. Lino Yunge imboma molamili nimbo moromolo. Aku tepala linonga Awili tendekumu kau moromo, yu Jisas Kraist. Yuni melema pali tepa wamoromu. Lino koinjo molamili nimbe tepa koinjo ltimu.

<sup>7</sup> Nalo Jisas ipuki tirimele imbo marenin kolo toli gotemanga enge naa peremo nimolo ungumu naa liko manjirimole. Imbo kanoma oi mele tendo i gote ningko kuro koirimole uluma terengi. Akumunga kuro ulkena ari mele koinge langima liko noromele wali apa i kuro koinge langima nomolo lemope, alowa temolo lepamo ningko konopu Itemele. Aku tepa konopu enge naa nimomuni eno tepa mainye mundurumu.

<sup>8</sup> Nalo langi noromolomuni lino Gote kinye imbo pengama naa tendelka. Lino langi akumu naa nomolo lemo lino imbo kerima molo. Aku tepala lino langi akumu nomolo lemo lino imbo pengama molo.

<sup>9</sup> Nongenje, naa nongenje aktu enonga tengen. Nalo teremele ulumuni Kristen imbo angemu te manda naa nombo nimo kanomu teremele ulu teambo nimbelie yu ulu a lowana mainye pumbelo naa tendaio.

<sup>10</sup> Liko manjeio. Eno enge ningko angimelemani kolo toli gote tengen ulke tempel molko kuro koiringi langi noromelena kanopalie kuro langi naa nombo nimbe pipili koromo Kristen imbo angenu teni nanga imboma aktu langi noromele kani na kape manda nombo konopu lepalie kuro koiringi langima nombalo.

<sup>11</sup> Kuro koikolio kere langi koirimelema manda nomolo ningko liko manjirimole ulumuni aktu Kraistini yunge nindipe kolorumu Kristen imbo angenu konopu enge naa nilmu teko mainye mundurumele.

<sup>12</sup> Kristen imbo angenupili marenin tumbi nili ulu temuya ningolio konopu enge ningko naa Itemelema aktu teko mainye mundurumele wali Kraist yu imbo kanomanga nimbe kolorumu iyemu kinye enoni ulu keri teremele.

<sup>13</sup> Akumunga i konopu lteomu eno kape aktu teko konopu leao. Nani langi aktu tepo noromuni nanga Kristen angenu te alowa tendepo tepo mainye mundundu lemo kuro koiringi ari mele langi te altopo paa naa nombo. Aku tepolio, yu tepo mainye naa mundumbo.

## 9

*Goteni Pol aposel kongonomu tirimungu Poloni paa tono kolopa kongono we terimu*

<sup>1</sup> Ulumareni Pol pange tenderemo nimele nalo aktu tepe molo. Pol iye aposelere molo konopu Itemele nalo Iye Awili Jisas mongoni kanopolio Jisasini kongono tirimumuni eno Gotenga imboma molangei nimbo tukundo lipolio aposel moro.

<sup>2</sup> Imbomareni na aposelere molo nimele. Nalo na Jisasina kongono tenderimunga eno Kristen imboma moromele muni na paa Jisasina kongono tipe munduli iye aposel nimbe mona ltenderemo. Akumunga enoni Pol paimbo iye aposel kongono tepa moromo ningko liko manjirimole.

<sup>3</sup> Nani enge tipolio na kanoko keri pilko moke teremele imbomando i ungu nio.

<sup>4</sup> Enonga kombuna aposel kongono terembolomunga enoni langi no talo tieio ungumu manda nilimbala.

<sup>5</sup> We aposel iyema kinye Awili Jisasina angenupili kinye Pita aktu iyemani

kombu ponenge pungei wali enonga Kristen omenupili amboma meko waye purumele mele aku teremele ulumu ilto kape manda telembala.

<sup>6</sup> Ambe telka Barnabas iltoni kau kele topo kongono tendambili konopu ltemeleya?

<sup>7</sup> Gavmanemanga ami iyemani kou naa limolo, we opa tendemolo nimele ungu akumu narini nilka. Imbo teni wain poinye panjipielie mongo ina topalie wali nowi mele kanomu naa namboya ungu narini nilka. Imbo teni kongi meme tapu imbo molopalie wali ame kolopa limbelomu narini naa nolka.

<sup>8</sup> Aku unguma mai kombu imbomani teremele ulumundo naa nio. Nimboi tero ungumundo Mosesini oi topa panjirimu mane ungumuni tendeku ungu kala nimo.

<sup>9</sup> Aku unguna i tepa nimbe peremo:

Kongi kaomuni wit nowi lelima kambulupe mongoma oltentembai kongono tendembalo wali yunge keremu ka toko pipi naa tiwi. *(Lo 25:4)*

Goteni kongi kaoma kondo kolopa konopu lepalie kau aku tepa naa nimu.

<sup>10</sup> Aku manda lepa lino Gotenga kongono tenderemolo imbomando nimu. Poinye apape toromo iye te kinye poinyena langi mongo nowi itemomu ina topa amenge teremo iye te kinye aku iye taloni i poinye mongo toromele langimare nombolo konopu lekolio kongono yu mele mele terembele. Kongi kao manda leli ungu kanomu Goteni lino aku tepo mele moromolomando nimu.

<sup>11</sup> Mini Kake Teli tirimu unguma langi imbole mele nimbo tipo tili tirimbulumunga Barnabas iltoni eno enge tirimbulu. Akumunga enoni ilto kere langi tiko tapu telemalanje narini molo nilka.

<sup>12</sup> Gotenga kongono imbomareni eno tapongemunga langi tiko nokoromele. Akumunga linoni eno pulu mondopo kumbe lepo Jisasinga temane topo tirimulungu paa langi tiko nokoko kondolemala. Nalo paa aku teko teao ungu naa nimulu. Aku molo. Imboma umbuni naa timilindo Kraistingu temane pengamu pilenje nimbolio kele topo umbuni awini meremolo.

<sup>13</sup> Oi tempel ulkena kuro koiringi uluma liko manjeio. Neya ulkena imbomare ulke amenge teko kongono teringimani tukundo tukundo ongo tiringi kerema marendo norangi. Aku tepala iyemareni alta polona kuro koiko kongono tekolio wali ari mele kaloringi marendo norangi.

<sup>14</sup> Teringi aku mele, Awilimuni Jisas ipuki tirimele imbomani Jisasinga ungu tukumemu toko tiko meko andoromelema melema tiko nokoko tapao nimu.

<sup>15</sup> Aku tapongei melema Goteni nando manda linio nimu nalo naa ltiu. Kinye i pipiana ungu topo panjipolio wali na enoni tapoko melema tingei konopu lepolio naa tero. Enonga mele mare naa lipo nanga nanu kele topo tono kolopo moro ulumu imbo teni pipi tilkanje na oi kolka konopu lteo.

<sup>16</sup> Nalo Goteni nando Jisasinga temane toko imbomando ningi tipuwi nimumunga, ungu kanomu nimbo tipolio wali imbi molopili nimbo naa tero. Imbomando aku ungu naa nimbo tindu lemo na bembo nimbo.

<sup>17</sup> Nanga konopumuni Gotenga ungumu nimbo tindu lemo melema tieio manda nimbo. Nalo Goteni niwi nimo ungu pilipolio ungu nimbo tindu lemo aku yunge tewi nimu ungumu tengi tipo Jisasinga ungu pengamu imbomando nimbo timbo.

<sup>18</sup> Konopu penga tili meleme li temoya? Enonga Goteni kongono tenderemelo imbomando tapoko tieio nimo melema manda limbo nalo naa limboi kani imbomando Jisasinga ungu tukumemu nimbo tiro wali enonga melema naa lipolio we nimbo tipo tono kolopo moro akumu konopu pengare ltemo.

#### *Poloni imbo pali tukundo limbei terimu ulumu*

<sup>19</sup> Na imbo tenga ka kongono tendepo naa moro. We molopolio nalo imbo pulumu Jisasinga imboma molangei nimboi imbo palinga ka kongono iyemu molamboi konopu lepolio tero.

<sup>20</sup> Tero uluma aku i tepa. Juda imboma Kraistingu imboma molangei nimboi akumunga eno kinye molopolio wali Juda imbomani teremele ulumanga tepo tukuruku pero. Mosesinga mane ungu lombiele imboma Kraistingu imboma molangei konopu lepoliomunga kano imboma kanangei wali mane ungu lombieleli mendepolo mele moro. Nalo Mosesinga mane ungumunga maindo naa moro.

<sup>21</sup> Mosesinga mane ungu naa pimele imboma Jisasinai tepa lipili konopu lepoliomunga eno kinye molopolio wali kano mane ungumuna naa lipo manjili iye mendepolo mele moro. Nalo aku ulu tero wali Gotenga tewi ungumu umbulu naa tiro. Aku tepolio Kraistini terimu ulumu lipo kumbena mundupolio tero.

<sup>22</sup> Konopu toimbo naa topili Jisas ipuki tirimele imboma enge nengei tapomboi konopu lepoliomunga enonga teremele uluma bembo naa timboi taku lipo moro. Ulu palima teromuni imbomare Jisas ipuki tiengi tapomboi konopu lepoliomunga

imbo palinga teremele uluma tepo tukuru pero.

<sup>23</sup> Jisasinga ungu pilko ipuki tiengei nani imboma enge timboindo aku uluma pali tero. Jisas ipuki tirimelemando Goteni mane ungu timbelo mele na kape limbo lepamo nimbolio tero.

*Melema apureli ltimele ungumu Poloni manda lepa nimu*

<sup>24</sup> I ungu manda lepo niomu eno liko manjengei. Imbomareni kombure lingei opa teko arale teremele nalo enge nimomuni ltimo. Aku teremele mele enoni mulu kombu limili ningi arale teao.

<sup>25</sup> Opa pungei purumele wali keri keri konopuma tiye kolko kombumu limolo lepamo ningi konopu tendekumu panjiko purumele. Kombu lingi nalo akilio pora nimbelo. Nalo mulu kombu liemili keri keri konopuma tiye kolopo aku kombuna molopo pumolo.

<sup>26</sup> Aku tepa mele na ola kane kane naa puro nalo mongo konopu talo kinye puro. Ola kane kane mera naa toro nalo kanopo kondopolio toro.

<sup>27</sup> Kinye kape opa pule iyemu kinye opa tero lepamo nimbolio nanga kangimu kele toro. Aku ambe telka, na Gotenga ungumu imbomando opa ungu nimbo tipolio na altopo embambo naa nimbo mulu kombu limboi kangi kele toro.

## 10

*Oi Israel imbomanga lapali kolepaleni teringi ulumu Poloni manda lepa iye kerimunga kondi toromo ungumu naa pileio nimu*

<sup>1</sup> Eno mainye naa pungei i manda lepo nimboi tero ungumu wamongo pilko kondaio. Linonga ara kae kame Isip kombu tiye kolko wendo oringi wali kupe lombili wangei nimbelie Goteni kupe te tipte mundurumu akuna maindo oringi. Kelepa Goteni Kondoli Nomu mendo mendo winjo winjo imunana kapu lepili nimuaku aulkena nekondo puringi.

<sup>2</sup> Imbo akuma nona yakondo ongo kupena maindo oringi aku ulu taloni Moses kinye kopu teko yunge imbo lombileringima manda lerimu. Aku ulumu no mele ltingi.

<sup>3</sup> Aku wali Mini Kake Telimuni muluna mainye opili nimbe langi tirimumu palini norangi.

<sup>4</sup> No tirimumu palini norangi. Aku nomu Goteni kouna akupe wendo opili nimu kinye orumuna norangi. Aku nomu terenga terenga wendo puringi kombuna koumunga no akupe ombo molorumuna norangi. Aku koumu yu Kraista manda lepo nio.

<sup>5</sup> Goteni aku tepa tapopalie nalo kano imbomanga ulu keri teringina kanopa penga naa pilerimu. Akumunga imbo akuma kolangei nimbe enonga kangi panama imbo naa peli kombu kapu wena tengateng leangei nimu.

<sup>6</sup> Oi imboma kinye i uluma wendo orumupe, kinye linoni kanamili nimbelie terimu. Oi imbomani ulu kerima teringima lino teamili eio ungu naa nemili nimbelie wendo orumula.

<sup>7</sup> Aku imbo mareni mele tendo gote ningi kuro popo toringi kani enoni aku ulu naa teao. Israel imbomani toringi ulu akumu Gotenga bukuna ungu te nimbe peremo: Israel imboma kere kapu awini nongo no enge nili mare awini nongo molkolio ulu keri nale teringi. Aku tekolio manga topa naa ltimu. (Kis 32:6)

<sup>8</sup> Linoni ambiye wapu langi naa namili. Koro oi, wali tendekumunga ambiye wapu langi norangi Israel imbo 23,000 Goteni topa kondorumuna koloringi.

<sup>9</sup> Linonga Iye Awilimu manda tembalonje nimbo naa manda manjipo kanamili. Israel imbomanga lapali kolepale aku ulu teringima Goteni waimbe kerimani naio nimunaaku imboma nongo kondoringi.

<sup>10</sup> Goteni ambe temona teremoya ungu naa neio. Oi imbomareni aku ulu teringimunga Gotenga muluna kongono iye ensel imbo topa kondolimuni imbo akuma topa kondoru-

<sup>11</sup> Oi imboma kinye i uluma wendo orumupe manda lepa kanamili ningolio lino mulu mai talo pora nimbei teremo waina moromolo imbomaniaku ulu naa teamili ningotoko panjiringi.

<sup>12</sup> Akumunga eno wamongo liko manjeio. Imboreni yu uluma pileli kelkele tonio lemo papo teko munduko ongo mainye punio kani wamongo kane kane molowi.

<sup>13</sup> Eno tepa maindo mundumbei teremo manda manjili ulu koinjo te oi wendo naa orumu. Uluaku tepamani imboma pali manda manjirimo. Goteni nanga imboma tapombo nimu ungu ara tipelie manda manjili ulu teni eno tepa maindo mundumbei embambo tipili ungu naa nimbelo. Nalo ulu teni manda manjipe umbuni timbelo wali Goteni eno umbuni meangei enge tipelie tapombalo.

*Kuro koiringi langi kinye langi mongo wain talo manda nongenje nimbe Poloni ungu mane tirimu*

<sup>14</sup> Kuro koiringi langi noromele ulumuni eno manda manjirimo. Akumunga nanga Kraistainga imbina kanopo ltimo imboma, kolo toli gote kuro koiko popo toromele uluma umbulu tieio.

<sup>15</sup> Eno liko manjirimele imbomando nio. Nanga nio ungu kolo toronje enoni pilko moke teao.

<sup>16</sup> Kraist yu kolorumu wali yunge mememuni lino imbo palima tepa koinjo litmu. Akumunga langi mongo noromolo wali mane ungu peli kap lipolio Gotendo paa tereno nimbo no wain nombolio lino meme tendeku imboma moromolo. Aku tepala bret pike leli noromolo wali lino Kraistingu kangi tendeku imboma moromolo.

<sup>17</sup> Bret tendekumu kau Itemona lino Jisas ipuki tirimolo imboma pali pike lepo noromolo. Akumunga lino imbo manga lupe lupema imbo tendeku mele moromolo.

<sup>18</sup> Israel imbomani Gotendo paa tereno ningo melema kalko tirimele uluma liko manjeio. Israel imbomani Gotendo paa tereno ningo ari tirimelema toko kondokolio ekondo alta polona tipe nomba pora tipili ningo kaloringi nalo ekondo enonga noringi. Akuulu teringimunga Gote kinye kopu teko moloringi.

<sup>19</sup> Naloaku ungu nimbolio wali Gote naa lipe manjilimanikolo toli gotemanga kuro koiringi ulumuakuulu tukumere konopu naa lteo. Kolo toli gote yu kape gote tukumere molo nio.

<sup>20</sup> Imbo kanomani kuro koiringi wali keri kuromando ari tirimelema tiko tapangei ningo teremele. Aku imbomani Goteni tapopilinngo ari tirimele te naa tirimele. Eno keri kuroma kinyekopu teko naa molangei konopu lepolio nilipo omboaku ungu nio.

<sup>21</sup> Walite Awilimunga kap noromele. Walite keri kuromanga kap noromele. Aku teko paa naa teao. Walite Kraist liko manjikolangi mongo noromele. Walite keri kuromanga kuro koikolangima noromele. Aku teko paa naa teao.

<sup>22</sup> Goteni lino kinye wailke naa tombalona teremoloya? Yu enge naa peremo nimbolio lipo amboltomoloya?

### *Imbo te ku pembalo kanaio nimbe Poloni ungu mane tirimu*

<sup>23</sup> Kristen imbomareni ulu palima manda temolo nimele. Naloaku ulu palimani lino naa taporomo. Imbomareni ulu palima manda temolo nimele. Nalo teremele ulu palimani imboma tepa enge naa tirimo.

<sup>24</sup> Imbo teni nu nunukele tokolioaku ulu naa tewi. Nalo imbomare tapombalo ulumu tewi.

<sup>25-26</sup> Eno ari melema maket teremelema manda liko nongei. Aku ambe telka, Gotenga bukuna peremo ungu lipo manjirimolomu i tepa:

Mai kombumu kinye akuna tukundo ltemo melema palinga pulu iyemu Gote yu. (Sng 24:1)

Akumunga kuro koiringi langimu liembonje naa liembonje ningokonopu talo naa leao.

<sup>27</sup> Aku tepala Jisas naa pileli imbo reni nundo langi tendeku tipo nambili owi nimbelo wali pumbo konopu lenio lemoaku manda punio. Aku wali da kuro koinge langima ltemoya konopu talo naa lekolio langima manda nonio.

<sup>28</sup> Nalo waye molongei imbo teni langidamu kuro koinge ltemo nimo lemoaku langima naa nowi. Aku ungu nimbelo iyemuni ulu aloware ltemoya konopu lepili kani yu naa tepo kenjimboi konopu lekoaku langima naa nowi.

<sup>29</sup> Nonio lemo nu ulu keri te aku teko naa tenio. Nalo iyemu molopiliaku ulu keri konopu itemomungaaku langi naa nowi. Nalo iye akumu ambe temona nanga uluma moke tepa molopa kanopili langi naa namboi konopu ltenoya?

<sup>30</sup> Waye molkolio Gotendo paa tereno ningo kere langi nonio waliaku ambe telka Goteni oi mane ungu tirimu langi noniona iye teni nu ulu keri tereno nimbelo langi naa namboi konopu ltenoya?

<sup>31</sup> I nimboi tero ungumunga akulangi naa nowi. Ulte tenionje. Ulte naa tenionje. Notenionje. Langi te nonionje. Aku uluma pali Gotenga imbi leko anjiko tewi.

<sup>32</sup> Enoi Juda imboma kape Grik imboma kape Gotenga ungumu pilenge imboma kape we imbo narire akuma konopu alowa naa leangei ningolio uluma teao.

<sup>33</sup> Imbo pulumu Jisas ipuki tiengenimbotapopo moro. Na nanukele naa toro. Imboma pali na konopu pengaleangei nimbelo uluma paliaku tepo tero. Eno kapeaku ulu talo teao.

## 11

<sup>1</sup> Kraistini terimu ulumu lombilipo teromele eno kanoko lombieio.

*Ambo iyemani Gotendo konge tengelulumu Poloni ungu mane tirimu*

<sup>2</sup> Oi ungu mane tiruma enoni waliwali naa tiye kolamli ningokonopu ltemele. Akumungaaku ulumu paa teremele nio.

<sup>3</sup> I nimboi tero ungumuka pe liko manjeio. Kraist yu Gotenga maindo moromo akumunga Kraistingu pinyewa Gote. Aku tepe iyema pali Kraistingu maindo moromelemunga iye palimanga pinyewema Kraist. Aku tepalamboma iyemanga maindo moromele akumunga ambomanga pinyewema iyema.

<sup>4</sup> Gotendo konge tembai wali iye teni melte pinyewena pakopalie yunge pinyewe iye Kraist tepe kenjirimo. Imbomando

Gotenga nimbe munduli unguma nimbe para timbei wali wainye pakopalie pinyewe iye Kraist kinye tepa alowa tenderemo.

<sup>5</sup> Aku tepala iye puli ambo teni pinyewe aku naa toli we Gotendo konge temo molo Gotenga nimbe munduli ungumu imbo-mando nimbe timo lemo yunge iyemu tepa mai kondombalo. Aku ulu telkanje pinyendi poroli ambo apureli none telka.

<sup>6</sup> Iye puli ambo te yunge pinyewena mele te aku naa tomo lemo yunge pinyendi porombalo. Nalo porowinga molo karu leko ponjiwinga mai kolomo lemo mele te pinyewena pakombalo.

<sup>7</sup> Goteni pulu polopa iye terimu wali yu yunu manda lepa au nimbe imbomani yunge imbi pilengei terimu akumunga Gote konge ningei wali iyemani enonga pinyewena mele te naa pakonge. Aku tepa mele omenu ambomuni teremo ulumanga imbomani kanokolio omenu iyemu wale pakoromo ltemo ningo iyemunga imbimu kapi nimele.

<sup>8</sup> Imboma terimu wali Goteni iyemu tembai wali ambomunga wendo lipe naa terimu, nalo ambomu iyemunga lambomu wendo lipe wamoruru lipo manjipo paimbo nimolo.

<sup>9</sup> Iyemuni ambomu maindo molopa tapopili nimbelie naa terimu, nalo ambomu yunge iyemu tapopili nimbelie terimu.

<sup>10</sup> Goteni oi terimu ulu pulumunga kinye enselemani kanoko penga pilengeimunga aku ungu pulu talonga ambomani linonga iyemanga ungu pilipo maindo moromolomu mona lepili ningo mele te pinyewena pakangei.

<sup>11</sup> Nalo ambomani iyemu yu tepili ningo linongan manda molamili nengei nimbe Goteniaku tepe amboma naa terimu. Aku tepe iyieman ambomu yu tepili ningo linongan molamili nengei nimbe Goteni iyema naa terimu.

<sup>12</sup> Oi iyemunga lambomu wendo lipelie wali ambomu wamoruru nalo altopa ambomuni topele topa iyema kalopa lipili nimbe Goteniaku uluma pali wendo opili nimbe terimu.

<sup>13</sup> Iye puli ambo teni pinyewena mele te naa pakopalie Gotendo konge tere-momu manda tembalonje aku ulumu eno enonganliko manjeio.

<sup>14</sup> Mai kombu ulu itemomuni iye te pinyendi ambo mele lapie memo lemo ambele iyerenje konopu itemolo.

<sup>15</sup> Nalo ambo teni pinyendi wale memo lemo manda lipe tirimona kanopo penga pi-molo. Aku ambe telka yunge pinyendimun wainye mele pakopili nimbe Goteni tirimi.

<sup>16</sup> Aku nio unguma imbo teni topa akum-bei temo lemo i nio ungumu lipe manjip-ili. Lino aposel iyemani pinyewena mele

te pakoli uluma aku ungu nio mele kau teremolo. Jisas ipuki tiko nombeya teko kombu maliona moromele imbomani kape ulu teteko naa teremele.

*Korin imbomani langi mongo nongo Jisas liko manjirimele uluma ningi amenge teao nimbe Poloni ungu mane tirimu*

<sup>17</sup> Eno nombeya teremele wali imboma Jisas kinye kopu teko molangei ningi enge naa tiko teko kenjirimele akumunga i nimboi tero unguna eno uluma teko kondoromele ungu te manda naa nio.

<sup>18-19</sup> Te kumbe lepa, eno onto nombeya teremele wali konopu tendekuna naa pupili molko manga pupu lupe lupe moromele ungu pileru. Eno lupe lupe moromele ungu pilipolio alaye ipuki tiro. Aku ambe telka aku ulumuni Goteni imbo naimele imbo toya tolima moromele kanopa penga pimo mona ltendembalo.

<sup>20-21</sup> Eno onto nombeya teko molkolio wali we imboma yu tepili eno kau nomolo ningo pako pako wamoko kere aku teko noromelemunga Awilimu wale pakoko langi naa noromele. Aku tekolio imbo mareninowain awini nongo lowi itemele nalo mare gala punena engele kolko we molko purumele.

<sup>22</sup> Enonga ulkena molkolio oi kere nongo no nongo molaio. Imbo koropa nolima mai kanangei ningo Gotenga imbo nombeya teremele ambe telka teko kenjirimeleya? Aku teko nongo moromelemunga eno paa teremele nemboya? Aku paa molo.

*Awili Jisasini langi mongo i teko naio nimu nimbe Poloni ungu mane tirimu*

<sup>23</sup> Awilimuni tirimu uluma lipolio enondo nimbo tiru. Aku i tepe. Ipu leli opa pule imbomanga kindo oi naa tili wali, Awili Jisasini bret lipe

<sup>24</sup> Gotendo paa tereno nimbelie pike lepa nimbei, "I bretemu nanga kangimu. Eno tapopili nimbo tiro. Na moro ulumu liko manjiko langi naio," nimu.

<sup>25</sup> Aku tepe la langi nongo pora tipelie yu kap te lipelie nimbei, "Nanga mememuni Goteni imboma kinye mi lepa tembo nimu unguma ara tipolio i kapomu tiro. I teko nongei wali na teru ulumu liko manjiko naio," nimu.

<sup>26</sup> Jisas oi yando naa oli bret kano nongo kap kano liko no nongei wali Awilimuni imboma tepe limbei kolorumu ningo para tingi.

*Langi mongo nomili wali konopu am-belemu teamili*

<sup>27</sup> Akumunga, imbo teni bret kano nongo kap kano liko no nongo wale naa pakopalie yunge noromo ulumuni Awili Jisasinga

mindi meme talo tepe kenjipe alowa tendembalo.

<sup>28</sup> Aku ulu wendo naa opili nimbe bret kinye no kapomu oi naa lili wali imbo te te ninga enonga teremele uluma moke teko liko manjikolio langi mongo naio.

<sup>29</sup> Aku ambe telka, Jisasini lino lipe popo tipelie kopu tepe molopa linonga nimbe kolo wangopa kolorumu ulumu kanopa imbi naa tipelie langi no talo we nongolio imbo akumu Goteni topili nimbe yunu tepe kenjirimo.

<sup>30</sup> Enonga uluma oi naa liko manjikolio Jisasini terimu ulumu kanoko imbi naa tiringimunga eno imbo pulumu kuro torumu kolko leringi. Mare kape oi kolko nomi ka akuringi.

<sup>31</sup> Nalo linonga teremolo uluma oi lipo manjipolio nimbo amenge temolo lemo Goteni konopu topele tonge konopu lepalie lino naa tombalo.

<sup>32</sup> Awilimuni lino ulu keri teremolona kanopalie umbuni tirimo wali ulu keri teremele mai kombu imboma kinye tipe kombuna pangei ungu naa nimbeimunga lino tepa amenge teremo.

<sup>33</sup> Akumunga nanga Kristen imbo angkame eno kere langi nongei ongo nombeya tenge wali oi namili konopu naa lekolio imbo angenupilima wangei kani nokoko molaio.

<sup>34</sup> Enonga nombeya teko kenjingemunga Goteni umbuni naa tipili ninga nu imbo te engale temo lemo nunge ulkena oi langi nongolio owi. Altopo ombo wali eno i tekoteangei ungu we mare kape nimbo timbo.

## 12

*Mini Kake Telimuni imbo te te ninga Gotenga kongono tewinga enge tirimuna Poloni ungu mane tirimu*

<sup>1</sup> Mini Kake Telimuni imboma kongono tendangei enge tirimuna enoni paa liko manjengei ungu mane timboi tero.

<sup>2</sup> Eno oi Jisas naa liko manjiringi wali, ungu naa nili melemando gote ningolio akuma kuro popo tongei ulu teni tope tirimi wali oi teringi ulu kanoma liko manjiringi.

<sup>3</sup> Aku ulu kerimu oi teringimunga i nimboi tero ungumu wamongo liko manjeio. Eno imbo Mini Kake Teli tope tirimo teni Jisas bembo nipili ungu akumu naa nimbelo. Aku tepe Mini Kake Telimuni imbo te tope naa timo lemo aku imbomu Jisas yu Gote manda naa nimbelo.

<sup>4</sup> Mini Kake Teli tendekumu kau moromo nalo Gotenga kongono tendewinga enge i kano kanoma we tipe kalopa tirimo.

<sup>5</sup> Gotenga kongono lupe mare litemo nalo Awili tendekumu kau moromo.

<sup>6</sup> Aku tepala kongono tendewinga enge lupe mare peremo nalo Gote tendekumuni yunge kongono manda tendangei nimbe imbo yu mele mele enge tirimo.

<sup>7</sup> Imbo te te ningoni waye moromele Kris-tien imboma tapangei nimbe Mini Kake Telimuni Gote moromo kanangei nimbe enge tirimo.

<sup>8</sup> Aku uluma i tepe. Imbo tendo Gotenga litemo uluma lipe manjipelie imbomando teamili nipili nimbe enge tirimo. Tendo Goteni imboma kinye teremo uluma kanopa imbi tipelie imbomando nipili nimbe Mini Kake Teli tendekumuni enge tirimo.

<sup>9</sup> Aku tendeku Mini Kake Teli tirimomuni imbo tendo Goteni ulu enge nilimu manda tembalu lepamo nimbe ipuki tipili nimbe enge tirimo. Imboma tepe koinjo lipili enge mareaku tendeku Mini Kake Telimuni tewi nimbe imbo tendo enge tirimo.

<sup>10</sup> Imbo tendo ulu wengendeli enge nili mare tepili nimbelie enge tirimo. Imbo tendo Gotenga ungu nimbe mundulimu imbomando ungu kanomu ninga tiwi nimbe enge tirimo. Imbo tendo keri kuromuni imbole tope tirimonje Mini Kake Telimuni tope tirimonje kanopa imbi tipili nimbe enge tirimo. Imbo tendo imbo ungu te oi naa pilelimu nipili nimbe enge tirimo. Imbo tendo kape imbo ungu te oi naa pilelimu topele topa imbomando nimbe tipili nimbe enge tirimo.

<sup>11</sup> Tendeku Mini Kake Telimuni yunu kau i ulumanga engemu timboi konopu lepalie imbo yaka yaka nimbe tirimo.

*Lino Kristen imboma pali Goteni lipe Kraistingu kangimu wamoramu ungumu Poloni ungu mane tirimu*

<sup>12</sup> Imbo tenga kangimu undukana tendekumu nalo kangimunga imbima lupe lupe. Kimbo ki kumbe mongo komu lupe lupe peremo nalo kangi tendekumu kau. Aku tendeku tirimo mele, lino imbo lupe lupema Kraistina kinye popo tipo imbo tendeku moromolo.

<sup>13</sup> Juda imboma kape Juda imbomanga wendo imbo lupema kape ka kongono teremele imboma kape enonga kombu we moromele imboma kape lino imbo lupe lupema Mini Kake Telemuni lipelie Kraistingu imboma molamili nimbelie tendekuna no ltindirimu. Aku tepala Mini Kake Telimuni tukundo liengei nimbe Goteni lino imbo palimando tirimu. Akumunga lino Kraistingu kangi tendeku imboma moromolo.

<sup>14</sup> Kimbo ki mongo kumbe kere komuma kangimu i tepe mele tendekure kau molo. Yu mele mele litemo.

<sup>15</sup> Kimbomuni nimbei, "Na kire molo nimo lemo na kangimunga tuku naa pero lepamo," nilkanje aku ulumuni yu manda tungu nimbe lupe naa molka.

<sup>16</sup> Aku tepala komumuni nimbei, "Na mongore molo nimo lemo kangimunga tuku naa pero lepamo," nilkanje aku ulumuni yu kumbe tepa yu wendo naa molka.

<sup>17</sup> Imbo tenga kangimu undukana mongomu kaunje ungu ambe tepa pilka? Imbo tenga kangimu undukana komumu kau lekanje melema ambe tepa mune pilka?

<sup>18</sup> Nalo Goteni mele lupe lupema lipe kangina kongono tepili konopu lepalie popo tirumumuni imboma aku tepa wamoramu.

<sup>19</sup> Kangimunga mele tendekumu kau angilkanje imbo kangi naa leka.

<sup>20</sup> Kinye itemo mele, kimbo ki mongo kumbe melema lupe lupe itemo nalo lipo popo tipe imbo kangi tendekumu terimu.

<sup>21</sup> Kangi tendeku terimumunga mongoni kimundo waye naa molambili, wendo puwi nimbelie aku ungu naa nipili. Aku tepala, pinyewemuni kimbondo tendekuna naa molambili wendo puwi ungu naa nipili.

<sup>22</sup> Lino naa molopili ungu naa nimolo. Linonga kangimanga mele enge naa peremo konopu itemolo te naa angilimo lemo lino tapombalo kangi te naa angilimbelo-munga manda naa molomolo.

<sup>23</sup> Kangi tendo penga naa itemo konopu lepolio akuna au tirimolo. Kangindo imbonani naa kanangei nimoloma nokopo kondoromolo.

<sup>24-25</sup> Nalo imboma manda karomelema paa nokopo naa kondoromolo. Kangi mele lupe lupema enonga kumbe teko pungo karaye naa teangei konopu lepalie Goteni kangimunga imbi naa mololi konopu itemoloma wale pakamili nimbe imbo kangi wamoramu. Aku tepalie kimbo ki mongo kumbe mele teni kangi popo tiko moromele melema tapopili konopu tendekuna pupili nimbe terimu.

<sup>26</sup> Kangimunga mele teni mindili nomo lemo kangi undukana mindili noromo. Kangi tendo imboreni tapu topa nokopa kondomo lemo kangi undukana tono kolopa moromo.

<sup>27</sup> Aku ungu nilipo ombolio mele eno Kraistingu kangimu moromele. Eno imbo te te ningi Kraistingu kimbo ki mongo kumbe melema moromele.

<sup>28</sup> Eno Gotenga imbo moromelemanga imunana Goteni imbo marendo aposel kongono tendepao nimbe eno kiyendo kanopa lipe kongono tirimolo. Talo tipe, marendo yunge ungu nimbe mundulimu imbomando ningi tieio nimbe iye profetema kanopa lipe kongono tirimolo. Yupoko tipe, marendo nanga imboma ungu

mane tieio nimbe eno kanopa lipe kongono tirimolo. Aku tepalie, ulu wengendeli enge nilima teaio nimbe imbo mare kanopa ltimo. Kuro toromo imboma teko koinjo lieio nimbe enge lupema tipelie imbo mare kanopa ltimo. Imbo wema tapao nimbe mare kanopa ltimo. Imbomando uluma i tepo teamuli ningi tapu teaio nimbe mare kanopa ltimo. Imbo ungu oi naa pileli mare manda nengei nimbe imbo mare kape kanopa ltimo.

<sup>29</sup> Kraistingu imboma pali aposel kongo teko moromeleya? Wayema Gotenga iye profetema moromeleya? Palini imbomando Gotenga ungu mane tirimeleya? Wayemani ulu wengendeli enge nilima tenderemeleya?

<sup>30</sup> Goteni imbo palindo kuro toli imbo awinima teko koinjo lengei nimbe enge mare tirimuya? Eno imboma pali oi naa pileli imbo ungu te nimeleya? Kano unguma pilko topele toko imbomando yando ningi tirimele wayeni manda nimeleya? Aku molo.

<sup>31</sup> Nalo imboma tapamili konopu lekolio Goteni tipe kalopa tirimolo ulu kiyendoma enge ningi liengei.

### *Imboma kondo kolko konopu mondangi ulumu Poloni ungu mane tirimu*

Kinye eno molko kondoko teangei ulu paa kiyendoma nimbo timboi tero.

## 13

<sup>1</sup> Enselemanga kape mai kombu imbomanga kape nimele unguma pilipolio manda nimbo nalo imboma kondo kolopo konopu naa mondondu lemo ungumuni we owa kere noro. Imbonani nanga nio ungu pilkollo ungu lalo nimo ningi tiringi toromele wali ungu mele nimo ninge.

<sup>2</sup> Goteni nando yunge ungu nimbe mundulimu imboma yando ungu nemboi enge tirimolo kinye Gotenga konopundo we panjirimo ungu nimbe mundumbei teremoma lipo manjipolio yunge imboma kinye teremo uluma pali kanopo imbi tipolio ipuki enge nimbo tiromunga mulu te konopa pumbelie anjipe polopili manda nimbo nalo imboma kondo kolopo konopu naa mondondu lemo na imbo tukumemu molo.

<sup>3</sup> Nanga mai kinye melema pali imbo koropa nolimando tipolio imbi molopili nimbo imbo kerimani na Jisasinga temane topo tiromunga ambolko like tipena topo kalamili ningi wali aku manda teaio nimbo nalo imbo kondo kolopa konopu naa mondondu lemo Gote kinye nanga imbimu naa moromo.

<sup>4</sup> Imboma kondo kolopa konopu mondoromo imbo reni ulu i tepama tepa momomo. Mumindili kolopa pundu tamboi konopu welea naa lembalo. Yu taka lipe molopa we imboma kinye uluma kandiki teremo. Yokoli naa kolombalo. Yunge teremomundo imbi molopili nimbe kelkele naa kolombalo. Paa moro konopu lepalie iye awili none naa tembalo.

<sup>5</sup> Imboma umbulu tipe topa mongo lipe aku ulu naa tembalo. Na kau liembo aie konopu naa lembalo. Mumindili welea naa kolombalo. Alowa teremeleunga pundu tomboi konopu mandopa naa lembalo.

<sup>6</sup> Ulu mongona naa pepuli teremele uluma tono kolopa yu tuku naa pembalo nalo Gotenga itemo uluma toy a toromele wali paa tono tono kolopa tuku pembalo.

<sup>7</sup> Ulu kerima teremo iye te mainye naa pupili umbuni tapopa meremo. Imboma ungu umbulkondo nindirimelena pilipe ipuki naa tipelie mololipe purumo. Imbo kerima konopu topele tangei nimbei Goteni imbo kanoma tapombalo konopu lelipa purumo. Umbuni mepa enge nimbe angilipielie Goteni imboma teangei nimo ungumun tenge tipe telipe purumo.

<sup>8</sup> Linoni imbomaaku tepo kondo kolopo konopu mondromolo ulu akumu pora naa nimbelo. Nalo imbomareni Gotenga ungu nimbe mundulimu yando ningi tirimele unguma walite pora nimbelo. Oi naa pileli imbo ungu ningema walite naa ningi. Goteni teremo uluma imbomareni kanoko imbi tirimele ulu akumu kape pora nimbelo.

<sup>9</sup> Aku ambe telka, kinye uluma pali naa lipo manjirimolo. Gotenga nimbe munduli unguma kopunge pilipo nimbo tirimolo.

<sup>10</sup> Nalo Goteni uluma koinjo tepalie kamukumu wendo opili nimbe tembalo wali kinye kokele itemoma tepa pora timbolo.

<sup>11</sup> Aku ulu i tepe, oi bakulumu moloru wali bakulumanga ulu teru. Bakulu mele ungu nimbo konopu lepo uluma lipo manjiru. Nalo kelepa na iye apuwe lepa pora tipolio aku bakulumanga teremele uluma tiyekoru.

<sup>12</sup> Kinye i moromolo waina nona nini karomolo mele alaye kolo kandomolo. Nalo peyalime waina kumbekere kanopo imbi timolo. Kinye uluma kopunge lipo manjiru nalo peyalime walimunga na kamukumu Goteni lipe manjirimo mele aku tepe ka-mukumu lipo manjimbo.

<sup>13</sup> Pileio! Goteni ipuki tirimolo ulumu kape Goteni imboma tapombalo lepamo konopu lepolio nokopo moromolo ulumu kape Gote kinye imboma waye konopu mondromolo aku ulu yupokope lepa kau pumbelo. Nalo ulu yupokonga olandopa itemomouaku konopu mondoli ulumu.

## 14

*Gotenga ungu nimbe mundulimu imbo-mando yando ningi tingei mele kinye oi naa pileli imbo unguma ningi mele aku ulu talo Poloni nimbe amenge terimu*

<sup>1</sup> Aku nio mele imboma kondo kolko konopu mondoko molaio! Aku tengen wali Mini Kake Telimuni imboma ulu enge nili mare teangei nimbe tipe kalopa tirimoma liemili konopu leao. Gotenga ungu nimbe mundulimu imbonando ningi tiengen niimbe enge tirimomu paa liemili konopu leao.

<sup>2-3</sup> Aku ambe telka, Gotenga ungu nimbe mundulimu yando nimbe tirimo iye profet teni imbomani Gote ipuki tiko enge ningi molangei nimbe enge tirimo. Wali mare imbomando tamba naa nilko Gotenga teao nimu uluma manda teangei nimbe tirimo. Wali mareaku tepala umbuni meangei wali Goteni tapombalo nimbe imbonanga konopu toimbo topili nimbe enge tirimo. Nalo oi naa pileli imbo ungu te nimo imbo teni imbomando naa nimbe Gotendo ungu nimo. Mini Kake Teli yunge minimu enge tirimomuni Gotenga oi mona naa leli uluma nimbe para tirimo wali imbo waye angimelemani pilkolio nalo naa liko manjirimele.

<sup>4</sup> Oi imbo ungu te naa pileli nimbelie nimo ulumuniaku imbomuni yunge konopundo nimbe enge tirimo. Nalo Gotenga nimbe munduli ungu nimbe tirimo imbo teni Gotenga imbinanombeya teremele imbonanga ipuki tirimele uluma nimbe enge tirimo.

<sup>5</sup> Oi naa pileli imbo ungu te nimele ulumu eno imbo palini nengei konopu lteo. Nalo eno palini Gotenga ungu nimbe mundulimu imbonando yando ningiaku ulumu konopu mondoro. Gotenga imbinanombeya tekomo moromele imboma enge ningi molangei nimbe enge tipili oi naa pileli imbo ungu pilipe topele topa nimbe tirimo imbo te naa molomo lemo,aku Gotenga nimbe munduli ungu nimbe tirimo imbo te imbo tapowinga yu olandopa nalo oi naa pileli imbo ungu nimo imbo teni imbo tapowinga yu mandopo.

<sup>6</sup> Walite ombo wali oi naa pimele imbo ungu te nilipo ondu lemoaku ungumuni eno manda tapombaloya? Manda naa tapombalo. Nalo Goteni oi naa nimbe para tili ungu te mepo ombo nindu lemoaku eno tapombalo. Gotenga nimbe munduli ungu mare eno nimbo tindu lemoaku eno tapombalo. Goteni niwi nimuna ungu mane tindu lemoaku ulumuni eno kape tapombalo.

<sup>7</sup> Kolape mingi kinye tiringi mingi talo koinjo mololi mele talte, molo, nalo ungu we nimbe. Tiringim u lopailke takomo

lemo ambe teko tokolio we ninio. Kola pinggi kalawé nimo lemo kunana temu nimo ninggo pilko imbi tinio.

<sup>8</sup> Aku tepala lalo pengomango munduli imbo teni opa pule iyema oromelewa nimbe alako tomo lemo yunge imboma wamongo naa pilkolio opa oromo lepamo naa ningolio opa manda naa punge.

<sup>9</sup> Enope aku tepalawa. Enonga nimele unguma pilipe imbi naa timo lemo ninge ungumunga pulumu narini lipe manjimbeloya? Aku teko ninge wali ungu lila ninge.

<sup>10</sup> I mai kombuna imbo ungu lupe nimelema paa pulumu itemo. Nalo ungu pulu te naa peli we nimele te naa itemo.

<sup>11</sup> Nalo imbo tengah nimo imbo ungummu pilipolio nalo naa lipo manjindu lemo yu komuna no puli kongi mele komu tenda tenda itemo imbole konopu lembo. Yunikape nando aku konopu lembalo.

<sup>12</sup> Oi imbo ungu te naa pileli ningolio wali eno nendo yando ungu lupe nili imbole mele moromele. Mini Kake Telimuni tipe kalopa tirimoma liemili konopu itemele akumunga Jisasinga imboma nimbo enge tiemili ulu tirimoma paa liemili konopu leao.

#### *Oi naa pileli imbo ungu nimolo ungummu Poloni ungu mane tirimu*

<sup>13</sup> Kraistinga imbo moromelema ninge tini imbo teni Kraistinga imboma nombuya tengen wali oi naa pileli imbo ungu te nimbe timo lemo nu Mini Kake Telimuni ungu kanomu topele toko niwinga enge timbei Gote kinye konge tewi.

<sup>14</sup> Liko manjeio. Oi naa pileli imbo ungu te nimbo Gote konge nilkanje Mini Kake Telimuni nanga minimu enge tirimuni nilka nalo konopumu mele tengah pupili nimbo molka.

<sup>15</sup> Akumunga ambele ulu temboya? Nanga Minimuni konge nimbo nalo konopu we lepili ungu naa nimbo konopumu kinye kape waye taloni konge nimbo. Gote kapi nimbo kunana nimbo wali minimuni kunana nimbo nalo konopu we lepili ungu naa nimbo konopumu kinye waye taloni kunana nimbo.

<sup>16</sup> Konopuma mele tengah pupili ningolio minimuni Gote kapi ninio lemo da ulumu naa pileli imbole ambe temona nunge Gotendo paa tereno nino ungumundo paa nino nimbeloya? Nino ungu naa pilipelie panino ungu manda naa nimbeloi.

<sup>17</sup> Gotendo paa tereno ningolio yunge imbulu paa manda kapini kondomio nalo nunge ungu niniomuni pilko angilengei imboma konopuma naa tapombokalo.

<sup>18</sup> Oi naa pileli imbo ungu mare nimele nalo enoni nimele ulu kanomu lipo ongon-

dopo waliwali ungu aku tepo nilipo oromunga Gotendo paa tereno nio.

<sup>19</sup> Nalo Kraistinga imboma Gote kapi ninggi nombuya tengen wali nanga ungummu pilengen nimbo ungu mane timboi ungu mongo ki te pakera kau nimbo. Imbo ungu te oiaa pilelinna imboma naa pilengi ungu mongo 10,000 nimbo aku manda naa nimbo.

<sup>20</sup> Nalo Kristen imbo ango kame, eno bakulu walo mele naa molaio. Ulu pulu keri teremele uluma wamongo naa liko manjiko enge naa peremele bakulu pame mele eno aku teko molaio. Nalo eno imbo konopu pepili aku teko molaio.

<sup>21</sup> Gotenga bukuna oi ungu te i tekohoko panjiringi. Goteni nimbei,

Imbo ungu lupe nili imbo ponenge ongo nanga ungu nimele muni nanga imboldando ungu mane nimbo timbo nalo wali kape na umbulu tiko nanga ungummu naa pilemili ninge, (Ais 28:11-12)

nimo.

<sup>22</sup> Aku ungu pilipolio Jisas ipuki naa tirimele imboldando aku imbo marenai oi naa pileli imbo ungu te ningi ulumu kinye Goteni ulu te teremo kanangei nimbe kuliene itemo lipo manjirimolo. Oi naa pileli imbo ungu nimele ulumu kuliene itemo kanaao nimbe Jisas ipuki tirimele imboldando aku tepa naa nimo. Nalo imboldando Gotenga ungu nimbe mundulima yando ninggo tirimele ulumu Jisas ipuki tirimele imboldanga Gote moromo kuliene itemo. Wendo imboldanga molo.

<sup>23</sup> Eno liko manjengei. Imboma pali nombuya tengen wali, eno imbo pulumuni oi naa pileli imbo ungummu ningena pilkolio Jisas wamongo naa liko manjilima kinye ipuki naa tilima tukundo ongo molkolio ninge ungummu pilkolio imbo keke lepo tolima moromele konopu lenge.

<sup>24-25</sup> Nalo eno imbo marenai Gotenga nimbe mundulima ungummu ninggo tengen wali Jisas ipuki naa tilimba te molo Kristen teremolo uluma wamba naa lipe manjili teni tukundo omo lemo yunge konopu keri panjirimoma ninge ungummu pilipelie yu moke teangei lipe manjipe yu ulu keri teli imbo moro konopu lembalo. Akumunga tamalu pepa Gote kapi nimbeliae nimbei i nombuya teremele imboma kinye Gote moromo nimbeloi.

#### *Nombuya teko Gote kapi ninge uluma tumbi tiko tieio nimbe Poloni ungu mane tirimu*

<sup>26</sup> Akumunga, Kristen imbo ango kame, lino Gote kapi nemili nombuya temolo wali uluma tepo kondamili ungu ambelemeu nemboya? Nombuya aku teko tengen wali

eno palini uluma tengen. Teni Gote kapi nimbe kunana nimbelo. Teni Gotenga uluma i tepo teamili ungu mane timbelo. Teni Goteni uluma tembalonimbe imbona nimbe timbelo. Teni oi naa pileli imbo unguna ungu nimbe timbelo. Teni oi naa pileli imbo ungu kanomu pilipe topele topa imbonando nimbe timbelo. Aku uluma pali tengen wali, Gotenga nombeya teko molonge imbona nimbe enge tipili konopu lekolio teao.

<sup>27</sup> Imbona pilengei ningi imbonareni oi naa pileli imbo unguna ningi tinge lemo imbo talo yupoko kau manda ninge. Te te ninge kinye imbonareni ungu kanoma pilipe topele topa imbona nimbe tipili.

<sup>28</sup> Topele towi imbo te naa molomo lemo imbona nombeya tengen wali imbo ungure oi naa pileli nimbei teremo imbonuni takalipe molopalie Goteni kau pilipili aku ungu mainye nimbelo.

<sup>29</sup> Aku wali Gotenga nimbe munduli ungu nili imbo profet talo yupoko kau ungu ningi tinge. We profetemani pilko kondokolio enonga ninge unguma pilko moke tengen.

<sup>30</sup> Aku ungu ningi tinge wali, waye molonge imbo tendo Goteni i ungu ningi tiwi nimo lemo oi nilipe purumo imbonere ungu nimbeleno kelepalie takalipe molopili.

<sup>31</sup> Aku tekolio eno te te ningi Gotenga nimbe munduli ungu ningi tinge ulumuni ungu pilinge imbonani ungu mane liko konopu toimbo topili molonge.

<sup>32</sup> Gotenga ungu nimbe mundulim imbonando yando ningi tinge wali Gotenga imbo profetemani konopu naa mepa andopili konopu kolona lepili ungu toya toko ningi tinge.

<sup>33</sup> Liko manjengei. Goteni imbona tepa bili bala naa tirimo. Nalo imbona konopu ame topili molangei nimo. Kombu maliona Gotenga imbona nombeya tekolio wali ulu te teremele aku ulu eno kape teao. Aku i tepa.

<sup>34</sup> Ambonani takaliko moloko we ungu naa neio. Mosesini topa panjirimu mane ungumuni nimo mele ambomu iyemanga maindo molopili. Gotenga imbona nombeya tengena ambonando ungu panjikoa naa neio ningi tieo.

<sup>35</sup> Ambo teni wamba naa pilipelie pilemboi ungu nimbei temo lemo ulke pumbelie omenu iyemu walipe pilipili. Aku ambe telka nombeya tengen wali ungu we nimele amboma ulu alowamu teremele.

<sup>36</sup> Eno imbo awili none teko lino Gotenga ungumu oi pulu mondopo nimulu imbona konopu ltemeleya? Eno kau Gotenga ungumu paa liko manjikolio paa moromolo konopu ltemeleya?

<sup>37</sup> Imbo teni na Gotenga iye profet te moro molo Mini Kake Telimuni ulu tewinga enge

tirimo iye moro konopu ltemo lemo aku iyemu kinye i pipiana topo panjiro ungumu Goteni imbona teao nimu ungu te lipe manjipili.

<sup>38</sup> Aku ungumu umbulu tipe naa pilimboi konopu lemo lemo, yu Gotenga ungu pimele imbonani umbulu tiko yunge unguma naa pilinge.

<sup>39</sup> Nanga Kristen imbo ango kame, kinye i ungumu nimbo ulu lemboi. Gotenga nimbe munduli unguma imbonando nimbo tiemili konopu leao. Aku tekolio, oi naa pileli imbo ungu nimele imbonando aku ulu naa teangei molo ungu akumu naa neio.

<sup>40</sup> Nalo Gotenga imbona nombeya tengen wali, molopo kondamili ulu toya tolima teao.

## 15

### *Jisas kolopa makilerimu*

<sup>1</sup> Nanga Kristen imbo ango kame, Jisasinga temane pengamu oi nimbo tiru kanomu liko manjengei nimbolio altoponio. Aku ungu pilko likolio akuna kimbo mundurumele.

<sup>2</sup> Oi nimbo tiru ungumu ambolonge lemo aku ungumuni Goteni eno tepe koinjolito. Unku kanomu naa ambolemanje ipuki we tilimala.

<sup>3</sup> Oi ungu tukume ltiumu eno pilengei nimbo tiru. Kano ungu i tepe. Gotenga bukuna peremo mele Kraistini linonga ulu kerima wendo lipe ltendembai kolorumu.

<sup>4</sup> Kolorumuna ono teringi. Gotenga bukuna peremo mele, wali yupoko ombo purumu wali Goteni Kraist topa makinjirimu.

<sup>5</sup> Makilipe wendo orumu wali oi Pitani yu kiyendo kanorumu. Altoko yunge iye aposel 12 akumani yu kanoringi.

<sup>6</sup> Kelko linonga Kristen angenupili iye 500 wayeni tendekuna yu kanoringi. Aku nombeya teko moloringi imbonanga mare oi koloringi nalo awini we moromele.

<sup>7</sup> Kelepa yunge angenu Jemsini yu kanorumu. Aku wali pele we kongono tipe munduli iye aposolemani kape yu kanoringi.

<sup>8</sup> Paa peyalimekondo nani yu kanoru. Bakulu mare takatotoromelema anupilini meremele kano tepe mele na walitikini mini ltendepo kongono tipe munduli iye aposel kanopa ltimumu moro.

<sup>9</sup> Gotenga imbona mindili lipo tirumunga Kristen imbonani nando iye aposel ningi imbi manda naa tirimele konopu lteo. Aku ulu terumunga iye aposolemanga pali, na maindo. I ulu keri terumanga

<sup>10</sup> pundu naa topalie Goteni na kondo kolopa taporumumuni kinye Gotenga kongono iye moro. Aku kondo kolopa taporumu ulumuni kere mongo merimu. We iye

aposelemani Gotenga kongono teremele nalo na ongondopo tero. Nanga engereni naa teru nalo Goteni kondo kolopa taporu-mumuni aku ulu teru.

<sup>11</sup> We aposel iyemani ungu ningotiringima kinye nani ungu nimbo tiromu ungu tendekumu. Jisas kolopa makilerimu nimbo tirimolo aku ungumu eno pilkolio ipuki tirimele.

#### *Akilio imboma pali kolko makilinge*

<sup>12</sup> Lino iye aposelemani Jisas kolorumu nalo Goteni yu topa makinjirimu ungumu waliwali nimbo tirimolo. Eno imbonareni imbo te kolopa naa makilimbelo ungu ambe telka nimeleya?

<sup>13</sup> Imbo te kolopa naa makilimbelo ungumu paimbo lekanje linoni Goteni Kraist naa topa makinjirimu ungu nilimala.

<sup>14</sup> I tepe mele Goteni Kraist naa topa mak-jilkanje eno ungu mane tirimolo kanomu we ungure mele nilimala. Eno kape Jisasinga temane topo tirimulumu we ipuki tili-mala.

<sup>15</sup> Kraist kolopa ono kombuna perimu wali Goteni yu topa makinjirimu yu kanop-olio imboma yando nimbo tirimolo. Nalo imbo te kolamu Goteni naa topa mak-jilkanje Goteni Kraist kape naa topa mak-jilkia. Akumunga Gote i ulumu terimu nimbo kolo tolemala.

<sup>16</sup> Paimbo. Imbo kololi Goteni naa topa makinjimo lemo Goteni Kraist kape naa topa makinjirimu nemili.

<sup>17</sup> Goteni Kraist naa topa makinjirimu ungumu paimbo lemo lemo eno Gote ipuki tirimele ulumuni eno naa tapombalo. Enonga ulu keri teremelemanga umbuni we menge.

<sup>18</sup> Jisas ipuki tiko koloringi imboma kape paa embambo ningi.

<sup>19</sup> I wai molopolio Kraistini tapopili mai kombu litemo melema limolo konopu lemolo lemo imbomanli linondo maku mongo naa peli, teremolo ningolio we ulu ne teremele ningi.

<sup>20</sup> Nalo Goteni Kraist ono kombuna topa makinjirimu lepamo. Kraist imboma palinga kumbu lepa koinjo molopili Goteni yu imbo kolilimu naa lepili nimbo topa makinjirimu. Kraist iye kololimanga imunana makilerimu iye komomu.

<sup>21</sup> Iye te kumbe lepa makilerimumuni yunge imboma pali makiklo koinjo molangei lipo manjirimolo. Aku ambe telka iye tengu terimu ulumuni imboma pali kolongei lepamo. Aku tepala iye tengu terimu ulumuni Goteni imboma pali topa makinjimbelo.

<sup>22</sup> Aku i tepe mele. Oi anda kauke Adamenga terimu ulumuni imbo pali koromele. Aku tepala Kraistini terimu

ulumuni Goteni imboma pali tepe koinjo limbelo.

<sup>23</sup> Nalo imbo yu mele mele nimbe topa makinjimbelo. Kraist koinjo molopili nimbe Goteni yu kumbe lepa topa makinjirimu. Aku tepalie, Kraist yando ombalo wali Goteni Kraistingu imboma topa makinjimbelo.

<sup>24</sup> Aku mulu mai talo pora nimbelo wali Kraistini keri kuro nokolima topa maindo mundupe mai kombumanga imbo nokolima topa maindo mundupe mulu mai talo ltemona engema pali topa maindo mundupelie kombu lipe Gotendo iye nomi king kiyendope, kinye mulu mai talonga melema pali nunge maindo molonge nimbe kombuma pali Gotenga kindo nendo timbelo.

<sup>25</sup> Uluma aku tepe wendo ombalo aku ambe telka, opa pule tolima pali Gotenga kimbo maindo molangei nimbe topa maindo mundumbei Kraistini oi kombumanga pali iye nomi king molopili.

<sup>26</sup> Yunge opa pulema pali topalipe peyali kololi ulu pulumu topa bembo timbelo.

<sup>27</sup> Aku Goteni melema pali Kraistingu kindo tirimo ungumu buk Baibelena tukundo peremo. Melema pali nimo kanomu nalo Goteni melema pali Kraistingu kina tirimo ungumu pilipolio Gote yu Kraistingu maindore, molo, konopu lipo manjirimolo.

<sup>28</sup> Goteni kombu pali nokopili nimbe Yunge Malo Kraistingu kindo tirimu. Maloni kombu nokopa amenge tepe pora timbelo wali kombuma pali Lapanga kindo timbelo. Aku wali yu kape Lapanga maindo molombo nimbe molombalo. Aku tembalo wali Goteni kombuma pali lipe undotipe uluma pali nokopa iye nomi king kiyendomu molombalo.

<sup>29</sup> Imbonareni Goteni imboma topa naa makinjimbelo ungu nimele kala. Aku ungu paimbo lemo lemo enoni ambe temona no oi naa lili koloringi imbo Jisas ipuki tiringimanga kolo wangoko no ltimeleya? Kololi imboma naa topa makinjimo lemo koloringi imbomanga kolo wangoko no liengei ulumuni imbo kanoma tapombaloya? Aku molo.

<sup>30</sup> Linope, Jisasinga temane topo tipo kombu marenga mepo andoromolomunga imbonareni lino tongei teremele nalo Goteni imboma topa naa makinjimo lemo umbuni kanoma ambe tepe memoloya?

<sup>31</sup> Waliwalima, kinye kolombonje konopu lteo. Aku ungu paimbo mi lepo nio. Eno Kraistingu imboma moromeleungu Gote kapi nimbo tono koltomu, paimbo ungumu ltemo mele ungu kanomu tendeku tipe paimbo ltemo.

<sup>32</sup> Mai kombu moromele imbomanga konopu lepolio owa takera imbo mele Efesus kombu taunona moromelema kinye opa teruya? Kolondu lemo melte naa limbo konopu lepolio opa naa tolka. Goteni imbo kololima naa topa makinjimo lemo imbomarenge nimele ungumu teamili. Aku ungumu i tepe,

Kinye kere langi awini nombo no enge nili awini namili. Aku ambe telka, otli kolomolo lepamo. *(Ais 22:13)*

<sup>33</sup> Nalo aku teko kili tingei nimele ungumu eno naa pileio. Linonga nimolo ungumu pe imbo keri koniye leko andonio lemo nu imbo keri apuwe lenio aku ungumu konopu liko manjengei.

<sup>34</sup> Eno imbomareni Gote naa pileli imboma none teremele lipo manjipolio aku ungu mai kondomboi nio. Akumunga ulu keri teremelema kele aio. Konopu toimbo topili ningi molaio.

### *Kolko makilinge imbomani kangi lupe lingue*

<sup>35</sup> Eno imbomareni i konopu lengei. Imbo kololima ambe teko makilko koinjo molonjengei? Makilinge wali kangi ambe telimu angilimbelenje?

<sup>36</sup> Eno keke lepo toromelema. Kalakambi mongo panjirimolo wali aku mongo tuku nimbe muli toromo.

<sup>37</sup> Aku mongo panjirimolo wali, kalakambi molo we kere mongo lupere lipolio panjirimolo. Nalo koinjo lepa gomo angili te naa lipo panjirimolo.

<sup>38</sup> Nalo kere mongo panjirimoloma pali Goteni i tepe muli topa wendo opili konopu lepalie pupu yu mele melemuni gomo tepe mongo topili nimo. Kere mongo yu mele melemando Goteni i teko muli toko akoko awili molangei enge timbelo.

<sup>39</sup> Aku tepala, melemanga kangima pali tendeku ulu naa teremo. Imbomanga kangi te. Owa kongi lopamanga kangi ulu te teremo. Keremanga te. Omamanga kape te.

<sup>40</sup> Muluna ola mele i kano kanoma angimele. Maina kape i kano kanoma itemele. Muluna olando itemoma kanopolio aku mele tiperipe mare nimolo. Aku tepala maina itemoma kanopolio aku mele tiperipe mare nimolo kape nalo lupe lupe teremo.

<sup>41</sup> Enamunga pamu te tepe. Olimunga pamu te tepe. Kombu kandiyemanga pamu te tepe. Kombu kandiyemanga kape te te nimbe pa lupe lupe teremo.

<sup>42</sup> Nio kano mele Goteni imbo kololima kangi koinjo tipe eno topa makinjimbelo. Maina ono teremele kangimu purumbelo. Goteni topa makinjimbela ombo imbomanga kangimu naa purumbelo.

<sup>43</sup> Ono teremele kangima kanokolio imbomani kola tekolio yakiki kolonge. Kangi topa makinjimbela ombo kanopolio tono kolopo kanopo penga pilimolo. Ono teremele kangimunga enge te naa peremo. Goteni topa makinjimbelo kangimu paa enge peremonia molopa pumbelo.

<sup>44</sup> Ono teremele kangimu mai kombumunga. Goteni topa makinjimbela ombo mulu kombuna manda molomolo kangimu. Mai kombumunga kangi te itemo. Mulu kombumunga kangi te kape itemo.

<sup>45</sup> Gotenga ungumuni ungu tendekumu nimo. Aku ungumu i tepe,

Goteni oi kiyendo iye Adam wamopalie koinjo molopili, *(Stt 2:7)* nimu. Peyalime, Adam mele iye Kraist Goteni yundo imboma molangei tepe koinjo lipili engemu tirimu.

<sup>46</sup> Oi kiyendo Goteni i imbomando mulu kombuna angilimbelo kangi naa tirimu. Imboma pulu polko mai kombuna molonge kangimu oi tirimo. Altapa Gotenga mulu kombuna angilimbelo kangimu timbelo.

<sup>47</sup> Mai kungupo tolima lipelie Goteni linonga anda kaue komomu iye Adam wamoromu. Nalo talo tipe iye Kraistainga mulu kombu kangimu angili tirimu.

<sup>48</sup> Mai kombu imbo palini anda kaue Adam moloromu mele moromele. Gotenga mulu kombumunga iye moromo mele lino mulu kombu pumili purumolo imboma aku tepe moromolo.

<sup>49</sup> Oi lino mai kombu iyemunga kangi angilerimu. Aku tepala akilio mulu kombu iyemunga kangi angimo mele angilimbelo.

<sup>50</sup> Nanga Kristen imbo ango kame, i ungu pilengen nimbol nio. Mai kombu kangi angimomuni Gotenga mulu kombu limbelo imbo teni tukundo manda naa pumbe akuna itemo uluma naa limbelo. Purumbelo kangimuni molopu kau puli kombuna naa molomolo.

<sup>51</sup> Pileio. Goteni oi naa nili ungu te nimbo timboi. Lino Jisas ipuki tirimolo imboma pali naa kolomolo nalo lino pali mulu kombu kangi angili imbo apuwe lemolo.

<sup>52</sup> Peyalime biukel ungu nimbelo wali kariapa teremo mele aku ulu wendo ombalo. Ensel teni biukel peyalimemu lipe popo tombalo wali Goteni imbo oi koloringima topa makinjipe koinjo molangei nimbolomunga imbo akumani alto naa purunge. Aku wali Goteni imbo koinjo we molongema mulu kombu kangi angili imbo apuwe ltendangei nimbelo.

<sup>53</sup> Aku ambe telka, Goteni kangi pururumomu alto naa purupili kangi angilipili nimbelo. Kangi kololima kikulu topa kangi koinjo molopa pupili nimbelo.

<sup>54</sup> Goteni aku ulu tepa pora timbelo wali oi Gotenga bukuna topa panjirimu nimolo ungu te ara timbelo. Aku ungu i tepa:  
Goteni yunge imboma topa makinjimbelo  
ulu akumuni kololi ulumu topa  
maindo mundurumu. (Ais 25:8)

<sup>55</sup> Kololi ulumuya, kinye nunge engemu tenaya? Kololi ulumuya imbo toko kondorono meramu tenaya? (Hos 13:14)

<sup>56</sup> Kololi ulumunga lino toromo meramupe linonga ulu kerima. Ulu kerimuni mane unguma kanamili nimbelie enge lipe lino topa maindo mundurumo.

<sup>57</sup> Nalo linonga Awili Jisas Kraistini ulu enge nili terimumuni Goteni lino tepa enge tirimumunga linonga opa pule ulu kanomu topa maindo mundurumolo. Akumunga Gotendo paa terimu nimbo tono kolamili.

<sup>58</sup> Akumunga nanga Kristen imbo ango kame konopu toimbo topili ningko angileio. Jisas ipuki tiko kimbo mundeo. Gotenga kongono tenderemelema were naa teremele akumunga Gotenga kongonomu mendepolo teamili konopu lekolio enge ningko teliko paio.

## 16

*Jerusalem moromele Kristen imbo angenupilini umbuni meremelemunga tapangei kou wendo wendo lieio nimbe Poloni nimu*

<sup>1</sup> Jerusalem moromele Kristen imbo angenupili tapangei kou wendo wendo liko popo tieio. Oi Galesia kombu moromele Kristen imbomando teao nimbo tiru mele enoni kape aku ulu teao.

<sup>2</sup> Koromanga yaka ningko kongono teremele kou linge mare koro awili kinye enoga ulkena pakiriko mare lepili neio. Akumunga na ombo wali eno kou naa andoko korangei.

<sup>3</sup> Na ombo wali i pipiamu meko onge imbomani eno tapangei Korin imbomanga kou meko oromele nimbo pipia topolio enoni kanoko ltingi imbomando tipo kou meko paio nimbolio aku imboma tipo mundumbo.

<sup>4</sup> Aku wali waye pamili konopu lendu lemo aku iyema kinye Jerusalem kombuna kopu tepo pumolo.

*Iye yupokoni Korin imboma kanongei purungi ungumu*

<sup>5</sup> Masedonia kombu mai nekondo omboi wali Jisas ipuki tirimele imboma kanopo lipolio altopto eno moromelendo ombo.

<sup>6</sup> Enoni na pumboi tembo konopu lteo aulkena tapongei eno kinye lo kombu tepa ali popo toromo wai kerimunga na molombonje konopu lepo wai tule mololipo pumboi.

<sup>7</sup> Kinye iye ponenge mele kanopo lipolio molkanje eno kinye naa mololipo ombo pulka. Nalo Awilimuni kolte manda molkolio puwi nimo lemo altopo ombolio eno kinye wali tule mele mololipo pumbo.

<sup>8-9</sup> Efesus kombu taunona imbo awinini nanga aposel kongonomu pipi tingei teremele nalo imbo pulumu tukundo liwi nimbe Goteni tope tirimuna Efesus molopolio Pentikos Wai Awili wendo ombalo wali tiye kolopo kombu tengat pumbo.

<sup>10</sup> Timoti enonga kombuna omo lemo na Awilimunga kongono tendero mele yuni kongono kanomu telipe purumo akumunga teko pipili naa kondoko yu konopu ame topa molopili ningko nokoko kondaio.

<sup>11</sup> Awilimunga kongono teremomunga iye nerungere moromo konopu naa lekolio, yu umbulu naa tieio. Na morona yando ombai tembalio wali konopu penga lipili ningko tapu teko tiko mundeio. Kristen iye angenupili mare onge wali yu kopu tepa ombalo lepamo konopu lteo.

<sup>12</sup> Apolos tepili ulumu i tepo nio. Eno momromelena Gotenga kongono tenderemele Kristen iye angenupilini kano pupundala teremele wali yu iyema kinye puwi ungu enge nimbo niu. Yu kinye naa pumboi konopu lepalie nimu nalo walite manda ombo kanowi wai lembalona eno ombo kanombalo.

*Poloni ungu mare nimbe pora tirimu*

<sup>13</sup> Imbomareni ungu kondi tongei teremele eno kane kane molaio. Jisas ipuki tirimele akuna angileio. Konopu toimbo topili mini naa leaio. Keri keri uluma anjo anjo lteko enge ningko molaio.

<sup>14</sup> Gote kinye imboma kinye konopu mondokolio uluma pali teao.

*Poloni yunge kongono tendeku imbo-mando ungu mare nimu*

<sup>15-16</sup> Grik kombu mai tukundo momromele imbo palinga Stefanasinga lapumu kumbe leko konopu topele toko Jisas ipuki tiringimu liko manjirimele. Imbo kanomani Jisas ipuki tirimele imboma tapamili konopu leringi. Nanga Kristen imbo ango kame, eno lemope imbo akuma kinye Gotenga kongonomu lino kape teamili ningko kongono tukuruku teko enge ningko teremelema kinye wale pakoko maindo molaio.

<sup>17</sup> Eno imbo palini kinye na manda naa kanoko molangei nalo Stefanus kinye Fortunatus kinye Akaikus pokoni na morona ongo kanoringi wali nanga iye pokonoremele nimbo tono koloru.

<sup>18</sup> Kano iye pokonoremele nimbo tono koloru. Na kape konopu kolona ombo molorumuna moro. Iye i teko

moromelema ninge unguma pilko wale pakaio.

<sup>19</sup> Esia kombu maina moromele imbomani eno molko kondaio ungu ningo mundurumele. Akwila Prisila talo kinye elonga ulkena tukundo Gotenga imbina nombeya teremele imboma kinye enondo lino manga tendekuma konopu lekolio tono kolko eno molko kondaio ungu ningo mundurumele.

<sup>20</sup> I kombu taunona moromolo Kristen imbo angenupili palini eno molko kondaio ningo ungu ningo mundurumele. Enonga Kristen imboma kanoko ltendekolio wali nanga imboma ningo kangulko ki liko panjiko lieio.

<sup>21</sup> Na Pol, nanga kimuni eno molko kondaio ungumu enondo topo tiro.

<sup>22</sup> Imboreni Awilimu konopu naa mondopa umbulu timo lemo Goteni aku imbomu tepe topili nio. Linonga Iye Awilimu, nu welea wani!

<sup>23</sup> Awili Jisasini eno kondo kolopa tapopili nimborio konge tero.

<sup>24</sup> Jisas kimbo mundupolio eno nanga imboma pali konopumu noiro. I nimbo pora tiro.

**Poloni Korin Imboma Pipia  
Talo Tipe Topa Tirimu  
Ungumu  
2 Korin  
I Ungu Torumumunga  
Ungu Pulu Mare**

Imbo maren i kolo tokon mane tikelio Pol imbomanga kou wapu ltimu, iye aposel paimbore molo lepamo ningo, Korin kombuna wendo oringi. Eno maindo mundumbe i pipia talo tipemu topa panjipielie Poloni yunge kongonomundo kape yunge konopu mandopa itemumundo kape i unguma nimbe mundurumu.

Goteni nunge konopu ltenomu yunge kongono iyemunga konopu lerimu mele manda lepili nipili!

**Jisasini Nanga Kongonomu  
Tendepaio Nimbe Lipe  
Mundurumu Iyemando  
Goteni Kongono Tirimu Mele  
Poloni Nimbe Tirimu Unguma**

*Poloni pipia tombaindo pulu polopa torumu unguma*

<sup>1</sup> Na Pol, Goteni na kanopa ltimuna Kraist Jisasini yunge kongonomu tendepuwi nimbe lipe mundurumu iyemu, na kinye linonga Kraistinga ungumu pileli angenu Timoti peya molopolio Gotenga imbo talape kombu awili Korin moromelema kinye, Gotenga imbo kake telima kombu Akaia provins tukundo kombumanga pali moromele imboma palindo i pipiamu eno topo tiro.

<sup>2</sup> Linonga Lapa Gote kinye Awili Jisas Kraist taloni eno kinye konopu noiko, eno konopu u nipili tako liko molaio nengili.

*Poloni Gote kinye paa tereno nimu ungumu*

<sup>3</sup> Linonga Awili Jisas Kraistinga Lapa, yu Gote moromo,aku iyemu yu kinye kondokololi ulu pulumu pepa wendo oromo, yu lino kinye umbunima wendo oromo wali konopu enge nimbe u nipili molangei nimbe lipe tapondoromo Gotela, yu kapi nimbo imbi nimbo pala mundemili.

<sup>4</sup> Yu, lino kinye umbunima wendo oromo wali eno konopu enge nimbe u nipili molangei nimo Gote. Oi lino kinye umbunima wendo oromo wali Goteni lino konopu enge nimbe u nipili molangei nimbe lipe tapondoromo aku tepe mele imbo mare umbunima wendo ombalo wali aku teko konopu enge nimbe u nipili molangei ningi manda liko

tapondangei nimbe yuni lino oiaku tepe lipo tapondorumu.

<sup>5</sup> Linoni imboma manda lipo tapondopo konopu enge nimbe u nipili molangei nimolomunga pulumu i tepe. Kraist oi mindili norumu mele, kinye lino yandopa mindili nombo moromolo, aku tepe la Goteni Kraist lipe tapondopa konopu enge nimbe u nipili molopili nimumunga lino konopu enge nimbe u nipili molangei nimbe lipo tapondoromo kala.

<sup>6</sup> Lino mindili nombo umbunima meremolo wali eno konopu enge nimbe u nipili molko, mindili nolemala aulkena wendo ongo, molko kondonge aulkena punge aku lipo tapondoli ulumu eno kinye pepili nimbo aku tepe mindili nombo umbunima meremolo. Goteni lino konopu enge nimbe u nipili molangei nimomunga lino kelepo enge nimbo moromolo wali aku ulumuni linoni eno konopu u nimbe enge nipili molangei nimbo manda lipo tapondoromo kano kinye lino umbuni tirimelena mepo moromolo mele eno aku teko mindili noromele wali eno kape konopu toimbo topili enge nipili tako liko molongela.

<sup>7</sup> Eno lino kinye tapu topo molopo, mindili peya noromolo mele eno lino kinye tapu topo molopo peya konopu enge nimbe u nipili moromolo kala nimbo pilipolio aku tekolio eno umbuni te tembalo wali ungu tukumemu tiye naa kolko enge ningolongela konopu lepo moromolo.

<sup>8</sup> Ango kame, ya kombu Esia provins lino kinye umbunima paa wendo orumuma eno wamongo pilengei nimbo tiemboi. Ulu umbuni orumuma paa awili lerimu wali lino paa kolomolo konopu lierimulu.

<sup>9</sup> Aku umbuni wendo orumu wali lino kolomolo waimu wendo oromo konopu lierimulu. Imbomanga engemuni lino Gotenga kongono manda naa tendemolo. Nalo Gote imbo kololima makilko koinjo molangei nimo iyemu, yunge engemunga kau i kongono manda temolo nemili akumunga i umbunima wendo orumu.

<sup>10-11</sup> Aku ulu wendo orumumuni lino topa kondombai terimuna Goteni lino tepe koinjo ltimu. Umbuni mare wendo ombalo wali altopala lino tepe koinjo kau limbelo konopu itemolo. Enoni kape aku teko ningolio lino liko tapoko Gotendo konge tenderingi. Linonga ningi konge tenderingima pilipelie Goteni lino lipe tapombalo ulu kanokolio imbo awinini Gotendo paa tereno ninge.

*Pol konopu alowa tepe Korin naa purumumunga kolo naa toru nimu ungumu*

<sup>12</sup> Na andopo tero mele konopuni pilipolio ulu teruma pali tepe kondoru. Na eno

kinye moloru wali Goteni kanopa kake teli uluma nimbe pimoma kau konopuna panjipo, na konopu talo naa pepili eno kinye tumbi tipo molopo ulu mare teru mele pilipolio molopo kondoru nimbo lipo manjipo tono kolto. Walite tepo naa kenjiru nimbo pio mele eno manda nimbo tirumanga tono kolopo i paa nio. Aku uluma konopuni pilipolio teru kinye mai kombuna aku tepe lipe manjili teni na naa taporumu. Goteni na kinye konopu noipelie taporumumunga naaku tepo andopo moloru.

<sup>13-14</sup> Eno manda kanoko ungu pulumu tumbi tiko pilinge unguma pipia topo tiro. Paimbo oi andopo kongono teru mele eno tumbi tiko naa liko manjirimelalalo linonga Awili Jisas ombalo waimu wendo ombalo kinye eno Kraustinga imboma molongena kanopolio tono kolomolo mele enoni lino Kraustinga imboma aka tekomo molo kanopolio tono kolko kau molangeila konopu itemolo.

<sup>15</sup> Eno aka teko molonge konopu lepolio eno tepo tono kondopo wali talo tipo kanomboi nimbo nani eno moromelema eno ombo niu kanomu.

<sup>16</sup> Na konopu leru mele i tepe. Kombu Masedonia provins pumboindo oi eno molongena ombolio, Masedonia pumbo. Altopola Masedonia tiye kolopo eno molongena kelepo yando ombo kinye enoni na kombu Judia distrik puwi ningolikotapangei ombo konopu leru.

<sup>17-18</sup> Aku tembo niu mele konopuni naa pilipolio we niuya? Na i tembo, i tembo nimbo, nimbo panjiro mele maina imbonani konopu talo pepili ulu te naa tenegeindo kolo toko temolo nimele mele naaku tepo naa nio. Ulu te temboindo paimbo tembo nio. Naa temboindo paimbo naa tembo nio. Goteni konopu alowa malowa naa tepe paimbo nimo mele nani i paa paimbo nio. Nani ungu te ee nimbo molo nimbo naa panjiro kano.

<sup>19</sup> Na kame Sails kame Timoti kame linoni eno mororingina ombo Gotenga Malo Jisas Kraustinga ungumu nimbo tirimulu, aka iyemuni konopu alowa malowa naa tepe, yu Gotenga iye toya tolimu. Tembo nimo ungumu paa tembalo.

<sup>20</sup> Goteni tembo nimbe mi lepa nimbe panjirimu kano uluma paimbo tepe moro tondombalo iyemu Kraist yu. Aku tepe moromomunga Gotenga ungumu paimbo tembalo nimbolio Gotenga imbi nimbo pala mundurumolo.

<sup>21</sup> Lino kape eno kape Goteni enge tirimona Kraist kinye enge nimbo tapu topo moromolo. Lino yunge kongono tendangei nimbe Goteni lino kanopa lipe,

<sup>22</sup> lino yunge imboma moromolo nimbo pilemili nimbe linonga konopuna tukundo

Gote yuni nanga nimbe imbi topa, linoni pilipolio lino paimbo yunge imboma nimbe kanopa ltimu. Pele, paimbo yunge melema pali lino timbelo nimbo pilemili nimbe i teli oi yunge Mini Kake Telimu linonga konopuna molopili nimbe tirimu.

*Korin imboma mororingina Pol welea naa purumu ungu pulumu*

<sup>23-24</sup> Nani eno umbuni te naa timboindo kombu awili Korin kelepo welea naa oru. Goteni na karomo paimbo nio. Enoni Kraustinga ungumu paimbo ningolengo pimelemunga eno enge ningolengo pilko molangei nimbo na enonga iye awilimulo molopo, eno nokambo nimbolio manda naa nimbo. Eno enge ningolengo pimele ulu akumuni eno enge ningolengo moromelemunga eno tono kolangei nimbo eno peya tapu topo kongono teremolo.

## 2

<sup>1</sup> Akumunga na eno molongena altropolapola ombo wali umbuni timbo konopu lepolio naa oru.

<sup>2</sup> Nani eno umbuni tilkanje we imbo narini na teko tono kondolemalaya? Aku we imbo te molo, enoni kau na teko tono kondonge.

<sup>3</sup> Aku tepo lipo manjipolio eno oi konopu topele toko molangei, pele na ombo kinye lino tono kolopo kopu tepe molamili nimbo nani umbuni timboma oi pilengei nimbo pipia te oi topo tiru. Enoni ungu pilko ulu tumbi nilimu tengenye wali na teko tono kondangei konopu lepolio lino waye tono kolomolo.

<sup>4</sup> Paimbo nani eno pipia te topo tiru wali eno oi teko moloringi mele pilipolio pipia tomboindo na kamelenapaa mindili tepe konopu umbuni tepili kola tepe molopolio pipiamu topo eno tiru. Eno tepe umbuni tiemboli nimbo naa tiru. Nalo eno konopu paa lakopa mondoro ulumu ningolengo pilengei nimbo topo tiru.

*Imbo teni eno tepe kenjimbelo wali yu tepili ningolengo tiye kolangei nimbo ungumu*

<sup>5</sup> Nalo Korin iye teni tepe kenjirimu kano iyemuni umbuni te tirimu na kau naa tirimu. Enondo kape tirimu, nalo eno paa tepe torumu konopu naa leao nio.

<sup>6</sup> Imbo awinini kano iyemu ulu pulu keri terimumunga ningolengo tumbi tiko mindili tiringi kanomu, aka manda.

<sup>7</sup> Kinye aka ulu keleao! Yu mindili tiringi kanomu umbuni paa awili teni yu paa tepe mainye mundumbelo ningolengo kinye, undupe kanopili ningolengo mindili tiringi ulu tiye kolko yuni ulu pulu keri terimumu yu tepili ningolengo tiye kolko yu kondo kolko, konopu ame topili ulu mare teaio.

<sup>8</sup> Akumunga yu paimbo konopu mondoromele Itemo nimbe kanopili ulu mare teao nimbo enge nimbo konge tero.

<sup>9</sup> Oi nani eno pipia topo tirumunga pulumu i tepa. Nani eno manda manjipo, teao nio ungu enoni pilkolio waliwalima pilko liko teremele molo naa teremelenje, pilembo nimbo kano pipiamu topo tiru.

<sup>10-11</sup> Sataneni lino Kraistingu imboma moromolomunga kondi topa ulu teremoma pali lipo manjirimolo. Kuromanga nomi Satanenga engemuni lino topa mainye naa mundupilimunga linoni teko kenjirimile imbomanga ulu kerima tiye kolamili. Aku tepolio kano iyemuni tepa kenjirimu ulumu enoni tiye koromele mele nani kape aku ulu tero. Ulu te paimbo tepa kenjirimu lemo eno kondo kolopo lipo tapondopo Kraist kanopili oi tiye koloru.

*Pol Troas taunondo pumbelie Taitus naa kanorumumunga konopu wango naa nimu*

<sup>12</sup> Oi Kraistingu ungu tukume nimbo timboindo Troas taunondo puru wali Awilimuni na akuna kongono manda tembo aulkemu lipe tumbi tindirimu mele mona lierimuna kanoru.

<sup>13</sup> Nalo nanga kongono tendeku angenu Taitus akuna naa ombo molorumu koroipo kelepolio nanga konopumu wango naa nimu wali Troas imbomando molaio nimbo tiye kolopo Masedonia provins puru.

*Kraistingu kongono tenderingi iyema yunge engemuni enge ningi moloringi ungumu*

<sup>14</sup> Paimbo, konopu wango naa nimu nalo Goteni opa pule iye topa mainye mundupelie uwi nimbe lino Kraistingu imboma kumbe lepa alumé nimbe yu pumbelie lino Kraist molopa teremo uluma pali temane topo tilipo andamili nimu. Akumunga yundo paa tereno nimolo. Yunge ungu nimbo tilipo andoromolo,aku ungumunga mune tolimu kumbumanga pali pilko manda tenderemele.

<sup>15</sup> Kraistingu mune pengamu toromona Goteni lino aku tepa mele mune pengamu toromona pimo. Aku mune penga toromomu imboma pali, mindili nolemala aulkena wendo ongo molko kondonge aulkena purumele imbomanga kape mindili nongo molko kenjinge aulkena purumele imbomanga kape, imunana mune toromo.

<sup>16</sup> Nalo aku munemuni ungu talo nimo. Mindili nonge aulkena purumele imbomani Kraistingu temane pengamunga munemu pimele kinye lkupindi toromo. Kano munemu eno mini pali kolonge ulu pulumu peremomunga aku tepa lkupindi toromo. Molko kondonge aulkena purumele imbomani ungu tukumemungga

munemu pilkolio, eno koinjo molko kondoko kau punge ulu pulumu peremo mune tingo telimu pimele. Akumunga Kraistingu ungu tukumemu nimbe timbelo kongonomu narini manda tembaloya?

<sup>17</sup> Iye awinini Gotenga ungumu wamongo ningi naa tiko kolo toko bisnis mele teko kou mone awini limele mele lino aku ulu naa teremolo. Goteni lino i kongonomu tirimomunga Kraist kinye peya tendeku tipo molopo linonga konopu tumbi nimbe pepili Goteni kanopa molopili yunge unguma imboma nimbo tirimolu.

### 3

*Goteni ungu koinjo mi lepa nimbe panjirimu ungumunga kongono tendeli imbomanga ungumu*

<sup>1</sup> Nalo aku tepo tero nio akumu nani alto pu pulu polopo nanu kapi nimbo nanga imbibmu nanu lipo ola mundumboi teroya? Molo imbo maren teremele mele pilipolio temboindo na tepo moro mele eno pilengei nimbo imbo teni pipia tondopili nimbo mepo ombo eno lipo ondomboya? Molo linoni pipia aku teli te enoni lino tapopili ningi lino pipia mepo pumbo imboma lipo ondomolomu manda toko tinge nimoloya? Aku molo.

<sup>2</sup> Lino moromolo mele imboma lipe ondoromo pipia akumu eno Kraistingu Korin kombu moromele imboma pipia aku teko moromele konopu Itemolo. Lino moromolo mele kanamili ningolio imbomani eno Korin imboma teremele ulu kanoko kambu toromele.

<sup>3</sup> Eno Kraistini pipia topa mundurumu moromele mele we imbomani karomele. Linoni kongono teremolo akumuni Kraistini kano pipiamu torumu. Nalo pipia kanona peneni ungu te naa torumu. Koinjo moromo Gotenga Mini Kake Telimuni kano pipiamu torumu. Goteni yunge kini kou elke tolina imbi topa Moses trimu mele tenga pipia naa torumu nalo eno imbomanga konopuna torumu.

<sup>4</sup> Kraistini nanga konopuna kongono terenomuni imboma lipe tapondoli enge tirimo ungu nimbe tirimona pilipolio Goteni na paimbo yunge kongono tendani nimbe kanopa ltimumu konopu lteo.

<sup>5</sup> I kongono teromu nanga engemuni manda tero paa manda naa nimbo. Na enge te naa peremo. Gote yuni na enge tirimona nani i kongonomu manda tero.

<sup>6</sup> Goteni nimbe panjipe mi lerimu ungu koinjomunga kongono iyemu molani nimbe yuni enge tirimona moro. Aku ungu koinjo nimbe panjipe mi lerimumu oi Moses molopili Goteni Israel imboma ungu mane tipe kou karu lelina ola imbia

topa teao nimbe tirimu mele, molo. Ungu koinjo nimbe panjipe mi lerimu akumu Gotenga Mini Kake Telimuni ombo tepili nimu. Goteni oi Mosesindo imboma ungu mane tiwi nimbe yu nimbe tirimu ungu kanomani imbo mini pali kolonge ulu pulumu tirimo, nalo Gotenga Mini Kake Telimuni lino koinjo molopo kondopo kau pumolo ulu pulumu tirimo.

*Goteni altopa nimbe panjipe mi lerimu ungu koinjomunga engemunga ungumu*

<sup>7</sup> Goteni kou elke tolina ungu mane topa Moses tirimu ungu mane akumani imbo molko kenjiko kau punge aulkemu akiririmu ungu manema wendo orumu kinye Gotenga enge pa telimu kinye wendo orumu. Aku pa enge nilimu Mosesinga kumbekeremu aku torumu kinye, ena karomele kinye mongoma yumi yami teremo mele Israel imbomani unye kumbekeremu kanoringi kinye aku ulu terimu. Nalo altopa wali mare ombo purumu kinye Mosesinga kumbekerena pa terimumu kelerimu. Kololi ulu pulumu perimu ungu manema aku tepa pa enge nilimu kinye wendo orumu itemo

<sup>8</sup> kinye, imbo koinjo molko kondoko kau puli ulu pulumu peremo Gotenga Mini Kake Telimuni tirimo ungumu kinye wendo oromo pa enge nilimu paa olandopa enge pembalo.

<sup>9</sup> Imboma tekno kenjirimelemunga mindili nangei nimbe kongono teremo ungumu enge te peya wendo orumu lemo kinye, imboma lipe tapondopa ulu pulu kerima tiye kolopa eno tumbi tindirimo kongono teremo ungumunga enge te peya wendo oromomu paa olandopa pembalo.

<sup>10</sup> Kinye wendo oromo akumu paa lakopa pa enge nili olandopamu peremo. Oi wendo orumu enge pa teli akumu paa mainyendopa.

<sup>11</sup> Oi lepa naa pumbelomu wendo orumu wali enge pa telimu kinye orumu lemo, kinye lepa kau pumbelo ungumunga enge pa telimu paa olandopa itemo.

*Goteni altopa nimbe panjipe mi lerimu ungu koinjomunga kongono tendeli iyemani pipili naa kolko kongono teremele mele ungumu*

<sup>12</sup> Kinye, Goteni ungu nimbe panjipe mi itemo kongonomuni imboma paimbo tapopa kondoromo, aku ungu koinjomu paimbo lepa kau pumbelo, lipo manjipolio, imboma pali pilengei nimbo konopu toimbo topili mona nimbo tilipo andoromolo.

<sup>13</sup> Oi Mosesini yunge kumbekerena pa teremomu kumbulupe kiminyeki nimbei teremo ulu Israel imbomani naa kanangei

nimbe maminye te lipe yunge kumbekeremu pipi tirimu. Lino Mosesini terimu mele aku tepo naa teremolo.

<sup>14</sup> Nalo Mosesini yunge kumbekeremu maminye mele teni pipi tirimu,aku tepa mele Mosesini topa panjirimu unguma kambu toromele wali Israel imbomanga konopumu mele teni pange tendeli peremo. Kinye kape aku ulu we teremo. Kraist ipuki tilimalanje aku ulumu wendo ombo pulka. Ipuki naa tirimelemunga we pange teli peremo.

<sup>15</sup> Paimbo kinye walimunga kape Mosesini torumu bukuna moromo unguma kambu toromelena pimele kinye maminye aku tepamuni enonga konopuma we pipi tirimo.

<sup>16</sup> Nalo imbo te konopu topele topa Awilimu ipuki tirimo kinye Awilimuni maminye mele imbonungu konopumu pipi tirimomu wendo lipe ltenderemo.

<sup>17</sup> Awili Jisas kinye Mini Kake Telimu konopu tendekumu itemo. Mini Kake Telimuni kongono tepa moromona ulu teni pipi manda naa tirimo.

<sup>18</sup> Akumunga lino Kraistainga imboma pali maminye mele teni aku topa pipi naa tirimomunga, Awilimunga imbumu enge peremo pamu ombo angilipe kariapa melela mini mana teremomu kanopolio wali Awilimbu kinye Mini Kake Telimu konopu tendeku itemomuni lino tepa aku enge pa telimu lino kinye pepa olandopa olandopa enge pumbe telipe pupili nimbe yu mele apuwe teamili nimbe yu tepa moromo mele olando olando manda leko pangei nimbe teremo.

## 4

*Jisasini lipe mundurumuna yunge kongo tenderemele iyema mingima maini teli mele moromelena tukundo mele walkumo peremo ungumu*

<sup>1</sup> Goteni ungu koinjo nimbe panjirimunu olandopa, akumunga enge pa telimu olandopa. Imboma aku tepa lipe tapondoromo akumunga Goteni lino kondo kolopalie tepo kondamili nimbe i ungu tukumemu andopo imbonando nimbo tirimolo kongonomu tirimumunga pilipolio umbunima wendo oromo kinye kongono tiye kolamili konopu naa itemolo.

<sup>2</sup> Lopeke tekno teli uluma kinye, pilili teli uluma kinye, oi lipo umbulu tirimulu. Kolo naa topo, Gotenga ungumu nimbo alowa naa tenderemolo. Goteni kanopa molopili imbomani pali enonga konopuni pilkolio lino Gotenga kongonomu tenderemolona kanokolio tumbi tiko teremele ningopilengei nimbo linoni ungu tukumemu mona nimbo para tirimolo.

<sup>3</sup> Nalo ungu tukume nimbo tiro wali paimbo melteni pipi timona naa pilinge lemo aku pipi tili ulumu kombu kerina purumele imboma kinye wendo oromo.

<sup>4</sup> Iye Kraist yu paa Gote none telimu moromo. Kraistainga imbi moromona au nimbe enge pa telimuma ungu tukumemu-nga pamu naa kanangei nimbe ya mai kombumu nokoromo gote kolo toli kuro Satan yuni Kraist paimbo ninga naa pimele imbo-manga konopuni liko manjingei aulkemu pipi tindirimo.

<sup>5</sup> Ungu tukumemu toyota topo nio ungu nindu kano mele, nanu palo topo na iye pengamu moro nimbo naa nimbo tiro. Nani nimboindo, Jisas, Goteni lino nokopa kondombalo iye te lipo mundumbo nimbe kanopa ltimu iye nomi Kraist, yu Awilimu. Jisasini nando tewi nimu mele tepo, na eno Kraistainga Korin imbomanga kende-mandemu moro nio kano,aku tepo ungu tukumemu mona nimbo para tiro.

<sup>6</sup> Akumunga pulumu i tepe. Kombu tum-bulu tolina pa tepili nimu kinye mai kom-buna pa terimu kano Gote yuni linonga konopuna tukundo pa tenderimu. Linoni Gotenga enge pa telimuni Kraistainga kum-bekerena pa teremo kanopo lipo manjemili nimbe aku ulu terimu.

<sup>7</sup> Nalo maini teremele mingi akumanga tuku imbomani enonga mele penga kou olandopa pulima lopeke teko noirimelie aku tepe mele Goteni tirimo ulu niomu lino kinye peremo. Aku teremomunga imbomani kanokolio i enge paa penga olandopa lino kinye peremomu linonga enge te molo. Gote yunge engemu kau peremo ninga pilinge.

<sup>8</sup> Waliwali, kombumanga pali, lino kinye umbunima wendo oromo nalo akumuni lino kamukumu topa mainye naa mundurumo. Wali marenga lino temolo mele konopuni pilipo tunduromolo nalo linonga konopumu kamukumu keri lepa tepe embambo naa tirimo.

<sup>9</sup> Linonga opa pulemani lino teko ken-jingei teremele nalo Goteni lino tiye naa koromo. Imbomani lino toromele nalo lino kamukumu toko naa kondoromele.

<sup>10</sup> Jisas toringi kolorumu mele waliwali lino mindili nongo kolangei ninga lino teko kenjiko linonga kangimu toromele nalo naa kolopo we koinjo moromolo kano ulumuni Jisas we koinjo moromo lipe ondoromo.

<sup>11</sup> Aku nio ungumu i tepe. Lino koinjo moromolo iyemani Jisasinga kongonomu ten-deromolomunga imbomani lino tokon-dongei teremele kinye linonga kangindo kololi ulu pulumu peremomunga kolemala nalo naa kolopo we koinjo moromolo aku-munga linonga kangimuni Jisas koinjo moromo mele pilengei mona liepili nimbe lipo

ondoromo.

<sup>12</sup> Kololi ulumuni lino aku tepe topa kon-dombai teremo nalo koinjo molopa kau puli ulu pulumu eno kinye peremo.

<sup>13-14</sup> Gotenga bukuna moromo mele i tepe,

Gote ipuki tiromunga nimbo para tiro, (*Sng 116:10*)

nimbe peremo. Awili Jisas kolorumu kinye topa makinjindirim iye akumuni lino kape eno kape Jisas kinye peya topa mak-injipe yu moromona lipe mepa pumbelo nimbo aku ungumu lipo manjipolio lino kape oi iyemuni ipuki tirimu mele aku tepe ipuki tirimolomunga nimbo para tirimolo.

<sup>15</sup> Na kinye aku tepe umbunima wendo oromo akumu eno Kraistainga imboma lipe tapondombaindo wendo oromo. Goteni we kondo kololi ulumuni anjo anjo pumbe imbo awini liper tapondoromomunga imbo awini olandopa olandopa Gote kinye Paa tereno ninga yu kapi ninga imbi liko ola mundundengei nimbe aku ulu umbunima na kinye wendo oromo.

*Jisasini lipe mundurumuna yunge kon-gono tenderemele iyema tiye naa kolko kon-gono enge ninga teremelemunga ungu pu-lumu*

<sup>16</sup> Aku tero ulumuni eno aku tepe lipe tapondoromo, na kinye eno kinye lino aku tepe ulu pengama wendo ombalo mele pilipolio umbunima na kinye wendo oromo wali apa, tiye teremo, kongonomu ke-leambo nimbo konopuna umbuni pepili naa moro. Paimbo nanga kangimu koromo nalo takiraki Goteni mini konopu talo koinjo kau ltenderemo.

<sup>17</sup> I ulu lipo manjirimolo. Na kinye umbuni wendo oromoma ulu awili te molo; wali alaye kolo wendo oromo. Kano ulu umbunimani Gote enge pa telimu kinye moromona pumbo yu kinye peya aku kombu paa pengana molombolo aulkemu akirindirim pilipolio i ulumu paa mele enge awilimu; umbuni wendo oromoma ulu tukumere molo lepamo nimbo pio.

<sup>18</sup> Akumunga, na mongoni karo melema wambo kanambo naa nio; naa karo mele kanoma paa kanamboa nimbo moro. Mongoni karo melema pora nimbelo. Naa karo melema waliwalima lepa kau pum-belo nimbo pilipolio nio.

## 5

*Mulu kombuna angimo ukemanga molomolomunga ungu manda lelimu.*

<sup>1</sup> Aku tepo lipo manjipo moromolo mele niomunga ungu pulu te i tepala. Lino piltimolo, linonga ya maina kangimu, ulke takaina mele moromolo. Akumu purumbelona tekiringe wali Goteni ulke

koinjo te lino molamili nimbe tepa wamopa noindirimomu lino timbelo, aku ulkemu maina imbomani takoromele aku teli ulke te molo. Akumu mulu kombuna waliwalima angilipe kau pumbelo ulkemu.

<sup>2</sup> Pele aku tepa ulkena tukundo molomolo nalo i teli oi ya mai kombuna i ulkena molopolio, lino tukundo molomolo ulke koinjomu Goteni linonga wale pakoli mele paa pakondopili nimbo umbuni kolopo konopuna kola tepo moromolo.

<sup>3</sup> Akumu wali pakoli mele pakondombo wali we naa molomolo nimbo pilipolio, kinye aku tepo moromolo.

<sup>4</sup> Lino i ulke takaina molopolio wale pakoli te naa pakopo we moromolo nimbo pilipo mulu kombuna ulke timbelo akumu wale pakoli meleme pakomoloa nimbo umbuni kolopo konopuna kola tepo moromolo. Kinye pakopo moromolo kangimu kulupo topo lteamili nimbo aku tepo naa nimolo. I kangi kolombalo akumu kikulu topa koinjo molopa kau pumbelo. Oi kangimu taka tombalo nimbo linonga mulu kombuna angimo kangimu pakamili nimbo moromolo.

<sup>5</sup> Gote yunu lino koinjo molopa kau puli kangima angilipili nimbe lino i teli oi lipe tumbi tindipelie, altoko eno molonge nio mele paa aku teko molonge ipuki tiengei nimbe i teli oi yunge Mini Kake Telimu lino tirimu.

<sup>6-7</sup> Aku ulu terimumunga Goteni nimu mele paimbo wendo ombalo nimbo pilipolio na kinye umbunima wendo oromo kinye tiye naa kolopo waliwalima konopu toimbo topili moro. Na ya maina kangimunga tukundo moro wali Awilimu kinye Yunge kombuna peya naa morombolo nimbo pio. Lino moromolo ulumu kanopoliorena molo, nalo konopuna lipo manjipolio ipuki tipo moromolo.

<sup>8</sup> Nalo nani oi nio mele altopo niola. Konopu toimbo topili molopolio na maina kangimu i teli oi tiye kolopo Awilimunga nokoromo kombuna pumbo yu kinye peya molembalanje paa konopu lepo moro.

<sup>9-10</sup> Konopu aku tepo lepolio Kraistini lino kot tendepa pilimbelo kinye lino pali yunge kumbekerena pumbo angilimolo. Aku wali oi ya mai kombuna kangimu kinye molopolio lino tepo kondorumulu molo tepo kenjirimulu mele pilipe apurupelie te te nimbe pundu tombalo. Akumunga, mai kombuna kangimu kinye molondu lemo kape, molo kolondu lemo kape Awilimuni kanopu penga pimo uluma paa teambo nimbo konopu kimbo tipo moro.

*Lino Gote kinye altopo tendeku tipo molomolomunga ungumua*

<sup>11</sup> Kotena angimolo nimbo pilipo Awilimu kinye pipili kolopo lipo manjirimolo akumunga imbomani Yu ipuki tieio nimbo paa enge nimbo nimbo tiro. Na konopuni pilipo uluma tepo moro mele Goteni tumbi tipe karomo. Eno kape nani tero mele enoni kanoko konopuni pilkolio aku unguwu paimbo ningi pilenge lemo paa nimbo pilto.

<sup>12</sup> I ungu nio akumuni enoni na iye pengamu konopu leangei nimbo nanga imbi olandopa molopili nimbo aku tepo naa nio, molo. Enoni na tero mele kanoko penga pilko, Poloni teremo mele iye mareni kanoko tunduko yunge ungu umbulkondo kolo tokon nindirimele mele imbomani naa pilko, yu paimbo moromo mele pilinge kinye penga ningi manda anjo anjo konopu tiko ningi tinge aulkemu lipo ondambo nimbo nio. Imbo mareni imbo tengen konopuna peremo ulumu naa kanoko, mongoni kangi tawendo kau kanoko penga pilko yu kapi ningi yunge imbi liko ola munduko ungu nimele mele na aku teko kanokolio kolo tokon nimele iyemando manda pundi tokon ungu paimbo mare manda ningi tiengei nimbo i unguma nio.

<sup>13</sup> Iye mareni nando iye keke lepo tolimu morono ninge lemo aku manda. Gotenga kongono tendemboindo aku tepo keke lepo topo moro. Molo na konopu tumbi tipe pepili kongono tepo molondu lemo eno lipo tapondomboindo aku tepo moro.

<sup>14</sup> Iye tendekumu linonga nimbe kolo wangopa imbonanga pali kolondorumuna lino yu ombele mepo lino pali yu kinye kolorumulu. Kraistini imboma aku tepa konopu mondoromo ulu lipo manjipolio yunge kongonomu paa tendambo konopu lteo.

<sup>15</sup> Lino Kraistinga koinjo moromolo imboma linonga temolo uluma kele topo naa molamili. Linonga nimbe kolondopa makilipe ola molorumu iyemu kau lipo manjipolio molo yu kanopu penga pilimbelo uluma kau tepo molamili nimbe yuni imbomanga nindipe aku ulu tenderimu.

<sup>16</sup> Aku tepo pilipolio na oi Kraistinga unguma naa pilipo konopu topele naa topo lipo maina konopuni pilipo imboma apururu nalo kinye, aku tepo imboma naa apururo. Oi konopumu perimu kinye paimbo oi Kraist kape aku tepo apurupo, yu molorumu mele pilipo tunduru, nalo kinye yuaku tepo pilipo naa apururo.

<sup>17</sup> Konopu koinjo wendo orumumunga, i ulu ltemo lipo manjirimolo. Imbo te Kraist kinye tapu topa moromo kinye Goteni kano imbonu yu imbo koinjomu molopili nimo, yu paimbo imbo koinjomu moromo. Oi tepa kenjipe molorumu uluma kamukumu mainye purumu. Kinye ulu koinjoma yu kinye wendo oromo.

<sup>18</sup> I ulu koinjoma pali Goteni kau teremo. Lino oi yu kinye opa pule molorumulu mele kinye aku teko naa molangei. Lino yu kinye tendeku tipo molamili nimbe Kraistini terimu ulu akumuni lino yu kinye tendeku tipo moromolo. Aku tepalie imboma yu kinye opa pule moromele mele tiye kolko na kinye kopu tepo molamili nimbe Goteni aku kongonomu lino tirimu.

<sup>19</sup> Aku kongonomu i tepa: Kraistini linonga nimbe tenderimumunga Goteni lino maina imboma kinye yu kinye opa pule naa molopo kopu tepo molomolo aulkemu lipe tumbi tindirimu. Aku tenderimumunga Goteni imbomanga ulu pulu kerima tiye kolopa, aku teko kenjiringimunga kot naa tendembo nimu. Imboma kinye na kinye tendeku tipo molamili nimbe Goteni kano ungumu imbandomo ningi tiengi nimu.

<sup>20</sup> Lino imbi topaaku tepa kongonomu tirimumunga Kraistinga konopu tukundo molopo Gote yuni imboma i teko teangei nimbeindo linoni yunge nimu ungumu andopo nindemili nimu. Akumunga Kraistini lino kanopa Itimuna yu kolo wangopo eno paa enge nimbo konge tepolio Gote kinye opa pule toromele mele tiye kolko yu kinye kopu teko molangei nimolo.

<sup>21</sup> Ulu pulu keri te naa terimu iyemu Goteni kano iyemuni linonga ulu pulu kerima lipe tapondopa mepili nimbe yu tirimu. Aku terimu wali yu paimbo ulu pulu keri teli iye te none terimu. Goteni aku terimumunga lino Kraist kinye peya tapu topo molopolio Goteni lino kanopalie imbo tumbi nilima nimbe karomo.

## 6

<sup>1</sup> Na Gote kinye kongono tapu topo topo molopolio ya nindu ungu kanomunga ungu te peya eno enge nimbo nimboi tero. Eno Goteni we kondo kolopalie eno lipe tapondopa tepa kondoramu ulu kanomu we naa terimu, terimu ulumu we mainye naa pupili neio nio.

<sup>2</sup> Aku niomunga ungu te Goteni nimbeindo,

Nani we kondo kolopo eno kinye konopu noiru walimu wendo orumu kinye enonga ungu ningima pilero.

Eno mindili nolemala aulkena wendo lipo na kinye peya molko kondonge aulkena lipo mondombu walimu wendo orumu kinye eno tepo ltiu, (*Ais 49:8*)

nimbe peremo. Nani eno paa nimbo tiru, pileio! Goteni nimu walimu akumu paa kinye. Kinye, Goteni imboma kinye konopu noipe we kondo kolombalo walimu. Kinye Goteni imboma lipe tapondopa, mindili nolemala aulkena wendo lipe yu kinye peya

molko kondonge aulkena lipe mondombalo walimu.

*Poloni Kraustinga kongono tenderimumunga mindili norumu mele ungumu*

<sup>3</sup> Linonga kongonomu mainye naa pupili, ungu taka naa tondangei nimbo imbomani lino kanoko keri pilko ungumu naa pilko lingi ulu te naa teremolo.

<sup>4</sup> Akumu molo. Imbomani lino kanokolio Gotenga kongono iyema moromolo ningi pilengei nimbo ulu ima teremolo. Aku ulu wendo oromoma i tepa. Umbunima lino kinye wendo oromo wali tiye teremo naa nimbo enge nimbo moromolo. Ulu umbuni lupe lupema lino kinye wendo omba, lino teko kenjirimele uluma wendo omba, lino mindili noli uluma wendo oromo.

<sup>5</sup> Wali marenga imbomani lino koipeni toko, wali marenga ka tiko, wali marenga imbomani pali lino kinye mumindili kolko ru ningi lkiko tukundo tukundo ongo maku toko lino teko mundu mongo tenderemelela. Lino kongono mindili nombo tepo, wali marenga uru naa pepo, wali marenga engele kolopo moromolola.

<sup>6</sup> Lino ulu kake telima tepo, lipe manjili pengamu ambolopo, olo ame topili molopo, imboma kondo kolopo tepo kondoromolo. Lino Mini Kake Telimu kinye tapu topo molopo, imboma konopu mondoromolo ulu akumu kolo naa topo paa konopu mondoromolo.

<sup>7</sup> Paimbo unguma nimbo, Gotenga engemuni kongono teremolo. Imboma opa tingeindo ele tolo melema ki ekondo ekondo ingi tiko amboromele mele lino aku tepo mele ulu tumbi nilima amboromolo.

<sup>8</sup> Imbo mareni linonga imbimu liko ola munduko, mareni linonga imbimu teko mainye munduko; mareni linonga ungu umbulkondo nindiko, mareni kapi nimele. Kongono paimboma tumbi tipo teremolo nalo linondo kongonomu kolo toko teremele nimele.

<sup>9</sup> Imbo mareni lino kanoko imbi tirimele nalo mareni peya molamili naa ningi, umbulu tirimele. Wali mare paa koltomolo konopu Itemolo nalo koinjo pumbo we moromolo. Lino teremolo mele kanoko keri pilkolio tiye kolko konopu topele taio ningi pulteni toromele nalo lino toko naa kondoromele.

<sup>10</sup> Lino takiraki konopu keri awini peremo nalo akumu yu tepili nimbo tono kolopo moromolo. Koropa purumo nalo imbo awini tepo kamakoma ltenderemolo. Lino melte naa noili none teremo, nalo mele pulumu noirimolona teremo. Imbomani lino kanokolio paimbo Gotenga kongono iyema moromolo ningi pilengei nimbo aku tepo moromolo.

<sup>11</sup> Korin imboma, linoni ungu te lopeke naa tepo, pali enondo nimbo para tirimolo. Eno paa lakopo konopu mondonromolo.

<sup>12</sup> Linoni eno kondo naa kolopo tiye kolamili paa manda naa nimolo nalo enoni lino kondo naa kolopo tiye kolamili nimelemunga konopu tendekuna naa pupili moromolo.

<sup>13</sup> Lapalini enonga bakulumando nimele mele, kinye nani eno nanga bakulumu nimbulio nani eno konopu awili tipo mondonromolo mele enoni nando aku ulu teao nimbo nio.

*Kraustinga imboma kake telimu moromelemunga tawendo moromele imboma kinye tendekuna tapu toko naa molangei ungumu*

<sup>14</sup> Kraustinga imboma Kraist ipuki naa tirimele imboma kinye tendekuna tapu toko naa molangei. Liko manjeio. Ulu pulu kerima kinye ulu tumbi nilima kinye konopu tendekuna naa purumo. Pa telimu kinye tumbulu tolimu kinye popo naa tirimbele.

<sup>15</sup> Kraist kinye kuromanga nomi tepekenjili Satan kinye konopu tendekuna pupili morombeleya? Kraustinga ungumu pimele imboma kinye Kraustinga ungumu naa pimele imboma kinye konopu tendeku tipe peremoya?

<sup>16</sup> Gote moromo ulke tempelemunga ulke kiripi kake telina kuro koinge melema manda meko pungo popo tongeya? Lino, koinjo molopa kau puli Gotenga kiripi kake telimu moromolo, yu lino kinye moromo. Yu kinyeaku tepe moromolomunga ungu te Goteni oi nimbe panjirimo. Yuni nimbeindo,

Na nanga imboma kinye tendekuna tapu topo molopo, enonga imunana molopo eno peya andomolo.

Na enonga Gote molombo, eno nanga imboma molonge. (WKP 26:12; Jer 32:38; Ese 37:27)

<sup>17</sup> Akumunga Tawendo imboma kinye, we melema anjiko kapi ningopopo toromele imboma kinye, eno kinye tendekuna naa molko, tiye kolko pungo kombu tengalupe molko pangei.

Kalaro mololi melema tawendo imbomani anjiko popo toromele melema kinye ulu pulu keri peremo melema kinye akuma naa ambolko ulu te naa teao.

Naa ambolko ulu te naa teng kinye nani molamili waio nimbo eno yando limbo. (Ais 52:11; Ese 20:34,41)

<sup>18</sup> Na enonga lapamu molombo, eno nanga bakulumu molonge. Na Gote enge olandopa peliyemuniaku tepe nio, (2Sa 7:8,14) nimu.

## 7

<sup>1</sup> Nanga konopu mondoro angokame, Goteni yunge imbo molongemando aku tepe nimbe panjirimu unguma eno kinye na kinye peremomunga pilipolio, kangindo kape konopundo kape kalaro mondonromolu umula tiye kolopo, Gote kinye pipili kolopo lipo awili tipolio ulu kake telima waye tepo molamili.

*Korin Kraustinga imboma kinye ulu pulu keri te perimumu altoko konopu topele toko kanoko keri pilerengimunga Pol paa konopu tirimu ungumu*

<sup>2</sup> Enoni altoko lino konopu awili tiko mondaio! Linoni enonga imbo te tepo naa kenjipo, imbo te tepekenjipili nimbo ulu te naa tepo, kolo topo imbo tengamelema toropo naa lipo, aku uluma naa terimulu.

<sup>3</sup> Nalo aku nio ungu kanomuni nani enoni teko kenjiringi nimboi naa nio. Oi kape nindu kano, nani eno paa enge nimbo konopu mondonromolu ulu teni manda tepe mainye naa mundumbelo, kololi ulumuni kape, we koinjo molopolio umbuni te wendo ombalo ulu teni kape, eno konopu mondopo tapu topo moromolo mele molamili nio.

<sup>4</sup> Nani enondo nio ungumu pilko naa tunduko uluma pali tumbi tiko teko kondonge nimbo enge nimbo pilipolio nanga konopu wango nimo. Enoni teremele mele imboma pilengei nimbo eno paa olandopa kapi nimbo temane topo tiro. Lino kinye ulu umbuni awini wendo oromo kinye eno moromele mele pilipolio paa konopu awili tipo konopu enge olandopa pepili moro.

<sup>5</sup> Aku tepe moromunga pulumu nembo. Oi na kombu Masedonia provins pumbolio, eno Korin imboma molko kenjiringi mele pilipolio konopu wango naa nipili alaye kolte kape manda naa moloru. Na kinye ulu umbuni lupe lupema wendo orumu. Imbomania na kinye karaye teringi. Konopuna tukundo umbuni tepe konopu wango naa nimona moloru.

<sup>6</sup> Nalo Goteni imbo paa konopu umbuni pepili moromelema konopu wango nipili molangei nimo kano Goteni na konopu wango nipili molopili nimu kinye Taitus na moloruna orumu akumunga na konopu wango nipili moloru.

<sup>7</sup> Nalo aku orumu ulumuni kau molo. Eno Korin imbomania Taitus yu teko konopu ame topili ningi akumuni Goteni na konopu wango tipo molambo nimula. Taitusini nando eno na kanamoloa ningo, na oi teko kenjiko, na teko konopu keri panjindiringi mele tiye kolko altoko konopu topele toko eno na kinye kopu tepe molamili ningo konopu awini liko munduringi mele nimbe

tirimuna pilipolio na konopu paa olandopa tiru.

<sup>8</sup> Nani eno nimbo amenge tepo pipia oi topo mundurumu kanokolio eno paimbo umbuni terimu nalo akumu mandala. Paimbo nani pipia topo eno tirumuni eno wali alaye kolte konopu umbuniltingi kinye pilipolio kondo terimu nalo

<sup>9</sup> kinye na konopu tiro. Nani eno umbuni tiru akumunga konopu naa tiro. Eno oi nimbo amenge tepo umbuni tiru akumuni eno konopu topele tondorumu akumunga na konopu tiro. Gote yuni ulu umbuni akumu eno kinye wendo opili nimuna nani pipia topo tiru akumuni eno alaye kolte kape tepo naa kenjiru.

<sup>10</sup> Eno Goteni umbuni tirimo akumuni eno teko kenjirimele mele kanoko keri pilko konopu topele toko, mindili nolemala aulkena wendo ongo, yu kinye peya molko kondonge aulkena pangei nimbe lipe mondoromona akumu paa, ulure molo. Nalo maina wendo oromo ulu umbuni akumani kololi ulu pulumu wendo oromo.

<sup>11</sup> Eno pilkolio, i Goteni tirimo umbuni akumuni eno tepa konopu topele tondorumuna ulu penga lupe luperma eno kinye wendo oromomunga paimbo tirimo mele wamongo pilko molangei. Unguma wambo pilipo, ulu pulu keri te lino kinye naa pepili paa tumbi tipo molamili ning teremele ulumu kinye, imbomanu eno kolo toko teko kenjirimele nimele unguma eno mongo toko ningeindo popenge teko teremele ulumu kinye, enonga iye teni tepa kenjirimo kinye enoni pilko kolko yu iri toromele ulumu kinye, iye teni tepa kenjirimu wali ulure naa tepo we molorumulumunga mongo limolo ning mini lteko moromele ulumu kinye, lino Pol altope kanomoloa, yu kinye popo tipo molamilia ning moromele ulumu kinye, iye teni tepa kenjirimo kinye enoni enge ning yu liko tumbi tirimele ulumu kinye, tepa kenjirimo iyemu tepa kenjirimomunga mongo lipili ning enge ning teremele ulumu kinye, kano ulu penga teremelemani ulu pulu keri eno kinye pemomu enoni naa ambolonge mele lipo ondopa, akumunga mongo te wendo ombalo kinye eno kinye mongo naa ling mele lipo ondoromo.

<sup>12</sup> Akumunga, paimbo eno umbuni tirimuna pipiamu nani oi topo tiru nalo iye teni tepa kenjirimu nimbo pilipolio kano pipiamu topo naa tiru. Kano iyemuni imbo te tepa kenjirimu nimbo pilipolio topo naa tirula. Imbo talonga kau pipia topo eno naa tiru. Enoni nanga ungumu pilko tekolio na paa lakoko konopu mondoromele mele Gote kanopa molopili enonganu paa pilko kondangei nimbo kano pipiamu eno topo

tiru.

<sup>13</sup> Akumunga nani eno kano pipiamu topo tiru kinye kanokolio moloringi mele kanoko keri pilko konopu topele toko teko kondoringi mele pilipolio na konopu wango nipili moloru. Nalo akumunga kau molo. Taitus konopu awili tepa lipe mundupelie eno moloringina orumu kinye enoni pali yu liko tapondoringimunga Taitus yu konopu wango nipili molorumu akumu kanopolio na konopu paa olandopa tiru

<sup>14</sup> Paimbo eno Taitus pilipe molopili eno kapi niu ungu akuma yu pumbe kanorumu kinye paimbo nimu nimbe kanorumunga na pilipi naa koloru. Aku tepala eno onndo niu kano unguma kape paimbola.

<sup>15</sup> Taitus eno moloringina orumu kinye eno mini lteko pipili kolko paimbo onio, peya molamili ning, yuni ungu nimu mele liko awili tiko pilko liko teringi ulu kanorumu kinye altopa pilipelite eno kondo kolopa olandopa konopu mondoromo.

<sup>16</sup> Kinye na pilo, enoni uluma pali tumbi tiko teko kondonge nimbo enge nimbo pilipolio na konopu tipo moro.

### **Poloni Kraistinga Korin Imbomando Kombu Judia Distrik Kraistinga Imbo Moromelema Kou Mone Tiengei Liko Maku Tangei Nimu Ungumu**

## 8

*Kombu Judia distrik moloringi  
Kraistinga imbomanga kou mone lipo  
tapondopo tiemili ning toya toko liko maku  
tangei nimu ungumu*

<sup>1</sup> Manda, angko kame, kinye ungu te lupe nemboi, Masedonia provins Kraistinga imbo talape moromelema pali Goteni we kondo kolopa lipe tapondorumuna moromele mele eno pilengei nimboi tero.

<sup>2</sup> Aku imboma kinye umbuni awini wendo orumu, paa mindili norangi ulumanu eno molko kondongenje molo molko kenjingenje nimbe manda manjirimu kinye paa awili teko konopu tiko moloringi. Eno paa koropa pupili moloringi nalo Kraistinga imbo talape mare melema molo itemoma lino kou mone melema olando lipo tapondopo tiemili konopu lekolio kou mone awini toya toko tiringi.

<sup>3</sup> Enoni teringi mele kanopolio nani eno Korin imboma pilengei nimbo para tiembo. Masedonia provins imbomanu kou mone timolo ningi mele tikolio, altoko mare peya olandopa liko tiringila. Enoni enonganu konopuni pilkolio

<sup>4</sup> na paa enge ningko konge tekolio ningeindo, Gotenga imbo kake teli kombu Judia distrik moromelema kombu marenga Kraistinga imbomani kou mone liko maku toko tingei teremele linoni kape peya lipo tapondopo tiemili ningi.

<sup>5</sup> Aku ningi ungu pilipolio enoni kou mone tinge nimbo lipo manjirimulu mele tiringi nalo aku teko kau naa teringi. Eno enongan ooi Awilimu tikolio, pele kape Goteni teaio nimu ungu te pilipo nani enondo niu unguma konopu talo tepa naa pepili paa pilipo lipo teamili ningi tumbi tiko teringi.

<sup>6</sup> Masedonia provins imbomani aku teko teringimunga pilipolio eno Korin imbomani Judia distrik imboma we kondo kolko liko tapondoringi ulumu pulu polko teringi kinye Taitusini eno kou mone liko maku tonge mele lipe tapondopili nimbo eno moloringga puwi nimbo lipo munduru mele aku teko liko tapondonge ulumu kamukumu pora nipili nimbo yu altopo eno moromelena opili tope tipo lipo mundumboi tero.

<sup>7</sup> Enoni teamili nimele uluma pali paa enge ningko olandopa teremele kanomu. Kraistinga ungumu paimbo ningko enge ningko pilingeindo paa olandopa enge ningko pilko tiye naa koromele. Aku teko pilipo moromolo mele imboma pilengei ningko taka liko naa nimele. Enge ningko imboma ningko tirimele. Eno paa awili tepa lipe manjili pepili Gotenga ungumu pilko moromele. Konopu talo naa pepa kolo toli ungu te eno kinye naa pepili Gotenga ungumu paa olandopa pilipo teko molamili nimelela. Nani eno pulu polopo konopu mondorumunga enoni na paa olandopa konopu mondoromelela. Aku uluma olandopa teremele mele kinye aku teko imboma lipo tapondoku kou mone tiemili nimele ulu penga akumu kape olandoko teangei.

<sup>8</sup> Ya eno Korin imbomani teangei nio akumu eno tope tipo naa nio. Eno Korin imbomani konopu mondoromele mele akumu paimbo teremelenje manda manjipo kanamboi nimbo imbo marenim imbo lupema kondo kolko paa lipo tapondamili nimele mele pilko kanangei, nimbo tiro.

<sup>9</sup> Linonga Awili Jisas Kraistini eno we kondo kolopalie terimu mele eno pimele. Yu kamako molorumu nalo yuni eno lipo tapondambo nimbelie yu iye koropamu apuwe lepa molorumu. Na koropa pumbelo kinye eno mele awini kande kandema noinge nimbe enonga nimbe yu koropamu molambo nimbe iye koropamu molorumu.

<sup>10</sup> Kou mone liko maku toko tingemunga enoni teangei konopu lteo mele nemboi. Oi poiyemunga eno lipo tapondamili ningi kou mone mare pulu polko liko

maku toringi kanomu, kinye kamukumu liko maku toko pora tiengen nio. Kombumanga pali imbomani akilio leko lipo tapondamili ningi nalo eno Korin imbomani kumbe leko lipo tapondamili ningi, kumbe leko kou mone liko maku toringila.

<sup>11</sup> Aku kani oi liko tapondongeindo konopu tiko kumbe leko lipo tapondamili ningi mele kinye, aku teko pilkolio kou mone yu mele mele ambolko moromelema wamongo pilko kamukumu kou mone tingema liko maku tangei.

<sup>12</sup> Imbo teni imboma paa lipo tapondambo nimbelie yuni noirimo melemanga mele mare konopu tipe lipe imboma lipe tapondopa tirimo kinye yuni tirimo melema Goteni kanopa penga pimo. Naa noirino melema liko tiwi ungu naa nimu.

<sup>13</sup> Nani imbo mare mindili noromelema mindili naa nongo, eno mindili naa noromelema mindili nangei nimbo naa nio. Nani eno pali melema manda leko noiengi nimbo nio.

<sup>14</sup> Kinye, enonga we noirimele melema molo itemo imboma liko tapondonge. Aku kinye altoko walite eno melema molo lembaro kinye enoni kinye liko tapondoko melema tirimele imbomani mele awini noikolio eno liko tapondonge kinye tendeku tepili molonge.

<sup>15</sup> Tendeku tepili molonge ungumunga ungu te Gotenga bukuna moromo. Akumu i tepa,

Imboma langi mana liko maku toringi kinye awini ltingima mare olandopa naa noiringi. Kelo teko ltingima molo naa lerimu. Awini ltingima kape kelo teko ltingima kape langi mana tendeku terimu,

*(Kis 16:18)*

nimbe bukuna moromo.

*Poloni Taitus kinye iye talo kinye eno Korin imbomani kou mone noirimelema ongo lingei nimbo eno moromelena lipo mundumboi tero nimu ungumu*

<sup>16</sup> Nani eno kondo kolopo lipo tapondambo nimbo lipo manjiryo mele Gote Taitusina konopuna molorumungu Taitusini eno kondo kolopo lipo tapondambo nimbe pilipe moromola, akumunga Gotendo paa tereno nio.

<sup>17</sup> Taitus aku tepa pilipe moromomunga nani yundo nimboindo Korin imboma moromelena pungo, imboma liko tapondoko kou mone tingema kamukumu liko maku tangei pungo nipiwi nio kinye pilipelite konopu tipe paa aku tepo tepumbo nimo. Yuni yunu konopuni pilipe paa aku tepo teambo nimbe pilipe moromo akumunga nani aku tepo Gote kinye paa tereno nio.

<sup>18-19</sup> Linonga angenu te Taitus kinye peya tapu toko pangili nimbo lipo munduro. Ungu tukumemu nimbe tilipe andoromemunga aku iyemu Kraustinga imbo talapemanipali yu paimbo teremo ningo kapi nimele iyemu. Aku iyemu imbi topo lipo munduru mungu pulu te peya pere-mola. Kou monema lipolio Jerusalemdendo timilindo mepo pumolo kinye Kraustinga imbo talapemanipali yu paimbo teremo ningo kinye peya tapu toko pangei ningi. Aku ningi ungu pilipolio yu eno Korin imboma moromelena puwi nimbo yu lipo munduro. Aku kondo kolopa lipe tapondoli kongonomu imboma Awilimu kapi ninge kinye yunge imbimu ola molombalo nimbo paa teamili nimbo moromolo. Linoni eno paa lipo tapondamili nimbo moromolo mele kape kanangei nimbo kano kou monema mepo pumolo.

<sup>20</sup> Enoni kou mone awini liko tapondoko tingema linoni lipolio Jerusalemdendo pumolo kinye kou mone tiringi imbomani Linoni kou tepo embambo tirimulu ningo linonga ungu umbulkondo nindiko iri naa tangei nimbo linonga angenu eno kanoko penga pilko kapi nimeleme kinye peya tapu topo andamili nio.

<sup>21</sup> I kondo kololi kongonomu temolo wali Awilimuni teko kondoromele nimbe kanopili nimbo kano kou mone tingema wamongo nokomboi tero. Nalo akumu kau molo. Imbomani kape teremolo mele kanokolio teko kondoromele ningo kanangeila nimbo aku angenumu peya teamili nio.

<sup>22</sup> Linonga angenu te elo kinye peya tapu toko pangei nimbo lipo mundurola. Aku iyemuni wali awini kongono wamba enge nimbe terimu mele kanoru. Kinye kape Korin imbomani paimbo kou mone liko tapondoko tinge nimbe enge nimbe pilipolie eno moromelena paa pumbo tapomboi nimbe moromo.

<sup>23</sup> Taitus lipo munduro aku iyemu yu i tepa. Yuni na kinye peya tapu topo Gotenga kongonomu andopo tepo enonga kongonoma tenderembolo iyemu. Angenu ongele talonga ungu te peya nio, Elo Kraustinga imbo talapemani eno Korin imboma moromelena palio ningo liko mundurumele iye taloni kongono terembelemunga Kraist kapi ningo yunge imbi liko ola mundurumele.

<sup>24</sup> Aku kani i teko teaio. Aku onge imboma kondo kolko tapoko tukundo likolio eno paimbo Kraustinga nimo unguma tinge tiko teremelelunga linoni eno kapi nimolo ungu we naa nimolo. Aku teko teremele ulu iye ongema kanangei liko on-donge wali Kraustinga talapena moromele imboma kanoko pilinge.

*Poloni Korin imbomando Kraustinga imbo kombu Judia distrik moromele engele paa koromele kani liko tapondoko mele mare we tiengei nimi ungumu*

<sup>1-2</sup> Eno Korin imbomani enge ningo Judia distrik imboma paa lipo tapondamilia ningo moromele mele piola. Liko tapondongeindo teko moromele mele Kraustinga imbo kombu Masedonia provins moromele imboma konopu tipo temane topo tipo eno Korin imboma kapi nimbolio niiumuni, kombu Akaia provins ltemo kombu awili Korin imbomani oi poineymunga kinye yandopa kape lipo tapondopo melema tiemili ningo nokoko moloringi mele Masedonia imbomando nimbo tiru kinye pilkolio Korin imbomani teremele mele manda lepo teamili ningo eno awinini melema tinge uluma teremelela, akumunga, Gotenga imbo konopu kake teli kombu Judia distrik moromele kombumanga pali Kraustinga imbomani liko tapondoko we tinge kou monema liko maku toko moromele mele eno Korin imboma pimelelunga eno ungu awini pipiana naa topo timbo kinye mandala.

<sup>3-4</sup> Nalo na ombo wali Masedonia provins iye mare peya omolo lemo eno Korin imbomani kou mone tingema kamukumu naa liko maku tonge lemo nani kapi nimbo enoni teremele mele imboma temane topo tiru mele pilipolio paa mai kolombo. Eno Korin imboma kape mai kolonge. Aku-munga pilipolio, na eno molongena ombo wali imboma kapi nimbo temane topo tiru mele paimbo aku teko teangei. Imbomani Poloni kolo torumu, yuni Korin imboma we kapi nimi ningo naa pilengei! Kou mone limboi omboma paimbo liko maku toko pora tiengei nimbo linonga angenu iye yupoko kanoma eno moromelena lipo munduro.

<sup>5</sup> Na kinye eno Korin imboma kinye lino mai naa kolamili nimbo linonga angenu iye yupokondo enge nimbolio nimboindo na oia naa pambo eno kumbe leko pungo, Korin imboma liko tapondoko, tinge kou mone liko maku toromelema kamukumu liko maku toko noiko molangei wambo kani eno moromelena liko tapondangei kumbe leko pangei nimbo lipo munduro. Pele timolo ningo panjiringi mele kou kamukumu liko maku tokolio na nokoko molangei ombo wali pilkolio konopu u nipili imboma liko tapondongeidi kou mone awini na toy toko tinge. Kou kamukumu naa noiko nokoko molangei ondu lemo eno pilkipili naa molko tinge kinye manda naa tembaloo. Aku tepo nimbo pilipolio na oia naa wambo

linonga iye angenupili pokondo eno liko tapondangei paio nimbo lipo munduro.

*Poinyena langi imbo panjirimolo mele langi mongo aku tepama limolo*

<sup>6</sup> Kou mone toya toko tiengei nimbo niomunga ungu pulumu nembo pilengei! Imbo te langi imbo koltalo panjirimomuni langi koltalo lipe noromo. Langi imbo awini panjirimo imbonumi awini lipe noromo.

<sup>7</sup> Imbonani imboma liko tapondoko melema konopu tiko tumbi tiko tirimele akuma Goteni kanopa konopu mondoromo kani eno imboma yu mele mele konopuni pilkolio kou mone i tepo imboma lipo tapondopo tiemili ningi pilkolio tiengei. Konopu keri panjiko naa tiengei. Naa tilimala nalo imbonani tieo ningi enge ningi konge teremelelunga tirimolu ningolio tinge ulumu manda naa tembalo.

<sup>8</sup> Goteni eno mele paa awini manda timbelo noiko manda tendenge, waliwalima konopu u nimbelo uluma kinye, kongono tinge uluma kinye, melema molo lembaloma pali tipe manda tendembalo kani konopu kimbo naa tiko imboma liko tapondoko melema tiengei. Enoni liko tapondoli ulu pengama pali manda tendangei nimbeaku tembalo.

<sup>9</sup> Aku ulumunga ungu te Gotenga bukuna moromo, akumu i tepsa:

Imbo teni poinyemanga langi imbo awini panjirimo mele imbo penga teni imbo koropama lipe tapondopa mele awini andopa moke tepsa tirimo. Pele aku tepsa kondo kolopa tepsa kondoromo ulu pengama waliwalima pepa kau pumbelo, Gote pilipe molombalo. (*Sng 112:9*)

<sup>10</sup> Langi imbo panjirimo iyemuni langi imbo topili nimbe imboma tirimo Gote, yuni we imboma langi lupe lupema nangei nimbe tirimo Gotela, yuni enoni imboma liko tapondangei nimbe mele paa awini timbelo. Enoni kondo kolopa tepsa kondoli ulu pengama tinge konge olandopa olandopa teangei nimbe lipe tapondopa melema timbelo. Langi imbo panjirimo wali langi mongo awini toromo mele eno kinyeaku tepsa wendo ombalo.

<sup>11</sup> Waliwalima, imboma melema molo lembalo kinye enoni kano imboma liko tapondoko mele awini toya toko tiengei nimbe Goteni eno mele awini timbelo kinye enoni enonga angenali mele awini manda tinge. Aku kinye linoni Kraistingu Judia distrik imboma lipo tapondopo, eno Korin imbonani mele awini toya toko tingema lipo mepo pumbo timolo kinyeaku teko angenali liko tapondongemunga angenalini Gote kinye paa tereno ningi.

<sup>12</sup> Enoni aku teko Gotenga imboma liko tapondoko melema tinge ulumu tengemunga ulu talo wendo ombalo. Aku tengemunga imbo mele molo itemoma molo naa lepa manda tembalo. Nalo akumu kau molo. Aku tengemunga imbo awinini Gote kinye paa tereno ningi yu kapi ningela.

<sup>13</sup> Eno Korin imbonani Judia distrik imboma eno teko liko tapondoko melema tingemunga kanokolio we imbonani eno paimbo Kraistingu imboma molko, yunge ungu tukumemu paimbo pilko likolio yunge unguma pilko liko tinge tiko tinge mele kape enonga melema lunga awini Judia imbona kinye imbo lupe lupema pali kinye toya toko liko tapondoko moke teko tinge mele kape, mona lembalona kanokolio Gote kapi ningi imbi liko ola mundunge.

<sup>14</sup> Akumu kanokolio, Goteni eno Korin imbona paa olandopa we kondo koromo mele kanokolio Gote kinye ungu ningi kinye eno paa konopu mondoko Gotendo enonga konge tendenge.

<sup>15</sup> Goteni mele paa penga olandopa we tirimu akumu linoni imboma nimbo timilindo pereremolo akumu Gote kinye paa awili tepsa paa tereno nemili.

### **Iye Mareni Poloni Tepa Kenjirimo Ningimunga Pilipelie Pol Yu Terimu Ulumu Pipia Torumu Ungumu**

## 10

<sup>1</sup> Kinye nani ungu te paa pilengei nimbo, nimbo tiro. Nimbo timboindo Kraist yu kandiki tepsa taka lipe molopa yunge imbi ola naa molopili nimbe molorumu mele naaku tepsa nimbo molopolio, eno nimbo timboi ungumu paa wamongo pilengei nimbo, nimbo tiro. Iye mareninanga ungu umbulkondo nindikolio ningeindo, Pol yu eno Korin imbona kinye peya moromele kinye pipili kolopa eno mane tirimo, nalo eno kinye naa molopa kombu tega lupe molopalie, pipili naa kolopa unguma enge nimbe tepsa tirimo nimele.

<sup>2</sup> Aku teko nimele ungu pilipolio eno naa ningi konopu topele tangei nimbo, eno enge nimbo konge tero. Molo konopu topele naa tonge lemo Pol tena lupe molopalie kau lino unguma pipili naa kolopa enge nimbe nimo nimele mele eno moromelena ombo. Eno kinye molopolio ungu mare pipili naa kolopo paa enge nimbo eno mane timbo. Enoni Pol tepsa moromo uluma maina uluma kau teremo, Kraistingu kanopa penga pimo uluma naa teremo nimele meleaku teko ningi molangei ondu lemo na paa pipili naa

kolopo eno enge nimbo mane timbo kani  
aku teko naa ning, konopu topele tangei  
nimbo, eno konge tero.

<sup>3</sup> Lino paimbo mai kombuna we imboma  
peya moromolo nalo Kraistingu opa  
temilindo maina imbonani konopuni  
pilkolio opa teremele mele lupe, aku tepo  
konopuni pilkolio opa naa teremolo.

<sup>4</sup> Lino opa temilindo mai kombuna im-  
bomanga opa teremele melema lipolio opa  
naa teremolo. Gotenga opa teli mele enge  
nilima lupe ambolopo, akuman opa pule-  
manga opa pape enge nilima ungu toro-  
molo.

<sup>5</sup> Mai kombumunga lipe manjili ungu  
nimelema tepo mainye mundupo, Gotenga  
unguma naa pilemili ning eno paa  
kelkele toromele unguma tepo kenjipo,  
imbomanga Kraist kinye opa pule konopu  
ltemelema lipo ambolopo ka tipo, imboma  
enonga konopumani Kraistingu unguma  
kau pilengei nimolo.

<sup>6</sup> Eno Korin imboma kape, eno weman  
konopu alowa teko nani teao nio ungum  
pilkliko teko molonge kinye kanopolio  
nanga unguma naa pimolo ning liko tui  
tinge imboma ombo tepo tumbi timbo  
nimbo nokopo moro.

<sup>7</sup> Imbonani ulu teremelema kanongeindo  
ulu tukumemu kangindo olando kau  
kanoko imbi tirimele. Ne iye teni na  
Kraistingu iyemu moro konopu lemo  
lemo na Kraistingu iyemu moro mele Pol  
akeku nimbo mele Kraistingu iyemu  
moromola konopu liepili. Yu yunu kau  
Kraistingu iyemu moro konopu naa liepili.

<sup>8</sup> Nani kongono teroma Awilimuni teani  
nimbe na enge tirimu akumu Awilimuni  
eno konopu enge pepili molangei liko  
tapondani nimbe na kanopa lipe imbibu  
tirimu. Eno molko kenjengei niwi nimbe  
na kanopa lipe imbibu naa tirimu. Aku  
tepa terimumunga nanga imbibu alaye  
kolte lipo ola mundupo kapi nio nalo aku  
teromunga na pipili naa kolombo.

<sup>9</sup> Nani pipia topo eno tiro akuma lino  
pipili kolopo mini lteamili nimbe pipia topa  
tirimu ning naa liko manjengei nimbo aku  
tepo nio.

<sup>10</sup> Paimbo iye marenin ningeindo, Poloni  
pipia topa tipelie lino iri topa ungu enge nili  
mare nimo nalo lino moromolona oromo  
kinye kanopolio yu we iye pupu te. Imbi  
naa mololi te. Iye marenin ungu mane enge  
ningo tirimele mele yu aku tepa ungu mane  
naa tirimo nimbo karomolo nimele.

<sup>11</sup> Aku teko nimele iyema eno i tek  
pilengei, na eno kinye tendekuna naa  
molopo, kombu teng lupe molopolio nani  
pipia topo pipili naa kolopo enge nimbo  
mane tiro mele kinye, eno moromelena  
ombolio mane timbo mele kinye, paa

tendeku tipemu. Aku pipiana topo panjiro  
mele ombolio wali mane timbo ning  
pilengei!

<sup>12</sup> Iye marenin lino iye pengama ning  
enongan imbi liko ola munduko kapi  
nimele mele lino aku tepo temolo wali  
paa manda naa tembalo. Aku iyemani  
eno enongan konopuni pilkolio lino i tepo  
i tepo temolo kinye iye pengama molo-  
molo ning pilkolio aku teko teremele.  
Eno enongan teremele ulu kanoko konop-  
uni pilko apurukolio lino iye penga olan-  
dopama ning pimele. Aku teremele iyema  
lipe manjili naa peli iyemani alowa teko  
teremelemunga lino eno enongan kapi  
nimele mele lino linonganaku tepo kapi  
nilimalanje paa manda naa telka.

<sup>13</sup> Nalo lino linongan imbi lipo ola  
mundupo kapi nimolo ulu Goteni i teko  
manda teangei nimo meleaku tepa kau  
linongan imbi lipo ola mundupo kapi  
nimolo. Lino linongan imbi lipo ola  
mundupo kapi nimolo nimbo Goteni lino  
kanopa lipe kongono teangei nimbe tirimu  
mele kau pilipolio lino linongan imbi lipo  
ola mundupo kapi nimolo. Goteni lino  
kongono teangei nimbe tirimu kongonomu  
kinye eno Korin imboma kinye kongono  
telipo orumulu.

<sup>14</sup> Goteni lino kongono teangei nimbe  
imbi tirimu akumunga linoni eno  
moloringina kumbe lepo ombolio wali  
Kraistingu ungu tukumemu nimbo tirimulu  
kinye Goteni lino kongono teao nimbe  
tirimumu tiye kolopo kongono te lupe  
alowa tepo naa terimulu. Akumunga  
lino linongan imbi paimbo lipo ola  
mundurumolo. Eno moloringina ombo  
ungu tukumemu naa nimbo tilimalanje  
aku tepo Goteni kongono tirimu te tiye  
kolemalanje lino linongan imbi lipo ola  
mundurumolo mele paa manda naa telka.

<sup>15</sup> Goteni lino kongono teao nimbe tirimu  
kongonomu teremolomunga kau linongan  
imbi ola mundurumolo. Imbo marenin  
kongono teremelemunga linoni kolo topo  
linongan imbi lipo ola naa mundurumolo.  
Eno ipuki tirimele mele olandopa pumbelo  
kinye linoni eno mane tipo kongono ter-  
emolo uluma enge pepa awili lepili kani  
imbo awinini Jisas ipuki tinge konopu lte-  
molo.

<sup>16</sup> Aku tepa wendo ombalo wali kong-  
ono eno kinye teremolomu enge pepa awi-  
li tepa pembalo kinye lino eno moromele  
kombu anjikondo Kraistingu ungu tukume  
oi naa pileli imbonando ungu tukume  
manda pumbu nimbo timolo. Aku tepolio  
iye marenin andoko ungumu ning tirigi  
kombuna naa pumbolio iye akumani kong-  
ono oi teremelemunga linoni terimulu  
naa nimbo, iye marenga kongonomu

linonga imbi lipo ola naa mundumolo.

<sup>17</sup> Nalo Gotenga bukuna ungu te moromo mele pilipo temolo. Akumu i tepa:

Imbo teni imbo tengi imbi ola mundumbo konopu lemo lemo Awilimunga imbi mu kau ola mundupili, *(Jer 9:26)*

nimbe bukuna moromo.

<sup>18</sup> Imbo teni kongono teremo mele kanopa apurupe yu yunu imbi mu lipo ola mundumbelo imbomu Goteni kanopalie i kongonomu paimbo temo, yu imbo pengamu nimbe kapi naa nimo, molo. Nalo Awilimuni imbo te molopa kongono teremo mele kanopa apurupelie yundo imbo pengamu nimbe kapi nimo imbomu kau paimbo imbi ola moromo.

## 11

*Iye mareni kolo toko Kraistini lipe mundurumuna kongono teremolo ningi iyemani teringi mele Poloni aku iyema na kinye tendeku tipe molo nimu ungumu*

<sup>1</sup> Ungu nio wali enoni konopu naa lepo nio konopu lekolio nalo pilko moromele. Na tipe naa kolko we pilengei konopu lteo.

<sup>2</sup> Korin imboma, nani eno Kraistinga imboma kau molangei nimbolio nimbo panjipo eno manda lepo ambo wenepo te lopa kumbu naa teli iye purumomu mele Kraist kinye pangei nimbo yu timbo nimbo pilipo moro akumunga Goteni imboma kanopa lipo yu kau liko awili tiko pilko molko, iye lupe tengi unguma naa pilko lombili paa naa pangei. Iye te lupe lombili pungei kinye paa konopu keri panjimbo nimbe moromo mele naaku tepo konopu lepo moro.

<sup>3</sup> Kraist kinye kau pangei nimbo moro nalo nani pilto. Waimbe kolo toli uluma pali pimomuni oi ambo Ipu kiyengo nimbe kolo topa kondi topa lipo loi tirimu kinye pilipe lipo lombili pumbe loi lerimu mele enoaku teko iye mareni kondi toko liko loi tingi kinye enonga ungumu pilkolio ningemuni, Lino Kraistinga imbo kake telima kau ningyu enge ningi pilko yunge ungumu kau pilko liko teko moloringi mele tiye kolko konopu alowa tekolio, iye lupemani kondi tongema lombili pungo loi lengenje nimbo mini ltepo moro.

<sup>4</sup> Imbo te lupenoi eno moromelena omba, nani Jisasinga ungu tukumemu nimbo tiro mele naa nimbe tirimo, yuni Jisasinga ungumu nimbo tiro nimbeline imbo tengi ungu lupe te nimbe tirimo kinye eno we pilko liko moromele. Molo, mini nimele akumu te lupe, eno oi Mini Kake Telimu ltingi akumu molo, te lupe, akumu enonga konopuna pumbe peremo kinye we pepili ningi kamukumu ltimele. Molo, iye mareni kolo toko ungu tukumemu nimbo tirimolo

nimele kinye nani ungu tukumemu eno nimbo tiru ungumu tiye kolko kano iye mani ningi tirimele ungumu kau ungu tukumemu ningi, taka liko pilko ltimele konopu lepolio mini ltepo moro.

<sup>5</sup> Oi enonganu imbi pala tondoromele nindu, kano iyema eno paimbo Kraistini Yunge kongonomu tendepao nimbe lipo mundurumu iyema moromolo nimele aku iyemando linonga ungu mane tili iye awilima nimele, aku iyemanga na maindo naa moro konopu lteo.

<sup>6</sup> Na ungu nimbo tiemboi ulumu imbo teni ungu imbo naa tondoringi aku ungu paimbo nimele nalo na Kraistinga unguma paa lipo manjiro. Eno mane tiro kinye unguma wambo pio mele waliwalima eno karomele.

<sup>7</sup> Gotenga ungu tukumemu eno nimbo timboindo nanga imbi mainye molopili nimbo aku tero kongonomunga melema tiengi naa niu. Nanga imbi mandopolio enonga imbi lipo ola mundundembo nimbo aku ulu teru. Naniaku tepo teru ulu akumu tepo alowa tenderuya?

<sup>8</sup> Eno lipo tapondopo Kraistinga kongono tendepo moloru kinye Kraistinga imbo ta-lape lupe mareni na liko tapondoko kou mone tiringi nalo aku waliaku imbomanga kongono naa tendepolio aku koumu wapu mele ltiu.

<sup>9</sup> Na eno kinye molopo kongono teru wali na melte molo lerimu kinye nanga angupili kombu Masedonia provins molko oringi. Akuman kau na liko tapondoko mele molo lerimuna pali meko ongo na tiringimunga eno Korin imboldando na liko tapondoko melema tieio nimbo eno umbuni te naa tiru. Na enondo liko tapondaio nimbo umbuni te paa naa timbo nimbo konopu lero mele kinye kape aku telipo pumbo konopu lteo.

<sup>10</sup> Naaku tepo paimbo tero mele tembo nimbo enge nimbo nimbo panjiru mele paa mi lepo Kraistinga ungu paimbomu na kinye peremomunga paimbo nio. Nani eno Korin imboma moromele kombu Akaia provins kombumanga pali andopo ungu tukumemu nimbo timbo kinye kou mone ni topo toko lieio naa nimbo nio akumu paimbo nio. Aku tepo na nanu kapi nio ungumu imbo teni kolo toromo ungumu naa ningi.

<sup>11</sup> Enonga kou mone naa limbo nio akumu ambe temona nioya? Nani eno konopu naa mondoromunga aku tepo nioya? Paa molo! Na eno paa konopu mondoro mele Goteni pimo.

<sup>12</sup> Melte tieio paa naa nimbo akumunga pulumu i tepa. Iye mare enonga imbi liko ola munduko imbomani linonga unguma pilkolio linoni kongono teremolo mele

kinye Poloni kongono teremo mele kinye tendeku tipe, yu kinye lino kinye peya Kraistini lipe mundurumu iyema molopo, kongono teremolomunga melema limolo ningko kanangei ningko teremele mele paa naa teangei. Imbomani kano iyemanga ungu kolo tolima paa naa pilengei nimbolio aku iyemani kongono teremolomunga melema tieio nimele mele nani paa naa tepo, na imboma lipo tapondopo Kraistingu kongono tenderomunga melema naa ltio mele altopo kape paa naa limbo.

<sup>13</sup> Aku teko teremele iyemani imbomani lino Kraistini lipe mundurumu iyema moromolo ningko kanangei ningko kolo toko andoko Kraistini lipe mundurumu iyemani kongono teremele mele eno aku teko manda leko andoko kongono teko moromele.

<sup>14</sup> Aku teremele mele kanokolio konopu kimbo tiko naa molangei. Kuromanga nomi Sataneni kape imboma kondi tombaindo yu paimbo moromo mele apuwe lepa mulu kombuna ensel te pa telina moromo mele molambo nimbe aku tepa none teremo.

<sup>15</sup> Sataneni aku tepa teremo lemo yuni teremo mele yunge kongono tendeli kendemande iyema imbomani lino kanokolio iye tumbi nilimunga kongono tendeli kendemande iyema moromolo ningko kanangei ningko aku teko manda leko kolo toko tengenkye kanokolio konopu awini kimbo naa tieio. Altopa imbo akumanga aku ulu teremelemunga Goteni pundu tombalo.

*Pol Kraistini kongono tendepuwi nimbe lipe mundurumu kongonomu tendembaindo mindili norumu mele ungumu*

<sup>16</sup> Nani oi nindu kano mele altopo nio. Konopu naa peli iyemu moro ungu naa neio. Nalo naaku teli iyemu konopu lenge lemo nani iye keke lepo tolimumi teremo mele nanga imbi olando munduro unguma pilko taka liko molaio.

<sup>17</sup> Nani na iye awili pengamu nimbo aku tepo nimbo kenjimbo kinye Awilimuni oi molopa terimu wali nimu mele naa nimbo. Keke lepo toli iye teni milka mele na nanu imbi lipo ola mundupo nimbo kenjimbo.

<sup>18</sup> Mai kombuna imbomani enonga imbima liko ola mundurumele mele iye awinini aku teko teremelemunga naaku tepo nanga imbimu nanu lipo ola mundupo kapi nimbo.

<sup>19</sup> Eno keke lepo naa topo lipe manjili peli imboma moromolo konopu itemele nalo keke lepo toromele iyema keke lepo we tangei ningko tiye kolkoaku unguma we taka liko pilko moromele.

<sup>20</sup> Iye marenieno ka kongono tirimele, molo enonga kongono we tendaio nimele, molo eno ningko ame tondoko enonga

melema we ltomele, molo eno liko loi tiko kolo toromele, molo lino iye penga awilima moromolo. Eno imbo kerima moromele nimele, molo linonga unguma paa pilengei, lino paa lombili wangei ningko enge ningko eno larauwe toromele kinye kape, eno Korin imbomani aku teko teremele iyema paliaku teko teangei ningko tiye kolko iye pengama, paa teremele ningko enonga unguma taka liko pilko moromele.

<sup>21</sup> Aku iye pengamani teremele mele lino tamba nimbe eno Korin imboma kinye molorumulu wali manda naa terimulu-munga kondo teremo. Nalo iye teni yu moromo mele kinye, yu kinye uluma wendo oromo mele kinye, pipili naa kolopa enge nimbe nimbe para tirimo lemo kinye i nio ungumu keke lepo ungu langopo nimbo na kape moro mele kape na kinye ulu wendo oromoma kape pipili naa kolopo enge nimbo tumbi tipo nimbo tiemboi.

<sup>22</sup> Aku iyema Hibru iyema lemo na kape aku iyemula. Aku iyema Israel iyema lemo na kape aku iyemula. Aku iyema anda kolepa Abrahameni kalopa ltimu iyema lemo na kape aku iyemula.

<sup>23</sup> Aku iyema Kraistingu kongono tendeli kendemande iyemaya? Eno Kraistingu kongonomu tenderemele mainyendopa mele, na Kraistingu kongonomu paa olandopa tendeli iyemu moro. I na nanu imbi lipo ola mundupo kapi nimbo nio ungumu keke lepo toli ungu mele nio. Na Kraistingu kongonomu mindili nombo olandopa terula. Na wali olandopa ka ulkena Peru. Na wali paa awini koipeni toringi mindili noru mele aku iyema tepo mainye munduro. Wali awini na koromele makona puru.

<sup>24</sup> Juda iye nokolimani na walite walite ningko tiko na undupo kanambo ningolio ka pulteni 39 ningko toringi. Aku lipe popo tipe wali kite pakera toringi.

<sup>25</sup> Wali yupoko Rom iyemani na mapuni toringi; walite Juda imbomani na kouni toringi, wali yupoko na sipina andoru kinye topa bultupe kamukumu keri lierimu; walite sip teaku terimu kinye na nomu kutana tukundo ipo leli tangoli wali talo Peru;

<sup>26</sup> Ulke tengawali awini naa pepo, kombu lupe lupemanga awini pelipo kau andoru; andoru kinye wali marenga pondeanga na nona purula; wali marenga wapu noli iyemani na toko melema wapu lingei teringila; wali marenga nanga Juda imbomani na tongei teringi; wali marenga Juda imbo talapena tawendo imbomani na tongei teringila; wali marenga taunomanga na tongei teringi; wali marenga na kombu ku lelina andoru kinye na topa kondombai ulumare wendo orumu; wali marenga nomu kutana na no wangorula;

wali marenga iye maren i kolo toko lino Kraistainga iyema moromolo ningolio nanga kongonoma pipi tindingei teringila.

<sup>27</sup> Mindili nombo umbunima pepili kongonoma andopo tepo, kongono terumunga wali awini uru naa pepo, wali awini engele kolopa no wali tepili molopo, wali awini langi naa nombo we pepo, wali awini ali terimu kinye wale pakoli pakombo te naa lerimu kolona paa koloru.

<sup>28</sup> Akumu kau molo. Umbuni mare peya na kinye wendo oromo. Waliwalima nani Kraistainga imbo talapema nokomboindo konopu paa awini lipo mundurumunga na konopuna umbuni awini pepili moro.

<sup>29</sup> Kraistainga imbo te yu enge nimbe moromo mele pora nimo kinye na kape yu kinye kondo koromunga konopu enge pepili naa moro. Melteni Kraistainga imbo te kondi toromo kinye yuni enge nimbe pimo mele tiye kolopa tepa kenjirimo kinye na paa kamelena mindili teremo.

<sup>30</sup> Nanga imbi nimbo pala mundumbo lemo na tepa tamba timbei teremo uluma nindu kano mele nimboi tero.

<sup>31</sup> Awili Jisasinga Lapa Gote, yunge imbi waliwalima lipo ola mundurumolo, yuni ungu i nioma kolo toromo manda naa nimbelo.

<sup>32</sup> Kombu awili Damaskus na puru wali iye nomi king Aretasinga kombu nokondorumu iye awilimuni ami iyemani na ambolko liko ka tiengei, Damaskus pape kere-puluna nokoko angilengei nimuna nokoko angilerengi.

<sup>33</sup> Nalo pape ombona nokoko anglerengimunga nanga angenupili maren i na wale basketena lakikolio papena ka moko toko liko tawendo munduringi. Aku terengimunga aku iye awilimuni na ka timbei terimumu ka naa tipili nimbo kowa puru.

## 12

*Pol mongo indi kumbu tepa kanopalie ungu enge nili mare awini pilerimu kinye melteni yunge kangina torunu ungumu*

<sup>1</sup> Nani nanu kapi nimbo nanga imbimu nanu lipo ola munduro mele paa lipo ola mundumbola. Aku tepo, na nanu imbi lipo ola mundupo kapi niomu ulu pengama naa tero kani eno kinye na kinye lino naa lipe tapondombalo nalo Awilimuni mongo indi kumbu tipelite ungu lopeke tepa peremo mare lipe ondoromunga nimbo tiemboi.

<sup>2</sup> Kraistainga iye te kanopo imbi tiro,aku iyemu poinye 40 ombo pupili oii Awilimuni yu lipe mepa mulu kombu paa olandopamuaku mulu kombu yupoko tipemu nimelemunga tukundo mepa purumu. Aku iyemu kangi pali meli purumu molo minimu kau

meli purumunje, na naa pilto. Goteni kau yunu pimo.

<sup>3-4</sup> Aku iyemu, Goteni mulu kombu paa pengana lipe meli purumu mele pilto, nalo akumu kangi pali mepa purumu molo minimu kaunje, na naa pilto. Goteni pimo. Aku iyemuni ungu mare pilerimuaku unguma imboma pilengei ningolioimbomani ningeindo perelema. Imbomani naa ningi tiengei ningi mi toromele unguma pilerimu.

<sup>5</sup> Iye te aku tepa ulu te terimu nio iyemunga imbimu lipo ola mundundupo kapi nindimbo nalo nanga imbimu lipo ola mundupu kapi naa nimbo. Nanga imbimu lipo ola mundembo nimbolio na enge te naa peremo mele kinye umbuni na kinye wendo oromo mele kinye kau nimbo tipo imbi lipo ola mundumbo.

<sup>6</sup> Molo nani paimbo nanu kapi nimbo nanga imbi lipo ola mundulkanje, paimbo unguma kau nilkamunga na keke lepo toli iye te naa molka. Na kinye uluma wendo orumu temanemu imbomani pilkollio nanga imbi liko ola mundunduko na liko awili tilimalanje manda naa telka. Na we tepo molopo ungu nimbo tiroma kau kanoko pilkollio na moro mele tumbi tiko pilengei.

<sup>7</sup> Goteni na mulu kombuna mepa pumbe na mele paa pengama lipe ondoromuna kanorumunga Goteni na none naa teambo nimbe nanga kangindo mindili nombo molombo melte tirimu. Aku meleme kuromanga nomi Satanenga kendemande teni na mindili nopili nimbe waliwalima mindili tirimo.

<sup>8</sup> Awilimuni na lipe tapondopa umbuni akumu wendo lindipili nimbo wali yupoko yundo enge nimbo konge teru,

<sup>9</sup> nalo yuni umbunimu wendo naa lipelie nando nimbeindo, imbo te enge naa peremo kinye nanga engemuni yu enge paa olandopa peremomunga nani nu we kondo koro ulumuni nu manda molonio nimu. Yuni aku tepa nimumunga ulu maren i na tepa tamba tirimona Kraistainga engemuni na kinye peremomunga paa tono kolopo moro.

<sup>10</sup> Na Kraistainga kongono tenderomunga kuro topa kangi tamba nimo molo konopu enge naa peremo kinye kape, na teko kenjiko ungu taka tondoko teko pipili kondoromele kinye kape, na kinye umbuni awini wendo oromomunga mindili noro kinye kape, imbomani na konopu keri panjikolio na umbunima wendo opili ningi na teko kenjiko mindili tirimele kinye kape, na konopuna umbunima tepa wango naa nipiili moro kinye kape, aku tepa umbunima wendo wendo oromo kinye na enge te naa peremo kinye, Kraistainga engemu na

kinye pepa na nokoromomunga enge pepili molopo konopu wango tipo aku uluma wendo opili nimbo moro.

*Poloni Kraistingu Korin imboma Kraistingu ungumu enge ning pimele mele tiye naa kolko kamukumu enge ning pilko molangei nimu ungumu*

<sup>11</sup> Nanga imbi ola molopili nimbo nanu kapi nimbo kano ungu niomu manda naa tepili, nimbo kenjipo keke lepo toro nalo enoni na aku ulu teambo nimele mele tero. Aku iyemani na ningko kenjiringi kinye eno pilengei eno Korin imbomania na iye pengamu ningko kapi nindilimalanje paa. Na paa imbi moromo iyemu konopu naa lteo nalo aku iyema lino Kraistini nanga kongonomu tendepao nimbe lipe mundurumu iye penga awili olandopama moromolo nimele iyemanga na iye mandopa te naa moro.

<sup>12</sup> Kraistini Nanga kongonomu tendepao nimbe lipe mundurumu iyemani teremele mele na eno kinye molopolio naaku teli iye te moromo ningko kanangei nimbo nani aku tepo ulu mare teru. Na paa mindili noru umbunima we meambo nimbo tiye naa kolopo enge nimbo molopolio, ulu enge nili awini lupe lupema tepo, imboma kanokolio paa mini Iteremele ulu enge nilima teru kanomu.

<sup>13</sup> Nani Kraistingu imbo talape mare kinye teru mele olandopa, eno Korin Kraistingu imbo talapemu kinye teru mele mainyendopaya? Ulu tendekumu kau teru, eno Korin imbo talapemu kinye naa teru, akumu kongono tenderumunga eno umbuni tipo melema tapaio ungu naa niu. Eno umbuni aku tepo naa tirumu alowa teru nalo alowa terumunga na kinye konopu keri naa panjiko, tiye kolaio.

<sup>14</sup> Kinye na eno moromelena wali yupoko tipo omboi tero nalo ombolio eno umbuni te tipo melema tieio nimboindo naa ombo. Na enonga melema konopu mondopo limboindo naa ombo. Na eno konopu mondopo kanomboindo ombo. Bakulumani anupili lapali pele liko tapondongeindo melema naa noindirimele; anupili lapalini bakuluma liko tapondongeindo melema noindirimele.

<sup>15</sup> Aku tepo, nani eno lipo tapondambro nimbo konopu tipo nanga melema eno timbo, na nanu kape eno timbo. Nani eno konopu olandopa mondromunga enoni na alaye teko konopu mondonge aku mandaya?

<sup>16</sup> Aku enonga tengenalo nani eno umbuni te naa tiru. Nalo enonga iye maren Poloni lino umbuni we tirimo, yu melema naa tirimolomunga kou mone wapu limbeindo nimbe amo tondoromo,

imboma lipe tapondombaindo tieio naa nimo nimele. Kondi toli ulu pulumu Pol kinye peremo nimele.

<sup>17</sup> Akumu ambe temona nimeleya? Nani iye mare eno moromelena paio nimbo lipo mundurumu akumani enonga melema wapu liengei paio nimbo lipo munduruya?

<sup>18</sup> Nani oi Taitus eno moromelena paa puwi nimbo enge nimbo lipo munduru wali linonga angenu te Taitus kinye koniye leko palio nimbo lipo mundurula. Pele, Taitus eno moloringina ombalie eno nimbe amo tondopa melema wapu ltimuya? Taitus kinye iltonga konopu tendeku tipe pepili ulu teremboloma tendeku tipo naa teremboloya?

<sup>19</sup> I pipia topo tiromu yuni teremo mele tumbi tipe teremo ningko pilengei nimbe topa tirimo ning pimeleya? Paa molo! Gote pilipe molopili i nio. Kraistini niwi nimo mele nio. Nanga imbo konopu mondoro imboma, nani ulu teroma pali eno lipo tapondopo konopu enge pepili molonge uluma kau tero nio.

<sup>20</sup> Ambe temona eno moromelena ombo wali penga teko molangei konopu lteo mele naa molongena kanambo. Enoni kape na opili konopu lenge mele naa ombona kanonge. Ombo kanombo kinye eno opa karaye teko, teko kondoko mele pengama noirimile imboma kinye konopu keri panjiko, popenge teko mumindili kolko, imboma kondo kolko liko naa tapondoko eno enongano yu mele mele nokoko, imbomanga ungu umbulkondo nindiko, andoko kolo toko imboma temane tokotiko, eno mongo lili imboma molko, nendo yando unguma naa pilko konopu tendekumu naa pepili uluma yu mele mele teko embambo tiko, ulu keriaku tepama teko paa molko kenjinge kinye kanombonje nimbo piomunga na mini ltepo moro.

<sup>21</sup> Eno moromelena ombo kanombo munga ungu te peya peremola. Eno moromelena altopo ombo kinye eno kanoko molangei nanga Goteni na tepe pipili kondombalo. Oi ulu pulu keri teringi imbomania teko kenjiringi mele kanoko keri naa pilko konopu topele naa toringi lemo ulu keri te na kinye wendo ombalo. Amboma kinye iyema kinye wapera toringi uluma kinye, iye naa pungo ambo naa lili imboma ulu kerinali teringi uluma kinye, aku teko ulu kerima kau teneindo eio ningko konopu kimbo tiko andoko teringi uluma kinye, aku ulu teko kenjiringima kanoko keri pilko konopu topele naa toringinje. Oi teringi mele we teko moromelenje nimbo pilipo na mini ltepo moro. Paimbo aku ulu teko molangei ondu lemo kanopolio na eno kinye konopu umbuni tepili kola tembo.

## 13

*Poloni Kraistingu Korin imboma kamukumu lepi lepi topa, molonge mele enge nimbe mane tirimu ungu mare*

<sup>1</sup> Kinye na wali yupoko tipe eno moromelena omboi tero. Omboi tembomunga ungu te Gotenga bukuna nimo mele i tepa,

Imboma pilko molangei imbo teni imbo te ulu te tepa kenjirimu mele nimbe timbelo kinye imbo akumuni tepe kenjimbelo mele imbo taloni molo yupokoni kanokolio yu tembaloo mele manda ningi tinge kinye kau ungumu pilko imbomuni paimbo tepe kenjirimu ningi pilengei! Imbo tendekumuni kau nimbe timbelo ungu naa pilengei! (Lo 19:15)

nimbe moromo.

<sup>2-3</sup> Kraistini nanga kerena ungumu nimbe tirimonje ningi pilko liko ondowi nimelemunga nani oi wali talo tipe eno kinye ombo molopolio lepi lepi topo tembo niu mele kinye altopo aulke tulena molopolio lepi lepi topo niola. Oi ulu pulu keri teringi imboma kinye, we imbo lupemani altoko ulu pulu keri teremele imboma kape, te tiye naa kolopo eno pali mindili nangei nimbo. Kraist yuni enge pepili eno tepe amenge teremo. Teko kenjirimelemunga mane timbeindo enge naa pepili tambo nimbe naa teremo.

<sup>4</sup> Paimbo oi yu enge te naa perimu kinye unjo polopeyan uku toko panjiringi kolorumu nalo Gotenga engemuni yu koinjo moromo. Na yu kinye tapu topo morombolomunga yu oi enge te naa pepili molorumu mele na enge te naa pepili morola, nalo na eno moromelena ombo wali Kraist peya tapu topo molombolomunga Gotenga engemuni na kinye pepili eno enge nimbo mane timbo.

<sup>5</sup> Enyu mele mele enongan enonga konopuma apuruko pilkolio, lino Kraist paimbo, Yunge ungumu paimbo nimbo enge nimbo pilipo moromolonje molo molonje ningi pilengei! Enongan yu mele mele paawamongo pilengei! Kraist Jisas enonga konopuma moromo ningi pimele konopu lteo. Molo aku teko manda manjiko pilkolio paimbo nimbo enge nimbo naa pilipo moromolo ningi pilengeiya?

<sup>6</sup> Nalo lino kongono teremolo mele wamongo kanoko pilko apurukolio lino paimbo Kraistini Yunge kongono tendepao nimbe lipe mundurumu iyema moromolo ningi kanangei konopu lteo.

<sup>7</sup> Na Gote kinye ungu nimbolio, enoni ulu te teko naa kenjingei liko tapondowi nimbo konge tero. Lino Kraistini Yunge kongono tendepao nimbe lipe mundurumu iyema moromolo ningi kanangei nimbo aku tepe

yu konge naa tero. Akumu ulure molo. Enoni lino kongono teremolo mele kanoko apurukolio yu kolo toli iyemu ninge lemo manda nalo enoni ulu tumbi nilima kau teko molangei konopu lteo.

<sup>8</sup> Ungu paimbomu tepo mainye mundumbo manda naa temolo. Ungu tukumemu waliwalima lepa kau pumbelo uluma kau lipo tapondopo temolo.

<sup>9</sup> Lino tepe tambo timbei umbunima wendo omo lemo ungure molo nalo ipuki tiko moromelemunga lino tono koltomolo. Aku tepo Goteni eno lipe tumbi tindipelie molko kondangei enge tipili nimbo Gotendo konge tendepo moromolo.

<sup>10</sup> Awilimuni na yunge kongonomu tendani nimbe eno tepo enge tipo mondambuo imbimu na tirimuaku imbimuni eno moromele ombolio nani eno enge nimbo iri topo eno nimbo maindo naa mundembuo konopu lepolio na kombu tulena molopolio i pipiamu eno topo tipo olandopa olandopa tumbi tiko molangei nio. Awilimuni eno molko kenjingei kongonomu teani nimbe na imbi aku tepamu naa tirimu.

*Poloni pipiamu topa pora timbeindo torumu unguma*

<sup>11</sup> Manda, nanga ang oame, pipia manda topolio eno molaio nio. Eno olandopa olandopa imbo tumbi nilima molamili ningi aku teko molonge uluma enge ningi teko, nani eno teangei nio mele pilko liko teko, konopu tendekuna pupili tendeku tiko molko, ame toko molaio. Aku teko molonge kinye Goteni eno konopu mondopa, eno konopu tendekuna pumbe u nipili takliko molangei nimo iyemu eno kinye molombalo.

<sup>12</sup> Gotenga imbo kake telima moromelema ang oame ningi eno enonganeno nendo yando kangulko kondo kolko molaio.

<sup>13</sup> Gotenga imbo kake teli i moromelemani pali eno molko kondaime nimele.

<sup>14</sup> Awili Jisas Kraistini eno pali we kondo kolopo molopili molko, Goteni eno pali konopu mondopa molopili molko, Mini Kake Telimu eno kinye pali tapu topa molopili molangei. I peya nio.

## **Poloni Galesia Imboma Pipia Topa Mundurumumu**

### **Galesia I Ungu Torumumunga Ungu Pulu Mare**

Poloni Galesia imboma mane tipelie kombu tenga purumu wali. Juda iyemareni yu akilio leko ongo Poloni ungu mane tipelie wali kolo torumu ningyu aposelere molo ningi. Akumani oi Moses mane tirimu ungu nimelema lombilinge lemo kau Goteni eno tukundo limbelo ningi. Nalo Jisas ipuku tirimele wali kau Goteni lino tukundo lipelie yunge unguma manda tengen timolo engemu tipe linonga ulu keri teremoloma kulomie tondombalo konopu leangei nimbeline Poloni i ungu topa panjirimu.

Goteni nu oi imbomanga ungu mane naa pilko likolio Jisasinga ungu tukume kau ipuki tieni nipili!

<sup>1</sup> Na Pol Jisasini kongono tepuwi nimbe kanopa lipe tipe mundurumu iyemu. Na manga pupureni kongono tepuwi ningyu naa liko munduringi. Iye muli muli teni kape na imbi topa kanopa lipelie i ungu ningyu kongono tepuwi ungu naa nimu. Aku molo. Nalo Jisasi Kraist kinye Gote Arani Jisasi yu kolorumu wali topa makinjirimu aku taloni na liko munduringili.

<sup>2</sup> Na Pol kinye Jisasinga kongono waye tempo moromolo imbomani konopu lipo manjipo eno Galesia kombu Kraistinguungumu pilko moromele imboma i pipiamu topo tiemili nimbolio enondo topo tiro.

<sup>3</sup> Linonga Gote Ara kinye Awili Jisasi Kraist taloni eno konopu koya leangei ningyu tapoko mane ungu tiengili nimbolio kongetero.

<sup>4</sup> Jisasi Kraistini lino ulu pulu keri teli imboma tempo koinjo limbo nimbeline kolorumu. Aku tepalies lino ya i mai kombumanga ulu pulu kerimanga wendo ltimu. Jisasini aku terimu ulumu linonga Ara Goteni tepili konopu lerimu mele lombilipe terimu.

<sup>5</sup> I Gotenga imbimu ola kau molopa pupili nemili. I paa.

*Galesia kombu imbomani Gote tiye klongei teremele*

<sup>6</sup> Aku Gote yuni Jisasi Kraistinguungumu eno tepa tukundo ltimu. Wali alaye kolonga i teli eno tiye kolondu wali manda molonge kano. Nalo kinye eno ungu tukume te lupe pilemili ningyu Gote umbulu tirimelemunga na mini purumo.

<sup>7</sup> Nalo aku nimelena piltiemele ungumu Jisasinga paimbo ungure molo. Aku ungu imbo marenii Jisasinga ungumu anekale tekolio enonga ungu kolomare tukuruku teko paimbo ungure none tenderemele. Aku teremele ulumuni enonga konopu teko embambo tirimele.

<sup>8</sup> Lino Gotenga paimbo ungumu nindipo mendepo andoli iyemani Gotenga ungumu peremo mele naa nili te tepa mele nili malanje aku lino Goteni paa tepa tolka. Gotenga mulu kombuna kongono iye ensel teniaku tepa kala ungu lupe te nilkanjele aku Goteni yu kape paa tepa tolka.

<sup>9</sup> Oi nimulu ungumu kinye kano ungumu altopola nio! Linomi eno oi Gotenga ungumu nimbo tirimulu kano mele imbo marenii naa nili kelko ungu mare tuku munduko enondo ningyu tinge lemo aku imboma Goteni kamukumu paa tepa tombalo nio. Da ulumu eno kinye wendo ombalanje? Kane kane molaio.

<sup>10</sup> Liko manjeio! Unku aku tempo nimbolio na imbomani kapi nengei nimbo naa nio. Aku molo. Goteni na penga nipli nimbolio kau nio nalo nani imbomani na kapi nengei konopu lendu lemo aku na Jisasi Kraistinguungumu iye tukumemu naa molombo. Nalo na Kraistinguungumu iye tukumemu moro.

#### *Polyunge temanemu topa tirimu*

<sup>11</sup> Nanga Kristen imbo angko kame, enoni liko manjeio. Unku tukumemu nani eno nimbo tiro aku kanomupe imbo imbomanga konopuna wendo oli ungure eno naa nimbo tiru kano. Aku molo.

<sup>12</sup> Imbo iyereni kape i ungumu niwi nimbe naa nimbe tirimu. Tendeku tepala imboreni kape i ulumu tewi nimbe mane naa tirimu. Nalo Jisasi Kraistini aku kano nimbo tiro ungumu yuni nando mongo indi kumbu te lipe ondopalies imboma ningyu tipuwi nimu ungumu eno nimbo tiro kano.

<sup>13</sup> Oi na Juda imbomanga Gote popo toringi ulumunga tuku molopolio waliaku nanga teru temanemu eno pimele kano. Aku wali nani Jisasinga imboma mindili lipo tipo paa tempo tomboi teru kano unguma eno pilko liko manjirimeli.

<sup>14</sup> Juda ara kaue kameni teao ningyu uluma nani kumbendo noipo moloru. Nanga iye konimanga imunana na iye paa kiyendomu. Nani nanga Juda imbo ara kaue kamenga ulu puluma kele topo lombilipo tempo kondorumu aku imbomani kape lombiliko teko kondangei nimbolio teru. Akumunga nanga imbimu ombo ola purumu.

<sup>15</sup> Aku uluma teru nalo na amani oi naa meli wali Goteni na kinye konopu noipe na

yunge kongono iyemu molambo nimbeline imbi topa kanopa ltimu.

<sup>16</sup> Aku tepalie Goteni yunge marenu Jisasi kanopo imbi tiemboi nani Jisasinga ungumu imbo lupemando nippemboi nimbeline na lipo ondomblo konopu lerimu wali nani imborendo na ambe teamboya na ambele ungumu nemboya ungu naa niu.

<sup>17</sup> Aku wali Goteni oi imbi topa kanopa ltimu kongono tipe munduli iye akumando na ambe teamboya nimbo Jerusalem kombu moloringindo olando naa puru. Aku molo. Aku wali na walitikale Arebia nimbe kombu mai pundu tengah welto pumbolio altopo Damaskus kombu taunona yando oru.

<sup>18</sup> Goteni yunge marenu nando lipe ondorumu walimunga winjo nilipo ombolio aku poiney yupoko ombo purumu. Aku wali pele Pita kanomboi Jerusalem kombundo olando puru. Akuna pumbolio, wali 15 kau Pita kinye moloru.

<sup>19</sup> Akuna Goteni imbi topa kanopa ltimu iye kongono tipe munduli wema te naa kanoru. Nalo Awili Jisasinga angenu Jems kau kanoru.

<sup>20</sup> Ya! Eno wamongo pileio! Nani Gotendo mi lteo. I pipia topo tiro unguma paimbo ltemo.

<sup>21</sup> Altopo Pita kano tiye kolopolio pele Siria kinye Silisia kombu mai talonga yando oru.

<sup>22</sup> Judia kombu maina tukundo Jisasi ipuki tiko moloringi imbomani na kanoko imbi oi naa tili.

<sup>23-24</sup> Nalo imbo mareni ungu temane toko andokolio ningei, "Lino Jisasi ipuki tipo moromolo imboma tombai andorumu kano iyemuni altopa Jisasinga ungu temanemu tondoromo. Aku iyemu yuni oi aku ungumu kinye opa pule tomo kano. Nalo kinye aku ungumu nimbe tirimo," ningi. Aku ungu pilkolio wali imbomani Gotenga imbimu kapi ningi.

## 2

*Oi aposel moloringimani Pol Gotenga kongono iyemu moromo ningi pileringi*

<sup>1</sup> Altopa poiney 14 ombo purumu kinye na kano Jerusalem kombundo altopola olando puru. Aku wali Barnabas na kinye waye purumbulu. Taitus kape nani lipo meruna waye purumulu kala.

<sup>2</sup> Aku purumu imboreni owi nimuna naa puru nalo Goteni na paa puwi nimbe mona lipe ondorumuna puru. Jerusalem kombu wendo pumbolio imbo lupema nimbo tilipo andoru kano ungu tukume tendekumula moke teko kanangei konopu lepolio iye aposelemando nimbo tiru. Nani imbomando oi Jisasinga temanemu toy

topo niunje kinye Gotenga ungumu paa nionje konopu lepolio Kristen imbo palini Jerusalem kombu iye muli muli moromele ningi wale pakoromele kano iyemando eno oi pilengei ungumu mainye ambolopo kondopo niu.

<sup>3-5</sup> Nanga ungumu Pita kame aku waye moloringi iyemando nimbo tiru. Nalo aku wali imbo mareni linonga ipukimu tekoko kondongeimunga Jisasini Juda imbomanga mane ungu wamoko panjiko lombileli ulumanga lino tepe koinjo mondorumu ulumu kalake kanoko tekoko kenjingeimunga eno Kristen imbo tukumema none tekoko kunduko lteko tukundo oringi. Aku ongolio imbomani Taitus kano kangi pundu kopeio ningi. Aku wali linoni imbo aku tekoko ningimanga ungumu naa pilipo ltimulu. Paimbo Taitus yu Juda iyere molo nalo da wali Juda Kristen imbomanga iye nokoli akumani Taitus kangi pundu kopipe lepili ungumu naa ningi. Linoni paimbo ungumu ingi nimbo ambolopolio imbo akumando nendo tipo enge nimbo angilerimulu. Aku terimulu ulumupe paimbo ungu tukumemu eno tapopa enge nimbe lepili nimbluo terimulu.

<sup>6</sup> Enonga ungu imbo iye koinjomani oi Jisasi kinye koniye leko andoringi iye akuma iye muli mulima ningi wale pakoromele. Imbo imbomani teremele mele Goteni iye imbimunga nimbe naa lipe manjirimo. Iye muli muli akuma enonga paa iyema akumunga ungure molo. Nalo nani aku ungu nimbo tiru wali iye aposelemani nanga niu ungumunga te akuko ola munduko naa ningi.

<sup>7</sup> Nalo enoni ulu teteko liko manjirringi. Aku wali Goteni Juda imboma yunge ungu nimbe mundulimu Pitani nimbe tipili nimbe kongono tirimu mele naaku tepala Juda imbomanga imbo lupema Gote yunge ungu nimbe mundulimu nimbo temboi nimbe na kongono akumu tirimu konopu leringi.

<sup>8</sup> Gote Arani Pita kape Juda imboma ungu mune mondopa tipili nimbe aposel kongono lipe mundupelie ulu enge nili mare yu kinye terimu. Na kape aku tepe kala imbo lupema mune mondopo nimbo temboi nimbe aposel kongonona lipe mundupelie na kinye ulu enge nili mare terimu ningi liko manjirringi.

<sup>9</sup> Goteni na kape mane ungu lakopa tirimu ningi liko manjirringi kala. Enonga ungu imbo iye koinjomani Jems, Pita kinye Jon pokon wale pakoromele. Ambe temona, iye akumani Kristen imbona ungu mane tirimele. Aku iye pokon eno Goteni alako topa kanopa lipelie kinye Juda imboma ungu ningi tieio nimbe kongono tipe mundurumu mele na kinye

Barnabas talo ilto kape aku tepa kala imbo lupemando ungu nimbo tiembili kongono lipe mundurumu ningko konopu tendekuna pupili ee ningko ki ltingi.

<sup>10</sup> Iltondo imbo koropa nolima kau walwalima lino peyani tapamili ningi. Aku ulu pulumu nanga oi temboi teru ulumunga kelko tewi ningi wali kape na kamukumu tono kolopo teru.

*Pitani ulu alowa tenderimuma Poloni nimbe para tirimu*

<sup>11</sup> Nalo altopa Pita kano Antiok kombu ombo molorumu wali nani imbo palinga kumbe kerena yu nendo tipo iri toru. Aku ambe telka yuni ulu alowa te terimu.

<sup>12</sup> Alowa terimu ulumu i tega, Juda Kristen imbo mare Jems kinye molkolio oi naa wangei wali Pitani wendo Kristen imbo lupema kinye langi nomba molorumu. Nalo altopa Juda iye kangi pundu kopeio nimelemani Jems kinye molkolio oringi wali Pitani Galesia imbo waye moloringi kanoma molangei yu kundupe iterimu. Aku ambe telka yuni Jems kinye molkolio oringi Juda Kristen imbo akumanii imbi keri tindinjenge pipili kolopalie terimu.

<sup>13</sup> Aku wali Antiok kombu moloringi Juda Kristen imbo wemani konopu talo lekolio Pitani terimu ulu teko tukuruku peringi. Aku teringina kanopalie Barnabasini kape aku ulu kala terimu.

<sup>14</sup> Nalo Gotenga ungu tukumemu lombilko naa kondoringi ulu nani kanopalio kinye imbo pali nombeaya teringi wali nani Pitando nimboindo, "Nu paimbo Juda iyemu nalo nu imbo lupema kinye koniye lekolio enonga ulu puluma tereno. Aku tekolio Juda imbomanga ulu puluma naa tereno. Akumunga ambe telka nuni Juda imbomanga ulu puluma imbo lupemando paa teao ninoya?

<sup>15</sup> Nu kinye na kinye ilto Juda iye talo. Juda imbomanga mane ungumu naa pilkolio ulu pulu keri teremele mele ilto aku tepa iye talte kape molo.

<sup>16</sup> Imboreni Juda imbomanga mane ungumu teremomunga Goteni yunge ulu kerima wendo lipe naa ltendembalo. Nalo imboreni Kraist Jisasini yunge nimbe kolorumuna ipuki tirimomunga kau Goteni yunge ulu kerima wendo lipe ltendembalo aku tepo lipo manjirimbolo. Akumunga iltono Jisasini ipuki tirimbulu.

<sup>17</sup> Ilto Kraistindo ipuki tipo yunge ungumu pilipo lombilipo Gotenga iye talo molombili lepolio Juda imbomanga mane ungumu lombilko teremele ulu akuma umbulu tirimbulu kano. Iltoniaku terembolo kinye Juda imbomani ilto iye ulu kalaro teli talo nimele kano. Aku ulu

pulu wendo oromomu iltoni Kraist pulu panjimboloya? Aku paa molo.

<sup>18</sup> Juda imbomanga mane ungumunga umbulu tirimbulu wali aku iltoni ulu aloware naa terimbulu, nio. Nalo kinye i tepo nio, kelepo nani oi umbulu tiru ulumu altopo ipuki tipo lombilipo tendu lemo Juda imbomanga mane ungumu paa topo tangondoli imbo kerimu nimbo nanu lipo ondombo.

<sup>19-20</sup> Nalo aku ulu yando naa limboi. mane ungumuni na ulu alowa teli iyemu kolopili nimumunga Goteni na Kraist kinye unjo polopeyana kopu teko kolani nimumunga koloru. Kinye na iye kololimu moro nalo Kraist yu nanga tukundo koinjo moromomuni na Gote kinye koinjo moro. Gotenga malo iye Jisasi na konopu mondopa nanga kolo wangopa kolorumu kano iyemu ipuki tipo tukundo lipolio na mai kombuna andopo moro.

<sup>21</sup> Goteni na kinye konopu mondopa aku ulu enge nili terimumundo umbulu naa tiro. Goteni imbomanga mane ungumu kau lombilimbelo imbo tendo nimbei nu nanga imbo toya tolimu nilkanje aku Jisasi yu unjo polopeyana we kolka!" niu.

### 3

*Poloni nimbe lepalie Jisasi kau ipuki tieio nimu*

<sup>1</sup> Nani enondo Jisasini unjo polopeyana kolopalie terimu ulumu mona toya topo lipo ondopo nimbo tiru kanomu. Nalo enondo imboreni ungure nimona enonga konopuma mepa andorumuya? Eno Galesia kombuna tukundo Gotenga ungumu pilko moromele imboma eno imbo paa konopu keke lepo tolima.

<sup>2</sup> Oi Gotenga Mini Kake Telimu ltingi. Eno Juda imbomanga mane ungumuni teaio nimo mele aku uluma lombilkolio Gotenga Mini Kake telimu ltinginje molo eno Jisasinga ungu koinjomu pilko ipuki tikolio Gotenga Mini Kake Telimu ltingiya? I ungumu maa naa tondonge lemo na ningko tieio.

<sup>3</sup> Oi Mini Kake Telimunga engemu liko eno Gotenga imboma molkolio andoko teringi. Nalo kinye enongano engemunga angilengei teremele. Akumunga kinye eno imbo konopu keke lepo tolima mele andoko moltomene. Eno ambe tenggei teremeleya!

<sup>4</sup> Aku tengge lemope eno Kraistainga ungumu pilko molkolio wali umbuni pulumu meringi. Nalo kinye eno Juda imbomanga mane ungumu pilko lombilenge lemoaku oi umbuni meringi kanoma we meringi. Naloakuumbunima we meringikonopu naa lteo.

<sup>5</sup> Mini Kake Telimuni eno moltomelena kongono enge nimbe ulu wengendelima teremo. Goteni yunge Minimu tirimumu aku Juda imbomanga mane ungumu lombilko teremelemunga tirimunje molo yuni eno Jisasinga ungu koinjomu pilko ipuki tiringimunga yunge Mini Kake Telimu tirimuya?

<sup>6</sup> Eno ipuki tirimele ulumu oi Israel imbomanga kalopa lili Abrahameni kape i ulu terimu. Abrahameni kape Gote ipuki tirimu kinye Goteni Abraham nu nanga iye toya tolimu nimu.

<sup>7</sup> Akumunga eno wamongo liko manjeio. Gotenga ungumu pilko Jisasi ipuki tinge imbo akuma kau paimbo Abrahamenga bakuluma molonge.

<sup>8</sup> Koro oi Goteni Juda imbomanga imbo lupema pali yunge ungumu pilko Jisasi ipuki tinge lemoaku imboma nanga imbo toya tolima nimbo nimbelie konopu kili kili ltendepa noirimu. Aku konopu lepalie ungu tukumemu Goteni Abrahamendo mi lepa nimbei,

Nu kolo nimborio mai kombu imbo palima mane ungu timbo, (*Stt 12:3, 18:18*) nimu. Aku ungu tukumemu Gotenga bukuna nimbe peremo.

<sup>9</sup> Akumunga Goteni mai kombuna imboma yunge ungumu pilko Jisasi ipuki tingema popo tipo Abraham yunge ungu pilipe ipuki tirimu iyemu kinye mane ungu timbo nimu.

<sup>10</sup> Nalo Gotenga bukuna i tepe nimbe momomo:

Mosesini Gotenga ungu torumumanga imbo reni waliwali pilipe lombilipe naa kondomo lemo Goteni imbo akumu paa keri tepe topili. (*Lo 27:6*)

Akumunga imbo narireni na Juda imbomanga mane ungumu lombilipo teromunga na Gotenga imbo toya tolimu moro konopu lenge lemoaku imbomu Goteni paa keri tepe tombalo.

<sup>11</sup> Nalo Gotenga bukuna Goteni koro oi nimbei:

Imbo narire nanga ungumu pilipe ipuki timbelo da imbomu nani nanga imbo toya tolimu nimbo kinye yu koinjo molombalo, (*Hab 2:4*)

nimbe peremo. Imunga imboreni Mosesinga Torumu ungu akumu kau lombilipe temo lemo Goteni imbo akumu nanga imbo toya tolimu naa nimbelo. Kinye i ungumu moro toromo.

<sup>12</sup> Gotenga bukuna i tepe nimbe peremo:

Imbo narireni mane ungu ulu puluma pilipe lombilipe temo lemo yu koinjo molombalo, (*WKP 18:5*) nimo kanomu. Kano tepe, mane ungu lombilipolio akumunga koinjo molomolo manda teremo nimelemani Jisasi ipuki tipolio koinjol molamili ungu naa nimele.

Nalo imbo te Juda imbomanga mane unguma pali manda naa lombilimbelo.

<sup>13</sup> Imbore i mane unguma pali naa temo lemo Goteni yu tepe topili nimbe ltemo kano. Lino pali imbo aku tepo moromolo nalo Kraistini lino ungu kanomunga maindo naa molangei nimbe linonga kombu lipe kolo wangopa kolorumu. Kolorumu wali, Mosesini torumu mane ungu te yu pala orumu. Aku ungumu i tepe:

Iye te toko unjona uku toringimu Goteni tepe topili, (*Lo 21:23*)

nimbe ltemo. Kano tepe kolorumu wali Kraistini Goteni tepe topili ungumu lino pala naa opili nimbelie lino wendo lipe tepe litimu.

<sup>14</sup> Kraistini lino tepe ltimumunga Goteni imbo lupema Abraham kinye popo tipe mane ungu manda tirimu. Aku wali Kraistinguungumu pilko ipuki tinge imbo palima Goteni yunge Mini Kake Telimu tipo mundumbo nimbe mi lerimu akumu manda linge.

*Goteni mi lepa ungu nimuaku ulu tukumemu*

<sup>15</sup> Kristen imbo ang o kame, kinye nani ya i mainye mai kombuna imbomani ulu teremele mele manda lepo nimboi tero. Imbo te kolombai wali kande ungu nimbe mi lembalo mele imbo teni neyaaku kande ungumu alowa tendembalo mele molo. Aku tepe mele mane ungumu altopa nimbumuni oi Goteni kande ungu mele nimbe mi lerimu ungumu altopa mane ungumuni naa ongondoromo.

<sup>16</sup> I ungumu kinye liko manjeio. Goteni Abraham kinye yunge kalopa limbelo iye-mundo tembo nimbe mi lerimu uluma nimbe wendo mundurumu. Goteni ungu nimumuaku Abrahamenga kalopa limbelo imbomando ungu naa nimu. Nalo yuni imbo tendekumundo nimu. Aku Abrahamenga kalopa lili iye Kraistindo nimu.

<sup>17</sup> I nio ungumunga pulumu i tepe, Goteni kumbe lepa Abraham kinye ee nimbe mi lepa tembo nimu unguma oi nimbe wendo mundurumu. Altopa pele poinye 430 omaba purumu kinyeaku Goteni Moses mane ungu tirimu. Imunga Mosesinga mane ungumuni Gotenga Abraham kinye ee nimbe mi leli ulu pulumu manda naa kanopa ltenderimu. Aku ungu kiyendomu Gote yuni yunu kau ee nimbe i paimbo nimu. Abraham kinye yunge kalopa limbelo iyemu kinye Goteni kiyendo ee nimbe mi lerimu ulumu oi pora naa nili. Aku ungumu we lepa pumbelo.

<sup>18</sup> I ungumu kape nio kala Goteni mi lepa mane ungu timbo nimu melelu lino

Mosesini torumu mane ungumu lombilipoliomunga naa ltimulu. Nalo Goteni Abraham kinye mi lepa mane ungu timboi nimbelie kondo kolopa yu kinye konopu noipe yundo paa tirimu.

<sup>19</sup> Mi leli mane ungu timboi nimu ungumu lerimu nalo altopa pele Goteni ambe telka Mosesini torumu mane ungumu tirimuya? Imbomani teko alowa teringi uluma kanoko imbi tingei nimbelie tirimu. Goteni Abrahamenga kalopa limbelo iyemu timbo nimbe mi lerimu aku iye Kraist oi naa oli wali aku mane ungumu manda lerimu. Aku mane ungumupe enselemani Mosesindo tingei nimbelie Goteni mane ungumu aku tepe enge tirimu. Aku wali Moses imunana iyemuni mane ungumu imbomando yando nimbe tirimu.

<sup>20</sup> Imunana iyemu angilipelie kongono teremo wali imbomani enonga nendo yando kumbe kere kanoko ungu ningi alowa malowa naa teremele. Nalo Goteni oi Abrahamendo mi lepa mane ungu timboi nimu wali toya topa ungu nimu.

*Mane Ungumuni lino Jisasi kanoko imbi tieio nimbelie lino bakulu mele tapu tepe mepa purumu*

<sup>21</sup> Imbo marenii teko kala liko manjing: Goteni oi tembo nimbe mi lepa ungumu Abrahamendo nimbelie altopa Moses mane ungumu tirimu. Akumunga yu konopu talo lepalie terimunj? Nalo aku molo. mane ungumuni imboma molko kau pangei nipi li nimbe Goteni tilkanje neyaaku mane ungumu pilko lombilimala imboma Goteni nanga imbo toya tolima nilka.

<sup>22</sup> Nalo aku tepe mane ungu te naa peremo. Gotenga Baibelenanimbei, Mai kombu imboma pali ulu alowa teringi ulumani imboma pali pange tenderemo aku tepe mele nimbe peremo. Mosesinga mane ungumuni lino manda naa tembalomungaga Goteni Jisasinga ungumu pilko ipuki tingi imbomando mi lepo tembo nimu ulumu paa tembalo.

<sup>23</sup> Goteni mi lepalie tembo nimbe Jisasi ipuki tieio nimuaku waimu wendo oi naa opili wali, mane ungumuni lino pange tenderimuna maindo molorumulu. Mololipo pumbo, Jisasi ipuki timolo ulumu moro tombalo walimunga mane ungumuni lino pange tendepa manda naa ambolombalo.

<sup>24</sup> Goteni oi Jisasi ipuki tiemili nimbelie yunge mane ungumuni lino bakulu melema tapu tepe nokopili nimu. Nalo kelepo Jisasinga ungumu pilipo ipuki tirimolo ulumuni lino imbo yu apuwe itemolo. Aku pilipo ipuki tirimolomunga kau Goteni lino yunge imbo toya tolima nimo.

<sup>25</sup> Kinye lino Jisasi ipuki tirimolomunga mane ungumuni lino bakulu mele manda naa tapu tembalo.

<sup>26</sup> Jisasini terimu ulumu ipuki tirimolomunga lino Gotenga bakulumamoromolo. Kinye imbo pupu i lupe lupema Jisasinga ungumu pilkilo ipuki tirimelemuni eno Gotenga bakulumamoromole.

<sup>27</sup> Eno Kraista imboma molomolo ningolio ungumu pilko no ltingi kinye Goteni eno Jisasi kinye tendekutipe mondorumu.

<sup>28</sup> Ipuki tirimo imbomundo Goteni i tepe naa nimo: I Juda imbomu, i tawendo imbo lupemu. I koropa noli iyemu, i iye makomu ungu naa nimo. Kelepa i ambomu, i iyemu nimbe aku tepe moke naa teremo. Aku molo. Goteni imbi tipelie nimbei imbo Jisasi ipuki tirimele palima tendekutulu teremomunga Kraist kinyetendekutipo mondoronimo.

<sup>29</sup> Akumunga Goteni eno paimbo Kraist kinyetendekutipe mondodomolemoaku eno Abrahamenga imboma molonge. Kanomunga Goteni Abrahamendo ee nimbe mi lerimu ulumu kapeaku enondowaye kala nimu mele eno manda lingue.

## 4

*Lino imbo kerima molorumulu nalo Kraistini terimumuni, kinye lino Gotenga bakulumamoromolo*

<sup>1</sup> Ungu ko liponimboi tero te i tepe. Juda imbomani lapalini bakulumanganoindirimelomelema ltimele ulu pulumu i teko teremele. Melema limbelo imbomu yubakulumamoromowali lapanga kakkongonotenderemeleyiyemamoromelemele moromo. Paimbo altopa akopawili lepalie waliaku yunge lapaninoindirimo melema manda nokombalo nalo neyawali yuoi ka kongonoye melelapangamelema naanokombalo.

<sup>2</sup> Yuaku tepebakulumoromowali lapaniyungekongonointombomandoibakulukongonotepiliningoaltopoyutimomelema nokaionimo. Kelepa lapanikinye imbo yu moromonimo waliaku melema yunge kindotikotukundmundungeinimbelo.

<sup>3</sup> Aku mele lino Juda imboma oibakuluma mele molopolio wali mane ungumukape mai kombu ulu pulumu kape pilipolio kakkongonotepomolorumulu. Aku ulutalonilinopangependerimu.

<sup>4</sup> Nalyinye Gotenilinoimbo yuma molangeinimbewaiwlipewanjirimuwaimuwendo orumu wali yunge marenu i mai kombunatipe mainyeambomungolonamundurumu kinyeambomuni yumerimu. Ungulumunilinongakombunakolopoa

akopalie Juda imbomanga mane ungumu pilerimu.

<sup>5</sup> mane ungumuni lino nokorumu imboma tepa limbeimunga orumu. Aku tepa ltimumunga Goteni lino yunge bakuluma nimbelie yunge marenu timbo nimbe mi lerimu aku melema lino timbelo.

<sup>6</sup> Kinye lino Gotenga bakuluma moromelemunga Goteni Jisasinga Mini Kake Telimu linonga konopuna tirimuna tuku moromo. Molopalie linonga konopu tepa makinjipelie linondo nimbei Gotendo nanga ara neio nimo.

<sup>7</sup> Akumunga, kinye eno ka kongono imboma mele naa moromele. Nalo eno kinye Gotenga bakuluma moromelemunga lanilinga melema ltimele meleaku teko eno Gotenga noindirimo melema ltimele imboma moromele.

*Poloni Galesia imboma ambe tengenje konopu lepalie umbuni merimu*

<sup>8</sup> Oi Gote naa liko manjikolio wali enoni kolo toli gotemanga maindo molko wale pakoko kuro popo tondoringi.

<sup>9</sup> Nalo kinye enoni Gote yu kinye pungo moromele. Ai,aku tepa molo. Nani nimboi tendumu Goteni eno tukundo lipelie molamili nimu. Yuniaku tepli nalo kinye eno mane ungumu kinye we mai kombu ulu keri tiye kololi kanomani enoaku ulu tengena altoko tukundo purumele. Aku ambe telka teremeleya? Eno manda tapongena teremeleya?

<sup>10</sup> Kinye kongono wai awili te ltemo ninguluma teko, oli ondombai teremo wali uluma teko, wai awilimare oromo wali uluma teko Krishmali oromo wali uluma tekolio enoni oi tiye koloringi kano uluma altoko yando ltimele.

<sup>11</sup> Aku tekolio eno paa mainye pungenje none teremo. Akumunga nani oi nimbo tiru ungumu naa pileringinje.

<sup>12</sup> Nanga Kristen imbo ango kame, nani Juda imbomanga mane unguma tiye kolopolio eno moromele mele mololipo oro. Kinye na moro mele molangei nimbolio eno enge nimbo nio. Oi eno moromele mele molopolio oru kinye enoni na umbulu naa tiringi kanomu.

<sup>13</sup> Kano tepo oi kiyendo oru wali na kangina kuro topa tepa tambaramba tirimuna eno kinye Jisasinga ungumu nimbo tipo waye molorumulu kanomu liko manjeio.

<sup>14</sup> Na kuro topa lipe tambaramba tirimuna kanokolio wali enoni na iye nerungere naa ninguluma naa tiringi. Aku molo. Gotenga muluna kongono iye ensel te panjiko lilimala ulumu molo Kraist kanoko panjiko lilimala enoni nando lino kinye molamili ningolio eno teko panjiko ltingi kanomu.

<sup>15</sup> Kano wali na paa tono kolko konopu mondoko ningui linonga mongo te akupolio Polondo manda timolo eno teko nilimala. Kinye ambe telka umbulu tirimeleya?

<sup>16</sup> Nani Gotenga paimbo ungumu enondo waliwali nimbo tiro. I nio ungumuni enoni na kinye ambe telka opa pule toromeleya?

<sup>17</sup> Neya eno kolo toli ungu imbo iyemani Polonga unguma naa pilengei ningui enonga kangi pundu kopeio nimele ungumu kau pilengei ningolio eno teko amo tondoko mongonane lakoko noromele. Nalo eno taporomolo konopu lekolio naa teremele. Enoni ne iye kolo tolima tapangei ningolio teremele. Aku teko konopu keri panjikolio mongonane noromele.

<sup>18</sup> Nalo imbole paa tapambo konopu lepalie mongonane noromo eno ulu penga teremo. Na waliwali eno tepo moro. Eno kinye molopolio wali kau, molo.

<sup>19</sup> Nanga bakuluma, nani eno Kraist yu moromo mele molangei konopu lepolio ambo bakulu membaimuni mindili noromo mele nani eno kolo mindili enge nillimu altopola noro.

<sup>20</sup> Nani eno tapombo konopu lteo nalowa ne eno kinye nondoporenge moroya! Molkanjepe nani i ulu teamili nimbo nilka.

*Mane ungumu lombielel imboma kinye Jisasinga ungumu lombielel imbomando ungu iko topa nimu*

<sup>21</sup> Kinye nani i ungumu eno Mosesinga mane ungumu kau lombieleli konopu ltemele imbomando nio. Juda imbomanga mane ungu Mosesini i tondorumumunga liko manjeio.

<sup>22</sup> Abrahamenga marenu ungulu talo moloringili. Ungulu te paa yunge ambo kamukumu ltimumuni menderimu. Te yunge ka kongono tendepili nimbe ltimu ambomuni menderimu. Mosesini topa panjirimu ungu te eno tepa ltemo.

<sup>23</sup> Neya eno ka kongono ambomuni merimu ungulamu eno imbo imboni bakulu meremele kano tepa mele merimu. Nalo yunge ambo kamukumuni merimu ungulu Asik eno Gotenga mi lepa timbo nimu mele eno tepa merimu.

<sup>24</sup> Kinye i ungu temane manda lepo toromuni eno pilengei ungu te manda lepo nimbo temboi, Goteni imboma kinye ee nimbe mi leli ulumu pulu talo tepa imboma kinye terimu. Aku mele ambo pupu talo waye moloringili. Te ka kongono ambomu, yunge imbi Hagar. Aku ambomu manda lepo Goteni Sainai muluna mane ungumu tirimu. Hagarani merimu bakuluma ka kongono teneindo merimu. Aku mele, mane ungumu pilko lombielel ulumuni eno ka kongono teremele.

<sup>25</sup> Ambo Hagaranga kombu Arebia. Imunga Mulu Sainai Arebia kombuna polaromo kinye Hagar yuni Mulu Sainai manda lepa moromo. Yunge merimu ungulumu manda lepa Mosesinga mane ungumu lombilko ka kongono imboma moromele mele aku tepa. Yu kinye yunge merimu bakuluma kinye ka kongono imboma moromele mele mane ungu lombilko Jerusalem kombu imboma aku teko ka imboma moromele. Akumunga Hagar yuni i mai kombuna ltemo Jerusalem kape manda lepa moromo.

<sup>26</sup> Nalo Abrahamenga pinyewe ambomu mele manda lepo nimbolio aku kamukumu Jerusalem mulu kombuna ltemo akumu lino Gotenga ungumu pilipo Jisasi ipuki tili imbomanga anumu mele manda ltemo.

<sup>27</sup> Aku Abrahamenga kamukumu ungulu anungolondo ungumu Gotenga bukuna i tepa nimbe peremo,

Nu mindili naa nongo bakulu te oi naa meli ambo wangonomu tono kolowi. Aku ambe telku nu omena iyemuni tiye kolorumu, nalo akilio omenu yando ombalo wali bakulu pulumu kalko linio. Kinye omenu iyemu moromo ambomu bakulu pokoraye kau merimu. Nu pende teko kunana ningotono kolowi. (Ais 54:1)

<sup>28</sup> Goteni Abrahamendo ungulu te timbo nimbe mi lepalie Aisak tirimu. Nanga Kristen angko kame aku tepa mele Goteni mi lepa tembo nimumunga eno Gotenga bakuluma moromele.

<sup>29</sup> Neya aku wali Abrahamenga imbo imboni meremele mele merimu ungulumuni Gotenga ee nimbe mi lepa tirimu ungulu Aisak mindili lipe tipe torumu. Aku mele, kinye Juda mane ungumu lombiltiemele imbomani Kristen imboma aku tekola mindili liko tiko toromele.

<sup>30</sup> Nalo Mosesini topa panjirimu ungumu paimbo. Aku ungumu i tepa,

Ka kongono ambomunga maloni kelepa kamukumu ambomunga malo kinye lapanga nini melema kopu tepa naa lipili. Akumunga ka kongono ambomu kinye yunge marenu talo tiye kolko makoroko wendo munduwi, (Stt 21:10)

nimo.

<sup>31</sup> Lino ka kongono ambo Hagaranga bakuluma, molo. Goteni mi lepo tembo nimu kinye lino Abrahamenga kamukumu ltimu ambomunga bakulu mele moromolo.

## 5

*Kraistini lino mane ungumunga ka kongonomunga tepa wendo ltimu*

<sup>1</sup> Kraistini mane ungumunga ka kongonomu teko maindo naa molangei nimbelie lino wendo ltimumunga lino Gotenga imboma moromolo. Akumunga eno enge ningi anglelio. Imbomareni eno ka kongono kanomu altoko teao nimele kani naa pileio!

<sup>2</sup> Ya! Na Poloni ungu enge nimbo niomu wamongo komu leko pileio. Eno Juda imbomanga mane ungumu lombilengei nimbelie imbo teni enonga kangi pundu kopipo oi Itendamboi nimo ungumundo ee ninge tenge tinge lemo Kraistini terimu ulu akumuni eno manda naa tapombalo.

<sup>3</sup> Aku ungu nimbolio altopola nani enondo paa kane kane molaio nio. Eno imbo mareni ningei aya na mane ungumuni nimo mele kangi pundu kopiko wendo liwi ningi ee ninge lemo aku imboma Mosesinga mane ungumuni nimo uluma pali kape paa tengi mendepolo.

<sup>4</sup> Eno imbo mareni ningei Mosesinga mane ungumu pio akumunga Goteni na yunge imbo toya tolimu nimbelo konopu lenge lemo aku enono teremele ulumuni Kraist munduko tiye koromele. Aku teremele ulumuni Goteni imboma konopu mondopa tapopa teremo ulumu tiye kolko umbulu tiko wendo angimele.

<sup>5</sup> Jisasi ipuki tirimolomunga linoni Gotenga ungumu tengi tipo uluma pali toya topo temili teremolo. Mini Kake Telimuni i temili teremolo uluma enge tipe tapombalo ulumu wendo opili nimbo nokopo moromolo.

<sup>6</sup> Imboma Kraist kinye kopu teko moromelemani aku kangi pundu kopilima kape naa kopilima kape aku ulu eno tapombalo ulu talo molo. Nalo imbo narini Jisasi ipuki tikolio imboma konopu mondromo lemo aku ulu tukumemu.

<sup>7</sup> Eno ungu paimbomu pilko ipuki tiko lombilko kondoringi kanomu. Nalo kelepa imbo narini enonga konopuma nimbe limona kelko paimbo ungumu pilko naa ipuki tirimeleya?

<sup>8</sup> Eno konopu ningi ltimele aku iyemape eno nanga imboma molaio nimbe kanopa ltimu Gote yuni tipe naa mundurumo.

<sup>9</sup> Pileio! Ungu i kolo nalo tipe pepurumo.

<sup>10</sup> Nalo eno Gotenga ungumu pilko Juda imbomanga mane ungu malio maindo naa molonge konopulteo. I nio ungumu wambo nemboi Goteni eno konopu nimbe ltimu imbo te mindili lipe timbelo. Penga imbo awili te kape Goteni mindili lipe timbelo.

<sup>11</sup> Imbo mareni nando ningei imboma paa kangi pundu kopengei kau nimo nimele halo nani aku tepo nilkanje Juda imbonani na mindili liko tirimelema naa tilimala. Nalo kinye nani imbonando Jisasi

enonga nimbe unjo polopeyana kolorumungu enoni aku ulumu liko manjiko ipuki tieio ungumu nimboi kau nimbo tiro. Aku-munga Goteni eno nanga imbo toy a tolima nimbelo. I ungu niomunga na mindili liko tirimele.

<sup>12</sup> Neya aku imbo eno mongo liko tiko-liomani ningei eno lino terimulu mele paa kangi pundu koeio nimele. Imbo akumando nani enonga kangi pundu kopingei wali kamukumu lakama kape liko lteangei konopu lteo.

<sup>13</sup> Jisasini eno nanga Kristen imbo angkame waio nimbe kanopa lipelie eno ka kongonomunga wendo limbo nimu mele paa terimu. Kinye aku mane ungumuni eno ulu kerima naa teao nimbe naa nokoromomunga eno manda teamili ningolio kika tiko ulu pulu kerimunga tuku naa paio. Aku molo. Nalo eno enongan nendo yando kondo kolko tapoko kongonomu teao.

<sup>14</sup> mane ungu palima pinyewe pange tenderemo mane ungumu i tepa, nu nunu kondo kolko kele torono mele imbo palimaaku teko kondo kolko kele towi nimbe peremo.

<sup>15</sup> Nalo enoni enonga nendo yando owa mele ungu kili toko alowa teko opa tengolemo aku eno waye embambo ninge. Aku-munga eno wamongo kane kane molaio.

*Mini Kake Teli moromomunga kuliene itemoru kinye konopu kerimunga kuliene itemo*

<sup>16-17</sup> Aku nio unguma nimboi, imbomanga we konopu oi peremomani kelepa Gotenga Mini Kake Telimuni konopu koinjo tirimoma kinye opa pule toromo. Aku tendeku wali Gotenga Mini Kake Telimuni imbomunga konopu koinjo tukundo tirimomaniaku imbomanga mai kombuna teamolo aie konopu oi akuma kinye opa pule toromo. Aku ulu talo enonga konopuna tukundo opa pule torombe wali enonga teamolo aie konopu itemele ulumu waliwali teko tukume naa panjirimele kani enonga molko penge ulumangaaku Gotenga Mini Kake Telimuni eno toperope tipili neio. Aku teng lemo eno maina mainye ulu pulu keri itemoma altopo teamili konopu naa lengue.

<sup>18</sup> Akumunga Mini Kake Telimuni opatopa ongondopalie nu toperope timo lemoaku ne mane ungumunga nu maindo ka kongono imbo naa molonio kanomu.

<sup>19</sup> Mai kombuna mainye konopumu lombliko aku ulu puluma tengelimo mona lembalona kanoko imbi tingemele i tepa, Te ambiye wapu langi noromele. Ulu kalaro mololi yakiki telima teremele. Kalambo naa ningo wangopa naa mololi uluma teremele.

<sup>20</sup> Melte paimbo Gote none tendeku kuro popo toromele. Kuroala toromele. Imboma kinye kumbekere teremele. Imbo te kinye ungu wailke toromele. Mumindili koromele. Mele mare noipo imbi molopili ulumare teambo konopu itemele. Manga pupuma momakemake lekolio nendo yando ungu mele nale teremele. Gotenga ungu pilko moromele imbomani kelko moke make leko lapu lupe lupe wamoko molkolio kolo toko ningei linoni Gotenga ungumu paa nimolo nalo ningo kondoromelemando keri nimele ninge.

<sup>21</sup> Imbomanga melema kanokolio yokoli koromele. No enge nili pulumu nongo keke lepo toko loi itemele. Imbo kalambo naa ningo mongo mongo kondoromele. Weaku tepea mele ulu i kano kanoma teremele. Imbo naimeleliaku uluma teko molko pengema Goteni yunge marenupilinganimbe mele penga noindirimoma naa liko Gote yunge nokoromo kombuna tukumanda naa punge. Oi tendeku ungumu nimbo tirumu kinye altopola enge nimbo nio.

<sup>22</sup> I mai kombuna mainye itemo ulumaaku tepea mele nalo Gotenga Mini Kake Telimuni tepea kere mongo mepa wendo oromo uluma i tepa. Imbomani imbo palima konopu mondoko kondo koromele. Imboma tono lakoko koromele. Imboma ame toko taka liko moromele. Konopu mare naa lekolio mumindili welea naa koromele. Imboma konopu koya leli uluma teremele. Imbo palimando ulu pengama teremele. Uluma pali tumbi ningo teremele.

<sup>23</sup> Imbo palimando ame toko kandiki teremele. Imboma eno enonganokele toko konopu kerima naa lombimele. I uluma naa teao nimbe mi ungu te naa peremo.

<sup>24</sup> I ungumi niope, Kraistainga imbomani mai kombuna ulu pulumanikonopu keri enge nilimu kinye ulu pulu kerimanga aie konopu leli ulu mepa wendo oromo akuma likolio unjo polopeyana pirimu toko kondoko pora tiringi.

<sup>25</sup> Gotenga Mini Kake Telimuni lino tepea koinjo mondopa lino molopo peamili mele lipe ondoromomunga kinye lino paa Mini Kake Telimuni lipe ondoromo mele teamili.

<sup>26</sup> Nalo linonga imbi olando pepili ungu naa nimbolio imboma tepea mumindili naa kondopo ne imboma molko peremele ulumu eio konopu naa teamili.

mane tipo nimbo timboi. Imbo teni ulu alowa te tepalie ulu kalaro temo lemo eno Mini Kake Telimu tope tirimo imbomani konopu ame topili kandiki tek molkolio imbo akumu yunge konopumu topele topa ulu penga tepe toya topa tepili kani liko tapao. Nalo eno Gotenga ungumu wamongo liko manjiko kondokolio aku ulu teao. Ambe telka enoni aku tek mele ulumu naa tengen lemo eno kape Sataneni manda manjimbelonje.

<sup>2</sup> Imbomani umbuni meremelema tapoko mendaio. Aku ulu tengen lemo eno Kraistini paimbo ungu mane tirimumu paa ara tirimele.

<sup>3</sup> Nalo enoni imbo kerima naa tapomolo ningo linonga imbi moromo ningo konopu lenge lemo eno enongano kolo toromele. Aku tek nimele imbomanga imbi Gote kinye naa moromo.

<sup>4</sup> Nalo enongano tek meko andoromele uluma wamongo moke tek kanaio. Aku ulu tekolio ulu awili molo kelo mare tengen lemo eno tono kolaio. Enongano ningei nani i ulumu tendu ninge. Nalo kelko imbo te kinye manda leko kanokolio ningei na awili nalo yu kelo ungu naa neio.

<sup>5</sup> Aku ambe telka enonga tengen ulumuni enono tek imbi mondonge.

<sup>6</sup> Enonga mele penga noirimile mare Gotenga ungumu mane tirimele imbo-mando moke tek tieio.

<sup>7</sup> Ungu te nimboi. Enoni Gote manda kili trimolo ningo enongano kau eno tek kolo toromele. Aku niope imbo teni yunge panjimbelo kere imbomunga kelepa kano teli kere mongomula tombalona inie tombalo.

<sup>8</sup> Imbo teni mai kombuna aie konopu ltemoma tepe kiru timbei uluma temo lemo eno imbonu Goteni yu tepe tombalo. Aku tepe mele, yunge teremo ulumuni meremo mele kere membalo. Nalo imbo teni Gotenga Mini Kake Telimu nimo mele tengen timo lemo eno imbonu Gotenga Minimuni yu tepe koinjo mundumbelona koinjo molopa pumbelo. Aku tepe mele ulu penga teremomuni mongo tombalo.

<sup>9</sup> Akumunga ulu pengamu tepolio wali kelepo eno ulu tewi tiye naa kolamili. Aku ambe telka linoni eno ulumu tiye naa kololi we tepe kau molomolo lemo eno ulu pulu penga temolomunga Goteni kanopa imbi timbelo wali ulu penga temolomuni lino mongo tombalo.

<sup>10</sup> I imbona manda tapomolo lipo manjipolio wali linoni imbo palimando ulu pengama teamili. Aku uluma temolomu linonga Kraist ipuki tirimele imbonando paa teamili.

*Poloni Jisasi kolopalie makilerimu ungumu nimu*

<sup>11</sup> Pipiana imbi awili kangoma moromo ulu kanokolio liko manjeio. Akuma nanga kimuni kau topolio enondo tiro.

<sup>12</sup> Juda imbomani enonga kangi olando kanoko penga pilengei ningolio kolo toli imbomareni eno Galesia imboma paa kangi pundi kopiko leangei ninge teremele. Aku teremele ambe telka Juda imbomani eno mane ungumu naa lombilko Jisasi unjo polopeyana kolorumu ipuki akumu tinge wali mindili liko tingei ningolio teremele.

<sup>13</sup> Oi kangi pundi kopiko leringi imbo akuma eno kape mane ungumuni nimo mele ulu palima naa lombimele. Eno kangi pundi kopiko lenge wali ne eno kolo toli imbomani Juda imbo palindo ningei kinye imbo lupema lino kinye kangi pundi kopiko leli ulumunga tendeku teremo kanaio ninge imbi molopili ningei teremele.

<sup>14</sup> Nalo ulu tengen kau imbi molopili nio. Linonga Iye Awili Jisasi Kraist unjo polopeyana pirimu toringina kolorumumu eno imbona tapombai terimu. Aku ulumunga kau na imbi molopili nio. Kraist eno tepe kolorumu ulumuni mai kombuna ulu pulu ltemoma eno tepe mele pirimu topa kondoromu. Kinye eno mai kombu ulumu konopu naa mondoro. Aku tendeku aulkemunga na eno tepe kolorula. Aku kinye mai kombuna imbomani na konopu naa mondoromele.

<sup>15</sup> Imbo te kangi pundi kopiko lemo eno ulu nerungemu. Kelepa imbo te kangi naa kopiko lemo eno kape eno ulu nerungemu kala. Nalo Goteni imbona tepe koinjo ltimu eno ulu tukumemu.

<sup>16</sup> I pipiana topo panjiro ungumu pilko lombilko eno uluma tengen imbona Goteni paa taka liko molangei nimbe kondo kolopili. Aku tengen imbona Gotenga paimbo Israel imbona molonge.

<sup>17</sup> Na ungu nimbo ulu lemboi teromu eno tepe Gotenga ungumu imbona nimbo tiromunga imbonani na toko kondongei teremele. Nanga kangi toringina uru peremomani na Jisasinga kongono iyemu nimbe lipe ondoromo. Akumunga imbo teni na umbunu altokola naa liko tieio.

<sup>18</sup> Nani i tepe nio, Jisasi enonga konopu paa tepe ame tondopa eno kinye konopu noipe ulu pengama tepili. I paa.

## Poloni Efesus Imboma Pipia Topa Tirimu Ungumu Efesus I Ungu Torumumunga Ungu Pulu Mare

Jisas ulu tukume terimumu lopeke tepa lerimu ungu mare Poloni nimbe para tipelie i ungu topa panjirimu. Lino meme tendekumu nimbe Poloni lino nendo yando konopu mondopo kandiki tepo konopu tendekuna pupili molamili nimbe ungu mane tirimu. Jisas ipuki tirimele imboma nombeya teko molko teangei mele kape ungu mane mare tirimu.

Goteni nu yunge imboma kinye nombeya tenio wali nuni eno konopu mondoko kandiki teko eno kinye konopu tendekuna pupili molani nipili!

*Kraistini linonga nimbe tenderimumunga Goteni lino imbo koinjoma molangei nimuna moromolo ungumu*

<sup>1</sup> Na Pol, Jisasi Kraistini yunge kongono tendepuwi nimbe lipe mundurumo iyemu. Goteni na aku teko molowi nimuna aku tepo moro. Pipia topo tiromu eno Gotenga imbo ulke kombu Efesus moromele imbo Jisasi Kraist paa enge ningko ambolko pilko i pipiam topo tiro.

<sup>2</sup> Linonga Ara Gote kinye Awili Jisasi Kraist taloni eno kinye konopu noiko konopu u nipili molangei nengili nio.

*Kraistini linonga nimbe tenderimumunga Goteni mulu kombuna lino mele pengama tirimo ungumu*

<sup>3-4</sup> Goteni mulu mai talo oi naa tepili Kraistini pele linonga nimbe tendembalo mele pilipeli lino imbo kake teli imbo mongo tembalo ulu te naa peli imboma molangei nimbe kanopa ltimu kani Gote linonga Awili Jisasi Kraistingu Lapamu kapi nimbo imbi lipo ola mundemili. Kraistini linonga nimbe tenderimu lino kinye koputepa moromomunga Goteni lino mane ungu tipe mulu kombuna yando linonga konopuma kinye minima kinye enge nimbe manda pepili nimbe ulu pengama tipe mundurumu. Lino konopu mondopalie

<sup>5</sup> paa koro oi lino kanopa lipe Jisasi lino lipe tapondombalomunga eno nanga imboma tepo limbo nimu. Yuni lino konopu noipelie yunge konopuniaku ulu terimu.

<sup>6</sup> Yunge marenu konopu mondoli lino tapopili nimbe we tipe mundupe terimu ulu konopu lipo manjipolio wali yu kapi nimbo yunge imbi paka tondamili.

<sup>7</sup> Goteni imboma we kondo kolopalie Jisasi linonga nimbe kolopili nimbe aku

tepalie yunge mememuni linonga ulu alowa tendelimanga tiye kolopalie lino wendo ltimu.

<sup>8</sup> Yu lino paa kondo kolorumu. Aku tepalie lipe manjili uluma kinye moke teli ulu pulumu kinye awini toya topa tirimu.

<sup>9</sup> Aku tepa tipelie Kraistini linonga nimbe tendembalomunga Goteni lino kinye konopu tipe tembalo mele nimbe panjirimumu lopeke tepa perimu nalo kinye lino lipe ondororu.

<sup>10</sup> Lopeke tepa perimu ulumu manda tembalo waina wendo opili nimbe panjirimu. Aku wali oi tepa mulu mai talo melema kinye yandopa melema pali aku melema pali nokopalie iye tengatengalopopote tipelie Kraist kano melema pali nokoli iyemu molopili nimbelo.

<sup>11</sup> Yunge konopuni pilipe melema kinye uluma pali kanopa lipe nanga kongono tendangei nimbe oi nimbe panjirimu. Aku tepa Goteni lino Juda imboma kano iye Kraistini linonga nimbe tendembalo mele pilipelie mulu mai talo oi naa tepili nanga imboma molangei nimbe kanopa ltimu.

<sup>12</sup> Lino Juda imboma oi pulu polopo Kraist ipuki tipo lombilerimulu. Goteni lino imbi topa ltimumunga imbo paliniaku ulu enge nilimu kanokolio yu kapi nengei.

<sup>13</sup> Eno imbo talape lupema kape Gotenga ungu tukumemu pilko Itingina Goteni tukundo ltimu. Kraist ipuki tiko kopu teko moloringi wali Goteni yunge imboma nimbe Mini Kakemu tirimu.

<sup>14</sup> Mini Kake Teli ltimulu akumunga Goteni lino pele molonge mele timbo nimbe panjirimu mele pengama yunge imboma paimbo timbelo lipo manjirimolo. Pele paimbo timbelo limolo nimbo pilipolio Goteni lino yunge imboma kamukumu limbelo kinye Satanenga ulu keri teni lino altopa manda naa ambolombalo nimbo pimolo. Linonga nimbe aku tendembalo kinye kanopolio lino yu kapi nemili nimbe tendembalo kani yunge imbimu paimbo lipo ola mundundupo yu kapi nemili.

*Poloni Efesus imbomanga Gotendo paa tereno nimbe eno Gote liko manjengei nimbe konge tenderimu ungumu*

<sup>15</sup> Goteni eno taporamomunga eno Awili Jisasi paa ipuki tiko Gotenga imboma pali konopu mondromemele mele oi pulu polopo pilendu. Kinye kape

<sup>16</sup> enoaku teremelemunga Gotendo walawalima paa tereno nimbo nani Gote kinye enonga konge tendero.

<sup>17</sup> Awili Jisasi Kraistingu Lapa Gote Enge Nilimuni yunge Mini Kake Telimu tipe yunge imboma lipe manjili ulumu tipili nimbe, yunge lopeke teli uluma pilengen

nipili nimbe nimona eno yu paa kanoko ltendangei nimbo konge tero.

<sup>18-19</sup> Enonga konopuni yunge ungu manga pulumu paa pilengei nimbo yu kinye enonga konge nindirola. Yuni eno mele pengama timbo eno molko kondonge nimbe, nimbe panjirimu melema nokoko moromele akuma kinye nanga imboma molonge mele paa pengama timbo nimuma kinye yu paimbo nimbo enge nimbo pimolo imboma yuni lipe tapondoromo enge paa olandopa olandopa peremomu kinye mona lepili paa pilengei nimbo aku tepo yu kinye enonga konge nindirola. Kano enge olandopa peremomu lino te aku tepa oi naa kanoli. Engemupe i tepa mele. Enge nimbe terimuna

<sup>20</sup> Kraist oi kolorumu wali Goteni yu topa makinjipielie mulu kombu mepa pumbe yunge imbo kindo mondorumu enge akumuni lino kinye terimu.

<sup>21</sup> Aku ulu teremomunga kuro enge nilima akuma maindo mundupe iye kamakoma gavman imboma waye enge kinye ltemoma altopa ombaloma kape peya maindo mundupe yu paa olando moromo.

<sup>22</sup> Goteni melema pali Kraistingu kimbona maindo lepili nimu. Aku ulu terimumunga Kraist yunge imbomanga yu iye kamako kiyendomu moromola. Yu kangimunga pinyewemu.

<sup>23</sup> Kraistingu imbo talapemu yunge kangimu. Kraist kinye yunge imbo talapemu kinye eno lipe popo tipe imbo tendeku mele. Yu yunge imbo talape moromele manga pali yu pumbe molopa manda tenderemo. Yu mele manga pali molopa manda tenderemo.

## 2

*Lino imbo kololima Goteni Kraist kinye peya koinjo molangei nimu*

<sup>1</sup> Enonga teko kenjiringi uluma kinye ulu pulu keri teringima kinye akumani eno toko kondoringi.

<sup>2</sup> Aku teko moloringi wali ya mai kombumanga ulu pulu kerima kau teko, kuroma nokromo iyemu kau lombili pungo pilko moloringi. Kinye imbo mare Gotenga ungu like tui tiko naa pimele imboma kano kuromanga iye nomimuni enge nimbe nokopa enonga konopuna moromo.

<sup>3</sup> Kano imboma kinye moromele mele oi lino imboma pali tendekuna molopo, oi konopu keri peliman ieo nimbo ulu pulu kerima kau pilipo tepo, kano konopumanu kinye kangimani kinye konopu mondoko teamili ningi mele kau pilipo lombili pumbo tepo molorumulu. Oi we imboma kinye aku tepo molorumulu mele we

molemalanje Goteni we imboma mindili tipo pundu tombo nimu mele linondo peya nilka.

<sup>4-5</sup> Paimbo lino tepo kenjirimulungu imbo kololima molorumulu nalo Goteni lino Kraist kinye peya altoko koinjo molangei nimu. Tepo kenjirimulungu Goteni pundu tao nilka nalo paa we kondo kololi ulumu peremo Goteni lino paa konopu mondopalie lino Kraist kinye peya altoko koinjo molangei nimu. Gotenga we kondo kololi ulumuni kau lino lipe tapondopa mindili nomolo aulkena wendo lipe yu kinye peya koinjo molopo kau pumulo ulu pulumu tirimo.

<sup>6</sup> Goteni lino Kraist kinye popo tipe topa makinjirumu. Aku tepalie lino Kraist kinye kopu tepa mulu kombuna yu molopa melema nokromo polona Kraist kinye peya molangei nimbe lipe mondorumu.

<sup>7</sup> Akilio kape imbo molongeima na Gote imboma na kinye paa olandopa olandopa we kondo kololi ulumu peremo mele pilengei lipo ondambo nimbe Goteni lino aku tepa Kraist Jisasini linonga nimbe tenderimumunga kondo kolopa tepe kondorumu.

<sup>8</sup> Kraist enonga nimbe tenderimu mele paimbo ningi enge ningi pileringimunga Gotenga we kondo kololimuni eno mindili nolemala aulkena wendo ltindipe yu kinye peya molko kondangei aulkena lipe mondorumu. Aku ulumu enoni enonganano naa teringi, Goteni eno we tirimu.

<sup>9</sup> Aku ulumu enoni kongono teringimunga pundu toko naa ltangi. Akumunga neyaaku ulumu limo imbo teni nanga kongono tendumunga neyaaku ulumu ltiu nimbe yunge imbi yunu kapi naa nimbelo.

<sup>10</sup> Goteni lino Jisasi Kraist linonga nimbe tenderimumunga tepe koinjo mondorumuna oi lino andamili nimbe tumbi tipe noindirimu aulke koinjo pengana linoni andamili.

*Juda imboma kinye imbo lupema kinye pali Gotenga imbo talape tendekumu molangei nimbe Kraistini lipe tendeku tirimu ungumi*

<sup>11</sup> Goteni eno we taporumumunga Efesus imboma eno altoko ulu te konopuni pilengei! Eno Juda imbomani naa meringi. Juda imboma naa moloringimunga imbi leko kangi pundu kopili imboma nimele imbomani enondo kangi pundu naa kopili imboma ningi. Aku ulumu iyemani eno enonganano kangikondo teringi ulumu kau. Akumu kinye altoko liko manjengei!

<sup>12</sup> Oi aku teko moloringi walimanga eno Kraist kinye peya tendekuna naa molko yu mele mele moloringi mele kinye altoko

pileio. Aku walimanga eno Israel imbo talapena tukundo onge aulke te naa lerimu, Goteni yunge imboma kinye tembo nimbe, nimbe panjipe mi lerimu ungu akumu eno kinye naa perimula. Enonga ulu penga te pele wendo ombalo ningko konopu tiko nokoko molonge ulu pulu te naa pepa, ya mai kombuna Gotenga imbi pilko yu kinye tapu toko molonge aulke te naa lerimu mele kinye pileio.

<sup>13</sup> Nalo kinye eno oi wali te Gote kinye tule teko moloringi imboma Kraist yunge meme ondorumumuni Kraist Jisasi yuni eno kinye tapu topa molopa eno Gote kinye nondoko molangei nimbe lipe popo tirimu. Kinye Yu kinye tendekuna moromele.

<sup>14</sup> Kraist yuni Juda imboma kinye eno we imbo lupema kinye opa pule toko molorumulu ulu pulumu topa mainye mundupe yunge kangimuni andi yando konopu keri panjirimulu papemu alumbiye tepalie lino ame tondopa imbo talape talo popo tiko talape tendekumu molangei nimbu.

<sup>15</sup> Moses ungu mane tirumuna kinye, aku ungu mane tipelie teaio nimu uluma kinye, ungu manemanga tukundo perimu unguma kinye, pali lino konopu keri perimuna imbo talape talo molorumulu. Akumunga Goteni Jisasinga kangimuni terimu ulumuniaku uluma pali kamukumu mainye pupili altopta ulure naa tepili nimbelie kano papemu alumbiye terimu. Yuni molangei nimbe pilipe aku terimu mele i tepe, eno imbo talape talo nanga imbo talape tendekumu molangei nimbe lipe popo tirimula. Aku teko molkolio eno konopu tendekuna pupili molko kondangei nimbelie aku tepe terimu.

<sup>16</sup> Yu unjo polopeyana kolorumumuni kano imbo talape talo oi opa pule moloringima kamukumu kangitendekumu molko Gotenga imboma molangei nimbe lipe popo tirimu. Yu unjo polopeyana kolorumumuni oi opa pule moloringi ulumu topa mainye mundurumu.

<sup>17</sup> Eno Juda imbo naa molko Gote kinye tule teko moloringi imboma kinye, Juda imbo Gote kinye nondoko moloringi imboma kinye Kraist omiba eno pali temane penga te topa tipelie nimbeindo, eno konopu tendekuna pupili popo tiko molaio nimbu.

<sup>18</sup> Yuni imbomanga nimbe tenderimumuni lino Juda imboma kinye we imbo lupema kinye pali Mini tendekumuni lipe tapondopa aulke akirindirimungu Ara moromona nondopo manda pumolo aulke itemo.

*Lino Kraistina imboma Gotenga  
ulkemu moromolo ungu*

<sup>19</sup> Aku tenderimuna aku tepo moromolo akumunga kinye eno imbo mare mai naa lepa imbo omiba angileli imboma mele naa moromele. Eno Gotenga Juda imboma kinye talape tendekumu molko, Gotenga imbo talape paimbomu molko,

<sup>20</sup> Gote moromo ulkemu mele moromele. Gotenga nimbe munduli unguma ning para tiringi profet iyema kinye, Jisasini nanga kongonomu tendepao nimbe lipe mundurumu iyema kinye, aku iyema kano ulkemunga pongama. Kraist Jisasi yu aku ulkemunga timumu.

<sup>21</sup> Ulke timumuni pele kokeyama ingi tipe amboromo kinye ulkemu enge nimbe angimo. Goteni ulkemu pele kokeya tepe moromo. Aku ulkemu kamukumu takombalo wali Awilimu yunge ulke kake telimu angilimbelo.

<sup>22</sup> Eno Kraistini tenderimumunga yu kinye tapu toko moromele imboma kape Goteni lipe popo tipe Gote yunge ulkemu takoromo, aku ulkena yunge Mini Kakemu kinye Gote moromo.

### 3

*Pol imbo talape lupemanga ungu nimbe  
tili iyemu molorumu ungu*

<sup>1</sup> Kraistini imbo lupema kinye Juda imboma kinye peya Gotenga imboma molangei nimbe aku tepe imbo talape talo lipe tendeku tirimu akumunga na Pol Gote kinye ungu nimbo enonga konge tendero. Eno we imbo lupema lipo tapondoromunga na ka ulkena pero iyemu molopolio, enonga konge tendero.

<sup>2</sup> Ungu te oi pilerimu nemboi, Goteni na kinye eno kinye terimu mele pilerungi konopu lteo. Akumu i tepe Goteni eno we kondo kolorumumunga lipe tapondombalo mele kamukumu pilengei nimbe na kanopa ltimu.

<sup>3</sup> Akumu Goteni ulu tembalo mele oi lopeke terimu akumu na nimbe para tirimu, akumu oi alaye kolte pipia topo nimbo tindu kanomu.

<sup>4</sup> I pipia toro akumu kanokolio pilenge kinye Goteni tembalo mele lopeke tepe perimumu Kraistini terimumunga mona lerimuna lipo manjiro mele eno pilenge.

<sup>5</sup> Ulu tembalo lopeke tepe perimu kanoma oi mololiko oringi imboma kinye nimbe para naa tirimu. Imbo mare, kinye nimbe para tirimu. Kinye kau Jisasini nanga kongonomu tendepao nimbe lipe mundurumu iyema kinye, Goteni yunge nimbe munduli unguma ningotirimele imboma kinye, yunge imbo kake teli aku imboma kau Gotenga Mini Kake Telimuni nimbe para tirimo.

<sup>6</sup> Kano oi lopeke terimu kinye para lemo ulumu i tepa, Kraist Jisasini imbomanga nimbe tenderimumuni temane pengamu peremo akumuni we imbo lupema kinye lino Juda imboma kinye lipe popo tipe kangi tendekumu molangei nimbe, Goteni imboma kinye tembo nimbe panjirimu mele Juda imboma kinye we imboma kinye pali teremu.

<sup>7</sup> Goteni we kondo kolopa na ungu tukumemu andopo topo tiembo nimbe kanopa lipe, aku kongonomu teambo nimbe na enge tirimu.

<sup>8</sup> Gotenga imbo moromelemanga pali na paa mainyendopa moro, nalo Goteni na we kondo kolopalie kongono i tepa tirimu, Juda imbo naa moromele imboma ungu tukumemu ningo tilko andowi nimu. Aku ungu tukumemu Kraistini lino kinye ulu penga terimuna, linoni manda naa moke tepo pilipo kambu manda naa toromolo uluma.

<sup>9</sup> Melema pali terimu Goteni pele tembo nimbe konopuna panjirimu mele koro oi yunu pilipe yu kinye lopeke tepa perimu mele altoko imbo naa pileringi kanoma, kinye nando imboma pilengei ningo tipuwi nimu.

<sup>10</sup> Oi lopeke tepa perimu nalo kinye Jisasi yu ipuki tiko moromele imboma kinye ulu pengama tepa mona ltenderemo muluna enselema kinye kupena kuro kerima kinye kanoko liko manjengei nimbe nimo.

<sup>11</sup> Paa oi Goteni aku ulu tembo konopu lerimu akumu kinye linonga Awili Jisasi Kraist kinye aku ulu terimu.

<sup>12</sup> Kraist ipuki tipo yunge imboma moromoluni pipili naa kolopo Gotenga kumbekerena tumbi tipo purumolo.

<sup>13</sup> Akumunga nani eno konge tepolio nimboindo, na eno lipo tapondomboindo mindili nombori moro mele konopu awini naa liko mundukolio paimbo ningo enge ningo pilko moromele mele tamba naa nipiili. Na mindili noro ulumuni Gote kinye peya tapu toko moromele mele lipe tapon-doromomunga konopu tiko molaio.

#### *Poloni Gote kinye Efesus imboma enge ningo molangei nimbe konge terimu*

<sup>14</sup> Oi nimbo tendu kanomu, kinye ya kamukumu nio. Goteni Juda imbo talapemu kape we imbo lupema kape lino pali tembo nimbe panjirimu mele kinye teremo ulumu pilipolio akumunga na linonga Lapa kinye ungu nimbo enonga konge tendambo nimbo yunge kumbekerena komongo topo pondoro.

<sup>15</sup> Gotenga imbo talape akumu mulu kombunga tukundo moromelema kinye, ya mai kombunga moromoloma kinye, pali imbo

talape tendekumu nimbe yuni enonga imbi tirimu.

<sup>16-17</sup> Nani Ara kinye ungu nembo nimbo yu moromona komongo topo pondopolio konge tepolio nimboi. Iye Kamako Gote, nu ipuki tiko moromele imbomanga Kraist enonga konopumanga yunge ulkemu nimbe kamukumu molopili ningo nunge enge pengama liko Mini Kake Teli imboma tukundo tipili ningo tiwi. Unjo te enge nimbe angilimbeindo yunge pulkono maina mainye purumo mele eno aku teko konopu mondoli ulu pulumunga tukundo molko enge nipili molangei niwi.

<sup>18</sup> Aku tekolio Kraistini lino pali konopu mondoromo mele paa manda leko pilko kondonge engemu Gotenga imboma bali kinye nunge imboma kinye peya pepili ningo Kraistini lino pali konopu mondoromo ulu akumu paa tule tepa bumbe paa palaku lepa pumbe paa olando tipe pumbe paa maindo purumo mele pilinge engemu nunge imboma tiwi.

<sup>19</sup> Gote nunge ulu pulu penga noiko tironoma enonga konopumanga aku uluma pali tenegepeya tepa pepili ningo kano Kraistini konopu mondoromo ulu pulumu enoni pilengei ningo enge tiwio nimbo enonga konge tendero. Aku Kraistini konopu mondoromo ulumu we konopuni kau manda moke teko pimolo aulke te naa ltemo.

<sup>20-21</sup> Akumunga Gotenga imbimu paa olandopa molopa kau pupili nemili Gote yunge engemuni linonga konopumanga kongono teremomunga linoni konge temolo uluma kinye teamboi molo aku tepo molambo molo aku tepo ulu lupe lupe konopuni pimolo mele uluma pali yuni yunge engemuni paa olandopa manda tembaloiyemu moromo, akumunga Kraistinga imbo talapena tukundo molopo Kraist Jisasi peya lino tapu topo moromolo imbomanii kano kongono teremo Gotenga imbimu akilio kape paa kamukumu paa olandopa molopa pupili nimbo yu kapi nimbo imbi lipo ola mundemili. I paa.

## 4

#### *Poloni lino Kraistinga imboma yunge kangimu molopolio Goteni teao nimo unguma kau pilipo lipo teamili nimu ungumu*

<sup>1</sup> Akumunga na Awilimunga kongono terumunga ka ulkena pepo moro iyemu, nani enge nimbo eno ungu mane tipolio nimboindo Goteni enondo eno nanga imboma molko nanga kongono tendangi wangei nimbe kanopa ltimuna ongo yu kinye moromele imboma mele molkolio yuni kanopa penga pimo uluma teko molaio.

<sup>2</sup> Waliwalima nanga imbi ola naa molopili, imboma kinye peya taka lipo molambo ning molaio. Imbomani eno teko kenjinge wali anjo enoni konopu mondoko pundu naa toko we tiye kolko konopu awini liko naa mundeo.

<sup>3</sup> Lino Kraistingu imbo talape tendekumu moromolo imboma konopu tendekuma pupili taka lipo molamili ning konopu tendekuma pupili nimo Minimuni eno nombeaya tepa ka topa ambolopili ning molaio.

<sup>4</sup> Lino Kraistingu imboma, lino kangi tendekumu. Mini Kake Teli linonga konopumanga moromomo yu tendekumu kau. Aku tepala Goteni linondo yunge imboma molangei waio nimu mele kombu pengana pumbo molomolo nimbo konopu tipo nokopo moromolo ulu tendekumula.

<sup>5</sup> Linonga Awilimu tendekumula. Ipuki tili ulumu tendekumula. No lili ulu pulumu tendekumula.

<sup>6</sup> Linonga pali Lapa Gote tendekumu kau. Yu lino Kraistingu imbomanga pali olando moromo. Yu linonga pali tukundo kongo konopu tepa moromo. Yu linonga pali konopumanga moromo.

<sup>7</sup> Gote we kondo kolorumumunga Kraistini lino tepo kondoromolo engema moke tepa lino te te nimbe awini we tirimu.

<sup>8</sup> Gotenga Bukumunga i tepa nimbe peremo:

Yu paa muluna olando pumbe ka ulke  
peli imbo awinima mepa pumbelie  
yunge imboma melema we tirimu.  
(Sng 68:18)

<sup>9</sup> Kraistyu olando purumu nimu akumu olando kau purumumunga lipe ondormuya? Molo. Oi yu paa maina manyendo purumumunga lipe ondorumu.

<sup>10</sup> Iye muluna paa olandopa purumu iye kanomu oi maina manyendo purumu iyemu. Mulu mai talonga pali undukana molombai aku terimu.

<sup>11</sup> Kano iyemuni kau maina imboma engema moke tepa we tirimu. Imbo mare yunge kongonomu tendangei nimbe lipe mundumbeindo enoaku kongonomu teangei engemu tipe, mare kanopa lipe yunge nimbe munduli unguma imbomando ning tengenengemu tipe, mare kanopa lipe Gotenga ungu pengamu nilko tilko andangei engemu tipe, mare kanopa lipe Kraistingu imbo talapemanga tapu iye kongono teangei enge tipe mare kanopa lipe Goteni kanopa penga pilimbelo mele mane tinge enge tipe aku teangei engemu tirimu.

<sup>12</sup> Kraistini nanga kangimu enge nimbe molopa kondopili nimbe Gotenga imboma pali Kraistingu kendemande kongonomu

teko molangei nimbe aku tepa engema yunge imboma moke tepa we tirimu.

<sup>13</sup> Lino yunge imboma paimbo nimbo enge nimbo pilimolomunga konopu tendekuma pupili molopo, Gotenga Maloni konopuni pilipe moromo mele lino pali tendeku tipo pilipo kondopo, imbo yu konopu pepili mololipo pumbo, kamukumu Kraist moromo mele lino imbo konopu pepili molamili nimbe aku terimu.

<sup>14</sup> Aku tepo tepo molomolo kinye bakulu keloma konopu naa peli moromele mele naa molomolo. Nomuna poporome topa sip mare we topa mepa andoromo mele iye mare kondi tokoko toromele iyema ongo eno i teko teaio i teko teaio ning mane tirimele kinye we pilko konopuma alowa malowa teko lombili purumele mele lino aku tepo naa temolo.

<sup>15</sup> Kolo toli iyemani ning mele komu tendepo naa pilipolio Kraistingu kangimu moromolo imbomani lino nokopo linonga pinyewe moromo iye Kraist moromo mele molamili nimbo nendo yando konopu mondopo ungu paimboma kau nimbo molamili.

<sup>16</sup> Yu kimbo ki kangi melemanga pali nokoromo iye pinyewemu. Yuni ombele pulkono melema pali enge nipili nimbe enge tirimo. Akumunga kangimunga melema pali nendo yando konopu mondopa lipe tapondoromomuni kangimu akopa awili lepa enge nimbelo.

*Kraistingu imboma oi uluma tiye kolku ulu pulu koinjoma teko molonje ungu*

<sup>17</sup> Jisasinga kongono iye molopo yunge imbi lipo eno kane kane molaio ungu nimbo timboi. Eno imbo imbomanga tengenulu naa teaio. Enonga konopu mepa andoromo.

<sup>18</sup> Kano imboma eno uluma pali naa pilko enonga konopuma pipi tirimeleunga Gote molopa teremo mele naa pilko, enonga lipe manjilima tumbulu toromo akumunga eno Gotenga koinjo molopa kondolimunga tawendo moromele.

<sup>19</sup> Ulu teremelema pilko moke teko pipili kolonge ulu pulumu mainye purumu eno kinye naa peremomunga eno ulu kerimanga tukundo tumbi tiko pungo, imboma kanokolio mai koromele ulu kalaro mololima konopu kimbo tiko teko moromele.

<sup>20-21</sup> Pileio! Lino oi Kraistingu ltemo ungu tukumemu nimbo tirimuluma paa pileringi konopu lteo. Aku wali eno imbo imbomanga ulu pulu kerima teaio ungu naa nimbo tirulu.

<sup>22</sup> Eno tengenemele ning mane tirimulu mele i tepa: Eno oi moloringi kinye enonga oi we konopumanu ulu pulu kerima eio konopu leringi kano konopuma tiye

kolangsei. Aku teringi ulumani ya mai kombuna molko kenjiko kolkolio kombu kerina pungo mindili nongo molko kenjiko kau pulimala.

<sup>23</sup> Kano oi we konopuma tiye kolko eno konopu koinjoma pepili molangei.

<sup>24</sup> Gote konopu peremo mele lino yunge konopu koinjo teremomu aku tega pepili ningolio Goteni ulu pulu penga tumbil nima tega paa kake tepili moromo mele aku teko molangei nimbo ungu mane aku tega nimbo tirimulu.

<sup>25</sup> Akumunga oi we konopuma tiye kolko konopu koinjoma liko panjikolio eno ungu kolo toli ungu mu tiye kolko, kangi tendekumunga kimbo ki melema angimo mele aku tega lino Kraistainga imboma pali konopu tendekumu pepili moromolo kani Kristen imbonando ungu paimboma kau ningo molaio.

<sup>26</sup> Eno mumindili tembalo kinye ulu pulu keri te naa teamili. ningo, pilko kondoko molaio. Eno mumindili kolko molangei ena naa pepupili.

<sup>27</sup> Nalo aku mumindili we kolkolio eno Satan nambu toko linge kani.

<sup>28</sup> Melema wapu ltimele imboma enu ulumu tiye kolko kinye wapu naa liko, kongono teangei. Enonga kimani melema wapu naa liko imbo mare mele molo lembaloma lipo tapondopo melema tiemili ningolio kano wapu noli imbomani enonga kimani kongono pengama teangei.

<sup>29</sup> Enonga keremanga ungu keri te wendo naa opili neio. Kraistainga imbo konopu tambo nimbeloma kinye molko kenjingema kinye eno enge timbelo unguma kau neio. Ungu mare kano imboma pilewali eno lipo tapondombalo unguma kau neio.

<sup>30</sup> Mini Kake Telimuni eno imboma ulu pulu kerimani kondi toromo kombumunga pele kamukumu wendo pungo, ulu pulu keri te naa peremo kombuna wangei kani nokopa molopili nimbe Goteni Mini Kake Teli tirimu akumuni kanopa keri pilipe konopu naa mondombalo uluma naa teangei.

<sup>31</sup> Imbo lupema kinye konopu keri panjiko teko kenjiko, iri toko mumindili kolko, opa teko ungu umbulkondo nindiko,aku ulu teremele manga ulu puluma tiye kolaio.

<sup>32</sup> Enoni enongan nendo yando kondo kolko teko kondoko, Kraistini enonga nimbe tenderimumunga Goteni enonga ulu pulu kerima we tiye kolopa enondo pundu taio naa nimu mele aku teko imbomani eno teko kenjingi uluma we tiye kolko pundu taio naa nengei.

## 5

<sup>1</sup> Aku tega eno Goteni paa konopu mondoromo bakuluma yuni tega moromo mele lombilko teko molaio.

<sup>2</sup> Eno enongan nendo yando konopu mondoko kau molangei. Kraistini lino konopu mondopalie linonga nimbe kolo wangopa kolondorumu aku teko imboma konopu mondoko molaio. Oi kongi kinye melema kalko Gote popo toko tiringi kinye munemu pilipe penga pilipe ltimu mele Kraistini lino konopu mondopa Gote popo topa yunge kangi toringimu tirimu akumu aku tega pilipe ltimu.

<sup>3</sup> Eno Gotenga bakuluma moromele kani wapu ulu kerinali naa teko, imbo tenga kangina ulu kalaro mololi uluma naa teko, mele noirimelme melema manda naa teremo ningi imbo marenga melema kumu meko nani lipo noiemboa ningo naa teaio. Aku ulumanga temane te kape paa naa taio. Gotenga imbo kake telima aku uluma tengen molo temane tongue kinye manda naa tembalo kani aku teko paa naa teaio.

<sup>4</sup> Imbo pilkolio pipili kolonge ungu kerima kape naa ningo, kauwe unguma pilko imboma owe teangei ningo temane kerima toko aku alowa teko unguma naa neio. Aku tega ungu kerima lino Kraistainga imboma nimolo kinye manda naa tembalo. Aku unguma naa ningo, Goteni eno tega kondoromomunga yu paa tereno ningo molaio. Aku tengen kinye penga.

<sup>5</sup> Eno paa i teko wamongo teko pilengei: Wapu ulu kerinali teko, imbo tenga kangina ulu kalaro mololi uluma teko, mele noirimelme melema manda naa teremo ningi imbo marenga melema kumu meko nani lipo noiemboa nimele imboma Gote kinye Kraist talo iye nomi king molko nokrombele kombuna pungo mele pengama linge aulke te paa naa ltemo. Melema kumu meremele imbomani we melemando linonga Gote ningi popo toko kapi nimele imboma moromele.

<sup>6</sup> Imbo teni lino teko kenjirimele nimbe ungu pulu te naa peli we unguma kolo topa kondi tombalo ningo paa kanoko kondoko molaio. Aku teko teremele imboma Goteni nanga unguma liko tui tiko da teko moromele nimbe eno kinye mumindili kolopa tega tombalo kani eno liko manjiko molaio.

<sup>7</sup> Aku ulu keri teremele imboma eno kinye kopu teko naa molaio.

<sup>8</sup> Oi eno tumbulu tolina moloringi nalo kinye Awilimuni eno pa telina mondoromo kani eno pana moromele imboma moromele mele aku teko molaio.

<sup>9</sup> Pa telimunga mongo toromo mele i tega. Ulu pengama kinye ulu tumbi nilima kinye ungu paimboma kinye aku uluma wendo opili nimo.

<sup>10</sup> Awilimuni kanopa konopu tirimo uluma pilipo kondopo teamili ning molaio.

<sup>11</sup> Tumbulu tolimuma ulu puluma paa naa teao. Tumbulu tolimuma ulu puluma eno lipe tapondombalo enge te naa peremo. Tumbulu tolimuma ulu puluma naa teko, imbonando tumbulu tolimuma ulu puluma keri ning, ning tinge kinye paa.

<sup>12</sup> Gotenga ungumu liko tui tiko teremele imbomani lopeke teko konopu tiko teremele mele nimbo timboindo kape mai kola.

<sup>13-14</sup> Nalo pamuni mele tepa mona ltenderemoma pali ulumanga puluma waye ltemo. Pa telimuni melte tepa mona ltenderemo kinye kano melema kape pa teremo akumunga melemanga puluma mona ltemo. Akumu pilko kunana tenga ungu te toringi akumu i teda:

Imbo uru pelimu, nu makilko molowi. Ono kombuna makiliwi.

Aku tenio kinye Kraistini nu moloniona pa tendembalo.

<sup>15</sup> Akumunga eno teko molonge mele kanoko kondoko molaio! Eno imbo lipe manjili naa peli imboma mele naa andangei. Lipe manjili peli imboma andoko molaio.

<sup>16</sup> Kinye moromele walima imbomani teko kenjirimele kenjinge walima akumunga eno lipe manjili peli imboma andoko molkolio, ulu pengama tengen waima wendo wendo ombalo kinye welea welea tepo naa temolo kinye ulu marenimomba pipi timbelo kani welea welea tepo teamili ning kano ulu pengama tumbi tiko teao.

<sup>17</sup> Akumunga, ulu alowa teli uluma naa teao. Awilimuni eno teao nimo mele liko manjiko kondokolio aku teko teao.

<sup>18</sup> No awini nongo keke lepo naa taio. Aku tengen wali eno enonganopekenjimbelo uluma tengen kani aku ulu naa teao. Gotenga Mini Kake Telimu enonga konopuna molopa manda tepili neio.

<sup>19</sup> Mini Kake Telimu enonga konopuna molopa tepili eno enonganopekenjimbelo uluma tengen kani aku ulu naa teao. Gotenga Mini Kake Telimuni enonga konopuna tope timbelo pilengue kunanama kinye ning Awilimuni kapi nemili ning kerena kape konopuna kape kunana ning

<sup>20</sup> linonga Awili Jisasi Kraistinga imbi leko waliwalima Lapa Gotendo melemanga pali paa tereno neio.

*Lino linonga imboma kinye ungu pilipo takalipo molomolo mele ungu mare*

<sup>21</sup> Kraist yu linonga Iye Awilimuningo ungu ungumu pilko molkolio andi yando Gotenga imbonanga maindo molaio.

<sup>22</sup> Eno ambomani Awilimuningo maindo moromele mele enonga iyema kinye maindo molaio.

<sup>23</sup> Ambe temona Kraist yunge imbonanga pinyewemu moromo mele enonga iyema enonga pinyewe mele moromele. Kraistini yu ipuki tirimele imboma tepa ltimu aku imboma yunge kangimu.

<sup>24</sup> I tepa mele Kraist yunge imbonanga yunge maindo moromele mele eno amboma enonga iyemanga waliwalima maindo molaio.

<sup>25</sup> Eno iyema, Kraistini yunge imbo talapemu paa konopu mondopalie kolo wangopa kolorumu aku teko mele enonga amboma konopu mondaio.

<sup>26</sup> Yunge imbo talapemu Gotenga talape kake telimu molopili nimbe Kraistini yunge kolo wangopa kolopa, yunge ungumu tuku panjipe noni yunge talapemu kulumie torumu.

<sup>27</sup> Aku tepalie kalaro te naa molopa lupe te naa molopa, aku ulu keri te naa pepa, kangi paa kake telimu angilipe nani nanga imbo talape paa pengamu kanopo tuku liembo nimbe aku tepa terimu.

<sup>28-31</sup> Aku teko iyemani enonga kangima konopu mondokolio nokoromele mele enonga amboma konopu mondaio. Iye teni yunge ambomu konopu mondonromo akumu yu yunu konopu mondonromo mele. Imbo teni yunge kangimu kinye opa pule naa toromo. Kraistini yunge imbo talapemu nokopa kondoromo mele aku tepa imbo teni yunge kangimu nokopa kondoromo.

Lino Kraistinga kimbo ki mongo melema moromolona lino yunge imbo talapemuaku tepa nokopa kondoromo. Ungu tendeku mele Gotenga Bukuna i tepa nimbe peremo:

Goteni ambomu kinye iyemu talo terimungu iye teni anumu lapa talo tiyekolopa yunge ambomu kinye pekolo elo kangi tendekumu mele molongele. (Stt 2:24)

<sup>32</sup> Aku ungumunga ungu pulu enge te lopeke mele teremo. Nani pilto, Kraist kinye yunge imbo talapemu kinye aku talondo nimu konopu lteo.

<sup>33</sup> Nalo aku ungumunga tumbi tipe ungu pulu te enonga peremola. Eno iyema yu mele mele konopu mondonromo mele enonga amboma aku teko konopu mondaio. Eno ambomani enonga iyema ning unguma pilko tengen tiko eno ulu pengama teao.

**6**

*Bakulum a kinye anupili lapali kinye eno tengen uluma*

<sup>1</sup> Bakulum, Goteni anupili lapalini eno nokangei nimo kani aminyeli lanielinga unguma pilko tengen tiko teao. Aku ulu toyota tolimu tengen.

<sup>2</sup> Goteni oi ungu mane tirimu bukuna moromo mele i tepe, aminyeli lanieli kinye teko kondoko enonga unguma pilko liko teao nimu kanomu. Aku tepa nimbelie wali Goteni mi lepa ulu te tembo nimu. Aku ungumu i tepe,

<sup>3</sup> eno mai kombuna molopo kondopo, poinye awini molamili ningo aku tengen nimbe ake tepa olandopa nimbe panjirimu.

<sup>4</sup> Eno lapalini, enonga bakulum teko mumindili naa kondaio. Eno Awilimunga unguma mane tiko teko wamoko nokoko kondaio.

*Kou mone naa liko kongono we tendingi kendemande imboma kinye kongono nokoli iyema kinye enonga ungumu*

<sup>5</sup> Kongono we tendeli kendemande imboma, eno enonga kongono nokoli maina iyemani ningungumu pilko konopu tiko pilipi kolko teao. Eno konopu talo tepe pepili enonga kongono nokoli iyemanga kongono naa tendangei. Enoni Kraistinga ungumu pilko liko teremele mele aku teko kongono nokoli iyemanga unguma pilko liko teao.

<sup>6</sup> Enonga kongono nokoli iyemani teao nimele mele kanoko molangei tengen tipo temolo kinye kapi ningungingo aku teko kau ningungilkolio unguma tengen tiko naa teao. Enoni Kraistinga kendemande imboma molopo yunge kongono tenderemolo ningungilkolio aku teko mele enonga kongono nokoli iyemanga kongonoma tendengeindo Gotenga kongonoma konopuni pilkolio kongonoma enge ningungono tono kolko teao.

<sup>7</sup> Imbomanga kongono kau tenderemolo kani ulure molo ningungongo nokoli iyemanga kongonoma naa tendangei. Kongono nokoli iyemanga kongono kanomu Awilimunga kongono tenderemolo lepamo ningungiko teko kongono nokoli iye akumanga kongonoma konopu penga pepili toyota toko tendao.

<sup>8</sup> Awilimuni kendemande kongono teremele imboma kape enonga kongono teremele imboma kape pali teko kondonge mele kanopalie melema timbelo ningungilkolio enonga kongono nokoli iyemanga kongonoma aku teko enge nimbo teamili ningungliko manjeio.

<sup>9</sup> Kongono nokoli iyema, enoni aku teko kongono we tendeli kendemande imboma teko kondangei kala. Mulu kombuna momomo iyemu yu kendemande imboma kinye

nokoli iyema kinye enonga pali Nokoli iye Awilim. Yuni imbomanga imbima kanopalie eno naa moke tembalu ningungliko manjikolio enoni enonga kongono we tendeli kendemande imboma teko pipili naa kondaio.

*Kraistinga imboma opa tengendo kune tolo melema enge ningung ambolangei nimu ungumu*

<sup>10</sup> Kinye ungu te kamukumu nembo, lino enge nimbo molamili ningung Awilim kinye kopu teko molko yunge enge awili tepa perlimu lino liemili tipili ningung molaio.

<sup>11</sup> Kuromanga nomi Sataneni uluma kolo topa tepe lino kondi toromo kani enge nimbo angilemili ningung eno Goteni opa telimele tirimoma pali liko pakoko molaio.

<sup>12</sup> Wamongo liko manjeio. Linoni imboma kinye opa naa teremolo. Nalo melema nokongeindo enge peremo kuroma kinye, imbi molopa kombu lupe lupe nokoromele kuroma kinye, mulu mai naa para nimo wali tumbulu tolina mai kombuna nokoromele kuroma kinye, muluna ola moromele kuroma kinye, akuma kinye opa tepe moromolo.

<sup>13</sup> Akumunga Goteni opa telimele tirimoma pali liko pakoko ambolko molaio. Aku tengen kinye umbuni walima wendo ombalo kinye eno manda enge ningung angilko opa manda tengen. Kano kinye wali mare opa pulema welea naa toko mundunge lemo we nokoko angilengei.

<sup>14</sup> Akumunga lino naa topa mundupili, enge nimbo angilemili ningung ungu paimboma kako mele toko, ulu tumbi nilima kapani telis wale pakoli mele luwindo pakoko

<sup>15</sup> imboma Gote kinye manda molonge Gotenga ungu tukumemu ningung tilko andonge kimbo tu mele mondaio.

<sup>16</sup> Aku melema pakokolio, Gotenga ungu tukume paimbo ltemona Kraistini lino lipe tapondombalo ningung enge ningung ipuki tirimelema enonga kune tapoi mele lepo teko molaio. Aku kune tapoimuni keri kuro Sataneni mera tipe nomba pelimani eno tombalo kinye tipemu manda topa ku mundumbelo.

<sup>17</sup> Goteni imboma ulu kerimanga wendo Itimu. Aku konopumu wainye kapani telimu mele liko pakaio. Mini Kake Telimunga opa telis bainet liko ambolao. Bainet akumu Gotenga ungu tukumemu.

<sup>18</sup> Minimuni eno enge timbelomuni walwalima Gote kinye konge teao. Ulu lupe lupe wendo ombalo akumanga Gote kinye konge teao. Yuni yunge imboma lipe tapondopili ningung tangoli kape ipuleli kape walwalima kanoko koro naa molko Gote kinye wamongo konge teko molaio.

<sup>19</sup> Goteni na lipe tapondopili ningonanga ningoyu konge tendekolio, na imboma ungu nimbo tipo tembo kinyena imboma pipili naa kolopo Gotenga ungu tukumemunga ungu pulu lopeke teperemoma tumbi tipo nimbo para tiembo kani Goteni nanga kerena ombarolopungumu nimbe tipili konge tendaio.

<sup>20</sup> Kano ungu tukumemu nando ningotipuwi nimbe Goteni lipe mundurumuna andopo nimbo tiromunga na ka ulkenapero. Aku ungu tukumemu Awilimuni nando ningotilko andowi nimbe kongonotirimukani na imboma pipili naa koloponimbo tiembo ningogote kinyekonge tendaio.

*Poloni pipia topa pora timbeindo Goteni  
imboma mane tipili nimbe nimu ungumu*

<sup>21</sup> Ungu ninduma pora nimo. Na kongonotepo, ungu nimbo, konopuna pilipomoro mele iye Tikikusini eno moromelenaomba nimbeitabelo. Tikikus yu nangakonopu mondoro angenumu, Awilimunga kongonomunimble lipe tapondopateremoiyemuni na moromele nimbeitabelo.

<sup>22</sup> Eno konopu u nipili molangeinimbelino moromolo mele eno nimbeitipilinimbo eno moromelena yu lipo munduro.

<sup>23</sup> Lapa Gote kinye Awili Jisasi Kraist taloni eno Kraistinga imboma konopu u nipili molko, nendo yando imboma konopu mondoko, enge ningoiipuki tilkomolangeinengili.

<sup>24</sup> Imbolinonga Awili Jisasi Kraist konopu mondoromele mele tiye naa kolko yu konopu mondoko kau moromele imboma Goteni Kraist kinyekonopu noirimo mele enokinyekonopu noipili. Aku peyanio.

## Poloni Filipai Imboma Pipia Topa Tirimu Ungumu Filipai I UNGU TORUMUMUNGA Ungu Pulu Mare

Rom kombu ka ulkena molopale wali Poloni i pipiamu topa mundurumu. Lino tono kolamili nimbe umbuni mepo Kraist kinye kopu tepo molamili nimbe ungu mane tirimu. Kolo toli ungu mane tirimele imbomani lino embambo naa tiengei kane kane molamili nimbe mundurumu.

Goteni nu Jisas Kraist kinye konopu tenudekuna pupili molani nipili!

*Kraustinga Filipai imboma Pol kinye tapu toko moloringimunga Pol paa konopu tirimu ungu mu*

<sup>1</sup> Ilto Pol Timoti talo, Kraist Jisasinga kongo iye taloni pipia topo, ulke kombu Filipai moromele imbo Kraist Jisasini yunge talapena tukundo ltimu imboma timbilindo torombolo. Eno we ungu pileli imboma kinye, enonga tapu iyema kinye, Kraustinga imbomanga kongono tendeli iyema kinye, eno pali timbilindo i pipiamu topo tirimbo.

<sup>2</sup> Linonga Lapa Gote kinye Awili Jisas Kraist kinye, eloni eno kinye konopu noiko konopu u nipili molangei nengili.

*Poloni Gotendo paa tereno nimu ungu mu*

<sup>3</sup> Nani eno waliwalima konopuni pilipolio nanga Gote kinye paa tereno nio.

<sup>4-5</sup> Na ungu tukumemu pulu polopo eno topo tiru wali kape yandopa yandopa kano kongonomu tero wali kape enoni kongono popo tiko tendeko na liko tapondoromele-munga Gote kinye enonga konge tendepolio wali tono kolopo konge tendepo moro.

<sup>6</sup> Nani pilipolio, Goteni eno kinye kongono pulu polopa terimu kongono pengamu telipe pumbe pumbe, Kraist Jisas yando ombo lino limbelo walimunga kano kongonomu tepa pora timbelo nimbo paa lipo manjiro.

<sup>7</sup> Na eno konopuni pilipo andopo morona na enondo konopu lteo mele paimbo lteo. Na ka ulkena pero wali kape, ungu tukumemu nimbo tipo yu paa paimbo ungu mu imboma paa pilko liengei nilipo andoru wali kape, enoni na liko tapondoromelena na kinye eno kinye lino Goteni we kondo kolopa lipe tapondoromo.

<sup>8</sup> Kraist Jisasini eno kondo kolopa konopu mondoromo mele nani aku tepo eno kondo kolopo konopu mondopolio waka itemona

kanamboa konopu lteo. Goteni aku ungu paa nio nimbe lipe manjirimo.

<sup>9-10</sup> Nani Gote enonga konge tendero mele i tepe: Enoni ulu keri pengama moke teko kondokolio ulu pengama kau pilko liko teaio nimbo eno Gote kinye Kraist talo peya elonga imboma peya konopu mondoromele mele paa olando olando mondoko mololiko pungo, enonga lipe manjilima kinye ulu keri pengama moke teli ulu pulumu kinye enonga konopumanga pepa ti nilipe pupili konopu mondoko molao nimbo enonga nimbo Gote konge tero. Aku teko molonge kano kinye Kraist al-topa ombalo walimu wendo ombalo kinye eno konopu kake tepili molko yu kanopa penga pimo ulu puluma kau enonga konopumanga pepili molko,

<sup>11</sup> Jisas Kraistini eno kinye kopu tepe molopa lipe tapondoromomunga yu kanopa tumbi nili uluma nimbe karomo uluma kau teko molonge. Enoaku teko tek molonge wali lupe imbo karomelemani Gotenga imbi liko ola munduko yu kapi nengei nimbo aku tepo Gote enonga nimbo konge tero.

*Pol ka ulke perimumuni Gotenga ungu ame tolimu taporamu*

<sup>12</sup> Ango kame, na kinye ulu umbuni wendo omo akumuni ungu pengamu pipi naa timo. Na ka tiringi ka ulkena pero ulumuni ungu pengamu tepe enge tirimomu eno liko manjengei nimbo tiro.

<sup>13</sup> Akumunga Rom iye nomi king Sisaramunga ulkemu nokoromele ami iyema kinye we imboma pali na Kraustinga kongonomu tenderomunga ka tiringi ka ulkena pero ningko karomele.

<sup>14</sup> Na ka ulkena peromunga nanga angenupili awinini kanokolio Awilimuni lino paimbo lipe tapondombalo ningko pilko konopu enge nipili pipili naa kolko Gotenga ungu mu enge ningko ningo tilko andoromele.

<sup>15</sup> Paimbo, iye mareni na kombu awininga andopo ungu mu nimbo tirumunga imbo awini kano ungu mu pilko limele mele kanoko keri pilkolio Polonga imbimu mainye pupili, linonga imbima ola molopili ningko Kraustinga ungu ningko tirimele.

<sup>16</sup> Na ungu pengamu yu paa paimbo nilipo andoromunga ka ulkena pero mele kanokolio na konopu mondokolio Kraustinga ungu mu ningko tirimele;

<sup>17</sup> nalo iye mareni konopu tumbi tipe naa pepili enonga imbi ola molopili ningko Kraustinga ungu ningko tirimele. Na ka

ulkena pero kinye umbuni mare olandopo tiemili ningko aku teremele.

*Pol ka ulkena pepalie na kolombo kinye molo molombo wali Kraist peya morombolo mele molombo nimu ungumu*

18-19 Nalo na mindili nopili ningko aku teremele mele ulure peremoya? Eno konopu penga pepili Gotenga ungu ningko tirimele molo konopu tumbi tipe naa pepili ningko tirimele akumu ulure molo. Eno wayeni Kraistaunga ungumu imbona ningko tirimelemunga na paa tono kolopo moro. Tono kolopo molombomunga ulu te peremola. Na pilipolio, na ka ulkena pepo mindili noro wali enoni Gote nanga konge tenderemelemunga kape, Jisas Kraistaunga Minimu yu na kinye molopa na lipo tapondoromomunga kape, i ulu talonga na ka ulkena wendo pumbo molombo nimbo pilipolio tono kolopo moro mele molombo.

20 Nani teambo konopu lteo mele i tepa na tero mele kape moro mele kape akumunga pipili naa kolopo Kraistaunga kumbekerena angilimbo wali paa nimbo yunge kongonomu enge nimbo tero. Molondu lemo kape molo kolondu lemo kape nanga kangimuni Kraistaunga imbi lipo ola mundumbo nimbo aku tero.

21 Na i konopu lteo. Na koinjo molondu lemo na Kraist kinye kopu tepo molombo nalo na kolondu lemo na paa penga tepa molombo.

22 Maina we molondu lemo nani imbona Gote kinye molangei kongono we itemomu manda tembo. Akumunga kolombomu kinye koinjo molombomu kinye kano ulu talonga te tembonje na naa lipo manjiryo.

23 Na konopu talo peremo. Mai kombumu tiye kolopo Kraist moromona pumbo peya molombolomunga na tono teremona moro. Aku tendu lemo penga.

24 Nalo eno tapomboindo mai kombuna we molomboaku paa penga.

25 Nani eno lipo tapondombo kinye eno Kraistaunga imbona molko kondoko tono kolok enge ningko ipuki tiko molangei nimbo pilipolio na eno kinye peya mai kombuna paimbo molomolo nimbo enge nimbo ipuki tiro.

26 Akumunga pele, na eno molongena altopo yando ombo peya molomolo kinye enoni tono kolko Kraist Jisasina imbimu liko ola mundengei.

*Goteni Filipai imbona enge tirimuna enge ningko molaio nimbe Poloni nimbe tirimu*

27 Nalo, na ondu lemo kape naa ondu lemo kape ulure molo. We imbonani lino kanokolio paimbo Kraistaunga imbona moromele ningko kanangei ningko Kraistaungi yu lombili andolima moromele mele

nimbe tirimu mele eno aku teko molaio. Aku teko molonge ulumu paa awilimu. Pele, aku ulu teko molangei ombo mongoni kanondu lemo molo eno teko moromele mele temane te ka ulkena molopolio pilendu lemo eno konopu tendekuna pupili enge ningko molko, imbona Kraist yu paimbo imbonanga tepa liliimu ningko enge ningko pilengei ningko ungu pengamu toya toko ningko tirimele ulu konopu lipo manjiryo.

28 Enonga opa pule imbonani eno mini lteangei ningko ulu mare teremele kinye ulure molo ningko mini naa lteko we angimele mele pilembo nimbo moro. Enonga opa pulemani eno mini naa lteko we angilinge ulu kanokolio eno opa pulema molko keninge nalo eno Kraistaunga imbona molko kondongena liko manjinge. Goteni eno tapondopapa opa pulema topa mainye mundumbelomunga aku teko liko manjinge.

29 Goteni eno tepa kondopalie Kraistaunga kongono teaio nimu. Eno ipuki kau tiko we molaio ungu naa nimu. Aku molo. Yunge kongono tendenge wali eno mindili nongei nimu.

30 Oi na Kraistaunga kongono tendepo opa teru kanomu, kinye enge nimbo opa we tepo moro piltiemele. Kinye eno mindili nongko molkolio na kinye opa kalale imbona moromele.

## 2

*Lino konopu tendekuna pupili molopo imbo lupema tepo kondamili ungumu*

<sup>1</sup> Kraistini enonga konopu enge tirimoya? Eno paa konopu mondopa enonga konopu tepa ame tondoromoya? Eno Mini Kake Telimu kinye kopu teko moromeleya? Eno imbo lupema kondo kolko teko ame tondoromeleya?

<sup>2</sup> Aku tengen lemo eno konopu tendekumu kau leko, enonganano nendo yando konopu mondoko molko, enonga konopu tendekuna pupili molkoaku ulu tengen lemo wali na teko tono kondonge.

<sup>3</sup> Eno na imbo awili te molambo, nanga imbi ola molopili ningko naa molaio. Na kamakomu moro, nanga imbi paa olando moromo ningko pilko eno none teko naa molaio. Eno molonge mele i tepa, imbo lupema awili moromele, na imbo mandopamu moro ningko eno teko pilko molaio.

<sup>4</sup> Eno enonganano konopu kau naa leao. Enonga imbo lupema teamili ningko mele pilko liko molko kondangei ningko tapondaio.

*Kraist Jisas Yu iye timborimbo mele molorumuna Goteni Yu lipo paa olando mondorumu ungumu*

<sup>5</sup> Kraist Jisasi konopu lerimu mele enoaku teko konopu leao.

<sup>6</sup> Yu paimbo Gote moromo nalo aku tepo Gote moro mele molambo konopu naa lerimu. Aku molo.

<sup>7</sup> Yu Gote molorumu mele tiye kolopakongono tendeli kendemande iye te molambo nimbe yu imbo imboma moromele mele aku tepa imbo iye apuwe lerimu.

<sup>8</sup> Yu imbo iyemu molorumuna kanoringikano kinye na imbo iye molambo nimbe molopa, Goteni tewi nimu uluma pali pilipe lipe terimu. Nu kolani, unjo polopeyana ukutoko panjengei nimu ungumu kape tiye naa kolopa pilipe lipe yu kolorumu.

<sup>9</sup> Aku ulu pulumunga Goteni yu paa olandopa lipe mondopa, imbi te we imbima pali topa mainye mundupe paa olandopa moromo imbibmu tirimu.

<sup>10</sup> Jisasinga imbibmu pilkolio mulu kombuna tukundo moromele imboma kinye, maina moromele imboma kinye, kolkolio maina mainye peremele imboma kinye, enoni pali yu imbi liko ola munduko, Yu iye Awilimu molopili lino manyendopa molamili ningyo yunge kumbekerena komongo tokon pondoromele.

<sup>11</sup> Ara Gote yunge imbi kapi nengei nimuna wayeni i teko ningyo para tingi. Jisas Kraist yu Awili ninge.

*Lino imboma kinye molomolona pa telma molamili ungu*

<sup>12</sup> Nanga imboma, Kraist Jisasini aku terimu mele pilkolio nanga unguma oi waliwalima pilko tengen tiko teringi mele, kinye kape tengen tiko teangei. Na eno kinye molopo teao niu wali pilko liko teringi mele, kinye na eno kinye naa morowali kape nani teao nio mele liko awili tiko pilko liko teko molangei. Goteni eno mindili nonge aulkena naa pangei nimbe oi wendo ltimumunga yu kinye popo tiko moromele mele aku tepo we molamili, aku tepo molomolo mele melteni pipi timbelonje ningyo Gotenga kumbekerena pipili kolko mini lteko Goteni we timbo nimumelema paa liemili ningyo akuma lingei kongonomu mindili nonge teko molaio.

<sup>13</sup> Aku ambe telka, Gote eno kinyemolopa, yuni teko molangei nimbe konopu itemo mele teangei nimbe engema tipe lipe tapondopa, teamolo konopu itemele ulumu yuni tirimo nimo kani aku uluma teko molaio.

<sup>14-16</sup> Goteni lino kinye ungu te peremo ulu, te naa kanopa, imbo kake telima kau nimbe kanopili. Kinye imbo ulu pengama tiye kolko ulu kalaro mololima kinye ulupulu kerima kau teremele imboma kinye peya molopo yunge bakuluma tumbi tipo molopo yuni lino kanopa ulu kalaro mololi

uluma nimbe naa kanopa imbo tumbi nilima kau moromele nimbe kanopili ningolio eno ulu teremelema pali nendo yando naa ningyo karaye naa teaio. Kano imbo kerima koinjo mololi ulumu peremo unguungu pilko liengei ningyo tirimelemunga kano imboma moromele tipe lam mele molko pa tenderemele. Aku tengen kinye, Kraustingawalimu wendo ombalo kinye eno kanopolio nani eno kinye mindili nombo kongono teroma we naa teru. Nanga ungu enge nimbo nioma mainye naa pumo nimbo kanopolio na paa eno kinye tono kolombo.

<sup>17</sup> Juda imbomani Gote popo toko melema kalko tikolio, mingi te no wain moromomuliko Gotenga kumbekerena kamukumu ondoko munduko tirimele mele enoni Gote ipuki tirimelema kinye, yunge kongonomu tenderemele kinye, yunge popo toko tirimele mele akumunga olandopa na Pol kolambo ningyo tongei wali nanga mememu no wain mele ondopa omiba pumbelonje. Aku lemo na tono kolopo, eno kinye peya paa tono kolombo.

<sup>18</sup> Na kinye aku ulu wendo omo lemo na eno kinye tono kolombo, akumunga eno kape tono kolko na kinye peya paa tono kolonge.

*Poloni Timoti kinye Epafroditus talo ulke kombu Filipai pangili lipe mundurumu ungu*

<sup>19</sup> Awili Jisasini ee nimo lemo nani nondopo Timoti eno moromele opili nimbo. Yu kelepa yando ombalie eno moromele mele na temane topa timbelo pilipolio na konopu penga pembalo.

<sup>20</sup> Timoti na kinye kopu tepe molopa eno molko kondangei lipo tapondombo nimbe moromo mele imbo lupe te aku tepa naa moromo.

<sup>21</sup> We imboma pali Jisas Kraist lipo tapondopo yunge kongonomu teamili naa ningyo enonga melema kau konopu kimbo tiko pilko moromele.

<sup>22</sup> Nalo Timoti tepe kondoromo mele eno pimele. Bakulu teni yunge lapa lipe tapondoromo mele yu kinye iltou ungu pengamunga kongonomu peya kopu tepe terembolo.

<sup>23</sup> Akumunga eno moromele na opili nimbo lipo mundumboi tero. Otili akinjo na kinye ambele ulure wendo ombalonje nimbo nokoro. Pele pilipolio, yu eno moromele opili nimbo welea lipo mundumbo.

<sup>24</sup> Na kape Awilimuni na lipe tapondombalo kinye nondopo eno ombo kanombo konopu lepo ipuki tiro.

<sup>25</sup> Nalo kinye i teli oi enoni na lipe tapondopa nokopili ningyo liko munduringi iye Epafroditus eno moromele altopta opili

paa lipo mundumbo konopu lteo. Yu linonga angenu, na kinye peya kopu tepo kongono tepo, Gotenga ungu tukumemu mainye naa pupili nimbolo peya opa terembolo iyemu.

<sup>26</sup> Eno altopo kanamboa nimbe molopa, yu kuro torumu ungu pileringimunga yu konopu umbuni tepili moromo.

<sup>27</sup> Yu paimbo kuro torumu, yu pondeanga kolorumu. Kolka nalo Goteni yu kondo kolopa tepe koinjo ltimu. Goteni yu kau kondo naa kolorumu. Yu kolombalo kinye na kinye umbuni awilima membo nimbe pilipili naa kape kondo kolopa yu tepe koinjo ltimu.

<sup>28</sup> Akumunga eno yu altoko kanokolio kuro pora nimu ltemo ningi tono kolangei. Ombalo wali na konopu umbuni awini naa tepili.

<sup>29-30</sup> Yu yunu umbuni te wendo ombalo mele konopuni naa pilipe, yuni Kraistingu kongonomu kau pilipe tepe molopalie kolombai tepe, enoni na lipo tapondopili ningi kongono tiringimu tepe molambo nimbe yu kuro torumu wali kape pilipe kelea kelea lepa we kongono terimu. Akumunga Epafroditus ombalo wali tono kolko panjiko lieio.

### 3

*Kraist paimbo linonga lipo tapondolimu nimile imboma kau paa imbo tumbi nilima moromele ungumu*

<sup>1</sup> Nanga imbo ango kame, i pipiamu topo pora timboindo i tepo nio: Eno Awilimu kinye kopu teko moromelemunga tono kolko molaio. Oi pipia te topo lepi lepi topo niu mele altopo pipia tombo kinye tiye naa tembaloo. Aku tembo wali eno lipo tapondopili kani altopo nembo,

<sup>2</sup> Iye owa takera mele moromelema kanoko kondoko molaio. Kano iyema eno teko kenjingi iyema, Israel iyemani kangimu kopiko teremele ulumu teko kenjirimele iyema.

<sup>3</sup> Lino Kraistingu imboma kau paa paimbo kangi pundu kopili Israel imboma moromolo. Lino Gotenga Minimuni lipo tapondoromona Gote popo toromolo imboma moromolo. Kraist Jisasina imbimu kau lipo ola mundupo, kangindo ulure teremele akumu lino naa lipo tapondorommo nimbo pimolo imboma moromolo.

<sup>4</sup> Kangindo ulumani manda lipo tapondolkanje na Goteni ulure naa tembaloo.

Molopo kondombo nimbo tono kolopo pilili naa kolka. Imbo marenii kangindo ulure teremolomunga paimbo manda molomolo ningi enge ningi pimele lemo nani kape aku tepo manda paimbo nimbo olando enge nimbo pilimboi.

<sup>5</sup> Amani na merimu wali wali kite yupoko pakera omiba purumu kinye ki talo tipemu nanga kangi pundu kopiringi. Na Israel iyemu, na Benjamin lapu iyemu; ama ara talo Hibru imbo talo, na Hibru iyemu. Na Farisi iye molopo Farisi iyemani Gotenga ungu manema pilko enge ningi teremele mele aku tepo pilipo paa teru.

<sup>6</sup> Gotenga ungumu enge nimbo pilipo tepo, yu paa lipo tapondambo nimbo Kraistingu imbo talapemu tepe kenjipo mindili tiru. Na Kraistingu iyemu naa molopolio ungu manema pileringi iyemani mane tiko teao ningi mele paa wamongo tipo terumunga nani ulu te alowa teko, teko kenjirino ningi paa naa kanoringi. Kangindo aku tepo tepe molorumunga kangindo teremele mele ulure lipe tapondolkanje na paa paimbo lipo tapondolka.

<sup>7</sup> Ulu akuma lombilkanje nani imboma maindo mundulka. Nalo ulu akuma kanoro wali manda naa terimu. Akumunga na Kraistingu iyemu paa molamboi konopu lepolio yu lombileru.

<sup>8-9</sup> Juda imbomanga ulu pulumando kau naa niu. Kraist Jisas nanga Awilimu paa pilipo paa kopu tepo morombolo aku ulumu paa penga nimbo we melema kinye uluma ulure molo nimbo tiye kolopo yu kau lombilipuro. Kraist kau ambolopo yunge unguma enge nimbo ipuki tipo tepo, yu kinye kopu tepo molambili nimbo we uluma langi purupe lkupindi toromo kinye toko iteremele melema mele ltemo nimbo pilipo moro. Kinye nani ungu manema pilipo lipo terumunga na Goteni na iye tumbi nilimu nimbe karomo nimbo naa pilto. Na iye tumbi nilimu molambo nimbo aulkle te lupe puro. Kraist kau paimbo nanga lipo tapondolimu nimbo ipuki tiro akumu kau iye tumbi nilimu moro aulkemu akirindrimo. Kraist paimbo ningi ipuki tirimele imboma kau Goteni imbo tumbi nilima nimbe imbi tirimo.

<sup>10</sup> Na Kraist moromo mele paa lipo manjipo, yu kinye paa kopu tepo kanopo lipo molambili konopu lteo. Kraist kolopa makilipe koinjo molopalie enge te ltimu aku engemuni na molopo tembo mele paa lipo tapondopili. Yu kolombaindo mindili norumu mele na yu kinye peya kopu tepo mindili nombo. Kolombaindo konopuni pilipe molorumu mele naaku tepo molombai.

<sup>11</sup> Aku tepolio na Goteni ono kombuna topa makinjipili konopu lteo.

*Poloni imboma melte lingeindo owe toromele mako peremonia tu arale teko lkiko purumele mele naaku tepo melte limboindo enge nimbo lkipo puro nimu ungumu*

<sup>12</sup> Nalo na i tepo i tepo molambo niu akumu oi aku tepo molto nimbolio naa nio. Iye paa penga ulu pulu keri naa pelimu moro naa nio. Kraistini na molopo kondambo nimbe na ambolopa ingi tirimunguaku mele na ulu akumu paa ambolopo ingi tiembo nimbo kongono enge nimbo tepo moro.

<sup>13-14</sup> Ango kame, ulu akumu oi ambolopo moro nimbo naa pilto. Nalo ulu te paimbo tepo moro, akumu i tepa imbomani melte tinge kinye lingeindo mako toromele owena na oi kumbe lepo lkipo pumbo liembo ningtu arale teko lkirimile mele naaku tepo Kraist Jisasini linonga nimbe tenderimumunga Goteni na koinjo molko kondoko kau pani owi nimu ulumu paa liemboi nimbo na umbuni lipe tirimo melema wendo wendo lipo ltepo, mulu naa pilipo we mele lupema konopuni naa pilipo owe torumuna pumboindo enge nimbo lkiro.

<sup>15</sup> Lino Kraistingu imbo lipe manjili moromoloma pali i nio ulumu teponolamili. Molo enonga imbo maren i nio mele paimbo nimo ningnaa pilko konopu lupe lienge lemo eno konopuni paimbo ungu pilenge mele Goteni lipe tumbi tindimbelo.

<sup>16</sup> Nalo ulu pengama teamili i teli oi nimbo teponolamolo mele tiye naa kolopo paa kamukumuaku teponge nimboteponolamili.

<sup>17</sup> Ango kame, enoni pali nani tero mele manda leko teko molaio. Lino teponolamolo mele penga teko manda leko teko moromele imboma wamongo kanoko lombieo.

<sup>18</sup> Oi wali awini nani enondo i teponimbo tiru. Imbo awini Kraist kolorumu unjopolopeyamu kinye opa pulema moromele. Kano imbomaniteko kenjirimele ulumani Kraist unjopolopeyana lino lipe tapondopakolorumu engemu ulure naa teremonimele nimbo tiru akumu kinye altoponkola teponenimbotiro.

<sup>19</sup> Eno mai kolonge uluma kapi ningulupengama ningno, mainamelema kaukonopu kimbo tiko moromele. Eno kangindouluma enonga Gote mele ningopimelemunga waliwalima molko kenjikokau pulikombukerina punge.

<sup>20</sup> Nalo lino mulu kombuna imboma moromolo. Lino Lipe Tapondombalo Iye te, akumu Awili Jisas Kraist, yaku mulu kombuna maindo ombaliele lino lipe mepapumbelonimbo konoputipo nokopomoromolo.

<sup>21</sup> Aku wali yunge enge peremonayumelema pali topa mainye mundupe yu pange tendepa molombalo. Enge akumunilinonga kangi lino umbuni tirimoma

kolowangopayungekangi none teli paa pengama lino timbelo.

#### 4

<sup>1</sup> Akumunga, nanga ango kame, na konopu mondopo paa eno kanamboa nimbo kondo kolopo moro imboma, na eno kinyekongonomuterumunga eno nanga mele kaloli pengamu moromelemunga tonokolopo moro imboma, nanga pulu Itemo imbo konopu mondonorama, Awili Kraistiniaku tepa eno kinye manda tembalokani pilkolio eno Awilimu tiye naa kolko enge ningonimbo molaio.

*Poloni Filipai imboma ungu mane tipelie eno konopu tendekunka pupili molaio nimu*

<sup>2</sup> Ambo Yuodia kinye Sintike talo, Awilimunga imboma molangei nimbe peremo ungu manemu mele eloaku teko Awilimunga ambo talo morombele kani konopu tendekunka pupili molalio nimbo elo paa walipo pilto.

<sup>3</sup> Nanga kongonotendekuyiyemu, nunge imbibunga pulumu pilkolio koputepo peya kongonoterembolo paimbomunu ambo talotendekutikomolangili ninglikotapondaninimbo kongetero. Imbomani ungu pengamu pilengei ningelo naa kinyepayakoputepokongonomindili nimboteponolorumulu kaniaku teani. Iye Klemen kape imbo mare peyakoputepo andopokongonoterimulula, akuiimbomangaimbima koinjomolko kau pungeimbomangaimbima moromolobukunamoromo.

<sup>4</sup> Eno Filipai imboma, Awilimu kinyekoputekomoromelekaniwaliwalimatonokolkomolaio. Altopolano. Tono kolkomolaio.

<sup>5</sup> Awilimu enomoromele nondopabai teremo kani enoniimbomaniteko kenjingewali enowelea teponirito邦enge nimbomanetiponimboma takalipotapondopomoromolomeleimbomanipalikanangeiningaku teko tekomolaio.

<sup>6</sup> Eno mele tengakonopukimbonaa tieio. Enonga melema kinye uluma kinye enonga konopunaumbuniteremoma pali Gote ningoparatako, yu kinyetaponingokongeketekoliyu kinyepaa tereno ningokau teko ningomolaio.

<sup>7</sup> Aku tengekinye Goteni eno konopuu nili ulutirimomu, kanomuimbomanimanda naa pimele, kano u nilimuni Kraist Jisas kinyekoputekomolangienongakonopuma nokombalo.

<sup>8</sup> Ungutekamukumunembo. Angokame, ulupaa pengao landopama, imbomanikanokoliokonoputikokapi kinyenimeleaku tepaluluma kaukonopukimbotikopilkololangei. Ulupaimboma kinye, imbomanip

kanoko penga pimele ulu tumbi nilima kinye, ulu kalaro naa mololi uluma kinye, imbomani pilko penga pimele uluma kinye, kanoko teko kondorono nimele uluma kinye, aku tepa uluma kau konopu kimbo tiko pilko molaio.

<sup>9</sup>Nani eno mane tiro pileringi mele kinye, ulu teroma pilko karomele mele kinye, aku uluma eno waliwalima teko molaio. Aku tengen wali konopu u nili ulu pulumu peli Gote eno kinye molombalo.

*Filipai imbomani melema we tiko munduringimunga Poloni konopu tipe paa teremele nimu unguma*

<sup>10</sup>Na Awilimunga iyemu molopolio enoni na kondo kolko tingei teringi mele akuma altoko teringimunga paa konopu tiro. Oi paimbo lipo tapondamili ningila nalo liko tapondongei aukle te naa lerimu.

<sup>11</sup>Na melema molo ltemona naa nio. Ulu lupe lupe keri pengama na kinye wendo oromo wali ulure molo, aku uluma mandala nimbo konopu kimbo tipo pilipo naa moro.

<sup>12</sup>Na wali mare melema molo ltemo mele kape, wali mare melema awini amboro mele kape pilipo moro. Nalo na langi awini ltemo walima kape engele ltemo walima kape, melema molo ltemo wali kape mele awini noiro wali kape, ulu keri pengaaku tepama pali na kinye wendo oromo wali ulure molo nimbo takalipo moro.

<sup>13</sup>Kraistini na enge tirimoaku engemuni na uluma pali manda tero.

<sup>14</sup>Akumu paimbo nalo eno na kinye popo tiko nanga umbunima meringi aku ulu pengamu teringi.

<sup>15</sup>Eno Filipai imbomani pimele, nani oi pulu polopo ungu pengamu nimbo tilipo andopolio eno moloringina ombo nimbo tiru pileringi kinye altopo enonga kombu Masedonia provins tiye kolopo kombu lupe marenega puru kinye enoni kau na liko tapondoko kou mone mare tiko munduringina ltiu. We Kraistingu imbo talape lupe marenia naa tiringi.

<sup>16</sup>Masedonia provins oi tiye naa kolopo ulke kombu Tesalonaika pumbo moloru wali kape na melte naa ltemo ningowali mare eno Filipai imbomani liko tapondoko melema tiko munduringila.

<sup>17</sup>Na melema we tiengenimbo konge tepo naa nio. Na liko tapondoko melema we tingemunga Goteni eno mele pengama olando timbelo linge, aku kinye na konopu timbo nimboaku tepo nio

<sup>18</sup>Akumunga melema pali tingemunga pipiamu i topo tiro. Melema tiringi ltiu akuma na molo lerimu melemanga olando tiringi ltiu. Kinye Epafroditusini eno mele tiko munduringi mendepa orumuna

lriumunga na mele paa pulumu noiro. Aku melema tinge, lino Gote popo tomilindo mele kalopo tirimoloma Goteni mune pilipe penga pilipe limo mele aku tepa kano melema popo topa kaloli melema mele yuni kanopa penga pimo.

<sup>19</sup>Kraist Jisasini enonga nimbe tenderimuna yunge imboma moromelemunga, nanga Goteni mele koinjo koinjo penga pulumu noirimomanga mare eno mele molo itemoma pali noiенgei nimbe timbelo.

<sup>20</sup>Waliwalima linonga Ara Gotenga imbi lipo ola mundupo yu kapi nimbo mololipo kau pamili. I paa.

*Poloni pipiamu topa pora timbeindo eno molko kondaio nimu unguma*

<sup>21</sup>Eno Kraist Jisasinga imboma pali nani molko kondaio nio. Na kinye peya moromo angokameni kape eno molko kondaio nimele.

<sup>22</sup>Gotenga imboma pali, Rom iye nomiking Sisaramunga ulkena peremelema kinye peya, enoni molko kondaio nimele.

<sup>23</sup>Awili Jisas Kraistini eno kinye konopu noipe enonga minima tepa penga tepili. I paa.

## **Poloni Kolosi Imboma Pipia Topa Tirimu Ungumu Kolosi I Ungu Torumumunga Ungu Pulu Mare**

Ka ulkena molopalie wali Poloni i pipiam topa panjirimu. Kolo toko ungu mane tiringimani enonga ungu mare Gotenga ungu tukuruku mundukolio ningi nalo imbonani konopu leko teringi ulumani ulu te naa tepili Jisas yuni kau lino manda tepa lipe Gotenga imbo toyta tolima nimbe tukundo Itimu nimbelie Poloni aku tepa nimu. Jisas yu melemania pali pulu iyemu nimbe ungu mane tirimu.

Goteni nu imbomanga mane ungu tukuruku mundurumelema naa pilko Jisas kopu teko molani nipili.

*Gotenga koinjo mololi ulu puluma kinye we uluma kinye pali Kraist kinye pepalie Yu melemania pali kiyendomu*

<sup>1</sup> Na Pol, Goteni aku tepili nimumunga Kraist Jisasini nanga kongono tendepuwi nimbe lipe mundurumu iyemu, na linonga angenu Timoti kinye molopolio

<sup>2</sup> nani i pipiamu topo tiro. Eno Gotenga imbo Kolosi peremele imbo, Kraist yu paimbo ningi enge ningi ipuki tirimele angenupilima i pipiamu topo tiro. Linonga Lapa Gote yuni eno kinye konopu noipe konopu u nipili taku liko molangei nipili.

*Poloni Kolosi imboma Jisas paimbo ningi ipuki tiringi mele pilipelie Gote kinye paa tereno nimu*

<sup>3</sup> Iltoni Gote, linonga Awili Jisas Kraistingu Lapa yu kinye konge tepolio kinye waliwalima paa tereno nimbolo.

<sup>4</sup> Eno Kraist Jisas paimbo ningi enge ningi ipuki tikolio Gotenga imboma pali konopu mondonomele akumunga konge terembolo.

<sup>5-6</sup> Gotenga ungu tukumemu eno moloringina orumu kinye Goteni enonga nimbe mulu kombuna noindirimu itemo mele akuma paa limolo ningi nokoko moromele. Pele aku nokoko moromele ulumuni eno ipuki tirimele ulumu kinye konopu mondonomele ulumu kinye, eno liengei nimu. Eno oi pulu polko Gotenga ungu tukumemu pilko Goteni eno we kondo kolorumu ungu paimboma pilkolio akumunga puluma paa pilko kondoringi kinye yandopaaku ungu tukumemuni eno tepea kondopa ulu pengama wendo wendo opili nimo mele mai kombumanga paliaku tepea ulu pengama wendo wendo opili nimo.

<sup>7</sup> Goteni eno we kondo kolorumu ungu pengamu Epafrasini eno oi nimbe tirimuna pileringi. Kano iyemu yu lino peya kopu tepo kongono tepo moromolo imbomanga iye te, lino konopu mondonomele iyemu. Yu linonga kongono tendambo nimbe Kraistingu kongono tepa kondopa tiye naa koroemo iyemu.

<sup>8</sup> Enonga konopuna Mini Kake Teli mordonomele eno lipe tapondorumuna imboma konopu mondonomele mele kape Epafras yuni ilto nimbe tirimu.

*Enonga nimbe Gote konge tendepa enge nipili molangei niwi nimu ungumu*

<sup>9</sup> Akumunga eno kinye aku tepa uluma wendo orumumunga oi pulu polko pileringi kinye yandopa wali wali Gote kinye enonga nimbo konge tendepolio, Goteni teangei nimbe pilipe moromo mele eno paa pilkolio, akumunga ungu puluma paa pilengei kani Mini Kake Telimu enonga konopuna molopa lipe manjilimu tipili nimbole.

<sup>10</sup> Aku teko pilko teko molkolio, Awilimuni eno kanopa penga pilipili kani yunge imboma teko moromele mele aku teko teko molko ulu penga lupe lupema awini teko, Gote moromo mele kinye, nimo unguma kinye, pilko moromele mele paa olando pupili nimbo konge tenderembolo.

<sup>11-12</sup> Eno, umbuni pembalo kinye mini naa leko, umbuni akuma pora nimbelo ningi taku liko nokoko molangei kani Gote enge paa olando tirimomunga yuni eno enge nipili molangei nimbe eno enge lupe lupema tipili. Yunge imbomanga nimbe yu iye nomi king molopa nokoromo kombu pa telimunga mele noindirimoma eno Kolosi imbomanga kape peya noindirimoline aulkemu akirindirimu iye, akumu enonga Lapa, yu kinye paa konopu tiko paa tereno nengei nimbo Gote enonga konge tenderembolola.

<sup>13</sup> Yuni lino lipe tapondopa tumbulu tolina yu king molopa nokoromo iye enge nili engemunga wendo lipe, yunge konopu mondonomele Maloni melema pali nokoromo engemunga tukundo lipe mondonoru.

<sup>14</sup> Yunge Malo akumu yunge meme ondoromumuni linonga ulu pulu kerima kamukumu mainye pupili nimbe tiye kolopa, lino ka tipe ambolorumu aulkena wendo lipe we manda molangei nimu.

*Kraist Yu molopa ulu teremomanga pali Yu olandopamunga ungumu*

<sup>15</sup> Gote naa karomolo nalo Gotenga Malo Kraist yunge Lapa none teli iyemu. Mulu mai melema oi wendo naa opili yu oi molorumu. Melemania pali yu iye awili mormomo.

<sup>16</sup> Aku ambe temona, muluna angimo melema kinye maina ltemo melema kinye, karomolo melema kinye naa karomolo melema kinye, aku mele Goteni tepo wamopo teambo nimu melema pali Malonga kimuni terimu. Enge peremo kuroma kinye, mulu kombuna imbo imbi moromo imbo awilima kinye, imbi paa olandopa molopa mele awini nokromelema kinye, enge nilima kinye, aku mele paa enge nilima muluna kinye mulu kombuna kinye moromelema pali kape mele mongoni karomolo melema pali peya yunge kimuni terimu. Melema paa pali Maloni kau tepe wamopa terimu. Aku melema yunge kau liepili. Yunge imbi kapi nengei nimbe aku melema terimu

<sup>17</sup> Melemanga pali yu kiyendo molorumu. Kinye ltemo melema pali yunge kina ltemo.

<sup>18</sup> Kraistingu talape imboma yunge kangimu, Kraist<sup>1</sup> yu kangimunga pinyewemu. Yu yunge kangimu koinjo moromungu pulu iyemu. Yu melemanga pali kumbe lepa moromo Malo, yu melemanga pali iye nokoli Awilimu molopili nimbe Goteni yu topa makinjirimuna yu kumbe lepa makilipe ola molorumu iyemu moromo.

<sup>19</sup> Gote yunu molopa teremo mele aku tepe Malo kinye molomboi konopu lerimuna kamukumu Malo kinye popo tipe moromo.

<sup>20</sup> Goteni lino mulu mai melema pali ulu pulu kerimanga wendo lipelie yu kinye manda molongei nimbe Maloniaku tembalo aulkemu akirindepili nimbe pilipelite Kraistingu mememu unjo polopeyana ondorummumuni Goteni lino kinye opa pule molorumulu ulu pulumu kamukumu topa mainye mundurumu.

<sup>21</sup> Oi enoni ulu kerima teko enonga konopumanu yu kinye opa pule moloringimunga Gote kinye tule teko moloringi.

<sup>22</sup> Nalo kinye Kraist unjo polopeyana toringina kolorumu aku ulumuni Goteni eno yu kinye konopu tendekuna pupili nondoko ongo molangei nimu. Eno yunge imbo kake telima molko, kalaro te naa pepa, yuni kanopa keri pimo ulu te naa pepili yu moromona ongo molangei nimbelie aku terimu.

<sup>23</sup> Nalo Kraist paimbo ningi ipuki tiko molkolio yu enge ningi ambolko tiye naa kolaio. Ungu pengamu oi pulu polko pileringi kinye paimbo ningi ipuki tiko kano ungumuni wendo ombalo mele kinye eno molonge mele kinye nimo aku tepe mele lino kinye paa wendo opili ningi konopu tiko nokoko moloringi mele ulu umbuni te wendo ombalo kinye tiye kolonge kani wamongo liko manjiko molaio.

Kano ungu pengamu mai kombumanga pali ningi tiringi ungumu. Kraistini na Pol kano ungu pengamunga kendemande iyemu molowi nimuna moro.

### *Poloni Kraistingu imbo talapemu Kolosi moromelema lipe tapondorumu ungumu*

<sup>24</sup> Kinye na eno lipo tapondomboindo mindili norumunga tono kolto. Kraistingu kangimu, akumu yunge imbo talape kanomu, yuni enonga nimbe lipe tapondopa mindili norumu mele mindili mare we peremo akumu na yunge talapemu lipo tapondambo konopu lepo Kraist mindili norumu mele nanga kangina mindili nombo manda tendero.

<sup>25</sup> Goteni na Kraistingu talape nimbe enonga nimbo lipo tapondamboi kongono tirimu. Aku kongonomu eno Goteni nimo unguma tumbi tiko pilko akumunga ungu puluma pali paa pilengei nimbo tiemboi nimbe tirimu.

<sup>26</sup> Paa koro oi walimanga pali imboma pali naa pilengei Goteni i ungumu lopeke terimu, nalo kinye yunge imboma pilengei nimbe, nimbe para tirimo.

<sup>27</sup> Ilopeke terimu ungu akumu paa penga oladopa, kombumanga pali imbo lupema paa manda lipe tapondombalo mele yunge imbomanu pali pilengei kani mona lepili nimbe Goteni nimbe para tirimu. Aku ungu lopeke terimumu i tepsa: Kraist yu eno kinye moromo. Yu eno kinye moromungu yuni eno Gote mulu kombuna engema peya pepili moromo akuna kopu tepe molamili lipo mepo pumbo nimuna pilkolio paimbo ningi konopu tiko nokoko moromele.

<sup>28</sup> I nio iye Kraist akumuni teremomu imbo te te nimbo, nimbo tirimolo. Eno Kraist kinye peya kopu teko molko yunge konopu enge peli imbo yuma molonge kinye mepo pumbo Gote tiemili nimbo, lipe manjili peremomuni imboma wamongo tipo lepi lepi topo mane tirimolo.

<sup>29</sup> Aku teambo nimbo yuni na enge tipe lipe tapondromo ulumani pali enge nimbo mindili nombo kongono tero.

## 2

### *Kraistingu ungumu paimbo ningi enge ningi ipuki tiko, kolo toli unguma liko tui tinge ungumu*

<sup>1</sup> Eno kinye, Kraistingu imbo talape Lao-disia moromelema kinye, kombumanga pali imbo na oi kanopa naa ltendeli imboma kinye, eno paa lipo tapondambo nimbo mindili nombo kongono tero mele eno pilengei konopu leto.

<sup>2</sup> Eno konopu enge nipili molko, nendo yando konopu mondonge ulumuni eno lipe popo timbelo kinye eno Kraistingu ulu puluma pali wamongo teko pilkolio paimbo

ningo enge ningo pimele mele kamukumu aku teko olando pilko molangei nimbo na paa mindili noro. Aku teko pilkolio Gotenga ungu lopeke tepa peremomunga eno pilengeila nimbo na mindili norola. Aku lopeke tepa peremo ungumu Kraist yu.

<sup>3</sup> Lipe manjili ulu puluma kinye, konopuni pimele ulu puluma kinye,aku ulu puluma Kraist yu kinye lopeke tepa peremo. Akuma kou mone bengena lopeke tepa tenegepeya tepa ltemo mele aku uluma yu kinye aku tepa peremo.

<sup>4</sup> Nani imbo teni eno tope tipe kolo topa naa tipili nimbolio i ungumu eno nimbo tiro.

<sup>5</sup> Na eno kinye naa moro nalo eno kinye moro konopu lepo, eno kinye kopu tepo enge ningo kongonoma tumbi tiko teko Kraist paimbo ningo enge ningo pilko tiye naa koromele mele nanga konopumunilipo manjipolio lakopo tono kolto.

*Lino Kraist kinye peya kopu tepo molopo koinjo molopa kondoli ulu paimbonu limolo ungumu*

<sup>6</sup> Kinye, Kraist Jisas linonga Awilimu molopili, peya molamili konopuna opili ningi aku teko yu kinye peya kopu teko molaio.

<sup>7</sup> Unjo te enge nimbe angilimbeindo yunge pulkonomma maina mainye mundurumo, ulke te enge nimbe angilipili ningi timu enge nili te poromele aku mele eno Kraist kinye aku teko kopu teko angiliko, linoni eno mane tirimulu unguma paimbo ningi ipuki tiko enge ningo pileringi mele olando enge ningo pilkolio, waliwalima Gotendo paa tereno neio.

<sup>8</sup> Imbo teni yunge konopuna lipe manjirimo mele eno aku teko mele paa konopuni pilko molangei nimbe we unguma kolo topa eno nimbe timbelo kani kanoko kondoko molaio. Lapali kolepalemani oi mane tiringi yandopa pileringi mele kinye, kupaena kinye mai kombuna molko nokoromele kuromanga unguma kinye,aku imbomani pilkolio eno ningotinge kani. Kraistingu konopuni pimo unguma naa pilko ningotinge.

<sup>9</sup> Kraist lino mele imbo iyemu molorumu. Gote yunge molopa teremo ulu Kraist kinye tenegepeya tepa ltemo mele eno liko manjirimeli.

<sup>10</sup> Kraistini yunge molopa teremo ulu lino kinye tenegepeya tepa lepa manda tenderemo. Kraist yu muluna kuro enge nilima kapeaku mele imbi molopa nokoromele kuroma pali pange tendepa yu olandopa moromo.

<sup>11</sup> Eno yu kinye ongo kopu teko moloringi kinye kangi pundu kopiko wendo lili ulu pulu tukumemu eno tirimuna ltingi. Aku

kangi pundu kopili ulu tirimumu imbonani kangindo teremele aku ulumundo naa nimu. Kraistini tenderimu ulumuni lino kangi pundu kopipe wendo lili ulumu ltimulu, akumu lino ulu pulu keri terimulunganga oi we konopumanga engema wendo ltimu. Aku ulumu kangi kopipe wendo lili ulu tukumemu.

<sup>12</sup> Eno no ltingi wali Goteni Kraist kinye eno popo tipe ono terimu. Altopa eno paimbo Goteni yunge engemuni Kraist topa makinjirimu ningi ipuki tiko pileringimunga Kraist topa makinjirimu Goteni eno no ltingi wali Kraist kinye waye topa makinjirimu kala.

<sup>13</sup> Eno oi we konopuma pepili ulu pulu kerima teringi kinye kape, eno Juda imboma naa molko imbo lupema moloringimunga Gotenga ungu manemani eno naa nokorumula,aku ulu taloni eno topa kondorumu, imbo kololima mele moloringi, nalo Goteni eno Kraist kinye peya koinjo molangei nimu. Yuni linonga ulu pulu kerima tiye kolopa kamukumu mainye pupili nimu.

<sup>14</sup> Mosesini Gotenga ungu manema bukuna torumumanli linondo wali walima teko kenjirimele nimo ungu manema lino enge nimbe nokorumu engemu lino ketona ulure naa tendepili kamukumu mainye pupili topo mainye mundembo nimbelie Goteni akuma lipe Kraistingu unjo polopeyana pirimu topa uku torumu.

<sup>15</sup> Kuro enge nilima kape,aku mele imbi peremonna melema nokoromelema pali enonga engema unjo polopeyana kolorumumunga topa mainye mundupe, kuromanga enge te naa pepa kamukumu mainye purumu lepamo ningokanangei nimbe eno lipe ondorumu.

*Kraist kinye peya kolorumulunganga we ungu manemani lino naa lipe tapondoromo ungumu*

<sup>16</sup> Yuniaku terimu kani imbo teni lino langi nombo no nombo wali kake telimanga uluma tepo, oli ondoromo kinye uluma tepo, koro mololi Sabat walimanga uluma tepo,aku ulumanga imbo teni temolo mele moke tepa ungu mane te naa nimbe panjipe, iri topa teko kenjirimele nimbe naa nipiili neio.

<sup>17</sup> Ulu akuma teangei ningoi ungu manema ningokanjiringi akuma altopa wendo ombalo ulu te manda manjiko aku uluma teringi. Aku ulumanga paimbo ulumu Kraist kinye peremo.

<sup>18</sup> Imbo te kumbu tepa kanoromo melema temane topa yu yunu konopu tiembo kani nanga imbi ola naa molopili molambo nimbe kolo topa,enselemanga imbi lipe ola mundupe kapi nimo imbo

teni aku tepo teromunga na nanu lipe manjili olando peremo nimbe enoni teko kenjirimelemunga Goteni eno melema naa timbelo linge nimbelo kinye yunge ungumu naa pileio! Kano imbonu yu yunu yunge oi konopumuniaku tepta pimo.

<sup>19</sup> Kano imbonu yu lino Kraistingu kangi moromolomunga pinyewe Kraist kinye ingi tipe naa amboromo. Aku iye pinyewemuni kimbo ki kangi melemanga pali nokopa, ombele pulkono melema pali enge nipili nimbe langi tirimo. Aku teremomunga Gotenga engemuni Kraistingu kangimu tepta akondoromo.

<sup>20-21</sup> Eno Kraist kinye peya kolkolio mai kombuna ulu keri kerima kamukumu tiye koloringi tendekuna manda naa molongemunga ambe temona kinye eno ya mai kombuna imboma mele molko mai kombuna ungu manema pilko liko teko moromeleya? Ungu manemani langi mare kinye no mare kinye akumando naa ambaiao nimbe, naa naio nimbe, kini lope naa tendaio nimo aku ungu manema ambe telka pilko liko teremeleya?

<sup>22</sup> Aku ungu manema pali maina imbonmani kau konopuni pilko i teko teaio, i teko teaio ningungu mane tirimelemungaaku ungu manemani pilko teaio nimele melema kinye ulu mare teremele kinye walitikale kamukumu keri lepa beambo nimo. Kano melemani eno lipe tapondombalo ulu te naa peremo.

<sup>23</sup> Aku ungu manemani lino imbi naa molopili molamili ningi, melema kapi ningi imbi liko ola munduko, linonga kangima mindili nopili nengei ningi ulu mareaku teko teremele mele kanokolioaku ungu manema lipe manjili paa pepa penga ltemo paimbo nimbo karomolo. Nalo lino oi konopumuni ulu kerima kau pilipo ulu pulu kerima kau konopu teremo uluma topo mainye mundemili nimbe lipe tapondombalo ulu te kano ungu manema kinyepaa naa peremo.

### 3

#### *Ulu kake telima tepo molomolo mele ungu mane mare*

<sup>1</sup> Goteni eno Kraist kinye peya topa mak-injirimu kani Kraist wi ola Gotenga enge lipe imbo kindo moromo kombumunga uluma kau lipe pinje pinje lepili kumbe tundu mongona liko mundeio.

<sup>2</sup> Mulu kombuna melema kau paa konopu kimbo tiko, mai kombuna melema konopu naa kimbo tiko molaio.

<sup>3</sup> Eno Kraist kinye kolkolio yu kinye tukundo koinjo moromelemunga Gote kinyekoputeremele kani muluna ola ltemo uluma konopu kimbo tiko molaio.

<sup>4</sup> Enonga koinjo moromele ulu pulumu Kraist yu. Akumunga yu ombo mona angilimbelo wali eno yu kinye peya molko, yu pa enge nimbe teremo kombuna yu iye awili olando molopa engema noipe melema nokoromo kombuna yu kinye peya wendo onto angilinge.

#### *Eno imbo koinjoma molkolio ulu pulu kerima tiye kolaio nimbe tirimu ungumu*

<sup>5</sup> Akumunga enonga oi konopuma Kraist kinye peya kolkolio yu peya makiklo koinjo moloringi kani maina ulu enonga konopumani pilkolio tengindo aie konopu ltemele uluma tiye kolaio! Ulu akuma i tepta: Wapu ulu kerinali teremele. We melema kape wali wali konopu kimbo tiko moromele. Ambomani iye pengama kanoko peya tapu topo andolembalanje paa konopu ltemele. Iyemani amboma kanoko konopu mondoromele. Imbo lupemanga melema kumo meremele. Aku imbo lupemanga melema kumo meremele uluma kinye, kuroma kinye gote kolo tolima kinye popo toko kapi nimele uluma kinye,aku ulu talo tendeku ulu teremo.

<sup>6</sup> Imbonani yunge ungumu pilko tui tikoaku ulu pulu kerima teremelemunga Goteni imbona mumindili kolopa tombo nimbe tumbi tipe noirimo.

<sup>7</sup> We maina imbona teko moromele mele oieno kapeaku teko ulu kerima kau teko moloringi.

<sup>8</sup> Nalo kinye aku uluma naa teamili ningitiye kolaio. Imbo mumindili kolko, imbo iri toko, imbonare kinye konopu keri leko, ungu tako tondoko, owe teangei ningokauwe ungu ningi,aku ulu puluma tiye kolaio.

<sup>9-10</sup> Oi konopuma kinye aku konopumani pilko terengi uluma kinye tiye kolko, imbo koinjoma molamili ningi Kraist ltingimunga eno imbo koinjoma tepta wamopa Goteni koinjo mundurumu, yandopa yandopa yu moromo mele eno olando olando pilkolioaku teko molaionimbeaku teremo kani nendo yando kolo naa taio.

<sup>11</sup> Goteni yunu imbo koinjoma peya pali tepta wamopa teremomunga lino imbo koinjoma mele moromolo imbonatendekutipo moromolo. Na Juda imbonu, na Grik imbonu. Na kangi kopili imbonu, na kangi naa kopili imbonu. Lino kombu lupe lupe imbona, lino ungu lupe lupe nili imbona. Na kongono kendemande we teli imbonu, na we mololi imbonu. Linoniaku konopu naa leamili. Kraist yu tendekumu kau moromo. Akumunga yu lino peya kinyekoputepa moromo.

*Imboma konopu mondoli uluma lipo amabolopo Kraistingu unguma lino kinyepipili molamili ungumu*

<sup>12</sup> Eno Goteni nanga imboma nimbe kanopa ltimu imbo konopu awili tepa mondopa, konopu kake tepa peli imboma nimbe karomo imboma moromele kani imbo lupema kondokolko liko tapondoko, taka liko molko mumindili naa kolaio. Imbomareni eno teko kenjingelemo mumindili welela naa kolaio.

<sup>13</sup> Enonga angenu teni eno tepa kenjipe ulu tepa mumindili kondoli ulu te tembalowali eno yundo ungu te naa ningi, tiye kolaio. Eno Gote teko kenjiringi ulu pulukerima yu we tiye kolopa kano ulu pulukerima na naa pilipo molambo nimu mele enoaku teko imbomani eno teko kenjingelenuma tiye koloko we molaio.

<sup>14</sup> Nalo aku ulu pulu penga nio ulu pulumanga pali konopu mondoli ulu pulumu paa olando peremo kani imboma konopu paa mondaio. Aku tengewaliaku teko ulu pulu pengatengema pali we tumbi tiko paa manda teko molonge.

<sup>15</sup> Kraistingu imboma kinyekonopu tendekunapupili konopu u nili ulu pulumu Kraistini tirimoaku ulu pulumuni enoaku teko taka liko konopuwango niplimolalao nimbe ombarokopili. Kangitendekumungakimbo ki melema lupe lupe angimo nalo kangi tendekumu kau angimoaku mele enoimboma pali tendekumele molangei nimbe Goteni eno waio nimblettimu. Gote waliwalima paa tereno ningomolaio.

<sup>16</sup> Kraistingu unguma enonga konopuna paa tenegepeyatepa pepili molangeiaku teko molkolio enolipe manjilimipepili enoniimboma ungu mane tiko, imboma ulu keri pengama pali moke teko kanangei ningotiko, Goteni enonga nimbetendere-momunga yu kinyepaa tereno ningeindo Gotenga bukunamoromokunanama kinyenombeya teko Gote kapi nimelekununama kinyemini Kake Telimuni enonga konopuna nimbetirimonapimelekununama kinyeneio.

<sup>17</sup> Unguningolulamateko kongonotenge ulu akuma pali tenegeindo i ulumani Awili Jisasinga imbi kapi nindemili ningokuluma teko, Lapa Gote kinyepaa tereno neio.

*Kristen ambo iyema kinyenonga bakuluma kinyetenge ungumu*

<sup>18</sup> Eno amboma, enonga omenali iyemanga unguma taka liko pilko liko molaio. Aku ulumu Awilimuni kanopapenga pimo ulu pulutekaniaku teaio.

<sup>19</sup> Eno iyema, enonga amboma konopu mondoko eno teko mumindili kondoko irinna tokomolaio.

<sup>20</sup> Bakuluma, eno aminyeli lanielini ningeunguma pali waliwalima pilko tengetikoteko molaio. Aku ulumu Awilimuni kanopakonoputirimo.

<sup>21</sup> Eno lapali, bakuluma eno ulu pengate manda naa temolo konopu lengekani enonga bakuluma teko mumindili naa kondaio.

*Poloni kongono kendemande imboma kinyenonga nokoli iyema kinyeteangeinimu ungumu*

<sup>22</sup> Kongono we tendeli kendemandeimboma, enonga kongono nokoli mainaimbomani ningeunguma pali pilko likoteao. Nokoli imboma kanoko molangeikongonotepokondombo kinyekanokolio kapi nengei ningokongononaateao. Kraistinguungumalikawili tiko pilko likoteremelemeleaku teko kongononokoliimbomani teaioningeungumapilkolikokongononokoliteko kondaio.

<sup>23-24</sup> Eno konoputalo tepa pepili enongakongononokoliimbomangakongononaatendaio. Kongonotengema pali tenegeindo Awilimunga kongonotenderemololepamo ningokuteko kongononokoli iye kanomangakongonomakonopupenga pepili toyatokotendaio. Mainaimbomangakongonokau tenderemolo, akumuuluremolo ningokongononaateao. Awilimuni yungeimboma meletimbeindo noindirimo mele pengamalino timbeloningo pilkolikonopupenga pepili kongononokoli iyemangakongonotoyatokotendaio. Kraistingu kongonokendemandetenderemele. Yu enonga IyeNokoli Awilimunkonopuleao.

<sup>25</sup> Awilimuni imbo palinga uluteremelema pali tendekutipemoke teremoakumungateko kenjingebimbomapaliteko kenjingemungamelelemaaku tepatimbelo.

#### 4

<sup>1</sup> Kongononokoliimboma, enonga kongonowe tendeli kendemandeimbomatalikonokokokondoko, tekomini naatendaio. Enonga Nokoli Iye te mulukombunamoromomulikomanjeio.

*Gote kinyenungunimo ulumu enge ningambolko molko kondangeinimu ungumu*

<sup>2</sup> Gote kinyepaa waliwalima kongeningo tiye naa kolokolaio. Gote kinyekongeninge wali konopu likomunduko Gote kinyepaa tereno ningokolaio.

<sup>3</sup> Gote kinyekongeningo molkolio linongakapekongetendekolio, lino yungeungu pengamuandoponimbotiemili aulke te lipelondopili neio. Aku

ungumu Kraustinga ungu, akumu paa oi lopeke tepa perimu. Aku ungu nimbo tirumunga na ka ulkena panjirimele.

<sup>4</sup> Gote kinye nanga konge tendekolio Kraustinga ungu lopeke tepa perimumu im-boma paa tumbi tiko pilengei nimbo para tipo nemboi neio. Na aku tepo kongono teamboi nimbe Goteni tirimu kani aku teko konge tendao.

<sup>5</sup> Kraustinga imbo talapena naa molko tawendo moromele imboma eno Kraustinga imbo moromelemani kanoko kondoko aulke andoko konopu penga leko uluma toya toko Kraustinga ulu pengama liko ondaio.

<sup>6</sup> Eno ungu ninggo tingema waliwalima yakela kolko paa pilemilia ninggo komu tendengei ungu pengama neio. Imbomani waltindinge wali linoni ungu pengama topodopo nemili ninggo aku teko neio.

*Poloni Tikikus kinye Onesimus talo Kolosi imboma moloringina lipe mundurumu ungu*

<sup>7</sup> Lino paa konopu mondoromolo angenu Tikikus ombalo wali na moro mele pali eno temane topa timbelo. Yu Awilimunga kongono paa tendepa tiye naa kolopa, lino kinye peya popo tipo teremolo iyemu.

<sup>8</sup> Yuaku tepe popo tipo kongono peya teremolomunga lino moromolo mele eno pilengei, eno konopu enge tipili nimbo nani yu eno moromelema lipo munduro.

<sup>9</sup> Enonga iye te, linoni konopu mondoromolo angenu kongono paa tepe kondopa tiye naa koromo iye Onesimus yu Tikikus kinye peya lipo munduro. Ya lino moromolona ulu wendo oromoma pali eno ninggo tingele.

*Pol kinye iye mare kinye enoni Kolosi imbomando molko kondaio ninggi ungu*

<sup>10</sup> Na peya ka ulkena perembolo iye Aristarkasini eno molko kondaio nimbe, nimbe mundurumo. Barnabasinga pelepa Mak ya kopu tepe moromolo iyemuni eno molko kondaio nimbe, nimbe mundurumola. Mak kinye eno tengenye mele oi nimbo munduru kanomu. Eno molongena omo lemo tono kolko peya molamili owi neio.

<sup>11</sup> Iye te, yunge imbi Jisas, aku iyemu yunge imbi te Jastus nimele, aku iyemuni eno molko kondaio nimbe mundurumola. Gote iye nomi king molopa melema nokombalomunga nimbo tiro kongonomu na liko tapondoko peya teremele imbomanga aku iyema kau Juda iyema. Aku iyemani kongono enge nimbo teambo ninggo paa liko tapondoromele.

<sup>12</sup> Epafras, eno Kolosi imbomanga iye te, yuni kape eno molko kondaio nimbe, nimbe mundurumo. Yu Kraist Jisasinga kongono tendeli iye te molopa, Gote

kinye konge nimbe molopili tiye naa kolopa waliwalima enonga nimbe enge nimbe konge tendepalie eno Kraustinga imbo yuma molko, paimbo ninggo enge ninggo pilko moromele mele konopu alowa malowa naa teko Gote kanopa penga pilimbelo ulu teaio nimoma pilko liko tengendo enge ninggo teko molangei nimbo.

<sup>13</sup> Yuni enonga kape, Laodisia imbo-manga kape Hierapolis imbomanga kape, eno lipo tapondambo nimbe paa kongono mindili nomba teremo akumu eno paa pilengei nimbo nio.

<sup>14</sup> Linonga konopu mondoromolo iye dokta Lukuni eno molko kondaio nimola. Iye Demasini aku tepea nimola.

<sup>15</sup> Linonga angenupili ulke kombu Laodisia moromelema kinye ambo Nimba kinye Kraustinga imbo talape yunge ulkena maku toko moromele imbomando eno molko kondaio nindeio.

<sup>16</sup> Eno Kolosi imboma i pipiamu pilengei kambu tondoko pora tinge wali Kraustinga imbo talape Laodisia moromelema kanoko pilengei ninggo tiko mundeio. Laodisia imboma pipia topo tirumu eno kanangei kani lino kanamili ninggo yando tieo neio.

<sup>17</sup> Arkipusindo i teko ninggo tieio. Nu Awilimunga kongono tendewi ninggo tiringimu paa pali tepe pora tiembo ninggo enge ninggo teami neio.

<sup>18</sup> Na Pol nanu i pipiamu topo eno molko kondaio nio. Na ka ulkena we pero mele komu naa tindeio. Goteni eno kinye konopu noipe molopili molaio.

**Poloni Tesalonaika Imboma  
Oi Kumbe Lepa Pipia Topa  
Tirimu Ungumu  
1 Tesalonaika  
I Ungu Torumumunga  
Ungu Pulu Mare**

Bolkena mele ipuki tiringi imboma konopu toimbo topili nimbe Poloni i pipiamu topa panjirimu. Jisas yando ombalo konopu lepolio tumbi nimbo molomolo mele ungu mane tirimu.

Goteni nu Jisas yando ombalo ungumu pilkolio tumbi tiko molani nipili.

**Pol Yu Kinye, Peya Kongono  
Teringi Iyema Kinye,  
Tesalonaika Imboma Ambe  
Teko Moromelenje Ningo  
Konopu Awini Liko Munduko  
Moloringi Mele Unguma**

<sup>1</sup> Na Pol, Sailas kinye Timoti talo molopolo wali eno Kraista imbo talape ulke kombu Tesalonaika moromelema i pipiamu topo tiro. Eno Lapa Gote kinye Awili Jisas Kraist kinye kopu teko moromele imboma, Goteni eno kinye konopu noipe tepa ame tondopa molopili.

*Poloni Tesalonaika imboma ipuki tiringimunga tono kolopa Gote kinye paa tereno nimu ungumu*

<sup>2</sup> Lino eno moromele mele pilipolio walima Gote kinye paa tereno nimbo, yu kinye enonga konge tenderemolo.

<sup>3</sup> Enonga ipuki tilimuni ulu pengama teangei nimbe tope tipe, enonga konopu mondoli ulumuni kongono penga teangei enge tipe, eno Awili Jisas Kraist ombalo ningi nokoromele ulumuni eno konopu enge tirimu ulu akumanga linonga Lapa Gotendo paa tereno nimolo.

<sup>4-5</sup> Ango kame, linoni Gotenga ungu tukumemu eno moloringina ombo nimbo tirimulu wali eno kinye ungumu kau wendo naa orumu nalo aku wali Gotenga engemu kanoko Mini Kake Telimuni terimu uluma kanoko ungu tukume paimbo ningi paa enge ningi ipuki tiringi. Aku ulu mona kanopolio Goteni eno paa konopu mondopa eno yunge imboma molangei nimbe kanopa ltuu lipo manjirimolo. Lino eno lipo tapondomilindo eno kinye ombo molorumulu mele eno pimele.

<sup>6</sup> Enoni lino Awilimu kinye molorumulu mele manda manjiko moloringi. Enonga pulu ltemo imbomani eno mindili tiko umbuni tiringi nalo Mini Kake Telimuni

tono kololi ulumu tirimumunga Gotenga ungumu tono kolko pilko ltingi.

<sup>7</sup> Aku teringimunga kombu Masedonia provins kinye Akaia provins talonga ipuki tiringi imboma molonge mele enoni liko ondoringi.

<sup>8</sup> Enoni Gotenga ungumu ningi meko andoringimu pumbe pumbelie Masedonia kinye Akaia provins talonga imboma moloringina purumu, pali pileringi naloaku kombu pokonga kau naa purumu. Enoni Gote ipuki tiringi temanemu kombumanga pali purumu. Akumunga eno moromele mele linoni altope temane te topo timolo kongono te naa ltemo.

<sup>9</sup> Lino eno moloringina orumulu kinye eno kinye uluma wendo orumu, enoni teringi mele we imboma enonganolino temane toko tirimele. Enoni we melema popo toringi gote kolo tolima tiye kolko konopu topele toko, koinjo molopa kau puli Gote paimbomu molorumuna purungi mele we imbomani lino temane toko tirimele. Yunge kendemandema molamili ningi molko,

<sup>10</sup> yunge Malo mulu kombumu tiye kolopa altopa ombalo ningi konopu tiko nokoko molongei Gote paimbomu molorumuna purungi mele temanemu toko tirimele. Aku Malomu kolorumu kinye Gote paimbo kanomuni topa makinjirimu iyemu akumu Jisas. Lino yunge imboma lipe tapondoromomunga Gote altopa imboma mumindili kolombalo waimu wendo ombalo kinye lino ulure naa pembalo, lino molopo kondomolo.

## 2

*Poloni Tesalonaika imboma kinye kongo terimu mele nimu ungumu*

<sup>1</sup> Ango kame, eno moloringina ombo kongo terimu kanomu we mainye naa purumu eno pimele.

<sup>2</sup> Enonga ulke kombuna oi naa ombo ulke kombu Filipai molorumulu kinye linonga kangindo mindili tiko lino ungu taka tondoringi mele eno pimele. Nalo altopa orumulu kinye imbomarenikongonanaa teangei tekopipili kondoringi nalo linonga Goteni lino lipe tapondorumu kinye pipili naa kolopo enge nimbo yunge ungu tukumemu eno nimbo tirimulu.

<sup>3</sup> Linoni enondo enge nimbo Jisas Kraist ipuki tiengei nimilindo linoni ungu mare alowa tendepo pilipo naa nimbo tipo, kalaro mololi uluma peya teamili naa nimbo konopu talo pepili unguma naa nimbo tipo, eno aulke tengat lupe pangei kani konditamili nimbo kolo naa torumulu. Aku ungu paa naa nimulu.

<sup>4</sup> Goteni lino moke tepa kanopalie nanga ungu pengamu manda tumbi tiko ningi

tinge nimbe kanopalie ningو tindengei nimu, akumunga i teko i teko ningو tieio nimu mele kau waliwalima nimolo. Imbomani lino kanoko penga pilko kapi nengei nimbo unguma andopo naa nimbo tirimolu. Linonga konopuma kanopa moke teremo Goteni kanopa penga pilipili nimbo kongono teremolo.

<sup>5</sup> Lino tumbi tipo terimulu mele eno pimele. Gote waltindilimalanje yuni paimbo nilkala. Lino kinyе ulu te teko kondangei kani eno kapi nimbo imbi lipo ola mundundemili nimbo unguma naa nimulu. Enonga melema lino tiengei nimbo unguma naala nimulu. Kolo naa toromolo eno pimele, Goteni pimola.

<sup>6</sup> Enoni kape mai kombu lupemanga imbomani kape lino kapi nengei nimbo Gotenga ungumu andopo naa nimulu. Paimbo lino Kraistini kongono tendangei nimbe lipe mundurumu iyema molorumulunguma eno lipo tapondopolio umbuni lipo enoni melema tiko lino nokaio enge nimbo manda nilimala.

<sup>7</sup> Nalo aku tepo naa nimulu. Eno kinyе molopolio ambomani enonga bakuluma taka liko nokoko ame tiko moromele mele eno kinyе taka lipo molorumulu.

<sup>8</sup> Lino eno paa konopu mondopo kondo kolopolio Gotenga ungu pengamu nimbo tiemili nimbo kau naa terimulu. Eno linonga imboma ningو moromelena eno lipo tapondomilindo lino kolomolo lemo ungure molo nimbo konopu tipo terimulu.

<sup>9</sup> Akumunga ango kame, lino eno kinyе molopolio kongono temilindo mindili nombo kongono terimulu mele eno piltiemele konopu lteo. Linoni eno Gotenga ungu pengamu nimbo tipo molomolo kinyе enoni lino nokoko kere langi tiengei naa nimolo nimbo ipu leli kape tangoli kape kongono terimulu. Aku kongonomu kongono tepo, eno lipo tapondopo kongono tepo, peya talo lipo popo tipo terimulu.

<sup>10</sup> Eno Kraist ipuki tirimele imboma peya kopu tepo molorumulu kinyе Goteni kanopa ulu kake telima nimbe karomo uluma kinyе, imbomani ulu tumbi nilima ningو karomele uluma kinyе tepo, ulu te tepo naa kenjirimulu akumu eno pimele, Gote pimo kala.

<sup>11</sup> Lapalini enonga bakuluma te te ningو nokoko tekо kondoromele mele linoni enoaku tepo terimulu akumu eno pimele.

<sup>12</sup> Eno konopu enge nimbe konopu wango nipi molangei nimblorio, Goteni nanga pa teli moro kumbuna nanga imboma molko kondangei nimbo eno peya molamili waio nimu kani yu kanopa penga pimo mele aku uluma kau waliwalima teko molaio nimbo paa enge nimbo mane tirimulu.

*Kraistingu imboma enge ningو ipuki tikolio umbuni meko enge ningو angileringu ungumu*

<sup>13</sup> Waliwalima Gote kinyе paa tereno nimolo akumunga ulu te peya peremo. Akumu i tepe: Lino eno moloringina ombo Gotenga ungu tukumemu pilipolio nimbo tirimulu wali maina imbo teni ungu te nimbe tirimo kinyе pilko lttimele mele kau naa pilko ltingi. Pilkolio akumu Gotenga ungumu ningو tirimele ningolio pilko ltingi. Akumu paimbo teringi. Kano ungu-muni eno Kraist ipuki tirimele imbomanga konopumanga kongono teremo.

<sup>14</sup> Ango kame, eno kinyе ulu wendo orumu mele kombu Judia Gotenga imbo ta-lape moloringima kinyе oi aku tepe wendo orumu. Eno imboma enonga pulu lemo imbomani mindili nangei ningو teko ken-jiringi mele, Judia kombuna Kraist Jisas peya kopu teko moromele imbomanga pulu lemo Juda imbomani oi aku teko kape mindili nangei ningو teko kenjiringi.

<sup>15</sup> Juda imbomani oi Gotenga nimbe munduli unguma imbomando ningو tirangi profet iyema toko kondoko, pele Awili Jisas toko kondoringi imbomani altopa lino kape mindili tiko makororingi. Goteni kanopa penga pimo uluma naa teko, imboma kinyе pali opa pule moromele.

<sup>16</sup> Goteni Juda imbo naa moromele imboma lipe tapondopa, mindili nonge aulkena wendo ltindipe, molko kondoko kau punge aulkena lipe mondombalo mele naa nemili ningو, lino andopo kano imbo lupema ungu nimbo timolo aulkemu pipi tingei teremele. Aku teremelemunga eno ulu pulu keri teremele mele olando olando teremele, akumunga ulu pulu keri awini eno kinyе kamukumu pepalie Gotenga mumindili koromo waimu eno moromelena wendo orumu.

*Poloni Tesalonaika imboma altopa paa kanamboa nimu ungumu*

<sup>17</sup> Nalo ango kame, Juda imbomani lino toko makororingi kinyе lino eno tiye kolopo tengа purumulu wali paimbo lino eno kinyе kopu tepo naa moromolo nalo linonga konopumani eno kinyе kopu tepo moromolo konopu lerimulu. Lapalini bakuluma tiye kolko kombu tulena pungo molko enonga bakuluma konopu liko munduko pilko moromele mele linoni aku tepo eno tiye kolopo pumbo alaye kolo kau molopolio, eno konopuni pilipo molopo eno paa kanamilia nimbo omilindo aulke te kororumulu.

<sup>18</sup> Lino eno moromelena omolo nimbo terimulu. Na Pol nanu kape wali awini omboi terula, nalo kuromanga nomi Sataneni molo nimbe lino pipi tirimu.

<sup>19</sup> Linonga Awili Jisas kelepa ombalo wali mele ambele teni lino enge timbelo kinye yunge kumbekerena enge nimbo tono kolopo angilimoloya? Linoni konongo enge nimbo tepo kondorumulu mele ambele melteni lipe ondopili nimbo mepo pumoloya? Eno yunge imboma moromele akumunga lino tono kolomolo.

<sup>20</sup> Paimbo, enoni aku teko lino teko tono kondoromelena lino konopu penga pere-mona moromolo.

### 3

*Poloni Tesalonaika imboma konopu enge tipili nimbe Timotindo pungo nipiwi nimbe lipe mundurumu temanmu*

<sup>1</sup> Neya akumunga, lino paa konopu awini lipo mundupu nokopo molorumulu kinye tiye terimumunga ilto ya ulke kombu Atens molambili nimbo panjipo

<sup>2</sup> iltoni Timoti eno moromelena puwi nimbulu. Timoti yu iltonga angenu, peya kopu tepo Gotenga kongono tendepo Kraistainga ungu pengamu andopo nimbo tirimolo iyemu. Yuni eno enge ningko molko Kraist ipuki tirimele mele tiye naa kolko paa ambolko molangei nipili nimbo yu eno moromelena lipo mundurumbulu.

<sup>3</sup> Eno mindili nongo umbuni meremele-munga konopu awini naa liko mundengei nimbo aku ulu terimulu. Kraistainga imboma aku teko umbunima menge nimbe Goteni nimu mele eno pimele.

<sup>4</sup> Lino eno kinye peya molopolio eno lepi lepi topolio nimili, lino Kraistainga imboma paimbo mindili tinge, lino kinye umbuni awini wendo ombalo nimulu kanomu paimbo aku tepa wendo orumuna eno karomele.

<sup>5</sup> Akumunga eno ambe teko morome- lenje nimbo konopu lipo mundupo tiye terimu kala konopu lipo mundundu tiye kolopo nani Timoti eno moromelena lipo munduro. Eno enge ningko pilko morome- lenje, molo kolo toli iye kerimuni eno kondi torumu kinye enonga ipuki tiringi mele we aku teko enge ningko pimele, molo aku teko teko moloringi ulumu tiye koloring-inje, kongono mindili nombo terimulumu beambo nimunje, pilimboi nimbolio yu lipo munduru.

*Timoti kelepa Pol molorumuna yando ombo Tesalonaika imboma teko moloringi mele temane topa tirimu kinye pilipelite Pol yu paa konopu tirimu ungumu*

<sup>6</sup> Nalo kinye kau Timoti yando ombalie eno enge ningko pilko konopu mondoko moromele mele temane pega te ombo topa timo. Waliwalima lino eno kinye peya molorumulu mele enoni konopu kimbo tiko pilkolio paa konopu tiko moromele

mele nimbe tipe, linoni eno paa kanamiliya nimbo moromolo mele eno aku tekola lino paa kanamiliya ningko moromele mele nimbe timo.

<sup>7</sup> Akumunga, ango kame, paimbo lino umbuni mepo mindili noromolo nalo eno enge ningko pilko moromele mele temanemu pilipolio konopu penga pepili enge nimbo moromolo.

<sup>8</sup> Eno Awilimu tiye naa kolko yu enge ningko ambolko moromelena lino konopu penga ltemo kinye molopo kondoromolo.

<sup>9</sup> Eno lipo manjipolio linonga Gotenga kumbekerena paa tono koromolo. Gote kinye pa tereno nimolo ulumu akumu maindopa. Yuni lino tepa tono tenderemo akumu olandopa.

<sup>10</sup> Ipu leli kape tangoli kape Gote kinye ungu nimblolio lino eno ombo kanamili aulke te akirindelpili nimbo paa enge nimbo konge teremolo. Aku wali enonga ipuki tili ulumu ponjimo lemo linoni tepo enge tindimolo.

*Poloni Tesalonaika Kraistainga imboma kanombai pumbe Gote konge terimu ungumu*

<sup>11</sup> Kinye Gote linonga Lapa akumu kinye linonga Awili Jisas kinye eloni lino eno moromelena wamili ningko aulke te akirindengili.

<sup>12</sup> Linoni eno konopu paa pulumu mon-doromolo mele Awilimuni enoni aku teko enonga Kraistainga imboma kinye we imboma kinye pali konopu paa olando olando mondangei nipili.

<sup>13</sup> Linonga Awili Jisas yunge imbo kake telima kinye altopa ombalo walimunga linonga Lapa Gotenga kumbekerena eno imbo kake telima molko eno molko kondoko imbo toyta tolima molonge kinye yuni kanopili nimbe Awilimuni neya aku konopu mondoli ulumuni enonga konopuma enge tipili. I paa.

### 4

*Goteni teaio nimo ulu pengama kinye naa teaio nimo ulu kerima kinye akumanga ungumu*

<sup>1</sup> Ango kame, oi eno mane tipo Goteni kanopa penga pimo uluma teangei mele oi nimbo tirimulu. Aku teko paimbo teko moromele. Nalo kinye eno aku uluma paa teliko teliko paio nimbo Awili Jisasinga imbi lepo enonga konopuma paa enge tirimolo.

<sup>2</sup> Linoni Awili Jisasinga imbina eno nimbo tirimulu ungu manema waye eno pimele kanomu.

<sup>3</sup> Goteni eno teangei konopu lepa moromo mele i tepa: Eno konopu kake tepili lino Gotenga imboma kau ningko molko,

wapu ulu kerinali teli uluma waye tiye kolaio.

<sup>4-5</sup> Gote naa pimele imbomani imbo lupa  
pema kanoko peya ulu kerinali tengende  
eio konopu leko wapu ulu kerinali teremele  
mele aku uluma naa teao. Eno yu mele  
mele ambo liko iye pungoaku ulu yakela  
teli kake teli kau teko molaio.

<sup>6</sup> Iyema, enonga Kristen angenali tepo  
naa kenjimili ningkoaku ulu pulu kerimu  
naa teko, enonga angenalinga amboma  
kinye ulu kerinali teamili ningokondi naa  
taio. Linoni oi eno nimbo tipo lepi lepi  
torumulu mele paa paimbo nimulu. Aku  
ulu pulu kerima tengenimboma Goteniaku  
tengemunga mindili nangei nimbe umbuni  
timbeloi lepi lepi topo nimulu kanomu.

<sup>7</sup> Goteni ulu pulu kalaro mololiaku  
tepama teko molangei waio nimbe naa  
nimu. Aku molo. Nangaimboma kau molko  
ulu pulu kake telima teko molangei waio  
nimu.

<sup>8</sup> Aku tepa nimu kala i ungu manemu naa  
pilipo lipotemolo ningumbulu tirimele  
imbomani imboma umbulu naa tirimele.  
Mini Kake Telimu eno tirimo Gote kau um-  
bulutirimele.

#### *Lino enge nimbo ulu pengama tepo molamili*

<sup>9</sup> Goteni eno imbo konopu mondonge  
mele oi eno mane tirimumunga eno  
Kraistinguimboma enonga angenupilima  
konopu mondangei nemili nimbo pipia naa  
tomolo.

<sup>10</sup> Masedonia provins Kraistinguimboma  
pali kape enoniaku teko konopu mon-  
doromelela. Nalo angokame, enoniaku  
ulumu teremele mele telikokau paio nimbo  
enonga konopu enge nipihi nimolo.

<sup>11</sup> Linoni oi eno mane tipolio taka liko molaio!  
Eno enonganoyu mele mele kau kongo-  
teao! Eno yumele mele kimuni kongo-  
tekolio eno enonganonokao nimulu  
mele paaaku tepo teamili ningoenge ningog-  
molaio!

<sup>12</sup> Aku tengenkinye Kraistinguimboma naa  
molko tawendo molongeimbomani eno  
aku teko tengenige ulukanokolio kapi ninge.  
Aku tekolio eno yumele mele melte molo  
naa lembalala.

#### *Awilimu ombalomunga ungumu*

<sup>13</sup> Angokame, koloringina ono teringi  
imboma kinye ambele uluwendo ombalo  
likomanjengei konopu itemolo. Gote ipuki  
naa tekolio imbomani altopto ono kom-  
buna makilimolo waimonokokonaamolko  
enonga imbo koromelema kondokolkokeri  
konopu itemele mele enoaku teko naa mo-  
lao.

<sup>14</sup> Lino Kraistinguimbomani Jisas kolopa  
makilipe koinjo moromo nimbo ipuki ti-  
rimolo. Akumunga Goteni Kristen imbo  
koloringima makinjimbelo kinye Jisasinga  
engemuni eno yu kinye popo tipe yando  
mepa ombalo lipo manjirimolo.

<sup>15</sup> Kinye Awilimuni yunu nimu ungu te  
eno i tepo nimbo tirimolo, Awilimu altopa  
mainye ombalo kinye lino Kraistinguimboma  
we koinjo molomoloma oi Jisas ipuki tikolio  
koloringi imboma tiye kolopo lino kumbe  
lepo naa pumolo. Aku molo.

<sup>16</sup> Awilimu mulu kombuna tiye kolopa  
mainye ombai wali Goteni enge nimbe  
alakotopa teamili nimbelo. Yunge ensel  
kiyendomuni ru nimbelo. Gotenga biukele-  
muni are nimbelo. Aku tembalo wali Awilimu  
mulu kombuna mainye ombai ombalo.  
Ombalo kinye Kraistinguimboma mokolio  
koromelema oi makilko koinjo  
mologe.

<sup>17</sup> Kano kinye lino we koinjo molomolo  
imboma kinyekoloringiimboma kinye  
peya kupena ola limbelo wali, lino Awilimu  
yu aulkena liengei nimbe lino olando  
limbelo, lino ola muluna pumbo yu aulkena  
lipumolo. Aku wali lino Awilimu kinye  
peya kamukumu kopu tepo molopo kau  
pumolo.

<sup>18</sup> Ulu akumu wendo ombalo kani  
Gotenga imboma pali konopu enge nipihi  
molangei ningoi ungu nendo yando ningotieio.

## 5

#### *Awilimu ombalo nimbo tumbi tipo molamili*

<sup>1-2</sup> Angokame, wapu noli imbo te ombalo  
walimu imbomani naa pilengeipulu leli  
miniltendepa oromo mele Awilimu ombalo  
walimuaku tepalawendo ombalomenu  
paa pimele kanomu. Akumunga, linoni  
eno kongonowai imunga ena wai imunga i  
uluma wendo ombalo nimbo naa pipia topo  
nimbotirimolo.

<sup>3</sup> Imbomani kinyewai pengamu, lino  
molopo kondoromolo ningewali ambo te  
bakulimembai walitikale mindili noromo  
mele eno bembotimbeilulumu walitikale  
wendo ombalo. Aku ulumu kowa manda  
naa punge.

<sup>4</sup> Nalo angokame, eno tumbulutolina naa  
moromelena wapu iye oromo ulukanokolio  
mini lteremele meleaku teko peyalime  
waimuwendo ombalo wali mininaa ltengem-  
Molo.

<sup>5</sup> Eno tangoli pa telina moromele im-  
boma. Lino peya ipu leli tumbulutolina  
imboma naa moromolo.

<sup>6</sup> Aku tepo moromolo kani we imboma  
uru peremele mele linoaku tepo uru

naa peamili. Lino mongo makilipo imbo konopu pepili molamili.

<sup>7</sup> Lino lipo manjirimolo. Uru peremele imboma ipu leli uru peremele. No enge nili nongo keke lepo toromele imboma ipu leli aku uluma teremele.

<sup>8</sup> Nalo lino tangoli moromolo imboma moromolo kani imbo konopu pepili molamili. Gote ipuki tili ulumu kinye, imboma konopu mondoli ulumu aku ulu talo wali pakoli kapani telimu pakoromele mele pakamili. Goteni lino altopa ombo limbelo ningokoko moromele aku ulumu wainye kapani teli mele pakamili. Aku tepolio enge nimbo nokopo angilemili.

<sup>9</sup> Goteni lino kinye mumindili kolombo aku ungu naa nimbe panjirimu. Linonga Awili Jisas Kraistini lino yu kinye molamili nimbe ulu pulu kerimanga wendo lipili nimbe panjirimu.

<sup>10</sup> Lino koinjo molomolo lemo kape kolomolo lemo kape lino peya kopu tepo molamili nimbe akumunga lino tapombai Jisasini linonga nimbe yu kolorumu.

<sup>11</sup> Akumunga eno te te ningoni Gotenga imboma konopu toimbo topili ungu pengama kinye teremele mele aku teko ningo tilko andaio.

*Goteni Kristen imboma tapombalo wali eno ulu pengama liko tenge*

<sup>12</sup> Ango kame, kinye linoni enondo i tepo nimolo, eno nokoromele iyema, Awilimuni yunge imbo talapemu nokangei nimbe kanopa ltimu iyemani enonga uluma ningo amenge tendeko ungu ningo tiko taporomele. Aku iyemanga ungumu pilko ipuki tiko tiengei tieio.

<sup>13</sup> Enoni aku ulu teremelemunga eno pilko konopu tiko konopu mondoko eno konopu tendekuna pupili molaio.

<sup>14</sup> Ango kame, linoni eno konopu makinjipo i tepo nimbo tirimolo: Kongono naa teko tiye tiye koltomele imboma ningo armenge teaio. Pipili koromele imboma ningo konopu toimbo tondaio. Mune naa mondoli omeame nimelema ningo tumbirumbi tieio. Uluma toyta toko naa teremele wali enoni imbo wayema kinye mumindili welea naa kolaio.

<sup>15</sup> Imbo marenin eno teko kenjingine kinye aku uluma pundu toko nendo teko naa kenjeio. Waliwalima Gotenga imboma kinye we imboma kinye kondokolo ulu pengama kau enge ningo teko molaio.

<sup>16</sup> Waliwalima tono kolaio.

<sup>17</sup> Waliwalima Gote kinye konge teaio.

<sup>18</sup> Te uluma eno kinye wendo omo lemo Gotendo paa tereno ningo molangei. Eno Kraist Jisas kinye kopu teko imbo moromelemaniaku ulu teko molangei Goteni konopu mondoromo.

<sup>19</sup> Mini Kakemuni eno makinjipe ulu te teaio nimbelo wali enoni yu naa pipi tieio.

<sup>20</sup> Gotenga ungu nimbe mundulima imboma ningo tirimele profet imboma keri konopu naa leao.

<sup>21</sup> Uluma pali moke teko kanokolio, pengama kau ambolko,

<sup>22</sup> ulu kerima pali eno tiri teaio.

<sup>23</sup> Gote, imboma taka liko molko konopu u nipili ulu pulumu pepili tirimo Gote yunu, yuni enonga mini kangima pali nanga kau kani kake tepa liepili nipili. Awili Jisas Kraist altopa ombalo kinye enonga konopumu kape minimu kape kangimu kape pali nokoromomuni eno ulu alowa naa teli imboma molangei nipili.

<sup>24</sup> Nanga imboma molangei waio nimbe Goteni yunge tembo unguma pali tepa kau teremomungaaku uluma pali eno kinyewendo ombalo.

<sup>25</sup> Ango kame, Goteni lino lipe tapon-dopili ningoneni linonga konge tendao.

<sup>26</sup> Lino Kraistainga imboma teremolo mele angenupili kanokolio linonga angenupili ningokiki lieio.

<sup>27</sup> Nani Awilimunga imbi lepo eno paa enge nimbo nio i pipia topo tiromu Gotenga imboma pali pilengei kambu toko ningo tieio.

<sup>28</sup> Awili Jisas Kraistini eno kinyekonopu noipe eno kinyemolopili.

## **Poloni Tesalonaika Imboma Pipia Talo Tipe Topa Tirimu Ungumu**

### **2 Tesalonaika I Ungu Torumumunga Ungu Pulu Mare**

Tesalonaika moloringi imbomareni Polonga ungu pilko tundukolio Jisas welea yando ombalo konopu lekolio kongono tiye koloringi. Jisas yando ombalo ulu nimbe tipelie Poloni eno nimbe amenge tepa ungu mane tirimu.

Goteni nu Jisas yando ombalo ungu pilko naa tundukolio mini naa lteko uluma toyota teani nipili.

*Awilimunga waimu altopa wendo ombalo ungu*

<sup>1</sup> Pol kinye Sailas kinye Timoti kinye linoni eno Kraistinga lapu Tesalonaika moromelema i pipiamu topo tirimolo. Eno linonga Lapa Gote kinye Awili Jisasi Kraist kinye kopu teko moromele.

<sup>2</sup> Linonga Lapa Gote kinye Awili Jisasi Kraist kinye eloni eno kinye konopu noiko konopu ame tondangili molangei.

*Kraistinga Tesalonaika imboma kinye umbunima wendo orumu wali enge ningomoloringi ungu*

<sup>3</sup> Ango kame, eno Kraistinga ungu ipuki tirimele mele olando olando enge ningon pilko, eno te te ningoni imbo lupema konopu mondoko teko kau moromele akumunga eno konopu lepolio waliwalima Gote kinye paa tereno nimolo. Aku ulu pengamu paa teamili.

<sup>4</sup> Enoni aku ulu teremelelunga Gotenga imbo moromele kombu lupe lupemanga andopo, enonga imbi kapi nimbo, imbomani eno umbuni tirimele kinye eno mindili noromele nalo enge ningon ambolko Kraist ipuki tirimele mele tiye naa kolko, kinye kape ipuki tiko moromele mele konopu tipo temane topo tirimolo.

*Goteni Yunge ulu tumbi nilimuni lino imboma tumbi tipe moke teremo ungu*

<sup>5</sup> Eno teko moromele mele kanopolio, Goteni imboma tumbi tipe moke teremo litemo nimbo karomolo. Eno ulu aku tepama wendo oromo akumunga Gote iye nomi king molopa nokoromo kombuna manda tukundo molangei nimbelo. Aku kombuna pungei mindili aku teko noromele.

<sup>6</sup> Imbomani ulu teremelema Goteni toyota topa pundu toromo, akumunga eno mindili tirimele imboma yuni mindili nangei nimbe,

<sup>7</sup> eno mindili noromele imboma kinye lino kinye peya konopu wango tiko molangei nimbelo. Awili Jisasi yunge ensel enge nilima kinye mulu kombumu tiye kolopa tipe awili kinye tukuruku ombo mona angilimbelo wali i ulumu wendo ombalo.

<sup>8</sup> Yu aku tepa ombalie Gote naa pilko liko tui tiko, Awili Jisasinga ungu pengamu pilko we konopu leko teremele imboma aku teremelelunga mindili nangei nimbe timbelo.

<sup>9</sup> Teko kenjirimelelunga mindili nonge mele i tepa: Goteni Awilimmo molombalona pungo naa molko, yunge pa enge nili tepa telimumga ongo naa molko, paa anjo pangei nimbe makoropa wendo mundumbelo, aku teko molko kenjiko kau pungei.

<sup>10</sup> Nalo Goteni aku wai panjirimuna Yu kapi ningon ipuki tirimele imbomani yunge imbi liko ola mundengei nimbe Awilimuni yando ombalo. Linoni eno ungu nimbo tirimuluma ipuki tiringimunga yu ombalo kinye eno kape peya tono kolko yu kapi ningela.

*Pol kame iyemani Kraistinga Tesalonaika imboma enge ningon molangei ningon Gote konge tenderingi*

<sup>11</sup> Aku uluma wendo ombalo konopu lepolio Goteni eno nanga imboma molko uluma teangei waio nimu mele eno aku uluma manda teangei engema tipili nimbo konge teremolo. Yunge engemuni eno ulu pengamu teamili nimele uluma paimbo teangei nimbe lipe tapondopa, eno Yu ipuki tikolio kongono teremele kongonoma penga lepili, teko kondangei nipili nimbo yu kinye konge teremolo.

<sup>12</sup> Aku ulu tengemunga linonga Awili Jisasinga imbi kapi neio. Yuni kape enonga imbi kapi nimbelo. Linonga Gote kinye Awili Jisasi Kraist taloni eno kinye konopu noinglemuniaku uluma paa wendo opili.

## **2**

*Iye teni ungu manema topa tangondopa paa tepa kenjipe wendo ombalo ungu*

<sup>1</sup> Ango kame, linonga Awili Jisasi Kraist altopa yando ombalo lino lipe nombayo tembalo. Aku ulu talo wendo ombalamunga lino ungu te nimili teremolomu wamongo komu tendao.

<sup>2</sup> Imbomareni kolo tokolio Gotenga ungu nimbe munduli pilendumu nimbo tiembo ningon ninge lemo, molo Poloni ungu te nimbe mundumomu nembo ningon ninge lemo, molo pipia toko tikolio na Poloni i pipiamu topa timo ningon ninge lemo, aku teko kolo toko Awilimunga Waimu oi wendo omo ningon ninge kani eno konopu awini

liko munduko mini naa lteao nimbo enge nimbo nimbo tirimolo.

<sup>3</sup> Nalo imbo teni aku tepa kolo topa kondi tombalo ningi ungu nimbeloma naa pilko, nio ungumu pilengei nimbe ulu mare tembalu wali ipuki naa tieio. Aku Waimu oi we wendo naa ombalo. Oi imbo awinini Gote kinye eno none teko Yunge ungumu paa naa pilimolo ningi umbulu tiko we mele none tendenge walimu oi wendo ombalo. Aku tengi walimunga iye teni ungu manema topa tangondopa paa tepa kenjimbelo iyemu, yu tipe kombuna pumbelo iyemu mona wendo ombalo.

<sup>4</sup> Aku iyemuni we imboma linonga pulu iyema ningi popo toko kapi ninge pulu iyemanga kolo wangopo molopo nanga imbi kau liko ola munduko na kau kapi nengei nimbelo. Linonga Gote moromo kiripina kape pumbe molopa na kau Gote nimbelo.

<sup>5</sup> Kinye i nio mele oi na eno kinye molopolio nimbo tindu kano unguma komu tindiko naa pimeleya?

<sup>6</sup> Nalo aku iyemu i teli oi wendo ombalo aulkemu melteni pipi tirimo, aku melemu eno pimele. Goteni aku iyemu wendo opili nimbelo wali wendo ombalo.

<sup>7</sup> Ungu manema topa tangondopa paa tepa kenjili iyemuni kinye uluma kiyengo nimbe tepa moromo. I teli oi wendo omba mona naa molopoli nimbe aulkemu pipi tirimo iyemu Goteni wendo pupili nimbelo. Yu wendo pumbelo wali paa tepa kenjilimu wendo omba mona molombalo.

<sup>8</sup> Aku wali ungu manema topa tangondopa paa tepa kenjimbelo iyemu mona angilimbelo. Mona angilimbelo kinye Awili Jisasini yunge kere popomuni yu topa kondopa, yu enge pa telimu kinye ombalie yunge pa telimuniaku iyemu kamukumu tepe beambo timbelo.

<sup>9</sup> Ungu manema topa tangondopa paa tepa kenjimbelo iye kanomu kuromanga nomi Satanenga engemu kinye ombalie, kolo toli ulu enge nilima tepa, imboma kanokolio mini lteangei lupe lupe ulu enge nilima tembalu.

<sup>10</sup> Kombu kerina pungo molko kenjingine imbomani paimbo ningi pilengei iye kerimuni ulu kolo topa kondi tombalo ulu keri lupe lupema tepa ungu keri lupe lupema nimbelo. Ungu tukumemu konopu mondonge lemo Awilimuniaku imboma tepa lipe tukundo limbelo nalo Yunge ungu tukumemu konopu naa mondokoliomunga kombu kerina pungo molko kenjingine.

<sup>11</sup> Akumunga Goteni kano imbomani kolo toli ungumu paimbo ungumu nengei nimbe enonga konopu beambo tirimo.

<sup>12</sup> Aku teremomunga imbo ungu tukumemu ipuki naa tiko ulu pulu kerima kau tono kolko teremele imboma kot walimu wendo ombalo kinye Goteni kot pilipe eno moke tepa pundu topa eno teko kenjiringimunga molko kenjengei nimbelo.

#### *Poloni Goteni eno tepa limbei kanopa ltamu nimu*

<sup>13</sup> Nalo Awilimuni konopu mendoromo ango kame, Goteni eno oi kumbe lepa kanopa lipe eno tepo liemboi kani Mini Kakemunga enge nilimuni eno nanga imbo kake telima molko, ungu tukume ipuki tiengei nimu akumunga pilipo molopolio linoni waliwalima Gote kinye paa tereno nimbo moromolo.

<sup>14</sup> Imboma linonga Awili Jisasi Kraistinga ba enge nilimur kinye yunge engemu kinye tendekuna kopu teko molonge kinye, eno kinye peya tendekuna kopu teko molangei kani nimbe linoni eno ungu tukume nimbo tirimulomuni Goteni eno aku teko molangei waio nimu.

<sup>15</sup> Linonga ango kame, aku terimu kani enge ningi angilko, linoni eno kinye molopolio Gotenga unguma nimbo tipo, altopa pipia topo tipo, aku tepo mane tirimulu ungu tukume akuma tiye naa kolko wamongo lombieio.

<sup>16</sup> Linonga Lapa Gote, lino konopu mendoromu iyemuni lino kondo kolopalie konopu enge tipe pora naa nimbelo ulumu kinye, Goteni lino kinye ulu pengama tembalu nimbo enge nimbo ipuki tipo nikopo moromolo ulumu tirimo iyemu kinye, linonga Awili Jisasi Kraist yu kinye eloni

<sup>17</sup> eno konopu enge nipili toimbo toko enge ningi molkolio waliwalima ulu pengama kau teko ungu pengama kau ningi molonge engemu tiengili.

### 3

#### *Enoni Goteni lino lipe tapondopili ningokonge tendao*

<sup>1</sup> Manda, ango kame, kinye ungu te kamukumu nemboi, Gote kinye ungu ningi linonga konge tendekolio i teko neio, eno Awilimunga ungumu nimbo tirimulu kinye pilkolio ungu pengamu, Yunni paimbo linonga nimbe aku tenderimu ningi pilko ltingi mele aku teko anjo anjo imboma i ungumu pilengei aulkemu nondopa wendo opili. Ungumu pilkolio enoni teringi mele aku ulu kala teangei ningi konge tendao.

<sup>2</sup> Eno piltimele, imbomani pali Awilimunga ungu akumu paimbo ningi ipuki naa tirimele. Akumunga iye kerimani ulu kerima kau teko, teko kenjiko moromele iyema lino ulu te naa teko umbuni te naa

tiengei kani Goteni lipe tapondopili ningko konge tendao.

<sup>3</sup> Nalo Awilimuni ulu tukumemu teremo kani lino yu manda ipuki tirimolo. Kuro kerimanga nomi Sataneni eno kinye ulu te naa tepili nimbe eno enge tipe nokombalo.

<sup>4</sup> Linonga Awilimuni eno enge tirimolo lipo manjipolio, linoni eno teao nimulu mele kinye teko kondoko moromele, altoko kape aku ulu kau teko molonge konopu itemolo.

<sup>5</sup> Goteni imboma konopu mondoromo mele kinye, enoni imboma konopu mondunge mele kinye, Kraistini umbuni membai enge nimbe angimo mele eno aku teko manda manjiko teko molonge mele kinye, Awilimuni mane tipe enonga konopu tepa tumbi tipili.

*Imboma we naa molko kongono teko molangei nimu ungumu*

<sup>6</sup> Ango kame, Awili Jisasi Kraistinga imbi lepo eno enge nimbo nimili, enonga angenu teni kongono naa tembo nimbe tiye kolopa, eno mane tirimulu mele aku tepa naa teremo imbomu peya tendekuna kopu teko paa naa molko eno yokeya tendao!

<sup>7</sup> Eno pilkolio, lino teremolo mele eno aku teko manda manjiko teaio ningko pimele. Oi eno kinye peya molorumulu wali lino we naa molorumulu.

<sup>8</sup> Imbo mareni lino langi tiringi wali we naa norumulu. Topo topo lipolio norumulu. Eno kinye peya molorumulu wali eno kinye peya moromolomunga eno umbuni te naa tepili nimbo ipu leli kape tangoli kape lino enge nimbo kongono temili akumunga lino paa mindili nombo molorumulu.

<sup>9</sup> Linoni eno lipo tapondoromolo kani lino pundu toko melte tie nilimalanje manda nilimala. Nalo ulu pengamu lombilengei nimbolio kere we naa ltimulu.

<sup>10</sup> Eno liko manjirimele. Lino eno kinye molopolio wali i tepa nimulu, imbo te kongono naa temo lemo aku yu langi we naa lipe nopili!

<sup>11</sup> Nalo lino pimolo wali enonga imbomare kongono naa teko we kau moromele. Imbo lupemanga teremele uluma ulu enongano molo nalo we nilko nilko andoromele.

<sup>12</sup> Awili Jisasi Kraistinga imbi lepolio kano imboma teangei mele i tepo enge nimbo nimolo. Eno tako liko molko kondoko, enonga langi nongeima eno enongano kongono tekolio langi liko naio nimolo.

<sup>13</sup> Nalo ango kame, eno ulu pengama tengei tiye naa kolaio!

<sup>14</sup> I pipia topo tirimolomunga tukundo ungu mane tirimoloma imbo teni pilipe tengenaa timo lemo enoni kanokolio yu

aku tepa teremomunga pipili kolopa lipe manjipili ningko yu kinye yokeya tendao.

<sup>15</sup> Nalo enoni aku imbomu linonga opa pule imbomu konopu leangei nimbo naa nimolo, molo. Yu linonga angenu kani yu tepa kenjimo mele undupe kanopili ningko amenge teao.

*Poloni pipia topa pora timbei nimu ungumu*

<sup>16</sup> Awilimlu, ame toli ulumunga Gote, yuni ulu lupe lupema wendo ombalo kinye eno konopu ame topili molangei nipili. Awilimlu eno kinye pali kopu tepa molopili.

<sup>17</sup> Nani pipia topo tiromanga imboman i pipiamu paa paimbo Pol yunu tomo ltemo ningko kanangei nimbo eno molko kondaio ungumu i tepo toro mele toro.

<sup>18</sup> Linonga Awili Jisasi Kraistini eno kinye konopu noipe molopili.

## **Poloni Iye Timoti Pipia Kumbe Lepa Topa Tirimu Ungumu 1 Timoti I Ungu Torumumunga Ungu Pulu Mare**

Poloni Kraistingu imbo Efesus kombuna moloringima Timoti tapu tepa nokopili nimbe yu purumu. Anjo molopalie Timoti Kraistingu imboma tapu tepa nokopa kondombalo mele mane tipelie i pipiamu topa mundurumu.

Goteni enonga tapu iyema toy a tokomolangai nimbe enge tipili.

## **Poloni Timotindo Nunge Ulu Tenioma Kinye Kraistingu Imbomani Ulu Tengema Kinye Wamongo Nokoko Kondowi Nimu Ungu Mare**

*Poloni i pipiamu tombaindo oi pulu  
polopa torumu ungumu*

<sup>1</sup> Na Pol, Jisasi Kraistini nanga kongonomu tendepuwu nimbe lipe mundurumu iyemu. Lino Tepa Lipe Mindili Nolemala Aulkena Wendo Ltamu Gote kinye lino paa tepa kondombalo nimbo konopu tipo nokopo moromolo iye Kraist Jisasi kinye na kanoko liko i kongonomu tendepuwu ningilina aku tepo andopo nimbo tiro iyemuni

<sup>2</sup> nu Kraistingu iyemu molko kondani nimbo nani nu nokoro, nu kinye ilto Kraistingu iye talo morombolomunga nu nanga kandi malo Timoti i pipiamu topo tiro. Lapa Gote kinye linonga Awili Kraist Jisasi taloni nu kinye konopu noiko teko kondoko, nuni wali te ulu mare teko kenjinio kinye nu kondo kolko mindili nani naa ningi, nu konopu ame topili tako liko molani nengili.

*Ungu kolo tolima mane tirimele imbo-  
mani nimele unguma naa pilipo umbulu tim-  
olo ungumu*

<sup>3</sup> Nani kombu Masedonia provins pumbobindu nu enge nimbo walipo pilipolio kombu awili Efesus molani niu kano mele kinye nu akuna we molani nio. Iye marenii akuna kolo toko ungu lupema mane tiko moromele kani akuna we molko kano iye-mandoaku ulu naa teao niwi nimbo nu walipo pilito.

<sup>4</sup>Aku iyemani Juda imbomanga kangema toko anda kolepalemanga imbima tule teko toko kau moromele ungumani enonga konopuma topa beambo tipe, ungumanga

pulumu pilingeindo we opa karaye kau tenge aulkemu akirindipe, Gotenga ungu paimboma pilinge aulkemu pipi tirimo kani enondo aku ulu naa teao niwi. Kano iyemani mane tirimele ungumani Gote pimolo aulkemu naa akirindirimo. Gotenga ungumu kinye, yuni lino kinye tembo nimbe, nimbe panjirimu uluma kinye, Kraist Jisasi molopa linonga nimbe tenderimu mele akumu paimbo nimbo enge nimbo pimolo ulumuni kau aku taloni kau pimolo aulkemu akirindirimo.

<sup>5</sup> Kano iyemani ningi kenjiko imboma teko embambo tirimele iyemando ake teko naa teao niwi no mele Kraistingu imboma nendo yando enonganon konopu mondoko molangei nimbo kano iyemando ake teko niwi nio. Paimbo ningi enge ningi pimele ulumu paa paimbo teremele ulumu kinye, konopu kake teli ulumu kinye, konopu uni pilkollo Goteni kanopa keri karomo ulu keri te konopuna naa peremo lepo amo ningi pileli ulumu kinye, ake tepa konopu penga peremo imboma andi yando enonganon konopu mondoli ulumundo nio.

<sup>6</sup> Imbo mare ake tepa konopu pengama naa pepili molko ake ulu pengama tiye kolkolio we unguma kau ningi keke lepo toromele.

<sup>7</sup> Mosesini Gotenga ungu manema pilipelite yando nimbe tirimu ungu manemanga mane tilima molamili nimele nalo ungu manemanga puluma naa pilko, enge ningi mane tingeindo nimele ungumanga puluma eno enonganon wamongo naa pimele.

<sup>8</sup> Lino pimolo, Mosesini ungu mane tirimuma tumbi tipo pilipo, ake ungu manemanga ungu puluma wambo pilipolio ulu akuma temolo kinye ake ungu manema paa penga nimbo pimolo.

<sup>9-10</sup> Kano ungu manemani kongono wamba tepa teremo mele kanopolio kano ungu manema penga nimbo pimolomunga ungu pulumua i tepsa: Gotenga ungu manema timbeindo tumbi tiko moromele imboma pilko teangei nimbe naa tirimu. Unku manema toko tangondoko kalambo naa nimele imboma kinye, Gotenga unguma liko umbulu tiko ulu pulu kerima teremele imboma kinye, Gotenga unguma naa pilko ulu kake telima pilipo teamili naa nimele imboma kinye, imbomani enonga anupili lapali toko kondoromele imboma kinye, imbo lupema toko kondoromele imboma kinye, wapu ulu kerinale teremele kango imboma kinye imbo yuma kinye, kombu awili Sodom imbomani iyema enonganon ulu kerinali teko amboma enonganon ulu kerinale terengi mele teremele imboma kinye, maket tepo kou liemili ningi imboma wapu ltimatele imboma kinye,

kolo toromele imboma kinye, kotena pungo paimbo nimolo ningi panjikolio kolo toromele imboma kinye, Gotenga unguma pilipo Kraistingu imboma teko molangei nimbo mane tirimolo ungu lupemba peya topa tangondambaindo ulu kerima teremele imboma pali kinye, Mosesini tirimu ungu manemani aku ulu teko kenjiko moromele imboma pali nokopili nimbe Goteni aku ungu manema pepili nimbe, nimbe panjirimu.

<sup>11</sup> Gotenga unguma mane tirimolo ungu paimbo akuma Goteni na kanopa lipe andoko ningi tiwi nimu unguma kinye tendeku tipe. Aku ungumu paa penga olandopamu, imbi paa peremo Gotenga ungumu.

*Poloni Goteni yu kondo kolorumumunga paa tereno nimu ungumu*

<sup>12</sup> Jisasi Kraist linonga Awilimuni i kongono tenderomunga engemu tipelie na kanopa penga pilipe nanga kongonomu tiye naa kolopa manda tepa kondombalo nimbe pilipelie i kongono tenderomu na tirimumunga yundo paa tereno nio.

<sup>13</sup> Paimbo oi yunge imbimu lipo ungu taka tondopo, yunge imboma kinye opa pule topo mindili tipo topo kondomboi teru nalo yu paimbo Gotenga Malo molopa Goteni lino nokopili nimbe maina lipe mundurumu iye Kraist molorumu mele pilipo tundupolio, Yunge temanemu toringi pilipolio kolo toromele nimbo enge nimbo pilera mele akumu tepo alowa terumunga yuni kanopalie na kondo kolopa mindili nopili naa nimu.

<sup>14</sup> Nalo na Kraist Jisasi kinye peya tapu topo molorumbulu kala linonga Awilimuni na paa we kondo kolopalie, Yu paimbo nimbo enge nimbo pileli ulumu kinye imboma konopu mondoli ulumu kinye kano uluma Awilimuni na olandopa tirimu.

<sup>15</sup> Lino ulu pulu keri terimulu imboma lipe tapondopa, mindili nolemala aulkena wendo lipe yu kinye peya molopo kondomolo aulkena lipo mondambu nimbe Goteni maina lipe mundurumu iye nomi Kraist Jisasi maina mainye orumu. Aku ungumu paa paimbo ungumu. Imbomania konopu talo naa pepili paimbo aku ulu terimu ningi paa enge ningi pilko ipuki tiengei. Aku temolo kinye paa ku naa pemolo. Ulu pulu keri teremele imbomanga na ulu pulu keri awini terumunga na iye kiyendomu,

<sup>16</sup> nalo Kraist Jisasini imboma konopu topele tangei nimbo taka lipo nokopo ame topili moro. Nani paimbo manda lipe tapondombalo ningi pilinge imboma paimbo kondo kolopo lipo tapondopo, koinjo molko kondoko kau punge ulu

pulumu timbo ningi kanangei nimbelie naa ulu pulu keri olandopa teru iyemu oi kondo kolopa tepo kenjirumunga mindili naa namboi nimbelie lipe tapondorumu.

<sup>17</sup> Waliwalima molopa kau puli iye nomi kingimu molopa, kolopa naa kolombalo iyemu molopa, imbo teni naa karomo iyemu molopa, yu tendekumu kau paimbo Gote molopa,aku tepa moromo Gote yu kau imbi ola molopa enge pepa, enge nimbe pa tepa,aku tepa molopa kau pupili! Aku tepa kau nemili! I paa.

*Poloni Timotindo ulu kerima kamukumu mainye pupili ningi enge ningi kongono tewi nimu ungumu*

<sup>18-19</sup> Nanga malo Timoti, Gotenga ungu nimbe mundulima Kraistingu iye mareni nu molonio mele oi ningi tiringi mele pilipolio nu paa aku teko teami nimbo, nimbo tiro. Imboma teko kenjiko molangei nimele melema mainye pumbe, Gotenga kongono tepo moromu enge pepili kani enge nimbo opa paa teambo ningolio nu tenio mele oi ningi tiringi ungu akuma pilko liko teami. Kraist Jisasi paimbo ningi enge ningi pino mele tiye naa kolko, waliwalima konopuni pilkolio Goteni kanopa keri pimo ulu keri te nanga konopuna naa peremo. Kongono teroma tepo kondoro lepamo ningi pilko molani! Aku ulu talo ambolkolio opa enge nimbo teambo ningi nu tenio mele oi ningi tiringi ungu akuma paa pilko liko teko molani. Imbo mareni kano ulu talo naa tembo kinye ulure molo ningimunga, nona andoli sip te nona kou teni topa bulturumo kinye paa keri lemo mele kano imboma aku teko mele ipuki tiringi ulumu paa kamukumu keri lierimu.

<sup>20</sup> Aku tiringi imbomanga iye Himeneus kinye Aleksander kinye elo aku teko teringili kinye kuromanga nomi Satan mindili lipe tipili mindili nangili niu. Aku teko molko kenjikolio Gote ungu taka tondoko yunge imbimu teko naa kenjingele mele pilengili nimbo aku ulu teru.

## 2

*Kraistingu imboma maku toko molko Gote popo toko kapi ningi Yunge imbi liko ola mundundunge mele ungu mane te*

<sup>1</sup> Manda, nani eno teangei nimbo ulumanga oi kumbe lepo enge nimbo teangei nimbo niomu i tepe, Imbomanga pali Gotendo unguma nindiko, konge tendeko, eno tapondopili nindiko, paa tereno ningi nengei.

<sup>2</sup> Eno nokoromele iye nomi kingima kinye gavman imboma kinye akumanga Gote konge tendangei. Gote kanopa penga pimo uluma tepo molopo konopu kake tepili

molopolio lino waye taka lipo molamili ningolio aku ulu teangei.

<sup>3</sup> Aku uluma penga ltemo. Lino Tepa Lili Gote aku uluma kanopa penga pimo.

<sup>4</sup> Gote yuni imboma pali mindili nolemala aulkena wendo ongo na kinye peya molko kondonge aulkena pungo, ungu tukumemu pilko ambolonge lemo paa konopu lepa moromo.

<sup>5</sup> Akumunga ungu pulumu i tepe, Gote tendekumu kau moromo; iye tendekumu kau Gote kinye lino maina imboma kinye linonga tuku tingina moromo, aku iyemu ya Kraist Jisasi.

<sup>6</sup> Goteni wai panjirimu wali Kraistini yu imbomanga pali kolo wangopa kolorumu ulumuni imboma kot kamukumu pame tepe kololi ulumunga wendo Itimu. Aku ulu terimumuni Goteni imboma waye tepe limbei teremona lipo manjirimolo.

<sup>7</sup> Kraistini nanga ungumu pungo ningotindiko, nanga kongonomu tendepuwi nimbe na lipe mundurumu akumunga pulumu Gote kinye imboma kinye popo tiko molonge aulkemu akirindimbeindo kolorumu kanomu. Kolo naa toro. Paimbo nio. Juda imbo naa moromele imbo lupema paimbo ning enge ning pilinge ulu paimbomu eno mane tiemboi nimbe na lipe mundurumu.

<sup>8</sup> Aku kani kombu lupe lupemanga pali Kraistingu imbomani Gote popo toko kapi ningeindo maku toko molonge kinye linonga kangi konopuma pali Gotenga ningo konopu kake tepili molonge imboma Gote kinye ungu nemili ningolio, mumindili kolko opa karaye tengen ulu te naa pepili ki ola munduko Gote kinye ungu nengei.

### *Ambomani ulu pengama teko molko kondangei nimbe ungu mane tirimu*

<sup>9</sup> Ambomanga ungu te i nio. Iyemani lino kanoko eio konopu leangei ning wale pakoli pengama naa pakangei. Au nombe nome naa tondaio. Enonga pinyendima au tiko, kou goloni telu melema kinye kulumu penga kou mone olandopa purumoma kinye, akuman i enonga kangima au tiko wale pakoli kou olando pulima pakoko, naa teangei. Enonga mandana pakoromele mele aku teko pakangei.

<sup>10</sup> Imbomani lino kanoko penga kanangei ningolio ulu tumbi nilima kau teangei. Aku uluma Gotenga amboma moromolo ning yunge unguma pilko moromele amboma au tinge mele pengama.

<sup>11</sup> Kraistingu imbo maku toko molon-  
gena amboma taka liko molko unguma naa  
ningo, Gotenga unguma wamongo pilko,  
unguma pilko liko molangei.

<sup>12</sup> Ambomani iyema naa nokoko, Gotenga unguma mane naa tiengei nio. Ungu naa ning tako liko molko pilengei.

<sup>13-14</sup> Goteni iye Adam oi kumbe lepa tepe, altopa ambo Ipu terimu. Pele kuromanga nomi Sataneni kolo topa kondi torumu unguma Adameni paimbo nimo nimbe kumbe lepa pilipe naa Itimu. Ambomuni kolo toromo ungumu paimbo nimo nimbelie Goteni nimu ungumu topa tangondopa ulu pulu kerimu terimu. Akumunga amboma aku teko taka liko molangei.

<sup>15</sup> Aku paimbo nalo amboma Kraist Jisasi molopa tenderemo mele paimbo ning enge ning pimele mele tiye naa kolko waliwalima enge ning pilko kau molko, waliwalima imboma konopu mondoko, lino Gotenga amboma molamili ning yuni ulu kake telima nimbe karomo uluma teko, enonga imbima teko mainye munduko taka liko molkolio, bakulu menge kinye Goteni eno molko kondangei nimbe lipe tapondombalo.

## 3

### *Kraistingu imbo talapemanga nokoli iyema teko molonge ungumu*

<sup>1</sup> I ungu tukume nimboi. Iye teni Kraistingu imbo talapemu nokamboi konopu lemo lemo kongono tukumemu konopu mondoromo.

<sup>2</sup> Akumunga Kraistingu imbomanga nokoli iyemu molombalo iyemu yu iye paa tumbi nili iye te molopa, imbomani kanoko keri pilinge ulu te yu kinye naa peli iyemu molopili. Nokoli iye molombalo iyemu yu ambo tendekumunga iyemu molopili. Yu molopa kondopa, ulu pengama kau konopu kimbo tipe, konopu lepa kondombalo imbomani yu kanoko penga pilko yunge unguma liko awili tinge ulu pengama kau tepe, yunge ulkena onge imboma tukundo wangei nimbe nokopa kondopa, Gotenga unguma imboma paa pilengei nimbe tumbi tipe mane timbelo ulumu lipe manjipe, aku tepe iyemu molopili.

<sup>3</sup> No nomba keke lepo naa topa, imboma kinye mumindili welea naa kolopa opa naa tepe, imboma kinye taka lipe molopa, kou mone olandopa konopu naa mondopili.

<sup>4</sup> Yunge ambomu kinye bakuluma nokopa kondopa, yunge bakuluma yunge unguma taka liko pilko liko tengen tiko teangei mele mane tipili.

<sup>5</sup> Iye teni yunge ambomu kinye bakuluma manda naa nokopa kondomo lemo Gotenga imbo talapemu nokombalo kongonomu manda naa tembalo.

<sup>6</sup> Kraistingu imbo talapemu kokele tukundo ombalomuni yu iye pengamu

konopu lepalie yu none tembalu aku wali Goteni oi Satan kot tendepa mainye mundurumu mele iye akumu aku tepe kot tendembalo kani kokele tukundo ombalo iye nokoli kongono manda naa tembalu.

<sup>7</sup> Kraustinga imbo talape tawendo moromele imbomani iye te kanoko imbi keri tirimeleuni nokoli kongono temo lemo Sataneni ungu keri nindirimeleuni aku iyemu melu mele lepa poimbelo. Akumunga nokoli iye molombalo iyemu tawendo molonge imbomani yu kanoko penga pilko yu iye toya tolimu ninge iyemu aku Kraustinga imbo talape nokoli iyemu molopili.

*Kraustinga talapemanga tapu iyema teko molonge ungu*

<sup>8</sup> Kraustinga imbo talapemanga tapu iye molongema eno kape i teko mele molko kondangei. Imbomani eno kanoko penga pilko enonga unguma liko awili tiko, eno linonga tapu iyema molonge lemo paa ninge uluma tekolio kongono tengendeindo wamongo pilko taku liko tengen iye ma molko; konopuna ungu lupe liko manjiko kerena ungu lupe ningiaku ulu naa teko, imbo marendo ungu lupe ningi marendo alowa teko ungu lupe ningi naa teko; no enge nili awini nongo keke lepo naa toko, Kraustinga imbomanga kongono tendepolio kou mone awini limbo konopu lensegi iyema naa molangei.

<sup>9</sup> Aku iyema lino Jisasi Kraistini linonga nimbe tenderimu lipe tapondromo mele paimbo nimbo enge nimbo pimolo imboma Goteni ungu lopeke terimumu nimbe para tirimu ungu paimboma paa ambolonge iyema molangei. Enoni ungu paimboma ambolongeindo konopuni pilkolio Goteni kanopa keri pimo ulu te konopuna naa peremo, kongono teroma tepo kondoro lepamo ningi pilkolio, ungu paimboma ambolangei.

<sup>10</sup> Tenge uluma oi manda manjiko kanokolio, eno molko kondoko, imbomani kanoko keri pilinge uluma naa teko, uluma tengen mele wamongo teko pilko taku liko teko molonge amboma molko, imbo tengen ungu umbulkondo naa nindiko, molko kondoko, enonga kongonoma toya toko pilko teko kondonge amboma molangei.

<sup>11</sup> Enonga amboma kape, imbomani kanoko keri pilinge uluma naa teko, uluma tengen mele wamongo teko pilko taku liko teko molonge amboma molko, imbo tengen ungu umbulkondo naa nindiko, molko kondoko, enonga kongonoma toya toko pilko teko kondonge amboma molangei.

<sup>12</sup> Kraustinga imbo talapemanga tapu tembalu iyemu yu ambo tendekumunga iyemu kau molopili. Yunge ambo bakuluma nokopa kondopa, yunge bakulumanu yunge unguma wamongo pilko liko,

liko awili tiko molonge mele mane tipe kondopili.

<sup>13</sup> Kraustinga imbo talapemunga tapu teko kondonge iyema imbomani liko awili tiko enonga imbima kapi nimele kape, Kraist Jisasi paimbo ningi pimele mele olandopa enge ningi pilkolio, aku teko enge ningi pimele mele pipili naa kolko imboma tumbi tiko ningi tinge.

*Poloni Timoti i pipiamu topa tirimungu ungu pulumu*

<sup>14</sup> Nu kanambo nimbo nu moronona nondopo paa wambo konopu lepolio nalo i pipiamu oi nu timboindo toro.

<sup>15</sup> Nalo ulu teni na pipi timbelo kinye manda nondopo naa ombonje kani nimbolio Gotenga imbo moromelema teko molonge mele pileni nimbo i pipiamu oi topo tiro. Aku imboma koinjo molopa kau puli Gotenga imbo talapemu. Aku talapemu ungu paimbomu lipe tapondopa enge nimbe pepili nimo talapemu. Ungu tukume akumu ulkemu mele, Gotenga imbo talape akumu ungu tukumemungu ulke timumuni angimo aku tepe enge tirimo.

*Gotenga ungu pulumu aku ulu paa olandopa*

<sup>16</sup> Oi Gotenga ungu te yuni mane tirimu ungu lopeke terimumu kinye mona nimbe para tirimu aku ungumuni lino Gotenga imboma molopo yuni kanopa penga pimo uluma temolo mele lipe ondoromo aku ungumunga ulu pulumu paa enge nilimu, imbomani aku ungumunga pulumu manda teko mainye naa mundunge. Aku ungu pulumu i tepe,

Yu maina iye te omba mona molorumuna imbomani kanoringi. Yu ulu pengama tepe molopa kondorumu mele Mini Kake Telimuni lipe ondorumu.

Mulu kombuna enselemani yu kanoringi. Yunge temanemu mai kombuna pali yunge imbomani toko tilko andoringi.

Imboma kano temanemu pilkolio paimbo ningi enge ningi pileringi.

Goteni yu mulu kombuna olando lipe, yu oi iye enge nilimu molorumu kombu enge nili pa telina mepa pumbe mondorumu.

## 4

*Imbo marenii kolo toko nimele ungumani imbomanga konopuma tepe beambo tindrimo ungu*

<sup>1</sup> Kinye ulu mare wendo oromomunga ungu mare Mini Kake Telimuni i tepe tumbi tipe nimbe para tirimo. Altapa wendo ombalu walimanga kolo toli kuromani ungu

ningema kinye, kuro maren mane tinge unguma kinye, imbo maren pilkolio Kraist paimbo ning enge ning pilinge ulumu tiye kolonge.

<sup>2</sup> Aku unguma iye topele mapele tolimani kolo toko mane tirimele. Aku iyemanga konopu naa pepa, enonga konopuni naa pilku ulu pulu keri teremelema naa pilko moromele.

<sup>3</sup> Aku iyemani mane tikolio ningeindo, iyema ambo naa liko amboma iye naa pangei ning, langi mare imbi tikolio aku langima kalaro moromo kani mi toko naa naio ninge. Nalo langi akuma Goteni lino Jisasi yu paimbo nimbo enge nimbo pilipo, ungu paimboma pilipo limolo imbomani nangei nimbe terimu. Aku langima lipo Gote kinye paa tereno nimbo nomolo kinye ulure molo.

<sup>4-5</sup> Goteni terimu melema pali pengama. Gotenga ungum kinye linoni Gote kinye ungu nimolo ungu taloni langi kinye melema pali Gotenga mele kake telima lembalo akumunga langi akuma tiye kolko naa nonge kinye manda molo. Gote kinye paa tereno ning liko nonge kinye manda lipo nomolo.

*Timoti Kraistingu kongono tendeli iye pengamu molombalo nimu*

<sup>6</sup> I nio mele nunge Kristen angenali aku teko teangei ning mane tinio kinye nu Kraist Jisasinga kongono tendeli iye pengamu molonio. Lino ungu pengama paimbo nimbo enge nimbo pimolo unguma kinye Kraistingu ungu puluma mane tirimuluma kinye oi kape altopa kape pilko liko teko moronoma pilko liko tenio kinye nu kinye enge nimbe pepili molonio.

<sup>7</sup> Unku timborimbo ungum Gotenga ungum topa mainye mundumbei tere-moma kinye kange kerima toromele akuma umbulu tiko, Goteni kanopa penga pimo uluma kau pilipo teambo ningaku uluma wamongo teko pilko kondoko teko molowi.

<sup>8</sup> Paimbo kangimu enge nipili nimbo ulu mare teremolo kinye akumu penga. Aku teremolo kinye kangimu paimbo enge nimomunga paimbo lino alaye kolte lipo tapondoromo. Nalo Goteni kanopa penga pimo uluma wamongo pilipo temolo ulu akumu paa olandopa pengamu. Aku temolo ulumuni lino lipo tapondopa, kinye ya maina moromolo mele kinye pele mulu kombuna molomolo mele kinye timbelomunga akumu paa olandopa kani Goteni kanopa penga pimo uluma wamongo pilko teko molowi.

<sup>9</sup> I nio ungu akumu paimbo. Aku ungum imbomani konopu talo tepa naa pepili ka-mukumu pilko ipuki tinge.

<sup>10</sup> Waliwalima koinjo molopa kau puli Goteni imboma pali Tepa Lipe Mindili Nolemala Aulkena Wendo Ltimo Iyemu yuni paimbo lino yu ipuki timolo imboma lipo tapondopa mindili nolemala aulkena wendo ltimo. Aku teremomunga lipo manjipolio, Yuni lino lipo tapondopa tepa kondombalo nimbo nokopo molopolio lino yunge kongonoma enge nimbo paa mindili nombo teremolo.

<sup>11</sup> I ungu nioma pali Kraistingu imboma pali ning tiko, teangei ning mane tiko molowi.

<sup>12</sup> Nu iye kokelemu, nalo imbomani nu iye yumu molo, nu lipo manjili naa peli iyemu konopu leko nunge ungum umbulu timolo konopu naa leangei. Nunge ungum pilko liengei ning molowi. Nuni ungu pengama ning, molko kondoko teko andoliko, imboma paa konopu mondoko, Kraist ipuki tiko, Goteni ulu kake telima nimbe karomo uluma teko, aku tekolio Kraist paimbo ning enge ning pimele imboma na molopo tembo mele manda leko molko tengen mele kanangei ning aku ulu tewi.

<sup>13</sup> Na oi welea naa ondu lemo, nuni Gotenga bukuna ungu moromoma imboma pilengei kambu toko, aku ungumanga ungu puluma imboma ning tiko, Kraistingu imboma teko molonge mele mane tiko molowi.

<sup>14</sup> Kraistingu imbo talapemunga tapu iyemani nu ambolko Goteni yunge kongonomu teko kondani nimbe lipo tapondopili ningi kinye Gotenga nimbe munduli ungum iye teni pilipelie yando nu nimbe tirimu kinye Goteni nu kongono teani nimbe enge tirimu akumu nu tiye naa kolowi.

<sup>15</sup> Aku engemu ambolko kondoko kongonoma enge ning tewi. Aku kongonoma teko kondoko molonio mele imbomani pali kanangei.

<sup>16</sup> Nu molonio mele kinye, nuni imboma mane tinio unguma kinye, aku ulu talo nokoko kondowi. Tiye naa tepili enge ningo aku teko tenio kinye aku teko teniomunga Goteni nu kape nunge ungum pilinge imboma kape peya lipo tapondopa mindili nolemala aulkena wendo lipo yu kinye peya molko kondonge aulkena lipo mondombalo.

**Ambo Waima Kinye Tapu  
Iyema Kinye Kongono  
Kendemande We Tendeli  
Imboma Kinye Timoti Yu  
Kinye Enoni Teko Molangei  
Unguma Poloni Timoti Mane  
Tirimu**

## 5

*Poloni Timotindo imboma kanokolio nanga pulu ltemo imbo kandima ningokanowi nimu ungumu*

<sup>1</sup> Kinye Kraistingu imbo talapena moromelema kinye tenio uluma nemboi. Iye anda te iri naa towi. Tepa kenjimbelo kinye kanokolio nunge lanie kinye nino mele aku teko ulu toyu topo teamili ningotiti. Nunje angenali nokoromo mele aku teko iye kokelema nokowi.

<sup>2</sup> Nunje aminye kinye tereno ulumu aku teko amboma kinye tewi. Goteni kanopa penga pimo uluma nunge keminyeli kinye tereno ulu aku mele ambo wenepoma kinye tewi.

### *Ambo waima nokonge ungumu*

<sup>3</sup> Ambo waima imbo mareni eno liko naa tapondongema paa liko tapondoko nokani.

<sup>4</sup> Nalo ambo wai te yunge bakuluma molo yunge bamupilima molonge lemoaku imbomani Gotenga ungumu pilipo teamili ningolio oi kumbe leko enonga imbo pulu lemoma nokoko, aku imboma eno bakuluma moloringi kinye lapali anupilini eno nokoringimunga enoni kinye aku teko pundu toko aku ambo waima liko tapondoko nokangei. Aku teko teremele uluma Goteni kanopa penga pimomungaaku ulu teangei.

<sup>5</sup> Ambo wai te yu imbo teni nokombalo imbo te naa moromomunga yu paimbo ambo wai pinyewe akoli moromo ambo akumu Goteni na paimbo lipe tapondopa nokombalo nimbe pilipelie ipu leli tangoli kape Gote kinye ungu nimbe liko tapondowi nimbe konge tepa moromo. Aku tengeambo waima liko tapondoko nokonio kinyeaaku paa.

<sup>6</sup> Ambo wai te yu yunu konopuni pilipe wapera topa uluma teremo ambo akumu yu paimbo we moromo nalo ambomu kololi imbo mele moromo.

<sup>7</sup> Aku ambo waima kinye enonga imboma kinye imbomani kanoko keri pilinge uluma naa teangei ningoneno aku teko mane tiwi.

<sup>8</sup> Imbo teni yunge anumu lapa talo kinyekemulipili angenupili mele te molo ltemomo umbuni te peremo kinye naa lipe tapondopa nokopa, yunge pulu ltemo imbowema kinye naa nokomo lemoaku teremo imbomaku tepea teremomunga yu Kraist paimbo nimbe enge nimbe pimo mele tiyekolopa umbulu tipe, paa tepea kenjirimo. Kraistingu imbo naa molko tawendo moromele imbomani teko kenjirimele ulumu mandopa, aku imbomuni tepa kenjirimo mele olando.

<sup>9</sup> Kraistingu imbo talapena moromele ambo waimanga imbima pipiana mondamili ningolio, ambo wai mare, paa amboi

leko, iye tendekumu kau purumuma aku ambo waimanga imbi mondangei.

<sup>10</sup> Aku ambo waima enoni oi teringimele pilengei! Oi enonga bakuluma langitiko nokoko kondoko, imbo ponengema ulkena wangei ningonokoko kondoko, Kraistingu imbomanga kongono kendemande tendeko, umbuni peremo imboma liko tapondoko, aku teko ulu pengama enge ningonoko moloringi mele ningotinge pilinge ambo waimanga imbima kau mondangei.

<sup>11-12</sup> Nalo kokele ambo waimanga imbi naa mondangei. Eno Kraist konopu mondoko pimele mele iye te lupe konopu mondoko pilinge ulumuni tepa mainye mundumbelo kinye oi kokele ambo waima molkolio Kraistingu kongonomu kau tendepo molomolo ningonoko, ningonanjiringi ungu tiye kolonge kinye Goteni eno teko kenjiriringi nimbelo kani enonga imbima ambo waimanga imbima kinye popo tiko naa mondangei.

<sup>13</sup> Ulu te i teko teremelela. Eno imboma kinye we unguma nimbo kopu tepo molamili ningonoko imbomanga ulkemanga andokolio kongono naa teko tiye kololi ulumu kau pilko liko teremele. Aku kau molola. Imbomani ulu te teremele mele naa kanoko imbomanga anjo anjo we nindiko temane tokotilko andoko, imbo mare ulu teko ungu nimelema paa pilemili ningonoko andoko waliako pilko komu tendeko moromele. Imboma ungu kiyengo ningonoko nimelema wapupilkano pungo ningonotirimene. Aku ulu teremele mele lino kanopo keri pimolouluma eno andoko teremele.

<sup>14</sup> Aku ulu teremelelunga nani kokele ambo waima tengelulu i tepo nio: Eno altoko iye pungo, bakulu meko, enonga iyema kinye bakuluma kinye nokangei. Aku tengel kinye linonga opa pule imbo tenienoni teko molonge ulu te kanokolio lino Kraistingu imbomanga umbulkondo ungu keri te manda naa nindinge.

<sup>15</sup> Mare oi moloringi mele oi tiye kolkumbulu tiko kuromanga nomi Satan lombili purumele.

<sup>16</sup> Ambo te Kraist paimbo nimbe enge nimbe pimo ambo te yunge pulu lemo ambo mare ambo waima moromelemaaku ambomu yuni eno lipe tapondopanokopili. Kraistingu imbo talapemuniaku ambo waima nokongeindo umbuni te naatepili. Kraistingu imbo talapemuni imbo te naa nokoromo ambo waima kau nokamili ningonoko akulutteangei.

*Kraistingu imbomani enonga tapu iye-manikongono teko kondromelema nokoko kondangei nimu ungumu*

17-18 Gotenga bukuna ungu te nimbe moromo kani aku teko teangei. Aku ungumuni nimbeindo,  
Rais wit mongoma wendo pupili ningokongi kaoma wit unjoma andoko kambulunge kinye eno wit mare naa nangei ningokongi kerema pipi tinge wali manda naa tembaloo kani pipi naa tiengei, (Lo 25:4)

aku tepa ungu te moromo. Ungu te moromola, akumuni nimbeindo,

Kongono teremele imboma melema liengei, nimbe moromola. Akumunga Kraistinga imbo talapemu paa nokoko kondormele tapu iyema Kraustinga imbomani wale pakoko mele awinima tiengei. Gotenga ungumu ningokongi, imboma mane tirimele tapu iyema kiyendo moromele ningokongi teko mele awinima tiengei.

<sup>19</sup> Imbo teni nimbeindo, tapu iye teni i tepa tepekenjimo nimbelo wali naa piliwil! Imbo talo molo yupokoni paimbo aku tepa temo ningokongi kai paimbo aku tepa temo lepamo ningokongi pilinio!

<sup>20</sup> Tapu iye mareni ulu pulu keri mare paimbo tengen lemo we imboma pilko molangei eno mane tiko ningokongi amenge tewi. Aku ningokongi amenge tenio wali we tapu iyema pilkoloo pipili kolko lino aku tepo naa teamolo konopu leangei kani tewi.

### *Timoti yunge tembaloo uluma nokopa kondopili nimu ungumu*

<sup>21</sup> Nani nundo nio ungumu Gote kinyekraist Jisasi kinye Gotenga enselema kinye akumani paimbo nio ningokongi molangei nani nundo enge nimbo nimboindo, nuni tewi nio mele paa aku teko tumbi tiko tewi nio. Imboma nokoko teangei ninindo eno kinye pali tendeku tiko nokani. Imbo mare konopu mondronio imboma molo nunge pulu ltemo imboma kau taku liko nokoko, wema enge ningokongi, aku ulu naa tewi nio.

<sup>22</sup> Nuni iye te liko Gotenga tapu iye te molopili ningokongi yu ki ola noiko kongonona welea naa mondowi. Iyema wamongo kanoko moke tekolio kanoko liwi. Mako tonio iye mareni pele ulu pulu keri teko mongo lenge aki wali naa kape umbuni menio akumunga wamongo kanoko tapu iyema mako towi. Ulu pengama kau teko, Goteni ulu kake telima nimbe karomo uluma tewi.

<sup>23</sup> Nalo tumbi tipo molambo ningokongi imbo no norono mele aki teko kau naa nowi. Nu kuro takiraki topa nunge olona manda naa teremo kani kuro pora nimbe kangi enge nipli ningokongi wain alaye kolte nowi.

<sup>24</sup> Tapu iye mareni ulu pulu keri teremelema neya para ltemo akumunga kotena oi naa pangei kot pimo iyemuni

oi teko kenjirimele mele tumbi tipe pimo. Iye mareni ulu pulu keri lopeke teko teremelema oi tumbi tipe para naa lembalo nalo pele kotena mona lembalo.

<sup>25</sup> Aku tepala, imbo mareni ulu pengama teremelema tumbi tipe mona ltemo mareni teremelema lopeke tepe peremo, nalo altopaka lopeke tepe naa pembalo. Akuma pali mona lembalo.

## 6

### *Kongono we tendeli imbomani enonga nokoli imboma liko awili tinge ungumu*

<sup>1</sup> Kraustinga iyema moromele imbo kendemande kongono we tendeli imbomani enonga kongono nokoli imbo akuma pengama ningokongi enonga unguma tengen tiko, liko awili tiko molangei. Kongono nokoli iyema kinye tawendo moromele imbomani tepo kenjimolo mele kanokolio Gotenga imbimu kinye, Kraist ipuki tipolio teremolo ulumu naa ningokongi kenjengei.

<sup>2</sup> Kendemande imboma enonga kongono nokoli imboma Kraustinga imboma moromele ningokongi eno kape lino kinye angenupili moromolomunga enonga unguma pilipo naa limolo kinye ulure molo ningokongi, enonga unguma umbulu tiko kongono tumbi tiko naa tengen kinye keri. Aku ulu naa teaio! Kongono nokoli imboma linonga angenupilima, enonga unguma pilipo lipo kongono tepo kondomolo kinye eno molko kondonge ningokongi enonga kongono ningema wamongo teko kondangei. I nu mane tiro mele imboma paa aku teko teangei ningokongi enge ningokongi mane tiwi.

### *Kou mone konopu mondormelelunga ungu pulu te*

<sup>3</sup> Linonga Awili Jisasi Kraustinga ungu akumu ungu paimboma kau peremo, kolo toli ungu te naa peremo. Akumu Goteni lino i teko molko kondangei nimbe mane tirimo ungumanga kinye, kano unguma iye teni tiye kolopu ungu te lupe kolo topa mane timo lemo

<sup>4</sup> Yu kalambo naa nimbe yunu pimo mele unguma kau ungu penga paimboma nimbe kano unguma kau konopu mondora na lipe manjili peremo iyemu moro nimbe pimo nalo yu konopu naa peremo, ungu tendekure kape wamba naa pimo. Konopu tiembo nimbe yu ungumanga pulumu imboma kinye keri kuru lipe ungu melenale teremo. Aku tepa teremo ulumani i tepa: Uluma imboma teangei nimo, imbo mareni anjo yando imbi olandopa moromo imboma kanokolio eno kinye konopu keri panjiko, imboma kinye irinale teko, imbomanga ungu umbulkondo nindiko, imbo teni ungu te nimo kinye molo ulu te teremo kinye konopu awini kimbo tiko,

<sup>5</sup> waliwalima konopu tumbi tipe naa peremo imboma kinye irinale teremele. Aku teko teremele iyema ungu paimboma konopuna naa peremo. Enonga konopuni pilkolio, Gotenga kongono tendemolo kinye mele awinima limolo konopu ltemele.

<sup>6</sup> Goteni tirimo uluma manda teremo nimbe konopu kimbo timo lemo paimbo Gotenga kongono tendembalo imbonu aku ulu tembalomunga mele penga awini limbelo.

<sup>7</sup> Lino ama kameni meringi wali melte naa mepo we orumulu kano. Altopo kolomolo wali aku tepo melte mepo naa pumolola.

<sup>8</sup> Wale pakoli kinye langima kape lemo lemo manda moromolo nimolo.

<sup>9</sup> Imbo mareni mele pulumu noipo imbo kamakomu molamili konopu lekolio kano teli melema lingei teremelemunga kuro-manga nomi Sataneni eno kondi topa tepa kenjimbelo. Aku iyemuni konopu aku tepa ltemelemu enonga konopuna melu mele litemo. Mele pulumu konopu liko mundukolio eno keke lepo toko molko kenjiko kombu kerina kamukumu punge.

<sup>10</sup> Kou mone konopu mondoli ulu akumu ulu pulu keri awini wendo oromomunga pulumu. Imbo mareni kou mone liembo ningo konopu paa awini liko mundukolio Kraist ipuki tirimeleme tiye kolkolio konopuna tukundo mindili awili nongo momomele.

#### *Poloni Timoti yu tepe molombalo ulumu mane tirimu ungumu*

<sup>11</sup> Nalo, nu Gotenga iyemu kani ulu pulu kerima tiye kolko kowa pungolio ulu penga ima kau konopu kimbo tiko teko molani: Ulu tumbi nilima kinye, Gotenga ulu tukumemu kinye, ipuki tili ulumu kinye, imboma konopu mondoli ulumu kinye, ulu pengama teni enge ningo angilko umbuni meko tiye naa kololi ulumu kinye, taka liko mololi ulumu kinye, aku tepe uluma kau tepo molambo ningo molowi.

<sup>12</sup> Imbo te mele pengamu limbeindo imboma kinye peya keri kuru liko lkirimele kinye paa enge nimbe lkipe tiye naa koromo mele Kraistingu iye paimbo ningon enge ningo pilino iyemu moronomunga paaaku teko mele pengamu liembo ningokeri kuru paa liko enge ningo lkiwi! Nu koinjo molopa kondopa kau puli ulu pulumu paa lipo ambolambo ningon enge ningolikido tiye naa kolko molani. Koinjo molopa kondopa kau puli ulu pulu nio kanomu imbo awini pilko molangei nuni paimbo ningon enge ningon pilerinu mele ningon para tirinu kinye Goteni koinjo molopa kondopa kau puli ulu pulum

tiemboi lieni nimbe nu oi alako torumu kanomundo nio.

<sup>13</sup> Goteni melema pali koinjo pupili nimo iyemu kinye, Jisasi Kraistini Pontius Pailatenga kumbekerena angilipe yunge ungu pulu paimbomu pipili naa kolopa tumbi tipe nimbe para tirimu iyemu kinye, pilko kanoko molangili i kongonomu naa paa tenio mele nimbo tipolio nimboindo,

<sup>14</sup> nu Gotenga kongono tendani nimbo nu mako torumulu mele pilko Gotenga ungumu nokoko kondoko molowi! Aku ungumu imbonani kanoko keri naa kanangei. Nani ulu te tembo kanoko keri naala kanangei ningo kalaro mololi uluma kinye ulu kerima kinye naa teko Gotenga kongonomu kau teko kondoko molani. Linonga Awili Jisasi Kraist mona yando ombalo konopu leko nu aku uluma tiye naa kolko teko kau molani.

#### *Poloni Gote kapi nimu ungumu*

<sup>15</sup> Jisas yando ombalo waimu Goteni oi mako torumu aku walimunga puwi nimbelo kinye mona yando ombalo. Gote yu molopa kondoli ulu pulumu peremo iyemu. Lino nokoromele imbonanga engema mandopa, yuni lino nokoromo engemu olandopa. Iye nomi kingimanga pali yu iye nomi king awili olandopamu. Imbo awilimanga yu iye awili olandopamu.

<sup>16</sup> Kololi ulu pulumunga yu kau manda naa kolombalo, waliwalima molopa kau purumo. Yu moromona pa enge nimbe teremomunga lino akuna manda tukundo naa pumolo. Oi imbo teni yu naa kanorumu. Kinye imbo teni yu manda naa kanombalo. Gote yunge imbi olandopa moromomu kinye yunge engemu kape waliwalima pepa kau pupili. I paa.

#### *Poloni imbo kamakomando Gote kau ipuki tiko, imboma kou mone tiko tapao nimu ungumu*

<sup>17</sup> Ya maina mele awini noirimele imbo kamakomando i teko mane tieni: Aku melema keri lembalo kani kalambo naa ningon, mele awini noirimomunga manda molamolo naa nengei. Lino konopu tipo molamili nimbe mele penga awini tirimo timbelo Gote paimbo lino nokopa kondombalo ningon enge ningon pilko nokoko molangei niwi.

<sup>18</sup> Aku imbo kamakomando i teko mane tieni: Imboma tapoko, ulu penga awini teko, mele noirimele melema konopu kimbo tiko naa molko, imbo mele molo lemabaloma mare toya toko moke teko tiengei niwi.

<sup>19</sup> Aku tengenye eno altoko manda molange ulumunga mele enge awinima noingeaku wali paa molko kau punge ulu pulu paimbomu liko ambolonge.

*Timotini yunge kongonomu wamba  
nokopili ungumu*

<sup>20</sup> Timoti, Goteni nu kongono tirimumu wamongo nokoko kondowi. Mai kombumunga ungu wema, imbomani Gote naa liko manjikolio nimele unguma kinye, kolo toli ungumani Gotenga ungumu beambo timbei teremo unguma kinye, naa pilko, umbulu tiwi. Aku ungumando kolo toko enonga lipa manjili peremomani nimbo trimolo nimele.

<sup>21</sup> Aku unguma imbo mareni paimbo unguma ninga enge ninga pileringimunga Gotenga ungu tukumemu oi enge ninga ipuki tiringi mele tiye kolko aulke tune tane ningi kani nu kano unguma umbulu tiko naa piliwi! Goteni eno kinye konopu noipe molopili molangei. Aku peya nio.

## Poloni iye Timoti Pipia Talo Tipe Topa Tirimu Ungumu 2 Timoti I Ungu Torumumunga Ungu Pulu Mare

Ka ulkena pepalie Poloni i pipiamu topa panjirimu. Yu toko kondonge ulu lipe manjipelie Kraistingu imbona molko kondangei konopu lerimu. Timotini Gotenga ungu tukumemu nimbe kondopili nimbe tepa enge tipe ungu mane tipelie Poloni nimu.

Goteni nu kongono tirimumu kamukumu teko pora tikolio konopu ame toli molani nipili!

*Poloni Timotindo enge pepili molopa, Gotenga kongonomu tendembai tiye naa kolopa ungu tukumemu pipili naa kolopa molopili nimu ungumu*

<sup>1</sup> Na Pol, Goteni na kanopa ltimuna Kraist Jisasini nanga kongonomu tendepuwi nimbe lipe mundurumu iyemu moro. Kraist Jisasini kinye peya kopu teko moromele imbona koinjo molko kondoko kau punge ungu andopa imbona nimbo timbo nimbe Goteni na kanopa ltimu.

<sup>2</sup> Timoti nu nanga malo konopu mondoromu i pipiamu topo tiro.

Lapa Gote kinye linonga Awilimunga Kraist Jisasini taloni nu we kondo kolko teko kondoko, nuni ulu mare teko kenjinio kinye nu kondo kolko mindili nani naa ningi, nu konopu ame topili taku liko molani nengili.

*Ungu tukume nimelemunga pipili naa kolamili*

<sup>3</sup> Nanga ara kaeue kameni Gotenga ungu manema pilko liko teringi mele na aku tepo ulu teroma konopu pilipolio te tepo kenjiro nimbo naa lipo manjiro. Tero mele Goteni kanopa penga pimo nimbo lipo manjiro. Aku kongono tendepo Gote kinye ipu leli tangoli kape ungu nimbo konge tepo molopo, nuni teko morono ulu pilipo nunge konge tendepolio, Gote kinye paa tereno nio.

<sup>4</sup> Nu oi kola terinu mele lipo manjipolio nu kanopoliope na tono kolombo konopu leto.

<sup>5</sup> Nu morono mele pilipolio, nu Gotenga ungumu paimbo ningi enge ningi ipuki tirino mele alto pi. Enge ningi pino mele kolo te naa torono nimbo lipo manjiro. Nu enge ningi ipuki tirino mele bamu Lois kinye aminye Yunis talo oi teringili mele. Elo ipuki tiringili mele nu aku teko pino nimbo pi.

<sup>6</sup> Nu aku teko pilko morono mele pilipolio, nani nu ki ola noiru kinye Goteni

nu enge te we tirimu akumu imbonani tipe enge nili awili tepe nopili ningi popo toromele mele nu aku teko Goteni enge tirimumu paa enge tipili ningi aku engemuni nu waliwalima enge ningi kongono teani nimbo nio.

<sup>7</sup> Goteni Mini Kake Telimu tipelie lino pipili kololi ulumu naa tirimu. Enge nili ulumu kinye, konopu mondoli ulumu kinye, lino linongano nokopo kondomolo ulumu tirimu.

<sup>8</sup> Akumunga linonga Awilimunga ungumu imbona ningi tinindo aku tembo kinye na mindili tiko tongenje ningi pipili naa kolowi. Na yunge kongono tenderomunga ka ulkena pero akumu nu aku teko ka tingenje ningi pipili naa kolowi. Na ungu tukumemu nimbo timbo kinye Pol mindili tirimele mindili noromo mele na aku tepo mindili tinge mindili nondu lemo ulure molo ningi kongono tewi. Altoko paimbo mindili tinge mindili nonio lemo Goteni nu enge tirimomuni nu enge ningi molonio.

<sup>9</sup> Enge nimbo molamili nimbe enge tirimo Gote akumu lino lipe tapondopa mindili nolemala aulkena wendo lipe yu kinye peya molopo kondomolo aulkena lipe mondopa, lino kanopa lipe Yunge imbo kake telima molangei waio nimu Gote. Lino aku tepe lipe tapondopa kanopa ltimumu linoni linongano ulu te terimulumunga kanopalie aku tepe naa terimu. Yuni yunu lino temolo mele pilipe kanopa lipe lino we kondo kolopalie lino waio nimbe lipe tapondorumu. Paa koro oi yunu molopalie yuni Kraist Jisasini linonga nimbe tendembalumunga lino we kondo kolopo lipe tapondombo nimu,

<sup>10</sup> nalo kinye, linonga Tepa Lipe Mindili Nolemala Aulkena Wendo Lili Iye Kraist Jisasini maina ombo linonga nimbe tenderimungu Goteni lino we kondo koromo mele mona wendo orumu. Kraist Jisasini kololi ulumu kamukumu topa mainye mundupe, yunge ungu pengamu paimbo ningi enge ningi ipuki tirimele ulumuni altopo naa kolomolo ulumu kinye koinjo molopa kau puli ulu pulumu talo limolo aulkemu wendo ombo mona lerimu.

<sup>11</sup> Aku ungu tukumemunga Goteni na Pol kanopa lipelie, i ungu tukumemunga andoko ningi tiko, Kraistini lipe mundurumu iye te molko, yunge ungumu imbona mane tinio iyemu molani nimu.

<sup>12</sup> Na aku tepo kongono teromunga na mindili tirimelena mindili noro. Nalo na paimbo nimbo enge nimbo pio iyemu tepe moromo mele pilipolio, na ungu tukumemunga paimbo nimbo enge nimbo ipuki tiro ulumu kinye, yunge kongono tirimuna teromu kinye, yuni wamba nokombalo-

munga keri naa lepa we lepa kau pupili mulu mai talo pora nimbelo waimu wendo ombalomunga lipo manjipolio na mai kolopo konopu umbuni pepili naa moro.

<sup>13</sup> Kraist Jisasini nu tapondombalo kinye nuni yu paimbo ningi ipuki tirino mele enge ningi pilko, Jisasi kinye imboma kinye konopu mondokolio na ni unguma nu nimbo tipo, mane tipo, niuna pilerinu mele wamongo pilkolio aku teko kau imboma mane tieni.

<sup>14</sup> Ungu tukumemu Goteni nunge kindo noindirimomu nokoko kondowi. Linonga konopuna Mini Kake Teli moromomuni nu enge timbelomuni aku kongonomu wamongo nokoko kondowi.

<sup>15</sup> Esia provins nu morono kombuna mromele Kraistingu imboma pali na tiye koloringi mele nu pino. Aku imbomanga Figelus kinye Hermogenes taloni na tiye koloringilila.

<sup>16</sup> Iye Onesiforus na ka ulkena Peru kinye pilipi naa kolopa, na konopu wango nipili molambo nimbe wali awini tapondorumumba Awilimuni Yu kinye yunge imboma kinye kondo kolopa lipe tapondopili.

<sup>17</sup> Yu kombu awili Rom ombalie na kropa altopa na moloruna omba kanopa lenderimu.

<sup>18</sup> Gotenga kot waimu wendo ombalo kinye Awilimuni yu kondo kolopa teba kondopili. Na kombu awili Efesus moloru kinye kape yuni na wali awini tapondorumu mele nu pino.

## 2

*Poloni Timotindo nu Kraist Jisasinga opa teli ami iye enge nili molani nimu ungumu*

<sup>1</sup> Nanga ungelumu, Goteni nu kongono tirimu akumu wamongo nokani nio akumunga, Kraist Jisasinga we kondo kololi ulumuni nu teba enge tipili.

<sup>2</sup> Aku tekolio imbo awini pilko molangei nani ungu nimbo tiruna nu pilerinu kano unguma Kraistingu ungu nokoko kondomele iyema, imboma manda mane tiko kondonge iye mare ningi tiwi.

<sup>3</sup> Kraist Jisasinga opa teli ami iye pengamu moro ningi na mindili noro mele mindili nombomunga ulure molo ningi enge ningi molowi.

<sup>4</sup>Iye te opa teli ami iye te molopalie, yu we kongono lupe lupema konopuni naa pilipe, yunge opa teli iye awilimuni yu teremo mele kanopa penga kanopili nimbe aku kongonomu kau enge nimbe pilipe teremo.

<sup>5</sup> Aku tepala, imbo te imbo mare kinye peya keri kuru liko aulke lkirimomu mele keri kuru liko lkieli ungu manema pilipelie lkrimo. Ungu manema

naa pilipelie lkrimo lemo yu keri kuru lipe lkirimomunga mele te naa limbelo.

<sup>6</sup> Aku tepala, imbo teni poiney mindili nomba teba nokopa kondoromo imbonuni kumbe lepa langi awini pengama paa limbelo.

<sup>7</sup> Ya nundo nio ungumunga puluma Awilimuni nu lipe ondombalo kani nio mele paa wamongo pilko molowi.

<sup>8</sup> Jisasi, Goteni kanopa ltimu Iye Nomi Kraist, yu iye nomi king Devitini kalopa ltimu iyemu, kolopalie makilipe ola molorumu ungu tukumemu nimbo tiro, aku iyemu moromo mele konopu kimbo tiko molowi.

<sup>9</sup> Kano ungu tukumemu nani nimbo tilipo andoromunga imbonani na iye kerimu ningi na umbuni awini tiko ka tirimele mindili noro nalo Gotenga ungumu ka manda naa tirimele.

<sup>10</sup> Akumunga, Goteni nanga imboma molangei nimbe kanopa ltimu imboma kape Kraist Jisasi paimbo ningi ipuki tiko yu peya kopu teko mromelemunga altoko mindili nolemala aulkena wendo lipe yu kinye peya molko kondonge aulkena lipe mondopili nimbo na waliwalima enonga nimbo mindili awini noromu, ulure molo nimbo mindili nombomo moro.

<sup>11</sup> Ungu te, ipuki tiemili nimbo nimbo tiemboi:

Kraist kinye peya kolomolo lemo yu koinjo molombalo mele lino yu kinye peya koinjo molomolo.

<sup>12</sup> Lino mindili nomolo wali enge nimbo molopo tiye naa kolomolo lemo lino yu kinye peya iye nomi kingima

molopo melema nokomolo.

Linoni imbonando Jisasi yu kanopo imbi naa tirimolo,

Yunge imboma naa moromolo nimolo lemo Yuni Lapando imbo ima na kanopo imbi naa tiro,

eno nanga imbomare molo nimbela.

<sup>13</sup> Yuni yunge unguma alowa naa teremomunga lino oi Yu

paimbo, Yunge ungumu paimbo nimbolio pele konopu alowa tepo Yu paimbo molo, Yunge ungumu paimbo molo nimolo lemo yuni nimo mele paimbo wendo oromo mele ombalo,

ungu akuma nimbe moromo mele paimbo.

*Poloni Timotindo nu Goteni kanopa penga pilimbelo kongono tendeli iyemu molani nimu ungumu*

<sup>14</sup> Aku unguma imboma waliwalima pilko molangei ningi waliwalima ningi tiwi. Gote pilko molowi ningi yu waliko pilkolio imbonando i teko neni. Eno naa lipe tapondopa, opa karaye tengen

ungumuni pilko molonge imboma paimbo ning enge ning ipuki tirimele ulu beambu tirimo ungu lupe lupema opa karaye naa teko molangei niwi.

<sup>15</sup> Aku wali Goteni na kanopa penga pilimbelo mele molambo, Yunge kumbekerena pipili naa kolopo molambo ning yu kanopa penga pilimbelo kongonoma kau enge ning teko molko, aku ungu paimbomanga puluma wamongo pilko tumbi tiko mane tinio iyemu molowi.

<sup>16</sup> Maina we ungu lupe lupe nimelema, Goteni pilipe keri pimo unguma, naa pilko umbulu tiwi. Aku unguma pilkolio teremele imboma Gotenga unguma umbulu tiko yu kanopa keri pimo uluma teremele mele altoko aku tekola olandopa teko mololiko punge kani paa komu naa tendeko molowi.

<sup>17</sup> Kano mane tirimele unguma lupe keri teremo mele teremo. Lupe kelo mele tepalie pele kamukumu awili lepa kangi awini nomba kangi pali kamukumu topa kondoromo mele aku mane tirimele unguma anjo anjo pumbe imboma molko kenjengei nimo. Aku ungu mane tirimele iyemanga iye talo Himeneus kinye Filetus talo morombele.

<sup>18</sup> Aku iye taloni ungu paimboma tiye kolko loi itembele. Eloni ningilindo, lino oi makilipo ola molorumulumunga pele kangi pali makilipo ola naa molomolo nimbele ungumuni imbo marenge ipuki tirimele ulu teko embambo tirimbelemunga enonga paimbo ning ipuki tirimele ulumu mainye purumo.

<sup>19</sup> Paimbo nalo ulke timu te iye enge nili teni poromo kinye we enge nimbe angimo mele, Gote paimbo ning enge ning pimelemunga ungu pulumu enge pepa, pora naa nimo. Aku ulke timu melemunga ola imbi te moromo, akumu i tipe: "Awilimu yunge imboma kanopa imbi tirimo," nimbe molopa, "Imbo marenai Awilimu yu nanga Gote nimele imbomani ulu kerima pali tiye kolangei," nimbe moromola.

<sup>20</sup> Ulke awili tengga mingi kou goloni telima kinye kou silvani telima kinye lepa, mingi unjoni telima kinye maini telima kinye itemola. Marenai kongono pengama teko, kongono lupe lupema teremele.

<sup>21</sup> Imbo teni ulu kerima tiye kolomo lemo yu Gotenga mingi kau molopa, yunge mingi kake teli paa penga te molopalie, yuni kongono pengama manda tembaindo molombalomunga yunge nokoli iyemuni yu mingi paa pengamu mele kongono pengama manda timbelo.

<sup>22</sup> Paimbo, nu iye kokolemu nalo iye wenepomani aie konopu itemele ulu pulu kerimaaku tepo paa naa teambo ning

mune mondoko liko umbulu tiko kowa pungholio ulu pengama kau konopu kimbo tiko teko molani. Ulu tumbi nilima kinye, enge ning pileli uluma kinye, konopu mondoli uluma kinye, imboma kinye taka liko mololi uluma kinye, aku uluma kau paa tepo molambo ning konopu kimbo tiko molani. Imbo mare molko kondoko paa Awilimunga imboma kau moromele imboma kinye aku teko uluma teko molowi.

<sup>23</sup> Konopu naa peremo iyemani keke lepo toko nendo yando opa karaye teamili nimele iyemanga unguma paa naa pilimbo ning umbulu tiwi. Ungu kanoma pilko nimele imboma kinye, ungu kanoma ning tirimele imboma kinye, ungu kanomani irinale teko opa karaye teangei nimbe peremo mele nu pino.

<sup>24</sup> Awilimunga kongono tendeli kendemande imbonuni mumindili kolopa ungu karaye teamili nimbelo kinye manda naa tembaloo. Yuni i ulu tipeili: Yu imbona kondo kolopa lipe tapondopa, unguma tumbi tipe mane timbelo enge peli iyemu molopa, imbomani yu kinye mumindili kolko teko kenjingi kinye pundu naa topa tiye kolopa,

<sup>25</sup> yu uluma tega ungu nimbe tirimo mele kanoko keri pilko yu toko mainye mundungei tengenje imboma teko kenjirimele mele nimbe para timbeindo taka lipe mane tipili. Yuni aku tembaloo kinye Goteni kano imbona tapondopa, konopu topele toko teremele ulu liko manjiko keri pilko tiye kolko ungu tukumemu ipuki tinge.

<sup>26</sup> Aku wali enonga imbo konopu altopa pepa lipe manjili pembaldo wali oi kuromanga nomi Sataneni yunge imboma molko yunge kongonoma tendangei nimbe moko topa karerimu akuna tiye kolko wendo pungo konopu penga pepili manda molonge.

### 3

*Mulu mai talo pora nimbei tembaloo waimanga imbomani ulu pulu keri awini tinge ungumu*

<sup>1</sup> Nalo i ungu paa liko manjeni nimbo nimboi: Waima pora nimbei tembaloo kinye ulu paa umbuni awini wendo ombalo.

<sup>2</sup> Aku walimanga imbomani kou mone kinye eno enongan kau konopu mondoko, enonga imboma kapi ning eno none teko, we imbona marake teko iri toko, anupili lapalinga unguma pilko naa liko, ulu pengamanga paa tereno naa ning, Gotenga ulu kake telima pilipo teamili naa ning,

<sup>3</sup> imbona kinye kondo naa kolko, imbomani eno teko kenjingi kinye tiye naa kolko, ungu umbulkondo nindiko enonga kangi nokoko naa kondokolio, aie konopu

Itemele uluma teko, imbo konopu naa pepili konopuni ulu kerima kau pilko teko, opa pule toko imboma teko beambo tirimele, ulu pengama kinye opa pule toko,

<sup>4</sup> enoni enonga angenupili imboma molko kenjengei ninggo opa pulemanga kindo tiko, ulu mare tingeindo i ulumu tembo kinye tepo kenjimbonje molo i ulumu tembo kinye imbo te umbuni timbonje ninggo naa pilko tumbi tiko we teko, eno enonganano konopuni pilkolio lino iye imbi ola moromo imboma ninggo pilko enonga kangindo konopu tinge uluma konopu mondoko Goteni nimo mele pilko tingeindo konopu naa mondoko,

<sup>5</sup> Gotenga uluma kangimuni kau tengen, konopuna tukundo Gotenga engemuni lino lipe naa tapondopili lino linonganano manda teremolo ninggo aku teko teremele. Aku ulu teko moromele iyema kinye tendekuna kongono teko naa molko enonga unguma naa pilko umbulu tiwi.

<sup>6-7</sup> Aku iyemanga mareni ambo mare linonga unguma pilengae kondi tamili ninggo pungo mane tingeindo imbmanga ulke marenega taka liko tukundo pungolio, aku ulkemanga moromele ambo mare Gotenga unguma wamongo naa pilko, konopuni pilkolio ulu pulu kerima tepo ambo kerima moromolo ninggo pilko, enonga konopu wamba naa peremo kinye ulu lupe lupema tingeindo konopu tiko tono kolko, iyemani pali mane tirimele unguma waliwalima komuni pimele nalo ungu tukumemu kau wamongo naa pilko limele ambo akuma kondi tonge kinye aku amboma enonga ungu kolo tolima pilko linge.

<sup>8</sup> Oi iye Janes kinye Jambres taloni Mosesinga ungu nimoma kolo toromo, Isip iye nomi kingimu naa pilipili ninggo Mosesinga unguma kinye opa pule moloringili mele teko kenjirimele iye kinye, niomani kape aku teko imboma ungu paimboma naa pilengae ninggo eno ungu paimboma kinye opa pule moromele. Eno konopu paa kerima pepili molkolio konopuni kolo toli unguma kau pilko, ungu paimboma mane tinge ulu pulu te naa pepili moromele.

<sup>9</sup> Nalo ungu paimboma kinye opa pule toromele iyemani tinge ulu imbomanai pali kanokolio,aku iyema keke lepo toko tinge mele tumbi tiko kanongemunga eno teko kenjirimele mele enge awili tepa olandopa naa pumbelo. Oi iye Janes kinye Jambres taloni teringili mele enge naa perimu mele aku ulu tembalo.

*Poloni Timotindo nu Gotenga ungumu enge ninggo ambolowi nimu ungumu*

<sup>10</sup> Nalo nu na ulu lupe lupe pengama tero mele pilko morono. Nani imbo ungu mane tiru ulu kinye, tepo moloru uluma kinye, na ulu terumanga pulumu kinye, Kraist paimbo nimbo enge nimbo ipuki tiru ulu kinye, imboma kinye mumindili naa kolopo kandiki tepo taka lipo moloru uluma kinye, imboma konopu mondoru uluma kinye, imbomanai na teko kenjiko mindili tiringi kinye kongonoma tiye naa kolopo enge nimbo teru uluma kinye, nu pino.

<sup>11</sup> Na kombu Antiok kinye Aikoniam kinye Listra kinye aku taunomanga andopo Gotenga kongonomu tendepo moloru kinye na teko kenjiko mindili tiko umbuni awini tiringi meru mele nu pino. Aku teko umbuni keri awini tiringi paa mindili noru kanomu. Nalo Awilimuni na lipe tapondorumuna kinye manda moro.

<sup>12</sup> Unku te paimbo peremo akumu i tepa, Kraist Jisasi kinye peya tapu toko molkolio Goteni kanopa penga pimo uluma kau tepo molamili ninggo aku teko molonge imboma bali we imbomanai teko kenjiko mindili tinge.

<sup>13</sup> Nalo teko kenjiko, kolo toko ungu paimboma nimolo ninggo mane tinge iyema olan-dopa olandopa teko kenjiko molko kenjinge. Enoni imboma anjo kolo koto mane tinge kinye Sataneni eno kondi tombalola, aku wali eno enonganano aku ungu koloma ungu paimboma ninggo pilingela.

<sup>14</sup> Nalo Timoti nu ungu paimboma pilko likolio akumu paa paimbo ninggo enge ninggo pilerinu unguma Kraistinga imbo pengamani nu aku unguma mane tiringi kani pilkolio aku unguma ungu paimboma ninggo pilko enge ninggo ambolko pilko kondoko molowi.

<sup>15</sup> Gotenga bukuna ungu moromomani Kraist Jisasi paimbo ninggo ipuki tirimele imboma Goteni lipe tapondopa mindili nolemala aulkena wendo lipe yu kinye molko kondonge aulkena lipe mondoromo mele nimbe tirimo unguma nu ungulu paa kelomu molkolio pulu polko pilerinu kani paimbo ninggo ipuki tirino mele kamukumu wamongo pilko kondowi.

<sup>16</sup> Gotenga bukuna moromo unguma pali Gotenga Minimuni nimbe tirimuna pilkolio toringi. Aku ungu mani imboma lipe tapondoromo mele i tepa, Aku ungu mani lino Gotenga imboma molamili mele mane tipe, ulu pulu keri teremoloma naa teamili nimbe mane tipe, ulu pulu kerima tiye kolopo molopo kondomolo mele mane tipe, Goteni teko molaio nimbe, ulu tumbi nilima nimbe karomo uluma temolo mele mane tirono.

<sup>17</sup> Gotenga kongono tenderemolo imboma yunge kongonoma tendemolomanga lipe manjilima pepili kongono pengama

tumbi tipo tepo kondomolomunga enge nilima lino kinye pepili nimbe lino aku tepa mane tirimo.

## 4

*Poloni Timotindo nu Gotenga unguma imboma paa ningtiwi nimu ungumu*

<sup>1</sup> Gote kinye Kraist Jisasi taloni imbo koinjoma kinye kololima kinye enonga kot pilinge iye talo kanoko molangili Kraist Jisasi ombo mona molopa iye nomi king molopa melema nokombalomunga nani nundo i tepo enge nimbo nio.

<sup>2</sup> Kraistinguunguma imboma ningtiwi. Ningtinio kinye imboma ungu pilinge lemo kape molo naa pilinge lemo kape waliwalima unguma ningtiwi tiko tiye naa kolko, enonga ulu teremelema tepo kenjirimolo ningtiwi pilko konopu topele tangei ningtiwi mane tiko, ulu pulu keri teremelema naa teangei iri toko mane tiko, eno Goteni kanopa penga pimo uluma teko konopu enge pepili molangei ningtiwi mane tiwi. Eno mane tinindo waliwalima kandiki teko taka liko penga teko mane tiwi.

<sup>3</sup> Piliwi! Imboma ungu paimboma naa pimolo ningtiwi umbulu tiko komu pipi tikolio, eno ungu konopu tiko pilinge unguma mane tinge iye awini mako tonge waimu pele wendo ombalo kani ungu paimboma tiye naa kolko mane tiko kondowi.

<sup>4</sup> Eno ungu tukumemu umbulu tiko, kolo toko kange temane lupe lupe tongema kau komu tendeko pilko molonge.

<sup>5</sup> Nalo nu, waliwalima imbo konopu pepili unguma wamongo moke teko kondoko pilkolio, mindili te nonio molo umbuni te nu kinye wendo omo lemo aku umbunima we meko, imboma ungu tukumemu paa pilko liko konopu topele tangei ningtiwi tilko andoko, Goteni nu nanga kongono iyemu molani nimbe kongono tirimuma pali teko kondowi.

*Poloni yu nondopo kolomboi nimu ungumu*

<sup>6</sup> Na nondopo wendo ombalo ulu pilipolio nuaku teko teani nio. Na, Gote popo toko no wain ondoko munduko yu tiringi mele, kinye nanga mememuni imbomareni na toko kondoko ondonge. Na mai kombumu tiye kolopo pumbo waimu nondopo wendo ombai teremo.

<sup>7</sup> Mele pengama liembo nimbo na enge nimbo keri kuru lipo lkiru. Lkiko pangei ningtiwi toringina kamukumu pumbo pora tiro. Kraistinguunguma tiye naa kolopo enge nimbo pilipo lkiru.

<sup>8</sup> Aku tepo molorumunga kinye, ulu tendekumu kau we peremo. Owena kamukumu oromunga na mele pengamu noipe moromo, aku mele pengamu

Awilimu, kotumbi tipe pimo iyemuni nando nu iye tumbi nilimu nimbeline timbelo. Na kau molola. Yuni imbomanga kot pilipe moke tembalowaliwunga na kinye yu ombalo mele paa kanamboa ningonokoko moromele imboma kinye peyaaku mele pengamu timbelo.

*Poloni Timotindo ungu kopunge mare nimu ungumu*

<sup>9-11</sup> Demasini na tiye kolopapurumu iyemu yu maina uluma olandopa konopu mondopalie ulke kombu Tesalonika kando purumu. Iye Kresens kombu Galesia provins pumbe, Taitus kombu Dalmesia distrik purumu. Luk kau ya na kinye peya morombolo kani nu aulke te paa korokolio na morona welea nondoko owi. Makoni na kongono manda lipe tapondopa tembalokani yu opili liko meko peya walio.

<sup>12</sup> Andi ulke kombu Efesus akuna Tikikus puwi nimbo lipo munduru.

<sup>13</sup> Onio kinye aulkrena ongo ulke kombu Troas ongolio, ali wale pakoli kinye buk mare kinye kongimanga kangini teli bukuma kape, Karpusinga ulkenanoiru itemo akuma liko meko owi. Kongimanga kangini teli buk paa penga, kou awili tepa pulima naa komu tindiko paa liko meko owi.

*Pol molopa kenjirimu kinye Goteni yu lipe tapondopa engema tirimu ungumu*

<sup>14</sup> Aleksander, kou kapani melema tepa wamoromo iyemu, yuni na paa tepa kenjirimu. Yuni na kinye tepa kenjirimunga Awilimuni yu pundi tombalo.

<sup>15</sup> Yuni linonga ungu nimoloma paa konopu naa mondopa aku unguma kinye opa pule molopa mainye pupili nimu kani nuaku tepa tepa kenjimbelo kani yu kanoko kondoko molowi!

<sup>16</sup> Nanga kotemu pulu polko pileringi wali imbo teni na kot teru mele naa tapondorum. Palini na tiye koloringi. Goteni aku iyemani teko kenjiringimunga pundi naa topa tiye kolopili aku tepo konge tero.

<sup>17</sup> Iyema na tiye koloringi nalo Awilimu na kinye tapu topa kotena angilipe na engemu tirimumunga kot kombuna Juda imbo naa molko imbo lupema moloringi imboma na ungu tukumemu nimbo tiru kinye manda pileringi. Na kotena enge naa tilkanje laionomani na toko nangei nilimala nalo Awilimuni na naa kolombo nimbe lipe tapondorum.

<sup>18</sup> Yu mindili nopili, tepo kenjimili ningewaliwanga pali Awilimuni na lipe tapondopa wendo lipelie nimbei, yu iye nomi kingimu molopa nokoromo mulu kombuna na manda ombalo kani oi maina molopakondopili nimbelo. Waliwalima yu kapi

nimbo imbi lipo pala tondolipo kau pamili.  
I paa.

*Pipiamu topa pora timbeindo Poloni ka-  
mukumu nimu unguma*

<sup>19</sup> Ambo Prisila kinye yunge omenu Ak-wila talo kinye, Onesiforus yunge imboma kinye, Poloni eno molko kondaio nimu nindiwi.

<sup>20</sup> Iye Erastus ulke kombu Korin we moromo. Trofimus kuro torumuna ulke kombu Miletus molopili tiye kolopo oru.

<sup>21</sup> Kombu ali teremo walima oi wendo naa opili na morona wambo ningو aulke te enge ningو korokolio owi. Yubulus kinye Pudens kinye Linus kinye ambo Klodia kinye linonga angenupilima Kraistinga im-bomani pali nu molko kondowi nimele.

<sup>22</sup> Awilimu nunge minimu kinye molopili molani. Yuni eno kinye konopu noipe molopili molangei. I peya nio.

## Poloni Iye Taitus Pipia Topa Tirimu Ungumu Taitus Poloni I Pipia Topa Tirimumunga Ungu Pulu Mare

Taitusini Pol kinye tapu topa kongono tepa andoramu. Krit kombuna molorumu wali, Poloni i pipiamu yundo tipe mundupelie Kraustinga imboma molko kondonge mele mane tirimu. Ungu kolo toko mane tilima kane kane molowi nimu. Imbomani Taitus kinye karaye teko umbulu tiringi wali Taitusini tembalu mele kape Poloni mane tipelie i pipiamu topa panjirimu.

Goteni imboma nu kinye konopu keri parajinge wali Jisas eno yando lipili ningotapoko tumbi ningotolani nimbeline enge tipili.

*Poloni i pipiamu tombaindo pulu polopa torumu unguma*

<sup>1</sup> Na Pol, Gotenga kongono tendeli kendemande iyemu. Na Jisas Kraistini nanga kongonomu tendepuwi nimbe lipo mundurumu iyemu. Yuni na lipo mundupelie, Goteni nanga imboma molangei nimbe kanopa ltimu imboma paimbo ningotengen pimele mele olan-dopa enge ningotoliko, ungu tukumemuni imboma Goteni kanopa penga pimo uluma pilko takliko tengen mele lipo ondoromo ungumu pilko kondangei liko tapopuwi nimbe na lipo mundurumu.

<sup>2</sup> Goteni walwalima koinjo molko kondoko kau punge ulu timbeloru nokoko molangei ningotoliko tapondani nimu. Aku ulumu walite kape kolo paa naa toromo Gote akumuni paa koro oi yunu molopalie lino koinjo molopo kondopo kau pumolo ulumu timbo nimbe, nimbe panjirimu ulumu. Yuni tembo nimo mele paimbo teremo iyemu.

<sup>3</sup> Pele, yunu wai panjipe imbomani ungumu pilengei wendo opili nimu walimu wendo orumu kinye na kanopa lipo yunge ungumu andoko ningotindiwi nimu. Aku nimu Gote, linonga Tepa Lili Iyemu. Yuni na ungu kanomu ningotoloko tiwi nimuna na ungu kanomu nimbo tilipo andoro.

<sup>4</sup> Taitus, nu kinye ilto Kraustinga iye talo morombolo. Nu Kraustinga iyemu molko kondani nimbo nani nu nokoromunga nu nanga kandi malomu morono, nani i pipiamu topo nu tiro. Lapa Gote kinye, linonga Tepa Lili Iye Kraist Jisas kinye, eloni nu

kinye konopu noiko, nu konopu ame topili taka liko molani nengili.

*Taitusini Kraustinga imboma nokoko kondonge iye penga mare mako topili nimu ungumu*

<sup>5</sup> Nu kinye peya kombu Kritina kongono terimulumu nuni teko pora tieni. Oi nani nu tewi niu mele nuni aku teko taunomanga pali andoko Kraustinga imbo talapema nokangei ningotoliko iye mare mako towi nimbo akuna molani niu.

<sup>6</sup> Tapu iyema mako tonindo eno uluma teko molonge mele kanokolio mako towi. Aku iyema imbomani kanoko keri pilinge ulu te eno kinye naa peli iyema molonge. Eno ambo tendekumu kau lili iyema molonge. Enonga bakuluma Kraist paimbo ningotipuki tiko, imbomani i bakuluma ulu kerima teko eno none teremele naa ningot, enonga anupili lapalinga unguma tui naa tingi. Aku teli iyema kau tapu iyema molangei mako towi.

<sup>7</sup> Kraustinga imbo talapemanga tapu iyemani Gotenga kongonomu nokoromele kani imbomani kanoko keri pilinge ulu te eno kinye naa peli iyema molangei. Iye awili none teremele iyema imboma enge ningotokoko, nondoko mumindili kolko, no enge nili namboi ningot, imboma kinye opa teko, kou mone kinye melema kumo mekoaku kongonomunga kou awini limolo ningot, aku teko molko kenjingei iyema tapu iyema naa molangei ningot mako naa towi.

<sup>8</sup> Imbo ponenge oromelema nokoko kondoko, ulu pengama kau teneindo konopu tiko teko, we teambo konopu ltemele uluma umbulu tiko naa pilko, imbo konopu pepili konopuni ulu pengama kau teko, ulu tumbi nilima kau teko, Gotenga iye kake telima molko, eno enonganoyu mele mele enge ningotokoko kondoromele iyema akuma kau tapu iyema molangei.

<sup>9</sup> Kraustinga ungu tukume oi mane tirimulu akumu enge ningot ambolongeindo amboromele iyema kau tapu iyema molangei ningot mako towi. Aku tepa molombalo iye teni kau imboma manda lipo tapondopa, imbomani pilkolio paimbo Gotenga ungumu ningotengen pimele ulu ungu tukumemua manda mane tipe, ungumu naa pilko tui tirimele imbomani pilko teremele mele paa pilengei enge nimbe mane timbelo ningotoliko teli iyema tapu iyema molangei ningot mako towi.

*Nomuna ltemo kombu Krit Kraustinga imboma paimbo ningotengen pimele ulu tiye kolko molko kenjingei ningot imbo awinini teko beambo tiringima moloringi nimu*

<sup>10</sup> Kraustinga imbo kombu Krit moromele-manga iye awini Gotenga ungu tukumemua naa pilko tui tiko, imboma kolo toko tiko

ungu awini we nimele. Juda iyemani Gotenga oi ungu manema pilipo kangi te kopemili nimele iyemanga awini aku teko teremele kani wamongo kanokolio tapu iyema mako towi.

<sup>11</sup> Aku iyemani ningko kenjirimelemunga imbo lapu marenga ambo bakulu imboma pali paimbo ningko ipuki tirimele ulumu teko embambo tiko altoko paimbo ningko pilingeindo pereremele kani kolo toko mane tirimele mele naa nengei, molo niwi. Kou mone liemili ningko lino Kraistingu imboma manda naa temolo uluma teangei ningko kondi toko ungu mane tirimele mele paa manda molo.

<sup>12</sup> Aku kombu Krit iyemanga lipe manjili iye teni kape oi nimbeindo,  
Krit imboma waliwalima kolo toko,  
kongti timbili mele imbo kerima molko,  
langi awini nongo kongono naa teko tiye  
tiye kolko we moromele,  
nimu.

<sup>13</sup> Yuni aku tepa nimu ungumu paimbo nimu kani aku ulu teko kenjirimele iyema Kraistingu ungumu kau paimbo ningko enge ningko pilko, kolo toli unguma tiye kolko naa pilengei ningko aku teko ningko amenge tewi.  
<sup>14</sup> Juda imbomanga kange temanema kinye, ungu tukumemu naa pimolo nimele iyemani ungu lupema mane tirimele unguma kinye, naa pilko molangei kani enge ningko niwi.

<sup>15</sup> Imbo mare kake tepili moromelemani langi kinye melema kake telima ningko kanokolio ltimele. Nalo ulu pulu kerimani kalaro mondoromo imboma, Kraist paimbo ningko naa pilko moromele imbonani langi kinye melema kalaro moromo ningko kanoko naa moke teremele. Aku iyemanga konopuma kape konopuni uluma pilko moke teremele mele kape kalaro kau molopa keri liteme.

<sup>16</sup> Keremani Gote pimolo nimele nalo ulu teremelemani Gote naa pilko yunge unguma liko tui tirimele nimbe lipe ondoromo. Aku iyema Goteni paa kanopa keri pimo. Gotenga unguma tui tiko, ulu penga tendekure kape manda naa teremele.

## 2

*Taitusini imbo lupe lupema mane timbelo Poloni nimbe tirimu unguma*

<sup>1</sup> Aku iyemani aku ulu teko kenjirimele nalo nuni Kraistingu ungumu ungu tukumemu ningko enge ningko pilko moromele imbomani pilkolio uluma teko molonge mele imboma ningko tiwi.

*Amboi andama Goteni kanopa konopu mondoromo uluma teangei nimbe, ambo*

*wenepoma teko kondonge mele nimu ungumu*

<sup>2</sup> Iye andama ungu mane tikolio ninindo, eno no awini nongo keke lepo naa toko, wamongo konopu leko, we konopu teremo uluma umbulu tiko naa pilko imbo konopu pepili konopuni ulu pengama kau pilko teko, Gotenga ungumu paimbo ningko enge ningko pilko, tiye naa kolko, imboma konopu mondoli ulumu paa ambolko, eno kinye umbunima wendo ombalo kinye enge ningko molangei ningko niwi.

<sup>3</sup> Aku tekola ambo amboima mane tikolio nini, Gotenga unguma tako liko pilko yuni kanopa penga pimo uluma teko molko, imbomanga ungu umbulkondo naa nindiko, no enge nilimani eno naa nokopili ningko molko, amboma kinye enonga bakulumka kinye ulu penga tengema mane tiengei niwi.

<sup>4</sup> Ambo amboima aku teko ulu pengama teko molongemunga ambo wenepoma teko molonge mele manda mane tikolio ningeindo, enonga iyema kinye bakulumka kinye konopu mondoko,

<sup>5</sup> aie konopu ltemele uluma umbulu tiko naa pilko imbo konopu pepili konopuni ulu pengama kau pilko teko, we iyema kinye ulu kerima naa teko, aku ulu kerimanga konopu kape naa leko, enonga ulkema nokoko kondoko, enonga imboma nokoko kondoko, enonga iyemanga unguma tako liko pilko liko molangei nengei. We imbonani Gotenga unguma marake naa teangei ningko ambo amboimani aku teko teangei.

*Iye wenepoma kanoko tengen ulu pengama kau Taitusini aku tepa kau tepili nimu*

<sup>6</sup> Iye wenepoma kape aku teko mane tikolio ninindo enonga konopuma kinye ulu tengema kinye penga teko enge ningko nokoko kondangei enge ningko ningko,

<sup>7</sup> nu nunu ulu terenoma eno kanoko manda leko tengen ulu pengama kau tewi. Unguma imboma mane tiembo ningolio konopuni pilko kondoko ungu tumbi nilima kau ningko kolo naa toko, imboma owe teangei ningko ungu kondowa liko naa niwi.

<sup>8</sup> Unku penga paimboma kau ningko, imbomani pilkolio kolo toromo ningko unguma naa niwi. Linonga opa pulemani lino umbulkondo ungu te manda naa nindinge. Lino ningko kenjingue kinye pipili kolangei ningko aku teko tumbi tiko ningko tiwi.

*Kongono we tendeli kendemande imboma enonga nokoli iyemanga unguma pilko tengen tiengei nimu ungumu*

<sup>9</sup> Kou naa liko kongono we tendeli kendemande imboma mane tikolio ninindo, enonga nokoli iyemanga unguma tako liko pilko liko, enoni kanoko penga pilko

konopu tinge kongonoma kau teko, ninge unguma karaye naa teko,

<sup>10</sup> enonga nokoli iyemani nokaio nimele melema kape wapu naa liko, kongono imbomani kongono tumbi tiko naa teko, melema wapu linge ningi konopu awini kimbo naa tinge uluma kau teangei. Aku ulu teko molonge kinye we imbomani kanokolio lino Lipe Tapondopa Mindili Nolemala Aulkena Wendo Lili Gotenga ungu tukumemu kapi ningi pilko liengei ningi kongono tendeli kendemande imboma aku ulu teko molangei niwi.

*Jisas Kraist kelepa ombalo nimbo nokopo molopo, konopundo kake tepili molamili ungumu*

<sup>11</sup> Goteni lino imboma pali we kondo kolopalino kinye konopu noirimu ulumuni maina imboma mindili nolemala aulkena wendo ongo, na kinye peya molko kondonge aulkena pangei lipo tapondambo nimu.

<sup>12-13</sup> Gotenga we kondo kololi ulu pulumuni lino molopo kondomolo mele mane tirimo. Aku ulu pulumuni lino Gotenga unguma umbulu tipo kuromanga nomi Satanenga unguma pimolo mele umbulu tipo molo nimolo mele mane tipe, lino linongan konopuna pimolo ulu kerima konopu naa tipo tiye kolopo, konopuma kinye ulu temoloma kinye wamongo nokopo kondopo, ulu pulu pengama tepo tumbi tipo molopo Goteni kanopa penga pilimbelo uluma kau tepo molomolo mele mane tirimo. Jisas Kraist linonga Gote Awilimu, linonga Tepa Lili Iyemu pa teli enge nilimu kinye ombalomunga lino ya maina konopu tipo nokopo moromolo kinye Gotenga we kondo kololi ulu pulumuni teangei nimbe mane tirimo uluma tepo molamili mele mane tirimo.

<sup>14</sup> Ombalo iye Jisas Kraistini imbo mare nanga imboma molangei kani ulu pulu kerima naa teko, enonga konopumanga ulu pulu kerima naa pepa kake tepili molangei nimbe linonga pundu tondombaindo linonga nimbe kolo wangopa kolondopa yunge mememu ondopa lerimu ulu pulu pengama kau tingeindo tono kolko teko molonge imbo talape te wendo ongo, na nanu nokombo talapena ongo molangei nimbe yuni aku ulu tenderimu.

<sup>15</sup> Unyu aku tepama tapu tereno imboma paa mane tiwi. Imbomanga tapu iyemu moro ningi ungumu pilko ulu pengama teko moromele imboma ulu pengama teko molko kondoromele mele tiye naa kolko konopu enge nipili molangei enge ningi ningi imbo ungumu naa pilko teko kenjirimele imboma tiye naa kolko iri toko ulu

akuma umbulu tiko ulu pengama kau teko molangei ningi ningi tiwi. Nunge ungu ninioma liko tui tiko ungu taka naa tandangei ningi nunge unguma imboma pali pilengei ningi enge ningi ningi tiwi.

### 3

*Kraustinga imboma teko kondangei ungumu*

<sup>1</sup> Nuni imboma altoko mane tikolio ninindo, enonga iye nomima kinye gavman imboma kinye enoni ungu ningema tako liko pilko liko, liko awili tiko teko molangei. Enoni ungu ningema tiye naa kolko, kongono tingema waliwalima tumbi tiko teko kondoko,

<sup>2</sup> imbo tengi ungu umbulkondo naa nindiko, imboma kinye opa teko ungu karaye naa teko, imboma kinye ulu kandiki telima teko molko, eno enonga imbima liko ola naa munduko, imboma pali liko awili tiko molangei niwi!

*Lino tepo kenjipo molorumulu kinye Goteni lino we kondo kolorumu ungumu*

<sup>3</sup> Lino kape oi ulu keri pengama konopu lepo moke tepo naa kondopo molopo, linonga iye nomimanga unguma naa pilipo, kuromanga nomi Sataneni lino kolo topa ungu nimuma pilipo lipo keke lepo topo ulu keri lupe lupema terimulu. Ulu pulu keri akuma kau temilindo kamele akopo konopu tipo molorumulu. Imbo lupema tepo kenjipo enonga melema kanopo kumo mepo molorumulu. Lino imbo lupema kinye kanopo keri pilerimulu, enoni aku tekola lino kanoko keri pileringi.

<sup>4</sup> Oi lino aku tepo tepo kenjipo molorumulu nalo kinye, lino Lipe Tapondopa Mindili Nolemala Aulkena Wendo Lili Goteni imboma nani eno we kondo kolopo eno we konopu mondopo tero mele kanangei nimbe

<sup>5</sup> yuni lino tepa lipe, mindili nombo pulimala kombuna wendo lipe, yu kinye peya molopo kondomolo kombuna lipe mondorumu. Linoni ulu pulu penga mare terimuluna kanopalie yuni lino naa lipe tapondorumu. Ulu pulu penga tendekure kape paa naa terimulu. Ulu pulu kerima kau tepo molamili yuni lino we kondo kolopalie lipe tapondorumu. Jisasini tenderimu akumu paimbo linonga nimbe tenderimu nimbo enge nimbo pilipolio no ltimulu ulu kanopalie Mini Kake Telimuni lino Gotenga bakuluma molangei nimbe aku tendepa, enonga minima koinjo pangei nimbe aku ulu tenderimu. Gote yuni lino au tepa lipe tapondorumu.

<sup>6</sup> Lino Lipe Tapondopa Mindili Nolemala Kombuna Wendo Lili Iye Jisas Kraistini

linonga nimbe tenderimumunga Goteni Mini Kake Telimu lino paa koya lepa tirimu.

<sup>7</sup> Kraistini lino kinye konopu noipe we kondo kolorumu akumunga Goteni lino kanopalie linonga ulu pulu kerima tiye kolopa konopu tumbi nimbe peli imboma nimbe kanopa, eno paimbo koinjo molopo kondopo kau pumolo ningi enge ningi pilko konopu tiko nokoko kondoko monromele uluma paa paimbo wendo opili nimbe yuni Mini Kake Telimu lino tirimu.

<sup>8</sup> I ungu niomu paimbo. Gote yu paimbo ningi enge ningi pimele imbomanu ulu pengama paa wamongo pilko teangei ningi i ungu nioma imboma paa pilko liko teangei ningi enge ningi mane tiwi. Aku tepa uluma paa ulu pengama, akumani imboma lipe tapondoromo uluma.

<sup>9</sup> Nalo imbomani keke lepo toko Kraistainga unguma tumbi tiko naa pilkolio ungu marenga puluma pilemili ningi opa karaye we teremele unguma kinye, anda kolepalemanga imbima temane toko tirimele unguma kinye, imboma kinye we irinale teremele unguma kinye, Mosesini ungu mane nimbe tirimu ungu puluma apureli teko ungu we nimele unguma kinye, aku ungumani eno molko kondonge mele naa lipe tapondoromomunga aku unguma umbulu tiko, aku teko nimele imbomanga nimele unguma naa pilowi.

<sup>10</sup> Imbo teni ungu mane te timbelo molo ulu te tembalomunga Kraistainga imboma popo tiko naa molonge lemoaku imbomu ningi amenge teko tembalu tiye kolopa tumbi tipe molopili niwi. Altoko wali talo tiko aku ulu naa tewi ninio kinye naa pilimo lemo yu kamukumu tiye kolko umbulu tiwi.

<sup>11</sup> Nunge ungumu naa pilipe we aku tepa tembalo imbonu ulu pulu kerimani yunge konopumu tepe keke lepo tondoromo, yu alowa tendeli iyemu. Yuni tepa kenjimbelo ulu yunu kape lipe manjipelie kombu kerina pumbo nimbe pilimbelo. Yunge teremo ulu aku tepama liko manjikolio yu tiye kolko umbulu tiwi. Yuni teremo ulu naa keleambo nimbelomungaaku tepo nio.

*Pipiamu topa pora timbeindo Poloni ka-mukumu nimu unguma*

<sup>12</sup> Nani iye Artemis molo Tikikus nu moloniona puwi nimbo lipo mundumbo ombalo kinye na Nikopolis taun molombona paa pambo ningi aulke te kanoko liko paa wela owi. Kombu poporome topa ali tembalowali na akuna molombo.

<sup>13</sup> Apolos kinye ungu manema pileli iye Senas kinye elo aulkena pungele wali melte molo naa lepili kani paa tapowi.

<sup>14</sup> Linonga Kraistainga imbomanu wamongo pilko kondokolio mele te molo lembalo imboma kinye umbuni pembalo

imboma kinye lipo tapondamili ningi Goteni teangei nimu uluma teko molangei. Eno we molko kongono pengama naa teko imboma lipe tapondombalo uluma naa teko molonge kinye keri.

<sup>15</sup> Na kinye moromele imbomani pali nu molko kondowi ningi, ningi mundurumele. Kraistini konopu mondaio nimu mele lino aku teko konopu mondoromele imboma nuni molko kondao niwi.

Goteni eno pali konopu noipe kondo kolopa molopili molangei. I peya nio.

**Poloni Filemon Pipia Tipe  
Mundurumumu  
Filemon  
I Ungu Torumumunga  
Ungu Pulu Mare**

Poloni ka ulkena pepalie wali Onesimusindo ungu tukumemu nimbe tirimu wali Onesimusini Jisas ipuki tirimu. Oi kongono kendemande teli iye Onesimusini yunge nokoli Filemon tiye kolko kowa purumu akumunga Poloni Filemonendo Onesimus ulu keri terimu tiye kolopa yu topa naa konopili nimbe i pipia topa mundurumu.

Goten nu imbo keri konopu topele toringima kandiki teko tapu tewi niplili!

<sup>1-2</sup> Na Pol, Jisas Kraistingu kongonomunga, ka ulke pero. Linonga angenu Timoti kinye molopolio Filemon, nanga kongono tendeku iye kanopa ltendeli pengamu kinye, linonga kemulu Apia kinye lino opa kalale iyema Gotenga i opa akumunga moromolo iye Arkipus kinye Kristen imbomani nunge ulkena nombeya teremelema kinye eno wayendo i pipia topo tiro.

<sup>3</sup> Linonga Lapa Gote kinye Awili Jisas Kraist eloni eno kinye konopu noiko enonga konopu ame topili molaio nengili.

*Filemon ulu penga teremomuni Polonga konopu tepe tono tenderimu*

<sup>4-5</sup> Gote kinye konge tepolio wali imbomani nando ningei nu Awili Jisas Kraist paa ipuki tikolio Gotenga imbo wayema konopu mondorono nimele akumunga wali walima nu konopu lepolio Gote kinye paa tereno nio.

<sup>6</sup> Nu lino kinye popo tipo Kraist ipuki tirimolo aku ulumuni lino Kraist kinye popo tipo molopolio mane ungu waye Itimolo akuma lino paa lipo manjemili enge tiye makinjipili nimbo Gote kinye aku tepo konge tero.

<sup>7</sup> Nanga ango, nuni Gotenga imboma waye paa konopu tirino aku tereno ulumuni imbomanga konopuma teko enge tirino. Akumunga nanga konopu paa ame topa paa tono koltlo.

*Filemononi Onesimus angenu mele al-topa lipili nimu*

<sup>8</sup> Ulu te nu teani konopu lteo. Kraistingu imbina Aku ulumu teani nimbo nundo manda nimbo. Nalo nunge ulu pengama lipo manjipolio,

<sup>9</sup> ungu enge nilimu nundo naa nio. Imbo lupema konopu mondoli ulumuni ilto lipo popo tirimo akumunga taka lipo nio. Na

Pol, Kraist Jisasinga ungumu nimbo andopo tiro iyemu, kinye aku kongonomunga ka ulkena pero kani

<sup>10</sup> nanga ungulu Onesimus kinye ulu pengama teani nimbo nu walipo pilto. Oi ka ulkena Peru wali Onesimus na moloruna orumu wali Kraist paa ipuki tipili nimbo yu taporu. Akumunga yu nanga ungulu tukumemu nio.

<sup>11</sup> Oi nu tapombai kongonomu penga tepa naa terimu. Nalo kinye ilto waye tapombai paa penga tepa tembalo.

<sup>12</sup> Kinye nu moronondo yu tipo munduro. Nanga konopumu yu kinye oromo.

<sup>13</sup> Na ungu tukume nimbo para tirumunga ka ulke pepolio, nu kolona na kinye kongono tepili nimbolio nani yu na kinye molopili nindu lemo na paa tono kolto.

<sup>14</sup> Nalo nuni aku ulumu ee oi nenii konopu lepolio akumunga yu naa noipo molto. Nu i ulu tewi ungu naa nio. I konopu lteo, nuni na kinye ulu pengamu teko taponoru lemo aka nunge konopuna nunu tewi.

<sup>15</sup> Onesimusini nu alaye kolo tiye kolorumu aku paimbo wendo orumu. Nalo yu altoko tukundo lieni nu kinye kamukumu molangili aku ulu oi wendo ombalo konopu lteo.

<sup>16</sup> Kinye nuni yu nunge kongono kendemande iyemu kau konopu naa lewi. Paimbo, yu nunge kongono kendemande iyemu nalo kinye nunge angena tukumemu nu paa konopu mondonio. Nani kando wali yu nanga kandi ango konopu lepo yu konopu tiro. Nalo na lipo manjiro, yu paa konopu mondonio. Nuni yunge kongono kendemande tembalomuni konopu mondonio nalo Kraistingu iyemu ningolio nunge angena tukumemu konopu lekolio yu kanoko paa konopu mondonio.

<sup>17</sup> Kraistingu kongonomunga ilto pinyewe koinje iye talo, akumunga nuni na tukundo linio mele aku teko Onesimus tukundo liwi.

<sup>18</sup> Oi ulumare nu kinye tepe kenjirimu lemo molo pundu mare nu kinye angilimo lemo akupe na kinye pundu angilipili yunge imbina nanga imbi kolo wangondowi.

<sup>19</sup> Nani pundu akumu pundu tombo. Na Pol nanga kimuni i ungumu toro. Nunge pundu na kinye angimo ungumu manda nilka. Nu lipo tapondoru kinye molko koinjo kau puniomunga pundumundo nio. Nalo nani aku ungu naa nimbo.

<sup>20</sup> Ango, piltinoya. Ilto Kraistingu iye talo. Awilimunga imbina nuni neya aku ulu pengamu na kinye tekolio nanga konopu teko penga tiwi.

<sup>21</sup> Na paa i tepo lipo manjiro, nuni nanga ungumu lombilinio akumunga nani i pipiamu nunge tondoro. Nani nu walipo pilipo

Onesimus kinye teani nio mele maindo munduko ulu pengamu paa olando tenio aku konopu lteo.

<sup>22</sup> Ungu te kape nimboi. Goteni enonga konge teremelema pimo nimbo ipuki tiro. Pimona na altopa eno moromelena ombo. Akumunga na ombo pembo nunge ulke kiripi te nanga amenge teko noindawi.

*Polonga kongono tendeku imbomani*  
*Filemonondo molowi ningi*

<sup>23</sup> Epafrasini nu molko kondowi nimo. Yu kape ka ulke peremo. Yu kinye ilto waye Kraist Jisasinga ka iye talo.

<sup>24</sup> Nanga kongono tendeku iyema, Mak kinye Aristarkas kinye Demas kinye Luk kameni kape nu molko kondowi nimele.

<sup>25</sup> Awili Jisas Kraistini eno kinye konopu noipe enonga minima nokopa kondopili molangei.

## Hibru Imboma Pipia Topa Tirimu Ungumu **Hibru** **I Ungu Torumumunga** **Ungu Pulu Mare**

Imbomani i pipia torumu iyemunga imbi naa liko manjirimele.

I pipia torumu iyemuni Jisas yu oi imboma kinye enselemanga olandopa moromo iyemu nimbe mane tirimu. Jisas kau melema palinga olandopa moromo iyemu lipo manjemili nimbe i pipia topa panjirimu. Israel imbomanga Gote popo tondoli uluma pali Jisas yuni aku uluma ara tipe pora tirimu. Yunge terimu ulumu Israel imbomanga uluma pali ongondorumu.

I ungu kambu torono wali oi teringi uluma liko manjikolio Jisas yu kau ulu tukumemu terimu ningo yu imbomanga kinye melelenga pali olandopa iyemu ningo ipuki tieni nipili!

### **Mulu Kombuna Enselema Mandopa Moromele, Jisas Olandopa Moromo Ungumu**

Kinye, Gotenga Maloni lino Gotenga unguna nimbe tirimo

<sup>1</sup> Paa koro oi Goteni waliwalima lino Hibru imbomanga ara kaue kamendo yunge ungu nimbe mundulima ningo tiringi profet iyemani yunge ungu mane tirimuna pilkolio linonga ara kaue kame ningo tiengei nimbe lipe mundurumu. Imboma paa pilengei nimbe lipe tapondoramu wali kano iyemani ulu awini liko ondoko ungu awini ningo tiringi.

<sup>2</sup> Nalo i peyalime waina Gote Yunge Maloni lino yunge unguma nimbe tindipili nimbe maina manyendo lipe mundurumu. Aku Ungulumu Goteni nanga melema kamukumu yu timbo, lipe noipe molombalo nimu ungulumu. Kano Ungulumu yu Goteni oi mulu mai melema tembo nimu melema pali terimu iyemula.

<sup>3</sup> Enamu pa teremo meleaku tepa Malo pa teremo akumuni Gotenga pa enge nimbe teremo pa telimu lino lipe ondoramu. Gote moromo mele Malo aku tepa moromo. Malonga ungu engemuni melema pali tepa enge tirimo. Yuni linonga ulu pulu kerima omiba mainye pupili, lino imbo kalaro naa mololima molangei nimbe kongono tepa pora tipelie melema pali nokombaindo mulu kombuna Iye Nomi King Awili Olandopamunga imbo kindo pumbé moromo.

*Gotenga Malo paa oladopa moromo,  
enselema manyendo moromele aku ungu*

<sup>4</sup> Aku terimuna Lapani yu nanga Malo imbi tirimuna aku imbi mololimu paa oladopa Itemo, mulu kombuna enselemando imbi lepa Gotenga kongono tendeli iyema nimu aku imbimu paa mainye, aku tepa mele yu paa oladopa enselema yunge maindo moromele.

<sup>5</sup> Goteni nimbeindo:

Nu nanga Malo, kinye na nunge Lanie, (*Sng 2:7*)

nimu mele ensel tendo walite aku tepa nimuya? Aku molo. Yunge Malondo kau aku ungu nimu. Molo yuni nimbeindo:

Na yunge Lapa molombo, yu nanga Malo molombalo, (*2Sa 7:14*)

nimu akumu ensel tendo nimuya? Aku molola. Malondo kau aku ungu nimu.

<sup>6</sup> Yundo ungu te kape nimula. Yunge ungu komomu maina lipe mainyendo mundupelie Goteni yunge enselemando nimbeindo:

Ungulumu kapi ningo yunge imbi liko ola mundeio, (*Lo 32:43*)

nimu.

<sup>7</sup> Enselema teremele ulu lipe manjipelie i tepa nimbe peremo:

Yunge enselema poporomemu mele molko, yunge kongono tendeli iyema tipe mele moromele. (*Sng 104:4*)

<sup>8</sup> Nalo Goteni Malondo nimbeindo:

Awilimu, nu waliwalima iye nomi kingimu morono mele molko kau punio.

Nuni ulu tumbi nilima teko imboma nokino.

<sup>9</sup> Nuni ulu pulu tumbi nilima undukana konopu mondorono.

Ulu pulu kerima konopu naa mondoko paa naa tereno,

akumunga nunge Goteni nu iye nomi king molko melema pali nokani nimbe kanopa lipelie nunge imbomanga pali imbi paa oladopamu nu tirimu.

Nuaku tepa tepa kondorumumunga imbo-manga pali tono koromele mele

Goteni nu tepa tono kondombalona nu paa oladopa tono kolonio, (*Sng 45:6-7*)

nimu.

<sup>10</sup> Goteni Malondo ungu te peya nimbeindo, Awilimu, oi pulu polko nuni maimu enge nimbe lepili teko, nunge kimuni mulumu kinye akuna Itemo melema kinye wamorunu.

<sup>11</sup> Aku mele talo pora nimbelo, nalo nu waliwalima molko kau puruno.

Wali pakolima pingi pumbé tungu nimbe keri Itemo mele mulu mai talo aku tepa bemblo nimbelo.

<sup>12</sup> Imbomani wale pakoli tulema toko ltengenindo kimburumele mele nuni mulu mai talo aku teko kimbunio.

Wale pakoli te lupe panjingeindo kolo wan-goromele mele nuni aku teko aku  
mele talo kolo wangonio.

Nalo nu nunu aku teko alowa naa teko, moro-me mele wali walima molko, walim-walima molko kau punio, (Sng 102:25-27)

nimu.

<sup>13</sup> Goteni oi walite nimbeindo,

Nunge opa pulema nuni nokani nimbo pele  
eno topo mainye mundumbo kani i  
teli oi nu na kinye peya kopu tepo iye  
nomi talo molambili

nanga imbo kindo ongo molani, (Sng 110:1)  
nimuaku ungumu ensel tendo nimuya?

Aku molo.

<sup>14</sup> Aku ungumu enselemando naa nimu  
lemo enselema naimeleya? Enselema mini  
mele molko Gotenga kongono tendelima.  
Akuma Goteni yu peya kamukumu kopu  
tepo molamili waio nimu imboma liko  
tapondoko nokangei paio nimbe lipe  
mundurumo enselema.

## 2

*Goteni lino tepa limbelo aku ulu awilimu*

<sup>1</sup> Manda, Jisas yu imbi lipe olando moromonga ungu tukume oi pilermuluna  
ulu teni lino wendo lipe mepa naa pupili  
nimbolio aku ungumu konopu kimbo tipo  
enge nimbo ambolopo molamili.

<sup>2</sup> I ungu liko manjeio. Goteni oi linonga  
ara kaeu kame kinye ungu nimbe pan-  
jipe mi lerimu ungumu eno nokorumu  
wali Goteni linonga ara kaeu kame ungu  
mane Mosesini tipili nimbe enselemani  
Moses ningi tieo nimu. Yunge ungu mane  
ningima enge nimbe perimumuna kano ungu  
manema naa pilko toko tangondoringi im-  
boma teko kenjiringimunga mele pundu to-  
rumuna Ittingi.

<sup>3</sup> Nalo kinye Goteni Jisas lipe munduru-  
muna lino lipe tapondopa mindili naa  
nangei, na peya molamili nimo ulu akumu  
paa olandopa. Goteni lino kinye lipe  
tapondombaindo tepe limbelo ulu paa  
olandomu tiye kolomolo lemo pele lino  
ulu pulu keri teremolomanga ambe tepo  
kowa pumbo mindili naa nomoloya? Kowa  
paa manda naa pumolo. Goteni lino tepe  
limbelo mele ungu akumu oi kumbe lepa  
Awili Jisas yuni yunu nimbe tirimu kinye  
pele aku ungu nimumu pileringi iyemani  
yando linondo i ungumu paimbo ungumu  
ningi.

<sup>4</sup> Aku wali Goteni kano iyema engema  
tirimu kinye enoni imboma mongoni  
kanoko konopu kimbo tingei ulu enge  
nilima teringi. Goteni Mini Kake Telimunga  
engemu lipe yunu konopuni pilipelie  
kongono molo ulu lupe lupema tengen-  
gema ungu ningo tiringi imboma

moke tepe tirimu. Goteni Malonga ungu  
tukumemu paimbo ningo pilengei nimbe  
kano iyema enge tirimu.

*Goteni Jisas Yu yunge angenupilima  
mele molopili nimu ungumu*

<sup>5</sup> Mai koinjo te wendo ombalo nimolo aku  
maimu Goteni nokangei nimumu ensele-  
mando naa nimu.

<sup>6</sup> Aku molo. Gotenga bukuna imbomani  
mai altopa wendo ombalomu nokongema  
ungu te topa panjipelie nimbeindo,  
Gote, nuni lino imboma ambele melema  
konopu lekolio lino kanoko imbi tiri-  
noaya?

Maina imbomani meremele imboma  
ambe temona nuni kondo kolko  
nokoronoya?

<sup>7</sup> Nuni imbomando nini, imboma en-  
selemania alaye kolo mainyendo  
molangei nimbo ninu.

Pele nuni enonga imbima liko ola mundun-  
duko, imbima tiko,

<sup>8</sup> enoni melema pali nokangei ninu, (Sng  
8:4-6)

nimbe moromo. Goteni maina imbomani  
melema pali nokangei nimu bukuna moro-  
romo lemo Goteni mele terimumanga ten-  
dekure kape enoni naa nokangei nimu  
mele te paa naa ltemo. Nalo imbomani  
melema pali nokangei nimo nimbe moro-  
romo mele, kinye aku tepe nimbo naa karomolo.

<sup>9</sup> Aku paimbo nalo kinye maina iye tendeku  
paimbo yunge imbi melemanga pali paa  
ollando moromo nimbo karomolo. Akumu  
Jisas. Oi Goteni lino we kondo kolopa yu im-  
boma lipe tapondombai enonga waye kolo  
wangopa mindili nomba kolopili nimbe yu  
enselemania mainye mele molopili nimu.  
Yu mindili nomba kolorumumunga Goteni  
yu melemanga pali imbi olando tipe yunge  
imbi lipe ola mundurumu nimbo karomolo.

<sup>10</sup> Akumunga ungu te peya nembo.  
Goteni melema pali terimu. Yu melemanga  
pali Gote. Yunu pilipelie melema terimu,  
akuma kinye nokromo. Akumunga imbo  
awini kanopa lipe nanga bakulumga molko,  
na kinye peya popo tipo molamili nimo  
kinye eno lipe tapondopa Gote kinye  
molko kondonge aulkemu akirindirimu  
iyemu mindili nopili nimu aku paimbo  
nimu. Yu mindili norumumunga yu iye  
paa penga tumbi nilimu molopa eno lipe  
tapondopa mulu kombuna punge aulkemu  
lipe ondombai mepa purumo.

<sup>11</sup> Yuni Gotenga bakulu awini manda  
mulu kombuna mepa pumbelomunga pu-  
lumi i tepe: Yu kinye eno lapu tendekumu.  
Iye teni imboma lipe tapondopa Goteni  
kanopa yunge imbo kake telima nimbe  
kanopili nimo iyemu kinye kano iyemuni

imboma lipe tapondoromona eno Goteni kanopa nanga imbo kake telima nimbe karomo imboma kinye linonga Lapa tendekumu. Akumunga yuni enondo ango kame nimbeindo pipili naa koromo.

<sup>12</sup> Akumunga oi ungu te nimbeindo,

Gote, nu morono mele nanga angenupilindo nimbo timbo. Eno kinye peya nu popo tomilindo maku topo molomolo wali eno pilko molangei kunana nimbo nu kapi nimbo, (Sng 22:22)

nimu.

<sup>13</sup> Akumunga kelepa walite yuni ungu te nimbei,

Nanga ango kameni teremele mele nani  
aku tepo Goteni na nokombo nimu  
mele paimbo tembalo nimbo pilipo  
taka lipo molombo,

nimu. Akumunga ungu te peya nimbei,

Goteni na bakulu tirimuma kinye peya momolomo,  
(Ais 8:18)

nimu.

*Jisas lino lipe tapondombaindo maina imbo iye apuwe lerimu ungumu*

<sup>14</sup> Bakulumando nanga angko kame nimu akumu maina imboldando nimu, akumunga Jisas yu eno mele molambo nimbe maina iye apuwe lepa molorumu. Enonga nimbo kolopolio kololi ulu pulumu nokoromo iyemu topo mainye mundembo nimbelie aku tepe maina iye apuwe lepalie kolorumu. Kololi ulu pulumu nokoromo iye akumu kuromanga awili Satan.

<sup>15</sup> Kolomolo ningko waliwalima konopu kimbo tiko pipili kolko kau moromele imboma aku teko Sataneni eno tepe pipili kondopa ka ulkena mele panjirimoma wendo liembo nimbe Jisas kolorumu.

<sup>16</sup> Jisasini aku tepe terimu akumu ensemble lipe tapondombaindo paa naa terimu nalo Abrahameni kalopa ltimu imboma lipe tapondombaindo terimu nimbo piltimo.

<sup>17</sup> Aku tepalie yunge angenupilima maina moromele mele yuaku tepe maina molopa eno umbuni teremo molo mindili noromele aku tepe uluma pali yu kinye wendo opili maina iye apuwe lepalie aku uluma tendeku tipe teremo. Goteni imbomanga ulu pulu kerima tiye kolopili yu kinye popo tiko molonge kongonomu tembaindo maina ombo iye aku tepe molopalie yuni imbomanga kondo kolopa Gote popo tondoli iye nomi awili olandomu molopa Gotenga kumbe kerenaaku kongonomu enge nimbe ambolopa molombalo aulke te lupe naa ltemo.

<sup>18</sup> Yu kinye manda manjili ulu awini wendo ombo, mindili norumu akumunga

imboma kinye manda manjili uluma wendo oromo kinye yuni manda eno lipo tapondoromo.

### 3

*Mosesinga imbimu olando nalo Jisas singa imbimu paa olandopa purumo ungumu*

<sup>1</sup> Ango kame, na kinye peya Kraistinga imbo moromelema, mulu kombuna moromo Goteni eno kape kanopa lipe nanga imboma molangei nimo imboma aku nio ungumu ungu paimbomu kani Jisas moromo mele paa konopu kimbo tiko molangei. Yu Goteni kongono tendepuwi nimbe lipe mundurumu iyemu, akumu Gote Popo Tondoli Iye Nomi Awili Olandomu. Aku iyemu paimbo nimbo yu moromo mele imboma temane topo tirimolo akumu wamongo pileio!

<sup>2</sup> Oi Mosesini Gotenga imboma nokopalie Goteni tewi nimu mele pilipe tumbi tipe tepe ungu te tiye naa kolorumu. Aku tepe ala Goteni Jisas kanopa lipe kongono tipe tewi nimu mele pilipe tengi tipe terimu. Gotenga imboma yunge ulkemu mele.

<sup>3</sup> Ulke takoromo iyemu yunge imbi olando moromo, yu paa kapi nimele. Ulkemunga imbi olando naa moromo. Aku tepe mele iye Jisas ulkemu takorumumunga yunge imbimu paa ola molopili nimbo yu paa kapi nimolo, nalo iye nomi Mosesinga imbimu ulke mele olando naa moromo.

<sup>4</sup> Ulke te we wendo naa ombo angimo. Imbo teni ulke te takoromo kinye angimo. Nalo Goteni melema pali lepili nimuna moremele.

<sup>5</sup> Moses yu Gotenga kongono tendeli iyemu molopa Goteni tewi nimu mele paa pilipe lipe Gote yunge ulkena kongono tembaindo tiye naa kolopa kongono tepe kau molorumu. Yunge kongono terimu i tepe: Goteni pele nimbe timbelo mele Mosesini oi nimbe tirimu.

<sup>6</sup> Nalo Kraist yu Gotenga Malo molopa imboma Gotenga ulkemu moromelema yuni nokopa Goteni tewi nimo mele paa pilipe lipe kongono tembaindo tiye naa kolopa kongono tepe kau molorumu. Jisasini lino lipo tapondombalo nimbo enge nimbo pilerimulu mele tiye naa kolopo, konopu enge nipili paimbo aku tembalo nimbo enge nimbo pilipo pipili naa kolopo, konopu tipo nokopo molomolo lemo lino yunge ulkemu moromolo.

*Gotenga Ungumu tui tingi imboma mandoko naa molonge*

<sup>7</sup> Lino Gotenga imboma aku tepe moromolomunga Mini Kake Telimuni nimu ungumu oi topa panjirimumu pilemili! Yuni nimbei,  
“Goteni nimu ungumu kinye pilinge lemo

<sup>8-9</sup> oi enonga ara kaeue kameni kombu ku lelina Goteni mumindili kolombalonje ningi ungu niuma paa naa pimolo ningi tui tiringi ulu naa teao. Akuna poineye tu paono ombo pupili eno kanoko molangei nani eno lipo tapondambo nimbo ulu enge nili mare teru,  
nalo kanokolio Goteni lino ulure tembalonje manda manjipo kanamili ningi  
nanga ungumu naa pilko tui tiko, nani eno nokambo ungu naa ningi.  
<sup>10</sup> Akumunga nani kano imboma kinye paa mumindili kolopolio nimboindo, i imboma nani ungu nioma naa pilko tui ningi enonga aulke mako tondoruna naa pungo tiye kromosome.  
<sup>11</sup> Eno kinye mumindili kolopolio mi lepo nimboindo, nani konopu taka lipe u nipili molangei niu ulu pulumu eno paa naa linge nio," nimu. (Sng 95:7-11)

<sup>12</sup> Nanga anga kame, enonga imbo teni ulu pulu kerima teambo nimbe konopu lipe mundupe yu Gote nimu mele painbo nimbe ipuki tirimu mele tiye kolopalie imboma enge nimbe nokoromo engemu peremo Gote umbulu timbelo kani kanoko kondoko molaio.

<sup>13</sup> Aku ulu naa tekolio i teko teangei. Ulu kerimani lino kondi topa eno none teangei nimbelo kani imboma nendo yando konopuma enge tipili ningi liko tapondangei. Goteni "Kinye" nimu akuna olando tondu akumu linoni waliwalima kinye uluma manda temolo, kinye manda ipuki timolo nimbo aku walimangaaku tepo nimbo pilipo nendo yando imboma ungu pengama nimbo tiemili.

<sup>14</sup> Aku niomunga pulumu i tepa: Lino Gote oi pulu polopo ipuki tirimulu mele aku tepe kamukumu paa enge nimbo ipuki tipo ambolopolio kolomolo lemo lino Kraistinga imbo tukumema molomolo.

<sup>15</sup> Lino i tepe lipo manjirimolo. Neya aku ungumu we itemo. Akumu i tepa:

Goteni nimu ungumu kinye pilinge lemo oi enonga ara kaeue kameni kombu ku lelina Goteni mumindili kolombalonje ningi ungu niuma paa naa pimolo ningi tui tiringi ulu naa teao. (Sng 95:7-8)

*Kinye Goteni nimu ungumu pilinge lemo oi enonga anda kolepalemani kalambo naa ningi yunge ungu nimuma paa naa pimolo ningi tui ningi mele naa teao nimu kanomu*

<sup>16</sup> Naimeleni oi Goteni ungu nimuma pilkolio naa pilimolo ningi eno none teringi? Aku imbo Mosesini Isip

kombuna wendo lipe mepa purumumani kauaku ulu teringi.

<sup>17</sup> Poineye 40 ombo pupili Goteni naimele kinye mumindili kolopa molorumuya? Ulu pulu keri tekolio kombu ku lelina koloringi onoma akuna lepili tiye koloringi imboma kinye mumindili kolorumu.

<sup>18</sup> Na Goteni konopu taka lipe pepili molangei niu ulumu enoni paa naa linge mi lepo nio nimu akumu naimelelo nimuya? Aku ungumu yunge ungu naa pilimolo ningi eno none teringi imbomando kau nimu.

<sup>19</sup> Aku imbomanli Gote ipuki naa tiringina aku pulumunga Goteni eno mepo pumbo nimu kombuna naa mepa purumu akumu lipo manjirimolo.

## 4

*Gotenga imboma konopu ame toli peli mulu liko molonge ungumu*

<sup>1</sup> Akumunga Goteni lino imbomando konopu taka lipe pepili mulu liko molangei nimbo kombuna mepo pumbo oi nimbe panjirimu ungumu, kinye kape we peremo kani yuni enonga imbo te moke tepa kanopalie konopu ame topili mulu liko molangei niu ulumu naa lipili nimbelo kani pipili kolko molaio.

<sup>2</sup> Ambe temona aku nimbo pipili kolamiliya? Oi linonga ara kaeue kame Mosesini kombu Isip tiye kolopa wendo lipe mepa purumu kano imboma temane pengamu pileringi, aku mele lino ungu tukumemu pimolola. Nalo kano imboma aku ungumu pilkolio Goteni paimbo nimo ningi ipuki naa tiringimunga ungu pileringimuni eno lipe naa tapondorumu.

<sup>3</sup> Lino Gotenga tembo nimo mele paimbo tembalimo nimbo ipuki tirimulu imboma kau, kinye paimbo Goteni konopu ame topili molangei nimbe nimu ulu pulumu manda limolo. Oi Goteni nimu mele aku tepe pere-mola. Oi yuni nimbeindo,

Eno kinye mumindili kolopolio mi lepo nimboindo, nani konopu ame topili mulu liko molangei niu ulu pulumu eno paa naa linge, (Sng 95:11)

nimu. I ungumu oi Moses molopoli wendo orumu. Oi Goteni mulu mai melema terimu aku kongonomu tepa pora tirimu waliaku koro mololi ulu pulumu perimu.

<sup>4</sup> Gotenga bukuna ungu te moromo mele pilipelie ungu akumuni wali kite yupoko bakera tipemundo nimbei,

Wali kite yupoko bakera Goteni kongonomata pa tipelie koro molorumu, (Stt 2:2)

nimbe moromo.

<sup>5</sup> Koro molorumumungu ungu te peya nimu akumu i tepa: Nani konopu taka lipe pepili

mulu liko molangei niu ulu pulumu eno paa naa linge nimbe moromo.

<sup>6</sup> Aku ungu muni lino lipe ondoromo mele i tepe: Gotenga konopu taka lipe pepili mulu lili ulu pulu oi perimu akumu kinye we peremo akumunga kinye imbo mare aku konopu taka lipe pepili molonge ulu pulumu linge. Nalo Mosesini mepa purumu ara kaue kame temane pengamu pilkolio kalambo naa ningungu naa pilko likolio neya akuna naa puringi.

<sup>7</sup> Oi eno konopu taka lipe pepili koro naa moloringimunga poinye awini ombo pupili pele walite Goteni altopa iye nomi King Devitinga kerena altopa 'Kinye' nimu. Devitini oi nimu nio kanomu i tepe,

Goteni nimo ungu kinye pilinge lemo  
Yunge ungu paa naa pimolo ningotu  
tiringi ulu naa teaio. (Sng 95:7-8)

'Kinye' nimu akumunga pulumu i tepe, Goteni altopa wali te kanopa lipelie i walimu konopu taka lipe pepili mulu lili walimu nimbe nimu.

<sup>8</sup> Josua yuni linonga oi ara kaue kame mulu liengei nimu lemo aku Goteni mulu lili wai te altopa naa nimbelo.

<sup>9</sup> Akumunga Goteni yunge imbomando konopu ame topili molangei nimo ulu pulumu kinye kape we peremo. Aku koro mololi ulu pulumu Goteni mulu mai talo kinye melema tepa pora tipelie, wali yupoko pakera tipemunga Sabat walina koro molorumu aku tepa mele peremo.

<sup>10</sup> Lino lipo manjirimolomu i tepe, oi Goteni yunge kongono tepa pora tipelie mulu ltimu mele imbo te yunge kongono tepa pora tipelie aku tepa mele mulu lipe taka lipe molombalo.

<sup>11</sup> Oi imbomani Goteni i teko teaio nimu ungu pileli naa pileli none teringi. Aku tekolio taka liko mulu lili ulumu naa teringi. Linoaku ulu naa teamili nimbulio Gote kinye mulu liemili enge nimbo ipuki tiemili.

<sup>12</sup> Goteni nimu ungu we naa moromo. Yunge ungu koinjo mololi uluma tepa enge tirimo nimbo pimolo. Yu nee paa noromo, opa teli bainet nendo kinye konondo kape waye talonga nee noromo aku mainyendo, yu paa olando. Gotenga ungu muni opa teli bainet mele ombelemu kinye kikimemu kinye tumbi tipe topa turu topa minimu kinye konopumu kinye topa turu toromo. Aku tepa lino konopu kimbo tirimolo mele kinye, konopuna pilipo temolo konopu itemolo mele kinye, pali pilipe moke teremo akumunga yunge ungu tengen tipe ipuki tiemili.

<sup>13</sup> Goteni mele terimumanga pali te Goteni naa kanopili ningungu manda lopeke naa tengen. Melema pali tapuwe nimbe Gotenga kumbekerena mona itemo. Aku mele Goteni linonga ulu teremoloma pali

pilipe moke tembalon konopu lepolio yunge ungu pilipo teamili.

### Jisas Gotenga Kumbe Kerena Linonga Popo Tondoli Iye Kiyendomu Moromomunga Ungumu

<sup>14</sup> Manda, linonga mulu kombuna Gote moromona purumu Gote popo tondoli iye kiyendo, akumu lino oi lipe tapondorumu iye Jisas, Gotenga Malo. Kinye yuni lipe tapondoromo mele aku tepa paimbo tembalon nimbo ipuki tipolio nimbo para tiri-molo mele tiye naa kolopo aku tepo ingi tipo ambolopo molamili.

<sup>15</sup> Kuro kerimanga nomi Sataneni lino kondi toromo kinye molo nimbo ulu pulu kerima topo mainye mundumolo enge naa pepili moromolo wali linonga popo tondoli iye kiyendomuni kanopa naa kondo koromo-yaya? Yu kanopa kondo koromo. Sataneni lino ulu luge lupema pali kondi toromo mele oiaku tepa linonga popo tondoli iye kiyendo Jisas kondi torumu nalo ulu pulu kerimanga te naa terimu.

<sup>16</sup> Akumunga, lino Gote moromona pipili naa kolopo nondopo pumbo yunge kumbekerena yu kinye konge nemili. Aku temolo wali Goteni lino kandiki tepa umbuni teremona wendo lipe tapombalo.

## 5

*Linonga popo tondoli iye kiyendo Jisas-ini lino molopo kondamili nimbe lino manda tepa wendo limbelo ungu*

<sup>1</sup> Wali wali Juda imbomanga ningungu Gote popo tondoli iyemanga iye te popo tondoli iye kiyendomu molopili ningungu, kanoko liko kongono tepili nimele mele i tepe. Goteni maina imbomanga iye te kanopa lipelie yu Gotenga kumbekerena yunge kongono tendepa maina imboma lipe tapondopili nimo. Popo tondoli iye kiyendomu yuni imboma lipe tapondombaindo imbomani Gotendo paa tereno ningungu tirimele mele lupe lupema yuni lipe Gote tindipe, imbomanga ulu pulu kerima tiye kolondopili nimbe kongi kera melema Gote popo topa kalopa tirimo.

<sup>2</sup> Aku Juda imbomanga Gote popo tondoli iye kiyendomu yu kape maina iye tela. Goteni teaio nimu ungu pilipe lipe tembaaindo yu umbuni peremola, akumunga imboma Gotenga ungu pilko tune tane ningolio yunge aulkena loi leko moromele imboma kondo kolopa lipe tapondoromo.

<sup>3</sup> Wali mare yu yunu kape Goteni teaio nimu mele naa teremola. Akumunga imbomani ulu pulu keri teringimanga popo tondopa melema kalopa Gote tirimo aku mele yunge ulu pulu kerima tiye kolondopili nimbe popo topa kalopa tirimola.

<sup>4</sup> Gote popo tondoli iye kiyendomunga ungu te peremola. Iye teni yunu nanga imbi muola molopili, popo tondoli iye kiyendo molambo naa nimo. Oi pulu polopa Goteni Aron kanopa ltimu mele aku tepa yandopa yandopa kape kanopa lipe aku kongonomu tewi nimo iyemu kauaku kongonomu tememo.

<sup>5</sup> Aku tepa mele Kraist yu kape yunu nanga imbi ola molopili kani popo tondoli iye kiyendomu molambo naa nimu. Goteni yu imbi ola molopili nimbelie nimbeindo, Nu nanga Malo, kinye na nunge Lanie, (Sng 2:7)

nimu.

<sup>6</sup> Buk tengi Goteni ungu te peya nimbeindo, Melkisedek molorumu mele nu nunu aku teko Gote popo tondoli iye te waliwaima molko kau punio, (Sng 110:4)

nimu.

<sup>7</sup> Kraistainga ungu te i tepa. Jisas ya mai kumbuna molopalie nimumuni, Goteni tewi nimu mele taka lipe pilipe lipe tepa yunge imbi mainye molopili nimbelie yu kolombalo aulkena manda wendo limbelo Gote kinye ungu nimbe enge nimbe walipe pilipe kola tepa konge terimu kinye konge terimu mele Goteni pilerimu.

<sup>8</sup> Paimbo yu Gotenga Malo nalo yu mindili norumu akumuni yu Goteni tewi nimu unguma pilipe lipe tengi tipe tembalu mele pilerimu.

<sup>9</sup> Aku tepa terimumunga yu Goteni tewi nimu unguma paa toyapilipe lipe tepa, kongono timbeloma paa tepa kondombalo iyemu molopalie, yunge ungumapilkoliko tingo teremele imboma lipe tapondopa eno kamukumu molko kondonge ulu pulumu peremo iyemu moromo.

<sup>10</sup> Aku tepa tepa molombalo iyemu molopili kani popo tondoli iye kiyendomu molopili nembo nimbe Goteni yundo iye Melkisedek popo tondoli iyemu molorumu mele nu aku teko popo tondoli iye kiyendomu wali wali molko kau pani nimbe kanopa ltimu.

### **Lino Altopo Molopo Naa Kenjimili Ningo Nokoko Kondaio Nimu Unguma**

<sup>11</sup> Jisas yu Melkisedek popo tondoli iyemu molorumu mele popo tondoli iye kiyendomu moromo mele ungu awini we peremo nimboindo nani kape perero. Iungumunga ungu pulumu paa enge nilimu. Nimbo tilka nalo eno ungu awini nimbo tiroma pilengeindo mindili kolko naa pimelemunga i ungu niomunga ungu pulumu eno nimbo timbo mele pinyewe toromo.

<sup>12</sup> Eno paa koro oi Kraistainga imboma moloringi, akumunga kinye eno Gotenga

unguma mane tili imboma molko imbo mare mane tilimala nalo eno Gotenga oi pulu polko ungu pulu eno kumbe leko pileringima wamongo naa pimelemunga imbo teni eno mane tiembo nimbelie Goteni Kraist maina lipe mundurumu, Yu linonga nimbe kolo wangopa kolorumu ungu akuma kau altopa manda mane timbelo kinye pilingenje ungu enge nilima manda mane naa timbelo. Naal pilimala. Eno bakulu pamema mele ame kau noromele, langi enge nilima manda naa noromele.

<sup>13</sup> Ame kau noromele bakuluma enonga teremele uluma naa liko manjirimele. Uluma enaa telu akumunga temu ulu toya tolimu, ulu temu ulu kerimu moke naa apurumele.

<sup>14</sup> Nalo langi enge nili akuma imbo yumania kau noromele. Imbo mare eno ulu terengina wamongo kanoko pilkolio enu pengama, enu kerima ningi moke tekopilkolimoromelema kau langi enge nilima manda noromele.

## **6**

*Jisas tiee nad kolopo Goteni lino tepa kondopili nimbo konopu enge pepili nokopo molamili ungumu*

<sup>1-2</sup> Manda, Kraistainga imboma i teko i teko teremele ungumuo eno pulu polko ningotiringi ungu akuma kau naa nimbo molamili. Linoniaku tepo kau nimbo molomolo lemo ulke ponga awinima poltomolo nalo ulke eno naa takoli mele. Oi kumbe leko ningotiringi unguma i tepa mele: Te, kololi ulu pulumu kau peremo uluma pali umbulu tiko konopu topele toko Gote ipuki tirimele. Te, no lingendo no ltimeleunga ungu pulu awini nimele. Te, Goteni mane tipili ningi imbomanga pinyewena ki noirimelemunga unguma. Te, Imboma kolkolio makilinge ulumunga ungu awini nimele. Te, Goteni maina imboma kot tendepa pilipielie imbo mare molko kondoko kau pangei nimbe, imbo mare molko kenjiko kau pangei nimbelomunga ungu mane tirimele unguma. Aku ulumanga unguma kau ningi pilko naa molangei. Imbo yuma ungu manema pimele mele aku tepo pilipo molamili.

<sup>3</sup> Manda, Goteni yunge ungumanga ungu paa tukume pilemili linondo ee nimo lemo, enu ulu teamili.

<sup>4-6</sup> Akumunga kinye ungu enge nili mare nemili. Goteni Kraist lipe mundurumu kinye yuni omiba tenderimumunga pulumu pilko kondoko paimbo ningi pilko limele imboma mulu kombuna mele we tipe kalopa tirimo melema liko, Mini Kake Telimu konopuna liko, Gotenga ungumu eno pilko likolio kau ungumu paa penga

ingo pilko, Gotenga engemuni pele kombu pora nimbelo walimunga ulu enge nilima tembalu aku engemuni kinye ulu enge nilima teremo uluma kanoko, aku uluma pali tekolio altoko konopu alowa teko naa pimolo ningo Kraist tiye kolonge lemo kelko manda konopu alowa teko Kraustinga unguma paimbo ningo enge ningo pilko yando onge aulke te paa naa ltemo. Imbo teniaku tepa teremo aku ulumuni Gotenga Malo altopa kolopili nimbe unjo polopeyana pirimu topa uku topa, imbomani yu kanoko ungu taka tondongei nimo.

<sup>7</sup> Pileio! Lo toromo kinye maina no awini pumbe, aku maina poiney teremele imbormani langi manda liko nonge langima omaba kondoromo kinye Goteni aku tepa kano maimu tepa kondoromomunga aku teremo.

<sup>8</sup> Nalo mai tengatiri ka kinye era keri lupe lupe oromo kinye kano maimu mai keri. Goteni keri lepili nimbei teremo. Pele wali te mai akumu tipeni undukana nombalo.

<sup>9</sup> Nanga ango kame, Kraustinga imboma molkolio pele yu tiye koromele imbomando aku tepo nimolo nalo eno aku teko naa tengenimbo pilipo moromolo. Goteni eno lipe tapondoromo, molko kondoko kau punge uluma teko moromele konopu ltemolo.

<sup>10</sup> Goteni ulu tumbi nilima kau teremo. Enonga kongono teremeleme kinye, eno Gote konopu mondokolio yunge imboma liko tapondoromele mele kinye kape waliwalima teremele uluma kinye, kanopa keri konopu lepa tiye naa koromo. Pilipe kau moromo.

<sup>11</sup> Eno paliaku teko teremele mele enge ningo tekolkoloyi te naa kolangei nimbo paa konopu ltemolo. Teliko pungo Goteni lino tepa pengatimbeloaku waimu wendo opiliaku teko molaio

<sup>12</sup> Eno tiye naa tepili konopu lepo moromolo. Imbo Gote paimbo ningo ipuki tiko tiye naa kolkolio Goteni yunge bakuluma nini melema timbo nimu melema tirimuna ltingi imboma moloringi mele molaio konopu lepo moromolo.

*Goteni tembo nimbe panjirimu mele paimbo tembalu nimbo ipuki tirimolu ungumuu*

<sup>13</sup> Oi Goteni linonga kolepa Abraham kinye ungu te nimbe panjipelie, paa olando moromo imbo tenga imbi lepa mi lembaindo Gote yu mainyendo imbo te paa olando te naa molorumumunga Gote yunu yunge imbi lepa mi lepalie

<sup>14</sup> nimbeindo,

Nani nu mane ungu tipo, nunge kole-nale bakulu awini molangei nimbo paimbo nio, (Stt 22:17) nimu.

<sup>15</sup> Aku nimumunga pilipelie Abraham Goteni yu mele timbo nimbe panjirimumu ara tipe timbelo nimbe oi tiye naa kolopa we nokopa molopalie paimbo Itimu.

<sup>16</sup> Imbo teni paimbo nimu ningo pilengei nimbe yunge imbo te awili olando moromomu imbi lepa paimbo nio nimbe mi ltemo. Imbomani yunge ungumu toko mainye naa mundundengei nimbelie mi lepa nimo.

<sup>17</sup> Akumunga aku tepa melela, Goteni Abraham kinye nimbo panjiru mele yunge kolepale imbomani paa pilko kondangei. Nani tembo nimbo panjiru mele konopu alowa naa tepo paimbo tero ningo kanangei nimbe yunge imbi yunu lepa paimbo niu nimbe mi lerimu.

<sup>18</sup> Gote yu konopu alowa naa teremo. Eno kinye tembo nimbo panjirimu mele waliwalima kape paimbo tembalu ningo konopu kimbo tiko molangei nimbe i ulu talo terimu. Ulu te, ungumu oi nimbe panjirimu. Ulu te, ungumu nimbe panjipelie pele yunge imbi yunu lepa paa paimbo tembo nimbe milerimuaku ulu talo terimu. Aku ulu talo Gote konopu alowa manda naa tepa, kolo paa manda naa toromo ulu talo. Akumu pilipolio Goteni lino timbo nimbe panjirimu melema paimbo timbelo nimbo pilipo umbuni te wendo naa opili, lino nokopili nimbo Gote moromona nondopo purumolo imboma linonga konopu enge nipili tiye naa kolopo manda nokopo molomolo.

<sup>19</sup> Aku ungumunga ungu iko te topo tiembo, nona andoli sip te poporomeni nona topa mepa pumbelo ningo tenga kareko panjirimele. Aku tepa linonga minima sip mele. Goteni lino kinye tembo nimo ungumu kolo naa topa paimbo teremo nimbo pimolo ulu akumu minimanga ka mele tenga kareremo. Aku kamu Gote moromo kiripi paa kake telina, maminye awilini pipi tirimo, akuna tutkundo pumbe kareremo.

<sup>20</sup> Kano kiripi paa kake telina iye te linonga nimbe lipe tapondombaindo kumbe lepa tukundo purumu. Pumbelie Melkisedek molorumu mele yuaku tepa waliwalima linonga nimbe Gote popo tondoli iye kiyendomu moromo, akumu Jisas.

<sup>1</sup> Aku iye Melkisedek yu ulke kombu Salem imbomanga iye nomi kingimu molopalie, Gote Paa Olando Kombumanga Pali Nokorumumunga kongono tendembaindo imbomanga Gote popo tondopa molorumula. Oi Abraham kombu tengapumbe opa tepe iye nomi king mare topa mundupelie eno meringi melema lipe mepa kelepa ulkendo ombai orumu kinye kano iye Melkisedek yu ombo aulkena kanopalie Goteni nu tepe kondopili nimu.

<sup>2</sup> Yuni aku tepe Gote kinye ungu nimbe Abrahamenga konge tenderimu wali Abrahameni 10 10 nimbe lipe merimu melemanga pali te te nimbe pengama wendo lipe Melkisedek tirimu. Melkisedek yunge imbi pulumu ulu tumbi nilima teremo iye nomi kingimu. Yu nokorumu ulke kombu Salemenga imbi pulumu, imboma kinye ame toli ulu pulumu. Akumunga iyemunga imbi talo tipem Imboma Kinye Ame Toli Ulu Pulumu Nokoromo Iye Nomi Kingimu.

<sup>3</sup> Melkisedek yunge anumu lapa talonga imbi talo naa lepa, yunge lapali kolepalenga tengi imbi kape naa lerimu. Yu meringi walimu kape, yunge kolorumu walimu kape naa lerimu. Yu Gote popo toli iyemu molorumu mele walite tiye kolorumu ungu te naa peremo. Yu Gotenga Malo waliwalima koinjo molopa kau purumo mele yuaku tepe mele molorumu.

<sup>4</sup> Melkisedek yu imbi paa olando molorumu mele pileio. Lino imbo talape awininga kolepa paa awili Abrahameni opa tepalie melema ltimu. Aku melemania pali 10 10 nimbe popo tipelie 10 akumunga te nimbe wendo lipe Melkisedek tirimu.

<sup>5</sup> Livaini kalopa ltimu iye mare Gote popo tondoli iyema moloringi. Kano iyemanga ungu mane te peremo, akumu i tepe mele: Israel imbomanga mele 10 10 ningenoingemelemanga te te ningi wendo liko Livai iyema tiengei nimbe peremo. Melema tiringi imboma kinye Livai iyema kinye angenupili, eno peya pali Israel imboma Abrahameni kalopa ltimu nalo Livai iyemani angenupilinga melema aku teko mare ltingi.

<sup>6</sup> Melkisedek yu Livaini kalopa ltimu iye te molo nalo Abrahameni Livai imboma oi naa kalopa lipili yunge mele 10 10 nimbe melemanga pali te te nimbe wendo lipe Melkisedek tirimuna ltimu. Goteni kano iyemu yu kinye tembo nimbe panjirimu iyemundo Melkisedekeni Goteni tepe kondopili nimula.

<sup>7</sup> Lino i tepe pimolo. Iye teni Goteni nutepa kondopili nimoaku iyemu yu iye olandomu, Goteni nu tepe kondopili nimona ltimu iye akumu mainyendomu.

<sup>8</sup> Akumunga ungu te peya peremo mele i tepe, Livai iyemani Israel imbomanga mele 10 10 ningenoiringi melemanga te te

ningo ltingi iyema koloringi. Nalo Abrahamenga mele 10 10 nimbe merimumanga te te nimbe ltimu iyemu Gotenga bukuna yu kolorumu ungu te nimbe naa moromo.

<sup>9</sup> Linoni Livai iyemani terengi mele ungu te manda nimolo. Aku iyemani kinye melemaaku teko ltimele kano nalo oi enonga melema Melkisedek tiringi.

<sup>10</sup> Paimbo enonga kolepa Livai oinaa meringi nalo Livai yunge kolepa Abrahamenga kangina tukundo molopili Melkisedekeni Abraham aulkena kane kane topa kanopalie Abrahameni melema tirimuna ltimu akumungaaku tepe nimolo.

*Oi popo tondoli iye moloringima mainyendo, popo tondoli iye Melkisedek mele koinjo moromo iyemu yu olandomu*

<sup>11</sup> Oi Mosesini Israel imbomando Gotenga ungu manema timbei ungu mane te tipelie nimbei, Livainga lapumuni Gote popo tondoli kongonomu teangei nimu.

Aku teko teangei nimu kinye kano popo tondoli iyemani kongono terengi mele manda terimu lemo kinye Aroni kalopa ltimu popo tondoli iyema mele iye te naa molopili, Melkisedek mele iye te kinye molopili ambe temona Goteni altopanimuya?

<sup>12</sup> Gotenga popo tondoli talapemu kolo wangoko tenge wali ungu manemu kape kolo wangoko tenge.

<sup>13</sup> Goteni popo tondoli iye nomi awili olandomu kolo wangopa molopa kau pumbelo nimu kano iyemu yu Israelenga malo Livaini kalopa ltimu imbo talapemunga tuku molorumu iye te, molo. Yu Israelenga malo teni kalopa ltimu imbo talapemunga tuku molorumu iye te. Yunge angenupili lapali kape teni Gote popo toko kaloringi alta polona pungo kongono naa terimu.

<sup>14</sup> Linonga Awilimi Israelenga malo Juhani kalopa ltimu iyemu molorumu lipo manjirimolo. Aku imbomanga te Gote popo tondoli iye te molombalo nimbe Mosesini oinaa nimu.

<sup>15</sup> Kinye iye koinjo te popo tondopa moloromo paa mona ltemona toya topo lipo manjirimolo akumu Melkisedek yu molorumu mele moromo iyemu. Aku iyemani Livai lapu popo tondoli moloringi akumanga paa olando moromo.

<sup>16</sup> Kano iyemu ungu manemuni Livaini kalopa limbelo iyema popo tondoli iyema molangei nimu akumanga yu popo tondoli iye te naa molorumu, molo. Nalo yu waliwalima koinjo molopa kau pumbelomunga engemu perimumunga yu popo tondoli iyemu moromo.

<sup>17</sup> Goteni yuaku tepe moromomundo oingu te i tepe nimbe panjirimu,

Melkisedek molorumu mele nu aku teko  
Gote popo tondoli iye te waliwalima  
molkau punio. *(Sng 110:4)*

<sup>18</sup> Aku ungumuni lino i tepa mele lipe ondoromo. Ungu mane oimu pange tepe lino lipe tapondombalo enge te naa perimuma Goteni kano ungu manemu kamukumu mainye pupili nimu, akumu lipe ondoromo.

<sup>19</sup> Mosesini ungu mane tirumani ulu tukume te wendo opili naa nimu. Akumunga kano popo tondoli iyemanga ungu manemu kolo wangopalie Goteni aulke koinjo penga te lupe akirrimu akumu onlando, oi ungu manemu mainyendo. Aku aulke koinjomunga pumbolio lino Gote moromona nondopo manda purumolo.

<sup>20</sup> Goteni Jisas popo tondoli iyemu molopili nimu wali we naa nimu. Yuaku popo tondoli iyemu molopili nimbe paimbo nio nimbe, nimbe panjipe mi lerimu. Oi popo tondoli iye moloringimaaku ulu tekomo langei nimbe Goteni mi naa lerimu,

<sup>21</sup> nalo Jisas Gote popo tondoli iye te molopili nimbe Goteni paimbo nio nimbe mi lerimu. Yundo i tepe nimbe panjipelite nimbei,

Awili Goteni yunge imbi yunu lepa paimbo nio nimbe mi lepalie nu popo tondoli iye waliwalimaaku teko molko kau punio nimbe panjipe mi lerimu.

Yu pele konopu alowa tepe ungu te lupe paa naa nimbelo, *(Sng 110:4)*

nimu.

<sup>22</sup> Aku tepe nimumunga Goteni lino kinyetembo nimbe ee nili ungumu Jisasaku ungumu paimbo ltemo enge tipili nimbeitirimuna moromo. Jisas lino kinye Gotenga tembo nimbe ee nili ungumu terimuaku onlando, oi ee nili ungumu maindo.

<sup>23</sup> Oi popo tondoli iye awinima moloringinalo molko kau naa puringi. Koloringi wali talape koinjo kolo wangoringi,

<sup>24</sup> nalo Jisas waliwalima koinjomolopa kau purumona yu kamukumu popo tondoli iyemu moromo. Akumunga waliwalima popo tondoli kongonomu tiye naa kolopa, tepe kau pumbelo, iye teni yu manda kolo naa wangombalo.

<sup>25</sup> Akumunga waliwalima koinjomolopa kau pumbelie Goteni eno lipe tapondopili nimbe waliwalima konge tepe moromomunga imbo mareninigolio paimbo Jisas na tepe ltimu ningi ipuki tiko yunge imbi leko konge tekolio Gote moromona nondoko purumele imbo akuma yuni waliwalima manda lipe tapondoromo.

<sup>26</sup> Popo tondoli iye nomi awili onlandoaku teliteni linonga nimbe tenderemo mele paa manda tendepa moromo. Yu Goteni kanopa iye paa kake telini karomo iyemu molopa, ulu te tepe naa kenjipe, ulu keri te teambo konopu naa

lepa Gote yunu mulu kombuna paa olando moromona molopili nimbe mondopa ulu alowa tendelimanga yu paa tule tepe moromo.

<sup>27</sup> Oi popo tondoli iye nomi awili olandomani teringi mele walimanga takiraki melema kalko popo tongeindo oi enonga ulu pulu kerima mainye pupili ningo melema popo toko kalkolio, pele imbomanga ulu pulu kerima mainye pupili ningo melema popo toko kalondoringi, nalo Jisasini aku tepe naa terimu. Yu yunu wali tendeku wali kau Gote popo topa yunge kangimu tirimuaku tepe imbomanga ulu pulu kerima kamukumu mainye pupili nimbe imbomani yu toko kondangei nimbe tiye kolopa Gotenga nimbe yunu wali tendeku wali kau tirimu.

<sup>28</sup> Aku nio ungumunga ungu te altopokamukumu nembo, Mosesinga ungu mane teni enge naa pelmai kombu iyema kanopa lipe popo tondoli iye nomi awili olandoma molangei nimo nalo Goteni Malondo nu popo tondoli iye nomi awili olandomu molani nimbe paimbo nio nimbe panjipe mi lerimu ungu akumu pele wendo orumu. Kano Malo aku kongonomu aratipelie molopa kau pumbelo.

## 8

*Goteni ungu koinjo te nimbe panjipe mi lerimunga Jisas mulu kombuna popo tondoli iye kiyendomu moromomunga ungumu*

<sup>1</sup> Nani Goteni kanopa lipe linonga popo tondoli iyemu molopili nimu nio akumunga ungu pulum i tepe, iye nindu kano telite linonga popo tondoli iye kiyendo moromo kanomu mulu kombuna Iye Nomi King Awili Olandomunga polomunga imbo kindopumbemoromo.

<sup>2</sup> Akuna molopa yu mulu kombuna angimo ulkemunga kiripi paa kake telimunga linonga nimbe Gote popo tondopamoromo. Yuaku kongonomu tendepa moromo ulke akumu Gote moromo ulke paimbomu. Akumu iye teni naa takorumu, Awilim yunu takorumu.

<sup>3</sup> Gote popo tondoli iye nomi awili olandomani Mosesini tirimu ungu manemuni nimu mele pilkolio tengende Gote kapi ningo we melema kinyekongisipsip kalolima kinyemekoongo ongo tiringi, akumunga iye Gote popo tondoli iye nomi awili olando pele orumu iye Jisas nio akumuni kape Gote kapi nimbe mele temepa ombarim.

<sup>4</sup> Nalo mai kombuna Gote popo tondoli iye ungu manemuni nimo mele pilkolio

Gote melema kalko tirimele iyema we mromele akumunga kano iyemu yu mai kombuna molkanje Gote popo tondoli iye te naa molka.

<sup>5</sup> Kano iyemani popo tondoli kongono teremele akumu Gote moromo mulu kombuna teremo kongonoma manda lepa, mulu kombumunga minimu mele manda leko moromele. Aku teko teremelemunga Gote maina molombalo sel ulkemu Mosesini kokele takombai terimu kinye Goteni yu mane tipelie nimbeindo, Nani Mulu Sainai ola Moses nu lipo ondondu aku tepa mele melema pali paa tumbi tiko manda leko teani, (*Kis 25:40*)

nimu.

<sup>6</sup> Aku paimbo, nalo kano iyemanga Gote popo tondoli kongonomu paa mandopa. Goteni Jisasindo tewi nimbe tirumu popo tondoli kongonomu paa penga olandopa. Aku tepa mele nanga imboma kinye tembo nimbe ee nili ungu oi nimbe panjirimunu aku mandopa. Goteni lino kinye tembo nimbe ee nili ungu koinjo nimbe panjipe mi lerimunu enge timbei Jisas tuku tingina angilipe Gote kinye lino kinye popo tiko molangei nimbe lipe tapondoromo iyemuni kamukumu wendo opili nimbe tenderimu,aku ee nili ungu koinjomu olandopa. Ungu koinjomuni lino kinye tembo nimbe panjirimo aku uluma olandopa, tembo nimbe ungu oi nimbe panjirimuni nimu aku uluma mainyendopa, akumunga ee nili ungu koinjomu olandopa.

*Goteni ungu koinjo nimbe panjipe mi lerimu ungumu olando, ungu oi nimbe panjipe mi lerimu ungumu mainyendo*

<sup>7</sup> Pileio! Goteni nimbe panjipe mi lerimu ungu oimunga engemu pelkanje Goteni altopa ungu te naa nimbe panjilka.

<sup>8</sup> Nalo imbomania teringi ulu Goteni kanopa keri pilipelie nimbei, Na Gote Awilimuni enondo nimboi,

"Pileio! Nani Israel imboma kinye Juda imboma kinye ungu koinjo te tembo nimbo ee nimbo panjipo mi lemboi waimu limbo.

<sup>9</sup> I ungu koinjo nio akumu oi enonga lanieli kolenale kombu Isip wendo lipo mepo oru walimunga kano imboma kinye nimbo panjipo mi leru mele tendeku tipe molo.

Nani eno kinye ungu nimbo panjipo mi leru ungumu naa pileringimunga nani eno molko kenjingei nimbo lipo umbulu tiru.

<sup>10</sup> Aku wali pele, Israeleni kalopa Itimu imboma kinye tembo nimbo ungu koinjo te nimbo panjipo mi lembo, akumu i tepa,

Nani eno kanopo penga pilimbo niu mele konopuni pilko kondangei nimbo nanga ungu manema enonga konopuna pepili panjindipo, nanga ungu manema konopu mondoko pilipo teamili ningololangaei nimbo nani kano ungu manema buk mele enonga konopuna imbi tombo.

Na enonga Gote molombo. Eno nanga imboma molonge.

<sup>11</sup> Aku waimu wendo ombalo wali imbo kamako imbi molombaloma kape, koropa imbi naa molombaloma kape, akumani pali na Awilimu ningololangaei imbi tingemunga imbomania enonga angenupili kinye kopu teko moromele imboma kape Awilimu moromo mele pilengei naa ninge.

Eno pali na liko manjiko molongemunga altoko ungu aku tepa ningua naa tinge.

<sup>12</sup> Nani eno kondo kolopo enoni teko kenjingine uluma tiye kolopo enonga ulu pulu kerima altope paa naa pilimbo nimbo," no. (*Jer 31:31-34*)

<sup>13</sup> Goteni pele lino kinye tembo nimbe panjipe mi lerimu ungu akumu ee nili ungu koinjomu nimi ungu akumuni oi Israel imboma kinye nimbe panjipe mi lerimu ungu oi akumu yuni kamukumu nondopa mainye pumbe teremo nimbe nimi. Mele oimi pora nimbei teremo akumu paimbo nondopa kamukumu pora nimbelo.

## 9

*Oi maina Gote popo tondoli iye kiyendo mani sel ulkena ari tirimelema kinye kerama kinye poinyena langima kape meko pungo Gote tiringimunga ungu mu*

<sup>1</sup> Oi Goteni Israel imboma kinye nimbe panjipe mi lerimu ungumuni Gote popo tokapi ninge mele nimi ungu manema perimu. Kano ungu oimunga Gote popo toringi ulke te maina angilerimu.

<sup>2</sup> Aku ulkemu sel ulke te takoringi, akuna tukundo kiripi talo lerimu. Takokolio, kiripi kiyendo lerimuna kandel amboromo melelu kinye bret kaloli Gotenga ningololangaei polomu kinye noiringi, aku kiripi imbi leko Kiripi Kake Telimu ningi.

<sup>3</sup> Anjikondo maminye awili tule teni pipi tirimu akuna anjikondo Kiripi Paa Kake Telimu lerimu.

<sup>4</sup> Gote popo tongeindo mele mune tolima kaloringi alta polo kou gol kandoringimu kinye ket kou gol kandoringimu kinye aku mele talo aku kiripina lerimu. Aku ketena Goteni Israel imboma kinye tembo nimbe mi lerimu ungumu ltemona kanangei nimbe lipe ondorumu melema lerimu. Aku ketena tukundo langi mana perimu mingi te kinye Arononga tu ambolorumu

kirikiri terimu kano tumu kinye Goteni Israel imboma kinye nimbe panjipe torumu unguma perimu kou talo akuma aku ketena tukundo lerimu.

<sup>5</sup> Aku ketemunga pipina ola muluna ensel au tiko mondoli talo kongo taloni pipimu ola oko poloringili pipi akuna meme ondoko Goteni imboma kondo kolopha enonga ulu pulu kerima tiye kolondorumu ningi. Nalo kinye wai te naa peremomunga aku melemanga puluma waye manda naa nimbo.

<sup>6</sup> Melema aku teko wamoringi kinye popo toli iyema wali walima kiyendo kiripina pungo enonga kongono teko popo toringi.

<sup>7</sup> Nalo popo tondoli iye kiyendomu kau anjikondo kiripi lerimuna tukundo purumu. Wali wali naa purumu. Poinye yaka nimbe wali tendeku wali kau purumu. We naa purumu. Kongi sipsip te topalie meme mare mepa tukundo pumbelie yunge ulu pulu keri terimuna kinye imbomanu ulu pulu keri naa liko manjiko teringima kinye aku mememu Gote popo topa tirimu.

<sup>8</sup> Aku ulumu manda lepa Mini Kake Telimuni aku oi Gote popo toringi sel ulkemu we angilipili Gote moromona manda pumolo aulke te wendo naa orumu nimbe lipe ondorumu.

<sup>9</sup> Kano sel ulkena ulu teringimani kinye tembalu uluma manda leko teringi mele i tepe. Oi waliwalima Gote popo toko melema we tiko ari tirimelema kalko tiringi akumanu Gote aku teko popo toringi imbomanga konopu wango naa niimu.

<sup>10</sup> Oi Gote popo toringi ungu manemani langi nongo, no nongo, kimbo ki kangima kulumie tonge aku uluma kau mane tiringi. Goteni imboma aku mi lepa nimbei tirimu unguma lombilko purumele nalo melema waye tepa amenge teremo wali kau kangindo kau ningi uluma pora timbelo.

*Akuna Kraistini Yunge mememu ondopa yunu Gote tirimu*

<sup>11</sup> Oi aku teringi nalo kinye Kraistyu Gote popo tondoli iye kiyendomu ombla molopalie Goteni mele pengama timbo niimu melema yuni mepa wendo oromo. Aku tepalie imbomanu takoringi mai kombuna angimo sel ulkemunga tukundo naa purumu. Yupe Gotenga ulke wengendeli mulu kombuna itemomunga purumu. Aku ulke paa olandopa paa ulke tukumemu.

<sup>12</sup> Yu Gotenga mulu kombuna angimo kiripi paa kake telina kamukumu wali tendeku wali tukundo purumu. Nalo akuna pumbeindo oi maina mulu sel ulkemunga tuku pungeindo teringi ulu yu naa terimu. Enoni kongi meme kinye kongi kao walo

kinye toko yokoli akuma Gotenga kumbekerena meko purungi mele aku tepe naa terimu, molo. Yunge mememu kau yunu meli pumbe wali tendeku wali kau Gote popo topa tirimu. Aku terimu ulumuni lino ulu pulu keri pali konopuna pepili mindili nolemala aulkrena wendo lipe Gote kinye kamukumu kopu tepo molopo kau pamili nimbe tepe Itimu.

<sup>13</sup> Goteni imbo kanopa kangimanga kalaro molopili moromele nimbe karomo imboma yuni kanopa kake tepili molonge nimbe kanopili ningolio ningimuni, oi kongi yokolima kinye kao peleama kinye toko yokolima kolko, kongi kao amboi kondoli, walo oi naa leli te toko tipena nomba pora tipili ningko kaloringi kinye norumu kekuma liko, yokolima tukundo ondoko munduko noikolio, kano imbomanga kangimanga pupe lteko toko munduringi kinye kano imboma altopa kanorumu kinye kangindo imbo kake telima nimbe kanorumu kala Gote kinye altoko kopu teko moloringi.

<sup>14</sup> Nalo Kraistinga mememuni oi teringi ulu pange tenderemo. Kraistyu ulu alowa te naa terimu. Aku molo. Mini Kake Teli Koinjo Mololi enge nimumuni Kraistyu yunu Gote popo topa tirimu. Aku iyemunga mememuni linonga kangindo kau kulumie naa tondoromo. Aku molo. Linonga ulu kerima kulumie torumuna Gotenga kumbekerena lino Imbo Kake Telima moromolo lipo manjirimolo. Aku tepe kulumie torumungu lino oi ungu mane enge naa peremomu naa lombieili. Molopa Kau Puli Gotenga teao nimu ungumu teamili.

*Kraistinga mememuni Goteni nimbe panjipe mi lerimu ungu koinjomu ka-mukumu enge pepili nimu ungumu*

<sup>15</sup> Jisasinga mememuni lino Gotenga kumbekerena tepe kake tenderimumunga Jisas yu Gotenga tembo nimbe mi leli ungu koinjomu enge tirimuna yu imunana iyemu moromo. Oi ungu manemu we lepili ulu keri teringi imboma wendo limbei kolorumu. Aku tepe kolorumumunga Goteni imboma waio nimbe alako torumu ungumu pilko lombilenge imboma pali molko kondoko molko kau punge. Aku ulumu Goteni yunge bakuluma timbo nimbe oi niimu.

<sup>16</sup> Iye teni yu kolombai yunge nini melema moke tembai narini limbelo akumu nimbe para tipe pipiana toromo. Nalo bakulumanu kano melema we manda naa limele. Pele lapa kolomo ningi imbomanu kanokolio manda, kinye lapani moke tepe noindirimo melema liengei nimele.

<sup>17</sup> Iye teni ungu nimbe panjirimo iyemu we moromo wali yunge ungu nimbe panjirimomu ulure manda naa teremo, we ltemo. Iyemu kolombalo wali nini ungu nimbe panjirimu mele aku teko manda melema ling.

<sup>18</sup> Aku tepala kongi te toko yokolima ondoko teringi ulumuni oi nimbe panjirimu ungu manemu enge tingei teringi.

<sup>19</sup> I teko mele teringi: Mosesini oi imboma pilengei nimbe Gotenga ungu manema pali nimbe tipelie kongi kao walo mare kinye kongi yokoli mare kinye topa yokolima mingina kolopa, no kinye topele mapele topalie, unjo kelo isop kola te lipe sipsip indi kondoli maren ka topalie, yokolima tuku mundupe wendo lipelie Goteni tirimu ungu manema molorumu bukuna kinye imbomanga kangina kinye pupe lteko topa mundurumu.

<sup>20</sup> Aku ulu tepalie nimbei, yokoli imu Goteni eno kinye ungu nimbe panjipe mi lerimu ungumu pilko tengen tiko molangei nimomu eno kinye wendo ombai enge tipili nimo yokolimu nimu.

<sup>21</sup> Aku tepa mele Gote popo toko kaloringi sel ulkemu kinye sel ulkena tukundo Gote popo tongeindo noiringi melema kinye pali Mosesini yokolimu pupe lteko topa kandrumu.

<sup>22</sup> Oi ungu manemu nimbe molorumu mele i tepa: Mele awini Goteni kanopa mele kake telima nimbe kanopili nimbe yokolimani kau manda tendembalo. Kongi kera kape te toko kondokolio yokoli naa ondonge lemo aku Goteni imbomanga ulu pulu kerima naa kandepea tepa ltendembalo.

*Imbomanga ulu pulu kerima Goteni tiye kolondopili nimbe Kraist Yu Yunu Gote popo topa tirimu ungumu*

<sup>23</sup> Gote popo toli sel ulkena lerimu melema muluna ltemo melema manda lepa lerimu. Mele akuma Gotenga kumbekerena kake tepili ningi kongi kerama tokolio yokolima liko tanda tiko kandoringi. Nalo mulu kombuna ltemo melema kake tepili ningi oi teringi ulu maindo munduko memo enge nili olandomuni manda tengen.

<sup>24</sup> Kraist kolopa makilipe koinjoi molopalie ya maina Gotenga kiripi kake teli kini wamoko muluna ltemo ulke manda leko teringina tukundo naa purumu. Aku molo. Yu mulu kombuna tumbi tipe purumu. Akuna lino tapombai Gotenga kumbekerena pumbe moromo.

<sup>25</sup> Poinyemanga yaka nimbe popo toli iye kiyendomuni kongi kera manga yokolima lipe kiripi paa kake telina pumbe popo topa tirimu. Nalo Jisasini poinye yaka nimbe aku ulu naa terimu. Wali tendeku wali

kau Gotenga mulu kombuna tuku pumbe yu yunu tirimu.

<sup>26</sup> Kraistini poinye yaka nimbe aku ulu telkanje poinyemanga yaka nimbe yu mindili nolka. Mulu mai talo Goteni terimu wali akuna mindili nombalie nolipe ombo kinye i wali olka. Nalo aku ulu naa terimu. Kinye peyalime waimu nondopo oromona Kraist Goteni imbomanga ulu kerima kulume topa tiye kolopili nimbe ya i mai kombuna wali tendeku wali kau ombo yu yunu popo topa Gote tirimu.

<sup>27</sup> Imboma pali ya maina wali tendeku wali kau kolkolio altopa kot tendepa pilimbelo kombuna punge ulu pulumu peremo.

<sup>28</sup> Aku tepa mele imbomanga ulu pulu kerimanga umbuni mepa wendo limbei Kraist yu yunu Gote popo topa tirimu. Altopa talo tepa ombalo aku wali ulu pulu kerima wendo limbei naa ombalo. Imbo yu nokoko moromelema tukundo limbei ombalo.

**Kraistini Linonga Nimbe  
Kamukumu Gote Popo  
Tondombaindo Wali Tendeku  
Wali Kau Yu Yunu Gote  
Tirimu Kinye Ari Tirimelema  
Kalko Tiringi Uluma  
Kamukumu Mainye Purumu  
Ungumu**

## 10

*Oi Gote popo toko kalko tiringi melemani ulu pulu kerima manda naa wendo lipe ltenderimu ungumu*

<sup>1</sup> Mosesinga ungu manemu i tepo kanamili ulu pengamu altopa ombalomunga oi mini mele kandomolo. Nalo lino naa wamba lipe ondorumu. Aku ungu manemuni poinyemanga yaka nimbe wali wali Gote kano teko kau popo toko tieio nimu. Akumunga ungu manemuni imboma aku teko Gote popo tongei ulke oringga kamukumu molko kondangei manda naa tepa tumbi tirimu lipo manjirimolo.

<sup>2</sup> Aku teko teringi ulumani enonga konopuma kamukumu kulume tondolkanje altopa ari tirimelema toko naa kalemala. Kamukumu kulume tolkanje wali tendeku wali Gote popo toko kalkolio, enonga ulu pulu kerima mainye pulka, kano kinye konopundo umbuni te naa pepa, ulu pulu kerima we naa peremomunga mongo naa limolo ningi pilkolio altopa ari tirimele mare naa kalko aku uluma tiye kolemala.

<sup>3-4</sup> Nalo kongi kao peleama kinye kongi memema kinye toko kaloringimanga mememani enonga ulu pulu kerima

kamukumu kulumie manda naa tondorumungu waliwalima ipo leli tangoli poinyemanga pali Gote altoko kongi aku tepama kaloliko pungolio Gotenga ungu manema pule toringimunga enonga konopuna ulu pulu kerima we pepa kau purumu mele kelko liko manjiringi.

<sup>5</sup> Akumunga Kraist mai kombuna ombai tepalie nimbei,  
Ari tirimelema toko nu kalko tiringima  
kinye mele nu we tiringi melema  
konopu naa mondokolio nuni na  
imbo kangi te tumbi tiko noikolio tiri-  
nu.

<sup>6</sup> Popo toko tipena nopili ningko kaloringi  
ari tirimelema kinye, ulu pulu keri  
teremolomanga kalopo tirimolu  
ningko kaloringi ari tirimelema kinye  
akuma nu konopu naa mondonoro.

<sup>7</sup> Akumunga nani nimboi, "Gote, na i moro.  
Nuni nando teani puwi ninu mele  
teambo nimbo nanga kangimu imbom-  
anga nimbo nu popo topo tipo om-  
boi tero. Nani aku tepo tembo mele oi  
bukuna toringina moromo kanomu  
nio," *(Sng 40:6-8)*

nimu.

<sup>8</sup> Paimbo Goteni yunu imbomando teaio  
nimbe ungu mane tirimu mele pilkolio  
tengeindo ari tirimelema kalko yu tiringi  
nalo Kraistini nimbu nio ari ungu-  
munga oi Kraistini nimbei, "Ari tirimelema  
toko nu kalko tiringima kinye mele nu we  
tiringi melema kinye tipena nopili ningko  
kaloringi kongima kinye ulu pulu keri  
konopuna peremomanga kalopo tirimolu  
ningko kaloringi kongima kinye, akuma  
kanokolio nu konopu naa mondonoro,"  
nimbu.

<sup>9</sup> Altopa nimbei, "Na i moro, nuni nando  
teani puwi ninu mele teambo nimbo om-  
boi tero," nimbu. Aku tepalie yu oi popo  
tongeindo ari tirimelema kaloringi ulu pulu  
topa mainye mundupe, yunu Gotendo  
tirimu ulu ari mele ulu pulu koinjo terimu.  
<sup>10</sup> Goteni yundo tewi nimbu ulumu pilipe  
lipelie Jisas Kraistini teambo nimbe om-  
ba yunge kangimu wali tendeku wali kau yunu  
kamukumu Gote popo topa tirimumunga  
Goteni kanopa konopu tipelie linonga ulu  
pulu kerima tiye kolondopa lino yunge  
imbo kake telima molangei nimbu.

*Kraistini Gote popo topa tirimu mele-  
muni ulu pulu kerima paa manda kulumie  
tondoromo ungumu*

<sup>11</sup> Walimanga pali Gote popo tondoli  
iyema ola angilko popo tondoli kongono  
tepundala teringi. Paa waliwalima ipu-  
leli tangoli ola angilko ulu pulu kerima  
paa manda naa kulumie tondopili ari tir-  
imelema toko kaloringi.

<sup>12</sup> Nalo Kraistini imbomanga ulu pulu  
kerima wendo limbei wali tendeku wali  
kau Gotendo yunu tirimu kinye manda ter-  
imu kolo we molorumu. Yu aku tepe pora  
tipelie Gotenga imbo kindo pumbe molo-  
rumu.

<sup>13</sup> Akuna molorumu kinye yandopa  
Goteni Jisas yunge opa pulema kamukumu  
topa mainye mundumbelo walimu wendo  
ombalomunga we nokopa moromo.

<sup>14</sup> Yuni aku oi kulumie tondorumu imbo  
akuma Gotenga imbo tukumema molangei  
nimbe yunu yunge meme wali tendeku  
wali ondopa kolorumu ari ulumuni imbo  
kanoma paa molko kondoko molko kau  
punge.

<sup>15</sup> Oi Mini Kake Telimuni linondo ungu  
aku tepe enge tipe nimbei,

<sup>16</sup> Awilimuni nimbei, "Aku wali pele  
imboma kinye tembo nimbo mi lepo  
ungu koinjomu ari tepe, 'Nanga  
ungu mane imbomanga konopundo  
panjindipo ari ungumu enonga  
konopuna lepa pupili,' nimbo topo  
panjindimbo." *(Jer 31:33)*

<sup>17</sup> Aku tepe nimbelie ungu te kape nimbei,  
Enonga ulu pulu kerima tiye kolopo altopo  
naa lipo manjimbo, *(Jer 31:34)*

nimu.

<sup>18</sup> Akumunga Goteni imbomanga ulu  
pulu kerima kamukumu kandepea tepe  
ltendemo lemo linonga ulu pulu kerima  
tiye kolopili nimbo ari tirimelema topo  
kalomolo kongonomu altopo naa temolo.

*Kraistinga uluma teremolo mele kau  
tepo molopolio tiye naa kolomolo ungumu*

<sup>19</sup> Ango kame, Jisas yunge mememuni  
linonga ulu pulu kerima kandepea tepe  
ltenderimumunga linoni Gotenga Kiripi  
Paa Kake Telimunga pipili naa kolopo  
manda tuku pumolo.

<sup>20</sup> Lino koinjo molamili nimbe aulke  
koinjo Jisasini akiririmungu linoni  
Kiripi Paa Kake Telina manda tuku  
pumolo. Aku aulke koinjomu maminye  
awilimuni ulke kerepulu kake telimu  
nambu tirimumunga tukundo pumbelie  
Jisasini akirindrimu. Aku maminye  
awilimuni yunge kangi mele.

<sup>21</sup> Linonga Popo Toli Iye Awilimu yuni  
Gotenga imbo wayema tapu teremo.

<sup>22</sup> Jisasinga mememuni linonga ulu ker-  
ima kandepea tenderimu. Aku ulu ker-  
ima linonga konopuna pepa umbuni tir-  
imumu uluma we lipo manjirimoloma yuni  
aku uluma kape kandepea tepe ltenderimu.  
No kake telimuni linonga kangima kulumie  
tondorumu. Akumunga linonga konopu  
toya topili ipuki tipo Gote moromona non-  
dopo pamili.

<sup>23</sup> Eno kinye tembo nimbe panjirimu iyemuni kolo naa topa tembo nimo mele paimbo tembalo kani eno yu lino kinye tepo kondombo nimbe panjirimu mele paimbo tembalo ningi oi enge ningi ipuki tiringi mele tiye naa kolko, ambolko kondokolio yu paimbo ombo tembalo ningi konopu tiko nokoko molaio.

<sup>24</sup> Konopu manjiko Gotenga imboma ulu penga teko konopu mondangei ulu nendo yando teangei makinjeio.

<sup>25</sup> Kristen imbo mare angenupili kinye liko maku naa toku tuku naa moromele aku ulu naa teaio. Kraist ombalo waimu nondopa oromomunga lino Gotenga imboma nendo yando enge nimbo tepo imbo marenga konopu toimbo topili enge tiemili.

### *Gotenga Malo ungu taka paa naa ton-damili ungumu*

<sup>26</sup> Pileio. Linoni Kraistinga ungumu pilipolio ulu kerima teamili konopu timolo lemo ari tirimelema kalko popo toli ulu teni aku ulu kerima manda naa kandepea tepa ltendembalo. Aku molo.

<sup>27</sup> Aku tepo temolo lemo kot awili wendo ombo Gotenga opa pule imboma tipeni nombai nomba peremo aku ulumu lino pipili kolopo nokopo moromolo.

<sup>28</sup> Imbo teni Mosesini ungu mane trimuma topa tangondorumu wali iye taloni molo yupokoni kanokolio ningi tiringi kinye yu kondo naa kolko tumbi tiko kamukumu toko kondoringi.

<sup>29</sup> Oi paimbo teko kenjiriringi imboma aku teko mindili tiringi lemo imbo teni Gotenga Malo yu ulure molo nimbe tiye kolopa ungu taka tondopa, Goteni ungu koinjo nimbe panjipe mi lerimu ungumu Kraistinga mememuni enge tirimu meme akumuni kano imbonu Gotenga imbo konopu kake telimu molopili nimu aku mememu ulure molo nimbe ungu taka tondopa, Goteni lino konopu mondopa lipe tapondoromo mele lipe ondoromo Mini Kake Telimu ungu taka tondoromo imbo akumu paimbo olandopa mindili nombalo molo we moromo konopu ltemeleya? Paa mindili nombalo.

<sup>30</sup> Aku ambe telka, lino ungu nimbe panjirimu iyemu lipo manjirimolo. Akumuni nimbei,

Teko kenjirimelemanga pundu toli kongonomu nanga kongonomu. Nanu kau pundu topo eno mindili timbo, (*Lo 32:35*)

nimbeline ungu te peya nimbei,  
Awilimuni yunge imbomanga kotemu yunu tendepa kot pilimbelo, (*Lo 32:36*)

nimbe aku ungumu moromo.  
<sup>31</sup> Waliwalima molopa kau puli Gote paa enge niili olandopamuni imbo tendo

mumindili kolopalie mindili nani nimbelo lemo paimbo yu paa mini wale ltembalo.

### *Lino paa ipuki tiko molamili ungumu*

<sup>32</sup> Eno oi Gotenga ungumu pulu polko pilkolio pilko Itingi kinye teringi mele altoko liko manjeio. Eno mindili tiringi wali we mindili nongo enge ningi molko Gote tiye naa koloringi.

<sup>33</sup> Wali marenga eno liko imbonanga kumbe kerena anjiko eno ungu taka tondoko mindili nangei ningi. Wali mare aku teko mindili noringi imboma eno kinye tapu toko molko liko tapondoringi.

<sup>34</sup> Ka tiringi ka ulkena peringi imbonaga enoni kondo koloringi. Enonga mele paa penga waliwalima lepa kau pumbe melema mulu kombuna we ltemo, ningi pilkollo enonga melema ltingi wali eno liengei ningi tono kolko tiye koloringi.

<sup>35</sup> Oi aku teko teringi mele altoko pilkolio paimbo lipe tapondoromo. Paimbo aku tepo molomolo, ningi enge ningi ipuki tiringi mele kinye tiye naa kolangei. Enge ningi ipuki tiko molonge wali akumunga mele penga timbelona eno awili teko lingi.

<sup>36-38</sup> Tiye naa kolangei nimbe ungu te peremomu i tega,

Wali koltalo kau ombo pumbelo kano kinye ombo nimu iyemu paimbo ombalo. Yu walitikale ombalo. Nani imbo tumbi nilima nimbo karo imboma nani nimbo moro mele paimbo ningi ipuki tirimelemunga koinjo molko kau punge.

Nalo na ipuki tirimele ulu tiye kolonge lemo nani eno kinye konopu naa timbo, (*Hab 2:3-4*)

nimbe aku tepa moromo. Akumunga Goteni lino teaio nimo mele temolo kinye yuni timbo nimbe panjirimu mele pengama limolo ningi pilkolio ipuki tirimele mele tiye naa kolko, aku teko molaio.

<sup>39</sup> Nalo lino imbo tiye kolkolio kombu kerina purumele imbomanga imboma naa moromolo. Aku molo. Lino paimbo nimbo ipuki tipolio mini pali koinjo molopa kau puli ulu pulumu limolo imboma moromolo.

## **Goteni Nimo Mele Linoni Paimbo Nimbo Pilipolio Enge Nimbo Molamili Ungumu**

### **11**

#### *Ipuki tirimolomunga ungu pulumu*

<sup>1</sup> Gote paimbo nimbo ipuki tirimolo nioaku enge nimbe ipuki tilimunga ungu pulumu i tega, Goteni lino timbo nimbe panjirimu melema paa limolo nimbo ipuki tipo nokopo moromolo. Melema mongoni naa karomolo nalo mele akuma paa ltemo nimbo ipuki tirimolo.

<sup>2</sup> Imbo oi moloringimani aku teko ningi ipuki tiringimunga Goteni eno kanopa penga pilipelie teko kondoromele nimu.

<sup>3</sup> Goteni nimo mele lino paimbo nimbo ipuki tirimolomunga Goteni mulu mai talo tembai wendo opili nimu ungumuni mulu mai talo wendo orumu nimbo lipo manjirimolo. Akumunga mele naa lerimu melemani Goteni lino karomolo melema paimbo terimu nimbo lipo manjirimolo.

*Abel kame Enok kame Noa kame Gote ipuki tiringi temane mare*

<sup>4</sup> Abeleni Goteni nimu mele paimbo nimbe ipuki tilipe molorumumunga Goteni kanopa penga pilerimu mele te Gote popo topa kalopa tirimu nalo Keineni Gote popo topa kalopa tirimu melema Goteni kanopa keri pilerimu. Abeleni Gote paimbo nimbe ipuki tirimumunga Goteni Abel iye tumbi nilimu nimbe imbi tirimu. Abel oi kolorumu nalo ipuki tipe ungu nimumuni kinye kape lino we nimo.

<sup>5</sup> Enokeni Goteni nimu mele paimbo nimbe ipuki tipe molorumumunga naa kolorumu. Yu koinjo molopili Goteni yu lipe mulu kombuna meli purumu. Goteni yu lipe meli purumu wali imbomani yu koroko naa kanoko ltingi. Goteni Enok oi lipe meli naa pupili Enokeni ulu terimuma Gote kanopa penga pilerimu, ungu aku tepa Gotenga bukuna moromo.

<sup>6</sup> Imbo teni Gote paimbo moromo konopu lepalie Gote kinye ambe tepo molombonje konopu kimbo tipelie, Gote yu lipe tapondombalo nimbe ipuki tipelie yunge kumbekerena manda pumbelo. Aku tepa naa nimbe pimo lemo paa manda naa pumbelo. Akumunga Goteni nimo mele paimbo nimbe ipuki naa tipelie Goteni kanopa penga pilimbelo ulu mare manda naa tembaloo.

<sup>7</sup> Noa Goteni nimu mele ipuki tipe molorumumunga Goteni yundo Maina umbuni te wendo opili nimboi tero nimu wali pilipelie, oi naa kanorumu nalo Noani Goteni paimbo nimo nimbe nona lembaro sip awili te takorumu. Akuna pungolio yunge ambo bakuluma kinye wai keri wendo orumumunga wendo lipe tepe ltimuna penga teko moloringi. Yuni Goteni nimu mele ipuki tipelie terimu ulumuni we maina moloringi imbonanga ulu kerima lipe ondoramu. Aku tepa Gote ipuki tirimumunga Goteni yu iye tumbi nilimu nimbe imbi tirimu.

*Abraham Sara talo Gote ipuki tiringili ungumi*

<sup>8</sup> Abraham Goteni nimu mele ipuki tipe molorumumunga Goteni yundo nu morono kombumu tiye kolko altopo timbo kombuna puwi nimu ungu pilipelie kano

kombu tulena lerimumunga oi naa kanorumu nalo ungumu pilipe lipe tengi tipe we purumu.

<sup>9</sup> Goteni nimu mele ipuki tirimungunga Goteni timbo nimbe panjirimu kombuna pumbelie iye ombo angililimu mele pumbe molorumu. Paimbo ulke te kamukumu naa takopa, sel ulke te takopa pelipe akuna Aisak kinye Jekop kinye molorumu. Aku lapumu Goteni nimbe panjipelie eno Timbo nimbe nimu maimu ltimele lapumu.

<sup>10</sup> Goteni yunu pilipelie ulke kombu tengi kamukumu angilimbelo ulkema takopa pora tirimu kombuna molombo nimbe pilipelie Abrahameni ipuki tipe nokopa molorumu.

<sup>11</sup> Abraham bakulu membai poinyema pora nimu, yunge ambo Sara wangono perimu, nalo Goteni nimu mele paimbo ningi ipuki tiko moloringilimunga Goteni elo enge tirimu kinye bakumu meringili. Goteni tembo nimbe panjirimo mele paimbo teremo, kolo naa toromo ningi ipuki tiringili.

<sup>12</sup> Akumunga iye te anda lepa iye kololi mele molorumu iyemu imbo paa awininga kolepa molorumu. Imbo kombukandiye mele molo kou ukiye mele kambu paa manda naa tonge imboma yuni kalopa ltimu.

<sup>13</sup> Kano iyemani Gote paimbo ningi ipuki tiko mololiko pungolio koloringi. Eno mai kombuna oi we molkolio Goteni timbo nimbe panjirimu melema oi naa ltingi. Pele paimbo limolo ningi konopuni pilerengi akumu tule tepe lerimuna mongoni mele kanokolio limolo ningi konopu tiko molkolio imbo moloringi kinye pipili naa kolko lino ya i mai kombuna imbo ponenge lepo ombo angimolo ningi.

<sup>14</sup> Imbomani aku teko nimele kinye pilipolio enonga kamukumu molonge kombu te koroko kanoko lingeindo nimele nimbo lipo manjirimolo.

<sup>15</sup> Kombu tiye kolko oringi kombuna kelepo pumolo ningi pilimalanje eno kelko manda pulimala.

<sup>16</sup> Nalo molko oringi kombu akumu altoko konopu kimbo tiko naa molkolio kombu paa penga olando te lupe akuna pamilia ningi pilerengi. Aku kombumu mulu kombumu. Akumunga Goteni yu paimbo ningi ipuki tirimele imbona akuna molangei nimbe ulke kombu penga te tepe wamopa terimu. Aku tepalie aku imbomani Gotendo nu linonga Gote ningi ungumu pilipelie ungu kanomu mai naa kolorumu.

<sup>17-18</sup> Goteni Abrahameni tewi nimbo mele paimbo pilipe lipe tembalonje kanambo nimbe manda manjirimu kinye Abrahameni Goteni tembo nimu mele

paimbo tembalo nimbe ipuki tipelie yunge malo Aisak Gote popo topa kalopa timbei terimu. Paimbo oi Goteni Abrahamendo nimbe panjipelie nimbeindo, "Nunge malo Aisakeni kalopa limbelo imboma kau nuni kalko lini nimbo, nimbo panjindu imboma molonge," nimu nalo aku pilipe paimbo nimo, paimbo aku tepa tembalo nimbe pilipelie yunge malo tendekumu kau molorumumu aku ulu tembai terimu.

<sup>19</sup> Abrahameni konopuna pilipelie, Aisak kolombalo kinye Goteni yu manda makin-jimbelo nimbe pilerimu kani linoni ungu manda lepolio i tepo nemili Abrahameni yunge marenu imbo ono kombuna wendo mele ltimu.

*Aisak kinye Jekop kinye Josep kame Gote ipuki tiringi ungumu*

<sup>20</sup> Aisakeni Goteni nimu mele paimbo nimbe ipuki tipe molorumumunga Jekop kinye Iso talo mane ungu tipelie altopa elo kinye wendo ombalo ulu oi nimbe tirimu.

<sup>21</sup> Jekoponi Gote ipuki tipe molorumumunga kolombai tepalie yunge malo Joseponga malo talo mane ungu tipelie tu ambolopa pi polopa mai kanopa Gote kapi nimu.

<sup>22</sup> Joseponi Gote ipuki tipe molorumumunga yu nondopa kolombai tepalie yunge Israel imboma eno altoko Isip kombu tiye kolko punge nimbe tirimu. Punge wali yunge ombele kinye tengen iungumu nimbe tirimu.

*Moses Gote ipuki tirimu ungumu*

<sup>23</sup> Mosesinga anumu lapa taloni Gote ipuki tiko moloringilimunga Moses mekolio yu oli yupoko lopeke teringili. Yu ungu paa penga ningi kanokolio Isip iye nomi kingimunga teao nimu ungumu umbulu tingilindo pipili naa koloringili.

<sup>24</sup> Moses Gote ipuki tipelie akopa awili lepalie wali Isip imbomanga king lemenunga malo naa nengei konopu lerimu.

<sup>25</sup> Ulu kerima lepa naa puli tono koromele ulu naa tembo konopu lepalie Gotenga imboma umbuni meremele mele aku tepo membo konopu lerimu.

<sup>26</sup> Yuni konopuna pilipelie Isip kombuna mele yakela tel iengama pali nanga noilkanje ulure molo nimbe pilipelie Goteni mele penga timbo nimu melema altopa limbo nimbe pilipelie, Kraistainga imbo molorumunga na teko mai kondonge lemo aku penga nimbe enge nimbe angilerimu.

<sup>27</sup> Moses Gote ipuki tipelie Isip tiye kolopa purumu wali Isip iye nomi kingimuni yu kinye mumindili kolorumumunga pipili kolopa kowa naa purumu. Imboman Gote mongoni naa karomele nalo Moses Gote kanokolio teremele ulu mele tepalie enge nimbe angilerimu.

<sup>28</sup> Moses Gote ipuki tipelie Goteni Israel imboma penga teko molangei nimu aku Pasova waina Israel imbomando kongi sipsip topolio yokolima ulke kere pulu malio wape tendamili nimu. Aku tengen wali topa kondombai ensel teni enonga ungulu komolayema naa ombo topa kondombalo nimu.

*Israel imbo awini Gote enge ningi ipuki tiringi ungumu*

<sup>29</sup> Israel imbomani Gote ipuki tiringimunga Nomu Kuta Kondoli kumbulupe maimu kapu lerimu kinye nekondo puringi. Nalo Isip iyemani Israel imboma lombili puringi kinye no wangoko koloringi.

<sup>30</sup> Israel imboma Gote ipuki tikolio Jeriko kombu kouni teli papemu wali kite yupoko pakera andoko makai tenderingi papemu ungu torumu.

<sup>31</sup> Wapera toli ambo Rahap Gote ipuki tipelie Israel iye taloni Jeriko imboma ambe teremelenje ningi kanoko panjingili oringili kinye yuni elo lipe tapondorumunga Israel imbomani Gotenga ungu naa pilko ltingi imboma ongo toringi wali yu naa toringi.

<sup>32</sup> Aku temane mele peya mare tamboya? Molo. Wai mare naa itemo. Gideon kame Barak kame Samson kame Jepta kame Devit kame Samuel kame Goteni altopa tembalo uluma oi neio nimbe tirimu iyema eno kinye temane mare topo tilka nalo aku temanema topo timbo wai naa itemo.

<sup>33</sup> Gote ipuki tiringimunga maren iye nomi king marenge ami iyema kinye opa tekolio enoni nokoringi kombuma toko kaloringi. Maren imboma molko kondangei ningi ulu tumbi nilima teko nokoringi. Maren Goteni eno tepo kondombo nimbe panjirimu mele eno molangei paimbo ltingi. Maren laiononga kerema pipi tiringi.

<sup>34</sup> Maren tipe awili tepe norumumu toko kumunduringi. Maren kowa puringi wali Goteni nokopili imbomani baineten toko naa kondoringi. Mare oi enge te naa perimu nalo pele enge pepili moloringi. Mare opa tengendeindo paa iye enge ningi mindili telima molko, enonga opa pule ami iyema toko munduringi.

<sup>35</sup> Mare koloringima kelko makilko ola moloringi kinye anupilini eno koinjo moloringi kinye kelko ltingi. Nalo mare ka tiko mindili nongo kolangei ningi koipeni tokolio ningeindo, enoni Gotenga ungumu tiye kolomolo ningi kinye we pangei nimolo ningi nalo kolomolo lemo kelepo makilipo ola molopo, kamukumu paa koinjo molopo kondopo kau pumolo

konopu lekolio enonga opa pulemani ningi ungumu naa pileringi.

<sup>36</sup> Mare ungu taka tondoko ka pulteni enge ningi toko, mare ka seneni ka toko ka ulkena panjiringi.

<sup>37</sup> Imbo mare kolangei ningi kouni toringi. Imbo mare koinjo molangei so\* liko imunana karu leko alowa teringi. Mare opa teli bainetenai toko kondoringi. Mare ipuki tikolio wale pakoli molo lerimuna kongi sipsip molo mememanga kangima liko maminy mele pakoringima imbomani eno toko puringi. Melema molo lepa paa koropa pupili moloringi. Mare mindili noringi. Mare, imbomani teko kenjiringi.

<sup>38</sup> Mare imbo naa peli kombumanga kinye, mulu kembomanga kinye, kou angamanga kinye, mai angamanga kinye, pungo peliko andoringi. We mai kombuna moromele imbomani naa telemala ulumu Gote ipuki tiringi imbomani aku ulu teringi.

<sup>39</sup> Aku imboma Gote ipuki tiringina Gote kinye enonga imbi moromo. Nalo mai kombuna molkolio Goteni tembo nimbe panjirimulu ulu pengama naa ltingi.

<sup>40</sup> Aku ambe telka Goteni linonga ulu penga wendo opili wai o pi panjirimu. Goteni lino kinye popo tiko eno molko kondangei nimu.

## 12

### *Lino Jisas kanopo ipuki tiemili ungumu*

<sup>1</sup> Oi imbo paa awini aku teko Gote ipuki tikolio teko kondoko moloringimunga aku tepo lino tepo kondamili mele liko ondoromele kani kanopo pilipolio pele kinye lino kape aku tepo mele pengama limilindo Goteni owe te panjirimu owemunga lkiko pangaei nimuna pilipolio paa lkiemili nimbo lino lipe naa tapondoromo ulu lupe lupema tiye kolopo, ulu pulu kerimani kape lino naa ambolopili nimbe tiye kolopo konopu enge nipili keru keru lipo lkiemili.

<sup>2</sup> Enge nimbo lkimirindo lino ipuki tirimolo ulu pulumunga pulu iye Jisas wambo kanolipo pamili. Linonga ipuki tirimolo ulumu yu manda tendembalo. Yu pilipelie, Goteni tewi nimo mele tepo kondombo kinye paa tono kolopo molopo kondombo nimbelie yu mindili nomba unjo polopeyana kolorumu. We imbomani unjo polopeyana koromele imbona aku imbo kerima nimele nalo Jisas unjo polopeyana uku toko panjingemunga pipili naa kolopa konopu awini lipe naa mundupelie akuna angilipe kolorumumunga kinye Gote kombu nokopa moromo polomunga imbo kindo yu pumbe Gote kinye moromo.

*Goteni lino umbuni tirimomu molopo kondamili nimbe tepe wamorunu*

<sup>3</sup> Lino tiye naa tepili ningi Jisasini terimu ulu wamongo pileio. Ulu pulu keri teli imbomani Jisas kinye mumindili kolko mindili tiringi kinye yu enge nimbe molorumu mele wamongo pilko molaio. Yu aku teko teringi kinye molorumu mele liko manikolio eno paimbo konopu enge nipili molko, tamba naa ningi ipuki tirimele mele tiye naa kolaio.

<sup>4</sup> Paimbo, ulu pulu kerima teko maindo mundungei opa teremele nalo meme te oi naa oli.

<sup>5-6</sup> Gotenga bukuna moromo ungu teni eno enge ningi molangei nimbe eno yunge bakuluma nimbelie enondo nimu ungumu komu tindingeya? Aku ungumuni nimbei, Nanga bakulamu, Awilimuni imbo konopu mondoromoma molko kondangei nimbe mindili tirimo.

Yunge bakuluma molangei nimo imbo akuma mapuni toromo. Akumunga Awilimuni nanga ungumu pilipili nimbelie mindili timbelo kinye akumu ulure molo naa ningi, yuni nu nimbe amenge tepe mane timbelo kinye umbuni awini naa kolani. (Snd 3:11-12)

<sup>7</sup> Goteni eno tepe wamopili enge ningi angileio. Gote eno nimbe amenge teremo aku ulumu Lapalini enonga bakuluma ningo amenge teremele mele. Bakulu te yunge lapani mane naa tirimo bakulu te moromoya? Molo.

<sup>8</sup> Bakuluma pali enonga lapalini molko kondangei ningi mapuni toko mane tirimele aku mele Goteni eno molko kondangei nimbe mindili naa timo lemo eno mepa Iteli bakuluma mele moromele, yunge bakulu tukumema naa moromele.

<sup>9</sup> Imu kape liko manjeio! Lino bakuluma molorumulu kinye linonga ya maina lapalini molko kondangei ningi mindili tiko mane tiringi kinye linoni enonga ungumalipo awili tipo takalipo molopo paa teremele nimbo molorumulu. Aku lemo linonga minima kinye konopuma kinye nokoromo Lapamuni lino mane tirimona yu kinye molopo kondamili nimbo yunge unguma pilipo yu maindo molamili.

<sup>10</sup> Wali alaye kolo mele linonga lapalini lino molko kondangei ningolio enonganononopuni pilkolio mindili tiko mane tiringi, nalo Goteni pilipe kondopa lino tumbi tipe mane tirimo akumuni lino waliwalima paa lipo tapondoromo. Lino popo tipo kake telima molamili nimbelie aku teremo.

<sup>11</sup> Linonga lapalini molko kondangei ningolio lino mindili tirimele kinye konopu

\* 11:37: 'So' akumu unjo karu lepo kongono teremolomu.

naa tipo moromolo. Mindili nombolio konopu keri kau panjipo moromolo. Nalo oi mane tirimele kinye pilipo lipolio pele ulu tumbi nilima tepo konopu u nipili takalipo moromolo.

*Lino konopu enge tipo molamili nimungumu*

<sup>12</sup> Akumunga, enonga kima enge naa nimbe ongopa topa lemo lemo, kinye ki winjiko kongono teao. Enonga kimboma kolomo lemo enge ningko kambuleio.

<sup>13</sup> Kimbo keri itemo imboma enonga kimboma kamukumu keri naa liepili. Altopa pengapiegili ningolio aulke toyatolina paio.

<sup>14</sup> Imboma kinye konopu tendekuna pupili takalipo moloko kondongei uluma enge ningko tekolecko, enonga konopuma kinye kangima pali Gotenga ningko Goteni kanopa kake teremo nimbe kanoromo uluma enge ningko tekolecko. Aku kake telulu naa tengelimo Awilimu naa kanonge.

<sup>15</sup> Unjo te mongo kombili telima toromo aku mongo mele enonga imbo teni Goteni eno we kondo kolopalie lipe tapondorumu ulumu tiye kolopa molopa kenjimbelo kinye eno tepa mongo mongo kondopa eno tepa kenjimbelo. Aku ulu wendo naa opili ningko wamongo kanoko molaio.

<sup>16</sup> Imbo teni wapu ulu kerinali naa tepli. Oi Isoni Gote umbulu tirimu mele aku tekona teao. Iso lapani iye komomunga nimbe timbelo melema ulure molo nimbe langi walitikale nombaimunga limbei aku mele pengama yolo ltimu.

<sup>17</sup> I nimboi ulu eno liko manjirimele. Iso yunge melema altopa limbei terimu nalo lapani molo nimu. Aku wali Iso mane ungu naa lipelie kola awini terimu nalo yu konopu alowa tembaloo aulke naa lerimu.

*Jerusalem mulu kombuna itemo akuna lino pumbo molomolo nimungumu*

<sup>18</sup> Eno melema kanoko ambolongei kombuna wendo naa oli. Oi Israel imboma Sainai Muluna nondoko ongo tipe alimbili nomba tumbulu topa ipo lepa poporome awili toromonana kanoringi.

<sup>19</sup> Akuna biukel te ungu nimbe iye teni ungu nimu imboma pilkolio mini lteko Mosesindo ningoi lino altopo naa pilimolo ningi.

<sup>20</sup> Goteni i ungu nimuna pilkolio mini lterengi akumu i tepa: Imbo te molo kongilopa te kape muluna nondopa pumbelo olando pumbeloo tembaloo kinye kouni tokokondangei nimumungaaku ungu ningi.

<sup>21</sup> Neyaaku uluma wendo orumu kanokolio mini lterengi uluma Moses yu pilipe kanopalie na kape mini ltepo pungu pungunio, nimu.

<sup>22</sup> Enoaku tepe komburenga naa oringi. Aku molo. Eno Gote moromo mulu Saion oringina moromele. Akumu ulke kombu awili Jerusalem. Aku ulke kombu awili koinjo molopa kau puli Gote enge nilimu moromo mulu kombuna itemo. Ensel kambu manda naa tolima tono kolko maku toko moromele eno oringi.

<sup>23</sup> Akuna Gotenga imboma, enondo nanga bakulu komomu nimu imboma nombeya tekohoromele oringi. Kano imbomanga imbima mulu kombuna buktenga moromo. Imbomanga pali kot pileli Gote moromona oringi. Goteni kanopa imbo tumbi nilima nimbe imbi tirimo imbotukumema moromele oringi.

<sup>24</sup> Goteni imboma tapombo nimbelineungu koinjo nimumu enge tirimu iye Jisasinga mememuni imbomanga pupe lteko torumuna wendo oringi. Abelenga mememuni pundi topili nimu mele Jisasinga mememuni aku tepe naa nimo. Aku mememuni ulu penga wendo opili nimo.

*Gotenga nimungumu naa pimolo ningi imboma mongo linge kani kanoko kondoko molaio nimu nimungumu*

<sup>25</sup> Mainaiyemuni koro oi ya mai kombuna moloringi imbomando ungu enge nilimare nimbe tipe lepi lepi torumu wali naa pilimolo ningi. Aku ulu teringimunga Goteni umbuni tirimu kinye eno kowapungei aulke te naa lerimu. Aku lemo mulu kombuna orumu iyemuni ungu engema linondo yando nimbe tipe lepi lepi toromo wali naa pilimolo nimbo umbulu timolo lemo mindili timbelo kinye kowapumulo aulke te lembaloya? Paa naa lembalo. Akumunga eno kinye nimo iyemu umbulu naa tieio.

<sup>26</sup> Koro oi Goteni nimu nimungumi mai parambala tenderimu, nalo kinye yuni ungu te nimbe panjipielie nimbei. Altopo walite kamukumu parambala tepili nimbo akumu maimundo kau naa nimbo.

Mulu mai talo waye parambala tepili nimbo kinye tembaloo, (Hag 2:6)

nimu.

<sup>27</sup> Ungu altopo walite kamukumu parambala tepili ungu nimumuni mulu mai talo tepe wamorumuma pali kolo wangombalo lipe ondoromo. We lepa kau pumbelomelema kau lope lape naa teli we lepili nimbe Goteni olo lope lape tendeli melema pali wendo lipe ltendembalo.

<sup>28-29</sup> Akumunga Yu iye nomi kingimuni nokoromo kombunu parambala tepe pora naa nimbelo kombuna limolo kani Gote

kinye paa tereno nemili. Tipeni melema nomba pora tirimo mele linonga Gote tipe mele moromo akumunga Goteni kanopa penga pimo uluma tepo pipili kolopo Yu iye paa awili olando enge pelimu nimbo yunge ungumwo taka lipo pilipolio yunge imbi kape nemili.

# **Pipia Topa Tirimu Iyemuni Kamukumu Torumu Ungumu**

13

*Lino imbo te te nimboni imbo lupema  
konopu paa mondamili ungumu*

<sup>1</sup> Eno Kraustinga imboma nanga angokame ningokonopu nendo yando mondoko molaio.

<sup>2</sup> Kombu tulena imbo ponenge mare onge kinye tiye naa kolko enonga ulkendo meko paio. Oi imbo maren iaku ulu teringi kinye we imbo mare nokoromolo konopu leringi nalo mulu kombuna enselema nokoringi.

<sup>3</sup> Kraustinga imbo ka ulkena peremelema eno we moromele imbomani lino eno kinyepeya ka ulkena pelemala ningopilkolioaku ka ulkena peremeleimboma liko manjiko kondo kolaio. Opa pulemani enongaimbo mare teko kenjingekinyenowemoromelemani opa pulemani linoaku tekoteko kenjilimala ningopilkoku opapulemaniteko kenjirimeleimboma liko manjikokondo kolaio.

<sup>4</sup> Ambo liko iye puli ulu pengamu. Gotenga kumbekerena kake tepa lepili ambo iyema enonga ambo liko iye purumeleu nokoko kondao. Goteni i kano kano ulu teko apureli ambo iyema pundukerimu tombo nimu ulu liko manjirimele.

<sup>5</sup> Eno kou monema kanoko kumu naa meaio. Goteni nimbei,

Nani eno paa tiye naa kolombo. Nani  
enongano we molangei naa nimbo.

Paa molo, (Lo 31:6)

nimu.

<sup>6</sup> Akumunga linoni konopu toimbo topo i tepo nemili,

Awilimuni na taporomomunga pipili naa kolombo. Imbomani na ulu te tengesi teremele wali pipili naa kolombo.  
(S. 112, 67)

*Lino oi nokoringi iyemanga ungumu  
taka lipo pilipo molopo, Jisas tiye naa  
kolamili ungumu*

*Kolauunguina*  
7 Eno Kraistainga imboma, eno oi nokoringi tapu iyemani oi pulu polko Gotenga ungu ningو tirinko iyema liko manjeio. Kano iyema molka teko ipuki tiringi ulu liko manjikolio aku teringi mele teko molao.

<sup>8</sup> Jisas Kraist tendeku tepa kau moromo. Oi molorumu. Kinye moromo, altopa kape wave aku tena kau molombalo.

<sup>9</sup> Akumunga ungu lupe lupe ningemani enonga konopu mepa naa andopili neio. Aku ulu naa tepili neio. Eno Gote tiye klonge kani. Goteni lino we kondo koromo ulumuni linonga konopuma tepe enge tirimo wali aku penga. Unugu manemuni i teko naio nimona langi nonge wali enonga konopu enge naa timbelo. Aku ulu teringi imboma kinye ulu tukume wendo naa oromo.

<sup>10</sup> Linonga alta polomu ltemo. Gotenga ulke tempelena popo toringi iyema linonga alta polona kere manda naa linge.

11 Gote popo tondoli iye kiyendomuni  
Goteni imbomanga ulu pulu kerima  
kanopa tiye kolopili nimbe ari tirimele  
tenga yokolimu kolopa meli kiripi paa  
kake telina tuku mepa pumbe Gote popo  
topa tirimo, nalo aku ari tirmelemu  
mekolio imbo molko peringi kombumu tiye  
kolko tawendo pungo tipena nopili ningko  
kaloringi.

<sup>12</sup> Aku teko teremelemunga Jisas kape yunge mememuni Goteni imboma kanopa kake telima nimbe kanopili nimbe imbo molko peringi ulke kombumungga pape tawendo mindili norumu.

<sup>13</sup> Akumunga Jisas pape tawendo momoroma lombili tawendo pumbo yu tekmai kondoringi mele lino kape yu peya tekmai kondangei kopu tepo molamili pamili.

<sup>14</sup> I tepo lipo manjipolio aku ulu teamili. Ya maina linonga kombu lepa kau pumbelo kombu te naa ltemo. Kombu te wendo ombalomu nokopo moromolo.

<sup>15</sup> Aku tepo nokopo moromolomunga Jisas konopu lipo manjipolio Gote waliwalima kapi nimbo molamili. Gote paa awili olandalopamu nimbo yu kalko tirimele mele linongka keremani yu waliwalima kapi nemili.

<sup>16</sup> Gote mele te kalko tiemili ningolio i ulu teao. Imboma tepo kondamili ningko liko tapondoko, mele molo lembalo imboma enonga mele mare moke teko tieio. Gote kalko tiengei aku tekoh teremele uluma yuni kanopa penga pilipe konopu tirimo kani komu naa tindiko aku ulu teao.

17 Enonga nokoli iyemana teao nimele mele pilko liko teko taka liko molaio. Aku iyemana pele Gote kongono teremolo mele nimbo timolo kinye teko kondoringi nipiili ningko pilko eno molko kondangei ningko nokoromele. Akumunga enonga ninge unguma pilko liko, lino aku tepo kongono temolo kinye linonga nokoli iyema konopu tiko konopu umbuni naa pepili lino nokangei ningko enoni teao ninge mele teko molaio. Enoni enonga nokoli iyemanga unguma pilko liko naa teko eno punge lemo

nokoli iyema konopuna umbuni te pemba lo akumuni eno manda naa lipe tapon-dombalo kani aku teao.

*Goteni eno molko kondangei nipili nimu unguma*

<sup>18</sup> Goteni lino lipe tapondopili konge tendaio. Lino konopuni pilipolio ulu te tepo kenjirimolo nimbo naa pilipo, lino waliwalima toya topo andamili nimbo pilipo moromolomunga enoni aku teko Gote linonga konge tendenge kinye pilimbelo.

<sup>19</sup> Ungu te eno peya enge nimbo konge tero. Gote kinye ungu ningolio na eno moromelena paa nondopo altopo wamboi Goteni na lipe tapondopili ningko konge tendaio.

<sup>20</sup> Imboma tepa ame toromo Goteni linonga Awili Jisasinga meme aku yunge imboma kinye tembo nimbe lepa kau pupili ungu nimbe panjipe mi lerimu ungumu enge tirimu mememunga engemuni Jisas yu lino yunge sipsipimanga tapu iye enge nilimu ono kombuna topa makinjirimu.

<sup>21</sup> Aku Goteni enoni yunge konopu mon-doromo uluma manda tengenai enge paa pengama tipili. Yunge konopuni pilipelie Jisas Kraist terimu ulumuni eno yunge konopu mondoromo uluma teremele imbo pengama tepa wamopili. Jisas Kraist walima kapi nimbo imbi lipo ola mundemili. I paa.

*Pipia topa pora timbei torumu ungumu*

<sup>22</sup> Ango kame, nani eno i pipia topo tiro akumu ungu kelo kolte kau enonga konopundo enge timboi toro kani tiye naa tepili wamongo pilko molaio nimbo enge nimbo konge tero.

<sup>23</sup> Nani eno pilengei nimbo nio. Linonga angenu Timoti kinye ka ulkena we naa peremo, yu wendo munduringi. Yu na morona welea omo lemo ilto peya ombo eno kanombolo.

<sup>24</sup> Eno nokoromele iyema kinye Gotenga imboma pali kinye molko kondaio nindeio. Kombu Itali imbo orangi moromelemani enondo molko kondaio nimele.

<sup>25</sup> Goteni eno kinye konopu noipili.

## Jemsini Pipia Topa Tirimu Ungumu Jems I Ungu Torumumunga Ungu Pulu Mare

Jemsini Jisas ipuki tiko Jerusalem moloringi imbomanga tapu iye awili molorumu. Imbomanji toya toli uluma teangei nimbe umbuni menge wali eno tepa enge tipili nimbe i pipiamu topa mundurumu.

Goteni nu yunge lipe manjili peli imbomu molkolio uluma pali toya toko teani nimbe enge tipili.

*Jemsini pipia tombaindo pulu polopa torumu ungumu*

<sup>1</sup> Na Jems, Gote kinye Awili Jisas Kraist talonga kongono tendeli kendemande iye te, nani i pipiamu topo, Israel imbo talape ki yupokonga imbo konoko pungo kombu Judaism distrik tawendo kombu lupe lupemanga moromele imboma topo tiro. Eno molko kondao!

*Umbuni wendo oromomani lino enge tirimo*

<sup>2-3</sup> Nanga angko kame, enonga ipuki tirimeleme enge nimonje nimbe manda manjipe karomo umbunimani enonga konopuma tepe enge tirimo ningko pimele kani eno tepa mainye mundumbei tembalu umbuni lupe lupema eno moromelena wendo ombalo wali paimbo wendo oromo ningko paa tono kolongei.

<sup>4</sup> Eno molko kondoko, waliwalima enge ningko umbunima meangei konopu enge nili uluma eno kinye enge nimbe pepili kani kamukumu imbo konopu pepili Gotenga imbo yuma molko, Goteni kanopa penga pimo ulu penga te konopundo naa ponjipili molangei.

*Imbo tengo lipe manjilimu manda naa pemo lemo yu Gote konge tepili*

<sup>5</sup> Imbo te yunge lipe manjili ponjimo lemo Gote kinye konge tepalie lipe manjili te tiwi nimbelo wali melema konge teremele wali iri naa topa mele awini toya topa tirimo Goteni paimbo timbelo.

<sup>6</sup> Nalo konopu talo tepe kimbo tirimo imbomu, poporomeni unjo mumu mepa andoromo mele, yunge konopumuniaku ulu teremo kani timbelonje naa timbelonje, lipe tapondombalonje naa tapondombalonje nimbe konopu talo tepe naa kimbo tipelie aku imbomu konge tembo mele paimbo timbelo nimbe ipuki tipelie konge tepili.

<sup>7-8</sup> Imbo te aku tepe konopu talo tepe peremo imbomu yu konopu talo tepe peremo-munga yunge konopumuni beambo nimbe, konopu tendekure kau naa pepa Awilimuni na melte timbelo konopu naa liepili.

*Iye koropa nolima kinye iye kamakomanga ungumu*

<sup>9</sup> Eno Kraustinga imbomanga angenu te melema naa noipe koropa nomba mai kombuna imbi naa moromo imbomu Goteni yu kinye ulu penga te tepe, Gote kinye imbi litemo nimo kani tono kolopili.

<sup>10</sup> Nalo kondipe tindi te enge naa nimbe nondopa oo litemo mele imboma aku teko kamukumu naa molko nondoko koromele kani lipe manjipelie Kraustinga imbo kamakomu Goteni yu imbi naa molopa we imbo mele molopili nimo kani tono kolopili.

<sup>11</sup> Ena enge nimbe toromo kinye era melema topa kondoromo wali kondipe tindi penga toromoma kolopa oo lepa mainye purumo. Aku tepala imbo te mele awini noirimo imbomu kou limbei kongonomu tepe molopalie akuna kolombalo.

*Goteni lino kinye ulu pengama kau tepe, ulu kerima teangei nimbe tope naa tirimo ungumu*

<sup>12</sup> Imbo te umbuni lupe lupema wendo oromo kinye aku umbunima mepa enge nimbe moromo imbo akumu umbuni wendo oromomani yu tepe mainye naa mundurumomunga Goteni waliwalima koinjo molopa kondopa kau puli ulu pulumu timbelo, akumu yunge mele pengamu limbelo kani umbuni lupe lupema wendo ombalo wali aku umbunima paimbo na kinye wendo oromo nimbe konopu tipili. Aku mele pengamu koro oi Goteni Yu paa konopu mondonge imboma mele aku tepe timbo nimbe, nimbe panjirimu mele pengamu.

<sup>13</sup> Ulu pulu kerimuni Gotendo ulu pulu keri te tewi manda naa nimbelo. Goteni imbo tendo ulu pulu keri te tewi paa manda naa nimbelo. Aku lemo ulu teni imbo te ulu pulu keri te tewi nimbe ulu te manda manjipe kanombalo wali aku imbomuni Goteni na tepe kenjembo nimbe kondi toromo unga naa nipili.

<sup>14</sup> Linonga konopumuni aku ulu pulu kerima teamili nimbe kondi toromo wali linonga konopu keri akumuni ulu pulu kerima teamili nimbe lino tope tirimo.

<sup>15</sup> Aku wali ambo te bakulu olo mongo toromo mele konopumuni aie konopu lepalie ulu pulu keri te peremo. Aku tepalie ulu pulu kerimu akopa pora tipelie kololi ulu pulumu wendo oromo.

*Goteni mele pengama kau tirimo ungumu*

<sup>16</sup> Nanga paa konopu mondoro ango kame, enonga konopuni paimbo nio ningko kolo toko konopu leko naa kenjeo.

<sup>17</sup> Mele pengama kinye ulu pengama kinye, aku tepa ulu paa pengama pali yando we naa limolo. Aku melema mulu kombuna wendo oromo. Muluna ola pa tendepa angimo melema tepa panjirimu Lapamuni kano mele paa pengama tirimo. Unjo kinye melemanga minima tule lepala ponjirimo mele Gote aku tepa alowa malowa naa teremo.

<sup>18</sup> Aku iyemuni lino yunge bakulumu molangei meambo nimbelie yunge ungumu, lino lipe tapondopa imboma koinjo molonge engemu peremo ungu paa paimbomuni lino mepili nimu. Yunge imboma yuni lino we imboma kinye melema terumanga pali kiyendo molangei nimbe lino aku tepa wamorumu.

### *Gotenga ungumu pilkolio lombieio ungumu*

<sup>19-20</sup> Paa nanga ango kame, i ungu pileio! Gotenci imboma tumbi tiko molonge kinye paa konopu lepa karomo mele imbonanga mumindili kololi ulu akumuni aku teko molangei nimbe naa lipe tapondoromo kani imbo teni ungu te nimbelo kinye wamongo pilemi ningko komu tendeko molko, ungu te nondoko pundu toko naa ningko, mumindili naa kolaio.

<sup>21</sup> Mumindili kololi ulumuni eno naa tapopili akumunga ulu kalaro mololima kinye ulu kerima kinye teremelema pali na kinye naa molopili ningko tiye kolko, Gotenci ungu oi enonga konopumanga panjindirimu, aku ungumuni eno mini pali lipe tapondopa mindili nolemala aulkena manda wendo lipe Gote kinye peya molko kondonge aulkena manda lipe mondombalo akumu taka liko pilko molangei.

<sup>22</sup> Gotenga ungumuni nimo mele we komuni kau naa pileio! Pilkolio tengi tiko teao. We komuni kau pilkolio nimo mele teremele lemo eno enonganano kolo toko paa tepo moromolo konopu litemele.

<sup>23-24</sup> Aku teangei niomunga ungu pulu te i tepe mele: Imbo teni ungumu we komuni kau pilipelite, nimo mele pilipe lipe naa temo lemo yu imbo teni yunge kumbekeremu kariapanana kanopalie wendo pumbelie yunge kumbekere ambe telimunje nimbe naa lipe manjirimoaku mele.

<sup>25</sup> Nalo imbo teni, ulu pulu kerimani lino ambolopa ka kongono tirimo aulkena mindili naa nongo we molangei nimbe wendo Itindirimu ungu mane pengamu wamba kanopa tiye naa kolopa molopa, nimo mele komu naa tindipe pilipe lipe tepe

molomo lemo aku imbonuni ulu teremomungu Goteni yu molopa kondopili nimbelo.

<sup>26</sup> Imbo teni na Gotenga ungumu paa pilipo lipo yu kapi nimbo ungu manema paa pilipo moro nimbe pilipe moromo nalo yunge ungumu nokopa naa kondomo lemo yuni yunu kolo topa konopuni kau paa aku ulu tero nimbe pilipe, yunge konopumu lepa kenjirimo. Yu Gotenga ungumu pilipo lipo, yu kapi nimbo ungu manema paa pilipo moro nimo ulu akumuni yu lipe tapondombalo ulure naa teremo.

<sup>27</sup> Linoni Gotenga imboma molopo yu kapi nemili nimolo imbonani linonga Lapa Goteni ulu kake tepa kalaro naa moromo nimbe karomo uluma temolo mele i tepa: Anupili lapali koromele bakulu kolumuluma kinye, ambo waima kinye, mindili nongo umbunima wendo opili moromelema aku teko naa molangei ningko nokoko, maina imbonani ulu pulu kerima teremele mele naa tengi. Aku ulu pulu kerimani lino ulu te naa tepa, lino kalaro te naa mondopili ningko molko kondoromele.

## 2

### *Linoni imboma moke naa tepo wayema kondo kolopo lipo tapamili*

<sup>1</sup> Nanga ango kame, eno linonga iye awili Jisas Kraist iye paa penga imbi olandopa molopa enge peremo paimbo ningko ipuki tirimelemani imboma moke teko imbo te imbi olando mololimu tapoko, imbo te imbi eno mololimu naa tapoko, aku ulu naa teao.

<sup>2</sup> Iye te wale pakoli paa pengama pakopa, kou goloni teli ring ki mongona mondombalo iye te kinye, iye koropa te wale pakoli kerima pakombalo iye te kinye, aku iye talo eno nobuya teko molongena ongele wali kanokolio

<sup>3</sup> iye wale pakoli pengama pakombalo iyemu kanoko penga pilkolio paa nokoko i polo pengana ongo molowi ningko, iye koropamu kanoko keri pilkolio yundo neya kulendo pungo ola angiliwi molo nanga kimbo mundurona ongo mainye molowi naa neio.

<sup>4</sup> Aku teko ninge lemo eno konopu keri pepili eno enonganano nendo yando moke teko kenjirimele. Eno aku teko imbona moke teremele mele enonganano konopuni pilkolio i imbonuni na manda tapombalo, imuni na naa tapombalo nimbo kanopo moke teko kenjirimolo litemo ningko liko naa manjirimeleya?

<sup>5</sup> Paa nanga ango kame, pileio! Gotenci imbo mare nanga imboma molangei nimbe kanopa limbeindo ya mai kombuna imbonani kanoko imbo koropa pupili

moromele ning karomele imbo akuma Goteni kanopa lipelie imbo kamako mele molangei nimbe enondo nimbeindo, enoni yu paimbo ning ipuki tiko kondokolio imbo na konopu mondonge imboma nani iye nomi kingimu molopo nokoro kombuna na kinye peya molamili nimbo panjiru akumu eno peya aku tepo molamili wangei nimu.

<sup>6</sup> Nalo nanga ango kame, enoni imbo koropama pipili kolangei ning teko kenjirimene. Ango kame, imbo naimeleni eno kondi toko enonga melema liko, mindili tiko, kot tendamili waio ning teremele imbo akuma naimeleya? Iye koropamanuaku teremeleya? Molo! Iye kamakomani eno kinye aku ulu teremele.

<sup>7</sup> En Jisas Kraistingu imboma moromele aku iyemunga imbi pengamu naimeleni ungu taka tondoromeleya? Iye koropamanuaku teremeleya? Molo! Iye kamakomaniaku ulu teremele.

<sup>8</sup> Gotenga bukuna ungu mane te tirimu paa olandopa moromo aku ungu manemu pilko liko tengen tiko tengen lemo paa. Aku ungu manemuni nimbei, enongan yu mele mele konopu mondoko, enonga kangima enongan kondo kolko nokoromele meleaku tekola imbo wema konopu mondoko nokoko molangei nimbe moromo ungu mane akumu pilko liko teao.

<sup>9</sup> Nalo imboma kanoko moke tekolio yu penga, lipo tapondambo; yu keri, naa lipo tapondambo ning lemo ulu pulu keri te teremele. Akumunga Gotenga ungu manemani nu ungu mane naa lombili iye kerire morono litemo nimbe lipo ondombalo.

<sup>10-11</sup> Aku niomunga pulumu i teta: Lino pimolo, ambo iye puli te molo iye ambo lili te imbo te lupe kinye wapu ulu kerinali naa teangilli nimbe nimu iyemuni imbo te toko naa kondangei nimu kala. Aku lemo nu wapu ulu kerinali naa tekolio imbo te toko kondonio lemo ungu manema topa tangondoli imboma morono. Akumunga imbo te ungu manema pali pilipe lipo teremo nalo tendekure kau topa tangondomo lemo aku ulu teremomunga ungu manema pali topa tangondromo.

<sup>12</sup> Ulu te tingeindo molo ungu te ningeindo oi i teko ning pilengei. Ulu pulu kerimani lino ambolopa ka kongono tirimo aulkena mindili naa nongo we molangei nimbe wendo ltimu ungu mane pengamuni nimo mele pilipelite Goteni lino uluma tepo unguma nimbo teremolo mele pilipelite moke tembalu kani, pilkolio aku ungu manemu pilko uluma teko unguma ning teko moromele mele pilko teko kondangei.

<sup>13</sup> Imbo teni imbo te kondo naa kolomo lemo altopa Goteni kot pilipelite yu kape kondo naa kolombalola. Imbo teni imbo

te kondo kolombalo imboma Goteni yunge kot pilipelite yu kape kondo kolombalo.

*Ipuki tili ulu pengama naa teremele akumu we ipuki tirimele*

<sup>14</sup> Nanga ango kame, imbo teni na Gote ipuki tiro nimo nalo ulu pengama na teremo lemo yuni ipuki tirimo ulumuni yu lipe tapondoromoya? Yuni ipuki tirimo ulumuni yu mindili nolka aulkena wendo lipo Gote kinye molopa kondombalo aulkena manda lipo mondombaloya? Ulu pengama naa temo lemo paa manda molo.

<sup>15</sup> Angena kape kemilie kape, te wale pakoli keri te pakopa, langi nombalo te naa lembalo wali,

<sup>16</sup> enonga imbo teni yu langi kinye wale pakoli mare naa tipelie yundo nimbeindo, nu konopu u nipli pungo, ali naa tepili wale pakoli penga te pakoko, olo tembalu langi mare nopusi nimo lemo aku teba nimbelomuni yu paimbo lipo tapondombaloya? Ulure manda naa tembalu.

<sup>17</sup> Imbo teni imbo te naa lipo tapondopu ungumuni kau manda molani puwi we nimo wali aku imboma naa lipo tapondopu ulure naa teremo aku tepala. Imbo teni paimbo nimbe ipuki tipelie ulu pengama naa temo lemo yunge ipuki tirimo ulumu koromo.

<sup>18</sup> Nalo imbo teni nani i nio ungumu kolo toromo nimbelie nando nimbei, "Imbo marenipaimbo ning ipuki tirimele ulu akumu manda kala. Imbo marenipaimbu nimo wali aku imbondo liko tapondoromele ulu akumu manda kala," nimbelo. Ulu talo peya tendeku teremo. Imbo teni aku ulu talonga ulu te tiye kolopa te pilipelite tembalu kinye aku ulu tendekumuni manda lipo tapondombalo nilkanje. Aku teba nilka imbonundo nani topondopo i teto nilka: nu Kraistini paimbo nanga nimbe tenderimu nimbo ipuki tiro mele lipo ondamboko ning ulu penga te naa tenio lemo nu ipuki tirino mele na ambe teto kanomboya? Manda naa kanombo. Na ulu pengama teto imboma lipo tapondombo ulumani paimbo nimbo ipuki tiro mele lipo ondombalo.

<sup>19</sup> Nuni Gote tendeku kau moromo ning ipuki tirino. Akumu paa tereno. Nalo kuromani kape aku teko ipuki tirimele. Aku teko ningolio pungu pungu ning mini teremele.

<sup>20</sup> Keke lepo toli imboma, we paimbo ning ipuki tiko ulu pengama naa tereno ulumuni ulure manda naa tembalu mele ungu pulumu pileni nimbo tiemboya?

<sup>21</sup> Linonga ara kae Abrahameni ulu te terimu mele kanopalie Goteni yunge ulu pulu kerima tiye kolopa, yu konopu tumbi nimbe peli iyemu nimbe imbi tirimu. Abrahameni yunge malo Aisak Gote popo topa

kalopa timbeindo alta polona ola noir-imuna kanopalie Goteni yu iye tumbi nilimu nimbe kanorumu.

<sup>22</sup> Wamongo pileio! Abrahameni paimbo nimbe enge nimbe pilerimu ulumu kinye ulu terimuma kinye popo tipe terimu wali yuni terimu ulumani yunge paimbo nimbe ipuki tirimu ulumu kamukumu tepa enge tirimu.

<sup>23</sup> Aku tepa terimumunga Gotenga bukuna yundo ungu te nimomunga pulumu wendo orumu. Aku ungumu i tepe: Goteni yu kinye tembo nimu mele Abrahameni paimbo tembalo nimbe ipuki tirimumunga kanopalie Goteni yu iye tumbi nilimu nimbe kanorumu. Abrahameni aku terimumunga Goteni yundo nanga kanopa lili iyemu nimula aku tepe moromo.

<sup>24</sup> Abraham kinye Gote kinye eloni teringili mele pilkolio, imbo teni we paimbo nimbe ipuki tirimona kanopalie Goteni yunge ulu pulu kerima tiye kolopo, yu konopu tumbi nimbe peli imbomu nimbo karo naa nimo. Imbo te paimbo nimbe enge nimbe pilipelite ulu pengama teremona kanopalie Goteni yunge ulu pulu kerima tiye kolopo, yu konopu tumbi nimbe peli imbomu nimbo karo nimo aku mele kinye liko manjirimene.

<sup>25</sup> Aku tepala, Josuani iye talo Jeriko taunona lipe mundurumu wali imboma ambe teremelenje ningko kanoko panjingili purgingili kinye ambo wapera Rahaponi elo naa tangai nimbe ya lopeke tekopeangili nimbe nokopalie, altopa aulkteenga lupe kelko yando pangili nimbe lipe mundurumu wali aku ulu terimumunga kanopalie Goteni yu ambo tumbi nilimu nimbe kanorumu.

<sup>26</sup> Imbo tengaa minimuni kangimu tiye kolopa purumo wali kangimu koromo,aku tepa imbo teni paimbo nimbe ipuki tipelie ulu pengama naa teremo wali yunge ipuki tirimo ulumu koromola.

### 3

#### *Linonga unguma nokopo kondopo ungu pengama kau nemilimunga ungumu*

<sup>1</sup> Nanga angko kame, Goteni imbomanga ulu teremelema moke tepa pilimbelo kinye lino imboma yunge unguma mane tirimolo iyemanga ulu teremoloma paa enge nimbe moke tepa pilimbelo kani enonga iye mare awinini Gotenga unguma imboma mane tiemili naa nengei.

<sup>2</sup> Aku niomunga pulumu nemboi, wali awini lino ulu penga te temolo konopu lepolio naa teremolo. Aku tepa uluma lino imboma kinye pali wendo oromo. Imbo teni walite kape ungu keri te naa nimo

lemo aku imbomu yu imbo paa pengamu, yunge kangima pali manda nokopa kondombalo.

<sup>3</sup> Imbo teni kongi os te nanga ungumu pilipili nimbe yunge kerena ain te panjindrimo. Aku wali yuni osemu i tepe pupili, i tepe pupili nimbe ainimu lipe ka ambolopa tumbirumbi tindrimo wali osemu aku tepe topele topa purumo.

<sup>4</sup> Sip teremo mele pileio! Sipima paa mele awilima nalo poporomeni kombu lupe marenga topa mundumbei teremo wali sipimanga stia paa keloma ambolkolio sip kongono teremele iyemani kombu tenga pumolo konopu lekolio stiamma ambolko pupu toromele kinye pungei teremele kombu akuna purumo.

<sup>5</sup> Aku tepe mele linonga keremu kangimunga mele kelomu nalo yu yunu kapi nimbe yunge imbi lipe ola mundurumo. Tipe kelo teni kombu awini kuli tipe noromo mele eno pileio!

<sup>6</sup> Keremu tipe melela. Linonga kangimanga pali yu mele kelomu nalo yuni ulu pulu keri awini tepalie kangima pali tepe kalaro mondopa, akumuni ungu nimolo ungumani kuli tipe noromo mele linono tepo kenjirimolo. Aku tipemu yu Goteni kuromanga nomi Satan makoropa mundurumu tipe kombuna wendo oromo tipemu.

<sup>7</sup> Imbomani kongi kinye kera kinye waimbe kinye takera mele lupema kinye nomu kutana tuku moromo melema kinye aku mele lupe lupe awinima manda ari tirimele. Akuma pali liko aku melemani linonga nimolo unguma pilko teangei ningko mane tiko nokoromele,

<sup>8</sup> nalo imbo teni yunge keremu aku tepe manda naa nokoromo. Keremu yu ulu kerima tembaindo taka lipe naa moromo meleme. Imboma koromele tomoma mele linonga kerena tenegepeya tepe peremo.

<sup>9</sup> Keremuni linonga Ara Ola Iye kapi nimbo imbi lipo ola mundurumolo nalo Goteni yu moromo mele aku tepe terimu imboma keremuni kape molko kenjengei nimbo, nimbo kenjirimolo.

<sup>10</sup> Gote, molo imbo te kapi nimbe imbi lipe ola mundurumo ungu pengama kinye nimbe kenjirimo ungu kerima kinye kere tendekuna waye talo wendo oromo. Nanga angko kame, ulu aku tepamu eno kinye naa pepili nio.

<sup>11</sup> Aku tepa mele maina no tendeku akupe wendo oromona api nomu kinye imbo nomu kinye tendekuna wendo naa orombele.

<sup>12</sup> Nanga angko kame, unjo fik teni unjo oliv mongo manda tombaloya? Molo, unjo wain teni unjo fik mongo manda

tombaloya? Aku tepe, no kombili teli tengah no tingo teli te manda wendo naa ombalo.

*Lipe manjili pengamu kinye lipe manjili kerimu talonga ungumu*

<sup>13</sup>Enonga imbo te unguma wamba pilipe, imbomanga uluma pilipe kondopa, lipe manjili peremoya? Aku ulu teremo imbo te molomo lemo imbomani yu paimbo aku tepe imbomu moromo mele ningkanangei nimbe yunge aulke andopa ulu tembaloma paa penga liepili. Yu kalambo naa nimbe yunge imbi lipe ola naa mundupe, konopuni pilipe kondopa, lipe manjili peremo ulu pengama kau tepli. Aku tembalo wali imbomani kanokolio yu paimbo lipe manjili peli imbomu moromo ningko kanonge.

<sup>14</sup>Nalo enonga konopuna imboma kinye yokoli kolko imbo nomi kelkele toromele konopu mandopa peremo wali enonganu maluwewe naa taio. Ulu tukumemu we mele none naa tendaio.

<sup>15</sup>Aku tepe lipe manjilimu mulu kombuna wendo naa oromo. I mai kombuna kau wendo oromo. Oi konopu kerimanga Gotenga Minimu naa mororumuna perimu aku konopumanga wendo oromo. Aku tepe ulu wendo oromomanga lapamu Satan yu.

<sup>16</sup>Pileio! Enonga konopuna imboma kinye yokoli kolko imbo nomi kelkele toromele konopu mandopa peremo wali waimu naa koromo kinye imbo mareni ulu pulu keri i kano kanoma teremele.

<sup>17</sup>Nalo mulu kombuna wendo oromo lipe manjili akumu lupe. Goteni lipe manjilimu imboma tirimo wali aku imbomani i ulu teremele: Kumbe lepa ulu kake tellima teremele. Ulu mare i tepala: imboma mindili naa tiko eno kinye konopu tendekuna pupili taku liko molko, imboma kinye kandiki tepili molko, enonga nokoli iyemani ungu nimelema tengen tiko, imbo mare umbuni peremoma kondo kolko liko tapondoko, we imbo koropama molo makoma naa apuruko imboma kinye paliaku ulu teko kondoko, topele mapele naa tokotemolo nimele uluma paa teremele.

<sup>18</sup>Imboma konopu tendekuna pupili ningko uluma teremele imbomani poinyena langi imbo mele panjirimele. Konopu tendekuna pupili uluma poinyena panjirimele wali imboma tumbi ningko molko ulu pengama tengen uluma poinyena mongo tombalo.

## 4

*Maina ulu konopu mondoromele imboma Gote kinye opa pule toromele*

<sup>1</sup>Eno irinale teko opa teko teremele akumu pulu ambe teparenga aku teremeleya? Enonga konopumanga melema

liemili ningko uluma teamili konopu ltemele ulu akumani enonga konopuna tukundo opa pule topa teremomunga enoni konopu talo yupoko pepili aku teko teremele.

<sup>2</sup>Melte kanokolio konopu mondoko liemili konopu ltemele nalo naa ltimele. Naa likolio pulu imboma toko kondoromele. Imbo tengah melema kanoko aie konopu ltemele nalo aku melema linga aulke te naa ltemomunga paa mumindili kolko enge ningko irinale teko opa teremele. Eno Goteni melema tipili ningko yu kinye ungu ningko melema konge naa teremelemunga liemili nimele melema naa ltimele.

<sup>3</sup>Melema liemili ningko Gote konge teremele akuma liemili nimele mele eno enonganu konopu tipo manda molamili ningko konge teremelemunga Goteni enonga konopuma kanopalae naa tirimo.

<sup>4</sup>Ambo teni yunge iyemu tiye kolopapera andopa toromo mele eno Gote tiye kolko melema konopu mondoromele imboma, mai kombuna uluma kinye melema pulu ltemo ningko kopu teko moromele imboma aku teko moromele, akumu eno naa pimeleya? Mai kombuna melema kinye uluma kinye konopu mondoko lino kinye pulu liepili kopu tepo molamili nimele imbomani aku teko nimelemunga Gote kinye opa pule toromele.

<sup>5</sup>Molo Gotenga bukuna moromo ungu-muni nimbeindo, lino imbomanga minima Goteni tirimumani Yunge unguma kau pilko, yunge kongonoma kau teko molangei nimbe moromo aku ungumu we nimo konopu ltemeleya?

<sup>6</sup>Nalo Goteni lino olandopa kondo kolopalie lipe tapondoromo. Aku tepe teremomunga ungu te Gotenga bukuna nimbe moromo. Akumu i tepe: Imbo te yunu iye nomi kelkele toromomu

Goteni yunge imbimu tepe mainye mundupe naa lipe tapondoromo.

Nalo imbo te yunge imbimu tepe mainye mundurumomu Goteni we kondo kolopapera lipe tapondoromo. (Snd3:34)

<sup>7</sup>Akumunga Gote liko awili tiko yunge ungu pilko molaio. Kondi toromo Sata-neni ungu nimbeloma paa naa pilko enge ningko umbulu tieio. Aku tengah wali eno tiye kolopapera kowa pumbelo.

<sup>8</sup>Gote kinye kopu tepo molamili ningko yu moromona nondoko wangei. Nondoko onge wali eno kinye kopu tepo molamili nimbe yu eno molongena nondopa ombalo. Eno ulu pulu keri teremele imbomani Gote moromona nondopo pamili ningolio imbo tengah ki kalaro moromo wali kulumie toromo mele enonga konopuna enonganu pimele uluma kulumie taio. Eno imbo

konopu talo peremo imbomani konopuma kake tepili. We melema konopu kimbo tipo moromolo mele mainye pupili neio.

<sup>9</sup> Eno ulu teremelema kanoko keri pilko, konopu umbuni tepa kamele mindili tepili kola awini teko molangei. Owe teko pende pende teremele ulumu tiye kolko konopu keri panjiko pinyewe kikime kola teao. Paa tono kolko moromele ulumu tiye kolko konopu paa umbuni pepili molangei.

<sup>10</sup> Awilimunga kumbekerena yu iye awilimu, linonga imbima mainye molopili ningo taka liko molangei. Aku tengi wali yuni enonga imbima lipe ola mundumbelo.

*Nendo yando imbomanga ungu umbulkondo naa nindemili ungumu*

<sup>11</sup> Ango kame, nendo yando enonga angenali marenge ungu umbulkondo naa nindengei. Imbo teni yunge angenu tenga ungu umbulkondo nindipe, tepa kenjirimo imbo kerimu nimo imbomuni Gotenga ungu manemanga kape ungu umbulkondo nindipe, aku ungu kerimu nimo. Ungu manema moke tepa ungu kerimu nimo imbomu ungu manema pilipe lipe naa tepa, ungu manemanga pilipe moke teli imbomu none teremo.

<sup>12</sup> Iye tendekumu kau ungu manema tipe panjipe, uluma pilipe moke teli iyemu moromo, akumu Gote. Aku iyemu imbo mindili nolemala aulkena purumele imbo mare manda lipe tapondopa wendo lipe, imbo mare mindili nangei nimbe manda topa mainye mundumbelo iyemu. Nu ambe telka nunge pulu litemo imbo tenga uluma pilko moke teko tepa kenjirimo ninoya?

*Otili akinjo i ulumu tembo ungu naa neio*

<sup>13</sup> Imbo mareni ningeindo, kinye molo otili kombu awili tenga pumbo bisnis tepumolo. Akuna pumbo poinye tendeku bisnis tepo kou mone awini limolo nimele imboma eno kinye ungu te peremonia pilio.

<sup>14</sup> Otili ulu te wendo ombalo wali molonge mele eno naa pimele. Enonga koinjo moromele wai akumu kupe topa po lepa lterimu mele.

<sup>15</sup> Akumunga neyaaku teko naa ningi, i teko nengei: Awilimuni naaku teko teani nimo lemo naa kolopo koinjo molopolio i teambo nio mele paimbo tembo nengei.

<sup>16</sup> Nalo enoniaku teko naa nimele. Eno kalambo naa ningi maluwele tokokongono awili te temolo ningi imboma ningi tirimele. Aku teremele ulumu paa ulu kerimu.

<sup>17</sup> Akumunga imbo teni ulu penga te konopuni pilipeaku tepo tembo wali paimbo nimbe pilipielie altopa naa temo lemoaku tepa teremo ulumu ulu pulu keri te teremo.

## 5

*Mele awini noirimele imboma wai keri wendo ombalomunga lepi lepi topa nimu ungumu*

<sup>1</sup> Eno mele awini noirimele imboma, enondo nimboi tero ungumu pileio. Eno molongena umbuni awili mare wendo ombalo kani kola tome taio!

<sup>2</sup> Enonga mele awini noirimele pu rupe lkupindi topa, enonga maminye mele pengama lkuriniani nomba,

<sup>3</sup> enonga kou goloma kinye kou silvama kinye urelo teremo. Kouma urelo teremomunga enoni teko kenjirimele mele mona lepa, kouma urelo teremomuni enonga kangina tipe mele nombalo. Mulu mai nondopa pora nimbei tepili enoaku teko mele pulumu tukundo tukundo liko we noirimele kani kola tome taio.

<sup>4</sup> Wamongo pileio! Enonga rais witima inia tondoringi kongono kendemande iyema kolo toko melema wamongo naa tiringimani enge ningo ningeindo, lino teko kenjirimele ningo alako toromele. Aku teko alako toringi mele Iye Awili paa enge olandopa pelimuni yunge komuni pilipielie enoni kendemande iyema teko kenjiringimunga eno pundu tombalo.

<sup>5</sup> Ya mai kombuna molkolio mele lupe lupe pengama konopu mondoko liemili ningi topo toko liko noiko konopu tiko molko, molko kondoringi. Eno langi paa awini nongo imbo kapo kangoma moromele nalo kinye toko kondonge waimu wendo oromo.

<sup>6</sup> Ulure naa teko imbo tumbi nili moloringi imboma kot tendeko toko kondoringi. Aku imbomani eno nendo tongei enge te naa peremo kanokolio we toko kondoringi.

*Eno molongena umbunima wendo ombalo kinye Awilimu paimbo lipe tapombalo ningi konopu enge pepili tiye naa kolko molangei ungumu*

<sup>7-8</sup> Akumunga, angokame, imbomani eno umbunima tirimele wali Awilimu oi naa opili we umbunima meaio. Imbo poinye teremelemani enonga poinyena langi penga te wendo ombalona lipo nomolo ningi nokoromele. Langi imbo panjikolio lo omaba ena tepa tembalo wali langi ola omaba nowi lembalo ningi taka liko nokoko moromele mele eno liko manjirimele. Eno kape, poinye teremo imbomuni langi imbo panjipielie langi wendo omaba nowi lembalo wali nombo nimbe taka lipe nokoromo meleaku teko enonga konopu toimbo topili umbunima we meko taka liko molaio. Awilimu yando ombalo walimu paa nondopa ombai teremo kani enge ningi angileio.

<sup>9</sup> Ango kame, nendo yando Gotenga imbomani ulu teremelelunga umbunima wendo wendo oromo ningi iri karaye teko ungu umbulkondo nindiko naa teangei. Gotenga kotena naa angilemili ningi aku ulu naa teangei. Kot Pilimbelo Iyemu nondopa oromo.

<sup>10</sup> Ango kame, profet iyemani Awilimunga ungu nimbe mundulima ningi tiringimunga opa pule imbomani eno teko kenjiringi wali enge ningi umbunima taka liko meringi mele pilkolio aku teringi ulu manda leko teao.

<sup>11</sup> Pileio! Imbo konopu enge pepili umbunima we meko paimbo ningi ipuki tirimele mele tiye naa koromele imboma eno malo nimbo pimolo. Oi molorumu iye Jop enge nimbe, yu kinye umbuni wendo orumuma we mepa molorumu wali altopa Awilimuni yu kamukumu molopa kondopili nimbe ulu mare terimu mele temanemu eno pimelela. Lino pimolo, Awilimuni imboma paa kondo kolopa, ulu teremele-manga pundu topa mindili tilka nalo we tiye koromo.

*Ulu te temolo ningolio Gotenga imbi leko mi naa leangei ungumu*

<sup>12</sup> Nanga ango kame, ulu te kumbe leko tenge mele i tepa: Mulu kombuna molo mai kombuna kape, molo mele tenga imbi leko paimbo nio ningi mi naa leangei. Ulu te temolo ninge lemo paa teangei. Ulu te naa temolo ninge lemoaku paa naa teangei. Ulu te ee ninge lemoaku teko teangei. Molo ningei wali aku teko teangei. Toya toko naa ninge lemo Gotenga kotena angilinge kinye teko kenjiringi kani mindili nangei nimbelo.

*Imbo toya tolimumini ipuki tipe konge tere-momu enge nimo*

<sup>13</sup> Enonga imbo te umbuni meremoya? Umbuni te memo lemo Gote konge tepili. Enonga imbo te tono koromoya? Tono kolomo lemo yu kunana nimbe Gote kapi nipili.

<sup>14</sup> Enonga imbo te kuro toromoya? Kuro tomo lemo Kraistingu talapena moromele tapu iyema waltindipelie enoni yunge ningi Gote kinye ungu ningi yu altopa manda molopili nipili ningi konge tendekolio wali Awilimunga imbi leko yunge kangina wel kandondangei wangei nipili

<sup>15</sup> Aku wali waltindimbelo iyema ongolio Goteni paimbo tembalo ningi ipuki tikolio yu konge tenge kinye Awilimuni yunge kuromu pora nipili nimbelo kinye yu kelepa manda molombalo. Aku imbomu ulu keri mare temo lemo Awilimuni akuma tiye kondombalola.

<sup>16</sup> Akumunga eno yu mele mele enonga ulu pulu keri teremelema nendo yando ningi para tikolio nendo yando Kristen angenupilinga ningi Gotendo konge tendangei. Aku tenge wali Goteni eno altoko manda molangei nimbelo. Imbo konopu tumbi nimbe pelimuni imbo tengat Gote konge tenderemo kinye yuni konge tenderemo mele paa enge nimbe imbomu paa manda lipe tapondoromo. Akumunga aku teko Gote imbomanga ningi konge tendenge ungu pilipelite aku ulu tendembalo.

<sup>17</sup> Gotenga profet iye Elaija yu lino none tel i yemuli molorumu. Nalo yuni Gote kinye enge nimbe konge tepa, lo naa opili niwi nimu wali poiney yupokonga oli kite talo pakera lo naa orumu.

<sup>18</sup> Altopa lo opili nimbe konge terimu wali lo kelepa omaba poineyena langima altopa wendo orumu.

*Imbo te ungu paimbomu tiye kolombalo wali yu kelvo yando liengei ungumu*

<sup>19</sup> Nanga ango kame, enonga imbo teni Gotenga ungu tukumemu tiye kolopa wendo pumbelo wali enonga imbo teni yu kelepa yando limo lemo

<sup>20</sup> yu ulu pulu keri teli imbomu tepe kenjirimo aulkena pumbelo kinye kanopalie Gotenga ungumu pilipe yunge talapena omaba molopili nimbe lipe tapondopa yando limbelomunga ulu pulu keri teli imbo mini pali kolka aulkena wendo limbelo. Aku ulu tembalomunga Goteni ulu pulu keri paa awini tiye kolondombalo! Aku peya nio.

## Pitani Pipia Kiyendo Topa Mundurumu Ungumu

### 1 Pita I Ungu Torumumunga Ungu Pulu Mare

Imbo maren Jisas ipuki tiringi imboma like mindili tiringi wali Pitani Kraistingu imboma nimbe enge tipili i pipiamu topa panjirimu. Lino mindili nomolo mele mane tipelie lino i mai kombu umbulu tipolio Goteni konopu mondoromo uluma teamili nimbe tipelie mulu mai talo pora ningele konopu lepolio ulu toya tolima teamili nimbe mane tirimu.

Wai kerimu wendo ombalo wali, nu Jisas tiye naa kolko umbuni yu kinye meko yunge imbo mendepolomu molani nimbe Goteni nu enge tipili!

#### *Pitani pipiamu tombaindo pulu polopa torumu ungumu*

<sup>1</sup> Na Pita, Jisas Kraistini nanga kongonomu tendepuwi nimbe lipe mundurumu iyemuni i pipiamu topo, Goteni nanga imboma molangei nimbe kanopa Itimu imboma tiro. Eno enonga kombumu tiye kolko pungo, kombu Pontus provins kinye Galesia provins kinye Kapadosia provins kinye Esia provins kinye Bitinia provins kinye, aku kombumanga pali pungo angimele imboma topo tiro.

<sup>2</sup> I pipia topo tiro imboma eno oi naa molangei Lapa Goteni eno oi Yunge imboma molangei nimbe pilipe kanopa imbi tipelie Yunge imboma nimbe mako torumumunga altoko moloringi kinye Mini Kake Telimuni eno Gotenga imbo kake telima molangei nimbe lipe tapondorumu. Jisas Kraistingu ungumu pilko liko tengen tiko molangei. Yunge mememuni eno Gotenga kumbekerena konopu kake tepa pepili molangei nimbe kulumie topili nimbe aku tepa lipe tapondorumu. Eno imbo aku teko moromelema i pipiamu topo tiro. Goteni eno kinye konopu noirimu mele kinye, eno konopu u' nipiaka takliko molangei nimo mele kinye olandopa olandopa pupili.

*Altopo molopo kondopo kau pumolo  
nimbo konopu tipo nokopo moromolomunga  
Gote kapi nimbo yunge imbi nimbo ola  
mundemili ungumu*

<sup>3</sup> Linonga Awili Jisas Kraistingu Lapa Gote kapi nimbo yunge imbi lipo ola mundemili. Yuni lino mindili nangei nilka nalo lino paa kondo kolopa naa tombo nimbe tiye kolopalie Jisas Kraist onto kombuna makilipe ola molopili nimuaku ulumuni

Goteni koinjo mololi ulu pulu koinjomu lino tirimu. Aku koinjo mololi ulumuni lino tepe enge tirimomunga Yuni mele pengama timbo konopu itemoma pali paimbo timbelo nimbo nokopo moromololo mele pora naa nimbelo.

<sup>4</sup> Lino molomololo uluma timbo nimbe, nimbe panjirimu ulu akumu keri naa lepa, kalaro te naa molopa, pora naa nimbe waliwalima lepa kau pumbelo ulu akumu Goteni mulu kombuna onge wali timbo nimbe noindirimomu limolo nimbo, konopu tipo nokopo moromololo.

<sup>5</sup> Eno timbo nimo imboma, eno Kraist paimbo ningi ipuki tirimelemunga Gotenga engemu, kune tapoi mele, akumuni eno molko kondangei nimbe okoromo. Altopa mulu mai talo pora nimbelo kinye lipe tapondopa, mindili nolemala aulkena wendo lipe, yu kinye peya molko kondonge kombuna mepa pumbe aku ulumu wendo ombalo wali paa kamukumu liengei nimu.

<sup>6</sup> Akumu pilkolio paa konopu tiko moromele, nalo kinye wali alaye kolo kau eno kinye umbuni lupe lupema wendo oromona konopu keri leko mindili noromele.

<sup>7</sup> Umbunima wendo oromomunga pulumu i tepe: Goteni eno paimbo ipuki tirimele mele mandanje nimbe kanombaindo manda manjirimo. Enonga ipuki tili ulu akumu olandopa. Kou gol paimbo mele paa penga kou mone awili tepe purumo halo akumu paa mandopa. Kou golomu teko kenjirimele kinye pora nimo nalo yu paimbo kou gol itemonje, kanamili ningi tipena manda manjiko karomele. Aku tepe mele, eno kinye umbuni wendo orommani eno paimbo Kraist ipuki tirimelenje nimbe manda manjipe kanopa, Jisas Kraist kelepa omba mona angilimbelo wali Goteni eno konopu tipe kapi nimbe imbi nimbe ola mundupili nimbe i teli o enonga enge ningi ipuki tirimele ulumu aku tepe manda manjipe karomo.

<sup>8-9</sup> Jisas Kraist yu paimbo naa karomele nalo Yu konopu mondoromele. Kinye yu paimbo naa karomele nalo Yu paimbo ningi enge ningi ipuki tiko eno Kraist paimbo ningi ipuki tirimelemunga pulu akumu Goteni eno mini pali lipe tapondopa, mindili nolemala aulkena wendo lipe, Gote yu kinye peya molko kondonge aulkena lipe mondoromo, akumunga paa olandopa tono koromele. Aku tono koromele mele ya maina tono koromele mele molo. Tono koromele mele paa olandopa akumu imbonando ningi tingi pereremele.

<sup>10-11</sup> Mindili nolemala aulkena wendo lipe, molko kondonge aulkena lipe mon-

doromomunga ungu mare Gotenga iye profetemani Kraist oi naa opili ningotiringi. Goteni altopa imboma we kondo kolopa lipe tapondombalo ulumundo oi ningotiringi. Ningotikolio, i ulumu te wali wendo ombalonje, Goteni kanopa ltimu iye nomi Kraist maina ombo mindili nombalo ulumu kape, aku tembalo kinye ulu penga olandopama wendo ombalo mele uluma kape, Kraistinga Mini Kakemu enonga konopuna tukundo molopalie nimbe tirimu ulu akuma ambe tepa wendo ombalonje ningotikolio oi naa opili aku iyemani enongan waliwalima konopu kimbo tiko waltindiko, akumunga puluma paa wamongo kororingi.

<sup>12</sup> Goteni aku iyemani yunge kongono tenderingi aku kongonomu eno enongan lipe tapondombalo kongonomu molo nimbe, nimbe para tirimu. Ulu altopa wendo ombalo oi ningotiringi ulu akuma eno molangei wendo naa orumu. Ulu altopa wendo ombalo oi ningotiringi ulu akuma, kinye moromele imboma enonga ningotikolio, oi ningotindiringi. Jisasinga kongono iyemani kinye moromele imboma ningotirimele unguma Goteni oi aku iyemando nimbe tirimu. Aku unguma altopa kinye mulu kombuna Mini Kake Teli lipe mundurumumunga engemuni Kraustinga unguma andoko ningotirimele iyemani ungu tukumemu ningotiringina pileringi unguma. Enselemani kape eno ningotirimele ungumanga puluma paa pilemili ningotikolio.

*Ulu pulu kerima paa naa tepo Gotenga imbo kake telima kau molamili nimbe Goteni lino alako toromo*

<sup>13</sup> Akumunga enonga konopuma kongono enge nimbe tepili ningotikolio liko tumbi tindiko, ulu tengema wamongo pilko kondoko teko, Jisas Kraist altopa ombo mona angilimbelo wali Goteni eno paimbo we kondo kolopalie tepa limbelo ningotipuki tiko nokoko molaio.

<sup>14</sup> Oi eno i unguma naa pilko we molkollio ulu kerima konopu mondoko pilko teringimele kinyeaku ulu naa teangei nalo unguma pilko tengotiko teremele bakulumamele molaio.

<sup>15</sup> Eno nanga imboma molangei wangei nimbe walipe pileringi iyemani paa kake tepili ulu pengama kinye ulu tumbi nilima kinye kau teremele ulu puluma peremo. Aku iyemani moromo mele eno teko waliwalima Gotenga imboma kau molamili ningotikolio eno enongan Gote manda leko, uluma pali tengendo eno kake tepili molko, ulu pengama kinye ulu tumbi nilima kinye teko molaio.

<sup>16</sup> Akumunga ungu te Gotenga bukuna moromo, akumu i tepa:

Goteni nimbeindo, "Na enonga Gote kake tepili ulu pengama kinye ulu tumbi nilima kinye kau tepo moro kani eno teko Nanga imboma ningotikolio konopu kake tepili molko ulu tumbi nili pengama kau teko molaio," nimu. (WKP 11:44-45, 19:2, 20:7)

*Imboma yando liembo nimbe Goteni mele paa penga te tirimu unguma*

<sup>17</sup> Eno Ara Gote ningotikolio Yu kinye ungu nimele iyemani imbomanga imbima pilipelie enoni ulu teremelema naa moke tepa karomo. Imbomanga yu mele uluma moke tembaindo enonga imbima naa pilipelie eno pali tumbi tipe moke teremo. Aku Araya nimele iyemani eno tepa moromo kani mai kombuna molkollio i kombumu linonga paimbo kamukumu kombumu molo. I mai kombuna imbo ombo angilima moromolo ningotikolio Yu iye paa awili olandopamu ningotiringi unguma liko awili tiko pilko molangei.

<sup>18</sup> Yuni enonga nimbe tenderimmele pilkollio tiko teko molangei. Eno pimele, enonga lanieli kolenalema konopu kimbo naa tiko we moloringi mele eno yandopa yandopa eno teko moloringi mele Goteni tiye kolko molko kondonge aulkena pangei nimbe lipe tapondopa wendo ltimu akumu wendo liembo nimbelie kou silva molo kou gol teni pame kot wendo naa ltimu.

<sup>19</sup> Nalo Kraustinga meme paa mele awiliimuni Goteni eno lipe tapondopa wendo ltimu. Kraist yu lupe molo uru te paa naa peli kongi sipsip walo mele molorumumu, yunge mememuni eno tepa terimu.

<sup>20</sup> Goteni mulu mai talo eno tepalie Kraist eno kongonomu tepili nimbe kanopa ltimu iyemani, kinye moltomolo walima pora nimbei teremele wali yu enonga nimbe lipe tapondombaindo maina mainye ombo mona molorumu.

<sup>21</sup> Yuni enonga nimbe tenderimmele pilkollio Yu imbo ono kombuna topa mak-injipelite Yunge imbi paa ola molopili nimu Gote paimbo ningotipuki tirimele. Aku terimumungo eno Gote kau paimbo ningotipuki tiko, Yuni altopo tembo nimbe, nimbe panjirimu mele paimbo tembalo ningotikolio tiko nokoko moromele.

*Linonga angenupilima paa konopu mondoriungumu*

<sup>22</sup> Eno ungu paimboma pilko liko tengotiko teremele eno kulemuni enonga konopuma kulumie tondoringi, konopu kake tepili moromelemunga kolo toko angenali konopu mondoromolo naa ningotikolio, paa konopu mondoromele kani kinye

angenali kinye konopu paa enge ning  
mondaio.

<sup>23</sup> Langi imbo poinyena panjirimele wali muli topa wendo ombo purumo mele enoaku tepe mele melteni kelepa wali talo tepe merimuna imbo koinjoma moromele. Langi imbo manda wendo naa ombo, ombareri lepa koromo imbomuni eno naa merimuna. Nalo langi imbo wendo ombo molopa kau purumo akumuni eno altopala merimuna. Aku langi imbomu Gotenga ungumu, akumu molopa kau pumbe koinjo mololi ungumu. Akumuni eno altopala merimuna.

<sup>24</sup> Aku ungumu pora naa nimo mele ungu te Gotenga bukuna moromo, akumu i tepe: Imboma pali era mele, eno molko kondoromele kondipe tindi mele. Erama koromo wali kondipe tindima oo lepa maina manye purumo

<sup>25</sup> nalo Awilimunga ungumu waliwalima lepa kau pumbelo. (Ais 40:6-8)

Aku ungumu eno ungu tukumemu ningotiringi.

## 2

*Awilimu kou koinjo mololi pengamu momromo*

<sup>1</sup> Eno altopala merimuna koinjo moromele kani enoni i teko teangei: We imboma teko kenjirimele uluma kinye, konopuni lupe pilko liko kerena lupe kolo toko ningo topele mapele toli uluma kinye, we ulu lupe mare teko kolo toli uluma kinye, imboma mele awini noiko molko kondoromele mele kanokolio yakela kolko konopu keri panjili uluma kinye, imbo tengungu umbulkondo nindili uluma kinye, ulu keri akuma waye tiye kolao.

<sup>2-3</sup> Awilimuni eno kondo kolopa we tepe kondoromele alaye kolte pilkolio pilko penga pileringi kani bakulu kiki ame paa omani koromele mele eno aku teko ame pengamu, mele keri te naa peli ame, akumu omani kolangei. Aku amemuni eno tepe enge timbelona enonga konopu enge pepili eno akoko awili leko Gote kinye penga teko koinjo molonge.

<sup>4</sup> Eno Kraist moromona wangei. Yu kou koinjo mololi melemele. Imbomani yu keri ningolikopilko liko lteringi nalo Goteni yu kanopa paa penga nimbe kanopalie mako torumu.

<sup>5</sup> Eno peya kou koinjo mololi mele moromele. Ulke mare kouni takoromele mele Goteni yunge Mini Kake Telimunga ulkemu takondombaindo eno kanopa lipelie ulke takombalomunga kou melema nimo. Eno Gotenga kapi nili imbo kake telima moromele. Kapi nili iyemani Gote kapi ningeindo yuni kanopa penga pileringi melema kalko yu tiringi aku teko

eno enongan Gote kapi ningeindo yukanopa penga kanombalo melema tiengei. Aku kinye, Jisas Kraistini enonga nimbe tenderimumunga Gote mele tingema Gote yuni paimbo kanopa penga pilipe limbelo.

<sup>6</sup> Akumunga ungu te Gotenga bukuna moromo. Akumu i tepe:

Nani kou paa penga te, ulke ponga mele polko, ulke enge nipili ningotimumele polangei nimbo kanopo ltiu, aku koumu paa olandopa mulu Saionona noiro.

Aku wali Yu paimbo ningotipuki tingeimbomanipili naa kolko konopu keri naa panjinge. (Ais 28:16)

<sup>7</sup> Eno Kraist paimbo ningotipuki tirimele imbomanaku koumu kanoko penga pimele nalo Yu naa pimele imbomani Yu kanoko keri pimele mele i tepe:

Ulke takoringiyemani kanoko kerire konopuleko tokolteringikouakumu, kinye ulke timumele ulke enge tili kou awili pengamu. (Sng 118:22)

<sup>8</sup> Ipuki naa tirimele imbo akuma kinye, akukoumu kinye, i tepe mele nimbe peremo:

Aku koumu yu kou kelo te, imbo te kamburumu wali kika tepe, tepe ai tondombai teremo. Yu kou awili teni imbotopemainyemundurumo kou mele. (Ais 8:14)

Aku imboma Gotenga ungumu likotuitirimeleungumetepai tondoromo. Goteni oiaku tepe nimbe panjirimu.

<sup>9</sup> Nalo eno Paimbo ningotipuki tirimeleimbomaku tepe molo. Eno yuni kanopaitumu imbotalapemu molko, iye nomikingimunga Gote popo tondoli imboma molko, yunge kau molongemunga imbo kake telima molko, paa Gotenga imbomamoromele. Yuni akuteko molangeinimbe eno mako torumumunga pulumu i tepe: eno tumbuluna moloringi wali Gotenikuna wendo ongo nanga pa teli paa pengamunga tukundo waio nimu. Aku Gote Yuni Yu molopo kondoro mele kape tepe pengatero mele kapeimbomapilengenikapi ningotemane tokotiengeninimbe eno Nanga imboma molangeinimbe kanopaitumu.

<sup>10</sup> Eno oiwemboma moloringi nalo kinye eno Gotenga imbotalapemu moromele. Oi ulu pulukeri terengimunga Goteni enokondokolopaeonga ulukerima tiye kololi ulu te eno kinyenaa perimu nalo kinyeyunkondokolopaulupukerima we tiye kololi ulumu tirimunattingi. Kinye eno kinyeperemo.

*Tawendo moromele imboma molongena lino tumbi tipo andopo molamili ungumu*

<sup>11</sup> Nanga konopu mondoro imboma, nani eno enge nimbo konge tepolio i mai

kombuna eno imbo ombo angilima mele, imbo ponenge mele moromelemunga enonga konopumani ulu kerima teamili nimele mele paa liko umbulu tiengei. Kangina oi we konopu keri peremomani eio konopu ltemo ulumani enonga minima tepo beambo tiemili ningi waliwalima minima kinye opa teremele.

<sup>12</sup> Eno tawendo imboma molongena pungolio ulu pengama kau teko tumbi tiko molangei. Tawendo imbomani kinye paimbo enondo teko kenjirimene imboma moromele ningi ungu umbulkondo nindirimele nalo enoni ulu pengama tengena kanokolio altoko Gote imboma molongena ombalo walimunga aku imbonani Gotenga imbi ningi ola mundengei ningi aku teko ulu pengama teko tumbi tiko molangei.

*Lino nokoromele imbo nomi awilima lipo awili tiemili ungumu*

<sup>13-14</sup> Awilimunga imbi ola molopili ningi gavman iye palinga unguma liko awili tiko pilko molaio. Iye nomi kumbena kingimu kinye kape, provins gavman kumbe leko moromele imboma kingimuni kanopa lipe teko kenjirimene imboma mindili nangei ningi, teko kondoromele imbomanga imbia kapi nengei pangei nimbe kombumanga lipe mundurumoma kape, aku iye awilimanga pali unguma liko awili tiko pilko molaio.

<sup>15</sup> Liko manjeio, imbo keke lepo tolimani enoni teko kenjirimene ningi ungu te naa pepili nimbe Goteni eno Kraistingu imboma ulu pengama kau teko molangei konopu ltemo.

<sup>16</sup> Unku mane teni naa nokopa ulu kerimanga kendemande imboma naa molkolio we moromele mele eno aku teko andoko molaio. Nalo unku mane teni lino naa nokromomunga ulu kerima temolo lemo ulure molo ningi ulu kerima andoko naa teao. Lino Gotenga kongono kendemande imboma ningi yunge kongono kendemande imbomani teremele mele aku ulu teko molaio.

<sup>17</sup> Eno pipia topo tiro imbomani imboma pali teko kondoko, unguma liko awili tieio. Paimbo ningi ipuki tirimele angenalima konopu mondoko, Gote pipili kolko liko awili tiko, iye nomi kingimu wale pakaio.

*Gotenga kongonomu tendepolio mindili nomolomunga ungumu*

<sup>18</sup> Eno mele pengama naa liko kongono we tendeli imboma, enonga nokoli imbomani ungu ningema taka liko pilko liko awili tiko molaio. Eno kinye karaye naa teko taka liko nokoromele nokoli imbomanga unguma kau pilko liko teangei nimbolio

naa nio nalo eno mindili tiko teko kenjirimene nokoli imbomani ninge unguma kape pilko liko teangei nimbolio nio.

<sup>19</sup> Aku niomu i tepo pilipolio nio. Gotenga unguma pilko likolio teko kondonge wali imbomani eno teko kenjiko teko mindili kondonge lemo manda, mindili nomolo kinye manda nalo tepo naa kenjipo Gotenga ungu ololandapamu kumbe lepo pilipo temolo ninge wali Goteni konopu timbelo.

<sup>20</sup> Teko kenjingemunga mane tiko teko mindili kondonge wali konopu enge nipiili molkolio manda, lino tepo kenjimolumunga paimbo mindili tirimele kani we mindili namili ninge kinye imbomani eno kapi ningeya? Aku molo. Paa mindili nonge. Nalo teko kondongemunga mindili tinge kinye we mindili nongo pundi naa toko we tiye kolonge lemo paa. Aku tengenye Goteni kanopa penga pilimbelo.

<sup>21</sup> Eno ulu keri te naa tekolio mindili nangei nimbe Goteni eno nanga kongonomu tendangei waio nimbe eno alako torumu. Kraist yu Goteni tewi nimu mele tembaindo enonga nimbe mindili norumu,aku ulumu eno aku teko manda leko tengenye lipe ondorumu. Akumunga Goteni teao nimo ulu akuma teamili ningolio teangei mindili nonge.

<sup>22</sup> Kraist yu tepa molorumu mele Gotenga bukuna ungu te i tepa nimbe moromo: Yuni ulu pulu keri te naa terimu. Wali te kape kolo topa ungu te paa naa nimu. (*Ais 53:9*)

<sup>23</sup> Yu ungu taka tondoko iri toko teringi wali yuni enondo ungu te topondopa naa nimu. Enoni yu we mindili tiringi nalo Yu we mindili nambo nimbeline ungu te naa nimu. Kot pilipe uluma pali tumbi tipe moke teremo Iyemuni yu teko kenjiringi imbomanga kot tendembalo nimbe pilipe enoni yu tiringi ulu tiye kolorumu.

<sup>24</sup> Yuni linongga ulu pulu kerima Nangama nimbeline akuma yunu mepa unjo polopeyana kolorumu. Aku tepalie lino imbo ulu keri teremoloma naa teamili nimbo kamukumu tiye kolopolio ulu toya tolima kau teamili nimbo koinjo molamili nimbe yuni aku ulu terimu. Imbonani yu toko mindili tiringimunga eno koinjopuringi.

<sup>25</sup> Kongi sipsip lupe lupe purumele mele eno aku teko lupe lupe puringi, nalo kinye enonga minima nokopa tapu teremo iye Kraist moromona yando ongolio moromele.

### 3

*Ambo iye pulimanga kinye iye ambo lili-manga ungumu*

<sup>1-2</sup> Oi nindu aku teko mele amboma eno enonga iyemanga unguma pilko

omenalinga maindo molaio. Amboma enonga iye mare Gotenga ungumu pilko naa limelemani enonga ambomani ulu penga tumbi nilima kau teko, iyemani ungu ningema wamongo pilko taka liko molonge ulu kanokolio konopu topele toko Gotenga iyema molamili nengei ningolio eno amboma aku ulu teko molaio.

<sup>3</sup> Eno ambo pengama kanoko nengei ninggio kangindo kau au tiko pinyendima lapie langoko, kou goloni teli mele pengama nomina leko, wale pakoli penga kou awili purumoma pakoko, aku ulu naa teao.

<sup>4</sup> Eno ambo pengama kanoko nengei ninggio mele paa tiperipe keri naa lembo mani enonga konopuna tukundo au tieio. Aku uluma i tepa: Eno konopu penga pepa, konopu tendekuna pupili taka liko molonge ulumu. Aku ulumu kanopalie Goteni ulu paa penga olandopamu nimbe karomo.

<sup>5-6</sup> Koro oi Goteni lino kinye tembo nimo mele paimbo tembalo ningio pilko nokoko moloringi ambo kake telimani lino au nemili ninglioaku teko taka liko moloringi kani pilkolioaku teko molaio. Sarani iye Abrahamenga unguma pilipe lipe, yundo nanga nokoli iye awilimu nimu, aku tepa mele, aku ambomani enonga iyemanga unguma pilko eno liko awili tiko moloringi. Eno ambomaniaku teko enonga iyema kinye ulu pengama teko melte pipili naa kolonge lemo eno Saranga lemenupili moromele.

<sup>7</sup> Iyema, eno aku teko enonga amboma kinye molongeindo amboma molko kondangei ningio eno konopuni wamongo liko manjeio. Ambomanga kangima enge te naa peremo kani eno iyemani amboma liko tapondaio. Goteni molopa kondopa kau puli ulu pulumu eno iyema kau naa timbelo. Amboma kape timbelola ningio pilkolio amboma kinye aku ulu teko molangei. Eno iyemani Gote kinye ungu nimbo konge temolo kinye ulu teni linonga unguma pipi na tipili ningio enonga amboma kinye aku ulu teangei.

#### *Imboma kinye ulu pulu tumbi nilima kau teamili*

<sup>8</sup> I pipia toromu topo pora tiemboi, ungu te peya kamukumu nemboi. Eno enonga konopuma tendekuna pupili popo tipo molamili ningio kandi angenupilimani nendo yando kondo kolko konopu mondoromele meleaku teko enoni nendo yando Kraustinga imboma linonga angenupili ningio kondo kolko konopu mondoko, liko tapondoko, eno imbi ola mele molopili, lino imbi mainye mele molopili ningio taka liko imbomanga unguma pilko molangei.

<sup>9</sup> Yando eno kinye teko kenjingewali nendo pundu naa taio! Yando iri toko ungu keri te ningewali nendo pundu naa taio! Yando eno teko kenjingewali nendo tepo kondopo lipo tapondamili ningio Goteni eno tepea kondopa, eno konopu tiko molko kondangei nipiili ningio Gote enonga ningio konge tendangei. Aku ulu tengelemo oi Goteni eno lipo tapondopo tepo kondambo waio nimu mele paa tembalo.

<sup>10</sup> Aku nio ungumunga ungu te Gotenga bukuna moromo mele i tepe:

Imbo teni na manda molopo, konopu tipo molambo nimbeline yungu keri te naa nimbo, kolo naa tambo nimbe yunge keremu nokopili.

<sup>11</sup> Ulu pulu kerima tiye kolopa umbulu tipe ulu pengama tepili. Imboma kinye konopu tendekuna pupili ulu pulumu pepili nimbe aku ulumu enge nimbe tepili.

<sup>12</sup> Aku ulu pengama ambe temonaaku tepea tepiliya? Akumunga pulumu nemboi: Awilimuni imbo ulu tumbi nilima teko moromele imboma kanopa penga pilipe, enoni yu konge teko ningewunguma waliwalima komu tendepa moromo, nalo ulu kerima teremele imboma lipe umbulu tirimo kani yuniaku tepea tepili. (Sng 34:12-16)

#### *Kraist lombimele imboma mindili nonge ungumu*

<sup>13</sup> Ulu pengama kau teamili ningio molonge wali narini eno mindili lipe timbeloya?

<sup>14</sup> Nalo ulu tumbi nilima tengewali akumanga paa mindili nongo molonge lemo eno malo. Imbomani eno teko pipili kondongei tengelemo eno pipili na kolko minnaa lteao.

<sup>15</sup> Enonga konopuna lino Kraist Yunge kau molopo, Yunge ungumu kau pilipo lipo tepo molamili ningio Yu kau linonga Iye Awilimuli molopili ningio Yu kau pipili kolaio. Aku kinye enoaku ulu teko wali pengawendo ombalo wali nokoko molonge kinye imbo teni kanopalie, enoaku teko ambe temona teko moromeleya nimbe walipe pilimo lemo enoni nendo ungu te topondoko enonga ulu teremele manga puluma ningotinge mele liko tumbi tiko molaio.

<sup>16</sup> Nalo enonga konopuna ulu keri te paa naa pepili neio. Pele eno Kraist pilko ambokolio molko kondoromele meleaku ulumungga imbomani eno teko kenjirimele. Kolo toko ningio enonga ungu umbulkondo nindingewali eno ulu keri te naa pepili molongenaaku imboma pipili kolongeitaka liko ningio tumbi tieio.

<sup>17</sup> Goteni lino mindili nangei nimbelo-munga ulu penga te tepolio mindili nomolo lemo aku penga. Lino ulu kerima tepolio mindili nomolo lemo aku keri. Kraistini Lino mindili nombo molopo kenjilimala aulkena wendo limbeindo yu kolopa makilipe ola molorumu.

<sup>18</sup> Kraist iye penga te molopalie mindili norumu mele pileio! Yu iye tumbi nilimu molopalie, ulu keri teli imbomanga kolo wangopa kolorumu. Enonga ulu pulu kerima pali kamukumu mainye pupili eno Gote moromona pungo popo tiko molangei nimbe Kraist wali tendeku wali kau kolorumu. Yunge kangimu toko kondoringina kolorumu nalo altopa Mini Kake Telimuni yu makinjirimuna ola molopa mulu kombuna pumbe molorumu mele moromo.

<sup>19</sup> Mini Kake Telimunga engemuni kangimu kolopa liepili imbo koloringi-manga minima ka ulkena moloringina pumbe unguma nimbe tirimu.

<sup>20</sup> Aku minima oi Noa molorumu wali Gotenga ungu nimuma naa pilko, liko umbulu tiko moloringi imbomanga minima. Imboma ulu keri awini teringi nalo Goteni welea pundu naa torumu. Noani sipimu takopa molopili imboma oi naa tambo nimbe taka lipe nokopa molorumu. Altopa Noani sipimu takopa pora tirimu wali Goteni no topa imboma topa kondopili nimu kinye imbo ki talo kau noni naa torumu. Aku imbo pokore kau Goteni naa kolko koinjo pangei kani sipina tuku pangei nimbe lipe tapondopa nona wendo ltimu.

<sup>21</sup> Aku nona imbo ki talo naa kolangei nimbe lipe tapondopa wendo ltimu. Kano nomupe, kinye no ltimele ulu pulumu lipe ondoromo. No ltimele nomuni kangindo ulure naa tepe, kangina kalaro moromoma kulumie topa wendo naa ltindirimo. No ltimelemuni eno i teko nimele: "Gote, no ltio kanowi. No ltio aku ulumuni na ulu kerima naa tembo," ningi mi leko nimele. Goteni Jisas Kraist imbo ono kombuna topa makinjindirimumunga no ltimelemuni eno lipe tapondopa mindili nolemala aulkena wendo lipe, yu kinye peya molko kondonge aulkena lipe mondoromo.

<sup>22</sup> Aku iyemu Yu makilipe ola molopalie mulu kombuna purumu. Kinye yunge imbi ola molopili Gotenga imbo kindo molopa, mulu kombuna enselema kape, maina imbo awilima kape, kuro enge nili awilima kape, akumanga pali Yu iye Awilimu molopa nokoromo.

## 4

*Oi konopu kerimunga unguma pilipo terimulu mele tiye kolamili*

<sup>1</sup> Akumunga, Kraist yunge kangina mindili nombalie ulure molo nimbe tiye kolorumu mele pilkolio eno kape yuni konopuni pilerimu mele aku ulu teangei. Imbo teni yunge kangina mindili nomba umbuni meremo imbonmu ulu pulu kerima tiye kolopa altopa naa teremo.

<sup>2</sup> Aku tepalie imbo akumuni oi naa kololi, kangimu kinye we molopalie yunge konopu oimuni konopu mondoromo ulu kerima naa teremo. Yu Goteni tewi nimo uluma kau teambo nimbe teremo.

<sup>3</sup> Tawendo moromele imbomani pilko teremele mele eno Kraistinga imbomani oi aku teko teringi. Nalo aku uluma wali paa awini oi teko moloringi mele manda teko, kinye tiye kolaio. Aku uluma i tepe: Ambo iyema kinye andoko wapera toko ulu kerinale teko kenjirimele ulumu kinye, ulu kerima tingeindo teamili ninggo teremele ulumu kinye, no nongo keke lepo toromele ulumu kinye, liko maku toko no enge nili awini nongo keke lepo toko ulu kerima awini teremele ulumu kinye, Goteni ungu mane nimbe panjirimuna liko umbulu tiko Goteni paa kanopa keri pilipe kalaro mololi uluma nimbe karomo uluma tingeindo we melemare liko anjiko lino nokoromele gotema ninggo kuro popo toko kapi nimele ulumu kinye, tawendo imbomani aku teko uluma teremele mele enoni oi aku teko wali awini teringi.

<sup>4</sup> Kinye eno tawendo imboma kinye tendekuna molko aku ulu pulu keri awini konopu mondoko teremele mele naa teko moromelemunga kanokolio tawendo imbomani oi teringi mele naa teremele ninggo mini lteko eno iri toko ungu taka ton-doromele.

<sup>5</sup> Nalo koinjo mololi imbomanga kape kololi imbomanga kape, pele walite kot pilipe, enoni ulu teremelema apurupe moke tembaindo moromo iyemu kot pilimbeindo molombalona angilinge. Yuni aku ulu teko kenjirimele imbomando ambe temona aku uluma teringiya nimbelo wali enoni ulu teremelema yundo paimbo ninggo tingte.

<sup>6</sup> Imbomanga teremele uluma moke tembalo akumunga oi koloringi imbomani oi naa kololi wali ungu tukumemu pilko ltingi. Paimbo maina moromele imboma kolonge mele koloringi nalo kinye minima koinjo pungo Gote kinye molko kau purumele.

*Goteni we tipe kalopa tirimu uluma tepo kondamili*

<sup>7</sup> Maina melema pali pora nimbelo walimu nondopa wendo ombai teremo kani eno imbo konopu pepili enonga uluma nokoko kondokolio, Gote kinye ungu ninggo molangei.

<sup>8</sup> Nalo aku ulumanga ulu olandopa te Gotenga imboma eno enongano nendo yando enge ningko konopu mondoko molaio. Aku ambe telka enonga konopu mondoli ulumuni imbomani eno ulu keri awinima pange tenderemo.

<sup>9</sup> Gotenga imbo te enonga ulke tenga ombalo wali eno ulke pulu imbomani konopu keri naa panjiko yu molamili owi ningko nokoko kondaio.

<sup>10</sup> Goteni kongonoma teko kondangei nimbe eno yu mele mele we kondo kolopa enge lupe lupema moke tepa we tirimo. Enge akumani eno nendo yando liko tapondoko molaio. Gotenga kongono tendeli imbo pengama molkolio aku ulu teaio.

<sup>11</sup> Imbo teni ungu nimbe timbelo lemo Gotenga unguma wamba nimbe tipili. Imbo teni imbo marengga kongono tendemba lo lemo Goteni enge tirimomuni kau tendepili. Ulu temoloma pali imbomani kanokolio Gote kapi ningko Yunge imbi liko ola mundengei ningko Jisas Kraist peya kopu teko molkolio aku uluma teaio. Yu imbi kamukumu ola molopa kau pumbe, yunge engemu waliwalima pepa kau pupili moromo. I paa.

*Kraistingu imboma molopolio mindili nomolo kinye ulure molo nemili ungu*

<sup>12</sup> Nanga konopu mondoli imboma, eno manda manjirimo ulu umbuni te tipeni mele, eno mindili tirimo. Aku ulumu ambe temona wendo oromoya ningko konopu liko naa mundengei.

<sup>13</sup> Kraist mindili norumu mele lino mindili noromolomunga paimbo mindili noromolo ningko tono kolangei. Yunge enge pa telimu kinye imbi ola molopili ombalo kinye lino konopu penga tepo lemo ningoaku konopu leko mindili nongo molangei.

<sup>14</sup> Eno Kraistingu imboma moromelemunga ungu taka tondonge lemo paa enge pepa imbi mololi Minimu, Yu Gotenga Minimu, eno kinye moromomunga eno malo.

<sup>15</sup> Eno mindili nonge lemo imbo toko kondonge molo melte wapu linge molo gavmannenga ungu mane lupe lupema toko tangondoko ulu te teko kenjingge molo imbo tengga kongono teremomu teko embambo tingemunga mindili naa nangei.

<sup>16</sup> Nalo eno ipuki tiko moromelemunga mindili nonge lemo pipili naa kolangei. Eno Kraistingu imboma moromele ningko pilko Gote kapi ningko imbi liko ola mundeo.

<sup>17</sup> Goteni imboma moke tembaido yunge imboma kumbe lepa moke tembalowalimu oi wendo ombai teremo kani konopu tiko mindili nongo molangei. Altropa, Goteni lino aku tepa kumbe lepa kot tendepalie aku teko mindili nangei

nimo lemo Gotenga ungu tukumemu liko umbulu tirimele imboma kot pilipelie, ambe tembalonje?

<sup>18</sup> Aku niomunga ungu te Gotenga bukuna moromo. Akumuni nimbeindo: Imbo konopu tumbi nipili moromelema tepa limbei pereremo lemo Gote umbulu tiko ulu pulu kerima teremele imboma ambe tengeya? (*Snd 11:31*) nimbe peremo.

<sup>19</sup> Akumunga, Goteni mindili nangei nimomunga mindili noromele imbomani mulu mai talo kinye lino imboma kinye tepa wamopa terimu Goteni tembo nimbe, nimbe panjirimo mele paimbo tepa, waliwalima lino nokopa kondopa tiye naa koromo ningolio enonga konopu kangima kinye pali Goteni nokopili ningko yu tiko, ulu pengama kau teko molangei.

## 5

*Kraistingu talapena imbomanga tapu iyemanga ungumu*

<sup>1</sup> Eno kinye moromele tapu iyema, eno tapu iye moromele mele na kape aku tepo tapu iyemula moro. Na Kraist mindili norumuna kanoru iyemu, na Gotenga mulu kombuna enge pa teli nondopa mona lembalo ulumu Kraistingu imboma kinye peya limolo iye tela, nani eno kinye moromele tapu iyemando paa enge nimbo konge tepoilo nimboi:

<sup>2</sup> Gotenga sipsip eno nokoromelema wamongo tapu teko kondaio. Goteni i kongoeno teangei nimbe tirimu akumu teaio nimo kani teamili ningko konopu keri panjiko we naa teangei. Konopu u nipili teangei. Goteni teaio nimu kongono akumu kou mone limolo ningko naa teangei. Imboma paa lipo tapondopo nokamili ningko paa konopu tiko teangei.

<sup>3</sup> Goteni eno nokangei nimbe tirimu imboma mandoko molangei, linonga imbima paa olandopa molopili ningko eno mindili tiko naa nokangei. Eno nokoromele sipsipima molonge mele eno tapu iyemaaku teko ulu pengama kau teko molangei. Enoni kanokolio manda leko teangei ningkoaku ulu teko molaio.

<sup>4</sup> Sipsipimaaku teko nokoko molongewali Sipsip Tapu Iye Awilimu ombalo kinye eno wainye alipu mele pakondombalo akumu waliwalima keri naa lepa, we lepa kau pumbelo mele pengamu linge.

*Goteni lino nokopa kondombalo nimbo taka lipo molamili*

<sup>5</sup> Iye kokelema, aku teko mele eno iye yumanga unguma taka liko pilko iye yuma maindo molangei. Gotenga bukuna ungu te nimbe moromo akumu i tepe:

Na awilimu moro, na lipe manjili peremo iyemu, imbo lupema enge te naa peremo ninga enonga imbima we liko ola mundurumele imboma Goteni yunge opa pulema nimbe tepa mainye mundurumo,

nalo imbo enongan na imbi naa mololi imbo kerimu, imbo lupema lipe manjilima peremomunga unguma taka lipo pilipo molambo nimele imboma we kondo kolopa tepa kondoromo.

(Snd 3:34)

Aku tepa nimbe moromo kani eno enongan pali nendo yando lino imbi naa moromo ninga taka lipo molamili neio.

<sup>6</sup> Aku tepa ungu te moromo kani Gote yu paa enge pepili imboma nokoromo ninga enoni na awilimu naa molambo, na imbi naa molopili ninga eno enongan imbi mainye munduko taka liko molaio. Aku ulu temolo kinye yunu pilimbelo wali tenga linonga imbima lipe ola mundumbelo ninga aku ulu teao.

<sup>7</sup> Yuni eno kondo kolopa nokopa moromo kani yu moromona pungo enonga konopuna umbuni pembaloma kinye mini ltengema kinye yundo ninga para tieio.

<sup>8</sup> Laion engele kolopalie kongi te topa nombaindo andoromo mele aku tepa enonga opa pule kuromanga nomi Sataneni na imboma ambolopo tepo kenjembo nimbe aku tembaindo andopa moromo kani eno imbo konopu pepili molko, waliwalima kanoko kondoko molaio.

<sup>9</sup> Eno lino konopuna umbuni tepili moromolo mele we mai kombuna pali moromele imbo angenupilimaaku teko umbuni tepili moromelela ninga pilkolio Goteni eno waliwalima nokopa kondoromo. Akilio kape kinye kape yuni eno tiye naa kolombalo ninga ipuki tiko molkolio Satan nanga opa pulemu, yuni na naa ambolopili ninga yunge ungumu naa pilko, we mele none tendeko, yu toko wendo mundeio.

<sup>10</sup> Eno wali alaye kolte umbuni tepili molonge wali Gote yuni yunu eno kelepa tukundo lipe, eno nanga imboma moromele mele tiye naa kolko enge pepili molangei nimbelo. Eno we kondo kolopalie yuni altopa eno yu peya kamukumu yunge enge pepa pa tepa kau puli kombuna peya molamili wangei nimbe ya maina mainyendo tirimu iye nomi Kraist akumuni linonga nimbe tenderimumunga Goteni linondo aku tepa manda nimbelo.

<sup>11</sup> Gote yu kinye engema pali pepa imbi ola molopa kau pupili moromo. I paa.

*Pipia topa pora timbeindo ungu mare torumu*

<sup>12</sup> I pipia ponjili topo tiromu Sailasini ton doromo. Yu kongonoma tiye naa kolopa paa enge nimbe teremo angenumu nimbo pilipo moro. I pipia toromu Goteni imboma we kondo kolopalie lipe tapondoromo mele pilengei nimbo toro. Goteni imboma kinye paimbo konopu noipe mendoromomundonio akumu paimbo ninga pimele mele tiye naa kolko, enge ninga molangei.

<sup>13</sup> Kraistinga imbo talape kombu awili Babilon moromelema, aku imboma kinye eno pipia topo tiro imboma kinye Goteni oi Nanga imboma molangei nimbe kanopa Itimu aku Babilon\* imbomani molko kondaio ninga, ninga mundurumele. Nanga malo Makoni eno molko kondaio nimbe, nimbe mundurumola.

<sup>14</sup> Eno enongan nendo yando kondo kolko ki liko molko kondaio neio. Eno Kraist kinye kopu teko moromele imboma pali konopu u nipili taka liko molangei. Aku peya nio.

\* **5:13:** Pitani Babilon manda lepa Rom kombundo nimu konopu ltemele.

## Pitani Pipia Talo Tipe Topa Mundurumu Ungumu

### 2 Pita I Ungu Torumumunga Ungu Pulu Mare

Pitani Kraistingu imboma mane tipelie kolo toko mane tili imbo ongema kane kane molamili nimbe i pipiamu topa panjirimu.

Goteni nu kolo toko mane tili imboma kanoko imbi tieni nipili!

*Lino ulu pengama kau enge nimbo tepo molamili unguma*

<sup>1</sup> Na Saimon Pita, Jisas Kraistini nanga kongonomu tendepuwi nimbe lipe mundurumu iyemu, na yunge kongono tendeli kendemande iyemu molopolio i pipiamu topo tiro. Linonga Gote, linonga Tepa Lili Iye Jisas, Goteni timbo nimbe maina lipe mundurumu iye Kraist, yuni uluma tumbi tipe teremomunga lino paimbo nimbo ipuki tirimolu ulu pengamu enoaku teko paimbo ningi ipuki tirimele imboma, enondo i pipiamu topo tiro.

<sup>2</sup> Gote kinye linonga Awili Jisas talo pilko imbi tirimelemunga eloni eno kinye konopu noirimbele ulumu kinye, eno konopu ame topili taka liko molangei nimbele ulumu olandopa olandopa pupili.

*Goteni lino kanopa lipe nanga imboma molangei waio nimu ungumu paa mainye naa pupili nemili*

<sup>3</sup> Gote yu imbi mololi enge peremo iyemu. Yu ulu pengamanga pulu iyemu. Aku iye-muni lino yunge imboma molangei waio nimbe alako torumu. Yu imbi tirimolumunga yunge engemu Jisasi kinye per-emomuni lino molopo kondopo Gotenga unguma kau pilipo lipo temolo ulu pulumu tirimu.

<sup>4</sup> Aku ulu terimumunga yunge melema lino timbo nimbe oi nimbe panjirimu mele paa enge pengama tirimu. Timbo nimbe mi lepa panjirimu melema eno kinye pembalo wali Gote yu moromo mele ulu pulumu eno kinye pepili, maina imbamangka konopuman melema kanoko konopu mondoko paa molko kenjiko, ulu keri teremele uluma eno Gotenga imboma aku teko molko naa kenjingie! Aku ulu kerima umbulu tiko, Gotenga imboma molko kondangei nimbe, yu timbo nimu mele paa enge pengama tirimu.

<sup>5</sup> Aku terimuna enoaku teko moromele kani eno paimbo ningi ipuki tirimele ulumunga ola panjiko ulu pengama kau paa wamongo pilko enge ningi teaio. Altoko enge ningi ulu pengama tenge ulumunga

ola panjiko Gote kinye Jisas Kraist talo momrombele mele kinye nimbele unguma kinye paa pilko kondaio.

<sup>6</sup> Altopa Gote kinye Jisas Kraist talo pilko kondoromele ulumunga ola panjiko eno enongano ulu pulu kerima waka lembalo kinye paa naa teamili ningi enongano konopumu nokoko kondoko ulu kerima naa teaio. Altoko enongano konopumu nokoko kondoko ulu kerima naa tengen ola panjiko eno kinye umbunima wendo ombalo wali enge ningi taka liko molkolio umbunima meao. Altoko umbunima enge ningi taka liko menge ulumungape ola panjiko Gotenga imboma moromolo ningi yunge unguma kau pilko liko teko molaio.

<sup>7</sup> Altoko Gotenga imboma molkolio Yu kanopa penga pimo uluma tengen ulumunga ola panjiko Kraistingu imboma linonga kandi angenupilima ningi konopu tendekuna pupili popo tiko molaio. Altoko Kraistingu imbo pulu itemoma ningi molonge ulumunga ola panjiko nendo yando paa konopu mondoko molaio.

<sup>8</sup> I ulu pengama enge ningi ambolko aku uluma eno kinye enge pepili molonge lemo, linonga Awili Jisas Kraist eno pilko imbi tirimele mele olandopa olandopa mongo tombalo. We mainye naa pumbelo kani aku teko uluma teko molaio.

<sup>9</sup> Nalo Kraistingu imbo te aku tepa ulu pengama naa tepa moromo imbomu yu mongo ltimona imbo te tule tepa itemo melema naa kanopa, paa nondopa itemo melema kau karomo imbo aku tepa mele moromo. Yuni ulu pulu keri oi terimuma Goteni kulumie topa yunge konopu tepa kake tenderimu mele naa pilipe maa ton-doromo.

<sup>10</sup> Akumunga, nanga ango kameya, eno Goteni nanga imboma molangei wangei nimbe alako topa kanopa ltimu ulumu ara tiko paa yunge imboma molopo kau pamili ningi enge ningi molaio. Aku tengen wali eno umbuni teni tepa mainye naa mundumbelo, enoni yu manda tiye naa klonge.

<sup>11</sup> Aku ulu teko molonge wali, linonga Tepa Lili Iye Awili Jisas Kraistingu kombu, Yu iye nomi king molopa nokopa kau pumbelo akuna molamili tukundo waio nimbe konopu tipe nambu topa noindimbelo.

<sup>12</sup> Akumunga, paimbo nani nio mele eno ungu tukumemu pilko paa paimbo ningi ipuki tiringi mele, kinye we pimele nalo aku unguma maa naa tondoko tiye naa kolangei nimbo takiraki nimbo timboindo altopo nimbo tiro.

<sup>13-14</sup> Linonga Awili Jisas Kraistini na nimbe tirimumunga na wali alaye kolo nanga kangimu ulke takai melena molopolio, tiye kolombo nimbo pilipolio kinye na i

ulke takaina mele we molopolio eno oi ungu pileringima paa wamongo liko manjiko molangei nimbo nani altopo nimbo tiro akumu paa nio konopu lteo.

<sup>15</sup> Altopo kape, nanga kangimu tiye kolopo pumbo wali eno i ungu nimbo tiroma akilio wamongo pilko konopu kimbo tiko molangei nimbo eno unguma wambo enge nimbo topo tiro.

*Jisasini nanga kongonomu tendepaio nimbe lipe mundurumu iyemani oi Gotenga pamu Kraist kinye perimumu kanoringi ungumu.*

<sup>16</sup> Linonga Awili Jisas Kraist yu paa enge nimo mele kinye, Yu altopa yando ombalo mele kape, eno nimbo tirimolo wali linoni linonga konopuna lipe manjili peremomuni kange temanema mele tepo wamopolio naa nimbo tirimulumunga Jisas maina molorumu kinye peya molopolio, Gotenga enge pa telimu Yu kinye molorumu mele mongoni kanorumulu mele eno temane topo tirimulu. We naa nimulu.

<sup>17</sup> Lino kanopo molamili mulu kombu enge pa telimu peremo kombuna ungu te wendo ombalie yundo nimbei i nanga paa konopu mondoro ungulumu. Nanga konopumu Yu noiro nimu wali Lapa Goteni Yunge imbibmu paa ola molopili, enge pa telimu yu kinye pepili nimu.

<sup>18</sup> Lino yu kinye Gotenga mulu kembonaola molorumulu wali aku ungumu mulukombuna mainyendo orumu kinye lino pilerimulu.

<sup>19</sup> Aku ulumu kanopo pilipolio, Gotenga ungu nimbe mundulima ningi tiringi iyemani ningolio bukuna toringi mele pilipolio paimbo ningi nimbo enge nimbo pimolo akumunga enonga unguma wamongo pilkolio pilko lingi lemo paa. Aku tengenenge pa tega angimo mele aku tega mele Jisasaku kombukandiyemu mele ombarlinonga konopuna tukundo ombaranglepili ningi aku iyemanga unguma i teli oi konopuna pepili wamongo pilko molangei.

<sup>20</sup> Eno ungu awili te pilengeimu i tega: Gotenga nimbe munduli ungu nili iye akumanii Gotenga bukuna toringi unguma eno enonganungu pulu te konopuna pilkolio bukuna naa toringi.

<sup>21</sup> Gotenga nimbe munduli ungu te pilipo i tupo i tega nimolo, i tega i tega wendo

ombalo ningi ungu akumanga ungu tendekure kape iyemani enonganungu mare konopuna pilipolio imboma nimbo tiemili naa ningi. Mini Kake Telimuni enonga konopuna tukundo molopalie nimbe tirimu ungu pilkolio Gotenga ungu te nimolo ningi imboma ningi tiringi.

## 2

*Kolo toko mane tiringi iyemani Kraustinga imboma ningi beambo tiringi ungu mare*

<sup>1</sup> Paimbo oi iye mareni Gotenga ungu kere tingima kau pilkolio imboma tumbi tiko ningi tiringi nalo mareni Gotenga unguma naa pilko we kolo toko imboma ningi tiringila. Kinye aku tepala eno moromelena iye mareni Jisas Kraustinga unguma mane tirimolo ningi kolo toko mane tinge. Aku kolo toko mane tinge iyemani eno ipuki tirimele mele tiye kolangei. Lino mane tirimolo unguma paimbo ningi ipuki tiengei ningi kiyengo ningi ongo kolo toko topoperope tiko Gote kinye kopu teko molongeindo i teko i teko teangei ningi ungu paa lupe mare mane tinge. Awilimuni eno kombu kerina naa pangai nimbe enonga nimbe kolondorumu, yunge mememuni eno kelepa yando ltimu akumu kape molo ningi umbulu tinge. Aku tengemunga eno aku teko enonganbeambo ninge kinye Goteni eno tamburumbutopa kondombalo.

<sup>2</sup> Kraustinga imbo awinini aku iyemani pipili naa kololi tengenenge mele manda leko tengenenge. Aku tengemunga imbo mare kanokolio ungu paimbomu peremo ungu tukumemu ungu taka tondonge.

<sup>3</sup> Aku mane tili iyemani mele awini liponoiemili ningolio eno enonganakonopuni pilingame temanema kolo toko, eno temane tokotikolio kou mone melema tieio ningokonge tengenenge. Nalo aku tengenenge mele Goteni koro oi pilipelite eno kot pilipe mindili nonge nimbe, nimbe panjirimu. Eno mindili nonge nimu ungu akumu mainyeneaa purumu. We nokopa moromo.

<sup>4</sup> Aku tega mele, oi mulu kombuna ensel marenili ulu pulu kerima tiringi wali Goteni eno tiye naa kolopa, kot walimu wendo ombalo kinye kot teangei, oi ka ulke paa tumbulu toli kombuna nokoko molangei nimbe ka seneni ka topa mindili nonge kombu kerina lipe mundurumu.

<sup>5</sup> Koro oi moloringi imboma kape Gotenga ungumanaa pilko yu umbulu tiringi wali tiye naa kolorumu. Eno kolangei noni nopili nimu. Nalo noni imboma torumu wali Noani imboma tumbi tiko molangei nimbe imboma mane tirimu iye akumu kinye yunge lapu imbo kite yupoko pakera kinye, eno noni naa nopili

nimbe Goteni lipe tapondorumumunga eno koinjo moloringi.

<sup>6</sup> Kombu awili Sodom kinye Gomora talonga imboma teko kenjirimele kani kolangei nimbe Goteni aku kombu talo tipeni topa kalorumu kinye aku kombu talo tipe keku lierimu. Gote umbulu tinge imbomanoi Sodom Gomora talo Goteni topa kalorumu mele altopo lino kinye kape aku tepa wendo ombalo ningo liko manjengei nimbe aku ulu terimu.

<sup>7</sup> Aku kombu talo tipeni topa kalorumu kinye Goteni iye tumbi nili Lot kau lipe tapondopa naa kolopili nimbe wendo ltimu. Imbomanilu paa kerima teko wapera toli ulu lupe lupema teringi kinye Lot yu paa kanopa keri pilipe paa kamele umbuni kolorumumunga lipe tapondorumu.

<sup>8</sup> Aku iye konopu tumbi nimbe pelimu Sodom molopa walimanga pali kanorumu kinye Sodom imboma waliwalima ungu manema pule toko paa ulu lupe lupema teko kenjiringi mele kanopalie yu mini ltepa konopu paa umbuni tepili molorumu.

<sup>9</sup> Awilimuni teko kenjiringi imboma kinye imbo tumbi nilima kinye paimbo aku tepa mele terimu lemo yuni yunge ungumu pilko liko ulu pengama teremele imboma kinye umbuni wendo oromo wali yuni umbuni naa opili nimbe manda wendo limbelo mele yunu pilipe, ulu tumbi nilima naa teko, teko kenjirimele imboma kot walimu wendo ombalo kinye pundu tombalo mele yunu pilipe, aku walimu wendo ombaindo, kinye kape aku imboma mindili tipe moromo.

<sup>10</sup> Oi we konopu kerimuni eio konopu ltemele mele pilkolio imbo mare ambo molo iye mare kanoko ulu te telemalanje paa konopu leko, wapera toko ulu paa kalaro mololima teko, Gote kinye imbi moromo imbo awilima kinye akumanga ungu mane teni lino naa nokoromo ningo liko umbulu tiko, aku ulu teremele imboma mele pundu awinima olandopa timbelona ling. Neya aku imbo kolo toko mane tilima eno moromele andoko kalambo naa ningo, enonga konopumuni pimele uluma kau andoko teko, mulu kombuna ensel enge peli awilima kape pipili naa kolko ungu taka tondoko teremele.

<sup>11</sup> Aku iyema manyendopa, enge te naa peremo, enselema eno olandopa, enge paa peremo, nalo aku iyemani ungu taka ton-doromele mele enselemani kape aku teko Awilimunga kumbekerena aku iyemanga ungu umbulkondo nindiko paa teko kenjirimele naa nimele.

<sup>12</sup> Nalo aku iyema, mele takerama konopu naa peremo mele, aku tepa konopu naa peremo. Mele takerama konopu liko

naa mundurumele. Ulu te tengen mele naa liko manjikolio we teremele. Mele takerama we molko, imboma moromele naa andoromele wali imbomanilu eno toko kondoromele. Aku tepa mele kolo toko mane tili iye akumanilu ungu ningema wamongo pilko naa ningo, unguma ningo kenjirimele. Aku ulu teremelelunga mele takerama we andoromele wali imbomanilu eno toko kondoko mindili tirimele mele eno kape aku teko mindili nonge.

<sup>13</sup> Aku iyemani imboma teko kenjiko umbunima tirimelelunga eno enonganomele pengamu lingeindo mindili nonge. Tangoli kape langi awini nombo no enge nilimu nombolio konopu timolo ningolio, eno kinye langi nongo no nongo, teko kalaro mondoko enonga imbima teko kenjiko, teko pipili kondoromele. Aku iyema aku teko kolo toli uluma teremele akumu konopu tiko teremele.

<sup>14</sup> Waliwalima amboma kanoko mongo kenge teko eno kinye peya wapu ulu kerinali teamili ningo, ulu kerimu kau teko moromele. Kraistinga imbo mare enge ningo naa moromelema kondi toko linoni tere-molo ulu waye teamili ningolio eno kinye ulu pulu kerima teremele. Eno melema kanoko konopu mondoromele ulu akumunga imbo kiyendoma molamili ningo moromele. Goteni aku teremele iyema paa molko kenjingei nimbe, nimbe panjirimu.

<sup>15</sup> Kolo toko kondi toromele aku iyema aulke tumbi nilimu naa kinele nalo tendekumuni kau, Balam keke lepo topa ulu te tepa kenjimbei terimu wali, tiye kolopili nimbe, Balam yu pumbelo aulkemu pipi tipe, yu iri topa imbo ungu nimele mele ungu te nimbe profet iye akumundo teko kenjirino nimi.

<sup>16</sup> Kongi donkima ungu naa nimele nalo tendekumuni kau, Balam keke lepo topa ulu te tepa kenjimbei terimu wali, tiye kolopili nimbe, Balam yu pumbelo aulkemu pipi tipe, yu iri topa imbo ungu nimele mele ungu te nimbe profet iye akumundo teko kenjirino nimi.

<sup>17</sup> Aku iyema no pikipe wendo omba kumburumo mele eno aku telima. Imbomanilu na namilu ningo no pikipe wendo oromona pimele wali kumburumona manda naa noromele. Paa kapu ltemo kombuna kupe topa kombu koromo wali kanokolio lo tombalo lepamo ningo konopu tiko nokoko moromele nalo poporomeni kupema we topa mepa purumo mele eno aku iyema teko telima moromele. Aku tepa, imboma lipe tapondombalo ungu te eno aku iyema kinye naa peremo. Goteni aku iyemanga kombu tumbulu topa paa pombera tolina molonge kombumu tepa wamopa terimu.

<sup>18</sup> Enoni ungu nimele akuma keke lepo toko nimele, aku ungu wema enge te naa peremo. Ungu awini loi leko ningi, imboma kondi toko enonga oi we konopumu pepili kangimuni wapera andopa topa, ulu kerima tembaindo aie nimolo uluma teangei nimele. Goteni naa teangei nimo uluma tawendo imbomani teremele uluma imbo mare i teli kau wendo ongo Kraistinga ungumu paimbo ningo moromele imboma linonga unguma pilengei ningo kondi tongeindo aku ulu teremele.

<sup>19</sup> Teko kenjirimile iye akumani enondo ningeindo, lino teremolo mele manda leko tengi kinye uluma pali enonga konopuni pimele mele manda tengi. Imbo teni molo ungu teni eno naa nokombalo nimele nalo eno enongano ulu kalaro moromani eno tepa kenjimbelo ulumanga kendemande iyema moromele, aku ulu kalaro moromo ulumaniaku iyema mindili tipe nokoromo. Melteni imbo te kongono kendemande tendewi nimo lemo yu aku melemunga kongono kendemandemu moromo. Akumungaaku iyema aku teko kongono kendemande iyema molko, we moromo konopu ltemele mele paimbo we naa moromele.

<sup>20</sup> Jisas Kraist, linonga Awilimu, linonga Tepa Lili Iyemu, aku iye kolo tolimani oi pilkolio yu paimbo aku tepa iyemu moromo ningo pimele ulumuni mai kombuna ulu pulu kerimani eno pipi tipe naa ambolopili, aku uluma tiye kolko wendo wangei nimbe lipo tapondorumungu we manda moromele nalo altoko tukundo punge lemo ulu pulu kerimani eno ka tingena kamukumu paa molko kenjinge. Oi wendo naa wangei paimbo ka ulkena mele molko, molko kenjiringi nalo altoko tukundo punge lemo paa kamukumu olandopa molko kenjinge.

<sup>21</sup> Ungu niomunga pulumu i tepe: Imboma tumbi tiko molonge aulkemu kanoko tukundo ongolio altoko tawendo purungi kolo toli iye akumani imboma tumbi tiko molonge aulkemu oi naa kanolemalanje paa. Kinye aku aulkemu kanokolio, Jisas singa ungu mane nimbo tirimuluma pilko likilio tiye kolko liko umbulu tiringi lemo paa manda molo.

<sup>22</sup> Aku ulu teremele iye kolo tolimanga ungu manda leli talo paimbo peremo. Aku taloni nimbeindo: Te,

Owani meku topa noipelie altopa pumbe noromo. *(Snd 26:11)*

Te, kongini no ltenderemele wali altopa le olina pumbe peko peremo nimbe nimo.

### 3

*Awili Jisas paimbo altopa wali talo tipe*

*ombalomunga ungumu*

<sup>1-2</sup> Nanga konopu mondoro imboma, i pipia toromu enonga topo mundumboindo wali talo tipo toro. Nani pilipolio i pipia toro mele nimbo tiembo, Jisas oi maina naa opili koro oi Gotenga nimbe munduli ungu nili profet iye tumbi nilimanii Awilimu altopa ombalo mele ningi tiringi bukuna moromo unguma kape, altopa kinye Jisasini nanga kongonomu tendepao nimbe lipo mundurumu iyemani Awilimu linonga Tepa Lili Iye Jisasini ungu manema eno nimbe tirimuma pilkolio yando imboma ningo tiringi unguma kape, enoniaku unguma oi pulu polko pileringi mele kelko pilko konopu kimbo tiko molangei nimbo pipia te oi topo tiru kano. Kinye imu kape talo tipo topo timboindo ungu pulu tendekumu pilipolio i pipiamu toro.

<sup>3</sup> Ungu te oi nimboi teromu wamongo pileio, Jisas ombalo kinye mulu mai talo pora nimbelo walimu nondopa wendo ombalo walimanga imbo mare ongo enongano enonga konopu leko paa teamili ningo pilinge ulu kerima kau tengi imbo mare eno molongena ongo ungu taka tondoko

<sup>4</sup> ningeindo: "Jisas yu altopa yando ombo nimbe, paimbo nimbe panjirimuya? Aku lemo, kinye tena moromoya? Linonga ara kae kame koloringi wali, yando yando kape, kinye kape, oi pulu polko melema wendo ombalie lierimu mele kinye yando yando kape we aku tepa lepa kau purumo. Ulu te luge wendo naa oromo," ninge.

<sup>5</sup> Nalo aku imbonani Goteni nimu ungumuni mulumu wendo ombo, maimu nona wendo ombo lierimu ungumu paa naa pilemili ningo moromele.

<sup>6</sup> Aku wali altopa Goteni nimu ungumuni oi nona maimu wendo orumu aku nomu kelepa molopa ola ombalie maima paliaku topa, moloringi melema pali topa kondoramu.

<sup>7</sup> Aku tepe mele Goteni altopo tembo nimu mele paimbo aku ungumuni tembalo. Goteni yu umbulu tiko teko kenjirimile imbonanga kot tendepa eno mongo lipo timbelo walimu wendo ombalomunga i teli oi mulu mai talo we liepili nimo. Aku kot walimu wendo ombalo kinye mulu mai talo tipeni nombalo, i teli oi we liepili nimbumunga kinye yunge ungu nimumuni mulu mai talo aku walimu wendo ombalo nokoko itembele.

<sup>8</sup> Nanga konopu mondoro imboma, ulu tendekumu komu naa tindeio. Awilimuni pilipelie, poiney 1,000 wali tendekumu konopu lepa, wali tendekumu poiney 1,000 konopu lepa moromo akumu komu naa tindeio.

<sup>9</sup> Awilimuni ombalo nimbe, nimbe panjirimu akumunga imbo mareni welea

naa oromo ning pimele. Nalo imbomani ning pimele mele yuni aku tepa nimbe naa pimo. Imbo mare ulu pulu keri teremelema konopuna we pepili moromelemunga mindili nongo molko kenjinge kombuna punge, manda naa tembalo. Eno kondo kolopolio, ulu pulu keri teremelema kanoko keri pilko tiye kolko konopu topele tangei kani eno moromelena welea naa pambo, oi konopu topele tangei kani kolte nokopo molambo nimbe pilipe welea naa oromo.

*Awilimunga walimu wendo ombalo kinye mulu mai talo paimbo pora nimbelo kani wamongo molangei*

<sup>10</sup> Nalo Awilimu ombalo walimu paimbo wendo ombalo. Wapu iyemu oromo mele ombalo. Ombalo kinye mulumu tipe ungu nimo mele tuku nimbe pora nimbe, Goteni mele keloma maina ltemo mele terimuma pali tipeni nomba pora timbelo. Altopa maimu kinye maina ltemo melema kinye naa lembalo.

<sup>11-12</sup> Aku melema pali aku tepa pora nimbelo ning pilkolio eno ambe teko molangeya? Enoni Gotenga walimu ombalo ningokoko molkolio paa welea opili ningotenga imboma kau molamili ning yuni ulu kake telima nimbe karomo uluma teko molangei. Gotenga walimu wendo ombalo kinye tipeni mulumu nomba pora tipe, tipe kondolini Goteni mele keloma maina ltemo mele terimuma pali no lembalo.

<sup>13</sup> Paimbo ulu aku tepamu wendo ombalo nalo linoni pilipolio Goteni linonga mulu mai talo koinjo topa tendembo, akuna ulu tumbi nilima kau pembalo nimbe, nimbe panjirimu. Aku mulu mai koinjo talo wendo ombalo nimbo lino konopu tipo nokopo moromolo. Awilimu ombalo nimbo ulu kerima naa tepo nokopo kondamili.

<sup>14</sup> Akumunga, nanga konopu mondoro imboma, aku tepa uluma wendo ombalo ning konopu tiko nokoko moromele kani Yuni ombo na kanombalo kinye, na paa konopu kake tepili, mongo timbelo ulu te paa naa pepili, yu peya paa popo tipo molambili, paaaku tepo molambo ombo kanopili ning yu mele mele aku teko molko yu nokoko molaio.

<sup>15</sup> Linonga Awilimu welea naa ombo taka lipe moromo akumunga pulumu eno pilko molangei. Imboma lipe tapondopa, mindili nolema aulkena wendo ongo, yu kinye peya molko kondonge aulkena pangei nimbe taka lipe nokopa moromo akumu pilko molaio. Linonga konopu mondoromolo angenu Pol Goteni lipe manjili tirimumunga nani i nio mele yuni aku tepa pipia topa tirimu kala.

<sup>16</sup> Yuni kombumanga pali pipia topa tirimu akumanga pali nani i pipia topo Awilimu altopa ombalo nio mele tendeku tipe kau nimu. Paimbo yunge pipiana ungu toromomanga pulu mare pilimilindo pereremolo, aku unguma lipe manjili naa pepa, enge ning naa pimele imbomani alowa teko mane tirimele, aku imbomani Gotenga bukuna moromo ungu mare kape imboma alowa teko mane tirimele. Aku teremelelunga Gotenga kot walimu wendo ombalo kinye mindili nongo beambo ning.

<sup>17</sup> Akumunga, paa nanga konopu mondoro imboma, aku iyemani altoko eno kondi tonge ulu aku tepama wendo ombalo mele oi pilko moromele kani wamongo pilko kondoko molangei. Gotenga ungu manema naa pilko, pule toko kolo toli iyemani lino kondi toko mane tingeindo alowa teko unguma ning tinge kinye pilipolio ipuki tipo moromolo mele tiye kolomolone, akupe mainye pumbelonje ning wamongo nokoko kondao.

<sup>18</sup> Aku tekolio, Jisas Kraist linonga Awilimu, linonga Tepa Lili Iyemu, Yuni lino we kondo kolopa tepe kondoromo mele pilipo moromolo akumu olandopa olandopa pilipo molamili ning molko, Yuni teremo mele kinye Yu moromo mele kinye olandopa olandopa enge ning wamongo pilko molangei. Imbi paa ola moromo iyemunga imbibu, kinye kape altopo waliwali ma kape imbomani liko ola mundunduko molangei. I paa.

## Jononi Kumbe Lepa Pipia Topa Mundurumumu **1 Jon** **I Ungu Torumumunga Ungu Pulu Mare**

Kolo toko mane tili iyemani Jisas imbo kangi naa angilipili molorumu ningi wali Jononi i pipiamu topa panjirimu. Kolo toko mane tirimele mele kanopo imbi tiemili nimbe panjirimu. Lino Goteni terimu uluma ipuki tipolio konopu wango nipili molamili nimbe mane tirimu.

Goteni nu konopu mondorumu mele liko manjikolio we imboma konopu mondani nipi.

*Koinjo molopa kondoli ungu akumu mona wendo orumu*

<sup>1</sup> Koinjo molopa kondoli ungumu eno nimbe tiemili! Yu oi pulu polopa molorumu. Yu lino pilerimulu. Yu mongoni kanorumulu. Yu nemeneme nimbo kanopo yu kini lope tenderimulu.

<sup>2</sup> Aku koinjo molopa kondoli ulu pulumu wendo ombo mona molorumu. Linoni yu kanopolio paimbo kanorumulu mele nimbe tirimulu. Molopa kau puli ulu pulumu Lapa kinye oi kopu tepa molopalie lino molorumuluna ombo moro torumuna kanorumulu mele eno nimbo tirimulu.

<sup>3</sup> En lino kinye peya kopu tepo molamili nimbo linoni kanopo pilerimulu mele eno kape nimbo tirimolu akumunga lino Lapa kinye yunge Malo Jisas Kraist kinye peya kopu tepo moromolo.

<sup>4</sup> En peya lino paa tono kolamili nimbo i ungumu nimbo pipiana toromolo.

### *Pa telina andopo molamili*

<sup>5</sup> Gotenga Malo Jisas Kraistini lino ungu nimbe tirimuna pilerimumulu ungu akumu eno nimbo tirimolu i tepa: Gote pa telimu. Yu kinye tumbulu toli te paa naa peremo.

<sup>6</sup> Lino Gote yu kinye konopu tendekuna pupili moromolo nimbolio tumbulu tolina andopo molomolo lemo aku ungu kolo topolio, ulu tukumema naa teremolo.

<sup>7</sup> Nalo yu pa telina moromo mele lino kape pa telina andopo molomolo lemo Gotenga imboma kinye manda konopu tendekuna pupili moromolo kinye yunge Malo Jisasnga mememuni lino ulu pulu keri teremolo konopuna peremoma pali lino kake tepili nimbe kulumum tondoromo.

<sup>8</sup> Linoni nimili ulu pulu kerima naa teremolo, te na kinye naa peremo nimolo lemo aku lino linongan kolo toromolo, ungu tukumemu lino kinye naa peremo.

<sup>9</sup> Nalo ulu pulu keri teremoloma nimbo para timolo lemo Tumbi Tipe Teremo Goteni tembo nimbe panjirimu mele pilipelite tembaindo linonga ulu pulu keri nimbo para tirimoloma tiye kondopa ulu pulu kerima lino kinye itemoma lipe wendo litendade lino tepa kake tendembalo.

<sup>10</sup> Nalo linoni nimilindo: Linoni ulu pulu keri te paa naa teremolo, paa naa terimulu nimolo lemo aku ungu nimolomuni Gote yu kolo toli iyemu nimolo, yunge ungu tukumemu linonga konopuna naa peremo.

## 2

### *Kraist linonga Lipe Tapondolimu*

<sup>1</sup> Nanga bakuluma, eno ulu pulu kerima naa teao nimbo i pipiamu eno topo tiro. Nalo eno teni ulu pulu keri te tengen lemo linonga nimbe Lapanga kumbekerena konge tenderemo iyemu moromo. Akumu ulu pulu keri te kape naa peli iye Jisas Kraist. Yu linonga Lipe Tapondolimu.

<sup>2</sup> Linonga ulu keri teremoloma Gote tiye kondopili nimbe yu kinye popo tiko molangei nimbe linonga nimbe kolorumu. Linonga nimbe kau naa terimu. Maina moromele imboma pali tapombai terimu.

*Gote lipe manjirimo imbonuaku  
Gotenga teaio nimo ulumu lombilipe teremo*

<sup>3</sup> Goteni linondo teaio nimu mele pilipo lipo temolo lemo Yu paa paimbo kanopo pilipo moromolo nimbo pimolo.

<sup>4</sup> Imbo teni na Gote wambo lipo manjiro nimbelo nalo Goteni teaio nimbe mane tirimu ungumu naa lombilimo lemo aku imbonu yu ungu kolo toli imbonu, yu ungu tukumema konopuna naa peremo.

<sup>5-6</sup> Nalo yuni teaio nimu unguma pilko liko teremele imbonu Gote paa konopu mondopa kondoromo. Imbo teni na Gote kinye kopu tero nimo imbo akumu Kraistini teremo ulumu tembalo. Neya aku ulu temolomunga linoni itepo lipo manjemili, lino Gote kinye kopu teremolo.

*Imboma konopu mondangei mane  
ungumu*

<sup>7</sup> Nanga imboma, i pipia toro ungu manemu koinjo te molo. Akumu koro oi pulu polko ltingi. Aku ungu manemu oi pileringimu.

<sup>8</sup> Nalo kinye i pipiana ungu mane koinjomu topo tiro. Tumbulu tolina kamukumu pora nimbei teremo, kinye paa pa telimu oi wendo orumumunga oi Kraistini tepa molorumuna aku mane ungumu lerimu kinye yandopa eno kinye itemoma lino karomolo.

<sup>9</sup> Imbo teni na pa telina moro nimo nalo yunge Kristen angenu te kinye konopu keri panjirimo akumunga yu tumbulu tolina we moromo.

<sup>10</sup> Imbo te yunge angenupili konopu mondoromou pa telina moromo. Kika tembalo melte pana naa ltemo.

<sup>11</sup> Nalo imbo te Kristen angenu te kinye konopu keri panjirimo imbomu tumbulu tolina molopa, tumbulumuni yunge mongomu pipi tirimona aulkemu manda naa kanopa tumbi tipe purumo.

<sup>12</sup> Nanga bakuluma, Kraistingu imbina Goteni enonga ulu pulu kerima tiye kolorumu, akumunga i pipiamu eno topo tiro.

<sup>13</sup> Eno lapali, iye oi pulu polopa molorumu kinye we moromo iyemu pilko imbi tirimelemunga nani eno i ungumu topo tiro. Iye wenepoma, enoni Satan iye kerimu toko mainye munduringimunga nani eno i ungumu topo tiro.

<sup>14</sup> Ena bakuluma, Lapa kanoko imbi tirimelemunga i ungumu eno topo tiro. Ena lapali, iye oi molorumumu kinye we moromou pilko imbi tirimelemunga i ungumu eno topo tiro. Iye wenepoma, eno enge ningi, Gotenga ungumu enonga konopuna peremo, enoni Satan iye kerimu toko mainye munduringimunga eno i ungumu topo tiro.

*Mai kombuna ltemo uluma konopu naa mondamili*

<sup>15</sup> Maina uluma kinye maina melema kinye konopu naa mondoko, aku melema konopu kimbo tiko naa molaio! Imbo te maina uluma konopu mondromo lemo aku imbomuni lapa konopu naa mondoromo.

<sup>16</sup> Aku ambe temona, maina melema pali ulu pulu keri teremele imbomani melte kanoko liemba mo lo teamboa nimbelo konopu mondromele melema kinye, imbomani mongo kenge teremele uluma kinye, mongo kondoko mongo ltimele uluma kinye, aku maina uluma pali Lapa kinye wendo naa oromo. Mai kombuna kau wendo oromo.

<sup>17</sup> Maimu kinye mele konopu mondromele melema pali pora nimbelo nalo imbo te Lapani tewi nimo mele pilipe tengi tipe tepe moromo imbomu waliwalima molopa kondopa kau pumbelo.

*Kraistingu opa pulema wendo oringi*

<sup>18</sup> Nanga bakuluma, mai kombu peyalime waimu kinye wendo oromo. Kraistingu opa pulemu ombalo eno oi pileringi. Kinye kape Kraistingu opa pule awini wendo oromena kanopolio peyalime waimu wendo oromo nimbo pimolo.

<sup>19</sup> Imbo akuma lino tiye kolko wendo purungi, nalo oi lino kinye peya molorumuli kinye kanoma linonga imboma paimbo naa moloringi. Eno paimbo linonga imboma molemalanje lino kinye peya we molemala. Nalo lino tiye kolko purungi

akumunga kinye lipo manjirimolo akuma linonga imbo mare molo.

<sup>20</sup> Nalo Mini Kake Telimu Kraistini lipe mundurumu ltingi akumunga eno pali paimbo uluma liko manjirimele.

<sup>21</sup> Eno ungu paimboma naa pimele nimbolio i ungumu naa topo tiro. Nalo eno ungu paimboma pimele, aku ungu tukumemunga ungu kolo tolima manda wendo naa oromo nimbolio i ungumu topo tiro.

<sup>22</sup> Kolo toli imboma naimeleya? Jisas yu Goteni lipo mundumbo nimu iye nomi Kraistimu molo nimele imboma eno kolo toli imboma. Kano imbomani Lapa Malo talo molo ningi liko umbulu tirimelemunga eno Kraistingu opa pulema moromele.

<sup>23</sup> Imbo teni Malo molo nimbe lipe umbulu tirimoaku imbomuni Lapa kape molo nimbe lipe umbulu trimola. Imbo teni Malo ipuki tirimoaku imbomuni Lapa kape ipuki trimola.

*Ungu tukumema Mini Kake Telimuni lino mane tirimo*

<sup>24</sup> Eno oi pileringi unguma konopuna paa kamukumu pepili ningi konopuni enge ningi pilko molaio! Aku tengi lemo eno Malo kinye Lapa peya waliwalima kopu teko molongo.

<sup>25</sup> Yuni lino timbo nimumu i tepe mele: Eno waliwalima molko kondoko kau punge ulu pulumu timbo nimu.

<sup>26</sup> Imbo maren eno kolo toko kondi toromelena nani i ungumu eno topo tiro.

<sup>27</sup> Nalo eno Kraistini Mini Kake Telimu tirimultingi akumu eno kinye moromomunga imbo teni eno ungu mane timbelo ungu te molo. Mini Kake Telimuni eno uluma pali mane tirimo. Aku ungu mane tirimoma kolo naa toromo, ungu tukumemaka. Akumunga yuni eno mane tirimo mele Kraist kinye waliwalima kopu teko molaio!

*Kinye lino Gotenga bakuluma moromolo*

<sup>28</sup> Paimbo, nanga bakuluma altopa yu ombalo wali kanopolio pipili naa kolopo yunge kumbekerena tumbi tipo ola angilemili ningi eno yu kinye kopu teko moloko kau paio!

<sup>29</sup> Kraist Iye Paa Tumbi Nilimu liko manjikolio akumunga ulu tumbi nilima teko moromele imboma kanopolio aku Gotenga bakuluma konopu lenge.

### 3

<sup>1</sup> Apa! Linonga Arani lino paa konopu mondopa konopu tirimo mele kanaio! Lino konopu awili tepe mondopalie nimomuni yuni imbi lepa linondo nanga bakuluma

nimo. Paimbo Gotenga bakuluma moromolo. We imbomani Gote naa liko manjikolio aku mele lino kape naa liko manjirimele kala.

<sup>2</sup> Nanga imboma, kinye lino Gotenga bakuluma moromolo nalo altopo lino molomolo mele iteli oi naa lipo manjirimolo. Nalo altopa Kraist yando ombara mona molombalo wali yu moromo mele kanopolio, lino yu moromo mele aku tepo molomolo.

<sup>3</sup> Imbo Yu ombalo ningokoko momelemani pali Kraist yu konopu kake tampiloromo mele linoaku tepo molamili ningonengonakonopundo kulumie tokomromele.

<sup>4</sup> Ulu pulu keri teremele imbomani Gotenga ungu manema pilko we mele none tendeko pule toromele. Ulu pulu kerimanga pulumu i tepe: Gotenga ungu manema pilko we mele none tendeko pule toromele ulumu.

<sup>5</sup> Kraistini ulu pulu kerima kandepea tendemba maina mainye orumu eno pimele. Ulu pulu keri tendekure kape yu kinye paa naa peremo.

<sup>6</sup> Yu kinye kopu teko moromele imboma ulu pulu kerima teko mololiko naa purumele. Imbo ulu pulu kerima teko mololiko purumele imboma Kraist naa kanoko naa pimele.

<sup>7</sup> Nanga bakuluma, imbo teni eno konditopa wendo mepa pumbelo kani nokoko kondao! Imbo te ulu tumbi nili uluma teremo imbomu Kraist Iye Tumbi Niilimu moromo mele yuaku tepe iye tumbi nili moromola.

<sup>8</sup> Oi pulu polopa kape, kinye kape kuromanga nomi Sataneni ulu pulu kerima kau teremomunga kinye ulu pulu keri teremele imboma Satanenga imboma moromele. Gotenga Maloni Satanenga kongonomu tepe bembotimbei orumu.

<sup>9</sup> Gotenga bakulu moromo imbomu ulu pulu kerima telipe naa andoromo. Goteni yutepa koinjo Itimuna koinjo purumungulu pulu kerima telipe manda naa andoromo.

<sup>10</sup> Akumunga imboma kanopolio i imbomu Gotenga bakulumu ltemo, imu Satanenga bakulumu ltemo nimbo manda kanopo moke temolo. Imbo teni Goteni kanopa penga pimo ulu puluma naa teremo imbomu yu Gotenga bakulu te molo. Imbo teni yunge angenumu konopu naa mondoromo imbomu yu Gotenga bakulu te molo kala.

*Lino te te nimboni imbo lupema konopu mondamili*

<sup>11</sup> Koro oi ungu te i teko pileringi kano. Lino te te nimboni imbo lupema konopu mondamili.

<sup>12</sup> Iye Keineni terimu mele manda manjipo tepo naa molamili! Yu kuro kerimanga nomi Satanenga iye te molopalie angenu topa kondorumu. Ambe telka angenu topa kondorumaya? Yu ulu pulu kerima terimu. Angenu ulu toya tolima terimuna akumunga yuni topa kondorumu.

<sup>13</sup> Anglo kame, we imbomani eno kinyekonopu keri panjirimele nalo ambe temonaaku ulu teremeleya ningomini naa lteao!

<sup>14</sup> Lino Gotenga imboma konopu mondopo moromolana lino kolomolo ulumu tiye kolopolio, molopo kau pumolo uluna moromolo nimbo pimolo. Gotenga imboma konopu naa mondopo moromo imbomu yu kololi uluna we moromo.

<sup>15</sup> Imbo angenu konopu keri panjirimoimbomu yu imboma topa kondoli imbomu. Akumunga pilipolio imboma topa kondoli imbo te molopa kondopa kau puli ulu pulumu yunge konopuna naa peremo nimbo pilipo moromolo.

<sup>16</sup> Konopu mondoli ulu pulumu pimolomele i tepe: Jisas Kraist yu linonga tapondopo kolambo nimbelie kolorumu. Altopokinye akumu pilipolio lino Kristen angenupilinga tapondopo kolamli!

<sup>17</sup> Imbo teni maina melema noipe molopalie angenu te melte molo lembalona kanopalie kondo naa kolomo lemo Gotenga imboma konopu mondoli ulu pulumu yunge konopuna naa peremo.

<sup>18</sup> Nanga bakuluma, na imboma konopu mondopo moro nimbo ungumuni kau nimbo naa molamili, molo! Ulu tukumemu tepolio, imboma paa konopu mondopo ulu pengama eno kinye teamili.

*Konopu mondoromele imboma Gotenga kumbekerena enge ningokoko angilinge*

<sup>19-20</sup> Linoni imbo lupema paa konopu tipo konopu mondololemo ungu tukumemu lombilipo teremolo. Gote uluma pali lipe manjipolie linonga konopumu maindo ltemo, yunge paa olando ltemo akumunga linonga konopumuni ulu kerima lipe onda onda lemo lemo Gotenga kumbekerena takalipo molomolo.

<sup>21</sup> Nanga imboma linonga konopumani ulu keri telima lipe onda onda naa lemo lemo Gotenga kumbekerena mini naa ltepo enge nimbo angimolo.

<sup>22</sup> Kano kinye, yuni teaio nimu mele pilipolio lipo tepo, yu kanopa penga karomo uluma tepolio yundo tiwi nimbo konge temolo melema yuni timbelo.

<sup>23</sup> Yuni teaio nimu mane ungumu i tepe: Nanga Malo Jisas Kraistinga imbina ipuki tiko imboma konopu mondaio nimu.

<sup>24</sup> Imbo Goteni teaio nimu mele pilko liko teremele imboma pali eno Gote kinye kopu teko moromele, yu eno kinye kopu tepa moromo. Yuni yunge Mini Kake Telimu lino tirimu akumunga yu lino kinye kopu tepa moromo lepamo lipo manjirimolo.

#### 4

*Gotenga Mini Kake Telimu kinye kuro kerima kinye enonga unguma manda manjipo karomolo mele unguma*

<sup>1</sup> Nanga imboma, Gotenga Mini Kake Telimuni na ungu niwi nimbe timo ningi Gotenga nimbe munduli ungu nimbo tirmolo ningolio nalo kolo toromele aku iye awinima i mai kombuna andoromele. Akumunga imbo awini ongolio ningei Gotenga Mini Kake Telimu na ungu nimbe timo ningema ipuki oi naa tieio. Gotenga Mini Kake Telimunje molo we kuromani tere-monje manda manjiko kanaio.

<sup>2</sup> Imbo teni konopuni pilipe ungu nimo ungumu paimbo Gotenga Minimuni yu ungu nimbe timonje moke tepo pilemili ningo i ulu teaio. Imbo teni Jisas Kraist paimbo maina iye te omba molorumu nimbelo imbonu, paimbo Gotenga Minimu yunge konopuna moromona nimo.

<sup>3</sup> Nalo imbo teni Jisasindo aku tepa naa nimbelo imbonu Gotenga Minimu yunge konopuna naa moromo, kuro kerire yunge konopuna moromo. Aku kuromu Kraist kinye opa pule toromo. Oi ombalo ningina pileringi kanomu kinye mai kombuna oi omba moromo.

<sup>4</sup> Nanga bakulu keloma, enonga konopuna moromo Minimu yunge engemu olando, we maina imboma kinye moromo kuromanga engemu maindo, akumunga eno Gotenga imboma molko, Gotenga ungu nimbo tiro ningi kolo toromele imboma toko mainye munduringi.

<sup>5</sup> Aku imboma maina imboma kau, akumunga enonga ungu nimelema maina unguma kau pilko nimele, akumunga we maina imboni enonga unguma pilko moromele.

<sup>6</sup> Nalo lino Gotenga imboma moromolo. Goteni konopuni pilipe ulu teremoma paa pimele imboni linoni nimolo unguma pilko moromele aku ulu teremelema, Mini Kakemu moromo imboma nimolo. Nalo Gotenga imbo naa moromelemani linonga unguma naa pilko ltimeleaku ulu teremele imboma kuro keri kolo tolimu moromo konopu itemolo.

*Gote konopu mondoromo imbomuni imbo lupema konopu mondombalo*

<sup>7</sup> Nanga imboma, konopu mondoli ulumu Gotenga ulumu kani linoni imbo lupema konopu mondamili! Konopu mondoko

mololiko purumele imboma Gotenga baku-luma molko eno yu paa liko manjirimole.

<sup>8</sup> Konopu mondoli ulu pulumu Gote kinye kau pepa wendo oromona imboma konopu naa mondoromele imboni Gote naa liko manjirimole.

<sup>9</sup> Goteni lino konopu mondoromo mele i tepe lipe ondoromo: Yunge malo tendekumu kau molorumu, nalo eno koinjo molko kondoko kau pangei kani nanga malo enonga nimbe kolopili nimbe yuni marenu lino imbo kerimanga nimbe mai kombuna lipe mundurumu.

<sup>10</sup> Konopu mondoli ulu pulumu i tepe: Linoni Gote oi konopu naa mondorumulu. Yuni lino oi konopu mondopalie yunge malo kolorumu ulumuni linonga ulu keri teremoloma kandepea tepe ltendembai malo mai kombuna tipe mundurumu.

<sup>11</sup> Nanga imboma, Goteni neya aku tepa lino paa konopu mondorumumunga linoni imbo lupema konopu paa mondamili.

<sup>12</sup> Maina imbo tendekureni kape Gote mongoni naa kanoringi. Nalo linoni imbo lupema konopu mondombolo lemo Gote linonga konopuna moromo, yunge konopu mondoli ulumu linonga konopuna akopa awili lepa tukume peremo.

<sup>13</sup> Yuni yunge Mini Kakemu lino tirimuna pilipolio Yu lino kinye kopu tepa moromo, lino yu kinye kopu tepo moromolo nimbo pimolo.

<sup>14</sup> Lapani mai kombu imboni ulu pulu keri teremelelunga tepe wendo limbei yunge malo lipe mundurumu, lino mongoni kanorumulu mele imboma nimbo tirimolo.

<sup>15</sup> Jisas yu paimbo Gotenga Malo ningi para tinge imboma Gote eno kinye kopu tepa molombalo, eno Gote kinye kopu teko molonge.

<sup>16</sup> Aku pilipolio Goteni lino konopu mondoromo pilipolio Yuni paimbo lino paa konopu mondoromo nimbo ipuki tirimolo.

Gote yu konopu mondoli ulumunga yu pulumu. Konopu mondoliko andoko moromele imboma Gote yu peya kopu teko moromele, yu eno kinye kopu tepa moromo.

<sup>17</sup> Jisas maina molopa imboma konopu paa paimbo mondopa molorumu mele lino aku tepo molombolo wali lino kinye konopu paa mondopa kondolimunga ulu pulumu pembalo. Kano kinye konopu mondopa kondoli ulu pulumu lino kinye pembalo wali Gotenga kot walimu wendo ombalo kinye lino pipili naa kolomolo, lino akumunga ulure molo nimbo enge nimbo ipuki tirimolo.

<sup>18</sup> Konopu mondoli ulu pulumu kinye pipili kololi ulu pulumu kinye tendekuna naa

perembelemunga konopu mondopa kondolimuni pipili kololi ulu pulumu makoromo. Imboma ulu pulu kerima teremele kinye aku teko mongo ltimele kano mongomanga pundu tongueindo pipili koromeela. Pipili koromele imboma enonga konopuna konopu mondoli ulu pulumu kamukumu naa peremola.

<sup>19</sup> Gote yuni lino pulu polopa konopu mondorumumunga linoni imbo lupema kinye konopu mondromolo.

<sup>20</sup> Imbo teni, na Gote konopu mondoro nimbelo nalo Gotenga imbo te kinye konopu keri panjirimo wali yu kolo toli imbomu kau moromo. Yu Kristen imbo te mongoni kanopalie yu konopu naa mondromolo kinye yuni mongoni naa kanoromo Gote ambe tepa konopu mondombalonje? Manda naa teremo.

<sup>21</sup> Kraistini lino ungu mane tirimu te i tepa: imbo Gote konopu mondromolo imbomu yuni Gotenga imboma kape konopu mondopiliaku tepa ungu mane tirimu.

## 5

### *Kristen imbomani mai kombumunga engemu toko mainye mundunge*

<sup>1</sup> Goteni lino nokopa kondombalo iye te lipo mundumbo oi nimbe panjirimu iye Kraist akumundo altopa Jisas kano iye Kraistmu ombo molorumu ningi ipuki tirimele imboma Gotenga bakuluma moromele. Imbo teni Lapa konopu mondromolo imbomuni Lapanga bakuluma kape konopu mondromolo.

<sup>2</sup> Linoni Gote konopu mondopo, Yuni teao nimu uluma pilipo lipo teremolo nimbo pilipolio linoni yunge bakuluma konopu mondromolo nimbo pimolo.

<sup>3</sup> Gote konopu mondromilindo yuni teao nimu uluma pilipo lipo temolo. Yuni teao nimu ulu tirimomani lino umbuni naa tirimo.

<sup>4</sup> Gotenga bakulu moromele imbomani i maina ltemo ulu pulu kerimanga engema toko maindo mundurumele. Gote ipuki tirimolo ulumuni opa pule melema topo makoropo wendo mundupo maina ltemo ulu pulu kerimanga engema topo maindo mundurumolo.

### *Goteni Malo moromo mele nimbe para tirimu unggumu*

<sup>5</sup> Naimele maina ulu pulu kerima toko mainye mundurumeleya? Lino Jisas yu Gotenga Malo nimbo ipuki tirimolo imbomani kau kano uluma topo mainye mundurumolo.

<sup>6</sup> Imboma yu kanoko imbi tiengei nimbe aku iye Jisas Kraist yu ombo no ltimu, unjo polopeyana pepalie yunge meme ondorumu. No lili ulumuni kau naa orumu.

Aku ulu taloni terimu. Mini Kakemu ungu tukumemunga pulu, aku Mini Kakemuni ulu akuma paimbo terimu nimbe, nimbe para tirimo.

<sup>7</sup> Aku ulu yupokoni Jisas Kraistinga terimu ulu ningi para tirimele.

<sup>8</sup> Mini Kakemu kinye nomu kinye mememu kinye, aku yupokoni ungu tendekumu kau nimele.

<sup>9</sup> Maina imbomani unguma ningi tirimele kinye pilipolio paimbo lepamo nimbo pimolo nalo maina imbomani ningi tirimele unguma maindo. Goteni yunu nimbe tirimu unguma olandomunga yunge Malo moromo mele nimbe tirimu unguma paa paimbo lepamo nimbo pimolo.

<sup>10</sup> Akumunga imbo teni Gotenga Malo yu paimbo nimbe ipuki tirimo imbomu yunge konopuna Goteni aku nimbe tirimo unguma paimbo lepamo nimbe pimo. Goteni yunge Malo molopa teremo ulu nimbe tirimo unguma ipuki naa tirimomunga aku Goteni nimo unguma ipuki naa tirimo imbomuni Gote yu kolo toromo iyemu nimbe pimo.

<sup>11</sup> Goteni mi lepa nimbe tirimo ungumu i tepa: Goteni lino waliwalima koinjo molopo kau pumolo ulumu tirimu. Kano molopa kau puli ulu pulumu yunge Malo kinye peremo.

<sup>12</sup> Gotenga Malo kinye kopu teko moromele imboma aku koinjo mololi ulumu Goteni tirimumu eno kinye peremo. Gotenga Malo kinye kopu teko naa moromele imboma aku koinjo mololi ulumu eno kinye naa peremo.

### *Lino molopo kau pumolo nimu unggumu*

<sup>13</sup> Eno Gotenga Malonga imbi pilko yu moromo mele paimbo ltemo ningi ipuki tirimele imboma waliwalima molko kau punge ulumu eno kinye peremo ningi ipuki tieio nimbolio i unggumu eno topo tiro.

<sup>14</sup> Linoni Gotenga ltemo konopu lombilipolio konge temolo lemo aku yuni linonga konge temoloma pilimbelo. Aku-munga lino konopu toimbo topili Goteni ulumu tembalo konopu ltemolo.

<sup>15</sup> Kano kinye lino yu konge temolo mele paimbo pilimbelo nimbo pilipolio konge temolo melema paimbo limolo lepamo nimbo lipo manjirimolo.

<sup>16</sup> Kraistinga imbo teni Kristen imbo angenu te ulu pulu keri te tembalo wali kanopalie aku ulu pulu keri tembalomunga yu kolombalo ulu te molo ltemo nimbe kanombalo imbomuni aku angenunga Gote kinye konge tendepili! Aku tembalo kinye Goteni yu altopa koinjo molopili nimbelo. We ulu pulu kerimando nio. Imbo teni ulu pulu keri te tembalomunga yu kolombalo ulu pulu te paa paimbo peremo. Imbo teni

kano ulu pulu kerimu tembalo kinye kano  
imbomunga Gote konge tendangei nimbo  
naa nio.

<sup>17</sup> Toya toli ulu naa teremelema aku ulu  
kerima. Nalo ulu pulu keri mare imbomani  
teremele aku ulu kerimanga imbo kolonge  
ulure molo.

<sup>18</sup> Lino pimolo kano: Gotenga bakulu  
moromele imboma ulu kerima teko naa  
moromele. Gotenga Maloni aku imboma  
nokopa kondoromona Sataneni aku im-  
boma naa ambolopa karomo.

<sup>19</sup> Lino pimolo kano: Gotenga bakuluma  
moromolo nalo i mai kombuna ltemo  
uluma pali Satanenga engena maindo  
ltemo.

<sup>20</sup> I tepo pimolo: Gotenga Malo oi ombalie  
lino Gote Tukumemu kanopo imbi tiemili  
konopu tirimu. Lino Gote Tukumemu kinye  
Marenu Jisas Kraist kinye popo tipo mo-  
romolo. Jisas Kraist yu Gote Tukumemu,  
koinjo molopa kau puli Gote yu.

<sup>21</sup> Nanga bakuluma, kolo toli kuro keri-  
mani tepa naa kenjipili ningyo yokeya ten-  
deko molaio.

## **Jononi Pipia Talo Tipe Topa Mundurumumu 2 Jon**

### **I Ungu Torumumunga Ungu Pulu Mare**

Linoni imboma konopu mondopolio wali Gotenga mane ungu tengen tirimolo nimbe Jononi i pipia topa mundurumuna mane tirimu. Lino ungu kolo toko mane tiri mele imboma kinye tendekuna naa molamili nimu.

Goteni nu we imboma konopu mondoko yunge unguma tengen tiko molani nipili!

<sup>1-2</sup> Na Kraistingu imbomanga tapu iyemuni i ungumu Goteni kanopa ltimu ambomu\* nu kinye nunge bakuluma kinye enonga pipia topo munduro. Eno nani paimbo konopu mondoro imboma. Nani kau eno konopu naa mondoro. Ungu paimboma lino kinye peremo mele kape lepa kau pumbelo akumunga ungu paimboma pimele imbomani pali eno konopu mondromene.

<sup>3</sup> Goteni yunge konopumu lino kinye noipe tepe lili ulu pulumu kinye, kondolokopa lino tepo kenjirimolo ulumanga mindili naa tiembo nimbe tiye kololi ulu pulumu kinye, konopu u nili ulu pulumu kinye, Lapa Gote kinye Gotenga Malo Jisasi Kraist kinye eloni aku ulu puluma lino kinye pepili ningotinge,aku uluma kinye ungu paimbomu kinye konopu mondoli ulu pulumu lino kinye pembalo.

#### *Imboma konopu mondromolo ulumu teamili*

<sup>4</sup> Lapani lino ungu paimboma pilko liko teao nimu mele nunge bakulu marenipilko liko tek moromele kinye kanopolio na paa tono kolopo moro.

<sup>5</sup> Ambo pengamu, lino imbo te te ningoni imbo lupema konopu mondramili nio, akumu nani ungu mane koinjo nimbo naa tiro, molo. Lino oi pulu polopo pileringi ungu mane kanomu eno imboma konopu mondoko teaio nimu kanomu.

<sup>6</sup> Imboma pali konopu mondromolo mele i tepe: Lino yuni teaio nimu mele ungu manema pilipo teamili! Yuni teaio nimbe ungu mane tirimu eno oi pulu polko pileringi ungu mane kanomu eno imboma konopu mondoko teaio nimu kanomu.

#### *Kraistingu ungumu enge nimbo ambolopo molamili*

\* <sup>1:1-2:</sup> Imbo marenip ambo tengen pipia topa mundurumu konopu ltemele. Nalo marenip Kraistingu imboma kombu tengen nombeya teko Gote kapi ningimando pipia topa mundurumu konopu ltemele.

<sup>7</sup> Kolo toko imbo kondi toko, Jisasi Kraist mainye ombo maina imbo iyemu moloru ungu naa nimele imbo awini kombumanga pali andoko moromele. Aku imboma kolo toko imbo kondi toromele imboma Kraist kinye opa pulema moromele.

<sup>8</sup> Eno mele limolo ningongongo mindili nongo teremelema ombo mainye pumbelo ningongokoko kondao! Aku tekolio lino mele penga timbeloma pali ling.

<sup>9</sup> Imbo te Kraistingu unguma enge nimbe ambolopa naa molopa, ungu te lupe pilembo nimbe pumo lemo Gote kinye yu kopu tepe naa moromo. Imbo te Kraistingu ungu mane tirimo unguma enge nimbe ambolopa molomo lemo aku Lapa kinye Malo talo yu kinye peya kopu teko moromele.

<sup>10</sup> Imbo teni ungu te nimbo tilipo oro nimbelie i unguma mele naa nimbe ungu te lupe nimbe timo lemo yu enonga ulke-manga naa meko pungo, panjiko naa liko ki nna lieio!

<sup>11</sup> Imbo teni panjiko liko ki limbelo imbomu ombalo imbomuni tepe kenjipe molombalo imbomu lipe tapondoromo.

#### *Tapu iyemuni eno kanomboi nimu*

<sup>12</sup> Nani ungu awini pipia topo eno manda tilka nalo na eno moromelema ombo kanopo ungu nimbo tono kolopo popo tipo molamili konopu lepolio pipia naa toli tiye kolto.

<sup>13</sup> Goteni nanga molopili nimbe kanopa ltimu angenanga bakulumani naa molko kondowi nimele.

**Jononi Pipia Yupoko Tipe  
Topa Mundurumumu  
3 Jon**

**I Ungu Torumumunga  
Ungu Pulu Mare**

I pipia topa panjirimuna Jononi Gaius pipia topa mundurupelie iye penga tendo kape iye keri tendo nimu.

Goteni nu imbo kerima manda leko naa teani nipili!

*Gotenga kongono tendenge imboma paa tapamili*

<sup>1</sup> Na Kraistingu imbomanga tapu iyemuni nanga angemu, paa konopu mondoro iye Gaius, nu i pipiamu topo tiro.

<sup>2</sup> Nanga ango pengamu, nani nunge minimu molopa kondoromo aku tepa nuni kongo tendo umbuni te wendo naa opili teko kondoko, nu kuro te naa topili molko konda ni konopu lteo.

<sup>3</sup> Iltonga angenupili iye mare ongo nando temane tokolio ningei, nu ungu tukumemu paa ambolko kondoko, nuni ulu tukumema paa pilko liko teko morono ninge pilipolio na paa tono koro.

<sup>4</sup> Nanga bakulumanu ungu tukumemu pilko liko teko moromele kinye pilipolio tono koltomu, nanga we ulumanga tono koroma pange tenderemo.

*Iye Gaiusini tepa kondorumu ungumu*

<sup>5</sup> Nanga ango pengamu angenali nunge kombuna oromelema, aku oi kanoko imbi tirinoma kinye naa kanolima waye paa liko tapondoko nokoko moronomunga paa teko kondorono.

<sup>6</sup> Nuni eno konopu mondoko nokorono mele enoni Kraistingu talape imboma ningo tirangi. Nuni Gotenga kongonomu tero konopu leko aulkena langi noliko pangei ningo liko tapondonio lemoaku ulu teko kondonio.

<sup>7</sup> Jisasinga kongono tendemolo ningo wendo mololi imbomanga melema naa lingei aku kongonomu tepurumele.

<sup>8</sup> Akumunga linoniaku tepa imboma lipotapondamili. Aku temolo ulumuni lino Gotenga ungu tukumemu enge timili kongo popo tipo temolo.

*Iye Diotrefesini tepa kenjirimu ungumu*

<sup>9</sup> Kraistingu imbo talapemu pipia te topo tiru nalo Diotrefesini yu enonga iye awilimou molombo konopu lepa moromo iye-muni linonga unguma naa pilipe ltimu.

<sup>10</sup> Akumunga na eno moromelena ondu lemo yuni linonga ungu umbulkondo nindrimo mele nimbo para timbo. Akumu

kau molo. Yuni angenupili ponenge leko oromele kinye panjipe naa lipo, ki naa lipo peya molamili naa nimbe, imbo marenimbo ponenge oromelema peya pepamili waio nimble wali yuni naa meko pangei, molo nimbe, Kraistingu imbo talape moromele ulkena makoropa pena pena teremo.

*Iye Demitriusini ulu pengama terimu ungumu*

<sup>11</sup> Nanga ango pengamu, ulu kerima kanoko manda leko naa tewi! Ulu pengama kau tewi! Imbo te ulu pengama teremo imbonmu Gotenga imbonmu moromo. Imbo te ulu kerima teremo imbonuni Gote naa lipo manjirimo.

<sup>12</sup> Imbonani iye Demitrius yu iye pengamu nimele. Yuni tepea kondoromo mele Gotenga ungu tukumemuni nimbe para tirimola. Nani kape ungu paimboma kau nio, nu pino. Nani yu ulu pengama teremo niola.

*Tapu iyemuni Gaius kanopumbo konopu lerimu*

<sup>13-15</sup> Na ungu awini pipia topo tilka nalo nu moronona nondopo ombó kanopo nu kinye ungu nimbo molambili konopu lepolio pipia naa toli tiye kolto.

Nu konopu u nipili molowi! Nunge imbo pulu ltemomani nu molko kondowii nimele. Nuni linonga imbo pulu ltemo nu kinye moromelema yu mele mele imbi leko linoni eno molko konda nindwi.

## Jut Pipia Topa Mundurumu Ungumu Jut I Ungu Torumumunga Ungu Pulu Mare

Kolo toko mane tili imboma ipuki naa tipolio eno kane kane molamali nimbe Jutuni i pipia topa mundurumu.

Goteni nu kolo toko mane tili imbomanga ungu akukolio ungu tukumemu ningi tieni enge tipili!

*Jut i pipiamu tombaindo pulu polopa torumu ungumu*

<sup>1</sup> Na Jut, Jisas Kraistingu kongono tendeli kendemande iye te, na Jemsinga angenu i pipiamu topo, Goteni nanga imboma molangei waio nimu imboma, Lapa Goteni konopu mondopa, Jisas Kraistini nokoromo imboma i pipiamu eno topo tiro,

<sup>2</sup> Goteni enoni walite ulu mare teko keninge kinye eno kondoloko mindili nangei naa nimbelo mele kinye, eno konopu u nipili taka liko molangei nimo mele kinye, eno konopu mondopa molopa, nendo yando konopu mondonge ulu pulumu tirimo mele kinye, olandopa olandopa pupili.

*Ungu tukumemunga opa pulema  
Kraistingu imbo talapena oringi imboma  
molko keninge mele ungumu*

<sup>3</sup> Nanga konopu mondoli imboma, i pipiamu eno topo timboindo Goteni na kinye eno kinye lino tepa lipe, mindili nolemala aulkena wendo lipe, yu kinye peya molopo kondomolo aulkena lipe mondomoro mele pipia topo nimbo tiembo nimbo konopu enge nimbo leru. Nalo altope pilipolio kinye pipia topo eno nimbo timboi tero akumu paimbo ningi ipuki tirimele ulumu Goteni oi yunge imboma paa kamukumu tirimu kanomu mainye naa pupili. Akumu imbo teni paa alowa naa tendepili ningi nokoko kondangei nimbo pipia te topo timbo nimbo pilipolio i pipiamu topo tiro.

<sup>4</sup> Eno Kraistingu imbo talapema moromele iye mare lopeke teko ongo moromele, aku iyemando Goteni koro oi nimu, yunge bukuna moromo mele nimbeindo, aku iyemanga kot waimu wendo ombalo kinye teko kenjiringi kani kombu kerina pungo molko kenjengei nimbo nimbe bukuna moromo. Gote liko umbulu tiko molko kenjiko, yunge unguma alowa tendeko enonga unguma tukuruku munduko, yuni imboma we kondo kolopa lipe tapondoromo ungu

tukumemu mainye pupili ningi alowa tendeko, aku ungumu tiye kolko kolo wango, Goteni imboma we kondo koromomunga lino amboma kinye wapu ulu keri niale temolo wali lino we kondo kolopa ulure naa tembalu ningi aku teko kau moromele. Aku iyemani linonga Iye Awili Enge Olandopa Iye Nomi Jisas Kraist liko umbulu tiko yu ulure molo nimelela. Iye aku tepama eno moromelena ongo molko Gotenga ungu tukumemu beambo tiengei teremelelunga pilipolio i pipiamu toro.

<sup>5</sup> Awilimuni yunge Israel imboma lipe tapondopa mindili nongo moloringi kombu Isip wendo lipe mepa purumu akumu eno pimele nalo altoko pilengelai nimbo pipia topo aku temanemu altope topo tiembo. Awilimuni eno wendo lipe meli pumbelle nimumuni, pele Yuni lino tepa limbelo ningi ipuki naa tiko yu umbulu tiringi imbo awini topa kondorumu akumu eno pimele nalo altoko pilengelai!

<sup>6</sup> Mulu kombuna ensel mare Goteni eno mele mare nokangei nimbe enge te tirimu melema taka liko naa nokoko, moloringi kombumu tiye kolko wendo puringi enselelunga temanemu pimele akumu altoko pilengelai! Aku ulu teringimunga Goteni eno ka tipe, lepa kau pumbelo ka seneni ka topa, kombu paa tumbulu tolina lipe tuku mundurumu. Gotenga kot wali awilimun wendo ombalomunga nokoko moromele.

<sup>7</sup> Aku enselemani teko kenjiringi mele kombu awili Sodom Gomora talo kinye, aku kombu talonga nondopa lerimu kombu mare kinye, aku kombumanga moloringi imbomani aku teko teringila. Sodom Gomora kombu talo moloringi imboma andoko wapera toko, ambomani amboma kinye ulu kerinale teko, iyemani iyema kinye ulu keri niale teko, aku ulu paa kerima teringi. Aku imboma tipe waliwalima nomba pepa kau purumo tipemuni topa kalorumu. Aku temanemu altoko pilengelai! Neya imboma teko kenjiringimunga Goteni mindili tirimu aku ulumuni lino manda lepo temolo kinye Goteni lino aku tepa tepa kenjimbelo ningi pilengelai nimbe lepi lepi toromo.

<sup>8</sup> Aku teko mele eno kinye neya moromele iyema enonga konopu teko embambo tindingei teremele aku iyemani aku ulu kerimu teremele. Uru kumbu lupe mare teko kanokolio eno enongan enonga kangindo ulu kalaro mololima teremele. Gote kinye imbi moromo imbo awilima kinye akumanga ungu mane teni lino naa nokoromo ningi liko tui tiko, mulu kombuna ensel enge peremo awilima ungu taka tondoromelela.

<sup>9</sup> Nalo aku iyemani enselema ungu taka tondoromele mele enselelunga iye nomi

awili Maikeleni aku ulu naa terimu. Maikel kinye Satan kinye Mosesinga onomu liembili ningko karaye teringili wali Maikeleni yundo Satan, nu teko kenjirino mele nu iri toro nimbe tembaindo paa pipili kolopa ungu taka naa tondorumu. Yuni Sata-nendo nimbeindo, teko kenjirinomunga Awilimunu iri topa teko kenjirino niplili nimu.

<sup>10</sup> Maikeleni Satan iri tombaindo pipili kolorumu nalo neya eno kinye moromele iyemani ungu marenge puluma pilko tundurumele unguma ungu kerima ningko ungu taka tondoromele. Eno mele takeramani teremele ulu teremele. Mele takerama ulu te tengeindo konopu kimbo naa tiko we teremele. Aku teko konopu liko naa munduko uluma we andoko teremele-munga eno melte molo imbo te topa kondombalo aulkena purumele kinye mindili nongo koromele. Aku iyema eno teko: Mele takeramani ungu alaye kolte pilkolio andoko teremele mele aku iyema enonila ungu alaye kolte kau pilkolio we uluma teko ungu nimele akumunga eno mindili nonge aulkena pungela.

<sup>11</sup> Eno paa mindili nongo molko kenjing! Keineni terimu mele eno aku teko teremele. Profet iye Balameni tepa alowa terimu mele eno aku teko kou mone liemili ningko uluma teremele. Oiye Korani tepa kenjirimu mele neya eno iyema eno teko Gote teko kenjirimele Kora kinye, eno teko kenjiko wangopa naa molorumu iyema kinye topa kondorumu mele neya eno iyema kape Goteni mindili nongo kolangei nimbobelola.

<sup>12</sup> Lupe te imbo tengah kangina teremo wali imboma manda naa moromo, eno teko mele eno Kraistingu imboma nendo yando konopu mondoko tendekuna langi nongo moromele wali eno kolo toli tapu iyema eno enongano tapu teko, eno Kraistingu imboma moromelena pungo peya molko kalaro mololi uluma teko, eno enongano molko langi awini kinye no awini nongo teneindo pipili naa kolko we noromele. Kombu paa kapu lelina lo ombai kombu koromo kinye kanokolio lo tombalo ningko konopu tiko nokoko moromele nalo poporomeni kupema we topa mepa purumo, kano mele eno iyema eno teko moromele. Unjo te mongo naa topa koromo wali pulu akuko teremele mele eno eno teko moromele. Eno wali talo tiko koromele iyema. Aku tepa imboma lipa tapondombalo ungu te eno iyema kinye naa peremo.

<sup>13</sup> Poporome toromo wali nomu kuta beumbeu tirimo mele eno eno teko ulu kerima teneindo pipili naa kolko we teremele. Noma amame meremo wali imbomani karomele mele enonila pilipi

naa kolko ulu kerima teremele mele eno teko mona ltemo. Kombukandiye mare purumelendo tiye kolko tendo ongo purumelema Goteni eno kombukandiyema kombu tumbulu topa paa pombera tirimo kombuna pangei nimu eno mele neya eno iyema eno teko moromelemunga kombu tumbu tipe noirmuna pungela.

<sup>14-15</sup> Enok eno pulu polopa anda kolepa Adamenga moloringi iyemanga kite yupoko pakera tipemunga molorumu iyemu. Yu Gotenga nimbe munduli ungu te pilipelie eno kolo toli iyemando nimbeindo, "Kanao! Awilimunu ungu ensel kake teli tausen awini kinye oromo. Yu imbomanga pali kot tendepa, ungu ungumunaa pilko umbulu tiko, eno kanopa keri pimo uluma teremele imboma kinye, ungu ungumunaa pilko ulu pulu keri teremelemanu eno ungu taka tondoko ungu kerima enge ningko nimele imboma kinye eno teko kenjirinigi ulumanga pundi toko mindili nangei nimbelo," nimu.

<sup>16</sup> Ulu penga mare eno iyema kinye wendo oromo kinye waliwalima konopu keri panjiko ulu kerima ningko eno teko kenjirimele ningko, eno teko ungu awini nimele. Enonanga konopumuni pilko, i teko temolo kinye konopu timolo ningko pimele ulu kerima kau teko, eno none teko enonanga kapi ningko imboma liko ola munduko, imbomani lino mele mare tiengenii ningko toperope tiko ningko amo tondongei imboma kapi ningko eno imbo pengama nimele.

#### *Jisas ipuki tiko konopu toimbo topili molangei nimu ungu*

<sup>17</sup> Nalo nanga konopu mondoli imboma, linonga Awili Jisas Kraistini nanga kongonomu tendepa nimbe lipa mundurumu iyemani oi ningi ungu te pileringi mele altoko pilengenii! Altopa wendo ombalo mele oi ningi tikolio

<sup>18</sup> eno Kraistingu imbomando ningeindo, "Jisas kelepa ombalo kinye mulu mai talo pora nimbelo walimu nondopa wendo ombalo, eno walimanga iye mare ongo Gotenga unguma ungu taka tondoko umbulu tiko, enonaga konopumuni pilinge uluma Goteni kanopa keri pilimbelo uluma kau teko, tumbi tipe molamili ningko imboma ungu taka tondoko tengenii," ningi kanomu altoko pileio.

<sup>19</sup> Jisasini lipa mundurumu iyemani altoko eno tepa iyema wendo onge ningi mele kinye eno iyema eno moromelena ongo molko, eno Kraistingu talape imboma teko beambo tiko lupe lupe molangei nimele. Aku iyema eno mai kombuna we imbomani pilko teremele mele kau teko, Mini Kake

Telimu konopuna naa moromo iyema mōromele.

<sup>20</sup> Nalo nanga konopu mondoli imboma, enonga paimbo ningi ipuki tirimele ulu paa kake teli uluma Goteni yunu tirimu akumuni enongan enge paa olandopa pumbelo uluma teko, Mini Kake Telimu konopuna molopa lipe tapondoromomunga Gote kinye ungu nengei.

<sup>21</sup> Linonga Awili Jisas Kraist omba eno kondo kolopa mindili tilka uluma tiye kolopa, eno waliwalima koinjo molko kondoko kau punge ulu pulumu timbeindo ombalo ningi nokoko molkolio Goteni eno konopu mondoromo mele paa kamukumu konopu mondopa kau pupili ningi wamongo pilko, yu kinye nondoko pungo molangei.

<sup>22</sup> Imbo mare paimbo ningi ipuki tiringi mele kelko konopu talo tepe pepili mōromele imboma kondo kolko liko tapondoko,

<sup>23</sup> imbo mare tipe kombuna pungei teremelema welea yando liengei! Imbo mare teko kenjinge wali kanokolio kondo kolko liko tapondangei. Liko tapondongeindo linoni kape mindili nomolo uluma temolo ningi pipili kolko, enonga oi konopuman pilko teringi ulu pulu kerimani enonga wale pakolima kape kalaro mondorumu kalaroma moromo wali pakolima paa kanoko keri kanokolio, aku mele kalaro moromo melemanga yokeya tendeko lino kalaro te naa molopili nengei. Nalo aku imboma paa wamongo kanoko liko tapondangei.

#### *Gotenga imbimu lipo ola mundemili*

<sup>24</sup> Eno ulu pulu keri teni naa ambolopa topa mainye naa mundupili. Kraist enge ningi ambolko, tiye naa kolangei nimbe eno manda nokopa kondopa, alowa tendeli ulu te konopuna paa naa pepili ningi tono kolko molangei eno yu moromo kombu enge pa telina manda mepa pumbe,

<sup>25</sup> aku tepa manda tembalo Gote tendekumu kau moromomuni linonga Tepa Lili Iyemu yu, linonga Awili Jisas Kraistini linonga nimbe tenderimumungaaku tepa moromo Gotenga imbi paa ola molopa, melemanga pali yu paa iye nomi awili olandopa molopa, yu enge awili tepa pumbe, imbi moromo imbonanga pali yu imbi olandopa molopa, yu awili tepa pa telimu kinye molopa, koro oi mulu mai talo naa liepili kape yandopa kinye kape altopa kape aku tepa molorumu mele we molopa kau pumbelomunga yu kapi nimbo imbi lipo ola mundemili. I paa. Aku peya nio.

## Lopeke Tepa Perimu Ungumu Nimbe Para Tirimu I Ungu Torumumunga Ungu Pulu Mare

Goteni Satan topa maindo mundumbelo mele Jononi nimbe para tipelie ungu topa panjirimu. Unga awini manda lepa ungu iko topa nimu. Lino Jisas ipuki tirimolo imbomani maindo naa pumbo Jisas tiye naa kolopo enge nimbo angilemili nimbeli lino nimbe enge tirimu. Mulu mai koinjo talo wendo ongo lengele mele kape nimu.

Wai keri te wendo ombalo wali nu mini naa Iteko Goteni Satan mainye mundupe tepe tombalo konopu liko manjikolio tono kolko Jisas ipuki tiko molani nimbe Goteni nu paa nokopa kondopili!

### *Jononi pulu polopa torumu ungumu*

<sup>1</sup> Altopa wendo ombalo mele Goteni Yunge kendemande imboma pilengi nimbe Jisas Kraist lipe ondorumumu inie moromo. Lino pilemili nimbe Jisas Kraist yuni yunge enselemu na yunge kendemande iye Jon moloruna lipe mundurumu.

<sup>2</sup> Nani kanoru mele pali nimbo para tiro. Gotenga unguma kinye Jisas Kraistini Goteni nimo unguma paimbo unguma nimu mele nimbo mona ltendero.

<sup>3</sup> Ulu wendo ombalo nimoma nondopa wendo ombalomunga altopa wendo ombalo mele i bukuna nimbe tirimo imboma pilko molangei kanoko ningotinge imboma kinye, bukuna moromo unguma konopu liko manjirimele imboma kinye Goteni eno mane ungu tirimona tono kolonge.

### *Jononi molko kondao nimu ungumu*

<sup>4</sup> Eno kombu Esia provins Kraistinga imbo talape kite yupoko pakera moromelena na Jononi i pipiamu topo tiro. Oi molorumu, kinye moromo, altopa ombalo Goteni Jisas kinye konopu noirimmo mele eno kinye konopu noipelie enonga konopu ame tondopili! Kano iyemu molopa kombuma nokromo polomunga mai ondoromondo mini kite yupoko pakera naku ulu pulu talo tenegeila!

<sup>5</sup> Jisas Kraist, Gotenga unguma kolo naa topa tumbi tipe nimbe tirimo iyemu, imbo kololima makilko koinjo molonge imbo-manga yu kumbe lepa makilipe koinjo molorumu iyemu, mai kombuna pali moromele iye nomi awilimanga iye nomimiu molopa nokromo iye nomi paa Awilimu, yuniaku ulu pulu talo eno tepili kala.

Lino konopu mondoromo iyemu, yuni yunge mememu linonga nimbe ondopa

ltenderimu aku mememuni linonga ulu pulu kerima wendo lipe ltendepalie,

<sup>6</sup> lino iye nomi kingimunga popo tondoli imboma molangei nimbe Yunge Lapa Gotenga kongonomu tendangei nimu iyemu, yunge imbimu wali wali paa ola molopa, imboma nokombalo engemu yu kinye kamukumu pepa kau pupil! Aku tepe wendo opili!

<sup>7</sup> Kanaio! Yu kupena molopa ombai tepe moromo.

Ombalo wali imbomani pali enonga mongoni kanonge.

Yu toloni toringi imbomani kanongela.

Yu ombalo wali mai kombuna moromele imboma

pali kola pupu tongue.

Paimbo aku tepe wendo ombalo.

I paa.

<sup>8</sup> Engema pali yu kinye peremo Gote Awilimuni nimbei, "Na kau oi kumbe lepo molopo peyalime kape moro," nimo. Aku Gote kinye moromo, oi molorumu, altopa ombalo.

## Kraistinga Imbo Talape Kite Yupoko Pakera Moloringina

### *Jononi Pipia Topa Mundurumu Unguma*

#### *Jononi Kraist kanorumu ungumu*

<sup>9</sup> Na enonga angenu Jon, eno kinye lino Jisasina imboma moromolomunga mindili nombo umbuni meremolo. Mindili molo umbuni te wendo oromo wali lino mindilima we namili nimbo enge nimbo molopo, lino Gote iye nomi kingimu molopa nokromo talapena moromolo imboma. Na Gotenga unguma imboma nimbo tipo, Jisasina temanemu topo tirumunga na ka tiko nomu kutana tukundo mai kelo itemo akumu kombu Patmos nimele akuna ka tiko ongo panjiringina moro.

<sup>10</sup> Awilimunga wai te wendo orumu wali Mini Kake Telimuni na moloruna ombo na enge nimbo tope tirimu wali nanga umbulkondo iye teni enge nimbe alako torumu, biukel mele ungu nimuna, pilero.

<sup>11</sup> Aku ungu nimu iyemuni nimbei, "Nu mongoni kanonio uluma waye bukuna tokolio Kraistinga talape kite yupoko pakera, Efesus kinye Smerna kinye Pergamum kinye Taiataira kinye Sardis kinye Filadelfia kinye Laodisia kinye, aku kombu awilimanga moromele imbomanga munduwi!" nimu.

<sup>12</sup> Narini nimonje nimbo umbulkondo iki tepo kanoru wali kou goloni teli tipe lam kite yupoko pakera lerimuna kanoru.

<sup>13</sup> Kano lamema lerimu imunana iye te angilerimu, yu Iyemunga Malo none teli te, yu iye nomimani teremele mele wale pakoli

tule te pakopa kimbo aku topa, kou goloni teli kako te luwina torumu.

<sup>14</sup> Yunge pinyewemu kinye pinyendii kinye paa u mokopumu, kongi sipsipi-manga indi kinye kalopera kinye aku talo kake teremo mele terimu. Yunge mongo talo tipe elka mele kondopa lenga terimu.

<sup>15</sup> Yunge kimbo talo kou kapa tipena karomele wali mini mana teremo mele aku tepe pa terimu. Yunge ungumu no tindi topa uwa nimo mele aku tepe ungu nimu.

<sup>16</sup> Yunge ki imbondo kombu kandiye kite yupoko pakera ambolorumu. Opa teli loi gelea ekondo ekondo peya ne nolimu yunge kerena wendo orumu. Enani yumi ami teremo mele yunge kumbe keremu aku tepe none terimu. Yunge kumbekere ena mele pa teremo.

<sup>17</sup> Yu kanopolio na imbo kololi none telimu yunge kimbo puluna tumbi tipo tamalu peru. Kano wali yunge imbo kimu na ola noipelie nimbei, "Minu naa ltewi! Na paa Kiyendo molopo peyalime kape moro iyemu.

<sup>18</sup> Na Koinjo Mololimu. Oi paimbo koloru nalo kanowi, kinye na kamukumu koinjo molopo kau puro. Na kololi ulu pulumu kinye kololi imbomanga kombu kerimu ta-longa ulke ki mele amboro.

<sup>19</sup> Akumunga kinye wendo oromo uluma kinye altopa wendo ombalo uluma kape nu kandono mele waye bukuna towi!

<sup>20</sup> Kombu kandiye kite yupoko pakera kinye kou goloni teli tipe lam kite yupoko pakera kinye kanonio aku ungu pulumu itepa: kombu kandiye kite yupoko pakera nanga imbo kindo amboro akuma na Kraistingu talape kite yupoko pakera enselema, tipe lam kite yupoko pakera akupe Kraistingu imbo talape kite yupoko pakera," nimu.

## 2

### *Kombu Efesus Kraistingu imbomando nimbe mundurumu ungumu*

<sup>1</sup> Yuniaku ungu nimbelie altopa nimbei, "Kombu Efesus Kraistingu talapemunga enselemundo pipia toko i teko ningomunduwi.

Na kombukandiye kite yupoko pakera imbo kindo ambolopo kou goloni teli tipe lam kite yupoko pakera itemona andoromuni yundo ungu nimbo munduro.

<sup>2</sup> Nuni tereno mele pali karo. Kongonomu enge ningoteko, umbunima wendo oromo wali tiye naa kolko enge ningomorononakaro. Ulu pulu keri teremele iyema kanoko keri pilko tendekuna andoko naa moronomele karo. Iye maren, 'Lino Jisasini lipe mundurumu iyema moromolo,' nimele

nalo kolo toromele. Aku iyema nuni paimbonje ningomoke tekopilkokanokolio enokolo toromele ningokarononakaro.

<sup>3</sup> Nanga imbimu amboronomunga imbonmani nu teko kenjirimele nalo nu kano umbunima we meko nanga kongonomutiyenaa korononakumo karo.

<sup>4</sup> Nalo nani nu kinye ungu te peremomunembu: Nuni oipulu polko na ipuki tikolio paa konopu mondorunu mele kinye akuteko na konopu naa mondorono.

<sup>5</sup> Oi pulu polko na konopu mondokonanga ungumu ambolorunu mele pilko altoko akuteko teani! Moloaku naa teni lemo nu moloniona ombolio nunge tipe lamemu itemo kombuna wendo limbo.

<sup>6</sup> Nalo ulu penga te terenomu itepa: Nu Nikolasinga talape imbomani teremele uluma paa konopu naa mondorono. Nani kape enonga teremele uluma paa konopu naa mondoro.

<sup>7</sup> Imbo te komu angilimbolomuni Mini Kake Telimuni Kraistingu imbotalapemando nimbeitrimungumupilipili! Imbo te enge nimbe opa pulemu kamukumu topa mainye mundumbelomuwali walima molopa kau pulu ulu pulumu peremo unjomunga mongoma manda noplifi nimbo. Aku unjomu mulu kombuna Gotenga poinyena angimo."

### *Kombu Smerna Kraistingu imbomando nimbe mundurumu ungumu*

<sup>8</sup> "Kombu Smerna Kraistingu talapemunga enselemundo i teko pipia tokomunduwi.

I ungu toromuo i kumbe lepo molorupeyalime molombo. Oi koloru altopomakilipo koinjo moro akumuni i ungumuminibomunduro.

<sup>9</sup> Nu mindili nongo koropapupilimorono ulu karo. (Paimbo kangindokoropapupilimorono nalo konopundo kamakomorono.) Imbo mareni Juda imboma moromolo. nimelemani nunge ungu takatondokoumbulkondo nindirimelena karo, Kano imboma paa paimbo Juda imboma molo. Eno kuromanga nomi Satanengatalapena moromele imboma.

<sup>10</sup> Eno mindili nongemele liko manjikolio mininaa lteao! Sataneni eno imbomangamare Na tiye kolangei nimbe ka ulkenapanjimbelo kano kinyewali 10 eno mindilinonge. Altoko na tiye naa kolko nanga imboma molkolokamukumukolonge lemonani enomele pengapundutopotiembomolobowali walima molkokondokokau punge ulu pulumu timbo.

<sup>11</sup> Imbo te komu angilimbolomuni Mini Kake Telimuni Kraistingu imbotalapemando nimbeitrimungumupilipili! Enge nimbe opa pulemu kamukumutopatopa

mainye mundumbelo imboma imboma talo tepe kololi ulumuni yu tepe naa kenjimbelo nimbo kinye yu kinye ulu te paa naa pembalo lemo."

*Kombu Pergamum Kraistingu imbo-mando nimbe mundurumu ungumu*

<sup>12</sup> "Kombu Pergamum Kraistingu talape-munga enselemundo i teko pipia toko munduwi.

Na unguma opa telo loi gelea ekondo ekondo ne noromo tulemu noipo moro iye-muni i ungumu nimbo munduro.

<sup>13</sup> Nu morono kombumu lipo mantiro. Satan iye nomi king molopa nokoromo kom-buna morono. Nalo na ambolko kondoko, na ipuki tirinu mele tiye naa kolorunu. Nanga unguma pipili naa kolopa imboma nimbe tirimu iye Antipas enonga kombu Satan nokopa moromo kombu kanona toko kondoringi. Aku wali na tiye kolko umbulu naa tirinu.

<sup>14</sup> Nalo nu kinye ungu mare peremo, akuma i tepa. Nuni na Kraistingu imbo nokorono talapemunga iye mare Balameni mane tirimu mele enge ningi pilko moromele. Balameni iye nomi king Balak mane tirimu mele i tepa. Nuni Israel imboma molko kenjengei ningi eno kondi toko, we melema linonga gotema ningi kuro popo toko koirimele langima nongo, wapu ulu kerinali teangei niwi nimu.

<sup>15</sup> Aku teko nu kinye moromele imbo mare Nikolas lombili purumele imbo-manga unguma pilko liko teremele.

<sup>16</sup> Akumunga nu konopu topele towi! Aku ulu naa tenio lemo nani naa moloniona nondopo ombolio nanga opa telo loi gelea kerena peremomuni aku imboma kinye ombo opa tembo.

<sup>17</sup> Imbo te komu angilimbelomuni Mini Kake Telimuni Kraistingu imbo talape-mando nimbe tirimu ungumu pilipili! Imbo te enge nimbe opa pulemu kamukumu topa mainye mundumbelo imboma na langi mana, kinye lopeke tepe itemamu timbo. Kou kake telina imbi koinjo te topo mondopolio timbo. We imbo teni aku imbimu naa kanombalo nalo kou limbelo imbomuni kau kanopa imbi timbelo."

*Kombu Taiataira Kraistingu imbo-mando nimbe mundurumu ungumu*

<sup>18</sup> "Kombu Taiataira Kraistingu talape-munga enselemundo i teko pipia toko munduwi.

Na Gotenga Malo, tipe noromo mele nanga mongomu tipe elka mele kondopa lenga topa, kapa koinjo mele aku tepe nanga kimbo mini mana teremo.

<sup>19</sup> Nu ulu terenoma lipo manjiro. Nu imboma pali konopu mondoko, na ipuki tiko, nanga kongono tendeko, umbunima

wendo oromo wali enge ningi molko, nu oi terinu mele mainyendopa, kinye tereno mele olandopa, akumu lipo manjiro.

<sup>20</sup> Nalo na nu kinye ungu te peremo mele i tepa. Kolo topa Gotenga ungu nimbe mundulima pilipo nimbo tiro nimbe ambo Jesebel, yuni nanga kendemande imboma kondi topa mane tipelie, wapu ulu kerinale teko, we melemando linonga gote ningi kuro popo toko langi koirimelema nonge nimo kano ambomu iri toko puwi naa ningi we molopili tiye korono.

<sup>21</sup> Yu wapera toromo mele konopu topele topili nimbolio, wali mare we moloru nalo yu konopu topele naa topa, tepe kenjirimu uluma we tepe moromo.

<sup>22</sup> Akumunga nani Yu kuro awili tepe topili nimbo. Yu kinye wapu ulu kerinale teremele iyema yuni ulu teremoma kanoko keri naa pilko konopu topele naa tongue lemo mindili awili nangei nimbo.

<sup>23</sup> Yunge bakuluma paa topo kondombo. Aku ulu tembo wali na Kraistingu talape imbo-mangi kanokolio, nani konopuni pimele mele kape ulu te tengendo konopu mon-doromele mele kape nani moke tepo ka-nopolio, enonga ulu teremelemanga te te nimbe kalombo ningi pilinge.

<sup>24</sup> Eno na Kraistingu imbo mare ulke kombu Taiataira molko, kano ambomunga ungu nimoma imbo marenai aku unguma Satanenga ungu enge nilima nimele aku unguma naa pilko ltimele imbonando ungu te nimboi tero. Umbuni te peya eno meangei naa nimbo.

<sup>25</sup> Nalo eno mele amboromelema enge ningi ambolko pungo molangeina ombo!

<sup>26</sup> Imbo te enge nimbe opa pulemu ka-mukumu topa mainye mundupe, nani tewi nio unguma pilipe tepe molopili, walimu pora nimbelo kinye nani aku tembalu imbo imbo talapema nokopili nimbo imbi timbo.

<sup>27</sup> Aku wali,

Yuni kano imbo talapema enge nimbe nokombalo.

Maini teremele mingima koipeni enge ningi nurupili toromele mele yuni aku tepe enge nimbe nokombalo, (*Sng 2:8-9*)

nimbe moromo mele Arani na imboma nokambo nimbe imbi tirimu mele imbo kanomu timbo.

<sup>28</sup> Kombu kandiye kombu tangombaindo ipu leli oi angimo akumu kape yu timbo.

<sup>29</sup> Imbo te komu angilimbelomuni Mini Kake Telimuni Kraistingu imbo talape-mando nimbe tirimu ungumu pilipili!"

**3**

*Kombu Sardis Kraistingu imbomando nimbe mundurumu ungumu*

<sup>1</sup> "Kombu Sardis Kraistingu talapemunga enselemundo i teko pipia toko munduwi.

Na Gotenga mini kite yupoko pakera kinye kombukandiye kite yupoko pakera kinye ambolopo molopo i ungumu nimbo munduro. Nani nu uluma tereno mele lipo manjiryo. Imbomani nu koinjo morono nimele nalo nu kolko pora tirinu.

<sup>2</sup> Nu uru naa peli makilko ola molowi! Nuni tereno uluma pali nani karo wali nanga Goteni kanopa penga pimo uluma aku tepe mele naa karo kani ulu penga walo kolte terenoma kamukumu mainye naa pupili ningko aku uluma enge ningko alotto tewi!

<sup>3</sup> Ungu oi pilko ltinu unguma altoko konopu kimbo tiko pilko, pilko liko tengen tiko konopu topele towi! Molo altoko nu makilko ola naa molonio lemo na wapu noli iye te oromo mele kiyengo nimbo nu moloniona ombo. Ombo waimu nu naa pilko molani ombo.

<sup>4</sup> Nalo nunge kombu Sardis imbo mare enonga wale pakolimanga kalaro naa molopili ningi. Eno kanopo penga pio uluma teko moromelemunga wale pakoli kake telima timbo pakoko na kinye kopu tepo andomolo.

<sup>5</sup> Aku imbomanga imbo te enge nimbe opa pulemu kamukumu tepe mainye mundumbelo imbonu yu wale pakoli kake telimu pakondombo. Aku imbomanga imbimu koinjo molko kau punge imbomanga imbima moromo bukuna altopa kape paa kulu naa tondombo. Ara kinye yunge enselema kinye enonga kumbe kerena yunge imbimu lepo nanga imbomu nimbo.

<sup>6</sup> Imbo te komu angilimbelomuni Mini Kake Telimuni Kraistingu imbo talapemando nimbe tirimu ungumu pilipili!"

*Kombu Filadelfia Kraistingu imbomando nimbe mundurumu ungumu*

<sup>7</sup> "Kombu Filadelfia Kraistingu talapemunga enselemundo i teko pipia toko munduwi.

Na paa kake teli, ulu tukumemanga na pulu, na King Devitinga ulke ki ambolopolio ulu te nambu topo wendo opili nimbo wali imbo teni pipi naa timbelo. Nani ulu te pipi timbo wali imbo teni nambu manda naa tombalo. Iungumu nunge nimbo munduro.

<sup>8</sup> Nani nu uluma terenona pilipo karo. Kanowii! Nu moronona ombo nambu tondu kanomu imbo teni manda pipi naa timbelo. Karo wali nunge enge kelo kolte kau peremo nalo nanga ungumu tiye naa kolko, nanga imbimu umbulu naa tirino.

<sup>9</sup> Imbo mare Juda imboma moromolo nimele nalo kolo toromele. Eno Juda imboma molo. Eno kuromanga nomi Satanenga talape moromele imbo kanoma nunge kumbe kerena onto tamalu peangei nimbo. Aku ulu tembomunga nu konopu paa mondoro ningko liko manjingue.

<sup>10</sup> Nani nu enge ningko nanga unguma tiye naa kolowi niuumu aku ulu teko moronomunga ulu umbunima kombumanga pali wendo ombalo wali nani nu tiye naa kolombo. Aku umbunima nu kinye wendo naa ombalo.

<sup>11</sup> Na omboi tero kani nu amborono melema enge ningko ambolowi! Nunge tipo kalopo timboi teromu imbo teni lupe naa lipili ningko aku ulu teko molowi!

<sup>12</sup> Enge nimbe opa pulemu kamukumu tepe mainye mundumbelo imbonu nanga Gotenga ulke tempelemunga ulke timu mele angilepili nimbo. Aku wali yu altopo ulkemu tiye kolopa penando manda naa pumbelo. Nanga Goteni ulke kombu awili Jerusalem koinjo tembalo akumu Gote moromo mulu kombuna lepa mainye ombalomunga imbimu kinye, nanga imbi koinjomu kape, aki imbi poko nani yunge mai mongona imbi topo mondombo.

<sup>13</sup> Imbo te komu angilimbelomuni Mini Kake Telimuni Kraistingu imbo talapemando nimbe tirimu ungumu pilipili!"

*Kombu Laodisia Kraistingu imbomando nimbe mundurumu ungumu*

<sup>14</sup> "Kombu Laodisia Kraistingu talapemunga enselemundo i teko pipia toko munduwi.

Na ungu paimboma kau peremo iyemu, Gotenga unguma kolo naa topo tumbi tipo kau nimbo tiro iyemu, Goteni mele terimanga pali Pulu Iye, akumuni i unguma nunge nimbo munduro.

<sup>15</sup> Ulu terenoma pali nani pilipo karo. Nu naa kokoromo. Nu mulu mulu naa nimo. Nu kamukumu kokoropili molenanje aki paa. Molo nu kamukumu mulu mulu nipili molenanje aki paala konopu lteo.

<sup>16</sup> Nalo nu alaye kolo kau mulu mulu nimo. Paa naa kokoromo, paa mulu mulu naa nimomunga nani nu meku topo itemboi tero.

<sup>17</sup> Nuni ninindo, 'Kou mone kinye mele awini noipo molopo kamako moro. Melte molo naa itemo,' nino nalo koroko nongo mindili nongo molko kenjiko, pulu waimbele naa panjiko we molko, mongo talo keri itemo morono mele nu nunu molopo kenjiro ningko naa liko manjirino. Imbomani imboma kondo koromele mele nu aki teko morono.

<sup>18</sup> Tekolio molko kondonio mele nimbo tiemboi. Kamako leambo ningko kou gol tipena kamukumu kalko kake tendeli noiromu polo teko liko, pulu waimbele naa teli aku tepo naa molambo! Pipili naa tepili ningko maminye kake noiroma okani polo teko liko, kombu kanambo ningko mongona kandonio opipi noiromu polo teko liwi!

<sup>19</sup> Imbo konopu mondoroma Molko kongangei nimbo iri topo mane tiro kani nu konopu liko mundukolio teko kenjirino mele kanoko keri pilko tiye kolko konopu totele towi!

<sup>20</sup> Kanowi! Na tukundo wamboya nimbo kere puluna nambu gaungau tipo angio. Imbo te nanga ungumu pilipe imbi tipelie tukundo owi nimo lemo na tukundo pumbo kopu tepo molopo, yu kinye langi nombo molombolo. Yu na kinye langi nomba molombalo.

<sup>21</sup> Oi na enge nimbo opa pulemu topo mainye munduru wali Ara iye nomi king molopa kombu nokopa molorumu polona pumbo peya morombolo mele aku tepa enge nimbe opa pulemu kamukumu tepa mainye mundumbelo imbonu na iye nomi king molopo kombuma nokopo moro polona peya molambili nimbo.

<sup>22</sup> Imbo te komu angilimbolomuni Mini Kake Telimuni Kraistainga imbo talapemando nimbe tirimu ungumu pilipili!" nimu.

#### 4

*Mulu kombuna Gote kapi ningko imbi liko ola munduringi ungumu*

<sup>1</sup> Aku unguma pilipo pora tipolio altopa kanopolio wali mulu kombuna ulke nambumu topa lerimuna kanoru. Aku wali iye kanomuni oi ungu biukel mele nimuna pilera akumuni nimbei, "Altopa wendo ombala uluma nani nu lipo ondambo kani ina ola owl!" nimu.

<sup>2</sup> Aku tepa nimu kinye walitikale na moloruna Mini Kake Telimu ombo na tope tirimuna mulu kombuna iye nomi kingimura molopa kombuma nokoromo polo te lerimu, akuna iye te molorumuna kanoru.

<sup>3</sup> Akuna ola molorumu iyemu i tepa mele molorumu. Kou mone olandopa pulimu kou jaspa kinye kou kondoli konilian talo pa teremo mele yu aku tepa pa terimu. Kou mone olandopa pulimu kou lkepa teli emeral pa teremo mele kolombe kaweyali melemele kinye kou tepa iye nomi kingimunga pololu lipa makai tendepa kano kou emeral mele pa enge nili tepa lerimu.

<sup>4</sup> Kano iye nomi kingimunga polona iye nomi kingimanga polo 24 noiko makai teringi, aku polomanga ola iye nomi 24 moloringi. Eno wale pakoli kake telima pakoko, iye nomi kingima wainye kou

goloni telima pakoromele mele wainye pakoko moloringi.

<sup>5</sup> Iye nomi kingimunga polona kariapa tepe, ungu enge nimbe nimbeline mulu torumu.

Polomunga mai ondoromondo kiye kite yupoko pakera nomba molorumu, aku kiyema Gotenga Mini Kake kite yupoko pakera.

<sup>6</sup> Polomunga mai ondoromondo glas none telo nomu kuta melemele molorumu akumu paa mini mana tepe wendo orumu. Mele kite koinjo mololima iye nomi kingimunga polomunga kongondondo nondoko angilko makai tenderingi. Aku melemanga umbulkondo olakondo mongo pulumu angilerimu.

<sup>7</sup> Aku melemanga te laion melemele, te kongi kao kaliepo melemele, te yunge kumbe keremu imbo melemele, te mangopa andoromo kera iliaka melemele aku teko mele moloringi.

<sup>8</sup> Koinjo mololi mele kite aku pokon enonga te te nimbe kongo kite talo pakera nimbe angilipe mongo paa awini kangimanga angilipe, kongomanga olando mainyendo kape waye angilerimu. Ipu leli tangoli eno mulu naa liko wali wali ningei, "Gote Olandopa Molopa Enge Nilimu yu paa kake telimu, yu paa kake telimu, yu paa kake telimu.

Oi molorumu, kinye moromo, altopa om-balo,"

ningo kau moromele.

<sup>9</sup> Iye nomi kingimunga polomunga momomo iye, wali walima molopa kau purumo iyemu yu koinjo mololi mele kiteni wali wali kapi ningko imbi liko ola mundunko paa tereno nimele kinye

<sup>10</sup> iye nomi 24 eno ne iye polona momomunga kumbe kerena mainye pungo tamalu peko, kano iye wali walima koinjo molopa kau purumo iyemu kapi ningko imbi liko ola munduko, enonga iye nomi king pakoromele wainye mele pakoromelema wendo liko yunge kimbondo toko mundukolio ningei,

<sup>11</sup> "Linonga Awilimu, linonga Gote, melema pali nuni wengendeko terinu.

Nunu konopuni pilkolio nunge engemuni melema

terinu kinye wendo oringi, nunge engemuni melema kinye wendo wendo ongo

moromele, akumunga akumani pali Nu Iye Awilimuni tereno mele paa tereno ningi

Nunge imbimu paa ola moromo.

Nu iye nomi paa awilimu molko melema pali nokorono engemu peremo iyemu,"

ingo nu aku teko kapi ninggo molonge  
kinye paa nimele.

## 5

*Jononi buk te panga tekolio ka toringimu  
kanorumu ungumu*

<sup>1</sup> Altopo kanopolio wali iye nomi kingimunga polona molorumu iyemu yunge imbo kindo buk panga teli te lerimuna kanoru, akumunga olando maindo peya imbi mare molorumu. Oi kandel gris kandoringina we imbo te naa kanopili ninggo imbi kite yupoko pakera toko mondoringi.

<sup>2</sup> Kanoru wali ensel enge nili te molorumumuni alako topa nimbei, "Imbo nari imbi moromomuni bukuna kandel gris kandoringima manda pilkipe wendo lipe bukumu tapuwe timbeloya?" nimu.

<sup>3</sup> Nalo mulu kombuna kape maina kape kombu kerina kape imbo teni manda bukumu tapuwe tipe, tukundo imbi molorumuma manda kanombalo imbo te naa molorumu.

<sup>4</sup> Aku wali imbo imbi molopalie manda bukumu tapuwe tipe kanombalo imbo te naa molorumumunga kanopolio na kola awini teru.

<sup>5</sup> Aku ulu teru wali iye nomi 24 moloringimanga teni nando nimbei, "Kola naa tewi! Piliwi! Juda Talapemunga Laion, iye nomi king Devitini kalopa ltimu iyemu, yuni enge nimbe opa pulemu kamukumu topa mainye mundurumu. Iye akumu imbi paa moromomuni buk kandel gris kite yupoko pakera manda wendo lipe pilkipe buk tapuwe timbelo," nimu.

*Jononi Sipsip Walomu kanorumu ungumu*

<sup>6</sup> Kanoru wali Kongi Sipsip Walo te anglerimu. Yu kongi sipsip toko kondoko noirimile mele yuaku tepa molopa, yu iye nomi king polona awi tuku tingina anglerimu. Mele koinjo mololi kite kinye iye nomi 24 kinye yu liko tukundo munduko eno molko makai teringi. Yunge pinyewuna ola kongi kao geromano kite yupoko pakera wendo ombo angilipe, mongo kite yupoko pakera anglerimu, kano mongoma Gote yunge mini kaka yupoko pakera yuni mai kombumanga pali lipe mundurumu akuma.

<sup>7</sup> Kano Kongi Sipsip Walomu yu ombo iye nomi king polona molorumu iyemunga imbo kindo lerimu bukumu ltimu.

<sup>8</sup> Ltimu wali mele koinjo mololi kite kinye iye nomi 24 kinye yunge kumbe kerena mainye pungo tamalu peringi. Eno yu mele mele gita mele mare ambolko, plet kou goloni teli, akuna paura kaloringi kinye

mune paa torumu pauramu peko lepili am-boloringi. Aku paurama Gotenga imbo-manga pali Gote popo toko konge teremele unguma.

<sup>9</sup> Enoni kunana koinjo te ningolio ningei, "Nu toringi kinye imbo ungu lupe lupe le-lima kinye, kangi lupe lupe angile-lima kinye, manga pupu lupe lupema kinye, kombu lupe lupe moromelema kinye, nunge mememumi Gote kinye kopu teko molonge aulkemu akirindirinu akumunga nuni buk manda liko kandel grisima wendo liwi.

<sup>10</sup> Nuni kano imboma linonga Gotenga kon-gonomu tendangei ningi Gotenga popo tondoli imbo Gote enonga iye nomi kingimu molopa eno nokombalo imbo talapemu molangaei ningi terinu, akumunga eno iye nomi kingima molko mai kombuna imboma nokoko molonge," ningi.

*Sipsip Walomunga imbi liko ola munduko kapi ningi ungumu*

<sup>11</sup> Altopo kanopolio kinye ensel paa pu-lumu ungu ningi unguma pilera. Eno kambu tolemalanje tausen kelepa olan-dopa tausen nimbo, milion kelepa olan-dopa milion nilimala. Akuma iye nomi king pololu kinye mele koinjo mololi kite kinye iye nomi 24 kinye liko makai tendeko tukundo munduko angileringi.

<sup>12</sup> Aku enselemani enge ningolio ningei, "Sipusipu Walo oi toko kondoringimundo imbomani pali Yu imboma nokom-balo engemu kinye yu kamako molombalo melema kinye, lipe manjilimu kinye engemu kinye yu kinye pepa manda tepa, yunge imbi mu-paa ola molopa, enge pa telimu yu kinye peremo ningi yu paa tereno ningi kapi ningi wali paa nengei," ningi.

<sup>13</sup> Kano kinye mulu kombuna moromele melema kape, maina moromele melema kape, maina tukundo moromele melema kape, nomu kutana moromele melema kape, kombumanga pali moromele mele-mani ningi ungu pilera. Enoni ningei:

"Iye nomi king polona moromo iyemu kinye Sipsip Walomu kinye elo molko kondangili nimbo waliwalima kapi nimbo imbi mu-paa olandopa molopa, enge pa telimu kinye imboma nokombalo engemu kinye kamukumu elo kinye pepa kau purumo," ningi kunana aku teko ningi.

<sup>14</sup> Aku ungu ningi wali mele koinjo mololi kiteni ningi, "Paa aku tepa wendo opili!" ningi. Iye nomi 24 akumanai mainye pungo

tamalu peko kapi ninggo elonga imbi liko ola munduringi.

## 6

*Sipsip Walomuni buk kandel grisimanga kite yupoko pakera wendo ltimu ungumu*

<sup>1</sup> Na kanopo angileru wali Sipsip Walomuni buk panga telimu kandel gris kite yupoko pakera kanomanga te wendo ltimu, kano wali mele koinjo mololi kite kanomanga teni mulu toromo mele enge nimbe alako topalie nimbei, "Welea wa!" nimu.

<sup>2</sup> Pilipolio kanoru wali kongi os kake teli te molorumu. Aku osemunga umbuluna mera wala wiye po lepa kangulupe iye te molorumu. Opa pule imboma toko mainye mundukolio pakoromele aku wainye te tiringi. Pakopalie, yu opa tepalie enge nimbelo engemu pepili pumbre opa tepa yunge opa pulema topa mundumbei purumu.

<sup>3</sup> Sipsip Walomuni buk kandel gris pange tendeli talo tipemu wendo ltimu wali mele koinjo mololi kite kanomanga talo tipemuni "Welea wa!" nimu.

<sup>4</sup> Kano wali kongi os paa kondoli te wendo orumu, aku osemunga umbuluna iye te molorumu, Maina imboma opa naa tekow te moromele wai pengama pora tipili! Imboma opa teko anjo yando imboma toko kondoko, teangei nimbelo engemu tiko, opa teli loi gelea te tiringi.

<sup>5</sup> Sipsip Walomuni bukumu kandel gris pange tendeli yupoko tipemu wendo ltimu wali mele koinjo mololi kite kanomanga yupoko tipemuni "Welea wa!" nimu. Kanoru kinye kongi os pombera te molorumu. Akumunga umbuluna iye te molopa melema moke teli skel te ambolorumu.

<sup>6</sup> Aku wali mele koinjo mololi kite moloringi tuku tingina imbo tenga ungu te wendo orumuna pileru, akumuni nimbei, "Engele awili te lembalamunga langi pengamanga te te nimbe moke tepe iye teni wali tenga kou kongono tepalie kou mone limo aku tepe mele kou mone pumbelo mele manda manjiko, langi wemanga moke telima yupoko yupoko ninggo iye teni wali tenga kou kongono tepalie kou mone limo aku tepe mele kou mone pumbelo mele manda manjiwi! Nalo wel teremele unjoma kinye no wain teremele unjoma teko naa kenjiwi!" ningi.

<sup>7</sup> Sipsip Walomuni bukumu kandel gris pange tendeli kite tipemu wendo ltimu wali mele koinjo mololi kite kanomanga kite tipemuni "Welea wa!" nimu.

<sup>8</sup> Kanoru kinye kongi os kainye teli te molorumu. Aku osemunga umbuluna molorumu iyemunga imbimu Kololi. Imbo Koromelema Purumele Kombumu yu peya

oringili. Maina moromele imbomanga pali talape kitenga te kolangei ninggo Mare opa teli loi gelea tonge wali kolko, mare engelena kamukumu kolko, mare kuro tombalo wali kolko, mare mele takeramani nongo kondangei ninggo teangili ninggo elo engemu tiringi.

<sup>9</sup> Sipsip Walomuni bukumu kandel gris pange tendeli kite pakera tipemu wendo ltimu wali imbo kololimanga minima Gote popo tongueindo melema akuna kaloringi alta polona maindo moloringina kanoru. Aku imboma oi mai kombuna molkolio Gotenga ungumu paimbo ungumu ninggo ipuki tiko, imboma aku ungumu pilengei ninggo andoko ninggo tiringi wali eno toko kondoringima,

<sup>10</sup> enoni alako tokolio ningei, "Melemanga Pali Iye Nomi King Awilimu, iye kake tepe ungu paimboma peremo iyemu, wali ambe tepe ombo pumbelo kinye maina imbo lino toko kondoringimanga kot pilkolio pundu tondonioya?" ningi.

<sup>11</sup> Aku teko ngingi wali eno yu mele mele wale pakoli kake telima tikolio ningei, "Alaye kolte nokoko molangei! Enonga angenali kinye kongono peya teringima kinye aku toko kondongema Goteni kambu toromo. Pele enonga opa pulemani enonga angenali kinye enonga kongono peya teringima kinye aku imboma kamukumu toko kondonge wali Goteni opa pulemanga kot pilipelie enonga meme pundu tondombalo," ningi.

<sup>12</sup> Altopo kanopo moloru wali Sipsip Walomuni bukumu kandel gris pange tendeli kite talo pakera tipemu wendo ltimu. Wendo ltimu wali mai parambala awili tepe, enamu paa kilu lepa kombu tumbulu topa, olimu kondopa yokoli tepe,

<sup>13</sup> unjo fik mongoma nowi naa lepili poporome enge nili tepe toromo wali mainye oromo mele kombu kandiyemaaku tepe maina mainye ololo ningi.

<sup>14</sup> Kunu mele mulumu panga tepe anjo anjo pumbe, mulu kemboma kinye kombu nomu kutana tukundo lerimuma anjo anjo purungi.

<sup>15</sup> Aku tepe uluma wendo orumu wali mai kombu iye nomi kingima kinye iye awili imbi molorumuma kinye opa teli amimanga iye nomima kinye kamakoma kinye iye enge nilima kinye imbo kou naa liko kongono we teringi kendemandema kinye we moloringi imboma kinye pali kou angamanga kape mai kowamanga kape kowa pungo lopeke teko molkolio,

<sup>16</sup> mai pangima kinye kou awilima kinye akumando alako tokolio ningei, "Iye nomi king polona moromo iyemuni lino naa kanopa, Sipsip Walomuni lino kinye mumindili kolopha mindili timbelo ulumu

wendo naa opili kani lino moromolona ongo aku taio!

<sup>17</sup> Gote kinye Sipsip Walomu talonga mu-mindili waimu wendo oromomunga aku teko lino aku taio! Aku waimu kinye imbo nari mindili naa lipe we molombaloya?" ningi.

## 7

*Israel imbo 144,000 Goteni enonga mai mongona imbi torumu temanemu*

<sup>1</sup> Aku ulumu kanopolio altopo kanoru wali mai kombu pundu kitenga ensel kite angilko, maina toromo poporome kite mai kinye nomu kuta kinye unjoma kinye naa topa mepa pupili ningi ambolko ingi tiringi.

<sup>2</sup> Aku wali altopo ensel te kanoru, yu ena mundi oromondo Koinjo Molopa Kau Puli Goteni yunge imboma imbi tombalo mele Yunge imbi moromomu mepa orumu. Goteni ensel kite mai kinye nomu kuta kinye teko kenjingei nimbe engemu tirimi enselemando kano enselemuni enge ru nimbelie nimbei,

<sup>3</sup> "Maimu kape nomu kutamu kape unjoma kape oi melte teko naa kenjeio! Oi linonga Gotenga kendemande imbo moromelemanga mai mongona lino andopo eno Gotenga imboma kanangei nimbo mako tamili! Pele kombu teko kenjingei!" nimu.

<sup>4</sup> Aku wali imbo imbi toringima kambu toringina pileru. Israeleni kalopa ltimu im-bomanga 144,000 kau imbi toringi.

<sup>5</sup> Judani kalopa ltimu lapumunga 12,000 imbi toko, Rubeneni kalopa ltimu lapumunga 12,000 imbi toko, Gateni kalopa ltimu lapumunga 12,000 imbi toko,

<sup>6</sup> Asani kalopa ltimu lapumunga 12,000 imbi toko, Naptalini kalopa ltimu la-pumunga 12,000 imbi toko, Manaseni kalopa ltimu lapumunga 12,000 imbi toko,

<sup>7</sup> Simeononi kalopa ltimu lapumunga 12,000 imbi toko, Livaini kalopa ltimu lapumunga 12,000 imbi toko, Isakarni kalopa ltimu lapumunga 12,000 imbi toko,

<sup>8</sup> Sebulunoni kalopa ltimu lapumunga 12,000 imbi toko, Joseponi kalopa ltimu lapumunga 12,000 imbi toko, Benjamini kalopa ltimu lapumunga 12,000 imbi toringi.

Manga pupu akuma Gotenga imbimu ltingi imboma.

*Imbo paa pulumu Gotenga imbi liko ola munduko kapi ningi ungumu*

<sup>9</sup> Aku ulumu kanopolio, altopo i tepe kanoru. Imbo paa awini, imbo teni

paa manda kambu naa tombalo mele, moloringina kanoru. Aku imboma eno kombu lupe lupe imboma, talape lupe lupe imboma, kangti lupe lupe angileli imboma, ungu lupe lupe nili imboma moloringi. Iye nomi king polona yakondo angilko, Sipsip Walomunga kumbe kerena angileringi. Eno wali pakoli kake teli tulema pakoko yawaye gomo ambolkolio,

<sup>10</sup> enge ningolio ningei,

"Linonga Gote iye nomi king polona moromo Iyemu yu kinye Sipsip Walomu kinye

eloni lino wendo ltingilimunga mindili naa nombo molopo kondoromolo," ningi.

<sup>11</sup> Iye awili king polomu kinye, iye nomi wayema kinye, mele koinjo mololi mele kite kinye, akuma imunana molangei enselema pali angilko makai tekolio iye awili king polona moromo iyemunga kumbekerendo tamalu peko Gote kapi ningolio

<sup>12</sup> ningei,

"Paimbo, aku teringili. Linoni tono kolopo

yu kapi nimbo,

yunge enge pa teli ulumu olandopa ltemo nimbo, yu uluma pali lipe manjirimo nimbo,

yu paa tereno nimbo, yunge imbimu paa olandopa molopili nimbo,

yu melema pali nokombalo engemu pepili nimbo,

yu paa enge olandopa peremo nimbolio,aku uluma pali Gote kinye kau kamukumu pepa kau pupili! Paimbo, aku tepe teplili!" ningi.

*Kano imbomanga mindili norangi uluma Goteni akumanga pora tindirimu*

<sup>13</sup> Aku wali iye nomi 24 kanomanga teni na walipe pilipeli nimbei, "I imbo wale pakoli kake teli tule pakoromelema naimeleya? Kombu tena molkolio oringiya?" nimu.

<sup>14</sup> Nani topondopo yundo nimboi, "Nanga awilimi, nuni liko manjirino," niu. Yuni nimbei, "I imboma enonga opa pulemani mindili tiko umbuni awini tiringi walimanga mindili paa pulumu norangi imboma. Eno enonga wale pakoli tulema Sipsip Walomunga mememuni kulumie toringina kake teremo.

<sup>15</sup> Akumunga,

"Eno iye nomi king polona moromo Gotenga kumbekerendo angilko, yunge ulke tempelena ipu leli tangoli kon-gono tenderingi.

Iye nomi king polona moromo iyemu eno kinye kopu tepe molopa eno nokom-balo.

<sup>16</sup> Walite kape eno altoko engele naa kolko no wali naa kolko, enani naa nomba,

tipe molo melteni enonga kangimu naa nopili molonge.  
 17 Sipsip Walomu iye nomi king polona tuku tingina moromomu yuni eno nanga sipsipima nimbe  
 eno tapu tembalomunga eno aku teko manda molko kondonge.  
 Eno no nangei nimbe koinjo molopa puli no pikopiko nimbe akuromomanga mepa pumbelo.  
 Goteni eno altoko kola naa teangei nimbe kolama kulu tondopa nimbe limbelo," nimu.

## 8

*Sipsip Walomuni bukuna wakaye kite yupoko pakera liko lteringimu wendo ltimu*

<sup>1</sup> Sipsip Walomuni bukuna wakaye kite yupoko pakera lipe lteringimu wendo ltimu wali ena mongo ekondo mele mulu kombuna melte paa ungu naa nimu.

<sup>2</sup> Aku wali altopo ensel kite yupoko pakera Gotenga kumbe kerena angimelemani biukel kite yupoko pakera ltingina kanoru.

<sup>3</sup> Ensel te lupe kou goloni teli okoko, mune toli paura kalko Gote tiringi okoko ambolorumu kanomu mepa ombo melema kalko Gote tiringi alta polona nondopa ombo angilerimu. Kano kinye paura kaloringi wali mune paa torumu paura keku awini kano enselemu tirimu. Gotenga ninga paura aku tepa mune toromoma kaloringi polo kou goloni teli,aku alta polomu iye nomi king polona lerimumunga aka paura kekumu kalopa Gotenga imbomani pali Gote popo toko konge teringi unguma Gote yu pilipili nimbe paura keku kanoma kalopa mune tombalolu yu tipili nimbe aka paura awini tirimu.

<sup>4</sup> Aku terimu wali paura keku kalorumungu iliomma kinye Gotenga imbomani Gote popo toko konge teringi unguma enselemu angilerimuna tiye kolopa Gote molorumuna purumu.

<sup>5</sup> Kano kinye ensel kanomuni paura keku kaloringi okokomu lipe, Gote melema popo toko kalko tiringi alta polona tipe norumu tipe mare lipe okolona mundupe peko tipelie maina topa mundurumu wali mulu topa kombu kariapa tepa mai parambala terimu.

## **Biukel Kite Yupoko Pakera Ensel Kite Yupoko Pakerani Ungu Tiringi Ungumu**

*Ensel kiteni biukel popo tiringi ungumu*

<sup>6</sup> Kano kinye ensel kite yupoko pakera biukel oti tiringi amboloringima ungu tingei teringi.

<sup>7</sup> Ensel teni kumbe lepa biukel popo torumu wali lo tipono mongo kinye tipe kinye

meme kinye tukuruku maina mainye purumu. Kano kinye mai kinye unjo kinye owe topa yupoko tepa, owe te mai kinye unjo kinye pali tipeni nomba, era koinjoma pali tipeni norumu.

<sup>8</sup> Ensel talo tipemuni biukel popo torumu wali mulu kembo paa awili none teli te tipe nomba perimu wali nomu kutana toko munduringi wali nomu kutamu yupoko tepa owe lerimu, akumunga owe te meme apuwe lepa,

<sup>9</sup> nomu kutana moloringi melema yupoko tepa owe torumu, owe te koloringi, nomu kutana sip lerimuma yupoko tipe owe torumu, owe te beambo nimu.

<sup>10</sup> Ensel yupoko tipemuni biukel ambolorumumu popo torumu wali kombu kandiye paa awili te, paa kiye mele nomba, muluna mainye ombo noma yupoko tepa owe torumu, owe tengyu ombo purumu noma kinye no akuromoma kinye akuna purumu.

<sup>11</sup> Kombu kandiyemu yunge imbimu Kombili Telimu. Akumu nona tuku pumbe noma kombili terimu, no kombili terimu akuma imbo awini noringima koloringi.

<sup>12</sup> Ensel biukel ambolko angileringi-manga kite tipemu yunge biukel ambolorumumu popo torumu wali ena kinye oli kinye kombu kandiyema kinye yu mele mele mo yupokonga mokemake leringi, mo te keri lepa tumbulu topa pa naa terimu, akumunga tangoli mo yupokonga mo te kombu pa naa tepa, ipu leli mo yupokonga mo te kombu pa naa terimu.

<sup>13</sup> Kanopo moloru wali kera iliaka te muluna ola mangopa andopalie enge nimbe are nimbelie nimbei, "Maina moromele imboma eno kinye paa umbuni awili pulure wendo ombalo, paa umbuni awili pulure wendo ombalo, paa umbuni awili pulure wendo ombalo. Ensel yupoko enonga biukel ungu naa tili we angimelema popo tonge wali umbuni paa awili pulure wendo ombalo," nimu.

## 9

*Ensel kite pakera tipemuni biukel popo torumu*

<sup>1</sup> Biukel ambolko angileringi enselemanga kite pakera tipemuni yunge biukelemu popo torumu wali kombu kandiye te muluna tiye kolopa maina mainye ombo lerimuna kanoru. Kano kombu kandiyemu maina mainye kowa muru te paa lepa kau pumbe naa pora nimomunga kerepulu kimu tiringi.

<sup>2</sup> Aku kowa murumunga kere pulumu ombo ki lipelie nangape torumu wali tipe nombalie ilio mambulu mepa wendo ombalie ena kinye mulu kinye pipi tipe tumbulu torumu.

<sup>3</sup> Kano iliona tuku kuli komboro paa awini wendo wendo ongo mai kombuna ongo moloringi. Pilimo kerena tomo pepili imbo noromo kinye mindili noromele mele aku tepa aku kuli komboromanga alina tomo pepili imboma tangei nimu.

<sup>4</sup> Kuli komboromando nimbei, "Unjo kape era kape maina moromo melemanga gomoma naa nangei! Gotenga imbimu imbo tengen mai mongona naa molombalo imboma kau nangei," nimu.

<sup>5</sup> Imboma toko kondangei nimbe engemu naa tirimu. Nonge wali oli kite pakera mindili nongo molangei nimbe enge tiringi. Kano wali pilimoni imbo toromo kinye mindili noromele mele kuli komboromani imbo toringi kinye imboma aku teko mindili awili teko nongo moloringi.

<sup>6</sup> Aku ulumu wendo ombalo wali mindili nonge imbomania paa kolamilia ninge nalo kololi ulu pulumu kowa pumbe naa klonge. Mindili nongo kau molonge.

<sup>7</sup> Kuli komboroma kanoru wali ami iyema opa teneindo kongi osena purumele kongi os none telima kanoru. Kuli komboromanga pinyewena kou goloni teli iye nomi kingima pakoromele wainye mele pakoko, enonga kumbe kerema imbo kumbe kere none terimu.

<sup>8</sup> Enonga pinyendima ambomanga pinyendi mele paa tule pumbe, enonga ungu angimoma laion enge nili ungu none terimu.

<sup>9</sup> Ami iyema opa teneindo wale pakoli kapani telima luwina pakoromele mele kano komboromanga olona aku tepa none tepe, opa teneindo kongi oseni karo kundupe lkipa ombo purumo wali ungu nimo mele aku tepa enonga kongoma ungu nimu.

<sup>10</sup> Kano kuli komboromanga alina kale nili mele angilipe imbomanga kangina tonge wali tomomu alina pepalie kangina tukundo pumbe kinye oli kite pakera mindili nongo molonge tomomu tirimu.

<sup>11</sup> Kuli komboroma nokorumu iye nomi kingimu kowa muru lepa pora naa nimo murumu nokromo ensel kerimu, kanomunga imbimu Hibru unguna Abadon ningi, Grik unguna Apolian nimeli. Aku ungu talonga pulumu Melema Pali Tepa Kenjiliumu.

<sup>12</sup> Kera iliakamuni umbuni yupoko wendo ombalo nimumunga umbuni te i pora nimo. We perimu talo pele wendo ombai terimu.

*Ensel kite talo pakera tipemu biukel popo torumu*

<sup>13</sup> Biukel ambolko angileringi ensele-manga kite talo pakera tipemuni yunge biukelemu popo torumu wali ungu te

wendo orumuna pileru. Paura keku mune tolima kalko Gote tiringi alta polo kou goloni teli Gotenga kumbe kerena lerimu akuna ola kongi kao geromano kite angilerimuna wendo orumuna pileru.

<sup>14</sup> Akumuni ensel biukel ambolorumu-mundo nimbei, "No awili Yufretis kombuna ensel kite ka tiko panjirringi akuma wendo liko munduwii!" nimu.

<sup>15</sup> Kano kinye Poinye imunga, oli imunga, wali imu kinye, ena mongo imunga imboma mo yupokonga te toko kondangei nimbe imbi topa ka tipe panjirimu ense-lema wendo lipe mundurumu.

<sup>16</sup> Ami iye kongi os umbuluna ola moloringimanga kambu toringi pileru mele i tepe: 200,000,000.

<sup>17</sup> Kongi osema kinye osemanga umbuluna moloringi iyema kinye kanoru mele i tepe: Luwina mera naa molopili ningi wale pakoli kapani telima pakoringi akuma mare kondolima pakoko, mare mukuma pakoko, mare kainye telima pakoringi. Kongi osemanga pinyewema laion enge nili pinyewema none tepe, tipe kinye ilio kinye kou salfa tipeni noli kinye akuma enonga keremanga wendo orumu.

<sup>18</sup> Imboma mo yupoko tokolio, kongi ose-manga tipe kinye ilio kinye kou salfa tipeni noli kinye aku mele yupoko imboma umbuni timbei wendo orumumani mo tenga imboma toko kondoringi.

<sup>19</sup> Kano kongi osemanga engema enonga kerena kinye alina talonga perimu. Enonga alima imbo nomba kondoli waimbe mele, akumanga pinyewemani imboma toko mindili tiringi.

<sup>20</sup> Umbuni wendo orumumani toko naa kondoringi we moloringi imboma aku umbunima wendo orumu wali kape kini teko kenjiringi uluma kanoko keri naa pilko konopu topele naa toringi. Kuroma popo toko, kou gol kinye kou silva kinye kou bras kinye kou kinye unjo kinye akumani melema kini teko wamoko teko anjiko, kano mele mongomani naa kanoko ungu manda naa ningo aulke manda naa andoringi akuma linonga gotema ningo popo toringi melema tiye naa koloringi.

<sup>21</sup> Imbo toko kondoko, tomo ambolko, meambu liko, wapu ulu kerinale teko, melema wapu nongo,aku ulu teko kenjiringima kape pali tiye kolko konopu topele naa toringi.

## 10

*Ensel teni Jon buk kelo te tirimuna norumu ungumu*

<sup>1</sup> Aku uluma pora nimu wali pele ensel enge nili te mulu kombuna mainye orumuna kanoru. Yu kupemu wale pakoli mele

pakopa, yunge pinyewena ola kolombe kaweyali lepa, yunge kumbe keremu ena mele pa tepe, yunge kimbo talo ulke timu tipe nomba peli none tepe angilerimu.

<sup>2</sup> Yu panga telu buk kelo te wendo lipe ambolopa angilerimu. Yunge imbo kimbondo nomu kutana kambulupe, koyando maina kambulupo,

<sup>3</sup> laiononi enge nimbe are nimo mele aku tepe yuni enge nimbe ru nimu. Enge nimbe ru nimu wali mulu kite yupoko pakera torumani enongano ungu mare ningi.

<sup>4</sup> Aku wali mulu kite yupoko pakera toko ungu ningi mele pilipolio bukuna tomboi teru wali mulu kombuna ungu te wendo orumuna pilero. Akumuni nimbei, "Mulu kite yupoko pakerani ungu nimelema nunge konopuna kau panjiwi! Bukuna imbi naa towi!" nimu.

<sup>5</sup> Kano wali ensel kimbo te nomu kutana kambulupe te maina kambulupe angilerimu oi kanoru kanomuni yunge imbo kimu mulu kombuna ola mundurumu.

<sup>6</sup> Waliwalima molopa kau puli Goteni muluma tepe akuna mele itemoma tepe, maimu tepe maina melema tepe, nomu kutamu tepe akuna moromo melema terimu aku iyemunga imbi lepa mi lepalie nimbei, "Alaye kolte nokopa naa molombalo. Goteni tembo nimu uluma kamukumu tembalo waimu wendo oromo," nimu.

<sup>7</sup> Biukel kite yupoko pakera amboloko angimele enselemanga kite yupoko pakera tipemuni yunge biukelemu popo tombalo kano walimanga Goteni o niimbe para naa tipe lopeke tepe tepe panjirimu mele kamukumu wendo ombalo. Oi yunge kendamande iyema yunge nimbe mundurumu unguma imboma ningi tiringi iye profete-mando nimu mele, aku tepe kamukumu wendo ombalo nimu.

<sup>8</sup> Aku wali ungu oi mulu kombuna wendo orumu pilerimuni altopa wali talo tipe nimuna pilero kinye nimbei, "Nu pungo, ensel nomu kutana kinye maina kinye kambulupe angilipe buk tapuwe tipe wendo lipe kina amboromomu pungo lipuwi!" nimu.

<sup>9</sup> Aku nimu ungu pilipolio enseleme angilerimuna pumbo, "Buku panga telu kelomu tiwi!" niu. Yuni nando nimbei, "Liko nowi! Nonio wali paimbo kerena pilimo mulu mele tingo tembalo nalo nongo merekondo mundunio wali olona kombili tembalo," nimu.

<sup>10</sup> Nani kano buk kelomu enselemunga kina lipolio noru. Noru wali pilimo mulu mele tingo terimu nalo nombo merekondo mundur wali na olona kombili terimu.

<sup>11</sup> Aku wali ungu teni nando nimbei, "Nu oi Gotenga nimbe munduli unguma pilko imboma ningi tirinu mele nuni kinye kangi lupe lupe angileli imboma kinye, kombu

lupe lupe moromele imboma kinye, ungu lupe lupe nimele imboma kinye iye nomi kingima kinye, eno pali uluma wendo ombalo mele kelko ningi tiwi!" nimu.

## 11

*Iye taloni Gotenga nimbe mundurumu ungu ningi tiringili ungumu*

<sup>1</sup> Manda leli mesa mele unjo pepena te na tipelie nimbei, "Gote moromona melema kalko yu popo toko tirimele ulke tempelemu kinye akuna melema popo toko karomele alta polomu kinye pungo manda leko, akuna Gote popo toko kapi ningi imbi liko ola mundunduko moromele imboma kambu topawi!

<sup>2</sup> Nalo Gotenga ulke tempelemu okoko pape teringina tukundo kombumu Juda imboma naa moromelema tirimulu kani akumu manda naa lewi! Kano imboma Gotenga ulke kombu awil kake telimunga kambulko andoko molangei oli 42 ombo pumbelo.

<sup>3</sup> Nani nanga unguma andoko ningi para tindingele iye talo elo enge pepili nimbo enge timbo kinye wali 1260 andoko nanga nimbo munduro unguma imboma ningi tilko andongele. Imboma kola ulke molangei mele pingi kerima pakoromele mele elo aku teko wale pakoli pingi kerima pakoko imboma nanga unguma ningi tilko andongele," nimu.

<sup>4</sup> Unjo oliv talo kinye tipe lam talo kinye mai kombumu nokoromo Iye Nomi Awilimunga kumbekerena angimbele aku iye talo aku teko angilingele.

<sup>5</sup> Imbo teni kano iye talo ulu te tepe kenjembe temo lemo elonga kerena tipe wendo ombo elonga opa pulema nomba kondombalo. Imbo teni elo ulu te tepe kenjembo nimbelo imbomu yu paimbo aku tepe kolombalo.

<sup>6</sup> Elo Gotenga ungu wendo ombalo mele para tiko ningi tilko andongele kinye lo naa opili ningi pipi tingele engemu elo kinye pembalo. Noma meme apuwe lepili ningele engemu elo kinye pembalo. We ulu umbunima pali maina imboma kinye wendo opili ningele engemu pembalo. Aku teko imboma mindili timbolo konopu lengale wali mindili manda tingele.

<sup>7</sup> Gotenga unguma andoko ningi tiko pora tingele wali mele takera enge nili te kowa te paa lepa kau pumbe naa pora nimomunga wendo oromomu wendo ombo elo molongelena tambo nimbe ombo elo topa kondombalo.

<sup>8</sup> Elonga ono talo ulke kombu awili aulke tengi akuna we lembalo. Oi elonga Awilimu unjo polopeyana toko kondoringi kolorumu kombu paa awili

aku kombumunga imbi leko ungu manda lekolio Sodom ningi Isip nomele.

<sup>9</sup> Imbo talape lupe lupema, ungu lupe lupe ningi, kangi lupe lupe angilipe, kombu lupe lupe molonge imbomani elonga ono talo nemeneme ningi kanopundala tengenalo mareni ono teamili naa ninge. Aku teko molangei, wali yupoko omaba pumbe kite tipemunga ekondo wendo ombalo.

<sup>10</sup> Maina molonge imbomani elonga ono talo kanokolio konopu tiko, langi koiko nongo, enonga pulu ltemo imboma melema we tiko mundunge. Kano iye taloni maina molonge imboma oi mindili liko tiringlimunga aku ulu tengen.

<sup>11</sup> Nalo wali yupoko omaba pumbe kite tipemunga ekondo wendo orumu kinye Goteni koinjo mololi popomu lipo mundurumu kinye iye talonga kangina tukundo purumu kinye elo koinjo molko ola angilerengilina imbomani kanokolio paa pungu pungu ningi mini lteringi.

<sup>12</sup> Kano wali eloni mulu kombuna ungu te enge nimbelie nimumu pileringili. Kanomuni elondo nimbei, "Ina olando walio!" nimu. Kano wali elonga opa pulema kanoko angilengi elo kupe tengenulu kombuna olando puringili.

<sup>13</sup> Olando pungili puringili kinye walitikale mai parambala enge nimbe terimu wali ulke kombu awilimu owe 10 topa, owe tengen ulke melema pali topa kaloramu. Mai parambala terimumuni imbo 7,000 topa kondoramu. Imbo naa kolko we moloringimani paa mini lteko pungu pungu ningi mulu kombuna moromo Gote kapi ningi yunge imbi liko ola munduringi.

<sup>14</sup> Ulu umbuni talo tipemu pora nimo. Yupoko tipemu nondopa wendo ombai tememo.

*Ensel kite yupoko pakera tipemuni biukel popo torumu ungumu*

<sup>15</sup> Kano wali pele ensel kite yupoko pakera tipemuni yunge biukel popo torumu kinye mulu kombuna kere awininga ungu te enge nimbe wendo ombalungu nimbei, "Mai kombunu nanga nimbe" oi nokopa iye nomi king awilimu molorumumunga pali kolo wangopa linonga Awilimu kinye yunge iye Kraist taloni kinye iltonga ningi elo kamukumu king talo molongele.

Awili, yu iye nomi king kombuma pali nokopa molopa kau pumbelo," ningi.

<sup>16</sup> Kano kinye iye awili 24 Gotenga kumbekerena enonga iye nomi king polomanga moloringi akuma mainyepungo tamalu peko Gote kapi ningi imbi liko ola mundukolio

<sup>17</sup> ningei,

"Gote awili, Engema Pali Nu Kinye Peremo Iyemu, oi molorunu, kinye kape molko kau puruno, nuni nunge enge nili olandopamu likolio nu nunu iye nomi kingimu kamukumu pulu polko molko melema nokoko morono akumunga

nu kinye paa tereno nimolo.

<sup>18</sup> Kombumanga pali we imbomani nu kinye paa mumindili koloringi nalo kinye nu imboma kinye mumindili kolko kot tendeko kamukumu tonio waimu kamukumu wendo omo.

Imbo kololima apuruko, nunge kendemande imbo

oi nunge ningi mundurunu unguma imboma ningi tiringi imbo profetema

kinye nunge imboma kinye Nu linonga iye Awilimu ningi

nunge ungumu taka liko pilko tengen tiko nunge imbi liko ola munduringi imboma kinye,

imbo awilima kape imbo imbi naa mololima kape

eno pali mele kaloli pengama tiko,

mai kombumu teko kenjirungi imboma teko kenjinio waimu kinye kamukumu wendo omo," ningi.

<sup>19</sup> Gote popo toko kaloli ulke tempel mulu kombuna tukundo angilerimu akumu nambu topa lerimu, akuna tukundo Goteni mi lepa nimbe panjirimu ungumu tuku perimu ketemu Israel imbomani oi meringi mele mona lerimuna kanoru. Kano kinye kariapa tepa, mulu topa, mai parambala tepa, lo tipono mongo pulumu torumu.

## Satan Kinye Yunge Imboma Kinye Beambo Ningi

### 12

*Jononi ambomu kinye waimbe awili kinye kanorumu*

<sup>1</sup> Kano wali mulu kombuna tuku ulu paa awili enge nili te wendo ombaimunga ulu imu wendo orumu. Akumu i tepe: Ambo te molopa, enamu maminye mele pakopa, olimu yunge kimbo maindo angilipe, pinyewena ambo nomi kwininga wainyete kombu kandiye 12 angilelimu pakorumu.

<sup>2</sup> Yu bakulu keri tepe molopalie bakulu membaindo mindili paa pulumu nomba perepa are nimbe molorumu.

<sup>3</sup> Kano wali mulu kombuna tukundo ulu paa awili enge nili te wendo ombaimunga itepa wendo orumu: Waimbe paa awili kondoli te molopa, yunge pinyewe kite yupoko pakera angilipe, kongi kao geromano mele 10 wendo omaba, yunge pinyewemanga iye nomi

kingimunga wainye kite yupoko pakera pakopa molorumu.

<sup>4</sup> Kombu kandiyema owe yupoko topa, kano waimbemu yunge alimuni kombu kandiye owe te muluna ola topa maina mainye mundurumu. Bakulu membai terimu ambomunga kumbe kerena angilipe kano bakulumu ambomuni kanopa limbelo wali topa nombaindo nokopa angilerimu.

<sup>5</sup> Ambomuni ungulu te kanopa ltimu. Kano ungulumu mai kombu imbo talapema pali paa enge nimbe nokopa molombalo. Merimu wali eno popenge teko liko kangulko Gote kombu pali nokopa molorumu polona meko puringi.

<sup>6</sup> Ambomu kombu imbo naa pelimunga tukundo lkipe kowa pumbe, kombu te Goteni oi tepe wamoko tenderimu kombu akuna purumu. Akuna Goteni yu wali 1,260 molopili nokondangei nimu.

<sup>7</sup> Kano wali mulu kombuna tukundo opa awili te wendo orumu. Mulu kombuna ensel awili Maikel kinye yunge mulu kombuna enselema kinye waimbe awili molorumuna opa oringi. Waimbemu kinye yunge enselema kinye kanokolio opa teringi nalo

<sup>8</sup> Maikelenga talapemuni eno toko munduringi akumunga pele Waimbemu kinye yunge enselema kinye mulu kombuna tuku manda naa moloringi.

<sup>9</sup> Waimbe enge nilimu yu koro oi molorumu, yu imboma Gotenga kumbe kerena kot tenderemomunga ningy yunge imbi Satan niemele iyemu, yu maina imboma pali kondi topa loi leko aulke tengi lupe pangeli nimo iyemu. Kanomu toko maina mainye munduringi, yu kinye yu lombili andoringi enselema kinye waye toko maina mainye munduringi.

<sup>10</sup> Kano wali mulu kombuna tukundo ungu enge nili te wendo orumuna pilera. Aku ungumu alako topalie nimbei, "Linonga angenupilima waliwalima ipu leli tangoli kape Gotenga kumbe kerena kot tenderemo iyemu

kinye maina mainye toko mundungemunga  
Gote yunge imbi enge peremomuni  
Sataneni lino naa ambolopa tepe kenjipe  
mindili nomolo kombuna naa mepa  
pupili nimbe,

lino lipe tapondopa, yu paa paimbo iye  
nomi kingimu molopa yu melema  
pali nokopa molopa,  
yu maina mundumbo nimbe panjirimu iye

Kraistinga,  
mele nokombalo imbi peremomuni  
Kraist yuni melema pali nokopa kondom-  
balo waimu  
kinye kamukumu wendo omo.

<sup>11</sup> Kongi Sipsip Walomuni meme ondoru-  
mumu kinye

Gotenga ungumu ningy para tilko an-  
doringimu kinye  
aku ulu taloni linonga angenupilima enge  
ningy opa pulemu toko munduringi.  
Eno maina molopo kondamili konopu naa  
leko,  
opa pulemani toko kondonge lemo manda  
ningy liko manjiringimunga  
aku tepe engemu perimu wali ulu  
teringi.

<sup>12</sup> Akumunga nu mulu kombumu kinye  
akuna moromele imboma kinye tono  
kolangei!

Nalo nu mainu kinye nu nomu kutamu  
kinye  
kuromanga nomi Satan akuna mainye pu-  
rumumunga eno kinye umbuni awili  
te wendo omo.

Goteni yu kamukumu topa mundumbelo  
waimu  
nondopa wendo ombalo nimbe pilipe yu  
paa mumindili kolopa moromo,"  
nimu.

<sup>13</sup> Waimbemu yu toko maina mainye  
munduringi kinye kanopalie pele ungulu  
merimu ambomu lipe kika tirimu.

<sup>14</sup> Nalo ambomu waimbemuni naa topili  
nimbe kombu tulendo imbo naa pelina yu  
poinye yupoko oli kite talo pakera molop-  
ili nokonge kombu te Goteni tepe wamopa  
terimumu yu akuna mangopa kowa pupili  
nimbe ambo kanomu kera iliaka kongo aw-  
ili talo tirimu.

<sup>15</sup> Yu kowa purumuna kanopalie  
waimbemuni ambomu noni lipe mepa  
pupili nimbe yunge kerena no meku  
torumu wali ambomu purumu mele  
lombilipe no awili topa purumu.

<sup>16</sup> Nalo maimuni ambomu lipe tapondopa  
mai awili tepe ungu torumuna waimbe-  
muni meku torumu nomu pali akuna omba  
mainye purumu.

<sup>17-18</sup> Kano kinye waimbemuni aku ter-  
imu ulu kanopalie ambomu kinye paa  
mumindili kolopalie ambomunga bakulu  
wema kinye opa tembai purumu. Ambo-  
munga bakulu kanoma Goteni teao nimo  
ungu manema pilko liko tengi tiko teko,  
Jisasinga unguma ningy tiko moromele im-  
boma.

### Jononi Mele Takera Talo Kanorumu Ungumu

## 13

*Mele takera te nomu kutana wendo  
orumu ungumu*

<sup>1</sup> Waimbemu nomu kuta kulendona  
angilerimuna kanoru kinye mele takera te  
nomu kutana wendo orumu. Yu kongi kao

geromanomele 10 angilipe, pinyewe kite yupoko pakera angilerimu. Yunge geromanomanga iye nomi kingimanga wainye 10 pakorumu. Yunge pinyewemanga yumele mele imbi molorumu, kano imbi kite yupoko pakera Gote marake tepa ungu takatondororumunguma molorumu.

<sup>2</sup> Mele takera kanoru kanomu awili lepat mele, nalo yunge kimbomu bea kimbo melemu, yunge keremu laion kere melemu. Waimbemuni yu yunu iye nomi king molopa melema nokorumu polomu kinye, yunge engemu kinye, melema paa enge nimbe nokombalo imbimu kinye, tirimu.

<sup>3</sup> Mele takeramunga pinyewe te yu kolopili ningotoringi mako te perimu. Paimbo kolka nalo yu toringi lupermu uru lerimu kinye koinjo purumu. Aku tepa koinjo purumu ulu kanoko mini itekolio imboma pali yu lombili puringi.

<sup>4</sup> Waimbemuni aku mele takeramu yu melema nokorumu engema tirimu wali imbomani Waimbemu linonga gote ningyo yu kapi ningo imbi liko ola munduringi. Mele takeramu kape aku teko yunge imbi liko ola munduko kapi ningolio ningei, "Mele takeramu mele nari moromoya?" Yu kinye narini manda ombo opa tembaloya?" ningi.

<sup>5</sup> Goteni oli 42 akuna mele takeramu we  
aku tepa yu yunu iye nomi kelkele topa  
na ungu tako tondopa melema enge nimbe  
nokopa molopili nimbe tiye kolorumu.

<sup>6</sup> Yu pulu polopa Gote marake tepa yunge imbimu kinye yu molorumu kombumu kinye mulu kombuna moloringi imboma kinye ungu tako tondorumu.

<sup>7</sup> Sataneni mele takeramu Gotenga im-boma kinye opa tepa enge nipili nimbe en-gemu tipe, yu iye nomi kingimu molopa mai kombuna pali imbo talape lupe lu-pe-ma kinye, ungu lupe lupe nimele im-boma kinye, kangi lupe lupe angileli im-boma kinye nokombalo imbimtu tirimu wali Goteni molo naa nimbe, aku tepili nimbe tiye kolorumu.

<sup>8</sup> Maina imboma oi Goteni mulu mai talo naa tepili Sipsip Walo tokon kondoringimungu waliwalima molopa kau puli bukuna imbi naa mololi imboman i pali mele takeramu lino nokoromo gote ningokapi ningokapi liko ola mundundunge.

<sup>9</sup> Imbo te komu angilimbelomuni i ungumu wamongo pilengei.

<sup>10</sup> Goteni imbo te ka ulke pepili nimo lemo  
aku imbomu ka ulkena pembalo.

Goteni imbo te opa teli loi geleani toko  
kondangei nimo lemo aku teko loi  
geleani toko kondonge.

Neva aku uluma wendo ombalo wali

Neyu aku uranu wendo omibalo wali  
Gotenga imbomani yu ipuki tiko enge ning  
angilengei.

*Mele takera te maina wendo orumu  
ungumu*

<sup>11</sup> Pele kanoru kinye mele takera te lupe  
maina wendo orumu. Geromano talo  
kongi sipsip walo tengen geromano angimo  
mele angilerimulo nalo yunge ungu nimumu  
Waimbe teni nimo mele aku tepa nimu.

<sup>12</sup> Akilio lepa orumu mele takeramuni  
oi kumbe lepa orumu mele takeramunga  
iye nomi king molopa melema nokombalo  
imbimbu akilio lepa orumumuni lipe  
ambolopa kumbe lepa orumumu lipe  
tapondopa yuni melema pali nokondopa  
kumbe lepa orumu mele takera, akumunga  
pinyewe tengahyu kolopili ningotoringi  
makomu uru lerimu kala koinjo purumu  
kanomu mai kombuna moromele imbo-  
manipali yu Awilimusingo yunge imbi  
liko ola munduko kapi nengei nimbe aku  
kongonoma tenderimu.

<sup>13</sup> Mele takera talo tipemuni ulu enge nilima maina imbonani manda naa teremele uluma terimu. Te i tepea: Imboma kanoko molangei mulu kombuna tipe te maina mainye opili nimuna tipe mainye orumu.

<sup>15</sup> Mele takera kumbe lerimu mele teko wamoko teko anjiringimu imbo mele ungu nipili nimbe akilio lepa orumu mele takeramuni koinjo mololi mulumu popo topa tuku mundurumu wali Goteni manda ungu nipili nimu wali mele teko wamoko teringimuni ungu nimu. Imbo marenip mele teko wamoko teko anjiringimu kapi nimbo imbi lipo ola naa mundemili ningi wali eno toko kondangei nimu kinye Goteni kanopalie, ulu te naa tepa tiye kolorumu.

16 Imboma pali, kamako lelima kinye koropa nolima kape, imbi mololima kinye imbi naa mololima kape, imbo marenga kendemande tendeko mele kaloli naa lili imboma kinye imbo we molko enonga konopuni pilko teringi imboma kape, enonga pali mai mongona molo imbo kindo makoto te kuti mele molopili tondangei nimu wali tondoringi.

17 Imbo tengai mai mongona molo imbo kindo makomu naa molorumu imbomu yu bisnis tepa kou mone limbei aulke te naa lepa, langi kape melema topo topa limbei aulke te naa lerimu. Mako akumu kumbe lepa orumu mele takeramunga imbi mu molo yunge imbibungga kambu toli

nambamu.

<sup>18</sup> Wamba konopu kimbo tipe pilimbelo imbomuni imunga ungu pulumu pilimbelonje? Imbo imbamanga nambama wamba tepe kambu toromomani kano mele takera munga nambamu wamba tepe kambu topa pilipili! Yunge nambamu iye tengam nambamu. Aku nambamu 666.

## 14

*Kongi Sipsip Walomunga imbomani kuanan koinjo te ningi ungumu*

<sup>1</sup> Altopo kanoru kinye Kongi Sipsip Walomu mulu Saion ola angilipe, mai mongona yunge imbimu kinye yunge Lapanga imbimu kinye mai mongona Goteni torumuna molorumu imbo 144,000 yu kinye peya angileringi.

<sup>2</sup> Mulu kombuna ungu te wendo orumuna pileru akumu no topa uwa enge nimo mele, molo mulu topa enge nimo mele, molo gitama toromele ungu nimo mele, aku tepe ungu te wendo orumuna pileru.

<sup>3</sup> Iye nomi king polona moromo iyemunga kumbekerendo mele koinjo mololi kite kinye iye nomi 24 kinye, eno moloringimanga kumbe kerena enoni kunana koinjo te ningi. Imbo 144,000 oi maina moloringi kinye Goteni Lipo tapondambo nimbe Malonga mememuni mindili nonge aulkena wendo ltimu akumani kau i kumanamu manda pilko ningi. We imbo teni aku kunana ningimu manda naa pilko imbi tiringi.

<sup>4</sup> Imbo 144,000 akuma Goteni lino kanopalie Kake tepili moromele nipili ningo amboma kinye ulu keri nale naa tiringi. Kanoma Sipsip Walomu purumo kombumanga pali lombili purumele. Goteni yunge nimbe mai kombuna moromele imbomanga imunana imbo kanoma Malonga mememuni mindili nonge aulkena kiyendo wendo lipe Sipsip Walomu kinye iltonga nimu.

<sup>5</sup> Eno kolo paa naa toringi. Goteni karomo wali eno kinye ulu pulu keri te naa peremo.

*Enselyupokoni ungu ningi ungumu*

<sup>6</sup> Ensel te mulu awi tuku tingina mangopa andorumuna kanoru. Imbo talape awilima kinye imbo talape keloma kinye, ungu lupe lupe nimelema kinye, imbo lupe lupema maina moromele imbo akuma pali kano enselemuni ungu tukume waliwalima pepa kau pumbelo ungu nimbe timbei mangopa andopalie,

<sup>7</sup> ru nimbeline nimbei, "Goteni imboma kot tendepa apurupe pilimbelo walimu kamukumu wendo omo kani yu pipili kolko yunge imbi liko ola mundeo! Mulumu kinye maimu kinye nomu kuta kinye no pikopiko nimbe wendo oromoma kinye pali terimu iyemu popo toko kapi neio!" nimu.

<sup>8</sup> Kano enselemu purumu kinye ensel te ombalie nimbei, "Ulke kombu awili imbi paa ola moromo Babilon kamukumu keri Itemo. Paimbo kamukumu keri Itemo. Kano kombuna moloringi imbomani we kumbumanga pali imbo talapema Wapu ulu kerinale tengen peremo, no wain paa enge nilimu nangei nimbeline tirimu," nimu.

<sup>9</sup> Ensel talo tipemu purumu wali ensel te altopta ombalie enge nimbeline nimbei, "Mele takera kumbe lepa oromumu kinye aku mele takeramu yu mele manda leko teko wamoko teko anjiringi melemele kinye elonga imbi liko ola munduko kapi ningi, yunge imbimu enonga mai mongo molo kina molombalo imboma

<sup>10</sup> eno kape Goteni eno kinye mumindili paa kolombalo ulu pulumu peremo no wainimu nangei nimbelo. Enoni aku teko, teko kenjingemunga yuni mumindili kolopa tembai peremo no wainimu no tamba nili te kinye wakamaka yunge mindili kolombalo mingina naa mundupe, no wainimu paa enge nipili kano imboma timbelo. Ensel kake telima kinye Sipsip Walomu kinye kanoko molangei kano imboma kou salfa tipe nombalomuni eno nombalo kinye paa mindili nongo molonge.

<sup>11</sup> Eno mindili timbelo tipemunga iliomu pora naa nimbe waliwalima ilio tepa kau pembalo. Mele takeramu kinye yu none teli manda leko teko wamoko teringi melemele kinye popo toko imbi liko ola mundunge, molo yunge imbimu mai mongona molo kina molombalo imboma mulu naa liko ipu leli tangoli mindili nongo kau molonge," nimu.

<sup>12</sup> Aku ulumu wendo ombalo wali Gotenga imbo yuni teao nimbe mane tirimu ungumu pilko liko tengen tiko, Jisas ipuki tirimele imboma konopu enge tipili molangei!

<sup>13</sup> Aku wali na ungu te mulu kombuna wendo orumuna pileru kinye nimbei, "Pipia toko i teko nini: Awilimunga imboma, kinye kape altoko kape kolongema eno malowa, ningo pipia towi!" nimu. Mini Kake Telimuni kape nimbei, "Paimbo, eno malo. Eno ulu pulu penga teremele waye meko punge Awilimuni pilipe molombalomunga mindili nongo teremele kongonoma tiye kolko paimbo mulu lingi," nimu.

*Maina langi nowi lerimuma toko ltingi ungumu*

<sup>14</sup> Altopo kanoru wali kupe kake te torumu. Akuna iye te molorumu, akumu imbo iyemunga malo none telimu molorumu. Yu iye nomi kingimunga wainye kou goloni teli te pakopa, langi nowi lelima toko

ltimele loi pulte nenge nenge te amboloru.

<sup>15</sup> Kano wali ensel te Gote popo toringi ulke tempel mulu kombuna angilerimu akuna wendo ombo kupe polona ola molorumumundo ru nimbelie nimbei, "Kinye mai kombuna langima kamukumu nowi lemona toko tukundo linge waimu wendo oromo kani nunge langi toko loi pultemu liko langima toko liwil!" nimu.

<sup>16</sup> Aku tepa nimu ungu pilipelie kupe polona ola molorumu iyemu mainye pumbe maina langima topa ltimu.

<sup>17</sup> Kano wali ensel te lupe Gote popo toringi ulke tempel mulu kombuna angilerimu akuna wendo orumu. Yu kape langi nowi lelima topa lili loi gelea nenge nenge te ambolorumu.

<sup>18</sup> Kano wali ensel te lupe, yu tipe nokorumi enselemu, yu melema kalko Gote tiringi alta polomu tiye kolopa ombo, ensel loi geleamu ambolorumumundo enge nimbe ru nimbelie nimbeindo, "Nunge loi gelea nenge nenge nolimbu likolio unjo wain toromo mongoma ondomo kani inie tokolio nombeya tewil!" nimu.

<sup>19</sup> Nimu ungumu pilipelie loi gelea ambolorumu enselemu mainye pumbe maina wain mongo ondorumuma inie topalie, wain no teko wamoko tengendo kimboni kambulko takelemakele teremelke kombuna mepa pumbe tuku mundurumu. Akuna Goteni paa mumindili kolorumu ulumu manda lerimu.

<sup>20</sup> Ulke kombu awilina tawendo wain mongoma kombuna kimboni kambulko takelemakele teringi wali kombuna mene wendo ombo 300 kilomita mele ombo pumbe, olando olando ombo kongi os te ola angimo tengah kumbena mele orumu.

## 15

*Imboma kinye kamukumu umbuni pembalo mele ensel kite yupoko pakera mele kite yupoko pakera amboloringi ungumu*

<sup>1</sup> Kano wali mulu kombuna tuku ulu paa awili enge nili te kanopolio konopu awini lipo munduru. Akumu i tepe: Imboma kinye kamukumu umbuni pembalo mele ensel kite yupoko pakera mele kite yupoko pakera ambolko angilerangi. Akumunga pulumu i tepe: Kano umbunima pora nimbelo wali Goteni imboma kinye mumindili kolombalo uluma kamukumu pora nimbelo.

<sup>2</sup> Kanoru wali nomu kuta mololi glas none tepe te kinye tipe kinye wakamaka perimu. Aku nomumunga kulendona imbo mare angilerangi. Kano imboma mele takeramu kinye, yu mele manda leko teko wamoko

teko anjiringi melemu kinye, mele takera-munga imbi manda lepa perimu nambamu kinye, toko mainye munduko enge ningi im-boma. Eno Gotenga gita melema ambolko nomu none telimunga kulendona angilklio,

<sup>3</sup> Gotenga kongono tendeli iye Mosesini kunana nimumu kinye Sipsip Walomunga kunanamu kinye ningolio ningei,

"Gote Awili Olandopamu nuni ulu terenoma pali  
paa olandopa, akuma kanopolio konopu awini lipo mundurumolo.

Imbomanga Pali Iye Nomi King Waliwalima Molopa

Kau Puli Iyemu, nuni ulu paimbo toya toko terenoma mona Itemonia karomolo.

<sup>4</sup> Awilimbu, nu kau paa kake tepili morono akumunga  
imbo narini nu pipili naa kolopa, nunge imbi lipa ola naa mundumbeloya?  
Nuni ulu toya toko terenoma pali mona wendo oromona karomele  
mai kombumanga pali imboma akumunga nu moronona ongo nu popo toko kapi ningi," ningi.

<sup>5</sup> Pele kelepo kanoru wali Gote popo toringi sel ulke tempelena tukundo kiripina paa kake telimu nambu topa lerimu. Aku kiripina tukundo Goteni mi lepa nimbe panjirimu unguma perimu, nambu topa lerimu.

<sup>6</sup> Akuna imboma umbuni tinge mele kite yupoko pakera ensel kite yupoko pakera ambolko meli wendo oringi. Akuma wale pakoli paa kake tepe pa telima pakoko, kako kou goloni telima luwina makai tendeko toringi.

<sup>7</sup> Wendo oringi wali mele koinjo mololi kite akumanga teni mingi kou goloni teli kite yupoko pakera, waliwalima molopa kau puli Gote yunge mumindili kololi uluma peko lepa molorumumu ensel kite yupoko pakera tirimu.

<sup>8</sup> Sel ulke tempel kake telina Gotenga imbi ola molopa pa enge telimu kinye yunge engemu kinye aku talonga ilio tepe ulke kake telimu ti nimu, akuna imbo te manda tukundo naa pumbelo. Ensel kite yupoko pakera imboma umbuni tinge mele kite yupoko pakera amboloringima oi kamukumu umbunima imboma tiko pora tiengi wali imboma oi nokoko pele kau imboma sel ulke tempelena tukudo manda punge.

## 16

*Gotenga mumindili kololi uluma mingi kite yupoko pakera tukundo perimuma ondoringi*

<sup>1</sup> Kano wali pele nani ungu te Gote popo toringi ulke tempelemunga wendo orumuna pileru. Akumuni ensel kite yupoko pakera enge nimbelie nimbei, "Eno pungo Gotenga mumindili kololimu peremo mingu kite yupoko pakera akuma meko pungo maina ondoko maina mainye mundoie!" nimu.

<sup>2</sup> Kano wali ensel teni yunge mingu ambolorumumu mepa pumbe maina ondorumu wali mele takeramunga imbimu enonga kangina molopa, takeramu none teli te tekowamoko teko anjiringi melemu popo toko kapi ningi imbomanga kangina paa mindili tirimu lupe keri awini moloru.

<sup>3</sup> Ensel talo tipemu yunge mingu ambolorumumu nomu kutana mepa pumbe ondorumu wali nomu kutamu imbo kololi tenga mememu mele apuwe lerimu wali nona moloringi melema pali koloringi.

<sup>4</sup> Ensel yupoko tipemu yunge mingu ambolorumumu mepa pumbe no ombo purumanga kinye no pikopiko wendo orumanga ondopa mundurumu wali no wayema meme apuwe lerimu.

<sup>5</sup> Kano wali noma nokorumu enselemuni ungu te nimumu pileru. Yuni nimbei, "Nu kinye morono, oi molorunu, iye paa kake telimu,

nuni imbo teko kenjiringimanga kot pilko moke teko kondokolio  
aku teko eno mindili tiniomu paa tenio.

<sup>6</sup> Ambe telka, aku imbomani nunge imboma kinye nunge ningi munduruno unguma imboma ningi tiringi imbo profetema kinye toko kondoringi wali meme ombo purumanga kinye enoni pundu toko meme nangei ningi tirino  
akumu enonga teko kenjiringimunga pundu tonio," nimu.

<sup>7</sup> Kano wali Gote popo tongeindo melema kaloringi alta polona ungu te wendo ombalie nimbei, "Gote Awili Olandopamu, nuni paimbo nino.

Nuni kot pilkolio imboma teremele mele tumbi tiko pilko moke teko kondorono ltemo," nimu.

<sup>8</sup> Ensel kite tipemuni yunge mingu ambolorumumu mepa pumbe enana ondorumu wali Goteni enana tipe enge nilimuni imboma noplili nimu.

<sup>9</sup> Kano wali enana tipe wendo ombo paa kondoromumuni imboma paa mindili nangei nimbe eno norumu wali enoni Gotenga imbimu ungu taka tondoko marake teringi. Aku ulu umbuni tirimu wendo orumuma Gotenga engemuni i uluma wendo opili nimu nalo enoni

konopu topele naa toko Gotenga imbimu ambolko ola naa munduringi.

<sup>10</sup> Ensel kite pakera tipemuni mingu ambolorumumu mepa pumbe mele takeramunga iye nomi king molopa nokorumu polona ondorumu wali yuni nokorumu kombuma pali tumbulu torumu. Imboma paa mindili nongo enonga nomimu kapu lerimuna kere kongilkko,

<sup>11</sup> eno mindili nongo lupe tepe terimu akumanga liko manjikolio mulu kombuna moromo Gotenga imbimu ungu taka tondoko marake teringi. Enonga ulu pulu keri teringima tiye naa kolko konopu topele naa tomolo nangi.

<sup>12</sup> Ensel kite talo pakera tipemuni mingu ambolorumumu mepa pumbe no awili Yufretis ombo purumuna ondorumu kinye nomu kumbulupe ena mundi oromona moloringi iye nomi king moloringima onge aulkemu akirindirimu.

<sup>13</sup> Aku kanoru wali waimbe keri kinye mele takeramu kinye Gote naa pilipe unguma we kolo topa nimu iye profetemu kinye enonga keremanga mini paa keri londea none teli yupoko wendo orumu.

<sup>14</sup> Aku mini kerimani ulu enge nilima teremele, enonga kongonomu i teta: Gote Olandopamunga wai awilimunga mai kombumanga pali iye nomi kingima tukundo tukundo ongo opa teangei wangei ningi pungo liko maku toromele.

<sup>15</sup> "Pileio! Wapu noli iye te ombalo ningi naa pilko walulu tiko moromele kinye mini ltendape oromo mele na eno molongena aku tepo ombo. Imbo teni yu ombalo kinye imbonani na maminye naa panjipo we molombona naa kanangei nimbe mai naa kolombo nimbe uru naa pepa makiliipe kanopa, yunge wali pakolima pakopa molombalo imbonu yu malo," nimu.

<sup>16</sup> Kano wali mini kerimani iye nomi kingima kombu tengi liko maku toringi, aku kombumunga imbimu Hibru unguna Armagedon nimele.

<sup>17</sup> Ensel kite yupoko pakera tipemuni mingu ambolorumumu muluna ondorumu wali Gotenga ulke tempel kake telina iye nomi kingimunga polomunga ungu enge nili te wendo ombalie nimbei, "Kinye pora nimo," nimu.

<sup>18</sup> Aku teta nimu wali kariapa teta, ungu mare wendo ombo, mulu topa, mai parambala awili te terimu. Mai parambala terimu akumu paa olandopa, oi imboma pulu polko mai kombuna moloringi wali aku teta te paa naa terimu.

<sup>19</sup> Aku terimu wali ulke kombu paa awili Babilon owe topa yupoko teta, imbomanga kombu lerimumanga ulke kombu awilima keri lepa pora tirimu. Goteni ulke kombu paa awili Babilon komu naa tindipelie Gote

yunge mumindili paa kolorumumu perimu no wain mingimu yu pali nopili nimbe tirimu.

<sup>20</sup> Nomuna tukundo lerimu kombu keloma pali kowa puringi. Kombuma pali mulu kembo te kape wendo naa orumu.

<sup>21</sup> Muluna tipono mongo awili tepa topa imboma torumu. Tipono mongo akumanga umbunimu awili (50kg) rais bek talonga mele. Tipono mongo olandopa torumumuni eno umbuni tirimu eno mindili noringimunga Gotenga imbiyu ungu taka tondoko marake teringi.

## 17

*Ambo wapera ulu keri terimumu Goteni pundu torumu*

<sup>1</sup> Gotenga mumindili kololi uluma perimu mungi kite yupoko pakera oi ambolko moloringi enselemanga teni na moloruna ombalie nimbei, "Ambo wapera toli awilimu, no awini ombo purumomanga ola moromomu, aku ulu teremomunga mindili tingena limbelo mele nu lipo ondamboi owl!"

<sup>2</sup> Maina moloringi iye nomi kingima kinye yu kinye wapu ulu kerinale teringi, we imbo maina moloringima kinye yu wapu ulu kerinale terimumunga no wain nongo keke lepo toromele mele aku teko keke lepo toringi," nimu.

<sup>3</sup> Kano wali pele na moloruna Mini Kake Telimu ombo ambolorumu kinye enselemuni na imbo naa peli kombu mepa purumu wali akuna ambo te mele takera kondoli tengah umbulu molorumuna kanoru. Aku mele takeramunga kangina imbi awini molorumu, aku imbima Gote marake teko ungu taka tondorngi imbima molorumu. Aku melemunga pinyewe kite yupoko pakera kinye geromano 10 kinye angilerimu.

<sup>4</sup> Aku ambomu ambo kamakoma pakoromele mele wale pakoli kondoli talo pakopa, kou gol kinye kou kangi lupe lupe kololi kou mone awili tepa purumoma kinye kulumbu kou mone awili tepa purumoma kinye akumani yu au nimbe molorumu. Yu no mingi kou goloni teli te ambolorumu, aku mingimunga tukundo yu wapu ulu kerinale terimumunga mele paa keri kalaro mololi awini pepa peko lerimu.

<sup>5</sup> Yunge mai mongona yunge imbi molorumu,aku imbimu ungu iko te molorumu, akumu i tepa,

Babilon Paa Awilimu, Wapera Toromelema  
Kinye

Maina Imbomanu Ulu Pulu Paa Kalaro  
Mololi Kerima Teremelema  
Enonga Anumu,  
nimbe molorumu.

<sup>6</sup> Gotenga imboma kinye, Jisas Yu paimbo ningi ipuki tiko yunge unguma andoko imboma ningi tiringi imboma kinye, aku ulu teko moloringimunga kano ambomuni eno topa kondorumu. Imbo torumumanga memema nomba, keke lepo torumu.

Aku ulumu kanopolio paa mini ltepo konopu awini lipo munduru.

<sup>7</sup> Aku teru wali enselemuni nimbei, "Nu ambe telka mini lterenoya? I ambomu kinye mele takera pinyewe kite yupoko pakera kinye geromano 10 kinye angimomuni ambomu mepa purumomu aku talonga lopeke teli ungu pulumu nu nimbo timbo!

<sup>8</sup> Mele takera kanoniomu oi molorumu, kinye naa moromo, pele mai muru lepa kau purumomunga wendo ombo yu mindili nombalo kombuna pumbelo. Maina imbo mare, maimu oi wendo naa opili Goteni molopa kau puli bukuna imbi naa torumu naa moromo imbomanu kano mele takeramu kanokolio, oi molorumu, kinye naa moromo nalo kelepa wendo ombalo wali kanokolio mini ltenge.

<sup>9</sup> Imbo lipe manjilimani ungu pulumu wamongo liko manjingue. Pinyewe kite yupoko pakera akuma mulu kembo kite yupoko pakerama manda lerimu. Akuna ambomu ola moromo.

<sup>10</sup> Pinyewe kite yupoko pakera akumanga pulu talo tipemu iye nomi king kite yupoko pakera. Aku kingimanga kite pakera koloringi, te kinye we moromo, te oi wendo naa oli. Nalo yu wendo ombalo kinye wali alaye kolte kau molombalo.

<sup>11</sup> Mele takera oi molorumu, kinye naa moromo akumu iye nomi king ki talo tipemu. Nalo yu kinye king kite yupoko pakera kinye eno talape tendekumu. Yu beambo nimbe kombu kerina pumbelo.

<sup>12</sup> Geromano 10 kanonio akumu iye 10 oi iye nomi king naa molko kombuma naa nokoromelema. Nalo altopa mele takeramu kinye peya eno iye nomi king engema likolio ena mongo tendeku kau kombuma nokonge.

<sup>13</sup> Kingima enonga konopu tendeku tipe peremo molkolio, enonga engema kinye kombu nokongei imbima kinye mele takeramu tingue.

<sup>14</sup> Eno Sipsip Walomu kinye opa tengen, nalo Sipsip Walomuni eno topa mainye mundumbelo. Yu iye awilimanga iye awili olandopamu, yu iye nomi kingimanga king olandopamu moromo. Yuni oi imbi topa Nanga imboma molangei waio nimuna yunge nimo unguma ipuki tiko lombili purumele imboma yu kinye kopu teko pungolio king kanoma toko maindo mundunge," nimu.

<sup>15</sup> Aku ungu nimbelie enselemuni nando nimbei, "Nu no omba purumo kanonioma, akumanga ambo wapera ola moromo, akupe imboma manda ltemo. Imbo talapema kinye imbo kangi lupe lupe angilima kinye ungu lupe lupe nimelema kinye mai kombu lupe lupe ltemomaaku tepa imbo paa pulumu i manda ltemo.

<sup>16</sup> Mele takeramu kinye geromano 10 kinye kanonio akumani apureli ambomu kinye konopu keri panjikolio, yu paa teko kenjiko yu we andopa molopili ningowale pakolima pali kulunduko, yunge mindi mare toko nongo, yu kamukumu tipeninopili ningokalonge.

<sup>17</sup> Goteni iye nomi kingima yunge kongonomu tendangei nimbe konopuni pilko teangei nimbe pilerimu mele enoni aku teko pilko eno kinye mele takeramu kinyekonopu tendekuna pupili molamili ningoenonga kombuma nokonge engema mele takeramu tinge. Eno aku teko molangei Goteni wendo opili oi nimbe panjirimu unguma wendo ombalo. Aku wali enonga kongonomu pora nimbelo.

<sup>18</sup> Ambo kanoniomu akupe maina mromele iye nomi kingima pali nokoromo ulke kombu paa awilimu," nimu.

## 18

*Ulke kombu awili Babilon kamukumu bembonimungu*

<sup>1</sup> Oi akumu kanopolio, altopo kanoru wali ensel te mulu kombuna mainye orumu. Akumu yu kombu nokombalo enge paa awili te pepa, yunge pa enge nilimuni mai kombuna pa tenderimu.

<sup>2</sup> Yuni paa enge nimbe alako topalie nimbei,

"Ulke Kombu Awili Imbi Paa Olandopa Mololi Babilon kamukumu bembonimo.

Kamukumu beambo nimbe pora timo.

Oi kombu pengamu nalo kinye kuro kerima linonga kombumu ningokuna peremele.

Kuro keri kalaro mololima kinyekera kalaro mololima kinyekera keri lelimakinyekera akuna peremele.

<sup>3</sup> Kano kombuna imbo moloringimani wapu ulu kerinali tengelenge uluma peremo nowain paa enge nilimu

we kombumanga pali imbo talapema noringimunga kamukumu keri lerimu.

Kombumanga pali iye nomi kingimani kape yu kinye wapu ulu kerinaliteringi.

Maina bisnis teringi iyemani enone tekomele kerima eio konopu leko

eno yu kinye bisnis teko kou mone awini ltingi," nimu.

<sup>4-5</sup> Kano wali pele, mulu kombuna ungu te lupe wendo orumuna pileru wali nimbei,

"Nanga imboma, aku ulke kombumunga ulu pulu kerima lepa mulu kombuna ola oromo,

aku kombuna tepa kenjirimu uluma Goteni pilipe moromo kani eno aku ulke kombumu tiye kolko wendo pangei!

Yunge ulu pulu keri teremo akuma peyakopu tepo naa teamili!

Ulu pulu keri teremo akumanga Goteni umbuni timbeloma lino waye naa liemili ningowendo waio!

<sup>6</sup> Yuni yando tepa kenjirimu akumunga enoni nendo aku teko yu pundu tokotiengen!

Yuni yando terimu akumunga enoni nendo te panjiko pundu tangen!

Yuni no enge nili mingi kapona tepa wamopa

terimumu liko no enge nili olandopa prumo te panjiko yu nopili tiengen!

<sup>7</sup> Yu yunu oi molopo kondambo nimbe yunge imbi lipa ola mundupe yu none tepa molorumu aku tepa mele pundu tokoonlandopa olandopa yu mindili tiko umbunima mepili tiengen!

Yuni konopuna kelkele topalie nimbei, "Na ambo nomi kwin molopo kwininga polona moro.

Na ambo waire naa moro.

Na walite kape kola tepo kola ulke naa molombo," nimbe konopu ltemo.

<sup>8</sup> Akumunga wali tendekumunga yunge umbunima wendo ombalo.

Imbo kolonge kuro awini wendo omba, imbo awini kola teko, kombumu engele lembalo. Tipeni yu nomba pora timbelo.

Yuni ulumaaku tepa tepa kenjirimomunga yu kot tendepa pimo Gote Awilimu baa enge nili olandopa peremo iyemuni yu moke tepa mindili akuma timbelo.

<sup>9</sup> Yu kinye wapu ulu kerinali teko, yu eio konopu leko enone teringi iye nomi kingimani yu tipeni nomba ilio wendo ombalona kanokolio kondo kolko kola teko konopu keri lenge.

<sup>10</sup> Yu mindili nombalo ulu kanokolio mini lteko tule teko angilkolio ningei,

"Ai ya! Ai ya! Ulke kombu imbi paa ola mololimu,

kombu paa awili enge nili Babilon! Ena mongo tendekumunga kau nunge teko kenjirinumunga uluma wali-kale wendo oromo," ninge.

<sup>11</sup> "Maina bisnis teremele iyema enonga bisnis teko kou mone lingemele naa

lingemunga eno kola teko konopu keri lenge.

<sup>12</sup> Bisnis teko noinge mele akuma i tepa: Kou gol kinye kou silva kinye kou mone awili tepa purumo kouma kinye kulumbulu kake kou mone paa olandopa purumoma kinye maminye kake pengama kinye, maminye kondoli lupe lupema kinye, unjo lupe lupe mune tolima kinye, mele lupe lupe kongi elepen geromanoni teko wamoko teringi melema kinye, unjo kou mone awili tepa pulimani teko wamoko tengen melema kinye, kou bras kinye kou ain kinye kou wape telima kinye aku koumani teko wamoko tengen melema kinye, aku melema noiko,

<sup>13</sup> kangina mune topili ningo wel teko wamoko, teko karomele sinamon kinye langi tingo tepili mele mare kinye, paura keku karomele wali mune toromoma kinye, wel lupe lupe mune tolima kinye, no wain kinye unjo oliv wele kinye rais wai kinye, rais witimuni teko wamoko teremele plawa kinye kongi kao sipsipima kinye kongi os kinye oseni kundurumo karoma kinye kongoно we tendenje kendemande molonge imboma kinye; aku mele noingema pali limbelo imbo te naa moromo, molo.

<sup>14</sup> Enoni ningei, 'Nu mele penga kou mone olandopa purumo melema paa liemboa konopu ltenoma mainye pumo. Mele penga lupe lupema nu aie konopu lenioma kinye nunge au nino mele kou mone olandopa purumo pengama kinye kamukumu nu tiye kolko mainye punge. Melema altopa nu kinye naa lembalo kanonio,' ninge.

<sup>15</sup> Aku melema bisnis teko kou mone awini liko tengen iyemani tule teko angilko yu mindili awili tepa nombalo ulu kanokolio paa mini ltenge. Kola teko konopu keri lekolio

<sup>16</sup> ru ningolio ningei,  
'Ai ya! Ai ya! Ulke kombu imbi paa ola mololimu, ambo kamakoma pakoko moromele mele wale pakoli kondoli pakopa, kou gol kinye kou kangi lupe lupe kololi kou mone awili tepa purumoma kinye, kulumbu kake tepa kou mone awili tepa purumoma kinye akumani yu au nimbei molorumu.

<sup>17</sup> Ena mongo tendekumunga yu kou mone awili purumu mele noirimoma paa kamukumu keri itemo,' ninge.

Nomu kutana andoli sip nokromeme iyema kinye sipimanga kongono teremele iyema kinye nona andoko bisnis teko kou mone limele imboma kinye tule teko angilkolio

<sup>18</sup> tipe nombalomunga iliomu kanokolio ningei, 'I ulke kombu awilimu none teli te lerimuya?' ninge.

<sup>19</sup> Mai kungupo liko pakoko kola teko molkolio ru ningolio ningei,  
'Ai ya! Ai ya! Ulke kombu imbi paa ola mololimu, sip meko andoko akuna kou mone awili tepa noirimu kou mone awili teko ltingi kombumi!

Ena mongo tendekumunga aku kombumu kamukumu beambo nimo,' ninge.

<sup>20</sup> Mulu kombuna moromele imboma kinye,

Gotenga imboma kinye Kraistini yunge kongonomu tendepao nimbe lipe mundurumu iyema kinye

Gotenga nimbe munduli ungu nili imbo profetema

kinye i kombumuni eno mindili tipe tepa kenjirimunguma

Goteni moke tepalie yu mindili tipe tepa kenjirimunguma eno konopu tiko tono ko laio nimbelo.'

<sup>21</sup> Kano kinye ensel paa enge nili teni kou paa awili te ola lipe nomu kutana topa mainye mundupelie nimbei,  
'I tero mele aku tepa ulu enge nili wendo ombalo

teni ulke kombu awili imbi paa ola mololi kombu Babilon topa mainye mundumbelona

imbomani i kombumu altoko naa kanonge.

<sup>22</sup> Gita toko, kolape mungi langoko, biukel popo toko,

kunana ningo, aku teko ulu teremele unguma altoko naa pilinge.

Ulke takoko mele teko wamoko teremele kongonomanga imboma altoko naa kanonge.

Plawa teamili ningo kou awili teni rais wit kai

Itemele kinye ungu nimo ungumu altopa naa nimbelona pilinge.

<sup>23</sup> Nu kombumu tipe lam pa naa tembaloo. Iye te ambo limbei molo ambo te iye pumbeindo ungu nimele mele

nu kombumu altoko naa pilinge.

Oi nunge bisnis teringi iyema kombumanga pali

iye kamakoma moloringi.

Nunge kuro koiringi ulumuni nuni mai kombuna

imboma pali kolo toko kondi toko tirinu akumuni imbomani ulu keri awini teringi.

<sup>24</sup> Gotenga imbo profetema kinye Gote yunge imboma

kinye Babilononi topa kondorummangga memema aku kombuna itemo.

Mai kombumanga pali toko kondorungi imbomanga memema kape aku kombuna itemo.

Aku uluma pali wendo orumuma kombu Babilon yuni kau tepa kenjirumu," nimu.

## Gote Kapi Ninge Unguma

### 19

*Kombu Babilon kamukumu keri lerimu-munga imboma tono kolko Gote kapi ninge unguma*

<sup>1-2</sup> Aku uluma pora nimu wali altopo pileru kinye mulu kombuna imbo awini ungu nimele mele ungu te wendo orumuna pilera. Akumani alako tokolio ningei, "Goteni uluma pali paimbo tumbi tipe moke tepalie teremo. Imbi paa ola mololi apureli ambomu yuni apureli toli uluma terimumuni mai kombuna imboma molko kenjingei ni-mumunga aku ulu terimuma Goteni pilipe moke tega apurupe yu mindili nopili nimu. Aku ambomuni Gotenga kendemandema topa kondorumu akumanga mememanga Goteni pundu tondopa mindili tir-imu akumunga

yu kapi nimbo imbi lipo ola mundemili! Mindili noromulu aulkena lipe tapondopa wendo ltimo ulumu yu kinye pepa, yunge imbi paa olandopa molopa, pa enge nilimu yu kinye pepa, yu melema pali nokombalo imbimu kinye engemu talo peremo iyemu," ningi akume ningi.

<sup>3</sup> Altoko alako tokolio ningei, "Yuni yu topa kalomomunga ilio waliwala-ima ombo kau peremomunga Gote kapi nimbo imbi lipo ola mundemili!" ningi.

<sup>4</sup> Iye nomi 24 kinye, mele koinjo mololi kite kinye, enoni iye nomi king polona moromo Gotenga kumbe kerena mainye pungo tamalu peko, yu kapi ningo imbi liko ola mundukolio ningei, "Aku tepea tepili! Gote kapi nimbo imbi lipo ola mundemili!" ningi.

<sup>5</sup> Kano wali ungu te iye nomi king polona wendo ombalie nimbei, "Eno yunge kongono imbo kendemande moromelema pali, Nu linonga iye Awilimu ningo pipili kolko yunge ungumu tako liko pilko teremele. Imbo awilima kape imbi naa mololima kape enoni linonga Gote kapi ningo imbi liko ola mundengei!" ningi.

*Kongi Sipsip Walomu ambo limbeimu langi awili teko koinge temanemu*

<sup>6</sup> Altopo pileru wali, imbo awinini ungu panjirimele mele ungu te, no awili topalie uwa nimo mele molo, mulu enge nimbe toromo mele ungu te pileru. Akumani ru ningolio ningei,

"Linonga Gote Awili Enge Pepa Imbi Awili Olandopamu Ltemo Iyemu kamukumu iye nomi kingimu molopa melema pali

nokoromomunga yu kapi nimbo imbi lipo ola mundemili!

<sup>7</sup> Sipsip Walomu ambo limbei waimu kamukumu wendo oromo.

Yu ambo limbelomu Yu ombo limbelo nimbe nokopa moromomunga lino konopu penga pepili konopu tipo paimbo terimu nimbo imbi lipo ola mundemili!

<sup>8</sup> Goteni wale pakoli paa penga enge nili mini mana tepea kake telima pakopili nimbe timo," ningi.

(Wale pakoli penga tirimoma Gotenga imbomani ulu pengama teremele uluma manda ltemo.)

<sup>9</sup> Kano wali enselemuni nando nimbei, "Ungu nimbomu pipiana imbi tani, Sipsip Walomu ambo limbei langi koingena Goteni imbomando wangei nimbelo im-boma eno tono kolaiol! aku mele pipiana towil!" nimu. Aku tepea nimbelie kelepa ungu te peya nimbei, "I unguma Gotenga ungu paimboma," nimu.

<sup>10</sup> Aku nimu ungu pilipolio enseleme-nga kumbe kerena tamalu pepo kapi nim-boi teru nalo yuni nando nimbei, "Nu aku ulu naa tewi! Nunge angenalini Jisasinga unguma imboma ningo tirimelema kinye nu kinye na kinye lino pali Gotenga kendemandema molopo kongono tenderemolo kani nuni Gote kau popo toko kapi niwi! Gotenga ungu nimbo tirimolo akumunga pulumu Jisasinga unguma nimbo tirimolo ulumu akumunga nu kinye angenali kinye na kinye lino peyama yunge kendemandema moromolo, nio," nimu.

*Iye te kongi os kakemunga umbulu moloru-mumunga ungumu*

<sup>11</sup> Mulu kombumu nambu topa lerimuna kanoru kinye kongi os kake telimu ang-lerimu, akumunga umbuluna ola iye te molorumu, akumu imbi leko Kongono Ambolopa Nokopa Kondopa Konopu Toyia Toli Iyemu ningi, Ulu Paimboma Kau Teremo Iyemu nimele. Imbomanga kot pilipe opa teremo wali ulu toyia tolimu kau teremo. Yu kot pilipe tumbi tipe moke tepea we naa lipe tapondoromo. Yu we opa teambo nimbe naa teremo.

<sup>12</sup> Yunge mongo talo tipe elka mele genegene nimbe iye nomi kingima wainye pakoromele mele wainye awini yunge pinyewena pakoromo. Yunge kangina imbi te moromo, aku imbimu yunu pimo, lupe imbomani naa pimele.

<sup>13</sup> Yu wale pakoli meme kaloli tule te pakoromo. Yunge imbimu Gotenga Ungumu.

<sup>14</sup> Mulu kombuna amima kongi os kake telimanga molko yu lombili pungei puringi. Akuma wale pakoli kake paa penga mare, kalaro naa mololima pakoringi.

<sup>15</sup> Yunge kerena mai kombuna imbo talapema pali topa opa telilo gelea paa nenge nenge noli te peremo. Yu imbomanga pali iye awilimu molopa imboma paa enge nimbe nokopa molombalo. Gote Olandopa Engemunga mumindili paa olandopa kololi ulumu peremo wain mongoma kimboni kambulupe takelemakele tenderemo.

<sup>16</sup> Yunge wale pakoli tule akuna kinye yunge palambena kinye imbi te moromo, akumu i tepa:

Iye Nomi Kingimanga

Yu Iye Nomi King Paa Olandopamu, Iye Awilimanga Yu Iye Paa Awili Olandopamu,  
nimbe moromo.

<sup>17</sup> Kanoru wali enanaola ensel te angilerimu, akumuni muluna mangoko andoringi keramando enge nimbe alako topalie nimbei, "Goteni langi awili koimomu nangei ongo nombeya teaio!"

<sup>18</sup> Iye nomi kingimanga onoma kape, amimanga iye nomimanga onoma kape, iye enge nilimanga onoma kape, osema kinye enonga umbuluna ola molko andoromele iyemanga onoma kape, imbomanga pali we moromele imboma kape, kongono we tendeko kendemande tenderemele-manga kape, imbi naa mololima kape, imbi mololima kape, enonga onomanga mindima nangei waio," nimu.

<sup>19</sup> Altopo kanoru wali mele takeramu kinye maina iye nomi kingima kinye kongi os umbuluna ola moromo iyemu kinye yunge amima kinye opa teamili ningonombeya teringi.

<sup>20</sup> Nalo Goteni ungu imbo tondomo ungumu pilipolio nimbo tiro nimbe kolo topa nimbe tirimu iye, kanomu mele takeramuni lipe tapondorumu neya ulu enge nili awini terimu akumu kinye, mele takeramu kinye, elo ka tirimu. Oi ulu enge nili terimu ulumani imbo mele takeramunga makomu kangina molopili ningi, yu none teli te teko wamoko teko anjiringimu popo toko kapi ningi kano imboma kondi torumu. Yu kinye mele takeramu kinye ka tikolio, kou salfa tipe nomba kondopa perimu muru paa awilina liko maindo munduringi.

<sup>21</sup> Kongi os umbuluna ola molorumu iyemunga kerena opa teli loi gelea perimumuni enonga amima pali topa kondorumu, kano wali enonga onomanga mindima

keramani ongo noringina kerama eno olo terimu.

## 20

*Kuromanga nomi Satan poinye 1,000 ka ulkena pembalo ungumu*

<sup>1</sup> Aku ulu terimuna kanoru kinye mulu kombuna ensel te, maina mainye muru te paa lepa kau pumbe naa pora nimomunga kere pulu kimu kinye ka sen paa awili te kinye ambolopa meli, mainye orumu.

<sup>2</sup> Aku enselemani waimbe ambolopa lipe poinye 1,000 aku tepa molopili nimbe ka seneni ka topalie ka tirimu. Aku waimbe yu koro oi molorumu waimbemu, yu imboma pali kot tenderemomu, yu kuromanga nomi Satan.

<sup>3</sup> Enselemani yu ambolopa lipe ka seneni ka topalie yu maina mainye muru te paa lepa kau pumbe naa pora nimomunga ka tipe topa mainye mundupe, poinye 1,000 ombo pupili yu altopa wendo ombo mai kombuna imbo talapema andopa kolo topa kondi naa topili nimbe kere pulumu pipi tipe lok torumu. Poinye akuma pora nimbelo wali yu wendo ombo alaye kolte andopili ningi wendo liko mundunge.

<sup>4</sup> Iye nomi king moromele poloma kanoru, akumanga Goteni imboma moke teangei nimbe imbi tirimu imboma moloringi. Imbo akumani maina molko Jisasinga unguma andoko ningi tiko, Gotenga ungumu enge ningi pilko amboloringimunga eno nomima pule toko toko kondoringi, akumanga minima kanoru. Eno mele takeramu kinye mele takeramu none teli melte teko wamoko teko anjiringimu talo popo toko kapi ningi imbi liko ola naa munduko, mele takeramunga makomu enonga mai mongona molo kina naa molopili ningiaku imboma kanoru. Akuma makilko koinjo molko, Satan muruna molopili poinye 1,000 Kraist peya iye nomi kingima molko melema nokoringi.

<sup>5</sup> Imboma pali makilko koinjo molongemunga eno kumbe leko makilko koinjo moloringi. We imbo koloringimaaku imboma kinye wali tendeku wali makilko koinjo naa moloringi. Poinye 1,000 pora nimbelo wali makilko koinjo molonge.

<sup>6</sup> Kumbe leko makilko koinjo moloringiaku imbo kake telima, eno malo. Imboma wali talo tiko kolongeaku ulumuni eno ulure manda naa tembaloo. Eno Gote kinye Kraist talo popo tondoli imboma molko, Kraist kinye peya poinye 1,000 kingima molko melema nokonge.

*Satan kamukumu mindili nomba mainye pumbelo ungumu*

<sup>7</sup> Poinye 1,000 pora nimbelo wali kuro-manga nomi Satan ka ulkena wendo liko mundunge kinye

<sup>8</sup> mai kombuna pali moromele imboma, Gok kinye Magok kinye kondi topa opa teangei wangei nimbe lipe nombeya tem-balo. Aku imboma kou ukiye mele manda.

<sup>9</sup> Mai kombuna pali kimbo kongono tek-oongo ongolio, Gotenga imboma moloringi kombumu, Gote konopu mondonromo ulke kombu awilimu, makai tendeko tongei teringi nalo mulu kombuna tipe te mainye omba aku amima norumu.

<sup>10</sup> Kano kinye kuromanga nomi imbo-manga kot kolo topa tendelimu, eno kondi torumu iyemu, liko kou salfa tipe nomba kondopa perimu muru paa awilina, mele takeramu kinye Goteni ungu imbo tondoru-mu unguma pilipo nimbo tiro. nimbe kolo toli iyemu kinye elo oi liko toko mainye munduringi muruna, yu liko toko mainye munduringi. Akuna eno ipu leli tangoli waliwalima mindili nongo kau molonge.

#### *Imbomanga kot awilimu kamukumu wendo ombalo ungumu*

<sup>11</sup> Altopo kanoru wali iye nomi king tenga polo kake teli awili te lerimu, akuna iye te molorumuna kanoru. Maimu kinye mulu talo yu molorumuna tiye kolko kowa purungi. Akuma altoko naa molonge.

<sup>12</sup> Imbo koloringi wayema, aku imbi naa mololima kinye imbi mololima kinye, iye nomi kingimunga polona moromo Iyemunga kumbekerendo angileringga kanoru. Buk mare wendo lipe kanorumu. Pele buk te lipe kanorumu, akumu koinjo molopa kau puli bukumu. Kano kinye bukumanga tukundo enonga ulu teringima kanopa moke tepea kot pilerimu.

<sup>13</sup> Nomu kutana imbo koloringima wendo pangei nimu. Kololi kinye Imbo Kololi Kombumu kinye aku talonga wendo pangei ningili. Aku wali imbo te te ningi ulu teringimanga kot tenderemo. Kano kinye enonga ulu teringimanga imbo te te nimbe kot tenderimu.

<sup>14</sup> Kano kinye kololi ulu pulumu kinye imbo kololi kombumu kinye aku talo tipe nomba perimu muru paa awilimunga topa mainye mundurumi. I tipe nomba peremo muru paa awilimu imboma wali talo tiko koromele ulumu.

<sup>15</sup> Kot pilimbelo iyemuni imbo teng-a imbiu koinjo molopa kau puli bukuna naa molorumu kinye kanopalie aku imbomu tipe nomba kau perimu muru awilimunga topa mainye mundurumi.

#### **Kombu Jerusalem Koinjomunga Temanemu**

#### *Mulu mai koinjo talo wendo ombalo ungumu*

<sup>1</sup> Pele mulu mai koinjo talo kanoru. Mai oimu kinye mulu oimu kinye pora nimbe, nomu kutamu kape naa molorumu.

<sup>2</sup> Ulke kombu awili kake teli, akumu Jerusalem koinjomu, Gote molorumu mulu kombuna tiye kolopa mainye ombai oru-muna kanoru. Ambo te iye pumbeindo au nimo mele yu aku tepa au nimbe kondopa orumu.

<sup>3</sup> Pele pileru wali iye nomi king polona ungu te wendo ombo enge nimbe ru nimbelie nimbe, "Kinye Gote moromo ulkemu ombo imboma moromelena angimo, yu eno kinye kopu tepea molombalo. Eno yunge imboma molonge, yu enonga Gote molopa eno nokopa, eno kinye molombalo.

<sup>4</sup> Yuni enonga mongona kola peremoma kulu tondombalo. Oi uluma pora nimuna imboma altoko naa kolko, kola naa teko, kola ulke naa molko, mindili naa nonge," nimu.

<sup>5</sup> Iye nomi king polona molorumu iyemuni nimbei, "Nani melema pali koinjonga tero," nimu. Altopa nimbei, "I nio unguma ungu paimboma, imbomani manda nani nio mele paimbo teremo ningi ipuki tingei unguma kani aku unguma pipiana imbi towi!" nimu.

<sup>6</sup> Nando kelepa nimbei, "Uluma pali wendo ombo pora timo. Na Oi Kumbe Lepa Iyemu, Na akilio lepa Iyemu; Na melema pali Pulu Iyemu, kongono tembo konopu lteoma waliwalima tepe pora tiro Iyemu. Imbo te no wali temo imbomu koinjo molopa kau puli ulu pulumu peremo no pikopiko wendo oromomu kou mone naa lipo we nowi nimbo.

<sup>7</sup> Imbo te enge nimbe opa pulemu topa mainye mundumbelomi i melema pali limbelo, na yunge Gote molombo, yu nanga bakulumu molombalo.

<sup>8</sup> Nalo imbo opa naa teambo ningi pipili koromele imboma kinye, na kolo toromo ningi pilko na ipuki naa tirimele imboma kinye, paa ulu pulu kerima teremele imboma kinye, imbo toko kondoromele imboma kinye, wapu ulu kerinali teremele imboma kinye, tomo ambolko meambu liko ala toromele imboma kinye, we melema anjiko linonga Gote lino nokoromele ningi kuro popo toko kapi nimele imboma kinye, kolo toromele imboma kinye, aku teko teremele imboma pali kou salfa tipe nomba kondopa kau peremo muru paa awilimunga pungo molonge, akumu enonga molonge kombumu. Aku ulu eno

kinye wendo ombalolu wali talo tiko kolonge ulumu," nimu.

*Jononi Jerusalem kombu koinjomu kanorumu*

<sup>9</sup> Kano wali ensel kite yupoko pakera kamukumu umbuni kite yupoko pakera perimu mingima amboloringi kanomanga teni na moloruna ombalie nando nimbei, "Sipsip Walomu Ambo Limbelo Ambomu, nu lipo ondamboi, kanani owil" nimu.

<sup>10</sup> Kano wali Mini Kake Telimumu na ambolorumu wali enselemuni na mepa mulu kembo paa olandopa kou polarumu tengah mepa pumbe mondopalie, ulke kombu awili kake teli Jerusalem Gote molorumu mulu kombuna tiye kolopa mainye ombai orumumu na lipe ondorumu.

<sup>11</sup> Yunge pa enge nili terimumu Gotenga pa enge nilimuni tepsa, imbo kou te kou mone paa olandopa pulimu te pa enge nili teremo mele, kou jaspa mele, yu aku tepsa enge nili pa tepsa mini mana tepsa, paa kariapa mele pa terimu.

<sup>12</sup> Aku ulke kombu awilimuna kou pape paa awili olana pepa, kere pulu 12 lerimu. Ensel 12 aku kere pulu 12 nokongei angilerimi. Israel imbo lapumanga 12 yaka nimbe imbi topa kou pape kere puluna imbi topa mondorumu.

<sup>13</sup> Ena mundi oromondo kere pulu yupoko lepa, ena pe purumondo kere pulu yupoko lepa, wiyando kere pulu yupoko lepa, mereyando kere pulu yupoko lerimu.

<sup>14</sup> Ulke kombu awilimunga kou papemunga kou awili 12 mondoringi kou tipimanga ola Sipsip Walomuni oi Yunge kongonomu tendepao nimbe lipe mundurumu iye 12 imbimanga molorumu.

<sup>15</sup> Ensel na kinye ungu nimumu melema manda manjili luwe kou goloni teli te ambolorumu. Akumuni ulke kombu awilimuna kinye kou pape kere puluma kinye kou papemu kinye manda lembai ambolorumu.

<sup>16</sup> Kombumunga ekondo ekondo tulemu kinye palakumu kinye tendeku ulu terimu. Ulke kombu awilimuna winjo tipe manda lerimu kinye 2,200 kilomita mele; polopeya tepsa manda lerimu kinye tendeku ulu kala terimu; olando tipe manda lerimu kinye tendeku ulu kala terimu.

<sup>17</sup> Kou pape tomindo lerimumu aku 65 mita mele. Enselemuni mita manda lerimumu maina imbomani manda itemele aku tepsa manda lerimu.

<sup>18</sup> Papemu kou jaspani tepsa, ulke kombu awilimuna kou gol paa nurupili te naa pelimuni Goteni terimu. Ulke kombu kariapa mele pa terimu.

<sup>19</sup> Ulke kombumunga pape tipina kou lupe lupe penga kou mone olandopa purumomani au tirimu. Pape tipi kiyendomu

kou penga jaspa panjiko, tipi talo tipemu kou penga muku teli kou sapaia panjiko, tipi yupoko tipemu kou penga kake teli kou aget panjiko, kite tipemu kou penga lkepa teli kou emeral panjiko,

<sup>20</sup> kite pakera tipemu kou penga kondoli tepsa kake teli kou sadonikis panjiko, kite talo pakera tipemu kou penga kondoli kou konilian panjiko, kite yupoko pakera tipemu kou penga kainye teli kou krisolait panjiko, ki talo tipemu kou penga lkepa teli te kou beril panjiko, ki talo pakera tipemu kou penga lupe kainye teli te kou topas panjiko, ki talo talo pakera tipe kou krisopres panjiko, ki talo yupoko pakera tipemu kou penga muku te lupe tepsa teli kou haisin panjiko, tipi ki yupoko tipemu kou penga kondoli te lupe kou ametis panjiringi.

<sup>21</sup> Pape kere pulu 12 kulumbu kake tepsa kou mone paa olandopa pulu 12 angilerimu. Kere pulu te te ningko kulumbu awili te te ningko teringi. Ulke kombu awilimunga aulke baretema kou gol paa penga nurupili te naa pelima mondoringi, aulke akuma kariapa mele pa terimu.

<sup>22</sup> Ulke kombu awilina tukundo Gote molorumuna ongo popo tonge ulke tempel te angilerimuna naa kanoru. Aku ambe telka, Gote Awili Enge Nilimu kinye Sipsip Walomu talo elo elongalo ulke tempel mele moloringili.

<sup>23</sup> Gotenga pa enge nilimuni kombumu pa tenderemo, Sipsip Walomu kombumunga tipe lam mele molorumumunga ena kape oli kape teni akuna pa naa tenderemo.

<sup>24</sup> Kombumanga pali imboma ulke kombu awilimuna pa tembalomunga manda andoko molonge. Maina iye nomi kingima enonga mele kou olando pumbe pengama kou kombuna meko onge.

<sup>25</sup> Aku kombumu tumbulu naa tombalomunga wali te pape kere puluma pipi naa tinge.

<sup>26</sup> Imbomani enonga mele kou mone olando pulima kinye au ningko melema kinye akuna tukundo meko punge.

<sup>27</sup> Nalo mele kalaro mololima kinye, imboma tekoi pipili kondoli uluma teremele imboma kinye, kolo toromele imboma kinye, akuma aku kombuna tukundo paa naa punge. Sipsip Walomunga koinjo molopa kau puli bukuna imbi molombalo imboma kau akuna tukundo punge.

## 22

*Koinjo molopa kau puli ulu pulumu peremo nomu kinye unjomu talonga ungumu*

<sup>1</sup> Kano kinye enselemuni molopa kondopa kau puli ulu pulumu peremo no ombo purumumu na lipe ondorumu, akumu kariapa mele pa terimu. Gote kinye Sipsip

Walomu kinye elonga iye nomi king polo-munga no akumu wendo omba,

<sup>2</sup> ulke kombu awilimunga aulke baret tuku tingina omba purumu. No nekondo yakondo kulendo talonga koinjo molopa kau puli ulu pulumu peremo unjomu angilerimu, akumu poinye tengah wali 12 mongo toromo, oli yaka yaka nimbe mongo toromo. Unjomunga gomomani imboma tepea koinjo ltimo.

<sup>3</sup> Goteni maina umbuni tirimu mele um-buni paa tendekure kape aku kombuna naa lembalo. Gote kinye Sipsip Walomu talonga iye nomi king polomu aku kombuna lem-balo, Gotenga kongono tendeli imbo kende-mandemani yu popo toko kapi ninge.

<sup>4</sup> Enoni yunge kumbekeremu kanonge, yunge imbimu enonga mai mongona topa panjimbelo.

<sup>5</sup> Aku kombuna ipo naa lembalo. Gote Awilimuni eno molongena pa tendembalo-munga ena tepili, molo tipe lam kandamili naa ninge. Eno imbo nomi kingima wali-walima molko nokoko kau punge.

#### *Jisas nondopa ombalo*

<sup>6</sup> Enselemuni nando nimbei, "I unguma ungu paimboma, imbomani manda nani nio mele paimbo teremo ningi ipuki tinge unguma. Awilimu, Gotenga ungu nimbe munduli ungu ningi tiringi imbo profete-manga minimanga Gote, yuni yunge kende-mandemani uluma nondopa wendo ombalo mele kanangei lipe ondopili nimbe yunge enselema lipe mundurumu," nimu.

<sup>7</sup> Jisasini nimbei, "Pileio! Na nondopo ombo nimu. Pele wendo ombalo i bukuna nimbe moromo unguma pilipe lipe tengah tipe tembalu imbomu yu malo," nimu.

<sup>8</sup> Na Jon, na i uluma pilipo kanoru iyemu. Pilipo kanopolio na uluma lipe ondorumu enselema yu popo topo kapi nembo nimbo yunge kumbe kerena tamalu Peru

<sup>9</sup> nalo yuni nando nimbei, "Paa aku ulu naa tewi! Nunge angenalini Gotenga ungu nimbe mundulimu imboma ningi tiringima kinye, i bukuna nimbe moromo unguma pilko liko teremele imboma kinye, nu kinye na kinye lino pali Gotenga kende-mandema molopo kongono tenderemolo kani nuni Gote yu kau popo toko kapi niwi!" nimu.

<sup>10</sup> Aku ungu nimbeline nando nimbei, "I bukuna ulu altopa wendo ombalo mele nimbe moromo uluma nondopa kamukumu wendo ombalo kani naa pilengei naa nimbo para tiembo ningi lopeka naa teami!

<sup>11</sup> Imbo te tepea kenjirimo imbomu yu pimbingi ti tipe tepea kenjipe molopili! Imbo te kalaro molopili moromo imbomu pimbingi ti tipe kalaro mololi ulumu tepili!

Imbo te tepea kondoromo imbomu pimbingi ti tipe tepea kondopa molopili! Imbo te Goteni nanga mendepolo nimbe kake tepili moromo imbomu pimbingi ti tipe Gotenga mendepolo nimbe molopa kake teli uluma tepili imbo molopili," nimu.

<sup>12</sup> Aku tepea nimu wali Jisasini nimbei, "Pileio! Na nondopo omboi tero. Ombo wali imboma enonga ulu teremele manganu mele mele pundi tomboi melele mepo ombo.

<sup>13</sup> Na oi kumbe lepo moloru. Akilio lepo molombo iyemu Na kape. Na kau kiyen-domu, Na peyalimemu. Na melele manganu Pulu Iyemu, Na melele manganu pali pora timbo iyemu.

<sup>14</sup> Enonga wale pakolima kulumie toromele imboma aku teremele manganu Koinjo Molopa Kau Puli Ulu Pulumu Peremo Unjomunga mongoma ongo nongo, ulke kombu awilimunga kou pape kere pulumang ongo tukundo paio niomunga kano imboma, Goteni eno nokopa kondopili.

<sup>15</sup> Ulu kerima kau konopu kimbo tiko moromelema kinye, tomo ambolko meambu liko toromelema kinye, apureli ambiye andoko toromelema kinye, imbo tuko kondoromelema kinye, we melema anjiko gotema ningi kuro popo toko kapi nimelema kinye, kolo toli uluma konopu mondoko kolo toko teremelema kinye eno Gotenga ulke kombu awilimunga kou papemunga tawendo moromele.

<sup>16</sup> Na Jisas, nani nanga imbo talapema i unguma pilengei, pumbe nimbe tindipili nimbo nanga enselema nu pungo ningi tipuwi nimbo lipo munduru. Na iye nomi king Devitini kalopa ltimo Iyemu, yu nanga kolepamu. Kombu kandiye kombu tangombaindo ipu leli oi angilipe pa enge nili termo akumu Na," nimu.

<sup>17</sup> Mini Kake Telimu kinye Sipsip Walomunga Ambo Limbelo Ambomu kinye eloni ngingili, "Nu paa owl!" nimbele. I unguma pilimbelo imbomuni "Nu paa owl!" nipiili! No wali kolombalo imbomu opili! Imbo te no nombo konopu lembalo imbomu kou mone naa lipe Goteni we timbelo no koinjo molopa kau puli ulu pulumu peremo nomu, ombo nipiili!

#### *I unguma pilinge imbomando Jononi enge nimbe mi lepa nimbe tirimu ungumu*

<sup>18</sup> Gotenga nimbe munduli ungu i bukuna nimbe moromoma pilinge imbomando lepi lepi topolio nimboi, "Imbo teni i bukuna tukundo moromo ungumanga ungu te tuku mundupe nimo lemo i bukumunga ulu umbuni enge nili mare wendo ombalo nimbe moromo ulu umbunima Goteni aku im-bomu kinye wendo opili," nimbelo.

<sup>19</sup> Molo imbo teni i bukumunga Gotenga nimbe munduli ungu nimbe moromomanga ungu te naa nimbe kulu topa wendo limo lemo Goteni yu tiye kolopa, yu koinjo molopa kau puli ulu pulumu peremo unjo i bukumuni nimbe tirimomunga mongo mare naa nomba, ulke kombu awili kake teli i bukumuni nimbe tirimo kombuna naa opili nimbelo.

<sup>20</sup> I uluma wendo ombalo nimbe tirimo iyemuni nimbei, “Paimbo. Na nondopo omboi tero,” nimo. Paa aku tepili! Awili Jisas, paa wanil!

<sup>21</sup> Awili Jisasini eno kinye konopu noipe kondo kolopa eno nokopa kondopili. Aku ulumu eno yunge imbo mendepolo palima kinye pepili! I paa!

## Read the New Testament daily

*January*

date	Scripture
1	Matyu 1:1-2:12
2	Matyu 2:13-3:6
3	Matyu 3:7-4:11
4	Matyu 4:12-25
5	Matyu 5:1-26
6	Matyu 5:27-48
7	Matyu 6:1-24
8	Matyu 6:25-7:14
9	Matyu 7:15-29
10	Matyu 8:1-17
11	Matyu 8:18-34
12	Matyu 9:1-17
13	Matyu 9:18-38
14	Matyu 10:1-23
15	Matyu 10:24-11:6
16	Matyu 11:7-30
17	Matyu 12:1-21
18	Matyu 12:22-45
19	Matyu 12:46-13:23
20	Matyu 13:24-46
21	Matyu 13:47-14:12
22	Matyu 14:13-36
23	Matyu 15:1-28
24	Matyu 15:29-16:12
25	Matyu 16:13-17:9
26	Matyu 17:10-27
27	Matyu 18:1-22
28	Matyu 18:23-19:12
29	Matyu 19:13-30
30	Matyu 20:1-28
31	Matyu 20:29-21:22

*February*

*March*

date	Scripture
1	Matyu 21:23-46
2	Matyu 22:1-33
3	Matyu 22:34-23:12
4	Matyu 23:13-39
5	Matyu 24:1-28
6	Matyu 24:29-51
7	Matyu 25:1-30
8	Matyu 25:31-26:13
9	Matyu 26:14-46
10	Matyu 26:47-68
11	Matyu 26:69-27:14
12	Matyu 27:15-31
13	Matyu 27:32-66
14	Matyu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Jon 1:1-28

date	Scripture
1	Jon 1:29-51
2	Jon 2:1-25
3	Jon 3:1-21
4	Jon 3:22-4:3
5	Jon 4:4-42
6	Jon 4:43-54
7	Jon 5:1-23
8	Jon 5:24-47
9	Jon 6:1-21
10	Jon 6:22-40
11	Jon 6:41-71
12	Jon 7:1-29
13	Jon 7:30-52
14	Jon 7:53-8:20
15	Jon 8:21-30
16	Jon 8:31-59
17	Jon 9:1-41
18	Jon 10:1-21
19	Jon 10:22-42
20	Jon 11:1-53
21	Jon 11:54-12:19
22	Jon 12:20-50
23	Jon 13:1-30
24	Jon 13:31-14:14
25	Jon 14:15-31
26	Jon 15:1-27
27	Jon 16:1-33
28	Jon 17:1-26
29	Jon 18:1-24
30	Jon 18:25-19:22
31	Jon 19:23-42

date	Scripture
1	Jon 20:1-31
2	Jon 21:1-25
3	Aposel 1:1-26
4	Aposel 2:1-47
5	Aposel 3:1-26
6	Aposel 4:1-37
7	Aposel 5:1-42
8	Aposel 6:1-15
9	Aposel 7:1-29
10	Aposel 7:30-50
11	Aposel 7:51-8:13
12	Aposel 8:14-40
13	Aposel 9:1-25
14	Aposel 9:26-43
15	Aposel 10:1-33
16	Aposel 10:34-48
17	Aposel 11:1-30
18	Aposel 12:1-23
19	Aposel 12:24-13:12
20	Aposel 13:13-41
21	Aposel 13:42-14:7
22	Aposel 14:8-28
23	Aposel 15:1-35
24	Aposel 15:36-16:15
25	Aposel 16:16-40
26	Aposel 17:1-34
27	Aposel 18:1-21
28	Aposel 18:22-19:12
29	Aposel 19:13-41
30	Aposel 20:1-38

date	Scripture
1	Aposel 21:1-16
2	Aposel 21:17-36
3	Aposel 21:37-22:16
4	Aposel 22:17-23:10
5	Aposel 23:11-35
6	Aposel 24:1-27
7	Aposel 25:1-27
8	Aposel 26:1-32
9	Aposel 27:1-20
10	Aposel 27:21-44
11	Aposel 28:1-31
12	Rom 1:1-17
13	Rom 1:18-32
14	Rom 2:1-24
15	Rom 2:25-3:8
16	Rom 3:9-31
17	Rom 4:1-12
18	Rom 4:13-5:5
19	Rom 5:6-21
20	Rom 6:1-23
21	Rom 7:1-14
22	Rom 7:15-8:6
23	Rom 8:7-21
24	Rom 8:22-39
25	Rom 9:1-21
26	Rom 9:22-10:13
27	Rom 10:14-11:12
28	Rom 11:13-36
29	Rom 12:1-21
30	Rom 13:1-14
31	Rom 14:1-23

date	Scripture
1	Rom 15:1-21
2	Rom 15:22-16:7
3	Rom 16:8-27
4	1 Korin 1:1-17
5	1 Korin 1:18-2:5
6	1 Korin 2:6-3:4
7	1 Korin 3:5-23
8	1 Korin 4:1-21
9	1 Korin 5:1-13
10	1 Korin 6:1-20
11	1 Korin 7:1-24
12	1 Korin 7:25-40
13	1 Korin 8:1-13
14	1 Korin 9:1-18
15	1 Korin 9:19-10:13
16	1 Korin 10:14-11:1
17	1 Korin 11:2-16
18	1 Korin 11:17-34
19	1 Korin 12:1-26
20	1 Korin 12:27-13:13
21	1 Korin 14:1-17
22	1 Korin 14:18-40
23	1 Korin 15:1-28
24	1 Korin 15:29-58
25	1 Korin 16:1-24
26	2 Korin 1:1-11
27	2 Korin 1:12-2:11
28	2 Korin 2:12-17
29	2 Korin 3:1-18
30	2 Korin 4:1-12
31	2 Korin 4:13-5:10

date	Scripture
1	2 Korin 5:11-21
2	2 Korin 6:1-13
3	2 Korin 6:14-7:7
4	2 Korin 7:8-16
5	2 Korin 8:1-15
6	2 Korin 8:16-24
7	2 Korin 9:1-15
8	2 Korin 10:1-18
9	2 Korin 11:1-15
10	2 Korin 11:16-33
11	2 Korin 12:1-10
12	2 Korin 12:11-21
13	2 Korin 13:1-14
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Efesus 1:1-23
23	Efesus 2:1-22
24	Efesus 3:1-21
25	Efesus 4:1-16
26	Efesus 4:17-5:2
27	Efesus 5:3-33
28	Efesus 6:1-24
29	Filipai 1:1-26
30	Filipai 1:27-2:18

date	Scripture
1	Filipai 2:19-3:6
2	Filipai 3:7-4:1
3	Filipai 4:2-23
4	Kolosi 1:1-20
5	Kolosi 1:21-2:7
6	Kolosi 2:8-23
7	Kolosi 3:1-17
8	Kolosi 3:18-4:18
9	1 Tesalonaika 1:1-2:9
10	1 Tesalonaika 2:10-3:13
11	1 Tesalonaika 4:1-5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitus 1:1-16
27	Taitus 2:1-14
28	Taitus 2:15-3:15
29	Filemon 1:1-25
30	Hibru 1:1-14
31	Hibru 2:1-18

date	Scripture
1	Hibru 3:1-19
2	Hibru 4:1-13
3	Hibru 4:14-5:14
4	Hibru 6:1-20
5	Hibru 7:1-19
6	Hibru 7:20-28
7	Hibru 8:1-13
8	Hibru 9:1-10
9	Hibru 9:11-28
10	Hibru 10:1-18
11	Hibru 10:19-39
12	Hibru 11:1-16
13	Hibru 11:17-31
14	Hibru 11:32-12:13
15	Hibru 12:14-29
16	Hibru 13:1-25
17	Jems 1:1-18
18	Jems 1:19-2:17
19	Jems 2:18-3:18
20	Jems 4:1-17
21	Jems 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Jon 1:1-10

date	Scripture
1	1 Jon 2:1-17
2	1 Jon 2:18-3:2
3	1 Jon 3:3-24
4	1 Jon 4:1-21
5	1 Jon 5:1-21
6	2 Jon 1:1-13
7	3 Jon 1:1-14
8	Jut 1:1-25
9	Nimbe Para Tilimu 1:1-20
10	Nimbe Para Tilimu 2:1-17
11	Nimbe Para Tilimu 2:18-3:6
12	Nimbe Para Tilimu 3:7-22
13	Nimbe Para Tilimu 4:1-11
14	Nimbe Para Tilimu 5:1-14
15	Nimbe Para Tilimu 6:1-17
16	Nimbe Para Tilimu 7:1-17
17	Nimbe Para Tilimu 8:1-13
18	Nimbe Para Tilimu 9:1-21
19	Nimbe Para Tilimu 10:1-11
20	Nimbe Para Tilimu 11:1-19
21	Nimbe Para Tilimu 12:1-18
22	Nimbe Para Tilimu 13:1-18
23	Nimbe Para Tilimu 14:1-20
24	Nimbe Para Tilimu 15:1-8
25	Nimbe Para Tilimu 16:1-21
26	Nimbe Para Tilimu 17:1-18
27	Nimbe Para Tilimu 18:1-24
28	Nimbe Para Tilimu 19:1-21
29	Nimbe Para Tilimu 20:1-15
30	Nimbe Para Tilimu 21:1-27
31	Nimbe Para Tilimu 22:1-21

*December*